


Tuhun Ndyoo sihin
tyehen ñi



New Testament in Mixtec, Chayuco (MX:mih:Mixtec, Chayuco)

Tuhun Ndyoo sihin tyehen ñi

New Testament in Mixtec, Chayuco (MX:mih:Mixtec, Chayuco)

copyright © 1979 Wycliffe Bible Translators, Inc.

Language: Mixtec, Chayuco

Translation by: Wycliffe Bible Translators, Inc.

Mixteco, Chayuco [mih], Mexico

Copyright Information

© 1979, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Chayuco

© 1979, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 4 Mar 2019 from source files dated 22 Dec 2018
4924062e-6bf2-54cb-87ed-9874f41e7991

Contents

SAN MATEO	1
SAN MARCOS	52
SAN LUCAS	83
SAN JUAN	137
HECHOS	175
ROMANOS	227
1 CORINTIOS	251
2 CORINTIOS	272
GÁLATAS	286
EFESIOS	294
FILIPENSES	302
COLOSENSES	308
1 TESALONICENSES	313
2 TESALONICENSES	318
1 TIMOTEO	321
2 TIMOTEO	327
TITO	332
FILEMÓN	335
HEBREOS	337
SANTIAGO	354
1 PEDRO	360
2 PEDRO	367
1 JUAN	371
2 JUAN	377
3 JUAN	378
JUDAS	379
APOCALIPSIS	381

Tuhun Vaha Sa I Tyaa Ra San Mateo

Ñiyivi sahnu sii ra Jesús

¹ Ihya cuu tandíhi ñiyivi sahnu sii ra Jesucristo, ra cu ñiyivi sii ra David ta sii ra Abraham.

² Ra Abraham i cuu zutu ra Isaac. Ta ra Isaac i cuu zutu ra Jacob. Ta ra Jacob i cuu zutu ra Judá ta yañi ra.

³ Ra Judá i cuu zutu ra Fares ta ra Zara. Tamar i sinañi zíhi ra. Ra Fares i cuu zutu ra Esrom. Ta ra Esrom i cuu zutu ra Aram.

⁴ Ra Aram i cuu zutu ra Aminadab. Ta ra Aminadab i cuu zutu ra Naasón. Ta ra Naasón i cuu zutu ra Salmón.

⁵ Ra Salmón i cuu zutu ra Booz. Ta Rahab nañi zíhi ra. Ra Booz i cuu zutu ra Obed. Rut nañi zíhi ra. Ta ra Obed i cuu zutu ra Isaí.

⁶ Ra Isaí i cuu zutu ra rey David. Ta ra rey David i cuu zutu ra Salomón vatyi i quihin ra sii ñazíhi ra Urías.

⁷ Ra Salomón i cuu zutu ra Roboam. Ta Roboam i cuu zutu ra Abías. Ra Abías i cuu zutu ra Asa.

⁸ Ra Asa i cuu zutu ra Josafat. Ta ra Josafat i cuu zutu ra Joram. Ta ra Joram i cuu zutu ra Uzías.

⁹ Ra Uzías i cuu zutu ra Jotam. Ta ra Jotam i cuu zutu ra Acáz. Ta ra Acáz i cuu zutu ra Ezequías.

¹⁰ Ra Ezequías i cuu zutu ra Manasés. Ta ra Manasés i cuu zutu ra Amón. Ta ra Amón i cuu zutu ra Josías.

¹¹ Ta ra Josías i cuu zutu ra Jeconías sihin yañi ra quívi i sicoo cuatyí ta i quihin ñiyivi sii ñu hebreo sindyaca ra sii tandíhi ñu ndya ñuu Babilonia cua cuu ñu muzu ñiyivi indyacuan.

¹² Yaha cuan ta ziquí ra Jeconías i cuu zutu ra Salatiel. Ta ra Salatiel i cuu zutu ra Zorobabel.

¹³ Ta ra Zorobabel i cuu zutu ra Abiud. Ta ra Abiud i cuu zutu ra Eliaquim. Ta ra Eliaquim i cuu zutu ra Azor.

¹⁴ Ta ra Azor i cuu zutu ra Sadoc, ta ra Sadoc i cuu zutu ra Aquim. Ta ra Aquim i cuu zutu ra Eliud.

¹⁵ Ra Eliud i cuu zutu ra Eleazar. Ra Eleazar i cuu zutu ra Matán. Ra Matán i cuu zutu ra Jacob,

¹⁶ ta ra Jacob i cuu zutu ra José yíi ña María. Ta maa ña i cuu zíhi ra Jesús ra sa nañi Cristo.

¹⁷ Ndyá quívi ra Abraham ta ndya ra David i sicoo usi cumi tahan ra sahnu sii ra Jesús cuhva vasi tata ra. Ta ndya quívi ra David ta ndya quívi i sindyaca ñiyivi sii tandíhi ñu hebreo ndya ñuu Babilonia i sicoo inga usi cumi tahan ra sahnu sii ra Jesús cuhva vasi tata ra. Ta i sicoo inga usi cumi tahan ra ndya ta sa yaha sahan ñu ñuu Babilonia ta ndya quívi i cacu ra Jesús.

Cuhva i cacu ra Jesucristo

¹⁸ Ihya cuu cuhva i cacu ra Jesucristo. Sa cundaa tyiño ña María zíhi ra Jesús sihin minoo ra sa nañi José, zoco cumañi ca ndu-ín ñu ta i sito ña vatyi sa ñihi ña minoo zehe sa cuenda Tatyí li maa ra Ndyoo.

¹⁹ Ta ra José, ra cua cuu yíi ña, i cuu ra minoo ra ndoo xaan, ta ñá cuñi ra zandoo ra sii ña minoo cuhva sa cua cahan xaan ñiyivi sii ña. I cuñi ra vatyi cua natani xehe tutu ñu.

²⁰ Zoco cuhva sa nacañi xaan iñi ra yozo caa cua zavaha ra, i quituu minoo ángel ra Ndyoo nuu ra sisi ñimahna, ta i catyi ángel cuan sihin ra: José, ñiyivi sii ra David, ma yuhun ta cuhun sii ña María sa cuu ña ñazihun vatyi zehe ña sa cua cacu cuu zehe Tatyí li ra Ndyoo.

²¹ Cua cacu zehe ña. Ta cua cunañi ra Jesús vatyí cua zandasi ra cuatyí ñiyivi cuñi sii ra. Tacuan i catyí ángel.

²² Ta i cuu tandihí cuhva ya vatyí cua quita si tañi cuhva i catyí ra Ndyoo quivi i cahan minoo ra profeta ta i catyí ra:

²³ Minoo ñaha yoco, cua ñihi ña minoo zehe, ta rayíi cua cuu zehe ña.

Emanuel cua cunañi ra.

Zívi Emanuel cuan cuñi si catyí si: Ra Ndyoo ndyaa sihin yo.

²⁴ Ta cuhva sa ndoyo ra José i zavaha ra cuhva i catyí ángel cuan sihin ra. I quihin ra sii ña María sa cuu ña ñazihí ra.

²⁵ Zoco ñá quixi ra sihin ña ndya sa cacu zehe nuu ña. Ta i zacunañi ra sii ra Jesús.

2

Zuhva ra sito xaan cahvi, i quisi ndyehe ra sii ra Jesús

¹ I cacu ra Jesús ñuu Belén nu cu si Judea quivi i cuu ra Herodes rey yucuan. Ta ñuu Jerusalén i saa zuhva ra sito xaan cahvi. Mago nañi ra. Ityí caña ñicandyí i quisi ra.

² Ta i ndaca tuhun ra: ¿Ndyamaa iyo ra i cacu sa cuu ra rey cuenda ñiyivi hebreo? Ityí caña ñicandyí ndyaa ndi, ta i ndyehe ndi minoo tiño sa cuu cuenda ra. Ta vasi ndi vatyí cua zacahnu ndi sii ra. Catyí ra.

³ I ñihi ra rey Herodes tuhun ya, ta sica xaan iñi ra ta tacuan tucu tandihí ñiyivi ñuu Jerusalén.

⁴ I cana ra Herodes sii tandihí ra zutu nahnu ta ra cu maestro cuenda ley, ta i ndaca tuhun ra sii ra ndyamaa tahan si cacu ra Cristo.

⁵ Ta i nacatyí ra cuan sihin ra: Cua cacu ra ñuu Belén nu cu si Judea vatyí tyehen i tyaa minoo ra profeta ta sa naha:

⁶ Yoho ñuu Belén nu cu si Judea, ña luhlu ca moo ta ziquí tandihí inga ca ñuu nu cu si Judea.

Vatyí ñuu Belén cua cacu minoo ra cua cundyaca ñaha, ta cua zacuenda ra sii ñu hebreo, ñiyivi mi.

Tacuan catyí Tuhun Ndyoo nacatyí ra cuan sihin ra Herodes.

⁷ Ta ziquí xehe ñi i cana ra Herodes sii ra mago cuan, ta i ndaca tuhun ra sii ra ñaa cuhva quituu tiño cuan.

⁸ Ta ziquí i tasi ra sii ra ndya ñuu Belén, ta catyí ra: Nanducu vaha xaan ndo sii ra luhlu cuan. Ta tatu sa nañihi ndo sii ra, zacoto ndo sii, vatyí cua cahun tuquí, ta cua zacahni sii ra.

⁹ Ta sa siñi ra mago cuan sa i catyí rey cuan, i quihin ra ityí cuahan ra. Ta tiño sa i ndyehe ra ityí caña ñicandyí, cuahan ti ityí nuu ra ndya i saa ti ta sicuiñi ti nu ndyaa lee cuan.

¹⁰ Ta sa i ndyehe ra mago vatyí i sicuiñi tiño cuan, zii xaan i cuñi ra.

¹¹ Ta i quihvi ra sisi vehe, ta i ndyehe ra sii lee cuan sihin ña María zihí ra. Ta i sicuiñi siti ra, ta zacahnu ra sii ra Jesús. Ta ziquí i nuña ra ndaha tyiño ra, ta i saha maa ra xuhun cuaan, ta cutu ta ndutya vixi.

¹² Ta sa yaha ndyehe ra sii ra Jesús, ta ziquí ziiñ ityí i cua nuhu ra ndya ñuu ra vatyí i zacoto minoo ángel ra Ndyoo sii ra sisi ñimahna vatyí ma cunanuhu ra nu ndyaa ra Herodes.

Sino ña María ta ra José ndya nu cu si Egipto

¹³ Cuahan ra mago cuan ta ziquí i quituu minoo ángel ra Ndyoo nuu ra José sisi ñimahna, ta i catyí si: Nduvita ta cahun sii ra luhlu ta sii zihí ra, ta cahun ndo ndya Egipto. Yucuan ndoo ndo ndya quivi cua catyí sihin ndo vatyí cuñi cahñi ra Herodes sii ra luhlu.

¹⁴ Tacuan i catyí ángel cuan ta i nduvita ra José, ta i quihin ra sii ra luhlu ta sii zihí ra. Ta zuun ñi sa cuaa cuan i quita ñu ta cuahan ñu ndya Egipto.

¹⁵ I ndoo ñu yucuan ndya i sihi ra rey Herodes. Cuhva ya i cuu si vatyi tacuan ta cua quita si kuhva i catyi minoo ra profeta nu i catyi ra kuhva i nacatyi maa ra Ndyoo: “Cua nacane sii Zehi ndya Egipto.” Catyi ra.

Tava ra Herodes tyiño vatyi cua cuu tandihi ra ndyih

¹⁶ Quivi i sito ra Herodes vatyi sacu ndyaa ra mago sii ra, ta ñá zavaha ra kuhva i catyi ra, yaha xaan i cuxaan ra. Ta i tava ra tyiño vatyi cahñi zandaru sii tandihi ra ndyih sa uu cuiya ta sa ndyih ca ñuu Belén ta inga ñuu ndyaa yatyi. Tacuan i zavaha ra vatyi tañi tacuan cuu cuiya ra Jesús sica iñi ra sa cuenda kuhva i catyi ra mago cuan sihin ra.

¹⁷ Ta kuhva i sahñi ra Herodes sii ra ndyih, i quita si kuhva i tyaa ra Jeremías, minoo ra profeta ta sa naha. Tyehen i tyaa ra:

¹⁸ I quita minoo nduzu ñihi nu cu si Ramá.

Sacu xaan ñiyivi, ta sacu saa ñu.

Maha Raquel sacu sa cuenda zehe ña, ta ma cutaxi ña vatyi yoñi ca si.

I catyi Tuhun Ndyoo vatyi cua cuu si kuhva cuan. Ta zuun ñi kuhva cuan i quita si.

¹⁹ Ta sa yaha sihi ra Herodes, ta i quituu tucu minoo ángel ra Ndyoo ityi nuu ra José sisi ñimahna nu ndyaa ra Egipto, ta i catyi si sihin ra:

²⁰ Nduvita ta kuhun sii ra luhlu ta sii zihhi ra ta cunanuhu ndo ndya Israel vatyi sa sihi ra cuñi cahñi sii ra luhlu.

²¹ Tacuan i catyi ángel cuan, ta i nduvita ra José, ta i quihin ra sii ra luhlu ta sii zihhi ra, ta i sinanuhu ñu ndya Israel.

²² Zoco i ñihi ra José tuhun vatyi ndyaca ñaha ra Arquelao nu cu si Judea sa cuenda ra Herodes zutu ra, ta i yuhu xaan ra José kuhun ra yucuan. Ta i cahan tucu ángel sihin ra sisi ñimahna, ta yucuan cuenda cuahan ñu ndya nu cu si Galilea.

²³ Ta sa saa ñu yucuan, i ndoo ñu ñuu Nazaret. Ta kuhva cuan i quita si tañi catyi minoo ra profeta vatyi i catyi ra vatyi cua catyi ñiyivi vatyi minoo ra nazareno cuu ra Jesús.

3

Cuhva i cahan ra Juan, ra i zacoo ndutya sii ñiyivi

¹ Quivi cuan i quisi ra Juan, ra zacoo ndutya sii ñiyivi, ndya nu cu si Judea. Minoo nu ityi xaan nu yoñi maa ñiyivi iyo i saa ra, ta i nacatyi ra Tuhun Ndyoo sihin ñiyivi i saa nu ndyaa ra.

² Ihya cuu kuhva i catyi ra: Zama ndo kuhva iyo ndo vatyi sa cuñi saa quivi cundyaca ñaha ra Ndyoo ihya ñuu ñiyivi. Catyi ra.

³ Ta ra Juan cuu ra i cahan ra Isaías tuhun quivi i tyaa ra tuhun i saha ra Ndyoo sii ra, ta i catyi ra:

Cua cuñi ndo nduzu minoo ra cana saa minoo nu ityi xaan.

Ta catyi ra cuan: “Tañi zanduvaha ndo minoo ityi,

tacuan zanduvaha ndo aña ndo vatyi cua quisi ra ndyaca ñaha sii yo.

Tañi zandundoo ndo ityi, tacuan zama ndo kuhva iyo ndo.”

Tacuan i tyaa ra Isaías ta sa naha sa cuenda ra Juan, ra cua quisi cuee ca.

⁴ Ta ra Juan cuan, siñoho ra zahma ixi camello. Ta sinuhñi zinda ñi sisi ra. Ta i sasi ra minoo nuu quiti tañi tica, ta sihi ra tyahiñu ñuñu.

⁵ Ñiyivi ñuu Jerusalén ta tandihi yuñuu Judea ta ñu ndyaa yatyi yuu Jordán, cuahan ñu cua tyizoho ñu sa cahan ra Juan.

⁶ Ta sa yaha nahma ñu cuatyi ñu, ta i zacoo ndutya ra Juan sii ñu yuu Jordán cuan.

⁷ I ndyehe ra Juan vatyi saa cuaha xaan ra fariseo sihin ra saduceo vatyi cuñi ra coo ndutya ra, ta i catyi ra Juan sihin ra: ¿Ñiyivi quiñi xaan iyo cuu ndo tañi coo! ¿Yoo sa catyi sihin ndo vatyi cuu cacu ndo sihin kuhva sa cua tasi tuñi ra Ndyoo sii ñiyivi?

⁸ Cuñi si sa zama ndisa cuii ndo kuhva iyo ndo, ta zavaha ndo sa vaha.

⁹ Ta ma caca iñi ndo sihin aña ndo vatyi ra Abraham cuu zutu ndo, ta ma caca iñi ndo vatyi maa ra cua zacacu sii ndo. Ma zacahnu ndo sii ndo vatyi vazu sihin yuu ya, ta cuu zavaha ra Ndyoo ñiyivi sii ra Abraham sihin si.

¹⁰ Tañi yutu ña saha siti cuu maa ndo vatyí ña zavaha ndo cuhva cuñi ra Ndyoo. Ta yutu sa ña saha siti, sahdya ñiyivi sii tu. Ta sahmi ñu sii tu. Ta zuun ñi cuhva cuan cua cuhun maa ndo nu cayu ñúhu.

¹¹ Ndisa zacoo ndutye sii ndo sihin ndutya tatu zama ndo cuhva iyo ndo. Zoco vasi inga ra cahnu ca ta ziqui mi. Ña tahan si sii, nu sa cui muzu ra ta cuize ndisa ra, zoco zuun ñi maa ra i saha tyiño sii. Ta maa ra cua zacoo ndutya sii ndo sihin Tatyí Ii ta sihin ñúhu.

¹² Sa ndaha ra pala ra ta cua zanduvii ra siti trigo ra, ta cua tava ziiin ra zoo si. Cua zandu-iin ra sii trigo ra, ta cua cucumi vaha ra sii si, ta cua cahmi ra zoo si sisi minoo ñúhu sa ma ndahva. Tacuan i catyí ra Juan sihin ñiyivi.

Cuhva i sicoo ndutya ra Jesús

¹³ Tacuan ta i quita ra Jesús nu cu si Galilea, ta i quisi ra ndya yuu Jordán nu ndyaa ra Juan vatyí cuñi ra sa cua zacoo ndutya ra Juan sii ra.

¹⁴ Ta ñá cuñi ra Juan zacoo ndutya sii ra vatyí catyí ra: Tahan si sa zacoo ndutya moo sii mi. ¿Ta ñaa cuenda catyun sa zacoo ndutye suun?

¹⁵ Zoco i catyí ra Jesús sihin ra: Nacuu si cuhva catyí suhun vityí vatyí tacuan cuñi si zavaha yo tandihi cuhva ndoo, cuhva cuñi ra Ndyoo. Tacuan i catyí ra Jesús, ta ziqui i ndoo ra Juan vaha.

¹⁶ Ta sa yaha i sicoo ndutya ra Jesús, ta i quita ra sisi ndutya cuan. Ta zuun ñi caa cuhva cuan i nuña andivi, ta i ndyehe ra Jesús Tatyí Ii ra Ndyoo. Noo si tañi noo minoo paloma ziqui ra.

¹⁷ Ta tacuan ta i cahan minoo ra cahan sisi andivi ta i catyí ra: Ihya cuu zehi. Cuñi xein sii ra. Zii xaan cuñi sihin ra.

4

Cuhva i nducu coto ihñi cuihna sii ra Jesús atu tyaa ra yahvi sii Ndyoo a sii cuihna

¹ Ta ziqui i sindyaca Tatyí Ii sii ra Jesús minoo nu ityi xaan nu yoñi maa ñiyivi iyo vatyí cua nducu coto ihñi cuihna sii ra.

² Ta ñá sasi ra Jesús uu xico quivi ta uu xico sa cuaa, ta ziqui i sizoco ra.

³ Ta cuhva cuan i tuhva cuihna sii ra vatyí cua nducu coto ihñi ra sii ra, ta catyí ra: Tatu ndisa vatyí Zehe ra Ndyoo cuu suun, catyun sihin yuu sa catuu ihya vatyí nanduu si pan.

⁴ Zoco i nacahan ra Jesús ta catyí ra: Catyí Tuhun Ndyoo vatyí ña maa sihin sa casi ñi yo cundito yo. Sihin sa sasi yo ndito coño ñuhu yo, zoco sihin sa tyaa yo yahvi tuhun cahan ra Ndyoo ta ndito añima yo sa ndisa cuii. Catyí ra Jesús sihin cuihna.

⁵ Tacuan ta i sindyaca cuihna sii ra Jesús ndya ñuu Jerusalén. Ta i zandaa ra sii ra xiñi vehe ñuhu cahnu. Ta i catyí ra sihin ra Jesús:

⁶ Tatu ndisa vatyí Zehe ra Ndyoo cuu suun, ndavon ndya nu ñuhu vatyí catyí Tuhun Ndyoo: “Cua cuhva ra Ndyoo tyiño sii ángel ra vatyí zacuenda ra suun. Cua naqueen ra suun sihin ndaha ra, ta ma ñicuehe sohon sihin minoo yuu.”

⁷ Tacuan i catyí cuihna, ta i catyí ra Jesús sihin ra: Catyí tucu Tuhun Ndyoo vatyí ma nducu coto ihñi ndi sii ra Ndyoo ra ndyaca ñaha sii ndi.

⁸ Yaha cuan ta i sindyaca cuihna sii ra Jesús xiñi minoo yucu zucu xaan, ta i zañaha ra tandihi ñuu ñiyivi sii ra ta cuhva sa tyaqui xaan caa si.

⁹ Ta i catyí ra sihin ra Jesús: Ndaha mi ndyaa tandihi ya vatyí saha ra Ndyoo sa cundyaca ñehi tandihi ñuu ñiyivi ya. Ta cua cuhve tandihi si suun tatu cua cuiñi situn nui ta zacahnun sii. Catyí cuihna.

¹⁰ Zoco i catyí ra Jesús sihin ra: Cuiñi siyo suun sii, cuihna vatyí catyí Tuhun Ndyoo vatyí iin ñi sii maa ra Ndyoo ra ndyaca ñaha sii ndi cua zacahnu ndi. Ta iin ñi tyiño maa ra cua zacuu ndi. Catyí ra Jesús sihin cuihna.

¹¹ Ta ziqui i zandoo cuihna sii ra Jesús, ta i quisi tyindyee ángel sii ra.

I quisaha ra Jesús zatyíño ra tyiño ra Ndyoo nu cu si Galilea

¹² Quivi i ñihi ra Jesús tuhun vaty i tyihi ñiyivi sii ra Juan vehe caa, i quita ra yucuan ta cuahan ra ndya Galilea.

¹³ Zoco ñá ndoo ra ñuu Nazaret. Cuahan ra cua cundyaa ra ñuu Capernaum. Minoo ñuu sa ndyaa yaty ñi yuhu miñi yaty nu cu si Zabolón ta Neftalí cuu si.

¹⁴ Tacuan i cuu si vaty cua quita si cuhva i tyaa ra Isaías, minoo ra profeta ta sa naha. Tyehen i tyaa ra Isaías:

¹⁵ Nu cu si Zabolón ta Neftalí, ityi cuahan yo miñi tatu sa yaha yo yuu Jordán, yucuan cuu nu cu si Galilea nu ndyaa ñiyivi sa yivi ñiyivi hebreo cuu.

¹⁶ Ñiyivi cuan sicoo ñu nu ñaa xaan, zoco i ndyehe ñu minoo ñúhu ndisi xaan. Quivi cuan cua cuu cuii ñu, zoco i zandundisi ñúhu cuan nu ndyaa ñu.

¹⁷ Ndy quivi i quihvi ra Jesús Galilea, ta i quisaha nacaty ra Tuhun Ndyoo sihin ñiyivi. Tyehen i catyi ra: Zandoo ndo cuaty ndo, ta zama ndo cuhva iyo ndo vaty sa cuñi saa quivi cua cundyaca ñaha ra Ndyoo ñuu ñiyivi.

Cuhva i cana ra Jesús sii cumi tahan ra tñin tyiyaca

¹⁸ Ta i sica noo ra Jesús yuhu miñi Galilea. Ta i ndyehe ra sii uu tahan ra sihin yañi ra. Minoo ra nañi ra Simón, ta Pedro nañi tucu ra. Ta inga ra nañi ra Andrés. Cañi ra traya ra nu ndutya vaty yucuan cuu tyiño i zacuu ra.

¹⁹ Ta i catyi ra Jesús sihin ra: Coho ndo sihin, ta cua cuhve cuhva nducu ndo sii ñiyivi tañi cuhva nducu ndo sii tyiyaca. Tacuan i catyi ra Jesús sihin ra.

²⁰ Ta ta sica ñi i zandoo ihno ra traya ra, ta cuahan ra sihin ra Jesús.

²¹ Ta i sica ra Jesús zuhva ca sihin ra ityi nuu ca ta i ndyehe ra sii ra Jacobo sihin ra Juan zehe ra Zebedeo. Ñoho ra minoo barco sihin zutu ra. Nazuhva ra traya ra. Ta i cana ra Jesús sii ra.

²² Ta zuun ñi caa cuhva cuan i zandoo ra sii zutu ra sihin barco ra, ta i sindyico ra sii ra Jesús.

Zacuaha ra Jesús sii cuaha xaan ñiyivi

²³ Sica noo ra Jesús nacahnu Galilea. Zacuaha ra sii ñiyivi sisi vehe ñuhu tahan tahan ñuu. Ta nacaty ra Tuhun Vaha sihin ñiyivi cuhva cua cundyaca ñaha ra Ndyoo. Ta i zanduvaha ra sii ñiyivi cuhu tandihi cuii nuu cuehe.

²⁴ I sito ñiyivi tuhun ra Jesús nacahnu Siria. Ta i quisi ndyaca ñu sii tandihi ñu cuhu zñin zñin nuu cuehe a tatu iyo sa uhu sii ñu. Ta i quisi ndyaca ñu sii ñu ñoho taty cuihna, ta ñu cuhu cuehe meme, ta ñu xii. Ta i zanduvaha ra Jesús sii ñu.

²⁵ Ta cuaha xaan ñiyivi sa ndyaa Galilea i sindyico ñu sii ra. Ta tacuan tucu ñiyivi ñuu Decápolis, ta ñuu Jerusalén ta nacahnu Judea ta ñiyivi ndyaa inga siyo yuu Jordán ndihi ca.

5

Cuhva i sahan ra Jesús xiñi minoo yucu ta i zacuaha ra sii ñiyivi

¹ I ndyehe ra Jesús vaty cuaha xaan ñiyivi, ta i ndaa ra minoo yucu, ta i sicundyaa ra yucuan. Ta i siconduu i sicundyaa ñiyivi ndyico sii ra nu ndyaa ra.

² Ta i quisaha zacuaha ra Jesús sii ñu, ta tyehen catyi ra:

Ñiyivi sa zñi xaan cuñi

³ Sa iyo sa vaha sii ñiyivi vityi tatu sa sito ñu vaty siñi ñuhu ra Ndyoo sii ñu vaty tahan si sii ñu sa cundyaca ñaha ra Ndyoo sii ñu.

⁴ Sa iyo sa vaha sii ñiyivi cuihya iñi vityi vaty cua zanaa ra Ndyoo tucuihya iñi sii ñu.

⁵ Sa iyo sa vaha sii ñiyivi zanduluhlu sii, vaty cuee ca cua cuhva maa ra Ndyoo sa cundyaca ñaha ñu ñuu ñiyivi ya.

⁶ Sa iyo sa vaha sii ñiyivi cuñi xaan zavaha tandihi sa ndoo, cuhva cuñi ra Ndyoo vaty cua tyindyee ra Ndyoo sii ñu, ta cua cuu xaan zavaha ñu sa vaha.

⁷ Sa iyo sa vaha sii ñiyivi cundahvi iñi sii inga ñiyivi vaty Ndyoo cua cundahvi xaan iñi ra sii maa ñu.

⁸ Sa iyo sa vaha sii ñiyivi sa ñahñi cuaty iyo añima vaty cua ndyehe ñu sii maa ra Ndyoo.

⁹ Sa iyo sa vaha sii ñiyivi nducu cuhva zacoo sa taxi nu iyo cuaty vaty cua catyi ra Ndyoo vaty zehe maa ra cuu sii ñu.

¹⁰ Sa iyo sa vaha sii ñiyivi tatu zandyehe inga ñiyivi tundoho sii ñu sa cuenda sa vaha sa zavaha ñu. Ndisa vaty sa ndyaca ñaha ra Ndyoo sii ñu.

¹¹ Sa iyo sa vaha sii ndo tatu quiñi xaan cahan ñiyivi sihin ndo sa cuenda mi ta tatu zavaha xaan ñu sa ndya vaha ñi sihin ndo ta tatu cahan ñu ndya vaha ñi sii ndo ta ña ndisa cuu si.

¹² Cuzii xaan iñi ndo tatu tacuan zavaha ñu sihin ndo vaty cahnu xaan sa vaha cua ñihi ndo andivi vaty zuun ñi cuhva ña vaha cuan i zavaha ñiyivi sihin ra profeta quivi cumañi ca cacu maa ndo.

Taño ñii ta ñuhu cuu maa yo ñuu ñiyivi ya

¹³ Maa ndo cuu taño ñii sa cuenda ñuu ñiyivi ya. Zoco tatu ña uhva ca ñii, ¿yozo caa tyindyee si? Tatu ña uhva ca si ña vaha ca si. Zavita yo sii si, ta cuañi ñiyivi ziqui si.

¹⁴ Maa ndo cuu taño ñuhu sa cuenda ñuu ñiyivi ya. Tatu ndyaa minoo ñuu xiñi minoo yucu ma cuu sa cundyaa xehe si.

¹⁵ Ta ña tuhva ñiyivi tyaa minoo lámpara ta tyihi ñu sii si xu minoo cajón. Ña tacuan vaty zucu tyaa ñu sii si, ta zandisi si sa cuenda tandihi ñiyivi yucu vehe.

¹⁶ Tacuan tucu maa ndo, zavaha ndo sa vaha ityi nuu ñiyivi, ta cua ndyehe ñu tyiño ndo, ta cua zacahnu ñu sii Zutu mañi yo, ra ndyaa andivi.

Cuñi si sa tyaa yo yahvi sii ley ra Ndyoo

¹⁷ Ma caca iñi ndo vaty yuhvi vasi zanei cuhva tyaa ñiyivi yahvi sii ley ra Ndyoo sa i tyaa ra Moisés a cuhva i tyaa ra profeta. Ña vasi zandihí cuhva iyo sii si cuan. Vasi ta tyei yahvi sii tandihí sa catyi tuhun cuan.

¹⁸ Sa ndisa catyi sihin ndo vaty nii ñi sa iyo andivi ta ñuhu ñuu ñiyivi, ma naa nu siin cuhva iyo sii ley ra Ndyoo. Tandihí sa catyi ley sa tahan si cuu, ta cua cuu si.

¹⁹ Yucuan cuenda yoo ra ma zavaha minoo ley ra Ndyoo, vazu ley luhlu cuu ley cuan, ta tatu cua nacaty tucu ra sihin ñiyivi vaty ma zavaha ñu sii si, ra zavaha cuhva cuan cua cuu ra ra luhlu ca nu ndyaca ñaha ra Ndyoo. Zoco ra zavaha sii si ta zacuahá ra sii inga ñiyivi vaty tahan si zavaha ñu sii si, minoo ra cahnu cua cuu ra nu ndyaca ñaha ra Ndyoo andivi.

²⁰ Vaty catyi sihin maa ndo vaty tatu ma zavaha ndo sa ndoo ca ta zavaha ndo taño ra maestro cuenda ley ta ra fariseo, nu yozo cui ca ta ma cuu quihvi ndo nu ndyaca ñaha ra Ndyoo.

Ña vaha cuxaan yo sihin ñiyivi

²¹ Sa siñi ndo cuhva i catyi ra Ndyoo sihin ñiyivi ta sa naha. I catyi ra: “Ma cahñi ndo sii ñiyivi. Yoo ra cua cahñi sii minoo ñiyivi, tahan si sa cutuñi ra.”

²² Zoco yuhvi catyi sihin ndo tatu cuxaan ndo sihin minoo ñiyivi, tahan si sa tasi tuñi ra Ndyoo sii ndo. Ta tatu cahan cuehe ndo sii minoo ñiyivi, tahan si sa tasi tuñi ra cu tyiño sii ndo. A tatu catyi ndo vaty laa xaan minoo ñiyivi, coto vaha ndo coto cuhun ndo andyaya.

²³ Yucuan cuenda quivi cuhun vehe ñuhu ta ndohon ofrenda sa cua cuhvon sii ra Ndyoo, tatu nacohon iñun vaty iyo sa zavohon sii inga ñiyivi

²⁴ zandoon sa cua cuhvon sii ra Ndyoo yucuan. Ta cuhun xihnon ta ndacon tucahnu iñi sii ñu cuan, ta nacoo vohon sihin ñu, ta ziqui cuhun ta cuhvon ofrendon sii ra Ndyoo.

²⁵ Tatu iyo ra sica cuaty sohon, ta cuahan ra suhun nu ndyaa juez, nducun cuhva nacoo vohon sihin ra ityi cuahan ndo coto nacuhva cuenda ra suun sii ra juez. Ta ra juez cua nacuhva cuenda suun sii policía, ta cua tyihi ra cuan suun vehe caa.

²⁶ Ta sa ndisa catyi suhun vaty tatu tacuan cua cuu, ma quiton ndya tyiyahvun tandihí sa tahan si tyiyahvun.

Nacatyí ra Jesús vatyí ña vaha caca iñi rayíi ndyehe ra inga ñaha tatu yívi ñazíhi ra cuu

²⁷ Sa siñi maa ndo tuhun i catyí ra Ndyoo ta sa naha vatyí ma cuu coo inga ñaha ndo ta ma cuu coo inga yíi ndo.

²⁸ Zoco yuhvi catyí sihin ndo vatyí tatu ndyehe ndo sii minoo ñaha ta cuñi ndo sii ña, sa zavaha ndo cuatyí sa cuu adulterio sihin ña sisi añima ndo cuu si cuhva cuan.

²⁹ Ta tatu ndyehe ndo minoo sa ndyehe ndo ta sa cuenda si ta cuñi xaan ndo zavaha ndo sa ña vaha, ma ndyehe ca ndo sii si coto coo cuatyí ndo ta cuhun ndo andyaya.

³⁰ A tatu iyo sa tuhva ndo zavaha sihin ndaha ndo ta sihin si cuan quisaha coo cuatyí ndo, ma zavaha ca ndo sii si inga saha coto cuhun ndo andyaya.

Ma cuu zandoo rayíi sii ñazíhi ra ta tani tutu ñu

³¹ Ta catyí tucu Tuhun Ndyoo sihin ñiyívi ta sa naha: “Yoo ra cuñi zandoo sii ñazíhi, cuñi si sa nducu ra cuhva tani tutu ñu sihin ley.”

³² Zoco yuhvi catyí sihin ndo vatyí tatu iyo minoo ra cua nducu ra cuhva tani tutu ra sihin ñazíhi ra ta ñahñi cuatyí ña iyo sihin inga rayíi, zoco cua coo cuatyí adulterio sii ña tatu zandoo yíi ña sii ña ta quihin ña sii inga rayíi. Ta ra cua tindaha sihin minoo ñaha zandoo yíi sii, zavaha tucu maa ra cuatyí adulterio cuan.

Ña vaha sa tyiñaha yo Ndyoo

³³ Ta sito tucu ndo vatyí i catyí ra Ndyoo sihin ñiyívi ta sa naha vatyí tatu sa tyiñaha ñu Ndyoo, cuñi si sa zavaha ñu cuhva catyí ñu.

³⁴ Zoco yuhvi catyí sihin ndo vatyí ma cuaha xaan cahan ndo tatu cuñi ndo sa cua sino iñi ñiyívi sa cahan ndo. Ma catyí ndo: “Sito vaha Ndyoo.” Ma cahan ndo tuhun andívi vatyí yucuan cuu nu ndyaa maa ra Ndyoo.

³⁵ Ma cahan ndo tuhun ñuu ñiyívi vatyí yucuan cuu nu sañi saha ra. Ta nu tuhun ñuu Jerusalén ta ma cahan ndo vatyí yucuan cuu ñuu ra Ndyoo, ra rey cahnu.

³⁶ Ta nu tuhun xiñi ndo ta ma catyí ndo, vatyí maa ndo ta ma cuu zanducuisi ndo a zandutoon ndo numinoo ixi xiñi ndo sa ndisa.

³⁷ Cuenda catyí ñi ndo: “Ndisa.” A catyí ndo: “Yívi.” Ta ñahñi ca sa cua cahan ndo. Tatu ñaa ca sa tuhva ndo cahan, zañaha si vatyí ña ndisa ndo.

Ma zavaha yo sa ña vaha sihin ñiyívi zavaha sa ña vaha sihin yo

³⁸ Sa siñi tucu ndo cuhva i tyaa ra Moisés ta sa naha nu catyí si vatyí tatu cañi ñiyívi sii ndo ta zatívi ñu minoo siti nuu ndo cuñi tucu si sa zatívi minoo ra cu tyiño siti nuu ñu. A tatu coco ñu minoo noho ndo, zuun ñi sihin cuhva cuan cua ndoho maa ñu, ta cua quita minoo noho ñu.

³⁹ Zoco yuhvi catyí sihin ndo: Ma zavaha ndo sa ña vaha sihin ñiyívi zavaha sa ña vaha sihin ndo. Tatu iyo ra cati minoo siyo xitun, cuhva ndihun inga siyo nacati ra.

⁴⁰ A tatu iyo ra tyaa cuatyí saton nuu ra cu tyiño ta ñahñi cuatyun ta cuñi ra quindyaa ra camison, cuhva ndihun siqueton sii ra.

⁴¹ A tatu yoo ra zañiñi suun sa cuizon carga ra minoo kilómetro, cuizon sii si uu kilómetro.

⁴² Cuhvon sii yoo ra sica suun, ta tatu cua caca noo ñiyívi sa suun, ma catyun vatyí ma cuhvon.

Cuñi si sa cuñi yo sii ñiyívi xaan iñi sii yo

⁴³ Ta sa siñi ndo cuhva tuhva ñiyívi catyí vatyí catyí ñu vatyí nacuñi xaan yo sii ra tahan yo, ta nacuxaan xaan yo ndyehe yo sii ra xaan iñi sii yo.

⁴⁴ Zoco yuhvi catyí sihin ndo vatyí cuñi ndo sii ñu xaan iñi sii ndo. Vaha cahan ndo sihin ñiyívi cahan ndya vaha ñi sihin ndo. Zavaha ndo sa vaha sihin ñiyívi ña cuu ndyehe sii ndo. Ta cahan ndo sihin ra Ndyoo cuenda ñiyívi cahan cuehe sii ndo ta ñu zavaha sa ña vaha sihin ndo.

⁴⁵ Tatu zavaha ndo tacuan, cua cuu ndo zehe ra Ndyoo Zutu yo sa ndisa cuii, ra ndya andívi, vatyí maa ra i tyaa ñicandyi, ta zandisi si nu yucu ñiyívi ña vaha ta ñiyívi vaha. Ta zacon ra zavi ziqui ñu vaha ta ziqui ñu ña vaha.

⁴⁶ Tatu iin ñi sii ñiyivi cuñi sii ndo cuñi tucu ndo, ñahñi sa vaha zavaha ndo cuhva cuan vaty tacuan tucu zavaha ñiyivi quiñi iyo tañi ra tava xuhun cuenda ra ndyaca ñaha. (Ta quiñi xaan iyo ra cuan cuñi maa ndo.)

⁴⁷ Ta tatu saha ndo ndyoo nacucumi iin ñi sii ra tahan ndo, ¿ña sa vaha zavaha ndo cuhva cuan? Ndy ñiyivi ña sito sii ra Ndyoo ta cahan ñu sihin tahan ñu cuhva cuan.

⁴⁸ Cuu ndo ñiyivi ñahñi maa cuaty. Tañi Zutu yo, ra ndyaa andivi, vaty ñahñi maa cuaty ra iyo caña ñi.

6

Nacaty ra Jesús yozo caa tahan si cuhva yo caridad sii ñiyivi

¹ Ma zavaha ndo sa vaha nuu ñiyivi ñi vaty cuñi ndo sa ndyehe ñu. Tatu tacuan zavaha ndo, ñahñi sa cua cuhva Zutu yo, ra ndyaa andivi, sii ndo.

² Yucuan cuenda tatu tyindyee ndo sii ñu ndahvi, ma nacaty ndo sihin tandihi ñiyivi tañi zavaha ra sahan vehe ñuhu ta nuyahvi ta zaha ra tuhun vaty vaha xaan ra. Zavaha ra sa vaha vaty cuñi ra sa cua zacahnu ñiyivi sii ra. Ta sa ndisa caty sihin ndo vaty sihin sa yucuan ñi ta sa ñihi ra sa vaha. Ñahñi ca sa cua cuhva maa ra Ndyoo sii ra.

³ Zoco tatu zavaha maa ndo tumañi iñi sii ñiyivi ndahvi, xehe ñi zavaha ndo sii si, minoo cuhva sa ma coto nu amigo ndo.

⁴ Xehe ñi tyindyee ndo sii ñiyivi ndahvi. Ta cua ndyehe ra Ndyoo Zutu yo cuhva zavaha ndo sa xehe ñi, ta cua cuhva maa ra sa vaha sii ndo sa cuenda si.

Zañaha ra Jesús yozo caa cuñi si cahan yo sihin ra Ndyoo

⁵ Ta tatu cua cahan ndo sihin ra Ndyoo, ma cuu ndo tañi ra zaha tuhun vaty vaha xaan ra, ta ña ndisa ra vaty tahan iñi ra cahan ra sihin ra Ndyoo nu tuu ñiyivi vaty cuñi ra sa cua ndyehe ñu. Yucuan cuenda cua cuiñi ndyaa ra sisi vehe ñuhu a ityi cahnu ta cahan ra sihin ra Ndyoo. Sa ndisa caty sihin ndo vaty sihin sa ndyehe ñiyivi sii ra sihin sa zavaha ra, ta sa ñihi ra sa cua ñihi ra.

⁶ Zoco tatu cua cahan maa ndo sihin ra Ndyoo, quihvi ndo nu yoñi ndyehe, ta nacazi ndo yuvehe ta cahan ndo sihin ra Ndyoo Zutu yo sa maa ñi maa ndo. Cua ndyehe maa ra cuhva zavaha ndo sa xehe ñi, ta cua cuhva ra sa vaha sii ndo sa cuenda si.

⁷ Cuhva cahan ndo sihin ra Ndyoo ma cahan ndo zuun ñi sa cahan ndo uu a uñi saha tañi zavaha ñiyivi ña sito sii ra Ndyoo. Sica iñi ñu vaty cua cuiñi ra Ndyoo sa cahan ñu tatu cuaha xaan cahan ñu.

⁸ Ma cuu ndo tañi maa ñu vaty sa sito ra Ndyoo Zutu yo ñaa sa siñi ñuhu sii ndo cuee ca sa caca ndo sii ra.

⁹ Yucuan cuenda cahan ndo sihin ra Ndyoo tyehen: Ndyoo Zutu ndi, ra ndyaa andivi, ii xaan cuu zivi moo.

¹⁰ Nasaa quivi cua cundyaca ñohon ihya ñuu ñiyivi. Nazavaha ñiyivi cuhva cuñi moo ihya ñuu ñiyivi tañi cuu si ndya gloria.

¹¹ Cuhvon sa siñi ñuhu sii ndi minoo minoo quivi.

¹² Ta zohon tucahnu iñi sii ndi sa cuenda cuaty ndi tañi maa ndi zaha ndi tucahnu iñi sii ñiyivi zavaha sa ña vaha sihin ndi.

¹³ Ma cuhvon sa nducu coto ihñi cuihna sii ndi coto zavaha ndi sa ña vaha. Vaty moo cuu ra ndyaca ñaha, ta moo cuu ra iyo xaan tundyee iñi sii, ta tahan si zacahnu tandihi ñiyivi suun tandihi cui tyiemvu. Ta nacuu si sa ndisa. Tacuan cahan ndo sihin ra Ndyoo.

¹⁴ Vaty tatu zaha maa ndo tucahnu iñi sii ñiyivi zavaha sa ña vaha sihin ndo, tacuan tucu cua zavaha Zutu yo ra ndyaa andivi. Cua zaha ra tucahnu iñi sii maa ndo.

¹⁵ Zoco tatu ma zaha maa ndo tucahnu iñi sii inga ñiyivi, ma zaha tucu Zutu yo tucahnu iñi sii maa ndo, ta ma zandasi ra cuaty ndo.

Zacuaha ra Jesús ziqui cuhva cuñi si coo ndyitya yo

¹⁶ Ta ziqui i caty ra Jesús sihin ñiyivi: Quivi ma casi ndo ta cahan ndo sihin ra Ndyoo, ma zanducuihya ndo iñi ndo tañi zavaha ñiyivi zaha tuhun vaty vaha xaan ñu. Ta ma

cahyi ndo ñiyaa nuu ndo tañi zavaha maa ñu. Tacuan zavaha ñu vatyí cuñi ñu sa cua ndyehe ñiyivi sii ñu ta nacoto ñu vatyí ña sasi ñu. Zoco catyí sihin ndo vatyí ñahñi cua ñihi ñu sihin ra Ndyoo vatyí yivi sa cuenda maa ra zavaha ñu sii si.

¹⁷ Zoco maa ndo tatu ñaa quivi cua coo ndyitya ndo ta cahan ndo sihin ra ndyoo, nacatya ndo nuu ndo, ta tyihi ndo xahan xiñi ndo.

¹⁸ Tacuan zavaha ndo vatyí ma coto ñiyivi vatyí ñá sasi ndo. Minoo tuhun ñi maa ra Ndyoo cua ndyehe cuhva zavaha ndo, ta cuaha sa vaha cua cuhva ra sii ndo ta cua ndyehe ñiyivi.

Cuhva zavaha yo ta cua coo cuaha sa vaha sii yo ndya andivi

¹⁹ Ma zacaya xaan ndo xuhun a ndaha tyiño ndo ihya ñuu ñiyivi coto tivi si a coto zativi tiquixi sii si. Ta coto quihvi ra zuhu ta quihin ra sii si.

²⁰ Vaha ca tatu zacaya ndo ndaha tyiño ndo ndya andivi vatyí yucuan ma zativi tiquixi sii si. Ta ma tivi si. Ta ma cuu quihvi ra zuhu ta quihin ra sii si.

²¹ Vatyí catyí sihin ndo vatyí nu ndyaa sa cuca ndo, yucuan cuu nu ndyaa aña ndo.

Siti nuu yo cuu tañi minoo sa zandisi sii yo ta cuu ndyehe yo nu cuahan yo, ta tacuan tucu tatu iyo sa ndisi sa saha ra Ndyoo aña ndo, vaha ñiyivi cuu yo

²² Siti nuu ndo cuu tañi minoo sa zandisi sii ndo. Ta tacuan tucu aña ndo, tatu maa ñi sa vaha ra Ndyoo iyo aña ndo, vaha ñiyivi cuu ndo.

²³ Zoco tatu ña vaha siti nuu ndo, ñahñi sa zandisi nu cuahan ndo. Ta zuun ñi cuhva cuan, tatu ñahñi sa ndisi ra Ndyoo iyo aña ndo, a tatu iyo si zoco ña tyaa ndo yahvi sii si, cuaha xaan cuatyí ndo iyo, ta sica noo ndo nu ñaa.

Ma cuu cuñi xaan yo sii ra Ndyoo tatu cuñi xaan yo xuhun

²⁴ Ma cuu zatyíño minoo muzu sa cuenda uu tahan patrón vatyí cua cuñi ca ra sii minoo patrón ra, ta ma cuñi ca ra sii inga ra. A sii minoo ra cua tyaa ra yahvi, ta sii inga ra ma tyaa ra yahvi. Ma cuu cuñi ndo sii ra Ndyoo ta cuñi ndo sii xuhun.

Zacuenda ra Ndyoo sii tandihi zehe ra

²⁵ Ta i catyí tucu ra Jesús: Yucuan cuenda catyí sihin ndo, ma caca xaan iñi ndo yozo caa cua ñihi ndo sa casi ndo ta sa coho ndo ñuu ñiyivi ya. Ta ma caca xaan iñi ndo yozo caa cua ñihi ndo zahma quihí ndo. Zoco nuu ra Ndyoo ñiñi ca aña ndo ta coño ñuhu ndo ta ziqui sa casi ndo ta sa ndihvi ndo. Maa ra saha sa ndito ndo, ta cua cuhva ra tandihi sa siñi ñuhu sii ndo.

²⁶ Ndyehe ndo cuhva iyo zaa sa sica noo ityí ziqui. Ña tasi ti. Ña zatyíño ti. Ñahñi nu naquihin vaha ti tyiño zacuu ti, ndihi ca. Zoco sasi ti vatyí maa ra Ndyoo zacasi sii ti. Ta ñiñi xaan ca cuu maa ndo ityí nuu ra Ndyoo ta ziqui zaa cuan.

²⁷ ¿Ta yoo ndo cuu nduzucu ca ndo siin ca tatu caca xaan iñi ndo sa cuenda si? Ma cuu ca.

²⁸ ¿Ta ñaa cuenda sica xaan iñi ndo sa cuenda zahma ndo? Ndyehe ndo cuhva sahnú ita sisi cuhu vatyí ña tavi si, ta ña cono si iza.

²⁹ Zoco catyí sihin ndo vatyí cuca xaan ra rey Salomón ta tyaqui xaan zahma ra, zoco ña tyaqui ca si ta ziqui minoo ita cuan.

³⁰ Ta tatu zandutyacuí xaan ra Ndyoo sii tu-ita sa iyo vityí ta ityaan cua nduu tu nducu ta cayu tu, tyaqui xaan tucu zahma cua cuhva ra sii maa ndo. Zoco maa ndo ña sino vaha iñi ndo sii ra.

³¹ Yucuan cuenda catyí sihin ndo: Ma caca xaan iñi ndo ta catyí ndo: “¿Ñaa sa cua casi ndi? ta ¿naa sa cua coho ndi? ta ¿yozo caa ñihi ndi zahma quihí ndi?”

³² Vatyí sica xaan iñi ñiyivi ña sito sii ra Ndyoo sa cuenda tandihi si cuan. Zoco maa Zutu mañi yo sa sito ra vatyí siñi ñuhu tandihi si cuan sii ndo.

³³ Vaha ca nducu ndo cuhva yozo caa cua cuhva cuenda ndo sii ndo sii ra Ndyoo vatyí cundyaca ñaha ra sii ndo ta maa ñi sa vaha xaan zavaha ndo tañi zavaha maa ra, ta tacuan ta cua cuhva ra tandihi sa siñi ñuhu sii ndo.

³⁴ Zacuenda maa ra Ndyoo sii ndo vityi ta ityaan, ndihi ca. Yucuan cuenda ma caca xaan iñi ndo sa cuenda sa cua cuñi si sii ndo ityaan. Caca iñi ndo vityi iin ñi sa cuenda sa siñi ñuhu sii ndo vityi.

7

Ma cahan cuehe ndo sii ñiyivi

¹ Ma cahan cuehe ndo sii ñiyivi coto catyi tucu ra Ndyoo vatyi ña vaha zavaha tucu maa ndo.

² Vatyi cuhva ndyehe maa ndo sii inga ñiyivi, tacuan tucu cua ndyehe ra Ndyoo sii ndo. Ta tatu tyaa ndo cuatyi sata ñiyivi, zuun ñi cuhva cuan cua tyaa ra Ndyoo cuatyi sata maa ndo.

³ ¿Yozo caa vatyi cuu ndyehe ndo cuatyi luhlu ñi sa iyo sii inga ñiyivi ta tañi minoo mihin luhlu ñi sa ñoho siti nuu ñu cuu si? Ta ña ndyehe ndo cuatyi cahnu xaan sa iyo sii maa ndo, ta cuu si tañi minoo mihin cahnu sa ñoho nuu maa ndo.

⁴ Ta ñaa cuenda catyun sihin yañun vatyi nacuhva ra sa tavon mihin luhlu sa ñoho siti nuu ra, ta ña tuu iñun sa ñoho minoo mihin cahnu siti nuu moo.

⁵ Cuhva cuan, zohon tuhun vatyi vaha xoon, ta ña ndisa. Tava xihnon mihin sa ñoho siti nuu moo, ta ziqui cua ndundisi ndyehun, ta cua cuu tavon mihin luhlu sa ñoho siti nuu yañun.

⁶ Ta ma zañiñi ndo ta cahan ndo Tuhun Ndyoo sihin ñiyivi ña cuñi coto, coto cañi ñu sii ndo. Tañi ina cuu ñiyivi ña cuñi Tuhun Ndyoo. Ta tañi zativi quini sii sa vaha, tacuan tucu iyo maa ñu. Cua cahan ñu ndya vaha ñi sii Tuhun Ndyoo.

Ma cundihi iñi ndo cahan ndo sihin ra Ndyoo

⁷ Caca ndo sii ra Ndyoo, ta cua cuhva ra sa sica ndo. Nanducu ndo, ta cua nañihi ndo. Cati ndo yuvehe, ta cua nuña si.

⁸ Vatyi tandihi ndoho ra sica, cua ñihi ndo. Ta tatu nanducu ndo, cua nañihi ndo. Ta tatu cati ndo yuvehe, cua nuña si.

⁹ Maa ndo ra cu zutu sa ndyih, tatu cua caca zehun minoo pan, ¿atu cua cuhva ndo minoo yuu sii ra? Ña tacuan.

¹⁰ A tatu cua caca ra minoo tyiyaca, ¿atu cua cuhva ndo minoo coo?

¹¹ Ñiyivi quiñi cuu maa ndo, zoco sito ndo yozo caa cuhva ndo sa vaha sii zehe ndo, vaha xaan ca cua zavaha Zutu yo, ra ndyaa andivi. Cua cuhva ra sa vaha sii ñiyivi sica sii ra.

¹² Ta tatu cuñi ndo sa cua zavaha ñiyivi sa vaha sihin maa ndo, tacuan zavaha tucu maa ndo sihin maa ñu tandihi saha vatyi yucuan cuu sa catyi ley ra Moisés ta libro i tyaa ra profeta ta sa naha.

Tihin yuvehe ta cuiñi ityi sa cuahan nu ndyaa ra Ndyoo

¹³ Nducu ndo cuhva quihvi ndo yuvehe tihin vatyi quihin yuvehe ta quihin ityi sa cuahan nu cunaa ñiyivi andyaya. Ta cuaha xaan ñiyivi cuahan ityi cuan.

¹⁴ Zoco tihin yuvehe ta cuiñi ityi sa cuahan nu ma cuu ca ñiyivi, ta zuhva cuii ñi ñiyivi cua nañihi ityi cuan.

Nacoto yo tatu vaha ñiyivi tatu zavaha ñu sa vaha

¹⁵ Zacuenda ndo sii ndo sihin ra vatya ta catyi ra vatyi cahan ra sa cuenda ra Ndyoo. Vasi ra tañi minoo mvee ticaty, zoco aña ra ñoho sa quiñi caa.

¹⁶ Cuu nacoto ndo sii ra sa cuenda cuhva zavaha ra. Tañi yutu ña vaha, tacuan iyo ra vatyi minoo tu mihndya ma cuu cuhva tu mango. Ta minoo iñu ma cuhva tu uva.

¹⁷ Ta tacuan cuu si. Tandihi yutu vaha, saha tu siti vaha. Ta tandihi yutu ña vaha, ña vaha siti tu.

¹⁸ Minoo yutu vaha, ma cuu cuhva tu siti ña vaha. Ta minoo yutu ña vaha, ma cuu cuhva tu siti vaha.

¹⁹ Ta tandihi yutu sa ña saha siti vaha, tuhva ñiyivi cahndya sii tu, ta cayu tu.

²⁰ Ta zuun ñi sihin cuhva cuan, cuu nacoto yo sii ñiyivi sihin cuhva zavaha ñu.

Ña tandihi ñiyivi cuu quihvi nu ndyaca ñaha ra Ndyoo andivi

²¹ Ña tandihi ñiyivi sa catyi sihin: “Zutu mañi yuu, Zutu mañi yuu”, cuu quihvi ñu nu ndyaca ñaha ra Ndyoo andivi. Maa ñi ñiyivi zavaha cuhva cuñi ra Ndyoo Zuti, cuu quihvi ñu.

²² Quivi cua tasi tuñi ra Ndyoo sii ñiyivi, cuaha xaan ñu cua catyi tyehen sihin: “Zutu mañi yuu, nduhvi i cahan ndi sihin zivi moo, ta sihin zivi moo tava ndi tatyí ña vaha, ta i zavaha ndi cuaha xaan sa ndyityi.” Cua catyi ñu.

²³ Zoco yuhvi cua catyi: “Ña site sii ndo. Cuñi siyo ndo sii, ta cuahan ndo vatyí ñá zavaha ndo sa vaha sa i catyi sihin ndo.”

Cuhva cua cuu si sihin ñiyivi tyaa yahvi sa cahan ra Jesús, ta cuhva cua cuu si sihin ñiyivi ña tyaa yahvi

²⁴ Tyehen catyi sihin ndo, tatu yoo ra tyizoho sa quehin ta zavaha ra sii si, cuu ra tañi minoo ra siñi tuñi vaha. Cono xaan i sitya ra ndya tahan ra minoo yuu cahnu, ta i zandaa ra vehe ra ziqui yuu cuan.

²⁵ Ta i coon xaan zavi, ta i cucono yuu. Ta ñihi xaan i ñoho tatyí, zoco ñá nduva vehe cuan vatyí i zandaa ra sii si ziqui yuu cuan.

²⁶ Zoco ra siñi sa quehin ta ña zavaha ra sii si, cuu ra tañi minoo ra tondo xaan, ra i zandaa vehe nu ñiyiti ñi. Ñá zavaha ra cimientu si.

²⁷ Ta i coon zavi. Ta i cucono yuu, ta ñihi xaan i sicaa tatyí, ta i nduva vehe cuan, ta cua naa si.

²⁸ Ta nu i ndihi cahan ra Jesús, iyo xaan i cuñi ñiyivi sihin cuhva zacuahra ra

²⁹ vatyí zacuahra ra tañi minoo ra ndyaca ñaha. Ñá zacuahra ra tañi ra maestro cuenda ley.

8

Cuhva i zanduvaha ra Jesús sii minoo ra tyahyu

¹ Cuhva i noo ra Jesús yucu cuan, cuaha xaan ñiyivi i sindyico sii ra.

² Ta i tuhva minoo ra cuhu cuehe tyahyu sii ra Jesús. Ta i sicuñi siti ra nuu ra ta catyi ra: Tata, iyo cuhva suun, ta cuu zanduvohon sii tatu cuñun.

³ Ta i tyizo ra Jesús ndaha ra xiñi ra, ta i catyi ra: Cuñi. Sa nduvohon. Ta zuun ñi caa cuhva cuan, i quita cuehe cuan sii ra, ta ndaha nduvaha ñi ra.

⁴ Ta i catyi ra Jesús sihin ra: Ndyehun vatyí ma nacatyun sihin numinoo ñiyivi. Cuhun nu ndyaa ra cu zutu, ta cuhvon ofrenda sii ra Ndyoo tañi i catyi ra Moisés cua cuhva ñiyivi tatu sa nduvaha ñu. Ta tacuan ta cua coto tandihi ñiyivi vatyí sa i nduvohon.

Zanduvaha ra Jesús sii minoo muzu ra ndyaca ñaha sii zandaru

⁵ I quihvi ra Jesús ñuu Capernaum, ta minoo ra ndyaca ñaha sii minoo ziendu zandaru i tuhva sii ra ta i sica ra tumañi iñi sii ra, ta catyi ra:

⁶ Tata, cuhu xaan minoo ra luhlu, ra cu muzi. Catuu ra, ta sa cuñi xii ra, ta ndyehe xaan ra tundoho.

⁷ Ta i catyi ra Jesús sihin ra: Cua cuhin, ta cua zanduvehi sii ra.

⁸ Ta i nacahan ra ndyaca ñaha sii zandaru cuan, ta i catyi ra: Ña tahan si sa cuhun vehi vatyí ra cahnu xaan ca cuu moo. Tatu cua catyi moo vatyí cua nduvaha muzi, cua nduvaha ra.

⁹ Vatyí zuun ñi iyo tucu ra ndyaca ñaha sii, ta iyo tucu zandaru ra ndyaca ñehi. Tatu catyi sihin minoo ra vatyí cuhun ra, cuhun ra. Ta tatu catyi sihin inga ra vatyí quisi ra, cua quisi ra. Ta tatu ñaa tyiño tave sii minoo muzi, zavaha ra sii si.

¹⁰ Tacuan i catyi ra, ta sa siñi ra Jesús cuhva cahan ra, iyo xaan i cuñi ra, ta i catyi ra sihin ñiyivi ndyico sii ra: Catyi sihin ndo vatyí tañaha ca nañihi sii minoo ra hebreo ra sino iñi sii ra Ndyoo tañi sino iñi ra ya.

¹¹ Ta catyi sihin ndo vatyí cua quisi cuaha xaan ñiyivi ndya ityi caña ñicandyi ta ndya ityi cua iñi, ta cua cundyaa ñu ta casi ñu sihin ra Abraham, ta ra Isaac ta ra Jacob nu ndyaca ñaha ra Ndyoo andivi.

¹² Zoco ñiyivi i tahan si cuhun yucuan, ma cuu cuhun ñu. Cua tyihi ra Ndyoo sii ñu minoo nu ñaa nu cua vacu xaan ñu, ta cua casi quihñi noho ñu sa cuenda tundoho sa ndyehe ñu.

¹³ Ta ziqui i catyi ra Jesús sihin ra ndyaca ñaha sii zandaru: Cuahan ndya vehun vatyi cuu si tañi cuhva sino iñun. Tacuan i catyi ra Jesús, ta zuun ñi caa cuhva cuan i nduvaha muzu ra.

Zanduvaha ra Jesús sii tyizo ra Simón Pedro

¹⁴ Cuahan ra Jesús ndya vehe ra Pedro, ta yucuan i ndyehe ra sii tyizo ra Pedro. Catuu ña nu sito. Cuhu ña sihin cahñi.

¹⁵ I tiin ra Jesús ndaha ña, ta i quita cahñi cuan. Ta i nduvita ña, ta i quisaha zavaha ña sa casi ra.

Zanduvaha ra Jesús sii cuaha xaan ñiyivi cuhu

¹⁶ Sa tyizo ñicandyi, ta sa tyahan cuan i quisi ndyaca ñiyivi sii cuaha xaan ñu ñoho taty cuihna nu ndyaa ra Jesús. Ta i tava ra taty ña vaha cuan sihin minoo ñi tuhun cahan ra, ta i zanduvaha tucu ra sii tandihi ñu cuhu.

¹⁷ Tacuan i cuu si vatyi cua quita si cuhva i catyi ra Isaías; minoo ra profeta i cuu ra ta sa naha. Tyehen i catyi ra: “I quindyaa ra cuehe yo, ta i zanduvaha ra sii yo.”

Ñu sa cuñi cundyico sii ra Jesús

¹⁸ Ta cuhva sa ndyehe ra Jesús vatyi cuaha xaan ñiyivi siconduu cuii yucu ñu sihin ra, i catyi ra vatyi cua yaha ra inga siyo miñi.

¹⁹ Ta i tuhva minoo ra maestro cuenda ley sii ra Jesús, ta i catyi ra sihin ra: Maestro, cuñi cundyique suun vazu ndya ndya maa cuohon.

²⁰ Ta i catyi ra Jesús sihin ra: ¿Atu cundye iñun? vatyi ñicuii ca ta iyo vehe ti, ta zaa iyo taca ti. Zoco ra i quisi ndya gloria, ñahñi maa vehe ra iyo.

²¹ Ta ziqui inga ra ndyico sii ra Jesús, i catyi ra sihin ra: Tata, cua cundyique suun, zoco cuatu noo ndya nacuu xihna zuti ta ziqui cua cundyique suun.

²² Ta i catyi ra Jesús sihin ra: Yoho cundyicon sii vityi, ta natyih i ñiyivi ña sito sii ra Ndyoo sii tahan sihi sihin ñu sisi ñuhu.

Zacutaxi ra Jesús taty sihin ndutya

²³ Tacuan ta i quihvi ra Jesús minoo barco sihin ra i casi ra.

²⁴ Ta i quisaha caa minoo taty ñihi xaan ndya cuhva ndya cuñi zahvi ndutya sii barco cuan. Ta quixi ra Jesús.

²⁵ Ta sahan ra sica noo sihin ra, ta i zandoyo ra sii ra, ta catyi ra sihin ra: ¡Tata, zacacun sii yo; sa cuñi cunaa yo!

²⁶ Ta i nacahan ra Jesús, ta catyi ra: ¿Ñacu yuhu xaan ndo? Zuhva cuii ñi sino iñi ndo. Catyi ra. Tacuan ta i nduvita ra, ta i cahan ra sihin taty ta sihin ndutya, ta i cutaxi si.

²⁷ Ta iyo xaan i cuñi ra ndihi sihin ra, ta catyi ra: ¿Yoo ra cuu ra ya? vatyi cuhva ndya taty ta cuhva ndya ndutya ta tyaa si yahvi sii ra.

Ra sa ñoho taty cuihna

²⁸ Ta cuhva sa i saa ra Jesús inga siyo miñi cuan ndya nu cu si Gadara, i quita uu tahan ra nu ñaña, ta i tuhva ra sii ra. Ñoho taty cuihna sii nduu tahan ra cuan, ta xaan xaan ra ndya cuhva yoñi cuu yaha ityi cuan.

²⁹ Ta i quisaha cana saa ra, ta catyi ra: ¿Ñaa sa cuñun sihin ndi, yoho Jesús zehe ra Ndyoo? ¿Atu vasi zandyehun tundoho sii ndi cumañi ca sa tahan si quivi?

³⁰ Tacuan i zacahan cuihna sii ra cuan. Ta yatyi ñi yucuan sica noo cuaha xaan quini. Sasi ti.

³¹ Ta i sica taty cuihna cuan tumañi iñi sii ra Jesús vatyi tatu cua tava ra sii si, naquihvi si sisi quini cuan.

³² Ta i catyi ra Jesús sihin si: Vaha, cuahan ndo. Ta i quita taty cuihna sii nduu tahan rayi cuan, ta i quihvi si sisi quini cuan. Ta ziqui tandihi quini cuan, i sino ti nu iñi noo yuhu miñi, ta i sihi tandihi ti sisi ndutya.

³³ Ta ra zacuenda quini cuan, i sino ra, ta cuahan ra ndya ñuu, ta i nacatyi ra sihin ñiyivi tandihi sa i tahan ra siñoho taty cuihna cuan.

³⁴ Ta ziqui i quita tandihi ñiyivi ñuu cuan, ta cuahan ñu nu ndyaa ra Jesús vaty cuñi ñu ndyehe ñu sii ra. Ta sa ndyehe ñu sii ra, i zañiñi ñu sii ra sa naquita ra ñuu ñu.

9

Zanduvaha ra Jesús sii minoo ra xii

¹ I quihvi ra Jesús sisi minoo barco, ta i yaha ra ta saa ra inga siyo miñi, ta i saa ra zuun ñi ñuu maa ra.

² Ta i sindyaca ñiyivi sii minoo ra cuhu nu ndyaa ra Jesús. Ndyizo ra sii ra cuan sihin minoo tyuhva. Ta sa ndyehe ra Jesús cuhva sino xaan iñi tandihi ra, ta i catyi ra sihin ra cuhu cuan: Ra luhlu, ma nducuihya iñun. Sa ndasi cuatyun.

³ Tacuan ta zuhva ra maestro cuenda ley, i sica iñi ra: “Quiñi xaan cahan ra ya sii ra Ndyoo.” (Vaty zaha ra Jesús tuhun vaty Ndyoo cuu ra, cuñi ra cuan.)

⁴ Ta ra Jesús i sito ra ñaa sa sica iñi ra, ta i catyi ra sihin ra cuan: ¿Ñaa cuenda sica iñi ndo minoo cuhva ña vaha?

⁵ ¿Ñaa sa yii ca catyi yo? ¿Atu yii ca catyi yo: “Sa ndasi cuatyun”, a yii ca catyi yo: “Nduvito ta cacon”? (Ñaa yii ca catyi yo: “Sa ndasi cuatyun.” Vaty yivi sa ndyehe yo cuu cuhva cuan. Ma coto ñiyivi tatu ndisa a ña ndisa. Zoco cua ndyehe ñu tatu zanduvaha yo sii minoo ñiyivi sa ndisa.)

⁶ Cua zañehi sii ndo vaty iyo cuhva sii vii, ra i quisi ndya gloria, sa zandasi cuaty ñiyivi ñuu ñiyivi. Ta ziqui i catyi ra Jesús sihin ra xii: Nduvito. Nacuhun tyuhvon, ta cuhun ndya vehun.

⁷ Tacuan ta i nduvita ra xii cuan, ta cuahan ra ndya vehe ra.

⁸ Ta sa ndyehe ñiyivi cuhva cuan, i yuhu xaan ñu, ta i zacahnu xaan ñu sii ra Ndyoo vaty i saha xaan ra cuhva sii ra Jesús.

Cana ra Jesús sii ra Mateo

⁹ I quita ra Jesús yucuan, ta i ndyehe ra sii minoo ra nañi Mateo. Ndyaa ra nu zatyyahvi ra sii ñiyivi cuenda xuhun ra ndyaca ñaha. Ta i catyi ra sihin ra: Coho sihin. Tacuan ta i nduvita ra Mateo, ta cuahan ra sihin ra.

¹⁰ Yaha zuhva quivi ta sahan ra Jesús sa casi ra xita vehe ra Mateo. Ta iñi ñi sihin ra Jesús ta sihin ra sica noo sihin ra sasi cuaha xaan ra tava xuhun cuenda ra ndyaca ñaha ta inga ra iyo cuaty.

¹¹ Ta sa ndyehe ra fariseo cuhva cuan, i ndaca tuhun ra sii ra sica noo sihin ra Jesús ta catyi ra: ¿Ñaa cuenda sasi ra maestro ndo sihin ra tava xuhun ta sihin inga ra iyo cuaty?

¹² Ta i siñi ra Jesús tuhun cuan, ta i catyi ra: Ñiyivi iyo vaha, ña siñi ñuhu minoo médico sii ñu, zoco sii ñu cuhu siñi ñuhu médico.

¹³ Cuhun ndo ta cutuhva ndo cuhva catyi si nuu tutu ra Ndyoo nu catyi si tyehen: “Cuñi sa cua cundahvi iñi ndo sii ñiyivi, ta ma zañiñi xaan ndo sa cahñi ndo quiti sa cuenda cuaty ndo.” Vaty ña vasi cane sii ñiyivi vaha, vasi cane sii ñu iyo cuaty vaty cuñi sa cua zama ñu cuhva iyo ñu.

Ndaca tuhun ñiyivi sii ra Jesús tatu cuñi si sa coo ndyitya ñiyivi

¹⁴ Tacuan ta ra ndyico sii ra Juan, ra zacoo ndutya sii ñiyivi, i tuhva ra sii ra Jesús, ta i ndaca tuhun ra sii ra: ¿Ñaa cuenda vaty maa ndi ta ra fariseo tuhva xaan ndi coo ndyitya, ta ra sica noo sihin moo, ña tuhva ra?

¹⁵ Ta i nacahan ra Jesús ta catyi ra: ¿Atu cuu sa ma casi ñu ñoho minoo vico tindaha ñi ñi sa ndyaa ra i tindaha sihin ñu? Ma cuu. Zoco cua saa quivi cua cuhun ra i tindaha, ta ziqui ndisa vaty ma casi ñu.

¹⁶ Tacuan i catyi ra Jesús, ta ziqui i cahan ra ziqui inga cuhva ta catyi ra: Yoñi ñiyivi natyaa zuhva zahma saa sii zahma sahnun vaty cua ndiyi zahma saa cuan, ta cua tahndya ca zahma sahnun cuan.

¹⁷ Ta inga cuhva, yoñi zavaha ndixi panela saa sisi quizi sahnú vatyí cua cuizo si ta ndaa si ta cua cahndi quizi sahnú cuan. Cuñi si quizi saa tatu zavaha ñiyivi ndixi panela saa vatyí ma tahvi quizi cuan, ta ma ndoyo ñuhu ndixi cuan. (I cahan ra Jesús cuhva ya vatyí ma cuu nazaca yo cuhva zacuaha maa ra sihin costumbre sahnú.)

Nduvaha zehe ra Jairo, ta i tiin minoo ñaha yuzahma ra Jesús

¹⁸ Ñiñi ñi sa cahan ra Jesús cuhva cuan, ta i saa minoo ra cu tyiño cuenda ñu hebreo, ta i sicuiñi siti ra nuu ra Jesús, ta catyi ra: Sa sihi minoo zehi, zoco tatu cua cuhun ndya vehi ta tyizon ndohon sii ña, cua nandoto ña. Catyi ra.

¹⁹ Ta i nduvita ra Jesús sihin ra sica noo sihin ra, ta cuahan ra sihin ra cuan.

²⁰ Ta ityi cuahan ra Jesús, i tuhva minoo ñaha sii ra. Sa usi uu cuiya sa cuhun ña, cuehe sa cuu ña ñiñi. Ta i quisi ña ityi sata ra Jesús, ta i tiin ña yuzahma ra.

²¹ Vatyí sica iñi ña: “Vazu zahma ñi ra cua tiin, ta nduvehi.”

²² Zoco i nasico cava ra Jesús, ta i ndyehe ra sii ña, ta catyi ra: Cuziñi xaan iñun, zihi. I nduvohon vatyí i sino iñun sii. Ta zuun ñi caa cuhva cuan i nduvaha ña.

²³ Ta cuhva sa saa ra Jesús vehe ra cu tyiño cuan, i ndyehe ra vatyí sa tiví música, ta cuvaa xaan ñiyivi, ta sacú saa ñu.

²⁴ Ta i catyi ra sihin ñu: Quita ndo ihya. Ñá sihi ña luhlu ya. Quixi ña. Tacuan i catyi ra, ta i sacú ndyaa ñu sii ra.

²⁵ Zoco i tava ra Jesús sii ñu, ta ziqui i quihvi ra, ta i tiin ra ndaha ña, ta i nduvita ña.

²⁶ Ta nacahnú cuii ityi cuan i sito ñiyivi cuhva i cuu.

Zanduvaha ra Jesús sii uu tahan ra cuaa

²⁷ Ta sa quita ra Jesús yucuan, i sindyico uu tahan ra cuaa sii ra, ta cana saa ra, ta catyi ra: ¡Cundahvi iñun sii ndi Zehe ra David!

²⁸ Ta sa yaha quihvi ra Jesús sisi vehe, i tuhva ra cuaa cuan sii ra. Ta i ndaca tuhun ra Jesús sii ra: ¿Atu sino iñi ndo vatyí cuu zanduvehi sii ndo? Ta i nacahan ra cuan, ta catyi ra: Sino iñi ndi, tata.

²⁹ Tacuan ta i tiin ra Jesús siti nuu ra, ta i catyi ra: Nacuu si tañi cuhva sino iñi ndo.

³⁰ Tacuan i catyi ra Jesús, ta i nduvaha siti nuu ra cuan. Ta i nacatyí ra Jesús sihin ra vatyí ma nacatyí ra sihin numinoo ñiyivi.

³¹ Zoco cuahan ra ta i nacatyí ra sihin tandiñi ñiyivi ityi cuan cuhva i zavaha ra Jesús.

Zanduvaha ra Jesús sii minoo ra ñehe

³² Ta cuhva sa cua quita ra yucuan, i quisi ndyaca ñiyivi sii minoo ra ñehe sii ra Jesús. Ñoho minoo tatyí cuihna sii ra cuan.

³³ I tava ra Jesús sii tatyí cuihna cuan, ta ziqui i quisaha cahan ra ñehe cuan. Ta iyo xaan i cuñi ñiyivi, ta i catyi ñu: Tañaha ca ndyehe maa yo ñiyivi hebreo minoo sa tyehen.

³⁴ Zoco i catyi ra fariseo: Ihya ra tava tatyí cuihna sihin tundyee iñi sii ra cu nuu sii cuihna.

Cundahvi xaan iñi ra Jesús sii ñiyivi

³⁵ I sica noo ra Jesús tahan tahan ñuu nahnu ta ñuu ndyíhi. Zacuaha ra sii ñiyivi sisi vehe ñuhu tahan tahan nu cuahan ra. I nacatyí ra Tuhun Vaha sa cuenda cuhva ndyaca ñaha ra Ndyoo. Ta zanduvaha ra sii ñiyivi tandiñi cuii nuu cuehe.

³⁶ Ta sa ndyehe ra sii ñiyivi, i cundahvi xaan iñi ra sii ñu vatyí ndyehe xaan ñu tundoho, ta sica noo ñu ityi cuan ityi ya tañi mvee ticatyí sa yoñi zacuenda sii.

³⁷ Tacuan ta i catyi ra Jesús sihin ra sica noo sihin ra: Sa ndisa quehin vatyí cahnu xaan itu, zoco yoñi cuñi zatyíño ta zaquee ra sii si.

³⁸ Yucuan cuenda caca ndo sii sito ho itu vatyí natasi ra muzu cua zaquee sii si.

10

I casi ra Jesús usi uu tahan ra apóstol

¹ I casi ra Jesús usi uu tahan ra. Ta i saha ra tundyee iñi sii ra, ta i cuu tava ra tatyí cuihna, ta zanduvaha ra tandiñi nuu cuehe ta tundoho.

² Ta ihya cuu zivi sa usi uu tahan ra cuan. Xihna ca ra Simón. Pedro nañi tucu ra, ta ra Andrés yañi ra. Inga ra nañi Jacobo, ta ra Juan yañi ra. Nduu tahan ra cuu zehe ra Zebedeo.

³ Ta ra Felipe tucu, ta ra Bartolomé, ta ra Tomás, ta ra Mateo; ra i tava xuhun cuenda ra ndyaca ñaha cuu ra Mateo. Ta ra Jacobo zehe ra Alfeo, ta ra Lebeo. Nañi tucu ra Tadeo.

⁴ Ta inga ra nañi ra Simón. Maa ra cuu cuenda minoo ityi ra cuñi zama sii ra ndyaca ñaha. Ta inga ra nañi ra Judas Iscariote. Cuee ca ta i xico ra sii ra Jesús.

I tasi ra Jesús sii sa usi uu tahan ra i casi ra vatyí cua nacatyí ra Tuhun Ndyoo sihin ñiyiví

⁵ I tasi ra Jesús sii sa usi uu tahan ra cuan, ta ihya cuu sa i catyi ra sihin ra: Ma cuhun ndo nu yoñi ñiyiví hebreo, ta ma quihví ndo ñuu nu cu si Samaria.

⁶ Zoco cuhun ndo nu yucu ñiyiví hebreo vatyí tañi mvee ticatyí sa cua naa cuu ñu.

⁷ Ta ityi cuahan ndo, nacatyí ndo Tuhun Ndyoo sihin ñiyiví, ta catyi ndo vatyí sa cuñi saa quiví cundyaca ñaha ra Ndyoo ñuu ñiyiví.

⁸ Zanduvaha ndo sii ñu cuhu. Zanandoto ndo sii ñu i sihi. Zanduvaha ndo sii ñiyiví cuhu cuehe tyahyu, ta tava ndo tatyí cuihna. Sa caha ñi ñihi maa ndo cuhva ya, ta sa caha ñi tyindyee maa ndo sii ñiyiví.

⁹ Ma cuizo ndo xuhun cuenda ityi, nu xuhun cuaan, ta nu xuhun cuisi, ta nu xuhun cuatyí.

¹⁰ Numinoo yiti ma cuizo ndo. Ma cuizo ndo inga camisa a zapato a minoo tutatu vatyí tahan si sa cuhva ñiyiví sa casi ra zatyíño tañi maa ndo.

¹¹ Tatu cua saa ndo minoo ñuu cahnu a ñuu luhlu, nanducu ndo sii minoo ra vaha, ta ndoo ndo vehe ra ndya quiví cua quita ndo ñuu cuan.

¹² Cuhva sa saa ndo minoo vehe catyi ndo: “Nacoo sa vaha sii ra Ndyoo sihin ndo.”

¹³ Ta tatu vaha ñiyiví cuu ñu vehe cuan, nandoo si tacuan, zoco tatu yiví ñiyiví vaha cuu ñu, naquihin ndo tuhun vaha i cahan ndo sihin ñu.

¹⁴ Ta tatu ma tiin cuenda ñiyiví sii ndo, ta ña cuñi ñu tyizoho ñu sa cahan ndo, quita ndo vehe cuan ta ñuu cuan ta naquizi ndo saha ndo vatyí ma cuhun nu ñiyaca ñuu cuan sihin ndo.

¹⁵ Sa ndisa catyi sihin ndo vatyí quiví cua tasi tuñi ra Ndyoo sii ñiyiví, cuaha ca tundoho cua ndyehe ñiyiví ñuu cuan ta ziqui niyiví ñuu Sodoma ta ñuu Gomorra.

Cuhva cua zavaha ñiyiví sa ña vaha sihin ñiyiví sino iñi

¹⁶ Ndyehe ndo, tañi mvee ticatyí cuu maa ndo, ta tasi sii ndo nu yucu lobo. Listo xaan cuu ndo tañi coo, zoco mazu xaan cuu iñi ndo tañi paloma.

¹⁷ Ta zacuenda vaha ndo sii ndo sihin ñiyiví vatyí cua cuhva cuenda ñu sii ndo sii ra cu tyiño. Ta cua cañi ñu sii ndo sisi vehe ñuhu.

¹⁸ Ta cundyaca ñu sii ndo nuu ra ndyaca ñaha ta nuu ra gobierno sa cuenda mi. Ta tacuan ta cua ñihi ndo cuhva cahan ndo sa cuenda mi nuu ra cuan ta nuu ñiyiví sa yiví ñiyiví hebreo cuu.

¹⁹ Ta cuhva sa cua cuhva cuenda ñu sii ndo sii ra cu tyiño, ma caca xaan iñi ndo ñaa sa cua cahan ndo vatyí sa zuun ñi caa cuhva cuan cua cuhva maa ra Ndyoo tuhun cua cahan ndo.

²⁰ Vatyí yiví maa ndo cua cahan. Tatyí li maa ra Ndyoo sa iyo añima ndo cua cuhva ra tuhun cua cahan ndo.

²¹ Cua xico tuhun rayi zuun ñi sii yañi ra, ta cua cahñi ñiyiví sii ra. Ta cua xico tuhun zutu sa ndyihí sii zehe ra. Ta cua cuxaan zehe ñiyiví sihin zutu ñu ta sihin zihí ñu, ta cua cuhva cuenda ñu sii ñu vatyí cahñi niyiví sii ñu.

²² Tandihí ñiyiví ñuu ñiyiví cua cuxaan sihin maa ndo sa cuenda mi, zoco ra ma zaña tuhun ndya nu cua ndihí tyiemvu, yucuan ra cua cacu.

²³ Tatu quiñi xaan zavaha ñiyiví sihin ndo minoo ñuu, cono ndo ta cuhun ndo ndya inga ñuu. Vatyí sa ndisa catyi sihin ndo vatyí tañaha ca ndihí cuhun ndo tandihí ñuu ñiyiví hebreo ta cua quisi tucu ra i quisi ndya gloria.

²⁴ Ña cahnu ca cuu minoo ra ndyico sii ra ta ziqui ra cu nuu sii ra. Ta ña cahnu ca cuu minoo muzu ta ziqui patrón ra.

²⁵ Ra ndyico sii ra, nandoo ra vaha cuu ra tañi ra cu nuu sii ra. Ta nandoo ra cu muzu vaha cuu ra tañi patrón ra. Tatu mi, ra cu nuu vehe, ta catyi ñiyivi vaty ra cu nuu sii cuihna sa nañi Beelzebú cui, cuaha ca sa cua cahan ñu sii zehi.

Ra tahan si yuhu yo

²⁶ Yucuan cuenda ma yuhu ndo sii ñiyivi. Ñahñi tuhun xehe sa ma quita nu ndisi. Ta ñahñi sa ñoho xehe ta ma coto ñiyivi sii si.

²⁷ Tandihí tuhun cahan xehi sihin ndo, nacaty ra sihin ñiyivi. Ta tuhun sa xehe xaan quehin sihin ndo, cana saa ndo sii si ndya xiñi vehe.

²⁸ Ma yuhu ndo sii ñiyivi cahñi coño ñuhu ndo vaty ma cuu cahñi ñu ña ñima ndo. Vaha ca cuyuhu ndo sii ra sa cuu cahñi sii ndo sa ndisa cui ta zacuhun ra sii ndo andyaya.

²⁹ Cuyahvi uu tahan zaa ndyihí sa minoo peso. Caha xaan ndyaa ti, zoco ma cuu cuu numinoo ti ta canacava ti nu ñuhu tatu ma cuhva Zutu yo.

³⁰ Ta ndya cuhva ndya ixi xiñi ndo, ta sito ra Ndyoo yozo tahan si.

³¹ Yucuan cuenda ma yuhu ndo. Yahvi xaan ca ndyaa maa ndo ta ziqui ca cuaha xaan zaa ndyihí.

Ma yuhu yo cahan yo Tuhun Ndyoo sihin ñiyivi

³² Tandihí ñiyivi sa cua catyi sihin inga ñiyivi vaty sito ñu sii, yuhvi cua catyi tuqui sihin Zuti, ra ndyaa andivi, vaty site sii ñu cuan.

³³ Zoco ñiyivi cua catyi ityi nuu inga ñiyivi vaty ña sito ñu sii, yuhvi cua catyi tuqui ityi nuu Zuti, ra ndyaa andivi, vaty ña site sii ñu cuan.

Sa cuenda ra Jesús ta ma cuu cu-ñn ñiyivi

³⁴ Ma caca iñi ndo vaty vasi cuhve sa coo sa taxi ñuu ñiyivi. Ña tacuan cuu si. Vasi ndyaque cuhva cahñi tahan ñiyivi.

³⁵ Vasi zacahñi tehin rayi sihin zutu ra ta ñu zihí sihin zihí ñu. Ta cua cahñi tahan sono ñiyivi sihin tyizo ñu.

³⁶ Ta cua cuxaan tahan xaan ñiyivi sihin ñiyivi sii ñu.

³⁷ Ra cuñi ca sii zutu ra a sii zihí ra ta ziqui sii mi, ña tahan si cuu ra ñiyivi cuenda mi. Ta ra cuñi ca sii zehe yí ra a sii zehe zihí ra ta ziqui sii mi, ña tahan si cuu ra ñiyivi cuende.

³⁸ Ta ra ña cuñi cundyico sii, vazu cuu ra cuende, ña tahan si cuu ra ñiyivi cuende.

³⁹ Ra sa cuñi coo vaha xaan ta zacuenda ra sii ra ñuu ñiyivi, cunaa ra, ta cunaa ndaha tyiño ra sihin ra. Zoco ra saha sa cuu sa cuenda mi, cua cundito ra tandihí cui tyiemvu.

Cuhva ñihi ñiyivi sa vaha sii ra Ndyoo

⁴⁰ Tatu tiin cuenda ñiyivi sii maa ndo, tiin cuenda ñu sii mi. Ta tatu tiin cuenda ñiyivi sii mi, tiin cuenda ñu sii ra i tasi sii.

⁴¹ Ra tiin cuenda sii minoo ra profeta vaty vasi ra sa cuenda ra Ndyoo, zuun ñi sa vaha cua cuhva ra Ndyoo sii ra tiin cuenda cuan tañi cua cuhva ra sii ra profeta cuan. Ta minoo ra tiin cuenda sii minoo ra vaha vaty vaha ra, zuun ñi sa vaha cua cuhva ra Ndyoo sii ra tañi sa cua cuhva ra sii ra vaha cuan.

⁴² Ta yoo ra cua cuhva, vazu minoo vaso ndutya visi ñi, sii minoo ra luhlu. Ndisa cui cua cuhve sa vaha sii ra tatu zavaha ra cuhva cuan sa cuenda sa vaty ndyico ra sii mi.

11

Tasi ra Juan sii uu tahan ra sica noo sihin ra ndya nu ndyaa ra Jesús

¹ Sa ndihí zacuaha ra Jesús cuhva ya sii sa usi uu tahan ra i casi ra, ta ziqui i quita ra yucuan ta cuahan ra zñn zñn ñuu ityi cuan cua zacuaha ra ta nacaty ra Tuhun Ndyoo sihin ñiyivi.

² Ñoho ra Juan vehe caa, ta i saa tyiño nu ndyaa ra sa cuenda cuhva zavaha ra Jesús. Yucuan cuenda i tasi ra sii uu tahan ra ndyico sii ra vaty cua cahan ra sihin ra Jesús.

³ Ta i ndaca tuhun ra cuan sii ra Jesús: ¿Atu yoho cuu ra Cristo, ra cua zacacu sii ndi a cuatu ca ndi naquisi inga ra?

⁴ Ta i nacahan ra Jesús, ta i catyi ra sihin ra cuan: Cuahan ndo ta nacatyí ndo sihin ra Juan tandíhi sa i ndyehe ndo ta sa siñi ndo.

⁵ Nacatyí ndo sihin ra cuhva nandyehe ra cuaa, ta nacaca ra coxo ta nduvaha ra tyahyu ta nacuíñi ra zoho, ta cuhva nandoto ñiyívi i sihi. Ta nacatyí ndo cuhva siñi ñiyívi ndahvi Tuhun Vaha, cuhva cua cacu ñu.

⁶ Ta catyi ndo sihin ra vatyí zii xaan cua cuñi ñiyívi tatu ma zaña ñu sa sino iñi ñu sii.

⁷ Tacuan i catyi ra Jesús sihin ra ndyico sii ra Juan. Ta sa yaha cuahan ra cuan ta ziquí i quisaha cahan ra Jesús sihin ñiyívi sa cuenda ra Juan, ta catyi ra: ¿Ñaa sa sindyehe ndo quívi i sahan ndo nu ityi xaan nu yoñi ñiyívi iyo? ¿Atu sahan ndo vatyí cua ndyehe ndo minoo tuñi sa zacanda tatyí?

⁸ Tatu yívi si cuan ¿ña sa sindyehe ndo? ¿Atu sahan ndo vatyí cua ndyehe ndo sii minoo ra ñoho zahma vaha? Ña tacuan vatyí sa sito ndo vatyí ñiyívi ñoho zahma vaha xaan, iyo ñu vehe rey.

⁹ ¿Ñaa sa sindyehe ndo? ¿Atu sahan ndo vatyí cua ndyehe ndo sii minoo profeta? Zuumi. Ta catyi sihin ndo vatyí ñiñi xaan ca ra cuu maa ra Juan ta ziquí ca tandíhi ca ra profeta.

¹⁰ Vatyí ra cuan cuu ra cahan si tuhun nuu tutu ra Ndyoo nu catyi si: “Yuhvi ra Ndyoo cua tasi sii minoo ra ityi nuu ca, ta cua zanduvaha ra cuhva iyo ñiyívi vatyí cua saa moo cuee ca, ta cua tyizoho ñu sa cohon.”

¹¹ Sa ndisa catyi sihin ndo vatyí tandíhi rayi ca, yoñi inga ca ra ñiñi ca ta ziquí ra Juan. Zoco ra luhlu ca, ra cuhun nu ndyaca ñaha ra Ndyoo, cahnu ca ra ta ziquí ra Juan, ra zacoo ndutya sii ñiyívi.

¹² Ta ndya quívi i saa ra Juan ta ndya vityí cuahan coyo ñiyívi gloria, ñu cuñi ndisa cuii cuhun. Zoco zañihi ñu ta cua zahacanaa ñu sii si.

¹³ Tandíhi ra profeta ta ley ra Moisés ndíhi ca, i cahan si sa cuenda cuhva cua cundyaca ñaha ra Ndyoo ndya cuhva ndya quívi i saa ra Juan.

¹⁴ Ta tatu cuñi ndo sino iñi ndo sa quehin, ra Juan cuu ra Elías, ra tahan si quisi.

¹⁵ Tatu ndyaa zoho ndo, cuiñi ndo.

¹⁶ ¿Ñaa ñi cuhva quehin sihin ñiyívi iyo vityí? ¿Tañi yoo ñi sa caa caa ñu? Caa ñu tañi sa ndyíhi sa ndyaa nuyahvi, ta cana saa si sii tahan si, ta catyi si:

¹⁷ “Tívi ndi cutu, ta ñá sata saha ndo. Ta sata ndi yaa tucuihya iñi, ta ñá sacu ndo.”

¹⁸ Tacuan iyo maa ndo vatyí i quisi ra Juan, ta ñá sasi vaha ra, ta ñá sihi ra vino, ta catyi ndo vatyí ñoho minoo tatyí cuihna sii ra.

¹⁹ Ta ziquí i saa mi, ra i quisi ndya gloria. Ta sasi ta sihi, ta catyi ndo vatyí tuhva xein coho ta cuahyi xein. Ta cuxaan ndo vatyí vaha ñiyívi cui sihin ra iyo cuatyí ta sihin ra tava xuhun cuenda ra ndyaca ñaha. Tacuan catyi ndo, zoco saha ra Ndyoo sa siñi tuñi maa ra sii ñiyívi sino iñi sii ra. Ta cua zañaha ñu sii maa ndo vatyí vaha sa siñi tuñi ra Ndyoo.

Cua ndyehe xaan ñiyívi tundoho vatyí ña tyaa ñu yahvi sa cahan ra Jesús

²⁰ Tacuan ta ziquí i quisaha cuxaan ra Jesús ta cahan ra sihin sa minoo minoo ñuu nu i zavaha xaan ra sa ndyityí vatyí ñiyívi ñuu cuan, ñá zama ñu cuhva iyo ñu. Tyehen i catyi ra Jesús:

²¹ ¡Ndahvi yoho ñuu Corazín! ¡Ta ndahvi yoho ñuu Betsaida! Vatyí tatu i zavehi sa ndyityí ndya ñuu Tiro ta ñuu Sidón tañi sa ndyehe maa ndo, sa ndisa vatyí cua zama ñu cuhva iyo ñu, ta cua nducuihya xaan iñi ñu sa cuenda cuatyí ñu ndya cuhva ndíhvi ñu zahma toon ta tyaa ñu ñiyaa xiñi ñu.

²² Zoco quívi cua tasi tuñi ra Ndyoo sii ñiyívi, ñihi ca cua tasi tuñi ra sii maa ndo ta ziquí sii ñiyívi ñuu Tiro ta ñuu Sidón cuan.

²³ Ta yoho ñuu Capernaum, ¿atu sica iñun vatyí cua ndoon ndya gloria? Cua noon ndya andyaya vatyí tatu i zavehi sa ndyityí ndya ñuu Sodoma tañi sa ndyehe ñiyívi ñuu Capernaum, ndisa vatyí ma zanaa ra Ndyoo ñuu Sodoma cuan ta cua coo si ndya cuhva ndya vityí.

²⁴ Zoco catyí sihin ndo vatyí quívi cua tasi tuñi ra Ndyoo sii ñiyívi, ñihi ca cua tasi tuñi ra sii ndoho ra ñuu Capernaum ta ziquí sii ñiyívi ñuu Sodoma.

Ñaha ndo, ta cuhve sa quitatu ndo, catyí ra Jesús

²⁵ Ta cuhva cuan i catyí ra Jesús: Zacahnu xein suun Ndyoo Zuti. Yoho ndyaca ñohon andívi ta ñuu ñiyívi. Tyixehun sa siñi tuñi suun sii ñiyívi sica iñi vatyí sito xaan ñu, ta zañohon sii si sii ñu cuu tañi sa ndyíhi ñuu ñiyívi ya.

²⁶ Tacuan zavohon vatyí tacuan cuñi moo.

²⁷ Ta ziquí i catyí tucu ra Jesús: Saha maa ra Ndyoo Zuti tandíhi sa iyo sii maa ra sii mi. Ta yoñi sa sito sii. Maa ñi ra Ndyoo Zuti cuu ra sito sii. Ta maa ñi mi site sii ra Ndyoo Zuti. Yoñi inga ra sito sii ra sa ndisa cuii. Ta zañehi sii yoo ra cuñi, cuhva iyo Zuti sa ndisa.

²⁸ Ñáha ndo, tandíhi ndoho ra sitatu xaan sa cuenda tyiño ndo ta sa cuenda sa vee xaan ndyizo ndo cuatyí ndo ta cua cuhve sa quitatu ndo.

²⁹ Cuhva ndo sa tyize yugo sa yozo xiñi mi xiñi ndo, ta cutuhva ndo sa cua zañehi sii ndo vatyí mi, vii xaan iye, ta zanduluhlu xein sii, ta cua nañihi ndo cuhva quitatu añima ndo.

³⁰ Vatyí ña yíi maa cua cuizo ndo yugo sa cua tyize xiñi ndo, ta carga sa cua cuizo ndo sa cuenda mi, ña vee si.

12

Tohon ra i casi ra Jesús yoco trigo quívi quitatu ñiyívi

¹ Minoo quívi quitatu ñiyívi i yaha ra Jesús mahñu itu trigo ñiyívi. Ta i sizoco ra i casi ra Jesús, ta i quisaha tohon ra zuhva yoco trigo, ta i zavii ra, ta sasi ra sii si.

² Ta cuhva sa ndyehe ra fariseo cuhva zavaha ra, i catyí ra sihin ra Jesús: Ndyehe, zatyíño ra sica noo suhun, ta ña catyí ley yo sa zatyíño yo quívi quitatu ñiyívi.

³ Zoco i catyí ra Jesús sihin ra: ¿Atu tañaha ca cahvi ndo cuhva i zavaha ra David ta ra ndíhi sihin ra minoo quívi i sizoco xaan ra?

⁴ I quíhvi ra sisi vehe ñuhu, ta i quíhin ra pan ii. Ta i sasi ra sii si, ta ña catyí ley sa casi ra sii si ta nu ra ndíhi sihin ra. Maa ñi ra cu zutu tahan si casi pan cuan.

⁵ ¿Atu tañaha ca cahvi ndo nu ley nu catyí si vatyí zatyíño ra cu zutu sisi vehe ñuhu quívi quitatu ñiyívi ta yívi cuatyí cuu si?

⁶ Ta catyí sihin ndo vatyí ihya iyo minoo ra cahnu ca ta ziquí vehe ñuhu.

⁷ Tatu sa sito ndo ñaa cuñi si catyí si nu i catyí ra Ndyoo vatyí cuñi ra sa cundahvi iñi ndo sii ñiyívi ta yívi ca sa cahñi ndo quíti ta cuhva ndo ñiñi ti sa cuenda cuatyí ndo, ma tyaa ndo cuatyí sata ñiyívi sa ñahñi cuatyí iyo.

⁸ Ta ra i quisi ndya gloria cui, ta ndyaca ñaha tuqui quívi quitatu ñiyívi.

Zanduvaha ra Jesús sii minoo ra na-ityi ndaha

⁹ Tacuan ta cuahan ra Jesús, ta i quíhvi ra vehe ñuhu.

¹⁰ Ta yucuan ndyaa minoo ra na-ityi ndaha. Ta inga ra yucu yucuan, i cuñi ra nducu ra cuhva tyaa ra cuatyí sata ra Jesús, ta yucuan cuenda i ndaca tuhun ra sii ra Jesús: ¿Atu catyí ley sa zanduvaha yo sii ñiyívi quívi quitatu yo?

¹¹ Ta i nacahan ra Jesús ta catyí ra: ¿Yoo ndoho tatu iyo minoo mvee ticatyí zono ndo ta canacava ti sisi minoo xahva quívi quitatu ñiyívi, atu ma tava ndo sii ti?

¹² Ta ¡ñiñi xaan ca cuu minoo ñiyívi ta ziquí minoo mvee ticatyí! Yucuan cuenda catyí ley vatyí cuu zavaha yo sa vaha quívi quitatu ñiyívi.

¹³ Tacuan ta i catyí ra Jesús sihin ra na-ityi ndaha cuan: Nandica ndohon. Ta i nandica ra ndaha ra, ta i nduvaha si tañi caa inga si.

¹⁴ Tacuan ta i quita ra fariseo, ta i quisaha sihñi tahan ra tyiño yozo caa cua cahñi ra sii ra Jesús.

Zavaha ra Jesús cuhva i tyaa minoo ra profeta ta sa naha

¹⁵ Ta sa sito ra Jesús cuhva cuan, i quita ra yucuan, ta cuaha xaan ñiyivi i sindyico sii ra. Ta i zanduvaha ra Jesús sii tandihi ñu cuhu.

¹⁶ Ta i saha ra tyiño sii ñiyivi i nduvaha vatyi ma nacaty i ñu yoo ra cuu ra.

¹⁷ Cuhva cuan i natahan si cuhva i nacaty ra Isaías, minoo ra profeta, sa cuenda ra Jesús. Ihya cuu Tuhun ra Ndyoo i tyaa ra Isaías:

¹⁸ Ihya ra cuu muzi; i casi sii ra; cuñi xein sii ra, ta zii xaan cuñi sihin ra.

Cua cuhva xein Taty i li sii ra,

Ta cua nacaty ra sihin ñiyivi sa yivi ñiyivi hebreo cuu vatyi ndoo xaan zavehi.

¹⁹ Ma tusi tahan ra tuhun.

Ta ma cana saa ñi ca ra ta cahan ra. Ta ma zacahnu ra sii ra nuu ñiyivi.

²⁰ Ma cahnu ndihi ra numinoo tuñi yacua, ta ma ndahva ndihi ra ñúhu sa siin ñi cayu. (Cuñi si catyi si vatyi ma quindyaa ndihi ra tatu siin ñi sino iñi ñiyivi.)

Cua quindyaa ra cuhva ndyaca ñaha ñiyivi ña vaha, ta cua cundyaca ñaha ra minoo cuhva ndoo xaan.

²¹ Ta tandihi cuii ñiyivi cuu cunii xaan iñi ñu sii ra vatyi cua tyindyee ra sii ñu.

Caty ra xaan iñi sii ra Jesús vatyi zatyño ra sihin tundyee iñi sii cuihna

²² Tacuan ta i quisi ndyaca ñiyivi sii minoo ra cuaa ta ñehe ra nu ndyaa ra Jesús. Ta ñoho minoo taty cuihna sii ra cuan. Ta i zanduvaha ra Jesús sii ra, ta i cuu nandyeehe ra ta nacahan ra.

²³ Ta iyo xaan i cuñi tandihi ñiyivi, ta i catyi ñu: ¿Atu ra ihya cuu ra cu tata ra David, ra cua zacacu sii yo?

²⁴ Zoco sa i siñi ra fariseo cuhva cahan ñiyivi, ta i catyi ra: Ra ihya tava ra taty cuihna maa ñi sihin tundyee iñi iyo sii ra Beelzebú, ra cu nuu sii cuihna.

²⁵ Ta sa sito ra Jesús cuhva sica iñi ra, ta i catyi ra: Tatu sahñi tahan xaan ñiyivi minoo ñuu, ndaha cua tivi ta naa ñuu cuan. Ta tacuan tucu minoo vehe ñiyivi, tatu sahñi tahan ñu sihin tahan ñu, yaty xaan cua ndihi cuhva vaha yucu ñu.

²⁶ Ta ma cahñi tahan ra cu nuu sii cuihna sihin inga cuihna vatyi tatu tacuan zavaha ra, yaty xaan cua ndihi cuhva iyo sii ra. Ma tava cuihna sii cuihna.

²⁷ Ta tatu yuhvi tave sii cuihna sihin tundyee iñi ra Beelzebú, ¿yoo sii tundyee iñi tava ra ndyico sii maa ndo sii si? Maa ra cua zacoto sii ndo vatyi ma tava minoo cuihna sii inga cuihna.

²⁸ Ta yuhvi tave sii cuihna sihin tundyee iñi maa ra Ndyoo. Ta cuñi si catyi si vatyi ndisa cuii sa saa cuhva ndyaca ñaha ra Ndyoo.

²⁹ Ta ¿yoo ra cua cuu quihvi vehe minoo ra ñihi xaan ta quihin ra ndaha tyiño ra tatu ma cuhñi xihna ra sii ra? Cuñi si sa cuhñi xihna ra sii ra ta ziqui cuu quindyaa ra ndaha tyiño ra.

³⁰ Tatu ña zatyño ñiyivi sihin, zativi ñu tyiñe. Ta tatu ma tyindyee ñu sii, sa nacaty Tuhun Ndyoo sihin ñiyivi, cuñi si catyi si vatyi ña saha ñu sa coto ñiyivi tuhin.

³¹ Yucuan cuenda catyi sihin ndo vatyi cua zaha ra Ndyoo tucahnu iñi tandihi cuaty zavaha ñiyivi ta tandihi sa quiñi cahan ñu, zoco tatu cahan ñiyivi ndya vaha ñi sii Taty i ra Ndyoo, ma zaha ra Ndyoo tucahnu iñi sii ñu.

³² Tatu quiñi cahan ñiyivi sii vii, ra i quisi ndya gloria, cua zaha ra Ndyoo tucahnu iñi sii ñu. Zoco yoo ra cahan quiñi sii Taty i, ma zaha ra Ndyoo tucahnu iñi sii ra nu ihya ñuu ñiyivi ta nu inga ñuu ñiyivi sa cua coo cuee ca.

Nacoto yo tatu vaha minoo yutu tatu saha tu yucu vixi vaha

³³ Minoo yutu vaha, saha tu siti vaha. Ta minoo yutu ña vaha, saha tu siti ña vaha. Nacoto yo ñaa yutu cuu tahan tahan tu sa cuenda siti saha tu.

³⁴ ¡Coo xaan cuu maa ndo! ¿Yozo caa cuu cahan ndo tuhun vaha ta ña vaha maa ndo? Yuhu ndo cahan sa situ cuii añima ndo.

³⁵ Minoo ra vaha, cahan ra tuhun vaha vatyí iyo sa vaha añima ra. Ta minoo ra ña vaha, ña vaha sa cahan ra vatyí iyo sa ña vaha añima ra.

³⁶ Ta catyí sihin ndo vatyí quívi cua tyicuhva ra Ndyoo sii ñiyívi, ta cua nacatyí ñu ñaa cuenda i cahan ñu sa minoo minoo tuhun sa ña ñiñi.

³⁷ Vatyí sa cuenda tuhun cahan ndo ta cua catyí ra Ndyoo tatu vaha ndo a ña vaha ndo.

Ñiyívi ña vaha cuñi ñu ndyehe ñu minoo sa ndyityí

³⁸ Tacuan ta zuhva ra fariseo ta ra maestro cuenda ley i catyí ra sihin ra Jesús: Maestro, cuñi ndi ndyehe ndi minoo zeña sa ndyityí.

³⁹ Ta i nacahan ra Jesús, ta catyí ra sihin ra: Ñiyívi quiñi xaan iyo ta ñu ña vaha, sica ñu sa ndyehe ñu sa ndyityí, zoco ma ndyehe ca ñu inga zeña ta ziquí cuhva i cuu ra Jonás, minoo ra profeta ta sa naha.

⁴⁰ Vatyí tañi i ñoho ra Jonás uñi quívi ta uñi sa cuaa sisi tyiyaca cahnu, tacuan tucu cua quíhi ra i quisi ndya gloria uñi quívi ta uñi sa cuaa sisi ñuhu.

⁴¹ Ñiyívi ñuu Nínive cua nduvita ñu ta cua tyaa ñu cuatyí sata ñiyívi iyo vityí, ta cua catyí ñu vatyí iyo cuatyí ndo vatyí ñiyívi ñuu Nínive cuan, i zama ñu cuhva iyo ñu sa i nacatyí ra Jonás Tuhun Ndyoo sihin ñu. Ta ihya iyo minoo ra ñiñi ca ta ziquí ra Jonás.

⁴² Ta tacuan tucu minoo ñaha i sindyaca ñaha ndya siyo tyañuhu, cua nandoto ña quívi cua tyicuhva ra Ndyoo sii ñiyívi, ta cua tyaa ña cuatyí sata ndo vatyí sica xaan i quisi ña quívi cuan vatyí cua tyizoho ña sa siñi tuñi sa saha ra Ndyoo sii ra Salomón. Ta ihya iyo minoo ra ñiñi ca ta ziquí ra Salomón.

Cuhva cua nandisi tucu tatyí ña vaha inga saha

⁴³ Tatu quita minoo tatyí ña vaha sii minoo ra, sica noo tatyí cuihna cuan nu ityí xaan, ta nanducu si nu cua quitatu si, zoco ña nañihi si nu quitatu si, ta catyí si:

⁴⁴ “Cunuhu tuqui ndya vehi nu i quite.” Ta sa nasaa si, nañihi si sii ra i quita si cuan. Ta añima ra cuu tañi minoo vehe sa yoñi ndyaa. Tíhvi ta nduvii vehe cuan.

⁴⁵ Tacuan ta cuahan tatyí cuihna cuan ta quihin si inga usa tahan tahan si sa xaan ca ta ziquí maa si. Ta cuahan tandíhi si cuan cua ndíhvi si añima ra cuan. Ta yaha ca cuhva cua nanduu ra cuan ta ziquí sa xihna ñi. Ta tacuan tucu cua tahan ñiyívi ña vaha ya.

Zíhi ra Jesús ta yañi ra

⁴⁶ Cahan ca ra Jesús sihin ñiyívi, ta i saa zíhi ra ta yañi ra. I sicuyucu ñu sata vehe, ta i cuñi ñu cahan ñu sihin ra.

⁴⁷ Ta i nacatyí minoo ñiyívi sihin ra Jesús: Zíhun ta yañun, nandyaa ñu sata vehe, cuñi ñu cahan ñu suhun.

⁴⁸ Zoco i catyí ra Jesús sihin ra cahan sihin ra: ¿Yoo sa cuu zíhi? ¿Ta yoo sa cuu yañi?

⁴⁹ Tacuan i catyí ra, ta ziquí i zañaha ndaha ra nu yucu ñiyívi sica noo sihin ra, ta i catyí ra: Ñu ihya cuu tañi zíhi, ta ra ihya cuu tañi yañi.

⁵⁰ Vatyí yoo ñiyívi zavaha cuhva cuñi Zutí, ra ndyaa andiví, yucuan ñu cuu tañi cuhve ta yañi ta zíhi.

13

Cahan ra Jesús ziquí minoo cuhva, cuhva ra tasi

¹ Quívi cuan i quita ra Jesús vehe, ta i sicundyaa ra yuhu miñi.

² I titahan cuaha xaan ñiyívi nu ndyaa ra, ta yucuan cuenda i quíhvi ra Jesús sisi minoo barco, ta i sicundyaa ra. Ta i ndoo tandíhi ñiyívi nu ñiyíti.

³ Tacuan ta i zacuaha ra sii ñu ziquí cuaha xaan cuhva, ta catyí ra: Cuahan minoo ra nu iyo tyiño ra vatyí cua quítí ra sítí trigo nu ñuhu ra.

⁴ Ta cuhva sa quítí ra sii si, zuhva si i canacoyo ityí. Ta i quisi zaa, ta sasi tí sii si.

⁵ Ta inga si i canacoyo nu yaxi ñoho ñuhu vatyí ñoho xaan yuu. Ta yatyí xaan i caña si vatyí yaxi xaan ñoho ñuhu.

⁶ Ta cuhva i ndyehe ñicandyi i naxii si vatyí ñahñi yoho si, ta i na-ityi si.

⁷ Ta zuhva ca sití cuan i canacoyo ticui iñu. Ta i caña si, zoco i zahvi iñu sii si.

⁸ Zoco inga tucu zuhva ca sití cuan, i canacoyo si nu vaha ñuhu, ta vaha xaan i saha si. Iyo si saha si ziendu sití si sa minoo ñi si. Iyo si saha si uñi xico usi. Ta iyo si saha si oco usi.

⁹ Tatu siñi ndo, ¡cuiñi ndo!

Cuenda sa i cahan xaan ra Jesús ziqui minoo cuhva

¹⁰ Tacuan ta i tuhva ra i casi ra Jesús, ta i ndaca tuhun ra sii ra: ¿Ñaa cuenda tuhvon cahan sihin ñiyivi ziqui minoo cuhva?

¹¹ Ta i nacahan ra Jesús, ta catyi ra: Saha ra Ndyoo sa coto maa ndo tuhun xehe sa cuenda cuhva ndyaca ñaha maa ra. Zoco ma cuu coto inga ñiyivi.

¹² Ra sa cutuñi iñi zuhva, cuaha ca cua cuhva ra Ndyoo sa cutuñi iñi ra. Ta ra ña cutuñi iñi, cua quindyaa ndihi ra Ndyoo ndya sa siin cuii ñi cutuñi iñi ra.

¹³ Yucuan cuenda quehin sihin ñu ziqui minoo cuhva vatyí cua ndyehe ñu, zoco ma coto ñu ñaa sa ndyehe ñu. Cua cuiñi ñu, zoco ma cutuñi iñi ñu. Cua cuu si tañi sa ñá siñi ñu.

¹⁴ Ta sa cuenda maa ñu cua natahan si cuhva i catyi ra Isaías. Ihya cuu cuhva i catyi ra: Ndisa cua cuiñi ndo, zoco ma cutuñi iñi ndo; Cua ndyehe ndo, zoco ma nacoto ndo ñaa sa ndyehe ndo.

¹⁵ Vatyí ñihi xaan iñi ndo, ta ña siñi ndo, ta ndaha titahan sití nuu ndo; coto ndyehe ndo ta coto cuiñi ndo ta coto cutuñi iñi ndo ta quisi ndo nu ndyei ta zanduvehi sii ndo. Tacuan i tyaa ra Isaías sa cuenda ñiyivi ña sino iñi cuan.

¹⁶ Zoco maa ndo, zii xaan cuu sii ndo vatyí ndyehe ndo sihin sití nuu ndo, ta siñi ndo sihin zoho ndo.

¹⁷ Ta sa ndisa catyi sihin ndo vatyí cuaha xaan ra profeta ta inga ñiyivi vaha, i cuiñi ñu ndyehe ñu sa ndyehe maa ndo vityi, zoco ñá ndyehe ñu sii si. Ta i cuiñi ñu cuiñi ñu sa siñi maa ndo, ta ñá siñi ñu sii si.

Nacatyí ra Jesús ñaa cuiñi si catyi si cuhva ra quití siti trigo nu ñuhu

¹⁸ Ta ziqui i catyi ra Jesús: Cuiñi ndo cuhva cuiñi si catyi si sa cuenda cuhva ra quití siti trigo nu ñuhu.

¹⁹ Ñiyivi sa siñi tuhun sa cuenda cuhva ndyaca ñaha ra Ndyoo ta ña cutuñi iñi ñu sii si cuu ñu tañi sití sa canacoyo ityi. Ta saa cuihna, ta quindyaa ra tuhun i tasi ra Ndyoo aña ñu.

²⁰ Sití sa canacoyo ticui yuu cuu tañi ñiyivi sa siñi Tuhun Ndyoo, ta zii xaan i cuiñi ñu.

²¹ Zoco ñá quihvi vaha Tuhun Ndyoo aña ñu. Ta ña naha cua sino iñi ñu. Tatu sa quisi minoo tundoho ziqui ñu a cuxaan ñiyivi sihin ñu sa cuenda Tuhun Ndyoo, vatyí xaan cua zaña ñu sii si.

²² Ta sití sa canacoyo ticui iñu cuu tañi ñiyivi sa siñi Tuhun Ndyoo, zoco sica xaan iñi ñu sa cuenda sa iyo ñuu ñiyivi ya. Ta tuhun cuca, tuhun zandavi ñaha ñi cuu si. Ta tandihí cuhva cuan, sahñi si Tuhun Ndyoo, ta ña zatyíño vaha si sihin ñiyivi cuan.

²³ Zoco sití sa canacoyo nu vaha ñuhu, cuu si tañi ñiyivi sa siñi Tuhun Ndyoo ta cutuñi iñi ñu sii si, ta vaha xaan zatyíño si sihin ñu. Iyo ñu cuu ñu tañi sití sa saha minoo ziendu sa minoo si. Ta inga ñu cuu tañi sití sa saha uñi xico usi. Ta inga ñu cuu tañi sití sa saha oco usi tahan sa minoo si.

Cuhva yucu ña vaha sa sahnú ticui trigo

²⁴ Tacuan ta ziqui i cahan ra Jesús ziqui inga cuhva, ta catyi ra: Cuhva ndyaca ñaha ra Ndyoo cuu si tañi minoo cuhva i tasi minoo ra sití vaha nu ñuhu ra.

²⁵ Zoco cuhva sa i quixi ñiyivi, ta i quihvi minoo ra xaan iñi sii sitocho ñuhu cuan, ta i tasi ra sití ña vaha ticui trigo, ta cuahan ra.

²⁶ I sahnú trigo, ta i caña yoco si. Ta ticui trigo i sahnú tucu yucu ña vaha cuan.

²⁷ Tacuan ta sahan muzu i sinacatyí ra sihin sitocho ñuhu cuan: “Tata, tatu vaha sití i tasun nu ñuhun, ¿yozo caa vatyí i caña tucu yucu ña vaha cuan?”

²⁸ Ta i catyi sitocho si: “Minoo ra xaan iñi sii, i zavaha cuhva cuan.” Ta ziqui i ndaca tuhun muzu ra sii ra: “¿Atu cuñun vatyí cutohon ndi yucu ña vaha cuan?”

²⁹ Zoco i catyi ra sihin ra: “Ma tohon ndo sii si coto quita ndihi trigo cuan.

³⁰ Vaha ca zandoo yo sii si, nacuahnu si ndya sa sisa si. Ta cua tasi muzu, ta cua tava xihna ra yucu ña vaha cuan ta cuhñi ra cuenda zucu si vatyí cua cayu si. Ta ziqui cua naquihin ra trigo ta tyihi ra sii si nu cua cucumi vehi sii si.”

Cuhva siti mostaza

³¹ Ta ziqui i cahan tucu ra Jesús ziqui inga cuhva, ta catyi ra: Cuhva ndyaca ñaha ra Ndyoo cuu si tañi minoo siti mostaza sa i tasi minoo ra nu ñuhu ra.

³² Ndisa vatyí luhlu ca maa siti cuan ta ziqui tandihi inga nuu siti, zoco tatu sa sahnú si, nducahnu ca si ta ziqui tandihi ca numa, ta nduu si tañi minoo yutu. Ta vasi zaa ta zavaha ti taca ti zoco tu.

Tañi yusa iya cuu cuhva ndyaca ñaha ra Ndyoo

³³ Ta i cahan tucu ra Jesús ziqui inga cuhva ya: Cuhva ndyaca ñaha ra Ndyoo cuu si tañi yusa iya sa nazaca minoo ñaha sihin uñi taha arroba yutyí pan, ta cua zanandaa yusa iya cuan sii tandihi yutyí pan cuan. (Ta tacuan tucu cuahan nducahnu ca sa ndyaca ñaha ra Ndyoo.)

Tuhva xaan ra Jesús cahan ziqui minoo cuhva

³⁴ I catyi ra Jesús tandihi ihya sihin ñiyivi ziqui minoo cuhva ta ziqui inga cuhva, ta ma cahan maa ra tatu ma cahan ra ziqui minoo cuhva.

³⁵ Tacuan i cuu si vatyí cua natahan si cuhva i tyaa minoo ra profeta. Ihya cuu sa i tyaa ra:

Cua quehin ziqui minoo cuhva;

cua nacatyí tuhun i sicoo xehe ndya quivi i zavaha ra Ndyoo ñuu ñiyivi.

Nacatyí ra Jesús ñaa cuñi si catyi si sa cuenda cuhva sahnú yucu ña vaha ticui trigo

³⁶ Tacuan ta i natasi ra Jesús sii ñiyivi, ta i quihvi ra sisi vehe, ta i tuhva ra i casi ra sii ra, ta catyi ra: Nacatyun sihin ndi ñaa cuñi si catyi si sa cuenda yucu ña vaha sa sahnú ticui trigo cuan.

³⁷ Ta i nacahan ra Jesús, ta catyi ra sihin ra: Ra i tasi siti vaha cuu ra i quisi ndya gloria.

³⁸ Ta ñuhu ra cuu ñuu ñiyivi. Ta siti vaha cuu tañi ñiyivi sa cuu cuenda ra Ndyoo. Ta yucu ña vaha cuan cuu tañi ñiyivi sa cuu cuenda cuhna.

³⁹ Ta ra xaan iñi sii, cuu ra tasi yucu ña vaha cuan. Cuihna cuu ra cuan. Ta ra cua nacuaan ndaha tyiño cuan cuu ángel. Ta quivi cua naquihin ra trigo cuan cuu si tañi nu cua ndihi ñuu ñiyivi.

⁴⁰ Ta tañi cuhva i tohon ra yucu ña vaha ta i sahmi ra, tacuan tucu cua cuu si nu ndihi ñuu ñiyivi.

⁴¹ Cua tasi ra i quisi ndya gloria sii ángel ra vatyí cua tava ziiin ra sii tandihi ñiyivi tyiyuhu sii inga ñiyivi ta zavaha ñu sa ña vaha ta sii inga ñiyivi zavaha sa ña vaha, ndihi ca.

⁴² Cua tyihi ángel sii ñu nu cayu ñuhu. Ta yucuan cua vacu ñu, ta cua casi quihñi noho ñu.

⁴³ Ta ñiyivi zavaha sa vaha cuhva cuñi ra Ndyoo, cua ndundisi xaan ñu tañi ñicandyi nu ndyaca ñaha ra Ndyoo Zutu yo. Tatu siñi ndo sa quehin, cuiñi ndo.

Cuhva minoo sa ñoho xehe ta yahvi xaan ndyaa si

⁴⁴ Cuhva ñihi yo sa cundyaca ñaha ra Ndyoo sii yo cuu tañi minoo sa yahvi xaan ndyaa ta ñoho xehe si sisi ñuhu. Ta i nañihi minoo ra sii si, ta natyixehe tucu ra sii si zuun ñi yucuan. Ta zii xaan i cuñi ra ta cuahan ra ta i xico ra tandihi sa iyo sii ra, ta i nazata ra ñuhu cuan.

Minoo cuhva perla sa yahvi xaan ndyaa

⁴⁵ Ta cuhva ndyaca ñaha ra Ndyoo sii yo vale xaan si tañi minoo cuhva minoo ra zata ndaha tyiño ta naxico ra. Sica noo ra ta nanducu ra perla vaha xaan.

⁴⁶ Ta quivi i nañihi ra minoo sa yahvi xaan ndyaa, cuahan ra ta i naxico ra tandihi sa iyo sii ra, ta i nazata ra perla cuan. (Ta tacuan tucu vale xaan Tuhun Ndyoo tañi perla cuan.)

Minoo cuhva sa cuenda minoo taraya

⁴⁷ Ta inga tucu cuhva, vatyí cuhva ndyaca ñaha ra Ndyoo cuu si tañi minoo taraya sa cañi ra tiin tyiyaca nu tyañuhu ta ñihi ra tandihi nuu tyiyaca.

⁴⁸ Tatu sa situ taraya ra, tava ra sii si nu ñiyiti ta yucuan cua cundyaa ra ta cua nacasi ra ñaa tyiyaca cuñi ra. Cua tyihi ra tyiyaca vaha sisi tyica, ta cua zavita ra tyiyaca ña vaha cuan.

⁴⁹ Ta tacuan cua cuu si nu cua ndihi ñuu ñiyivi. Cua quisi ángel vatyí cua tava zhin ra sii ñiyivi ña vaha sihin ñiyivi vaha.

⁵⁰ Ta ñiyivi ña vaha cuan cua tyihi ra nu cayu ñúhu, ta cua vacu ñu, ta cua casi quihñi noho ñu.

Sa vaha xaan sa saa ta sa sahnú

⁵¹ Tacuan ta ziqui i ndaca tuhun ra Jesús sii ra i casi ra: ¿Atu cutuñi iñi ndo tandihi cuhva ya? Ta i catyi ra: Cutuñi iñi ndi, tata.

⁵² Ta ziqui i catyi ra Jesús sihin ra: Tatu cua cutuhva minoo maestro cuenda ley sa cuenda cuhva ndyaca ñaha ra Ndyoo vityi cua cuu ra tañi minoo ra xu vehe sa cumi vaha sa sahnú ta sa saa sa vaha xaan, ta cuu zañaha ra nduu tahan si.

Sinuhu ra Jesús ñuu ra, ñuu Nazaret

⁵³ Sa ndihi cahan ra Jesús ziqui cuhva ya ta ziqui i quita ra yucuan, ta cuahan ra.

⁵⁴ Ta i nasaa ra zuun ñi ñuu maa ra. Ta yucuan i quisaha zacuaha ra sii ñiyivi sisi vehe ñuhu. Ta iyo xaan i cuñi ñiyivi, ta catyi ñu: ¿Yozo caa ñihi ra ya cuhva sa casi xaan iñi ra? ¿Ta yozo caa ñihi ra cuhva zavaha ra sa ndyityi?

⁵⁵ Ta zehe ra carpintero cuu sii ra. Ta ña María cuu zihí ra. Ta ra Jacobo, ta ra José, ta ra Simón, ta ra Judas cuu yañi ra.

⁵⁶ Ta cuhva ra iyo tucu ñu ihya sihin yo. ¿Ta yozo caa vatyí sito ra tandihi cuhva ya?

⁵⁷ Tacuan i cahan ñiyivi, ta yucuan cuenda ña cuñi ñu tyaa ñu yahvi sii ra Jesús. Zoco i catyi ra Jesús sihin ñu: Tyaa ñiyivi yahvi sii minoo ra profeta, zoco ñiyivi ñuu ra ta ñiyivi vehe ra ña tyaa ñu yahvi sii ra.

⁵⁸ Ta ña zavaha ra Jesús cuaha sa ndyityi yucuan vatyí ña sino iñi ñiyivi sii ra.

14

Cuhva i sihi ra Juan, ra i zacoo ndutyá

¹ Quivi cuan, ra Herodes ndyaca ñaha nacahnu Galilea, ta i siñi ra tuhun ra Jesús.

² Ta i catyi ra sihin muzu ra: Ra Juan Bautista cuu ra cuan. Sa nandoto ra, ta yucuan cuenda ndyityi xaan ra.

³ Tacuan i catyi ra Herodes vatyí maa ra cuu ra i tava tyiño ta i tiin ra sii ra Juan, ta sihñi ra sii ra, ta cuahan ra vehe caa. I zavaha ra sii si sa cuenda ña Herodías, ñazihí ra Felipe yañi ra.

⁴ Ra Juan cuu ra i catyi sihin ra Herodes: Ña vaha sa nacuhun ñazihí yañun.

⁵ I cuñi ra Herodes cahñi ra sii ra Juan, zoco i yuhu ra sii ñiyivi vatyí sino iñi tandihi ñu vatyí cahan ra Juan sa cuenda ra Ndyoo.

⁶ Zoco quivi tahan si cuiya ra Herodes, i quita zehe ña Herodías vatyí cua cata saha ña nuu ñiyivi i quisi vico ra. Ta i tahan xaan iñi ra Herodes cuhva i sata saha ña.

⁷ Ta i tyiñaha ra Herodes Ndyoo, ta i catyi ra sa ndisa cuii vatyí cua cuhva ra ñaa ñi maa sa cua caca ña.

⁸ Ta sa i nacatyí zihí ña sihin ña ñaa sa cua caca ña, ta i catyi ña sihin ra Herodes: Cuhvon xiñi ra Juan Bautista sii sihin minoo nu coho. Catyi ña.

⁹ I nducuihya xaan iñi ra rey Herodes sa siñi ra sa cahan ña, zoco sa tyiñaha ra Ndyoo, ta sa siñi ñiyivi yucu vico cuan. Ta yucuan cuenda i tasi ra tyiño, ta catyi ra vatyí cuhva ra sii si sii ña.

¹⁰ Ta i catyi ra vatyí cahndya yuu ra zucu ra Juan sisi vehe caa.

¹¹ Ta i quisi ndyaca ra sii si sihin minoo nu coho, ta saha ra sii ña luhlu. Ta i saha maa ña sii si sii zihí ña.

¹² Tacuan ta i quisi ra sica noo sihin ra Juan, ta i quihin ra coño ñuhu ra Juan, ta i sityihi ra sii si sisi ñuhu. Ta ziquí cuahan ra ta i nacatyí ra sihin ra Jesús.

Cuhva i saha ra Jesús sa casi ohon mil rayii

¹³ Ta sa sito ra Jesús cuhva cuan, ta i quita ra sisi minoo barco, ta cuahan ra maa tuhun ñi ra ndya minoo nu yoñi maa ñiyivi iyo. Zoco i ñihi ñiyivi tuhun, ta i quita ñu ñuu ñu, ta i sindyico ñu sii ra ityi nu ñuhu.

¹⁴ Ta sa i quita ra Jesús barco, i ndyehe ra cuaha xaan ñiyivi. Ta i cundahvi xaan iñi ra sii ñu, ta i zanduvaha ra sii ñu huhu sa sindyaca ñu.

¹⁵ Ta cuhva sa cua iñi, i quisi ra i casi ra nu ndyaa ra, ta catyi ra sihin ra: Sahiñi xaan. Ta yoñi ñiyivi iyo ihya. Catyun sihin ñiyivi nacuhun ñu. Nacuhun ñu nu iyo ñuu ta zata ñu sa casi ñu.

¹⁶ Zoco i catyi ra Jesús sihin ra: Ña tahan si sa cuhun ñu. Cuhva maa ndo sa casi ñu.

¹⁷ Ta i catyi ra i casi ra Jesús sihin ra: Ñahñi maa sa cumi ndi ihya. Ohon tahan ñi pan, ta uu tahan ñi tiyaca.

¹⁸ Ta i catyi ra Jesús sihin ra: Ta ndyaca ndo sii si ihya.

¹⁹ Tacuan ta i tava ra Jesús tyiño vatyí nacundyaa ñiyivi nu huhu. Ta i quihin ra sihin ndaha ra sa ohon tahan pan cuan ta uu tahan tiyaca cuan, ta i nandyehé ndaa ra. Ta i saha ra tyahvi ndyoo sii ra Ndyoo, ta ziquí i sahnu ndyihí ra pan cuan, ta saha ra sii si sii ra i casi ra. Ta i zasa maa ra sii si sii ñiyivi.

²⁰ Ta i sasi tandihí ñiyivi. Ta ndaha xaan iñi ñu. Ta ziquí i zanacutu ñu usi uu tahan tyica sihin yiquí pan sa nandoo ta tiyaca cuan.

²¹ Ta ñiyivi i sasi i cuu ohon mil rayii ta ziiñ ñu zihí ta sa ndyihí.

Cuhva i sica ra Jesús nu ndutya

²² Tacuan ta i catyi ra Jesús sihin ra i casi ra vatyí nandihvi ra barco ta cuyaha ra inga siyo miñi. Ta cua nandoo ra Jesús, ta cua catyi ra sihin tandihí ñiyivi vatyí cunuhu ñu ndya ñuu ñu.

²³ Ta sa yaha natasi ra Jesús sii ñu, ta ziquí i sahan ra minoo yucu maa tuhun ñi ra vatyí cua cahan ra sihin ra Ndyoo. Ta i cuaa, ta ndyaa ra yucuan maa tuhun ñi ra.

²⁴ Ta sa cuahan barco cuan mahñu miñi. Nandaa, nanoo tu zacuu ndutya vatyí ñihi xaan ñoho tatyí nu cuahan tu.

²⁵ Ta ñaa ca i tuhva ra Jesús nu yucu ra. Sica ra nu ndutya.

²⁶ Ta cuhva sa ndyehe ra sii ra Jesús vatyí sica ra nu ndutya, i yuhu xaan ra, ta i sacú saa ra sihin sa yuhu ra, ta catyi ra: ¡Minoo añima cuu si!

²⁷ Zoco i cahan ra Jesús, ta catyi ra: Zandyee ndo iñi ndo. Ma yuhu ndo vatyí mi cui.

²⁸ Tacuan ta i catyi ra Pedro sihin ra: Tata, tatu zuun yoho cuu, catyun sihin vatyí caque nu ndutya ta sei ndya nu vasun.

²⁹ Ta i catyi ra Jesús sihin ra: Ñaha. Ta ziquí i quita ra Pedro barco ta i quisaha sica ra nu ndutya ndya nu vasi ra Jesús.

³⁰ Zoco cuhva sa i tuu iñi ra vatyí ñihi xaan ñoho tatyí, ta i yuhu ra. Ta i quisaha ndyee ra sisi ndutya, ta i cana saa ra, ta catyi ra: ¡Tata, zacacun sii!

³¹ Ta zuun ñi caa cuhva cuan i natiñ ra Jesús ndaha ra, ta i catyi ra sihin ra: ¡Siin xaan sino iñun sii! ¿Ñacu ña ñii iñun? Catyi ra.

³² Ta i ndihvi ra Jesús ta ra Pedro sisi barco, ta i cutaxi tatyí.

³³ Ta ziquí ra ñoho barco cuan, i sicuiñi siti ra, ta i zacañu ra sii ra Jesús, ta catyi ra: Sa ndisa cuii vatyí Zehe ra Ndyoo cuu suun.

Cuhva i zanduvaha ra Jesús sii ñiyivi huhu nu cu si Genesaret

³⁴ Ta i yaha ra miñi, ta i saa ra nu cu si Genesaret.

³⁵ Ta cuhva sa i nacoto ñiyivi yucuan sii ra Jesús, ta i zacoto ñu naca cahnu, ta i quisi ndyaca ñiyivi sii tandihi ñu cuhu ndya nu ndyaa ra Jesús.

³⁶ Ta i sica ñu tumañi iñi sii ra vatyí nacuhva ra sa tiin ñu vazu yuzahma ñi ra. Ta tandihi ñiyivi i tiin sii si, i nduvaha ñu.

15

Sa zatívi añima ñiyivi

¹ Tacuan ta ziqui i tuhva zuhva ra fariseo ta ra maestro cuenda ley sii ra Jesús. I quisi ra ndya ñuu Jerusalén, ta i ndaca tuhun ra sii ra Jesús:

² ¿Ñaa cuenda ña zavaha ñiyivi sica noo suhun costumbre i zandoo ñiyivi sahnú? Vatyí ña nacatya vaha ñu ndaha ñu ta casi ñu.

³ Tacuan i catyi ra cuan, ta ziqui i ndaca tuhun ra Jesús sii ra: ¿Ta ñaa cuenda vatyí ña tyaa maa ndo yahvi sii ley ra Ndyoo vatyí cuñi ndo cundyico ndo costumbre?

⁴ Vatyí i catyi maa ra Ndyoo: “Tyaa ndo yahvi sii zutu ndo ta sii zihí ndo”, ta “Yoo ra cahan ndya vaha ñi sihin zutu ra a sihin zihí ra, nacahñi ñiyivi sii ra.”

⁵ Zoco catyi maa ndo vatyí cuu catyi minoo ra sihin zutu ra a sihin zihí ra: “Ma cuu tyindyeyi suun vatyí tandihi sa iyo sii, saha cuende sii ra Ndyoo.”

⁶ Ta yoo ra catyi cuhva cuan, ña cuñi ca si sa tyindyey ra sii zutu ra a sii zihí ra, catyi maa ndo. Ta sihin cuhva cuan tyaa siyo ndo ley maa ra Ndyoo vatyí cuñi ndo cundyico ndo sii costumbre maa ndo.

⁷ ¿Zaha ndo tuhun vatyí vaha xaan ñiyivi cuu ndo, zoco ña ndisa! Vaha xaan i cahan ra Isaías sa cuenda ndo quivi i tyaa ra ihya tuhun i saha ra Ndyoo sii ra:

⁸ Ihya ñiyivi zacahnu ñu sii, sihin yuhu ñu.

Zoco ña zacahnu ñu sii, sa ndisa.

⁹ Nahñi tuhun cuu sa zavaha ñu culto;

Zacuaha ñu sii ñiyivi maa maa cuhva costumbre ñiyivi.

Ta ña zavaha ñu cuhva catyi Tuhun Ndyoo sa ndisa.

¹⁰ Tacuan i nacatyi ra Jesús cuhva i tyaa ra Isaías ta sa naha, ta ziqui i cana ra sii ñiyivi, ta catyi ra sihin ñu: Tyizoho ndo, ta tyituñi iñi ndo.

¹¹ Yivi sa sasi ñiyivi ta yivi sa sihi ñu cuu sa zatívi añima ñu. Zoco sa quiñi sica iñi ñu ta cahan ñu cuu sa zatívi añima ñu.

¹² Tacuan i catyi ra Jesús, ta ziqui i quisi ra i casi ra, ta i catyi ra sihin ra: ¿Atu siton vatyí i cuxaan ra fariseo sihin cuhva cohon?

¹³ Zoco i nacahan ra Jesús ta catyi ra: Tandihi yava sa ñá tasi Zuti ra ndyaa andívi, cua quita ndya yoho si.

¹⁴ Ma tyaa ndo yahvi sii ra fariseo. Cuu ra tañi ra cuaa ta zañaha ra ityi sii inga ra cuaa. Ta tatu zañaha minoo ra cuaa ityi sii inga ra cuaa cua canacava nduu tahan ra sisi minoo xahva. Catyi ra Jesús.

¹⁵ Ta ziqui i catyi ra Pedro sihin ra Jesús: Nacatyun sihin ndi ñaa cuñi si catyi si cuhva i cohon cuan.

¹⁶ Ta i catyi ra Jesús: ¿Atu ndya maa ndo ta ña cutuñi iñi ndo?

¹⁷ ¿Atu ña cutuñi iñi ndo vatyí tandihi sa sasi ñiyivi cuahan si ndya sisi ñu ta ziqui quita tucu si?

¹⁸ Zoco sa quita yuhu ñiyivi, quita si añima ñu. Ta yucuan cuu sa zatívi sii ñiyivi.

¹⁹ Vatyí añima ñu quita tandihi tuhun ña vaha sa sica iñi ñu. Quita tuhun sa cuñi ñu cahñi ñu sii inga ñiyivi, sa cuñi rayhi sii inga ñaha ta yivi ñazihí ra cuu, sa quiñi zavaha ñu, sa zuhu ñiyivi, sa vatya ñiyivi, ta sa cahan ñu ndya vaha ñi sii inga ñiyivi.

²⁰ Tandihi ihya cuu sa zatívi añima ñiyivi. Zoco tatu casi ñu ta ma nacatya ñu ndaha ñu tañi catyi costumbre, yivi sa yucuan cua zatívi sii ñu.

Cuhva i sino iñi minoo ñaha inga ñuu sii ra Jesús

²¹ I quita ra Jesús yucuan, ta cuahan ra ndya ñuu Tiro ta ñuu Sidón.

²² Ta minoo ñaha cananea sa ndyaa yucuan i ndyehe ña sii ra Jesús, ta i cana saa ña, ta catyi ña: ¡Tata, zehe ra David, cundahvi iñun sii! Ñoho minoo tatyí cuihna sii ña luhlu zehi, ta ndyehe xaan ña tundoho. Catyi ñaha cuan sihin ra Jesús.

²³ Zoco ñá nacahan ra Jesús sa cahan ña. Ta ziquí i quisi ra i casi ra Jesús, ta i zañiñi ra sii ra, ta catyi ra: Catyun sihin ña vatyí nacuhun ña vatyí ndyico xaan ña sii yo ta cana saa xaan ña.

²⁴ Tacuan i catyi ra, ta ziquí i catyi ra Jesús sihin ña: I tasi ra Ndyoo sii mi maa ñi sa cuenda mvee ticatyí hebreo sa cua naa. Catyi ra.

²⁵ Zoco i tuhva ñaha cuan, ta i sicuñiñi siti ña nuu ra Jesús, ta catyi ña: ¡Tyindyeyun sii, tata!

²⁶ Zoco i catyi ra Jesús sihin ña: Natyindyee xihna que sii ñiyivi ñui vatyí ña vaha sa quindyeyi pan sa casi zehi ta cuhve sii si casi ina. Catyi ra.

²⁷ Zoco i catyi maa ña sihin ra: Ndisa, tata; zoco ndya cuhva ndya ina ta sasi ti yu pan sa canacava yumesa nu sasi sito ho ti. Ta tacuan tucu ii.

²⁸ Tacuan i catyi ña, ta ziquí i catyi ra Jesús: ¡Maha, sino xaan iñun sii! Cua cuu si cuhva cuñi moo. Ta zuun ñi cuhva cuan, ndaha nduvaha ñi zehe ña.

Zanduvaha ra Jesús sii cuaha xaan ñu cuhu

²⁹ I quita ra Jesús yucuan, ta i yaha ra yuhu miñi sa nañi Galilea, ta ziquí i ndaa ra minoo yucu, ta i sicundyaa ra yucuan.

³⁰ I saa cuaha xaan ñiyivi nu ndyaa ra. Sindyaca ñu sii ñu coxo, ta ñu cuaa, ta ñu ñehe, ta ñu cumañi ndaha ta cuaha xaan inga ñu cuhu. I saqui ñu sii ñu nu ndyaa ra Jesús, ta i zanduvaha ra sii ñu.

³¹ Ta iyo xaan i cuñi ñiyivi vatyí i cuu nacahan ñu ñehe, ta ñu cumañi ndaha i nacundyaa ndaha ñu. Ta i cuu nacaca ñu coxo ta nandyehé ñu cuaa. Ta i quisaha zacahnu xaan ñiyivi sii ra cu Ndyoo cuenda ñiyivi hebreo.

Cuhva i saha ra Jesús sa casi cumi mil rayii

³² Tacuan ta ziquí i cana ra Jesús sii ra i casi ra, ta i catyi ra sihin ra: Cundahvi xaan iñi sii ñiyivi ya vatyí sa uñi quivi ndyaa ñu ihya sihin, ta ñahñi maa sasi ñu. Ña cuñi natasi sii ñu ndya vehe ñu tatu ma casi ñu coto cuaña ñu ityi cuhun ñu.

³³ Tacuan ta i catyi ra i casi ra Jesús sihin ra: Zoco ¿ndya ityi cua quihin yo sa casi cuaha xaan ñiyivi ya sicuhu ya? Ta yoñi ñiyivi iyo ihya. Catyi ra.

³⁴ I ndaca tuhun ra Jesús sii ra: ¿Yozo tahan pan cumi ndo? Ta i catyi ra cuan: Usa tahan ta uu tahan tyiyaca ndyihí. Catyi ra.

³⁵ Ta ziquí i catyi ra Jesús vatyí nacundyaa ñiyivi nu ñuhu.

³⁶ Ta i quihin ra sa usa tahan pan cuan ta tyiyaca ndyihí cuan sihin ndaha ra, ta saha ra tyahvi ndyoo sii ra Ndyoo. Ta ziquí i sahnu ndyihí ra sii si, ta saha ra sii ra i casi ra, ta i zasa maa ra sii si sii ñiyivi.

³⁷ I sasi tandihí ñu, ta ndaha xaan iñi ñu. Ta ziquí i zacutu ñu usa tahan tyica sihin yu pan cuan ta tyiyaca sa nandoo cuan.

³⁸ Ñiyivi i sasi i cuu cumi mil rayii ta ziquí ñu zihí ta sa ndyihí.

³⁹ Yaha cuan ta i natasi ra Jesús sii ñiyivi ndya vehe ñu, ta i ndihvi ra barco ta cuahan ra ndya nu cu si Magdala.

16

Sica ra fariseo ta ra saduceo minoo sa ndyityi sii ra Jesús

¹ I quisi ra fariseo ta ra saduceo nu ndyaa ra Jesús vatyí cuñi ra coto ihñi ra sii ra, ta i sica ra sii ra vatyí zañaha ra minoo sa ndyityi sii ra sa quita ndya andivi.

² Zoco i nacahan ra Jesús ta catyi ra sihin ra: Sa sahiñi tuhva maa ndo catyi: “Cua cundisi vaha ityaan vatyí cuaha xaan vico.”

³ Ta sa ñaha ñi tatu cuaha vico, tuhva ndo catyi: “Ña vaha cua cuu quivi vityi vatyí iñi ñaa.” Zaha ndo tuhun vatyí vaha xaan ndo, zoco ña ndisa ndo. Tuhva ndo nacoto ñaa

sa cua coo sa cuenda cuhva caa andivi, zoco ña nacoto ndo ñaa sa cua cuu ñuu ñiyivi sa cuenda cuhva ya vityi.

⁴ Ñiyivi ña vaha sa iyo vityi, iyo xaan cuatyí ñu, ta sica ñu sa ndyehe ñu sa ndyityi, zoco minoo ñi zeña cua ndyehe ñu tañi cuhva i cuu sii ra Jonás. Tacuan i catyi ra Jesús, ta ziqui i zandoo ra sii ra cuan ta cuahan ra.

Tuhun cahan ra fariseo cuu tañi yusa i siya

⁵ Cuhva sa yaha ra i casi ra Jesús ndya inga siyo miñi, i naa iñi ra cuizo ra pan casi ra.

⁶ Ta ziqui i catyi ra Jesús sihin ra: Ndyehe ndo. Zacuenda ndo sii ndo sihin yusa i siya sii ra fariseo ta ra saduceo.

⁷ Tacuan i catyi ra Jesús, ta i natuhun tahan ra i casi ra, ta i catyi ra: Cahan ra tacuan vatyí ñahñi pan ndyizo yo.

⁸ I sito ra Jesús sa natuhun ra, ta catyi ra: ¿Ñaa cuenda catyi ndo vatyí ñahñi pan ndyizo ndo? ¡Siin xaan sino iñi ndo!

⁹ ¿Atu tañaha ca cutuñi iñi ndo? ¿Atu ña nacohon iñi ndo sa ohon tahan pan i zase sii ohon mil rayii? ¿Ta yozo tahan ca tyica si i naquihin ndo?

¹⁰ Ta ¿atu ña nacohon iñi ndo sa usa tahan pan i zase sii cumi mil rayii? ¿Ta yozo tahan ca tyica si i naquihin ndo?

¹¹ ¿Ta yozo caa vatyí ña tuu iñi ndo vatyí ña quehin sa cuenda pan cuhva i catyi vatyí nazacuenda ndo sii ndo sihin yusa i siya sii ra fariseo ta ra saduceo?

¹² Tacuan i catyi ra Jesús, ta ziqui i cutuñi iñi ra i casi ra vatyí ña cahan ra Jesús tuhun pan, zoco cahan ra sa cuenda cuhva zacuaha ra fariseo ta ra saduceo (vatyí ña vaha si).

Nacatyí ra Pedro vatyí ra Jesús cuu ra cua zacacu sii ñiyivi

¹³ Cuhva i saa ra Jesús ndya nu cu si Cesarea de Filipo i ndaca tuhun ra sii ra i casi ra: ¿Ñaa catyi ñiyivi yoo ra cuu vii, ra i quisi ndya gloria?

¹⁴ Ta i catyi ra sihin ra: Iyo ñiyivi catyi vatyí minoo ra i nandoto cuun tañi ra Juan, ra i zacoo ndutya sii ñiyivi a ra Elías a ra Jeremías a inga ra cu profeta ta sa naha cuun.

¹⁵ Ta ziqui i catyi ra Jesús sihin ra: Ta maa ndo, ¿yoo ra cui catyi maa ndo?

¹⁶ Ta i catyi ra Simón Pedro: Yoho cuu ra Cristo, ra cua zacacu sii ndi. Ta zehe ra Ndyoo ndito cuu suun.

¹⁷ Ta i nacahan ra Jesús, ta catyi ra sihin ra: Zii xaan cuu suun, Simón, zehe ra Jonás, vatyí yoñi ñiyivi zañaha cuhva cuan suun. Maa Zuti ra ndyaa andivi i zañaha cuhva cuan suun.

¹⁸ Ta yuhvi catyi suhun vatyí yoho cuu ra Pedro. Ta nu yuu ya cua zandei vehe ñuhi, ta ma cuu zahacanaa tuhun sihi ta andyaya sii vehe ñuhi.

¹⁹ Ta yuhvi cua cuhve ndaha ticui suun sa cuenda nu ndyaca ñaha ra Ndyoo, ta ñaa sa cua cuhñun ihya ñuu ñiyivi, cua cunuhñi tucu si ityi nuu ra Ndyoo. Ta sa cua ndasun ihya, ñuu ñiyivi, cua ndasi tucu si ityi nuu ra Ndyoo.

²⁰ Tacuan i catyi ra Jesús, ta ziqui ñihi xaan i saha ra tyiño sii ra i casi ra vatyí ma nacatyí ra nu sihin minoo ñiyivi vatyí ra Cristo cuu ra.

Zacoto ra Jesús cuhva cua cuu ra

²¹ Ta ndya cuhva cuan i zacoto ra Jesús casi xaan sii ra i casi ra yozo caa cuñi si sa cahun ra ñuu Jerusalén. Ta ra mandoñi ta ra zutu nahnu ta ra cu maestro cuenda ley cua zandyehe xaan ra tundoho sii ra. I catyi ra Jesús sihin ra i casi ra vatyí cua cahñi ra cuan sii ra, zoco sa cu uñi quivi ta cua nandoto ra.

²² Ta ziqui i tava ziiin ra Pedro sii ra, ta ñihi xaan i cahan ra sihin ra, ta catyi ra: ¡Numinoo saha, ta ma tahan si suun, tata! ¡Natyindyee ra Ndyoo suun, ta ma tohon sa tacuan!

²³ Zoco i nasico cava ra Jesús, ta i catyi ra sihin ra Pedro: ¡Cuiñi siyon sii, cuihna! Zayanga xoon sii, vatyí ña sica iñun cuhva sica iñi ra Ndyoo. Sica iñun cuhva sica iñi ñiyivi.

²⁴ Ta ziqui i catyi ra Jesús sihin ra i casi ra: Tatu iyo ra cuñi cundyico sii, nazama ra cuhva iyo ra. Ta ma zacahnu ra sii ra. Ta nandyeha ra tundoho sa cuenda mi. Ta nazavaha ra cuhva zavehi.

²⁵ Tatu ña cuñi ñiyivi sa cuu ñu sa cuenda Tuhun Ndyoo, cua cuu ñu, ta cua cuhun ñu andyaya, ta ma cundito ñu sihin ra Ndyoo. Zoco tatu cua cuu ñiyivi sa cuenda mi a sa cuenda Tuhun Ndyoo cua cundito ñu sihin ra Ndyoo.

²⁶ ¿Ñaa sa ñihi ñiyivi sa zahacanaa ñu tandihi sa iyo ñuu ñiyivi ta quivi cua cuu ñu, ndaha cua naa ñi ñu? ¿Ta yozo caa cuu tyiyahvi ñiyivi ta ñihi tahvi añima ñu?

²⁷ Vaty yuhvi, ra i quisi ndya gloria, cua quisi inga saha, ta tyaqui xaan cua cui tañi cuhva caa Zuti. Cua quisi sihin ángel, ta ziqui cua tyiyahvi sii minoo minoo ñiyivi sa cuenda cuhva i zavaha ñu.

²⁸ Sa ndisa cui catyi sihin ndo vaty iyo zuhva ra yucu ihya, ma cuu ra ndya cuhva ndya cua ndyeha ra vaty ndisi tucu ra i quisi ndya gloria inga saha sihin cuhva cua cundyaca ñaha ra sii ñiyivi.

17

Cuhva i zama ra Ndyoo cuhva caa ra Jesús minoo saha

¹ I yaha iñu quivi, ta ziqui i quihin ra Jesús sii ra Pedro ta ra Jacobo ta ra Juan yañi ra Jacobo ta cuahan ra sihin maa ñi maa ra ndya minoo yucu zucu xaan.

² Ta yucuan i zama cuhva caa ra Jesús ityi nuu ra cuan. Ndisi xaan i nduu nuu ra tañi ñicandyi, ta cui xaan i nduu zahma ra tañi ñúhu.

³ Ta zuun ñi cuhva cuan, i ndyeha ra sii ra Moisés ta ra Elías. (Ra i sihi ta sa naha cuu nduu tahan ra cuan.) Natuhun ra sihin ra Jesús.

⁴ Ta ziqui i catyi ra Pedro sihin ra Jesús: Tata, ¡vaha xaan yucu yo ihya! Tatu cuñun cua zavaha ndi uñi tahan vehe tyiyahva, minoo cuenda moo, ta minoo cuenda ra Moisés, ta inga si cuenda ra Elías.

⁵ Nii ñi sa cahan ra Pedro, ta i quisi minoo vico ndisi xaan si, ta ndaha tyazi si sii tandihi ra; ta sisi vico cuan i siñi ra minoo nduzu, ta catyi si: Ra ihya cuu Zehi. Cuñi xein sii ra. Zii xaan cuñi sihin ra. Cuiñi ndo sa cahan ra.

⁶ Ta sa siñi ra i casi ra Jesús tuhun cuan, i sicava ndyayu ra nu ñuhu, ta i yuhu xaan ra.

⁷ Ta ziqui i tuhva ra Jesús sii ra, ta i tyizo ra ndaha ra sii ra, ta catyi ra: Nduvita ndo. Ma yuhu ndo.

⁸ Ta cuhva sa nandyeha ra, yoñi inga ca ra ndyeha ra, maa ñi ca ra Jesús.

⁹ Ta cuhva sa vasi noo ra yucu cuan, ñihi xaan i saha ra Jesús tyiño sii ra, ta catyi ra: Ma nacaty ndo sa ndyeha ndo nu sihin minoo ñiyivi ndya sa yaha nandoto ra i quisi ndya gloria sisi sa i sihi ra.

¹⁰ Tacuan i catyi ra Jesús, ta ziqui i ndaca tuhun ra i casi ra sii ra: ¿Ñaa cuenda catyi ra maestro cuenda ley vaty tahan si sa quisi xihna ca ra Elías?

¹¹ Ta i nacahan ra Jesús, ta catyi ra: Sa ndisa vaty xihna ca cua quisi ra Elías, ta cua zanduvaha ra tandihi.

¹² Zoco yuhvi catyi sihin ndo vaty sa i quisi ra Elías, ta ñá nacoto ñiyivi sii ra. I zavaha ñu sihin ra tandihi sa cuñi maa ñu. Ta zuun ñi cuhva cuan cua ndyeha tucu ra i quisi ndya gloria tundoho zacuu ñiyivi.

¹³ Tacuan i catyi ra Jesús, ta ziqui cutuñi iñi ra i casi ra vaty cahan ra Jesús tuhun ra Juan, ra i zacoo ndutya sii ñiyivi.

I zanduvaha ra Jesús sii minoo ra luhlu sa ñoho taty cuihna

¹⁴ Cuhva sa i nasaa ra nu yucu tuu xaan ñiyivi, i tuhva minoo ra sii ra Jesús, ta i sicuiñi siti ra nuu ra, ta catyi ra:

¹⁵ Tata, cundahvi iñun sii ra luhlu zehi. Ñihi xaan tahan ra, ta ndyeha xaan ra tundoho. Cuaha xaan saha nduva ra nu ñoho ñúhu a sisi ndutya.

¹⁶ I quisi ndyaque sii ra sii ra sica noo suhun, zoco ñá cuu zanduvaha ra sii ra.

¹⁷ Ta i nacahan ra Jesús, ta i catyi ra: ¡Ndoho cuu ñiyivi ña sino iñi, ta ña vaha ndo! Ma cundyee iñi cundyeyi sihin ndo naha xaan ca. Ta ndyaca ndo sii ra luhlu ña ihya.

¹⁸ Tacuan ta ziqui i cahan ra Jesús sihin tatyí cuihna, ta i tava ra sii si sii ra luhlu, ta i nduvaha ra zuun ñi caa cuhva cuan.

¹⁹ Cúee ca i cahan ra i casi ra sihin maa ñi maa ra Jesús, ta i catyi ra: ¿Ñacu ñá cuu tava maa ndi sii tatyí cuihna cuan?

²⁰ Ta i catyi ra Jesús sihin ra: Ñá cuu sii ndo vatyi siin cuii ñi sino iñi ndo. Sa ndisa catyi sihin ndo vatyi tatu sino iñi ndo vazu zuhva ñi tañi cuhva caa minoo siti mostaza, cua cuu catyi ndo sihin yucu ya: “Cuiñi siyon ihya, ta cuhun inga ityi.” Ta cua cuiñi siyo si. Ta ñahñi maa sa ma cuu sii ndo.

²¹ Zoco nuu tatyí cuihna sa ñoho sii ra luhlu cuan, quita si maa ñi sa caca ndo sii ra Ndyoo ta coo ndyitya ndo.

Zacoto tucu ra Jesús inga saha cuhva cua cuu ra

²² Nii ñi sa iin ñi sica noo ra nu cu si Galilea, i catyi ra Jesús sihin ra: Cua xico minoo ra sii ii, yuhvi ra i quisi ndya gloria.

²³ Ta cua cahñi ñiyivi sii, ta sa cu uñi quivi cua nandoto tuqui. Ta sa catyi ra Jesús cuhva cuan, cuihya xaan i cuñi ra i casi ra.

Xuhun cuenda vehe ñuhu

²⁴ Cuhva i saa ra Jesús sihin ra i casi ra ndya ñuu Capernaum, ra zatyiyahvi sii ñiyivi xuhun cuenda vehe ñuhu i sahan ra i sicahan ra sihin ra Pedro, ta i ndaca tuhun ra sii ra: ¿Atu ña tuhva ra maestro ndo tyiyahvi xuhun cuenda vehe ñuhu?

²⁵ Ta i catyi ra Pedro: Tuhva ra. Ta cuhva sa quihvi ra Pedro sisi vehe i cahan xihna ra Jesús sihin maa ra, ta catyi ra: ¿Yozo caa cuñi oo, Simón? ¿Yoo sii zatyiyahvi ra rey, ra ndyaca ñaha ñuu ñiyivi ya? ¿Atu zatyiyahvi ra sii ñiyivi sii ra a sii ñiyivi inga ñuu?

²⁶ Ta i nacahan ra Pedro ta catyi ra: Sii ñiyivi inga ñuu zatyiyahvi ra. Ta yivi sii ñiyivi sii ra. Ta i catyi ra Jesús sihin ra: Ndisa. Ta ñiyivi sii ra, ña tahan si tyiyahvi ñu.

²⁷ Zoco ña cuñi yo sa zacuxaan yo sii ñiyivi. Yucuan cuenda cuahan ndya miñi ta cañun zuelun. Tyiyaca sa cua tiin sii si sa xihna ñi, ndyehun yuhu ti, ta cua nañuhun minoo xuhun. Ta maa cuhva ñi tyiyahvun sa cuenda mi ta sa cuenda moo. Cuhun sihin si, ta tyiyahvun.

18

¿Yoo ra cuu ra ñiñi ca?

¹ Cuhva cuan i tuhva ra i casi ra Jesús sii ra, ta i ndaca tuhun ra sii ra: ¿Yoo nduhvi cuu ra ñiñi ca sa cuenda ra Ndyoo?

² Tacuan i catyi ra, ta i cana ra Jesús sii minoo ra luhlu ndya nu ndyaa ra. Ta i sañi ndyaa ra sii ra mahñu nu yucu ra.

³ Ta i catyi ra sihin ra sica noo sihin ra: Sa ndisa catyi sihin ndo vatyi tatu ma zama ndo cuhva iyo ndo ta nduu ndo tañi sa ndyihí sa ñahñi cuatyí, ma cuu quihvi ndo nu ndyaca ñaha ra Ndyoo.

⁴ Ra ñiñi ca nu ndyaca ñaha ra Ndyoo cuu ra zanduluhlu sii ra ta nduu ra tañi minoo ra luhlu.

⁵ Ta yoo cua tiin cuenda vaha sii minoo ra luhlu tañi ra ya sa cuenda mi, tiin cuenda tucu ra sii mi cuhva cuan.

Ica xaan tatu zavaha yo cuatyí

⁶ Yoo ra cua zañaha sii minoo ra luhlu sa sino iñi sii, tañi ra luhlu ya cuhva zavaha ra sa ña vaha ta ma cundyico ca ra sii, vaha ca tatu sa i sihñi ñiyivi zucu ra cuan sihin minoo yuu yozo vee xaan ta zavita ñu sii ra sisi tyañuhu yatyi ca.

⁷ ¡Ndahvi ñiyivi ñuu ñiyivi vatyi tandihí tyiemvu iyo sa ña vaha sa cuñi ñu zavaha ñu! Ta tacuan cua cuu si, zoco ndahvi ñi cuu ra tyiyuhu sii ñiyivi ta zavaha ñu cuatyí.

⁸ Yucuan cuenda tatu cuñun zavohon sa ña vaha sihin ndohon a sihin sohon, cahndya ndaxun sii si ta zaviton sii si vatyí vaha ca cuhun gloria tañi minoo ra ñahñi ndaha a minoo ra coxo ta ma cuhun andyaya sihin nduu tahan ndohon ta nduu tahan sohon sisi ñuhu sa ma ndahva.

⁹ Ta tatu cuñun ndyehun sa ña vaha sihin minoo siti nuun, tavon sii si ta zaviton sii si vatyí vaha ca cua quihvun gloria sihin minoo ñi siti nuun nu ndyaca ñaha ra Ndyoo, ta ma cuhun sihin nduu tahan siti nuun andyaya nu cayu ñuhu.

Cahan ra Jesús ziqui minoo cuhva, cuhva minoo mvee ticatyí sa cua naa

¹⁰ Zaha ndo cuenda sii ndo, ta ma catyí ndo sa ma tyaa ndo yahvi vazu sii ra ndyíhi vatyí catyí sihin ndo vatyí ndya gloria ta ángel zacuenda sii ra ndyíhi tandíhi cuii tyiemvu nandyaa ra ityí nuu ra Ndyoo Zuti, ra ndyaa gloria.

¹¹ Vatyí yuhvi, ra i quisi ndya gloria, vasi zacaqui sii ra cua naa.

¹² ¿Yozo caa sica iñi ndo? Tatu iyo minoo ra, ta iyo minoo ziendu mvee ticatyí zono ra ta tatu cua naa minoo ti, ¿atu ma zandoo ra sii inga cumi xico sahun cumi tahan ti ta cuhun ra ndya yucu ta nanducu ra sii quití sa cua naa cuan?

¹³ Ta tatu sa nañihi ra sii ti, sa ndisa catyí sihin ndo vatyí zii xaan ca cua cuñi ra sa cuenda ti ta ziqui sa cuenda tandíhi inga cumi xico sahun cumi tahan ti sa ñá cua naa.

¹⁴ Ta zuun ñi cuhva cuan ña cuñi Zutu yo ra ndyaa andívi sa cua naa numinoo ra luhlu tañi ra ya.

Cuhva cuñi si sa zaha yo tucahnu iñi sii hermano yo

¹⁵ Tatu zavaha minoo hermano sa ña vaha suhun. Cuahan ndya vehe ra ta nacahan vohon sihin ra maa tuhun ñi ra ta nacatyun sihin ra ñaa sa ña vaha i zavaha ra suhun. Tatu tyaa ra yahvi sa cohon ta ndaca ra tucahnu iñi suun hermano vaha cua cuu ra.

¹⁶ Zoco tatu ma tyaa ra yahvi sa cohon sa xihna ñi, cuhun inga saha sihin minoo a uu tahan hermano. Tacuan ta tandíhi sa cohon sihin ra ta cua catyí inga ra ndíhi suhun vatyí sa ndisa cohon, cua cuu ra sa ndaa.

¹⁷ Ta tatu ma tyaa ra yahvi sa cahan inga hermano. Nacatyun nuu tandíhi ra hermano vehe ñuhu ñaa sa ña vaha i zavaha ra suhun. Ta tatu ma tyaa ra yahvi sa cahan tandíhi hermano, catyí ndo vatyí yívi ca ra sino iñi cuu ra, ta cuu ra tañi minoo ra zavaha sa ña vaha, tañi zavaha ra tava xuhun cuenda ra ndyaca ñaha vatyí sica ra cuaha ca.

¹⁸ Sa ndisa catyí sihin ndo ñaa sa cua cuhñi ndo ñuu ñiyívi ya, cua cunuhñi tucu si andívi. Ta ñaa sa cua ndasi ndo ñuu ñiyívi ya, cua ndasi tucu si andívi.

¹⁹ Ta catyí tuqui sihin ndo vatyí tatu cua ndu-ín uu tahan ndo ihya ñuu ñiyívi sa cuenda sa cua caca ndo, ra Ndyoo Zuti, ra ndyaa andívi, cua cuhva ra sii si sii ndo.

²⁰ Vatyí tatu titahan vazu uu a uñi tahan ndo sa cuenda mi, yucuan ndyei sihin ndo.

²¹ Tacuan i catyí ra Jesús, ta ziqui i tuhva ra Pedro sii ra, ta i ndaca tuhun ra sii ra: Tata, ¿yozo tahan saha cuñi si sa zehi tucahnu iñi sii minoo hermano tatu zavaha ra sa ña vaha sihin? ¿Atu zehi tucahnu iñi sii ra usa tahan saha?

²² Ta i catyí ra Jesús sihin ra: Ña catyí suhun vatyí usa tahan saha ñi. Catyí vatyí ndya tañi cumi ziendu cumi xico usi tahan saha a cuaha ca.

Cuhva iyo minoo muzu ña cuñi zaha tucahnu iñi sii ñiyívi

²³ Cuhva ndyaca ñaha ra Ndyoo cuu si tañi minoo rey, ra cuñi coto yozo tavi muzu ra sii ra.

²⁴ Ta sa quisaha tava ra cuenda sa cuenda minoo minoo ra, ta i quisi ndyaca ñu minoo ra tavi xaan sii ra. Cuaha xaan millón tavi ra sii ra.

²⁵ Ñá cuu tyiyahvi ra sii ra ta yucuan cuenda i catyí rey cuan vatyí cua xico ra sii ra sihin ñazíhi ra ta zehe ra, ta cua zatyiño ñu tyiño ñiyívi. Ta cua nduyahvi tandíhi ndaha tyiño ra, ta tacuan ta cua nañihi rey cuan xuhun sa tavi ra cuan sii ra.

²⁶ Yucuan cuenda i sicuiñi siti muzu ra, ta i zacahnu ra sii ra, ta i catyí ra sihin ra: “Tata, zandyeun iñun ndyehun sii, ta cua tyiyahvi tandíhi sa tavi suun.”

²⁷ Tacuan ta i cundahvi iñi rey cuan sii muzu ra, ta i zaña ra sii ra, ta i zaha ra tucahnu iñi sii ra sa cuenda tandihi sa tavi ra sii ra, ta ma tyiyahvi ra sii ra.

²⁸ Zoco zuun ñi muzu cuan i quita ra, ta i nañihi ra sii inga ra cu muzu sihin ra. Tavi ra uu mil ñi sii ra. Ta i tiin cuiti ra zucu ra, ta i catyi ra: “¡Tyiyahvun sa tavon sii!”

²⁹ Ta inga muzu cuan i sicuiñi siti ra ityi nuu ra, ta i sica ra tumañi iñi sii ra, ta i catyi ra: “Zandyeun iñun ndyehun sii. Ta cua tyiyahvi tandihi sa tavi suun.” Catyi ra.

³⁰ Zoco ñá cuñi ra cundahvi iñi sii ra. Ta cuahan ra sihin ra, i sityihi ra sii ra vehe caa ndya cua tyiyahvi ra sa tavi ra sii ra.

³¹ Ta sa ndyehe inga ra tahan ra, ra cu muzu sihin ra, cuhva i zavaha ra sihin ra ta cuihya xaan i cuñi ra, ta i sahan inga ra ta i nacaty i ra sihin rey tandihi sa i zacuu ra sii ra.

³² Ta i cana rey sii ra cu muzu, ra tavi xaan sii ra, ta i catyi ra sihin ra: “¡Yoho, muzu ña vaha cuun! Yuhvi i zaha xein tucahnu iñi suun sa cuenda tandihi sa tavon sii, ta ña tyiyahvun vaty i sica xoon tumañi iñi sii.

³³ Ta ¿ña cuenda ñá cundahvi iñun sii inga ra cu muzu suhun tañi i cundahvi iñi mi suun?”

³⁴ Tacuan i catyi rey sitoho muzu cuan, ta i cuxaan xaan ra sihin ra, ta i tava ra tyiño sa cua ndoho ra ndya cua tyiyahvi ra tandihi sa tavi ra sii ra.

³⁵ Tacuan i catyi ra Jesús, ta ziqui i catyi ra: Ta zuun ñi cuhva cuan cua zavaha Zuti, ra ndyaa andivi, sihin maa ndo tatu ma zaha ndo tucahnu iñi sa ndisa cuii sii inga hermano tatu zavaha ra sa ña vaha suhun.

19

Cuhva i zacuahra Jesús vaty ña vaha cua zandoo minoo ra sii ñazih i ra

¹ Sa yaha cahan ra Jesús cuhva cuan, ta i quita ra Galilea, ta i nasaa ra nu cu si Judea sa ndyaa siyo ityi caña ñicandyi siyo yuu Jordán.

² Cuaha xaan ñiyivi i sindyico sii ra, ta yucuan i zanduvaha ra sii ñu cuhu.

³ Ta i tuhva tucu ra fariseo sii ra Jesús vaty cuñi ra nducu ra cuhva tyaa ra cuaty sata ra. Ta i ndaca tuhun ra sii ra Jesús: ¿Atu cuu zandoo rayi sii ñazih i ra sa cuñi ñi maa ra? Catyi ra.

⁴ Ta i nacahan ra Jesús, ta catyi ra sihin ra: ¿Atu ta cahvi ca ndo Tuhun Ndyoo nu catyi si vaty ra i zavaha ñiyivi sa xihna ñi, i zavaha ra sii minoo rayi ta sii minoo ñaha?

⁵ Yucuan cuenda cua zandoo rayi sii zutu ra ta zih i ra, ta cua ndu-ñin ra sihin ñazih i ra. Ta sa nduu tahan ñu cua nduu ñu tañi minoo ñi ñiyivi ityi nuu ra Ndyoo.

⁶ Yucuan cuenda ña uu tahan ñiyivi cuu ñu, minoo ñi. Ta minoo sa zandu-ñin ra Ndyoo, ña vaha zanduziñ ñiyivi sii si.

⁷ Tacuan i catyi ra Jesús ta ziqui i ndaca tuhun ra fariseo sii ra: ¿Ñaa cuenda i saha ra Moisés tyiño vaty cuu cuhva rayi minoo tutu divorcio sii ñazih i ra, ta tacuan ta cuu zandoo ra sii ña?

⁸ Ta i catyi ra Jesús sihin ra: Ndava xaan iñi ndo. Yucuan cuenda i saha ra Moisés sa zandoo ndo sii ñazih i ndo. Zoco ña tacuan i cuu si nu quisaha si.

⁹ Ta catyi sihin ndo vaty tatu zandoo minoo rayi sii ñazih i ra ta yivi cuaty sa quixi ña sihin inga rayi cu si ta zandoo ra sii ña ta tindaha ra sihin inga ñaha. Ra zandoo sii ñazih i sa ñahñi cuaty cuan, zavaha ra cuaty sa nañi adulterio. Ta tatu cua tindaha inga ra sihin minoo ñaha i zandoo yi, ra cua tindaha sihin ña, zavaha tucu maa ra cuaty adulterio.

¹⁰ Tacuan i catyi ra Jesús, ta ziqui i catyi ra i casi ra sihin ra: Tatu tacuan cuu si sihin rayi ta ñazih i ra, vaha ca ma tindaha yo. Catyi ra.

¹¹ Ta ziqui i catyi ra Jesús sihin ra: Ña tandihi ñiyivi cuu cutuñi iñi cuhva ya, maa ñi ñiyivi sa tyindyee ra Ndyoo sii.

¹² Iyo ñiyivi ma cuu tindaha ñu vaty tacuan ndyaa maa ñu cuhva ndya quivi i cacu ñu. Ta iyo inga ñiyivi ma cuu tindaha ñu vaty sa sicoo cuhva zavaha ñiyivi sihin ñu. Ta iyo tucu inga ñiyivi ma tindaha ñu vaty cuñi ñu zatyño ñu tyiño ra Ndyoo. Tatu cuu zavaha ndo cuhva ya, zavaha ndo sii si.

Cuhva i zoco ñaha ra Jesús sii sa ndyih

¹³ Tacuan ta ziqui i quisi ndyaca ñiyivi sii sa ndyih nu ndyaa ra Jesús vaty cu tyizo ra ndaha ra xiñi si ta cahan ra sihin ra Ndyoo. Zoco i catyi ra i casi ra Jesús sihin ñiyivi vaty ma quisi ndyaca ñu sii sa ndyih sii ra.

¹⁴ Zoco i catyi ra Jesús: Ma cahan ndo. Naquisi ndyaca maa ñu sii sa ndyih sii, vaty tatu cuñi ñiyivi sa cua cundyaca ñaha ra Ndyoo sii ñu, cua sino iñi ñu sii, tañi sino iñi sa ndyih ya.

¹⁵ Tacuan i catyi ra Jesús, ta i tyizo ra ndaha ra xiñi sa ndyih. Ta ziqui i quita ra yucuan.

Caty i ra Jesús vaty yñi xaan cua cuhva cuenda minoo ra cuca sii ra sii Ndyoo

¹⁶ I sahan minoo ra yoco nu ndyaa ra Jesús, ta i ndaca tuhun ra sii ra: Yoho maestro vaha xoon. ¿Yozo caa zacui ta ñih tahvi añime?

¹⁷ Ta i catyi ra Jesús sihin ra: ¿Ñaa cuenda catyun vaty vaha xein? Minoo tuhun ñi ra vaha iyo, maa ra Ndyoo. Tatu cuñun sa ñih tahvi añimon, zavohon cuhva catyi sa usi tahan ley ra Ndyoo.

¹⁸ Ta i catyi ra cuan sihin ra Jesús: ¿Ndya ley? Ta i catyi ra Jesús sihin ra: Ma cahñun sii ñiyivi. Ma cuzun sihin inga ñaha sa yivi ñazihun cuu. Ma zuhun. Ma cohon cuendu ziqui ñiyivi.

¹⁹ Tyoon yahvi sii zutun ta sii zihun. Ta cuñi xoon sii inga ñiyivi tañi cuñun sii moo.

²⁰ Tacuan i catyi ra Jesús, ta i catyi ra yoco cuan sihin ra: Tyei yahvi sii tandih tuhun cuan cuhva ndya ta luhli. ¿Ñaa ca sa cumañi sii?

²¹ Ta i catyi ra Jesús sihin ra: Tatu cuñun sa ma coo ca cuatyun caña ñi, cuahan, ta xicon tandih sa iyo suun, ta cuhvon xuhun cuan sii ñiyivi ndahvi ta cua coo sa cuca suun gloria, ta quisun ta cundyicon sii. Catyi ra.

²² Ta sa siñi ra yoco cuhva cuan, ta i nducuihya xaan iñi ra vaty cuca xaan ra.

²³ Tacuan ta ziqui i catyi ra Jesús sihin ra i casi ra: Sa ndisa cuii catyi sihin ndo vaty yñi xaan ta cua quihvi ñiyivi cuca nu ndyaca ñaha ra Ndyoo.

²⁴ Ta catyi tuqui inga saha vaty yñi ca quihvi minoo ra cuca nu ndyaca ñaha ra Ndyoo ta ziqui ca minoo camello yaha ti xuu minoo yicui ticui.

²⁵ Ta sa siñi ra i casi ra Jesús cuhva i cahan ra, ta iyo xaan i cuñi ra, ta i catyi ra: Tatu tacuan cuu si ¿yoo ra cuu cacu?

²⁶ Ta i ndyehe ra Jesús sii ra, ta catyi ra sihin ra: Tandih sa ña cuu zavaha ñiyivi, cuu zavaha ra Ndyoo sii si. Catyi ra.

²⁷ Tacuan ta i catyi ra Pedro sihin ra: Sa zandoo ndi tandih sa sii ndi, ta ndyico ndi suun. ¿Ñaa sa cua ñih maa ndi?

²⁸ Ta i catyi ra Jesús sihin ra: Sa ndisa catyi sihin ndo vaty ndoho ra ndyico sii, cuee ca, quivi cua cundyaa ra i quisi ndya gloria nu tyayu vaha ra sisi gloria ta cua cundyaa tucu maa ndo nu tyayu vaha. Minoo si sii minoo minoo ndo, ta cua tyicuhva ndo sii ñiyivi hebreo, tandih sa usi uu tahan ityi ñu.

²⁹ Ta tandih ñiyivi sa zandoo vehe ñu a tahan ñu a zutu ñu a zih ñu a ñuhu ñu sa cuenda mi, cua ñih ñu minoo ziendu ca si, ta cua ñih tahvi añima ñu, ta cua cundito ñu tandih cuii tyiemvu.

³⁰ Zoco cuaha ñiyivi ñiñi vaty, yivi ca ñiyivi ñiñi cua cuu ñu. Ta ñiyivi ña ñiñi, cua nduu ñu ñiyivi ñiñi xaan.

20

Cahan ra Jesús ziqui minoo cuhva, cuhva ra zatyño

¹ Cuhva ndyaca ñaha ra Ndyoo cuu si tañi minoo sitoho ñuhu. I quita ra ñaha ñi, ta cuahan ra vaty cua nducu ra muzu sa cua tohon uva ra.

² Ta sa yaha zandaa ra tyiño sihin muzu cuan vaty cua tyiyahvi ra oco usi peso sa minoo quivi, ta ziqui i tasi ra sii ra nu ndyaa tyiño ra.

³ Ta i quita tucu sitoho si cuhva caa ñin sa ñaha ñi, ta i ndyehe ra vatyi yucu xaan ñiyivi nuyahvi, yucu ñi maa ra.

⁴ Ta i catyi ra sihin ra: Cuahan tucu ndoho nu iyo tyiñe, ta cua tyiyahvi sii ndo cuhva tahan si. Ta cuahan muzu cuan cuhva catyi ra.

⁵ Ta i quita tucu sitoho si cuhva maa ora, ta zuun ñi cuhva cuan i zavaha tucu ra. Ta tacuan tucu caa uñi sa sahiñi.

⁶ Ta caa ohon sa sahiñi i sahan tucu ra nuyahvi, ta i nañihi ra sii inga ra ña zatyíño, ta i catyi ra sihin ra: “¿Ñacu yucu ñi maa ndo ihya ndiyaca, ta ña zatyíño ndo?”

⁷ Ta i catyi ra cuan sihin ra: “Vatyi yoñi i saha tyiño sii ndi.” Ta ziqui i catyi sitoho si: “Cuahan tucu ndoho. Cua zatyíño ndo nu iyo tyiñe. Ta cua tyiyahvi sii ndo cuhva tahan si.”

⁸ Ta tacuan i cuu si, ta sa sahiñi cuan i catyi sitoho ndaha tyiño cuan sihin ra zacuenda xuhun ra: “Cana sii ra zatyíño, ta tyiyahvun sii ra. Quisohon sihin ra i quisaha zatyíño sa sahiñi ta ndya cuhva ndya ra i quisaha sa xihna ñi.”

⁹ Tacuan ta i saa ra i quisaha zatyíño cuhva caa ohon. Ta minoo minoo ra i ñihi ra oco usi peso.

¹⁰ Cuae ca i tahan si tyiyahvi ra sii ra i quisaha zatyíño sa ñaha ñi, ta i sica iñi ra cuan vatyi cua ñihi ra cuaha ca, zoco zuun ñi cuhva i ñihi maa ra, oco usi peso sa minoo minoo ra.

¹¹ Sa yaha quihin ra sii si, ta ziqui i quisaha cahan ra sii ra cu patrón ra.

¹² Ta catyi ra: “Inga ra cuan, i saa ra ndya nu ndihi. I zatyíño ra minoo ora ñi, ta ñin ñi cuhva i tyiyahvun sii ra tañi i tyiyahvun sii maa ndi, ta maa ndi ñihi xaan i zatyíño ndi ndiyaca cui nu ndyii.”

¹³ Zoco i catyi sitoho si sihin minoo ra cuan: “Amigo, ñahñi sa ña vaha i zavehi suhun. ¿Atu ñá zandaa yo tyiño vatyi cua tyiyahvi oco usi peso suun?”

¹⁴ Quihin xuhun ya ta cuhun. Inuu ñi cua tyiyahvi sii ra i saa ta sa cuñi ndihi tyiño tañi cua tyiyahvi suun.

¹⁵ ¿Atu ñahñi cuhva iyo sii, sa zavehi cuhva cuñi sihin xuhin? ¿Atu cuxoon sa vaha ñiyivi cui?”

¹⁶ Ta ziqui i catyi tucu ra Jesús: Zuun ñi cuhva cuan, ra saa nu ndihi, cua cuu ra ra nuu. Ta ra quisaha sa xihna ñi, cua cuu ra nu ndihi vatyi cane sii cuaha xaan ñiyivi, zoco zuhva cui ñi cuu ñiyivi i casi.

Nacatyí ra Jesús inga saha vatyi cua cahñi ñiyivi sii ra

¹⁷ Cuahan ra Jesús ñuu Jerusalén. Ta ityi cuahan ra i tava zñin ra sii sa usi uu tahan ra i casi ra, ta i catyi ra sihin ra:

¹⁸ Cuahan yo ñuu Jerusalén ya. Ta cua cuhva cuenda ñiyivi sii ra i quisi ndya gloria ndaha ra cu zutu nahnu ta ra cu maestro cuenda ley, ta cua catyi ra vatyi cua cuu ra.

¹⁹ Ta cua cuhva cuenda ra sii ra sii ñiyivi sa yivi ñiyivi hebreo cuu, ta cua vacu ndyaa ñu sii ra, ta cua cañi xaan ñu sii ra, ta cua cahñi ñu sii ra nu cruz. Ta sa cu uñi quivi cua nandoto tucu ra.

Minoo sa i sica zñhi ra Jacobo ta ra Juan

²⁰ Ta ziqui i tuhva zñhi ra Jacobo ta ra Juan sii ra Jesús. Yñi ña sii ra Zebedeo. I zacahnu ña sii ra Jesús, ta i sica ña minoo tumañi iñi sii ra.

²¹ Ta i ndaca tuhun ra Jesús sii ña, ta i catyi ra: ¿Ñaa sa cuñun zavehi? Ta i catyi ña sihin ra: Cuhvon vatyi quivi cua cundyaca ñohon, cua cundyaa nduu tahan zehi suhun. Minoo ra siyo cuohon ta minoo ra siyo zatyun.

²² Zoco i catyi ra Jesús: Ña siton ñaa sa sicon. Ta i catyi ra sihin ra Jacobo ta ra Juan: ¿Atu cundye ndoho ndyehe ndo tundoho tañi cua ndyehe mi? Ta i catyi ra: Cundyee iñi ndi.

²³ Ta i catyi ra Jesús sihin ra: Ndisa cuii cua ndyehi tundoho ta cua ndyehe ndoho tundoho sa cuenda mi. Zoco sa cundyaa ndo siyo cuehi, ta siyo zatyí, ña tahan si sa yuhvi cuhva. Maa ra Ndyoo Zuti cua catyi yoo ra cua ñihi ndatu cuan.

²⁴ Ta sa siñi inga usi tahan ra i casi ra Jesús ta i cuxaan ra sihin ra Jacobo ta ra Juan.

²⁵ Zoco i cana ra Jesús sii tandihi ra, ta i catyi ra sihin ra: Sa sito maa ndo cuhva ndyaca ñaha ñiyivi ñuu ñiyivi. Iyo ra cu nuu, ta zacoto ra sii tandihi ñiyivi vatyí ndyaca ñaha ra sii ñu.

²⁶ Zoco ña tacuan cuu si sa cuenda ndoho. Zama si cuhva. Tatu cuñi minoo ra cuu ra ra cahnu, natyindyee ra sii ra tahan ra.

²⁷ Ta yoo ra cuñi sa cuu ra minoo ra cahnu ityi nuu ra Ndyoo, cuñi si sa nduu ra muzu sii tandihi ndo.

²⁸ Vatyí cuhva ndya ra i quisi ndya gloria, ña vasi ra sa vatyí tyindyee ñiyivi sii ra. Vasi ra sa tyindyee ra sii ñiyivi. Ta vasi ra sa cuenda sa cua cuu ra sa cuenda ñiyivi, ta ziqui cua cuu cuhun cuaha ñiyivi gloria.

Zanduvaha ra Jesús sii uu tahan ra cuaa

²⁹ Quita ra ñuu Jericó, ta cuaha xaan ñiyivi i sindyico sii ra.

³⁰ Ta ityi cuahan ra ndyaa uu tahan ra cuaa yu-ityi. Ta sa i siñi ra sa cua yaha ra Jesús, i cana saa ra, ta catyi ra: ¡Yoho Jesús, zehe ra David, cundahvi iñun sii ndi! Catyi ra.

³¹ Cuaha xaan ñiyivi i cuxaan, ta catyi ñu nacutaxi ra, zoco ñihi ca nduu ra cana saa ra, ta catyi ra: ¡Yoho ra ndyaca ñaha ta ñiyivi ra David cuun! ¡Cundahvi iñun sii ndi!

³² Tacuan ta i sicuñi ra Jesús, ta i cana ra sii ra, ta catyi ra: ¿Ñaa sa cuñi ndo sa zavehi sihin ndo?

³³ Ta i catyi ra cuaa cuan: Maestro, cuñi xaan ndi sa nandyehé ndi. Catyi ra.

³⁴ Ta i cundahvi xaan iñi ra Jesús sii ra, ta i tiin ra siti nuu ra, ta zuun ñi caa cuhva cuan i cuu nandyehé ra, ta i sindyico ra sii ra Jesús.

21

Cuhva i quihvi ra Jesús ñuu Jerusalén

¹ Ta cuhva sa cua saa ra ñuu Jerusalén, i saa ra sa xihna ñi ndya ñuu Betfagé yatyí ñi minoo yucu sa nañi yucu Olivos, ta ziqui i tasi ra Jesús sii uu tahan ra sica noo sihin ra minoo tyiño.

² I catyi ra sihin ra: Cuahan ndo minoo ñuu sa ndyaa yatyí ñi yucuan, ta cuhva sa quihvi ndo ñuu cuan, cua nañihi ndo sii minoo burro. Nuhñi ti, ta nandyaa zehe ti sihin ti. Ndasi ndo sii ti, ta quisi ndo sihin ti.

³ Ta tatu iyo ñiyivi ndaca tuhun sii ndo ñaa cuenda ndasi ndo sii ti, catyi ndo: “Siñi ñuhu ti sii ra ndyaca ñaha sii yo.” Ta tacuan ta cua cuhva ra sii ti.

⁴ Ta i cuu tandihi cuhva cuan vatyí cua natahan si cuhva i catyi minoo ra profeta nu i tyaa ra tyehen:

⁵ Ndyehé ndo, vasi rey ndo.

Zanduluhlu xaan ra sii ra, ta yozo ra minoo burro luhlu.

⁶ Ta cuahan ra sica noo sihin ra Jesús, ta i zavaha ra cuhva i tava ra Jesús tyiño sii ra.

⁷ I quisi ndyaca ra sii burro cuan sihin zehe ti, ta i tyizo ra zahma sata ti, ta i sicozo ra Jesús sii ti.

⁸ Ta cuaha xaan ñiyivi i saqui zahma ñu ityi. Inga ñu i sahndya ndaha numa ta saqui ñu ityi nu cuahan ra.

⁹ Ta ñu cuahan ityi nuu ra Jesús, ta ñu vasi ityi sata ra, i cana saa ñu, ta catyi ñu: ¡Cahnu xaan cuu zehe ra David! ¡Vaha xaan cuu ra vasi sa cuenda ra Ndyoo! ¡Nazacahnu yo sii ra Ndyoo!

¹⁰ Ta cuhva sa quihvi ra ñuu Jerusalén, i ndutihvi tandihi ñiyivi ñuu cuan, ta catyi tandihi ñu: ¿Yoo ra cuu ra ya?

¹¹ Ta i catyi ñu: Ihya ra cuu ra Jesús, minoo ra cu profeta. Ra ñuu Nazaret cuu ra nu cu si Galilea.

Tava ndyizo ra Jesús sii ñiyivi zavaha ndya vaha ñi yuvehe ñuhu cahnu

¹² Tacuan ta i quihvi ra Jesús nu cuu nuquehe vehe ñuhu cahnu, ta i tava ndyizo ra sii ñu xico ta ñu zata yucuan. Ta i zanduva ihno ra mesa ñiyivi nazama xuhun ñiyivi, ta tacuan tucu tyayu ñiyivi xico paloma.

¹³ Ta i catyi ra sihin ñu: Catyi Tuhun Ndyoo: “Vehe mi cuu vehe nu cahan ñiyivi sihin ra Ndyoo”; zoco maa ndo zacuu ndo vehe ra zuhu sii si. Catyi ra.

¹⁴ Ta i quisi ra cuaa ta ra coxo nu ndyaa ra Jesús sisi vehe ñuhu, ta i zanduvaha ra sii ra.

¹⁵ Zoco i ndyehe ra zutu nahnu ta ra maestro cuenda ley sa ndyityi i zavaha ra Jesús. Ta i siñi ra vatyi cana saa sa ndyihhi sisi vehe ñuhu, ta catyi si: “Cahnu xaan cuu Zehe ra David.” Ta i cuxaan xaan ra.

¹⁶ Ta i catyi ra sihin ra Jesús: ¿Atu siñun sa cahan sa ndyihhi cuan? Ta i catyi ra Jesús sihin ra: Siñi sa cahan si. ¿Atu ta cahvi ca ndo Tuhun Ndyoo nu cahan si sa cuenda cuhva ya? Catyi si:

Maa ra Ndyoo saha sa cata sa ndyihhi ta sa lee, ta vaha xaan cuu cuhva zacahnu si sii ra.

¹⁷ Tacuan ta ziqui i zandoo ra Jesús sii ñiyivi sisi vehe ñuhu. I quita ra ñuu Jerusalén, ta cuahan ra ndya ñuu Betania cua cuzu ra.

Ña zii maa i cuñi ra Jesús sihin minoo yutu ñahñi yucu vixi iñi nuu

¹⁸ Inga quivi ñaha ñi cua nanuhu tucu ra Jesús ndya ñuu Jerusalén, ta i sizoco ra.

¹⁹ Ityi cuahan ra i ndyehe ra minoo yutu higuera, ta i sahan ra i sindyehe ra tatu iñi siti tu, zoco ñá ñihi maa ra ndaha ñi. Maa maa ndaha ñi tu iñi. Ta i catyi ra Jesús sihin yutu cuan: Ma cuhva ca moo yucu vixi casi ñiyivi. Ta zuun ñi caa cuhva cuan, ndaha i na-ityi ñi tu.

²⁰ Ta cuhva sa ndyehe ra i casi ra Jesús sii tu, iyo xaan i cuñi ra ta i catyi ra sihin ra Jesús: ¡Yaty xaan i na-ityi yutu higuera ya!

²¹ Ta i nacahan ra Jesús, ta catyi ra sihin ra: Sa ndisa catyi sihin ndo vatyi tatu nii xaan cuu iñi ndo, ta ma caca xaan iñi ndo tatu cuu a ma cuu zavaha ndo, cua zavaha ndo cuhva i zavehi sihin yutu higuera ya. Ta ña maa ñi tacuan. Cua cuu tucu cahan ndo sihin yucu ya: “Cuiñi siyon ihya, ta cua ndihvun sisi tyañuhun”, cua catyi ndo.

²² Ta tandihhi cuii ñaa sa cua caca ndo sii ra Ndyoo, tatu cua sino iñi ndo vatyi cua ñihi ndo sii si, cua ñihi ndisa cuii ndo sii si.

Iyo xaan cuhva sii ra Jesús

²³ I quihvi ra Jesús sisi vehe ñuhu, ta i tuhva ra zutu nahnu ta ra mandoñi sii ra cuhva zacuahra ra, ta i ndaca tuhun ra sii ra: ¿Yoo sa saha tyiño suun vatyi zavohon tandihhi cuhva ya? ¿Ta yoo ra catyi suhun vatyi zavohon sii si?

²⁴ Ta i nacahan ra Jesús, ta catyi ra sihin ra: Cuñi tuqui nducu tuhun minoo cuhva sii maa ndo. Tatu nacatyi ndo, tacuan ta ziqui cua nacatyi sihin ndo yoo ra saha cuhva sii, ta zavehi cuhva ya.

²⁵ ¿Yoo ra i tasi sii ra Juan sa zacoo ndutya ra? ¿Atu i tasi ra Ndyoo sii ra a ñiyivi? Catyi ndo. Tacuan ta i natuhun tahan ra cuan sihin tahan ra, ta catyi ra: Tatu catyi yo vaty i tasi ra Ndyoo sii ra Juan, cua catyi ra ya: “¿Ñaa cuenda ñá sino iñi ndo sa cahan ra?”

²⁶ Zoco ma cuu catyi yo vaty ñiyivi i tasi sii ra Juan vaty yuhu yo sii ñiyivi vaty sica iñi tandihhi maa ñu vaty ra Juan cuu minoo ra profeta.

²⁷ Yucuan cuenda i catyi ra sihin ra Jesús: Ña sito ndi yoo ra i tasi sii ra Juan. Ta i catyi ra Jesús sihin ra: Ta yuhvi tucu ma nacaty tucu vii yoo ra i saha cuhva ya sii.

Cahan ra Jesús cuhva minoo ra iyo uu tahan zehe

²⁸ I catyi tucu ra Jesús sihin ra zutu nahnu ta sihin ra mandoñi: ¿Yozo caa sica iñi ndo sa cuenda tuhun ya? Sicoo minoo ra, ta sicoo uu tahan zehe yii ra. Ta i cahan ra sihin minoo ra, ta catyi ra: “Zehe luhli, cuahan vaty cua tohon uva.”

²⁹ Ta i catyi zehe ra: “Ma cuhin.” Zoco cuee ca i ndu-uu iñi ra cuhva ña vaha i cahan ra sihin zutu ra, ta cuahan ra.

³⁰ Ta i sahan zutu ra i sicahan ra zuun ñi cuhva cuan sihin inga zehe ra. Ta i catyi inga zehe ra: “Cuhin, tata.” Catyi ra. Zoco ñá sahan ra.

³¹ Ta vityi catyi ndo ¿ndya ra i zavaha cuhva cuñi zutu ra? Ta i catyi ra cuan sihin ra Jesús: Ra sa xihna ñi. Ta i catyi ra Jesús sihin ra: Sa ndisa catyi sihin ndo vatyi sa cuu quihvi ra tava xuhun cuenda ra ndyaca ñaha ta ñiyivi zii iñi nu ndyaca ñaha ra Ndyoo, zoco maa ndo ma cuu quihvi ndo.

³² Vatyi i quisi ra Juan, ta i zacuaha ra minoo cuhva ndoo xaan sii ndo, ta ñá sino iñi ndo sii ra, zoco ra tava xuhun cuenda ra ndyaca ñaha ta ñu zii iñi i sino iñi ñu sa cahan ra. Ta vazu ndyehe maa ndo cuhva cuan, zoco ñá zama ndo cuhva iyo ndo, ta ña sino iñi ndo.

Tañi ra ña cuñi zatyíño vaha tacuan iyo ra cua cahñi sii ra Jesús

³³ Cuiñi ndo inga cuhva ya. Sicoo minoo ra iyo ñuhu, ta i zavaha ra minoo sacu, ta i tasi ra yoho uva sisi si. Ta ziqui i zavaha ra nu cua tava ra ndutya uva ta minoo vehe tyiyahva vatyi cua zacuenda ra sacu ra. Ta i saha noo ra sacu ra sii minoo ityi ra cua zatyíño yucuan. Ta cuahan ra nusica.

³⁴ Ta saa quivi sa iyo yucu vixi cuan ta i tasi ra sii muzu ra nu ndyaa ra zatyíño yucuan vatyi cua quihin ra zuhva yucu vixi cuhva tahan si sii patrón ra.

³⁵ Zoco ra zatyíño yucuan, i tiin ra sii muzu cuan. I cañi ra sii minoo ra. Minoo ra i sahñi ra. Ta i cañi ra sihin yuu sii inga ra.

³⁶ Inga saha i tasi tucu patrón cuan sii inga muzu ra. Cuaha ca ra i tasi ra ta ziqui sa xihna ñi. Ta zuun ñi cuhva ña vaha cuan i zavaha ra sihin ra.

³⁷ Ta nu ndihi tuhun, i tasi ra sii zehe ra nu ndyaa ra zatyíño cuan vatyi catyi ra: “Cua tyaa ra cuan yahvi sii zehi.”

³⁸ Zoco cuhva sa ndyehe ra zatyíño sii zehe ra, i natuhun tahan ra sihin tahan ra, ta i catyi ra: “Ihya ra cuu ra cua nañihi ndaha tyíño quivi cua cuu zutu ra. Nacahñi yo sii ra vatyi ndoo maa yo sihin sacu ya.” Catyi ra.

³⁹ Ta i tiin ra cuan sii zehe ra, ta i tava ndyizo ra sii ra sata sacu, ta i sahñi ra sii ra.

⁴⁰ Tacuan i catyi ra Jesús, ta ziqui i ndaca tuhun ra sii ra tyizoho: ¿Yozo caa cua zavaha sito ho sacu cuan sihin ra sahñi sii zehe ra?

⁴¹ Ta i nacahan ra yucu yucuan, ta catyi ra: Cua zanaa ra sii ra ña vaha cuan, ta cua cuhva noo ra sacu ra sii inga ra zatyíño vaha, ra cua cuhva yucu vixi cuhva tahan si sii ra.

⁴² Ta i catyi ra Jesús sihin ra: ¿Atu ta cahvi ca ndo Tuhun Ndyoo? nu catyi si tyehen: “I zavita ihno ñiyivi zandaa vehe sii yuu sa cuñi si sa cuenda siqui vehe. Ta vityi yuu cuan cuu sa ñiñi ca ta ziqui tandihi sa cuenda vehe cuan vatyi tacuan catyi maa ra Ndyoo. Ta vaha xaan cuñi yo sihin cuhva ya.”

⁴³ Yucuan cuenda catyi sihin ndo vatyi ma cuu cuhun ndo nu ndyaca ñaha ra Ndyoo, zoco inga ñiyivi sa yivi ñiyivi hebreo cuu cua cuhun ñu vatyi vaha cuhva zavaha ñu.

⁴⁴ Ta yoo ra cua nduva ziqui yuu sa quehin tuhun cuan, cua tahnu cuatyí ra, zoco yoo ra cua canacava yuu cuan ziqui, cua cahnu cuatyí si sii ra sehe sehe.

⁴⁵ Ta sa siñi ra zutu nahnu ta ra fariseo cuhva cahan ra Jesús, i cutuñi iñi ra vatyi cahan ra Jesús sa cuenda maa ra.

⁴⁶ I cuñi ra tiin ra sii ra Jesús, zoco i yuhu ra sii ñiyivi vatyi sica iñi ñu vatyi minoo profeta cuu ra Jesús.

22

Cuhva minoo vico tindaha

¹ I quisaha cahan ra Jesús inga saha ziqui minoo cuhva, ta i catyi ra:

² Cuhva ndyaca ñaha ra Ndyoo cuu si tañi minoo rey i zavaha minoo vico tindaha sa cuenda zehe ra.

³ Ta i tasi ra sii muzu ra vatyi cua cana ra sii ñiyivi cua quisi vico cuan, zoco ñá cuñi ñu quisi.

⁴ Inga saha i tasi tucu ra sii inga muzu ra, ta catyi ra sihin ra: “Caty i ndo sihin ñiyivi i cane vatyi sa ndyaa listo sa casi ñu. Sa sahñi zindiqui zone ta inga quitu xahan. Sa ndyaa listo tandihi. Naquisi maa ñu vico.”

⁵ Ta tacuan i nacaty i muzu ra, zoco ñá tyaa ñiyivi yahvi. Minoo ra cuahan ra nu iyo itu ra, ta inga ra cuahan ra nu iyo inga tyiño ra.

⁶ Ta inga ñiyivi i tiin sii muzu rey cuan, ta i cañi xaan ra sii ra ndya cuhva ndya sahñi ra sii ra.

⁷ Ta sa siñi rey cuan cuhva cuan, i cuxaan xaan ra, ta i tasi ra sii zandaru ra vatyi cua cahñi ra sii ra sahñi sii ra cuan, ta i sahmi ra ñuu ra.

⁸ Ta ziqui i catyi rey cuan sihin muzu ra: “Sa ndyaa listo tandihi sa cuenda vico tindaha, zoco ñiyivi i cane, ña vaha ñu vatyi ñá tyaa ñu yahvi sa quehin, ta ña tahan si sii ñu quisi ñu.

⁹ Yucuan cuenda cuahan ndo calle nahnu, ta yoo ra ndyehe ndo cana ndo sii ra naquisi ra vico tindaha.”

¹⁰ Ta cuahan muzu ra, ta i zatitahan ra sii tandihi ñiyivi i nañihi ra, ñiyivi vaha ta ñiyivi ña vaha, ta i sicoo cuaha xaan ñiyivi vico tindaha cuan.

¹¹ Tacuan ta i quihvi rey cuan vatyi cua ndyehe ra sii ñiyivi i saa vico cuan, ta yucuan i ndyehe ra sii minoo ra ña ñoho zahma cuenda vico tindaha.

¹² Ta i catyi ra sihin ra: “Amigo, ¿yozo caa i quihvun ta ña ñohon zahma sa cuenda vico tindaha?” Catyi ra. Zoco ñá nacahan maa ra cuan.

¹³ Ta ziqui i catyi rey cuan sihin muzu ra: “Cuhñi ndo saha ra ta ndaha ra ta zavita ndo sii ra nu ñaa, ityi sata nu cua vacu xaan ñiyivi ndya cuhva casi quihñi noho ñu.

¹⁴ Vatyi i cane sii cuaha xaan ñiyivi, zoco zuhva ñi ñu i casi ta cuu quihvi ñu.”

Tahan si tyaa yo yahvi sii ra cu tyiño ta sii ra Ndyoo

¹⁵ Tacuan ta ziqui i titahan ra fariseo ta i zacasi tahan ra tyiño minoo cuhva cua zavaha ra ta cua nducu ra cuhva sihin ñaa minoo tuhun ña vaha cua cahan ra Jesús, ta cua tyaa ra cuaty i sata ra.

¹⁶ Ta i tasi ra fariseo sii zuhva ra ndyico sii ra sihin ra ndyico sii ra rey Herodes, ta i catyi ra sihin ra Jesús: Maestro, sito ndi vatyi ra vaha xaan cuun ta zañohon ityi ra Ndyoo sa ndisa. Ta inuu ndita ñi tyoon yahvi sa cahan ñiyivi cuca ta ñiyivi ndahvi.

¹⁷ Yucuan cuenda nacatyun sihin ndi, ¿yozo caa sica iñun? ¿Atu vaha tyiyahvi yo xuhun sii ra ndyaca ñaha César a ña vaha? Catyi ra.

¹⁸ Zoco i tuu iñi ra Jesús vatyi ña vaha añaima ra cuan. Ta i catyi ra sihin ra: ¿Ñaa cuenda nducu coto ihñi ndo sii? ndoho ra zaha tuhun vatyi vaha xaan ndo zoco ña ndisa ndo.

¹⁹ Zañaha ndo minoo xuhun sii. Catyi ra. Ta i quisi ndyaca ra minoo xuhun sii ra.

²⁰ Ta i ndaca tuhun ra Jesús sii ra: ¿Yoo sii nuu ndyaa ya? ¿Ta yoo sii zivi ndyaa ya?

²¹ Ta i catyi ra cuan. Sii ra gobierno César. Ta ziqui i catyi ra Jesús sihin ra: Cuhva ndo sii ra César sa cuu sii maa ra. Ta cuhva ndo sii ra Ndyoo sa cuu sii ra Ndyoo.

²² Ta sa siñi ra cuan sa cahan ra Jesús, ta iyo xaan i cuñi ra, ta i zandoo ra sii ra ta cuahan ra.

Ndaca tuhun ra tatu cua nandoto tucu ñiyivi

²³ Zuun ñi quivi cuan sahan zuhva ra saduceo cua cahan ra sihin ra Jesús. Ra saduceo cuu ra catyi vatyi ma nandoto tucu ñiyivi i sihi. Yucuan cuenda i ndaca tuhun ra sii ra Jesús cuhva ya:

²⁴ Maestro, i catyi ra Moisés vatyi tatu sihi minoo rayi ta ndoo ndahvi ñazih i ra ta yoñi zehe ra, natindaha yañi ra sihin ñaha cuan. Ta cua coo zehe ra sihin ña sa cuenda yañi ra, ra i sihi cuan.

²⁵ Sicoo usa tahan rayi sihin yañi ra. I tindaha ra nuu. Ta i sihi ra, ta yoñi zehe ra i sicoo. I zandoo ra sii ñazih i ra cuenda yañi ra.

²⁶ Ta tacuan tucu i zavaha ra cu uu, ta ra cu uñi ta cuhva ndya ra cu usa.

²⁷ Ta nu ndih i tuhun i sihi ndih i tucu maa ñaha cuan.

²⁸ Yucuan cuenda cuñi ndi coto ndi, ¿yoo ra cua cuu yii ña quivi cua nandoto ñiyivi? vatyí ñazihí tandihí sa usa tahan ra i cuu sii ña. Tacuan i catyi ra cuan sihin ra Jesús.

²⁹ Ta i nacahan ra Jesús, ta i catyi ra sihin ra: Ña sito ndo ñaa sa cahan ndo vatyí ña sito ndo ñaa sa catyi Tuhun Ndyoo. Ta ña sito ndo vatyí iyo xaan cuhva sii ra Ndyoo.

³⁰ Ñiyivi cua nandoto inga ñuu ñiyivi saa, ma tindaha ca ñu indyacuan, ta ma cuhva ca ñiyivi sii zehe ñu sa tindaha ñu. Cua nduu ñu tañi ángel ra Ndyoo sa iyo andivi.

³¹ Ta sa cuenda tuhun tatu nandoto ñiyivi a ma nandoto ñu, ¿atu ta cahvi ca ndo sa i cahan ra Ndyoo sihin ndo? nu i catyi ra:

³² “Yuhvi cui Ndyoo sii ra Abraham ta sii ra Isaac ta sii ra Jacob.” Yivi Ndyoo sii ñiyivi ndaha sihi cuu ra. Ndyoo cuu ra sii ñiyivi cua cundito tandihí cuu tyiemvu.

³³ Tacuan i catyi ra Jesús, ta sa siñi tandihí ñiyivi, iyo xaan i cuñi ñu sihin cuhva i zacuaha ra.

Minoo ley ra Ndyoo sa ñiñi ca

³⁴ Zoco cuhva i siñi ra fariseo vatyí i zacutaxi ra Jesús sii ra saduceo, ta i titahan ra fariseo.

³⁵ Ta minoo ra fariseo, ra cu minoo abogado, i ndaca tuhun ra sii ra Jesús vatyí cuñi ra nducu coto ihñi ra sii ra. Ihya cuu sa ndaca tuhun ra:

³⁶ Maestro, ¿ndya cuu ley ra Ndyoo sa ñiñi ca?

³⁷ Ta i catyi ra Jesús sihin ra: Ley sa ñiñi ca sii ra Ndyoo catyi si: “Nihi xaan cuñi ndo sii Ndyoo Zutu ndo sihin añima ndo. ñin ñi sii ra caca iñi ndo; ñin ñi sihin ra cahan ndo; ñin ñi tyiño ra zatyño ndo.”

³⁸ Ihya cuu sa xihna ñi ley ra Ndyoo, ta ley sa ñiñi ca cuu si.

³⁹ Ta sa cu uu ley, ñin ñi sasi tahan si sihin ley sa xihna ñi cuan. Catyi si: “Cuñi xaan ndo sii tandihí inga ñiyivi tañi cuñi ndo sii maa ndo.”

⁴⁰ Ñahñi inga ca ley ñiñi ca ta ziqui nduu tahan ley ya. Tandihí inga ley ra Ndyoo ta tandihí sa i tyaa tandihí ra profeta, sasi tahan si sihin nduu tahan ley ya, ta tyaa si yahvi sii si.

¿Yoo sii zehe cuu sii ra Jesus?

⁴¹ Cuhva sa yucu ra fariseo ñin ñi yucuan i ndaca tuhun ra Jesús sii ra:

⁴² ¿Yozo caa sica iñi maa ndo sa cuenda ra Cristo? ¿Yoo zehe sii ra? Ta i catyi ra fariseo cuan sihin ra: Zehe ra David.

⁴³ Ta ziqui i catyi ra sihin ra: ¿Ñaa cuenda vatyí cuhva i cahan ra David cuhva cuñi Tatyí li ta i catyi ra vatyí ra ndyaca ñaha sii ra cuu ra Cristo? Ihya cuu sa i tyaa ra David:

⁴⁴ Cahan ra Ndyoo sihin ra ndyaca ñaha sii mi, ta catyi ra: “Cundyoon siyo cuehi ndya cuhva ndya cua saa quivi cua cuhve cuhva cua zahacanoon sii ñiyivi xaan iñi suun.”

Tacuan i tyaa ra David catyi ra Jesús.

⁴⁵ Tatu zuun ñi ra David catyi vatyí ra ndyaca ñaha sii ra cuu ra Cristo, ¿yozo caa cuu cuu ra Cristo zehe ra David?

⁴⁶ Ta sa catyi ra Jesús cuhva cuan, ta yoñi i cuu nacatyí cuhva sa ndaca tuhun ra. Ta ndya quivi cuan, yoñi ca i caña iñi ndaca tuhun ñaa inga tuhun sii ra.

23

Tyaa ra Jesús cuatyí sata ra fariseo ta ra maestro cuenda ley

¹ Tacuan ta ziqui i cahan ra Jesús sihin tandihí ñiyivi ta sihin ra i casi ra, ta i catyi ra:

² Sica iñi ra maestro cuenda ley ta ra fariseo vatyí cuu nacatyí ra tandihí cuu sa cuñi catyi ley ra Moisés.

³ Yucuan cuenda tandihí sa catyi ra cuan, tyaa ndo yahvi sii si, ta zavaha ndo sii si, zoco ma zavaha ndo cuhva zavaha maa ra vatyí cahan ra minoo cuhva ta zavaha ra inga si.

⁴ Zanducuaha ca ra ley i tasi ra Ndyoo ta sa naha. Yoñi sa cuu zavaha tandihí sii. Ta nu maa ra ta ña zavaha ra tandihí si vatyí sa sito ra vatyí ma cuu.

⁵ Ta tandihi sa zavaha ra, zavaha ra sii si vaty cuñi ra sa cua ndyehe ñiyivi. Cuaha xaan Tuhun Ndyoo tyaa ra nu tutu quehen xaan ta tyaa ra sii si yiqui nuu ra ta zucu ndaha ra, ta nañi xaan yuhva tyaqui yuzahma ra.

⁶ Cuñi xaan ra cundyaa ra tyayu vaha nu sasi ñiyivi zavaha vico. Ta cuñi xaan ra sa cundyaa ra nu ndyaa ñiyivi ñiñi sisi vehe ñuhu.

⁷ Ta cuñi ra vaty tyaa xaan ñiyivi yahvi sii ra ta cuhva ñu nacumi sii ra nuyahvi ta catyi ñu maestro sihin ra.

⁸ Zoco maa ndo, ma cuhva ndo sa catyi ñiyivi maestro sii ndo vaty iyo minoo ñi ra cuu Maestro ndo, ra Cristo. Ta tandihi maa ndo, yañi ndo cuu sihin tahan ndo.

⁹ Ta ma catyi ndo zutu ndo sii ra iyo ihya ñuu ñiyivi vaty iyo minoo ñi ra cu Zutu yo. Ra ndyaa andivi.

¹⁰ Ta ma catyi ndo vaty minoo ndo cuu ra cu nuu, vaty maa ñi ra Cristo cuu ra cu nuu sii ndo.

¹¹ Ra cahnu ca nu yucu maa ndo cuu ra cua nduu muzu sii tandihi ndo.

¹² Ta yoo ra cua zanducahnu sii ra, cua zanduluhlu ra Ndyoo sii ra. Ta ra zanduluhlu sii, cua zanducahnu ra Ndyoo sii ra.

¹³ Zoco ¡ndahvi ndoho ra maestro cuenda ley ta ra fariseo! Zaha ndo tuhun vaty vaha xaan ndo, zoco ña ndisa vaty nacazi ndo yuvehe gloria, ta ña cuu quihvi ñiyivi. Ñá quihvi maa ndo, ta nu ña saha ndo quihvi inga ñiyivi cuñi quihvi.

¹⁴ ¡Ndahvi ndoho ra maestro cuenda ley ta ra fariseo! Zaha ndo tuhun vaty vaha xaan ndo, zoco ña ndisa vaty quindyaa ndo vehe ñundahvi, ñu sihi yii, ta ziqui zandavi ñaha ndo vaty vaha xaan ndo, ta naha xaan cahan ndo sihin ra Ndyoo. Sa cuenda sa zavaha ndo cuhva ya, ta ñihi xaan ca cua tasi tuñi ra Ndyoo sii ndo.

¹⁵ ¡Ndahvi ndoho ra maestro cuenda ley ta fariseo! Zaha ndo tuhun vaty vaha xaan ndo, zoco ña ndisa. Nanducu ndo nacahnu ñuu ñiyivi, ta yaha ndo tyañuhu vaty cuñi ndo nañihi ndo vazu minoo tuhun ñi ñiyivi cua zasino ndo iñi ñu cuhva sino iñi maa ndo. Ta sa nañihi ndo sii ra cuan ta zananduu ndo sii ra uu cuhva quiñi ca ta ziqui maa ndo. Ta ndisa xaan cuu si vaty cua cuhun tandihi ndo andyaya.

¹⁶ ¡Ndahvi ndoho! Ra cuua cuu ndo, ta cuñi ndo zañaha ndo ityi sii inga ñiyivi. Catyi ndo: “Cuu tyiñaha ñiyivi Ndyoo nuu ñiyivi ta cahan ñu zivi vehe ñuhu cahnu, zoco ma zavaha ñu cuhva catyi ñu. Zoco tatu cahan ñu sa cuenda xuhun cuan sa iyo sisi vehe ñuhu cuan, tacuan ta ziqui ñiñi xaan cua zavaha ñu cuhva catyi ñu.” Catyi ndo.

¹⁷ Ra tondo cuu ndo ta ra laa cuu ndo. ¿Atu cahnu ca cuu xuhun cuan ta ziqui vehe ñuhu sa zandu-ii sii si? Ña tacuan.

¹⁸ Ta catyi ndo: “Yoo ra cua tyiñaha Ndyoo nuu ñiyivi ta cahan ra zivi altar, zoco ma zavaha ra cuhva catyi ra. Zoco tatu cahan ra tuhun sa yozo nuu altar cuhva cuan, tacuan ta ziqui iyo cuaty ra tatu ma zavaha ra cuhva catyi ra.” Catyi maa ndo.

¹⁹ Ra tondo ta ra laa cuu ndo. ¿Atu cahnu ca cuu sa yozo nuu altar cuan ta ziqui altar sa zandu-ii sii si? Ña tacuan.

²⁰ Ta yoo ra tyiñaha Ndyoo nuu ñiyivi ta cahan ra zivi altar, zavaha ra sii si sa cuenda altar ta ndya sa cuenda tandihi sa yozo nuu si.

²¹ Ta yoo ra tyiñaha Ndyoo nuu ñiyivi ta cahan ra zivi vehe ñuhu, zavaha ra sii si sa cuenda vehe ñuhu ta sa cuenda ra Ndyoo, ndihi ca.

²² Ta ra tyiñaha Ndyoo nuu ñiyivi ta cahan ra zivi andivi, zavaha ra sii si ndya sa cuenda tyayu ra Ndyoo ta ndya sa cuenda ra Ndyoo ra ndyaa nuu si.

²³ ¡Ndahvi ndoho ra maestro cuenda ley ta ra fariseo! Zaha ndo tuhun vaty vaha xaan ndo, zoco ña ndisa vaty cahvi ndo ndaha menta ndo ta siti anís sihin siti comino ta saha ndo minoo minoo sisi sa usi tahan si sii ra Ndyoo, zoco ña tyaa ndo yahvi sa ñiñi ca sa catyi ley tañi sa zavaha ndo sa ndoo ta sa cundahvi iñi ndo sii ñiyivi ta sa cunhi xaan iñi ndo sii ra Ndyoo. Cuñi si sa zavaha ndo cuhva ya, ta ma zaña ndo sa cuhva tucu ndo diezmo cuan.

²⁴ Ra cuaa cuu ndo, ta cuñi ndo zañaha ndo ityi sii inga ñiyivi. Zacuenda xaan ndo sii ndo ta ña zavaha ndo cuaty ndiyi, zoco zavaha ndo cuaty nahnu xaan sa ña tyaa ndo yahvi ley cuan. Cuu si tañi tava ndo tyiyucu ndiyi nuu calu ndo ta ziqui coco ndo quití nahnu ca sa nañi camello.

²⁵ ¡Ndahvi ndoho ra maestro cuenda ley ta ndoho ra fariseo! Zaha ndo tuhun vaty vaha xaan ndo, zoco ña ndisa. Nacatya xaan ndo sata coho ta sata vaso, zoco aña ndo situ cui sa ña vaha sa zavaha ndo tañi sa zuhu ndo ta cuhva ña cuu cundyaca ñaha ndo sii ndo.

²⁶ Ndoho ra fariseo cuaa, catyi ra Jesús, xihna ca zandundiun ityi sisi vaso ta coho, ta ziqui cua ndundi tucu ityi sata si.

²⁷ ¡Ndahvi ndoho ra maestro cuenda ley ta ra fariseo! Zaha ndo tuhun vaty vaha xaan ndo, zoco ña ndisa. Cuu ndo tañi ñaña sa zandutyaqui xaan ñiyivi ityi sata, zoco ityi sisi maa maa yiqui ndiyi ñoho ta tandi inga nuu sa quiñi caa.

²⁸ Ta tacuan iyo maa ndo. Vaha xaan ñiyivi cuu ndo cuhva caa ndo ityi nuu ñiyivi, zoco aña ndo situ cui si sihin cuhva zandavi ñaha ndo ta tandi inga nuu sa ña vaha sa zavaha ndo.

²⁹ ¡Ndahvi ndoho ra maestro cuenda ley ta ra fariseo! Zaha ndo tuhun vaty vaha xaan ndo, zoco ña ndisa vaty tyaqui zavaha ndo ñaña ra i cuu profeta ta zandutyaqui ndo ñaña ñiyivi vaha.

³⁰ Ta catyi ndo: “Tatu sa vaty i sindito maa ndi quivi i sahñi ñiyivi sahnu sii ndi sii ra profeta, maa ndi ma ndoo ndi vaha sa cahñi ra sii ra.”

³¹ Ta sihin cuhva cahan ndo, zuun ñi maa ndo saha sa ndaa sa cuenda ndo vaty zutu ndo sii ra i sahñi sii ra profeta.

³² ¡Zavaha ca ndo cuhva ña vaha sa i quisaha zutu ndo!

³³ ¡Tañi coo cuu ndo, zehe quití xaan! ¿Yozo caa cuu cacu ndo ta ma cuhun ndo andyaya? Ma cuu.

³⁴ Yucuan cuenda cua tasi sii ra profeta ta sii ra iyo xaan sa siñi tuñi ra Ndyoo sii, ta sii ra cua zacuaha Tuhun Ndyoo sii ndo. Zoco maa ndo cua cahñi ndo sii zuhva ra ta zuhva ra cua tyaa ndo nuu cruz. Ta inga ra cua cañi ndo sisi vehe ñuhu ndo ta cua zayanga ndo sii ra ta zayuhu ndo sii ra, ta cua cono ra ndya minoo ñuu ta ndya inga ñuu.

³⁵ Ta yucuan cuenda sata maa ndo cua ndoo cuaty sa cuenda tandi ñiyivi vaha i sahñi ñiyivi ndya ra Abel, ra ndoo xaan, ta ndya cuhva ndya ra Zacarías zehe ra Berequías, ra i sahñi ndo sisi vehe ñuhu mahñu nu ii xaan sihin altar.

³⁶ Sa ndisa catyi sihin ndo vaty cua ndoo cuaty sa cuenda tandi ya sata ñiyivi iyo vityi.

Sacu xaan ra Jesús sa ndyehe ra ñuu Jerusalén.

³⁷ ¡Ndahvi yoho ñuu Jerusalén! Sahñi ñiyivi sii ra profeta ihya, ta ra tasi ra Ndyoo ihya, cañi ñu sii ra sihin yuu. ¡Cuaha xaan cuaha xaan saha cuñi zandu-ñin sii ñiyivi ñuu ya ta zacuende sii ñu tañi zacuenda minoo ndivi sii zehe ti sisi ndisi ti, zoco ña cuñi ñu!

³⁸ Ndyehe ndo vityi, ndoho ñiyivi ñuu Jerusalén, vaty vityi zandoi sii ndo.

³⁹ Vaty catyi sihin ndo vaty ma ndyehe ca ndo sii, ndya cuhva ndya quivi cua catyi ndo vaty vaha xaan cuu ra vasi sa cuenda ra ndyaca ñaha sii yo.

24

Cuhva i catyi ra Jesús cuhva cua tani vehe ñuhu cahnú

¹ I quita ra Jesús vehe ñuhu ta sa cuahan ra ityi ta i tuhva ra i casi ra sii ra ta i quisaha zañaha ra sii ra Jesús cuhva caa vehe ñuhu.

² Zoco i nacahan ra Jesús ta catyi ra sihin ra: ¿Atu ndyehe ndo tandi ihya? Sa ndisa catyi sihin ndo vaty numinoo yuu ya ta ma ndoo si ziqui tahan si. Cua tani tandi si. (Sihin cuhva ya zacoto ra Jesús vaty cua zativi ndi ñiyivi vehe ñuhu cuan.)

Zeña sa cua naa ñuu ñiyivi

³ Tacuan ta ziqui cuahan ra yucu sa nañi Olivos. Ta sa sindyaa ra Jesús yucuan, ta i tuhva ra i casi ra sii ra, ta xehe ñi i cahan ra sihin ra, ta catyi ra: Cuñi ndi sa nacatyun sihin ndi ama cua coo cuhva cuan. ¿Ñaa zeña cua ndyehe ndi, ta cua coto ndi vatyí sa cuñi quisun ta sa cuñi naa ñuu ñiyivi? Catyi ra.

⁴ Ta i nacahan ra Jesús, ta catyi ra sihin ra: Zacuenda ndo sii ndo coto zandavi ñaha ñiyivi sii ndo.

⁵ Vatyí cuaha xaan ra cua quisi, ta cua catyi ra vatyí vasi ra sa cuenda mi, ta cua catyi ra: “Yuhvi cui Cristo.” Ta cua zandavi ñaha ra sii cuaha xaan ñiyivi.

⁶ Cua cuiñi ndo tuhun vatyí cua coo cuatyí ta cahñi tahan xaan ñiyivi, zoco ma yuhu ndo. Xihna ca cua cuu tandihi cuhva cuan, cumañi ca sa saa quivi naa ñiyivi.

⁷ Vatyí cua cahñi tahan minoo ñuu sihin inga ñuu, ta cua coo cuatyí ñuu nahnu sihin inga ñuu nahnu. Ta cua coo tama ta cuehe ta cua coo sa taan nahnu xaan ziiñ ziiñ ityi.

⁸ Ta tandihi cuhva ya, nu naca cua quisaha ndyehe ñiyivi tundoho.

⁹ Ta ziqui cua cuhva cuenda ñiyivi sii ndo sii ra ndyaca ñaha vatyí cua ndoho ndo. Ta cua cahñi ñiyivi sii zuhva ndo. Ta tandihi ñiyivi ñuu ñiyivi cua cuxaan xaan ñu ndyehe ñu sii ndo sa cuenda mi.

¹⁰ Ta quivi cuan, cuaha xaan ñiyivi sino iñi sii, cua ndoyo ñuhu ñu. Ta cua xico tuhun ra sii tahan ra. Ta ma cuu ca ndyehe ra sii tahan ra.

¹¹ Cua coo cuaha xaan ra vatyí. Cua catyi ra vatyí cahan ra sa cuenda ra Ndyoo, ta cua zandavi ñaha ra sii cuaha xaan ñiyivi.

¹² Cuaha xaan sa quiñi cua coo ndya cuhva ndya ma cuñi ca ñiyivi sii tahan ñu.

¹³ Zoco ra ma zaña tuhun ndya nu cua ndihi ñuu ñiyivi, cua cacu ra.

¹⁴ Ta Tuhun Vaha sa cuenda cuhva ndyaca ñaha ra Ndyoo, cua zacoto ñiyivi sii si nacahnu ñuu ñiyivi, ta cua cuiñi tandihi ñiyivi sii si, ta ziqui cua naa ñuu ñiyivi.

¹⁵ Tatu ndyehe ndo minoo sa zativi xaan ta quiñi xaan zacuu si, ta nandyaa si cuan nu ii cuhva i catyi ra profeta Daniel, cutuñi iñi ndo ndoho ra cahvi tuhun ya,

¹⁶ tatu ndyehe ndo sii si cuan, nacono ñiyivi ñoho Judea, ta naquihvi xehe ñu ndya yucu.

¹⁷ Tatu iyo ra yozo xiñi vehe ra quivi cuan, ma cuatu ra numaa iyo ndaha tyiño cuñi ra tava ra sisi vehe ra.

¹⁸ Ta ra ñoho itu ra, ma cunuhu ra ndya vehe ra sa cua naquihin ra zahma ra.

¹⁹ Ta ndahvi ñu zihí sa ñoho zehe quivi cuan a tatu iyo zehe ñu sa tyaxi quivi cuan vatyí cahnu xaan tundoho cua ndyehe ñu.

²⁰ Ta caca ndo sii ra Ndyoo vatyí ma tahan si cono ndo quivi vico zavi a minoo quivi quitatu ñiyivi

²¹ vatyí tatu tacuan tahan si, yaha xaan cuaha tundoho cua coo, minoo cuhva ta coo ca ndya cuhva ndya quivi i sino ñuu ñiyivi ta ma coo ca tundoho cahnu xaan tañi tundoho ya inga saha ndaha ñi.

²² Tatu ma zanduzuhva ra Ndyoo quivi tundoho cuan, yoñi ñiyivi cua cacu. Zoco cua zanduzuhva ca ra sii si sa cuenda ñiyivi i casi ra.

²³ Tatu catyi minoo ra sihin ndo: “Ihya ndyaa ra Cristo” a “Yucuan ndyaa ra”, catyi ra, ma sino iñi ndo.

²⁴ Vatyí cua nduvita cuaha xaan ra zandavi ñaha, ta cua catyi ra vatyí Cristo cuu ra, ta cua catyi ra vatyí cahan ra tuhun saha ra Ndyoo sii ra. Ta cua zavaha ra zeña nahnu ta sa ndyityi ndya cuhva ndya sii ñiyivi i casi ra Ndyoo cua zandavi ñaha ra tatu sa vatyí cuu cuhva cuan, zoco ma cuu.

²⁵ Ndyehe ndo, sa nacatyí tandihi sihin ndo cuee ca sa tahan si.

²⁶ Yucuan cuenda tatu catyi ñiyivi sihin ndo: “Ndyehe ndo, ndyaa ra Jesús sisi cuhu.” Catyi ñu. Zoco ma cuhun ndo cundyehe ndo. A tatu catyi ñu: “Iyo minoo nu ñoho xehe ra.” Ma sino iñi ndo.

²⁷ Vatyí quivi cua quisi inga saha, cua ndyehe tandihi ñiyivi sii. Tañi ndyehe tandihi ñiyivi tatu yaha tasa zavi ityi caña ñicandyi ta cuhva ndya ityi cua iñi, tacuan cua cuu si quivi quisi tucu ra i quisi ndya gloria.

²⁸ Vatyí nu catuu ndiyí, yucuan cua titahan tyasii.

Cuhva cua quisi tucu ra i quisi ndya gloria

²⁹ Tatu sa yaha ndyehe ñiyívi tundoho cuan ta ziquí ña naha ca ta cua nduñaa ñicandyi ta ma ndyehe ca nu yoo. Cua nacoyo tiño, ta ndya cuhva ndya cua canda andívi.

³⁰ Tacuan ta ziquí cua ndyehe ñiyívi sii ra i quisi ndya gloria ityi andívi, ta cua nducuihya xaan iñi tandíhi tata ñiyívi ñuu ñiyívi. Cua ndyehe ñu vatyí vasi ra nu vico, ta sihin cuaha xaan cuhva. Ta tyaqui xaan caa ra.

³¹ Ta cua tasi ra sii ángel ra ndya tandíhi sa cumi tahan siqui ñuu ñiyívi, ta cua tiví ra cutu sihin minoo nduzu ñihi xaan. Ta cua zatahan ra sii tandíhi ñiyívi i casi ra Ndyoo ndya nacahnu ñuu ñiyívi.

³² Vityí coto ndo minoo cuhva iyo yutu higuera ta tandíhi inga yutu. Tatu cua ndyehe ndo sa cua nacoyo ndaha tu ta cua nduyutya tu, tacuan ta sa sito ndo vatyí sa cua nducahñi.

³³ Ta tacuan tucu tatu sa ndyehe ndo vatyí sa cuu tandíhi tuhun sa quehin sihin ndo ihya, tacuan ta cua coto ndo vatyí sa cua cuyatyí sa cunaa ñuu ñiyívi.

³⁴ Sa ndisa catyi sihin ndo vatyí cua cuu cuhva ya cuee ca sa cuu ñiyívi sa iyo vityí.

³⁵ Yutyí andívi ta ñuhu ñuu ñiyívi cunaa si. Zoco tuhun quehin, ma naa si.

³⁶ Zoco yoñi ñiyívi sito ñaa quívi a ñaa cuhva cua cuu si. Nu ángel andívi ta ña sito ra. Maa tuhun ñi ra Ndyoo Zuti sito.

³⁷ Tañi i cuu si quívi ra Noé, tacuan cua cuu tucu si quívi cua quisi tucu ra i quisi ndya gloria.

³⁸ Quívi cumañi ca cuu ñiyívi sihin ndutyá, sasi ñu. Sihi ñu. Tindaha ñu. Ta saha ñu sii zehe ñu tindaha ñu ndya cuhva ndya quívi i quíhvi ra Noé sisi barco.

³⁹ Ta zana ñi iñi ñu, ta i zanaa ndutyá sii tandíhi ñu. Zuun ñi cuhva cuan, cua cuu tucu si quívi cua quisi tucu ra i quisi ndya gloria.

⁴⁰ Quívi cuan, uu tahan ra ñoho itu ra, cua quihin sii minoo ra. Ta inga ra cua nandoo.

⁴¹ Ta uu tahan ñuzíhi ndyico ñi ñi quívi cuan, cua quihin sii minoo ña. Ta inga ña cua nandoo.

⁴² Yucuan cuenda cuatu listo ndo vatyí ña sito ndo ñaa quívi cua quisi ra ndyaca ñaha sii ndo.

⁴³ Coto ndo cuhva ya, tatu sa i sito ra xu vehe ñaa cuhva cua quíhvi ra zuhu, cua cuatu listo ra, ta ma cuhva ra sa nuña ra zuhu cuan vehe ra.

⁴⁴ Yucuan cuenda cuatu listo tucu maa ndo vatyí minoo quívi sa ña sica iñi ndo, cua quisi tucu ra i quisi ndya gloria.

Muzu vaha ta muzú ña vaha

⁴⁵ ¿Yoo ra cuu minoo muzú vaha, muzú sa iyo sa siñi tuñi vaha ta saha patrón ra sa cundyaca ñaha ra vehe ra ta cuhva ra sa casi inga muzú ra cuhva tahan si?

⁴⁶ Zii xaan cua cuñi muzú cuan tatu nasaa patrón ra ta nañihi ra sii ra zavaha ra cuhva cuan, cuhva catyi patrón ra.

⁴⁷ Sa ndisa catyi sihin ndo vatyí cua cuhva patrón ra sa cundyaca ñaha ra tandíhi sa sii ra.

⁴⁸ Zoco tatu ña vaha muzú cuan ta sica iñi ra sihin añaima ra: “Naha xaan cuahan patroin.”

⁴⁹ Ta yucuan cuenda quisaha cañi ra sii inga muzú ta sasi cuahyi ra ta sihi xaan ra ndixi ta siñi ra.

⁵⁰ Tacuan ta zana ñi iñi ra ta cua nasaa patrón ra minoo quívi sa ña ndatu ra sii ra, minoo cuhva sa ña sito ra,

⁵¹ ta cua tasi tuñi xaan patrón ra sii ra. Ta cua tahan si sii ra tañi cua tahan si sii ñiyívi zaha tuhun vatyí vaha xaan ñu, zoco ña ndisa. Ñihi xaan cua vacu saa ñu, ndya cuhva cua casi quihñi noho ñu.

¹ Cuhva ndyaca ñaha ra Ndyoo cuu si tañi cuhva i tahan usi tahan ñu yoco sa cuahan minoo vico tandaha. I quihin ñu lámpara ñu sa sahmi azetye, ta cuahan ñu vatyí cua zatahan ñu sii ra cua tindaha.

² Ta ohon tahan ñu cuan, listo xaan ñu. Ta ohon tahan ñu, laa xaan ñu.

³ Ta ñu laa cuan, i quihin ñu lámpara ñu, zoco ñá quihin ñu cuaha ca azetye.

⁴ Ta ñu listo cuan, i quihin ñu lámpara ñu, ta i quihin tahan tahan ñu minoo yutyí azetye vatyí cua zacutu tucu ñu sii si.

⁵ Ta ñi ñi sa cucuee xaan ra cua tindaha, i quixi tandíhi ñu.

⁶ Tacuan ta maañuu i siñi ñu cana saa ñiyívi, ta catyí ñu: “¡Sa vasi ra cua tindaha; cuahan ndo cua zatahan ndo sii ra!”

⁷ Ta i nduvita tandíhi ñu, ta i zanduvaha ñu lámpara ñu.

⁸ Ta i catyí ñu laa cuan sihin ñu listo cuan: “Cuhva ndo zuhva azetye ndo sii ndi vatyí sa cuñi ndahva lámpara ndi.”

⁹ Zoco i nacahan ñu listo cuan, ta catyí ñu: “Ma cuu, coto ma ñihi si sa cuenda tandíhi yo. Vaha ca tatu cuhun ndo nu cuyahvi si ta zata ndo zuhva sa cuenda maa ndo.” Catyí ñu.

¹⁰ Zoco ñi ñi sa cuahan ñu sa cua zata ñu sii si, ta i saa ra cua tindaha cuan, ta ñu sa ndyaa listo i quihvi ñu sihin ra nu iyo vico tindaha, ta i nucundazi yuvehe.

¹¹ Cuee ca i nasaa inga ñu yoco cuan, ta i catyí ñu: “¡Tata, tata, nuña yuvehe!”

¹² Zoco i nacahan ra ta catyí ra: “Sa ndisa catyí sihin ndo vatyí ña site sii ndo.”

¹³ Ta ziquí i catyí ra Jesús: Yucuan cuenda cuatu listo ndo vatyí ña sito ndo ñaa quivi a ñaa cuhva cua quisi tucu ra i quisi ndya gloria.

Cuñi si sa cutyiño yo tandíhi sa saha ra Ndyoo sii yo

¹⁴ Cuhva ndyaca ñaha ra Ndyoo cuu si tañi minoo ra sa cuñi cuhun minoo ñuu nusica, ta i cana ra sii tandíhi muzu ra, ta saha cuenda ra xuhun ra sii ra.

¹⁵ Sii minoo ra saha ra tañi ohon mil, sii inga ra tañi uu mil, ta sii inga ra minoo mil ñi. Cuhva cuu sii sa minoo minoo ra sa zatyíño ra sihin si, tacuan saha ra sii si sii ra. Ta i quihin ra ityí cuahan ra.

¹⁶ Tacuan ta ra i ñihi sa ohon mil cuan, cuahan ra, ta i zatyíño ra sihin si, ta i ñihi ra inga ohon mil ziquí si.

¹⁷ Ta zuun ñi cuhva cuan, ra i ñihi uu mil, i ñihi ra inga uu mil ziquí si.

¹⁸ Zoco ra i ñihi minoo mil ñi, i sahan ra, ta i sitya ra minoo yavi, ta i tyixehe ra xuhun patrón ra.

¹⁹ Cuee xaan ca, i nasaa patrón, ta i tava ra cuenda sihin muzu cuan.

²⁰ Xihna ca i saa ra i ñihi ohon mil cuan, ta i saha cuenda ra inga ohon mil sii patrón ra, ta i catyí ra: “Tata, i sohon ohon mil sii. Ica si ya sihin inga ohon mil i zahacanei ziquí si.”

²¹ I catyí patrón ra sihin ra: “Vaha xaan; yoho cuu minoo muzu vaha, ta ndoo xoon. Vaha xaan i zatyíñon sihin sa zuhva ñi xuhun i zandoi suhun. Yucuan cuenda vityí cua cuhve sa cundyaca ñohon cuaha ca. Quihvi ta cuzi xaan iñun iñ ñi sihin mi.”

²² Cuee ca i saa muzu sa ñihi sa uu mil cuan, ta i catyí ra: “Tata, i sohon uu mil sii; ica si ya sihin inga uu mil i zahacanei ziquí si.”

²³ I catyí patrón ra sihin ra: “Vaha xaan; yoho cuu minoo muzu vaha, ta ndoo xoon. Vaha i zatyíñon sihin sa zuhva ñi xuhun i zandoi suhun. Yucuan cuenda vityí cua cuhve sa cundyaca ñohon cuaha ca. Quihvi ta cuzi xaan iñun iñ ñi sihin mi.” Catyí ra.

²⁴ Tacuan ta i saa muzu sa ñihi minoo mil ñi, ta i catyí ra sihin patrón ra: “Tata, site suun vatyí minoo ra xaan cuun, ta tuhvon naquihin sa yívi suun cuu, ta nacuhun tyiño zacuu inga ra.

²⁵ Ta i yuhi suun, ta sehin ta i tyixehi xuhun sisi ñuhu. Naquihin sa suun vityí.”

²⁶ Ta i nacahan patrón ra, ta catyí ra: “Yoho, minoo muzu ña vaha ta ra zusa cuun. Sa siton vatyí tuhve naquihin sa yívi sii, ta naquihin tyiño zacuu inga ra.

²⁷ Yucuan cuenda ¿ña cuenda ñá tyuhun xuhin banco, ta sa cua nasei ta cua naquihin sii si, zoco sa zahacanaa si zuhva?” Catyí patrón cuan.

²⁸ Ta i catyi ra sihin inga ra yucu yucuan: “Quindyaa ndo xuhun sa sehi sii ra ya, ta cuhva ndo sii si sii ra sa cumi usi mil cuan.

²⁹ Vaty ra zatyño vaha sihin sa sehi sii ra, cua cuhve cuaha ca sii ra, ta cua coo cuaha xaan ca sii ra. Ta ra ña cuñi zatyño sihin sa sehi sii ra, cua quindyeyi sii si.

³⁰ Ta muzu ña vaha cuan, zavita ndo sii ra ityi sata nu ñaa xaan, nu cua vacu xaan ñiyivi ndya cuhva cua casi quihñi noho ñu.”

Cuhva cua tyicuhva ra Jesús sii ñiyivi ñuu ñiyivi

³¹ Quivi cua quisi tucu ra i quisi ndya gloria sihin ángel ra, tyaqui xaan ra. Ta cua cundyaa ra tyayu nu cua cundyaca ñaha ra.

³² Ta tandihi ñiyivi ñuu ñiyivi cua titahan ñu ityi nuu ra, ta cua zaziin ra sii ñu tañi zaziin minoo ra cu pastor sii mvee ticaty zono ra sihin mvee zono ra.

³³ Mvee ticaty zono ra cua tyaa ra siyo cuaha ra. Ta mvee zono ra cua tyaa ra sii ti siyo zaty ra.

³⁴ Ta ziqui cua catyi Rey sihin ñu ndyaa siyo cuaha ra: “Ñaha ndo, Cuñi xaan Zuti sii ndo. Cumañi ca sino ñuu ñiyivi, ta sa ndyaa listo gloria vaty cua quihvi ndo.

³⁵ Vaty yuhvi i sizoque, ta saha ndo sa casi. Ityi xein, ta saha ndo sa cohi. I sica noi ta ñahñi vehi, ta i saha ndo vehe ndo cundyei.

³⁶ Ñahñi zahme, ta saha ndo zahma sii. I cuhi ta sahan ndo i sindyehe ndo sii. I siñohi vehe caa, ta sahan ndo i sindyehe ndo sii.” Cua catyi ra.

³⁷ Ta ziqui cua catyi ñiyivi vaha cuan sihin ra: “Tata, ¿ama i ndyehe ndi suun sizocon ta saha ndi sa casun, a ityun ta saha ndi sa cohon?”

³⁸ ¿Ta ama i ndyehe ndi suun sica noo ta saha ndi sa cundyocon vehe ndi a ndyehe ndi suun ta ñahñi zahmon, ta saha ndi zahma suun?

³⁹ ¿Ta ama i ndyehe ndi suun sa cuhun a ñohon vehe caa ta sahan ndi sa ndyehe ndi suun?” Cua catyi ñu.

⁴⁰ Ta cua nacahan Rey cuan ta catyi ra sihin ñu: “Sa ndisa catyi sihin ndo, tandihi sa i zavaha ndo sihin yañi, vazu ra ndyih ca, zoco sihin mi i zavaha ndo cuhva cuan.”

⁴¹ Ta ziqui cua catyi Rey cuan sihin ñiyivi ndyaa siyo zaty ra: “Cuiñi siyo ndo sii, ndoho ñiyivi sa cuxaan ra Ndyoo sihin. Cuquihñi ndo nu cayu ñúhu nu i zavaha Ndyoo sa cuenda cuihna ta taty cuihna sa ndyico sii ra.

⁴² Vaty i sizoque, ta ñá saha ndo sa casi. I cu-ityi, ta ñá saha ndo ndutya cohi.

⁴³ I sica noi, ta ñahñi vehi, ta ñá saha ndo vehe ndo cundyei. Ñahñi zahme, ta ñá saha ndo zahma sii. I cuhi, ta i siñohi vehe caa, ta ñá sindyehe ndo sii.”

⁴⁴ Ta ziqui cua catyi tucu ñiyivi cuan sihin Rey cuan: “Tata, ¿ama i ndyehe ndi suun sizocon a ityun a sica noo ta ñahñi vehun? ¿Ta ama i ndyehe ndi suun sa ñahñi zahmon a cuhun a ñohon vehe caa ta ñá tyindyee ndi suun?”

⁴⁵ Ta cua nacahan Rey ta catyi ra: “Sa ndisa catyi sihin ndo vaty tandihi sa ñá zavaha ndo sihin minoo ñiyivi luhlu ca, ñá zavaha ndo sii si sihin mi.” Cua catyi ra.

⁴⁶ Ta ziqui cua cuhun ñu nu cua ndoho ñu tandihi cui tyiemvu. Zoco ñiyivi vaha, cua cuhun ñu nu cua cundito ñu tandihi cui tyiemvu.

26

Sihñi tahan ra tyiño yozo caa cua tiin ra sii ra Jesús

¹ Sa yaha cahan ra Jesús tandihi tuhun ya, ta ziqui i catyi ra sihin ra i casi ra:

² Sa sito ndo vaty uu quivi ñi ca, ta cua cuu si vico zuhun, ta cua xico minoo ra sii ra i quisi ndya gloria, ta cua cahñi ñiyivi sii ra nu cruz. Catyi ra.

³ Ta sisi quivi cuan i titahan ra zutu nahnu sihin ra maestro cuenda ley ta ra mandoñi. Tandihi ra cuan cuu ra ra hebreo nahnu, ta i titahan ra nuquehe vehe ra Caífas ra cu zutu ya cahnu.

⁴ Ta yucuan i natuhun tahan ra yozo caa cua tiin xehe ra sii ra Jesús, ta cua cahñi ra sii ra.

⁵ Zoco i catyi ra sihin ra tahan ra: Zoco ma cuu si quivi vico vaty cuaha xaan ñiyivi yucu, ta coto cahñi tahan ñu sihin yo.

I tyozo minoo ñaha azetye vixi xiñi ra Jesús

⁶ Ñoho ra Jesús ñuu Betania vehe ra Simón, ra i cuhu cuehe tyahyu.

⁷ Ta i tuhva minoo ñaha sii ra. Ñaa ña minoo yutyi sino sihin minoo yuu yahvi xaan, ta ñoho azetye vixi. Ta i tyozo ña sii si xiñi ra Jesús cuhva sa sasi ra xita.

⁸ Ta sa ndyehe ra i casi ra Jesús cuhva zavaha ña, i cuxaan ra, ta catyi ra: ¿Ñacu zativi ña sii si?

⁹ Vaha ca tatu sa i xico ña sii si ta ñihi ña cuaha xuhun ta cuhva ña sii ñiyivi ndahvi.

¹⁰ Ta sa sito ra Jesús sa cahan ra cuan, ta ziqui i catyi ra sihin ra: ¿Ñacu cuyuhu xaan ndo sihin ñaha ya? I zavaha ña minoo sa vaha sihin.

¹¹ Tandihí tyiemvu cua coo ñiyivi ndahvi sihin ndo, ta cuu tyindyee ndo sii ñu tatu cuñi ndo. Zoco yuhvi ma cundyei sihin ndo tandihí tyiemvu.

¹² Cuhva i zavaha ña ya sa tyozo ña azetye vixi coño ñuhi cuu sa zanduvaha ña sii, sa cuenda sa cuquihi ñaña.

¹³ Sa ndisa catyi sihin ndo vaty vazu ndyacamaa nacaty ñiyivi Tuhun Ndyoo, zoco cua nacaty ñu cuhva i zavaha ña ya sihin, ta cua nacohon iñi ñiyivi sii ña. I catyi ra Jesús.

Cuhva i xico ra Judas sii ra Jesús

¹⁴ Yaha cuan ta ziqui minoo sa usi uu tahan ra i casi ra Jesús, ra sa nañi Judas Iscariote, cuahan ra cua cahan ra sihin ra zutu nahnu.

¹⁵ Ta i catyi ra sihin ra: ¿Yozo cua cuhva ndo sii, tatu cuhva cuende sii ra sii ndo? Ta i zandaa ra tyiño sa cua cuhva ra oco usi tahan xuhun cui.

¹⁶ Ta ndya quivi cuan, i quisaha nducu xaan ra Judas cuhva cua cuhva cuenda ra sii ra Jesús sii ra cuan.

I cuxiñi ra Jesús sihin sa usi uu tahan ra i casi ra

¹⁷ Nu quisaha vico nu tuhva ñiyivi hebreo sasi pan ña ndaa, i tuhva ra i casi ra Jesús sii ra, ta i catyi ra sihin ra: ¿Ndyamaa cuñun vaty cua zanduvaha ndi sa cua cuxiñun sa cuenda vico zuhun ya?

¹⁸ Ta i catyi ra Jesús: Cuahan ndo ndya ñuu cahnu vehe ra sa cahan yo tuhun, ta catyi ndo sihin ra: “Cati ra Maestro, cua saa cuhva sa cua cui. Vehe moo cua cuxiñi sa cuenda vico zuhun ya sihin ra i casi.”

¹⁹ Ta tacuan i zavaha ra, cuhva i catyi ra Jesús sihin ra, ta i zanduvaha ra sa cuxiñi ra sa cuenda vico cuan.

²⁰ Ta cuhva sa sa cuaa cuan, sa ndyaa ra Jesús mesa sihin sa usi uu tahan ra i casi ra.

²¹ Ta ñi ñi sa sasi ra xita i catyi ra Jesús sihin ra: Sa ndisa catyi sihin ndo vaty cua xico minoo ndo sii. Cati ra.

²² Ta i nducuihya xaan iñi ra ndihí sihin ra, ta i quisaha ndaca tuhun minoo minoo ra sii ra Jesús: Tata, ¿atu yuhvi cui?

²³ Ta i nacahan ra Jesús, ta catyi ra: Ra sa sasi sihin iñi ñi coho, yucuan ra cuu ra cua xico sii.

²⁴ Cuahan ra i quisi ndya gloria cuhva catyi Tuhun Ndyoo; zoco ñndahvi ñi cuu ra xico sii! Vaha ca tatu sa ñá cacu ra vaty cua ndyehe xaan ra tundoho.

²⁵ Tacuan i catyi ra Jesús, ta ziqui ra Judas ra sa xico sii ra i ndaca tuhun ra sii ra, ta catyi ra: Maestro, ¿atu zuun yuhvi cui? Ta i catyi ra sihin ra: Tacuan cu si, tañi catyi moo.

²⁶ Ta cuhva sa cuxiñi ra, i quihin ra Jesús pan, ta i saha ra tyahvi ndyoo sii ra Ndyoo, ta ziqui i sahnun ra sii si ta saha ra sii si sii ra i casi ra, ta i catyi ra: Quihin ndo sii si ta casi ndo. Ihya cuu tañi coño ñuhi.

²⁷ Tacuan ta i quihin ra minoo vaso ñoho vino, ta i saha ra tyahvi ndyoo sii ra Ndyoo, ta i saha ra sii si sii ra, ta i catyi ra: Coho tandihí ndo zuhva zuhva

²⁸ vaty ihya cuu tañi ñiñi sa cuenda tyiño saa sa zandaa ra Ndyoo. Cua cati si, ta sa cuenda maa si, cua ndasi cuaty cuaha xaan ñiyivi.

²⁹ Zoco catyi sihin ndo vaty ma coho que vino ndya quivi cua cohi sii si sihin maa ndo minoo cuhva saa nu ndyaca ñaha ra Ndyoo.

Catyi ra Jesús vaty cua catyi ra Pedro vaty ña sito ra sii ra

³⁰ I sata tandihi ra minoo yaa Ndyoo, ta ziqui cuahan ra ndya yucu Olivos.

³¹ Tacuan ta i catyi ra Jesús sihin ra: Sa cuaa vityi tandihi cuii ndo cua zandoo ndo sii. Ta ma cuñi ca ndo cundyico ndo sii, vaty catyi Tuhun Ndyoo: “Cua cuu ra cu pastor, ta cua quitu cuaty tandihi cuii mvee ticaty zono ra.”

³² Zoco sa yaha nandote ta cua cuhin vaty ca ta ziqui maa ndo ndya Galilea.

³³ Ta ziqui i catyi ra Pedro sihin ra: Vazu zandoo tandihi ca ra ya suun, zoco yuhvi cua cundyique suun.

³⁴ Ta i catyi ra Jesús sihin ra: Sa ndisa catyi suhun vaty zuun ñi sa cuaa vityi, cuee ca sa vacu saa ndivi tyahnu, cua catyun uñi tahan saha vaty ña siton sii.

³⁵ Ta i catyi ra Pedro sihin ra: Vazu cui suhun, zoco ma catyi sa ña site suun. Ta tacuan tucu i cahan tandihi ca ra i casi ra Jesús.

Cahan ra Jesús sihin ra Ndyoo minoo nu yucu yutu tyaqui nu nañi si Getsemani

³⁶ Tacuan ta ziqui i saa ra Jesús sihin ra i casi ra ndya minoo nu yucu yutu tyaqui nu nañi si Getsemani, ta i catyi ra sihin ra: Cundyaa ndo ihya vaty cuehin cua quehin sihin ra Ndyoo ityi nuu ca.

³⁷ Ta i quihin ra Jesús sii ra Pedro ta sii nduu tahan zehe ra Zebedeo cuahan sihin ra, ta i quisaha nducuihya xaan iñi ra, ta ndahvi xaan cuñi ra.

³⁸ Tacuan ta i catyi ra: Cuihya xaan cuñi añime cuhva ndya sa cuñi cui. Ndo ndo ihya ñi, ta cundyaa tyacu ndo sihin.

³⁹ Ta ziqui cuahan ra Jesús zuhva ca ityi nuu, ta i sicava ndyayu ra nu ñuhu, ta i sica tahvi ra sii ra Ndyoo, ta catyi ra: Ndyoo Zuti, tatu sa vaty cuu, cuhvon sa ma ndyehi tundoho sa cua ndyehi vityi, zoco ma cuu si cuhva cuñi mi, nacuu si cuhva cuñi moo.

⁴⁰ Tacuan i catyi ra Jesús, ta ziqui i sahan ra nu yucu ra ndihi sihin ra, ta i nañihi ra sii ra quixi ra, ta i catyi ra sihin ra Pedro: ¿Yozo caa? ¿Ñacu ñá cuu cundyaa tyacu ndo sihin numinoo ora?

⁴¹ Cutyacu ndo ta cahan ndo sihin ra Ndyoo coto nducu coto ihñi cuihna sii ndo. Cuñi ndo zavaha ndo sa vaha, zoco ña cuu sii ndo sa maa tuhun ñi ndo.

⁴² Tacuan ta i sahan tucu ra Jesús inga saha sa cua cahan ra sihin ra Ndyoo, ta i catyi ra: Ndyoo Zuti, tatu cuu sa ma ndyehi tundoho ya, vaha xaan, zoco tatu ma cuu, nacuu si cuhva cuñi moo. Catyi ra.

⁴³ Ta ziqui i nasaa ra, ta i nañihi ra sii ra ndihi sihin ra quixi tucu ra vaty situ xaan ra.

⁴⁴ Ta i zandoo ra sii ra, ta cuahan ra sa cu uñi saha, ta zuun ñi tuhun cuan i cahan ra sihin ra Ndyoo.

⁴⁵ Ta ziqui i nasaa tucu ra nu yucu ra i casi ra, ta i catyi ra sihin ra: Cuzu ndo vityi, ta quitatu vaha ndo. Sa saa cuhva sa cua nacuhva ñiyivi sii ra i quisi ndya gloria sii ra iyo cuaty.

⁴⁶ Ta nduvita ndo. Coho yo. Sa vasi ra xico sii.

Tiin ra sii ra Jesús

⁴⁷ Nu cahan ca ra Jesús, ta i saa ra Judas; minoo sa usi uu tahan ra i casi ra Jesús cuu ra. Ta i quisi cuaha xaan ñiyivi sihin ra. I tasi ra zutu nahnu ta ra mandoñi sii ra, ta ñaa ra mityi ta yutu.

⁴⁸ Ra sa xico sii ra Jesús, i saha ra minoo cuhva sii ra cuan, ta catyi ra: Ra cua cohi xiti cuan, yucuan cuu ra tiin ndo. Tiin vaha ndo sii ra.

⁴⁹ Ta i saa ra Judas, ta i tuhva ra sii ra Jesús, ta i catyi ra: Nacumi suun, Maestro. Ta i sihi ra xiti ra.

⁵⁰ Ta i catyi ra Jesús sihin ra: Amigo, ¿ña cuenda vasun? Catyi ra. Ta ziqui i tiin ra sii ra Jesús, ta cuahan ra sihin ra.

⁵¹ Ta minoo ra ndihi sihin ra Jesús, i tava ra mityi ra, ta i cañi ra sii ra cu muzu ra cu zutu ya cahnu, ta i sahndya ra zoho ra siyo cuaha.

⁵² Ta ziqui i catyi ra Jesús sihin ra: Natyuhun mityun sisi veno si. Ra cahñi tahan sihin mityi, cua cuu ra sihin mityi.

⁵³ ¿Atu sica iñun vatyí ma cuu caque sii Zuti ta vityi vityi cua tasi ra tañi usi uu ityi ángel cua zacuenda sii?

⁵⁴ Zoco tatu tacuan zavehi, ¿yozo caa ta natahan si cuhva catyi Tuhun Ndyoo vatyí cua tahan si sii?

⁵⁵ Ta ziqui i catyi ra Jesús sihin ñiyivi: ¿Atu vasi tiin ndo sii minoo ra zuhu vatyí ñaa ndo mityi ta ndaha tyiño xaan? Tahan tahan quivi i sehin vehe ñuhu cahnu ta yucu ndo, zoco ñá tiin ndo sii yucuan.

⁵⁶ Zoco tacuan cu si tandihi cuhva ya vatyí cua natahan tandihi cuhva i tyaa ra profeta nuu tutu ra Ndyoo. Tacuan i catyi ra Jesús, ta ziqui i zandoo tandihi ra i casi ra sii ra, ta i sino ra.

I sindyaca ra sii ra Jesús nu titahan ra cu tyiño hebreo

⁵⁷ Ra i tiin sii ra Jesús, i sindyaca ra sii ra ityi nuu ra Caifás. Ra Caifás cuu ra cu nuu sii tandihi ra cu zutu. Ta yucuan i titahan ra maestro cuenda ley ta ra mandoñi.

⁵⁸ Ta i sindyico ra Pedro sica sica ñi ndya cuhva ndya saa ra nuquehe vehe ra cu zutu ya cahnu, ta yucuan i quihvi ra, ta i sicundyaa ra sihin ra policia vatyí cua ndyehe ra yozo caa cua cundaa tyiño sa cuenda ra Jesús.

⁵⁹ Ra cu zutu ya cahnu sihin ra mandoñi ta tandihi ra cu tyiño hebreo, i nanducu xaan ra ñiyivi cua cuhva sa ndaa sa cuenda ra Jesús vazu maa cuendu ñi cuu si vatyí cuñi ra cahñi ra sii ra.

⁶⁰ Zoco ñá ñihi ra cuhva sa yatyi vazu cuaha ñiyivi saha sa ndaa, vatyí ñá nacasi tahan sa cahan ra. Ndyo nu ndihi tuhun i ñihi ra sii uu tahan ra.

⁶¹ Ta i catyi ra cuan: Ihya ra i catyi: “Cuu cani vehe ñuhu cahnu ra Ndyoo, ta cuu zanandei sii si sisi sa uñi quivi ñi.”

⁶² Ta ziqui i nduvita ra cu zutu ya cahnu, ta i catyi ra sihin ra Jesús: ¿Ñacu ña nacohon ii caña ñi? ¿Ñaa sa cuu sa cahan ñiyivi ya zicun? Catyi ra.

⁶³ Zoco ñá nacahan maa ra Jesús. Tacuan ta i catyi ra cu zutu ya cahnu: Sihin zivi ra Ndyoo ndito quehin, ta catyi suhun vatyí cohon sa ndisa ta nacatyun sihin ndi tatu ra Cristo cuun, ra cu Zehe ra Ndyoo.

⁶⁴ Ta i catyi ra Jesús sihin ra: Zuun ra cui tañi catyun. Ta catyi tuqui sihin maa ndo vatyí cua ndyehe ndo sii ra i quisi ndya gloria cuhva cundyaa ra siyo cuaha ra Ndyoo ta cuhva cua quisi ra ndya andivi sisi vico.

⁶⁵ Tacuan catyi ra Jesús, ta ziqui ra cu zutu ya cahnu, cuxaan ra ta i ndata ra zuun ñi zahma maa ra, ta i catyi ra: ¿Ñaa ca sa ndaa cuñi si vityi? Sa siñi ndo sa cahan ra ndya vaha ñi sii ra Ndyoo.

⁶⁶ ¿Ñaa catyi ndo vityi? Ta i nacahan tandihi ra, ta i catyi ra: Nacuu ra vatyí iyo cuatyí ra.

⁶⁷ Ta ziqui i quisaha tyicu zii ra nuu ra, ta inga ra cati ra nuu ra sihin ndaha ra.

⁶⁸ Ta i catyi ra: Tatu ndisa vatyí ra Cristo cuun, nacoton yoo ra cañi suun.

I catyi ra Pedro vatyí ña sito ra sii ra Jesús

⁶⁹ Ñii ñi sa yaha tandihi cuhva cuan, ndyaa ra Pedro nuquehe, ta i tuhva minoo muzu sii ra, ta i catyi ña sihin ra: Cutahan aan sica noon sihin ra Jesús, ra i quita Galilea.

⁷⁰ Zoco i catyi ra Pedro ityi nuu tandihi ñiyivi vatyí yivi ra cuu ra. I catyi ra sihin ña: Ña site ñaa tuhun cohon. Catyi ra.

⁷¹ Tacuan ta sa quita ra Pedro ndya yuvehe nuzama, ta i ndyehe inga muzu sii ra, ta i catyi ña sihin ñiyivi yucu yucuan: Ra ihya, ra tahan ra cuu sii ra Jesús, ra ñuu Nazaret.

⁷² Ta i tyiñaha ra Pedro ndyoo nuu ñiyivi yucu yucuan, ta i catyi ra: Ña site sii ra cohon tuhun ña.

⁷³ Ta i yaha zuhva cuhva, ta i tuhva ra nandyaa yucuan sii ra Pedro, ta i catyi ra sihin ra: Ndisa cuii vatyí minoo ra tahan ra cuu tucu oo vatyí cohon tañi cahan ñiyívi nu cu si Galilea. Catyi ra.

⁷⁴ Tacuan ta i quisaha cahan ra Pedro ndya vaha ñi, ta catyi ra: Ña site sii ra cuan. Catyi ra. Ta zuun ñi caa cuhva cuan, i sacú saa ndiví tyahnu.

⁷⁵ Ta ziqui i nacohon iñi ra Pedro cuhva i catyi ra Jesús sihin ra: “Cuee ca sa vacu saa ndiví tyahnu, cua catyun uñi saha vatyí ña siton sii.” Ta sa nacohon iñi ra Pedro cuhva cuan, i quita ra, ta i sacú xaan ra vatyí i nducuihya xaan iñi ra.

27

Nacuhva cuenda ra sii ra Jesús sii ra Pilato

¹ Ta sa cundisi i zandoo ra tyiño, tandíhi ra zutu nahnu ta ra mandoñi. Sa ndu-ín ra minoo cuhva, cuhva cua cahñi ra sii ra Jesús.

² Ta i sihñi ra sii ra Jesús, ta i sindyaca ra sii ra nu ndyaa ra Poncio Pilato, ra cu gobernador.

Cuhva i sihi ra Judas

³ Ra Judas, ra i xico sii ra Jesús, i ndyehe ra vatyí cua cahñi ra sii ra Jesús, ta ziqui i ndu-uu iñi ra cuatyí ra, ta i nacuhva ra sa oco usi tahan xuhun cuii sii ra zutu nahnu ta ra mandoñi,

⁴ ta i catyi ra sihin ra: Cahnu xaan cuatyí i zavehi vatyí i saha cuende sii minoo ra ñahñi cuatyí, ta vityí cua cuu ra. Zoco i nacahan ra cuan, ta catyi ra: ¿Ta ñaa sa cuenda nduhvi? ¡Ndyehe moo yozo caa zacuun vityí!

⁵ Tacuan ta i zavita ihno ra Judas xuhun cuan sisi vehe ñuhu cahnu ta cuahan ra, ta i sahñi ra sii ra. Tyíhi ra minoo yoho zucu ra.

⁶ I nacuaan ra zutu nahnu xuhun cuan, ta catyi ra: Ma cuu tyíhi yo xuhun ya sihin xuhun ofrenda vatyí xuhun sa cuenda sa cua cati ñiñi minoo ra cu si.

⁷ Ta ziqui i ndu-ín ra minoo cuhva, ta sihin xuhun cuan, i zata ra minoo ñuhu nañi si Nu Tava Ñiyívi Ndyahyu sa cua Zavaha Ñu Ndaha Tyiño. Ta tyaa ra cuhva vatyí ñuhu cuan cua cuu nuñaña sa cuenda ñiyívi inga ñuu tatu cua cuu ñu ñuu Jerusalén.

⁸ Ta yucuan cuenda ndya cuhva ndya vityí nañi ñuhu cuan, Ñuhu Cuenda Ñiñi.

⁹ Ta cuhva cuan i natahan si cuhva i catyi ra Jeremías, minoo ra cu profeta ta sa naha. Tyehen i tyaa ra: “I naquihin ra sa usi uu tahan xuhun cuii. Yucuan cuu yahvi i sicundyaa ra i zacuu ñiyívi hebreo.

¹⁰ Ta sihin xuhun cuan i zata ra ñuhu sii ra zavaha quiyí tañi i catyi maa ra Ndyoo sihin.” Tacuan i tyaa ra Jeremías sa cuenda cuhva cua tahan ra Jesús.

Cua cundaa tyiño ra Jesús nuu ra Pilato

¹¹ I sindyaca ra sii ra Jesús ityi nuu ra Pilato, ra cu gobernador, ta i ndaca tuhun ra Pilato sii ra Jesús: ¿Atu yoho cuu rey cuenda ñiyívi hebreo? Ta i catyi ra Jesús: Tacuan cu si tañi catyi moo.

¹² Tacuan ta i tyaa ra zutu nahnu ta ra mandoñi cuatyí sata ra Jesús, zoco ñá nacahan ra ndaha ñi.

¹³ Ta ziqui i catyi ra Pilato: ¿Atu ña siñun sa cahan ra ya, cuhva tyaa ra cuatyí saton? Catyi ra.

¹⁴ Zoco ñá nacahan ra Jesús ndaha ñi, ta iyo xaan i cuñi ra Pilato.

Saha ra Pilato sa cuu ra Jesús

¹⁵ Ta vico cuan, tuhva ra gobernador tava sii minoo ra ñoho vehe caa, yoo ra cua catyi ñiyívi.

¹⁶ Ta sicoo minoo ra sa sito tandíhi ñiyívi. Barrabás nañi ra.

¹⁷ Ta cuhva i titahan tandíhi ñiyívi, i ndaca tuhun ra Pilato sii ñu: ¿Yoo ra cuñi ndo sa zañe, a sii ra Barrabás a sii ra Jesús sa nañi Cristo?

¹⁸ Vatyí sa sito ra Pilato vatyí ña tahan iñi ra cu tyiño hebreo sii ra Jesús, ta yucuan cuenda i saha cuenda ra sii ra sii ra.

¹⁹ Nii ñi sa ndyaa ra Pilato tyayu ra nu zandaa ra tyiño, i tasi ñazihi ra tyiño nu ndyaa ra, ta catyi ña: “Coto ñaha ñaa sa zavohon sihin ra vaha cuan vatyí i ndyehi minoo ñimahna quiñi xaan sa cuenda ra cuñi.” Tacuan catyi tutu i tyaa ña.

²⁰ Zoco i zasino ra zutu nahnu cuan ta ra mandoñi iñi ñiyivi vatyí cua caca ñu sii ra Barrabás, ta cua catyi ñu vatyí nacuu ra Jesús.

²¹ I cahan ra gobernador inga saha, ta catyi ra: ¿Yoo ra cuñi ndo sa cua zañe? Ta i catyi ñu: Sii ra Barrabás.

²² Ta ziquí i ndaca tuhun ra Pilato: Ta ¿ña sa cua zavehi sihin ra Jesús sa nañi Cristo? Ta i nacahan tandihi ñu, ta catyi ñu: ¡Nacuu ra nu cruz!

²³ Ta i catyi ra Pilato: ¿Ñaa cuenda? ¿Ñaa sa ña vaha i zavaha ra? Zoco i cana saa ñu ñihi ca, ta catyi ñu: ¡Nacuu ra nu cruz!

²⁴ Ta ziquí i ndyehe ra Pilato vatyí ñá cuu zacuu ra. I nduvaa ñi maa ñiyivi. Yucuan cuenda i quihin ra ndutya, ta i nacatya ra ndaha ra ityi nuu ñiyivi, ta catyi ra: Yivi cuatyí mi cuu ta cua cati ñiñi ra vaha ya. Ndyehi maa ndo cua ndoo cuatyí sata maa ndo.

²⁵ Ta i nacahan tandihi ñiyivi, ta catyi ñu: Nacuu si cuatyí maa ndi ta cuatyí zehe ndi. Catyi ñu.

²⁶ Ta ziquí i zaña ra Pilato sii ra Barrabás, ta i tava ra tyiño vatyí cua cañi zandaru sii ra Jesús, ta ziquí i saha cuenda ra sii ra vatyí cua cuu ra nu cruz.

²⁷ I sindyaca zandaru ra Pilato sii ra Jesús sisi vehe tyiño, ta i titahan tandihi inga zandaru sihin ra.

²⁸ I tava ra zahma ra Jesús, ta i natyihi ra minoo zahma tixinda sii ra.

²⁹ Ta i zavaha ra minoo corona iñu ta tyihi ra xiñi ra Jesús, ta saha ra minoo tuyoo caxyila cuña ra, ta ziquí i sicuiñi siti zandaru ityi nuu ra, ta i sacu ndyaa ra sii ra, ta catyi ra: Nacumi suun, yoho ra cu rey cuenda ñiyivi hebreo.

³⁰ I tyicu zii zandaru sii ra Jesús, ta i naquihin ra tuyoo caxyila cuan, ta i cañi xaan ra xiñi ra.

³¹ Ta sa yaha sacu ndyaa ra sii ra, i tava ra zahma tixinda cuan, ta i natyihi ra zahma maa ra sii ra. Ta ziquí i quihin ra sii ra vatyí cua cahñi ra sii ra nu cruz.

Nu i tyaa ra sii ra Jesús nu cruz

³² Ta cuhva sa cuahan ra ityi, i tahan ra sii minoo ra ñuu Cirene. Simón nañi ra. Ta i zacuizo zandaru cuan cruz ra Jesús sii ra.

³³ Ta cuahan tandihi ra nu nañi si Gólgota. Tuhun Gólgota cuan cuñi si catyi si Nu Yucu Yiquí Xiñi Ndiyí.

³⁴ Ta cuhva sa saa ra yucuan, i saha ra vino zaca si sihin minoo sa uva xaan vatyí cua coho ra Jesús, zoco i sihi ra Jesús siin ñi ta ziquí ñá cuñi ca ra coho sii si.

³⁵ Ta sa yaha tyaa zandaru sii ra Jesús nu cruz ta ziquí i siziquí ra vatyí cua ndyehi ra yoo ra cua zahacanaa minoo minoo zahma ra. Cuhva cuan i natahan si cuhva i tyaa minoo ra profeta sa cuenda ra Jesús nu catyi si tyehen: “I zasa ra zahme sii tahan ra, ta i siziquí ra yoo ra cua ñihi zahma cañi vii.”

³⁶ Ta ziquí i sicundyaa zandaru, ta i zacuenda ra sii ra Jesús.

³⁷ Ta xiñi cruz i tyaa ra minoo tutu, ta catyi si ñaa cuenda cua cuu ra, ta catyi si: “Ihya ra cuu ra Jesús, rey cuenda ñiyivi hebreo.”

³⁸ Ta i sihi tucu uu tahan ra zuhu sihin ra Jesús, minoo ra siyo cuaha ra, ta inga ra siyo zatyí ra.

³⁹ Cuhva sa yaha ñiyivi nu ndyaa ra Jesús, i sacu ndyaa ñu sii ra, ta zavico xiñi ñi ca ñu

⁴⁰ ta catyi ñu: Yoho, ra catyi vatyí cua canun vehe ñuhu ta uñi quivi ñi ta cua zanduvohon sii si, tatu sa ndisa vatyí zehe ra Ndyoo cuu suun, noon nu cruz.

⁴¹ Ta i sacu ndyaa tucu ra zutu nahnu ta ra maestro cuenda ley ta ra mandoñi sii ra, ta catyi ra:

⁴² I zacacu ra sii inga ñiyivi, zoco ña cuu zacacu ra sii ra. Tatu rey cuenda ñiyivi hebreo cuu ra, nanoo ra nu cruz vityi, ta cua sino iñi yo sii maa ra.

⁴³ Sino xaan iñi ra sii ra Ndyoo, nazacacu ra Ndyoo sii ra vityi tatu sa ndisa vatyí cuñi ra Ndyoo sii ra vatyí i catyí ra vatyí Zehe ra Ndyoo cuu sii ra. Catyí ra.

⁴⁴ Ta ndya cuhva ndya ra zuhu, ra sihi iin ñi sihin ra Jesús, ta i cahan tucu ra ndya vaha ñi sii ra Jesús.

Nu i sihi ra Jesús

⁴⁵ Tacuan ta i nduñaa xaan nacahnu ñuu ñiyivi ndya maa ora ta ndya cuhva ndya caa uñi sa sahiñi.

⁴⁶ Ta cuhva caa uñi i cana saa ra Jesús minoo sa ñihi xaan, ta i catyí ra: Elí, Elí ¿lama sabactani? Cuñi si catyí si: Zutu mañi yu, Zutu mañi yu, ¿ña cuenda i zandoon sii? Catyí ra.

⁴⁷ Zuhva ñiyivi nandyaa yucuan, i siñi ñu ta catyí ñu: Ra ihya cana saa ra sii ra profeta Elías. Catyí ñu.

⁴⁸ Ta zuun ñi caa cuhva cuan, i cacono minoo ra cuan, ta i quihin ra sii minoo sa ñahma, ta i zatyí ra sii si sihin ndutyá iya. I tyaa ra sii si numinoo yutu, ta i zandaa ra sii si nu ndyaa ra Jesús vatyí cua coho ra.

⁴⁹ Ta i catyí inga ra yucu yucuan: Cuatu noo, nandyehé yo tatu cua quisi zanoo ra Elías sii ra.

⁵⁰ I sacú saa ra Jesús inga saha minoo sa ñihi xaan, ta ziqui i sihi ra.

⁵¹ Zuun ñi caa cuhva cuan, i ndata zava zama coco sa ndita sisi vehe ñuhu cahnu ndya ziqui ta ndya xuu. I taan minoo sa ñihi xaan, ta i ndata yuu nahnu,

⁵² ta i nuña ñaña, ta i nandoto cuaha xaan ñiyivi i sino iñi sii ra Ndyoo.

⁵³ Sa yaha nandoto ra Jesús, ta ziqui i quita maa ñu ñaña, ta saa ñu ñuu Jerusalén, ñuu ra Ndyoo, ta cuaha xaan ñiyivi i ndyehé sii ñu.

⁵⁴ Ta minoo ra cu nuu sii minoo ziendu zandaru ta zandaru ra zacuenda sii ra Jesús iin ñi sihin ra cuan, i ndyehé ra cuhva i taan ta tandihi inga sa i cuu, ta i yuhu xaan ra, ta i catyí ra: Ndisa cuii ra ihya vatyí zehe Ndyoo cu sii ra.

⁵⁵ Ndyá zava ñi i siyucu cuaha xaan ñu zihí. Ndyehé ñu sii ra Jesús. I sindyico ñu sii ra ndya Galilea, ta i tyindyee ñu sii ra.

⁵⁶ Minoo ña cuan, nañi ña María Magdalena, ta inga ña cuu ña María zihí ra Jacobo ta ra José, ta inga ña cuu ñazihí ra Zebedeo.

I tyihí ra sii ra Jesús sisi ñaña

⁵⁷ Minoo ra cuca sa nañi José, ra ñuu Arimatea cuu ra, ta ndyico ra sii ra Jesús. Ta sa tyahan cuan

⁵⁸ i sahan ra nu ndyaa ra Pilato, ta i sica ra coño ñuhu ra Jesús. I saha ra Pilato tyiño vatyí cuu quihin ra sii si.

⁵⁹ Ta i quihin ra José coño ñuhu ra Jesús, ta i cava noo ra minoo zahma vaha sii si,

⁶⁰ ta i saqui ra sii si sisi ñaña saa maa ra sa i zavaha ra sisi minoo yuu. I tyazi ra yuhu ñaña cuan sihin minoo yuu cahnu, ta cuahan ra.

⁶¹ Ta cuhva cuan i siyucu ña María Magdalena ta inga ña María yatyí ñi yuñaña cuan.

Cuhva i zacuenda ra ñaña ra Jesús

⁶² Inga quivi, quivi sa cua quitatu ñiyivi, sa ndihi zanduvaha ñu sa cuenda vico cuan, ta i sahan ra zutu nahnu ta ra fariseo nu ndyaa ra Pilato.

⁶³ Ta i catyí ra sihin ra: Tata, nacohon iñi ndi vatyí ñi ñi sa ndito ra vatyá cuan ta i catyí ra vatyí tatu sa yaha uñi quivi cua nandoto ra sisi sa i sihi ra.

⁶⁴ Yucuan cuenda cuñi ndi vatyí tavon tyiño vatyí cundyaa zeyun yuhu ñaña ra ndya cuhva ndya sa yaha uñi quivi coto quisi ra tahan ra sa sa cuaa ta zuhu ra coño ñuhu ra, ta ziqui cua catyí ra sihin ñiyivi vatyí i nandoto ra sisi sa i sihi ra. Tatu tacuan cua cuu, yaha ca cua sino iñi ñiyivi tuhun vatyá sa cahan ra ta ziqui sa xihna ñi. Catyí ra.

⁶⁵ Ta i catyí ra Pilato sihin ra: Quihin ndo huhva zandaru. Ta cuhun ndo ta cazí cutu vaha ndo yozo ca cuhva cuu sii ndo. Catyí ra.

⁶⁶ Tacuan ta cuahan ra, ta i tyazi cutu vaha ra ñaña cuan, ta i tyaa ra zeyu yuhu si, ta i zandoo ra sii zandaru yucuan vatyí cua zacuenda ra.

28

Cuhva i nandoto ra Jesús

¹ I yaha quívi quitatu ñiyívi hebreo. Ta quívi tumingu cuhva sa vasi cundisi i saa ña María Magdalena sihin inga ña Mariá vatyí cua ndyehe ñu ñaña cuan.

² Ta zuun ñi caa cuhva cuan i taan minoo sa ñihi xaan vatyí i quita minoo ángel ra Ndyoo ndya andívi, ta i noo ra ndya nu ñuhu, ta i saa ra ndya ñaña. I tyaa siyo ra yuu sa ndazi yuñaña cuan, ta i sicundyaa ra nuu si.

³ Ndisi xaan ra tañi minoo tasa zavi, ta cuisí xaan zahma ra tañi caa nieve cuisí.

⁴ Cuhva sa ndyehe zandaru sii ra, ta ñihi ra sihin sa yuhu ra, ta i cuaña ra.

⁵ Ta i catyí ángel cuan sihin ñu zihí cuan: Ma yuhu ndo. Site vatyí nanducu ndo sii ra Jesús, ra i sihi nu cruz.

⁶ Yoñi ca ra ihya. Sa i nandoto ra tañi i nacatyí ra. Ñaha ndo, ta ndyehe ndo nu i caa coño ñuhu ra.

⁷ Yatyí cuii ñi cuhun ndo, ta nacatyí ndo sihin ra i casi ra vatyí sa nandoto ra. Ta catyí ndo: “Xihna ca ra Jesús cuahan ndya Galilea ta ziquí maa ndo. Yucuan cua ndyehe ndo sii ra,” catyí ndo. Ihya cuu sa tahan si nacatyí sihin ndo, catyí ángel cuan sihin ñu zihí cuan.

⁸ Ta i yuhu xaan ñu zihí cuan, ta zihí xaan i cuñi ñu, ndihí ca, ta yatyí xaan i naquihin ñu ityí cuahan ñu, ta i cacono ñu vatyí cua nacatyí ñu sihin ra i casi ra Jesús.

⁹ Ityí cuahan ñu i quituu ra Jesús ityí nuu ñu, ta i catyí ra: Nacumi sii maa ndo. Ta i tuhva ñu sii ra Jesús, ta i tiin ñu saha ra, ta i zacahnu xaan ñu sii ra.

¹⁰ Tacuan ta i catyí ra Jesús sihin ñu: Ma yuhu ndo. Cuahan ndo ta nacatyí ndo sihin ra yañi vatyí nacuhun ra ndya Galilea, ta yucuan cua ndyehe ra sii.

Cuhva i nacatyí zandaru

¹¹ Ñi ñi sa cuahan ñu zihí cuan, ta zuhva zandaru, ra zacuenda ñaña cuan, cuanuhu ra ndya ñuu, ta i nacatyí ra sihin ra zutu nahnu tandihí sa i cuu.

¹² Ta i sahan ra zutu nahnu cuan, ta i natuhun ra sihin ra mandoñi yozo caa cua zavaha ra ta i ndu-ñin ra minoo cuhva. Ta ziquí i saha ra cuaha xaan xuhun sii zandaru,

¹³ ta i catyí ra sihin ra: Catyí ndo vatyí i quisi ra tahan ra sa sa cuaa, ta i zuhu ra coño ñuhu ra ñi ñi sa quixi ndo.

¹⁴ Ta tatu cua coto ra gobernador cuhva ya, cua zasino ndi iñi ra, ta tacuan ta ñahñi cua tahan ndo.

¹⁵ Tacuan ta i quihin zandaru xuhun cuan, ta cuahan ra, ta i cahan ra cuhva i nacatyí ra cuan sihin ra. Ta sino iñi ñiyívi hebreo tuhun cuan ndya cuhva ndya vityí.

Cuhva i saha ra Jesús tyiño sii ra i casi ra

¹⁶ Tacuan ta cuahan sa usi ñin tahan ra i casi ra Jesús ndya Galilea ndya minoo yucu sa i zacoto ra Jesús sii ra.

¹⁷ Ta cuhva sa ndyehe ra sii ra Jesús, i zacahnu ra sii ra, zoco zuhva ra ñá sino vaha iñi sa zuun ra cuu ra.

¹⁸ Ta ziquí i tuhva ra Jesús sii ra, ta i catyí ra sihin ra: Saha ra Ndyoo tandihí cuii cuhva sii sa cundyaca ñehi andívi ta nu ñuhu ñuu ñiyívi.

¹⁹ Cuahan ndo nacahnu ñuu ñiyívi, ta zacuaha ndo sii tandihí ñiyívi. Zacoo ndutyá ndo sii ñu sihin ziví ra Ndyoo Zutu yo ta sihin ziví Zehe ra ta sihin ziví Tatyí Ii ra Ndyoo.

²⁰ Tandihí sa i zacuehi sii ndo, nacatyí ndo sii si sihin ñu cua sino iñi vatyí natyaa ñu yahvi sii si. Ta coto ndo vatyí yuhvi ndyei sihin ndo tandihí cuii quívi ndya cuhva ndya cua ndihí ñuu ñiyívi. Ta nacuu si tacuan, ta nacuu si sa ndisa.

Tuhun Vaha Sa I Tyaa Ra San Marcos

Cuhva i cahan ra Juan, ra i zacoo ndutya sii ñiyivi quivi cuan

¹ Ihya kuhva quisaha Tuhun Vaha sa cuenda ra Jesucristo, ra cu zehe Ndyoo.

² Cuhva i zatyaa ra Ndyoo sii ra Isaías tuhun ra ta tyiemvu, ta i tyaa ra Isaías kuhva i cahan ra Ndyoo sihin ra Cristo ta catyi ra:

Cua tasi sii minoo ra sa xihna ñi, ta cua zacoto ra sii ñiyivi vatyi cua cuhun.

Vatyi quivi cua soon ta cua tyizoho ñu sa cohon.

³ Cua cana saa ra cuan sisi cuhu ta catyi ra sihin ñiyivi:

“Zama ndo kuhva iyo ndo vatyi sa cua saa ra ndyaca ñaha sii yo.”

⁴ Ta i quisi ra i tasi ra Ndyoo, ra cua cana saa sisi cuhu. Sinañi ra Juan. I zacoo ndutya ra sii ñiyivi. Ta i zacuaha ra sii ñu vatyi coo ndutya ñu ta zama ñu kuhva iyo ñu, ta ziqui cua zandasi ra Ndyoo cuatyi ñu.

⁵ Ñiyivi ñuu Jerusalén ta tandíhi ñuu nu cu si Judea i sahan ñu nu ndyaa ra Juan. Ta sa yaha nahma ñu cuatyi ñu nuu ra Ndyoo, ta ziqui i sicoo ndutya ñu i zacuu ra Juan yuu sa nañi río Jordán.

⁶ Ixi camello i cuu zahma ra Juan, ta i sinuhñi zinda ñi sisi ra. Ta i sasi ra minoo nuu quití tañi tica ta sihi ra tyahiñu ñuñu.

⁷ I cahan ra sihin ñiyivi ta catyi ra: Ta cua yaha zuhva quivi ta cua quisi inga ra cahnu ca. Ña tahan si sii, nu sa cui muzu ra ta cuize ndisa ra, zoco zuun ñi maa ra i saha tyiño sii.

⁸ Zacoo ndutye sii ndo sihin ndutya, zoco maa ra cua zacoo ndutya sii ndo sihin Tatyí li. Tacuan i catyi ra Juan.

Cuhva i sicoo ndutya ra Jesús

⁹ Ta i yaha zuhva ñi quivi ta i quita ra Jesús ñuu Nazaret nu cu si Galilea, ta i saa ra yuu Jordán, ta i zacoo ndutya ra Juan sii ra.

¹⁰ Zuun ñi caa kuhva sa nduvita ra Jesús nu ndutya cuan ta i nandyehe ndaa ra, ta i ndyehe ra vatyi nuña ityi andivi, ta i noo xica Tatyí li sii maa ra tañi noo minoo paloma.

¹¹ Ta i siñi ra minoo nduzu sa cahan ityi ziqui, ta catyi si: Yoho cuu zehi. Ta cuñi xein suun. Zhi xaan cuñi suhun.

Cuhva i nducu coto ihñi cuihna sii ra Jesús atu cua tyaa ra yahvi sii Ndyoo a sii cuihna

¹² Ta zuun ñi quivi cuan i saca Tatyí li sii ra Jesús, ta cuahan ra minoo cuhu cahnu.

¹³ Ta yucuan i ñoho ra uu xico quivi nu sicoo quití cuhu. Ta i nducu ra cu nuu sii cuihna kuhva coto ihñi ra sii ra vatyi cuñi ra sa tyaa ra Jesús yahvi sii ra. Ta ziqui i quisi tyindyee ángel Ndyoo sii ra Jesús.

Cuhva i quisaha zacuaha ra Jesús nu cu si Galilea

¹⁴ Tacuan ta ziqui i tyihi ñiyivi sii ra Juan vehe caa, ta i quisi nuhu ra Jesús nu cu si Galilea, ta i zacoto ra sii ñiyivi Tuhun Vaha sa cuenda kuhva ndyaca ñaha ra Ndyoo.

¹⁵ Ta i catyi ra Jesús: Vityi sa cuñi saa quivi cua cundyaca ñaha ra Ndyoo ihya ñuu ñiyivi. Zandoo ndo cuatyi ndo, ta sino iñi ndo Tuhun Vaha.

Cuhva i cana ra Jesús sii cumi tahan ra tñin tyiyaca

¹⁶ I sica noo ra Jesús yumiñi Galilea, ta i ndyehe ra sii ra Simón sihin yañi ra, ra Andrés. Cañi ra traya ra nu ndutya vatyi yucuan cuu tyiño zacuu maa ra.

¹⁷ Ta i cana ra Jesús sii ra ta catyi ra: Coho ndo sihin, ta cua kuhve kuhva nducu ndo sii ñiyivi tañi kuhva nducu ndo sii tyiyaca. Tacuan i catyi ra Jesús sihin ra.

¹⁸ Ta ta sica ñi i zandoo ihno ra traya ra, ta cuahan ra sihin ra Jesús.

¹⁹ Ta i sica ra Jesús zuhva ca sihin ra ityi nuu ca, ta i ndyehe ra sii ra Jacobo sihin ra Juan yañi ra. Ta zehe ra Zebedeo cuu sii ra. Ñoho ra barco. Nazuhva ra traya ra.

²⁰ I cana ra Jesús sii ra, ta i zandoo ra sii ra Zebedeo zutu ra sihin muzu ra sisi barco. Ta i sindyico ra sii ra Jesús.

Cuhva i ñoho taty cuihna sii minoo ra

²¹ I saa ra Jesús sihin ra i cana ra ñuu Capernaum, ta quiivi tuhva ñiyivi quitatu i quihvi ra Jesús vehe ñuhu. Ta i zacuaha ra sii ñiyivi.

²² Ta iyo xaan i cuñi ñiyivi sihin cuhva i zacuaha ra vaty ñá zacuaha ra tañi zacuaha ra maestro cuenda ley, zoco i zacuaha ra tañi sa saha ra Ndyoo sa siñi tuñi sii ra.

²³ Ta sisi vehe ñuhu cuan i ñoho minoo ra, ra ñoho taty cuihna añima. Ta i quisaha cana saa ra. Ta catyi ra:

²⁴ ¿Ñaa sa cuñun sihin ndi? Jesús, ra ñuu Nazaret. ¿Atu vasun sa vasi zandyehun tundoho sii ndi? Site yoo ra cuun. Moo cuu ra cu zehe Ndyoo, ra ñahñi cuaty. Tacuan i cahan ra cuan.

²⁵ Tacuan ta xaan xaan i cahan ra Jesús sihin taty cuihna cuan ta catyi ra: Cazi yuhun ta ma cohon. Ta quita ndo sii ra ya.

²⁶ Ta ñihi xaan i zanihi taty cuihna cuan sii rayi cuan, ta saa xaan i sacu saa si, ta i quita si añima ra.

²⁷ Ta iyo xaan i cuñi ñiyivi, ta i nducu tuhun tahan ñu: ¿Yozo caa? Minoo cuhva saa cuu si vaty ra ihya iyo cuhva sii ra vaty cahan ra sihin taty cuihna, ta tyaa si yahvi sii ra.

²⁸ Ta yaty xaan i sito ñiyivi nacahnu nu cu si Galilea cuhva i zavaha ra Jesús.

Cuhva i zanduvaha ra Jesús sii tyizo ra Pedro

²⁹ Tacuan ta ziqui i quita ra vehe ñuhu ta cuahan ra Jesús sihin ra Jacobo ta ra Juan ndya vehe ra Simón ta ra Andrés.

³⁰ I caa tyizo ra Pedro nu sito. Cuhu ña cahñi. Ta i nacaty ñu sihin ra Jesús vaty cuhu ña.

³¹ I tuhva ra nu ndyaa ña, ta i tiin ra ndaha ña, ta i tyindyee ra sii ña, ta i nduvita ña. Zuun ñi caa cuhva cuan i ndyico cahñi sii ña, ta i nduvita ña. Ta i zavaha ña sa casi ra.

Cuhva i zanduvaha ra Jesús sii cuaha xaan ñiyivi cuhu

³² Sa tyizo ñicandyi ta sa tyahan cuan i quisi ndyaca ñiyivi sii tandihi ñu cuhu, zhin zhin nuu cuehe, ta ñu ñoho taty cuihna.

³³ Ta i quisi tuu xaan ñiyivi yuvehe nu ñoho ra Jesús.

³⁴ Ta i zanduvaha ra Jesús sii cuaha xaan ñu cuhu cuaha xaan nuu cuehe, ta i tava ra sii cuaha xaan taty cuihna sii ñiyivi, zoco ñá saha maa ra sa cahan taty cuihna cuan vaty i nacoto si sii ra.

Cuhva i zacoto ra Jesús sii ñiyivi Tuhun Ndyoo nu cu si Galilea

³⁵ Ta inga quiivi ñaa ca i nduvita ra Jesús ta sahan ra minoo cuhu, ta i quisaha cahan ra sihin ra Ndyoo Zutu ra, ra iyo andivi.

³⁶ Ta ra Simón sihin ra tahan ra i sinanducu ra sii ra.

³⁷ Ta nu nañihi ra sii ra Jesús i catyi ra sihin ra: Nanducu xaan ñiyivi suun.

³⁸ Zoco i catyi ra Jesús: Coho yo tandihi inga ñuu yaty ñi ihya vaty indyacuan cua cahan tuqui Tuhun Ndyoo vaty yucuan cuenda vasi.

³⁹ Ta i sica noo ra tandihi nu cu si Galilea. I zacoto ra sii ñiyivi Tuhun Ndyoo tahan tahan vehe ñuhu, ta i tava ra taty cuihna sii ñiyivi.

Cuhva i zanduvaha ra Jesús sii minoo ra tyahyu

⁴⁰ Minoo saha i tuhva minoo ra nu ndyaa ra Jesús. Cuhu xaan ra sihin cuehe sa tyahyu ra. I sicuñi siti ra, ta i catyi ra: Iyo cuhva suun, tatu cuñun cuu zanduvohon sii.

⁴¹ Ta i cundahvi iñi ra Jesús sii ra cuan, ta i tiin ra ndaha ra ta catyi ra: Cuñi. Zanduvehi suun.

⁴² Ta zuun ñi caa cuhva cuan i quita cuehe cuan sii ra, ta ndaha nduvaha ñi ra.

⁴³ Ta ziqui i catyi ra Jesús sihin ra vaty cuu cunuhu ra, zoco ñihi xaan i saha ra tuhun sii ra ta catyi ra:

⁴⁴ Ndyehun, vatyi ma nacatyun sihin ñiyivi. Cuhun nu ndyaa ra cu zutu vehe ñuhu hebreo, ta cuhvon sii ra Ndyoo sa i catyi ra Moisés sa cua cuhva ñiyivi tatu nduvaha ñu. Tacuan ta cua coto ñiyivi vatyi i nduvohon.

⁴⁵ Tacuan ta cuahan ra i nduvaha, ta i nacatyi ra sihin tandihi ñiyivi cuhva i cuu sii ra. Ta yucuan cuenda ñá cuu ca quihvi ra Jesús inga ñuu. I sica noo ra nu yoñi ñiyivi iyo. Zoco i sahan xaan ñiyivi zhin zhin ñuu ndya nu ndyaa ra.

2

Cuhva i zanduvaha ra Jesús sii minoo ra xii

¹ Ta i yaha zuhva quivi ta ziqui i quisi nuhu ra Jesús ndya ñuu Capernaum, ta yatyi xaan i sito ñiyivi vatyi sa nasaa nuhu ra.

² Ta ta sica cuii ñi i titahan ñiyivi cuhva ndya ñá cuu ca quihvi ñu yuvehe. Ta i zacuahra ra Jesús sii ñu Tuhun Ndyoo.

³ Ta i quisi minoo ityi ñiyivi ta ndyizo cumi tahan ra sii minoo ra xii.

⁴ Ta ñá cuu yaha ra yuvehe nu ñoho ra Jesús vatyi tuu xaan ñiyivi yucu. Cuu, i ndaa ra xiñi vehe, ta i nuña ra xiñi vehe, ta i zanoo ra sii ra xii sihin minoo tyuhva nu nandyaa ra Jesús.

⁵ I ndyehe ra Jesús cuhva sa ñi ñi tandihi ra, ta i catyi ra Jesús sihin ra xii cuan: Zandasi cuatyun, zehe luhli. Catyi ra.

⁶ Ta yucu uu tahan ra maestro cuenda ley yucuan, ta sica ñi ra sihin añaima ra:

⁷ “¿Ñacu cahan ra ya tacuan? Yoñi ra cuu zandasi cuaty ñiyivi. Maa ñi ra Ndyoo cuu zandasi cuaty ñiyivi.”

⁸ Ta i sito ra Jesús cuhva sica ñi ra sihin añaima ra, ta i quisaha ndaca tuhun ra: ¿Ñacu sica ñi ndo tacuan sihin añaima ndo?

⁹ Sica ñi ndo vaty ña vaha quehin vaty i catyi sihin ra ya: “Zandasi cuatyun.” Ta vityi cua zañehi sii ndo vaty iyo cuhva sii, ta cua catyi sihin ra: “Nduviton ta nacuhun yuun, ta cunuhun.”

¹⁰ Cua zañehi sii ndo vaty iyo cuhva sii vii, vaty ra i quisi ndya gloria cui. Ta cua zandasi cuaty ñiyivi ñuu ñiyivi. Ta i cahan ra sihin ra xii cuan, ta catyi ra:

¹¹ Quehin suhun vaty nduviton, ta nacuhun tyuhvon, ta cunuhun ndya vehun.

¹² Ta yaty xaan i nduvita ra xii cuan. I naquihin ra tyuhva ra, ta i quita ra. I ndyehe tandihi ñiyivi, ta iyo xaan i cuñi ñu, ta i catyi ñu vaty iyo xaan cuhva sii ra Ndyoo. Ta catyi ñu: Tañaha ca ma ndyehe yo sa tyehen yozo vasi si.

Cuhva i catyi ra Jesús sihin ra Leví vaty cuhun ra sihin ra

¹³ Tacuan ta ziqui cuahan tucu ra Jesús ityi yuhu tyañuhu. Ta i tatahan cuaha xaan ñiyivi. Ta i zacuahra ra sii ñu.

¹⁴ Ta sa cuahan tucu ra Jesús i ndyehe ra sii ra Leví, zehe ra Alfeo. I zatyiahvi ra sii ñiyivi sa cuenda xuhun ra ndyaca ñaha. Ta i catyi ra Jesús sihin ra: Coho sihin. Ta yaty xaan i nduvita ra Leví, ta cuahan ra sihin ra.

¹⁵ Ta sa i sasi ra Jesús xita vehe ra Leví, ñi ñi mesa i siyucu ra sihin ra sica noo sihin ra ta sihin cuaha xaan ra zatyiahvi sii ñiyivi sa cuenda xuhun ra ndyaca ñaha ta sihin inga ra iyo cuaty vaty i sindyico cuaha xaan ra iyo cuaty sii ra Jesús.

¹⁶ Ta i ndyehe ra maestro cuenda ley ta ra fariseo vaty sasi ra Jesús xita sihin ra cuan, ta i catyi ra sihin ra ndihi sihin ra Jesús: ¿Ñacu sasi ra xita sihin ra zatyiahvi sii ñiyivi ta ra iyo cuaty?

¹⁷ Ta sa siñi ra Jesús sa cahan ra ta i catyi ra: Ña cuñi si médico sii ra iyo vaha, zoco sii ra huhu cuñi si. Ña vasi sa cuenda ñiyivi sica ñi vaty vaha xaan ñu. Vasi sa cuenda ñiyivi sito vaty iyo cuaty ñu.

Ndaca tuhun ñiyivi sii ra Jesús ñaa cuenda ña cuñi ra sica noo sihin ra cahñi zoco ra sii ra

¹⁸ Ñiyivi i sindyico sii ra Juan sihin ñiyivi i sindyico sii ra fariseo ñahñi maa sasi ra tatu sica tahvi ra sii ra Ndyoo. Ta i ndyehe inga ñiyivi. Ta i ndaca tuhun ñu sii ra Jesús ta

catyi ñu: ¿Ñacu sasi ñiyivi ndyico suun xita tandihi quivi vazu sica tahvi ñu sii Ndyoo? Ta ñiyivi ndyico sii ra Juan ta ñiyivi ndyico sii ra fariseo ñahñi maa sasi ra tatu sica tahvi ra sii Ndyoo.

¹⁹ Ta i cahan ra Jesús minoo cuhva sihin ñu ta catyi ra: ¿Ñacu ma casi ñiyivi xita tatu cuahan ñu minoo vico tindaha? Tatu ndyaa ra tindaha, sasi vaha tandihi ñiyivi vatyí zii cuñi ñu. Ta tacuan tucu ñiyivi ndyico sii. Zii cuñi ñu vatyí ndyei sihin ñu.

²⁰ Zoco tatu sa cuahan ra tindaha, tacuan ta ziqui ma casi ca ñu.

²¹ Ña vaha cua cutyiño ñiyivi zahma saa sa natyaa ñu minoo zahma sahnu vatyí zahma saa cuan cua ndyí si, ta ziqui cua tahndya ca zahma sahnu cuan.

²² Ta inga cuhva vatyí ma zavaha ñiyivi ndixi panela sisi quizi sahnu vatyí cua cuizo si ta ndaa si. Ta cua cahndi quizi cuan tatu sahnu si. Tatu cua zavaha ñu ndixi panela, cuñi si quizi saa. Ta tandihi cuhva zacuehi cuu sa saa. Ta ña vaha nacuzaca si sihin sa sahnu. Cuñi si sa zama ndo cuhva iyo ndo.

Cuhva quivi quitatu ñiyivi

²³ Minoo saha quivi quitatu ñiyivi, cuahan ra Jesús sihin ra sica noo sihin ra, ta i yaha ra sisi itu trigo sa zavaha ñiyivi yutyí pan. Ta i quisaha tohon ra ndihi sihin ra Jesús zuhva si.

²⁴ Tacuan ta i catyi ra fariseo: Ndyehé, ¿ñacu zatyiño ra ndihi suhun? Ta vityí cuu quivi quitatu ñiyivi vatyí tacuan catyi ley.

²⁵ Zoco i catyi ra Jesús sihin ra: ¿Atu ta cahvi ca ndo Tuhun Ndyoo cuhva i zavaha ra rey David minoo saha sihin amigo ra? vatyí i sizoco xaan ra.

²⁶ I quihvi ra David vehe ñuhu quivi i cuu ra Abiatar ra cu zutu ya cahnu. Ta i sasi ra pan ii. Ta yucuan pan ii, maa ñi ra cu zutu cuu casi. Zoco i sasi ra David sii si. Ta i saha ra i sasi ra tahan ra.

²⁷ Ta inga cuhva catyi tucu ra Jesús: Iyo quivi quitatu ñiyivi sa vatyí cua tyindyee si sii ñu. Ñá zavaha ra Ndyoo sii ñiyivi sa cuenda quivi cuan. I zavaha ra quivi cuan vatyí cua tyindyee si sii ñiyivi.

²⁸ Ta yuhvi, ra i quisi ndya gloria cui. Ta iyo cuhva sii, sa catyi ñaa sa cua zavaha ñiyivi quivi quitatu ñiyivi.

3

Cuhva i zanduvaha ra Jesús sii ra na-ityi ndaha

¹ I quihvi tucu ra Jesús vehe ñuhu, ta yucuan ndyaa minoo ra na-ityi ndaha.

² Ndyehé ihñi ra fariseo nu ñoho ra Jesús tatu ndisa cuii cua zanduvaha ra sii ra na-ityi ndaha cuan quivi quitatu ñiyivi vatyí cuñi ra tyaa ra cuatyí sata ra.

³ Ta i catyi ra Jesús sihin ra na-ityi ndaha cuan: Ñaha mahñu ya.

⁴ Ta ziqui i ndaca tuhun ra Jesús sii ra fariseo: ¿Ñaa sa cua zavaha yo quivi quitatu ñiyivi? ¿Atu vaha cua zavaha yo sa vaha a sa ña vaha? ¿Atu cua zanduvaha yo sii ñiyivi a cuhva yo sa cuu ñu? Ta ñá nacahan ra fariseo ndaha cuii ñi.

⁵ Tacuan ta i cuxaan ra Jesús sihin ra, ta i nducuihya iñi ra sihin ra vatyí ñihi xaan iñi ra. Ta i catyi ra Jesús sihin ra na-ityi ndaha cuan: Nandica ndohon. Ta i nandica ra ndaha ra, ta zuun ñi caa cuhva cuan i nduvaha si.

⁶ Tacuan ta i quita tandihi ra fariseo nu ñoho ra Jesús, ta i natuhun tahan ra sihin minoo ityi amigo ra Herodes. Ta i quisaha nducu ra cuhva cahñi ra sii ra Jesús.

Cuhva i quisi tuu xaan ñiyivi yuhu tyañuhu

⁷ Ta ra Jesús cuahan ra sihin ra sica noo sihin ra ndya tyañuhu, ta i sindyico cuahan xaan ñiyivi Galilea sii ra.

⁸ Ta sa sito ñu vatyí tyiño vaha zavaha ra Jesús, ta i quita ñu Judea, ta ñuu Jerusalén, ta Idumea ta inga siyo yuu Jordán. Ta tandihi ñuu ndyaa yatyí sii ñuu Tiro ta ñuu Sidón, ta i quisi ndyehé ñu sii ra.

⁹ Yucuan cuenda i catyi ra Jesús sihin ra ndihi sihin ra vatyí nazaquisi ra minoo barco vatyí quihí ra Jesús, ta ma catyíhi xaan ñiyívi sii ra.

¹⁰ Sa zanduvaha ra Jesús sii cuaha xaan ñiyívi cuhu, ta yucuan cuenda i quisi tuu xaan ñiyívi cuhu vatyí cua tñin ñu sii ra.

¹¹ Ta sa ndyehe ñiyívi ñoho tatyí cuihna cuan sii ra Jesús sicuiñi siti ñu, ta cana saa cuihna ñoho sii ñu: ¡Yoho, zehe ra Ndyoo cuu suun!

¹² Ta ñihi xaan i cahan ra Jesús sihin tatyí cuihna cuan vatyí ma nacatyí ca si yoo ra cuu ra.

I casi ra Jesús sii usi uu tahan ra apóstol

¹³ Tacuan ta ziquí i ndaa ra Jesús minoo yucu, ta i cana ra yoo ra cua cuizo tyiño, ta i sahan ra cuan nu ndyaa ra Jesús.

¹⁴ I quihin ra Jesús sii usi uu tahan ra vatyí cua cutahan ra sihin ra, ta cua tasi ra Jesús sii ra, ta cua zacoto ra sii ñiyívi Tuhun Ndyoo.

¹⁵ Ta i saha ra Jesús cuhva sii ra vatyí cuu zanduvaha ra sii ñiyívi cuhu, ta cuu tava ra tatyí cuihna sii ñiyívi.

¹⁶ Ihya cuu zivi sa usi uu tahan ra i casi ra Jesús: Simón, i zacunañi ra Jesús sii ra Pedro;

¹⁷ ra Jacobo sihin yañi ra, ra Juan, zehe ra Zebedeo cuu sii nduu tahan ra, ta i zacunañi ra Jesús sii ra, ra xaan;

¹⁸ ra Andrés, ra Felipe, ra Bartolomé, ra Mateo, ra Tomás, ra Jacobo zehe ra Alfeo; ra Tadeo, inga ra Simón, maa ra cuu cuenda minoo ityi ra cuñi zama sii ra ndyaca ñaha,

¹⁹ ta ra Judas Iscariote, maa ra cuu ra cua xico sii ra Jesús cuee ca.

Cuhva i catyi ñiyívi vatyí ñoho tatyí cuihna sii ra Jesús

²⁰ Tacuan cuu cuhva i cana ra Jesús sii ra i casi ra, ta ziquí i quihvi ra Jesús sisi minoo vehe sihin sa usi uu tahan ra cuan, ta i quisi tucu cuaha xaan ñiyívi cuhva ña cuyatyí ca ra casi ra xita.

²¹ Ta sa sito zihí ra ta yañi ra Jesús tuhun cuan, ta cuahan ñu vatyí cua naquihin ñu sii ra vatyí cahan xaan ñiyívi, ta catyi ñu vatyí zana xiñi ra Jesús.

²² Ta ra maestro cuenda ley, ra i quisi ndya ñuu Jerusalén, i catyi ra: Ra ihya, ñoho ra cu nuu sii cuihna sii ra. Ta tava ra tatyí cuihna sihin tundyee iñi iyo sii ra Beelzebú, ra cu nuu sii cuihna.

²³ Tacuan ta i cana ra Jesús sii ñiyívi, ta i quisaha zacuaha ra sii ñu sihin minoo cuhva ta catyi ra: ¿Ñaa sa sica iñi ndo? ¿Atu cua tava ra cu nuu sii cuihna sii inga cuihna?

²⁴ Tatu iyo minoo ñuu ta sahñi tahan xaan ñiyívi sihin inga ñiyívi sa zuun ñi ñuu cuan, yatyí xaan cua tiví ñuu cuan.

²⁵ Ta tatu sahñi tahan ñiyívi sihin tahan ñu, sihin cuhva ñu, sihin yañi ñu, yatyí xaan cua tiví cuhva yucu ñu.

²⁶ Ta ma cahñi tahan ra cu nuu sii cuihna sihin inga cuihna vatyí tatu tacuan zavaha ra, yatyí xaan cua ndihi cuhva iyo sii ra.

²⁷ Ñihi xaan cuu ra cuihna, ta sa sito yo vatyí ma cuu quihvi ñiyívi vehe minoo ra ñihi xaan ta quihin ñu ndaha tyiño ra tatu ma cuhñi xihna ñu sii ra. Tatu sa nuhñi ra ñihi cuan, tacuan ta ziquí cuu quihvi yoo ra cuñi ta quihin ra ndaha tyiño ra.

²⁸ Ndisa cuii cuu si vatyí cuu zandasi ra Ndyoo tandihí cuatyí zavaha ñiyívi ta tandihí sa quiñi cahan ñu.

²⁹ Zoco tatu ndyehe ñiyívi cuhva zatyíño Tatyí Ii ra Ndyoo ta catyi ñu vatyí cuihna zatyíño, ma zandasi ra Ndyoo cuatyí ñu nu yozo cuii ca. Tandihí cuii tyiemvu cua ndoo cuatyí cuan ziquí ñu.

³⁰ Tacuan i catyi ra Jesús vatyí numaa zatyíño ra sihin cuhva sii Tatyí Ii ra Ndyoo, zoco i catyi ñiyívi vatyí zatyíño ra sihin cuhva iyo sii cuihna.

Zihí ra Jesús ta yañi ra

³¹ Tacuan ta ziquí i saa zihí ra Jesús sihin yañi ra, ta i tasi ñu tyiño ñu ñoho ra Jesús vatyí naquisi ra nu ndyaa ñu.

³² Ta ñiyivi yucu siconduu sihin ra Jesús i catyi ñu sihin ra: Saa zihun ta yañun. Nanducu ñu suun. Yucu ñu sata vehe.

³³ Ta i catyi ra Jesús: ¿Yoo sa cuu zihí? ¿Ta yoo sa cuu yañi?

³⁴ Ta ziqui i nandyehe ra nu yucu ñiyivi siconduu sihin ra, ta i catyi ra: Ñu ihya cuu tañi zihí. Ta ra ihya cuu tañi yañi. Ta ñu ihya cuu tañi cuhve.

³⁵ Vatyí yoo ñiyivi zavaha tandíhi sa catyi ra Ndyoo, yucuan cuu ñu cuñi tañi ñiyivi sii. Tacuan i catyi ra Jesús.

4

Cuhva ra tasi

¹ Inga saha i quisaha zacuaha ra Jesús sii ñiyivi ityi yuhu tyañuhu. Ta cuaha xaan ñiyivi i titahan nu ndyaa ra, ta i quihvi ra Jesús sisi minoo barco vatyí tuu xaan ñiyivi. Ta i sicundyaa ra. Ta tandíhi ñiyivi i nandoo nuu ñiyiti cuan.

² Ta i zacuaha ra sii ñiyivi ziqui minoo cuhva ta inga cuhva. Ta ihya cuu minoo cuhva i cahan ra:

³ Tyizoho ndo cuhva ya vatyí minoo saha sahan minoo ra cua tasi siti trigo.

⁴ Zuhva si i canacava si ityi nu ndava ñuhu. I quisi zaa, ta tandíhi cuii si i sasi ti.

⁵ Zuhva si i canacava nu yaxi ñoho ñuhu vatyí ñoho xaan yuu. Vatyí xaan i caña si vatyí ña coco caa ñuhu.

⁶ Tacuan ta ndyii xaan i nanduu. Ta i xii yava ndyihí cuan vatyí ñá tñin yoho si.

⁷ Ta inga si i canacava si sisi iñu. Ta vatyí ca sahnu iñu cuan. Ta i zahvi iñu cuan sii si, ta ñá saha si siti si.

⁸ Zoco huhva si i canacava si nu vaha ñuhu. Yucuan cuu sa sahnu vaha. Ta i saha si siti si. Iyo si saha si ziendu siti si sa minoo ñi si. Iyo si saha si uñi xico usí. Ta iyo si saha si oco usí.

⁹ Ta i catyi ra sihin ñu: Tatu siñi ndo, ¡cuiñi ndo!

Cuenda sa huhva xaan ra Jesús cahan ziqui minoo cuhva

¹⁰ Tacuan ta ziqui i nandoo huhva ca ñiyivi sihin ra Jesús ta sihin ra i casi ra. Ta i ndaca tuhun ñu sii ra Jesús: ¿Ñaa cuiñi si catyi si sa cuenda cuhva cuan?

¹¹ Ta i catyi ra Jesús sihin ñu: Saha ra Ndyoo sa coto maa ndo yozo caa ndyaca ñaha maa ra. Zoco cuhva cuan maa ñi sihin cuhva quehin sihin inga ñiyivi.

¹² Vatyí maa ñu, cua ndyehe ñu. Zoco ma cuu coto ñu ñaa sa ndyehe ñu. Cua tyizoho ñu. Zoco ma cutuñi iñi ñu. Vatyí tatu cua cuiñi ñu, cua zama ñu cuhva iyo ñu. Ta cua zandasi ra Ndyoo cuatyí ñu.

I nacatyí ra Jesús ñaa cuiñi si catyi si cuhva ra tasi trigo cuan

¹³ Tacuan ta ziqui i ndaca tuhun ra Jesús sii ñu. Ta i catyi ra: ¿Atu ña siñi ndo cuhva cuan? Tatu ña siñi ndo sii si, ¿yozo caa cua cuiñi ndo inga cuhva?

¹⁴ Tañi ra i tasi siti yutu cuan, tacuan iyo ra nacatyí sihin ñiyivi Tuhun Ndyoo.

¹⁵ Tañi siti i canacava ityi, tacuan iyo huhva ñiyivi. Siñi ñu sa cahan ra Ndyoo, zoco vatyí xaan quisi cuihna. Ta quihin ra tuhun sa siñi ñu.

¹⁶ Ta iyo inga ñiyivi tañi siti sa canacava nu yaxi ñuhu. Tacuan iyo maa ñu. Siñi ñu Tuhun Ndyoo, ta cuiñi xaan ñu sii si.

¹⁷ Zoco ña quihvi vaha si añima ñu. Ta ña naha cua sino iñi ñu. Tatu sa quisi minoo tundoho ziqui ñu a cuxaan ñiyivi sihin ñu sa cuenda Tuhun Ndyoo, vatyí xaan cua zaña ñu sii si.

¹⁸ Ta inga ñiyivi, tañi siti sa canacava sisi iñu cuu ñu. Siñi ñu Tuhun Ndyoo.

¹⁹ Zoco sica iñi ñu tuhun sa iyo ñuu ñiyivi. Ta tuhun cuca, tuhun zandavi ñaha ñi cuu si cuan. Ta cuiñi xaan ñu tandíhi nuu ndaha tyiño. Ta tandíhi cuhva cuan zanaa si iñi ñu Tuhun Ndyoo. Ta ma zatyíño vaha si sihin ñu.

²⁰ Zoco iyo inga ñiyivi siñi ñu Tuhun Ndyoo. Ta sino iñu ñu. Yucuan cuu ñiyivi vaha zatyíño, tañi siti sa i canacava nu ñuhu vaha. Iyo ñiyivi vaha xaan zatyíño ñu tyiño ra

Ndyoo tañi siti i saha minoo ziendu sa minoo si. Ta inga ñu cuu tañi siti i saha uñi xico usi ñi. Ta inga ñu cuu tañi siti i saha oco usi ñi.

Cuhva sii minoo lámpara

²¹ Ta i catyi tucu ra Jesús sihin ñu: Tatu cayu minoo lámpara vehe ñiyivi, ¿atu cua tyihi ñu sii si sisi tyica a xu sito? Ña tacuan. Zucu tyaa ñu sii si cuñi si vatyí tacuan ta ndundisi sisi vehe.

²² Ta tañi lámpara tatu ñoho xehe si sisi tyica, tacuan iyo cuhva zacuehi sii ndo vityi. Zoco cua coo quivi ta cua cuiñi ñiyivi nacahnu ñuu ñiyivi cuhva zacuehi ihya.

²³ Yoo ra tyizoho, natyizoho vaha ra.

²⁴ Tyizoho vaha ndo ñaa sa siñi ndo. Tatu zuhva ñi cua tyizoho ndo, zuhva ñi cua coto ndo. Tatu tyizoho vaha ndo cua coto ndo cuaha ca vatyí cua cuhva ra Ndyoo sii ra tyizoho vaha vatyí cua coto ra cuaha ca.

²⁵ Sii ra sa iyo cuaha ca, cuaha ca cua cuhva ra. Ta sii ra iyo zuhva ñi, cua naquihin ndihi ra Ndyoo sii si.

Cuhva sahnú siti

²⁶ Catyi tucu ra Jesús: Ñiyivi ndyaca ñaha ra Ndyoo, nducuaaha ca ñu tañi nducuaaha siti. Tasi minoo ra ndaha tyiño nu ñuhu.

²⁷ Quixi ra sa sa cuaa. Ta nduvita ra ñaha ñi. Ta caña siti cuan, ta cua cuahnu maa tuhun ñi si. Ña sito ra cuan yozo caa sahnú si.

²⁸ Ñuhu cuan saha tundyee iñi, ta cua cuahnu siti cuan. Sa xihna ñi cua coo yutu tu. Ta ziqui coo yoco tu.

²⁹ Tatu sa sisa siti cuan. Ta ziqui cua cahndya ra sii si ta naquihin ra sii si vatyí sa saa tyiemvu si.

Cuhva siti mostaza

³⁰ Ta i catyi tucu ra Jesús: ¿Ñaa sihin cuu zacasi tahan yo cuhva ndyaca ñaha ra Ndyoo? ¿Ñaa cuhva cua nacatyí sihin ndo vatyí cua cuiñi ndo?

³¹ Tañi minoo siti mostaza, tacuan iyo si. Ñahñi siti luhlu ca sa nuu mostaza iyo nacahnu ñuu ñiyivi. Quihin minoo ra sii si, ta tasi ra sii si nu ñuhu ra.

³² Ta cuee ca cua cuahnu si. Ta cua nduu si cahnu xaan, cahnu ca ta ziqui cuaha xaan inga nuu siti sa tasi yo. Nahnu xaan zoco tu. Ta ndya cuhva ndya zaa ta cua quisi cozo ti zoco tu.

Tuhva xaan ra Jesús cahan ziqui minoo cuhva

³³ Tacuan i cahan ra Jesús sihin ñiyivi. Ta i sityiño ra cuaha xaan cuhva tañi cuhva ya. Tandihí ñaa sa cuu cuiñi ñu, i cahan ra sihin ñu.

³⁴ Ta ma cahan maa ra tatu ma cahan ra ziqui minoo cuhva. Ta cuee ca ta i nacatyí casi ra sihin ñiyivi ndyico sii ra.

Zacutaxi ra Jesús tatyí ta ndutyá

³⁵ Zuun ñi quivi cuan ta sa tyahan i catyi ra Jesús sihin ra i casi ra: Coho yo inga siyo miñi.

³⁶ Ta i zandoo ra sii ñiyivi cuan, ta cuahan ra Jesús sihin ra i casi ra sisi barco sa ñoho ra. Ta cuahan uu a uñi tahan ca barco sihin ra.

³⁷ Ta i quisaha minoo tatyí cahnu xaan. Ta i quisaha quihvi ndutyá sisi barco cuan. Ta zuhva zuhva ñi cua cutu tu.

³⁸ Ta ra Jesús quixi ra ityi zuhma barco. Ñoho minoo zahma xiñi ra. Ta i zandoyo ra i casi ra sii ra. Ta catyi ra sihin ra: Maestro, ¿ñacu ña cohon ta sa cuñi cunaa yo?

³⁹ Ta i nduvita ra Jesús, ta i cahan ra sihin tatyí: ¡Taxi ñi! Ta i catyi ra sihin ndutyá: ¡Ma ndyayu con! Ta taxi cuí ñi i nduu tatyí. Ta tacuan tucu ndutyá.

⁴⁰ Ta ziqui i catyi ra Jesús sihin ra i casi ra: ¿Ñacu yuhu xaan ndo? ¿Ñacu ña niñi iñi ndo?

⁴¹ Ta iyo xaan i cuñi ra i casi ra. Ta i natuhun tahan ra, ta catyi ra: ¿Ñaa ra cuu ra ya vatyí cuhva ndya tatyí ta cuhva ndya ndutyá ta tyaa si yahvi sii ra?

5

Ra ñoho taty cuihna

- ¹ I saa ra inga siyo miñi nu cu si Gadara,
² ta i quita ra Jesús barco cuan. Ta i quisi minoo ra iyo nu ñaña. Ñoho taty cuihna sii ra.
³ Ndyaa maa ra nu ñaña, ta yoñi maa cuu cuhñi sii ra numaa sihin cadena.
⁴ Cuaha xaan saha i sihñi ñiyivi saha ra ta ndaha ra sihin cadena, zoco tandihi saha sahanu ndyihhi ra sii si. Ta ñá cuu zandumazu ñiyivi sii ra.
⁵ Ndyiyaca ta ñiyaca ndihvi noo ra yucu ta nu ñaña. Sacu saa ra, ta sahandya ra sii ra sihin yuu.
⁶ I ndyehe ra sii ra Jesús sica ca. Ta i cacono ra. Ta i sicuiñi siti ra nu vasi ra Jesús.
⁷ Saa xaan i cahan ra, ta catyi ra: ¿Ñaa sa cuñun sihin mi, Jesús? Moo cuu zehe ra Ndyoo, ra cahnu ca. Sa ndyoo ñi ma zandyehun tundoho sii.
⁸ Tacuan i catyi ra vaty sa catyi ra Jesús: Yoho taty cuihna, quita sii ra ya.
⁹ Ta ziqui i ndaca tuhun ra Jesús sii taty cuihna cuan, ta catyi ra: ¿Ñaa nañi moo? Ta i catyi si: Nañi Legión vaty cuaha xaan ndi iyo.
¹⁰ Ta i cahan ndahvi xaan si sihin ra Jesús sa ma tava ra sii si ta cuhun si ndya vaha ñi.
¹¹ Ta yaty ñi yucu cuan siyucu cuaha xaan quini. Nanducu ti sa casi ti.
¹² Ta i quisaha cahan ndahvi tandihi taty cuihna cuan. Ta catyi si sihin ra Jesús: Tasun sii ndi nu yucu quini cuan. Ta cua quihvi ndi sisi ti.
¹³ I catyi ra Jesús sihin si vaty cuu. Ta ziqui i quita tandihi taty cuihna cuan sii rayii cuan, ta i quihvi si sisi quini cuan. Ta tandihi sa uu mil quini cuan, i sino ti nu iñi noo yuhu miñi. Ta i sihi tandihi ti sisi ndutya.
¹⁴ Tacuan ta iyo xaan i cuñi ra zacuenda quini cuan. I sino xaan ra. Sahan ra nacahnu sa nacaty ra sihin ñiyivi. Ta i quisi ndyehe ñiyivi ñaa sa cuu.
¹⁵ I saa ñu nu ndyaa ra Jesús, ta i ndyehe ñu sii ra i siñoho taty cuihna cuan. Sa ndyaa ra taxi ñi. Ñoho ra zahma ra, ta sa nduvaha cuñi xiñi ra. Ta i yuhu xaan ñu.
¹⁶ Ta ra i ndyehe cuan, i nacaty ra sihin ñiyivi cuhva i tahan ra i ñoho taty cuihna sii cuan ta cuhva i tahan quini cuan.
¹⁷ Ta ziqui i catyi ñu sihin ra Jesús sa ndyoo ñi naquita ra ñuu ñu.
¹⁸ Tacuan ta i quihvi ra Jesús sisi barco. Ta i quisaha cahan ndyoo ra siñoho taty cuihna sii cuan sihin ra Jesús vaty cuñi ra cuhun ra sihin ra.
¹⁹ Zoco ñá saha ra Jesús sa cuhun ra. I catyi ra: Cuahan ndya vehun nu iyo ñiyivi suun. Ta nacatyun sihin ñu tandihi cuhva i tyindyee ra Ndyoo suun. Ta yozo caa i cundahvi iñi ra suun.
²⁰ Ta cuahan ra cuan. Ta i nacaty ra sihin tandihi ñiyivi tandihi ñuu nu cu si Decápolis tandihi sa i zavaha ra Jesús sihin ra. Ta iyo xaan i cuñi ñiyivi.
- Nduvaha zehe ra Jairo, ta i tiin minoo ñaha yuzahma ra Jesús*
- ²¹ Saa tucu ra Jesús sihin ra i casi ra inga siyo miñi. Ta cuaha xaan ñiyivi i titahan yuhu miñi nu i saa ra.
²² Ta i quisi minoo ra cu tyiño vehe ñuhu. Jairo nañi ra. Ta cuhva sa ndyehe ra sii ra Jesús i sicuiñi siti ra.
²³ Ta i quisaha sacu ndahvi ra nuu ra Jesús ta catyi ra: Sa cuñi cuu cuii ña luhlu zehi. Coho ta tyizon ndohon sii ña. Ta cua nduvaha ña, ta ma cuu ña.
²⁴ Tacuan ta cuahan ra Jesús sihin ra. Ta i sindyico tuu xaan ñiyivi sii ra. Ñihi xaan i catyihhi ñu sii ra.
²⁵ Ta ticui ñiyivi cuan ñoho minoo ñaha cuhu. Sa usi uu cuiya sa cuhu ña cuehe sa cuu ña niñi.
²⁶ Sa cuaha xaan tundoho ndyehe ña. Cuaha xaan médico i zacuu tata sii ña. I zanaa ña tandihi cuii sa iyo sii ña. Zoco ñá nduvaha ña. Xaan ca i nduu cuehe cuan.
²⁷ Ta sa i siñi ña sa cahan ñiyivi tuhun ra Jesús, i quisi ña ityi sata ra zava mahñu ñiyivi cuan, ta i tiin ña yuzahma ra.

²⁸ Vatyí i sica iñi ña: “Vazu zahma ñi ra cua tiin, ta nduvehi.”

²⁹ Ta zuun ñi caa cuhva cuan i sicuita ñiñi ña. Ta i sito ña vatyí sa nduvaha ña sihin tundoho sa i tahan ña.

³⁰ Ta vatyí xaan i sito ra Jesús sa i quita zuhva tundyee iñi sii ra. I nandyehé ra siconduu nu yucu ñiyivi cuan. Ta i catyi ra: ¿Yoo cuu sa tiin zahme?

³¹ Ta i catyi ra i casi ra sihin ra: ¿Atu ña siton vatyí tuu xaan ñiyivi cuahan suhun? ¿Ta yozo caa cuu ndaca tuhun yoo sa tiin zahmon?

³² Ta ra Jesús i nandyehé ra siconduu nu yucu ñiyivi cuan vatyí cua ndyehé ra yoo sa i tiin sii ra.

³³ Yuhu xaan ñaha cuan ndya cuhva ñihi ñi ca ña vatyí sito ña ñaa sa cuu sa tahan ña. I quisi ña, ta i sicuiñi siti ña nuu ra Jesús. Ta i nacatyí ña sihin ra tandihi cuii.

³⁴ Ta i catyi ra Jesús sihin ña: Zihi, i nduvohon vatyí i sino iñun sii. Cuahan vityi, ta ma caca ca iñun vatyí sa nduvohon sihin tundoho i tohon.

³⁵ Ta zuun ñi caa cuhva sa cahan ra Jesús sihin ñaha cuan, ta i quisi cahan ñiyivi sihin ra cu tyiño vehe ñuhu. Ta catyi ñu: Sa sihi zehun. Ma zayanga con sii ra Maestro ya.

³⁶ Ta i siñi ra Jesús sa cahan ñu. Ta i catyi ra sihin ra cu tyiño: Ma yuhun. Sino iñun.

³⁷ Ta ñá saha ca ra Jesús sa cuhun cuaha xaan ñiyivi sihin ra. Ra Pedro ñi sihin ra Jacobo ta ra Juan, yañi ra Jacobo, cuahan sihin ra.

³⁸ Ta sa cua saa ra Jesús vehe ra cu tyiño cuan, i siñi ra sa cuvaa xaan ñiyivi. Sacu ñu. Ta sacu saa ñu.

³⁹ I quihvi ra sisi vehe, ta i catyi ra: ¿Ñacu cuvaa xaan ndo ta sacu xaan ndo? Ñá sihi ña luhlu ya. Quixi ña.

⁴⁰ Zoco i sacu ndyaa ñiyivi sii ra. Tacuan ta i tava ra Jesús sii tandihi ñu. Ta i quihin ra zutu ña ta zihí ña luhlu cuan, ta ra i quisi sihin ra ndya nu candyaa ña luhlu cuan.

⁴¹ I tiin ra ndaha ña, ta i cahan ra sihin zahan maa ra: Talita, cumi. Tuhun cuan cuñi si catyi si: Ñaha luhlu, catyi suhun vatyí nduviton. Nacuiñi ndyaa.

⁴² Zuun ñi caa cuhva cuan i nduvita ña luhlu sa iyo usi uu cuiya cuan. Ta ndaha nacaca ña. Ta iyo xaan i cuñi ñiyivi.

⁴³ Ñihi xaan i saha ra Jesús tyiño sii ñu sa ma nacatyí ñu nu sihin minoo ñiyivi. Ta i catyi ra vatyí cuhva ñu sa casi ña luhlu cuan.

6

Sinuhu ra Jesús ñuu ra, ñuu Nazaret

¹ I quita ra Jesús ñuu cuan, ta cuahan ra ndya ñuu ra. Ta cuahan ra i casi ra sihin ra.

² Ta tahan si quivi quitatu ñiyivi. I sahan ra vehe ñuhu, ta i zacuaaha ra sii cuaha xaan ñiyivi. Ta iyo xaan i cuñi ñu, ta catyi ñu: ¿Ndyamaa i cutuhva ra ya tuhun ya? ¿Yozo caa i ñihi ra cuhva sa casi xaan iñi ra? ¿Yozo caa ñihi ra cuhva zavaha ra sa ndyityi?

³ ¿Atu yivi ra ya cuu ra cu carpintero, zehe ña María, ta yañi ra Jacobo, ra José, ra Judas ta ra Simón? Ta cuhva ra iyo ñu ihya sihin yo, ndihi ca. Tacuan i catyi ñu. Ta yucuan cuenda ñá tyaa ca ñu yahvi sii ra Jesús.

⁴ Ta i catyi ra Jesús sihin ñu: Tyaa ñiyivi inga ñuu yahvi sii minoo ra profeta, zoco ndya ñuu ra, ndya vehe ra, nu ndyaa ñiyivi sii ra, ña tyaa ñu yahvi sii ra. Tacuan i catyi ra Jesús.

⁵ Ta yucuan cuenda ñá zavaha ra Jesús cuaha xaan sa ndyityi tañi i zavaha ra inga ñuu. I tyizo ra ndaha ra ziqui zuhva ñi ñiyivi cuhu, ta i zanduvaha ra sii ñu. Ta tacuan ñi.

⁶ Ta iyo xaan i cuñi ra vatyí ñá sino iñi ñu sii ra. Ta cuahan ra tandihi inga ñuu yucuan. Ta i zacuaaha ra sii ñiyivi yucuan.

I tasi ra Jesús sii sa usi uu tahan ra i casi ra vatyí cua nacatyí ra Tuhun Ndyoo sihin ñiyivi

⁷ I cana ra Jesús sii sa usi uu tahan ra i casi ra vatyí cuñi ra sa cua tasi ra uu uu ra. Ta i saha ra cuhva sii ra, cuhva sa tava ra tatyí cuihna sii ñiyivi.

⁸ Ta i catyi ra sihin ra vatyí ñahñi maa cua cuizo ra sa casi ra ityi. Minoo tuhun ñi tutatu cuña ra. Ta ñahñi ca sa cuizo ra nu yono ta nu xita ta nu xuhun.

⁹ Ndisa ndahvi ñi cundyaa saha ra. Minoo tuhun ñi camisa quihí ra, ta ma cuu sa uu tahan.

¹⁰ Ta i catyi ra Jesús sihin ra: Tatu saha ñiyivi minoo vehe cundyaa ndo, yucuan ñi ndoo ndo ndya cua cuhun ndo inga ñuu.

¹¹ Tatu saa ndo minoo ñuu ta ña cuñi ñiyivi sii ndo ta ña tyizoho ñu sa cahan ndo, quita ndo ñuu cuan. Naquizi ndo saha ndo vatyí ma cuhun nu ñiyaca sii ñuu cuan sihin ndo. Tacuan ta cua coto ñiyivi vatyí i zavaha ñu sa ña vaha sihin ndo. Ñihi xaan cua coo tundoho sii ñiyivi ñuu Sodoma ta ñiyivi ñuu Gomorra quivi cua tasi tuñi ra Ndyoo sii ñiyivi, zoco ñihi xaan ca cua coo tundoho sii ñiyivi ña cuñi tñin cuenda sii ndo. Tacuan i catyi ra Jesús.

¹² Ta ziqui cuahan ra, ta i zacoto ra sii ñiyivi vatyí nazandoo ñu cuatyí ñu.

¹³ Ta i tava xaan ra tatyí cuihna sii ñiyivi. Ta i natyihi ra azetye sii cuaha xaan ñiyivi cuhu, ta i zanduvaha ra sii ñu.

Cuhva i sihi ra Juan, ra i zacoo ndutya

¹⁴ Ta i sito ra rey Herodes, ra ndyaca ñaha yucuan, cuhva cuan vatyí i cahan tandihí ñiyivi tandihí sa i zavaha ra Jesús. Ta i sica iñi ra Herodes: Ra Juan, ra i zacoo ndutya cuan, cuu ra. I nandoto ra, ta yucuan cuenda ndyityi xaan ra.

¹⁵ Ta i catyi tucu inga ñiyivi: Ra Elías cuu ra. Ta inga ñiyivi i catyi: Minoo ra profeta cuu ra tañi ra profeta sicoo ta sa naha.

¹⁶ Ta sa siñi ra Herodes cuhva cuan, ta i catyi ra: Ra Juan cuu ra, ta i nandoto ra. Ta yuhvi i tave tyiño sii ra sahndya yuu zucu ra.

¹⁷ Vatyí zuun ñi ra Herodes i tava tyiño sii ñiyivi sa tyihi sii ra Juan vehe caa. Ta i sihñi ra sii ra sihin cadena sa cuenda ña Herodías. Ta ña Herodías cuan i cuu ñazihí ra Felipe yañi ra Herodes. Zoco i quihin ra Herodes sii ña sa cuu ñazihí ra.

¹⁸ Ta ra Juan i catyi ra sihin ra Herodes: Ña vaha cua cuhun ñazihí yañun. Catyi ra.

¹⁹ Xaan xaan i nduu ña Herodías sihin ra Juan. Ta cuñi ña sa cahñi ña sii ra. Zoco ñá cuu

²⁰ vatyí yuhu ra Herodes sii ra Juan vatyí sito ra vatyí ñiyivi vaha cuu ra Juan. Ta ñahñi cuatyí i zacuu ra. Ta yucuan cuenda ñá saha ra sa zavaha ña maña sii ra. Ta vazú ñá cutuñi iñi ra Herodes cuaha xaan sa cahan ra Juan, zoco i tahan iñi ra tyizoho ra sa cahan ra.

²¹ Ta ña Herodías i ñihi ña minoo cuhva quivi i nandusi cuiya ra Herodes. I saha ra sa cuxiñi tandihí ra ndyizo tyiño ra, sihin ra cu nuu sii zandaru, ta sihin tandihí ra nahnu nu cu si Galilea.

²² Ta i quihvi ña yoco zehe ña Herodías nu siyucu ra. Ta i sata saha maa tuhun ñi ña. Ta tahan xaan iñi ra Herodes sihin tandihí ra yucu sihin ra. Ta i catyi ra Herodes sihin ña: Caca moo ñaa sa cuñun, ta cua cuhve sii si suun.

²³ Ta i tyiñaha ra Ndyoo ta catyi ra sa ndisa cuii vatyí cua cuhva ra ñaa sa cua caca ña vazú zava cuii ñuu ndyaca ñaha ra.

²⁴ I quita ña, ta i catyi ña sihin zihí ña: ¿Ñaa sa cua caque? Ta i catyi zihí ña: Cacon xiñi ra Juan, ra zacoo ndutya.

²⁵ Ta ta sica cuii ñi i ndihvi ña nu ndyaa ra Herodes, ta i catyi ña: Cuñi vityi vityi ñi xiñi ra Juan, ra i zacoo ndutya sihin minoo nu coho.

²⁶ Ta i nducuihya xaan iñi ra Herodes, zoco sa tyiñaha ra Ndyoo, ta sa siñi tandihí ñiyivi. Ta yucuan cuenda ñá cuñi ra catyi ra sa ma cuhva ra sa sica ña.

²⁷ Zuun ñi caa cuhva cuan i tasi ra minoo zandaru cua quihin xiñi ra Juan.

²⁸ Sahan zandaru cuan vehe caa, ta i sahndya ra zucu ra Juan, ta i quihin ra xiñi ra. Ta i quisi ndyaca ra sii si sihin minoo nu coho, ta i saha ra sii si sii ña yoco cuan. Ta i saha maa ña sii si sii zihí ña.

²⁹ Ta sa i sito ñiyivi ndyico sii ra Juan vatyí sa i sihi ra, ta i sinaquihin ñu sii coño ñuhu ra. Ta i tyihi ñu sii si si ñuhu.

Cuhva i saha ra Jesús sa casi ohon mil rayii

³⁰ Tacuan ta ziqui i titahan tucu ra i casi ra Jesús. Ta i nacatyí ra sihin ra tandíhi sa i zavaha ra ta tandíhi sa i zacuaha ra sii ñiyívi.

³¹ Ta i catyí ra Jesús sihin ra: Coho yo; cua quitatu yo nu yoñi maa ñiyívi iyo. Tacuan i catyí ra vatyí tuu xaan ñiyívi i quisi. Ta tuu xaan ñu ndyico sii ra. Ta nu sa casi ra xita ta ñá cuyatyí ca ra.

³² Tacuan ta cuahan ra Jesús sihin ra i casi ra sihin minoo barco ndya minoo nu yoñi maa ñiyívi iyo.

³³ Zoco i ndyehe ñiyívi sa cuahan ra. Ta i nacoto ñu sii ra Jesús. Tandíhi ñuu i quita ñu. Ta i sino ñu. Ta yatyí ca i saa ñu ta ziqui maa ra.

³⁴ I quita ra Jesús barco cuan, ta i cundahvi xaan iñi ra sii ñu vatyí tañi mvee ticatyí sa yoñi sito ho i cuu ñu. Ta i quisaha zacuaha ra sii ñu cuaha xaan cuhva.

³⁵ Ta cuhva sa cua iñi i quisi ra i casi ra nu ndyaa ra, ta i catyí ra sihin ra: Sahiñi xaan. Ta yoñi ñiyívi iyo ihya.

³⁶ Catyun sihin ñiyívi nacuhun ñu tandíhi ñuu, tandíhi cuadria, cua zata ñu sa casi ñu vatyí ña ndyizo ñu sa casi ñu.

³⁷ Ta i nacahan ra Jesús, ta catyí ra: Cuhva maa ndo sa casi ñu. Ta i catyí ra sihin ra Jesús: Ma cuu zata maa ndi oco mil pan ta cuhva ndi casi ñiyívi.

³⁸ Tacuan ta i ndaca tuhun ra Jesús sii ra ta catyí ra: ¿Yozo tahan pan ndyizo ñiyívi? Cua ndyehe xihna ndo. Ta sa sito ra i catyí ra: Ohon tahan pan, ta uu tahan tyiyaca.

³⁹ Ta ziqui i catyí ra Jesús vatyí nacundyaa ñiyívi iñ iñ ityí ñu nu itya.

⁴⁰ Ta i sicundyaa ñu iñ iñ ityí ñu. Ziendu ñu a uu xico usi ñu sa minoo minoo ityí ñu.

⁴¹ Tacuan ta i quihin ra Jesús sa ohon tahan pan cuan ta uu tahan tyiyaca cuan. Ta i nandyehe ndaa ra ityí andívi, ta i nacuhva ra tyahvi ndyoo sii ra Ndyoo Zutu ra. Ta i sahnu ndyíhi ra pan cuan. Ta i saha ra sii si sii ra i casi ra vatyí cua zasa ra sii si sii ñiyívi. Ta tacuan tucu sa uu tahan tyiyaca cuan.

⁴² Tandíhi ñiyívi cuan i sasi, ta i ndaha xaan iñi ñu.

⁴³ Ta i zacutu ñu usi uu tahan tyica sihin sa nandoo yuhu pan cuan ta tyiyaca cuan.

⁴⁴ Ohon mil sa maa rayiñi ñi ta ziiñi ñu zíhi ta sa ndyíhi sasi ñu, ndíhi ca.

Cuhva i sica ra Jesús nu ndutya

⁴⁵ Tacuan ta ziqui i catyí ra Jesús sihin ra i casi ra vatyí nandíhvi ra barco vatyí cua yaha ra inga siyo miñi ndya ñuu Betsaida. Ta ra Jesús cua catyí ra sihin tandíhi ñiyívi cuan vatyí cunuhu ñu ndya ñuu ñu.

⁴⁶ Ta sa natasi ra Jesús sii ñu ndya ñuu ñu, ta i sahan ra minoo yucu vatyí cua cahan ra sihin ra Ndyoo Zutu ra, ra iyo andívi.

⁴⁷ Ta cuhva sa i cuaa i saa barco ñoho ra i casi ra zava mahñu miñi, ta ra Jesús i nandoo maa tuhun ñi ra.

⁴⁸ Ta ziqui i ndyehe ra Jesús vatyí yíi xaan i zacaca ra barco vatyí ñilhi xaan quiñi ndaha tatyí sii barco cuan. Ta ñaa ca cuan i tuhva ra Jesús nu yucu ra. Sica ra nu ndutya. Ta i cuñi ra Jesús yaha ra nu yucu ra.

⁴⁹ Ta i ndyehe ra vatyí sica ra Jesús nu ndutya, ta sica iñi ra vatyí minoo añaima cuu ra. Ta i sacu saa ra

⁵⁰ vatyí tandíhi ra i ndyehe sii ra. Ta i yuhu xaan ra. Ta i cahan ra Jesús sihin ra, ta catyí ra: Zandyee ndo iñi ndo. Yuhvi cui. Ma yuhu ndo.

⁵¹ Ta i quíhvi ra Jesús sisi barco, ta i sicuita tatyí. Ta iyo xaan i cuñi ra i casi ra Jesús

⁵² vatyí tañaha ca cutuñi vaha iñi ra vatyí cahnu xaan cuu cuhva iyo sii ra Jesús vazú sa ndyehe ra sa ndyityí i zavaha ra.

Cuhva i zanduvaha ra Jesús sii ñiyívi nu cu si Genesaret

⁵³ I yaha zava ra sihin ra i casi ra nu miñi cuan. Ta i saa ra nu cu si Genesaret. Ta i sihñi ra barco cuan yuhu miñi.

⁵⁴ I quita ra barco cuan, ta yatyí xaan i nacoto ñiyívi sii ra Jesús.

⁵⁵ Ta i sino xaan ñiyívi nacahnu ityí cuan, ta i quisaha quisi ndyaca ñu sii ñiyívi cuhu sihin nu sito ndya nu ndyaa ra Jesús.

⁵⁶ Ta tandihi nu cuahan ra vazú ñuu nahnu a ñuu ndyihí a sicuhu, i saqui ñiyivi sii ñu cuhu ityi. Ta i cahan ndyoo ñu sihin ra Jesús vatyí natiiñ ñiyivi cuhu sii ra vazú yuzahma ra. Ta tandihi ñu i tiiñ sii ra, i nduvaha ñu.

7

Sa zatívi añima ñiyivi

¹ Ra maestro cuenda ley, ra i quisi ityi ñuu Jerusalén sihin ra fariseo, i tuhva ra nu nandyaa ra Jesús.

² Sa i ndyehe ra vatyí ra i casi ra Jesús ña tuhva ra nacatya vaha ndaha ra sa sasi ra xita tañi iyo costumbre ñiyivi hebreo. Ta yucuan cuenda i cahan ra ndya vaha ñi sii ra vatyí ñá zavaha ra costumbre iyo yucuan.

³ Ta ra fariseo sihin tandihi ñiyivi hebreo ña zaña ñu costumbre sa ndoo vaha xaan ndaha ñu ta casi ñu xita vatyí tacuan i zacuaha ñiyivi sahnu sii ñu.

⁴ Ta sa nasaa ñu sa sahan ñu nuyahvi, ma casi ñu tatu ma nandaha vaha xaan ñu. Ta iyo cuaha xaan ca costumbre sii ñu. Nacatya ñu tasa, ta quizi, ta caa sa tuhva ñu cutyíño ta cuhva ndya sito ñu.

⁵ Tacuan ta i ndaca tuhun ra fariseo ta ra maestro cuenda ley ta catyi ra: ¿Ñaa cuenda ña zavaha ñiyivi ndyico suun costumbre sa i zavaha ñiyivi sahnu vatyí ña nacatya vaha ñu ndaha ñu ta casi ñu?

⁶ Ta i catyi ra Jesús sihin ra: Vaha xaan i cahan ra Isaías cuhva iyo maa ndo vatyí zaha ndo tuhun vatyí vaha xaan ndo, zoco ña ndisa. Ta tacuan i tyaa ra Isaías ta sa naha. I catyi ra vatyí i catyi maa ra Ndyoo tyehen:

Ihya ñiyivi zacahnu ñu sii, sihin yuhu ñu.

Zoco ña zacahnu ñu sii, sa ndisa.

⁷ Zacuaha ñu sii ñiyivi maa maa costumbre ñiyivi ñi.

Ta ña zavaha ñu cuhva catyi Tuhun Ndyoo sa ndisa.

⁸ Ta i catyi tucu ra Jesús sihin ra: Maa ndo i zandoo ley ra Ndyoo vatyí cua cundyico ndo costumbre ñiyivi, tañi sa nacatya xaan ndo quizi ndo ta tasa ndo ta inga cuhva sa tacuan.

⁹ Tyaa siyo xaan ndo sa catyi Tuhun Ndyoo vatyí cuñi ndo zacahnu ndo costumbre ñiyivi sahnu.

¹⁰ Ihya cuu cuhva i tyaa ra Moisés: “Zacahnu ndo sii zutu ndo ta sii zihí ndo.” Ta “Yoo ra cahan sa quiñi sii zihí ra a sii zutu ra, nacañi ñiyivi sii ra.”

¹¹ Zoco maa ndo catyi vatyí cuu catyi minoo ñiyivi sihin zutu ra a sihin zihí ra: “Ma cuu tyindyeyi suun vatyí tandihi ndaha tyiñe corbán cuu si.” (Tuhun corbán cuan cuñi si catyi si vatyí sii ra Ndyoo cuu.)

¹² Tatu tacuan cahan minoo ñiyivi, maa ndo catyi ndo vatyí ma cuu tyindyee ca ra sii zutu ra a sii zihí ra.

¹³ Tacuan cuu cuhva zanduluhlu ndo tuhun cahan ra Ndyoo vatyí cuñi ndo zanducahnu ndo costumbre ndo. Ta cuaha xaan ca cuhva sa tacuan ndyicuu ndo.

¹⁴ Ta i cana tucu ra Jesús sii ñiyivi ta catyi ra sihin ñu: Tyizoho tandihi ndo, ta tyituñi vaha iñi ndo.

¹⁵ Yivi sa sasi ñiyivi ta yivi sa sihi ñu cuu sa zatívi añima ñu. Zoco sa quiñi sica iñi ñu cuu sa zatívi añima ñu.

¹⁶ Tatu siñi ndo, cuiñi ndo.

¹⁷ Ta sa zandoo ra Jesús sii ñiyivi cuan, ta i quihvi ra minoo vehe. Ta ra i casi ra, i ndaca tuhun ra sii ra: ¿Ñaa cuñi si catyi si cuhva cuan?

¹⁸ Ta i catyi ra Jesús sihin ra: ¿Atu ña siñi tucu maa ndo vatyí yivi sa sasi ñiyivi ta yivi sa sihi ñu cuu sa zatívi añima ñu?

¹⁹ Vatyí yivi añima ñu quihvi si. Quihvi si sisi siti cahnu ñu ta ziqui quita si. Tacuan i catyi ra vatyí ñahñi sa ica iyo sa ma cuu casi ñiyivi. Cuu casi ñiyivi ñaa sa cuñi maa ñu. Ta yivi cuatyí cuu si.

²⁰ Ta i catyi tucu ra: Sa quiñi sica iñi ñiyivi, yucuan cuu sa zativi añima ñu. Ta yucuan cuu cuhva cua coo cuatyi ñu.

²¹ Vatyí añima ñiyivi quita tandihi sa sica iñi ñu, sa quiñi zavaha ñu, sa nama minoo rayii ñazihí inga ra, a sa coo cuaha xaan ñaha ra, a sa cahñi ra sii inga ñiyivi,

²² sa zuhu yo, sa cucuihna iñi yo sa cuenda ndaha tyiño inga ñiyivi, tandihi sa quiñi zavaha yo, sa zandavi ñaha yo, sa cuxi xaan iyo yo, sa cuihna iñi yo, sa vatya yo, sa cahnu xaan zaha yo sii yo ta sa ña zavaha yo sa vaha.

²³ Tandihi cuii cuhva quiñi ya, quita si añima ñiyivi, ta zativi si sii ñu.

Cuhva i sino iñi minoo ñaha inga ñuu sii ra Jesús

²⁴ I quita ra Jesús yucuan, ta cuahan ra ndya ñuu Tiro ta ñuu Sidón. I quihvi ra minoo vehe vatyi cuñi ra sa ma coto ñiyivi sa i saa ra. Zoco ñá cuu.

²⁵ Yatyí xaan i sito zihí minoo ñaha luhlu sa ñoho tatyí cuihna sii. Ta i quisi ña nu ndyaa ra Jesús. Ta i sicuiñi siti ña saha ra.

²⁶ Ta ñaha cuan i cacu ña ñuu Sirofenicia. Ta yivi ñiyivi hebreo cuu ña. Ta i sica ña tumañi iñi sii ra Jesús sa tava ra tatyí cuihna sa ñoho sii zehe ña.

²⁷ Zoco i cahan ra Jesús minoo cuhva sihin ña, ta i catyi ra: Natyindyee xihne sii ñiyivi ñui vatyi ña vaha quihin mi sa cua casi sa ndyihí ta cuhve casi ina sii si.

²⁸ Ta i catyi maa ña: Ndisa, tata, zoco tañi ina lee cui vatyi cua casi vazu yuxita zanacoyo sa ndyihí. Yucuan cuenda tyindyeeun sii, zuhva.

²⁹ Tacuan ta i catyi ra Jesús: Vaha cohon. Sa cuu cuhun. Sa quita tatyí cuihna sii zehun.

³⁰ Ta sa nasaa ña vehe ña, ta i ndyehe ña sii zehe ña nu sito, ta sa quita tatyí cuihna sii ña.

Zanduvaha ra Jesús sii ra zoho ta ñehe ra

³¹ I quita ra Jesús ñuu Tiro ta cuahan ra ndya Sidón ta ndya tandihi ñuu ndyihí nu cu si Decápolis. Ta i saa ra yumiñi Galilea.

³² Ta i quisi ndyaca ñiyivi sii minoo ra zoho ta ñehe ra. Ta i sica ñu tumañi iñi sa cua tyizo ra Jesús ndaha ra sii ra.

³³ Ta i quihin ra Jesús sii ra, ta i tuhva ra sihin ra ndya zava. I zanandoo noo ra sii ñiyivi. Ta i tyihí ra Jesús nu ndaha ra nduu siyo zoho ra zoho cuan. Ta ziquí i tyaa ra Jesús zihí ra nu ndaha ra, ta i tiin ra yaa ra ñehe cuan.

³⁴ Ta i nandyehé ndaa ra Jesús ityi ziquí, ta i sinoo ra, ta i catyi ra sihin tuhun maa ra: ¡Efata! Tuhun cuan, cuñi si catyi si: ¡Nanuña!

³⁵ Ta zuun ñi caa cuhva cuan i nuña zoho ra. Ta ndaha nacahan vaha ra.

³⁶ Ta i ndisi tucu ra Jesús nu yucu ñiyivi. Ta i catyi ra sihin ñu vatyi ma nacatyi ñu nu sihin minoo ñiyivi. Zoco sa ñihí ca catyi ra Jesús sihin ñu, cuaha ca nacatyi ñu sihin ñiyivi.

³⁷ Ta iyo xaan i cuñi ñiyivi, ta i catyi ñu: Tandihi cuii sa vaha zavaha ra Jesús cuhva ndya nacuiñi ra zoho, ta nacahan ra ñehe.

8

Cuhva i saha ra Jesús sa casi cumi mil rayii

¹ Ta quivi cuan i tuhva cuaha xaan ñiyivi. Ta ñahñi maa sa casi ñu. Ta i catyi ra Jesús sihin ra i casi ra:

² Cundahvi xaan iñi sii ñiyivi ya vatyi sa iyo uñi quivi sa yucu ñu sihin, ta ñahñi maa sa casi ñu.

³ Tatu natasi sii ñu cunuhu ñu vehe ñu ta ma casi ñu, coto cuaña ñu ityi cuhun ñu vatyi sica xaan i quisi ñu.

⁴ Ta i catyi ra i casi ra Jesús sihin ra: ¿Ndya ityi cua quihin yo sa casi ñu ya sicuhu ya? Ta yoñi ñiyivi iyo ihya.

⁵ Ta i ndaca tuhun ra Jesús sii ra: ¿Yozo tahan pan ndyizo ndo? Ta i catyi ra: Usa tahan.

⁶ Tacuan ta i catyi ra Jesús vatyí nacundyaa ñiyívi cuan nu ñuhu. Ta i quihin ra sa usa tahan pan cuan, ta i saha ra tyahvi ndyoo sii ra Ndyoo. Ta i sahnu ndyíhi ra pan cuan. Ta i saha ra sii ra i casi ra. Ta ra yucuan saha sii ñiyívi.

⁷ Ta ndyizo ñiyívi cuan zuhva tyiyaca ndyíhi. Ta i saha tucu ra Jesús tyahvi ndyoo sii ra Ndyoo sa cuenda tí. Ta i saha ra sii ra i casi ra. Ta i zasa ra sii si sii ñiyívi cuan.

⁸ Sasi ñu, ta i ndaha xaan iñi ñu, ta ziquí i zacutu ñu usa tahan tyica sihin sa nandoo cuan.

⁹ Ta sa i sasi tañi cumi mil ñiyívi ta ziquí i natasi ra Jesús sii ñu ndya vehe ñu.

¹⁰ Ta i ndíhvi ra barco sihin ra i casi ra, ta cuahan ra ndya nu cu si Dalmanuta.

Sica ra fariseo minoo sa ndyityi sii ra Jesús

¹¹ Tacuan ta ziquí i quisi ra fariseo, ta i quisaha natuhun tahan ra sihin ra Jesús. Cuñi ra ndyehe ra minoo sa ndyityi tañi zavaha ra Ndyoo vatyí cuñi ra coto ra atu ndisa i tasi ra Ndyoo sii ra Jesús.

¹² Ta ra Jesús i sinoo xaan ra. Ta i catyi ra: ¿Ñacu sica xaan ñiyívi sa ndyehe ñu sa ndyityi? Catyi vatyí ma zavehi minoo sa ndyityi sa ndyehe ñi maa ñu.

¹³ Ta i zandoo ra Jesús sii ra fariseo. Ta i nandíhvi tucu ra barco, ta cuahan ra inga siyo miñi cuan.

Tuhun cahan ra fariseo cuu tañi yusa i siya

¹⁴ I naa iñi ra i casi ra Jesús sa casi ra ta sa cuahan ra sihin barco cuan. Minoo ñi pan ndyizo ra.

¹⁵ Ta i catyi ra Jesús sihin ra: Ndyehe ndo, zacuenda ndo sii ndo sihin yusa i siya ra fariseo ta ra Herodes.

¹⁶ Ta i natuhun tahan ra i casi ra Jesús, ta i catyi ra: Cahan ra tacuan vatyí ñahñi pan ndyizo yo. Tacuan i sica iñi ra cuan vatyí ñá cutuñi iñi ra tuhun i cahan ra Jesús sa cuenda yusa i siya cuan. Ñá cutuñi iñi ra vatyí cahan ra Jesús minoo cuhva vatyí cua zacuenda ra sii ra sihin cuhva zacuaaha ra fariseo ta ra Herodes.

¹⁷ I sito ra Jesús sa natuhun tahan ra, ta i catyi ra: ¿Ñacu sica xaan iñi ndo sa ña ndyizo ndo pan? ¿Atu ña cutuñi iñi ndo? ¿Atu tañaha ca ñihi ndo cuhva?

¹⁸ ¿Atu ña ndyehe ndo sihin sití nuu ndo, ta ña siñi ndo sihin zoho ndo? ¿Atu ña nacohon iñi ndo?

¹⁹ Quívi i sehi sa ohon tahan pan i sasi ohon mil rayí, ¿ta yozo tahan tyica si i naquihin ndo? Ta i catyi ra: Usi uu tahan.

²⁰ Ta i catyi ra Jesús: Ta sa i sehi sa usa tahan pan i sasi cumi mil ñiyívi, ¿yozo tahan tyica i situ i naquihin ndo? Ta i catyi ra: Usa tahan.

²¹ Ta i catyi ra Jesús: ¿Ñacu ña cutuñi iñi ndo?

Zanduvaha ra Jesús sii minoo ra cuaa ñuu Betsaida

²² I saa ra Jesús ñuu Betsaida. Ta i sindyaca ñiyívi sii minoo ra cuaa nu ndyaa ra. Ta i sica xaan ñu tumañi iñi sa tyizo ra ndaha ra sii ra cuaa cuan.

²³ Ta i tiin ra Jesús ndaha ra, ta i sahan ra sihin ra ndya yuñuu. Ta i tyaa ra Jesús zii ra nuu ra cuaa cuan, ta i tyizo ra ndaha ra ziquí ra. Ta i ndaca tuhun ra sii ra tatu sa cuu ndyehe ra zuhva.

²⁴ Ta i ndyehe ra cuaa cuan, ta i catyi ra: Ndyehi ñiyívi. Tañi caa yutu caa ñu. Ta sica ñu.

²⁵ Ta i tyizo tucu ra Jesús inga saha ndaha ra nuu ra, ta i nduvaha ra. Sa nandyehe vaha ra tandíhi.

²⁶ Tacuan ta i natasi ra Jesús sii ra ndya vehe ra, ta i catyi ra: Ma quíhvun sisi ñuu. Ta ma nacatyun sihin ñiyívi.

Nacatyí ra Pedro vatyí ra Jesús cuu ra cua zacacu sii ñiyívi

²⁷ Tacuan ta cuahan ra Jesús sihin ra i casi ra tandíhi ñuu ndyíhi nu cu si Cesarea de Filipino. Ta ityi cuahan ra i ndaca tuhun ra Jesús sii ra ta catyi ra: ¿Yoo ra cui catyi ñiyívi?

²⁸ Ta i catyi ra i casi ra: Iyo ñiyivi catyi vatyí minoo ra i nandoto cuun tañi ra Juan, ra i zacoo ndutya a minoo ra profeta. Ta catyi inga ñiyivi vatyí ra Elías cuun.

²⁹ Ta i ndaca tuhun ra Jesús sii ra: Ta maa ndo, ¿yoo ra cui catyi maa ndo? Ta i catyi ra Pedro: Yoho cuu ra Cristo, ra i tasi ra Ndyoo vatyí cua zacacun sii ndi.

³⁰ Ta i catyi ra Jesús sihin ra vatyí ma nacatyí ra sihin ñiyivi.

Zacoto ra Jesús cuhva cua cuu ra

³¹ Ta i quisaha zacuaha ra Jesús sii ra i casi ra vatyí cua ndyehe xaan ra i quisi ndya gloria tundoho. Ta ra mandoñi, ta ra zutu nahnu, ta ra maestro cuenda ley cua cuxaan xaan ra sihin ra. Ta cua cahñi ra sii ra. Ta sa cu uñi quivi, cua nandoto tucu ra.

³² Ta tandihi cuhva cuan casi xaan i nacatyí ra Jesús sihin ra. Tacuan ta i tava ra Pedro sii ra ndya zava, ta ñihi xaan i cahan ra Pedro sihin ra Jesús, ta catyi ra: Ña vaha cua tahan si suun cuhva sa cohon ña.

³³ Ta i nandyehe ra Jesús nu yucu inga ra i casi ra. Ta xaan xaan i cahan ra sihin ra Pedro, ta catyi ra: Ma cahan con tacuan vatyí cohon tañi cahan cuihna. Ña sica iñun cuhva sica iñi ra Ndyoo. Sica iñun cuhva sica iñi ñiyivi.

³⁴ Tacuan ta i cana ra Jesús sii ra i casi ra ta sii inga ñiyivi. Ta i catyi ra: Tatu iyo ra cuñi ra cundyico ra sii, nazama ra cuhva iyo ra. Ta ma zacahnu xaan ra sii ra. Ta nandyehe ra tundoho sa cuenda mi. Ta nazavaha ra cuhva zavehi.

³⁵ Tatu ña cuñi ñiyivi sa cuu ñu sa cuenda Tuhun Ndyoo, cua cuu ñu, ta cua cahun ñu andyaya. Ta ma cundito ñu sihin ra Ndyoo. Zoco tatu cua cuu ñiyivi sa cuenda mi a sa cuenda Tuhun Ndyoo, cua cundito ñu sihin ra Ndyoo.

³⁶ ¿Ñaa sa ñihi ñiyivi sa zahacanaa ñu tandihi sa iyo ñuu ñiyivi ta quivi cua cuu ñu ndaha cua naa ñi ñu?

³⁷ ¿Ta yozo caa cuu tyiyahvi ñiyivi ta ñihi tahvi añima ñu?

³⁸ Tatu iyo ra cahan nuu sa cuenda mi a sa cuenda Tuhun Ndyoo nuu ñiyivi iyo cuatyí ya, tacuan tucu cua cucahan nui sii ra. Vatyí yuhvi, ra i quisi ndya gloria cui, ta cua quisi tuqui sihin ángel. Ta cua ndyehe ñiyivi vatyí cahnu xaan cuu Zuti.

9

¹ Ndisa cui sa quehin sihin ndo vatyí iyo ñu yucu ihya ma cuu ñu ndya cua ndyehe ñu cuhva cundyaca ñaha ra Ndyoo vatyí iyo xaan cuhva sii ra Ndyoo.

Cuhva i zama ra Ndyoo cuhva caa ra Jesús minoo saha

² Sa yaha iñu quivi ta cuahan ra Jesús sihin ra Pedro, ta ra Jacobo ta ra Juan ndya minoo yucu zucu xaan. Ta yucuan i zama cuhva caa ra Jesús nu yucu ra sihin ra.

³ Zahma ra xiño xaan i nduu si ta cui si xaan si tañi nieve. Yoñi numinoo ñiyivi cuu zanducuisi zahma tañi i nducuisi zahma ra Jesús.

⁴ Ta i ndyehe ra i casi ra Jesús sii ra Elías ta ra Moisés. Ra zacuaha Tuhun Ndyoo ta sa naha cuu nduu tahan ra cuan. I quisi ra ndya gloria. Ta i natuhun ra sihin ra Jesús yucuan.

⁵ Ta i catyi ra Pedro sihin ra Jesús: Maestro, vaha xaan yucu yo ihya. Nazavaha ndi uñi tahan vehe tyiyahva; minoo cuenda moo, ta minoo cuenda ra Moisés, ta inga si cuenda ra Elías.

⁶ Yuhu xaan tandihi uñi tahan ra i casi ra Jesús. Ta yucuan cuenda i cahan ra Pedro tacuan vatyí ñá sito ra ñaa sa cahan ra.

⁷ Ta ziqui i quisi minoo vico. Ta ndaha tyazi si sii tandihi ra. Ta i cahan minoo sa cahan sisi vico cuan. Ta catyi si: Ra ihya cuu zehi. Cuñi xein sii ra. Tyaa ndo yahvi sa cahan ra.

⁸ Ta zuun ñi caa cuhva cuan i nandyehe ra i casi ra Jesús siconduu nu yucu ra. Ta ñá ndyehe ca ra sii ra Moisés ta nu ra Elías. Maa tuhun ñi ca ra Jesús nandyaa sihin ra.

⁹ Ta cuhva sa cua noo ra yucu cuan i catyi ra Jesús sihin ra vatyí ma nacatyí ra nu sihin minoo ñiyivi sa ndyehe ra ndya cua saa quivi cua nandoto tucu ra i quisi ndya gloria sisi sa i sihi ra.

¹⁰ Ta i sicumi xehe ra tuhun cuan, zoco i nducu tuhun tahan xaan ra: ¿Yozo caa cuu nandoto ñiyivi tatu sa i sihi ñu?

¹¹ Ta i ndaca tuhun ra sii ra Jesús ta catyi ra: ¿Ñacu catyi ra maestro cuenda ley vatyi xihna ca ra Elías cua quisi ta ziqui ra Cristo?

¹² Ta i catyi ra Jesús: Ndisa cuii, xihna ca ra Elías i quisi, ta i zanduvaha ra tandihi tyiño vatyi cua quisi ra Cristo. Ta ¿ñaacatyi Tuhun Ndyoo sa cuenda ra i quisi ndya gloria? Catyi si vatyi cua ndyehe xaan ra tundoho ta ma tyaa ñiyivi yahvi sii ra.

¹³ Yuhvi catyi sihin ndo vatyi ra Elías sa i quisi ra, ta i zavaha ñu tandihi sa cuñi maa ñu sihin ra. Tañi catyi Tuhun Ndyoo, ta tacuan i cuu si.

I zanduvaha ra Jesús sii minoo ra luhlu sa ñoho taty cuihna

¹⁴ Ta cuee ca i ndisi tucu ra Jesús nu yucu zuhva ca ra i casi ra. Nandyaa ra cuan zava mahñu. Ta yucu cuaha xaan ñiyivi siconduu cuii ñu sii ra. Ta natuhun tahan ra maestro cuenda ley sihin ra.

¹⁵ Ta sa i nandyehe ñiyivi sii ra Jesús, iyo xaan i cuñi ñu. Ta i sino xaan ñu ta i zatahan ñu sii ra.

¹⁶ Tacuan ta i ndaca tuhun ra Jesús: ¿Ñaa tuhun natuhun xaan ndo?

¹⁷ Ta i nacahan minoo ra nandyaa yucuan. Ta i catyi ra: Maestro, vasi ndyaque minoo zehi. Ñoho taty cuihna sii ra. Ta ña saha si cahan ra.

¹⁸ Ta ndya vaha cuii ñi cuhva nduxaan si sii ra. Ta zanduva si sii ra nu ñuhu. Ta saa tiñi yuhu ra. Ta sasi quihñi noho ra. Ta ndaha ndurutu ra. Ta yucuan cuenda cuehe xaan ra. Ta sa catyi vatyi tava ra i casun sii si. Zoco ñá cuu sii ra.

¹⁹ Ta i catyi ra Jesús sihin tandihi ñiyivi: Ndoho cuu ñiyivi ña sino iñi. ¿Yozo tahan ca quivi cua ndoi sihin ndo ta ziqui cua sino iñi ndo? Sa naha xaan i cundyeen iñi sihin ndo. Ta ndyaca ndo sii ra luhlu ña.

²⁰ I sindyaca ra sii ra, ta i ndyehe taty cuihna cuan sii ra Jesús. Ta i nduxaan si sii ra luhlu cuan. Ta i nduva ra nu ñuhu. Sicotuu ra. Zañihi ra. Ta saa tiñi yuhu ra.

²¹ I ndaca tuhun ra Jesús sii zutu ra luhlu cuan: ¿Sa yozo tahan cuiya sa tahan ra tacuan? Ta i catyi zutu ra: Ndyaa ta luhlu ra.

²² Ta cuaha xaan saha cañi ñuhu si sii ra nu ñuhu a si ndutya vatyi cuñi si cañi si sii ra. Tatu cuu zanduvohon sii ra cundahvi iñun sii ndi, ta tyindyeun sii ndi.

²³ Ta i catyi ra Jesús sihin ra: Cuu zanduvehi sii ra tatu cuu sino iñun vatyi cuu sii vatyi zavaha ra Ndyoo ñaa sa sica ñiyivi sino iñi sii ra.

²⁴ Ta i cana saa zutu ra luhlu cuan ta catyi ra: ¿Sino iñi, ta tyindyeun sii, cuhva sino ca iñi!

²⁵ I ndyehe ra Jesús vatyi cuaha xaan ñiyivi cua titahan, ta xaan xaan i cahan ra Jesús sihin taty cuihna cuan, ta catyi ra: Yoho cuihna zañehe sii ñiyivi, cuihna zazoho sii ñiyivi, yuhvi catyi vatyi quiton. Zañon sii ra luhlu ya. Ta ma ndihvi con sii ra.

²⁶ I sacua saa taty cuihna cuan, ta i zacuñaa si sii ra luhlu cuan, ta i quita si. Tañi ra sihi nduu ra. Ta i catyi cuaha xaan ñiyivi vatyi sa sihi ra.

²⁷ Zoco i tiin ra Jesús ndaha ra, ta i cañihi ra sii ra, ta i nduvita ra.

²⁸ Ta ziqui i quihvi ra Jesús minoo vehe, ta i ndaca tuhun xehe ra i casi ra sii ra: ¿Ñacu ñá cuu tava nduhvi taty cuihna cuan?

²⁹ Ta i catyi ra Jesús sihin ra: Cuu zacuu ndo tatu coo ndyitya ndo ta cahan ndo sihin ra Ndyoo.

I zacoto tucu ra Jesús inga saha cuhva cua cuu ra

³⁰ Ta i quita ra yucuan, ta i yaha ra nu cu si Galilea. Ta ñá cuñi ra Jesús sa coto numinoo ñiyivi nu cuahan ra.

³¹ I zacua ra sii ra i casi ra, ta catyi ra sihin ra: Cua xico minoo ra sii ii, ra i quisi ndya gloria. Ta cua tiin ñiyivi sii. Ta cua cañi ñu sii. Ta sa cu uñi quivi cua nandoto tuqui.

³² Zoco ñá nacoto ra sa cahan ra Jesús, ta ñá ndaca tuhun ra vatyi cahan nuu ra.

¿Yoo ra cuu ra ñiñi ca?

³³ Tacuan ta ziqui i saa ra Jesús ñuu Capernaum. Ta sa ñoho ra minoo vehe, ta i ndaca tuhun ra Jesús sii ra i casi ra ta catyi ra: ¿Ñaa tuhun natuhun xaan ndo ityi i quisi yo?

³⁴ Zoco taxi cuii ñi i nduu ra. Ta i cucahan nuu ra vaty i natuhun tahan ra ityi i quisi ra yoo ra cuu ra ñiñi ca sii ra.

³⁵ Ta i sicundyaa ra Jesús, ta i cana ra sii tandihi sa usi uu tahan ra i casi ra, ta i catyi ra: Tatu iyo minoo ra cuñi ra cuu ra ra ñiñi ca, vaha ca ma zacahnu ra sii ra. Natyindyee ra sii inga ñiyivi.

³⁶ Ta ziqui i quihin ra Jesús sii minoo ra luhlu, ta i tyihi ra sii ra mahñu ñiyivi, ta i sicunumi ra sii ra, ta catyi ra:

³⁷ Tatu zavaha ñiyivi sa vaha sihin minoo ra luhlu sa cuenda mi, tañi sa zavaha ñu sa vaha sihin mi cuu si. Ta tatu zavaha ñiyivi sa vaha sihin mi, zavaha ñu sa vaha sihin Zuti.

Tatu ña cahan ñiyivi ndya vaha ñi sii yo, tyindyee ñu sii yo cuhva cuan

³⁸ Ta ziqui i catyi ra Juan: Maestro, i ndyehe ndi minoo ra tava ra taty i cuihna sihin zivi moo, zoco yivi ra tahan ndi cuu ra. Ta i catyi maa ndi vaty ma zavaha ra sa tacuan.

³⁹ Ta i catyi ra Jesús: Ña vaha sa ñá saha ndo. Vaha tatu cua cutyiño ra zivi; ma cuu tucu cahan ra sa ndya vaha ñi ziqui.

⁴⁰ Vaty tatu ma cahan ñiyivi ndya vaha ñi ziqui yo, tyindyee ñu sii yo.

⁴¹ Tatu cuhva ñiyivi ndutya cohon ndo vaty i tasi ra Ndyoo sii, ta ra i casi cuu maa ndo, catyi vaty cua tyiyahvi Ndyoo sii ñu.

⁴² Yoo ra cua zañaha sii minoo ra luhlu tañi ra luhlu ya cuhva zavaha ra sa ña vaha ta ma cundyico ca ra sii, vaha ca tatu sa i sihñi ñiyivi zucu ra cuan sihin minoo yuu yozo vee xaan ta zavita ñu sii ra sisi tyañuhu yaty ca.

⁴³ Tatu cuñun zavohon sa ña vaha sihin ndohon, cahndya ndaxun sii si vaty vaha ca cahun gloria sihin minoo ñi ndohon ta ma cahun sihin nduu tahan ndohon andyaya sisi ñuhu sa ma ndahva

⁴⁴ nu ña sihi tindacu sasi sii ñiyivi ta nu cayu ñuhu tandihi cui tyiemvu.

⁴⁵ Tatu cuñun zavohon sa ña vaha sihin sohon, cahndya ndaxi tucun sii si cuan vaty vaha ca cahun gloria sihin ii siyo ñi sohon, ta ma cahun sihin nduu tahan sohon andyaya sisi ñuhu sa ma ndahva

⁴⁶ nu ña sihi tindacu sasi sii ñiyivi, ta nu cayu ñuhu tandihi cui tyiemvu.

⁴⁷ Ta tatu cuñun ndyehun sa ña vaha sihin siti nuun, tavon sii si vaty vaha ca cua quihvun sihin minoo ñi siti nuun nu ndyaca ñaha ra Ndyoo, ta ma cahun sihin nduu tahan siti nuun andyaya

⁴⁸ nu ña sihi tindacu sasi sii ñiyivi, ta nu cayu ñuhu tandihi tyiemvu.

⁴⁹ Zoco ñiyivi ndyico sii, cua nduvaha aña ñu tañi ñi vaha vaty cua tahan ñu tundoho ihya ñuu ñiyivi sa cuenda mi. Ta tundoho cuan, tañi ñuhu cuu si vaty sito xaan ñu tundoho. (Ta tacuan cua nduvaha aña ñu.)

⁵⁰ Vaha xaan cuu ñi, zoco ¿yozo caa cutyiño ñiyivi sii si tatu ña uhva ca si? Tañi ñi vaha cua cuu maa ndo tatu vaha cua zavaha ndo sihin inga ñiyivi.

10

Cuhva i zacuaha ra Jesús vaty ña vaha cua zandoo minoo ra ñazihi ra

¹ I quita ra Jesús ñuu Capernaum, ta cuahan ra nu cu si Judea inga siyo yuu Jordán. Yucuan, cuaha xaan ñiyivi i titahan nu ndyaa ra, ta inga saha i zacuaha ra sii ñu tañi cuhva sa tuhva ra.

² Ta ziqui i quisi ra fariseo nu ndyaa ra Jesús, ta i ndaca tuhun ra sii ra Jesús ta catyi ra: ¿Atu iyo ley sa zandoo minoo rayi sii ñazihi ra? Tacuan cahan ra vaty cuñi ra fariseo tyaa ra cuaty sata ra Jesús.

³ Ta i ndaca tuhun ra Jesús sii ra: ¿Ñaa sa i catyi ra Moisés?

⁴ Ta i catyi ra fariseo: Saha ra Moisés cuhva sa sino minoo tutu, ta ziqui cuu zandoo ra sii ña sihin ley.

⁵ Ta i catyi ra Jesús sihin ra: I saha ra Moisés ley cuan sii ndo vaty ñihi xaan iñi ndo.

⁶ Zoco sa xihna ñi i zavaha ra Ndyoo tandihí sa iyo ñuu ñiyívi, ta i zavaha ra minoo rayíi ta minoo ñaha.

⁷ Ta yucuan cuenda cua zandoo rayíi sii zutu ra ta sii zihí ra, ta cua cu-ín ra sihin ñazihí ra.

⁸ Sa nduu tahan ñu cua nduu ñu tañi minoo ñi. Cuhva sa ndyehe ra Ndyoo sii ñu, minoo ñi ñiyívi cuu ñu.

⁹ Cuu, ña vaha zandoo rayíi sii ñazihí ra. Nu maa ña ta ma zandoo ña sii maa ra vatyí ra Ndyoo i zandu-ín ra sii ñu.

¹⁰ Ta sisi vehe i ndaca tuhun ra i casi ra Jesús sii ra ñaa tuhun cuu si cuan.

¹¹ Ta i catyí ra Jesús sihin ra: Ra zandoo sii ñazihí ra ta quihin ra inga ñaha, yucuan cuu ra iyo cuatyí vatyí ña ndoo zavaha ra sihin ñazihí ra.

¹² Tacuan tucu ñaha zandoo sii yíi ña ta cuhun ña sihin inga rayíi, iyo cuatyí ña vatyí ña ndoo zavaha ña.

Cuhva i zoco ñaha ra Jesús sii sa ndyihí

¹³ Tacuan ta ziquí i quisi ndyaca ñiyívi sii sa ndyihí nu ndyaa ra Jesús vatyí cua tyizo ra ndaha ra sii si ta cahan ra sihin ra Ndyoo. Ta i catyí ra i casi ra Jesús sihin ñiyívi cuan vatyí ma quisi ñu.

¹⁴ Ta i ndyehe ra Jesús, ta i cuxaan ra ta catyí ra: Ma cahan ndo. Naquisi ndyaca maa ñu sii sa ndyihí sii, vatyí tatu cuñi ñiyívi sa cua cundyaca ñaha ra Ndyoo sii ñu, cua sino iñi ñu sii, tañi sino iñi sa ndyihí ya.

¹⁵ Ndísa cuii sa quehin vatyí ñiyívi ña sino iñi tañi sino iñi sa ndyihí ya, ña saha ñu sa cundyaca ñaha ra Ndyoo sii ñu.

¹⁶ Ta i quihin ra sii sa ndyihí, ta i tyizo ra ndaha ra sii minoo minoo si. Ta i catyí ra: Nacuhva ra Ndyoo sa vaha sii ndo.

Cuhva i cahan minoo ra yoco, cuca sihin ra Jesús

¹⁷ Ta sa quita ra Jesús, ta i quisi minoo ra. Sino xaan ra, ta i sicuñi siti ra nuu ra Jesús. Ta i ndaca tuhun ra sii ra: Maestro, vaha xaan ra cuun. ¿Ñaa sa cua zavehi, ta ñihí tahví añime gloria?

¹⁸ Ta i catyí ra Jesús sihin ra: ¿Ñacu catyun vatyí vaha xaan ra cui? Minoo tuhun ñi ra vaha iyo, ra Ndyoo.

¹⁹ Sa siton tandihí ley ra Ndyoo: Ma cuhun minoo ñaha tatu yívi ñazihun cuu. Ma cahñun ñiyívi. Ma cohon cuendu sata ñiyívi. Ma zandavi ñohon sii ñiyívi. Tyoon yahví sii zutun ta sii zihun.

²⁰ Ta ra cuan i nacahan ra: Tacuan iyo mi ndya ta luhli. Catyí ra.

²¹ Ta i cuñi xaan ra Jesús sii ra ta catyí ra: Cumañi minoo ñi ca cuhva suun. Cuahan ta xicon tandihí sa iyo suun, ta cuhvon xuhun cuan sii ñiyívi ndahví. Ta ma cumañi si suun nu cua soon gloria. Ta ziquí quisi cundyicon sii.

²² Ta sa siñi ra cuan cuhva cuan ta i nducuihya xaan iñi ra ta cuahan ra vatyí cuca xaan ra (ta ñá cuñi ra sa zanaa ra xuhun ra).

²³ Ta i ndyehe ra Jesús siconduu nu yucu ñiyívi ndyico sii ra ta catyí ra: Yíi xaan ta cuu quihví ñiyívi cuca nu ndyaca ñaha ra Ndyoo.

²⁴ Ta iyo xaan i cuñi ñu sihin cuhva cahan ra Jesús. Ta i catyí tucu ra Jesús sihin ñu: Zehe luhli, yíi xaan cua quihví minoo ra iyo xaan ndaha tyiño nu ndyaca ñaha ra Ndyoo vatyí sica iñi ra vatyí cua tyindyee ndaha tyiño ra sii ra ta cua cuu quihví ra.

²⁵ Yíi ca quihví minoo ra cuca nu ndyaca ñaha ra Ndyoo ta ziquí ca minoo camello yaha tí xuu minoo yícuí ticuí.

²⁶ Ta sa siñi ñu cuan cuhva cuan ta iyo xaan i cuñi ñu. Ta i natuhun tahan ñu. Ta i ndaca tuhun ñu sii ra Jesús: ¿Yoo ñiyívi cua cacu ta ma cuhun ñu andyaya?

²⁷ Ta i ndyehe ra Jesús sii ñu ta catyí ra: Ma cuu zavaha ñiyívi cuhva cuan, zoco Ndyoo cuu zavaha ra vatyí Ndyoo ñahñi sa yíi nuu ra.

²⁸ Ta ziquí i catyí ra Pedro: Tata, nduhví sa zandoo ndi tandihí ndaha tyiño ndi, ta ndyico ndi suun.

²⁹ Ta i catyi ra Jesús sihin ra: Ndisa cuii sa quehin sihin ndo vatyi ra zandoo vehe ra, a yañi ra, a cuhva ra, a zutu ra, a zihhi ra, a ñazihhi ra, a ñuhu ra sa cuenda mi ta sa cuenda Tuhun Ndyoo

³⁰ cua ñihi ra cuaha xaan ca ihya ñuu ñiyivi tañi minoo ziendu ca vehe ra, ta yañi ra, ta cuhva ra, ta zihhi ra, ta zehe ra, ta ñuhu ra vazú cua tahan ra tundoho. Zoco inga ñuu ñiyivi cua cundito ra tandihhi cuii tyiemvu.

³¹ Ta cuaha xaan ñiyivi ñiñi vityi, yivi ñiyivi ñiñi cua cuu ñu. Ta ñiyivi ña ñiñi, cua nduu ñu ñiyivi ñiñi xaan.

Nacatyí ra Jesús inga saha vatyi cua cahñi ñiyivi sii ra

³² Tacuan ta ziqui cuahan ra ityi ñuu Jerusalén. Ityi nuu iñi ra Jesús, ta ityi sata vasi ra i casi ra, ta iyo xaan cuñi ra. Ta ñiyivi ndihhi sihin ra, yuhu xaan ñu. Tacuan ta i cana ra Jesús sii sa usi uu tahan ra ndya zava, ta i nacatyí ra sihin ra tandihhi cuhva sa cua cuu sii ra.

³³ Ta i catyi ra Jesús sihin ra: Ndyehé ndo vatyi sa cuahan yo ityi ñuu Jerusalén nu cua xico tuhun ñiyivi sii ra i quisi ndya gloria. Ta cua tñin ra zutu nahnu ta ra maestro cuenda ley sii ra. Ta cua catyi ra cuan vatyi cua cuu ra. Ta cua cuhva ra sii ra sii ñiyivi sa yivi ñiyivi hebreo cuu.

³⁴ Ta cua vacu ndyaa ñu sii ra. Ta cua cañi xaan ñu sii ra. Ta cua tyicu zñi ñu sii ra. Ta cua cahñi ñu sii ra. Zoco sa cu uñi quivi ta cua nandoto tucu ra sisi sa i sihi ra.

I sica ra Jacobo ta ra Juan minoo tumañi iñi sii ra Jesús

³⁵ Ta ziqui i tuhva ra Jacobo ta ra Juan nu ndyaa ra Jesús. Zehe ra Zebedeo cuu sii nduu tahan ra. Ta i catyi ra: Maestro, cuñi ndi zavohon minoo tumañi iñi sa sica ndi suun.

³⁶ Ta i ndaca tuhun ra Jesús sii ra ta catyi ra: ¿Ñaa sa cuñi ndo zavehi?

³⁷ Ta i catyi ra: Cuhvon vatyi quivi cua cundyaca ñohon ta cua cundyaa maa ndi suhun. Minoo ndi siyo cuohon ta minoo ndi siyo zatyun.

³⁸ Ta i catyi ra Jesús sihin ra: Ña sito ndo ñaa sa sica ndo. ¿Atu cundyeé ndoho ndyehe ndo tundoho tañi tundoho cua ndyehe mi?

³⁹ Ta i catyi ra: Cundyeé iñi ndi. Ta i catyi ra Jesús sihin ra: Ndisa cuii cua ndyehé tundoho, ta cua ndyehe ndo tundoho sa cuenda mi.

⁴⁰ Zoco sa cundyaa ndo siyo cuehi ta siyo zatyí, ña tahan si sa yuhvi cuhva. Maa ra Ndyoo cua catyi yoo ra cua ñihi ndatu cuan.

⁴¹ Ta sa siñi inga sa usi tahan ra i casi ra Jesús, ta i cuxaan ra sihin ra Jacobo ta ra Juan.

⁴² Ta i cana ra Jesús sii ra ta catyi ra: Sa sito maa ndo cuhva ndyaca ñaha ñiyivi ñuu ñiyivi. Iyo ra cu nuu, ta zacoto ra sii tandihhi ñiyivi vatyi ndyaca ñaha ra sii ñu.

⁴³ Zoco ña tacuan cuu si sa cuenda ndoho. Zama si cuhva. Tatu cuñi minoo ra cuu ra ra cahnu, natyindyee ra sii ra tahan ra.

⁴⁴ Ta yoo ra cuñi sa cuu ra minoo ra cahnu ityi nuu ra Ndyoo, nanduu ra muzu sii tandihhi ndo.

⁴⁵ Vatyi cuhva ndya ra i quisi ndya gloria, ta ña vasi ra sa vatyi tyindyee ñiyivi sii ra. Vasi ra sa tyindyee ra sii ñiyivi. Tacuan iyo ra. Ta yucuan cuenda cua cuu ra sa cuenda ñiyivi, ta ziqui cuu quihvi ñu gloria.

I zanduvaha ra Jesús sii minoo ra cuaa, ra nañi Bartimeo

⁴⁶ I saa ra Jesús ñuu Jericó, ta cuhva sa cua quita tucu ra ñuu cuan sihin ra i casi ra ta i sindyico cuaha xaan ñiyivi sii ra. Ta minoo ra cuaa, ra nañi Bartimeo, zehe ra Timeo, ndyaa ra ityi vatyi caya ra.

⁴⁷ Ta sa sito ra vatyi ra Jesús, ra ñuu Nazaret, cua yaha ityi cuan ta i cana saa ra ta catyi ra: ¡Jesús, yoho cuu ñiyivi sii ra rey David, cundahvi iñun sii!

⁴⁸ Cuaha xaan ñiyivi catyi sihin ra nacutaxi ra, zoco ñihhi ca nduu ra cana saa ra, ta catyi ra: ¡Yoho ñiyivi ra David, cundahvi iñun sii!

⁴⁹ Tacuan ta i sicuñi ra Jesús ta i catyi ra: Cana ndo sii ra. Ta i cana ñu sii ra cuaa ta catyi ñu: Zanduzñi iñun, ta nduviton vatyi cana ra Jesús suun.

⁵⁰ Ta ta sica cuii ñi i nduvita ra, ta i zandoo ihno ra zahma ndisi ra. Ta i tuhva ra sii ra Jesús.

⁵¹ Ta i ndaca tuhun ra Jesús sii ra: ¿Ñaa sa cuñun zavehi suhun? Ta i catyi ra cuaa cuan: Maestro, cuñi zanduvohon nui.

⁵² I catyi ra Jesús sihin ra: Sa cuu cuhun. Sa nduvohon vatyi i sino iñun. Ta zuun ñi caa cuhva cuan ndaha nandyeha ñi ra cuaa cuan. Ta cuahan ra sihin ra Jesús.

11

Cuhva i quihvi ra Jesús ñuu Jerusalén

¹ Ta sa saa ra yatyi ñi ñuu Jerusalén nu ndyaa ñuu Betfagé ta ñuu Betania yatyi ñi yucu sa nañi Olivos, ta i tasi ra Jesús sii uu tahan ra i casi ra.

² Ta i catyi ra: Cuahan ndo ñuu ndyaa yatyi ñi ya sa ndoo ñi. Tatu saa ndo cua ndyehe ndo minoo burro, nuhñi ti, quití ta yoñi ca maa cozo. Ndasi ndo sii ti, ta quisi ndo sihin ti.

³ Tatu iyo ñiyivi ndaca tuhun sii ndo ñaa sa ndyicuu ndo ta catyi ndo: “Cuñi ra cu nuu sii yo sii ti, ta tañi ca cua quisi nuhu ti.”

⁴ Ta cuahan ra, ta i nañihi ra burro cuan. Nuhñi ti ityi, yatyi ñi yuvehe. Ta i ndasi ra sii ti.

⁵ Ta i catyi ra yucu yucuan sihin ra: ¿Ñaa sa ndyicuu ndo? ¿Ñacu ndasi ndo burro ña?

⁶ Tacuan ta i nacatyí ra cuhva sa catyi ra Jesús sihin ra. Ta i saha ñiyivi sa cuhun ra sihin burro cuan.

⁷ I sindyaca ra sii ti nu ndyaa ra Jesús, ta i tyizo ra zahma ra sata ti, ta ziqui i sicozo ra Jesús sii ti.

⁸ Ta cuaha xaan ñiyivi i saqui ñu zahma ñu ityi. Ta inga ca ñiyivi i sahdya ñu ndaha numa, ta i saqui ñu ityi.

⁹ Ta ñu cuahan ityi nuu ra, ta ñu vasi ityi sata ra i cana saa ñu ta catyi ñu: ¡Aleluya! ¡Nazacahnu yo sii ra Ndyoo vatyi vaha xaan cuu ra vasi sa cuenda ra Ndyoo!

¹⁰ ¡Vaha xaan cua cundyaca ñaha maa ra cuhva i sindyaca ñaha ra rey David, ra i cuu ñiyivi sii yo! ¡Aleluya! ¡Nazacahnu yo sii ra iyo ityi ziqui! Catyi ñu.

¹¹ Tacuan i quihvi ra Jesús ñuu Jerusalén. Ta i quihvi ra vehe ñuhu. Ta i ndyehe ra tandihi sa iyo yucuan, ta ziqui cuahan ra ñuu Betania sihin sa usi uu tahan ra i casi ra vatyi sa cua iñi xaan.

Ña zii maa i cuñi ra Jesús sihin minoo yutu ñahñi yucu vixi iñi nuu

¹² Ta inga quivi i quita ra ñuu Betania. Ta i sizoco xaan ra Jesús.

¹³ Tacuan ta i ndyehe ra minoo yutu sa nañi higuera sihin ndaha tu. Ta sahan ra i sindyehe ra tatu iñi siti tu, zoco ñá ñihi maa ra ndaha ñi. Maa maa ndaha ñi tu iñi vatyi yivi tyiemvu iyo siti tu cuu si.

¹⁴ Ta i catyi ra Jesús sihin yutu cuan: Ma coo ca situn vatyi ma casi ca ñiyivi sii si ndaha cuii ñi. Ta i siñi ra i casi ra sa cahan ra.

Tava ndyizo ra Jesús sii ñiyivi zavaha ndya vaha ñi yuvehe ñuhu cahnu

¹⁵ I saa tucu ra Jesús ñuu Jerusalén. Ta sa i quihvi ra vehe ñuhu ta i quisaha tava ndyizo ra sii ñiyivi xico ta ñiyivi zata. Ta i zanduva ihno ra mesa nu nazama ñiyivi xuhun sii inga ñiyivi, ta tacuan tucu tyayu nu xico ñiyivi paloma.

¹⁶ Ná saha ca ra sa cuizo ñiyivi ndaha tyiño sisi vehe ñuhu.

¹⁷ Ta i quisaha zacuaha ra Jesús sii ñu ta catyi ra: Catyi Tuhun Ndyoo: “Vehe mi cunañi si vehe nu cahan ñiyivi sihin ra Ndyoo. Ta sa cuenda tandihi cuii ñiyivi ñuu ñiyivi cuu si.” Zoco maa ndo zacuu ndo vehe ra zuhu sii si.

¹⁸ I siñi ra zutu nahnu ta ra maestro cuenda ley sa cahan ra. Ta i quisaha nducu ra cuhva cañi ra sii ra. I yuhu xaan ra sii ra Jesús vatyi iyo xaan i cuñi tandihi ñiyivi sihin tandihi cuhva i zacuaha ra.

¹⁹ Zoco sa tyahan cuan, i quita ra Jesús ñuu cuan ta cuahan ra.

Ndaha na-ityi yutu higuera

²⁰ Ta inga quivi i yaha ra ñaha ñi, ta i ndyehe ra vaty sa na-ityi yutu i cahan ra Jesús sihin ndya cuhva ndya yoho tu.

²¹ Ta i nacohon iñi ra Pedro, ta catyi ra sihin ra Jesús: Ndyehe Maestro, sa i na-ityi yutu i cohon sihin.

²² Ta i catyi ra Jesús: Sino iñi ndo sii ra Ndyoo.

²³ Quehin sa ndisa sihin ndo vaty yoo ra cua catyi sihin yucu ya: “Cuiñi siyon ihya, ta cua ndihvun sisi tyañuhu.” Tatu sino iñi ra tacuan, tacuan cua cuu si sa ndisa cuii.

²⁴ Tyehen catyi vii sihin ndo: Sino iñi ndo sa cua ñihi ndo tandihi sa cua caca ndo sii ra Ndyoo. Ta cua cuhva ra tandihi si sii ndo.

²⁵ Tatu sica tahvi ndo sii ra Ndyoo ta iyo cuaty ndo sihin inga ñiyivi, zanaa ndo iñi ndo cuaty i zacuu ñu sihin ndo. Ta tacuan tucu ra Ndyoo Zutu yo, ra iyo andivi, cua zandasi ra cuaty maa ndo.

²⁶ Zoco tatu ma zanaa ndo iñi ndo cuaty i zavaha ñiyivi sihin ndo, tacuan tucu ra Ndyoo Zutu yo, ra iyo ityi ziqui, vaty ma zandasi ra cuaty maa ndo.

Iyo xaan cuhva sii ra Jesús

²⁷ Inga saha i quisi tucu ra Jesús ñuu Jerusalén. Ta sa quihvi ra vehe ñuhu ta i quisi ra zutu nahnu sihin ra maestro cuenda ley sihin ra mandoñi nu ndyaa ra Jesús.

²⁸ Ta i ndaca tuhun ra sii ra Jesús ta catyi ra: ¿Yoo ra i tasi suun vaty cua tava ndyizon sii ñiyivi sisi vehe ñuhu ya? ¿Yoo sa saha tuhun suun vaty cuu zavohon tandihi cuii cuhva ya?

²⁹ Ta i catyi ra Jesús sihin ra: Cua ndaca tuhun minoo cuhva sii ndo. Tatu cuu nacaty ndo, tacuan ta cua nacaty sihin ndo yoo sa saha cuhva sii mi.

³⁰ Ta i catyi ra: ¿Yoo ra i tasi sii ra Juan sa zacoo ndutya ra? ¿Atu i tasi ra Ndyoo sii ra a ñiyivi? Nacaty ndo.

³¹ I quisaha natuhun tahan xehe ra, ta i catyi ra sihin tahan ra: Tatu catyi yo vaty Ndyoo i tasi sii ra, ta ziqui cua catyi ra Jesús: “¿Ñacu ñá sino iñi ndo?”

³² ¿A catyi yo vaty ñiyivi i tasi sii ra? Catyi ra. Zoco i yuhu ra sii ñiyivi vaty sa sito ra vaty tandihi cuii ñiyivi sino iñi ñu vaty i cahan ra Juan sa cuenda ra Ndyoo.

³³ Ta yucuan cuenda i catyi ra sihin ra Jesús: Ña sito ndi. Ta i catyi ra Jesús: Tacuan tucu ii, ma nacaty yoo ra i saha cuhva ya sii.

12

Tañi ra ña cuñi zatyño vaha, tacuan iyo ra cua cahñi sii ra Jesús

¹ Tacuan ta ziqui i quisaha cahan ra Jesús sihin minoo cuhva ta catyi ra: Sicoo minoo ra i tasi minoo sacu yoho uva. Ta i zavaha ra nu i tava ra ndutya uva ta minoo vehe tyiyahva vaty cua zacuenda ra sacu ra, ta i saha noo ra sacu ra sii inga ityi ra zatyño. Ta cuahan ra inga ñuu.

² Ta i saa quivi i sicoo uva cuan. Ta i tasi sitoho si minoo muzu ra vaty cua caca ra zuhva, cuhva sa tahan si sii patrón ra.

³ Ta i tiin ra sii muzu ra cuan, ta i cañi xaan ra sii ra. Ta i natasi ra sii ra. Ta ñá saha ra nu zuhva uva cuan.

⁴ Ta i tasi tucu sitoho si sii inga muzu ra. Ta i cañi xaan ra sii ra sihin yuu. I tahvi ra xiñi ra. Ta quiñi xaan i zavaha ra sihin ra.

⁵ Ta ziqui i tasi tucu sitoho si sii inga tucu ra. Ta i sahñi ra sii ra. Ta i tasi sitoho si cuaha ca muzu minoo minoo ra. Zuhva ra i cañi ra, ta zuhva ra i sahñi ra.

⁶ Ta iyo minoo tuhun ñi zehe sitoho si, ta cuñi xaan ra sii ra. Ta nu ndihi tuhun i tasi ra sii ra vaty sica iñi ra: “Cua tyaa ra yahvi sii zehi.”

⁷ Ta i catyi ra zatyño cuan sihin tahan ra: “Ihya cuu ra cua nañihi ndaha tyiño quivi cua cuu zutu ra. Nacahñi yo sii ra vaty ndoo maa yo sihin sacu ya.”

⁸ I tiin ra sii ra. Ta i sahñi ra. Ta i tava ra coño ñuhu ra sata sacu.

⁹ Ta i ndaca tuhun ra Jesús ta catyi ra: ¿Yozo caa cua zavaha sitoho ñuhu cuan vityi? Cua cuhun ra, ta cua cahñi ra sii ra zatyño cuan. Ta cua cuhva noo ra ñuhu cuan sii inga ñiyivi.

¹⁰ ¿Atu tañaha ca cahvi ndo Tuhun Ndyoo? nu catyi si:
I zavita ihno ñiyivi zandaa vehe sii yuu sa cuñi si cuenda siqui vehe.
Ta vityi, yuu cuan cuu sa ñiñi ca ta ziqui tandihi sa cuenda vehe cuan vatyí tacuan catyi ra Ndyoo.

¹¹ Ta vaha xaan cuñi yo sihin cuhva ya.

¹² Ta i nducu ra ndyizo tyiño cuhva tiin ra sii ra Jesús vatyí i siñi ra cuhva cahan ra Jesús, cuhva iyo maa ra. Zoco i yuhu ra sii ñiyivi. Ta yucuan cuenda i zandoo ra sii ra ta cuahan ra.

Tahan si tyaa yo yahvi sii ra cu tyiño ta sii ra Ndyoo

¹³ I tasi ñiyivi sii zuhva ra fariseo ta ra ñoho cuenda ra Herodes vatyí cua zandavi ñaha ra sii ra Jesús, ta cua nducu ra cuhva sihin ñaa minoo cuhva cua cahan ra Jesús ta ziqui cua cuu tyaa ra cuatyí sata ra.

¹⁴ I quisi ra cuan ta i catyi ra: Maestro, sito ndi vatyí cohon sa ndisa, ta inuu ndita ñi tyoon yahvi sa cahan inga ñiyivi a cuca ñu a ndahvi ñu. Ndisa cuii zañohon ityi ra Ndyoo. ¿Atu vaha cua tyiyahvi yo xuhun sa sica ra gobierno César, a ña vaha? ¿Atu cua tyiyahvi ndi a ma tyiyahvi ndi?

¹⁵ Ta i sito ra Jesús vatyí ña vaha aña ra cuan, ta i catyi ra sihin ra: ¿Ñacu saqui xaan ndo xayu sehi? Quisi ndyaca ndo minoo xuhun vatyí ndyehi.

¹⁶ Ta i sindyaca ra sii si. Ta sa ndyehi ra Jesús, ta i catyi ra: ¿Yoo sii nuu ndyaa ya? ¿Ta yoo sii zivi ndyaa ya? Ta i catyi ra: Sii ra gobierno César.

¹⁷ Tacuan ta i catyi ra Jesús sihin ra: Cuhva ndo sii ra gobierno César sa cuu sii ra. Ta cuhva ndo sii ra Ndyoo sa cuu sii ra Ndyoo. Ta iyo xaan i cuñi ra sihin cuhva i cahan ra Jesús.

Ndaca tuhun ra tatu cua nandoto tucu ñiyivi

¹⁸ I sahan tucu minoo ityi ra saduceo nu ndyaa ra Jesús. I sica iñi tandihi ra saduceo vatyí ma nandoto tucu ñiyivi, ta yucuan cuenda i ndaca tuhun ra sii ra Jesús ta catyi ra:

¹⁹ Maestro, i tyaa ra Moisés minoo ley vatyí tatu sihi minoo rayii ta ndoo ndahvi ñazihí ra, ta yoñi zehe ra, natindaha yañi ra sihin ñaha cuan. Ta cua coo zehe ra sihin ña sa cuenda yañi ra, ra i sihi cuan.

²⁰ Sicoo usa tahan rayii sihin yañi ra. I tindaha ra nuu, ta i sihi ra, ta yoñi zehe ra i sicoo.

²¹ Ta ziqui i tindaha ra cu uu sihin ñandahvi cuan. Sihi tucu ra cuan. Ta yoñi zehe ra i sicoo. Ta tacuan tucu ra cu uñi.

²² Ta tacuan i tindaha tandihi sa usa tahan ra sihin ñaha cuan. Ta i sihi ra. Ta numinoo ra yoñi zehe ra i sicoo. Ta nu ndihi tuhun, i sihi tucu maa ñaha cuan.

²³ ¿Yoo ra cua cuu yii ña quivi cua nandoto tucu ñiyivi vatyí ñazihí tandihi sa usa tahan ra i cuu sii ña? Tacuan i catyi ra sihin ra Jesús.

²⁴ Ta i catyi ra Jesús sihin ra: Ña sito ndo ñaa sa cahan ndo vatyí ña sito ndo Tuhun ra Ndyoo. Ta ña sito ndo yozo caa iyo cuhva sii ra.

²⁵ Quivi cua nandoto ñiyivi i sihi, ma tindaha ca ñu. Ta ma cuhva ca ñu sii zehe ñu sa tindaha ñu. Tañi ángel sa iyo andivi tacuan cua nduu ñu.

²⁶ Ta tatu cuñi ndo coto ndo tatu cua nandoto tucu ñiyivi, cuñi si sa nacohon iñi ndo sa i tyaa ra Moisés nu i saha ra cuenda yozo caa i cayu minoo taca iñu. Ta i cahan ra Ndyoo sihin ra sisi tu ta catyi ra: “Yuhvi cui Ndyoo sii ra Abraham ta sii ra Isaac, ta sii ra Jacob.”

²⁷ Tacuan i cahan ra Ndyoo vazu sa sihi tandihi ra cuan ta sa naha vatyí sito ra Ndyoo vatyí ndito ra cuan ta cua nandoto tucu ra. Yivi Ndyoo sii ra ndaha sihi cuii cuu Ndyoo Zutu yo. Ndyoo sii ñiyivi cua cundito tandihi tyiemvu cuu maa ra. Ta zama xaan yuhu ndo vatyí sica iñi ndo vatyí ma nandoto tucu ñiyivi.

Minoo ley ra Ndyoo sa ñiñi ca

²⁸ I saa tucu minoo ra maestro cuenda ley, ta i siñi ra sa ndaca tuhun xaan ñiyivi sii ra Jesús, ta i sito ra vatyí vaha xaan i nacahan ra Jesús sihin ñu, ta yucuan cuenda i ndaca tuhun ra sii ra ta catyi ra: ¿Ndyá cuu ley ra Ndyoo sa ñiñi ca?

²⁹ Ta i catyi ra Jesús sihin ra: Ley sa ñiñi ca sii ra Ndyoo catyi si: “Ndoho ñiyivi hebreo, cuiñi ndo. Ndyoo, ra ndyaca ñaha sii ndo, minoo tuhun ñi ra iyo.

³⁰ Ñihi xaan cuñi ndo sii ra Ndyoo Zutu ndo sihin añima ndo. ñin ñi sii ra caca iñi ndo; ñin ñi sihin ra cahan ndo; ñin ñi tyiño ra zatyíño ndo. Ta tacuan cua coto ra vatyí cuñi xaan ndo sii ra.”

³¹ Ta catyi ley ra Ndyoo sa cu uu: “Cuñi xaan ndo sii tandihí inga ñiyivi tañi cuñi ndo sii maa ndo.” Ñahñi ca inga ca ley ñiñi ca ta ziquí nduu tahan ley ya.

³² Ta i catyi ra cu maestro cuenda ley cuan sihin ra Jesús: Vaha xaan cohon, Maestro. Ndisa cuun sa cohon vatyí minoo tuhun ñi ra Ndyoo iyo. Ta yoñi inga ca Ndyoo iyo.

³³ Ta tatu cuñi ñiyivi sii ra sihin añima ñu, ta zatyíño ñu tyiño ra ta tandihí cuhva cuan ta tatu cuñi ñu sii inga ñiyivi tañi cuñi ñu sii maa ñu, vaha xaan ca cuu si tacuan. Vaha ca tacuan ta ziquí cuhva zavaha ndi, cuhva sa sahmi ndi mvee ticatyí a ñaa sa saha ndi sa zacahnu ndi sii ra Ndyoo.

³⁴ I sito ra Jesús vatyí vaha xaan i nacahan ra maestro cuenda ley, ta i catyi ra Jesús sihin ra: Zuhva ñi ca cumañi suun, ta cua cuu quihvun nu ndyaca ñaha ra Ndyoo. Catyi ra. Ta i yuhu xaan ñiyivi sa ndaca tuhun ca ñu sii ra Jesús.

¿Yoo sii zehe cuu sii ra Cristo?

³⁵ I zacuaha ra Jesús sisi vehe ñuhu ta catyi ra: Catyi ra maestro cuenda ley vatyí ra Cristo cuu ñiyivi sii ra rey David, ta ndisa cuu si cuhva cahan ra cuan.

³⁶ Zoco zuun ñi maa ra rey David i cahan ta sa naha i zacuu Tatyí Ii. Ta i tyaa ra cuhva cahan ra Ndyoo sihin ra Cristo. Tyehen i tyaa ra David: Cahan ra Ndyoo sihin ra ndyaca ñaha sii mi, ta catyi ra: “Cundyoon siyo cuehi ndya cuhva ndya cua saa quivi cua cuhve cuhva cua zahacanoon sii ñiyivi xaan iñi suun.”

³⁷ ¿Ta yozo caa cuu cuu ra Cristo ñiyivi ra David tatu zuun ñi maa ra David catyi vatyí ndyaca ñaha ra Cristo sii ra? Tacuan i catyi ra Jesús, ta zii xaan i cuñi tandihí ñiyivi sa siñi ñu tuhun i cahan ra.

Tyaa ra Jesús cuatyí sata ra maestro cuenda ley

³⁸ I zacuaha ra Jesús sii ñiyivi ta catyi ra: Zacuenda vaha ndo sii ndo. Ta ma zacuu ndo cuhva zacuu ra maestro cuenda ley. Tahan xaan iñi ra quihí ra zahma nañi vatyí cua nacoto ñiyivi sii ra vatyí ra ñiñi cuu ra. Ta cuhun ra nuyahvi vatyí cuñi xaan ra sa tyaa ñiyivi yahvi sii ra.

³⁹ Ta cuñi xaan ra sa cundyaa ra nu ndyaa ñiyivi ñiñi sisi vehe ñuhu. Ta cuñi xaan ra sa cundyaa ra tyayu vaha nu sasi ñiyivi zacahnu vico.

⁴⁰ Cuaha ca cua cutuñi ra maestro cuenda ley ta ziquí inga ñiyivi vatyí zuhu ra ndaha tyiño ñu ndahvi. Ta zandavi ñaha ra sii ñiyivi vatyí naha xaan sica tahvi ra sii Ndyoo vatyí cuñi ra sa cua ndyehe ñiyivi, ta cua caca iñi ñu vatyí sito xaan ra sii Ndyoo.

Cuhva i saha minoo ñandahvi xuhun

⁴¹ Minoo saha ndyaa ra Jesús sisi vehe ñuhu hebreo yatyí ñi nu ndyaa satu nu quihvi xuhun. Ta i ndyehe ra vatyí cuaha xaan ñiyivi tyihi xuhun. Ta ra cuca, cuaha xaan i tyihi ra.

⁴² Tacuan ta i saa minoo ñaha ndahvi. Ta i tyihi ña uu tahan xuhun ndyihí sa cuu ohon zendavu sisi satu cuan vatyí cuñi xaan ña sii ra Ndyoo, ra iyo andivi.

⁴³ Ta ziquí i cana ra Jesús sii ra i casi ra ta catyi ra: Ndisa cuii sa quehin. I tyihi ñandahvi cuan cuaha ca xuhun ta ziquí tandihí ca ra.

⁴⁴ Saha maa ra sa ndoo ñi ca sii ra, zoco ñandahvi cuan, ndihí i saha ñi ca ña xuhun cuita casi ña.

13

Cuhva i catyi ra Jesús cuhva cua tani vehe ñuhu cahnu

¹ Ta i quita ra Jesús vehe ñuhu cuan ta i catyi minoo ra i casi ra sihin ra: ¡Ndyehé, Maestro, tyaqui xaan i sino vehe ñuhu ya! ¡Vaha xaan yuu i sino si!

² Ta i catyi ra Jesús sihin ra: Ndyehun vehe nahnu ya vatyi cua tani si, ta tandíhi si cua quití cuatyí.

Zeña sa cua naa ñuu ñiyívi

³ Tacuan ta ziquí cuahan ra yucu sa nañi Olivos, yucu sa ndyehé ñiyívi sa ndyaa ñu yuvehe ñuhu. Ta sa ndyaa ra Jesús yucuan, i ndaca tuhun xehe ra Pedro ta ra Jacobo ta ra Juan ta ra Andrés sii ra ta catyi ra:

⁴ Cuhvon cuenda sii ndi. ¿Ñaa quívi cua cuu sa catyun? ¿Ñaa zeña cua ndyehé ndi, ta ziquí cua coto ndi vatyi cua tahan si?

⁵ Ta i catyi ra Jesús: Zacuenda ndo sii ndo coto zandavi ñaha ñiyívi sii ndo.

⁶ Vatyi cuaha xaan ra cua quisi ta cua catyi ra: “Yuhvi cui Cristo.” Ta tacuan cua zandavi ñaha ra cuaha xaan ñiyívi.

⁷ Ta cua cuiñi ndo tuhun vatyi cua coo cuatyí ta cahñi tahan xaan ñiyívi, zoco ma yuhu ndo. Xihna ca cua cuu tandíhi cuhva cuan, cumañi ca sa saa quívi naa ñiyívi.

⁸ Cua cahñi tahan minoo ñuu sihin inga ñuu, ta cua coo cuatyí ñuu nahnu sihin inga ñuu nahnu. Cua coo cuaha xaan sa taan, ta cua coo tama, ta cua yuhu xaan ñiyívi. Ta tacuan ñi cua quisaha ndyehé ñiyívi tundoho.

⁹ Zacuenda ndo sii ndo vatyi cua tiñi ñiyívi sii ndo, ta cua cuhun ndo nu yucu ra cu tyiño nahnu. Ta cua cañi ñiyívi sii ndo sisi vehe ñuhu. Ta sa cuenda mi cua tasi ra sii ndo nu ndyaa ra gobernador ta ra rey. Ta cua ñihi ndo cuhva cahan ndo tuhun mi nuu ra.

¹⁰ Ta ma naa ñuu ñiyívi ndya cua cuiñi ñiyívi nacahnu ñuu ñiyívi Tuhun Ndyoo.

¹¹ Tatu cundyaca ñiyívi sii ndo nu ndyaa ra cu tyiño nahnu, ma caca iñi ndo sa cua cahan ndo. Ta ma caca xaan iñi ndo. Cahan ndo ñaa sa cahan ra Ndyoo sihin ndo cuhva cuan vatyi yívi maa ndo cua cahan. Tatyí li ra Ndyoo cua cahan.

¹² Cua xico tuhun ñiyívi sii tahan ñu, ta ziquí cua cahñi ñiyívi sii ñu cuan. Ta cua xico tuhun zutu ñiyívi sii zehe ra. Cua cahñi tahan ñiyívi sihin zutu ñu ta sihin zihí ñu. Ta cua cuhva ñu sii ñu sii inga ñiyívi vatyi cahñi ñu sii ñu.

¹³ Cua cuxaan tandíhi ñiyívi sihin maa ndo sa cuenda mi, ta yoo ra ma cuiñi siyo sii ndya nu cua ndíhi ñuu ñiyívi, cua cacu ra.

¹⁴ Tatu ndyehé ndo minoo sa zatívi xaan ta quiñi xaan zacuu si, ta nandyaa si cuan nu ii, cuhva i catyi ra profeta Daniel, cutuñi iñi ndo ndoho ra cahvi ihya, tatu ndyehé ndo sii si cuan, nacono ñiyívi ñoho Judea, ta naquihvi xehe ñu ndya yucu.

¹⁵ Tatu iyo ra yozo xiñi vehe ra quívi cuan, ma cuatu ra numaa iyo ndaha tyiño cuiñi ra tava ra sisi vehe ra.

¹⁶ Ta ra ñoho itu ra, ma cunuhu ra ndya vehe ra sa cua naquihin ra zahma ra.

¹⁷ Ta ndahvi ñu zihí sa ñoho zehe quívi cuan a tatu iyo zehe ñu sa tyaxi quívi cuan vatyi cahnu xaan tundoho cua ndyehé ñu.

¹⁸ Ta caca ndo sii ra Ndyoo vatyi ma tahan si cono ndo vico zavi a minoo quívi quitatu ñiyívi

¹⁹ vatyi cua coo cuaha xaan tundoho quívi cuan, cuhva ta ndyehé ca ñiyívi ndya i zavaha ra Ndyoo ñuu ñiyívi. Ta ma coo inga ca tundoho sa tacuan ndaha cuiñi ñi.

²⁰ Tatu ma zanduzuhva ra Ndyoo quívi tundoho cuan, yoñi ñiyívi cua cacu. Zoco cua zanduzuhva ca ra sii si sa cuenda ñiyívi i casi ra.

²¹ Tatu catyi minoo ra sihin ndo: “Ihya ndyaa ra Cristo a yucuan ndyaa ra”, catyi ra; ma sino iñi ndo.

²² Vatyi cua nduvita cuaha xaan ra zandavi ñaha, ta cua catyi ra vatyi Cristo cuu ra, ta cua catyi ra vatyi cahan ra tuhun saha ra Ndyoo sii ra. Ta cua zavaha ra zeña nahnu ta sa ndyityi ndya cuhva ndya sii ñiyívi i casi ra Ndyoo cua zandavi ñaha ra tatu sa vatyi cuu cuhva cuan, zoco ma cuu.

²³ Ndyehé ndo, sa nacatyí tandíhi síhin ndo cuee ca sa tahan sí.

Cuhva cua quisi tucu ra i quisi ndya gloria

²⁴ Ta í catyí tucu ra Jesús: Tatu sa yaha ndyehé ñiyívi tundoho cuan ta ziquí ña naha ca ta cua nduñaa ñicandyí, ta ma ndyehé ca yoo.

²⁵ Cua nacoyo tiñoo andívi ndya nu ñuhu, ta ndya huhva ndya cua canda andívi.

²⁶ Tacuan ta ziquí cua ndyehé ñiyívi síi ra í quisi ndya gloria ityí andívi. Cua ndyehé ñu vatyí vasi ra nu vico ta síhin cuaha xaan huhva. Ta tyaquí xaan caa ra.

²⁷ Ta cua tasi ra síi ángel ra ndya tandíhi sa cumi tahan síqui ñuu ñiyívi, ta cua zatahan ra síi tandíhi ñiyívi í casi ra Ndyoo ndya nacahnu ñuu ñiyívi.

²⁸ Vityí coto ndo minoo huhva iyo yutu higuera ta tandíhi inga yutu. Tatu cua ndyehé ndo sa cua nacoyo ndaha tu ta cua nduyutya tu, tacuan ta sa sito ndo vatyí sa cua nducahñi.

²⁹ Ta tacuan tucu tatu sa ndyehé ndo vatyí sa cuu tandíhi tuhun sa quehin síhin ndo íhya, tacuan ta cua coto ndo vatyí sa cua cuyatyí sa cunaa ñuu ñiyívi.

³⁰ Sa ndisa catyí síhin ndo vatyí cua cuu huhva ya cuee ca sa cuu ñiyívi sa iyo vityí.

³¹ Yutyí andívi ta ñuhu ñuu ñiyívi cunaa sí, zoco tuhun quehin, ma naa sí.

³² Zoco yoñi ñiyívi sito ñaa quívi a ñaa huhva cua cuu sí. Nu ángel andívi ta ña sito ra ta nu Zehe ra Ndyoo. Maa tuhun ñi ra Ndyoo Zuti sito.

³³ Cuiñi vaha ndo sa quehin; cuyucu listo ndo, ta cahan ndo síhin ra Ndyoo vatyí ña sito ndo ñaa quívi cua cuu sí.

³⁴ Tañi minoo huhva síi minoo ra cua huhun nu sica, cuee ca sa quita ra vehe ra saha ra cuenda síi muzu ra. Saha cuenda ra ñi ñi tyiño zacuu ra. Ta saha ra tyiño síi ra zacuenda yuvehe ra vatyí zacuenda vaha ra. Ta tañi ra huhun nu sica cui.

³⁵ Yucuan cuenda cundyaa listo ndo vatyí ña sito ndo ñaa huhva cua quisi, tañi ña sito muzu cuan ñaa huhva cua quisi patrón ra, a nu cuu tyahan a maa ñuu a huhva sacu ndívi a ñaha ñi.

³⁶ Cuatu vaha ndo, coto yatyí xaan quisi ta ña ndatu listo ndo.

³⁷ Quehin huhva ya síhin maa ndo ta síhin tandíhi cui ñiyívi: Cuyucu listo ndo.

14

Sihñi tahan ra tyiño yozo caa cua tñin ra síi ra Jesús

¹ Cumañi uu ca quívi ta cua tahan sí vico síhi mvee ticatyí, quívi sasi ñiyívi pan ña ndaa. Ta ra zutu nahnu síhin ra maestro cuenda ley nducu ra huhva yozo caa cua tñin xehe ra síi ra Jesús. Ta cua cahñi ra síi ra.

² Zoco í catyí ra: Ña vaha vityí vatyí iyo vico. Ta coto cahñi tahan ñiyívi síhin yo.

I tyozo minoo ñaha azetye vixi xiñi ra Jesús

³ Ñoho ra Jesús ñuu Betania vehe ra Simón, ra í huhu cuehe tyahyu. Ta huhva sa ndyaa ra mesa ta í tuhva minoo ñaha síi ra. Ñaa ña minoo yutyí ñoho azetye vixi. Nañi síi nardo, ta yahvi xaan ndyaa sí. Í tahvi ña yutyí, ta í tyozo ña azetye vixi cuan xiñi ra Jesús.

⁴ Ta ñiyívi yucu yucuan í cuxaan ñu síhin ña, ta í nducu tuhun tahan ñu. Ta catyí ñu: ¿Ñacu zatívi ña azetye vixi cuan?

⁵ Vaha ca tatu sa í xico ña síi sí, ta ñihi ña tañi uu mil peso ta tyindyee ña síi ñiyívi ndahvi. Ta xaan xaan í cahan ñu síhin ña.

⁶ Ta í catyí ra Jesús: Zandíhi ndo tuhun síhin ña. ¿Ñacu cuyuhu xaan ndo síhin ña? Vaha xaan í zavaha ña síhin.

⁷ Tandíhi tyiemvu cua coo ñiyívi ndahvi síhin ndo. Ta cua cuu zavaha ndo sa vaha síhin ñu ñaa quívi cuñi ndo, zoco yuhvi, ma cundyeyi síhin ndo tandíhi tyiemvu.

⁸ Í zavaha ñaha ya minoo sa vaha. Tañaha ca cua quihvi sí ñuhu. Zoco í tyozo ña azetye vixi coño ñuhi cuee ca sa cui ta huhin nuñaña.

⁹ Ndisa cuií sa quehin síhin ndo vatyí vazú ndyacamaa nacatyí ñiyívi Tuhun Ndyoo síhin ñiyívi, zoco cua nacatyí ñu huhva í zavaha ña ya síhin, ta cua nacohon íni ñiyívi síi ña. Tacuan í catyí ra Jesús.

Cuhva i xico ra Judas sii ra Jesús

¹⁰ Yaha cuan ta ziqui minoo sa usi uu tahan ra i casi ra Jesús, ra sa nañi Judas Iscariote, cuahan ra cua cahan ra sihin ra zutu nahnu vatyí cuñi ra xico ra sii ra Jesús.

¹¹ Zii xaan i cuñi ra zutu nahnu sihin sa i catyi ra, ta i catyi ra vatyí cua tyiyahvi ra sii ra. Ta ziqui i quisaha nducu ra Judas cuhva cua cuhva cuenda ra sii ra Jesús sii ra.

I cuxiñi ra Jesús sihin ra i casi ra

¹² Quivi i quisaha vico sa sasi ñiyivi pan ña ndaa ta i sahñi ñu mvee ticatyí vatyí tyaa ñu yahvi sii ra Ndyoo. Ta quivi cuan i ndaca tuhun ra i casi ra Jesús sii ra ta catyi ra: ¿Ndyamaa cuñun vatyí cua zanduvaha ndi nu cua cuxiñun sa cuenda vico ya?

¹³ Tacuan ta i tasi ra Jesús sii uu tahan ra ta catyi ra sihin ra: Cuahan ndo ndya ñuu cahnu. Ta yucuan cua nañihi ndo sii minoo ra; ndyizo ra minoo quiyi ndutya. Cundyico ndo sii maa ra.

¹⁴ Ta nu quihvi ra cahan ndo sihin sitoho vehe cuan ta catyi ndo: “Catyí ra Maestro: ¿Ndyamaa iyo cuarto nu cua casi ra xita sa cuenda vico ya sihin ra i casi ra?”

¹⁵ Ta cua zañaha ra minoo cuarto cahnu ndya ziqui. Sa yaha nduvii si. Yucuan zanduvaha ndo sa cuxiñi yo. Tacuan i catyi ra Jesús sihin ra.

¹⁶ Ta cuahan ra cuan ta i saa ra ndya ñuu ta i nañihi ra cuarto cuan tañi cuhva i catyi ra Jesús. Ta i zanduvaha ra sa cuxiñi ra vico zuhun cuan.

¹⁷ Ta sa sa cuaa cuan i saa ra Jesús yucuan sihin sa usi uu tahan ra i casi ra.

¹⁸ Ta ñii ñi sa sasi ra xita i catyi ra Jesús sihin ra: Sa ndisa catyi sihin ndo vatyí minoo ndoho sa sasi sihin ihya, cua xico ra sii. Catyi ra.

¹⁹ Ta i nducuihya xaan iñi ra ndihi sihin ra, ta i quisaha ndaca tuhun minoo minoo ra sii ra Jesús: ¿Atu yuhvi cui?

²⁰ Ta i nacahan ra Jesús ta catyi ra: Minoo sa usi uu tahan ndo sa sasi sihin ñin ñi coho ya cuu ra.

²¹ Cuahan ra i quisi ndya gloria cuhva catyi Tuhun Ndyoo, zoco ñndahvi ñi cuu ra xico sii! Vaha ca tatu sa ñá cacu ra vatyí cua ndyehe xaan ra tundoho.

²² Ta cuhva sa cuxiñi ra i quihin ra Jesús pan, ta i saha ra tyahvi ndyoo sii ra Ndyoo, ta ziqui i sahnu ra sii si ta saha ra sii si sii ra i casi ra, ta i catyi ra: Quihin ndo sii si ta casi ndo. Ihya cuu tañi coño ñuhi.

²³ Tacuan ta i quihin ra minoo vaso ñoho vino, ta i saha ra tyahvi ndyoo sii ra Ndyoo, ta i saha ra sii si sii ra, ta i sihi tandihi ra zuhva zuhva si.

²⁴ Ta i catyi ra Jesús sihin ra: Ihya cuu tañi ñiñi. Cua cati si sa cuenda cuaha xaan ñiyivi. Vityi zandaa ra Ndyoo minoo tyiño saa. Cua zandasi ra cuatyí ñiyivi sihin ñiñi.

²⁵ Sa ndisa catyi sihin ndo vatyí ma coho que vino ndya cua cohi sii si minoo cuhva saa nu ndyaca ñaha ra Ndyoo.

Catyí ra Jesús vatyí cua catyi ra Pedro vatyí ña sito ra sii ra

²⁶ I sata tandihi ra minoo yaa Ndyoo, ta ziqui cuahan ra ndya yucu Olivos.

²⁷ Tacuan ta i catyi ra Jesús sihin ra: Sa cuaa vityí tandihi cuii ndo cua zandoo ndo sii. Ta ma cuñi ca ndo cundyico ndo sii, vatyí catyi Tuhun Ndyoo: “Cua cuu ra cu pastor, ta cua quiñi cuatyí tandihi cuii mvee ticatyí zono ra.”

²⁸ Zoco sa yaha nandote ta cua cuhin yatyí ca ta ziqui maa ndo ndya Galilea.

²⁹ Ta ziqui i catyi ra Pedro sihin ra: Vazu zandoo tandihi ca ra ya suun, zoco yuhvi cua cundyique suun.

³⁰ Ta i catyi ra Jesús sihin ra: Sa ndisa catyi suhun vatyí zuun ñi sa cuaa vityí, cuee ca sa vacu saa ndivi tyahnu uu yuhu ti, cua catyun uñi tahan saha vatyí ña siton sii.

³¹ Ta ñihi xaan i cahan ra Pedro ta catyi ra: Vazu cui suhun, zoco ma catyi sa ña site suun. Ta tacuan tucu i cahan tandihi ca ra.

Cahan ra Jesús sihin ra Ndyoo minoo nu yucu yutu tyaqui nu nañi si Getsemaní

³² Tacuan ta ziqui i saa ra Jesús sihin ra i casi ra ndya minoo nu yucu yutu tyaqui nu nañi si Getsemaní, ta i catyi ra sihin ra: Cundyaa ndo ihya vatyi cuehin cua quehin sihin ra Ndyoo ityi nuu ca.

³³ Ta i quihin ra Jesús sii ra Pedro ta ra Jacobo ta ra Juan cuahan sihin ra, ta i quisaha nducuihya xaan iñi ra, ta ndahvi xaan cuñi ra.

³⁴ Tacuan ta i catyi ra sihin ra: Cuihya xaan cuñi añime cuhva ndya sa cuñi cui. Ndo ndo ihya ñi ta cundyaa tyacu ndo.

³⁵ Ta ziqui cuahan ra Jesús zuhva ca ityi nuu, ta i sicava ndyayu ra nu ñuhu, ta i sica tahvi ra sii ra Ndyoo sa ma ndyehe ra tundoho sa cua cuu sii ra tatu sa vatyi cuu cuhva cuan.

³⁶ Ta cuhva sa sica tahvi ra sii ra Ndyoo i catyi ra: Ndyoo Zuti, cuu tandihi suun. Tyindyeun sii sa ma ndyehi tundoho cuan, zoco ma cuhvon tañi cuñi mi. Nacuu si tañi cuñi moo.

³⁷ Tacuan i catyi ra Jesús, ta ziqui i sahan ra nu yucu ra ndihi sihin ra, ta i ndyehe ra sii ra quixi ra, ta i catyi ra sihin ra Pedro: Simón, ¿a quixun? ¿Ñacu ñá cuu cundyaa tyacu ndo sihin numinoo ora?

³⁸ Cutyacu ndo ta cahan ndo sihin ra Ndyoo coto nducu coto ihñi cuihna sii ndo. Cuñi ndo zavaha ndo sa vaha, zoco ña cuu sii ndo sa maa tuhun ñi ndo.

³⁹ Tacuan ta i sahan tucu ra Jesús inga saha sa cua cahan ra sihin ra Ndyoo, ta zuun ñi tuhun cuan i cahan ra inga saha.

⁴⁰ Ta ziqui i nasaa ra, ta i ndyehe ra sii ra ndihi sihin ra quixi tucu ra vatyi situu xaan ra, ta ñá ñihi ra cuhva ñaa sa cua cahan ra sihin ra Jesús.

⁴¹ Ta i sahan ra Jesús ta i naquita tucu ra nu yucu ra sa cu uñi saha, ta i catyi ra: ¿Atu quixi ndo? ¿Atu quitatu ndo? Vaha ñi vityi. Sa saa cuhva cua nacuhva ñiyivi sii ra i quisi ndya gloria sii ra iyo cuatyi.

⁴² Ta nduvita ndo. Coho yo. Sa vasi ra xico sii.

Tiin ra sii ra Jesús

⁴³ Nu cahan ca ra Jesús, ta i saa ra Judas; minoo sa usi uu tahan ra i casi ra Jesús cuu ra. Ta i quisi cuaha xaan ñiyivi sihin ra. Ñaa ra mityi ta yutu. I tasi ra zutu nahnu ta ra maestro cuenda ley ta ra mandoñi sii ra.

⁴⁴ Ra sa xico sii ra Jesús, i saha ra minoo cuhva sii ra cuan, ta catyi ra: Ra cua cohi xiti cuan, yucuan cuu ra tiin ndo. Tiin vaha ndo sii ra, ta quihin ndo sii ra.

⁴⁵ Ta i saa ra Judas, ta i tuhva ra sii ra Jesús ta catyi ra: Nacumi suun, Maestro. Ta i sihi ra xiti ra.

⁴⁶ Ta ziqui i tiin ñiyivi cuan sii ra Jesús.

⁴⁷ Ta minoo ra ndihi sihin ra Jesús, i tava ra mityi ra, ta i cañi ra sii ra cu muzu ra cu zutu ya cahnu, ta i sahndya ra zoho ra.

⁴⁸ Ta ziqui i catyi ra Jesús sihin ñiyivi cuan: ¿Atu vasi tiin ndo sii minoo ra zuhu vatyi ñaa ndo mityi ta ndaha tyiño xaan?

⁴⁹ Tahan tahan quivi i sehin vehe ñuhu cahnu ta i zacuehi sii ñiyivi, zoco ñá tiin ndo sii yucuan. Zoco vityi zavaha ndo cuhva ña vaha ya vatyi tacuan ta cua naquita si cuhva catyi Tuhun Ndyoo sa cuende.

⁵⁰ Ta sa yaha cahan ra Jesús cuhva cuan ta ziqui i zandoo tandihi ra i casi ra sii ra ta i sino ra.

I sino minoo ra yoco

⁵¹ I sindyico minoo ra yoco sii ra Jesús, ta ndisi ra minoo ñi zahma cahnu. Ta i tiin zandaru sii ra.

⁵² Zoco i zandoo ra zahma ra ta cuahan vavihi ra ñii ndii ñi ra.

I sindyaca ra sii ra Jesús nu titahan ra cu tyiño hebreo

⁵³ I sindyaca ra sii ra Jesús nu titahan ra cu zutu ya cahnu sihin ra zutu nahnu ta ra mandoñi ta ra maestro cuenda ley.

⁵⁴ Ta i sindyico ra Pedro sica sica ñi ndya cuhva ndya saa ra nuquehe vehe ra cu zutu ya cahnu, ta yucuan i quihvi ra ta i sicundyaa ra sihin ra policia yunuhu vatyí visi ra.

⁵⁵ Ra zutu nahnu sihin tandihi inga ra cu tyiño hebreo, i oanducu xaan ra ñiyivi cua cuhva sa ndaa sa cuenda ra Jesús vatyí cuñi ra cañi ra sii ra. Zoco ñá ñihi ra cuhva sa vatyí

⁵⁶ vazu cuaha ñiyivi saha sa ndaa ta i cahan ra cuendu ziqui ra Jesús, zoco ñá nacasi tahan sa cahan ra.

⁵⁷ Ndyá nu ndihi tuhun i ñihi ra sii uu tahan ra, ta i cahan ra cuendu sata ra Jesús ta catyí ra:

⁵⁸ I siñi ndi catyí ra: “Cua cani vehe ñuhu cahnu ra Ndyoo sa i zavaha ñiyivi, ta sisi sa uñi quivi ñi ta cua zandei inga si sa yivi ñiyivi zavaha.”

⁵⁹ Tacuan i catyí ra cuan, zoco zuun ñi ñá nacasi tahan cuhva i cahan ra sa cuenda ra Jesús.

⁶⁰ Ta ziqui i nduvita ra cu zutu ya cahnu nu yucu ra cuan. Ta i ndaca tuhun ra sii ra Jesús ta catyí ra: ¿Ñacu ña cohon ndaha ñi? ¿Ñaa sa cuu sa cahan ñiyivi ya zicun? Catyí ra.

⁶¹ Zoco ñá nacahan maa ra Jesús. Ta i ndaca tuhun tucu ra cu zutu ya cahnu sii ra inga saha ta catyí ra: ¿Atu ra Cristo cuun? ¿Atu zehe ra Ndyoo ra ii xaan cuun?

⁶² Ta i catyí ra Jesús sihin ra: Zuun ra cui, ta cua ndyehe ndo sii ra i quisi ndya gloria cuhva cundyaa ra siyo cuaha ra Ndyoo ta cuhva cua quisi ra ndya andivi sisi vico.

⁶³ Tacuan i catyí ra Jesús, ta ziqui ra cu zutu ya cahnu, i cuxaan ra, ta i ndata ra zuun ñi zahma maa ra, ta i catyí ra: ¿Ñaa ca sa ndaa cuñi si vityí?

⁶⁴ Sa siñi ndo sa cahan ra ndya vaha ñi sii ra Ndyoo. ¿Ñaa catyí ndo vityí? Ta i nacahan tandihi ra ta i catyí ra vatyí nacuu ra vatyí iyo cuatyí ra.

⁶⁵ Ta ziqui i quisaha tyicu zii ra nuu ra, ta i siñi ra nuu ra, ta i cañi ra sii ra ta catyí ra sihin ra: ¡Nacoton yoo ra cañi suun! Ta i cati ra policia nuu ra.

I catyí ra Pedro vatyí ña sito ra sii ra Jesús

⁶⁶ Ta ndyaa ra Pedro nuquehe, ta i tuhva minoo muzu ra cu zutu ya cahnu cuan sii ra.

⁶⁷ Ta sa ndyehe ña vatyí ndyaa ra Pedro cuan yunuhu cuan nduvixi ra ta i ndyehe vaha ña sii ra ta catyí ña: Cutahan aan sica noon sihin ra Jesús, ra ñuu Nazaret.

⁶⁸ Zoco i catyí ra Pedro: Ña site sii ra cuan, ta ña site ñaa tuhun cohon. Catyí ra. Ta i siñi siyo ra zuhva, ta ziqui i sacú saa minoo ndivi tyahnu.

⁶⁹ Ta i nandyehé ña cu muzu cuan sii ra inga saha ta catyí ña sihin ra yucu yucuan: Ra tahan ra Jesús cuu minoo ra ya.

⁷⁰ Ta i catyí tucu ra Pedro vatyí ña ndisa. Ta cuee ca i catyí tucu ra yucu cuan inga saha sihin ra Pedro: Ndisa cuii vatyí minoo ra tahan ra cuu tucu oo vatyí cohon tañi cahan ñiyivi nu cu si Galilea. Catyí ra.

⁷¹ Tacuan ta i cahan ra Pedro ndya vaha ñi ta i tyiñaha ra ndyoo ta catyí ra: Ña site sii ra cahan ndoho tuhun.

⁷² Ta zuun ñi caa cuhva cuan, i sacú saa ndivi tyahnu sa cu uu yuhu ti. Ta ziqui i nacohon iñi ra Pedro cuhva i catyí ra Jesús sihin ra: “Cuee ca sa vacu saa ndivi tyahnu sa cu uu yuhu ti, yoho cua catyun uñi saha vatyí ña siton sii.” Ta sa nacohon iñi ra Pedro cuhva cuan, i sacú xaan ra vatyí i nducuihya xaan iñi ra.

15

Nacuhva cuenda ra sii ra Jesús sii ra Pilato

¹ Ta sa cundisi i zandoo ra tyiño, tandihi ra zutu nahnu ta ra mandoñi ta ra maestro cuenda ley ta tandihi inga ra cu tyiño hebreo. Ta i siñi ra sii ra Jesús, ta i sindyaca ra sii ra nu ndyaa ra Pilato (ra cu gobernador).

² Ta i ndaca tuhun ra Pilato sii ra Jesús ta catyí ra: ¿Atu yoho cuu rey cuenda ñiyivi hebreo? Ta i catyí ra Jesús: Tacuan cu si tañi catyí moo.

³ Tacuan ta i tyaa ra zutu nahnu cuatyí sata ra Jesús cuaha xaan cuhva.

⁴ Ta ziqui i ndaca tuhun ra Pilato sii ra inga saha ta catyi ra: ¿Ñacu ña cohon ndaha cuii ñi? Ta cuaha xaan cuhva tyaa ra ya cuatyí saton.

⁵ Zoco ñá cahan ra Jesús ndaha cuii ñi. Ta iyo xaan i cuñi ra Pilato.

Saha ra Pilato sa cuu ra Jesús

⁶ Ta vico cuan tuhva ra Pilato tava sii minoo ra ñoho vehe caa, yoo ra cua catyi ñiyivi.

⁷ Ta quivi cuan siñoho minoo ityi ra i sahñi tahan sihin ra cu tyiño. Minoo ra cuan nañi ra Barrabás, ta ñoho ra vatyí sahñi ra ñiyivi.

⁸ Ta i quisi cuaha xaan ñiyivi ta i sica ñu sii ra Pilato vatyí tava ra sii minoo ra ñoho vehe caa cuhva tuhva ra zavaha tahan cuiya.

⁹ Ta i ndaca tuhun ra Pilato sii ñu: ¿Atu cuñi ndo vatyí cua tave sii ra cu rey sii maa ndo ñiyivi hebreo?

¹⁰ Tacuan i catyi ra Pilato vatyí sito ra vatyí i nacuhva cuenda ra zutu nahnu sii ra Jesús sii ra vatyí cucuihna xaan iñi ra sii ra.

¹¹ Zoco ñihi xaan i tyihi ra zutu nahnu tyiño sihin ñiyivi vatyí nacaca ñu sii ra Barrabás.

¹² Ta ziqui i ndaca tuhun ra Pilato inga saha ta catyi ra: ¿Ta ñaa sa cuñi ndo cua zavehi sihin ra zacunañi ndo rey sii ñiyivi hebreo?

¹³ Ta i cana saa ñu ta catyi ñu: ¡Nacuu ra nu cruz!

¹⁴ Ta i catyi ra Pilato sihin ñu: ¿Ñaa cuenda? ¿Ñaa sa ña vaha i zavaha ra? Zoco i cana saa ñu ñihi ca ta catyi ñu: ¡Nacuu ra nu cruz!

¹⁵ I cuñi ra Pilato coo vaha ra sihin ñiyivi, ta yucuan cuenda i tava ra sii ra Barrabás. Ta i nacuhva cuenda ra sii ra Jesús vatyí cua ndoho ra sihin cuarta ta ziqui cua cuu ra nu cruz.

¹⁶ Ta i quihin zandaru sii ra Jesús, ta i sindyaca ra sii ra sisi vehe tyiño cahnu, ta i cana ra sii tandihi inga zandaru.

¹⁷ Ta ziqui i natyihi ra minoo zahma tixinda sii ra Jesús, ta i tyihi ra minoo corona iñu xiñi ra.

¹⁸ Ta i quisaha sacu ndyaa ra sii ra. I cana saa ra ta catyi ra: ¡Nacumi suun tata; yoho cuu rey sii ñiyivi hebreo!

¹⁹ I cañi xaan zandaru tuyoo caxtyila xiñi ra Jesús, ta i tyicu zii ra sii ra. Ta i sicuñi siti ra nuu ra ta sacu ndyaa ra sii ra.

²⁰ Ta sa yaha sacu ndyaa ra sii ra, i tava ra zahma tixinda cuan, ta i natyihi ra zahma maa ra sii ra. Ta ziqui i quihin ra sii ra vatyí cua cahñi ra sii ra nu cruz.

Nu i tyaa ra sii ra Jesús nu cruz

²¹ Ta cuhva sa cuahan ra ityi i tahan ra sii minoo ra ñuu Cirene. I quita ra sicuhu ta vasi ra ndya ñuu Jerusalén. Simón nañi ra. Zutu ra Alejandro sihin ra Rufo sii ra. Ta i zacuízo zandaru cuan cruz ra Jesús sii ra.

²² Ta cuahan tandihi ra nu nañi si Gólgota. Tuhun Gólgota cuan cuñi si catyi si Nu Yucu Yiqui Xiñi Ndiyí.

²³ Ta i saha ra vino zaca si sihin minoo sa nañi mirra vatyí coho ra Jesús, zoco ñá sihi ra sii sí.

²⁴ Ta sa yaha tyaa ra zandaru sii ra Jesús nu cruz, ta ziqui i siziqui ra vatyí cua ndyehe ra yoo ra cua zahacanaa minoo minoo zahma ra Jesús.

²⁵ Caa ñn sa ñaha ñi cuu cuhva i tyaa ra sii ra Jesús nu cruz.

²⁶ Ta xiñi cruz cuan ndyaa letra i tyaa ra ta saha cuenda si ñaa sa cuu cuatyí ra. Tyehen catyi si: “Rey cuenda ñiyivi hebreo.”

²⁷ I sañi ra cruz sa ndyaa minoo ra zuhu nuu siyo cuaha ra Jesús, ta inga ra siyo zatyí.

²⁸ Cuhva cuan i quita si cuhva catyi Tuhun Ndyoo nu catyi si: “Cua catyi ñiyivi vatyí ra iyo cuatyí cuu ra.”

²⁹ I yaha ñiyivi nu ndyaa ra Jesús, ta i sacu ndyaa ñu sii ra, ta zavico xiñi ñi ca ñu. Ta catyi ñu: Yoho ra catyi vatyí cua canun vehe ñuhu ta uñi quivi ñi ta cua zanduvohon sii sí,

³⁰ zacacun suun ta noon nu cruz.

³¹ Tacuan tucu ra zutu nahnu sihin ra maestro cuenda ley, i sacu ndyaa ra sii ra. Ta i catyi ra sihin ra tahan ra: I zacacu ra sii inga ñiyivi, zoco ña cuu zacacu ra sii ra.

³² Tatu cua noo ra nu cruz, tacuan ta cua sino iñi yo vatyi ra Cristo cuu ra. Ta rey sii maa yo ñiyivi hebreo cuu ra. Catyi ra cuan. Ta tacuan tucu ndya cuhva ndya ra zuhu, ra sihi iin ñi sihin ra Jesús, ta i cahan tucu ra ndya vaha ñi sii ra Jesús.

Nu i sihi ra Jesús

³³ Ta cuhva maa ora i nduñaa xaan nacahnu ñuu ñiyivi ndya cuhva ndya caa uñi sa sahiñi.

³⁴ Ta cuhva caa uñi cuan i cana saa ra Jesús minoo sa ñihi xaan, ta i catyi ra: Elí, Elí, ¿lama sabactani? Cuñi si catyi si: Zutu mañi yu, Zutu mañi yu, ¿ña cuenda i zandoon sii?

³⁵ Zuhva ñiyivi nandyaa yucuan, i siñi ñu ta catyi ñu: Tyizoho ndo; cana ra sii ra profeta Elías.

³⁶ Ta zuun ñi caa cuhva cuan i cacono minoo ra, ta i quihin ra sii minoo sa ñahma, ta i zatyii ra sii si sihin ndutya iya. I tyaa ra sii si nu minoo yutu, ta i zandaa ra sii si nu ndyaa ra Jesús vatyi cua coho ra ta catyi ra: Cuatu noo, nandyehé yo tatu cua quisi zanoo ra Elías sii ra.

³⁷ I sacu saa ra Jesús inga saha minoo sa ñihi xaan, ta ziqui i sihi ra.

³⁸ Zuun ñi caa cuhva cuan, i ndata zava zahma coco sa ndita sisi vehe ñuhu cahnu ndya ziqui ta ndya xuu.

³⁹ Ta minoo ra cu nuu sii minoo ziendu zandaru i iñi ndyaa ra ityi nuu ra Jesús. Ta sa ndyehé ra cuhva i sacu saa ra ta cuhva i sihi ra, i catyi ra: Ndisa cuii ra ihya vatyi zehe Ndyoo cu sii ra.

⁴⁰ Ndyaa zava ñi i siyucu cuaha xaan ñu zihí. Ndyehé ñu sii ra Jesús. Minoo ña nandyaa sihin ñu nañi ña María Magdalena. Inga ña cuu ña María zihí ra Jacobo, ra luhlu ca, ta ra José. Ta inga ña nañi ña Salomé.

⁴¹ Yucuan ñu cuu ñu i sindyico sii ra ta i tyindyee ñu sii ra quivi i sica noo ra nu cu si Galilea. Ta sihin inga ñu cuan i quisi ñu ndya ñuu Jerusalén sihin ra.

I tyihi ra sii ra Jesús sisi ñaña

⁴² Ta sahiñi viarni i cuu si, quivi zanduvaha ñiyivi sa cua casi ñu zavuru vatyi zavuru cuu quivi tuhva ñu quitatu.

⁴³ Ta i quisi ra José ra ñuu Arimatea. Minoo ra mandoñi cuu ra ta catyi ñiyivi vatyi vaha xaan ñiyivi cuu ra. Ndatu ra quivi cua tasi ra Ndyoo minoo ra cua cundyaca ñaha ñuu ñiyivi. Ná yuhu ra, ta i sahan ra nu ndyaa ra Pilato, ta i sica ra tumañi iñi sii ra vatyi cuu quihin ra coño ñuhu ra Jesús.

⁴⁴ Iyo xaan i cuñi ra Pilato vatyi yatyí xaan i sihi ra Jesús. Ta i cana ra sii ra ndyaca ñaha sii zandaru, ta i ndaca tuhun ra sii ra tatu sa tañi i sihi ra Jesús.

⁴⁵ Ta cuhva sa sito ra Pilato vatyi catyi ra cuan vatyi sa sihi ndisa cuii ra Jesús, ta ziqui i saha ra Pilato sa quihin ra José coño ñuhu ra.

⁴⁶ I zata ra José minoo zahma vaha. I zanoo ra coño ñuhu ra Jesús, ta i cava noo ra zahma cuan sii si, ta i saqui ra sii si sisi minoo ñaña sa zavaha ñiyivi sisi yuu. Ta i tyazi ra yuhu ñaña cuan sihin minoo yuu cahnu.

⁴⁷ I ndyehé ña María Magdalena sihin ña María zihí ra José nu i tyihi ra sii ra Jesús.

16

Cuhva i nandoto ra Jesús

¹ I yaha quivi quitatu ñiyivi hebreo. Ta ziqui i zata ña María Magdalena ta ña María zihí ra Jacobo ta ña Salomé ndutya vixi xaan sahan vatyi cua natyihí ñu sii coño ñuhu ra Jesús.

² Ta ñaha cuii ñi quivi tumbingu i saa ñu ndya ñaña cuan cuhva sa caña ñicandyi ñi.

³ Ta i natuhun tahan ñu ta catyi ñu: ¿Yoo ra cua tyaa siyo yuu sa ndazi yuñaña cuan?

⁴ Tacuan ta i ndyehé ñu vatyi yuu cahnu sa sindazi yuñaña cuan sa siñi siyo si.

⁵ Ta i quihvi ñu sisi ñaña cuan. Ta yucuan i ndyehe ñu minoo ángel. Tañi caa minoo ra yoco caa ra. Nandyee ra nu i cuu si siyo cuaha ra Jesús. Ñoho ra minoo zahma cañi. Cuisi xaan si. Ta iyo xaan i cuñi ñu.

⁶ Zoco i catyi ángel cuan sihin ñu: Ma yuhu ndo. Nanducu ndo sii ra Jesús, ra ñuu Nazaret, ra i sihi nu cruz. Zoco sa i nandoto ra. Yoñi ca ra ihya. Ñaha ndo, ta ndyehe ndo nu i caa coño ñuhu ra.

⁷ Ta vityi cuahan ndo ta nacatyí ndo sihin ra i casi ra ta sihin ra Pedro. Tyehen catyi ndo: “Xihna ca ra Jesús cuahan ndya Galilea ta ziquí maa ndo. Yucuan cua ndyehe ndo sii ra, tañi sa nacatyí ra sihin ndo.”

⁸ Tacuan ta yatyí cuii ñi i quita ñu zihí cuan ñaña cuan. I cacono ñu. Iyo xaan i cuñi ñu. Nihí tacuan ñi ca ñu. Ta ñá nacatyí maa ñu nu sihin minoo ñiyiví vatyí yuhu xaan ñu.

I quituu ra Jesús nuu ña María Magdalena

⁹ Ta sa yaha nandoto ra Jesús, ta ñaa ca quiví tuingu xihna cuii ca i quituu ra nuu ña María Magdalena, ñaha sa i tava ra usa tahan tatyí cuihna.

¹⁰ Ta cuahan ña, ta i nacatyí maa ña sihin amigo ra Jesús vatyí i nducuihya xaan iñi ra. Ta sacú xaan ra.

¹¹ Ta sa siñi ra sa catyi ña vatyí ndito ra Jesús ta sa ndyehe ña sii ra, ñá sino iñi ra.

¹² Tacuan ta i quituu tucu ra Jesús inga saha nuu uu tahan amigo ra ityi cuahan ra sicuhu.

¹³ Ta i sahan ra cuan, ta i nacatyí ra sihin inga ra, zoco ñá sino tucu iñi ra sa cahan ra.

Cuhva i saha ra Jesús tyiño sii ra i casi ra

¹⁴ Tacuan ta i quituu tucu ra Jesús nuu sa usi iin tahan ca ra i casi ra zuun ñi cuhva sa yucu ra mesa sasi ra xita. Ta i ndaca tuhun ra Jesús sii ra ñaa cuenda ña sino iñi ra sa nandoto ra vazú sa ndyehe ra tahan ra sii ra ta nacatyí ra sihin ra. Ta i catyi ra Jesús sihin ra vatyí ñihí xaan iñi ra ta ña ñii maa iñi ra ndaha ñi.

¹⁵ Ta i catyi tucu ra Jesús sihin ra: Cuahan ndo nacahnu ñuu ñiyiví, ta zacoto ndo sii tandihí ñiyiví Tuhun Ndyoo.

¹⁶ Tatu sino iñi ñu ta coo ndutya ñu cua cacú ñu. Ta ñiyiví ña sino iñi, ma ñihí tahvi añima ñu gloria.

¹⁷ Cua coo zeña sihin tandihí ñiyiví sino iñi sii. Tyehen cua zacuu ñu ta cua coto inga ñiyiví vatyí zacuaha ñu sa ndisa. Cua cutyiño ñu ziví ta cua tava ñu tatyí cuihna. Cua cuu cahan ñu zahan sa ña tuhva ñu cahan.

¹⁸ Tatu cua tñin minoo coo sii ñu a tatu cua coho ñu minoo sa xaan, ñahñi cua tahan ñu. Ta cua tyizo ñu ndaha ñu sii ñiyiví huhu, ta cua nduvaha ñu.

I ndaa xica ra Jesús ityi andiví

¹⁹ Ta sa ndihí cahan ra Jesús ta i ndaa xica ñi ra ityi andiví, ta i sicundyaa ra siyo cuaha ra Ndyoo Zutu yo.

²⁰ Ta i quita ra i casi ra, ta i zacoto ra Tuhun Ndyoo nacahnu ñuu ñiyiví. Ta zuun ñi ra Jesús i tyindyee sii ra vatyí saha ra Jesús sa zavaha ra cuaha xaan sa ndyityi. Ta tacuan ta i sito ñiyiví vatyí sa ndisa cuu sa zacuaha ra. Ndhí si vityi.

Tuhun Vaha Sa I Tyaa Ra San Lucas

Tasi ra Lucas minoo tuhun sii ra Teófilo

¹ Sa cuaha xaan ñiyivi nducu ñu cuhva tyaa ñu cuhva yozo caa i sicoo sa minoo minoo cuhva sa sino iñi yo

² tañi i nacatyí ra sica noo sihin ra Jesús ndya ta xihna ñi, nu i quisaha zatyíño ra, ta i tyindyee ra cuan sihin tyíño ra. Ta i ndyehe ra tandíhi sa zavaha ra.

³ Ta yuhvi tucu, i nducu cote tandíhi sa nacatyí ra cuan tatu ndisa cuii. Ta yucuan cuenda cuñi tyei sii si minoo minoo si vatyí coton, yoho Teófilo.

⁴ Cuñi sa cua coton vatyí sa ndisa cuii cuu cuhva sa zacoto ñiyivi suun.

Zacoto minoo ángel vatyí cua cacu ra Juan, ra cua zacoo ndutya sii ñiyivi

⁵ Quivi i sindyaca ñaha ra rey Herodes nu cu si Judea, sicoo minoo ra cu zutu cuenda vehe ñuhu hebreo, ta i sinañi ra Zacarías. Siñohe ra minoo ityi ra cu zutu sa nañi Abías. Elisabet i sinañi ñazíhi ra. Ta ra Aarón i cuu ñiyivi sahnu sii ña ta sa naha.

⁶ Ndoos xaan i cuu nduu tahan ñu ityi nuu ra Ndyoo vatyí i tyaa xaan ñu yahvi ley ra, ta yoñi i cuu tyaa cuatyí sata ñu.

⁷ Zoco yoñi maa zehe ña Elisabet i sicoo. Ta sahnu xaan nduu tahan ñu.

⁸ Ta minoo quivi sa i tahan si sii ra Zacarías sa cua zatyíño ra ityi nuu ra Ndyoo

⁹ tañi sicoo costumbre cuenda ra cu zutu, ta i siziqui ra ta i tahan si sii ra Zacarías sa quihvi ra sisi vehe ñuhu cahnu nu ii, cua cahmi ra cutu ityi nuu ra Ndyoo.

¹⁰ Ta ñi ñi sa sahmi ra cutu sisi vehe ñuhu ta tandíhi inga ñiyivi i siyucu ñu ityi sata ta cahan ñu sihin ra Ndyoo.

¹¹ Ta i quituu minoo ángel ra Ndyoo ityi nuu ra Zacarías. Nandyaa ra ityi siyo cuaha nu sahmi ra cutu.

¹² Ta sa ndyehe ra Zacarías sii ángel cuan, iyo xaan i cuñi ra, ta i yuhu xaan ra.

¹³ Zoco i catyi ángel cuan sihin ra: Ma yuhun Zacarías vatyí i siñi ra Ndyoo sa cohon, ta cua ñihi ña Elisabet ñazíhun minoo zehe, ta cua zacunañi ndo sii ra Juan.

¹⁴ Ziñi xaan cua cuñun, ta cuaha xaan ñiyivi cua cuzíhi iñi vatyí cua cacu ra.

¹⁵ Vatyí cahnu xaan cua cuu ra nuu Ndyoo. Ma coho ra vino ta nu ndixi. Ta cua cutu cuii Tatyí li sii ra ndya ta ñoho ra sisi zíhi ra cuee ca sa cacu ra.

¹⁶ Ta sa cuenda maa ra, cuaha xaan ñiyivi hebreo cua sino iñi ñu sii ra Ndyoo, ra ndyaca ñaha sii yo.

¹⁷ Cua zatyíño ra tyíño ra Ndyoo vatyí cua coo xaan Tatyí li ra Ndyoo sihin ra, ta cuaha xaan tundyee iñi ra Ndyoo cua coo sii ra. Ta cua cuu ra tañi ra Elías, ra cahan Tuhun Ndyoo ta sa naha. Sa cuenda maa ra ta cua coo sa taxi sii ñiyivi sahnu sihin zehe ñu. Ta sa cuenda maa ra ta ñiyivi quiñi iyo cua zama ñu cuhva iyo ñu, ta cua tyaa ñu yahvi. Cua zandulisto ra sii ñiyivi, ta cua tiin cuenda vaha ñu sii ra ndyaca ñaha sii yo. Tacuan i catyi ángel cuan.

¹⁸ Ta i nducu tuhun ra Zacarías sii ángel cuan: ¿Yozo caa cuu cote tatu sa ndisa cuii cuu cuhva ya? Vatyí sa sahnu xein, ta sahnu xaan ñazíhi.

¹⁹ Ta i catyi ángel cuan sihin ra: Yuhvi nañi Gabriel. Tuhve sica tyíño ra Ndyoo. Ta tasi ra sii, sa quehin suhun, ta zacote tuhun ya suun.

²⁰ Ta vityí cua nduñihun, ta ma cuu cohon ndya quivi cua tahan si cuhva sa catyi suhun vatyí ña sino iñun sa quehin. Ta cua cuu tandíhi si tañi sa catyi suhun, catyi ángel cuan.

²¹ Ta ñiyivi i sindatu sii ra Zacarías sata vehe ñuhu, iyo xaan i cuñi ñu vatyí naha xaan i ñoho ra sisi vehe ñuhu.

²² Ta ziqui i quita ra, ta ñá cuu cahan ra sihin ñu, ta i sito ñu vatyí i ndyehe ra minoo sa ndyehe ra sisi vehe ñuhu. Ta i quisaha cahan ra sihin ñu sihin zeña ñi vatyí ña cuu cahan ra.

²³ Tacuan i cuu si, ta i saa quivi sa ndihi ndyizo tyiño ra Zacarías vehe ñuhu cuan. Ta i sinuhu ra ndya vehe ra.

²⁴ Ta sa yaha cuan ta ziqui i ñihi ña Elisabet minoo zehe. Ta ñá quita ña sata vehe ohon tahan yoo, ta i sica iñi ña:

²⁵ “Vaha xaan cuu cuhva zavaha maa ra Ndyoo sihin vatyí vityi ma cahan cuehe ca ñiyivi sii.”

I zacoto minoo ángel sii ña María vatyí cua cacu ra Jesús

²⁶ Ta sa iñu yoo sa ñoho zehe ña Elisabet, ta ziqui i tasi ra Ndyoo sii ángel Gabriel ndya nu cu si Galilea ndya minoo ñuu sa nañi Nazaret

²⁷ vatyí cua cahan ra sihin minoo ñaha yoco sa cuñi tindaha sihin minoo ra sa nañi José. Ra rey David i cuu ñiyivi sahnu sii ra ta sa naha. Ta ñaha cuan, María nañi ña.

²⁸ I quituu ángel cuan nu ndyaa ña, ta catyí ra: Nacumi suun. Saha xaan ra Ndyoo sa vaha suun. Maa ra ndyaa suhun.

²⁹ Ta cuhva sa siñi ña sa cahan ángel cuan, ta iyo xaan i cuñi ña. Ta i sica iñi ña ñaa cuenda cahan ra cuhva cuan sihin ña.

³⁰ Ta i catyí tucu ángel cuan sihin ña: Ma yuhun María vatyí saha xaan ra Ndyoo sa vaha suun.

³¹ Cua coo minoo zehun. Ta Jesús cua zacunañun sii ra.

³² Cahnu xaan cua cuu ra, ta cua cunañi ra Zehe ra Ndyoo ra cahnu ca. Ta cua zacuu ra Ndyoo minoo rey sii ra tañi i cuu ra David, ñiyivi sii ra ta sa naha.

³³ Ta cua cundyaca ñaha ra sii ñiyivi hebreo tandihi cuii tyiemvu. Ta ma ndihi maa sa ndyaca ñaha ra. Catyí ángel cuan.

³⁴ Tacuan ta i ndaca tuhun ña María sii ángel, ta catyí ña: ¿Yozo caa cuu si cuhva ya vatyí tañaha ca coo yíi? Catyí ña.

³⁵ Ta i catyí ángel cuan sihin ña: Tatyí li maa ra Ndyoo cua quisi zicun. Ta tundyee iñi sii Zutu mañi yo cua coo suhun. Yucuan cuenda lee sa cua cacu cuan cua cunañi ra Zehe ra Ndyoo.

³⁶ Ta tacuan tucu ña Elisabet tyixun. Sahnu xaan ña, zoco sa ñihi tucu ña minoo zehe. Tuhva xaan ñiyivi catyí vatyí ma cuu coo zehe ña, zoco vityi sa iñu yoo sa ñoho zehe ña

³⁷ vatyí ñahñi sa ma cuu zavaha maa ra Ndyoo. Catyí ángel sihin ña.

³⁸ Ta i catyí ña María: Muzu maa ra Ndyoo cui. Nazacuu maa ra sihin cuhva catyun. Catyí ña. Tacuan ta cuahan ángel cuan.

Cuahan ña María cua ndyehe ña sii ña Elisabet

³⁹ Ta quivi cuan numi ñi i quita ña María, ta yatyí xaan cuahan ña minoo ñuu nu maa yucu ñi cuu si, nu cu si Judea.

⁴⁰ Ta i quihvi ña vehe ra Zacarías, ta i saha ña minoo nacumi sii ña Elisabet.

⁴¹ Ta cuhva sa siñi ña Elisabet sa cahan ña María ta i natyoño lee sa ñoho sisi ña, ta i situ cuii Tatyí li sii ña.

⁴² Ta saa xaan i cahan ña, ta catyí ña: Cuaha ca sa vaha saha ra Ndyoo suun ta ziqui sii tandihi inga ñuzihi. Ta saha xaan ra sa vaha sii zehun sa ñoho sisun.

⁴³ ¿Ta ñaa ña cuu vii? ta vasi zihí ra ndyaca ñaha sii; vasi cahan ña sihin.

⁴⁴ Ta zuun ñi cuhva sa siñi tuhun cohon, ta i natyoño lee sisi sihin sa zii xaan cuñi ra.

⁴⁵ Zii xaan cua cuñun, vatyí i sino iñun, ta cua cuu tuhun sa cahan ra Ndyoo suhun. Catyí ña Elisabet.

⁴⁶ Ta i quisaha catyí ña María:

Zacahni sii ra Ndyoo sihin tandihi cuii añime.

⁴⁷ Ta zii xaan cuñi vatyí zacacu ra Ndyoo sii.

⁴⁸ Cundahvi iñi ra Ndyoo sii mi, ñaha ndahvi. Ta vityí tandihi tyiemvu cua catyí ñiyivi sihin vatyí saha xaan ra Ndyoo sa vaha sii.

⁴⁹ Vatyí ra Ndyoo ra cahnu ca cuu ra.

Ta cahnu xaan cuu sa zavaha ra sihin.

Li xaan cuu zivi ra.

⁵⁰ Ta cua cundahvi iñi ra sii tandihi ñiyivi yuhu sii ra.

⁵¹ Cahnu xaan cuu tyiño zavaha ra. Cua tyaa siyo ra sii ñiyivi zacahnu sii ñu.

⁵² Cua zanduluhlu ra sii ñu. Ta cua zanducahnu ra sii ñiyivi ndyihí.

⁵³ Ñiyivi sa cuñi xaan coto sii ra, saha xaan ra sa vaha sii ñu. Ta ñu sica iñi vatyí sa vaha ñu, ñahñi cua cuhva ra sii ñu.

⁵⁴ Tyindyee ra sii ñiyivi hebreo, ñu cuu muzu ra.

Ña naa iñi ra sii ñu, ta cundahvi iñi ra sii ñu

⁵⁵ tañi i catyí ra sihin ra Abraham siin yo ta sihin zehe ra.

Catyí ña María.

⁵⁶ Ta i ndoo ña María sihin ña Elisabet uñi yoo, ta ziquí i sinuhu ña ndya vehe ña.

Quiví i cacu ra Juan, ra cua zacoo ndutya

⁵⁷ I saa quívi sa cua cacu zehe ña Elisabet, ta rayí i cuu zehe ña.

⁵⁸ Ta ñiyivi sa yucu vatyí sihin ñu ta ñiyivi sii ña i sito ñu vatyí vaha xaan sa zavaha ra Ndyoo sihin ña. Ta zii xaan i cuñi ñu ñi sihin ña.

⁵⁹ Ta sa cu uña quívi sa cacu lee cuan, ta i sahan ñu sa tahndya ñi xiñi xuu ra tañi catyí costumbre. Ta i zacunañi ñu sii ra Zacarías cuhva nañi zutu ra.

⁶⁰ Zoco i catyí zihí ra: Ña tacuan cuu si. Juan cua cunañi ra. Catyí ña.

⁶¹ Ta i catyí inga ñu sihin ña: ¿Ñaa cuenda cua zacunañun Juan sii ra? Yoñi ñiyivi sii ndo sa nañi tacuan. Catyí ñu.

⁶² Ta i quisaha nducu tuhun ñu sihin zeña sii zutu ra vatyí cuñi ñu coto ñu ñaa ziví cuñi ra sa cunañi ra.

⁶³ Ta i sica ra minoo vitu vatyí cua tyaa ra. Ta i tyaa ra ziví ra: Juan cuu ziví ra. Tyaa ra. Ta tandihi ñiyivi yucu yucuan, iyo xaan i cuñi ñu.

⁶⁴ Ta zuun ñi caa cuhva cuan i cuu nacahan ra Zacarías, ta i quisaha zacahnu ra sii ra Ndyoo.

⁶⁵ Ta tandihi ñiyivi sa ndyaa vatyí yucuan i yuhu xaan ñu. Ta i sito tandihi ñiyivi yucu nu cu si Judea.

⁶⁶ Ta tandihi ñiyivi sa siñi tuhun cuan, i sica iñi ñu ta catyí ñu sihin tahan ñu: ¿Ñaa ra cua cuu lee cuan? Catyí ñu. Ta i tyindyee xaan ra Ndyoo sii ra.

Zacahnu ra Zacarías sii ra Ndyoo

⁶⁷ Ta i situ cuí Tatyi Ii sii ra Zacarías zutu ra. Ta i quisaha cahan ra tuhun sa saha ra Ndyoo sii ra. Ta catyí ra:

⁶⁸ Cahnu xaan cuu ra Ndyoo Zutu mañi yo, ra Ndyoo cuenda maa yo hebreo vatyí i quisi ra nu ndyaa yo, ta i zacacu ra sii yo.

⁶⁹ Ta saha ra minoo ra cahnu sii yo; ñiyivi sii ra David muzu ra Ndyoo cua cuu sii ra, ta cua zacacu ra sii yo.

⁷⁰ Tacuan i cahan ra Ndyoo sihin ra profeta ta sa naha.

⁷¹ I catyí ra vatyí cua zacacu ra sii yo ndaha ra xaan iñi sii yo ta sii ra ña cuu ndyehe sii yo.

⁷² Ta tañi sa catyí ra Ndyoo sihin ñiyivi sahnu sii yo, cua cundahvi xaan iñi ra sii yo. Ta ma naa iñi ra tuhun sa cahan ra.

⁷³ Ihya cuu tuhun i catyí ra Ndyoo sihin ra Abraham siin sahnu yo.

⁷⁴ I catyí ra vatyí cua zacacu ra sii yo sii ra xaan iñi sii yo, ta ma cuyuhu yo zacahnu yo sii ra Ndyoo.

⁷⁵ Vatyí maa ra zanduvaha xaan sii yo ityi nuu ra. Ta zandundoo xaan ra sii yo tandihi quívi cua coo yo ñuu ñiyivi ya.

Catyí ra Zacarías.

⁷⁶ Ta i cahan ra Zacarías sa cuenda ra Ndyoo ta catyí ra sihin lee cuan:

Ta yoho zehi, cua catyí ñiyivi vatyí minoo profeta ra Ndyoo cahnu cuun. Vatyí cua cuhun ityi nuu ra ndyaca ñaha sii yo, ta cua catyun sihin ñiyivi vatyí cua quisi ra.

⁷⁷ Ta cua zacoton sii ñiyivi vatyí cua zandasi ra Ndyoo cuatyí ñu, ta cua zacacu ra sii ñu.

⁷⁸ Vatyi cuñi xaan ra Ndyoo sii yo. Ta cundahvi iñi ra sii yo, ta zaquisi ra sii minoo ra cua tyindyee sii yo. Tañi minoo ñúhu ñicandyi cua cuu ra.

⁷⁹ Vatyi sihin sa zañaha ra sii ñiyivi, natava ra sii ñu iyo nu ñaa sa cuenda cuatyi ñu. Yuhu ñu vatyi iyo ñu nu ñaa, ta cua cuu cuii ñu. Zoco cua zañaha ra sii ñu yozo caa cua quihvi ñu ityi vaha.

Catyi ra Zacarías.

⁸⁰ Ta ra luhlu cuan, i sahnu ra, ta i ndundyee ra sihin Tatyí Ii. Ta i sicoo ra minoo nu ityi xaan. Ta ziqui cuee ca zañaha ra sii ra sii ñiyivi hebreo, ta i quisaha cahan ra sihin ñu.

2

Cuhva i cacu ra Jesús

¹ Ta quivi cuan sicoo minoo ra ndyaca ñaha sa nañi Augusto, ta i tasi ra tyiño vatyi cua coo minoo censo sii tandihi ñiyivi ñuu ñiyivi.

² Ta quivi cuan ndyaca ñaha ra Cirenio nacahnu nu cu si Siria.

³ Ta tahan si cunuhu tandihi ñiyivi ñuu ñu vatyi cua cuhva ñu zivi ñu yucuan.

⁴ Yucuan cuenda i quita ra José nu cu si Galilea ñuu Nazaret, ta cuahan ra nu cu si Judea ndya ñuu Belén. Yucuan cuu ñuu nu i cacu ra rey David ta sa naha. Cuahan ra José yucuan vatyi ñiyivi sii ra David cuu sii ra.

⁵ Cuahan ra sa cua cuhva ra zivi ra sihin ña María vatyi sa cuñi tindaha ñu. Ta sa cuñi cacu zehe ña María.

⁶ Ta ñiñi ñi sa ndyaa ñu yucuan, ta i tahan si quivi cacu zehe ña.

⁷ Ta i zacacu ña sii zehe ña, ra nuu, ta i zucu ña zahma sii ra. Ta i saqui ña sii ra sisi minoo canua nu sasi quiti vatyi ña ñiñi ñu minoo vehe cundyaa ñu vatyi ña nuña ca vehe hotel.

I cahan ángel sihin ra zacuenda mvee

⁸ Yatyí ñuu cuan yucu zuhva ra sisi huhu vatyi zacuenda ra sii quiti zono ra sa sa cuaa.

⁹ Ta zana ñi iñi ra ta i quituu minoo ángel Ndyoo nu yucu ra. Ta sa ndisi sii Zutu mañi yo i zandundisi si nacahnu nu yucu ra, ta i yuhu xaan ra.

¹⁰ Ta i catyi ángel cuan sihin ra: Ma yuhu ndo vatyi vasi nacatyi minoo sa vaha xaan sihin ndo. Zii xaan cua cuñi tandihi ñiyivi sa cuenda si.

¹¹ Vatyi vityi i cacu minoo ra ñuu ra David. Vasi ra sa cuenda maa ndo vatyi cua zacacu ra sii ñiyivi. Ra Cristo cuu ra, ta ra ndyaca ñaha sii yo.

¹² Ta ihya cuu cuhva cua nacoto ndo sii ra. Cua nañihi ndo sii lee cuan zucu ra zahma, ta catuu ra sisi minoo canua.

¹³ Ta zuun ñi caa cuhva cuan i saa cuaha xaan ca ángel sihin ángel cuan. Ta zacahnu ángel cuan sii ra Ndyoo, ta catyi ra:

¹⁴ Cahnu xaan cuu maa ra Ndyoo ra ndyaa gloria, ta naco sa vaha ta sa taxi sii ñiyivi ñuu ñiyivi.

Catyi ángel cuan.

¹⁵ Ta ziqui cua nanuhu ángel cuan ndya gloria, ta i catyi ra zacuenda mvee sihin tahan ra: Coho yo Belén. Cua ndyehe yo ñaa sa cuu cuhva i zacoto ra Ndyoo sii yo.

¹⁶ Ta numi xaan cuahan ra, ta saa ra ñuu Belén, ta i nañihi ra sii ña María sihin ra José. Ta catuu lee cuan sisi canua.

¹⁷ Ta sa yaha i ndyehe ra sii lee cuan, ta i nacatyi ra cuhva i catyi ángel cuan sihin ra sa cuenda lee cuan.

¹⁸ Ta tandihi ñiyivi i siñi tuhun cuan iyo xaan i cuñi ñu.

¹⁹ Zoco ña María, cuenda nacañi ñi iñi ña sa cuenda tuhun cuan.

²⁰ Ta cuanuhu ra zacuenda mvee, ta zacahnu xaan ra sii ra Ndyoo sa cuenda tandihi sa i ndyehe ra ta sa i siñi ra cuhva i catyi ángel cuan sihin ra.

Saha cuenda ñu sii ra Jesús sii ra Ndyoo sisi vehe ñuhu cahnu

²¹ Ta sa ndu-uña quivi lee cuan, i sahndya ñu ñiñi xiñi xuu ra tañi catyi costumbre ñu, ta i zacunañi ñu sii ra Jesús tañi catyi ángel cuee ca sa ñiñi ña María sii ra.

²² Ta sa yaha quívi cuhva catyi ley ra Moisés sa cuenda sa nduvaha ña ityi nuu Ndyoo, ta ziqui sindyaca ñu sii ra Jesús ndya ñuu Jerusalén vatyi cua cuhva cuenda ñu sii ra sii ra Ndyoo.

²³ Tacuan i zavaha ñu vatyi catyi ley ra Ndyoo: “Rayii ra cacu sa xihna ñi zacuu minoo ñaha, cua cuhva cuenda ñu sii ra sii ra Ndyoo”, catyi ley.

²⁴ Ta i sahan ñu, ta saha cuenda ñu uu tahan quití tañi catyi ley maa ra Ndyoo nu catyi si tyehen: “Cuhva ndo uu tahan curuu a uu tahan paloma”, catyi ley.

²⁵ Ta quívi cuan sicoo minoo ra ñuu Jerusalén sa nañi Simeón. Minoo ra ndoo xaan i cuu ra, ta i zacahnu ra sii ra Ndyoo sa ndisa cuii. Ta ndatu ra sa cua quisi ra cua zacacu sii ñiyívi hebreo. Ta ñoho Tatyí Ii ra Ndyoo sii ra.

²⁶ Ta i zacoto Tatyí Ii sii ra vatyi ma cuu ra ndya cuhva ndya ndyehe ra sii ra cua zacacu sii ñiyívi. Cua ndyehe ra sii ra Cristo, ra cua tasi ra Ndyoo.

²⁷ Ta i sahan ra Simeón vehe ñuhu cuhva catyi Tatyí Ii ra Ndyoo sihin ra. Ta i saa zutu ra ta zihí ra Jesús sihin maa ra vatyi cua zavaha ñu cuhva catyi ley.

²⁸ Ta cuhva sa saa ñu nu ndyaa ra Simeón, ta i quihin ra sii ra Jesús i tyihi zucu ndaha ra. Ta i quisaha zacahnu ra sii ra Ndyoo ta catyi ra:

²⁹ Zutu mañi yuu, nacui vityi sihin sa taxi añime.

Vatyi sa zavohon cuhva sa catyun sihin muzun.

³⁰ Vatyi sa ndyehi sihin siti nui sii ra cua zacacu sii ñiyívi.

³¹ Sa cua zañohon sii ra sii tandihí ñiyívi.

³² Ihya ra cua zanducahnu ca sii ñiyívi hebreo, ñiyívi i casun.

Ta cua cuhva ra ya ñúhu sa cua zandundisi ityi sii inga ñiyívi sa yívi ñiyívi hebreo cuu. Catyi ra Simeón.

³³ Ta ra José sihin zihí ra Jesús, iyo xaan i cuñi ñu sihin cuhva cahan ra Simeón cuenda lee cuan.

³⁴ Tacuan ta i cahan ra Simeón sihin ra Ndyoo sa cuenda ñu, ta ziqui i catyi ra sihin ña María, zihí ra Jesús: Ndyehun vatyi lee ya cua zanduva a cua zanduvita ra sii cuaha xaan ñiyívi hebreo. Cua cuu ra tañi minoo zeña, ta cuaha xaan ñiyívi cua cuxaan sii ra.

³⁵ Ta uhvi xaan cua cuu añimon, María, tañi sa yaha zava minoo tyicaa añimon. Ta cuhva sa sica iñi ñiyívi sisi añima ñu, casi xaan cua quita si. Catyi ra Simeón.

³⁶ Ta yucuan ndyaa tucu minoo ñaha sa cahan Tuhun Ndyoo. Nañi ña Ana. Ra Fanuel i cuu zutu ña, ñiyívi sii ra Aser. Sa sahanu xaan ña. Ndyá luhlu ña ta tindaha ña, zoco usa cuiya ñi ta i sihi yíi ña.

³⁷ Ta quívi cuan ñandahvi i cuu ña, ta cumi xico cumi cuiya ña. Ta ñá quita ña sisi vehe ñuhu vatyi ñiyaca ta ndyiyaca i cahan ña sihin ra Ndyoo. Ta iyo saha ñá sasi ña ta cahan ña sihin ra Ndyoo.

³⁸ Ta zuun ñi caa cuhva sa cahan ra Simón ta i saa tucu ña Ana nu ndyaa ra José ta ña María sihin lee. Ta i nacuhva ña tyahvi ndyoo sii ra Ndyoo cuenda ra. Ta i quisaha cahan ña cuenda ra Jesús sihin tandihí ñiyívi sa ndatu quívi cua cacu ñiyívi ñuu Jerusalén.

I sinanuhu ñu ndya ñuu Nazaret

³⁹ Ta sa ndihí zavaha ñu tandihí sa catyi ley ra Ndyoo ta i sinanuhu ñu ndya nu cu si Galilea ndya ñuu Nazaret nu cuu ñuu ñu.

⁴⁰ Ta i sahanu ra Jesús. Ta i ndundyee ca ra sihin sa siñi tuñi ra Ndyoo. Ta i tyindyee xaan ra Ndyoo sii ra.

Cuhva i cahan ra luhlu Jesús sihin ra sito xaan sisi vehe ñuhu cahnu

⁴¹ Ta ra José sihin zihí ra Jesús tuhva ñu sahan ñuu Jerusalén tahan tahan cuiya sa cuenda vico zuhun.

⁴² Ta sa ndusi ra Jesús sa usi uu cuiya ra, ta i sahan ñu ñuu Jerusalén tañi tuhva tandihí ñiyívi sahan sa cuenda vico cuan.

⁴³ Ta sa ndihí vico cuan ta cua nuhu ñu, zoco i ndoo ra Jesús ñuu Jerusalén, ta ñá sito ra José ta zihí ra.

⁴⁴ I sica iñi ñu vaty ndihi ra sihin ñu vaty cuaha xaan ñiyivi cuahan sihin ñu. Ta sa minoo quivi sica ityi ñu, ta ziqui i nanducu ñu sii ra ticui amigo ñu ta ñiyivi sii ñu.

⁴⁵ Zoco ñá nañihi ñu sii ra. Yucuan cuenda i sinanuhu sata ñu ndya ñuu Jerusalén cua nanducu ñu sii ra.

⁴⁶ I yaha uñi quivi ta ziqui i nañihi ñu sii ra sisi vehe ñuhu cahnu. Ndyaa ra mahñu ra maestro. Tyizoho ra Jesús sa cahan ra ta nducu tuhun ra sii ra.

⁴⁷ Ta tandihi ra i siñi sa cahan ra Jesús, iyo xaan i cuñi ra sihin sa siñi tuñi sii ra Jesús ta sihin tuhun cahan ra, ndihi ca.

⁴⁸ Ta sa ndyehe zutu ra ta zihí ra sii ra, iyo xaan i cuñi ñu. Ta i catyi zihí ra sihin ra: Zehe luhli, ¿ña cuenda i zavohon cuhva ya sihin ndi? Catyi ña. Zutun ta yuhvi i sica xaan iñi ndi sa cuendon, ta i nanducu xaan ndi suun. Catyi ña.

⁴⁹ Ta i catyi ra Jesús sihin ñu: ¿Ñaa cuenda nanducu ndo sii? ¿Atu ña sito ndo vaty cuñi si sa zatyine tyiño Zuti? Catyi ra.

⁵⁰ Zoco ñá cutuñi iñi ñu tuhun cahan ra sihin ñu.

⁵¹ Ta cua nuhu ra sihin ñu ndya ñuu Nazaret, ta i tyaa ra yahvi sii ñu. Ta i nacañi iñi ña María sa cuenda cuhva i cahan ra.

⁵² Ta ra Jesús i sahnu ra, ta cahnu ca nduu ra, ta i nducuaha ca sa siñi tuñi sii ra. Ta zii xaan i cuñi ra Ndyoo sihin ra ta ñiyivi ndihi ca.

3

Cuhva i cahan ra Juan, ra i zacoo ndutya sii ñiyivi

¹ Ta sa sahun cuiya sa ndyaca ñaha ra Tiberio nacahnu, ta ra Poncio Pilato i cuu ra gobernador nu cu si Judea. Ta ndyaca ñaha ra Herodes nu cu si Galilea. Ta yañi ra, ra Felipe cuu ra ndyaca ñaha nu cu si Iturea sihin Traconite. Ta ra Lisaniyas ndyaca ñaha ra nu cu si Abilinia quivi cuan.

² Ta ra Anás sihin ra Caifas i cuu ra cu nuu sii tandihi ra cu zutu. Ta quivi cuan i cahan ra Ndyoo sihin ra Juan zehe ra Zacarías minoo nu ityi xaan nu sindyaa ra.

³ Ta i sica noo ra Juan tandihi ñuu sa ndyaa yaty ñi nu ndyaa yutya sa nañi Jordán. I nacaty ra sihin ñiyivi vaty nazama ñu cuhva iyo ñu ta coo ndutya ñu. Ta ziqui cua zandasi ra Ndyoo cuaty ñu.

⁴ Tañi catyi si nuu libro i tyaa ra Isaías, minoo ra profeta ta sa naha. Nu catyi ra tyehen: Cua cuiñi ndo nduzu minoo ra cana saa minoo nu ityi xaan.

Ta catyi ra cuan: “Tañi zanduvaha ndo minoo ityi, tacuan zanduvaha ndo aña ndo vaty cua quisi ra ndyaca ñaha sii yo. Tañi zandundoo ndo ityi, tacuan nazama ndo cuhva iyo ndo.

⁵ Ta tañi zanandutu ndo tandihi xahva, ta tañi zandundaa ndo tandihi yucu ta zandundoo ndo nu yacua ityi ta zanduvaha ndo nu quiñi caa, tacuan cuñi si sa zama ndo cuhva iyo ndo.

⁶ Tacuan ta tandihi ñiyivi cua ndyehe sii Zehe ra Ndyoo, ra cua zacacu sii yo.”

Tacuan i tyaa ra Isaías ta sa naha vaty cuhva cuan cua cahan ra Juan sihin ñiyivi.

⁷ Tacuan i cahan ra Juan sihin ñiyivi. Ta cuhva sa siñi ñu sa cahan ra ta i catyi ñu sihin ra vaty cuñi ñu sa zacoo ndutya ra sii ñu. Ta ziqui i catyi ra sihin ñu: ¿Ñiyivi quiñi xaan iyo cuu ndo tañi coo! ¿Yoo sa nacaty sihin ndo vaty cuu cacu ndo sihin cuhva sa cua tasi tuñi xaan ra Ndyoo sii ñiyivi?

⁸ Cuñi si sa zama ndisa cuii ndo cuhva iyo ndo, ta zavaha ndo sa vaha. Ta ma catyi ndo vaty maa ra Abraham cuu zutu ndo, ta ma catyi ndo vaty maa ra cua zacacu sii ndo. Ma zacahnu ndo sii ndo vaty vazu sihin yuu ya ta cuu zavaha ra Ndyoo ñiyivi sii ra Abraham sihin si.

⁹ Tañi minoo yutu sa ña saha siti cuu ndo. Vaty ña zavaha ndo cuhva cuñi ra Ndyoo. Ta yutu sa ña saha siti, sahndya ñiyivi sii tu. Ta sahmi ñu sii tu. Ta zuun ñi cuhva cuan cua cuhun maa ndo nu cayu ñuhu. Catyi ra Juan.

¹⁰ Ta i ndaca tuhun ñiyivi sii ra ta catyi ñu: ¿Ñaa sa cuñi si zavaha ndi? Catyi ñu.

¹¹ Ta i nacaty ra Juan sihin ñu: Ndoho ra iyo uu tahan camisa, nacuhva ndo minoo sii ra ñahñi. Ta ra iyo sa casi, nacuhva tucu ra sii ra ñahñi. Catyi ra.

¹² Ta i saa coyo tucu zuhva ra zatyiyahvi sii ñiyivi xuhun cuenda ra ndyaca ñaha, ta i cuñi ra coo ndutya ra. Ta i ndaca tuhun ra sii ra Juan: Maestro, ¿ña sa cuñi si zavaha ndi? Catyi ra.

¹³ Ta i catyi ra Juan sihin ra: Ma zatyiyahvi zana ndo sii ñiyivi minoo cuhva ña catyi ley. Catyi ra Juan.

¹⁴ Tacuan ta i ndaca tuhun tucu zuhva ra zandaru sii ra Juan ta catyi ra: Ta nduhvi tucu, ¿ña sa cuñi si zavaha ndi? Catyi ra. Ta i catyi ra Juan sihin ra: Ma quindyaa ndo ndaha tyiño ñiyivi. Ta ma zayuhu xaan ndo sii ñiyivi. Ma tyaa ndo cuaty sata ñu tatu ña ndisa. Ta ndoo ndo vaha ta yahvi ñi ndo. Catyi ra Juan.

¹⁵ Ta i nacañi iñi ñiyivi sa cuenda ra Juan tatu ra Cristo cuu ra a yivi vaty ndatu ñu sa cua quisi ra Cristo.

¹⁶ Ta i catyi ra Juan sihin tandihi ñu: Ndisa zacoo ndutye sii ndo sihin ndutya, zoco vasi inga ra cahnu ca ta ziqui mi. Ña tahan si sii, nu sa cui muzu ra ta cuize ndisa ra, zoco zuun ñi maa ra i saha tyiño sii. Ta maa ra cua zacoo ndutya sii ndo sihin Taty Ii ta sihin ñuhu.

¹⁷ Sa ndaha ra pala ra, ta cua zanduvii ra siti trigo ra, ta cua tava ziiñ ra zoo si. Cua zandu-iin ra sii trigo cuan, ta cua cucumi vaha ra sii si, ta cua cahmi ra zoo si sisi minoo ñuhu sa ma ndahva ca. Tacuan i catyi ra Juan sihin ñiyivi.

¹⁸ Ta sihin cuaha xaan ca cuhva i cahan ra Juan sihin ñiyivi, ta i zayuhu ra sii ñu, ta i nacaty ra vaty cua quisi minoo ra cua zacacu sii ñiyivi.

¹⁹ I nacaty ra Juan sihin ra rey Herodes tandihi cuii sa ña vaha sa i zavaha ra vaty i quihin ra sii ña Herodías, ñazih ra Felipe yañi ra.

²⁰ Cuñi si sa zanduvaha ra Herodes cuhva iyo ra, zoco i zavaha ra minoo ca sa ña vaha ta i tyihi ra sii ra Juan vehe caa.

Cuhva i sicoo ndutya ra Jesús

²¹ Cuaha xaan ñiyivi i zacoo ndutya ra Juan, ta i zacoo ndutya ra sii ra Jesús. Ta cuhva sa sicoo ndutya ra Jesús, i cahan ra sihin ra Ndyoo, ta i nuña andivi.

²² Ta i noo Taty Ii ziqui ra tañi minoo paloma. Ta i siñi ñiyivi minoo nduzu sa quita andivi ta catyi si: Yoho cuu zehi, ra cuñi xein. Zii xaan cuñi suhun. Catyi nduzu cuan.

Ñiyivi sahnii sii ra Jesús

²³ Oco usi cuiya ra Jesús ta i quisaha zatyño ra. Tandih ñiyivi i sica iñi ñu vaty zehe ra José cuu sii ra. Ta ra José, zehe ra Elí cuu sii ra.

²⁴ Ta ra Elí, zehe ra Matat cuu sii ra. Ta ra Matat, zehe ra Leví cuu sii ra. Ta ra Leví, zehe ra Melqui cuu sii ra. Ta ra Melqui, zehe ra Jana cuu sii ra. Ta ra Jana, zehe ra José cuu sii ra.

²⁵ Ta ra José cuan, zehe ra Matatías cuu sii ra. Ta ra Matatías, zehe ra Amós cuu sii ra. Ta ra Amós, zehe ra Nahum cuu sii ra. Ta ra Nahum, zehe ra Esli cuu sii ra. Ta ra Esli, zehe ra Nagai cuu sii ra.

²⁶ Ta ra Nagai, zehe ra Maat cuu sii ra. Ta ra Maat, zehe ra Matatías cuu sii ra. Ta ra Matatías, zehe ra Semei cuu sii ra. Ta ra Semei, zehe ra José cuu sii ra. Ta ra José cuan, zehe ra Judá cuu sii ra.

²⁷ Ta ra Judá, zehe ra Joana cuu sii ra. Ta ra Joana, zehe ra Resa cuu sii ra. Ta ra Resa, zehe ra Zorobabel cuu sii ra. Ta ra Zorobabel, zehe ra Salatiel cuu sii ra. Ta ra Salatiel, zehe ra Neri cuu sii ra.

²⁸ Ta ra Neri, zehe ra Melqui cuu sii ra. Ta ra Melqui, zehe ra Adi cuu sii ra. Ta ra Adi, zehe ra Cosam cuu sii ra. Ta ra Cosam, zehe ra Elmodam cuu sii ra. Ta ra Elmodam, zehe ra Er cuu sii ra.

²⁹ Ta ra Er, zehe ra Josué cuu sii ra. Ta ra Josué, zehe ra Eliezer cuu sii ra. Ta ra Eliezer, zehe ra Jorim cuu sii ra. Ta ra Jorim, zehe ra Matat cuu sii ra.

³⁰ Ta ra Matat, zehe ra Leví cuu sii ra. Ta ra Leví, zehe ra Simeón cuu sii ra. Ta ra Simeón, zehe ra Judá cuu sii ra. Ta ra Judá, zehe ra José cuu sii ra. Ta ra José, zehe ra Jonán cuu sii ra. Ta ra Jonán, zehe ra Eliaquim cuu sii ra.

³¹ Ta ra Eliaquim, zehe ra Melea cuu sii ra. Ta ra Melea, zehe ra Mainán cuu sii ra. Ta ra Mainán, zehe ra Matata cuu sii ra. Ta ra Matata, zehe ra Natán cuu sii ra.

³² Ta ra Natán, zehe ra David cuu sii ra. Ta ra David, zehe ra Isaí cuu sii ra. Ta ra Isaí, zehe ra Obed cuu sii ra. Ta ra Obed, zehe ra Booz cuu sii ra. Ta ra Booz, zehe ra Salmón cuu sii ra. Ta ra Salmón, zehe ra Naasón cuu sii ra.

³³ Ta ra Naasón, zehe ra Aminadab cuu sii ra. Ta ra Aminadab, zehe ra Aram cuu sii ra. Ta ra Aram, zehe ra Esrom cuu sii ra. Ta ra Esrom, zehe ra Fares cuu sii ra. Ta ra Fares, zehe ra Judá cuu sii ra.

³⁴ Ta ra Judá, zehe ra Jacob cuu sii ra. Ta ra Jacob, zehe ra Isaac cuu sii ra. Ta ra Isaac, zehe ra Abraham cuu sii ra. Ta ra Abraham, zehe ra Taré cuu sii ra. Ta ra Taré, zehe ra Nacor cuu sii ra.

³⁵ Ta ra Nacor, zehe ra Serug cuu sii ra. Ta ra Serug, zehe ra Ragau cuu sii ra. Ta ra Ragau, zehe ra Peleg cuu sii ra. Ta ra Peleg, zehe ra Heber cuu sii ra. Ta ra Heber, zehe ra Sala cuu sii ra.

³⁶ Ta ra Sala, zehe ra Cainán cuu sii ra. Ta ra Cainán, zehe ra Arfaxad cuu sii ra. Ta ra Arfaxad, zehe ra Sem cuu sii ra. Ta ra Sem, zehe ra Noé cuu sii ra. Ta ra Noé, zehe ra Lamec cuu sii ra.

³⁷ Ta ra Lamec, zehe ra Matusalén cuu sii ra. Ta ra Matusalén zehe ra Enoc cuu sii ra. Ta ra Enoc, zehe ra Jared cuu sii ra. Ta ra Jared, zehe ra Mahalaleel cuu sii ra. Ta ra Mahalaleel, zehe ra Cainán cuu sii ra.

³⁸ Ta ra Cainán, zehe ra Enós cuu sii ra. Ta ra Enós, zehe ra Set cuu sii ra. Ta ra Set, zehe ra Adán cuu sii ra. Ta ra Adán, zehe ra Ndyoo cuu sii ra.

4

Cuhva i nducu coto ihñi cuihna sii ra Jesús

¹ Ta i situ cuii Tatyí Ii Ndyoo sii ra Jesús sa yaha sicoo ndutya ra. Ta i quita ra nu cu si yuu Jordán, ta sindyaca Tatyí Ii ra Ndyoo sii ra minoo nu ityi xaan.

² Yucuan i sindyaa ra uu xico quívi, ta i nducu coto ihñi cuihna sii ra. Ta sisi quívi cuan ñahñi maa i sasi ra. Ta yaha cuan, ta i sizoco xaan ra.

³ Ta i catyi cuihna sihin ra: Tatu ndisa vatyí Zehe ra Ndyoo cuu suun, catyun sihin yuu sa catuu ihya vatyí nanduu si pan. Catyi cuihna sihin ra Jesús.

⁴ Ta i catyi ra Jesús sihin cuihna: Catyi Tuhun Ndyoo vatyí ña maa sihin sa casi ñi yo ta cundito yo. Sihin sa sasi yo ndito coño ñuhu yo, zoco sihin sa tyaa yo yahvi tuhun cahan ra Ndyoo ta ndito añima yo sa ndisa cuii. Catyi ra Jesús sihin cuihna.

⁵ Tacuan ta i sindyaca cuihna sii ra Jesús xiñi minoo yucu zucu xaan, ta i zañaha ra tandíhi cuii ñuu ñiyívi sii ra.

⁶ Ta i catyi cuihna sihin ra Jesús: Ndaha mi ndyaa tandíhi ya vatyí saha ra Ndyoo sa cundyaca ñehi tandíhi ñuu ñiyívi ya. Ta cuu cuhve sii si sii yoo ra cuñi, ta cua cundyaca ñaha ra.

⁷ Ta cua cuhve tandíhi si suun tatu cua cuiñi situn nui ta zacahnun sii. Catyi cuihna sihin ra Jesús.

⁸ Zoco i catyi ra Jesús sihin cuihna: Cuiñi siyo suun sii, cuihna, vatyí catyi Tuhun Ndyoo vatyí ñi ñi sii maa ra Ndyoo ra ndyaca ñaha sii ndi cua zacahnu ndi. Ta ñi ñi tyiño maa ra cua zacuu ndi. Catyi ra Jesús sihin cuihna.

⁹ Yaha cuan ta i sindyaca cuihna sii ra Jesús ndya ñuu Jerusalén. Ta i zandaa ra sii ra xiñi vehe ñuhu cahnu. Ta i catyi ra sihin ra Jesús: Tatu ndisa vatyí Zehe ra Ndyoo cuu suun, ndavon ndya nu ñuhu.

¹⁰ Vatyí catyi Tuhun Ndyoo: “Cua cuhva ra Ndyoo tyiño sii ángel ra vatyí zacuenda ra suun.

¹¹ Cua naqueen ra suun sihin ndaha ra ta ma ñicuehe sohon sihin minoo yuu.” Catyi cuihna sihin ra Jesús.

¹² Ta i catyi ra Jesús sihin ra: Catyi Tuhun Ndyoo vaty ma nducu coto ihñi ndi sii ra Ndyoo ra ndyaca ñaha sii ndi. Catyi ra.

¹³ Ta ñá cuu zandavi ñaha cuihna sii ra Jesús. Ta cuahan cuihna zuhva ñi quivi.

I quisaha ra Jesús zatyíño ra tyíño ra Ndyoo nu cu si Galilea

¹⁴ Ta sa yaha sa nducu coto ihñi cuihna sii ra Jesús, ta ziqui i quisi nanuhu ra Jesús ndyaa Galilea. Situ cuii ra sihin tundyee iñi Tatyí li. Ta i cahan ñiyivi tuhun ra nacahnu cuii ityi cuan.

¹⁵ Ta i zacuaha ra sii ñiyivi sisi vehe ñuhu tahan tahan ñuu. Ta i zacahnu tandíhi ñiyivi sii ra.

Cuhva i zavaha ñiyivi sihin ra Jesús ñuu Nazaret

¹⁶ Tacuan ta i nasaa ra Jesús ñuu Nazaret nu i sahnu ra. Ta minoo quivi quitatu ñiyivi i quihvi ra vehe ñuhu tañi sa tuhva maa ra zavaha, ta i sicuñi ndyaa ra vatyí cua cahvi ra Tuhun Ndyoo.

¹⁷ Ta i saha ñu minoo libro Tuhun Ndyoo sii ra sa i tyaa ra Isaías, minoo ra profeta ta sa naha. Ta i nuña ra libro, ta i nañihi ra nu catyi si tyehen, ta i cahvi ra tuhun ya:

¹⁸ Ndyaa Tatyí li ra Ndyoo sihin, vatyí maa ra i tyaa tyíño sii, vatyí nacatyí tuhun vaha ra sihin ñiyivi ndahvi.

I tasi ra sii, sa zacote sii ñu ndyaa ndaha ra ña vaha vatyí cua quita ñu.

Ta zacote sii ñu cuaa vatyí cua nandyehe ñu.

Ta zacote sii ñu ndyehe tundoho vatyí cua cacu ñu.

¹⁹ Ta zacote sii ñiyivi vatyí sa saa quivi cua cuhva xaan ra Ndyoo sa vaha sii ñu.

Tacuan i cahvi ra Jesús.

²⁰ Ta sa ndíhi cahvi ra, ta i nacazi ra libro, ta nacuhva ra sii minoo ra zatyíño vehe ñuhu cuan. Ta i sicundyaa ra. Ta i ndyehe xaan tandíhi ñiyivi yucu yucuan sii ra.

²¹ Ta i quisaha catyi ra sihin ñu: Zuun ñi vityí natahan si ityi nuu maa ndo cuhva catyi tuhun ya. Catyi ra Jesús.

²² Ta tandíhi ñiyivi yucu yucuan, vaha i cahan ñu sa cuenda ra Jesús. Ta iyo cuñi ñu sihin sa cahan ra vatyí vaha xaan si. Ta i nducu tuhun ñu sii tahan ñu: ¿Atu yivi ra ihya cuu zehe ra José? Catyi ñu.

²³ Ta i catyi ra Jesús sihin ñu: Site cuhva sica iñi ndo. Ta tyehen cua catyi ndo sihin: “Yoho ra cu médico, xihna ca sii moo zanduvohon.” Ta cua catyi tucu ndo: “Sa siñi ndi sa zavohon ñuu Capernaum. Cuhva cuan zavaha tucun ñuu moo.” Tacuan cua catyi ndo sihin. Catyi ra Jesús.

²⁴ Tacuan ta i catyi ra Jesús: Sa ndisa catyi sihin ndo vatyí minoo ra profeta, ña tyaa ñiyivi ñuu ra yahvi sii ra.

²⁵ Ta catyi sa ndisa sihin ndo vatyí cuaha xaan ñundahvi hebreo, ñu sihi yí, i sicoo quivi i sica noo ra Elías. Ta ñá coon zavi uñi cuiya zazava. Ta sicoo xaan tama nacahnu.

²⁶ Zoco ñá tasi ra Ndyoo sii ra Elías vatyí tyindyee ra sii numinoo ñundahvi hebreo. I tasi ra Ndyoo sii ra nu ndyaa minoo ñandahvi minoo ñuu nañi Sidón nu cu si Sarepta. Catyi ra Jesús.

²⁷ Ta i catyi tucu ra Jesús: Cuaha xaan ra hebreo huhu sihin cuehe sa tyahyu ra quivi i sica noo ra Eliseo, ra cu profeta. Zoco ñá nduvaha numinoo ra hebreo, zoco i nduvaha ra Naamán, minoo ra ñuu Siria. Catyi ra Jesús.

²⁸ Ta sa siñi ñiyivi ñoho vehe ñuhu tuhun cuan, i cuxaan xaan tandíhi ñu.

²⁹ Ta i nduvita ñu. Ta i tñin ñu sii ra Jesús sindyaca ñu sii ra yuñuu nu iñi noo vatyí cua zavita ñu sii ra yucuan.

³⁰ Zoco i yaha ra Jesús mahñu ñu, ta cuahan ra.

Zanduvaha ra Jesús sii minoo ra ñoho tatyí cuihna

³¹ Ta cuahan ra Jesús ñuu Capernaum nu cu si Galilea. Ta tahan quivi quitatu ñiyivi i zacuaha ra sii ñu.

³² Ta iyo xaan i cuñi ñu sihin cuhva cahan ra vatyí cahan ra tañi minoo ra sito xaan tañi cahan ra ndyaca ñaha vatyí cahan ra sihin sa siñi tuñi ra Ndyoo.

³³ Ta sisi vehe ñuhu sicoo minoo ra ñoho minoo tatyí ña vaha sii, ta saa xaan i cana saa ra ta catyí ra:

³⁴ Zañon sii ndi, yoho ra Jesús. ¿Ñaa sa cuñun sihin ndi? Catyí ra. ¿Atu vasi zanoon sii ndi? Site yoo ra cuun. Yoho cuu ra lí, ra tasi ra Ndyoo. Tacuan i catyí ra cuan zacuu tatyí cuihna.

³⁵ Ta i cahan ra Jesús sihin tatyí ña vaha cuan, ta i catyí ra: Taxi ñi, ta zañon sii ra ya. Catyí ra. Tacuan ta i zanduva tatyí cuihna sii ra cuan mahñu nu yucu ñiyívi, ta i quita si, ta ñá zañicuehe si sii ra.

³⁶ Ta i yuhu xaan tandíhi ñiyívi i ndyehe. Ta i catyí ñu sihin tahan ñu: ¿Ñaa tuhun cuu ya? Iyo xaan cuhva ta tundyee iñi sii ra Jesús, ta cuu cahan ra sihin tatyí cuihna ta quita si. Catyí ñu.

³⁷ Ta nacahnu cuii yucuan i cahan xaan ñiyívi tuhun ra.

Zanduvaha ra Jesús sii tyizo ra Simón Pedro

³⁸ Ta i quita ra Jesús vehe ñuhu cuan, ta i quihvi ra vehe ra Simón. Ta huhu xaan tyizo ra Simón sihin cahñi. Ta i cahan ñu sihin ra Jesús sa cuenda ña.

³⁹ Ta i saa ra Jesús nu catuu ña, ta i catyí ra sihin cuehe cuan vatyí naquita si. Ta i quita cahñi cuan sii ña. Ta zuun ñi cuhva cuan i nduvita ña, ta i zavaha ña sa casi ra.

Zanduvaha ra Jesús sii cuaha xaan ñiyívi huhu

⁴⁰ Ta huhva sa cua cuizo ñicandyi i quisi ndyaca ñiyívi sii tandíhi ñiyívi huhu iyo vehe ñu, ñaa ndíhi cuii ca cuehe. Ta i tyizo ra Jesús ndaha ra ziquí minoo minoo ñu, ta i zanduvaha ra sii ñu.

⁴¹ Ta i quita tucu tatyí cuihna sii cuaha xaan ñiyívi cuan, ta i cana saa si ta catyí si: Yoho cuu ra cu Zehe Ndyoo. Catyí si. Zoco ñá saha ra Jesús sa cahan ca si vatyí nacoto si sii ra vatyí ra zacacu sii ñiyívi cuu ra.

Nacatyí ra Jesús Tuhun Ndyoo nacahnu Galilea

⁴² Ta sa cundisi inga quívi, ta i quita ra Jesús ñuu cuan. Cuahan ra minoo nu ityí xaan nu yoñi ñiyívi iyo. Zoco i nanducu ñiyívi sii ra, ta i saa ñu nu ñoho ra, ta cuñi ñu sa ndoo ra sihin ñu.

⁴³ Zoco i catyí ra Jesús sihin ñu: Cuñi si sa zacote sii ñiyívi inga ñuu huhva ndyaca ñaha ra Ndyoo vatyí yucuan cuenda i tasi ra Ndyoo sii.

⁴⁴ Ta tacuan i sica noo ra Jesús, ta i nacatyí ra Tuhun Ndyoo tandíhi vehe ñuhu nacahnu Galilea.

5

Cuhva i saha ra Jesús ndatu sii ra tñin tyiyaca, ta i ñihi xaan ra tyiyaca

¹ Minoo saha nandyaa ra Jesús yuhu miñi sa nañi Genesaret, ta i saa coyo ñiyívi. Ta tñin xaan i siyucu ñu vatyí cuñi ñu cuiñi ñu Tuhun Ndyoo.

² Ta i ndyehe ra Jesús uu tahan barco vatyí ñi yumiñi. Ta sa quita coyo ra tñin tyiyaca ta nacatya ra taraya ra.

³ Tacuan ta i quihvi ra Jesús sisi minoo barco sa cuu sii ra Simón, ta i catyí ra sihin ra vatyí nazatuhva ra huhva ca sii tu nu cono ca. Ta ziquí i sicundyaa ra Jesús sisi barco, ta i quisaha zacuha ra sii ñiyívi yucu yumiñi cuan.

⁴ Cuhva sa ndíhi cahan ra ta i catyí ra sihin ra Simón: Zacuhun barcun ndya nu cono ca ta cañi ndo taraya ndo nu ndutya vatyí cua tñin ndo tyiyaca. Catyí ra Jesús.

⁵ Ta i nacahan ra Simón ta catyí ra: Maestro, sa zatyíño xaan ndi ñiyaca cuii, ta ñá ñihi maa ndi. Zoco tatu moo catyí, cua cañi tucu ndi taraya. Catyí ra Simón.

⁶ Ta sa zavaha ra huhva cuan, ta i tñin ra cuaha xaan tyiyaca, ndya huhva i tahndya taraya ra sihin sa vee ti.

⁷ Ta i saha ra zeña sii ra tahan ra sa ñoho inga barco vaty naquisi tyindyee ra sii ra. Ta i quisi ra, ta i zacutu ra nduu tahan barco cuan sihin tyiyaca cuan, ta ndya cuhva i cuñi ndyee tu.

⁸ Ta sa ndyehe ra Simón Pedro cuhva cuan, ta i sicuñiñi siti ra nuu ra Jesús. Ta i quisaha catyi ra sihin ra: Zandon sii, tata, vaty ra iyo xaan cuaty cui.

⁹ Iyo xaan i cuñi ra Simón ta tandiñi ra ndiñi sihin ra vaty cuaha xaan tyiyaca i tiin ra.

¹⁰ Ta iyo xaan cuñi tucu ra Jacobo sihin ra Juan zehe ra Zebedeo. I zatyño ra ñin ñi sihin ra Simón. Ta i catyi ra Jesús sihin ra Simón: Ma iyo xaan cuñun. Ndy vityi ma tiin con tyiyaca. Cua tiun sii ñiyivi vaty cua zacoton Tuhun Ndyoo sii ñu. Catyi ra Jesús sihin ra Simón.

¹¹ Ta sa yaha zandaa ra barco ra nu ñuhu ityi, i zandoo tandiñi uñi tahan ra sii tandiñi ndaha tyiño ra, ta cuahan ra sihin ra Jesús.

Zanduvaha ra Jesús sii minoo ra tyahyu

¹² Ta minoo quivi ndyaa ra Jesús minoo ñuu nu ndyaa minoo ra tyahyu. Ta sa ndyehe ra sii ra Jesús, sicuñiñi siti ra nuu ra Jesús, ta i nacañi noo ra xiñi ra ndya nu ñuhu. Ta i sica xaan ra sii ra ta catyi ra: Tata, iyo cuhva suun; ta cuu zanduvohon sii tatu cuñun. Catyi ra.

¹³ Ta i tyizo ra Jesús ndaha ra xiñi ra, ta i catyi ra: Cuñi. Sa nduvohon. Ta zuun ñi caa cuhva cuan i quita cuehe tyahyu cuan sii ra.

¹⁴ Ta i catyi ra Jesús sihin ra: Ma nacatyun sihin numinoo ñiyivi. Zoco cuhun nu ndyaa ra cu zutu ta cuhvon ñaa ndiñi sa tahan si cuhvon tañi i catyi ra Moisés, ta cua cuu si minoo sa ndaa sii ra cu zutu vaty sa nduvohon. Catyi ra Jesús sihin ra.

¹⁵ Zoco vazu i catyi ra Jesús sihin ra vaty ma nacatyi ra sihin ñiyivi, zoco cuaha xaan ñiyivi i ñihi tuhun cuan. Ta cuaha xaan cuaha xaan ñiyivi i titahan vaty cuñi ñu tyizoho ñu sa cahan ra Jesús, ta cuñi ñu sa zanduvaha ra sii ñu.

¹⁶ Zoco i quita ra Jesús nu yucu ñu ndya minoo nu ityi xaan nu yoñi ñiyivi iyo, ta yucuan i cahan ra sihin ra Ndyoo.

Zanduvaha ra Jesús sii minoo ra xii

¹⁷ Minoo quivi zacuaha ra Jesús sii ñiyivi, ta yucu zuhva ra fariseo ta ra maestro cuenda ley hebreo. I quita ra cuan ñuu Jerusalén ta inga ñuu ndyihí nacahnu Galilea ta Judea. Ta sicoo xaan tundyee iñi ra Ndyoo sihin ra Jesús quivi cuan, ta i zanduvaha xaan ra sii ñiyivi cuhu.

¹⁸ Tacuan ta i saa coyo ra ndyizo sii minoo ra cuhu sihin minoo tyuhva. I nducu ra cuhva quihvi ra sisi vehe vaty cuñi ra caqui ra sii ra nu nandyaa ra Jesús.

¹⁹ Zoco ñá ñihi ra cuhva quihvi ra vaty tuu xaan ñiyivi. Tacuan ta i ndaa ra xiñi vehe, ta i tyaa siyo ra zuhva tyiyo, ta i zanoo ra sii ra nu nandyaa ra Jesús mahñu ñiyivi.

²⁰ Ta sa ndyehe ra Jesús vaty sino xaan iñi tandiñi ra, ta i catyi ra sihin ra cuhu: Tata, sa ndasi tandiñi cuatyun. Catyi ra Jesús.

²¹ Tacuan ta ra maestro cuenda ley cuan sihin ra fariseo i quisaha sica iñi ra: “¿Yoo ra cuu ra ya? Quiñi xaan cahan ra sii ra Ndyoo. Sica iñi ra vaty cuu zandasi ra cuaty yo, zoco minoo tuhun ñi maa ra Ndyoo cuu zandasi cuaty yo.”

²² Zoco i sito ra Jesús cuhva sica iñi ra, ta i quisaha catyi ra sihin ra: ¿Ñaa cuenda sica iñi ndo tacuan?

²³⁻²⁴ ¿Ñaa sa ña yii ca catyi yo? ¿Atu yii ca catyi yo? “Sa ndasi cuatyun”, a yii ca catyi yo: “Nduviton ta cacon; sa nduvohon.” Ña yii catyi yo: “Sa ndasi cuatyun.” Vaty yivi sa ndyehe yo cuu cuhva cuan. Ma coto ñiyivi tatu ndisa a ña ndisa. Zoco cua ndyehe ñu tatu zanduvaha yo sii minoo ñiyivi sa ndisa. Ta vityi cua zañehi sii ndo vaty cuu zacui tandiñi vaty ra i quisi ndya gloria cui. Cuu zandasi cuaty ñiyivi, ta cuu zanduvehi sii ra ya. Catyi ra Jesús. Ta i catyi ra sihin ra cuhu catuu yucuan: Catyi suhun, nduviton. Naquihin tyuhvon ta cunuhun ndya vehun.

²⁵ Ta zuun ñi caa cuhva cuan i nduvita ra, ta i naquihin ra tyuhva ra, ta cua nuhu ra ndya vehe ra. Ta ityi cuahan ra zacahnu xaan ra sii ra Ndyoo.

²⁶ Ta iyo xaan i cuñi tandihi ñiyivi, ta i zacahnu ñu sii ra Ndyoo. Ta i yuhu xaan ñu, ta i catyi ñu: Vityi ndisa i ndyehe yo minoo sa iyo xaan caa.

Cana ra Jesús sii ra Leví

²⁷ Ta sa yaha cuan, ta i quita ra Jesús vehe cuan, ta cuahan ra. Ta i ndyehe ra sii minoo ra tava xuhun cuenda ra ndyaca ñaha romano. Leví nañi ra. Ta i catyi ra Jesús sihin ra: Coho sihin.

²⁸ Tacuan ta i nduvita ra Leví. I zandoo ra tandihi sa sii ra, ta cuahan ra sihin ra Jesús.

²⁹ Tacuan ta i zavaha ra Leví minoo vico cahnu xaan vehe ra sa cuenda ra Jesús. Ta cuaha xaan ra tava xuhun cuenda ra ndyaca ñaha sindyaa mesa sihin inga ca ñiyivi.

³⁰ (I sica iñi ra fariseo ta ra maestro cuenda ley hebreo vatyí ñahñi cuatyí maa ra), ta yucuan cuenda i quisaha cahan cuehe ra sihin ra sica noo sihin ra Jesús, ta catyi ra: ¿Ñaa cuenda sasi ndo ta sihi ndo sihin ra tava xuhun ta ra iyo xaan cuatyí?

³¹ Ta i catyi ra Jesús sihin ra: Ra iyo vaha, ña siñi ñuhu minoo médico sii ra. Zoco ra cuhu, siñi ñuhu médico sii ra.

³² Ta maa ndo sica iñi ndo vatyí vaha xaan ndo; ñahñi cuatyí ndo cuñi ndo. Yucuan cuenda ña vasi tyindyeyi sii maa ndo. Vasi tyindyeyi sii ñu sito vatyí iyo cuatyí ñu vatyí cua nazama ñu cuhva iyo ñu. Catyi ra Jesús.

Ndaca tuhun ñiyivi sii ra Jesús ñaa cuenda ña cuñi ra sica noo sihin ra cahñi zoco ra sii ra

³³ Tacuan ta i quisaha ndaca tuhun ra cuan sii ra Jesús ta catyi ra: Ra ndyico sii ra Juan ta sii ra fariseo, tuhva ra sahñi zoco sii ra, ta cahan ra sihin ra Ndyoo. Zoco ra sica noo sihin moo, tandihi quivi sasi ra xita ta sihi ra ndutya. ¿Ñaa cuenda?

³⁴ Ta i catyi ra Jesús sihin ra: ¿Atu cuu sa ma cuhva ndo casi ñu yucu minoo vico tindaha tatu ndyaa ra i tindaha sihin ñu? Ma cuu. Cuñi ñu casi ñu vatyí zii xaan cuñi ñu.

³⁵ Zoco cua saa quivi cua ndihi vico. Cua cuhun ra i tindaha vatyí cua quindyaa ñiyivi sii ra. Tacuan ta ziqui ma casi ra sica noo sihin ra xita.

³⁶ Tacuan ta i cahan ra Jesús ziqui minoo cuhva, ta i catyi ra: Yoñi ñiyivi cua cahndya minoo zahma saa ta natyaa ñu zuhva si sii minoo zahma sahnu vatyí cua ndiyi zahma saa cuan, ta ziqui cua tahndya ca zahma sahnu cuan. Ta ña vaha naha si ndihi ca tatu natyaa ñu zahma saa sii zahma sahnu.

³⁷ Ta yoñi zavaha ndixi panela sisi quizi sahnu vatyí cua cuizo si ta ndaa si. Ta cua cahndi quizi cuan tatu sahnu si. Ta cua cati ndixi ta cua tivi quizi.

³⁸ Cuñi si quizi saa tatu zavaha ñiyivi ndixi panela, ta ma ndoyo ñuhu si.

³⁹ Ta tatu sa sihi minoo ra ndixi panela sa ndaa, ma cuñi ra sa ñá ndaa vatyí catyi ra: “Vaha ca ndixi sa ndaa.” Ndixi sahnu ca cuu si cuan. (Ta tacuan iyo ñiyivi sihin costumbre ñu. Sa caan xaan ñu sii sa sahnu, ta ma cuu nazaca si sihin minoo cuhva saa.)

6

Tohon ra sica noo sihin ra Jesús yoco trigo quivi quitatu ñiyivi

¹ Minoo quivi quitatu ñiyivi i yaha ra Jesús mahñu itu trigo ñiyivi. Ta ra sica noo sihin ra i tohon ra zuhva yoco trigo ta i zavii ra sihin ndaha ra, ta sasi ra sii si.

² Tacuan ta i catyi zuhva ra fariseo sihin ra: Ña catyi ley yo sa zatyíño yo quivi quitatu ñiyivi. ¿Ñaa cuenda zatyíño ndo?

³ Ta i catyi ra Jesús sihin ra: ¿Atu tañaha ca cahvi ndo cuhva i zavaha ra David ta ra ndihi sihin ra minoo quivi i sizoco xaan ra?

⁴ I quihvi ra sisi vehe ñuhu, ta i quihin ra pan ii. Ta i sasi ra sii si, ta saha ra sii ra ndihi sihin ra. Ta catyi ley vatyí maa ñi ra cu zutu tahan si casi pan cuan. Catyi ra Jesús.

⁵ Ta i catyi tucu ra Jesús sihin ra: Ra i quisi ndya gloria cui, ta ndyaca ñaha tuqui quivi quitatu ñiyivi.

Zanduvaha ra Jesús sii minoo ra na-ityi ndaha

⁶ Ta inga quivi quitatu ñiyivi i quihvi ra Jesús sisi vehe ñuhu ta zacuaha ra sii ñiyivi. Ta yucuan i ndyehe ra sii minoo ra na-ityi ndaha siyo cuaha.

⁷ Ta ra maestro cuenda ley hebreo sihin ra fariseo i ndyehe xaan ra sii ra Jesús tatu cua zanduvaha ra sii ra cuan quivi quitatu ñiyivi. Tacuan ta cua cuu tyaa ra cuatyí sata ra.

⁸ Zoco sa sito ra Jesús cuhva sica iñi ra, ta i catyi ra sihin ra na-ityi ndaha: Nduvita. Ta cuiñi ndyoon mahñu. Ta i nduvita ra, ta sicuiñi ndyaa ra mahñu.

⁹ Ta ziqui i nducu tuhun ra Jesús sii ra yucu yucuan ta catyi ra: Minoo ñi tuhun cua nducu tuhun sii ndo. ¿Atu catyi ley vatyí zavaha yo sa vaha a sa ña vaha quivi quitatu ñiyivi? ¿Atu zacacu yo sii ñiyivi a cahñi ndihí yo sii ñu?

¹⁰ Ta i ndyehe ra Jesús sii minoo minoo ra yucu yucuan. Ta i catyi ra sihin ra cuhu: Nandica ndohon. Ta i nandica ra ndaha ra, ta i nduvaha ndaha ra.

¹¹ Ta zuhva ra yucu yucuan, i cuxaan xaan ra, ta i natuhun tahan ra yozo caa cua zavaha ra sihin ra Jesús.

I casi ra Jesús usi uu tahan ra apóstol

¹² Ta minoo quivi i ndaa ra Jesús minoo yucu vatyí cua caca tahvi ra sii ra Ndyoo. Ta i cahan ra sihin ra Ndyoo ñiyaca cuii.

¹³ Ta cuhva sa cundisi i cana ra sii tandihí ra sica noo sihin ra, ta i casi ra usi uu tahan ra vatyí cuu ra apóstol, ta cua tava ra Jesús tyiño sii ra.

¹⁴ Ta ihya cuu zivi sa usi uu tahan ra: Ra Simón Pedro, ta yañi ra, ra Andrés. Ra Jacobo, ra Juan, ra Felipe, ta ra Bartolomé.

¹⁵ Ta ra Mateo, ta ra Tomás, ta ra Jacobo zehe ra Alfeo ta ra Simón Zelote.

¹⁶ Ta ra Judas, yañi ra Jacobo, ta ra Judas Iscariote, ra cua xico sii ra Jesús.

Zacuaha ra Jesús sii cuaha xaan ñiyivi

¹⁷ Ta i noo ra Jesús yucu cuan sihin sa usi uu tahan ra cuan. Ta i sicuiñi ndyaa ra minoo nu ndaa sihin ra sica noo sihin ra ta sihin cuaha ca ñiyivi, ñu i quita coyo nacahnu Judea ta ñuu Jerusalén ta ñuu Tiro sihin ñuu Sidón sa ndyaa yuhu tyañuhu. I saa ñu yucuan vatyí cua cuiñi ñu sa cahan ra Jesús. Ta ñu cuhu, cuiñi ñu sa zanduvaha ra sii ñu.

¹⁸ Ta ñiyivi ñoho tatyí ña vaha, i nduvaha tucu ñu.

¹⁹ Ta tandihí ñu, cuiñi ñu tiin ñu sii ra Jesús vatyí iyo tundyee iñi ra Ndyoo sii ra Jesús, ta i zanduvaha si sii tandihí ñu.

Ñiyivi ñihi tumañi iñi ta ñiyivi ma ñihi tumañi iñi

²⁰ Tacuan ta i ndyehe ra Jesús sii ñiyivi sica noo sihin ra. Ta i catyi ra: Tandihí ndoho sa ndahvi, zii xaan cuu sii ndo vatyí tahan si sii ndo sa cundyaca ñaha ra Ndyoo sii ndo.

²¹ Ta tandihí ndoho sa sizoco vityí, zii xaan cuu sii ndo vatyí cua coo quivi ta ma ndyehe ca ndo zoco. Ta tandihí ndoho sa sacu xaan vityí, zii xaan cuu sii ndo vatyí cua coo quivi ñahñi ca tucuihya iñi cua coo sii ndo. Ta cua vacu ndo sihin sa zii cuiñi ndo.

²² Zii xaan cuu sii ndo tatu ña cuu ndyehe ñiyivi sii ndo, ta tatu cua tava ñu sii ndo nu yucu ñu, a tatu cahan cuehe ñu sii ndo a tatu catyi ñu vatyí ñiyivi ña vaha cuu ndo vatyí sino iñi ndo sii mi, ra i quisi ndya gloria cui.

²³ Zii xaan cuiñi ndo quivi ndyehe ndo tundoho cuan, ta ndava ndo sihin sa zii cuiñi ndo vatyí cahnu xaan sa cua cuhva ra Ndyoo sii ndo gloria. Zuun ñi cuhva ña vaha cuan i zavaha ñiyivi sahnu ta tyiemvu sihin ra profeta.

²⁴ Zoco ndahvi ndoho ra cuca vityí vatyí sa iyo sa zii sii ndo ihya ñuu ñiyivi ya.

²⁵ Ta ndahvi ndoho ra sica iñi vatyí ñahñi sa cumañi sii ndo vityí vatyí cua coo quivi cua ndyehe xaan ndo zoco. Ta ndahvi ndoho tatu zii xaan cuiñi ndo vityí vatyí cua coo quivi cua nducuihya xaan iñi ndo, ta cua vacu xaan ndo.

²⁶ Ta ndahvi ndoho tatu catyi tandihí ñiyivi vatyí vaha xaan ndo vityí vatyí zuun ñi cuhva cuan i cahan ñiyivi sahnu sii ñu cuenda ra i catyi vatyí profeta ra Ndyoo cuu ra, ta ña ndisa ra.

Cuiñi xaan ndo sii ñiyivi xaan iñi sii ndo

²⁷ Tandihí ndoho ra siñi sa quehin, catyi sihin ndo vatyi cuñi xaan ndo sii ñu xaan iñi sii ndo. Zavaha ndo sa vaha sihin ñiyivi ña cuu ndyehe sii ndo.

²⁸ Cahan vaha ndo sihin ñiyivi cahan ndya vaha ñi sii ndo, ta cahan ndo sihin ra Ndyoo cuenda ñiyivi zavaha sa ña vaha sihin ndo.

²⁹ Tatu iyo ra cati ii siyo xiti ndo, cuhva ndihí ndo inga siyo nacati ra. Tatu iyo ra quindyaa siqueta ndo, cuhva ndihí ndo camisa ndo sii ra.

³⁰ Cuhva ndo ñaa ndihí sa sica ñiyivi sii ndo, ta tatu iyo ra quindyaa sa sii ndo, ma nandaca ndo sii si.

³¹ Tatu cuñi ndo sa cua zavaha ñiyivi sa vaha sihin maa ndo, tacuan zavaha tucu maa ndo sihin maa ñu.

³² Tatu iin ñi sii ñiyivi cuñi xaan sii ndo cuñi ndo, ¿ña sa vaha zavaha ndo cuhva cuan? vatyi tacuan tucu zavaha ñiyivi quiñi xaan iyo. Cuñi xaan ñu sii ñiyivi sa cuñi sii maa ñu.

³³ A tatu zavaha ndo sa vaha sihin ñiyivi zavaha sa vaha sihin ndo, ¿ña sa vaha zavaha ndo cuhva cuan? vatyi tacuan tucu zavaha ñiyivi quiñi xaan iyo.

³⁴ A tatu saha noo ndo ndaha tyiño ndo sii ñiyivi vatyi cuñi ndo sa zaha ñu tumañi iñi sii ndo, ¿ña sa vaha zavaha ndo cuhva cuan? vatyi ñiyivi quiñi xaan iyo, saha noo ñu sa sii ñu ta ndatu ñu sa cua nacuhva tucu ñiyivi sii si.

³⁵ Zoco maa ndo, cuñi xaan ndo sii ñu xaan iñi sii ndo. Ta zavaha ndo sa vaha. Ta cuhva noo ndo sa sii ndo, zoco ma cuatu ndo ñaa tumañi iñi cua zavaha tucu maa ñu sii ndo. Ta tacuan ta cahnu xaan sa vaha cua ñihi ndo nu ndyaa ra Ndyoo. Ta sa ndisa cuii cua cuu ndo zehe ra Ndyoo, ra cahnu ca. Vatyi ra Ndyoo, vaha ñiyivi cuu ra sihin ñiyivi quiñi xaan iyo ta sihin ñu ña saha tyahvi ndyoo sii ra.

³⁶ Yucuan cuenda cundahvi xaan iñi ndo sii ñiyivi tañi maa ra Ndyoo cundahvi xaan iñi ra sii ñu.

Ma cahan cuehe yo sii ñiyivi

³⁷ Ma cahan cuehe ndo sii ñiyivi coto catyi ra Ndyoo vatyi ña vaha zavaha tucu maa ndo. Ma catyi ndo vatyi ña vaha ñiyivi, ta ma catyi tucu ra Ndyoo vatyi ña vaha ndo. Zaha ndo tucahnu iñi sii ñiyivi, ta cua zaha ra Ndyoo tucahnu iñi sii maa ndo.

³⁸ Cuhva maa ndo sa siñi ñuhu sii ñiyivi, ta cua cuhva tucu maa ra Ndyoo sa siñi ñuhu sii maa ndo. Tañi ñiyivi vaha tatu xico ñu ñaa sa xico ñu sii ndo, situ cuii saha ñu ndya cuhva sitya cuii ñi ca si. Tacuan tucu cua zavaha ra Ndyoo sihin ndo. Vaha xaan cua tyicuhva ra sa vaha ndya cuhva sitya cuii si, ta cua cuhva ra sii ndo. Vatyi tañi cuhva cua cuhva maa ndo sii ñiyivi, tacuan cuu cuhva cua cuhva ra Ndyoo sii maa ndo. Catyi ra Jesús.

³⁹ Ta ziqui i cahan ra Jesús sihin ñu sihin minoo cuhva ta catyi ra: Ma cuu zañaha minoo ra cuaa ityi sii inga ra cuaa. Cua canacava nduu tahan ra sisi xahva.

⁴⁰ Ta cahnu ca cuu minoo ra cu maestro ta ziqui ra zacuaha sihin ra, zoco tatu sa ndihí zacuaha ra, cua nduu ra tañi maestro ra.

⁴¹ ¿Ñaa cuenda ndyehun mihin luhlu cuii ñi sa ñoho siti nuu yañun, ta ña zohon cuenda mihin cahnu sa ñoho siti nuun?

⁴² Ta ¿ña cuenda catyun sihin yañun vatyi nacuhva ra sa tavon mihin luhlu sa ñoho siti nuu ra? ta ña tuu iñun vatyi minoo mihin cahnu xaan ñoho siti nuun. Cuhva cuan zohon tuhun vatyi vaha xoon, ta ña ndisa. Tava xihnon mihin cahnu sa ñoho siti nuun, ta cua ndundisi ndyehun, ta cua cuu tavon mihin sa ñoho siti nuu yañun.

Nacoto yo tatu vaha minoo yutu tatu saha tu yucu vixi vaha

⁴³ Minoo yutu vaha, ña saha tu siti ña vaha. Ta minoo yutu ña vaha, ña saha tu siti vaha.

⁴⁴ Nacoto yo ñaa yutu cuu tahan tahan tu sa cuenda siti saha tu. Vatyi minoo tu mihndya ma cuhva tu mango, ta minoo iñu ma cuhva tu yucu vixi sa nañi uva.

⁴⁵ Ta tacuan tucu sihin ñiyivi. Minoo ra vaha, cahan ra tuhun vaha sa iyo añaima ra. Ta ñiyivi ña vaha, ña vaha añaima ñu, ta cahan ñu sa quiñi sa iyo añaima ñu vatyi ñaa ndihí sa situ añaima ñiyivi, yucuan cuu sa cahan ñu.

Cuhva cua cuu si sihin ñiyivi tyaa yahvi sa cahan ra Jesús, ta cuhva cua cuu si sihin ñiyivi ña tyaa yahvi

⁴⁶ ¿Ñaa cuenda catyi ndo sihin: “Zutu mañi yuu, Zutu mañi yuu”, ta ña zavaha ndo cuhva catyi sihin ndo?

⁴⁷ Tatu iyo ra cua quisi nu ndyei, ta siñi ra sa quehin, ta zavaha ra sii si, ihya cuu cuhva iyo ra:

⁴⁸ Cuu ra tañi minoo ra i zandaa vehe. Cono xaan sitya ra ndya tahan ra minoo yuu cahnu, ta i zandaa ra vehe ra ziqui yuu cuan. Ta quivi i coon xaan zavi, ñihi xaan i yaha ndutya saha vehe ra, zoco ñá cuu zanduva si vehe ra vatyí ndyaa si ziqui yuu cuan.

⁴⁹ Zoco ra ña siñi sa quehin, ta ña zavaha ra sii si, cuu ra tañi minoo ra ñá zavaha cimientu, ta i zandaa ra vehe ra nu ñuhu ñi. Ta ñihi xaan i yaha ndutya saha vehe ra, ta tañi tyehen ñi i nduva vehe ra, ta i ndoyo ñuhu si.

7

Zanduvaha ra Jesús sii minoo muzu ra ndyaca ñaha sii zandaru

¹ Cuhva sa ndihí cahan ra Jesús sihin ñiyivi ta cua nanuhu tucu ra inga saha ndya ñuu Capernaum.

² Ta yucuan ndyaa minoo ra ndyaca ñaha sii minoo ziendu zandaru. Ta minoo muzu ra, ra sa cuñi xaan ra, cuhu xaan ra, ta cuñi cuu ra.

³ Quivi sa sito ra cu nuu sii zandaru cuan tuhun ra Jesús, i tasi ra sii zuhva ra sahnu hebreo vatyí caca ra tumañi iñi sii ra Jesús sa quisi zanduvaha ra sii muzu ra.

⁴ Ta i saa coyo ra sahnu cuan nu ndyaa ra Jesús, ta i sica xaan ra tumañi iñi sii ra ta catyi ra: Iyo minoo ra romano. Ra cu nuu sii zandaru cuu ra.

⁵ Ta vaha xaan ñiyivi cuu ra sihin maa yo ñiyivi hebreo ndya cuhva ndya i tyiyahvi maa ra ta i ndaa minoo vehe ñuhu ndi.

⁶ Tacuan ta cuahan ra Jesús sihin ra sahnu cuan, zoco cumañi ca saa ra vehe ra cu nuu cuan, ta i tasi ra cuan zuhva amigo ra, ta i catyi ra sihin ra Jesús: Tata, catyi ra cu nuu cuan vatyí ma zayangon suun sa cuhun ndya vehe ra vatyí cahnu xaan ca cuu moo, ta cahan nuu ra vatyí iyo cuatyí ra. Ta yoho, ra vaha xaan cuun.

⁷ Yucuan cuenda ña cuñi ra quisi ra nu ndyoon. Zoco tatu cua catyi moo vatyí nduvaha muzu ra, cua nduvaha ra vazú ma cuhun, catyi ra.

⁸ Vatyí maa ra, ra ndyaca ñaha sii zandaru cuu ra. Ta cuu catyi ra sihin minoo ra: “Cuahan”, ta cuhun ra. Ta catyi ra sihin inga ra: “Ñaha”, ta vasi ra. Ta catyi ra sihin muzu ra: “Tyehen zavohon”, ta zavaha ra sii si. Ta tacuan tucu moo, catyi ra, vatyí tatu catyun vatyí nduvaha muzu ra, cua nduvaha ra. Catyi ra cuan sihin ra Jesús.

⁹ Ta sa siñi ra Jesús cuhva cahan ra cuan, ta iyo xaan i cuñi ra sa cuenda ra cu nuu cuan. Ta i nasico cava ra, ta i catyi ra sihin ñiyivi ndyico sii ra: Catyi sihin ndo vatyí tañaha ca nañihi sii minoo ra hebreo ra sino iñi sii ra Ndyoo tañi sino iñi ra cuan. Catyi ra.

¹⁰ Ta cuanuhu ra i tasi ra cu nuu cuan, ta sa nasaa ra i ndyehe ra vatyí sa nduvaha muzu cuan.

Zanandoto ra Jesús sii zehe minoo ñandahvi sa sihi yi

¹¹ Yaha cuan ta inga quivi cuahan ra Jesús minoo ñuu sa nañi Naín. Ta cuahan tucu ra sica noo sihin ra ta cuaha xaan ca ñiyivi.

¹² Ta cuhva sa cua saa ra yatyi ñi ñuu cuan, ta ndyehe ra vatyí quita cuaha xaan ñiyivi ñuu cuan. Ta ndyizo ñu minoo ndiyi. Minoo tuhun ñi zehe ña iyo cuu ra i sihi cuan. Ta ñandahvi cuu maa ña.

¹³ Ta sa ndyehe ra Jesús sii ña, i cundahvi xaan iñi ra sii ña, ta i catyi ra: Ma vacun.

¹⁴ Ta i tuhva ra Jesús, ta i tiin ra satu ñoho ndiyi. Ta ra ndyizo satu cuan, i sicuñi ra. Ta i catyi ra Jesús sihin ra ñoho cuan: Ra yoco, catyi suhun vatyí nduviton.

¹⁵ Tacuan ta i nduvita ra cuan, ta i quisaha cahan ra. Ta i nacuhva cuenda ra Jesús sii ra sii zihí ra.

¹⁶ Ta i yuhu xaan tandihi ñiyivi i ndyehe. Ta i zacahnu xaan ñu sii ra Ndyoo, ta i catyi ñu: Ihya ra cuu minoo profeta cahnu. Ta inga ñu i catyi: Cahnu xaan sa zavaha ra Ndyoo sihin yo vityi.

¹⁷ Ta i sito ñiyivi nacahnu Judea ta nacahnu ityi cuan cuhva i zavaha ra Jesús.

Tasi ra Juan sii uu tahan ra sica noo sihin ra ndya nu ndyaa ra Jesús

¹⁸ Ta i nacaty i ra sica noo sihin ra Juan sihin ra tandihi sa zavaha ra Jesús. Ta i cana ra Juan sii uu tahan ra sica noo sihin ra.

¹⁹ Ta i tasi ra sii ra nu ndyaa ra Jesús vaty i cua ndaca tuhun ra sii ra tatu ra Cristo cuu ra, ra cua zacacu sii ñiyivi, a tatu cuñi si sa cuatu ra ndya cua quisi inga ra.

²⁰ Ta saa ra i tasi ra Juan nu ndyaa ra Jesús, ta i catyi ra sihin ra: ¿Atu yoho cuu Cristo, ra cua zacacu sii ndi a cuatu ca ndi naquisi inga ra?

²¹ Ta zuun ñi cuhva sa yucu ra cuan, i zanduvaha ra Jesús sii cuaha xaan ñiyivi cuhu, cuaha nuu cuehe, ta ñu ñoho taty i cuihna. Ta cuaha xaan ñiyivi cuaa i nandyehe zacuu ra.

²² Tacuan ta i catyi ra Jesús sihin ra i tasi ra Juan: Cuahan ndo ta nacaty i ndo sihin ra Juan tandihi sa i ndyehe ndo ta sa siñi ndo. Nacaty i ndo cuhva nandyehe ra cuaa, ta cuhva nacaca ra coxo, ta cuhva nduvaha ra tyahyu, ta cuhva nacuiñi ra zoho, ta cuhva nandoto ñiyivi i sihi. Ta nacaty i ndo cuhva siñi ñiyivi ndahvi Tuhun Vaha, cuhva cua cacu ñu.

²³ Ta catyi ndo sihin ra vaty i zii xaan cua cuñi ñiyivi tatu ma zaña ñu sa sino iñi ñu sii. Catyi ra Jesús sihin ra.

²⁴ Ta sa yaha cuahan ra i tasi ra Juan, ta i quisaha ndaca tuhun ra Jesús sii ñiyivi, ta catyi ra: ¿Ñaa sa sindyehe ndo quivi i sahan ndo nu ityi xaan nu yoñi ñiyivi iyo? ¿Atu sahan ndo vaty i cua ndyehe ndo minoo tuñi sa canda zacuu taty i?

²⁵ ¿A atu sahan ndo vaty i cua ndyehe ndo sii minoo ra ñoho zahma vaha? Zoco ña tacuan vaty i ñiyivi ñoho zahma vaha xaan, iyo ñu vehe rey.

²⁶ ¿Atu yivi minoo ra cu profeta cuu sa sindyehe ndo? Zuun. Ta cahnu ca ra cuu ra ta ziqui tandihi inga ra cahan tuhun i saha ra Ndyoo sii ra.

²⁷ Zuun ra cuu ra sa cahan si tuhun nuu tutu ra Ndyoo nu i tyaa ra Isaías tyehen: “Yuhvi ra Ndyoo cua tasi sii minoo ra ityi nuu ca, ta cua zanduvaha ra cuhva iyo ñiyivi vaty i cua saa moo cuee ca, ta cua tyizoho ñu sa cohon.”

²⁸ Ta catyi sihin ndo vaty i tandihi rayi ra cacu, yoñi inga ca ra ñiñi ca ta ziqui ra Juan. Zoco ra luhlu ca, ra cuhun nu ndyaca ñaha ra Ndyoo, cahnu ca ra ta ziqui ra Juan, ra zacoo ndutya sii ñiyivi. Catyi ra Jesús.

²⁹ Ta tandihi ñiyivi sa siñi sa cahan ra Jesús ta ra tava xuhun cuenda ra ndyaca ñaha, i zacahnu xaan ñu sii ra Ndyoo, ta nacoto ñu vaty i ndoo xaan sa zavaha ra Ndyoo. Sa yaha sicoo ndutya maa ñu i zacuu ra Juan.

³⁰ Zoco ra fariseo ta ra maestro cuenda ley hebreo ñá cuñi ra quihin ra sa saha ra Ndyoo sii ra. Yucuan cuenda ñá cuñi ra coo ndutya ra.

³¹ Ta i catyi ra Jesús sa cuenda ra: ¿Ñaa ñi cuhva quehin sihin ñiyivi iyo vityi? ¿Tañi yoo ñi sa caa caa ñu?

³² Caa ñu tañi sa ndyih i sa ndyaa nuyahvi, ta cana saa si sii tahan si, ta catyi si: “Tivi ndi cutu, ta ñá sata saha ndo. Ta sata ndi yaa tucuihya iñi, ta ñá sacu ndo.”

³³ Tacuan iyo maa ndo vaty i ra Juan, ra i zacoo ndutya sii ñiyivi, i quisi ra ta ñá sasi vaha ra, ta ñá sihi ra vino. Ta catyi ndo vaty i ñoho minoo taty i cuihna sii ra.

³⁴ Ta ziqui i saa mi, ra i quisi ndya gloria. Ta sasi ta sihi. Ta catyi ndo vaty i tuhva xein coho ta cuahy i xein. Ta cuxaan ndo vaty i vaha ñiyivi cui sihin ra iyo cuaty i ta sihin ra tava xuhun cuenda ra ndyaca ñaha.

³⁵ Ta catyi sihin ndo vaty i saha ra Ndyoo sa siñi tuñi maa ra sii ñiyivi sino iñi sii ra. Ta cua zañaha ñu sii maa ndo vaty i vaha sa siñi tuñi ra Ndyoo.

Sasi ra Jesús xita vehe minoo ra fariseo sa nañi Simón

³⁶ Ta i cana minoo ra fariseo sii ra Jesús sa cua casi ra xita vehe ra. Ta cuahan ra Jesús vehe ra fariseo cuan, ta sicundyaa ra mesa.

³⁷ Tacuan ta minoo ñaha zii ñi ñuu cuan i sito ña vatyí ndyaa ra Jesús vehe ra fariseo cuan, ta i quisi ña sihin minoo yutyí azetye vixi.

³⁸ Ta i sicuiñi ndyaa ña saha ra Jesús, ta i sacú xaan ña vatyí ndu-uu ñi ña cuatyí ña, ta i quisaha nacatya ña saha ra Jesús sihin ndutya nuu ña. Ta ziqui i zana-ityí ña saha ra sihin ixi xiñi ña. Ta sihi ña saha ra. Ta i saca ña azetye vixi cuan saha ra.

³⁹ Ta cuhva sa ndyehe ra Simón tacuan, ta i sica ñi ra: “Tatu ndisa vatyí minoo ra profeta cuu ra ya, cua nacoto ra yozo caa iyo ñaha sa tiin sii ra vatyí iyo xaan cuatyí ña.”

⁴⁰ Ta i catyí ra Jesús sihin ra Simón: Simón, iyo minoo tuhun cuñi nacatya suhun. Ta i catyí ra Simón: Vaha, maestro. Nacatyun sihin.

⁴¹ Ta i catyí ra Jesús sihin ra: Sicoo minoo ra, ta uu tahan ra i sitavi sii ra. Minoo ra tavi ra ohon ziendu denario (tañi ohon mil peso cuu si). Ta inga ra tavi ra uu xico usi ñi denario (tañi ohon ziendu peso ñi).

⁴² Ta nduu tahan ra cuan, ñá cuu tyiyahvi ra sa tavi ra. Ta ra sa saha noo xuhun cuan, zaha ra tucahnu ñi sii nduu tahan ra, ta ñá tyiyahvi ca ra sii ra. Ta vityí catyun, Simón, ¿ndya ra cua cuñi ca sii ra sa saha noo cuan? Catyí ra Jesús.

⁴³ Ta i nacahan ra Simón ta catyí ra: Ra sa cuaha ca tavi cuan. Catyí ra. Tacuan ta i catyí ra Jesús: Ndisa sa cohon.

⁴⁴ Ta ziqui i nandyehé ra Jesús sii ñaha cuan, ta i catyí ra sihin ra Simón: Ndyehun sii ñaha ya. Yuhvi i quihvi vehun, ta ñá sohon ndutya ndoo sehi. Zoco maa ña i nacatya ña sehi sihin ndutya nuu ña, ta zana-ityí ña sihin ixi xiñi ña.

⁴⁵ Yoho ñá suhun xiti. Zoco ndya cuhva ndya quihvi ihya ta ñá zaña maa ña sa sihi ña sehi.

⁴⁶ Ñá tyuhun azetye xiñi. Zoco ihya ñaha i tyihi azetye vixi sehi.

⁴⁷ Yucuan cuenda catyí suhun, Simón, vatyí vazu cuaha xaan cuatyí ña iyo, zoco sa zehi tucahnu ñi sii ña tandihí si. Yucuan cuenda cuñi xaan ña sii. Inga ñiyivi sa zuhva ñi cuatyí ñu iyo, zuhva ñi zehi tucahnu ñi sii ñu, ta zuhva ñi cuñi ñu sii.

⁴⁸ Ta i catyí ra Jesús sihin ñaha cuan: Sa ndasi cuatyun. Catyí ra.

⁴⁹ Tacuan ta inga ra yucu mesa sihin ra, i quisaha sica ñi ra sihin aña ra: “¿Yoo ra cuu ra ya vatyí zandasi tucu ra cuatyí ñiyivi?”

⁵⁰ Ta i catyí ra Jesús sihin ñaha cuan: Cuahan vityí, sa cacun vatyí sino ñun. Cuahan sihin sa vaha.

8

Ñuzihi sa tyindyee sii ra Jesús

¹ Yaha cuan ta cuee ca ta cuahan ra Jesús tahan tahan ñuu nahnu ta ñuu ndyíhi. I cahan ra Tuhun Ndyoo nuu ñiyivi. Ta i zacoto ra sii ñu Tuhun Vaha, cuhva cuñi ra Ndyoo cundyaca ñaha ra sii ñu. Ta ndihí sa usi uu tahan ra i casi ra sihin ra.

² Ta cuahan tucu ñu zihí sihin ra. Maa ñu cuu ñu i zanduvaha ra ta cuhu ñu a i ñoho tatyí cuihna sii ñu ta i tava ra. Ta cuahan ña María minoo ñaha ñuu Magdala sihin ñu. I siñoho usa tahan tatyí cuihna sii ña, ta nduvaha ña.

³ Ta cuahan tucu ña Juana, ñazihí ra Chuza. Minoo ra cu tyiño sa cuenda ra rey Herodes cuu maa ra. Ta cuahan ña Susana ta cuaha xaan ca ñu cuahan. Ta i tyindyee ñu sii ra Jesús sihin xuhun ñu.

Cahan ra Jesús ziqui minoo cuhva, cuhva ra tasi

⁴ Cuaha xaan ñiyivi i quita sa ziin ziin ñuu, ta titahan ñu vatyí cua tyizoho ñu sa cahan ra Jesús. Ta i cahan ra sihin ñu ziqui minoo cuhva ta catyí ra:

⁵ Cuahan minoo ra nu iyo tyiño ra vatyí cua quití ra siti trigo nu ñuhu ra. Ta cuhva sa quití ra sii si, zuhva si canacoyo si ityí. Ta i sañi ñiyivi sii si, ta i sasi zaa sii si.

⁶ Ta zuhva siti cuan, i canacoyo si nu yaxi ñoho ñuhu vatyí ñoho xaan yuu. Ta quivi i caña si, i na-ityí si vatyí ña coco caa ñuhu ta i cumañi ndutya sii si.

⁷ Ta zuhva siti cuan, i canacoyo si ticui iñu. Ta i caña si sisi iñu, zoco i zahvi iñu sii si. Ta ñá saha si siti si.

⁸ Ta zuhva ca siti cuan, i canacoyo si nu vaha ñuhu, ta saha xaan si siti si. Iyo si saha si minoo ziendu siti si. Catyi ra Jesús. Ta sa yaha cahan ra tuhun cuan, i cana saa ra, ta i catyi ra: Tatu siñi ndo, cuiñi ndo sa quehin. Catyi ra.

⁹ Tacuan ta i ndaca tuhun ra i casi ra sii ra ñaa cuñi si catyi si cuhva cahan ra sihin ñiyivi.

¹⁰ Ta i catyi ra Jesús sihin ra: Saha ra Ndyoo sa coto maa ndo tuhun xehe sa cuenda cuhva ndyaca ñaha maa ra. Zoco sihin inga ñiyivi, maa ñi sihin minoo cuhva quehin vaty cua ndyehe ñu, zoco ma nacoto ñu ñaa sa ndyehe ñu. Cua cuiñi ñu, zoco ma cutuñi iñi ñu.

¹¹ Ihya cuu cuhva cuñi si catyi si: Siti cuan cuu tañi Tuhun Ndyoo.

¹² Ta tañi sa canacoyo siti cuan ityi, tacuan iyo minoo ityi ñiyivi siñi Tuhun Ndyoo. Ta saa cuihna, ta quindyaa ra sii si sisi aña ñu coto cua sino iñi ñu ta cacu ñu.

¹³ Ta tañi sa canacoyo siti nu ñoho xaan yuu iyo inga ityi ñiyivi sa siñi Tuhun Ndyoo. Zi xaan cuñi ñu sihin si zuhva ñi quivi, zoco ña quihvi vaha si aña ñu. Ta ña naha cua sino iñi ñu. Tatu cua quisi minoo tundoho ziqui ñu a cuxaan ñiyivi sihin ñu sa cuenda Tuhun Ndyoo, yaty xaan cua zaña ñu sii si.

¹⁴ Ta inga ñiyivi cuu tañi sa canacoyo siti nu ndyaa iñu. Siñi ñu Tuhun Ndyoo, zoco sica xaan iñi ñu inga tuhun, tuhun sa iyo ñuu ñiyivi. Sica iñi ñu tuhun sa nducuca ñu ta cuhva cua cuzi iñi ñu ñuu ñiyivi ya. Ta ma zatyño vaha Tuhun Ndyoo sihin ñu.

¹⁵ Zoco tañi siti canacoyo nu vaha ñuhu, tacuan iyo inga ñiyivi. Ndo xaan iyo ñu, ta vaha xaan aña ñu. Siñi ñu Tuhun Ndyoo, ta zavaha ñu sii si. Ta cundyee xaan iñi ñu. Ta cuaha xaan sa vaha zavaha ñu cuhva catyi Tuhun Ndyoo.

Cuhva sii minoo lámpara

¹⁶ Tatu tyaa ñiyivi minoo lámpara sisi vehe ñu, ma tyihi ñu sii si xu sito a inga nu xehe. Ña tacuan vaty tyaa ñu sii si nu zucu vaty tacuan ta ndundisi sisi vehe, ta cuu ndyehe ñiyivi quihvi sisi vehe.

¹⁷ Ta tañi lámpara tatu ñoho xehe si, tacuan iyo cuhva zacuehi sii ndo vityi. Zoco cua coo quivi ta cua cuiñi ñiyivi nacahnu ñuu ñiyivi cuhva zacuehi ihya.

¹⁸ Yucuan cuenda coto vaha ndo sii ndo sihin sa siñi ndo vaty tatu tyaa ndo yahvi sa quehin, cuaha ca cua zacuehi sii ndo. Zoco tatu ma tyizoho ndo cua quindyee ndya cuhva ndya sa zuhva ñi sa sica iñi ndo vaty sa cutuñi iñi ndo.

Zihi ra Jesús ta yañi ra

¹⁹ Tacuan ta i saa zihhi ra ta yañi ra Jesús, zoco ñá cuu quihvi ñu nu ndyaa ra vaty tuu xaan ñiyivi.

²⁰ Ta i zacoto ñiyivi yucu yucuan sii ra ta catyi ñu: Zihun ta yañun, nandyaa ñu sata vehe, ta cuñi ñu cahan ñu suhun.

²¹ Ta i nacahan ra Jesús, ta catyi ra: Ñiyivi sa cuu zihhi ta yañi cuu ñu siñi Tuhun Ndyoo ta zavaha ñu sii si.

Zacutaxi ra Jesús taty ta ndutya

²² Minoo quivi i quihvi ra Jesús minoo barco sihin ra i casi ra. Ta i catyi ra sihin ra: Coho yo inga siyo miñi. Ta cuahan ra sihin barco cuan.

²³ Ta cuhva sa cuahan ra mahñu miñi cuan, ta quixi ra Jesús. Ta sicava minoo taty cahnu xaan. Ta quihvi ndutya sisi barco. Ta i situ tu, ta i quisaha ndyee tu.

²⁴ Ta i zandoyo ra sii ra Jesús ta catyi ra: ¡Maestro! ¡Maestro! ¡Sa cuñi cunaa yo! Catyi ra. Ta i nduvita ra Jesús, ta i cahan ra sihin taty ta sihin ndutya, ta i cutaxi si.

²⁵ Ta i catyi ra sihin ra yucu sihin ra: ¿Ñacu ña ñi iñi ndo? Catyi ra. Zoco ra cuan, yuhu xaan ra, ta iyo xaan i cuñi ra. Ta i quisaha ndaca tuhun ra sii ra tahan ra: ¿Yoo ra cuu ra ya? vaty cuhva ndya taty ta cuhva ndya ndutya ta tyaa si yahvi sii ra.

Minoo ra ñoho taty cuihna

²⁶ Tacuan ta i saa ra Jesús nu cu si Gadara sa ndyaa inga siyo miñi cahnu sa nañi Galilea.

²⁷ I quita ra Jesús barco, ta i tuhva minoo ra ñuu cuan sii ra. Sa naha xaan ñoho tatyí cuihna sii ra, ta ña ñoho ra zahma ra, ta ña ndyaa ra vehe ra. Sica noo ñi maa ra nu ñaña.

²⁸⁻²⁹ Ta tuhva tatyí ña vaha cuan tiin sii ra, ta yucuan cuenda sihñi ñu cadena ndaha ra ta saha ra vatyí ma cuu cuhun ra. Zoco i sahnu ra cadena sihin fuerza sa saha tatyí ña vaha cuan sii ra, ta i zacono tatyí cuan sii ra ndya nu yoñi ñiyivi iyo. Ta cuhva sa ndyehe ra sii ra Jesús, i sicuñi siti ra nuu ra, ta i cana saa ra, ta catyí ra: ¿Ñaa sa cuñun sihin mi, Jesús? Moo cuu zehe Ndyoo ra cahnu ca. Sa ndyoo ñi ma zandyehun tundoho sii. Tacuan i catyí ra vatyí sa catyí ra Jesús sihin tatyí cuihna vatyí naquita si sisi añima ra.

³⁰ Ta ziqui i ndaca tuhun ra Jesús sii ra: ¿Ñaa nañun? Ta tatyí cuan nacahan si ta catyí si: Nañi Legión. Tacuan catyí tatyí ña vaha cuan vatyí cuaha xaan si ñoho sii ra.

³¹ Ta i sica tatyí ña vaha cuan tumañi iñi sii ra Jesús sa ma zacuhun ra sii si sisi minoo xahva cono xaan nu ma cuu quita si.

³² Ta sica tatyí ña vaha cuan sii ra Jesús vatyí nacuhva ra sa quihvi si sisi quini vatyí yucu xaan ti yucuan. Ta i saha ra Jesús sa quihvi si sisi quini cuan.

³³ Ta i quita tatyí ña vaha cuan sii ra ndahvi cuan, ta i quihvi si sisi quini cuan. Ta ñihi xaan i cacono quini cuan nu iñi noo yuhu miñi. Ta i sihi tandihí ti sisi ndutya.

³⁴ Ta cuhva sa ndyehe ra zacuenda quini cuan sa tahan ti, i sino xaan ra, ta i nacatyí ra sihin ñiyivi sa ndyehe ra sisi cuhu ta sisi ñuu.

³⁵ Ta i quita coyo ñiyivi vatyí cua ndyehe ñu ñaa sa cuu, ta i saa ñu nu ndyaa ra Jesús. Ta i ndyehe ñu sii ra sa quita tatyí cuihna cuan. Nandyee ra nuu ra Jesús. Sa ñoho ra zahma ra, ta sa nduvaha cuñi xiñi ra. Ta i yuhu xaan ñu.

³⁶ Ta ñiyivi i ndyehe, i nacatyí ñu sihin inga ñu cuhva i quita tatyí ña vaha sii ra ta i nduvaha ra.

³⁷ Tacuan ta cuaha xaan ñiyivi nacahnu Gadara i catyí ñu sihin ra Jesús vatyí nacuhun ra vatyí i yuhu xaan ñu sa cuenda cuhva i zavaha ra sihin tatyí cuihna cuan. Ta i nandihvi ra Jesús sisi barco.

³⁸ Ta ra sa quita tatyí cuihna cuan, i sica ra sii ra Jesús sa cuhun ra sihin ra, zoco i catyí ra Jesús sihin ra:

³⁹ Cuanuhun ndya vehun. Ta nacatyun sihin ñiyivi suun ñaa sa i zavaha ra Ndyoo suhun, cuhva sa cahnu xaan i tyindyee ra suun. Ta cuahan ra cuan, ta i nacatyí ra nacahnu ñuu ra cuhva sa cahnu xaan i zavaha ra Jesús sihin ra.

Nduvaha zehe ra Jairo, ta i tiin minoo ñaha yuzahma ra Jesús

⁴⁰ Ta quivi sa nasaa ra Jesús inga siyo miñi, cuaha xaan ñiyivi ndatu sii ra. Ta zii xaan cuñi ñu vatyí nasaa ra.

⁴¹ Tacuan ta i saa minoo ra sa nañi Jairo. Minoo ra cu tyiño cuenda vehe ñuhu ñuu cuan cuu ra. Ta i sicuñi siti ra nuu ra Jesús, ta i sica xaan ra tumañi iñi sii ra sa cuhun ra sihin ra ndya vehe ra.

⁴² Vatyí minoo tuhun ñi zehe ra iyo. Usi uu cuiya ña, ta sa cuñi cuu ña sihin cuehe. Ta cuahan ra Jesús vehe ra cuan. Ta i sindyico cuaha xaan ñiyivi sii ra. Ñihi xaan i catyíhi ñu sii ra.

⁴³ Ta ticui ñiyivi cuan ñoho minoo ñaha cuhu. Sa usi uu cuiya sa cuhu ña cuehe sa cuu ña niñi. Cuaha xaan médico i zacuu tata sii ña. I zanaa ña tandihí cuii sa iyo sii ña. Zoco ña nduvaha ña sihin cuhva zavaha médico.

⁴⁴ Ta i quisi ña ityí sata ra Jesús zava mahñu ñiyivi cuan, ta i tiin ña yuzahma ra. Ta zuun ñi caa cuhva cuan i sicuñi niñi ña.

⁴⁵ Ta i catyí ra Jesús: ¿Yoo sa tiin sii? Ta tandihí ñiyivi cuahan sihin ra catyí ñu vatyí yivi maa ñu. Ta ra Pedro ta inga ra ndihí sihin ra Jesús i catyí ra: Maestro, tuu xaan ñiyivi cuahan suhun, ta catyíhi ñu suun. ¿Ta ñaa cuenda ndaca tuhun yoo sa tiin suun?

⁴⁶ Zoco i catyí ra Jesús: Iyo minoo ñiyivi i tiin sii, vatyí tuu iñi vatyí cuahan zuhva tundyee iñi sii.

⁴⁷ Ta sa sito ñaha cuan vatyí ma cuu tyixehe ña, ta i quisaha ñihi ña vatyí yuhu xaan ña. Ta i sicuñiñi siti ña nuu ra Jesús. Ta ityi nuu tandihí ñiyivi i nacatyí ña sihin ra ñaa cuenda i tiin ña sii ra ta yozo caa i nduvaha ña sa zuun ñi caa cuhva cuan.

⁴⁸ Ta i catyi ra Jesús sihin ña: Zihí, i nduvohon vatyí i sino iñun sii. Cuahan sihin sa vaha. Catyi ra.

⁴⁹ Nii ñi sa cahan ra Jesús tuhun ya, ta i quisi minoo ra iyo vehe ra Jairo cuan. Ta i catyi ra sihin ra Jairo: Sa sihi zehun. Ma zayanga con sii ra maestro ya.

⁵⁰ Ta sa siñi ra Jesús tuhun cuan, i catyi ra: Ma yuhun. Sino iñun ta cua nduvaha ña.

⁵¹ Ta sa saa ra Jesús vehe ra Jairo, ñá saha ra quihvi ñiyivi, maa ñi ra Pedro ta ra Jacobo ta ra Juan ta ra Jairo, zutu ña, sihin ñazihí ra.

⁵² Ta i sacú xaan tandihí ñiyivi vatyí i sihi ña, zoco i catyi ra Jesús: Ma vacu ndo. Ñá sihi ña. Quixi ña.

⁵³ Ta i sacú ndyaa ñu sii ra vatyí sito ñu vatyí sa sihi ña.

⁵⁴ Tacuan ta i tiin ra Jesús ndaha ña luhlu cuan, ta i catyi ra sihin ña: Ñaha luhlu, nduviton.

⁵⁵ Ta i nandihvi añima ña, ta zuun ñi caa cuhva cuan i nduvita ña. Ta i catyi ra sihin ñu nacuhva ñu sa casi ña.

⁵⁶ Iyo xaan i cuñi zutu ña ta zihí ña, zoco ñihi xaan i saha ra tyiño sii ñu sa ma nacatyí ñu nu sihin minoo ñiyivi cuhva i cuu.

9

Tasi ra Jesús sii sa usi uu tahan ra i casi ra vatyí cua nacatyí ra Tuhun Ndyoo sihin ñiyivi

¹ I zandu-iin ra Jesús sii sa usi uu tahan ra i casi ra, ta i saha ra tundyee iñi sii ra vatyí cua tava ra tatyí ña vaha, ta cua zanduvaha ra sii ñiyivi cuhu.

² Ta i tasi ra sii ra sa cahan ra Tuhun Ndyoo, ta cua nacatyí ra sihin ñiyivi cuhva ndyaca ñaha ra Ndyoo. Ta cua zanduvaha ra sii ñiyivi cuhu.

³ Ta i catyi ra Jesús sihin ra: Ñahñi sa cuizo ndo ityi cuhun ndo. Ma cuñaa ndo numinoo tutatu, ta numinoo yiti, ta nu sa casi ndo. Ma cuizo ndo xuhun. Ndihi ñoho ñi ndo zahma ndo cuhun ndo, ta ma cuizo ndo inga.

⁴ Tatu saha ñiyivi minoo vehe cundyaa ndo, yucuan ndoo ndo ndya cua cuhun ndo inga ñuu.

⁵ Ta tatu saa ndo minoo ñuu ta ña cuñi ñiyivi tyizoho ñu sa cahan ndo, quita ndo ñuu cuan. Naquizi ndo saha ndo vatyí ma cuhun nu ñiyaca ñuu cuan sihin ndo. Tacuan ta cua coto ñiyivi vatyí i zavaha ñu sa ña vaha sihin ndo. Tacuan i catyi ra Jesús.

⁶ Ta i quihin ra ityi cuahan ra tahan tahan ñuu. I nacatyí ra Tuhun Vaha sihin ñiyivi, ta nacahnu i zanduvaha ra sii ñu cuhu.

Cuñi ra rey Herodes coto ra yoo ra cuu ra Jesús

⁷ Ra Herodes i cuu ra ndyaca ñaha nacahnu Galilea. Ta i ñihi ra tuhun sa cuenda tandihí sa zavaha ra Jesús. Ta ñá ñihi vaha ra cuhva yoo ra cuu ra Jesús vatyí zuhva ñiyivi i catyi ñu vatyí ra Juan cuu ra ta i nandoto ra.

⁸ Ta inga ñiyivi i catyi ñu vatyí ra Elías cuu ra Jesús. Ta inga ñu i catyi ñu vatyí i nandoto minoo ra profeta.

⁹ Zoco i catyi ra Herodes: Zuun ñi mi i tava tyiño sii ra sahndya yuu zucu ra Juan. ¿Ta yoo ra cuu ra siñi xein tuhun vityi? Ta i cuñi xaan ra Herodes ndyehe ra sii ra Jesús.

Cuhva i saha ra Jesús sa casi ohon mil rayii

¹⁰ Ta i nasaa coyo ra apóstol, ta i nacatyí ra sihin ra Jesús tandihí sa i zavaha ra. Tacuan ta i quihin ra Jesús sii ra ta cuahan ra sihin maa ñi maa ra ityi ñuu Betsaida.

¹¹ Zoco i sito ñiyivi, ta sindyico tuu xaan ñu sii ra, ta i cahan vaha ra sihin ñu sa cuenda cuhva ndyaca ñaha ra Ndyoo. Ta i zanduvaha ra sii ñiyivi cuhu.

¹² Ta sahiñi i tuhva ra i casi ra sii ra, ta i catyi ra sihin ra Jesús: Catyun sihin ñiyivi nacuhun ñu tandihí ñuu, tandihí cuadria sa ndyaa yatyí ñi cuzata ñu sa casi ñu ta cuzu ñu vatyí ñahñi maa sa iyo ihya.

¹³ Zoco i catyi ra Jesús sihin ra: Cuhva maa ndo sa casi ñu. Ta i catyi ra sihin ra Jesús: Ñahñi maa sa cumi ndi ihya, ohon tahan ñi pan ta uu tahan ñi tyiyaca. ¿A atu sica iñun sa cuu zata ndi sa casi tandihi ñu ya? Catyi ra.

¹⁴ Vatyí tañi ohon mil rayii yucu yucuan. (Ta ziin ñu zihí ta sa ndyihi.) Ta i catyi ra Jesús sihin ra i casi ra: Catyi ndo sihin ñu vatyí nacundyaa ñu. Uu xico usi tahan ñu sa minoo minoo ityi ñu.

¹⁵ Ta tacuan i sicundyaa ñu i zacuu ra.

¹⁶ Ta ziqui i quihin ra Jesús sa ohon tahan pan ta uu tahan tyiyaca, ta i nandyehé ndaa ra ityi andivi, ta i saha ra tyahvi ndyoo sii ra Ndyoo. Ta i sahnu ndyihi ra pan ta tyiyaca cuan. Ta i nducuaha si. Ta i saha ra sii si sii ra i casi ra vatyí cua zasa ra sii si sii ñiyivi.

¹⁷ Ta i sasi tandihi ñu, ta i ndaha xaan iñi ñu. Ta ziqui i zanacutu ñu usi uu tahan tyica sihin yiqui pan sa nandoo ta tyiyaca cuan.

Nacatyí ra Pedro vatyí ra Jesús cuu ra cua zacacu sii ñiyivi

¹⁸ Minoo quivi i quita ziin ra Jesús sihin ra i casi ra minoo nu taxi ñi, ta i sica tahvi ra Jesús sii ra Ndyoo. Ta yaha cuan ta ziqui i ndaca tuhun ra sii ra ndihi sihin ra ta catyi ra: ¿Yoo ra cui, catyi ñiyivi?

¹⁹ Ta i nacahan ra ta catyi ra: Iyo ñu catyi ñu vatyí ra Juan, ra i zacoo ndutyá quivi cuan cuun. Ta inga ñu catyi vatyí ra Elías cuun. Ta inga tucu ñu catyi vatyí i nandoto minoo profeta, ta zuun ra cuan cuun. Catyi ñu.

²⁰ Tacuan ta i ndaca tuhun ra Jesús sii tandihi ra ta catyi ra: ¿Ta yoo ra cui catyi maa ndo? Ta i nacahan ra Pedro ta catyi ra: Yoho cuu ra Cristo. Zehe ra Ndyoo.

Nacatyí ra Jesús yozo caa cua cuu ra

²¹ Ta i nacatyí ra Jesús sihin ra i casi ra vatyí ma nacatyí ra tuhun cuan sihin numinoo ñiyivi.

²² Ta i catyi ra: Cuaha xaan tundoho cua ndyehe ra i quisi ndya gloria. Cua cuxaan ra mandoñi ta ra zutu nahnu ta ra maestro cuenda ley hebreo sihin ra. Ta cua cahñi ra cuan sii ra. Ta sa cu uñi quivi cua nandoto ra.

²³ Ta i catyi ra Jesús sihin tandihi ra: Tatu iyo ra cuñi ra cundyico ra sii, nazama ra cuhva iyo ra. Ta ma zacahnu ra sii ra. Ta nandyehé ra tundoho sa cuenda mi. Ta nazavaha ra cuhva zavehi.

²⁴ Tatu ña cuñi ñiyivi sa cuu ñu sa cuenda Tuhun Ndyoo, cua cuu ñu. Ta cua cuhun ñu andyaya. Ta ma cundito ñu sihin ra Ndyoo. Zoco tatu cua cuu ñiyivi sa cuenda mi a sa cuenda Tuhun Ndyoo, cua cundito ñu sihin ra Ndyoo.

²⁵ ¿Ñaa sa ñihi ñiyivi sa zahacanaa ñu tandihi sa iyo ñuu ñiyivi ta quivi cua cuu ñu ndaha cua naa ñu?

²⁶ Tatu iyo ra cahan nuu sa cuenda mi a sa cuenda Tuhun Ndyoo, tacuan tucu cua cucahan nui sihin ra. Vatyí ra i quisi ndya gloria cui, ta cua quisi tuqui sihin ángel. Ta cua ndyehe ñiyivi vatyí cahnu xaan cuu Zuti.

²⁷ Ta sa ndisa cuii catyi sihin ndo vatyí iyo zuhva ra yucu ihya, ma cuu ra ndya cuhva ndya cua ndyehe ra cuhva cua cundyaca ñaha ra Ndyoo.

Cuhva i zama ra Ndyoo cuhva caa ra Jesús minoo saha

²⁸ I yaha tañi uña quivi sa yaha catyi ra Jesús cuhva cuan. Ta ziqui i ndaa ra Jesús xiñi minoo yucu cua cahan ra sihin ra Ndyoo, ta cuahan ra Pedro ta ra Juan ta ra Jacobo sihin ra.

²⁹ Ta cuhva sa sica tahvi ra sii ra Ndyoo, ta i zama cuhva caa nuu ra, ta i nducuisi xaan zahma ra ta xiño xaan si.

³⁰ Ta i quituu uu tahan ra natuhun sihin ra. Minoo ra cuu ra ra Moisés, ta inga ra cuu ra ra Elías. (Ra i sihi ta sa naha cuu nduu tahan ra cuan.)

³¹ Ndisi xaan nu siyucu ra, ta i cahan ra tuhun yozo caa cua cuu ra Jesús ñuu Jerusalén.

³² Ta ra Pedro ta ra tahan ra cuñi xaan ra cuzu ra, zoco ñá quixi ra vatyí ndyehe ra sa ndisi xaan nu nandyaa ra Jesús sihin sa uu tahan ra nandyaa sihin ra.

³³ Ta cuhva sa cuahan ra yucu sihin ra Jesús, i catyi ra Pedro sihin ra Jesús: Maestro, vaha xaan yucu yo ihya. Nazavaha ndi uñi tahan vehe tyiyahva, minoo cuenda moo, ta minoo cuenda ra Moisés, ta minoo cuenda ra Elías, catyi ra. Zoco ñá sito ra Pedro ñaa tuhun cahan ra.

³⁴ Ta cuhva sa cahan ra Pedro tacuan ta i noo minoo vico ta ndaha tyazi si sii tandihi ra. Ta i yuhu xaan ra sa quihvi ra sisi vico cuan.

³⁵ Ta sisi vico cuan i siñi ra minoo nduzu sa catyi: Ra ihya cuu Zehi. Cuñi xein sii ra. Cuiñi ndo sa cahan ra.

³⁶ Ta sa yaha cahan nduzu cuan, tuhun cuan, ta i ndyehe ra ndihi sihin ra Jesús vatyí ña ndyaa ca inga ra cuan sihin ra Jesús. Maa tuhun ñi ca maa ra. Ta i sicumi xehe ra tandihi sa i ndyehe ra, ta sisi quivi cuan ñá nacatyí ra sihin numinoo ñiyivi.

Zanduvaha ra Jesús sii minoo ra luhlu sa ñoho tatyí cuihna

³⁷ Ta inga quivi cuhva sa noo ra yucu cuan, cuaha xaan ñiyivi i zatahan sii ra Jesús.

³⁸ Ta minoo ra ñoho ticuti ñiyivi cuan i cana saa ra ta catyi ra: Maestro, sica xein tumañi iñi suun sa cua ndyehun sii zehi vatyí minoo tuhun ñi zehi iyo.

³⁹ Ñoho minoo tatyí cuihna sii ra, ta ndya vaha ñi cuhva nduxaan si sii ra. Ta sacú saa ra, ta zanduva si sii ra nu ñuhu, ta saa tiñi yuhu ra. Ña zaña si sii ra, ta zañicuehe si sii ra.

⁴⁰ Sa catyi vatyí natava ra i casi moo sii si, zoco ñá cuu sii ra.

⁴¹ Ta i nacahan ra Jesús, ta catyi ra (sihin tandihi ñiyivi): Ndoho cuu ñiyivi ña sino iñi. ¿Yozo tahan ca quivi cua ndoi sihin ndo ta ziqui cua sino iñi ndo? Ma cundye e iñi cundyei sihin ndo naha xaan ca. Sa naha xaan cundye e iñi sihin ndo. Ta ndyaca sii zehun ihya.

⁴² Ta cuhva sa vasi ra luhlu cuan, i zanduva tatyí cuihna cuan sii ra ta quiñi xaan i tahan ra. Ta xaan xaan i cahan ra Jesús sihin tatyí ña vaha cuan. Ta i zanduvaha ra sii ra luhlu cuan, ta ziqui i nacuhva cuenda ra sii ra sii zutu ra.

⁴³ Ta iyo xaan i cuñi tandihi ñiyivi vatyí cahnu xaan cuu tundyee iñi maa ra Ndyoo.

Zacoto tucu ra Jesús inga saha cuhva cua cuu ra

Ñi ñi sa iyo xaan cuñi tandihi ñiyivi sihin sa zavaha ra Jesús ta i quisaha catyi ra sihin ra i casi ra:

⁴⁴ Tyizoho vaha ndo sa quehin vatyí cua xico minoo ra sii ra i quisi ndya gloria. Ta cua tiñi ñiyivi sii. Catyi ra Jesús.

⁴⁵ Zoco, ñá cutuñi iñi ra ñaa tuhun cahan ra. Ta ñá nacatyí ra Jesús sihin ra ñaa cuñi si catyi si. Ta yuhu ra ndaca tuhun ra sii ra Jesús ñaa tuhun cahan ra.

¿Yoo ra cuu ra ñiñi ca?

⁴⁶ Tacuan ta i quisaha natuhun tahan xaan ra i casi ra Jesús sa cuenda cuhva yoo ra cuu ra ñiñi ca sii ra.

⁴⁷ Ta i sito ra Jesús ñaa sa sica iñi ra cuan sihin añima ra. Ta i quihin ra sii minoo ra luhlu, i sañi ndyaa ra sii ra ii siyo xiin ra.

⁴⁸ Ta i catyi ra sihin ra ndihi sihin ra: Tatu zavaha ñiyivi sa vaha sihin minoo ra luhlu sa cuenda mi, tañi sihin mi zavaha ñu sa vaha cuu si. Ta tatu zavaha ñiyivi sa vaha sihin mi, zavaha ñu sa vaha sihin Zuti. Ta ra sa luhlu ca zaha maa ndo tuhun, yucuan ra cuu ra cahnu ca ityi nuu ra Ndyoo. Ta ra sa cahnu ca cuñi ndo, yucuan ra cuu ra luhlu ca ityi nuu ra Ndyoo. Catyi ra Jesús.

Tatu ña cahan ñiyivi ndya vaha ñi sii yo, tyindyee ñu sii yo cuhva cuan

⁴⁹ Tacuan ta i catyi ra Juan: Maestro, i ndyehe ndi minoo ra tava tatyí cuihna sihin zivi moo, zoco yivi ra tahan ndi cuu ra. Ta i catyi maa ndi sihin ra vatyí ma zavaha ra tacuan.

⁵⁰ Ta i catyi ra Jesús sihin ra: Ña vaha sa ñá saha ndo. Vatyí tatu ña cahan ñiyivi ndya vaha ñi sii yo, tyindyee ñu sii yo.

Catyí ra Jesús vatyí ña vaha cuhva sica iñi ra Jacobo ta ra Juan

⁵¹ Ta sa cuñi saa quivi cunanuhu ra Jesús ndya gloria, ityi i quisi ra. Yucuan cuenda cuñi ra Jesús cahun ra ñuu Jerusalén nu cua cuu ra. Ta i quihin ra ityi cuahan ra.

⁵² Ta i tasi ra tyiño ityi nuu ca nu cuahan ra, ta i quihvi ra i tasi ra minoo ñuu nu cu si Samaria vatyí cua nducu ra minoo nu cua quitatu ra Jesús.

⁵³ Ta ñá saha ra samaritano sa cundyaa ra Jesús ñuu ra vatyí cuahan ra Jerusalén. (Ta ña cuu ndyehe ñiyivi samaritano sii ñiyivi ñuu Jerusalén.)

⁵⁴ Ta cuhva sa sito ra Jacobo ta ra Juan vatyí ñá saha ra samaritano sa cundyaa ra ñuu ra ta i cuxaan ra ta catyi ra: Tata, ¿atu cuñun vatyí zavaha yo cuhva i zavaha ra Elías ta sa naha? Cua caca yo sii ra Ndyoo nazaquisi ra ñúhu ziqui ñiyivi Samaria, ta cua cayu tandihi ñu. Catyi ra.

⁵⁵ Zoco xaan xaan i cahan ra Jesús sihin ra ta catyi ra: Taxi ñi ndo. Ña cutuñi iñi ndo ñaa tyiño vasi.

⁵⁶ Ra i quisi ndya gloria cui, ta ña vasi zanei sii ñiyivi, vasi zacaqui sii ñu. Catyi ra. Ta ziqui cuahan coyo ra inga ñuu.

Ñu cuñi cundyico sii ra Jesús

⁵⁷ Ta cuhva sa cuahan ra ityi, i catyi minoo ra sihin ra Jesús: Tata, cuñi cundyique suun vazú ndya ndya maa cuohon.

⁵⁸ Ta i catyi ra Jesús sihin ra: ¿Atu ndison? vatyí yuhvi, ñahñi sa iyo sii. Iyo vehe ñicuii, ta iyo taca zaa. Zoco ra i quisi ndya gloria ñahñi vehe ra iyo.

⁵⁹ Tacuan ta i catyi ra Jesús sihin inga ra: Cundyicon sii. Zoco i catyi ra cuan: Tata, cuatu ndya nacuu zuti, ta ziqui cua cundyique suun.

⁶⁰ Ta i catyi ra Jesús sihin ra: Ña vaha sa ñoho xaan iñun tuhun ñiyivi suun. Natyihi ñiyivi ña sito sii ra Ndyoo sii tahan sihi sihin ñu sisi ñuhu, zoco yoho cuahan ta nacatyun sihin ñiyivi cuhva ndyaca ñaha ra Ndyoo.

⁶¹ Tacuan ta ziqui i catyi inga ra sihin ra Jesús: Tata, cua cundyique suun, zoco cuhvon sa cunuhu xihne cua naquehin sihin ñiyivi sii.

⁶² Zoco i catyi ra Jesús sihin ra: Yoo ra quisaha zatyíño ra tyiñe ta ndu-uu iñi ra, ma cuu quihvi ra nu ndyaca ñaha ra Ndyoo.

10

Tasi ra Jesús sii uñi xico usi tahan ra cua nacatyi Tuhun Ndyoo sihin ñiyivi

¹ Sa yaha cuan ta ziqui i casi ra Jesús uñi xico usi tahan ca ra. Ta i tasi ra sii ra ityi nuu ra. Uu uu ra cuahan tandihi ñuu ta tandihi ityi nu cua cuhun ra Jesús cuee ca.

² Ta i catyi ra sihin ra: Tañi minoo itu cahnu xaan, tacuan iyo tyiño zavehi. Zoco ña cuaha muzu iyo. Yucuan cuenda caca ndo sii ra Ndyoo natasi ca ra muzu vatyí cua tyindyee ra sihin tyiño, ta cua nacatyi tucu ra Tuhun Ndyoo sihin ñiyivi.

³ Cuahan ndo ta ma naa iñi ndo vatyí tañi mvee ticatyi lee cuu ndo, ta tasi sii ndo nu yucu xaan ina nduvahu.

⁴ Ta ma cuizo ndo xuhun nu sa quihí xuhun ndo a inga ndisa ndo. Zanumi ndo, ta ma cucuee xaan ndo ityi sa natuhun ndo sihin ñiyivi.

⁵ Ta yoo sii vehe saa ndo, sa xihna ñi catyi ndo: “Nacoo sa taxi sa saha ra Ndyoo sii ndo.” Catyi ndo.

⁶ Ta tatu ndisa vatyí iyo ñiyivi vaha vehe cuan, cua ndoo sa vaha sihin ñu. Zoco tatu yoñi ñu vaha añima, ma ndoo sa vaha sihin ñu.

⁷ Ta minoo ñi vehe nu cua saa ndo, yucuan ndoo ndo. Casi ndo ta coho ndo ñaa sa saha maa ñu sii ndo. Vatyí minoo ra zatyíño, iyo cuhva sii ra sa ñihi ra sa casi ra. Ta ma quita ndo vehe nu ndyaa ndo ta cundyaa ndo ziiñ ziiñ vehe.

⁸ Ta ñaa ñi maa ñuu saa ndo, tatu vaha cahan ñu sihin ndo, casi ndo ñaa sa cua cuhva ñu sii ndo.

⁹ Zanduvaha ndo sii ñiyivi cuhu ñuu cuan, ta catyi ndo sihin ñiyivi: “Sa cuñi saa cuhva cundyaca ñaha ra Ndyoo.”

¹⁰ Zoco tatu quihvi ndo minoo ñuu ta ña tiñ cuenda ñu sii ndo, quita ndo ityi cahnu ta catyi ndo sihin ñu:

¹¹ “Ndyá cuhva ndya ñiyaca ñuu ndo sa iñi saha ndi ta cua tava ndi sii si. Minoo zeña cuu si vatyí cua ndoo cuatyí ndo ziquí ndo. Zoco coto ndo vatyí sa cuñi quisi quivi cundyaca ñaha ra Ndyoo.” Tacuan catyí ndo sihin ñu. Catyí ra Jesús.

¹² Ta catyí tucu ra Jesús sihin ra: Ta catyí ndo vatyí quivi cua tasi tuñi ra Ndyoo sii ñiyivi, ñihi ca cua tasi tuñi ra sii ñiyivi ñuu ña tñn cuenda sii ndo ta ziquí ca ñiyivi ñuu Sodoma.

Cua ndyehe xaan ñiyivi tundoho vatyí ña tyaa ñu yahvi sa cahan ra Jesús

¹³ Tacuan ta i catyí ra Jesús: Ndahvi ndoho ñiyivi ñuu Corazín. Ta ndahvi ndoho ñiyivi ñuu Betsaida vatyí ña zama ndo cuhva iyo ndo vazu ndyehe ndo sa ndyityi nahnu. I zanaa ra Ndyoo sii ñiyivi ñuu Tiro ta ñuu Sidón ta sa naha sa cuenda cuatyí ñu. Zoco tatu sa i ndyehe maa ñu sa ndyityi nahnu tañi sa ndyehe maa ndo, cua zandoo ndisa cuii ñu cuatyí ñu, ta cua zama ñu cuhva iyo ñu, ta cacu ñu.

¹⁴ Yucuan cuenda, ndoho ñiyivi ñuu Corazín ta ñiyivi ñuu Betsaida, ñihi ca cua tasi tuñi ra Ndyoo sii ndo ta ziquí sii ñiyivi ñuu Tiro ta ñuu Sidón cuan.

¹⁵ Ta ndoho ñiyivi ñuu Capernaum, sica iñi maa ndo vatyí cua ndaa ndo ndya andivi, zoco cua noo ndo ndya andyaya vatyí ña tyaa ndo yahvi sii Tuhun Ndyoo.

¹⁶ Ta i catyí ra Jesús sihin sa uñi xico usi tahan ra cuan: Ñiyivi tyizoho sa cahan maa ndo, tañi tyizoho tucu ñu sa cahan mi cuu si. Ta ñiyivi ña tyaa yahvi sii maa ndo, ña tyaa tucu ñu yahvi sii mi. Ta tatu ña tyaa ñu yahvi sii mi, ña tyaa ñu yahvi sii ra i tasi sii.

Nasaa coyo sa uñi xico usi tahan ra i tasi ra Jesús

¹⁷ Tacuan ta cuee ca i nasaa coyo sa uñi xico usi tahan ra cuan, ta zii xaan cuñi ra, ta catyí ra sihin ra Jesús: Tata, ndya cuhva ndya tatyí cuihna ta tyaa si yahvi sa cahan ndi tatu cahan ndi zivun. Catyí ra.

¹⁸ Tacuan ta i catyí ra Jesús sihin ra: I ndyehi cuhva i canacava cuihna cu nuu sa nañi Satanás ndya andivi. Tañi caa minoo tasa zavi; tacuan caa cuhva canacava ra.

¹⁹ Ta sehi tundyee iñi sii maa ndo, ta cuu zahacanaa ndo ziquí tandihi cuhva sa iyo sii cuihna. Ta cuu cuañi ndo ziquí coo ta ziquí tizuhma, ta ñahñi maa sa cuu zañicuehe sii ndo.

²⁰ Zoco ma zii xaan cuñi ndo vatyí cuu tava ndo tatyí cuihna cuan. Zii ca cuñi ndo vatyí sa ndyaa zivi ndo nu libro ra Ndyoo andivi.

Zacahnu ra Jesús sii ra Ndyoo vatyí cuaha xaan sa zañaha ra Ndyoo sii ñiyivi ndahvi

²¹ Cuhva cuan ta zii xaan i cuñi ra Jesús zacuu Tatyí Ii, ta i catyí ra: Zacahnu xein suun Ndyoo Zuti. Yoho ndyaca ñohon andivi ta ñuu ñiyivi. Tyixehun sa siñi tuñi suun sii ñiyivi sica iñi vatyí sito xaan ñu, ta zañohon sii si sii ñu cuu tañi sa ndyihí ñuu ñiyivi ya. Tacuan zavohon vatyí tacuan cuñi moo. Catyí ra Jesús.

²² Ta i catyí ra Jesús sihin tandihi ra zatyíño tyiño ra: Saha maa ra Ndyoo Zuti tandihi sa iyo sii ra sii mi. Ta yoñi sa sito sii. Maa ñi ra Ndyoo Zuti cuu ra sito sii. Ta maa ñi mi sito sii ra Ndyoo Zuti. Yoñi inga ra sito sii ra sa ndisa cuii. Ta zañehi sii yoo ra cuñi, cuhva iyo Zuti sa ndisa.

²³ Ta ziquí i nandyehé ra Jesús sii ra i casi ra, ta i catyí ra iin ñi sihin maa ra: Zii xaan cuu sii maa ndo vatyí ndyehe ndo tandihi sa ndyehe ndo.

²⁴ Vatyí catyí sihin ndo vatyí cuaha xaan rey ta ra profeta ta sa naha, i cuñi xaan ra ndyehe ra sa ndyehe maa ndo vityí, zoco ñá ndyehe ra sii si. Ta i cuñi xaan ra cuiñi ra sa siñi maa ndo, ta ñá siñi ra sii si.

Zacuaha ra Jesús vatyí tahan si tyindyee yo sii ñiyivi ndya vaha ñi

²⁵ Tacuan ta i cahan minoo ra maestro cuenda ley hebreo. I cuñi ra nducu coto ihñi ra sii ra Jesús, ta i ndaca tuhun ra sii ra: Maestro, ¿yozo caa zavehi ta ñihi tahvi añime?

²⁶ Ta i catyí ra Jesús sihin ra: ¿Ñaa sa catyí ley? ¿Ñaa sa cahvun yucuan?

²⁷ Ta i nacahan ra cuan, ta catyí ra: Catyí si vatyí cuñi xaan yo sii ra Ndyoo sihin tandihi cuii añima yo, sihin sa ñii iñi yo, sihin tandihi tundyee iñi sii yo, ta sihin tandihi sa siñi

tuñi sii yo. Ta catyi tucu ley vatyi cuñi si sa cuñi xaan yo sii inga tahan yo tañi cuñi yo sii maa yo. Tacuan catyi si. Catyi ra cuan.

²⁸ Ta i catyi ra Jesús sihin ra: Ndisa sa cohon. Tacuan zavohon, ta cua ñihi tahvi añimon. Catyi ra Jesús.

²⁹ Zoco ra maestro cuenda ley hebreo cuan, i cuñi ra zañaha ra vatyi vaha cuhva i ndaca tuhun ra. Yucuan cuenda i catyi tucu ra: Zoco ¿yoo ra cuu tehin?

³⁰ Ta i nacahan ra Jesús ta catyi ra: I quita minoo ra ñuu Jerusalén ta cuahan ra ndya ñuu Jericó. Ta i tahan ra sii ra zuhu. Ta i zuhu ra tandihi cuii sa ndyizo ra ndya cuhva ndya zahma ra, ta i cañi xaan ra sii ra ndya cuhva sa yatyi cahñi ra sii ra. Ta ziqui i zandoo ra sii ra.

³¹ Tacuan ta i yaha minoo ra cu zutu ityi cuan. Ndyehe ra sii ra catuu ra yucuan, ta i yaha ra ndya zava.

³² Ta ziqui i yaha tucu inga ra cuenda vehe ñuhu. Minoo ra tyindyee sii ra cu zutu cuu ra. Zoco i saa ra, ta i ndyehe ra sii ra catuu ra yucuan, ta ziqui i yaha ra ndya zava.

³³ Tacuan ta i yaha minoo ra samaritano sihin burro zono ra ityi cuan. Ta i ndyehe ra sii ra, ta i cundahvi xaan iñi ra sii ra.

³⁴ Ta i noo ra burro zono ra, ta i zavaha ra tata sii ra. I tyihi ra azetye ta vino nu cahvi ra, ta i nazucu ra zahma sii ra, ta i tyizo ra sii ra sata burro zono ra. Ta i quihin ra sii ra ta i sinducu ra minoo nu cua cundyaa ra ta zacuu ca ra tata sii ra.

³⁵ Ta inga quivi i cuñi ra samaritano cuan cuhun ra, ta i tava ra xuhun ta saha ra sii ra xu vehe. Ta i catyi ra sihin ra: “Zacuendon sii ra ya. Ta ñaa ca sa cua zanaa ndo sihin ra, yuhvi cua nacuhve sii ndo naquisi inga saha.” Tacuan i catyi ra ta cuahan ra. Catyi ra Jesús.

³⁶ Tacuan ta ziqui i ndaca tuhun ra Jesús sii ra maestro cuenda ley cuan ta catyi ra: Sisi sa uñi tahan ra cuan, ¿yoo ra cuu ra tahan ra ndahvi cuan?

³⁷ Ta i catyi ra maestro cuan: Ra sa cundahvi iñi sii ra. Ta i catyi ra Jesús sihin ra: Cuahan, ta zuun ñi cuhva cuan zavaha tucu moo.

Sahan ra Jesús vehe ña Marta ta ña María

³⁸ Ta cuahan ra Jesús minoo ityi, ta saa ra minoo ñuu. Ta yucuan ndyaa minoo ñaha sa nañi Marta. Ta i tñin cuenda ña sii ra vehe ña.

³⁹ Ta iyo minoo cuhu ña Marta. Nañi ña María. Ta i sicundyaa ña saha ra Jesús ta tyizoho ña sa cahan ra.

⁴⁰ Zoco cuaha xaan tyiño i zavaha ña Marta sa zavaha ña sa casi ra, ta i quisi ña nu ndyaa ra Jesús ta catyi ña sihin ra: Tata ¿atu ña sica iñi oo sa zandoo cuhi sii, ta zatyine maa tuhun ñi? Catyun sihin ña natyindyee ña sii.

⁴¹ Zoco i catyi ra Jesús sihin ña: Marta, Marta, sica xaan iñun cuaha xaan cuhva.

⁴² Zoco iyo minoo ñi sa ñiñi xaan, ta sa i cutuñi vaha iñi ña María cuhva vaha cuan. Ta yoñi cua cuu quindyaa cuhva cuan sii ña. Catyi ra Jesús.

11

Zañaha ra Jesús yozo caa caca tahvi yo sii ra Ndyoo

¹ Ta minoo saha sa sica tahvi ra Jesús sii ra Ndyoo ta sa ndihi sica tahvi ra, ta i catyi minoo ra i casi ra sihin ra: Tata, zañohon sii ndi yozo caa caca tahvi ndi sii ra Ndyoo tañi i zañaha ra Juan sii ra i sica noo sihin ra.

² Tacuan ta i catyi ra Jesús sihin ra: Cuhva sa cua cahan ndo sihin ra Ndyoo tyehen catyi ndo: “Ndyoo Zutu ndi ra ndyaa andivi, ii xaan cuu zivi moo. Nasaa quivi cua cundyaca ñohon ihya ñuu ñiyivi. Nazavaha ñiyivi cuhva cuñi moo ihya ñuu ñiyivi tañi cuu si ndya gloria.

³ Cuhvon sa siñi ñuhu sii ndi minoo minoo quivi.

⁴ Ta zohon tucahnu iñi sii ndi sa cuenda cuatyi ndi tañi maa ndi zaha ndi tucahnu iñi sii ñiyivi zavaha sa ña vaha sihin ndi. Ma cuhvon sa nducu coto ihñi cuihna sii ndi coto zavaha ndi sa ña vaha.” Tacuan i zacuaha ra Jesús sii ra.

⁵ Ta ziqui i catyi tucu ra: Tatu maañuu cua soon vehe amigun ta catyun sihin ra: “Xaa, cuhva noo ñi tahan pan sii.

⁶ Vatyí nacaá saa ra tehin. Sica xaan i quisi ra, ta ñahñi maa sa cuhve casi ra.”

⁷ Ta ndya sisi vehe cua cahan amigun, ta cua catyi ra: “Ma zayangon sii. Sa ndazi cutu yuvehi. Ta quixi sa ndyihí zehi. Ta coto ndoyo si, ma cuu nduvite ta cuhve suun vityi.” Tacuan cua catyi ra suhun.

⁸ Ta catyi suhun vatyí vazu amigun sii ra cuan, zoco ma nduvita ra ta cuhva ra sa yatyí. Zoco tatu ndoon yucuan ta ndita ñi cacon sii ra, tacuan ta cua nduvita ra ta cuhva ra yozo tahan si cuñun.

⁹ Ta tacuan tucu maa ndo. Caca ndo sii ra Ndyoo, ta cua cuhva ra sa sica ndo. Nanducu ndo, ta cua nañihi ndo. Cati ndo yuvehe, ta cua nuña si.

¹⁰ Vatyí tandíhi ndoho ra sica, cua ñihi ndo. Ta tatu nanducu ndo, cua nañihi ndo. Ta tatu cati ndo yuvehe, cua nuña si.

¹¹ Ndoho, ra cuu zutu sa ndyihí, tatu cua caca zehun minoo pan ¿atu cua cuhva ndo minoo yuu sii ra? Ña tacuan. A tatu caca ra minoo tyiyaca ¿atu cua cuhva ndo minoo coo?

¹² A tatu cua caca ra minoo ndiví ¿atu cua cuhva ndo minoo tizuhma? Ña tacuan.

¹³ Ñiyívi quiñi xaan cuu maa ndo, zoco sito ndo yozo caa cuhva ndo sa vaha sii zehe ndo; vaha xaan ca cua zavaha ra Ndyoo, ta cua cuhva ra Tatyí li sii ñiyívi sica sii ra.

Catyí ra xaan iñi sii ra Jesús vatyí zatyíño ra sihin tundyee iñi sii cuihna

¹⁴ Tava ra Jesús minoo tatyí cuihna sii minoo ra ñehe. Ta cuhva sa quita tatyí cuihna cuan ta i cuu nacahan ra ñehe. Ta iyo xaan i cuñi ñiyívi.

¹⁵ Zoco zuhva ñu i catyi ñu: Tava ra ya tatyí cuihna sihin tundyee iñi ra Beelzebú, ra cu nuu sii cuihna. Catyi ñu.

¹⁶ Ta inga ñu nducu coto ihñi ñu sii ra Jesús, ta i sica ñu sa zañaha ra minoo zeña ityi andiví.

¹⁷ Zoco i sito ra Jesús cuhva sica iñi ñu, ta i catyi ra sihin ñu: Tatu sahñi tahan xaan ñiyívi minoo ñuu, ndaha cua tiví ta naa ñuu cuan. Ta tacuan tucu minoo vehe ñiyívi, tatu sahñi tahan ñu sihin tahan ñu, yatyí xaan cua ndíhi cuhva vaha nu yucu ñu.

¹⁸ Ta ma cahñi tahan ra cu nuu sii cuihna sihin inga cuihna vatyí tatu tacuan zavaha si, yatyí xaan cua ndíhi cuhva iyo sii si. Ma tava cuihna sii cuihna. Ta catyi ndo vatyí yuhvi tave sii cuihna sihin tundyee iñi sii ra cu nuu sii cuihna.

¹⁹ Zoco tatu yuhvi tave sii cuihna sihin tundyee iñi ra Beelzebú, tacuan tucu zavaha ra ndyico sii maa ndo. Zoco maa ra cuan cua nacatyí sihin ndo vatyí ma tava minoo cuihna sii inga cuihna.

²⁰ Ta yuhvi tave sii cuihna sihin tundyee iñi maa ra Ndyoo. Ta cuñi si catyi si vatyí ndisa cuii sa saa cuhva ndyaca ñaha ra Ndyoo.

Zañaha ra Jesús vatyí ñihi ca tundyee iñi iyo sii ra Ndyoo ta ziqui sii cuihna

²¹ Tatu minoo ra ñihi xaan zacuenda ra vehe ra sihin mityí ra, yoñi cuu quihin ndaha tyiño ra.

²² Zoco tatu quisi inga ra ñihi ca ta ziqui ra cuan ta quindyaa ra mityí ra, ma cuu ca zacacu ra sii ra. Ta cuu quihin inga ra ndaha tyiño ra ta zasa ra sii ra tahan ra.

²³ Tatu ña zatyíño ñiyívi sihin, zativí ñu tyiñe. Ta tatu ma tyindyee ñu sii, sa nacatyí Tuhun Ndyoo sihin ñiyívi, cuñi si catyi si vatyí ña saha ñu sa coto ñiyívi tuhin.

Cuhva nandisi tucu tatyí ña vaha inga saha tatu naa iñi ñiyívi sii ra Ndyoo

²⁴ Tatu quita minoo tatyí ña vaha sii minoo ra, sica noo tatyí cuihna cuan nu ityi xaan, ta nanducu si nu cua quitatu si. Zoco ña nañihi si nu quitatu si, ta catyi si: “Cunuhu tuqui ndya vehi nu i quite”, catyi si.

²⁵ Tacuan ta nasaa si añima ra cuan nu i quita si. Ta ndyehe si vatyí ndii xaan; yoñi ndyaa yucuan.

²⁶ Ta ziqui cuahan si, ta quihin si usa tahan ca tatyí cuihna xaan ca ta ziqui maa si. Ta ndihvi tandihí tatyí cuihna cuan añima ra cuan, ta ndoo si. Ta yaha ca cuhva cua nanduu ra cuan ta ziqui sa xihna ñi.

Ñiyivi sa zii xaan cuñi sa ndisa

²⁷ Ta ñii ñi sa cahan ra Jesús cuhva cuan, ta i cana saa minoo ñaha sa ñoho ticui ñiyivi, ta catyi ña: Zii xaan cuu sii ñaha i zacacu suun, ñaha i zacaxi suun.

²⁸ Zoco i catyi ra Jesús sihin ña: Ndison sa cohon, zoco zii xaan ca cua cuu sii ñu siñi Tuhun Ndyoo ta zavaha ñu sii si.

Maa maa ñi sa ndyityi cuñi ñiyivi ña vaha ndyehe ñu

²⁹ I siconduu cuii ñiyivi nu ndyaa ra Jesús, ta i catyi ra sihin ñu: Quiñi xaan iyo ñiyivi iyo vityi. Cuñi xaan ñu ndyehe ñu minoo zeña, zoco ñahñi inga ca zeña cua ndyehe ñu ta ziqui sa i cuu sa cuenda ra Jonás.

³⁰ Ra Jonás i cuu ra minoo zeña sii ñiyivi ñuu Nínive, ta tacuan tucu cua cuu ra i quisi ndya gloria sihin ñiyivi sa iyo vityi.

³¹ Quivi cua tyicuhva ra Ndyoo sii ñiyivi, cua nandoto minoo ñaha sa sindyaca ñaha sii ñiyivi ndya siyo tyañuhu ta sa naha. Ta maa ña cua tyaa cuatyí sata maa ndo vatyí sa ndisa iyo cuatyí ndo, vatyí ña tyizoho ndo sa cahan Zehe ra Ndyoo. Ta maa ña, sica xaan i sahan ña i sityizoho ña sa siñi tuñi sa saha ra Ndyoo sii ra rey Salomón. Ta vityi ndyaa inga ra cahnu ca ta ziqui ra Salomón sihin ndo, ta ña tyizoho ndo sa quehin.

³² Ta tacuan tucu ñiyivi ñuu Nínive, cua tyaa ñu cuatyí sata ndo quivi cua zandaa ra Ndyoo tyiño cuenda ñiyivi vatyí i tyizoho ñu sa cahan ra Jonás, ta i ndu-uu iñi ñu cuatyí ñu. Ta cahnu ca mi ta ziqui ra Jonás, ta ña cuñi ndo tyizoho ndo sa quehin.

Nazaha vaha yo cuenda sii yo coto ñahñi sa ndisi ra Ndyoo iyo sii yo

³³ Yoñi yo cua tyaa yo minoo tyuma ta tyihi yo sii si minoo nu xehe a sisi minoo caja vatyí ñúhu cuan tahan si cozo si minoo nu zucu vatyí tacuan ta ndisi ndyehe ñiyivi quihvi sisi vehe.

³⁴ Siti nuu yo cuu tañi minoo sa zandisi sii yo ta cuu ndyehe yo nu cuahan yo. Tatu vaha siti nuu yo, ndisi ndyehe yo nu cuahan yo. Ta tacuan tucu añima yo, tatu iyo sa ndisi sa saha ra Ndyoo añima yo, vaha ñiyivi cuu yo. Tatu ñahñi sa ndisi sa saha ra Ndyoo iyo añima minoo ñiyivi, yivi ñiyivi vaha cuu ñu. Tañi minoo ra cuaa cuu ñu.

³⁵ Yucuan cuenda zaha ndo cuenda sii ndo tatu ndyaa sa ndisi ra Ndyoo sihin ndo a sa ñaa.

³⁶ Tatu situ cuii sa ndisi ra Ndyoo añima ndo, nu siin ta ma cuu zavaha ndo sa ña vaha. Ñahñi ca sa quiñi ta sa ña vaha iyo sii ndo. Tatu sino iñi ndo, cuu si tañi minoo ñúhu cahnu zandisi sii ndo.

Tyaa ra Jesús cuatyí sata ra fariseo ta ra maestro cuenda ley hebreo

³⁷ Cuhva sa ndihí cahan ra Jesús ta i cana minoo ra fariseo sii ra vatyí cua casi ra xita vehe ra. Ta cuahan ra Jesús vehe ra. Ta i sicundyaa ra mesa.

³⁸ Ta i ndyehe ra fariseo cuhva zavaha ra. Ta iyo xaan i cuñi ra vatyí ña zavaha ra Jesús costumbre sa nacatya xaan ra ndaha ra tañi tuhva maa ñu zavaha cuee ca sa casi ñu xita.

³⁹ Ta i catyi ra Jesús sihin ra: Ndoho ra fariseo nacatya xaan ndo sata vaso ta sata coho, zoco sisi añima maa ndo yaha xaan quiñi iyo ndo ta zuhu xaan ndo.

⁴⁰ Tondo xaan iyo maa ndo. I zavaha ra Ndyoo sata vaso ta coño ñuhu maa ndo, zoco jatú sica iñi ndo vatyí ña zavaha tucu ra añima ndo?

⁴¹ Cuñi si sa cuhva ndo xuhun sii ñiyivi ndahvi ta zavaha ndo sa vaha sihin ñu. Tacuan ta cua ndundii tucu añima ndo.

⁴² Ndahvi ndoho ra fariseo vatyí saha ndo diezmo sii ra Ndyoo tandihí yucu sa tasi ndo tañi menta ta ruda ta inga sa sasi ndo, zoco ña zavaha ndo sa ñiñi ca vatyí ña zavaha ndo sa ndoo sihin ñiyivi, ta ña cuñi ndo sii ra Ndyoo sa ndisa cuii. Ta yucuan cuu sa ñiñi ca, ta ma naa iñi ndo sa cuhva ndo diezmo, ndihí ca.

⁴³ Ndahvi ndoho ra fariseo vatyí cuñi ndo cundyaa ndo tyayu vaha vehe ñuhu. Ta cuñi ndo sa zacahnu ñiyivi sii ndo nuyahvi.

⁴⁴ Ndahvi ndoho ra maestro cuenda ley ta ndoho ra fariseo vatyí zaha ndo tuhun vatyí vaha xaan ndo ta ña ndisa. Cuu ndo tañi ndiyi sa ñoho sisi ñaña, ta yaha ñiyivi ziqui si, zoco ña sito ñu ñaa sa ñoho. Catyi ra Jesús.

⁴⁵ Tacuan ta i nacahan minoo ra maestro cuenda ley sihin ra, ta catyi ra: Maestro, tatu cohon cuhva cuan, tyaa tucun cuatyí sata maa ndi.

⁴⁶ Ta i catyi tucu ra Jesús sihin ra: Ndahvi tucu ndoho ra maestro cuenda ley vehe ñuhu vatyí zanducuaha ca ndo ley i tasi ra Ndyoo ta sa naha, ta ña tahan si zavaha ndo tacuan. Yoñi sa cuu zavaha tandihi si. Ta nu maa ndo ta ña zavaha ndo tandihi si vatyí sa sito ndo vatyí ma cuu.

⁴⁷ Ndahvi ndoho vatyí zandutyiqui xaan ndo ñaña cuenda ra i cuu profeta ta sa naha, ta zuun ñi ñiyivi sahnu sii ndo ta sa naha i sahñi ñu sii ra cuan.

⁴⁸ Sihin cuhva zavaha ndo zañaha ndo vatyí ndoo ndo vaha cuhva i zavaha ñiyivi sahnu sii ndo ta sa naha vatyí maa ra i sahñi sii ra profeta, ta maa ndo zandutyiqui xaan ndo ñaña ra profeta cuan.

⁴⁹ Yucuan cuenda i catyi ra Ndyoo ta sa naha: Cua tasi sii ra cua cahan tuhun sa cua cuhve sii ra, ta cua tasi sii ra cua tave tyiño sa zatyíño ra tyiñe. Ta cua cahñi ñiyivi sii zuhva ra, ta sii inga ra cua zayanga xaan ñu.

⁵⁰ Ta ndisa vatyí tacuan zavaha ndo. Ta cua tasi tuñi ra Ndyoo sii maa ndo sa cuenda tandihi ra profeta i sahñi ñiyivi ta sa naha ta ndya cuhva ndya vityi.

⁵¹ Ndyá cuhva ndya ñiñi ra Abel, ra i sahñi ra Caín yañi ra, ta ndya cuhva ndya niñi ra Zacarías, ra i sahñi ñiyivi sisi vehe ñuhu, ta catyi sihin ndo sa ndisa cuii vatyí cua tasi tuñi ra Ndyoo sii ñiyivi iyo vityi sa cuenda tandihi si cuan.

⁵² Ndahvi ndoho ra maestro cuenda ley vehe ñuhu vatyí i tyixehe ndo ndaha ticui cuenda yuvehe nu quihvi ñiyivi ityi ra Ndyoo. Ñá quihvi maa ndo ityi cuan, ta inga ñiyivi sa cuñi quihvi, ña saha ndo sa quihvi ñu.

⁵³ Sa ndihi cahan ra Jesús tuhun cuan, ta ra maestro cuenda ley ta ra fariseo i cuxaan xaan ra sihin ra, ta i quisaha nducu tuhun xaan ra sii ra cuaha xaan cuhva

⁵⁴ vatyí nducu ra cuhva sa cahan ra Jesús minoo cuhva ña vaha. Ta ziqui cua tyaa ra cuatyí sata ra.

12

Nacatyí ra Jesús vatyí ma cuu tyixehe yo cuatyí yo

¹ Cuenda mil ñiyivi i titahan ndya cuhva catyíhi tahan ñu vatyí cuaha xaan ñu. Ta sa xihna ñi i catyi ra Jesús sihin ra i casi ra: Zacuenda vaha ndo sii ndo sihin cuhva iyo ra fariseo vatyí ra zandavi ñaha cuu ra.

² Vatyí tandihi sa ña vaha sa zavaha ñiyivi ta tyixehe ñu sii si, cuee ca ta cua quita si nu ndisi, ta cua coto inga ñiyivi sii si.

³ Yucuan cuenda ñaa ndihi ca sa cahan xehe ndo sisi vehe ndo, cua coo quivi cua cuiñi tandihi ñiyivi sii si. Ta vazú xehe xaan cahan ndo minoo tuhun, zoco cua coto tandihi cuii ñiyivi sii si cuee ca.

Cuñi si sa yuhu yo sii ra Ndyoo ta yivi sii ñiyivi

⁴ Ta catyi sihin ndoho ra cuu amigi vatyí ma yuhu ndo sii ra cuu cahñi sii coño ñuhu ñi ndo vatyí yaha cuan ta ñahñi ca sa cuu zacuu ra.

⁵ Zoco cua catyi sihin ndo yoo sii tahan si cuyuhu ndo. Cuyuhu ndo sii ra sa cuu cahñi sii ndo sa ndisa cuii ta zacuhun ra sii ndo andyaya.

⁶ Ña yahvi ndyaa zaa. Cuu zata yo ohon tahan ti sa uu peso. Ta ña naa iñi ra Ndyoo sii numinoo ti.

⁷ Ta sito ra Ndyoo yozo tahan ixi xiñi ndo iyo. Yucuan cuenda ma yuhu ndo sii ra cahñi sii ndo vatyí yahvi xaan ca ndyaa maa ndo ta ziqui ca cuaha xaan zaa.

Ma yuhu yo cahan yo Tuhun Ndyoo sihin ñiyivi

⁸ Ta catyi sihin ndo vatyí tandíhi ndo sa nacatyí ndo sihin ñiyivi vatyí sito ndo sii, yuhvi cua catyi sihin ángel ra Ndyoo ndya gloria vatyí site sii ndo. Ta ra i quisi ndya gloria cui.

⁹ Zoco yoo ra catyi vatyí ña sito ra sii, yuhvi cua catyi ityi nuu ángel vatyí ña site sii ra.

¹⁰ Ra i quisi ndya gloria cui, ta vazu cahan ñiyivi ndya vaha ñi sii, zoco cua zaha ra Ndyoo tucahnu iñi sii ñu. Zoco tatu cahan ñiyivi ndya vaha ñi sii Tatyí Ii ra Ndyoo, ma zaha ca ra Ndyoo tucahnu iñi sii ñu.

¹¹ Ta cuhva cundyaca ñiyivi sii ndo sisi vehe ñuhu a nuu ra cu juez a ra cu tyiño, ma caca xaan iñi ndo ñaa sa cua cahan ndo.

¹² Vatyí zuun ñi caa cuhva cuan cua cuhva Tatyí Ii tuhun cua cahan ndo.

Ica xaan tatu caca xaan iñi yo yozo caa ñihi yo xuhun

¹³ Cuaha xaan ñiyivi i siyucu sihin ra Jesús, ta minoo ra ndíhi sihin ñu i catyi ra sihin ra Jesús: Maestro, catyun sihin yañi vatyí natahvi zava ra ndaha tyiño sa zandoo zutu ndi sii ndi.

¹⁴ Tacuan ta i catyi ra Jesús sihin ra: Xaa, ¿yoo ra saha tyiño sii sa cui juez a cui minoo ra sa tahvi zava ndaha tyiño?

¹⁵ Ta i catyi ra Jesús sihin tandíhi ñiyivi: Zaha vaha ndo cuenda ta ma ndyiyo iñi ndo ndaha tyiño vatyí ña siñi ñuhu sa coo cuaha xaan ndaha tyiño yo ta coo vaha yo.

¹⁶ Ta i cahan ra Jesús ziqui minoo cuhva sihin ñiyivi, ta i catyi ra: Sicoo minoo ra cuca xaan, ta vaha xaan i cuu ndaha tyiño ra.

¹⁷ Ta i sica iñi ra sihin añima ra, ta i catyi ra: “¿Yozo caa cua zavehi? Ñahñi nu quihi tandíhi ndaha tyiño.

¹⁸ Zoco tyehen cua zavehi. Cua cani yaca ndyíhi, ta cua zavaha que sa nahnu ca. Ta yucuan cua quihi tandíhi niñi.

¹⁹ Tacuan ta ma zatyíño que cuaha xaan cuiya. Cua quitati, ta zii xaan cua cuñi. Cua casi vehi ta coho vehi.” Tacuan i sica iñi ra.

²⁰ Zoco i catyi ra Ndyoo sihin ra: “Tondo xaan sica iñun vatyí vityí sa cuaa cua cuun. Ta ndaha tyiño sa sicumi vaha xoon, cua ndoo si sihin inga ñiyivi.”

²¹ Ta tacuan iyo ñiyivi sa zacaya xaan ndaha tyiño sa cuenda ñi maa ñu, ta ñahñi maa sa iyo sii ñu nu ndyaa ra Ndyoo. Catyi ra Jesús.

Ma caca xaan iñi yo sa cuenda ñaa sa siñi ñuhu sii yo

²² Ta i catyi ra Jesús sihin ra i casi ra: Catyi sihin ndo vatyí ma caca xaan iñi ndo yozo caa cua ñihi ndo sa casi ndo ñuu ñiyivi ya. Ta ma caca xaan iñi ndo yozo caa cua ñihi ndo zahma quihi ndo.

²³ Vatyí iyo inga sa siñi ñuhu ca sii yo ta ziqui sa casi yo ta sa quihi yo.

²⁴ Ndyehe ndo cuhva iyo zaa. Ña tasi ti, ta ña naquihin ti tyiño zacuu ti, ta ña tyíhi vaha ti ndaha tyiño ti. Zoco sasi ti vatyí maa ra Ndyoo saha sa casi ti. Ta ñiñi xaan ca cuu maa ndo ityi nuu ra Ndyoo ta ziqui zaa cuan.

²⁵ ¿Ta yoo ndo cuu nduzucu ca ndo siin ca tatu caca xaan iñi ndo sa cuenda si? Ma cuu ca.

²⁶ Ta tatu ma cuu zavaha ndo numinoo cuhva luhlu cuan, ¿ña cuenda sica xaan iñi ndo sa cuenda tandíhi inga cuhva?

²⁷ Zaha ndo cuenda cuhva iyo ita vatyí ña tavi si ta ña cono si iza, zoco catyi sihin ndo vatyí vazu cuca xaan i cuu ra Salomón ta tyaqui xaan zahma ra, zoco ña tyaqui ca si ta ziqui minoo ita cuan.

²⁸ Ta tatu zandutyaqui xaan ra Ndyoo sii tu-ita sa iyo vityí ta ityaan cua nduu tu nducu ta cayu tu, tyaqui xaan tucu zahma cua cuhva ra sii maa ndo. Zoco maa ndo ña sino vaha iñi ndo sii ra.

²⁹ Ma caca xaan iñi ndo ta nanducu ndo sa casi ndo ta sa coho ndo. Ta ma caca xaan iñi ndo tatu cua cuhva ra Ndyoo sii si a ma cuhva ra.

³⁰ Vatyí sica xaan iñi ñiyivi ña sito sii ra Ndyoo sa cuenda sa casi ñu. Zoco ma caca xaan iñi maa ndo tuhun cuan vatyí sito Zutu ndo vatyí siñi ñuhu si sii ndo.

³¹ Vaha ca nducu ndo cuhva yozo caa cua cuhva cuenda ndo sii ndo sii ra Ndyoo vatyí cundyaca ñaha ra sii ndo. Ta tacuan ta cua ñihi ñdo tandíhi cuii sa siñi ñuhu sii ndo.

Cuhva vaha xaan sa iyo ndya gloria

³² Ma yuhu ndo, mvee ticatyí zone. Vazu ña cuaha ndo zoco zii xaan cuñi Zutu yo, ta cua cuhva ra quihvi ndo nu ndyaca ñaha ra.

³³ Xico ndo sa sii ndo ta cuhva ndo sii ñiyivi ndahvi. Tatu tacuan zavaha ndo, zacaya ndo sa vaha nu ndyaa ra Ndyoo. Ta yucuan ma ndíhi sa vaha cuan vatyí ma cuu quihvi ra zuhu, ta yoñi tiquixi zatívi sii si.

³⁴ Nu ndyaa sa cuca ndo, yucuan cuu nu ndyaa añima ndo.

Cuñi si sa cundyaa listo yo

³⁵ Cundyaa listo ndo, ta cuatu ndo quívi cua quisi inga saha.

³⁶ Cuu ndo tañi minoo muzu sa ndatu listo sii patrón ra ñaa quívi cua nasaa ra sa cuahan ra minoo vico tindaha. Ta cayu ñúhu sisi vehe vatyí tatu nasaa patrón ta cati ra yuvehe, yatyí xaan cua nuña muzu yuvehe.

³⁷⁻³⁸ Ta cuhva cuan zii xaan cua cuñi patrón ndyehe ra sii muzu ra vatyí ndatu listo ra ñaa ñi cuhva cua nasaa ra vazu sa cuaa a vazu ñaa ca. Ta cua tyaa ra sii muzu ra yumesa ta cuhva ra sa casi ra vatyí i ndatu ra sii ra. Ta zii xaan cua cuñi muzu cuan vatyí tacuan zavaha patrón ra sihin ra.

³⁹ Ta coto ndo cuhva ya vatyí tatu cua coto minoo ra xu vehe ñaa cuhva cua quihvi ra zuhu vehe ra, cua zacuenda xaan ra vehe ra. Ta ma cuzu ra. Ta ma cuhva ra sa nuña ra zuhu vehe ra ta zuhu ra ndaha tyiño ra.

⁴⁰ Zuun ñi cuhva cuan cundyaa listo tucu maa ndo vatyí zana ñi iñi ndo ta cuhva cuan cua nasaa ra i quisi ndya gloria.

Muzu vaha ta muzu ña vaha

⁴¹ Tacuan ta i ndaca tuhun ra Pedro sii ra Jesús ta catyí ra: Tata, ¿Yoo sii cuenda cohon tuhun ya? ¿Atu sa cuenda sa maa ñi maa ndi a sa cuenda tandíhi ñiyivi?

⁴² Tacuan ta i nacahan ra Jesús, ta i catyí ra sihin ra: Muzu sa tyizoho sa cahan patrón ra, yucuan cuu muzu vaha vatyí zacuenda ra vehe patrón ra. Ta saha ra sa casi tandíhi inga muzu minoo cuhva vaha.

⁴³ Ta zii xaan cua cuñi muzu cuan tatu nasaa patrón ra cuhva sa zatyiño ra ta zavaha ra tandíhi sa catyí patrón ra.

⁴⁴ Sa ndisa catyí sihin ndo vatyí cua cuhva patrón ra sa cundyaca ñaha ra tandíhi sa sii ra vatyí tyaa xaan ra yahvi sii patrón ra.

⁴⁵ Zoco tatu sica iñi muzu cuan vatyí naha xaan cuahan patrón ra, ta yucuan cuenda quisaha cañi ra sii inga muzu ta sasi cuahyi ra ta sihi xaan ra ndixi ta siñi ra,

⁴⁶ tacuan ta zana ñi iñi ra ta cua nasaa patrón ra minoo quívi sa ña ndatu ra sii ra. Ta cua tasi tuñi xaan patrón ra sii ra. Ta cua tahan si sii ra tañi cua tahan si sii ñiyivi ña sino iñi.

⁴⁷ Ta minoo muzu sa sito ñaa sa cuñi patrón ra zavaha ra, zoco ña ndyaa listo ra ta ña zavaha ra cuhva cuñi patrón ra, cuaha xaan tundoho cua zandyehe patrón ra sii ra.

⁴⁸ Ta tatu ña sito minoo muzu ñaa sa cuñi patrón ra ta ña zavaha ra sii si, tahan si sa ndoho ra. Zoco zuhva ñi cua ndoho ra vatyí ña sito ra. Ta tatu saha ra Ndyoo cuaha ca sa siñi tuñi sii minoo ra, cuaha ca sa vaha cuñi si zavaha ra. Ta tatu cuaha ca tyiño ndyizo minoo ra, cuñi si vatyí ñihi ca zatyiño ra.

Ña cuu cu-ñn ñiyivi sa cuenda ra Jesús

⁴⁹ Tañi sa zatehin minoo ñúhu ñuu ñiyivi, yucuan cuu tyiño vasi. Ta ñúhu cuan cua zanduvaha si sii ñu sino iñi sii, ta cua zanaa si sii ñu ña sino iñi. Sa quisaha cayu ñúhu cuan, zoco cumañi zacayu que sii si.

⁵⁰ Ta cuaha xaan tundoho cua ndyehi ndya cuhva ndya cua ndíhi tyiño zacui.

⁵¹ Sica iñi maa ndo vatyí vasi cuhve sa taxi ñuu ñiyivi, zoco ña tacuan. Vasi zacuziin sii ñiyivi.

⁵² Ta ndya vityi ta ityi nuu ca ihya cuu cuhva cua cuu si. Tatu ohon tahan ñiyivi iyo minoo vehe, uñi tahan ñu cua cahñi tahan sihin uu tahan ñu, ta uu tahan ñu cua cahñi tahan sihin uñi tahan.

⁵³ Cua cahñi tahan zutu sa ndyihí sihin zehe ra ta zehe ra sihin zutu ra. Ta zihí ña cua cahñi tahan sihin zehe ña, ta zehe ña sihin zihí ña. Ta cua cahñi tahan tyizo ña sihin sono ña ta sono ña sihin tyizo ña.

Nacatyí ra Jesús sihin ñiyivi vatyí ña nacoto ñu vatyí sa ndyaa Zehe ra Ndyoo

⁵⁴ Tacuan ta i catyí ra Jesús sihin ñiyivi yucu yucuan: Tatu ndyehe ndo vatyí iñi ñaa vityí, catyí ndo vatyí cua coon zavi. Ta ndisa ndo sa cahan ndo.

⁵⁵ Ta tatu ndyehe ndo vatyí vasi tatyí ityi tyañuhu, catyí ndo vatyí sa cua ndu-cahñi. Ta tacuan cuu si.

⁵⁶ Ra tondo xaan cuu maa ndo. Nacoto ndo sa iyo andivi ta nu ñuhu. ¿Yozo caa vatyí ña nacoto ndo ñaa tyiemvu cuu si vityí?

Nducu ndo cuhva coo sa taxi sii ndo sihin ra xaan iñi sii ndo

⁵⁷ ¿Ñaa cuenda ña cutuñi iñi ndo ñaa sa cuu sa ndoo?

⁵⁸ Tatu iyo minoo ra cuñi ra cuatyí suhun ta cuhun sihin ra nu ndyaa ra cu tyiño, nducun cuhva nacoo vohon sihin ra cuee ca sa saa ndo nuu ra cu tyiño coto catyí ra cu tyiño vatyí cuhun vehe caa. Ta cua cuhva ra suun sii ra cu policía. Ta cua tyihí ra suun vehe caa.

⁵⁹ Tatu tacuan cua cuu si, ma quiton ndya tyiyahvun tandihí sa tahan si tyiyahvun, (ta tacuan cua zavaha ra Ndyoo suhun andyaya tatu ma nduvohon sihin ra).

13

Cuñi si sa zama yo cuhva iyo yo

¹ Cuhva cuan yucu zuhva ra nacatyí sihin ra Jesús cuhva i zavaha ra Pilato sihin zuhva ra Galilea. Catyí ra nacatyí sihin ra Jesús vatyí i tava ra Pilato tyiño sa cahñi zandaru sii ra Galilea cuan ñi ñi sa saha ra ofrenda sii ra Ndyoo sisi vehe ñuhu. Ta i nazaca ra ñiñi ra cuan sihin ñiñi quití sa cuu ofrenda ra.

² Ta i nacahan ra Jesús, ta catyí ra sihin ra: Sica iñi ndo vatyí cahnu xaan cuatyí ra Galilea cuan. Ta yucuan cuenda ndyehe ra tundoho ta sihi ra.

³ Zoco catyí sihin ndo vatyí ña tacuan. Ta tatu ma zama maa ndo cuhva iyo ndo cunaa tucu maa ndo.

⁴ Ta sito ndo vatyí i sihi sahun uñi tahan ra quivi i nduva torre Siloé cuan ziqui ra. ¿Atu sica iñi ndo vatyí cuaha ca cuatyí ra cuan ta ziqui inga ra ñuu Jerusalén?

⁵ Ña tacuan. Ta tatu ma zama maa ndo cuhva iyo ndo, cunaa tucu maa ndo.

Ndatu ra Ndyoo sa nazama yo cuhva iyo yo

⁶ Tacuan ta i cahan ra Jesús ziqui cuhva ya, ta catyí ra: Sicoo minoo yutu higuera sii minoo ra nu ndyaa yoho uva ra. Ta i sahan ra ta i sinanducu ra yucu vixi nuu tu, ta ña ñañihi ra.

⁷ Ta i catyí ra sihin ra zanduvii nu ndyaa ndaha tyiño ra: “Ndyehe, sa uñi cuiya quisi nanduqui yucu vixi nuu tu ya, ta ña ñañihi. Cahndyon sii tu vatyí nandyaa ñi tu, ta ñahñi maa saha tu.” Catyí ra.

⁸ Zoco i nacahan inga ra, ta catyí ra sihin ra: “Tata, nandoo tu minoo ca cuiya. Cua zanduvite ñuhu saha tu ta tyihí ñuhu tyahyu.

⁹ Ta tatu cuhva tu yucu vixi, vaha, ta tatu ma cuhva tu cua cahndye sii tu.”

Quivi quitatu ñiyivi zanduvaha ra Jesús sii minoo ña tehe sata

¹⁰ Minoo quivi quitatu ñiyivi zacuaha ra Jesús sii ñiyivi sisi vehe ñuhu.

¹¹ Ta yucuan ndyaa minoo ñaha sa ñoho minoo tatyí ña vaha. Sa sahun uñi cuiya, ña cuu ndundoo ña.

¹² Ta i ndyehe ra Jesús sii ña. Ta i cana ra sii ña ndya nu ndyaa ra, ta i catyí ra sihin ña: Maha, sa nduvohon.

¹³ Ta i tyizo ra ndaha ra xiñi ña, ta zuun ñi caa cuhva cuan i ndundoo ña. Ta i zacahnu xaan ña sii ra Ndyoo.

¹⁴ Zoco i cuxaan xaan ra cu nuu sii vehe ñuhu cuan vaty i zanduvaha ra Jesús sii ña quivi quitatu ñiyivi. Ta i catyi ra sihin ñiyivi yucu yucuan: Iyo iñu tahan quivi tahan si zatyño yo. Yucuan cuenda quisi ndo quivi cuan ta nduvaha ndo ta yivi quivi sa quitatu ñiyivi.

¹⁵ Ta i catyi ra Jesús sihin ra: Ra ña vaha cuu ndo. ¿Atu ma ndasi ndo quiti zono ndo sa cuu zacoho ndo ndutya sii ti quivi quitatu ñiyivi?

¹⁶ Ta tacuan tucu maha ya. Zehe ra Abraham cuu sii ña, ta sa sahun uñi cuiya nuhñi ña zacuu cuehe ya. ¿Atu ña vaha sa cua ndasi ña quivi quitatu ñiyivi? Catyi ra Jesús.

¹⁷ Ta sa yaha catyi ra cuhva ya, i cucahan xaan nuu ra xaan iñi sii ra. Ta zii xaan i cuñi tandiñi ñiyivi sihin sa vaha xaan sa zavaha ra Jesús.

Taño minoo siti mostaza, tacuan caa sa ndyaca ñaha ra Ndyoo

¹⁸ Tacuan ta i catyi ra Jesús: ¿Yozo caa iyo sa ndyaca ñaha ra Ndyoo? ¿Ñaa sihin zacasi tehin sa ndyaca ñaha ra Ndyoo?

¹⁹ Cuu si taño minoo siti mostaza sa i tasi minoo ra nu ñuhu ra, ta i sahnu tu. I cucahnu xaan tu ndya cuhva cua cozo zaa zoco tu.

Taño yusa iya cuu sa ndyaca ñaha ra Ndyoo

²⁰ Ta i catyi tucu ra Jesús inga saha: ¿Ñaa sihin zacasi tehin sa ndyaca ñaha ra Ndyoo?

²¹ Cuu si taño yusa iya sa quihin minoo ñaha ta nazaca ña sihin uñi tahan arroba yutyi pan. Yusa iya cuan cuu sa cua zanandaa sii tandiñi yusa pan cuan. (Ta tacuan tucu cuahan nducahnu ca sa ndyaca ñaha ra Ndyoo.)

Yuvehe tihin ta ityi cuiñi cuu sa cuahan nu ndyaa ra Ndyoo

²² Tacuan ta cuahan ra Jesús tahan tahan ñuu nahnu ta ñuu ndyih, zacuaha ra sii ñiyivi. Cuahan ra ndya Jerusalén.

²³ Ta minoo quivi i ndaca tuhun minoo ra sii ra: Tata, ¿atu zuhva ñi ñiyivi cua cacu? Ta i catyi ra Jesús sihin ra:

²⁴ Nducu xoon cuhva quihvun yuvehe tihin vaty yii xaan cua quihvi ñiyivi nu ndyaca ñaha ra Ndyoo. Catyi suhun vaty cuaha xaan ñiyivi cua cuñi ñu quihvi ñu, ta ma cuu.

²⁵ Taño ra xu vehe, tacuan iyo ra Ndyoo. Ta ra xu vehe cuan cua nacazi ra yuvehe ra. Ta cua cuyucu ndo sata vehe, ta cua cati ndo, ta cua catyi ndo: “Tata, tata, nuña yuvehe naquihvi ndi.” Ta cua catyi ra sihin ndo: “Ña site yoo ndoho cuu ndo.”

²⁶ Tacuan ta cua catyi maa ndo: “Sasi ndi ta sihi ndi suhun, ta i zacuohon sii ndi ñuu ndi.”

²⁷ Ta cua catyi ra Ndyoo sihin ndo: “Ña site yoo ndoho cuu ndo. Cuiñi siyo ndo sii, vaty ña zavaha ndo sa vaha sa i catyi sihin ndo.” Cua catyi ra.

²⁸ Ta cua vacu xaan ndo ndya cuhva cua casi quihñi noho ndo vaty cua ndyehe ndo vaty ñoho ra Abraham ta ra Isaac ta ra Jacob ta tandiñi ra profeta. Ñoho tandiñi ra cuan nu ndyaca ñaha ra Ndyoo, ta maa ndo cua ndoo ndo ityi sata.

²⁹ Ta cua quisi ñiyivi ityi caña ñicandyi ta ityi cuahiñi ta ityi yucu ta ityi tyañuhu, ta cua cundyaa ñu nu ndyaca ñaha ra Ndyoo.

³⁰ Ta iyo ñiyivi ña ñiñi vityi, ta cua nduu ñu ñiyivi ñiñi xaan yucuan. Ta ñiyivi ñiñi vityi cua nduu ñu ñiyivi ña ñiñi.

Sacu xaan ra Jesús sa ndyehe ra ñuu Jerusalén

³¹ Ta zuun ñi quivi cuan i quisi zuhva ra fariseo, ta i catyi ra sihin ra Jesús: Quiton ihya ta cuhun vaty cuñi cahñi ra rey Herodes suun.

³² Ta i catyi ra Jesús sihin ra: Cuahan ndo ta nacaty ndo sihin ra ñicuii cuan vaty yuhvi catyi vaty tave taty cuihna ta zanduvehi sii ñiyivi vityi ta ityaan. Ta iza cua sei nu cuehin.

³³ Zoco tahan si sa caca ityi vityi ta ityaan ta iza vaty ma cuu cuu minoo ra cahan Tuhun Ndyoo tatu ta saa ca ra ñuu Jerusalén.

³⁴ ¡Ndahvi yoho ñuu Jerusalén! Sahñi ñiyivi sii ra profeta ihya. Ta ra tasi ra Ndyoo ihya, cañi ñu sii ra sihin yuu. ¡Cuaha xaan cuaha xaan saha cuñi zandu-iin sii ñiyivi ñuu ya ta zacuende sii ñu tañi zacuenda minoo ndivi sii zehe ti sisi ndisi ti, zoco ña cuñi ñu!

³⁵ Ndyehhe ndo vityi, ndoho ñiyivi ñuu Jerusalén, vaty vityi zandoi sii ndo. Ta sa ndisa cuii catyi sihin ndo vaty ma ndyehhe ca ndo sii, ndya cuhva ndya quivi cua catyi ndo vaty vaha xaan cuu ra vasi sa cuenda ra ndyaca ñaha sii yo.

14

Zanduvaha ra Jesús sii minoo ra ndaa

¹ Minoo quivi quitatu ñiyivi i sahan ra Jesús vehe minoo ra cu nuu sii ra fariseo cua casi ra xita. Ta ndyehhe xaan ra fariseo ñaa sa cua zavaha ra Jesús.

² Ta ñoho minoo ra cuhu yucuan; ndaa xaan ra.

³ Ta i catyi ra Jesús sihin ra maestro cuenda ley ta ra fariseo: ¿Atu catyi ley vaty cuu zanduvaha yo sii ñiyivi quivi quitatu ñiyivi a ma cuu?

⁴ Tacuan ta tandihi ra cuan, taxi cuii ñi yucu ra ta ña cahan ra. Ta ziqui i quihin ra Jesús sii ra cuhu cuan, ta i zanduvaha ra sii ra, ta i natasi ra sii ra sa cunuhu ra.

⁵ Ta ziqui i catyi ra Jesús sihin ra fariseo: Tatu canacava minoo burro zono ndo a minoo zindiqui zono ndo sisi minoo xahva quivi quitatu ñiyivi ¿atu ma tava ndo sii ti yaty ñi vazú quivi quitatu ñiyivi cuu si? Catyi ra.

⁶ Tacuan ta ña cuu ca nacahan ra cuan.

Ma zacahnu yo sii yo

⁷ I ndyehhe ra Jesús cuhva i zavaha tandihi ñiyivi yucu vico cuan vaty saa ra cuan ta i casi ra maa ñi tyayu vaha ca cundyaa ra, ta i cahan ra Jesús sihin minoo cuhva sihin ra, ta i catyi ra:

⁸ Tatu cana minoo ra suun sa cuhun minoo vico tindaha, ma nanducun tyayu vaha ca cundyoön coto quisi inga ra ñiñi ca.

⁹ Ta ra i cana suun sa cuenda vico cuan cua quisi ra ta cua catyi ra suhun: “Cuhvon tyayu ya cundyaa inga ra ya.” Ta cua cucahan xaan nuun, ta cua cuhun nu ndyaa tyayu cuenda ñiyivi ña ñiñi.

¹⁰ Vaha ca tatu cana ñu suun minoo vico, cuhun xihnon nu ndyaa tyayu ña ñiñi cundyoön. Ta ziqui cua quisi ra i cana suun ta cua catyi ra: “Amigo, cuhun nu ndyaa tyayu vaha ca.” Cua catyi ra. Ta sihin cuhva cuan cua zacahnu ra suun nuu ñiyivi yucu suhun yumesa.

¹¹ Vaty yoo ra zacahnu sii, cua zanduluhlu ñiyivi sii ra. Ta yoo ra zanduluhlu sii, cua zacahnu ñiyivi sii ra.

¹² Ta ziqui i catyi ra Jesús sihin ra i cana sii ra sa cua casi ra: Tatu cua cuhvon minoo sa cuzama a sa cuxiñi sii ñiyivi, ma canon sii amigun a tohon a sii ñiyivi suun a sii ra cuca sa ndyaa yaty yuehun. Vaty quivi naco tucu minoo vico vehe maa ra ta cua cana tucu ra suun.

¹³ Zoco tatu cua zavohon minoo vico, canon sii ñu ndahvi, ñu coxo, ñu xii ta ñu cuaa.

¹⁴ Ta zii xaan cua cuñun. Vaty ra yucuan ma cuu nacuhva ra sa casun, zoco cua tyiyahvi ra Ndyoo suun quivi cua nandoton sihin ñiyivi vaha.

Cuhva cua cuu si quivi cua quihvi ñiyivi nu ndyaca ñaha ra Ndyoo

¹⁵ Ta siñi minoo ra ndyaa mesa cuan sa cahan ra Jesús, ta catyi ra sihin ra: Zii xaan cua cuñi ra casi xita nu ndyaca ñaha ra Ndyoo.

¹⁶ Ta ziqui i catyi ra Jesús sihin ra: I zavaha minoo ra minoo sa cuxiñi cahnu xaan vehe ra.

¹⁷ Ta cuhva sa cua cuhva ra sa cuxiñi ñu, i tasi ra sii muzu ra sa nacana ra sii ñu sa i cana ra vaty sa ndyaa listo si, ta sa cuu quisi casi ñu.

¹⁸ Zoco tandihi ñu i catyi ñu vatyi ma cuu cuhun ñu. Ra sa xihna ñi i catyi ra: “Nacaa zate minoo ñuhu, ta cuñi sa cundyehi sii si. Catyun sihin ra vatyi nazaha ra tucahnu iñi sii, vatyi ma cuhin.”

¹⁹ Ta inga ra i catyi ra: “Nu zate ohon tahan yunta, ta cuehin cua ndyehi tatu vaha ti. Catyun sihin ra vatyi nazaha ra tucahnu iñi sii, vatyi ma cuhin.”

²⁰ Ta inga tucu ra i catyi ra: “Nacaa tindehi, ta yucuan cuenda ma cuhin.” Catyi ra.

²¹ Ta cua nuhu muzu cuan, ta i nacatyi ra tandihi cuhva ya sihin patrón ra. Ta i cuxaan xaan patrón ra, ta i catyi ra sihin muzu ra: “Cuahan yatyi cuii ñi tandihi ityi cahnu ta ityi ndyihhi ta cuhun sii ra ndahvi ta ra coxo ta ra xii ta ra cuaa, ta quisi ndyacon sii ra ihya.” Catyi ra.

²² Ta i zavaha muzu ra cuhva catyi ra, ta ziqui i catyi ra: “Tata, sa zavehi tandihi cuhva catyun, ta nuña ca.” Catyi ra.

²³ Ta i catyi patrón ra sihin ra: “Cuahan tandihi cuii ityi, ta zañiñun sii ñiyivi vatyi naquisi ñu. Cuñi sa cua cutu cuii vehi.

²⁴ Vatyi catyi suhun vatyi numinoo ra i cane sa xihna ñi, ma cuhva que sa casi ra sihin.”

Cuaha xaan tundoho cua ndyehe yo tatu cua cundyico yo sii ra Cristo

²⁵ Cuaha xaan ñiyivi cuahan sihin ra Jesús. Ta i ndyehe ra sii ñu ta i catyi ra sihin ñu:

²⁶ Tandihi ndoho ra ndyico sii, tatu cuñi ca ndo sii ñiyivi sii ndo ta ziqui sii mi, ma cuu cuu ndo ñiyivi sii mi.

²⁷ Vatyi yoñi ra cuu cuu ñiyivi sii mi tatu ma ndyehe ra tundoho sa cuende, ta vazuu cuu ra sa cuende.

²⁸ Vatyi yoñi minoo ra tatu cua zandaa ra minoo torre ta ma cundyaa xihna ra ta tava ra cuenda tatu ñihi xuhun ra ta cundyee iñi ra zandihi ra tyiño cuan.

²⁹ Coto sa zavaha ra cimienta ta ziqui ma cuu zandihi ra tyiño. Ta tandihi ñiyivi cua ndyehe sii si, ta cua vacu ndyaa xaan ñu sii ra.

³⁰ Ta cua catyi ñu: “Ihya ra i quisaha zandaa ra minoo torre, ta ñá cuu zandihi ra sii si.”

³¹ A tatu iyo minoo rey sa cuñi cahñi tahan sihin inga rey sa iyo oco mil zandaru. Rey sa xihna ñi cuan cua cundyaa xihna ra ta nacañi iñi ra tatu cuu zahacanaa ra sihin sa usi mil zandaru sa iyo sii maa ra.

³² Ta tatu sa sito ra vatyi ma cuu, cua tasi ra tyiño ñi ñi sa ndyaa inga rey cuan nusica, ta cua caca ra sii ra vatyi nandihi ñi maa tuhun.

³³ Ta tacuan tucu maa ndo, tatu ma cahndya iñi ndo tandihi sa cuñi xaan ndo ta tandihi sa cumi ndo, ma cuu cuu ndo ñiyivi sii mi sa ndisa cuii.

Catyi ra Jesús vatyi iyo ñiyivi tañi ñi sa ña uhva ca

³⁴ Vaha xaan cuu ñi, zoco tatu ña uhva ca si ¿yozo caa cuu cutyiño ñiyivi sii si?

³⁵ Ñahñi ca sa cuu zacuu ñu sihin si. Nu sa tyindyee si sii ñuhu ta ma cuu. Nu ndihi tuhun zavita ñu sii si. Tatu ndyaa zoho ndo, cuiñi ndo tuhun ya. Catyi ra Jesús.

15

Tañi mvee ticatyi sa cua naa cuu ñiyivi iyo cuatyi

¹ Ta tandihi ra tava xuhun cuenda ra ndyaca ñaha ta ra iyo cuatyi, i tuhva ra sii ra Jesús vatyi cuñi ra tyizoho ra sa cahan ra.

² Ta i cahan xehe ra fariseo ta ra maestro cuenda ley sa cuenda ra Jesús, ta i catyi ra: Ra ihya, cahan ra sihin ra iyo cuatyi, ta sasi ra sihin ra.

³ Tacuan ta i cahan ra Jesús sihin ra ziqui minoo cuhva ta catyi ra:

⁴ Yoo ndoho, ra iyo minoo ziendu mvee ticatyi zono, tatu cua naa minoo ti ¿tatu ma zando ndo tandihi ti sicuhu? Ta cua nanducu ndo sii sa minoo ti cuan ndya nañihi ndo sii ti.

⁵ Ta cuhva sa cua nañihi ndo sii ti, cua cozo zoco ndo sii ti, ta zii xaan cua cuñi ndo.

⁶ Ta tatu sa nasaa ndo vehe ndo cua cana ndo sii amigo ndo ta sii ñiyivi yucu yaty, ta cua catyi ndo: “Cuzii xaan iñi ndo sihin, vaty i nañihi mvee ticaty zone quiti sa cua naa.”

⁷ Ta catyi sihin maa ndo vaty zuun ñi cuhva cuan, zii xaan cua cuñi ángel gloria sa cuenda minoo ra cua ndu-uu iñi cuaty. Zii ca cua cuñi ángel sihin sa minoo ra cuan ta ziqui sihin sa cumi xico sahun cumi tahan ñiyivi vaha sa ñahñi cuaty ta ña zama ñu cuhva iyo ñu.

Taño xuhun sa cua naa cuu ñiyivi iyo cuaty

⁸ Ta inga tucu cuhva, tatu iyo minoo ñaha sa cumi usi tahan xuhun, ta tatu cua naa minoo xuhun ña. ¿Atu ma tyaa ña minoo candil ta natihvi ña sisi vehe ña ta nanducu ña xuhun cuan ndya cuhva ndya cua nañihi ña sii si?

⁹ Ta tatu sa nañihi ña sii si, cua cana ña sii amigo ña ta sii ñiyivi yucu yaty, ta cua catyi ña: “Cuzii xaan iñi ndo sihin, vaty i nañihi xuhin sa cua naa.”

¹⁰ Ta zuun ñi cuhva cuan catyi sihin maa ndo vaty zii xaan cua cuñi ángel ra Ndyoo sa cuenda minoo ra cua ndu-uu iñi cuaty.

Taño ra ñá tyaa yahvi sii zutu cuu ñiyivi sa cua naa

¹¹ Tacuan ta i catyi tucu ra Jesús cuhva ya: Sicoo minoo ra, ta uu tahan zehe yii ra i sicoo.

¹² Ta minoo saha i catyi ra luhlu ca sihin zutu ra: “Tata, cuhvon ndaha tyiño sa tahan si sii.” Ta i natahvi zutu ra ndaha tyiño sa tahan si sii minoo minoo zehe ra.

¹³ Ta ña cuaha ñi quivi ta ziqui i xico ra luhlu ca cuan tandihi cui sa nacuhva zutu ra sii ra. Ta i zatahan ra xuhun ra, ta cuahan ra nusica. Ta yucuan i zanaa ra tandihi cui xuhun ra sihin sa cuzii iñi ra. Ta zana xaan i sicoo ra.

¹⁴ Ta sa yaha zanaa ra tandihi, ta ziqui i sicoo minoo tama ñuu cuan, ta i quisaha sizoco ra.

¹⁵ Tacuan ta sahan ra vehe minoo ra ñuu cuan. Ta i tasi ra cuan sii ra nu iyo quini zono ra vaty cua cuhva ra sa casi ti.

¹⁶ Ta i sizoco xaan ra ndya cuhva cuñi ra casi ra sa sasi quini. Ta yoñi maa sa saha sa casi ra.

¹⁷ Tacuan ta i quisaha nacañi iñi ra ta i catyi ra: “Tandihi cui muzu zuti, sasi vaha ra ndya cuhva ndoo ca sa sasi ra. Ta yuhvi, cuñi cahñi zoco sii.

¹⁸ Vityi cunanuhi nu ndyaa zuti, ta tyehen cua catyi sihin ra: Tata, sicoo cuaty nuu Ndyoo ta nuu moo.

¹⁹ Zohon tuhun sa yivi ca zehun cuu sii, zoco cuhvon sa cui minoo muzun.” Tacuan i sica iñi ra.

²⁰ Ta i nduvita ra, ta i quihin ra ityi cua nanuhu ra ndya vehe zutu ra. Zoco sica ca vasi ra ta sa i ndyehe zutu ra sii ra. Ta i cundahvi iñi ra sii zehe ra, ta i cacono ra cua zatahan ra sii ra. Ta i sicunumi ra sii ra, ta i sihi ra xiti ra.

²¹ Ta i catyi zehe ra sihin ra: “Tata, sicoo cuaty nuu ra Ndyoo ta nuu moo. Zohon tuhun sa yivi ca zehun cuu sii.” Catyi ra.

²² Zoco i catyi zutu ra sihin muzu ra: “Ta ndyaca ndo zahma vaha ca, ta natyihni ndo sii ra. Ta tyihni ndo minoo xehe nundaha ra. Ta natyihni ndo zapato saha ra.

²³ Ta cahñi ndo minoo zindiqui luhlu, quitu xahan ca, vaty casi yo, ta nacuzii xaan iñi yo.

²⁴ Vaty zehi, sa i zehi tuhun vaty sa i sihi ra, ta vityi ndito ra. Cua naa ra ta vityi naquita ra.” Catyi zutu ra. Ta i quisaha zavaha ñu minoo vico. Ta zii xaan i cuñi ñu.

²⁵ Ta inga zehe ra cuan, ra nuu, zatyño ra sisi huhu. Ta cuhva sa cua nasaa ra ndya vehe, ta siñi ra yaa ta sa sata saha ñiyivi.

²⁶ Ta i cana ra sii minoo muzu, ta i ndaca tuhun ra ñaa sa cuu.

²⁷ Ta i catyi muzu sihin ra: “Nasaa yañun, ta i tava zutun tyiño sa cuu minoo zindiqui luhlu, quitu xahan xaan, vaty vaha ñi i nasaa yañun.” Catyi ra.

²⁸ Ta i cuxaan xaan ra nuu cuan, ta ñá cuñi ra quihvi sisi vehe. Yucuan cuenda i quita zutu ra, ta i cana ra sii ra.

²⁹ Zoco i catyi ra sihin zutu ra: “Ndyehe, sa cuaha xaan cuiya zatyine suhun, ta ñahñi cuhva sa ñá tyei yahvi sa cohon. Zoco numinoo saha ta ñá sohon minoo mvee luhlu sii, vatyi cua zavehi minoo vico sihin amigi.

³⁰ Ta sa nasaa zehun, ra i zanaa xuhun moo sihin ñu zihí zii iñi, ta yatyi xaan sahñun minoo zindiqui cuenda ra.” Catyi ra.

³¹ Tacuan ta i nacahan zutu ra, ta i catyi ra sihin ra: “Zehe luhli, ndyoon sihin tandihi cuii tyiemvu. Ta tandihi sa sii, sii tucu moo cuu.

³² Zoco vityi tahan si sa zacahnu yo vico ya ta cuzii xaan iñi yo vatyi i zehi tuhun vatyi sa i sihi yañun, ta vityi ndito ra. Cua naa ra ta naquita ra.”

16

Cuhva cuñi si tyindyee yo sii ñiyivi sihin sa iyo sii yo

¹ Tacuan ta i quisaha catyi ra Jesús sihin ra i casi ra: Sicoo minoo ra cuca, ta sicoo minoo ra zacuenda xuhun ra. Zoco i catyi inga ñiyivi sihin ra cuca cuan vatyi zativi xaan ra zacuenda cuan xuhun ra.

² Ta i cana ra cuca cuan sii ra, ta i catyi ra sihin ra: “Cuaha xaan tuhun ñihi sa cuendon. Nacuhva cuendon tandihi cuii tyiño i zacuun sii, vatyi ma zatyino con sihin.”

³ Ta ziqui i sica iñi ra zacuenda xuhun cuan sihin ñima ra: “¿Yozo caa zacui vityi? Cuñi quindyaa patroin tyiñe, ta ñahñi tundyee iñi iyo sii, sa zatyine. Ta cahan xaan nui caque caridad sii ñiyivi.

⁴ Zoco site yozo caa cua zavehi vatyi vaha sa coo amigi, ta ziqui tatu ñahñi tyiñe, zoco cuu cuhin vehe ra.”

⁵ Tacuan i sica iñi ra cuan, ta ziqui i cana ra sii sa minoo minoo ra tavi sii patrón ra. Ta i catyi ra sihin ra i saa sa xihna ñi: “¿Yozo tavun sii patroin?” Catyi ra.

⁶ Ta i catyi ra cuan: “Tavi cumi mil litro azetye.” Catyi ra. Ta i catyi ra sihin ra: “Quihin inga tutu ya, ta tyoon uu mil ñi, ta tyoon zivun, ta zaviton tutu sahnu cuan.” Catyi ra. Ta tacuan i zavaha ra ta cuahan ra.

⁷ Ta ziqui i saa inga ra, ta i catyi ra sihin ra: “¿Yozo tavun sii patroin?” Ta i catyi ra cuan: “Tavi minoo mil arroba trigo.” Catyi ra. Ta i catyi ra sihin ra: “Quihin inga tutu ya, ta tyoon uña ziendu arroba ñi, ta tyoon zivun, ta zaviton tutu sahnu cuan.”

⁸ Tacuan ta i sito patrón ra sa ña vaha sa zavaha ra, ta iyo xaan i cuñi ra vatyi casi xaan iñi ra zavaha ra sa ña vaha. Catyi ra Jesús. Ta i catyi tucu ra sihin ra i casi ra: Casi ca iñi ñiyivi ña vaha ñima ta ziqui ñiyivi vaha ñima.

⁹ Ta catyi sihin ndo vatyi cutyino ndo ndaha tyiño ndo sa iyo ñuu ñiyivi ya, ta tyindyee ndo sii ñiyivi. Ta quivi cua ndihi si, cua ñihi ndo minoo nu cundyaa ndo sa ma naa ca nu ndyaa ra Ndyoo.

¹⁰ Ra zavaha sa ndoo sihin sa zuhva ñi sa iyo sii ra, tacuan cua zavaha tucu ra vazú sihin cuaha ca. Ta ra ña zavaha sa ndoo sihin sa zuhva ñi, ma zavaha tucu ra sa ndoo sihin sa cuaha ca iyo sii ra.

¹¹ Yucuan cuenda tatu ña zavaha ndo sa ndoo sihin sa iyo ñuu ñiyivi ya, ma cuhva ra Ndyoo sa vaha xaan sa iyo andivi sii ndo.

¹² Tandihi sa iyo sii ndo, maa ra Ndyoo saha noo sii si sii ndo. Ta tatu ña zavaha ndo sa ndoo sihin si, ma cuhva maa ra sa cuu sii maa ndo.

¹³ Ma cuu zatyino minoo muzu sa cuenda uu tahan patrón vatyi cua cuñi ca ra sii minoo patrón ra, ta ma cuñi ra sii inga ra. A sii minoo ra cua tyaa ra yahvi, ta sii inga ra ma tyaa ra yahvi. Ma cuu cuñi ndo sii ra Ndyoo ta cuñi ndo sii xuhun. Catyi ra Jesús.

¹⁴ Ta i siñi ra fariseo tandihi sa cahan ra Jesús. Ta i sacu ndyaa ra sii ra vatyi cuñi xaan ra fariseo cuan xuhun.

¹⁵ Ta i catyi ra Jesús sihin ra: Ityi nuu ñiyivi zaha maa ndo tuhun vatyi vaha xaan ñiyivi cuu ndo, zoco sito maa ra Ndyoo ñima ndo. Ta tandihi sa zacahnu xaan ñiyivi, ña cuu ndyehe ra Ndyoo sii si.

Ma naa ley maa ra Ndyoo

¹⁶ Ley ra Ndyoo sa i tyaa ra Moisés ta tuhun i tyaa ra profeta ta sa naha, yucuan cuu sa zañaha ityi sii ndo ndya quivi i saa ra Juan. Quivi i saa ra Juan ta i quisaha nacaty i ra sihin ñiyivi cuhva ndyaca ñaha ra Ndyoo. Ta cuaha xaan ñiyivi cuñi xaan ñu cuhva cuan.

¹⁷ Zoco catyi sihin ndo vaty i vazu cunaa ñuu ñiyivi a sa iyo ityi ziqui, zoco ley ra Ndyoo sa i tyaa ra Moisés ma cuu naa si nu siin.

Ña vaha sa zandoo rayi sii ñazih i ra ta tani tutu ñu

¹⁸ Tatu iyo minoo rayi ta zandoo ra sii ñazih i ra ta tani tutu sa tindaha ra ta tindaha ra sihin inga ñaha, zavaha ra cuan sa cuu adulterio. A tatu tindaha inga ra sihin ñaha sa zandoo yi sii, zuun ñi cuaty i cuan zavaha ra.

Cuhva i cuu sii minoo ra cuca, ta cuhva i cuu sii ra Lázaro

¹⁹ I sicoo minoo ra cuca, ta tyaqui xaan i cuu zahma ra tyacu yuhva tixinda, ta yahvi xaan ndyaa si. Ta sasi vaha xaan ra tandih i quivi.

²⁰ Ta sicoo tucu minoo ra ndahvi sa nañi Lázaro. Iñi xaan ra ityi, ta catuu ra yuvehe ra cuca cuan.

²¹ Cuñi xaan ra casi ra vazu sa canacava yumesa ra cuca cuan. Ta i saa ina nu catuu ra ndahvi cuan, ta yuyaa ti nu cahvi ra.

²² Ta minoo quivi i sihi ra, ta i sindyaca ángel ra Ndyoo sii ra ndya nu ndyaa ra Abraham gloria. Ta i sihi tucu ra cuca cuan, ta tyih i ñu sii ra sisi ñuhu.

²³ Ta cuahan aña ra andyaya, ta ndyehe xaan ra tundoho yucuan. Ta i nandyehe ndaa ra, ta sica xaan i ndyehe ra sii ra Abraham sihin ra Lázaro.

²⁴ Ta i cana saa ra ñoho andyaya cuan ta catyi ra: “Tata Abraham, cundahvi iñun sii, ta tasun sii ra Lázaro nazaty i ra siin nundaha ra ta quisi zatoon ra nu yei vaty i yaha xaan cahnu tundoho ndyehi sisi ñúhu ya.” Catyi ra.

²⁵ Zoco i catyi ra Abraham sihin ra: “Nacohon iñun vaty i cuaha xaan sa vaha sicoo suun quivi i sinditon ñuu ñiyivi. Ta ra Lázaro ndahvi xaan i cuu ra ñuu ñiyivi. Ta vity i iyo sa vaha sii ra, ta yoho ndyehun tundoho.

²⁶ Ta inga tucu cuhva vaty iyo minoo xahva cahnu xaan mahñu nu yucu yo. Ta vazu cuñi ra ihya cuhun ra nu ndyoon, zoco ma cuu. Ta ma cuu quisi minoo ra ñoho nu ñohon nu ndyaa ndi.”

²⁷ Ta ziqui i catyi ra cuca cuan: “Tata Abraham, zohon tumañi iñi sii, ta tasun sii ra Lázaro ndya vehe zuti.

²⁸ Vaty iyo ohon tahan yañi, ta cuñi vaty i cunacaty i ra sihin ra yozo caa iye ihya nu ndyehi tundoho coto quisi tucu ra ihya.”

²⁹ Tacuan ta i catyi ra Abraham sihin ra: “Iyo ley sa i tyaa ra Moisés ta iyo tuhun i tyaa ra profeta ta sa naha. Nazavaha yañun sa catyi si cuan.”

³⁰ Tacuan ta i catyi ra cuca cuan: “Tata Abraham, ma tyaa ra yahvi sii si cuan. Zoco tatu cua nandoto minoo ra sa i sihi ta cuhun ra nu ndyaa ra, yucuan ndisa cua tyaa ra yahvi, ta cua zama ra cuhva iyo ra.”

³¹ Ta i catyi ra Abraham sihin ra: “Tatu ma tyaa ra yahvi sii ley i tyaa ra Moisés ta sii tuhun i tyaa ra profeta, ma sino iñi ra vazu cua nandoto minoo ñiyivi ta cahan ra sihin ra.”

17

Ica xaan tatu zavaha yo cuaty i

¹ Tacuan ta i catyi ra Jesús sihin ra i casi ra: Tandih i cui tyiemvu cua coo sa quiñi caa sa zativi sii ñiyivi, zoco ndahvi ñi cuu ra tyiyuhu sii ñiyivi ta zavaha ñu cuaty i ta tivi ñu.

² Vaha ca tatu cuhñi yo minoo yuu vee xaan zucu ra ta zavita yo sii ra sisi tyañuhu coto zativi ra sii ñu sino iñi sii Ndyoo.

³ Zaha ndo cuenda sii ndo. Tatu zavaha minoo ra tahan ndo minoo sa ña vaha suhun, catyun sihin ra ñaa sa ña vaha i zavaha ra. Ta tatu zama ra cuhva iyo ra, zohon tucahnu iñi sii ra.

⁴ Ta tatu usa tahan saha sa minoo quivi zavaha ra sa ña vaha suhun ta tandihi usa tahan saha catyi ra suhun: “Zohon tucahnu iñi sii.” Zohon tucahnu iñi sii ra.

Tatu sino iñi yo sii ra Jesús cuu zavaha yo cuaha sa vaha

⁵ Tacuan ta i catyi ra apóstol sihin ra Jesús: Cuhvon cuhva sii ndi ta cua sino xaan ca iñi ndi suun.

⁶ Ta i catyi ra Jesús sihin ra: Tatu sino iñi ndo sii mi siin ñi vazu tañi caa minoo siti mostaza luhlu ñi cuu cuhva sino iñi ndo, ta cua cuu catyi ndo sihin yutu sicómoro sa nandyaa ihya vatyí cuiñi siyo tu nu ndyaa tu ta cuhun tu sisi tyañuhu, ta cua tyaa tu yahvi sa cahan ndo.

Cuhva tahan si tyaa yo yahvi sii ra Ndyoo

⁷ Ta ziqui i catyi ra Jesús: Yoo ndoho tatu tahvi muzu ndo ñuhu a saha ra sa casi zindiqui zono ndo ta ziqui nasaa ra vehe, ¿atu cua catyi ndo sihin ra: “Cundyaa ta casun xita”?

⁸ Tyehen cua catyi ndo sihin ra: “Zavohon sa cuxiñi, ta tyizon coho nu mesa. Ta tatu sa sasi ta ziqui casi tucu moo.” Cua catyi ndo.

⁹ ¿Atu nacuhvon tyahvi ndyoo sii ra vatyí zavaha ra tyiño tavon sii ra? Ña tacuan vatyí tahan si zavaha ra tyiñon.

¹⁰ Ta tacuan tucu maa ndo. Tatu sa zavaha ndo tandihi cui tyiño sa tava ra Ndyoo sii ndo. Catyi ndo: “Ñahñi maa sa vaha zavaha ndi. Maa ñi cuhva tahan si zavaha ndi i zavaha ndi.” Tacuan tahan si catyi ndo.

Zanduvaha ra Jesús sii usi tahan ra tyahyu

¹¹ Ta cuhva sa cuahan ra Jesús ndya ñuu Jerusalén, i yaha ra nu cu si Galilea ta nu cu si Samaria.

¹² Ta sa i saa ra minoo ñuu ta i quita usi tahan ra tyahyu ta yucu ra ndya zava.

¹³ Ta i cana saa tandihi ra, ta catyi ra: Maestro Jesús, cundahvi iñun sii ndi.

¹⁴ Ta sa ndyehe ra Jesús sii ra, ta i catyi ra sihin ra: Cuahan ndo cua zañaha ndo sii ndo sii ra cu zutu. Tacuan i catyi ra Jesús sihin ra cuan, ta ityi cuahan ra i nduvaha ra.

¹⁵ Ta minoo ra, cuhva sa ndyehe ra vatyí sa nduvaha ra, i sinanuhu sata ra. Ta ñihi xaan i cana saa ra ta i zacahnu ra sii ra Ndyoo.

¹⁶ Ta i sicuiñi siti ra, ta i sicava ndyayu ra nu ñuhu nu ndyaa saha ra Jesús, ta i saha xaan ra tyahvi ndyoo sii ra. Ta minoo ra samaritano cuu ra nduvaha cuan.

¹⁷ Tacuan ta i catyi ra Jesús: ¿Atu ña usi tahan ra i nduvaha? ¿Ndyamaa cuahan iñ tahan ca ra?

¹⁸ ¿Atu minoo tuhun ñi ra inga ñuu ya cuu ra i ndisi nanuhu sata sa nacuhva ra tyahvi ndyoo sii ra Ndyoo?

¹⁹ Ta i catyi ra Jesús sihin ra i nduvaha: Nduvita ta cuhun. I nduvohon vatyí sino iñun.

Cuhva cua cuu si quivi cua quisaha cundyaca ñaha ra Ndyoo ñuu ñiyivi

²⁰ I ndaca tuhun ra fariseo sii ra Jesús: ¿Ama cua quisaha cundyaca ñaha ra Ndyoo ñuu ñiyivi? Ta i catyi ra Jesús sihin ra: Ma coto ndo ama cua quisaha cundyaca ñaha ra Ndyoo vatyí yivi sa cuu ndyehe yo cuu si.

²¹ Ma cuu catyi ñiyivi: “Ihya ndyaa ra”, a “Ityi cuan ndyaa ra” vatyí zñin cuu cuhva ndyaca ñaha ra. Sisi añima ñiyivi cuu nu ndyaca ñaha ra, añima ñiyivi sa tyaa yahvi sii ra.

²² Tacuan ta i catyi ra Jesús sihin ra i casi ra: Cua coo quivi ta cua cuñi ndo ndyehe ndo sii ra i quisi ndya gloria, zoco ma ndyehe ca ndo sii ra.

²³ Ta cua catyi ñiyivi sihin ndo: “Ihya ndyaa ra”, a “Yucuan ndyaa ra.” Zoco ma cuhun ndo cundyehé ndo. Ta ma cundyico ndo sii ra cuan vatyí yivi yuhvi cuu ra.

²⁴ Vatyí quivi cua quisi inga saha, cua ndyehe tandihi ñiyivi sii. Tañi ndyehe tandihi ñiyivi tatu yaha tasa zavi nacahnu andivi, tacuan cua cuu si quivi cua quisi tucu ra i quisi ndya gloria.

²⁵ Zoco xihna ca tahan si ndyehi tundoho cuaha xaan cuhva. Ta ñiyivi sa iyo vityi ma cuñi ñu sii.

²⁶ Tañi i cuu si quivi ra Noé, tacuan cua cuu tucu si quivi cua quisi tucu ra i quisi ndya gloria.

²⁷ Quivi ra Noé, sasi ñu. Sihi ñu. Tindaha ñu. Ta saha ñu sii zehe ñu sa tindaha ñu ndya cuhva ndya quivi i quihvi ra Noé sisi barco ta i coon zavi xaan. Ta i naa tandihi ñiyivi.

²⁸ Tacuan i cuu tucu si quivi ra Lot. Sasi ñu. Sihi ñu. Zata ñu. Naxico ñu. Tasi ra itu. Ta zavaha ra vehe ra.

²⁹ Ta zuun ñi quivi i quita ra Lot ñuu Sodoma cuan, i coon xaan ñúhu sihin azufre ndya andivi, ta i naa tandihi cuii ñiyivi ñuu cuan.

³⁰ Ta zuun ñi tacuan cua cuu si quivi cua quisi tucu ra i quisi ndya gloria.

³¹ Quivi cuan tatu ñoho minoo ndo xiñi vehe, ma noo ndo ta tava ndo ndaha tyiño ndo. A tatu ñoho ndo itu ndo ma cunuhu ndo ndya vehe ndo.

³² Nacohon iñi ndo cuhva i tahan si sii ñazihí ra Lot.

³³ Yoo ra cua nducu cuhva zacacu ra sii ra, cunaa ra. Ta yoo ra cua cuhva sa cuu ra sa cuenda mi, cua cacu ndisa cuii ra.

³⁴ Ta catyi sihin ndo vatyí sa cuaa cuan, uu tahan ñiyivi quixi ñin ñi nu sito. Cua naquihin sii minoo ñi ta minoo cua nandoo.

³⁵ Ta uu tahan ñuzihí ndyico ñin ñi quivi cuan, cua naquihin sii minoo ñi ña. Ta inga ña cua nandoo.

³⁶ Ta uu tahan ra ñoho itu ra, cua quihin sii minoo ra. Ta inga ra cua nandoo.

³⁷ Tacuan catyi ra Jesús. Ta cuhva sa siñi ñiyivi tuhun ya, i ndaca tuhun ñu sii ra: ¿Ndyamaa cua cuhun ñiyivi cuan? Ta i catyi ra Jesús sihin ñu: Nu catuu ndiyi, yucuan cua titahan tyasii.

18

Cuhva cuñi ra Ndyoo sa caca yo sii ra

¹ Tacuan ta i cahan ra Jesús ziqui minoo cuhva ya vatyí cuñi ra sa cua coto ñu vatyí tahan si sa caca ñiyivi tumañi iñi sii ra Ndyoo tandihi saha, ta ma zandihí yo tuhun sa caca yo sii ra.

² Ihya cuu cuhva i catyi ra Jesús: Minoo ñuu sicoo minoo ra juez. Ta ña yuhu ra sii ra Ndyoo. Ta ña tyaa ra yahvi sii ñiyivi.

³ Ta zuun ñi ñuu cuan sicoo minoo ñandahvi. Ta i sahan ña nu ndyaa ra juez cuan, ta catyi ña sihin ra vatyí sica ña cuatyí saha minoo ra xaan iñi sii ña.

⁴ Ta ña tyizoho ra juez cuan sa cahan ña. Ña cuñi ra zandaa ra tyiño ña. Ta sa naha xaan sica ña. Ta ziqui i sica iñi ra juez: “Vazu ña yuhi sii ra Ndyoo ta ña tyei yahvi sii ñiyivi,

⁵ zoco zayanga xaan maha ya sii. Yucuan cuenda cua zandei tyiño ña coto quisi ca ña ta zayanga ca ña sii.”

⁶ Ta i catyi ra Jesús: Sa siñi ndo cuhva catyi ra juez, ra ña vaha cuan.

⁷ Ta maa ra Ndyoo ¿atu ma zacacu ra sii ñiyivi i casi ra vatyí sica ñu tumañi iñi sii ra ora ta sa cuaa? ¿Atu cuatu xaan ra ta ziqui tyindyee ra sii ñu?

⁸ Catyi sihin ndo vatyí yatyi xaan cua zacacu ra sii ñu. Zoco quivi cua quisi tucu ra i quisi ndya gloria, sito Ndyoo tatu nañihí que sii ñu sino iñi sii, sa ndisa cuii.

Minoo cuhva cuenda ra tava xuhun cuenda ra ndyaca ñaha ta ra fariseo

⁹ Tacuan ta i cahan ra Jesús ziqui minoo cuhva cuenda ñiyivi zaha tuhun vatyí vaha xaan ñu ta ña cuu ndyehe ñu sii inga ñiyivi. Ta ihya cuu cuhva i catyi ra:

¹⁰ I quihvi uu tahan ra vehe ñuhu vatyí cua cahan ra sihin ra Ndyoo. Minoo ra cuu ra minoo ra fariseo, ta inga ra cuu minoo ra tava xuhun cuenda ra ndyaca ñaha.

¹¹ Iñi ndyaa ra fariseo, ta ihya cuhva i sica iñi ra sisi añima ra: “Zutu mañi yuu, nacuhve tyahvi ndyoo suun vatyí ña iye tañi iyo inga ñiyivi. Ña zuhi. Ña quiñi iye. Yoñi tyañi. Ta ña iye tañi ra tava xuhun ya.

¹² Vaha xaan tyei yahvi tuhun cohon vatyí uu saha sa minoo vitya sahñi zoque sii, ta sehi diezmo suun sihin tandihí cuii sa iyo sii.” Catyi ra.

¹³ Ta ndya zava, iñi ndyaa ra tava xuhun cuenda ra ndyaca ñaha. Ta nu ña nandyehé ndaa ra andivi. Ta cati ra yiqui ndyica ra vatyí ndu-uu iñi ra cuatyí ra. Ta tyehen cahan ra sihin ra Ndyoo: “Zutu mañi yuu, cundahvi iñun sii, vatyí iyo xaan cuatyí.” Tacuan i catyí ra.

¹⁴ Ta catyí sihin ndo vatyí sii maa ra cuan i zaha ra Ndyoo tucahnu iñi ta yivi sii inga ra. Zanaa ra Ndyoo cuatyí ra tava xuhun cuan, ta cuanuhu ra ndya vehe ra. Zoco ra fariseo cuan, ñahñi tucahnu iñi ñihi ra vatyí ña vaha cuhva sica ra. Ta zihñ sa zacahnu xaan ra sii ra. Yucuan cuenda luhlu ñi ndyehe ra Ndyoo sii ra. Zoco tatu zanduluhlu yo sii yo, cua nducahnu yo nuu ra Ndyoo.

Zoco ñaha ra Jesús sii sa ndyihí

¹⁵ Ta i quisi ndyaca tucu ñiyivi sii sa ndyihí vatyí cua tyizo ra Jesús ndaha ra xiñi si. Ta sa ndyehe ra i casi ra Jesús cuhva zavaha ñu, ñá saha ca ra.

¹⁶ Zoco i cana ra Jesús sii ra, ta i catyí ra sihin ra: Cuhva ndo sa quisi sa ndyihí nu ndyei, ta ma catyí ndo vatyí ma cuu vatyí tañi iyo sa ndyihí tacuan iyo ñiyivi saha sa cundyaca ñaha ra Ndyoo sii ñu.

¹⁷ Ta catyí sihin ndo vatyí tatu ma cuhva ndo sii ndo sii ra Ndyoo ta sino iñi ndo sii ra tañi sino iñi sa ndyihí sii zutu si, ma cuu quihvi ndo nu ndyaca ñaha ra Ndyoo.

Catyí ra Jesús vatyí yíi xaan cua cuhva cuenda minoo ra cuca sii ra sii ra Ndyoo

¹⁸ Tacuan ta i ndaca tuhun minoo ra ndyaca ñaha cuenda vehe ñuhu sii ra Jesús ta catyí ra: Yoho maestro vaha xoon, ¿yozo caa zacui ta ñihi tahvi añime?

¹⁹ Ta i catyí ra Jesús sihin ra: ¿Ñaa cuenda catyun vatyí vaha xein? Minoo tuhun ñi ra vaha iyo, maa ra Ndyoo.

²⁰ Sa siton tandihí cuii ley maa ra Ndyoo cuhva catyí si: “Ma cuzun sihin inga ñaha sa yivi ñazihun cuu. Ma cahñun sii ñiyivi. Ma zuhun. Ma cohon cuendu ziqui ñiyivi. Ta tyoon yahvi sii zutun ta sii zihun.” Catyí ra Jesús sihin ra.

²¹ Ta i catyí ra cuan: Tyei yahvi sii tandihí tuhun cuan cuhva ndya luhli.

²² Ta sa siñi ra Jesús cuhva catyí ra, ta i catyí ra sihin ra: Minoo ñi ca cuhva cumañi suun. Xicon tandihí sa iyo suun, ta cuhvon xuhun cuan sii ñiyivi ndahvi, ta cua coo sa cuca suun ndya gloria, ta quisun ta cundyicon sii. Catyí ra.

²³ Ta sa siñi ra cuan cuhva catyí ra Jesús, ta i nducuihya xaan iñi ra vatyí cuca xaan ra.

²⁴ Ta sa ndyehe ra Jesús vatyí cuihya xaan cuñi ra, ta i catyí ra sihin ra: Yíi xaan cua quihvi ñiyivi cuca nu ndyaca ñaha ra Ndyoo.

²⁵ Yíi ca quihvi minoo ra cuca nu ndyaca ñaha ra Ndyoo ta ziqui ca minoo camello yaha ti xuu minoo yicui ticui. Catyí ra.

²⁶ Ta ñiyivi sa siñi cuhva catyí ra Jesús i ndaca tuhun ñu: Tatu tacuan cuu si ¿yoo ra cuu cacu?

²⁷ Ta i catyí ra Jesús sihin ñu: Tandihí sa ña cuu zavaha ñiyivi, cuu zavaha ra Ndyoo sii si. Catyí ra.

²⁸ Tacuan ta i catyí ra Pedro sihin ra: Sa zandoo ndi tandihí sa sii ndi, ta ndyico ndi suun.

²⁹ Ta i catyí ra Jesús sihin tandihí ra: Sa ndisa catyí sihin ndo vatyí tandihí ndo sa zandoo vehe ndo a ñazihí ndo a tahan ndo a zutu ndo a zihí ndo a zehe ndo ta nducu ndo sa vaha sa cuenda nu ndyaca ñaha ra Ndyoo,

³⁰ cuaha xaan sa vaha cua ñihi ndo ihya ñuu ñiyivi ya, ta inga ñuu ñiyivi saa cua cundito ndo tandihí cuii tyiemvu.

Nacatyí ra Jesús inga saha vatyí cua cahñi ñiyivi sii ra

³¹ I cana ra Jesús sii sa usi uu tahan ra i casi ra, ta i catyí ra sihin ra: Vityí cua cuhun yo ñuu Jerusalén. Ta yucuan cua cuu tandihí sa i tyaa ra profeta ta sa naha sa cuenda ra i quisi ndya gloria.

³² Vatyí cua cuhva cuenda ñiyivi sii ra sii ñiyivi sa yivi ñiyivi hebreo cuu, ta cua vacu ndyaa ñiyivi sii ra. Quiñi xaan cua zavaha ñu sihin ra, ta cua tyicu zihñ ñu sii ra.

³³ Ta cua cañi xaan ñu sii ra, ta cua cahñi ñu sii ra. Ta sa cu uñi quivi cua nandoto tucu ra. Catyi ra Jesús.

³⁴ Ta ra apóstol cuan ñá cutuñi iñi ra nusiin sa cahan ra Jesús vatyí tañaha ca cuhva ra Ndyoo sa cutuñi iñi ra sii si.

Zanduvaha ra Jesús sii minoo ra cuaa vatyí ñi ñuu Jericó

³⁵ Tacuan ta sa cuñi saa ra Jesús ñuu Jericó, ta yu-ityi ndyaa minoo ra cuaa, sica ra caridad.

³⁶ Ta siñi ra cuaa vatyí yaha cuaha xaan ñiyivi, ta i ndaca tuhun ra ñaa cuenda.

³⁷ Ta i catyi ñiyivi sihin ra vatyí cua yaha ra Jesús, ra ñuu Nazaret.

³⁸ Ta i cana saa ra, ta catyi ra: ¡Yoho Jesús, zehe ra David, cundahvi iñun sii! Catyi ra.

³⁹ Ta ra sa cuahan coyo ityi nuu i catyi ra sihin ra vatyí nacutaxi ra. Zoco ñihi ca i cana saa ra ta catyi ra: ¡Zehe ra David, cundahvi iñun sii!

⁴⁰ Ta i sicuñi ra Jesús yucuan, ta i catyi ra sihin ñiyivi naquisi ndyaca ñu sii ra. Ta cuhva sa saa ra cuaa nu ndyaa ra Jesús, i ndaca tuhun ra Jesús sii ra ta catyi ra:

⁴¹ ¿Ñaa sa cuñun zavehi suhun? Ta i catyi ra cuaa cuan: Cuñi xein sa nandyehi.

⁴² Ta i catyi ra Jesús sihin ra: Nandyehi. Sa nduvaha siti nuun vatyí sino iñun sii.

⁴³ Ta zuun ñi caa cuhva cuan i cuu nandyehi ra, ta i sindyico ra sii ra Jesús. Zacahnu xaan ra sii ra Ndyoo. Ta tandiñi ñiyivi sa ndyehi cuhva cuan, i zacahnu xaan ñu sii ra Ndyoo.

19

Ra Jesús sihin ra Zaqueo

¹ I quihvi ra Jesús ñuu Jericó, ta cua yaha ra mahñu ñuu cuan.

² Ta ñuu cuan ndyaa minoo ra sa nañi Zaqueo. Cuca xaan ra. Ta ra cu nuu cuu ra sa cuenda ra tava xuhun cuenda ra ndyaca ñaha.

³ Cuñi xaan ra ndyehi ra sii ra Jesús yoo ra cuu ra. Zoco ñá cuu ndyehi ra vatyí tyaha xaan ra.

⁴ Yucuan cuenda i cacono ra ityi nuu nu cuahan ra Jesús, ta i ndaa ra minoo nu yutu sicómoro sa nandyaa yu-ityi nu cua yaha ra Jesús.

⁵ Ta sa saa ra Jesús yucuan i ndyehi ndaa ra, ta i ndyehi ra sii ra. Ta i catyi ra sihin ra: Zaqueo, zanumi ta noon vatyí vityí cua ndoi vehun.

⁶ Ta i zanumi ra Zaqueo ta i noo ra. Ta zii xaan i cuñi ra, ta cuahan ra sihin ra ndya vehe ra.

⁷ Ta sa ndyehi ñiyivi cuhva cuan i quisaha cahan ñu ndya vaha ñi sii ra Jesús ta catyi ñu vatyí cuahan ra Jesús vehe minoo ra iyo cuatyí.

⁸ Ta sa ñoho ra vehe ra, i sicuñi ndyaa ra Zaqueo, ta i catyi ra sihin ra Jesús: Zava ndaha tyiñe cua cuhve sii ñiyivi ndahvi. Ta tatu i zandavi ñehi ta zuhi xuhun ñiyivi, cua nacuhve cumi saha sii ñu.

⁹ Ta i catyi ra Jesús sihin ra: Vityí sa cacun, ta ñiyivi ra Abraham cuu suun vatyí sino iñun sii ra Ndyoo tañi i sino iñi ra Abraham.

¹⁰ Ta yuhvi, ra i quisi ndya gloria cui, ta vasi ñuu ñiyivi vatyí cua nanduqui ta zacaqui sii ñiyivi sa cua naa.

Cuñi si sa cutyiño yo tandiñi sa saha ra Ndyoo sii yo

¹¹ Ta ñi ñi ra siñi ñiyivi sa cahan ra Jesús, ta i quisaha cahan tucu ra inga cuhva ya vatyí sa cuñi saa ra ñuu Jerusalén, ta sica iñi ñiyivi vatyí cua quisaha cundyaca ñaha ra yucuan.

¹² Yucuan cuenda i catyi ra Jesús: Sicoo minoo ra vaha, ta cuñi ra cuhun ra minoo ñuu nusica vatyí yucuan cua nduu ra rey ta ziqui cua ndisi ra ñuu ra zoco sa cuu ra minoo rey.

¹³ Ta cumañi ca cuhun ra, i cana ra sii sa usi tahan muzu ra, ta saha ra minoo ziendu peso sii sa minoo minoo ra. Ta i catyi ra sihin ra: “Zatyíño ndo sihin xuhun ya ndya quivi cua quisi.”

¹⁴ Zoco ñiyivi ñuu ra, ñá cuñi ñu sa cuu ra rey sii ñu. Ta sa cuahan ra ityi, i tasi ñu tyiño sihin zuhva ra ta catyi ñu: “Ma cuhva ndi sa cundyaca ñaha ra ya sii ndi.”

¹⁵ Zoco ra cuan i nduu ra rey, ta ziqui i nasaa ra ndya ñuu ra. Ta sa nasaa ra i cana ra sii muzu ra, ra i zandoo ra xuhun cuan sihin vatyí cuñi ra coto ra yozo i zahacanaa xuhun ra ñii ñi sa sahan ra.

¹⁶ Ta saa minoo muzu cuan ta catyi ra: “Tata, i zahacanei minoo mil sihin sa minoo ziendu i zandoon sii.”

¹⁷ Ta i catyi rey cuan sihin ra: “Vaha xaan. Minoo muzu vaha cuun. Vaha i zatyínon sihin sa zuhva ñi xuhun i zandoi suhun. Yucuan cuenda vityi sehi sa cundyaca ñohon usi tahan ñuu.”

¹⁸ Tacuan ta i saa tucu inga ra sa i saha ra xuhun sii. Ta i catyi ra: “Tata, i zahacanei ohon ziendu sihin sa minoo ziendu i zandoon sii.”

¹⁹ Ta i catyi tucu rey cuan sihin ra: “Cuu cundyaca ñaha tucu moo; ohon tahan ñuu cua cundyaca ñohon.”

²⁰ Tacuan ta i quisi inga ra, ta i catyi ra: “Tata, ica xuhun ya sa minoo ziendu cuan. I sicumi vehi sii si nuu minoo pañitu

²¹ vatyí yuhi suun vatyí minoo ra xaan cuun, ta tuhvon naquihin sa yivi suun cuu, ta nacuhun tyiño zacuu inga ra.”

²² Tacuan ta i catyi rey cuan sihin ra: “Yoho minoo muzu ña vaha cuun. Vityi sihin cuhva cohon ta cua catyi tuqui suhun vatyí siton vatyí xein ta tuhve naquihin sa yivi sii cuu, ta naquihin tyiño zacuu inga ra.

²³ Yucuan cuenda ¿ña cuenda ñá tyuhun xuhin banco, ta sa cua nasei ta cua naquihin sii si, zoco sa zahacanaa si zuhva?” Catyi rey cuan.

²⁴ Ta i catyi ra sihin inga ra yucu yucuan: “Quindyaa ndo xuhun sa sehi sii ra ya, ta cuhva ndo sii si sii ra sa cumi cuaha ca.”

²⁵ Ta i catyi ra cuan sihin ra: “Zoco sa cumi minoo mil.”

²⁶ Ta i catyi rey cuan: “Ta catyi sihin ndo vatyí ra zatyíno vaha sihin sa sehi sii ra, cua cuhve cuaha ca sii ra. Ta ra ña cuñi zatyíno sihin sa sehi sii ra, cua quindyeyi sii si.

²⁷ Ta ñu xaan iñi sii, ñu ña cuñi sa cundyaca ñehi sii ñu, quisi ndyaca ndo sii ñu ihya, ta cahñi ndo sii ñu nui.” Catyi rey cuan i catyi ra Jesús.

Cuhva i quihvi ra Jesús ñuu Jerusalén

²⁸ Ta sa yaha cahan ra Jesús cuhva cuan ta cuahan ra ityi nuu ca ndya ñuu Jerusalén.

²⁹ Ta cuhva sa cuñi saa ra ñuu Betfagé ta ñuu Betania vatyí ñi minoo yucu sa nañi yucu Olivos, ta i tasi ra sii uu tahan ra apóstol.

³⁰ I catyi ra sihin ra: Cuahan ndo minoo ñuu sa ndyaa vatyí ñi yucuan, ta cuhva sa quihvi ndo ñuu cuan cua nañihi ndo sii minoo burro nuhñi ti. Quiti ta yoñi ca cozo. Ndasi ndo sii ti, ta quisi ndo sihin ti.

³¹ Ta tatu iyo ñiyivi ndaca tuhun sii ndo ñaa cuenda ndasi ndo sii ti, catyi ndo: “Vatyí siñi ñuhu ti sii ra ndyaca ñaha sii yo.”

³² Ta ra apóstol cuan, cuahan ra, ta i nañihi ra sii ti tañi cuhva i catyi ra Jesús sihin ra.

³³ Ta cuhva sa cua ndasi ra sii ti i catyi sito ho ti sihin ra: ¿Ñaa cuenda ndasi ndo burro ña?

³⁴ Ta i catyi ra cuan: Siñi ñuhu ti sii ra ndyaca ñaha sii yo. Catyi ra.

³⁵ Ta sindyaca ra sii ti sii ra Jesús. Ta i tyizo ra zahma ra sata ti, ta i tyizo ra sii ra Jesús sata ti.

³⁶ Tacuan ta cuahan ra Jesús. Ta i saqui ñiyivi zahma ñu ityi nu cua yaha ra.

³⁷ Ta cuhva sa cua cuyatyí ñu ñuu Jerusalén, saa ñu nu iñi noo yucu Olivos cuan. Ta tandihí cuii ñiyivi ndyico sii ra Jesús i quisaha cuzhi xaan iñi ñu. Ta saa xaan cana saa ñu, ta zacahnu ñu sii ra Ndyoo sa cuenda sa ndyityi nahnu xaan i ndyehe ñu.

³⁸ Ta i catyi ñu: ¡Nazacahnu yo sii ra cuu rey, ra vasi sa cuenda ra Ndyoo! ¡Nazacahnu xaan yo sii maa ra Ndyoo! ¡Vaha xaan, vaha xaan cuu maa ra Ndyoo! Catyi ñu.

³⁹ Tacuan ta zuhva ra fariseo sa cuahan coyo sihin ñiyivi cuan i quisaha catyi ra: Maestro, zacutaxun sii ñu sica noo suhun.

⁴⁰ Zoco i catyi ra Jesús sihin ra: Catyi sihin ndo vatyi tatu cua cutaxi ñiyivi ya, cua cana saa yuu.

⁴¹ Tacuan ta sa cuñi saa ra Jesús ñuu Jerusalén, ta kuhva sa ndyehe ra ñuu cuan i sacu xaan ra.

⁴² Ta i catyi ra: Tatu sa i sito ndo ta cutuñi iñi ndo yozo caa cuu coo sa taxi sii ndo sihin ra Ndyoo, cuu nduvaha ndo. Zoco vityi sa yaha kuhva. Ta sa siñi tuñi cuan, ñoho xehe si sii ndo, ta ma cuu coto ndo sii si.

⁴³ Ta cua quisi quivi, ta ra xaan iñi sii ndo cua zavaha ra minoo sacu viconduu nu yucu ndo, ta ma cuu quita ndo.

⁴⁴ Ta ndaha cua zativi ra ñuu ndo. Cua cuu tandihi cuii ndo. Ta ma zandoo ra numinoo yuu ziqui inga si vatyi ña cuñi ndo nacoto ndo sa quisi ra Ndyoo nu ndyaa ndo.

Tava ndyizo ra Jesús sii ñiyivi zavaha ndya vaha ñi yuvehe ñuhu cahnu

⁴⁵ Tacuan ta i quihvi ra Jesús nu cuu nuquehe vehe ñuhu cahnu, ta i quisaha tava ndyizo ra sii ñu xico ta ñu zata yucuan.

⁴⁶ Ta i catyi ra sihin ñu: Catyi tutu Tuhun Ndyoo: “Vehe mi cuu vehe nu cahan ñiyivi sihin ra Ndyoo.” Zoco maa ndo zacuu ndo vehe ra zuhu sii si. Catyi ra.

⁴⁷ Ta tahan tahan quivi i zacuaha ra Jesús sii ñiyivi sisi vehe ñuhu. Ta ra zutu nahnu, ta ra maestro cuenda ley ta ra cu tyiño ñuu cuan i nducu ra kuhva yozo caa cuu cahni ra sii ra.

⁴⁸ Zoco ñá ñihi ra kuhva yozo caa cua zacuu ra vatyi i tyizoho tandihi ñiyivi tandihi sa cahan ra Jesús.

20

Ndaca tuhun ra fariseo sii ra Jesús yoo ra i saha tyiño sii ra ta zavaha ra kuhva zavaha ra

¹ Minoo quivi sa quivi cuan zacuaha ra Jesús sisi vehe ñuhu cahnu, ta nacatyi ra tuhun vaha sihin ñiyivi. Ta saa coyo ra zutu nahnu ta ra maestro cuenda ley ta ra sahnü ñuu cuan.

² Ta i catyi ra sihin ra Jesús: Nacatyun sihin ndi ¿yoo sa saha tyiño suun vatyi zavohon tandihi kuhva ya?

³ Ta i nacahan ra Jesús, ta catyi ra sihin ra: Cuñi tuqui nducu tuhin minoo tuhun sii maa ndo, ta nacatyi ndo sihin.

⁴ ¿Yoo ra i tasi sii ra Juan sa zaco ndutya ra? ¿Atu i tasi ra Ndyoo sii ra a ñiyivi? Catyi ndo.

⁵ Ta i natuhun tahan ra cuan sihin tahan ra ta catyi ra: Tatu catyi yo vatyi i tasi ra Ndyoo sii ra Juan cua catyi ra ya: “¿Ñaa cuenda ñá sino iñi ndo sa cahan ra?”

⁶ Zoco tatu catyi yo vatyi ñiyivi i tasi sii ra Juan, cua cahni ñiyivi sii yo sihin yuu vatyi sica iñi tandihi maa ñu vatyi maa ra Ndyoo i tasi sii ra Juan ta minoo profeta i cuu ra. Catyi ra cuan sihin tahan ra.

⁷ Yucuan cuenda i catyi ra sihin ra Jesús vatyi ña sito ra yoo ra i tasi sii ra Juan.

⁸ Ta i catyi ra Jesús sihin ra: Ta ma nacatyi tucu vii yoo ra i saha kuhva ya sii.

Tañi ra ña cuñi zatyño vaha tacuan iyo ra cua cahni sii ra Jesús

⁹ Tacuan ta i quisaha cahan ra Jesús sihin ñiyivi ziqui kuhva ya ta catyi ra: I tasi minoo ra yoho uva minoo sacu. Ta i saha noo ra sii si sii inga ra cua zatyño ra yucuan, ta cuahan ra nusica naha xaan.

¹⁰ Ta saa quivi sa iyo yucu vixi cuan, ta i tasi ra sii minoo muzu nu ndyaa ra zatyño yucuan vatyi cua quihin ra zuhva yucu vixi kuhva tahan si sii patrón ra. Zoco i cañi xaan ra sii muzu cuan. Ta ñahni sa saha ra sii ra. Ta i natasi ra sii ra.

¹¹ Ta i tasi sitoho yoho uva cuan sii inga muzu ra, ta i cañi xaan tucu ra sii ra. Ta quiñi xaan i zavaha ra sihin ra. Ta ñahni maa i saha ra sii ra, ta i natasi ra sii ra.

¹² Ta i tasi tucu patrón cuan inga muzu ra, sa cu uñi saha i cuu si. Ta zuun ñi kuhva cuan i zavaha ra sihin ra. I zañicuehe ra sii ra, ta tava ndyizo ra sii ra.

¹³ Yaha cuan, ta i catyi sitoho sacu cuan: “¿Yozo caa zacui vityi? Cua tasi sii zehi. Cuñi xein sii ra, vazú tyaa ra yahvi sii maa ra vatyi zehi cuu sii ra.”

¹⁴ Zoco cuhva sa ndyehe ra zatyíño yucuan sii ra, i natuhun tahan ra sihin tahan ra ta catyi ra: “Ihya ra cuu ra cua nañihi ndaha tyiño quivi cua cuu zutu ra. Nacahñi yo sii ra vatyí ndoo maa yo sihin sacu ya.” Catyi ra.

¹⁵ Ta i tava ndyizo ra sii ra sata sacu, ta i sahñi ra sii ra. Catyi ra Jesús. Ta ziqui i ndaca tuhun ra sii ñiyivi tyizoho: ¿Yozo caa cua zavaha sito ho sacu cuan sihin ra sahñi sii zehe ra?

¹⁶ Cua quisi ra, ta cua zanaa ra sii ra, ta cua cuhva noo ra sacu cuan sii inga ra. Catyi ra Jesús. Ta sa siñi ñiyivi tuhun cuan ta catyi ñu: Zoco ma zavaha ra Ndyoo cuhva cuan.

¹⁷ Ta i nandyehe ra Jesús sii ñu, ta catyi ra: Tatu tacuan sica iñi ndo ¿ña cuñi si catyi si cuñi maa ndo nu catyi si tyehen? “I zavita ihno ñiyivi zandaa vehe sii yuu sa cuñi si sa cuenda siqui vehe. Ta vityi yuu cuan cuu sa ñiñi ca ta ziqui tandihi sa cuenda vehe cuan vatyí tacuan catyi ra Ndyoo.

¹⁸ Ta yoo ra cua nduva ziqui yuu cuan cua tahnu cuatyí ra, zoco yoo ra cua canacava yuu cuan ziqui, cua caxi cuatyí si sii ra ndyíhi ndyíhi.”

Tahan si tyaa yo yahvi sii ra cu tyiño ta sii ra Ndyoo

¹⁹ Ta ra zutu nahnu ta ra maestro cuenda ley i nducu ra cuhva zuun ñi cuhva cuan sa tiin ra sii ra Jesús vatyí tuu iñi ra vatyí i cahan ra Jesús cuhva iyo maa ra. Zoco i yuhu ra sii ñiyivi.

²⁰ Yucuan cuenda i tasi ra sii zuhva ra cua nducu coto ihñi sii ra Jesús. Cua zaha ra cuan tuhun vatyí ra vaha cuu ra, zoco cua nducu ra cuhva ñaa minoo tuhun ña vaha cua cahan ra Jesús, ta cua ñihi ra cuhva tyaa ra cuatyí sata ra nuu ra cu gobernador.

²¹ Yucuan cuenda i catyi ra tyehen sihin ra Jesús: Maestro, sito ndi vatyí ndoo xaan cohon, ta ndoo xaan cuhva zacuohon. Ña tyaa con yahvi sii minoo ñiyivi ta ziqui sii inga ñu zoco zacuohon ityi ra Ndyoo sa ndisa cuii.

²² Yucuan cuenda cuñi ndi coto ndi: ¿Atu vaha tyiyahvi yo xuhun sii ra ndyaca ñaha a ña vaha? Catyi ra.

²³ Zoco i tuu iñi ra Jesús vatyí ña vaha añima ra cuan, ta i catyi ra sihin ra: ¿Ñaa cuenda nducu coto ihñi ndo sii?

²⁴ Zañaha ndo minoo xuhun sii. ¿Yoo sii nuu ndyaa ya? ¿Ta yoo sii zivi ndyaa ya? Ta i nacahan ra cuan ta catyi ra: Sii ra gobierno César.

²⁵ Ta i catyi ra Jesús sihin ra: Cuhva ndo sii ra gobierno César sa cuu sii maa ra. Ta cuhva ndo sii ra Ndyoo sa cuu sii maa ra Ndyoo. I catyi ra Jesús.

²⁶ Ta ñá cuu maa zandavi ñaha ra cuan sii ra Jesús sihin tuhun cahan ra nuu ñiyivi. Ta iyo xaan i cuñi ra cuhva i cahan ra Jesús, ta i cutaxi ra.

Ndaca tuhun ra tatu cua nandoto tucu ñiyivi

²⁷ Yaha cuan ta ziqui i saa coyo zuhva ra saduceo nu ndyaa ra Jesús. Catyi ra saduceo cuan vatyí ma nandoto ñiyivi tatu sa sihi ñu. Ta i ndaca tuhun ra cuan sii ra Jesús cuhva ya:

²⁸ Maestro, i tyaa ra Moisés minoo ley vatyí tatu sihi minoo rayi ta ndoo ndahvi ñazihi ra ta yoñi zehe ra i sicoo, natindaha yañi ra sihin ñaha cuan. Ta cua coo zehe ra sihin ña sa cuenda yañi ra, ra i sihi cuan.

²⁹ Sicoo usa tahan rayi sihin yañi ra. I tindaha ra nuu. Ta i sihi ra, ta yoñi zehe ra i sicoo.

³⁰ Ta ziqui i tindaha ra cu uu sihin ñandahvi cuan. Sihi tucu ra cuan. Ta yoñi zehe ra i sicoo.

³¹ I tindaha tucu ra cu uñi sihin ña. Ta tacuan tucu cuahan tyiño ndya i tindaha tandihi sa usa tahan ra sihin ña. Ta i sihi tandihi sa usa tahan ra, ta yoñi zehe ra i sicoo.

³² Ta nu ndihi tuhun i sihi ndihi tucu maa ñaha cuan.

³³ Yucuan cuenda cuñi ndi coto ndi ¿yoo ra cua cuu yí ña quivi cua nandoto ñiyivi? vatyí ñazihi tandihi sa usa tahan ra i cuu sii ña. Tacuan i catyi ra cuan sihin ra Jesús.

³⁴ Ta i catyi ra Jesús sihin ra: Ihya ñuu ñiyivi tindaha rayi ta ñu zíhi.

³⁵ Zoco ñiyivi cua nandoto inga ñuu ñiyivi saa nu ndyaca ñaha ra Ndyoo, ma tindaha ca ñu indyacuan.

³⁶ Ta ma cuu ca ñu vaty i sa nduu ñu tañi ángel. Ta zehe ra Ndyoo cuu sii ñu sa ndisa cuii vaty i cua nandoto ñu.

³⁷ Sa ndisa cuu si vaty i nandoto ñiyivi vaty i zandoo ra Moisés tuhun cuan nu tutu i tyaa ra. Vaty i quivi i cahan ra Ndyoo sihin ra nu cayu taca iñu cuan zoco ñá ndihi si, i cahan ra Moisés cuhva ya sihin ra Ndyoo ta caty i ra: “Zutu mañi yuu, Ndyoo cuun sii ra Abraham ta sii ra Isaac ta sii ra Jacob.” (Tacuan i caty i ra Moisés vaty i sito ra vaty i ndito ra Abraham sihin tandihi zehe ra vazu sa sihi coño ñuhu ra.)

³⁸ Vaty i yivi Ndyoo sii ñiyivi ndaha sihi cuii cuu ra Ndyoo. Ndyoo cuu ra sii ñiyivi cua cundito tandihi cuii tyiemvu. Ta ndito añima ñiyivi sa cuenda maa ra Ndyoo. Ña sihi ñu.

³⁹ Tacuan ta i cahan zuhva ra maestro cuenda ley ta caty i ra: Vaha xaan tuhun cohon, Maestro.

⁴⁰ Ta yaha cuan ta ñá caña ca iñi ra ndaca tuhun ra numinoo ca tuhun sii ra Jesús.

¿Yoo sii zehe cuu sii ra Cristo?

⁴¹ Tacuan ta i caty i ra Jesús: Caty i ra maestro cuenda ley vaty i ra Cristo cuu ñiyivi sii ra rey David, ta ndisa cuu si cuhva cahan ra cuan.

⁴² Zoco zuun ñi maa ra rey David i cahan ta sa naha tuhun i saha ra Ndyoo sii ra, ta i tyaa ra cuhva cahan ra Ndyoo sihin ra Cristo. Tyehen i tyaa ra David:

Cahan ra Ndyoo sihin ra ndyaca ñaha sii mi ta caty i ra:

“Cundyoon siyo cuehi

⁴³ ndya cuhva ndya cua saa quivi cua cuhve cuhva cua zahacanoon sii ñiyivi xaan iñi suun.”

Tacuan i tyaa ra David.

⁴⁴ ¿Ta yozo caa vaty i caty i ra maestro cuenda ley vaty i ñiyivi ra David cuu sii ra Cristo ta zuun ñi maa ra David caty i vaty i ndyaca ñaha ra Cristo sii ra? Caty i ra Jesús.

Tyaa ra Jesús cuaty i sata ra maestro cuenda ley

⁴⁵ Ta cuhva i tyizoho tandihi ñiyivi i caty i ra Jesús sihin ñiyivi sica noo sihin ra:

⁴⁶ Zacuenda vaha ndo sii ndo, ta ma zacuu ndo cuhva zacuu ra maestro cuenda ley. Tahan xaan iñi ra quihí ra zahma nañi vaty i cua nacoto ñiyivi sii ra vaty i ra ñiñi cuu ra. Ta cahun ra nuyahvi vaty i cuñi xaan ra sa tyaa ñiyivi yahvi sii ra. Ta cuñi xaan ra sa cundyaa ra nu ndyaa ñiyivi ñiñi sisi vehe ñuhu. Ta cuñi xaan ra sa cundyaa ra tyayu vaha nu sasi ñiyivi zacahnu vico.

⁴⁷ Cuaha ca cua cutuñi ra maestro cuenda ley ta ziqui inga ñiyivi vaty i zuhu ra ndaha tyiño ñundahvi. Ta zandavi ñaha ra sii ñiyivi vaty i naha xaan sica tahvi ra sii Ndyoo vaty i cuñi ra sa cua ndyehe ñiyivi ta cua caty i ñu vaty i sito xaan ra sii Ndyoo. Caty i ra Jesús.

21

Cuhva i saha minoo ñandahvi xuhun

¹ I ndyehe ra Jesús vaty i tyihi ra cuca xuhun sisi minoo satu sisi vehe ñuhu cahnu.

² Ta i ndyehe tucu ra sii minoo ñaha ndahvi. Tyihi ña uu tahan xuhun ndyihí sa cu ohon zendavu sisi satu cuan.

³ Ta i caty i ra Jesús: Ndisa cuii caty i sihin ndo vaty i tyihi ñandahvi cuan cuaha ca xuhun ta ziqui tandihi ca ra cuca.

⁴ Saha maa ra sa nandoo ñi ca sii ra. Zoco ñandahvi cuan, ndihi i saha ñi ca ña xuhun cuita casi ña.

Cuhva i caty i ra Jesús cuhva cua tani vehe ñuhu cahnu

⁵ Tacuan ta zuhva ñu i natuhun ñu tuhun vehe ñuhu cahnu cuan. Caty i ñu vaty i tyaqui xaan yuu i sino si. Ta tyaqui xaan sa taca sa saha maa ñiyivi, ndihi ca. Tacuan ta i caty i ra Jesús:

⁶ Cua coo quivi ta tandihi sa ndyehe ndo ihya cua tani si. Numinoo yuu ya ta ma ndoo si ziqui tahan si. Cua nacoyo tandihi si.

⁷ Ta i ndaca tuhun ra sii ra Jesús ta catyi ra: Maestro, ¿ama cua coo cuhva cuan? ¿Ñaa zeña cua ndyehe ndi, ta ziqui cua coto ndi vatyi sa cua tahan si?

⁸ Ta i catyi ra Jesús: Zacuenda ndo sii ndo coto zandavi ñaha ñiyivi sii ndo. Vaty cuaha xaan ra cua quisi ta cua catyi ra: “Yuhvi cui Cristo, ta sa cuñi naa ñiyivi.” Cua catyi ra. Zoco ma sino iñi ndo sii ra, ta ma cundyico ndo sii ra.

⁹ Ta cua cuñi ndo tuhun vaty cua coo cuaty ta cahñi tahan xaan ñiyivi, zoco ma yuhu ndo. Xihna ca cua cuu tandihi cuhva cuan, cumañi ca sa saa quivi naa ñiyivi. Catyi ra.

¹⁰ Ta catyi tucu ra: Cua cahñi tahan minoo ñuu sihin inga ñuu, ta cua coo cuaty ñuu nahnu sihin inga ñuu nahnu.

¹¹ Ta cua coo sa taan ñihi xaan ziin ziin ityi. Ta cua coo cuehe tandihi ityi. Ta cua coo tama. Ta cua coo sa zayuhu xaan sii ñiyivi. Ta cua coo cuaha xaan zeña andivi.

¹² Zoco cumañi ca sa cuu tandihi cuhva cuan, cua cuxaan xaan ñiyivi ndyehe ñu sii ndo. Cua zayanga xaan ñu sii ndo, ta cua tiin ñu sii ndo vaty caca ñu cuaty saha ndo sisi vehe ñuhu. Ta cua tyihi ñu sii ndo vehe caa. Ta cua cuhva maa ndo sa ndaa sa cuenda mi ityi nuu ra cu rey ta ra cu tyiño.

¹³ Ta cua cuu cahan ndo sa cuenda mi.

¹⁴ Zoco zaha ndo cuenda, ta ma caca iñi ndo ñaa sa cua cahan ndo nuu ra cu tyiño cuan.

¹⁵ Vaty yuhvi cua cuhve tuhun cahan ndo, ta cua cuhve sa siñi tuñi xiñi ndo. Ta numinoo ra xaan iñi sii ndo ta ma cuu zahacanaa ra sii ndo sihin tuhun cahan ra.

¹⁶ Zoco zuun ñi ñiyivi sii ndo cua xico tuhun sii ndo, zutu ndo ta zihhi ndo, ta tahan ndo ta ra tahan ndo, ta amigo ndo. Cua cuhva ñu sii ndo sii ñu xaan iñi sii ndo. Ta cua cahñi ñu sii zuhva ndo.

¹⁷ Tandihi ñiyivi cua cuxaan xaan ñu ndyehe ñu sii ndo sa cuenda mi.

¹⁸ Zoco ma cunaa numinoo ixi xiñi ndo.

¹⁹ Ta tatu ma ndu-uu iñi ndo, cua cundito ndo tandihi cui tyiemvu.

²⁰ Ta quivi cua ndyehe ndo vaty yucu zandaru siconduu ñuu Jerusalén ya, cua coto ndo vaty sa cuñi saa quivi cunaa ñuu ya.

²¹ Tacuan ta ñiyivi ndyaa nacahnu Judea, nacono ñu ta naquihvi xehe ñu ndya yucu. Ta ñu yucu sisi huhu, ma cunuhu ñu ndya ñuu ñu.

²² Vaty quivi cuan cua tasi tuñi ra Ndyoo sii ñiyivi ñuu ya. Ta tacuan ta cua cuu si tandihi cuhva catyi tutu ra Ndyoo.

²³ Zoco cuaha xaan tundoho cua ndyehe ñu zihhi, ñu ñoho zehe, quivi cuan a tatu iyo zehe ñu sa tyaxi quivi cuan vaty cahnu xaan tundoho cua coo quivi cuan vaty cua cuxaan xaan ra Ndyoo sihin ñiyivi ñuu Jerusalén.

²⁴ Cua cahñi zandaru sii ñiyivi sihin mityi ra, ta inga ñiyivi cua tiin ra ta cundyaca ra sii ñu ziin ziin ñuu. Ta ñiyivi sa yivi ñiyivi hebreo cuu, cua cuyucu ñu ñuu Jerusalén ndya quivi cua catyi maa ra Ndyoo.

Cuhva cua quisi tucu ra i quisi ndya gloria

²⁵ Ta cuaha sa iyo cua ndyehe ñiyivi nu ñicandyi ta nu yoo ta cuhva iyo tiño. Ta cua yuhu xaan ñiyivi ñuu ñiyivi ya cuhva cua ndaa noo xaan tyañuhu.

²⁶ Yaha xaan yaha xaan cua yuhu ñiyivi sihin sa sica xaan iñi ñu sa cuenda sa iyo sa cua cuu ñuu ñiyivi. Ta tandihi sa iyo andivi cua canda si.

²⁷ Tacuan ta ziqui cua ndyehe ñiyivi sii ra i quisi ndya gloria. Cua quisi tucu ra sihin vico ta sihin cuaha xaan cuhva. Ta tyaqui xaan caa ra.

²⁸ Ta tatu sa quisaha cuu tandihi cuhva ya, zih xaan cuñi ndo vaty sa yatyi cui cua cacu ndo.

²⁹ Tacuan i catyi ra Jesús, ta ziqui i cahan ra ziqui minoo cuhva ya ta catyi ra: Ndyehe ndo cuhva iyo yutu higuera ta tandihi inga yutu.

³⁰ Tatu cua ndyehe ndo sa cua nacoyo ndaha tu ta cua nduyutya tu, tacuan ta sa sito ndo vaty sa cua nducahñi.

³¹ Ta tacuan tucu tatu sa ndyehe ndo vaty sa cuu tandihi tuhun sa quehin sihin ndo ihya, tacuan ta cua coto ndo vaty sa cua cuyaty cundyaca ñaha ra Ndyoo ñuu ñiyivi ya.

³² Sa ndisa catyi sihin ndo vatyí cua cuu cuhva ya cuee ca sa cuu ñiyivi sa iyo vityi.

³³ Yutyí andivi ta ñuhu ñuu ñiyivi cunaa si. Zoco tuhun quehin ma naa si.

³⁴ Coto vaha ndo sii ndo coto ñáha zandava ndo iñi ndo sa cuenda cuatyí zavaha ndo tañi sa zavaha xaan ndo vico ta sihi xaan ndo ndixi ta sica xaan iñi ndo tuhun sa iyo ñuu ñiyivi. Tatu tacuan iyo ndo ta ña ndatu listo ndo, zana ñi iñi ndo ta cua quisi tundoho ziqui ndo.

³⁵ Vatyí tacuan cua cuu si sihin tandihí ñiyivi ñuu ñiyivi. Zana ñi iñi ñu, ta cua cuu si tañi minoo sa nacazi ra Ndyoo nu ñoho ñu, ta ma cuu ca quita ñu.

³⁶ Yucuan cuenda cuatu listo ndo, ta caca xaan ndo sii ra Ndyoo tandihí quivi vatyí cua cuhva ra sa ma ndyehe ndo tundoho cahnu xaan sa cua coo. Ta caca ndo sii ra vatyí cuhva ra sa cua saa vaha ndo ityi nuu ra i quisi ndya gloria. Tacuan i catyi ra Jesús.

³⁷ Ora i zacuaha ra Jesús sii ñiyivi sisi vehe ñuhu cahnu ta sa sa cuaa tuhva ra sahan ndya yucu sa nañi Olivos.

³⁸ Ta tahan ñaha ñi saa coyo ñiyivi vehe ñuhu vatyí cuñi ñu tyizoho ñu sa cahan ra.

22

Xico ra Judas Iscariote sii ra Jesús

¹ Sa cuñi tahan si vico sihi mvee ticatyí. Quivi sasi ñiyivi pan ña ndaa. Pascua nañi vico cuan. Ta catyi maa yo vico zuhun.

² Ta ra zutu nahnu sihin ra maestro cuenda ley, sa nducu ra cuhva yozo caa cuu cahñi ra sii ra Jesús, zoco yuhu ra sii ñiyivi.

³ Tacuan ta i quihvi cuihna sii ra Judas Iscariote. Ta minoo sa usi uu tahan ra i casi ra Jesús cuu ra.

⁴ Ta cuahan ra cua cahan ra sihin ra zutu nahnu ta ra cu nuu sii ra zacuenda vehe ñuhu cahnu. Natuhun tahan ra yozo caa cua xico ra Judas sii ra Jesús.

⁵ Ta zii xaan i cuñi ra cuan ta i zandaa ra tyiño vatyí cua cuhva ra xuhun sii ra Judas.

⁶ Ta i ndoo ra Judas vaha, ta i quisaha nducu ra cuhva yozo caa cua cuhva cuenda ra sii ra Jesús sii ra cuan cuhva sa yoñi ñiyivi yucu sihin ra.

I cuxiñi ra Jesús sihin ra i casi ra

⁷ Ta sa saa quivi tuhva ñu hebreo sasi pan ña ndaa, quivi sa tahan si cahñi ñu sii minoo mvee ticatyí.

⁸ Ta i tasi ra Jesús sii ra Pedro ta ra Juan sihin minoo tyiño, ta catyi ra sihin ra: Cuahan ndo cua zanduvaha ndo minoo mvee ticatyí vatyí cua cuxiñi yo.

⁹ Ta i ndaca tuhun ra sii ra Jesús ta catyi ra: ¿Ndyamaa cuñun sa zanduvaha ndi sa cuxiñi yo? Catyi ra.

¹⁰ Ta i catyi ra Jesús sihin ra: Cuahan ndo sisi ñuu. Ta yucuan cua ndyehe ndo sii minoo ra ndyizo ra minoo quiyi ndutyá. Cundyico ndo sii ra, ta quihvi ndo vehe nu cua quihvi maa ra.

¹¹ Ta catyi ndo sihin sitoho vehe cuan: “Catyí ra Maestro: ¿ndyamaa ndyaa cuarto nu cua cuxiñi sa cuenda vico ya sihin ra i casi?” Tacuan catyi ndo sihin ra catyi ra Jesús.

¹² Ta cua zañaha ra minoo cuarto cahnu ndya ziqui. Sa yaha nduvii si. Yucuan zanduvaha ndo sa cuxiñi yo.

¹³ Tacuan catyi ra Jesús sihin ra. Ta cuahan ra, ta i nañihi ra cuarto cuan tañi cuhva i catyi ra Jesús. Ta i zanduvaha ra sa cuxiñi ra sa cuenda vico zuhun cuan.

¹⁴ Ta sa saa cuhva ta i sicundyaa ra Jesús yumesa sihin sa usi uu tahan ra i casi ra.

¹⁵ Tacuan ta i catyi ra Jesús sihin ra: Cuñi xein cuxiñi sihin ndo sisi vico zuhun ya cuee ca sa ndyehi tundoho.

¹⁶ Ta catyi sihin ndo vatyí ma casi que inga saha sihin ndo sa cuenda vico ya ndya cua cuu si inga saha nu ndyaca ñaha ra Ndyoo.

¹⁷ Tacuan ta i quihin ra minoo vaso ñoho vino, ta i saha ra tyahvi ndyoo sii ra Ndyoo, ta i catyi ra: Quihin ndo vaso ya, ta coho minoo minoo ndo zuhva zuhva.

¹⁸ Vatyí catyí síhin ndo vatyí ma coho que vino ndya cua cundyaca ñaha ra Ndyoo síi ñiyívi.

¹⁹ Tacuan ta i quihin ra pan. Ta i saha ra tyahvi ndyoo síi ra Ndyoo, ta i sahnú ra síi sí, ta i saha ra síi sí sí ra. Ta i catyí ra: Ihya cuu tañi coño ñuhi sa cua cuhve sa cuenda maa ndo. Zavaha ndo cuhva ya vatyí nacohon iñi ndo síi. Catyí ra.

²⁰ Ta sa yaha cuxiñi ra i quihin ra minoo vaso vino, ta i catyí ra: Ihya cuu tañi ñiñi. Cua cati sí sa cuenda maa ndo. Vityí zandaa ra Ndyoo minoo tyiño saa. Cua zandasi ra cuatyí ñiyívi síhin ñiñi.

²¹ Zoco vityí ra sa xico síi, ñn ñi ndyaa ra mesa ya síhin.

²² Ta ndisa vatyí ra i quisi ndya gloria cua cuu tandihí síi ra tañi sa ndyaa cuu síi ra, zoco ñdahvi ñi cuu ra xico síi! Catyí ra Jesús.

²³ Tacuan ta i quisaha nducu tuhun tahan ra i casi ra síi ra tahan ra, ndya ra cuu ra zacuu cuhva cahan ra Jesús tuhun.

Natuhun tahan ra i casi ra Jesús ndya ra cuu ra ñiñi ca

²⁴ Yaha cuan ta i quisaha natuhun tahan xaan ra i casi ra Jesús sa cuenda ndya ra cuu ra ñiñi ca nu yucu ra.

²⁵ Ta i catyí ra Jesús síhin ra: Ra cu rey síi ñiyívi ñuu ñiyívi ya cuñi ra vatyí zacahnú ñiyívi síi ra. Ta cuñi ra vatyí catyí ñiyívi vatyí tyindyee ra síi ñu.

²⁶ Zoco ña tacuan cua cuu sí sa cuenda maa ndo. Tatu cuñi ndo cuu ndo ra cu nuu, zanduluhlu ndo síi ndo. Ta ra cuñi cundyaca ñaha síi inga ndo, cuñi sí sa cuu ra muzú síi tandihí ndo.

²⁷ Ihya ñuu ñiyívi, ra ñiñi ca cuu ra ña zatyíño. Ndyaa ra yumesa ra, ta tyizo muzú ra coho nu mesa. Zoco ña tacuan zavaha mi vatyí zatyíño tañi muzú cui síi ndo.

²⁸ Ta maa ndo cuu ra i sindyaa síhin sisi quívi ña vaha ya nu ndyehe xein tundoho.

²⁹ Yucuan cuenda cua cuhve minoo nu cua cundyaca ñaha ndo tañi cua cuhva Zuti minoo nu cua cundyaca ñehi.

³⁰ Ta cua cuhve sa cua casi ndo ta cua coho ndo numesa síhin mi nu cua cundyaca ñehi. Ta cua tyicuhva ndo síi sa usi uu tahan ityí ñiyívi hebreo.

Catyí ra Jesús vatyí cua catyí ra Pedro vatyí ña sito ra síi ra

³¹ Tacuan ta i catyí ra Jesús síhin ra Pedro: Ndyehe vohon yoho Simón vatyí cuñi ra cu nuu síi cuihna suun vatyí cuñi ra nducu coto ihñi ra suun.

³² Zoco i cahan xein síhin ra Ndyoo sa cuendon vatyí ma naa sa sino iñun síi ra Ndyoo. Ta quívi cua ndu-uu iñun cuatyun, zandundyee con iñi ra tohon.

³³ Ta i catyí ra Simón síhin ra: Tata, sa ndyaa listi sa cuhin suhun vazu ndya vehe caa ta vazu cui suhun. Catyí ra.

³⁴ Ta i catyí ra Jesús síhin ra: Catyí suhun yoho Pedro vatyí cumañi ca sa vacu saa ndívi tyahnu sa cuaa vityí ta cua catyun uñi tahan saha vatyí ña siton síi.

Sa cuñi saa cuhva cua cuhva cuenda ra Judas síi ra Jesús

³⁵ Tacuan ta i ndaca tuhun ra Jesús síi ra i casi ra ta catyí ra: Nacohon iñi ndo quívi i tasi síi ndo sa nacatyí ndo tuhun síhin ñiyívi ta ñahñi sindyizo ndo, nu xuhun ta nu sa casi ndo ta nu inga zahma ndo. ¿Atu i cumañi sí síi ndo quívi cuan? Ta i nacahan ra cuan ta catyí ra: Ñahñi i cumañi síi ndi.

³⁶ Ta ziquí i catyí ra Jesús síhin ra: Zoco vityí tatu iyo xuhun ndo a sa casi ndo a zahma ndo, cuizo ndo síi sí. Ta tatu ñahñi mityí ndo, xico ndo minoo zahma ndo ta zata ndo minoo sí.

³⁷ Vatyí catyí síhin ndo vatyí cuhva ndyaa sí nu tutu ra Ndyoo sa cuenda mi, sa cuñi tahan sí cuhva catyí sí: “Cua tasi tuñi ñiyívi síi ra tañi ra iyo cuatyí.” Tacuan catyí sí, ta cua cuu tandihí cuhva ndyaa sí.

³⁸ Ta i catyí ra cuan síhin ra Jesús: Tata, cumi yo uu tahan mityí. Ta i catyí ra Jesús síhin ra: Maa vatu ñi.

Cahan ra Jesús síhin ra Ndyoo minoo nu yucu yutu tyaqui nu nañi sí Getsemaní

³⁹ I quita ra Jesús vehe cuan ta cuahan ra ndya yucu Olivos tañi tuhva maa ra sahan. Ta cuahan tucu ra i casi ra sihin ra.

⁴⁰ Ta cuhva sa saa ra yucuan i catyi ra sihin ra i casi ra: Caca tahvi ndo sii maa ra Ndyoo vaty ma cuhva ra sa nducu coto ihñi cuihna sii ndo.

⁴¹ Tacuan ta cuahan ra Jesús zuhva ca maa ñi maa ra. Tañi cuhva zavita yo minoo yuu, tacuan ñi cuu cuhva cuahan ra. Ta yucuan i sicuiñi siti ra, ta i cahan ra sihin ra Ndyoo.

⁴² Ta i catyi ra sihin ra Ndyoo: Ndyoo Zuti, tatu cuhva cuñi moo cuu, cuhvon sa ma ndyehi tundoho ya. Zoco ma cuhvon tañi cuhva cuñi mi. Nacuu si tañi cuhva cuñi moo.

⁴³ Tacuan ta i quituu minoo ángel nu ndyaa ra, ta saha ca si tundyee iñi sii ra.

⁴⁴ Cuaha xaan tundoho ndyehe ra Jesús vaty cuihya xaan cuñi ra, ta ñihi ca sica tahvi ra sii ra Ndyoo. Ta cuaha xaan tyeen ra i quita tañi toon ñiñi nu ñuhu.

⁴⁵ Ta sa nduvita ra sa ndihi cahan ra sihin ra Ndyoo ta sahan ra nu yucu ra ndihi sihin ra, ta nañihi ra sii ra quixi ra vaty cuihya xaan cuñi ra.

⁴⁶ Ta i catyi ra sihin ra: ¿Ñacu quixi xaan ndo? Nduvita ndo ta cahan ndo sihin ra Ndyoo coto nducu coto ihñi cuihna sii ndo.

Tiin ra sii ra Jesús

⁴⁷ Nu cahan ca ra Jesús ta i saa ra Judas, minoo sa usi uu tahan ra i casi ra Jesús cuu ra. Ta i saa cuaha xaan ñiyivi sihin ra. I tuhva ra Judas sii ra Jesús vaty cua coho ra xiti ra.

⁴⁸ Ta i catyi ra Jesús sihin ra: Judas, ¿atu sihin sa cohon xiti cua nacuhva cuendon sii ra i quisi ndya gloria? Catyi ra.

⁴⁹ Ndyehi ra yucu sihin ra Jesús cuhva sa cuu, ta ndaca tuhun ra sii ra: Tata, ¿atu cañi ndi sii ra sihin mityi? Catyi ra.

⁵⁰ Ta minoo ra cuan i sahdya ra zoho minoo ra cu muzu ra cu zutu ya cahnu, siyo cuaha.

⁵¹ Zoco i catyi ra Jesús sihin ra: Zaña ndo. Vaha ñi. Catyi ra. Ta i naquihin ra Jesús zoho ra cuan ta natyaa ra. Ta i zanduvaha ra zoho ra.

⁵² Tacuan ta i catyi ra Jesús sihin ra zutu nahnu, ta ra cu policia cuenda vehe ñuhu ta ra mandoñi: ¿Atu vasi tiin ndo sii minoo ra zuhu vaty ñaa ndo mityi ta ndaha tyiño xaan?

⁵³ Tahan tahan quivi i sehin vehe ñuhu cahnu ta yucu ndo, zoco ñá tiin ndo sii yucuan. Vityi cuu cuhva ndyaca ñaha ra ña vaha, ta yucuan cuenda vityi cua tiin ndo sii.

I catyi ra Pedro vaty ña sito ra sii ra Jesús

⁵⁴ Tacuan i tiin ra sii ra Jesús, ta i sindyaca ra sii ra ndya vehe ra cu nuu sii ra cu zutu. Ta i sindyico ra Pedro sii ra sica sica ñi.

⁵⁵ Ta cuhva sa saa coyo ra yucuan i zatahan ra ñuhu nuquehe ta sicundyaa ra, ta i sicundyaa ra Pedro mahñu.

⁵⁶ Ta cuhva sa ndyaa ra Pedro yunuhu ta i ndyehe minoo ña cu muzu sii ra, ta nacoto ña sii ra, ta catyi ña: Ra ihya, ra tahan ra cuu sii ra.

⁵⁷ Zoco i catyi ra Pedro: Maha, ña site sii ra.

⁵⁸ Ta i yaha zuhva cuhva, ta i ndyehe tucu inga ra sii ra Pedro, ta catyi ra: Yoho tucu, ra tahan oo cuu sii ra. Ta i catyi ra Pedro sihin ra: Yivi yuhvi, tata.

⁵⁹ Ta i yaha tañi minoo ora, ta i catyi tucu inga ra: Ndisa cui vaty ra ihya cuu tucu minoo ra tahan ra vaty zuun ñi ra Galilea cuu tucu ra.

⁶⁰ Ta i catyi ra Pedro sihin ra: Tata, ña site ñaa tuhun cohon. Catyi ra. Ta zuun ñi caa cuhva sa cahan ra Pedro, ta i sacu saa minoo ndivi tyahnu.

⁶¹ Tacuan ta i nasico cava ra Jesús, ta i nandyehi ra sii ra Pedro. Ta i nacohon iñi ra Pedro cuhva sa i catyi ra Jesús sihin ra: “Cumañi ca vacu saa ndivi tyahnu, cua catyun uñi tahan saha vaty ña siton sii.”

⁶² Ta cuhva cuan i quita ra Pedro, ta i sacu xaan ra vaty i nducuihya xaan iñi ra.

Sacu ndyaa ñiyivi sii ra Jesús

⁶³ Tacuan ta ra i sicumi sii ra Jesús i quisaha sacu ndyaa ra sii ra, ta i cañi ra sii ra.

⁶⁴ I sihñi ra minoo zahma nuu ra, ta ziqui i cati ra nuu ra ta catyi ra: Nacoton yoo ra i cañi suun. Catyi ra.

⁶⁵ Ta cuaha xaan inga sa quiñi i cahan ra sihin ra.

I sindyaca ra sii ra Jesús nu titahan ra cu tyiño hebreo

⁶⁶ Ta cuhva sa cundisi i titahan ra mandoñi sihin ra zutu nahnu sihin ra maestro cuenda ley. Ta i quihin ra sii ra Jesús, ta sindyaca ra sii ra nu cuu junta cahnu cuenda tandihi ra ñiñi hebreo. Ta i catyi ra sihin ra:

⁶⁷ Nacatyun sihin ndi ¿atu ra Cristo cuun, ra cua zacacu sii ndi? Ta i catyi ra Jesús sihin ra: Tatu catyi sihin ndo vatyi zuun ra cui, ma sino iñi ndo.

⁶⁸ A tatu ndaca tuhun ñaa minoo cuhva sii maa ndo, ma nacahan ndo. Ta zuun ñi sa ma zaña ndo sii.

⁶⁹ Zoco ndya vityi cua cundyaa ra i quisi ndya gloria siyo cuaha ra Ndyoo. Catyi ra.

⁷⁰ Tacuan ta i ndaca tuhun tandihi ra sii ra Jesús ta catyi ra: ¿Ziqui zehe ra Ndyoo cuu suun? Ta i catyi ra Jesús sihin ra: Zuun cui tañi catyi maa ndo.

⁷¹ Tacuan ta i catyi ra cuan sihin tahan ra: Xihna sa cahan ra. Ñahñi ca sa ndaa cuñi si vityi. Zuun ñi maa yo i siñi sa cahan ra sihin yuhu ra.

23

Nacuhva cuenda ra sii ra Jesús sii ra Pilato

¹ I nduvita tandihi ra xaan iñi sii ra Jesús, ta i sindyaca ra sii ra nu ndyaa ra Pilato, ra cu gobernador.

² Ta i quisaha tyaa ra cuatyí sata ra Jesús nuu ra Pilato ta catyi ra: Ra ihya, zatívi xaan ra sii ñiyívi sihin tuhun cahan ra nuu ñu. Ta catyi ra vatyí ña vaha sa tyiyahvi ndi xuhun sii ra ndyaca ñaha. Ta catyi ra vatyí Cristo cuu ra, minoo ra cu rey. Tacuan i nacatyí tandihi ra cuan sihin ra Pilato.

³ Ta ziqui i ndaca tuhun ra Pilato sii ra Jesús: ¿Atu yoho cuu rey cuenda ñiyívi hebreo? Ta i catyi ra Jesús: Tacuan cu si tañi catyi moo.

⁴ Tacuan ta i catyi ra Pilato sihin ra zutu nahnu ta sihin inga ñiyívi: Ñahñi cuatyí ra ya iyo. Catyi ra.

⁵ Zoco i nduxaan ca ñiyívi ta i catyi ñu: Cahnu xaan cuatyí ra ya. Cuaha xaan tizíhi saha ra vatyí zacuaha ra sii ñiyívi ta zanandiqui ra sii ñu ndya Galilea ta ndya ihya.

Tasi ra Pilato sii ra Jesús nuu ra Herodes

⁶ Cuhva sa siñi ra Pilato tuhun cuan ta i ndaca tuhun ra tatu ra Galilea cuu ra Jesús.

⁷ Ta sa sito ra vatyí zuun ra cuu ra, ta ziqui i zacuhun ra sii ra nu ndyaa ra Herodes vatyí ra Herodes i cuu gobernador nacahnu Galilea. Ta quívi cuan ñoho ra Herodes ñuu Jerusalén.

⁸ Ta zii xaan i cuñi ra Herodes sa ndyehe ra sii ra Jesús vatyí sa naha xaan cuñi ra ndyehe ra sii ra. Sa siñi xaan ra Herodes tuhun ra Jesús, ta cuñi ra ndyehe ra sa zavaha ra Jesús minoo sa ndyityi.

⁹ Cuaha xaan cuhva i ndaca tuhun ra sii ra Jesús, zoco ñá nacahan maa ra Jesús sa cahan ra.

¹⁰ Ta yucu tucu ra zutu nahnu ta ra maestro cuenda ley cuhva cuan, ta i tyaa xaan ra cuatyí sata ra Jesús.

¹¹ Ta ra Herodes sihin zandaru ra, i sacu ndyaa ra sii ra Jesús. Ta i natyíhi ra minoo zahma yahvi xaan sii ra, ta tyaqui xaan si tañi sa sityiño minoo rey, ta i natasi ra Herodes sii ra nu ndyaa ra Pilato.

¹² Ta quívi cuan i nduu amigo ra Pilato sii ra Herodes vatyí nu quisi quívi ñá cuu ndyehe ra sii tahan ra.

Saha ra Pilato sa cuu ra Jesús

¹³ I zandu-íin ra Pilato sii ra zutu nahnu ta ra cu tyiño ta tandihi ñiyívi.

¹⁴ Ta i catyi ra sihin ñu: I quisi ndyaca ndo sii ra ya sii, ta catyi ndo vatyí zatívi xaan ra sii ñiyívi. Zoco sa tyicuhve sii ra nuu ndo. Ta ñahñi cuatyí ra iyo cuhva catyi maa ndo.

¹⁵ Ta ra Herodes tucu ñá nañihi ra numinoo cuatyí ra, ta i natasi tucu ra sii ra ihya. Sa ndyehe ndo vatyí ñahñi sa zavaha ra ta cua cuu ra.

¹⁶ Yucuan cuenda cua cañi sii ra, ta cua zañe sii ra.

¹⁷ Tacuan i catyí ra Pilato vatyí cuñi si sa zaña ra sii minoo ra ñoho vehe caa tañi iyo costumbre sa cuenda vico cuan.

¹⁸ Zoco iin ñi i cana saa tandihi ñiyivi ta catyí ñu: Cahñun sii ra ya, ta zañon sii ra Barrabás. Catyí ñu.

¹⁹ Ta ra Barrabás cuan ñoho ra vehe caa vatyí iyo cuatyí ra sa cuñi ra nduvita ra ziqui ra cu tyiño. Ta i sahñi ra ñiyivi.

²⁰ Ta ra Pilato cuñi ra zaña ra sii ra Jesús, ta i cahan ra sihin ñiyivi inga saha vatyí cua zaña ra sii ra.

²¹ Zoco i cana saa ñu ta catyí ñu: Nacuu ra nu cruz. Nacuu ra nu cruz.

²² Ta i catyí tucu ra Pilato sihin ñu sa cu uñi saha: ¿Ñaa cuenda? ¿Ñaa sa ña vaha i zavaha ra? Ñahñi cuatyí ra i nañihi ta cua cuu ra. Yucuan cuenda cua cañi sii ra, ta cua zañe sii ra. Catyí ra Pilato.

²³ Zoco i cana saa xaan ñiyivi, ta i zañiñi ñu vatyí nacuu ra nu cruz. Yaha xaan i cana saa ñiyivi, ta ra zutu nahnu ndya cuhva ndya sa cuu cuhva cuñi ñu.

²⁴ Ta i zandaa ra Pilato tyiño cuhva cuñi maa ñu.

²⁵ Ta tañi cuhva cuñi ñiyivi, i zaña ra sii ra Barrabás, ra ñoho vehe caa sa cuenda sa sahñi ra ñiyivi ta nduvita ra ziqui ra cu tyiño. Ta i zavaha ra sihin ra Jesús cuhva catyí ñiyivi.

Nu i tyaa ra sii ra Jesús nu cruz

²⁶ Tacuan ta i quihin zandaru sii ra Jesús ta cuahan ra sihin ra. Ta i tiin zandaru sii minoo ra ñuu Cirene. Simón nañi ra. I quita ra sicuhu, ta vasi ra ñuu Jerusalén. Ta i zacuizo zandaru cruz ra Jesús sii ra, ta cuahan ra sata ra Jesús.

²⁷ Ta i sindyico tucu cuaha xaan inga ñiyivi sii ra Jesús. Ta cuaha xaan ñu zihí i sacú xaan ñu vatyí cuihya xaan cuñi ñu sa cuenda ra.

²⁸ Ta i ndyehe ra Jesús sii ñu, ta i catyí ra sihin ñu: Tandihi ndoho ñu zihí ñuu Jerusalén, ma vacu ndo sa cuenda mi. Vacu ndo sa cuenda maa ndo ta sa cuenda zehe ndo.

²⁹ Vatyí cua quisi quivi cua ndyehe xaan ndo tundoho. Ta cua cahan ñiyivi sa cuenda ñu sa yoñi zehe, ta cua catyí ñu: “Zihí xaan cuñi ñu yoñi zehe iyo vatyí ma yaha xaan ndyehe ñu tundoho tañi ñiyivi iyo zehe.”

³⁰ Vatyí quivi cuan, cua cuñi ñu sa nduva yucu xiñi ñu ta zahvi si sii ñu.

³¹ Vatyí tatu tyehen zavaha ñu sihin mi ta ñahñi cuatyí, yaha ca cua zavaha ñu sihin maa ndo ra iyo cuatyí. Catyí ra Jesús.

³² Ta i quihin tucu zandaru sii uu tahan ra quiñi xaan iyo vatyí cua cahñi ra sii ra iin ñi sihin ra Jesús.

³³ Ta sa saa coyo ra minoo nu nañi si Yiqui Xiñi Ndiyí, yucuan i tyaa ra sii ra Jesús nuu cruz. Ta i tyaa ra sii minoo ra ña vaha cuan nuu inga cruz ta sañi ndyaa ra siyo cuaha ra Jesús. Ta inga ra siyo zatyí ra.

³⁴ Ta cuhva sa ndyaa ra Jesús nu cruz ta i catyí ra: Ndyoo Zuti, zohon tucahnu iñi sii ra ya vatyí ña sito ra ñaa sa ndyicuu ra sihin. Tacuan i cahan ra Jesús sihin ra Ndyoo. Ta i siziqui zandaru cuan vatyí cua ndyehe ra yoo ra cua zahacanaa minoo minoo zahma ra Jesús.

³⁵ Ta yucu ñiyivi, ta ndyehe ñu. Ta ra cu tyiño sa yucu sihin ñu i sacú ndyaa ra sii ra Jesús ta catyí ra: I zacacu ra sii inga ñiyivi. Nazacacu ra sii maa ra tatu ndisa vatyí ra Cristo cuu ra, ra i casi ra Ndyoo.

³⁶ Ta i sacú ndyaa tucu zandaru sii ra. I tuhva ra sii ra, ta saha ra vinagre coho ra.

³⁷ Ta i catyí ra: Tatu rey cuenda ñiyivi hebreo cuun, zacacun suun. Catyí ra.

³⁸ Ta i tyaa ra letra xiñi cruz ra sihin zahan griego, ta zahan latín ta zahan hebreo ta catyí si: “Rey ñiyivi hebreo cuu ra.”

³⁹ Ta minoo ra quiñi, ra ndyaa nu cruz ii siyo ra Jesús, quiñi xaan i cahan ra sihin ra ta i catyi ra: Tatu ndisa vatyí ra Cristo cuun, zacacun sii moo ta sii maa ndi. Catyi ra.

⁴⁰ Zoco inga ra cuan i catyi ra sihin ra tahan ra: ¿Atu ña yuhun sii ra Ndyoo? Ta zuun ñi tundoho sa ndyehe maa ra, ndyehun vityi.

⁴¹ Ta maa yo tahan si ndyehe yo tundoho ya vatyí iyo cuatyí yo, zoco maa ra ya ñahñi cuatyí ra iyo. Catyi ra.

⁴² Ta i catyi ra sihin ra Jesús: Jesús, nacohon iñun sii, quivi cua cundyaca ñohon.

⁴³ Ta i catyi ra Jesús sihin ra: Sa ndisa catyi suhun vatyí vityí cua cundyoos sihin mi nu cuahan añima ñu sino iñi sii ra Ndyoo.

Nu i sihi ra Jesús

⁴⁴ Tacuan i catyi ra Jesús. Ta i cuu si maa ora, ta i quisaha nduñaa. Ta ñaa xaan i nduu nacahnu ñuu ñiyivi ndya caa uñi sa sahiñi.

⁴⁵ I nduñaa ñicandyi. Ta zahma coco sa ndita sisi vehe ñuhu cahnu i ndata zava si.

⁴⁶ Ta i cana saa ra Jesús minoo sa ñihi xaan ta i catyi ra: Ndyoo Zuti, ndaha moo tyei añime. Ta sa yaha cahan ra Jesús cuhva cuan ta ndaha i sihi ñi ra.

⁴⁷ Ta sa ndyehe minoo ra cu nuu sii zandaru tandihi sa cuu, ta i zacahnu ra sii ra Ndyoo, ta catyi ra: Ndisa cuii vatyí ñahñi cuatyí ra i sicoo.

⁴⁸ Ta tandihi ñiyivi sa i titahan yucuan vatyí cua ndyehe ñu ñaa sa cua cuu, i quita ñu ta cuahan ñu. Yaha xaan cuihya i cuñi ñu.

⁴⁹ Ta tandihi amigo ra Jesús ta ñu zihí sa sindyico sii ra ndya Galilea i si-iñi ndyaa ñu ndya zava. Ta i ndyehe ñu tandihi sa i cuu.

I tyihi ra sii ra Jesús sisi ñaña

⁵⁰ Sicoo minoo ra nañi José. Vaha xaan ra, ta ndoo xaan ra. Ta i cuu ra minoo ra cu nuu cuenda ra hebreo.

⁵¹ Ra ñuu Arimatea cuu ra José, ta ndatu ra quivi cua cundyaca ñaha ra Ndyoo. Ta ñá ndoo ra vaha sihin sa zavaha ra hebreo ra tahan ra.

⁵² Ta i sahan ra José nu ndyaa ra Pilato, ta i sica ra coño ñuhu ra Jesús.

⁵³ Ta i zanoo ra sii si nuu cruz. Ta i cava noo ra zahma sii si. Ta i saqui ra sii si sisi minoo ñaña nu cuu minoo yavi yuu. Minoo ñaña saa cuu si ta yoñi ca cutyiño sii si.

⁵⁴ Ta i cuu si viarni, quivi i zanduvaha ñiyivi sa cua casi ñu zavuru vatyí zavuru cuu quivi tuhva ñu quitatu.

⁵⁵ Ta ñu zihí sa i quisi sihin ra Jesús ndya Galilea i sindyico ñu sii ra, ta i ndyehe ñu ñaña ta cuhva catuu coño ñuhu ra Jesús sisi si.

⁵⁶ Ta ziqui cuahan ñu ta zanduvaha ñu xahan vixi (sa cua vaca ñu sii coño ñuhu ra Jesús cuee ca), ta i quitatu ñu zavuru tañi catyi ley hebreo.

24

Cuhva i nandoto ra Jesús

¹ Ta quivi tumingu ñaha cuii ñi i sinanuhu ñu zihí ndya ñaña ra. Ndaha ñu xahan vixi sa zanduvaha ñu. Ta i sahan tucu inga ñu zihí sihin ñu.

² Ta cuhva sa saa ñu i ndyehe ñu vatyí yuu cahnu sa sindazi yuñaña cuan sa siñi siyo si.

³ I quihvi ñu sisi ñaña cuan, zoco ña nañihi ñu coño ñuhu ra Jesús, ra ndyaca ñaha sii yo.

⁴ Ta ñá ñihi ñu cuhva ñaa sa cuu. Ta cuhva cuan i quisi uu tahan ra nu nandyaa ñu; ñoho ra zahma xiño xaan si.

⁵ Ta i yuhu xaan ñu. Ta i sicava ndyayu ñu nu ñuhu. Ta i catyi ra cuan sihin ñu: ¿Ñacu nanducu ndo sii minoo ra ndito ihya nu iyo ñiyivi i sihi?

⁶ Yoñi ca ra ihya; sa i nandoto ra. Nacohon iñi ndo cuhva i cahan ra sihin ndo quivi sa sica noo ra Galilea.

⁷ Vatyí i catyi ra: “Tahan si sa cuhva cuenda ñu sii ra i quisi ndya gloria ndaha ra iyo cuatyí. Ta cua cahñi ra sii ra nuu cruz. Ta sa cu uñi quivi cua nandoto tucu ra.”

⁸ (Tacuan i catyi ángel cuan sihin ñu.) Ta i nacohon iñi ñu tuhun i cahan ra Jesús quivi cuan.

⁹ Ta i quita ñu nuñaña, ta i sinuhu ñu. Ta i nacatyi ñu tandihí cuhva cuan sihin sa usi iñi tahan ca ra i casi ra Jesús ta sihin tandihí inga ñu sino iñi.

¹⁰ Ta ñu nacatyi tuhun cuan sihin ra cuan cuu ña María Magdalena, ta ña Juana, ta ña María zihí ra Jacobo ta inga zuhva ca ñu.

¹¹ Zoco ñá sino iñi ra cuan sa cahan ñu vatyi sica iñi ra vatyi cahan ñi maa ñu.

¹² Zoco i nduvita ra Pedro, ta i cacono ra ta cuahan ra ndya ñaña. Ta i ndyehe ra sisi yavi yuu cuan. Ta i ndyehe ra vatyi zahma ñi ca ra catuu ndya zava. Ta i sinuhu ra. Ta iyo xaan i cuñi ra vatyi ñá catuu ca coño ñuhu ra Jesús sisi ñaña cuan.

I quituu ra Jesús nuu uu tahan ra i sica noo sihin ra

¹³ Ta zuun ñi quivi cuan cuahan uu tahan ra i sica noo sihin ra Jesús ndya minoo ñuu luhlu sa nañi Emaús. Ñuu cuan ndyaa si tañi usi iñi kilómetro sata ñuu Jerusalén.

¹⁴ Ta cuhva sa cuahan ra, natuhun tahan ra sa cuenda tandihí sa i cuu.

¹⁵ Ta cuhva sa natuhun tahan ra sihin ra tahan ra, i natahan ra Jesús sii ra ta cuahan ra sihin ra.

¹⁶ Zoco vazu i ndyehe ra sii ra Jesús, ñá nacoto ra yoo ra cuu ra Jesús.

¹⁷ Tacuan ta i catyi ra Jesús sihin ra: ¿Ñaa sa natuhun xaan ndo ityi cuahan ndo? Ta ¿ñacu nducuihya xaan iñi ndo?

¹⁸ Tacuan ta i nacahan minoo ra sa nañi Cleofas, ta catyi ra: ¿Yozo caa cuu si vatyi i sohon ñuu Jerusalén, ta ña siton cuhva sa i cuu ñuu cuan?

¹⁹ Ta i catyi ra Jesús sihin ra: ¿Ñaa sa i cuu? Catyi ra. Ta i catyi ra cuan sihin ra: Sa cuenda ra Jesús, ra ñuu Nazaret vatyi i cuu ra minoo ra profeta. Ta sihin tundyee iñi ra Ndyoo i zavaha xaan ra sa ndyityi. Vaha xaan i cuu ra nuu ra Ndyoo, ta vaha xaan i cahan ra nuu ñiyivi ndihí ca.

²⁰ Zoco ra zutu nahnu ta ra cu nuu vehe ñuhu i saha cuenda ra sii ra sii zandaru romano vatyi cahñi ra sii ra. Ta i sihi ra nuu cruz.

²¹ Ta vityi sa cuu si uñi quivi sa i cuu cuhva cuan. Ta i sica iñi maa ndi vatyi maa ra cuu ra cua zacacu sii ñiyivi hebreo.

²² Ta inga tucu cuhva vatyi iyo xaan cuñi ndi sihin cuhva catyi zuhva ñu zihí vatyi ñaha cuii ñi i sahan ñu nu ndyaa ñaña ra.

²³ Ta ñá nañihi ñu coño ñuhu ra yucuan. Ta i quisi nacatyi ñu sihin ndi vatyi i ndyehe ñu sii uu tahan ángel. Ta catyi ángel cuan vatyi ndito ra Jesús.

²⁴ Ta sahan zuhva ra tahan ndi nu ndyaa ñaña ra. Ta i ndyehe ra vatyi sa ndisa cuu cuhva catyi ñu zihí cuan. Ta ñahñi ca coño ñuhu ra Jesús ñoho.

²⁵ Tacuan i catyi ra cuan. Ta i catyi ra Jesús sihin ra: Zuhva cuii ñi cutuñi iñi ndo. Ta cuee xaan sino iñi ndo tuhun i tyaa ra profeta ta sa naha.

²⁶ ¿Atu ña sito ndo vatyi tahan si sa ndyehe xihna ra Cristo tundoho? ta ziqui cua ñihi ra tyiño sa cundyaca ñaha ra. Catyi ra Jesús sihin ra.

²⁷ Ta ziqui i quisaha nacatyi ra yozo caa cuahan tuhun nu tutu ra Ndyoo. I quisaha ra sihin tuhun i tyaa ra Moisés ta ziqui sa i tyaa tandihí ra profeta. Ta i zañaha ra Jesús cuhva i cahan Tuhun Ndyoo sa cuenda maa ra.

²⁸ Ta cuhva sa saa ra ñuu nu cuahan ra, i zaha ra Jesús tuhun vatyi cua cuhun ra ityi nuu ca.

²⁹ Zoco i zañiñi inga ra cuan sii ra ta catyi ra: Ndoon sihin ndi vatyi sa cua iñi xaan. Ta i quihvi ra Jesús vatyi cua ndoo ra sihin ra.

³⁰ Ta cuhva sa sacundyaa ra sihin ra mesa, i quihin ra pan. Ta saha ra tyahvi ndyoo sii ra Ndyoo. Ta i sahnú ra sii si, ta saha ra sii si sii ra.

³¹ Ta cuhva cuan i nacoto ra sii ra Jesús, zoco i naa ñi ra Jesús, ta ñá ndyehe ca ra sii ra.

³² Ta i catyi ra sihin ra tahan ra: ¿Ñacu ñá nacoto yo sii ra cuhva sa vasi yo sihin ra? Vatyi zii xaan i cuñi yo cuhva sa natuhun ra sihin yo ta cuhva zacuaha ra sii yo yozo caa cuahan Tuhun Ndyoo.

³³ Tacuan i catyi ra cuan, ta zuun ñi caa cuhva cuan i nduvita ra ta i sananuhu ra ndya ñuu Jerusalén. Yucuan i nañihi ra sii sa usi ñin tahan ca ra i casi ra Jesús. ñin ñi yucu ra sihin inga ra.

³⁴ Ta i catyi ra sihin ra: Ndisa vaty i nandoto ra ndyaca ñaha sii yo, ta sa ndyehe ra Pedro sii ra.

³⁵ Tacuan i catyi ra, ta i nacaty i tucu ra i saa cuan cuhva i natuhun ra Jesús sihin ra ityi cuahan ra ta cuhva i nacoto ra sii ra nu i sahnu ra pan.

Quituu ra Jesús nuu sa usi ñin tahan ra i casi ra

³⁶ Ta cuhva sa natuhun tahan ra tuhun cuan, ta i quituu ra Jesús mahñu nu yucu ra, ta i catyi ra sihin ra: Nacoo xaan sa taxi añima ndo. Catyi ra.

³⁷ Zoco i yuhu xaan ra cuan vaty i sica iñi ra vaty i ndyehe ra sii minoo añima.

³⁸ Ta i catyi ra Jesús sihin ra: ¿Ñacu yuhu xaan ndo? Ta ¿ñacu sica xaan iñi ndo? ta yuhvi cui.

³⁹ Ndyehe ndo ndehi ta sehi vaty i zuun yuhvi cui. Tiñ ndo sii, ta cua coto ndo vaty i yivi minoo añima cui. Ñahñi yiqui ta coño ñuhu iyo sii minoo añima tañi iyo sii mi.

⁴⁰ Ta cuhva sa ndih i cahan ra Jesús tuhun ya, i zañaha ra ndaha ra ta saha ra sii ra.

⁴¹ Zoco maa ra cuan, iyo xaan cuñi ra ta zii xaan cuñi ra ndya cuhva ndya ña cuu ca sino iñi ra sa ndyehe ra. Ta i catyi ra Jesús sihin ra: ¿Atu iyo sa casi?

⁴² Ta i saha ra zuhva tyiyaca sa tyihyo ta zuhva xita tyahiñu sii ra.

⁴³ Ta i quihin ra sii si, ta i sasi ra nuu tandih i ra.

⁴⁴ Ta i catyi ra sihin ra: Tandih i sa i cuu sii, cuu sa nacaty i sihin ndo ta ndyei sihin ndo. I catyi vaty i cua cuu tandih i cuhva ndyaa nuu Tutu ra Ndyoo sa cuenda mi, tandih i sa catyi tuhun i tyaa ra Moisés, ta tuhun i tyaa ra profeta ta sa ndyaa nu libro salmos ndih i ca.

⁴⁵ Tacuan i catyi ra Jesús sihin ra, ta i saha ra sa cutuñi iñi ra cuhva catyi si nuu tutu ra Ndyoo.

⁴⁶ Ta i catyi tucu ra Jesús sihin ra: Tacuan ndyaa si vaty i tahan si sa cui. Ta sa cu uñi quivi cua nandoto tuqui, catyi si. Vaty i ra Cristo cui, ra zacacu sii ndo.

⁴⁷ Ta vity i tahan si sa cahun ndo tandih i ñuu nacahnu ñuu ñiyivi ta nacaty i ndo sihin ñiyivi vaty i cuñi ra Ndyoo sa ndu-uu iñi ñu cuaty i ñu ta cua zandasi ra Ndyoo cuaty i ñu. Quisaha ndo cahan ndo tuhun ya ñuu Jerusalén ya.

⁴⁸ Ta maa ndo cuu sa ndaa tandih i tuhun ya.

⁴⁹ Ta cua zaquisi Taty i Ii ra Ndyoo ziqui ndo tañi catyi Zuti vaty i cua cuhva ra sii ndo. Zoco ndoo ndo ñuu Jerusalén ya ndya cua quisi Taty i Ii, ta cua ñihi ndo tundyee iñi sa cua quisi ndya andivi.

I ndaa xica ra Jesús ityi andivi

⁵⁰ Tacuan i cahan ra Jesús sihin ra i casi ra, ta i sindyaca ra sii ra ndya ñuu Betania. Ta i zandaa ra ndaha ra, ta i nazoco ra sii ra.

⁵¹ Ta cuhva sa nazoco ra sii ra ta i ndaa xica ñi ra ityi andivi.

⁵² Ta i zacahnu xaan ra yucu yucuan sii ra Jesús. Ta i sinanuhu ra ndya ñuu Jerusalén. Ta zii xaan zii xaan i cuñi ra.

⁵³ Ta ñiyaca ta ndyiyaca yucu ra vehe ñuhu cahnu yucuan. Ta zacahnu xaan ra sii ra Ndyoo. Ndh i si vity i.

Tuhun Vaha Sa I Tyaa Ra San Juan

Tuhun Ndyoo i nduu si minoo rayi

¹ Quivi i sino ñuu ñiyivi ta sa iyo Tuhun Ndyoo; maa ra, ra cu Tuhun Ndyoo, sa ndyaa ra sihin ra Ndyoo quivi cuan vatyí Ndyoo cuu tucu maa ra.

² Ndyaa sa xihna cuii ñi ta sa iyo ra sihin ra Ndyoo Zutu yo.

³ Sihin ra cuan i zavaha ra Ndyoo Zutu yo tandihi cuii sa iyo, ta ñahñi sa zavaha ra Ndyoo sa maa tuhun ñi ra.

⁴ Tandihi sa ndito ta ndito si sa cuenda ra cuan. Ta zañaha ra sii ñiyivi ñaa sa cuu sa ndisa. Tañi minoo ñúhu cuu ra.

⁵ Ñúhu cuan zandisi si nu ñaa. Ta ña cuu ndahva sa ñaa ya sii si.

⁶ Sicoo minoo ra i tasi ra Ndyoo. Sinañi ra Juan.

⁷ I quisi ra vatyí cuu ra minoo sa ndaa ta cahan ra tuhun sa cuenda ra cu ñúhu cuan vatyí tacuan ta cua sino iñi ñiyivi.

⁸ Maa ra Juan cuan, yivi ñúhu cuan cuu ra. Sa ndaa ñi i cuu ra. I tava ra Ndyoo tyiño sii ra vatyí cahan ra sa cuenda ra cu ñúhu cuan.

⁹ Vatyí ra cu ñúhu sa ndisa cuan, sa cua saa ra, ta cua cuhva ra sa siñi tuñi vaha sii tandihi ñiyivi.

¹⁰ I zavaha ra ñuu ñiyivi sihin ra Ndyoo Zutu yo, zoco quivi i quisi ra ñuu ñiyivi ya, ta ñá nacoto ñiyivi sii ra.

¹¹ I quisi ra zuun ñi ñuu ñiyivi sa i zavaha ra, ta zuun ñi ñiyivi ra ñá naquihin vaha ñu sii ra.

¹² Zoco ñiyivi i naquihin vaha sii ra sa ndisa, i saha ra cuhva sii ñu sa nduu ñu zehe ra Ndyoo. Maa ñu cuu ñu sino iñi sa ndisa cuii sii ra.

¹³ Ña caa ca ñu tañi caa zehe ñiyivi cuhva iyo si ñuu ñiyivi ya vatyí sa i nacacu saa ñu cuhva cuñi ra Ndyoo.

¹⁴ Ta ra cu Tuhun Ndyoo i nduu ra minoo ñiyivi, ta sindyaa ra sihin yo zuhva quivi. Saha xaan ra tumañi iñi sii ñiyivi, ta cahan ra maa ñi sa ndisa. Sa ndyehe yo vatyí cahnu xaan cuu maa ra tañi Ndyoo zutu ra. Minoo tuhun ñi ra cuu zehe Ndyoo sa ndisa, ta yucuan cuenda cuaha xaan cuhva iyo sii ra.

¹⁵ I cahan ra Juan sa cuenda ra, ta catyi ra: Ihya ra cuu ra i catyi vatyí vasi minoo ra cuae ca, zoco ñiñi ca ra ta ziqui mi vatyí sa iyo ra ta ziqui i caqui. Catyi ra Juan.

¹⁶ Sii tandihi cuii yo tyindyee xaan ra cuaha xaan cuaha xaan saha.

¹⁷ Sa cuenda ra Moisés ta sito yo ley ra Ndyoo, zoco sa cuenda ra Jesucristo, ta cuu ñihi yo tumañi iñi sihin ra Ndyoo, ta cuu coto yo ñaa sa cuu sa ndisa cuii.

¹⁸ Ta yoñi ca ndyehe sii ra Ndyoo numinoo saha. Zoco sa minoo tuhun ñi ra cuu zehe ra, cuñi xaan ra Ndyoo sii ra, ta maa ra ndyehe sii ra Ndyoo. Ta i nacatyí ra tandihi sihin yo yozo caa iyo ra Ndyoo Zutu yo.

Ra Juan ra i zacoo ndutya sii ñiyivi, cahan ra sa cuenda ra Jesucristo

¹⁹ Ra hebreo ra ñiñi ñuu Jerusalén i tasi ra sii ra cu zutu ta sii ra tyindyee sii ra cu zutu vatyí cua nducu tuhun ra sii ra Juan yoo ra cuu ra.

²⁰ Ta i catyi casi ra Juan: Yivi ra Cristo cuu yuhvi.

²¹ Ta ziqui i nducu tuhun tucu ra ta catyi ra: ¿Yoo ra cuu oo? ¿Atu ra Elías cuun? Ta i catyi ra Juan: Yivi yuhvi. Ta ziqui i nducu tuhun ra inga saha sii ra Juan ta catyi ra: ¿Atu yoho cuu ra cua quisi, ra cua cahan Tuhun Ndyoo? Ta i catyi tucu ra Juan: Yivi.

²² Ta ziqui i catyi tucu ra cuan sihin ra: ¿Yoo ra cuu oo? Cuñi si vatyí nacatyí ndi sihin ra tasi sii ndi. ¿Ñaa sa cua catyun? ¿Yoo ra cuun?

²³ I nacahan ra Juan ta catyi ra: Yuhvi cui minoo ra cana saa sisi cuhu ta catyi: “Vasi ra ndyaca ñaha sii yo. Yucuan cuenda zandundoo ndo ityi tañi i catyi ra cahan Tuhun Ndyoo”, ra Isaías. Tacuan i catyi ra Juan.

²⁴ Ta ra i quisi cuenda ra fariseo

²⁵ i nducu tuhun ra sii ra Juan ta catyi ra: Tatu yivi ra Cristo cuun ta yivi ra Elías ta yivi inga ra cahan Tuhun Ndyoo cuun ¿ña cuenda zacoo ndutyon sii ñiyivi?

²⁶ Ta i catyi ra Juan: Zacoo ndutye sihin ndutya. Nu yucu maa ndo nandyaa minoo ra sa ña sito ndo yoo ra cuu ra.

²⁷ I sei sa xihna ñi ñuu ñiyivi ya ta ziqui i saa maa ra, zoco ñiñi xaan ca ra ta ziqui mi. Ta yucuan cuenda ma cuu cui nu muzu ra ta ndasi tyiendu ndisa ra. Catyi ra Juan.

²⁸ Ta tandihi ihya, i cuu si nu nañi si Betábara. Ndyaa si cuan ityi caña ñicandyi ndya nu ndyaa yuu Jordán nu tuhva ra Juan zacoo ndutya sii ñiyivi.

Ra Jesús cuu tañi mvee ticatyi ra Ndyoo

²⁹ Ta inga quivi i ndyehe ra Juan vatyí tuhva ra Jesús sii ra, ta i catyi ra: Ndyehe ndo, ihya vasi ra cuu mvee ticatyi ra Ndyoo. Zandasi ra cuatyi sii tandihi ñiyivi ñuu ñiyivi.

³⁰ Ihya ra cuu ra quehin tuhun quivi i catyi: “Cuee ca cua quisi inga ra, zoco ñiñi xaan ca ra ta ziqui mi vatyí sa iyo ra ta ziqui i caqui.”

³¹ Ta ñá site yoo ra cuu ra quivi cuan, zoco cuñi sa cua coto ñiyivi hebreo sii ra, ta yucuan cuenda vasi zacoo ndutye sii ñiyivi sihin ndutya. Catyi ra Juan.

³² Ta i saha ra Juan minoo sa ndaa ta catyi ra: I ndyehi quivi i noo Tatyí li ndya ityi ziqui tañi noo minoo paloma, ta i ndoo si sihin ra.

³³ Ta ñá nacote sa xihna ñi yoo ra cuu ra Jesús, zoco ra Ndyoo Zutu yo i tava ra tyiño sii, sa zacoo ndutye sihin ndutya, ta i catyi ra: “Tatu cua ndyehun vatyí noo Tatyí li ta ndoo si sihin minoo ra, yucuan ra cuu ra cua zacoo ndutya sihin Tatyí li.” Catyi ra.

³⁴ Ta sa i ndyehi cuhva cuan, catyi ra Juan, ta sehi sa ndaa vatyí ihya cuu ra cuu zehe ra Ndyoo.

Ra i casi ra Jesús sa xihna ñi

³⁵ Ta i yaha minoo quivi. Ta inga quivi ndyaa ra Juan yucuan inga saha sihin uu tahan ra cutahan sihin ra.

³⁶ Ta sa i ndyehe ra vatyí cua yaha ra Jesús ta i catyi ra: Ica ra cu mvee ticatyi ra Ndyoo. Catyi ra.

³⁷ Ta sa siñi sa uu tahan ra cutahan sihin ra sa cahan ra Juan, ta i sindyico ra cuan sii ra Jesús.

³⁸ Ta ziqui i nandyehé ra Jesús ityi sata ra, ta i ndyehe ra vatyí ndyico ra cuan sii ra, ta i catyi ra Jesús: ¿Ñaa sa nanducu ndo? Ta i catyi ra cuan: Maestro, ¿ndyamaa iyo vehun?

³⁹ Ta i catyi ra Jesús: Coho ndo ta cua ndyehe ndo. Ta cuahan ra cuan sihin ra, ta i ndyehe ra nu ndyaa ra Jesús, ta i ndoo ra minoo quivi cuan sihin ra vatyí sa i cuu si tañi caa cumi sa sahiñi cuhva sa i saa ra yucuan.

⁴⁰ Ta minoo sa uu tahan ra cuan sa i siñi ra sa catyi ra Juan ta sindyico ra sii ra Jesús, cuu ra Andrés yañi maa ra Simón Pedro.

⁴¹ Ta ra Andrés, ñahñi inga ca sa i zavaha ra. Sa xihna cui ñi i sahan ra ta nanducu ra sii yañi ra, ra Simón, ta i catyi ra: Sa nañihi ndi sii ra Mesías. Catyi ra. (Tuhun Mesías cuan cuñi si catyi si Cristo a minoo ra sa cua zacacu sii ñiyivi.)

⁴² Ta ziqui i sahan ra Andrés sihin ra Simón ndya nu ndyaa ra Jesús. Ta sa ndyehe ra Jesús sii ra Simón, i catyi ra: Yoho cuu ra Simón zehe ra Jonás, zoco cua cunañun Cefas. (Cuñi si catyi si Pedro a minoo yuu.)

Cana ra Jesús sii ra Felipe ta ra Natanael

⁴³ Ta inga quivi cua cuhun ra Jesús ndya nu cu si Galilea, ta i nañihi ra sii ra Felipe ta catyi ra: Cundyicon sii.

⁴⁴ Ta ra Felipe cuan cuu ra minoo ra ñuu Betsaida. Hín ñi ñuu maa ra sihin ñuu ra Andrés ta ra Pedro.

⁴⁵ Ta i sahan ra Felipe ta nanducu ra sii ra sa nañi Natanael, ta i catyi ra: Sa i ndyehe ndi sii ra i cahan ra Moisés tuhun nu i tyaa ra nu tutu. Ta i tyaa tucu ra profeta sa cuenda ra cuan. Ra Jesús cuu ra sa cahan ra cuan tuhun, ta zehe ra José cuu ra, ra ñuu Nazaret.

⁴⁶ Ta i catyi ra Natanael: Ma cuu quita minoo sa vaha ñuu Nazaret cuan. Ta i nacahan ra Felipe ta catyi ra: Coho ta cua ndyehun.

⁴⁷ Ta sa i ndyehe ra Jesús sii ra Natanael vasi ra, ta i catyi ra Jesús: Ica minoo ra sa cuu ñiyivi hebreo sa ndisa cuii. Ña tuhva maa ra zandavi ñaha.

⁴⁸ Ta ziqui i nducu tuhun ra Natanael ta catyi ra: ¿Yozo caa siton sii? Ta i catyi ra Jesús: I ndyehi suun cuee ca sa cana ra Felipe suun, cuhva sa ndyoon saha yutu higuera cuan.

⁴⁹ Ta i catyi ra Natanael: Maestro, yoho cuu zehe ra Ndyoo Zutu yo. Ra ndyaca ñaha cahnu sii ñiyivi hebreo cuun.

⁵⁰ I nacahan ra Jesús ta catyi ra: ¿Atu sihin sa yucuan ñi sino iñun sii vatyi catyi suhun vatyi ndyehi suun saha yutu higuera cuan? Cahnu xaan ca inga sa cua ndyehun ta ziqui ca sa ihya.

⁵¹ Sa ndisa catyi suhun vatyi cua ndyehun vatyi cua nuña ityi ziqui ityi andivi ta ángel Ndyoo cua ndaa cua noo ziqui ra i quisi ndya gloria.

2

Minoo vico tindaha ñuu Caná nu cu si Galilea

¹ Ta i yaha uñi quivi ta ziqui sicoo minoo vico tindaha ñuu Caná nu cu si Galilea. Ta ñoho zihí ra Jesús yucuan.

² Ta i cana ñiyivi sii ra Jesús sihin ra i casi ra vatyi cuhun tucu ra vico tindaha cuan.

³ Ta cuahan ra, ta nu yucu ñiyivi yucuan i ndihí vino sihi ñu, ta catyi zihí ra Jesús sihin ra: Ndihi vino.

⁴ Ta i nacahan ra Jesús ta catyi ra: Maha, ¿ña cuenda cohon tuhun ña sihin? Tañaha ca tahan si quivi zatyíñe.

⁵ Zoco i catyi maa ña sihin ñu cu muzu: Zavaha ndo tandihí sa catyi maa ra.

⁶ Ta yucuan siyucu iñu tahan quizi yuu nahnu, tahan sa sityiño ñiyivi hebreo sa cuenda costumbre sa nacatya xaan ñu ndaha ñu a ñaa ca. Ta sa minoo minoo quizi cuan cuu cutahan cumi xico a minoo ziendu litro ndutya.

⁷ Ta i catyi ra Jesús sihin ñiyivi zatyíño: Zacutu ndo quizi ya sihin ndutya. Ta i zacutu cuii ñu.

⁸ Ta ziqui i catyi ra Jesús: Vityi tava ndo zuhva si ta cundyaca ndo sii ra cu nuu sii vico ya. Ta tacuan i zavaha ñu.

⁹ Ta i sihi ra cu nuu sii vico cuan sii ndutya cuan ta sa i nduu si vino, ta ñá sito ra yozo caa sino si. Zoco i sito maa ñu cu muzu cuan vatyi maa ñu i tyihi ndutya sisi quizi cuan vatyi maa ra Jesús catyi, ta i nduu si vino. Ta ra cu nuu sii vico cuan i cana ra sii ra tindaha cuan.

¹⁰ Ta i catyi ra sihin ra: Tandihí ñiyivi tuhva ñu saha sa xihna ñi vino vaha, ta tatu sa i sihi ñiyivi cuaha vino ta ziqui cua cuhva tucu ñu vino ndahvi ca coho ñiyivi. Zoco yoho i sicumi vohon vino vaha, ta vityi sohon sii si. (Tacuan i catyi ra vatyi ña sito ra vatyi maa ra Jesús zavaha vino cuan sihin ndutya.)

¹¹ Ihya cuu sa xihna ñi sa ndyityi i zavaha ra Jesús ñuu Caná nu cu si Galilea, ta sihin cuhva ya zañaha ra vatyi iyo xaan cuhva sii ra, ta i sino iñi ra i casi ra sii ra.

¹² Ta sa ndihí vico cuan, ta cuahan ra Jesús ñuu Capernaum. Ta cuahan zihí ra ta yañi ra ta ra i casi ra sihin ra. Ta yucuan i ndoo ñu zuhva quivi.

Tava ra Jesús sii ñiyivi zavaha sa ña vaha yuvehe ñuhu cahnu

¹³ Sa cuñi tahan si quivi coo vico zuhun cuenda ñiyivi hebreo, ta cuahan ra Jesús ndya ñuu Jerusalén.

¹⁴ Ta yucuan nuquehe vehe ñuhu i ndyehe ra vatyi xico ñiyivi zindiqui, mvee ticatyi ta paloma, ta inga ñiyivi ndyaa ñu sa nazama ñu xuhun ñiyivi.

¹⁵ Ta sa ndyehe ra Jesús tacuan, i zavaha ra minoo cuarta, ta i tava ndyizo ra sii ñu sata vehe ñuhu cuan sihin mvee ticatyi ta zindiqui. Ta sii ñiyivi nazama xuhun, i quiti cuatyi ra xuhun ñu nu ñuhu ta i zanduva ra mesa ñu.

¹⁶ Ta sihin ñiyivi xico paloma i catyi ra: Tava ndo sii ti ihya. Ma zavaha ndo minoo vehe nuyahvi sii vehe Zuti.

¹⁷ Ta sa i ndyehe ra i casi ra cuhva i zavaha ra, ta i nacohon iñi ra vaty i catyi ra David quivi i tyaa ra Tuhun Ndyoo: “Cuñi zativi si sii, vaty zavaha ñiyivi sa ña vaha sisi vehun.”

¹⁸ Ta ziqui i nducu tuhun ra hebreo sii ra Jesús ta catyi ra: ¿Ñaa zeña cua zañohon sii ndi ta ziqui cua coto ndi vaty ra cahnu cuun ta cuu zavohon sa tyehen?

¹⁹ I nacahan ra Jesús ta catyi ra: Cani ndo vehe ñuhu ya, ta sa cu uñi quivi ta cua zanduvehi sii si inga saha.

²⁰ Tacuan ta ziqui i catyi ra hebreo: Uu xico iñu cuiya i zatyino ra zandaa vehe ñuhu ya. ¿Ta ñacu catyun vaty cua zandoon sii si sisi sa uñi quivi ñi?

²¹ Zoco vehe ñuhu sa cahan ra Jesús tuhun, zuun ñi coño ñuhu maa ra cuu.

²² Yucuan cuenda, quivi i nandoto ra Jesús ta i nacohon iñi ra i casi ra vaty sa i catyi ra cuhva ya. Ta ziqui i sino iñi ra cuhva catyi tutu Ndyoo ta tuhun cahan ra Jesús sihin ra.

Sito ra Jesús tandihi sa iyo aña ñiyivi

²³ Ta quivi sa sindyaa ra Jesús ñuu Jerusalén vico zuhun cuan ta cuaha xaan ñiyivi sino iñi sii ra vaty ndyehe ñu cuaha xaan sa ndyityi i zavaha ra.

²⁴ Zoco ña ñi iñi ra Jesús sihin ñiyivi cuan vaty sa sito vaha ra cuhva iyo tandihi ñiyivi.

²⁵ Ta ña siñi ñuhu minoo, yoo sa cua cuhva sa ndaa sii ra vaty zuun ñi maa ra ta sa sito ra yozo caa iyo aña ñiyivi.

3

Ra Jesús sihin ra Nicodemo

¹ Sicoo minoo ra fariseo nañi ra Nicodemo. Minoo ra ndyizo tyiño sihin ra hebreo cuu ra.

² Ta i sahan ra minoo sa cuaa sa cua cahan ra sihin ra Jesús, ta catyi ra: Maestro, sito ndi vaty maa ra Ndyoo i tava tyiño suun vaty zacuohon sii ndi vaty yoñi ra cuu zavaha sa ndyityi tañi zavaha moo tatu yivi ra Ndyoo tyindyee sii ra.

³ Ta i nacaty ra Jesús sihin ra: Sa ndisa ta sa ndisa catyi suhun vaty tatu ma nacacu saa ñiyivi, ma cuu cundyaca ñaha ra Ndyoo sii ñu.

⁴ Ta i nducu tuhun ra Nicodemo ta catyi ra: ¿Zoco yozo caa cuu nacacu saa minoo ñiyivi tatu sa sahnun ra? Ma cuu nandihvi ra sisi zihhi ra inga saha ta nacacu ra.

⁵ Ta i nacahan ra Jesús ta catyi ra: Sa ndisa ta sa ndisa catyi suhun, ra ma coo ndutya ta ra ma ñihi Taty Ii ra Ndyoo, ma cuu quihvi ra nu ndyaca ñaha ra Ndyoo.

⁶ Ra cacu ñiyivi, ñiyivi cuu ra. Zoco ra nacacu saa sa cuenda Taty Ii, sa ndito aña ra.

⁷ Ma iyo xaan cuñun vaty catyi suhun vaty cuñi si sa nacacu soon. Ñahñi ca cuhva.

⁸ Caá taty tandihi ñi maa ityi. Siñun nduzu si, zoco ña cuu catyun ndyamaa i quisi si a ndyamaa cuahan si. Ta tacuan tucu iyo ñiyivi sa nacacu cuenda Taty Ii.

⁹ Tacuan i catyi ra Jesús, ta ziqui i quisaha nducu tuhun tucu ra Nicodemo sii ra ta catyi ra: ¿Ta yozo caa cuu cuhva ya?

¹⁰ Ta i nacaty ra Jesús sihin ra: Ta yoho minoo ra ñiñi cuun, minoo ra zacuaha sii ñiyivi hebreo, ta ña cutuñi iñun tuhun ya.

¹¹ Sa ndisa ta sa ndisa catyi suhun vaty quehin cuhva site ta cui sa ndaa cuhva sa ndyehi, zoco ña sino iñi ndo sa catyi.

¹² Tatu quehin sihin ndo cuhva iyo ñuu ñiyivi ya ta ña sino iñi ndo, ¿yozo caa cua sino iñi ndo tatu quehin sa cuenda sa iyo ndya gloria?

¹³ Yoñi ra sa i ndaa xica ndya gloria, maa ñi maa ra sa i noo ndya gloria, ra i quisi ndya gloria, zehe ra ndyaa ndya gloria.

¹⁴ Ta tañi i cañihi ra Moisés coo caa cuan sisi cuhu, tacuan tucu cua cañihi ñiyivi sii ra i quisi ndya gloria.

¹⁵ Vaty tacuan ta tandihi ñiyivi sino iñi sii ra, ma cunaa ñu. Cua cundito ñu tandihi cui tyiemvu.

Cuñi xaan ra Ndyoo sii ñiyivi ñuu ñiyivi

¹⁶ (Cahan ca ra Jesús, ta catyi ra:) Cuñi xaan ra Ndyoo sii ñiyivi, ta i saha ra sii sa minoo tuhun ñi zehe ra vatyí tandíhi ñiyivi, ñu sino iñi sii ra, ma cunaa ñu. Cua cundito ñu tandíhi tyiemvu sihin ra.

¹⁷ Ná zaquisi ra Ndyoo sii zehe ra ñuu ñiyivi ya sa cuenda sa cua tasi tuñi ra sii ñiyivi. I zaquisi ra sii ra vatyí cua zandasi ra cuatyí ñiyivi ta cua zacacu ra sii ñu.

¹⁸ Ñiyivi sa sino iñi sii zehe ra Ndyoo, ma tasi tuñi ra Ndyoo sii ñu, zoco ñiyivi sa ña sino iñi cua tasi tuñi ra Ndyoo sii ñu vatyí ña sino iñi ñu sii sa minoo tuhun ñi ra cu zehe Ndyoo.

¹⁹ Ta ihya cuu cuenda cua tasi tuñi ra Ndyoo sii ñu vatyí i quisi ñúhu ñuu ñiyivi, zoco cuñi xaan ca ñiyivi sa ñaa, ta ña cuñi ñu sii ñúhu vatyí yaha xaan ña vaha cuu cuhva zavaha ñu.

²⁰ Tandíhi ñiyivi sa zavaha sa ña vaha, cuxaan xaan ñu ndyehe ñu ñúhu cuan, ta ña tuhva ñu sii si coto ndundisi cuhva ña vaha sa ndyicuu ñu ta cua ndoho ñu.

²¹ Zoco ñiyivi zavaha cuhva sasi tahan sihin sa ndisa, tuhva ñu sii ñúhu, vatyí tacuan ta cua coto inga ñiyivi vatyí ra Ndyoo tyindyee sii ñu sihin cuhva vaha zavaha ñu.

Cahan tucu ra Juan sa cuenda ra Jesús

²² Ta sa i yaha cahan ra Jesús ta ziqui cuahan ra sihin ra i casi ra ndya nu cu si Judea, ta i ndoo ra zuhva quivi yucuan, ta i zacoo ndutya ra sii ñiyivi.

²³ Ta zuun ñi zacoo ndutya tucu ra Juan ñuu Enón yatyí ñi ñuu Salim vatyí cuaha xaan ndutya iyo yucuan. Ta cuaha xaan ñiyivi i quisi, ta sicoo ndutya ñu.

²⁴ Tacuan i cuu si vatyí tañaha ca cua tyihi ñiyivi sii ra Juan vehe caa.

²⁵ Tacuan ta ziqui i quisaha natuhun tahan xaan ra cu tahan sihin ra Juan sihin minoo ra hebreo sa cuenda yozo caa nduvaha cuhva iyo ñiyivi.

²⁶ Ta i sahan ñiyivi nu ndyaa ra Juan ta catyi ñu sihin ra: Maestro, ra sa sindyaa suhun inga siyo yutya Jordán, ra sa cahan xoon tuhun, vityí zacoo ndutya ra, ta tandíhi ñiyivi ndyico sii maa ra.

²⁷ Ta i nacahan ra Juan ta catyi ra: Yoñi minoo yo ta cuu coo sa sii yo tatu yivi maa ra Ndyoo saha.

²⁸ Zuun ñi maa ndo cuu sa ndaa vatyí sa i catyi sihin ndo vatyí yivi ra Cristo cui. Minoo ra i tasi ra Ndyoo ityi nuu cui.

²⁹ Vityí cua quehin minoo cuhva, cuhva iyo minoo vico tindaha. Ra cua tindaha cuan cuu ra sa cua quihin minoo ñaha. Ta amigo ra tindaha cuan, ndyaa ra yucuan. Tyizoho ra, ta cuzi xaan cuñi ra sihin cuhva cahan ra cua tindaha. Tacuan tucu mi vityí. Zii xaan cuñi.

³⁰ Ra sa cahan ndo tuhun, cuñi si nducahnu ca ra, ta yuhvi cua nduluhlu que.

Ra i quisi ndya gloria

³¹ Ra i quisi ndya gloria, ra cahnu ca cuu ra ta ziqui tandíhi inga ñiyivi. Ta ñiyivi ihya, cuenda ñuu ñiyivi ya cuu yo. Cahan yo cuhva iyo ñuu ñiyivi. Zoco ra i quisi ndya gloria ñiñi ca cuu maa ra ta ziqui tandíhi ca yo.

³² Ta saha ra sa ndaa sa cuenda sa i ndyehe ra ta sa i siñi ra, zoco yoñi sino iñi sa catyi ra.

³³ Zoco tatu iyo minoo ra sa sino iñi sa ndaa sa saha ra cuan, saha tucu maa ra sa ndaa vatyí cahan ra Ndyoo sa ndisa.

³⁴ Vatyí ra i tasi ra Ndyoo, cahan ra Tuhun Ndyoo. Vatyí saha maa ra Ndyoo Tatyí Ii sii ra cuaha xaan.

³⁵ Cuñi xaan ra Ndyoo Zutu yo sii Zehe ra, ta tandíhi cui ñaa sa iyo, saha maa ra Ndyoo sii si sii Zehe ra.

³⁶ Ñiyivi sino iñi sii Zehe ra Ndyoo, cua cundito ñu tandíhi cui tyiemvu. Zoco ñiyivi ña sino iñi, ma cundito ñu sihin ra Ndyoo. Yaha xaan cua ndoho ñu cua zacuu ra Ndyoo.

4

Natuhun ra Jesús sihin minoo ñaha samaritana

¹⁻³ I sito ra fariseo vatyí cuaha ca ñiyívi ndyico sii ra Jesús ta cuaha ca ñiyívi zacoo ndutyá ra ta ziquí ra Juan. Vazu yívi ra Jesús zacoo ndutyá sii ñu. Maa ra i casi ra zacoo ndutyá sii ñu. Ta sa sito ra Jesús vatyí sa sito ra fariseo cuhva cuan, ta ziquí i quita ra Judea ta cua nuhu ra ndya Galilea.

⁴ Ta ityi cahun ra, cua yaha ra nu cu si Samaria.

⁵ Yucuan cuenda saa ra minoo ñuu sa ñañi Sicar. Cuenda Samaria cuu ñuu cuan, ta ndyaa si yatyí minoo ñuhu i saha ra Jacob sii ra José zehe ra ta tyiemvu.

⁶ Yucuan iyo zoco sa ñañi zoco ra Jacob. Sitatu xaan ra Jesús vatyí sica ityi ra, ta yucuan cuenda sicundyaa ra yatyí ñi yuhu zoco cuan. Ta i cuu si maa ora.

⁷⁻⁸ Ta ra i casi ra Jesús, cuahan ra ndya ñuu vatyí cua zata ra zuhva sa casi ra. Tacuan ta ziquí i saa minoo ñaha nu ndyaa ra Jesús. Minoo ñaha samaritana cuu ña. Vasi quihin ña ndutyá. Ta catyi ra Jesús sihin ña: Cuhva siin ndutyá cohi.

⁹ Ta i nacahan ñaha samaritana cuan ta catyi ña: Ra hebreo cuun, ta yozo caa vatyí sicon ndutyá sii, ta ñaha samaritana cui. Tacuan i catyi ña vatyí iyo tizihí ñiyívi hebreo sihin ñiyívi samaritana.

¹⁰ Tacuan ta ziquí i nacahan ra Jesús ta catyi ra: Tatu sa vatyí siton ñaa sa saha maa ra Ndyoo ta yoo ra sica ndutyá suun, cua cacon sii, ta cua cuhve ndutyá sa cunditon.

¹¹ Ta ziquí i catyi ña sihin ra: Tata, ñahñi sa ndohon sa cua tavon ndutyá ya, ta cono xaan ñoho ndutyá ya. ¿Ta ndyamaa cua cahun ndutyá sa saha sa cundito ñiyívi ta cuhvon sii?

¹² ¿Atu cahnu ca moo ta ziquí ra Jacob ra cu ñiyívi sahnú sii ndi? Ihya ndutyá i sihi maa ra ta zehe ra ta quití zono ra, ta i zandoo ra ndutyá ya sii ndi. Catyi ña.

¹³ Ta i catyi ra Jesús sihin ña: Tandihí ñiyívi sa cua coho ndutyá ya, cua cu-ityi ñu inga saha.

¹⁴ Zoco ñiyívi sa cua coho ndutyá sa cua cuhve, ma cu-ityi ca ñu numinoo saha. Vatyí ndutyá sa cua cuhve, cua caña si sisi añima ñu, ta cua cuhva si sa cundito añima ñu sihin ra Ndyoo.

¹⁵ Tacuan ta ziquí i catyi ñaha cuan sihin ra: Tata, cuhvon ndutyá cuan sii vatyí ma cu-ityi que, ta ma quisi quihin que ndutyá zoco ya.

¹⁶ Ta i catyi ra Jesús sihin ña: Cuahan cua canon sii yíun ta quisi ndo.

¹⁷ Ta i nacahan ña ta catyi ña: Yoñi yíi iyo. Ta i catyi ra Jesús sihin ña: Ndison sa cohon vatyí yoñi yíun iyo.

¹⁸ Vatyí sa sicoo ohon tahan yíun. Ta ra sa ndyaa suhun vityi, yívi yíun cuu sii ra cuan sa ndisa. Ndisa sa cohon vatyí yoñi yíun iyo.

¹⁹ Tacuan ta i catyi ñaha cuan sihin ra: Tata, tuu iñi vatyí minoo ra cahan Tuhun Ndyoo cuun.

²⁰ I zacahnu ñiyívi sahnú sii nduhvi samaritana sii ra Ndyoo ihya yucu ya, zoco ndoho ñiyívi hebreo catyi ndo vatyí Jerusalén cuu nu cuñi si zacahnu ñiyívi sii ra Ndyoo, catyi ña.

²¹ Ta i catyi ra Jesús sihin ña: Sino iñun sa quehin, maha, vatyí sa cua saa quiví ta cua zacahnu ndo sii ra Ndyoo Zutu yo, zoco yívi yucu ya ta yívi ndya Jerusalén.

²² Ndoho samaritana ña sito ndo ñaa sa zacahnu ndo, zoco nduhvi sito ndi yoo ra zacahnu ndi. Vatyí cuhva cacu yo vasi si sa cuenda ñiyívi hebreo.

²³ Zoco sa cua saa cuhva, ta vityi cuu si, ta ñiyívi sa zacahnu sii ra Ndyoo sa ndisa, cua zacahnu ñu sii ra sihin tandihí añima ñu ta sihin sa ndisa. Vatyí nanducu ra Ndyoo Zutu yo sii ñiyívi sa cua zacahnu sii ra cuhva cuan.

²⁴ Ndyoo cuu ra tatyí, ta ñiyívi zacahnu sii ra, cuñi si vatyí zacahnu ñu sii ra sihin cuhva saha Tatyí lí ra ta minoo sa ndisa. Tacuan catyi ra Jesús sihin ña.

²⁵ Ta ziquí i catyi ñaha cuan: Site vatyí cua quisi minoo ra sa cua zacacu sii yo, ta Cristo cua cunañi ra. Ta quiví cua quisi ra, cua nacatyí ra tandihí sihin yo, catyi ña.

²⁶ Ta i catyi ra Jesús sihin ña: Zuun yuhvi cui ra cahan suhun ya.

²⁷ Ta cuhva sa cahan ra Jesús ta i nasaa ra i casi ra, ta iyo xaan i cuñi ra ñaa cuenda natuhun xaan ra Jesús sihin minoo ñaha. Zoco numinoo ra, ta ñá cuñi ra nducu tuhun ñaa sa cuñi ña a ñaa tuhun cahan ra sihin ña.

²⁸ Ta ziqui i zandoo ñaha cuan quiyi ña, ta cuahan ña ndya ñuu, ta i nacatyí ña sihin ñiyivi:

²⁹ Coho ndo cua ndyehe yo sii minoo ra nacatyí sihin tandíhi cui sa zavehi. ¿Atu yivi ra Cristo cuu ra? Catyi ña.

³⁰ Tacuan ta ziqui i quita ñu ñuu cuan ta cuahan ñu ndya nu ndyaa ra Jesús.

³¹ Cuae ca sa saa ñiyivi yucuan ta i zañiñi ra i casi ra Jesús sii ra ta catyi ra: Maestro, casi zuhva.

³² Zoco i catyi ra Jesús sihin ra: Iyo sa sa sasi, zoco ña sito ndo.

³³ Tacuan ta ziqui i quisaha nducu tuhun tahan ra i casi ra sii tahan ra, ta catyi ra: ¿Atu iyo minoo ñiyivi sa quisi ndyaca sa sasi ra ya? Catyi ra.

³⁴ Zoco i catyi ra Jesús sihin ra: Sa saha tundyee iñi sii, cuu sa zavehi cuhva cuñi ra tasi sii, ta sa zandíhi tyiño ra.

³⁵ Ma catyi ndo: “Cumañi cumi ca yoo, ta cua naquihin ñiyivi tyiño i zacuu ñu.” Vatyí yuhvi catyi: Ndyehé vaha ndo itu vatyí sa sisa si. Sa cuu zaquee ñiyivi sii si.

³⁶ Ta ra sa cua naquihin, cua coo yahvi ra. Ta sa cua naquihin ra, cuu cuenda tandíhi cui tyiemvu. Ma cunaa si. Vatyí ra tasi ta ra cua naquihin cua cuzi xaan iñi nduu tahan ra.

³⁷ Ta ihya cuu minoo sa ndisa cuhva cahan ñiyivi: “Minoo ra tasi ta inga ra naquihin.”

³⁸ Tave tyiño sii ndo vatyí naquihin ndo nu ñá ndyehe ndo tundoho. Inga ra zatyíño ta vityí nañihi maa ndo sa vaha nu zatyíño ra cuan. (Tacuan i catyi ra Jesús sihin ra i casi ra.)

³⁹ Ta cuaha xaan ñiyivi ñuu Samaria i sino iñi ñu sii ra Jesús sa cuenda sa i nacatyí ñaha cuan vatyí i catyi ña: “I nacatyí ra sihin tandíhi cui sa i zavehi.”

⁴⁰ Yucuan cuenda zañiñi ñu sii ra Jesús vatyí ndoo ra sihin ñu. Ta i ndoo ra Jesús uu quivi yucuan.

⁴¹ Ta cuaha xaan ca ñu i sino iñi ñu sii ra Jesús sa cuenda tuhun i cahan ra sihin ñu.

⁴² Ta ziqui i catyi ñu sihin ñaha cuan: Vityí sino iñi ndi sii ra ta ña ñn ñi sa cuenda tuhun i nacatyí moo, zoco vityí zuun ñi maa ndi siñi ndi sa cahan ra, ta sito ndi vatyí ndisa ra Cristo cuu ra, ra cua zacacu sii ñiyivi ñuu ñiyivi.

Zanduvaha ra Jesús sii zehe minoo ra ndyaca ñaha

⁴³ I yaha uu quivi, ta i quita ra Jesús yucuan ta cuahan ra ndya nu cu si Galilea.

⁴⁴ Vatyí sa catyi maa ra vatyí minoo ra cahan Tuhun Ndyoo, ña tyaa ñiyivi yahvi sii ra ñuu ra.

⁴⁵ Ta sa i saa ra Jesús ndya Galilea, ta yucuan zii xaan i cuñi ñiyivi sihin ra vatyí sa i sahan ñu vico zuhun ñuu Jerusalén ta i ndyehe ñu tandíhi sa i zavaha ra Jesús yucuan.

⁴⁶ Tacuan ta ziqui i naquita tucu ra Jesús ndya ñuu Caná sa ndyaca ñaha Galilea nu i zanduu ra vino sii ndutyá quivi cuan. Ta yucuan iyo minoo ra ñuu Capernaum. Cahnu xaan tyiño ndyizo ra cuenda ra cu rey. Ta huhu xaan zehe ra ndya ñuu ra.

⁴⁷ Ta sa sito ra cuan vatyí sa i quita ra Jesús Judea ta nasaa ra Galilea, i sahan ra nu ndyaa ra sa cua cahan ra sihin ra vatyí cahun ra ndya vehe ra ta zanduvaha ra sii zehe ra vatyí sa cuñi cuu ra.

⁴⁸ Tacuan ta i catyi ra Jesús sihin ra: Tatu ma ndyehe ndo zeña ta sa ndyityi, ma sino iñi ndo sii.

⁴⁹ Zoco i catyi ra ndyizo tyiño cuan sihin ra: Tata, coho vityí vityí ñi cuee ca sa cuu zehi.

⁵⁰ Ta i catyi ra Jesús sihin ra: Cuahan ndya vehun. Sa nduvaha zehun. Tacuan ta i sino iñi ra sa catyi ra Jesús, ta i quihin ra ityi cuahan ra.

⁵¹ Ta ityi cuahan ra ta i ñihi tahan muzu ra sihin ra ta catyi ra: Ñá sihi zehun.

⁵² Tacuan ta ziqui i nducu tuhun ra: ¿Ñaa cuhva i quisaha nduvaha zehi? Ta i catyi muzu cuan: Icu, cuhva caa ñn sa yaha ora i quita cahñi cuan.

⁵³ Tacuan ta i sito ra vaty i cuu si zuun ñi cuhva sa i catyi ra Jesús sihin ra: “Sa nduvaha zehun.” Ta i sino iñi ra cuan sii ra Jesús sihin tandihi ñiyivi sii ra.

⁵⁴ Ta ihya cuu sa cu uu sa ndyityi i zavaha ra Jesús sa quita ra Judea ta nasaa ra Galilea.

5

Zanduvaha ra Jesús sii minoo ra xii nu iyo minoo pila sa nañi Betesda

¹ Ta sa yaha cuan ta ziqui i cuu si minoo quivi sa zacahnu ñiyivi hebreo minoo vico, ta cuahan ra Jesús ndya ñuu Jerusalén.

² Ta ñuu Jerusalén iyo minoo pila sa nañi Betesda sihin zahan hebreo. Iyo ohon tahan yuvehe nu cuu quihvi ñiyivi ndya nu ndyaa si. Ndy yuñuu iyo pila cuan vaty minoo yuhu nuzama sa nañi: Nu Quihvi Mvee Ticaty.

³ Ta vaty ñi yu pila cuan candyaa cuaha xaan ñiyivi cuhu, tañi: ñu cuaa, ta ñu coxo, ta ñu xii. Ndatu ñu sa cua canda nduty sisi pila cuan.

⁴ Vaty iyo saha, noo minoo ángel ndya pila cuan ta zacanda si nduty, ta ziqui yoo ra cua quihvi si nduty cuan sa xihna ñi, yucuan cuu ra cua nduvaha, ñaa ndihi cui ca cuehe cuhu ra.

⁵ Ta yucuan ndyaa minoo ra sa oco sahun uñi cuiya sa cuhu ra.

⁶ Ta i ndyehe ra Jesús sii ra candyaa ra yucuan, ta i nacoto ra vaty sa naha xaan tahan ra tacuan, ta i nducu tuhun ra sii ra: ¿Atu cuñun nduvohon? catyi ra.

⁷ I nacahan ra cuhu cuan ta catyi ra: Tata, yoñi sa cua tyihi sii sisi nduty ya cuhva sa canda si. Tandih saha cuñi quihvi, zoco quihvi inga ra sa xihna ñi.

⁸ Tacuan ta i catyi ra Jesús sihin ra: Nduviton; natuun yuun ta cacon.

⁹ Ta zuun ñi caa cuhva cuan ndaha nduvaha ñi ra, ta i natuu ra yuu ra ta quisaha sica ra. Ta quivi cuan, minoo quivi quitatu ñiyivi cuu si.

¹⁰ Yucuan cuenda i catyi ñiyivi hebreo sihin ra nduvaha cuan: Vityi cuu quivi quitatu yo. Ña tahan si cuizon yuun.

¹¹ Ta i nacahan ra sa nduvaha cuan ta catyi ra: Ra zanduvaha sii, i catyi ra: “Nacuhun yuun ta cacon.”

¹² Tacuan ta ziqui i nducu tuhun ñiyivi sii ra sa nduvaha cuan ta catyi ñu: ¿Ta yoo ra cuu ra sa i catyi suhun vaty nacuhun yuun ta cacon?

¹³ Zoco ña sito ra sa nduvaha cuan yoo ra zanduvaha sii ra vaty sa quihvi ra Jesús ticui ñiyivi, ta cuaha xaan ñiyivi yucu yucuan.

¹⁴ Ta cuee ca i nañihi ra Jesús sii ra sisi vehe ñuhu, ta i catyi ra sihin ra: Ndyehe vityi vaty sa nduvohon. Ma zavaha con cuaty, coto quisi inga tundoho cahnu ca zicun.

¹⁵ Tacuan ta ziqui cuahan ra cuan, ta i nacaty ra sihin ñiyivi hebreo vaty ra Jesús cuu ra i zanduvaha sii ra.

¹⁶ Ta yucuan cuenda i cuxaan xaan ñiyivi hebreo sihin ra Jesús ta i cuñi cahñi ñu sii ra vaty i zavaha ra cuhva cuan quivi quitatu ñiyivi.

¹⁷ Zoco i catyi ra Jesús sihin ñu: Tandih tyiemvu zatyño ra Ndyoo Zuti, ta yuhvi zatyño tuqui. Catyi ra.

¹⁸ Ta yucuan cuenda cuñi xaan ca ñiyivi hebreo sa cahñi ñu sii ra Jesús vaty ña tyaa ra yahvi ley sa cuenda quivi quitatu ñiyivi, ta catyi tucu ra vaty ra Ndyoo cuu Zutu ra ta zacuu ra sa ñn ñi ra cuu ra sihin ra Ndyoo.

Iyo xaan cuhva sii Zehe ra Ndyoo

¹⁹ Tacuan ta ziqui i catyi ra Jesús: Sa ndisa catyi sihin ndo vaty ñahñi sa cuu zavaha ra cu Zehe ra Ndyoo sa maa ñi maa ra. Zavaha ra cuhva sa ndyehe ra vaty zavaha Zutu ra, vaty tandih cuhva zavaha ra Ndyoo Zutu ra, ta tacuan tucu zavaha Zehe ra.

²⁰ Cuñi xaan ra Ndyoo Zutu yo sii Zehe ra, ta zañaha ra sii ra tandih cui sa zavaha maa ra. Ta cua zañaha tucu ra inga cuhva cahnu ca sii Zehe ra, tacuan ta iyo xaan cua cuñi ndo.

²¹ Vaty tañi tuhva ra Ndyoo Zutu yo zanandoto sii ñiyivi i sihi ta saha ra sa cundito ñu, ta tacuan tucu Zehe ra, saha ra sa cundito yoo ñiyivi cuñi ra.

²² Ta Ndyoo Zutu yo, ña tyicuhva ra sii ñiyivi. Saha ra tandihi cuhva cuan sii Zehe ra sa tyicuhva ra sii ñiyivi.

²³ Tacuan i zavaha ra Ndyoo vaty cuñi ra sa cua zacahnu ñiyivi sii Zehe ra tañi zacahnu ñu sii ra Ndyoo Zutu ra. Ñiyivi ña zacahnu sii Zehe ra Ndyoo, ña zacahnu tucu ñu sii Zutu ra vaty maa ra i tasi sii ra.

²⁴ Sa ndisa catyi sihin ndo: Ra sa siñi sa quehin ta sino iñi ra sii ra i tasi sii, cua cundito ra tandihi cui tyiemvu. Ma tasi tuñi ca ra Ndyoo sii ra. Ma cuu cui ñima ra, cua cundito ra tandihi cui tyiemvu.

²⁵ Sa ndisa catyi sihin ndo vaty sa cua saa cuhva, ta vityi cuu si, ta iyo ñiyivi tañi sa sihi ñu sa cuenda cuaty ñu zoco cua cuiñi ñu sa cahan Zehe ra Ndyoo. Ta ñiyivi tyaa yahvi, cua cundito ñu tandihi cui tyiemvu sihin ra Ndyoo.

²⁶ Vaty iyo cuhva sii Ndyoo Zuti sa cuhva ra sa cundito ñiyivi tandihi cui tyiemvu. Ta tacuan tucu i saha ra sii Zehe ra sa cuhva ra sa cundito ñiyivi.

²⁷ Ta i saha tucu ra Ndyoo cuhva sii Zehe ra vaty zandaa ra tyiño cuenda ñiyivi vaty ra i quisi ndya gloria cuu ra.

²⁸ Ma iyo xaan cuñi ndo vaty quehin tuhun ya vaty cua saa cuhva ta tandihi ñiyivi i sihi cua cuiñi ñu sa cahan Zehe ra Ndyoo.

²⁹ Ta cua quita ñu sisi ñaña. Ñiyivi i zavaha sa vaha, cua nandoto ñu ta cua cundito ñu. Zoco ñiyivi i zavaha sa ña vaha, cua nandoto ñu ta cua ndoho ñu.

Cuhva cuu coto yo vaty cuu zacuu ra Jesús tandihi

³⁰ (Cahan ca ra Jesús ta catyi ra:) Ñahñi sa cuu zavehi sa maa ñi mi. Cuhva catyi maa ra Ndyoo sihin, ta tacuan zandei tyiño cuenda ñiyivi. Ta ndoo xaan cuu cuhva zandei tyiño vaty ña nduqui cuhva zavehi cuhva cuñi mi, zoco zavehi cuhva cuñi ra i tasi sii.

³¹ Tatu zuun ñi mi saha sa ndaa sa cuende, ña sito ñiyivi tatu quehin sa ndisa.

³² Zoco iyo inga ra saha sa ndaa sa cuende, ta site vaty ndisa cuu sa ndaa sa saha ra sa cuende.

³³ I tasi ndo tyiño, ta i nducu tuhun ndo sii ra Juan. Ta cuhva i catyi maa ra, sa ndisa cuu si.

³⁴ Zoco ña siñi ñuhu sa cuhva ñiyivi sa ndaa sa cuende. Zoco catyi cuhva ya vaty cuñi sa cua cacu ndo.

³⁵ I cuu ra Juan tañi minoo lámpara. Cayu si ta zandisi si. Ta zii xaan i cuñi ndo zuhva quivi sihin ñuhu i saha maa ra.

³⁶ Zoco iyo minoo sa ndaa sii. Ñiñi ca si ta ziqui sa ndaa sa saha ra Juan. Zuun ñi cuhva zavehi cuu sa ndaa. Ta zañaha si vaty i tasi ra Ndyoo Zuti sii, sa ndisa. Ta maa ra cuu ra i catyi vaty zavehi cuhva ya ta zandehi sii si.

³⁷ Ta ra Ndyoo Zuti, ra i tasi sii, cahan tucu ra sa cuenda mi. Tañaha ca cuiñi ndo sa cahan ra a ndyehe ndo sii ra.

³⁸ Ta ñahñi tuhun ra iyo ñima ndo vaty ña sino iñi ndo sii ra i zaquisi ra.

³⁹ Nanducu xaan ndo sisi tutu Tuhun Ndyoo vaty sica iñi ndo vaty yucuan cua nañihi ndo cuhva cacu ñima ndo ta ma cuu cui ndo. Ta zuun ñi yucuan cuu nu saha si sa ndaa sa cuende.

⁴⁰ Zoco ña cuñi ndo sino iñi ndo sii ta ñihi ndo sa cundito ndo.

⁴¹ Ña sica xaan iñi tatu tahan iñi ñiyivi sii a ña tahan iñi ñu.

⁴² Zoco sa site sii ndo, ta site vaty ña cuñi ndo sii ra Ndyoo.

⁴³ Vasi sa cuenda ra Ndyoo Zuti, ta ña sino iñi ndo sii. Zoco tatu cua quisi inga ra sa cuenda sa zuun ñi maa ra, sii maa ra cuan cua sino iñi ndo.

⁴⁴ ¿Yozo caa cuu sino iñi ndo? Ma cuu vaty saha ndo sa zacahnu ñiyivi sii ndo ta zacahnu ndo sii ñu. Ta sii sa minoo ñi ra cuu Ndyoo, ña nanducu ndo cuhva cuzii iñi maa ra sihin ndo.

⁴⁵ Ma caca iñi ndo vaty yuhvi cua tyei cuaty sata ndo nuu ra Ndyoo Zuti. Iyo minoo ra sa tyaa cuaty sata ndo. Zuun ñi maa ra Moisés cuu ra. Ta ñi xaan iñi ndo vaty maa ra cua zacacu sii ndo.

⁴⁶ Zoco tatu sa i sino iñi ndo sa ndisa cuhva cahan ra Moisés, ta vityi cua sino iñi ndo sii, vatyí i tyaa ra Moisés sa cuende.

⁴⁷ Zoco tatu ña sino iñi ndo sa i tyaa ra, zuun ñi cuhva cuan ma cuu sino iñi ndo sa quehin. (Catyí ra Jesús sihin ñiyívi hebreo cuan.)

6

Saha maa ra Jesús sa casi ohon mil rayíi

¹ Ta sa ndíhi cahan ra Jesús tuhun cuan, ta ziquí cuahan ra ndya inga siyo miñi cahnu sa nañi Galilea. Ta inga zivi si cuu Tiberias.

² Ta cuaha xaan ñiyívi ndyico sii ra vatyí i ndyehe ñu sa ndyityi i zavaha ra sihin ñiyívi cuhu nu i zanduvaha ra sii ñu.

³ Ta i ndaa ra Jesús minoo yucu, ta yucuan i sicundyaa ra sihin ra i casi ra.

⁴ Ta sa cuñi tahan si quívi coo minoo vico cuenda ñiyívi hebreo.

⁵ Ta nandyehé ra Jesús vatyí cuaha xaan ñiyívi ndyico sii ra, ta i catyí ra sihin ra Felipe: ¿Ndyamaa cua zata yo sa casi ñiyívi ya?

⁶ Tacuan i catyí ra vatyí cuñi ra ndyehe ra ñaa sa cua catyí ra Felipe vatyí sa sito ra Jesús ñaa sa cua zavaha ra.

⁷ Tacuan ta i catyí ra Felipe sihin ra: Vazu uñi mil peso pan, zoco ma ñihi si casi ñiyívi zuhva zuhva ñi.

⁸ Ta ra Andrés, minoo ra i casi ra Jesús cuu ra ta yañi ra Simón Pedro, ta maa ra Andrés cuan i catyí:

⁹ Iyo minoo ra luhlu ihya; ndyizo ra ohon tahan pan ta uu tahan tyiyaca. Zoco ñahñi ñi cuu si cuan nuu sa cuaha xaan ñiyívi ya.

¹⁰ Tacuan ta ziquí i catyí ra Jesús: Catyí ndo sihin ñiyívi vatyí nacundyaa ñu. Catyí ra. Ta iyo cuaha cuhu yucuan, ta i sicundyaa ñiyívi tañi ohon mil sa maa ñi rayíi (ta ziquí ca ñu zíhi ta sa ndyíhi).

¹¹ Tacuan ta i quíhin ra Jesús pan cuan, ta sa yaha saha ra tyahvi ndyoo sii ra Ndyoo ta ziquí i saha ra sii si sii ra i casi ra. Ta i zasa ra cuan sii si sii ñiyívi yucu yucuan. Ta tacuan tucu i zavaha ra sihin tyiyaca cuan. I saha ra ndya cuhva ndya sa ndaha iñi ñu.

¹² Ta sa ndaha iñi ñu ta catyí ra Jesús sihin ra i casi ra: Naquíhin ndo sa nandoo, ta tacuan ta ñahñi si cua tiví.

¹³ Tacuan ta i naquíhin ra sii si, ta i zacutu ra usi uu tahan tyica sihin yiquí pan cuan sa nandoo ta sa ndíhi sasi ñiyívi.

¹⁴ Ta sa ndyehe ñiyívi cuan sa ndyityi i zavaha ra Jesús, i catyí ñu: Ndisa cuii vatyí ihya ra cuu ra sa ndyaa tyiño sa quisi ra ñuu ñiyívi ta cahan ra Tuhun Ndyoo. Catyí ñu.

¹⁵ Ta i tuu iñi ra Jesús vatyí cuñi ñu quisi tñn ñu sii ra ta zañiñi ñu sii ra vatyí cuu ra minoo rey, ta sa sito ra cuhva cuan i quita ra yucuan ta cuahan ra minoo yucu maa ñi maa ra.

Sica ra Jesús nu ndutyá

¹⁶ Ta sa cuaa cuan cuahan ra i casi ra Jesús ndya yuhu miñi cuan.

¹⁷ Ta i quíhvi ra minoo barco, ta i quisaha yaha zava ra miñi cuan vatyí cuñi ra cuhun ra ñuu Capernaum. Ta sa cuaa cuu si cuhva cuan, ta tañaha ca nasaa ra Jesús.

¹⁸ Ta ñihi xaan i quisaha canda ndutyá vatyí ñihi xaan ñoho tatyí.

¹⁹ Ta cuhva sa i yaha ra tañi minoo ohon a iñu kilómetro, tacuan ta ziquí i ndyehe ra sii ra Jesús. Sica ra nu ndutyá, ta tuhva ra sii barco cuan. Ta i yuhu xaan ra i casi ra.

²⁰ Zoco i catyí ra Jesús: Zuun yuhvi cui. Ma yuhu ndo.

²¹ Tacuan ta ziquí i cuñi xaan ra i casi ra vatyí naquíhvi ra Jesús sisi barco. Ta sa i quíhvi ra, ta vatyí cuii ñi i saa tu nu cuahan ra.

Nanducu ñiyívi sii ra Jesús

²² Cundisi inga quívi ta i sito ñiyívi sa nandoo inga siyo miñi cuan vatyí sa cuahan ra i casi ra Jesús sihin sa minoo barco sa sindyaa yucuan, ta ña cuahan ra Jesús sihin ra.

²³ Zoco cuhva cuan ta i saa inga ca barco, yutu i quita ñuu cahnu Tiberias. I saa tu vatyi ñi nu i sasi ñiyivi pan sa yaha saha ra Jesús tyahvi ndyoo sii ra Ndyoo.

²⁴ Tacuan ta sa ndyehe ñiyivi vatyi yoñi ra Jesús yucuan ta nu ra i casi ra, tacuan ta ziqui i quihvi ñu sisi barco sa i saa cuan, ta cuahan ñu ndya ñuu Capernaum cua nanducu ñu sii ra Jesús.

Ra Jesús cuu pan sa saha sa cundito ñiyivi

²⁵ Ta sa i saa ñiyivi inga siyo miñi cuan, i nañihi ñu sii ra Jesús ta nducu tuhun ñu: Maestro, ¿ama i soon ihya? Catyi ñu.

²⁶ Ta i catyi ra Jesús sihin ñu: Sa ndisa catyi sihin ndo, nanducu ndo sii vatyi i sasi ndo, ta ndaha iñi ndo. Yivi sa cuenda vatyi i cutuñi iñi ndo sa ndyityi i zavehi.

²⁷ Ma zatyño ndo maa ñi sa cuenda ndyayu sa cua casi ndo vatyi cunaa si cuan. Vaha ca zatyño ndo sa cuenda ndyayu sa cua coo tandihi tyiemvu, ndyayu sa cua cuhva sa cundito ndo tandihi tyiemvu. Ihya ndyayu cua cuhva ra i quisi ndya gloria vatyi maa ra Ndyoo Zutu yo saha cuhva cuan sii ra sa cuhva ra. (Tacuan i catyi ra Jesús.)

²⁸ Tacuan ta i nducu tuhun ñiyivi sii ra: ¿Ñaa sa cuñi si zavaha ndi ta cua zavaha ndi tandihi cuii cuhva cuñi ra Ndyoo? Catyi ñu.

²⁹ Ta i nacahan ra Jesús ta catyi ra sihin ñu: Ihya cuu sa cuñi ra Ndyoo zavaha ndo. Sino iñi ndo sii ra i tasi ra.

³⁰ Tacuan ta ziqui i nducu tuhun ñu sii ra: ¿Ñaa zeña cua zañohon sii ndi ta ndyehe ndi ta sino iñi ndi suun? ¿Ñaa sa cua zavohon?

³¹ Ñiyivi sahnú sii ndi ta sa naha, i sasi ñu maná sisi cuhu tañi catyi tutu ra Ndyoo: “Saha maa ra Ndyoo pan sa quisi ndya ityi ziqui vatyi casi ñu.”

³² Tacuan ta i catyi ra Jesús sihin ñu: Sa ndisa catyi sihin ndo vatyi yivi ra Moisés saha pan sa quisi ndya ityi ziqui. Ra Ndyoo Zuti cuu ra saha pan sa cuu pan sa quita ityi ziqui sa ndisa cuii.

³³ Vatyi pan sa saha maa ra Ndyoo cuu ra i quita ndya andivi ta saha ra sa cundito ñiyivi ñuu ñiyivi.

³⁴ Tacuan ta i catyi ñiyivi sihin ra: Tata, cuhva pan cuan sii ndi tandihi cuii tyiemvu.

³⁵ Ta i catyi ra Jesús sihin ñu: Yuhvi cui pan sa saha sa cundito ñiyivi. Ñiyivi cua sino iñi sii, ma cuzoco ca ñu ndaha ñi. Ta ma cu-ityi ca ñu numinoo saha.

³⁶ Zoco tañi sa catyi sihin ndo vatyi vazu sa ndyehe ndo sii, zoco ña sino iñi ndo sii.

³⁷ Tandihi ñiyivi sa saha ra Ndyoo Zuti sii, cua sino iñi ñu sii. Ta ñu sino iñi sii, ma tave sii ñu ityi sata.

³⁸ Vatyi ña quite ndya gloria sa zavehi cuhva cuñi mi, zoco vasi vatyi cua zavehi cuhva cuñi ra i tasi sii.

³⁹ Ta ihya cuu sa cuñi ra i tasi sii vatyi ma zacunei numinoo ñiyivi sa i saha ra sii. Zoco cua zanandote sii tandihi ñu quivi cua tyicuhva ra Ndyoo sii ñiyivi.

⁴⁰ Cuhva cuñi ra Ndyoo Zuti cuu, tandihi ñiyivi sa ndyehe sii Zehe ra ta sino iñi ñu sii ra, cua cundito ñu tandihi tyiemvu. Ta cua zanandote sii ñu quivi cua tyicuhva ra Ndyoo sii ñiyivi. Tacuan i catyi ra Jesús.

⁴¹ Ta sa ndihi cahan ra tacuan, ta ziqui i quisaha natuhun xaan ra hebreo vatyi catyi ra Jesús: “Yuhvi cui pan sa i quita ndya andivi.”

⁴² Ta i catyi ñu: ¿Atu yivi ra Jesús cuu ra ya, zehe ra José? Sito yo sii zutu ra ta sii zñi ra. ¿Ñacu catyi ra vatyi ra i quita ndya andivi cuu ra?

⁴³ Tacuan ta i catyi ra Jesús: Ma natuhun tahan xaan ndo.

⁴⁴ Yoñi sa cuu sino iñi sii tatu ma tyindyee ra Ndyoo Zutu yo sii ra cuan. Ra Ndyoo i tasi sii. Ta cua zanandote sii ñiyivi cuan quivi cua tyicuhva ra Ndyoo sii ñiyivi.

⁴⁵ Sisi libro i tyaa ra profeta catyi si tyehen: “Cua zacuaha ra Ndyoo sii tandihi ñu.” Catyi si. Tacuan cu si, ta tandihi ñiyivi sa siñi ta cutuhva ñu sa zacuaha ra Ndyoo Zutu yo, cua sino iñi ñu sii.

⁴⁶ Yoñi numinoo ñiyivi sa ndyehe sii ra Ndyoo Zutu yo. Minoo tuhun ñi ra i ndyehe cuu ra i quita ndya nu ndyaa ra Ndyoo.

⁴⁷ Sa ndisa catyi sihin ndo vatyi ra sa sino iñi sii, sa ñihi ra sa cundito ra tandihi tyiemvu.

⁴⁸ Yuhvi cui pan sa saha sa cundito ñiyivi.

⁴⁹ I sasi ñiyivi sahnü sii ndo maná sisi cuhu, zoco sihi ñu.

⁵⁰ Ta quehin tuhun pan sa quisi ndya andivi vatyi cua casi ñiyivi sii si, ta ma cuu ñu.

⁵¹ Ta yuhvi cui pan ndito sa i quita ndya andivi. Ta ñiyivi sa cua casi pan ya, cua cundito ñu tandihi cui tyiemvu. Ta pan sa cua cuhve cuu coño ñuhi. Cua cuhve sii si vatyi tacuan ta cua cundito ñiyivi sihin ra Ndyoo.

⁵² Tacuan i catyi ra Jesús, ta ziqui i quisaha natuhun tahan xaan ra hebreo sihin tahan ra ta catyi ra: ¿Yozo caa cuu cuhva ra ya coño ñuhu ra casi yo?

⁵³ Tacuan ta i catyi ra Jesús sihin ra: Sa ndisa catyi sihin ndo vatyi tatu ma casi ndo coño ñuhu ra i quisi ndya gloria ta coho ndo niñi ra, ma cundito aña ndo.

⁵⁴ Ñiyivi sa cua casi coño ñuhi ta coho ñu niñi, cua cundito aña ñu, ta cua zanandote sii ñu quivi cua tyicuhva ra Ndyoo sii ñiyivi.

⁵⁵ Vatyi coño ñuhi cuu sa ndisa ndyayu, ta niñi cuu sa ndisa sa coho ñiyivi.

⁵⁶ Ñiyivi sa cua casi coño ñuhi ta coho ñu niñi, ñin ñi cua cuu ñu sihin, ta ñin ñi cua cui sihin ñu.

⁵⁷ Tañi sa tasi ra Ndyoo ndito sii ta ndite sa cuenda ra, ta zuun ñi cuhva, ñiyivi sa cua casi coño ñuhi, cua cundito aña ñu sa cuenda mi.

⁵⁸ Ta ihya cuu pan sa i quita andivi. Ña iyo si tañi maná sa sasi ñiyivi sahnü sii ndo ta sihi ñu; vatyi ñiyivi cua casi pan sa quehin tuhun, cua cundito ñu tandihi cui tyiemvu sihin ra Ndyoo.

⁵⁹ I zacuaha ra Jesús cuhva ya nu titahan ñiyivi sisi vehe ñuhu ñuu Capernaum.

Ihya tuhun saha si cuhva coto yo yozo caa cundito yo tandihi cui tyiemvu

⁶⁰ Ta sa i siñi ñiyivi ndyico sii ra Jesús cuhva cahan ra ta cuaha xaan ñu catyi ñu: Yi xaan cuhva cahan ra. Yoñi sa cuu cutuñi iñi sa cahan ra. Catyi ñu.

⁶¹ Zoco i tuu iñi ra Jesús cuhva natuhun tahan xaan ñu ndyico sii ra sa cuenda cuhva i cahan ra, ta i catyi ra sihin ñu: ¿Atu ña tahan iñi ndo tuhun cuan?

⁶² ¿Ta yozo caa tatu ndyehe ndo sii ra i quita ndya gloria nandaa tucu ra ndya nu i quita ra? ¿Ñaa sa cua caca iñi ndo?

⁶³ Taty i li cuu sa saha sa cundito aña ñiyivi. Ñahñi tyindyee coño ñuhu ñu. Tuhun quehin sihin ndo cuu sa cuenda aña ndo, ta saha si sa cundito aña ndo.

⁶⁴ Zoco iyo zuhva ndo sa ña sino iñi ndo. Tacuan catyi ra Jesús vatyi sa sito ra ndya sa xihna ñi yoo ñu cuu ñu sa ña sino iñi ta yoo ra cua xico tuhun sii ra.

⁶⁵ Ta i catyi ra: Yucuan cuenda catyi vatyi yoñi numinoo ndo ta cuu sino iñi ndo sii tatu ma cuhva ra Ndyoo Zuti cuhva cuan sii ndo.

⁶⁶ Ta sa ndihi cahan ra Jesús cuhva cuan, ta cuaha ñiyivi ndyico sii ra, i zandoo ñu sii ra ta ñá sindyico ca ñu sii ra.

⁶⁷ Tacuan ta ziqui i catyi ra Jesús sihin sa usi uu tahan ra i casi ra: ¿Atu cua cuhun ndihi tucu ndoho?

⁶⁸ Ta i nacahan ra Simón Pedro ta catyi ra: Tata, ¿Yoo sihin cuhun ndi? Moo cuu ra nacaty sihin ndi yozo caa cua ñihi ndi sa cundito ndi tandihi tyiemvu.

⁶⁹ Ta sa sino iñi maa ndi ta nacoto vaha ndi vatyi yoho cuu ra Cristo, zehe ra Ndyoo ndito.

⁷⁰ Ta i nacahan ra Jesús ta catyi ra: I casi sii ndo sa usi uu tahan ndo, ta minoo ndo cuu minoo cuhna. Catyi ra.

⁷¹ I cahan ra Jesús cuhva ya sa cuenda ra Judas Iscariote zehe ra Simón vatyi maa ra cuu ra cua xico tuhun sii ra. Ta minoo sa usi uu tahan ra i casi ra cuu ra.

¹ Ta sa yaha cuhva cuan ta i sica noo ra Jesús nu cu si Galilea. Ña cuñi ca ra caca noo nu cu si Judea vatyí cuñi cahñi ra hebreo sii ra.

² Ta sa cuñi tahan si quívi zacahnu ñiyívi hebreo minoo vico nu zavaha ñu vehe tyiyahva.

³ Ta i catyí yañi ra Jesús sihin ra: Quiton ihya ta cahun ndya Judea vatyí tacuan ta cua ndyehe ñiyívi sino iñi suun ityí cuan tyiño zavohon.

⁴ Vatyí tatu cuñi minoo ra sa cua coto ñiyívi sii ra, ñahñi sa xehe zavaha ra. Tatu zavohon cuhva ya, zavohon sii si nuu tandíhi ñiyívi.

⁵ Tacuan catyí yañi ra vatyí nu yañi ra ta ñá sino iñi ra sii ra.

⁶ Tacuan ta ziquí i catyí ra Jesús sihin ra: Ta saa ca quívi, zoco sa cuenda maa ndo ta cuu ndya vaha ñi maa quívi.

⁷ Ma cuu cuxaan ñiyívi sihin maa ndo, zoco cuxaan xaan ñu sihin mi vatyí nacatyí sa ña vaha sa zavaha ñu.

⁸ Cuahan maa ndo vico. Ma cuhin vityí vatyí ta saa ca cuhva cuhin.

⁹ Tacuan i cahan ra Jesús sihin ra, ta i ndoo ra Galilea.

Cuahan ra Jesús vico nu sino vehe tyiyahva

¹⁰ Ta sa cuahan yañi ra, ta ziquí cuahan tucu ra Jesús, zoco ña cuahan ndisi ra. Cuahan xehe ñi ra.

¹¹ Ta i nanducu ra ndyaca ñaha sii ñiyívi hebreo sii ra vico cuan, ta catyí ra: ¿Ndyamaa iyo ra cuan?

¹² Ta natuhun tahan xaan tandíhi ñiyívi sa cuenda ra. Iyo ñu catyí ñu: “Vaha ñiyívi cuu ra.” Ta inga ñu catyí: “Ña vaha ra. Zandavi ñaha xaan ra sii ñiyívi.” Catyí ñu.

¹³ Zoco xehe ñi cahan ñiyívi sa cuenda ra vatyí yuhu ñu sii ra ndyaca ñaha hebreo.

¹⁴ Ta sa yaha zava vico cuan, ta ziquí i quíhvi ra Jesús vehe ñuhu cahnu cuenda ñu hebreo ta quisaha zacuahá ra.

¹⁵ Ta iyo xaan i cuñi ra hebreo ta catyí ra: ¿Yozo caa sito xaan ra ya ta ñá sahan ra zicuela?

¹⁶ I nacahan ra Jesús ta catyí ra: Cuhva zacuehi, yívi sa cuenda ñi mi cuu. Cuenda ra i tasi sii cuu si.

¹⁷ Tatu cuñi minoo ndo zavaha ndo cuhva cuñi ra Ndyoo, cua coto ndo tatu cuhva zacuehi cuu sii ra Ndyoo a sa cuenda ñi mi.

¹⁸ Tatu cahan minoo ñiyívi cuhva sa sica ñi iñi maa ra, cuñi ra cuan vatyí zacahnu ñiyívi sii ra. Zoco ra cuñi vatyí zacahnu ñiyívi sii ra i zaquisi sii ra, cahan ra cuan sa ndisa ta ñahñi cuatyí ra.

¹⁹ I saha ra Moisés ley sii ndo, zoco numinoo ndo ta ña cuñi ndo tyaa ndo yahvi sii si. ¿Ta ñaa cuenda cuñi ndo cahñi ndo sii?

²⁰ Ta i nacahan ñiyívi ta catyí ñu: Iyo minoo tatyí ña vaha suun. Yoñi sa cuñi cahñi suun.

²¹ I nacahan ra Jesús ta catyí ra sihin ñu: I zavehi minoo sa ndyityí quívi quitatu yo, ta iyo xaan cuñi tandíhi ndo.

²² I saha ra Moisés minoo ley sa tahndya ñi xiñi xuu lee. Zoco yívi ra Moisés i quisaha sihin si. Zutu sahnu yo i quisaha sihin si ndya tyiemvu. Yucuan cuenda sahndya ndo ñi xiñi xuu lee vazu quívi quitatu yo cuu.

²³ Ta tatu sa cuenda sa ma cumañi ley ra Moisés ta tahndya ñi xiñi xuu lee vazu quívi quitatu yo cuu, ¿ñaa cuenda cuxaan ndo sii vatyí ndaha zanduvehi sii minoo ra quívi quitatu yo?

²⁴ Ma tyaa ndo cuatyí sata ñiyívi tatu ña sito vaha ndo ñaa sa zavaha ñu. Cuatu ndo ndya ndyehe vaha ndo ta ziquí cahan ndo.

Cuñi ñiyívi coto ñu yoo ra cuu ra Jesús

²⁵ Tacuan ta ziquí i quisaha nducu tuhun zuhva ñiyívi ñuu Jerusalén ta catyí ñu: ¿Atu yívi ra ihya cuu ra sa cuñi cahñi ñiyívi?

²⁶ Zoco ndyehe ndo yucuan, cahan ra nuu ñiyivi, ta ñahñi catyi ñu. ¿Atu sa sino iñi ra cu tyiño vaty ra Cristo cuu ra?

²⁷ Zoco sito yo sii ra ya, ta sito yo ndyamaa i quisi ra. Ta quivi cua quisi ra Cristo, yoñi cua coto ndyamaa cua quisi ra.

²⁸ Ta sito ra Jesús sa cahan ñu cuhva zacuaha ra sisi vehe ñuhu cahnu, ta saa xaan cahan ra ta catyi ra: Sito ndo sii, catyi ndo ta sito ndo ndya ityi i quisi, zoco ña vasi sa cuenda ñi mi. Iyo minoo ra tasi sii. Ra vaha xaan cuu ra, ta ña sito ndo sii ra.

²⁹ Yuhvi site sii ra vaty sa cuenda maa ra vasi, ta maa ra i tasi sii.

³⁰ Tacuan ta i cuñi ra tiin ra sii ra Jesús, zoco yoñi tyihi ndaha sii ra vaty ta saa ca cuhva cua tahan si sii ra.

³¹ Zoco cuaha ñiyivi sa yucu yucuan sino iñi ñu sii ra vaty ra Cristo cuu ra, ta catyi ñu: Ma cuu zavaha inga ra cuaha ca sa ndyityi ta ziqui ra ya.

Zacuhun ra fariseo zandaru vaty cua tiin ra sii ra Jesús

³² I siñi ra fariseo cuhva natuhun ñiyivi sa cuenda ra Jesús. Ta ra fariseo ta ra zutu nahnu i zacuhun ra zandaru cuenda vehe ñuhu hebreo vaty cua tiin ra sii ra Jesús ta cahun ra vehe caa.

³³ Tacuan ta i catyi ra Jesús: Cua cundyei zuhva cui ñi ca quivi sihin ndo, ta ziqui cunanuhin ndya nu ndyaa ra i tasi sii.

³⁴ Cua nanducu ndo sii, zoco ma nañihi ndo sii. Ta nu cuhin, ma cuu cahun ndo.

³⁵ Tacuan ta i catyi ra hebreo zuun ñi sihin ra tahan ra: ¿Ndyamaa cua cahun ra ya ta ma nañihi yo sii ra? ¿Atu cua cahun ra nu iyo ñiyivi sii yo ñuu griego, ta yucuan cua zacuaha ra?

³⁶ ¿Ta ñaa cuñi si catyi si sa catyi ra tyehen: “Cua nanducu ndo sii, ta ma nañihi ndo sii. Ta nu cua cundyei ma cuu cahun ndo”?

Cua cuhva ra Ndyoo Taty Li sii ñiyivi sino iñi sii ra Jesús

³⁷ Quivi sa nducahnu xaan vico cuan, nandyaa ra Jesús, ta ñihi xaan cahan ra, ta catyi ra: Tatu iyo ndo ityi ndo, quisi ndo nu ndyei ta coho ndo.

³⁸ Ñiyivi sa sino iñi sii, ndya añima ñu cua caña ndutya sa saha sa cundito ñiyivi tañi sa catyi Tuhun Ndyoo. Ta tañi yuu cahnu cua cuu ndutya cuan.

³⁹ Cahan ra Jesús cuhva ya sa cuenda Taty Li. Vaty sii ñiyivi sa sino iñi sii ra Jesús cua cuhva ra Ndyoo Taty Li vaty tañaha ca cuhva ra Ndyoo Taty Li quivi cuan vaty tañaha ca cunanuhu ra Jesús ndya gloria.

Ñá cuu ndu-ñin ñiyivi

⁴⁰ Ta sa siñi ñiyivi cuhva cahan ra Jesús, iyo ñu catyi ñu: Ndisa cui vaty ra ihya cuu ra profeta, ra sa cua quisi cumañi ca sa quisi inga ra sa cua zacacu sii yo.

⁴¹ Ta inga ñu catyi ñu: Ihya cuu ra Cristo. Zoco inga tucu ñu catyi ñu: Yivi ra Galilea cua cuu ra Cristo.

⁴² Catyi Tuhun Ndyoo vaty ñiyivi ra rey David cua cuu sii ra Cristo. Belén cua cuu ñuu ra nu i cuu ñuu ra rey David. Catyi ñu.

⁴³ Ta yucuan cuenda ñá cuu ndu-ñin ñiyivi sa cuenda ra Jesús.

⁴⁴ Ta zuhva ñiyivi cuñi ñu quihin ñu sii ra cahun ra vehe caa, zoco yoñi i tiin sii ra.

Yoñi inga ra cahan tañi cahan ra Jesús

⁴⁵ Tacuan ta ziqui i nasaa ra zandaru cuenda vehe ñuhu nu yucu ra fariseo ta ra zutu nahnu, ta i nducu tuhun ra sii ra: ¿Ñacu ñá tiin ndo sii ra?

⁴⁶ Ta i nacahan ra zandaru ta catyi ra: Ta yoñi ca maa cahan tañi cahan ra cuan. Catyi ra.

⁴⁷ Tacuan ta i catyi ra fariseo: Ndyaa sii maa ndo ta zandavi ñaha ra.

⁴⁸ ¿Atu sica iñi ndo vaty sino iñi minoo ra ndyaca ñaha a minoo ra fariseo? Numinoo ndi ta ña sino iñi ndi sii ra cuan.

⁴⁹ Zoco ñiyivi sa ñahñi maa sito ta nu ley ta ña sito ñu, cua cuxaan xaan ra Ndyoo sihin ñu.

⁵⁰ Tacuan ta i cahan minoo ra sa nañi Nicodemo. Zuun ñi ra cuu ra sa i sahan nu ndyaa ra Jesús minoo sa cuaa. Ta minoo ra ndyaca ñaha cuu tucu ra sihin inga ra, ta i catyi ra sihin ra tahan ra:

⁵¹ Catyi ley yo vatyí ma cuu catyi yo atu vaha a ña vaha sa zavaha minoo ra tatu ma tyizoho xihna yo sa cahan ra ta coto yo ñaa sa zavaha ra. Catyi ra.

⁵² Ta i nacahan minoo ra tahan ra ta catyi ra: Vaziquí ra Galilea cuu tucu yoho vatyí cahan xoon tuhun ra. Nanducun sisi Tuhun Ndyoo, ta cua ndyehun vatyí yoñi minoo ra Galilea cua cuu ra minoo profeta. (Yucuan cuenda yivi ra cahan Tuhun Ndyoo cuu ra Jesús cuñi ra fariseo vatyí ra Galilea cuu ra Jesús.)

⁵³ Tacuan ta cuanuhu minoo minoo ra ndya vehe ra.

8

Minoo ñaha zana iyo

¹ Sahan ra Jesús ndya yucu sa nañi Olivos.

² Ta inga quivi ñaha ñi i nasaa tucu ra ndya vehe ñuhu cahnu, ta quisi tandihi ñiyivi nu ndyaa ra, ta i sicundyaa ra ta zacuahra ra sii ñu.

³ Tacuan ta ra cu maestro cuenda ley sihin ra fariseo i sindyaca ra sii minoo ñaha i nañihi ra sihin minoo ra ndya vaha ñi. Ta i tyaa ra sii ña mahñu ñiyivi.

⁴ Tacuan ta i catyi ra sihin ra Jesús: Maestro, i nañihi ndi sii ñaha ya sihin minoo ra ndya vaha ñi.

⁵ Nu ley ra Moisés catyi si vatyí cañi ñiyivi sii ña sihin yuu ndya cua cuu ña. ¿Ta yoho, yozo caa catyun?

⁶ Catyi ra cuhva ya vatyí cuñi ra coto ra sii ra Jesús vatyí cuñi ra sa cua tyaa ra cuatyí sata ra. Zoco i nacañi noo ra Jesús xiñi ra ta quisaha tyaa ra nu ñuhu sihin nu ndaha ra.

⁷ Ta ñá zaña ra cuan sa nducu tuhun ra sii ra, ta ziquí i nandyeha ra Jesús sii ra ta catyi ra: Yoo ra ñahñi cuatyí iyo, nacañi xihna ca maa ra sii ña sihin yuu. Catyi ra.

⁸ Ta i nacañi noo tucu ra xiñi ra ta quisaha tyaa tucu ra nu ñuhu.

⁹ Ta sa siñi ra cuhva cuan, i quisaha quita minoo minoo ñi ra vatyí tuu iñi ra vatyí iyo tucu cuatyí maa ra. Xihna ca ra sahnu ca cuahan minoo minoo ra ta cuhva ndya ra ndyihí, ta i ndoo minoo tuhun ñi ra Jesús sihin ñaha cuan.

¹⁰ Ta sa nduvita ra Jesús ta yoñi ca ndyeha ra, minoo tuhun ñi ca ñaha cuan, ta i catyi ra: Maha, ñaha ra tyaa cuatyí saton. ¿Atu yoñi ca ra catyi vatyí iyo cuatyun?

¹¹ Ta i catyi maa ña: Yoñi ca ra, tata. Ta i catyi ra Jesús: Ta nu mi ta ña tyei cuatyí saton. Cuahan, ta ma zavaha con cuatyí. Catyi ra.

Tañi minoo ñúhu ñuu ñiyivi cuu ra Jesús

¹² Ta inga tucu saha i cahan ra Jesús sihin ñiyivi, ta catyi ra: Yuhvi cui ñúhu sii ñuu ñiyivi. Ñiyivi ndyico sii, ma caca noo ca ñu nu ñaa vatyí ndyaa ñúhu sihin ñu.

¹³ Tacuan ta i catyi ra fariseo sihin ra: Zuun ñi moo saha sa ndaa sa cuendon, ta ña ndisa sa cohon.

¹⁴ Ta i nacahan ra Jesús, ta catyi ra sihin ra: Vazu sehi sa ndaa sa cuenda mi, zoco sa ndisa cuu si vatyí site ndya ityi i quisi ta ndya ityi cuhin. Zoco maa ndo ña sito ndo ndya ityi i quisi a ndya ityi cuhin.

¹⁵ Maa ndo tyicuhva ndo cuhva iyo si ñuu ñiyivi ya. Zoco mi ña tyicuhve.

¹⁶ Zoco tatu cua tyicuhve, minoo cuhva vaha xaan cua cuu si vatyí ña minoo tuhun ñi mi. Ra Ndyoo Zuti, ra i tasi sii, ndyaa ra sihin.

¹⁷ Sisi ley maa ndo, catyi tucu si vatyí sa ndaa sa saha uu tahan ñiyivi, ndisa cuu si.

¹⁸ Yuhvi cuu minoo ra saha sa ndaa sa cuende, ta ra Ndyoo Zutu yo, ra i tasi sii, saha ra sa ndaa sa cuende.

¹⁹ Tacuan ta i catyi ra fariseo sihin ra: ¿Ndyamaa iyo zutun? catyi ra. I nacahan ra Jesús ta catyi ra: Nu sii mi ta ña nacoto ndo ta nu sii Zuti. Tatu sa vatyí nacoto ndo sii, cua nacoto tucu ndo sii Zuti.

²⁰ Ihya tuhun i cahan ra Jesús nu ndyaa satu nu tyihi ñiyivi xuhun sisi vehe ñuhu cahnu, zoco yoñi i tiin sii ra sa cuhun ra vehe caa vatyí ta saa ca cuhva cua tahan si sii ra.

Nu cuhin ma cuu cuhun ndo

²¹ Tacuan ta ziqui i catyi tucu ra Jesús sihin ñu: Cua cuhin ta cua nanducu ndo sii. Zoco cua cuu ndo sa cuenda cuatyí ndo, ta ma cuu cuhun ndo nu cuhin. Catyi ra.

²² Tacuan ta i catyi ra hebreo: Vaziqui zuun ñi maa ra cua cahñi sii ra vatyí catyi ra vatyí ma cuu cuhun yo nu cuhun ra.

²³ Ta i catyi ra Jesús sihin ra: Maa ndo cuu cuenda ihya. Yuhvi i quisi ndya andivi. Ra ñuu ñiyivi ya cuu maa ndo. Ta yuhvi, yivi ra ñuu ñiyivi ya cui.

²⁴ Yucuan cuenda catyi sihin ndo vatyí cua cuu ndo sa cuenda cuatyí ndo. Tatu ña sino iñi ndo sii vatyí yuhvi cuu ra zacacu sii ndo, cua ndoo cuatyí ndo ziqui ndo, ta cua cuu ndo.

²⁵ Tacuan ta i catyi ñiyivi sihin ra: ¿Yoo ra cuun? Ta i catyi ra Jesús sihin ñu: Zuun ñi ra cui tañi sa nacatyí sihin ndo ndya quivi i quisaha quehin sihin ndo.

²⁶ Iyo cuaha xaan sa cuñi catyi cuhva iyo ndo, ta cua catyi ñaa sa cuu cuatyí ndo. Ta ra i tasi sii, ñahñi sa vatya iyo sii ra. Ta ihya ñuu ñiyivi nacatyí tuhun cuhva i siñi cuhva catyi maa ra. Tacuan i catyi ra Jesús sihin ñu.

²⁷ Zoco ñá cutuñi iñi ñiyivi vatyí cahan ra sa cuenda Ndyoo Zutu ra.

²⁸ Tacuan ta ziqui i catyi ra Jesús sihin ñu: Quivi cua cañihi ndo sii ra i quisi ndya gloria, ta ziqui cua coto ndo vatyí yuhvi cuu ra. Ta ñahñi sa zavehi sa cuñi ñi mi, zoco tañi sa zacuaha Zuti sii ta tacuan quehin.

²⁹ Ta ra i tasi sii, ndyaa ra sihin. Ña zandoo maa tuhun ra sii vatyí tandihi saha zavehi cuhva cuñi ra.

³⁰ Ta sa ndihi cahan ra Jesús tuhun ya, ta cuaha xaan ñiyivi i sino iñi sii ra.

Tuhun sa ndisa cuan, cua zacacu si sii yo

³¹ Tacuan ta ziqui i catyi ra Jesús sihin ñiyivi hebreo, ñu sino iñi sii ra: Tatu ma zaña ndo tuhun zacuehi sii ndo, cua cuu ndo ñiyivi sino iñi sii mi sa ndisa.

³² Ta cua coto ndo ñaa sa cuu sa ndisa, ta sa ndisa cuan cua ndasi si sii ndo.

³³ Ta i nacahan ñiyivi ta catyi ñu: Ñiyivi sahnu sii ndi cuu sii ra Abraham. Tañaha ca cuu ndi muzu sii numinoo ñiyivi. ¿Ta ñaa cuenda catyun vatyí cua ndasi ndi?

³⁴ Ta i nacatyí ra Jesús sihin ñu: Sa ndisa ta sa ndisa catyi sihin ndo. Tandihi ñiyivi zavaha cuatyí, muzu cuu ñu sii cuatyí cuan.

³⁵ Ta ra cu muzu, ma ndoo ra vehe sitocho ra tandihi tyiemvu. Zoco zehe ra cuu sitocho cuan, ndoo ra yucuan tandihi tyiemvu.

³⁶ Tatu zehe ra cuu sitocho vehe cuan saha sa cacu ndo, cua cacu ndisa cuii ndo, ta ma cuu ca ndo muzu sii sa ña vaha.

³⁷ Site vatyí ñiyivi ra Abraham cuu sii ndo. Zoco cuñi ndo cahñi ndo sii vatyí ña cuñi ndo sino iñi ndo tuhun quehin sihin ndo.

³⁸ Quehin cuhva sa ndyehi nu ndyaa Zuti. Ta maa ndo ndyicuu ndo cuhva catyi zutu maa ndo.

Cuihna cuu zutu ndo

³⁹ Ta i nacahan ñiyivi, ta catyi ñu sihin ra: Zutu ndi cuu sii ra Abraham. Ta i catyi ra Jesús sihin ñu: Tatu sa ndisa vatyí zutu ndo cuu sii ra Abraham, cua zavaha ndo cuhva i zavaha ra Abraham.

⁴⁰ Zoco vityí cuñi ndo cahñi ndo sii vatyí minoo ra cahan sa ndisa sihin ndo cui. Ta tuhun quehin sihin ndo, cuhva i siñi cuhva catyi ra Ndyoo cuu si. Ta cuhva cuñi maa ndo zavaha ndo, ña tacuan i zavaha ra Abraham.

⁴¹ Zavaha ndo cuhva zavaha zutu ndo. Catyi ra Jesús. Tacuan ta i nacahan ñiyivi cuan ta catyi ñu: Ñá cacu maa ndi tacuan ñi. Iyo minoo ñi ra cuu zutu ndi, ra Ndyoo.

⁴² Ta i nacatyí ra Jesús síhin ñu: Tatu sa vatyí ra Ndyoo cuu Zutu ndo sa ndisa, cua cuñi xaan ndo sii, vatyí ndya nu ndyaa ra Ndyoo i quite ta vasi. Ña vasi cuhva cuñi mi. Maa ra i tasi sii.

⁴³ Ña cutuñi iñi ndo tuhun quehin síhin ndo vatyí ña cuñi ndo tyizoho ndo tuhun quehin síhin ndo.

⁴⁴ Zutu ndo cuu sii ra cu cuihna. Ta cuñi xaan ndo zavaha ndo sa ña vaha cuhva cuñi zutu ndo. Sahñi ra sii ñiyivi ndya ta xihna ñi ta ñahñi maa sa ndisa iyo sii ra. Cuhva cahan ra sa vatyá, tacuan cahan ra vatyí tacuan cuhva iyo ra, vatyí ra vatyá cuu ra ta zutu sa vatyá cuu sii ra.

⁴⁵ Ta sa cuenda sa vatyí quehin sa ndisa, ta yucuan cuenda ña sino iñi ndo sii.

⁴⁶ Yoñi ndo cuu catyí ndo sa ndisa vatyí iyo cuatyí. Ta tatu quehin sa ndisa, ¿ñacu ña sino iñi ndo sii?

⁴⁷ Ra cuu cuenda ra Ndyoo, tyizoho ra sa cahan ra Ndyoo. Ta yucuan cuenda ña tyizoho ndo sa catyí ra Ndyoo vatyí yivi zehe ra cuu sii ndo.

Sa xihna ñi sa iyo ra Jesús ta ziqui i sicoo ra Abraham

⁴⁸ Ta i nacahan ra hebreo ta catyí ra: Sa ndisa cuii catyí ndi vatyí minoo ra samaritano cuun ta ñoho minoo cuihna suun.

⁴⁹ Ta i catyí ra Jesús: Ñahñi cuihna ñoho sii. Tyei yahvi sii Zuti, zoco ña tyaa ndo yahvi sii.

⁵⁰ Ta ña nducu xein sa zacahnu ñiyivi sii, zoco iyo minoo ra cuñi sa zacahnu ñiyivi sii. Ta cua tyicuhva ra sii ndo.

⁵¹ Sa ndisa ta sa ndisa catyí síhin ndo vatyí ñiyivi zavaha cuhva catyí, ma cuu ñu.

⁵² Ta i catyí ñiyivi hebreo: Vityí nacoto vaha ndi suun vatyí ñoho minoo cuihna suun. I síhi ra Abraham ta tandíhi ra profeta ta sa naha. Ta catyun vatyí ma cuu ñiyivi tatu zavaha ñu cuhva catyun.

⁵³ ¿Atu ñiñi ca cuu moo ta ziqui ñiyivi sahnu sii ndi, ra Abraham? Zoco i síhi ra Abraham ta tandíhi inga ra i cuu profeta ta tyiemvu. Ta yoho, ¿yoo ra cuun vatyí catyun vatyí ma cuu ndi tatu sino iñi ndi suun?

⁵⁴ Ta i catyí ra Jesús: Tatu maa ñi mi catyí vatyí ra ñiñi cui, ña vale si. Zoco maa Zuti cuu ra catyí vatyí ra ñiñi cui. Ta zuun ñi ra cuan cuu ra catyí ndo vatyí Ndyoo ndo cuu sii ra.

⁵⁵ Ta tañaha ca coto ndo sii ra, zoco yuhvi site sii ra. Ta tatu catyí vatyí ña site sii ra, cua cui minoo ra vatyá tañi maa ndo. Zoco site sii ra, ta zavehi cuhva catyí ra.

⁵⁶ Ñiyivi sahnu sii ndo, ra Abraham, zih xaan i cuñi ra vatyí cua tahan si quivi caqui. Ta i ndyehe ra sii si, ta zih xaan i cuñi ra.

⁵⁷ Tacuan ta i catyí ra hebreo cuan síhin ra Jesús: Ta quita ca uu xico usi cuiyon, ta ¿yozo caa catyun vatyí sa ndyehun sii ra Abraham?

⁵⁸ Ta i nacatyí ra Jesús síhin ra: Sa ndisa ta sa ndisa catyí síhin ndo vatyí cumañi ca cacu ra Abraham ta sa iye. Catyí ra.

⁵⁹ (Ta i cuxaan xaan ra hebreo), ta i quihin ra yuu sa cua cañi ra sii ra Jesús. Zoco i quihvi xehe ra Jesús ticui ñiyivi, ta i quita ra sisi vehe ñuhu cahnu cuan, ta cuahan ra.

9

Zanduvaha ra Jesús sii minoo ra cuaa

¹ Ta sa cua yaha ra Jesús, ta i ndyehe ra sii minoo ra cuaa. Cuaa ra i cacu ra.

² Ta i nducu tuhun ra i casi ra Jesús sii ra ta catyí ra: Maestro, ¿yoo sa zavaha cuatyí, zutu ra a zihí ra ya a zuun ñi maa ra? Vatyí ndyehe, cuaa ra i cacu ra.

³ Ta i catyí ra Jesús síhin ra: Yivi cuatyí ra, ta yivi cuenda ñiyivi sii ra. I tahan ra ya cuhva ya vatyí tacuan ta cua coto ñiyivi vatyí cuu sii ra Ndyoo zanduvaha ra sii ra.

⁴ Ñiñi xaan cuñi si zavehi cuhva cuñi ra i tasi sii, ñiñi ñi sa ndisi vatyí cua cuaa ta yoñi cua cuu zatyiño.

⁵ Ñiñi ñi sa ndyei ñuu ñiyivi ya, tañi minoo ñuhu cui ñuu ñiyivi. Tacuan i catyí ra Jesús.

⁶ Ta sa ndihi cahan ra cuhva cuan ta ziqui i tyicu zii ra nu ñuhu. Ta i zavaha ra ndyahyu sihin zii ra, ta i tyaa ra sii si nuu ra cuaa cuan.

⁷ Ta i catyi ra Jesús sihin ra: Cuahan ta nacatyon siti nuun nu ndyaa tanque Siloé. Zivi Siloé cuan cuñi si catyi si: I tasi suun. Ta i sahan ra cuan, ta i nacatya ra, ta sa nasaa ra ta sa cuu ndyehe ra.

⁸ Ta ñiyivi sa ndyaa yatyi yuvehe ra ta ñiyivi sa tuhva ndyehe sii ra vatyi cuaa ra i catyi ñu: ¿Atu yivi ra ihya cuu ra sica xaan caridad?

⁹ Zuhva ñu catyi ñu: Zuun ra cuu ra. Ta inga ñu catyi: Tañi caa ra caa. Zoco maa ra i catyi: Zuun yuhvi cui.

¹⁰ Yucuan cuenda catyi ñiyivi sihin ra: ¿Yozo caa i cuu vatyi i ndundisi ndyehun?

¹¹ Ta i nacahan ra ta catyi ra: Minoo ra sa nañi Jesús i zavaha ra ndyahyu, ta i tyaa ra sii si siti nui, ta i catyi ra sihin: “Cuahan cua nacatyon nuun nu ndyaa tanque Siloé.” Ta i sehin ta nacatye siti nui, ta ndundisi ndyehi vityi. Catyi ra.

¹² Tacuan ta i catyi ñiyivi sihin ra: ¿Ndyamaa iyo ra cuan? Ta i catyi maa ra: Ña site.

Nducu tuhun xaan ra fariseo sii ra sa nduvaha siti nuu cuan

¹³ I quihin ñiyivi sii ra sa ndundisi ndyehe, ta sindyaca ñu sii ra nu yucu ra fariseo.

¹⁴ Ta quivi quitatu ñiyivi i cuu quivi i zavaha ra Jesús ndyahyu ta zanduvaha ra siti nuu ra cuaa cuan.

¹⁵ Ta i nducu tuhun tucu ra fariseo sii ra nduvaha cuan ta catyi ra: ¿Yozo caa nduvaha siti nuun? Ta i catyi ra: Ndyahyu i tyaa ra siti nui, ta i nacatye, ta vityi ndundisi ndyehi. Catyi ra.

¹⁶ Tacuan ta ziqui i catyi huhva ra fariseo: Ra cuan, yivi cuenda ra Ndyoo cuu ra vatyi ña tyaa ra yahvi sii quivi quitatu yo. Ta inga ra fariseo catyi: Tatu ra iyo cuaty cuu ra, ma cuu zavaha ra sa ndyityi tañi ya. Ta sa cuenda cuan, ta ñá cuu ndu-ñn ra fariseo.

¹⁷ Ta i catyi tucu ra sihin ra i nduvaha nuu inga saha: ¿Ñaa catyi moo cuenda ra i zanduvaha siti nuun? Ta i catyi ra: Minoo ra profeta cuu ra. Catyi ra.

¹⁸ Zoco ra ndyaca ñaha sii ñiyivi hebreo, ñá sino iñi ra sii ra vatyi cuaa ra ta ziqui i ndundisi ndyehe ra ndya sa cana ra sii zutu ra ta sii zihí ra.

¹⁹ Ta i nducu tuhun ra sii ñu ta catyi ra: ¿Atu zehe maa ndo cuu sii ra ya? ¿Atu cuaa ra i cacu ra? ¿Ta yozo caa cuu vatyi ndundisi ndyehe ra vityi?

²⁰ Ta i nacahan zutu ra ta catyi ra: Sito ndi vatyi zehe ndi cuu sii ra ta cuaa ra i cacu ra.

²¹ Zoco ña sito ndi yozo caa vatyi ndyehe ra vityi a yoo sa zanduvaha siti nuu ra. Sa iyo cuiya ra. Nducu tuhun ndo sii maa ra. Cuu cahan ra sa cuenda maa ra.

²² I cahan zutu ra ta zihí ra cuhva cuan vatyi yuhu ñu sii ra ndyaca ñaha sii ñiyivi hebreo vatyi sa i yaha ndu-ñn ra cuan minoo cuhva ta catyi ra vatyi yoo ra catyi vatyi i quisi ra Jesús cuenda ra Ndyoo ma cuu ca cuhun ra vehe ñuhu.

²³ Yucuan cuenda i catyi zutu ra ta zihí ra: “Sa iyo cuiya ra. Nducu tuhun ndo sii maa ra.”

²⁴ Ta inga saha i cana ra hebreo sii ra i nduvaha, ta catyi ra: Zacahnun sii ra Ndyoo vatyi sito maa ndi vatyi ra iyo cuaty cuu ra zanduvaha suun.

²⁵ Ta i nacahan ra i nduvaha ta catyi ra: Ña site tatu ra iyo cuaty cuu ra a yivi, zoco minoo ñi cuhva site vatyi ra cuaa i cui, ta vityi ndundisi ndyehi. Catyi ra.

²⁶ Tacuan ta ziqui i catyi ra sihin ra inga saha: ¿Ñaa sa zavaha ra suhun? ¿Yozo caa i zanduvaha ra siti nuun?

²⁷ Ta i catyi ra sihin ra: Sa nacatyi sihin ndo, ta ñá tyizoho ndo. ¿Ñaa cuenda cuñi ndo coto ndo inga saha? ¿Atu cuñi tucu maa ndo vatyi cundyico ndo sii ra?

²⁸ Tacuan ta i cuxaan ra hebreo, ta catyi ra: Minoo ra ndyico sii ra cuun. Zoco maa ndi ndyico ndi sii ra Moisés.

²⁹ Sito ndi vatyi i cahan ra Ndyoo sihin ra Moisés. Zoco inga ra cuan, ña sito ndi ndyamaa i quisi ra cuan. Catyi ra.

³⁰ Tacuan ta i nacahan ra nduvaha cuan ta catyi ra: Ihya cuu minoo sa vaha xaan vatyi vazú ña sito maa ndo sii ra, zoco i zandundisi ra ndyehi.

³¹ Ta sito yo vatyí ña tyizoho ra Ndyoo sa cahan ñiyivi iyo cuatyí. Zoco tatu iyo minoo ra zacahnu sii ra Ndyoo ta zavaha ra cuhva cuñi ra, tyizoho ra Ndyoo sa cahan maa ra cuan.

³² Ta ndya ta sino ñuu ñiyivi, ta tañaha ca coto yo tatu iyo minoo ra sa cuu zandundisi nuu minoo ra cuaa ndya quivi i cacu ra.

³³ Tatu sa yivi ra Ndyoo tasi sii ra cuan, ma cuu zacuu ra cuhva ya. Catyi ra.

³⁴ Ta i nacahan ra hebreo ta catyi ra: Yoho sa cacun sisi tandiñi nuu cuatyí, ta vityi cuñun zacuothon sii maa ndi. Ta i quihin ra sii ra, ta i tava ndyizo ra sii ra ityi sata.

Cuaa ñiyivi cuenda sa ndisa

³⁵ Ta i sito ra Jesús vatyí i tava ndyizo ñiyivi sii ra i nduvaha. Ta i nañihi ra Jesús sii ra, ta catyi ra: ¿Atu sino iñun sii Zehe ra Ndyoo?

³⁶ Ta i nacahan ra cuan ta catyi ra: ¿Yoo ra cuu ra cuan, tata? vatyí cuu sino iñi sii ra.

³⁷ Ta i catyi ra Jesús sihin ra: Sa i ndyehun sii ra, ta zuun ra cuu sa natuhun suhun. Catyi ra.

³⁸ Ta i catyi ra cuan: Sino iñi suun; yoho ra ndyaca ñaha cuun. Ta i zacahnu ra sii ra Jesús.

³⁹ Ta i catyi ra Jesús: Vasi ñuu ñiyivi ya vatyí cua tyicuhve sii ñiyivi. Ta ñiyivi sa ña cuu ndyehe cua ndyehe ñu. Ta ñiyivi sa ndyehe vityí, cua nducuaa ñu. Catyi ra.

⁴⁰ Ta tayucu zuhva ra fariseo vatyí ñi yucuan, ta siñi ra sa cahan ra Jesús ta catyi ra sihin ra: ¿Atu cuaa tucu nduhvi?

⁴¹ Ta i catyi ra Jesús sihin ra: Tatu sa vatyí cuaa ndo sa ndisa, ma coo cuatyí ndo. Zoco sa cuenda sa vatyí catyi ndo vatyí ndisi ndyehe ndo ta yucuan cuenda ndoo cuatyí ndo ziqui ndo.

10

Cahan ra Jesús sihin minoo cuhva, cuhva iyo minoo sacu

¹ Sa ndisa ta sa ndisa catyi sihin ndo: Ra sa ma quihvi yu sacu, ndaa ra xiñi sacu ta quihvi ra; ra zuhu cuu ra.

² Vatyí ra quihvi yu sacu cuan, sitoño mvee ticatyí cuan cuu sii ra.

³ Ta ra zacuenda yuvehe cuan, nuña ra ta quihvi sitoño mvee. Sito mvee ticatyí zono ra nduzu ra, ta cana ra sii ti sihin zivi ti, ta quita ra, ta ndyico ti sii ra.

⁴ Ta sa ndiñi tava ra sii mvee ticatyí zono ra, maa ra cuahan ityi nuu ti. Ta ndyico ti sii ra vatyí nacoto ti nduzu ra.

⁵ Zoco sii inga ra sa ña sito ti, ma cundyico ti. Cua cono ti sii ra vatyí ña nacoto ti nduzu ra.

⁶ I cahan ra Jesús sihin ñiyivi sihin minoo cuhva, zoco ñá cutuñi iñi ñu tuhun cahan ra sihin ñu.

Ra zacuenda vaha cuu ra Jesús

⁷ Tacuan ta ziqui i cahan ra Jesús inga saha, ta catyi ra: Sa ndisa ta sa ndisa catyi sihin ndo vatyí yuhvi cui tañi yu sacu nu quihvi coyo mvee ticatyí.

⁸ Tandihí cui ra i quisi cuee ca sa quisi mi, ra zuhu cuu ra cuan. Zoco ña tyizoho mvee ticatyí zone sa cahan ra.

⁹ Yuhvi cui yuvehe. Tandihí ñiyivi sa cua quihvi coyo, cua cacu ñu. Ta cua quita ñu, ta cua nandihvi ñu, ta cua nañihi ñu sa vaha.

¹⁰ Ra zuhu cuan, vasi ra vatyí zuhu ra ta cahñi ra. Vasi zativi ra. Yuhvi vasi vatyí cuhve sa cundito ñiyivi tandihí tyiemvu ta coo vaha xaan ñu.

¹¹ Yuhvi cuu ra zacuenda vaha sii ndo. Ta sehi sa cui sa cuenda mvee ticatyí zone.

¹² Zoco minoo ra sa cuu muzu, zatyíño ra ta iyo yahvi ra. Ndyehe ra vatyí vasi ina nduvahu, ta zandoo ra sii mvee ticatyí cuan vatyí yivi zono ra cuu sii ti. Ta tiñ ino nduvahu sii ti ta quiti cuatyí ti sii ti.

¹³ Ta sino ra cu muzu cuan vatyí muzu ñi cuu ra, ta ñahñi sa cuu cuñi maa ra sa cuenda mvee ticatyí cuan.

¹⁴ Zoco yuhvi cuu ra zacuenda vaha. Nacote sii mvee ticaty zone, ta nacoto ti sii.

¹⁵ Tañi nacoto Zuti sii ta nacoto tuqui sii ra. Ta sehi sa cui sa cuenda mvee ticaty zone.

¹⁶ Ta iyo inga mvee ticaty zone. Yoñi ti ihya. Cuñi si sa naquihin sii ti. Cua cuiñi ti nduzi, ta cua ndu-ïin ti sihin inga ti, ta minoo ñi ra cua zacuenda sii ti.

¹⁷ Yucuan cuenda cuñi xaan Zuti sii, vaty sehi sa cui, ta cuee ca ta cua nandoto tuqui.

¹⁸ Yoñi sa cuu cahñi sii tatu ma cuhve sa cui, zoco cua cuhve sa cui. Cuu cui, ta cuu nandoto tuqui. Ihya tyiño i saha ra Ndyoo Zuti sii.

¹⁹ Ta sa ndihi cahan ra Jesús tuhun ya, ta ziqui ña cuu ca ndu-ïin ra hebreo sa cuenda sa i catyi ra Jesús.

²⁰ Ta i catyi cuaha xaan ra: Ñoho minoo cuihna sii ra cuan, ta zana xiñi ra. ¿Ñacu tyizoho ndo sa cahan ra?

²¹ Zoco inga ra catyi: Cuhva cahan ra, yivi cuhva cahan minoo ra sa ñoho cuihna. ¿Atu cuu zandundisi cuihna nuu ñiyivi cuaa?

Ña tyaa ra hebreo yahvi sii ra Jesús

²² Vico cahñi i cuu si, ta nducahnu minoo vico ñuu Jerusalén. Vico cuenda nu ndihi ndaa vehe ñuhu cahnu ta tyiemvu, ta nducahnu vico tahan cuiya cuenda si.

²³ Ta i sica noo ra Jesús sisi vehe ñuhu cahnu cuan nu nañi si corredor ra Salomón.

²⁴ Tacuan ta tyihi mahñu ra hebreo sii ra Jesús, ta i catyi ra: ¿Ndyaa ama ta cahan casun sihin ndi? Tatu ra Cristo cuun, catyi casun.

²⁵ Ta i nacahan ra Jesús ta catyi ra: Sa i nacaty sihin ndo, ta ña sino iñi ndo. Tyiño zavehi sa cuenda Zuti, yucuan saha sa ndaa cuende.

²⁶ Zoco ña sino iñi maa ndo vaty yivi mvee ticaty zone cuu sii ndo. Tañi sa nacaty sihin ndo.

²⁷ Mvee ticaty zone, siñi ti nduzi. Ta nacote sii ti, ta ndyico ti sii.

²⁸ Ta sehi sa cundito ti tandihi cui tyiemvu. Ta ma cuu ca ti. Ta yoñi ra cua tava sii ti sisi ndehi.

²⁹ Niñi ca cuu Zuti ta ziqui tandihi ca, ta i saha maa ra sii ti sii. Ta yoñi ra cuu tava sii ti sisi ndaha Zuti.

³⁰ Yuhvi sihin Zuti ñin ñi cuu ndi.

³¹ Tacuan ta i quihin ra hebreo yuu inga saha sa cua cañi ra sii ra Jesús.

³² Ta i cahan ra Jesús inga saha, ta catyi ra: Sa cuaha xaan tyiño vaha zañehi sii ndo sa cuenda Zuti. ¿Ndyaa sa ña tahan iñi ndo ta cuñi ndo cañi ndo yuu sii?

³³ Ta i nacahan ra hebreo ta catyi ra: Yivi sa cuenda minoo tyiño vaha i zavohon, zoco sa cuenda vaty ña vaha cohon vaty minoo ñiyivi ñi cuun, ta catyun vaty ra Ndyoo cuun.

³⁴ Ta i catyi ra Jesús sihin ra: Nuutu Tuhun Ndyoo ndyaa si nu i catyi ra Ndyoo vaty ndyoo cuu tucu maa ndo.

³⁵ I catyi ra Ndyoo vaty ñiyivi sa tyizoho Tuhun ra cuu tañi Ndyoo. Ta ma cuu catyi Tuhun Ndyoo minoo sa ña ndisa.

³⁶ I zandu-ii ra Ndyoo Zuti sii ra i tasi ra ñuu ñiyivi. Ta maa ndo catyi ndo vaty quehin ndya vaha ñi sii ra Ndyoo vaty catyi vaty Zehe ra Ndyoo cuu sii.

³⁷ Tatu ña zavehi cuhva cuñi Zuti, ma sino iñi ndo sii.

³⁸ Zoco zavehi cuhva cuan, ta vazu ma sino iñi ndo sii, zoco sino iñi ndo sa cuenda sa vaha i zavehi. Tacuan ta cua cuu nacoto ndo. Ta cua nacoto vaha ca ndo vaty ndyaa ra Ndyoo Zutu yo sihin, ta ñin ñi cui sihin ra. Tacuan i catyi ra Jesús.

³⁹ Yucuan cuenda i cuñi tucu ra tñin ra sii ra sa cahun ra vehe caa. Zoco i quita ra ta cuahan ra, ta ñá cuu.

⁴⁰ Ta cuahan tucu ra inga saha ndya inga siyo yuu Jordán ndya nu i zacoo ndutya ra Juan sii ñiyivi sa xihna ñi. Ta i ndoo ra yucuan.

⁴¹ Ta cuaha xaan ñiyivi cuahan coyo ndya nu ndyaa ra. Ta i catyi ñu: Ñahñi sa ndyityi i zavaha ra Juan, zoco tandihi cui sa catyi ra cuenda ra ya, ta ndisa cuu si.

⁴² Ta cuaha xaan ñiyivi i sino iñi sii ra Jesús yucuan.

11

I sihi ra Lázaro

¹ I cuhu minoo ra sa nañi Lázaro, cuhva ña María ta ña Marta. Betania cuu ñuu ñu.

² Ta ña María cuhva ra Lázaro, zuun ñi ña cuu ña sa tyozo azetye vixi saha ra Jesús ta zana-ityi ña sihin ixi xiñi ña minoo saha.

³ Tacuan ta ziqui i zacuhun cuhva ra Lázaro tyiño nu ndyaa ra Jesús ta catyi ñu: Tata, cuhu ra sa cuñi xoon.

⁴ Ta sa i siñi ra Jesús tuhun cuan i catyi ra: Ma cahñi cuehe cuan sii ra. Zoco cua ndyehe ñiyivi vaty cuu xaan zacuu ra Ndyoo, ta cua zacahnu xaan ñiyivi sii Zehe ra. Catyi ra Jesús.

⁵ Ta cuñi xaan ra Jesús sii ña Marta ta sii cuhu ña ta sii ra Lázaro.

⁶ Ta sa i sito ra vaty cuhu ra ta i ndoo ra uu ca quivi nu ndyaa ra.

⁷ Tacuan ta ziqui i catyi ra sihin ra i casi ra: Cohon yo Judea inga saha.

⁸ Ta i catyi ra sihin ra: Maestro, nacaa cuñi ñiyivi hebreo yucuan cañi ñu yuu suun. ¿Atu cuhun yucuan inga saha?

⁹ Ta i catyi ra Jesús: Iyo usi uu ora sa minoo ndyiyaca. Ra sa sica noo ora, ma catyih i saha ra vaty ndisi ndyehe ra ta zavaha ra sa vaha.

¹⁰ Zoco tatu cua caca noo minoo ra sa sa cuaa ta zavaha ra sa ña vaha, cua catyih i saha ra vaty cumañi ñúhu nu cuahan ra.

¹¹ Tacuan i catyi ra Jesús ta ziqui i catyi ra: Quixi xaan ra Lázaro amigo yo, zoco cuhin cua zandoye sii ra.

¹² Tacuan ta catyi ra i casi ra: Tata, tatu quixi ra, cua nduvaha ra.

¹³ Zoco i cahan ra Jesús tuhun sa sihi ra, zoco i sica iñi ra i casi ra vaty cahan ra tuhun sa quixi ndisa cuii ra ta quitatu ra.

¹⁴ Ta tacuan ta i catyi casi ra Jesús sihin ra: Sa sihi ra Lázaro.

¹⁵ Ta zii cuñi vaty yoñi ndyaa yucuan. Vaha ca tacuan sa cuenda maa ndo vaty cua sino ca iñi ndo. Coho yo nu catuu ra.

¹⁶ Tacuan ta i cahan ra Tomás sa nañi Dídimó sihin inga ra i casi ra Jesús, ta i catyi ra: Coho tucu maa yo vaty cuu yo ñin ñi sihin ra Jesús.

Zanandoto ra Jesús sii ra Lázaro

¹⁷ Ta sa i saa ra Jesús yucuan, i sito ra vaty sa ñoho ra Lázaro cumi quivi sisi ñaña.

¹⁸ Ñuu Betania cuan vaty ñi ndyaa si sihin ñuu Jerusalén tañi uñi kilómetro zazava.

¹⁹ Ta i saa cuaha xaan ra hebreo; cua cuhva ra tundyee iñi sii ña Marta ta ña María vaty sihi cuhva ñu.

²⁰ Ta sa sito ña Marta vaty vasi ra Jesús, cuahan ña cua zatahan ña sii ra. Zoco i ndoo ña María sisi vehe.

²¹ Tacuan ta i catyi ña Marta sihin ra Jesús: Tata, tatu sa vaty ndyoon ihya, ma cuu cuhve.

²² Zoco site vaty tandih i cuii ñi sa cua cacon sii ra Ndyoo, maa ra Ndyoo cua cuhva sii si suun.

²³ Ta i catyi ra Jesús sihin ña: Cua nandoto cuhvon.

²⁴ Ta i catyi ña Marta sihin ra: Site vaty cua nandoto ra quivi cua tyicuhva ra Ndyoo sii ñiyivi.

²⁵ Ta i catyi ra Jesús sihin ña: Yuhvi cuu ra zanandoto, ta sehi sa cundito ñiyivi. Ra sa sino iñi sii, vazu sa sihi ra, zoco cua nandoto ra.

²⁶ Ta ñiyivi ndito ta sino iñi ñu sii, ma cuu ca ñu. ¿Atu sino iñun cuhva ya?

²⁷ Ta i catyi ña sihin ra: Ndisa tata. Sino iñi vaty ra Cristo cuun, ta Zehe ra Ndyoo cuu suun. Ra sa cua quisi ñuu ñiyivi cuun. Catyi ña.

Sacu ra Jesús nu ndyaa ñaña ra Lázaro

²⁸ Ta sa sa ndih i cahan ña tacuan, ta ziqui cuahan ña ta cana xehe ña sii ña María cuhu ña, ta catyi ña: Sa saa ra Maestro ta cana ra suun.

²⁹ Ta sa i siñi ña María tuhun cuan, ta yatyí xaan i nduvita ña ta cuahan ña nu ndyaa ra Jesús.

³⁰ Ta tañaha ca cua quihvi ra Jesús sisi ñuu cuan. Ta cuhva ndyaa ñi ra nu tahan ña Marta sii ra.

³¹ Ta ra hebreo, ra ndyaa sihin ña María vehe cuan, i ndyehe ra vatyí yatyí xaan i nduvita ña ta i cacono ña cuahan ña. Ta i sindyico ra sii ña vatyí catyí ra: Cuahan ña cua vacu ña nu ndyaa ñaña ra Lázaro.

³² Tacuan ta i saa ña María nu ndyaa ra Jesús, ta i sicuiñi siti ña nuu ra ta catyí ña: Tata, tatu sa vatyí ndyoon ihya sihin ndi ndya icuñuu ca, ma cuu cuhve.

³³ Ta sa ndyehe ra Jesús vatyí sacú ña ta sacú tucu ra hebreo, ra ndihi sihin ña, ta i nducuihya xaan cuñi añima ra Jesús.

³⁴ Ta i catyí ra: ¿Ndyamaa i tyihi ndo sii ra? Ta i catyí maa ñu sihin ra: Coho, tata, vatyí cua ndyehun.

³⁵ Ta i sacú ra Jesús.

³⁶ Tacuan ta ziquí i catyí ra hebreo: Ndyehé ndo cuhva cuñi xaan ra sii ra sihi cuan.

³⁷ Zoco i catyí inga ra: Ihya ra i zandundisi ndyehe ra cuaa cuan. ¿Ñacu ñá zavaha ra minoo cuhva ta ma cuu ra ya?

Nandoto ra Lázaro

³⁸ I quisi minoo sa ndahvi xaan cuñi ra Jesús inga saha sa ndyehe ra ñaña nu ñoho ra Lázaro. Minoo yavi yuu, i cuu si, ta ndazi minoo yuu yuhu si.

³⁹ I catyí ra Jesús: Tyaa siyo ndo yuu ña. Ta i catyí ña Marta, cuhva ra i sihi cuan: Tata, sa iñi sahan ra vatyí sa cumi quivi sa sihi ra.

⁴⁰ Ta i catyí ra Jesús sihin ña: Sa catyí suhun vatyí tatu cua sino iñun, cua ndyehun vatyí cahnu xaan cuu cuhva iyo sii ra Ndyoo, ta cuu zacuu ra tandihi.

⁴¹ Tacuan ta ziquí i tyaa siyo ñu yuu nu ñoho ndiyi cuan. Ta i nandyehé ndaa ra Jesús ityi ziquí, ta catyí ra: Tyahvi ndyoo suun Ndyoo Zuti vatyí siñun sa quehin.

⁴² Ta site vatyí siñun sa quehin tandihi saha, zoco catyí tacuan sa cuenda ñiyivi sa yucu ihya vatyí tacuan ta cua sino iñi ñu vatyí moo i tasi sii.

⁴³ Ta sa ndihi cahan ra tacuan, ta ziquí i cana saa ra ta catyí ra: Lázaro quita xiña.

⁴⁴ Ta ra i sihi cuan, i quita ra. Zucu ra zahma. Ta nuhñi minoo zahma nuu ra. Ta i catyí ra Jesús sihin ñiyivi: Ndasi ndo sii ra, naquita ra.

Nducu cahñi ñiyivi sii ra Jesús

⁴⁵ Tacuan ta ziquí i sino iñi cuaha xaan ra hebreo, ra ndihi sihin ña María ta ndyehe ra cuhva i zavaha ra Jesús.

⁴⁶ Zoco sahan zuhva ra nu yucu ra fariseo ta nacatyí ra cuhva i zavaha ra Jesús.

⁴⁷ Yucuan cuenda i titahan ra zutu nahnu sihin ra fariseo, ta catyí ra: ¿Yozo caa zacuu yo vatyí cuaha xaan sa ndyityi zavaha ra cuan?

⁴⁸ Tatu cuhva yo sa zavaha ca ra tacuan, cua sino xaan iñi tandihi cuii ñiyivi sii ra. Ta cua quisi zandaru ñuu Roma ta cahñi ra sii yo ta zativi ra ñuu yo. Catyí ra.

⁴⁹ Ta minoo ra nañi Caifás, maa ra cuu ra cu nuu sii tandihi cuii ra cu zutu cuiya cuan. Ta i catyí ra sihin ra: Ñahñi maa sa sito ndo.

⁵⁰ Ña cutuñi iñi ndo vatyí vaha ca sa nacuu minoo tuhun ñi ra sa cuenda ñiyivi, ta yivi ca sa cuu tandihi cuii yo. Catyí ra.

⁵¹ Ñá cahan ra cuan sihin sa siñi tuñi xiñi ñi maa ra. Ra cu nuu sii tandihi cuii ra cu zutu i cuu ra cuiya cuan. Ta vazu ña sito ra, zoco i cahan ra profecía vatyí cua cuu ra Jesús sa cuenda tandihi ñiyivi hebreo.

⁵² Ta yivi sa cuenda sa maa ñi maa ñu, zoco cua zandu-ñin ra sii tandihi zehe ra Ndyoo, ñu indyucuan ta indyehe.

⁵³ Ta ndya quivi cuan i zacasi tahan ra hebreo, ra ndyizo tyiño cuan, tyiño vatyí cua cahñi ra sii ra Jesús.

⁵⁴ Yucuan cuenda ñá sica noo ndisi ca ra Jesús nu yucu ra hebreo. I quita ra yucuan ta saa ra ñuu Efraín yaty nu ndyaa minoo nu ndahvi xaan caa, sa catyi yo desierto. Ta yucuan i ndoo ra sihin ra i casi ra.

⁵⁵ Ta sa cua tahan si quivi coo vico zuhun cuenda ñu hebreo. Ta i quita cuaha xaan ñu ñuu ñu, ta cuahan ñu ñuu Jerusalén cuee ca sa tahan si quivi coo vico vaty cuñi ñu nduvaha ñu cuhva iyo costumbre maa ñu.

⁵⁶ Ta yucuan i nanducu ñu sii ra Jesús, ta catyi ñu sihin tahan ñu nu ñoho ñu vehe ñuhu cahnu: ¿Ñaa sa sica iñi ndo? ¿Atu ma quisi ra vico ya? Catyi ñu.

⁵⁷ Ra zutu nahnu sihin ra fariseo, sa i saha ra tyiño vaty tatu yoo sa cua coto ndyamaa ndyaa ra Jesús cua zacoto ra sii ra cuan vaty cua tñin ra sii ra.

12

I tyozo minoo ñaha azetye vixi saha ra Jesús

¹ Iñu quivi ca cuee ca sa tahan si vico zuhun cuan, i saa ra Jesús ñuu Betania nu iyo ra Lázaro, ra sa i sihi ta i zanandoto ra Jesús sii ra.

² Ta yucuan i zavaha ñu sa cuxiñi ra Jesús. I tyizo ña Marta coho nu mesa, ta ndyaa ra Lázaro sihin ra Jesús mesa.

³ Tacuan ta ziqui i quihin ña María zava litro azetye vixi sa yahvi xaan ndyaa, ta i tyozo ña sii si saha ra Jesús, ta i zana-ityi ña saha ra sihin ixi xiñi ña. Ta i situ cuii vehe cuan sihin xico vixi.

⁴ Ta i catyi minoo ra i casi ra Jesús, ra sa nañi Judas Iscariote zehe ra Simón, zuun ra cuu ra sa cua xico tuhun sii ra Jesús. Maa ra cuan i catyi:

⁵ ¿Ñacu ñá xico ñu azetye ya? ta cua ñihi ñu tañi cumi mil zazava ta tyindyee ñu sii ñiyivi ndahvi sihin si. Catyi ra.

⁶ Zoco ñá catyi ra tacuan vaty cuñi xaan ra sii ñiyivi ndahvi. I catyi ra tacuan vaty minoo ra zuhu cuu ra, ta ndyizo ra yiti sa ñoho xuhun ra Jesús, ta quihin xehe ra xuhun cuan.

⁷ Tacuan ta i catyi ra Jesús: Ma cahan ca ndo sihin ña. Zavaha ña sii si cuee ca sa cui ta cuhin nuñaña.

⁸ Ñiyivi ndahvi cuan, cua coo ñu sihin ndo tandihi cuii tyiemvu. Zoco yuhvi ma cundyei sihin ndo tandihi tyiemvu.

Cuñi cahñi ñiyivi sii ra Lázaro

⁹ Ta sa ñihi ñiyivi hebreo tuhun vaty ndyaa ra Jesús ñuu Betania, cuaha xaan ra saa coyo. Ña iñ ñi sa cuenda ra Jesús i quisi ra, quisi ra vaty cuñi ra ndyehe ra sii ra Lázaro, ra i zanandoto ra Jesús.

¹⁰ Zoco ra zutu nahnu i natuhun tahan ra yozo caa ta cuu cahñi ra sii ra Lázaro.

¹¹ Vaty sa cuenda ra Lázaro, ta cuaha xaan ra hebreo zaña ra tuhun zacuaha ra cu zutu ta sino iñi ra sii ra Jesús.

I quihvi ra Jesús ñuu Jerusalén

¹² Ta inga quivi i saa cuaha xaan ñiyivi ñuu Jerusalén sa cuenda vico zuhun, ta sa i sito ñu vaty vasi ra Jesús

¹³ i sahndya ñu ndaha tuticaha ta i quita coyo ñu ta cua zatahan ñu sii ra, ta cana saa ñu ta catyi ñu: ¡Cahnu xaan cuu ra vasi sa cuenda ra Ndyoo! ¡Rey, ra ndyaca ñaha sii yo cuu ra! Catyi ñu.

¹⁴ Ta i ñihi ra Jesús minoo burro luhlu, ta yozo ra sii ti tañi catyi si sisi Tuhun Ndyoo:

¹⁵ Ma yuhu ndo ñiyivi ñuu Sión;

Ica rey ndo vasi ya;

Yozo ra minoo burro luhlu.

Tacuan catyi si.

¹⁶ Ña cutuñi iñi ra i casi ra Jesús cuhva ya sa xihna ñi, zoco ta sa cua nanuhu ra Jesús ndya gloria ta ziqui i nacohon iñi ra i casi ra vaty tacuan ndyaa si sa cuenda ra Jesús, ta i nacohon iñi ra vaty tacuan i zavaha ñiyivi sihin ra.

¹⁷ Ta i saha ñiyivi sa ndaa, ñiyivi sa yucu sihin ra Jesús nu i cana ra sii ra Lázaro sisi ñaña ta i zanandoto ra sii ra.

¹⁸ Ta yucuan cuenda cuaha xaan ñiyivi i zatahan sii ra Jesús vatyí sa sito ñu vatyí i zavaha ra sa ndyityi cuan.

¹⁹ Zoco i catyi ra fariseo sihin tahan ra: Ndyehé ndo vatyí ma cuu ca zavaha yo ñaa sa cuñi yo sihin ra vatyí sa tandihi cuii ñiyivi sino iñi sii ra.

Nanducu ra griego sii ra Jesús

²⁰ Ta yucu tucu zuhva ra griego, ra i saa sihin ñiyivi vico cuan sa cua zacahnu ra sii ra Ndyoo.

²¹ Ta i tuhva ra sii ra Felipe ra ñuu Betsaida nu cu si Galilea, ta i catyi ra sihin ra: Tata, cuñi xaan ndi natuhun ndi sihin ra Jesús.

²² Ta i sahan ra Felipe, ta nacatyí ra sihin ra Andrés. Ta ziqui i sahan ra Andrés sihin ra Felipe cua nacatyí ra sihin ra Jesús.

²³ Ta i catyi ra Jesús sihin ra: Sa saa cuhva cua cui, ta ra i quisi ndya gloria cua cunanuhu ra ndya gloria.

²⁴ Sa ndisa ta sa ndisa catyi sihin ndo vatyí minoo siti trigo tatu ma canacava si nu ñuhu ma cuu si, zoco minoo tuhun ñi si cua coo sa tacuan. Ta tatu cua cuu si, cuaha xaan siti si cua nanduu.

²⁵ Ra sa cuñi coo vaha, cunaa ra sihin si. Ta inga ra tatu ndoo ra vaha vazú cahan ñiyivi sii ra sa cuenda Tuhun Ndyoo, cua coo vaha ra cuan ndya gloria, ta ma cuu añima ra.

²⁶ Tatu iyo ndo cuñi ndo zatyíño ndo tyiñe, cundyico ndo sii. Ta nu cua cundyei, yucuan cua cundyaa tucu maa ndo. Ta tatu iyo ndo sa cua zatyíño ndo tyiñe, cua zacahnu Zuti sii ndo.

Nacatyí ra Jesús vatyí cua cuu ra

²⁷ Ta vityí ndahvi xaan cuñi añime. ¿Ta ñaa sa cua catyi? ¿Atu cua catyi: “Zuti zacacun sii, sihin tundoho sa cua ndyehi vityí”? Ma catyi tacuan vatyí vasi ñuu ñiyivi sa cuenda sa cua ndyehi tundoho ya.

²⁸ Vaha ca nacatyí: “Zuti zanducahnun zivun.” Tacuan i catyi ra Jesús. Ta ziqui i quisi minoo nduzu ndya andivi ta catyi si: Sa i zanducahnu mi zivi, ta cua zanducahni sii si inga saha.

²⁹ Ta i siñi ñiyivi sa yucu yucuan nduzu cuan, ta i catyi ñu vatyí cahan zavi. Ta inga ñu i catyi ñu vatyí cahan minoo ángel ra Ndyoo sihin ra Jesús.

³⁰ Ta i nacahan ra Jesús ta catyi ra: Ña vasi nduzu ya sa cuenda mi. Vasi si sa cuenda maa ndo.

³¹ Ta vityí cua tasi tuñi ra Ndyoo sii ñuu ñiyivi ya. Ta ra ndyaca ñaha sii ñuu ñiyivi ya, vityí cua tava ra Ndyoo sii ra ityi sata.

³² Ta yuhvi tatu cua tyaa ñiyivi sii nu cruz, cuaha xaan ñiyivi cua sino iñi sii.

³³ Ta sa i cahan ra Jesús tuhun ya, saha ra sa cua coto ñiyivi cuhva cua cuu ra.

³⁴ Ta i nacahan ñiyivi ta catyi ñu: Sa siñi ndi vatyí catyi si nuu ley ra Ndyoo vatyí ra Cristo, tacuan ñi cua coo ra tandihi cuii tyiemvu. ¿Ta ñacu catyun vatyí cuñi si sa tyaa ñiyivi sii ra i quisi ndya gloria nu cruz? ¿Yoo ra cuu ra i quisi ndya gloria?

³⁵ Tacuan ta ziqui i nacatyí ra Jesús sihin ñu: Zuhva ñi ca cuhva cua coo ñuhu nu yucu ndo. Caca ndo ñi ñi sa ndyaa ñuhu ya, coto quisi sa ñaa ta ma cuu ca caca ndo. Vatyí ra sica noo nu ñaa, ña sito ra ndya ityi cuahan ra.

³⁶ Ñi ñi sa ndyaa ñuhu sihin ndo, sino iñi ndo sii ra. Vatyí tacuan ta cua cuu ndo zehe ñuhu. (Cua cuu ndo ñiyivi sa zama cuhva iyo.)

Ña sino iñi ra hebreo sii ra Jesús

Tacuan i catyi ra Jesús, ta cuahan ra ta i quihvi xehe ra sii ñu.

³⁷ Vazu sa cuaha xaan sa ndyityi i zavaha ra nuu ñiyivi cuan, zoco ñá sino iñi ñu sii ra

³⁸ vatyí tacuan ta cua quita si tañi i catyi ra Isaías, minoo ra cu profeta, quivi i catyi ra tyehen:

Tata ¿yoo ra sino iñi sa quehin?

Ta ¿yoo sii i zañaha ra ndyaca ñaha sii yo cuhva cuu zacuu ra?

³⁹ Yucuan cuenda ña cuu sino iñi ñu vaty zuun ñi i catyi tucu ra Isaías:

⁴⁰ I zanducuaa ra siti nuu ñiyivi cuan, ta i zanduñihi ra iñi ñu.

Ta tacuan ta ma ndyehe ñu sihin siti nuu ñu, ta ma cutuñi iñi ñu sihin añima ñu ta nazama ñu cuhva iyo ñu, ta ma zanduvehi sii ñu.

Caty ra Ndyoo.

⁴¹ I catyi ra Isaías tuhun ya quivi i ndyehe ra vaty cahnu xaan cuu maa ra Ndyoo ta tyaquí xaan ra. Ta i cahan ra cuenda ra.

⁴² Zoco cuaha xaan ra cu tyiño ñuu cuan, i sino iñi ra sii ra Jesús. Zoco ñá saha ra sa ndaa vaty yuhu ra sii ra fariseo coto tava ndyizo ra sii ra sisi vehe ñuhu.

⁴³ Vaty cuñi xaan ca ra cuan sa tyaa ñiyivi yahvi sii ra, ta ña sica iñi ra tatu cua cuzii iñi ra Ndyoo sihin ra a ma cuzii iñi ra.

Tuhun cahan ra Jesús cua tyicuhva si sii ñiyivi

⁴⁴ I cana saa ra Jesús ta catyi ra: Ra sa sino iñi sii, ña hin ñi sii mi sino iñi ra. Zoco sino tucu iñi ra sii ra i tasi sii.

⁴⁵ Ta ra sa ndyehe sii, ndyehe tucu ra sii ra i tasi sii.

⁴⁶ Vasi ñuu ñiyivi ya tañi minoo ñuhu vaty yoo ra sino iñi sii, ma ndoo ca ra nu ñaa.

⁴⁷ Ta tatu sa siñi ñiyivi sa quehin ta ma tyaa ñu yahvi, ma tyicuhve sii ñu vaty ña vasi tyicuhve. Vasi zacaqui sii ñiyivi ñuu ñiyivi.

⁴⁸ Ra sa ña cuñi sii mi caña ñi, ta ña tyaa ra yahvi tuhun quehin, sa iyo sa cua tyicuhva sii ra. Tuhun sa i quehin, yucuan cuu sa cua tyicuhva sii ra quivi cua tyicuhva ra Ndyoo sii ñiyivi.

⁴⁹ Vaty ña quehin sa cuenda ñi mi. Zuti, ra i tasi sii, i saha ra tyiño sii, tandihi cuii sa cuu nacaty.

⁵⁰ Ta site vaty tyiño i saha ra sii, cuu cuhva cundito ñiyivi tandihi tyiemvu sihin ra. Yucuan cuenda tandihi cuii sa catyi sihin ndo, quehin cuhva saha Zuti tyiño sii.

13

I nacatya ra Jesús saha ra i casi ra

¹ Ta sa vaty vico zuhun, ta sa sito ra Jesús vaty sa cua tahan si cuhva quita ra ñuu ñiyivi ya ta cuhun ra nu ndyaa Zutu ra. I cuñi xaan ra sii ñiyivi sino iñi sii ra ihya ñuu ñiyivi ta cuhva cuñi ra sii ñu, ma ndihi maa si.

² Ta cuhva sa cuxiñi ra, ta i quihvi cuihna añima ra Judas Iscariote zehe ra Simón, vaty cua xico tuhun ra sii ra Jesús.

³ Ta sa sito ra Jesús vaty sa i saha Zutu ra tandihi cuii tyiño sii maa ra. Ta sa sito ra vaty ndya nu ndyaa ra Ndyoo i quita ra, ta ndya indyacuan cua cunanuhu ra.

⁴ Ta cuhva sa cuxiñi ra i nduvita ra, ta i tava ra zahma sa ndisi ra, ta sihñi ra minoo toalla sisi ra.

⁵ Ta ziqui i tyihi ra ndutya sisi minoo caa, ta quisaha nacatya ra saha ra i casi ra. Ta zana-ityi ra saha ra sihin toalla sa nuhñi sisi ra.

⁶ Ta sa saa ra nu ndyaa ra Simón Pedro, i catyi ra Pedro sihin ra: Tata, ¿atu cua nacatyon sehi?

⁷ Ta i nacahan ra Jesús ta catyi ra: Ña cutuñi iñun sa zavehi vityi, zoco cuee ca cua cutuñi iñun. Catyi ra.

⁸ Ta i catyi ra Pedro sihin ra: Numinoo saha ta ma nacatyon sehi caña ñi. Ta i catyi ra Jesús sihin ra: Tatu ma nacatye sohon, yivi ñiyivi sii cuu suun.

⁹ Ta i catyi ra Simón Pedro sihin ra: Tata, ña maa ñi sehi nacatyon, nacatya tucun ndehi ta xiñi.

¹⁰ Ta ziqui i catyi ra Jesús sihin ra: Ra sa sityi, maa ñi saha ra cuñi si ndoo vaty sa ndii maa ra. Ta sa ndii maa ndo, zoco ña tandihi ndo.

¹¹ Tacuan i catyi ra Jesús vaty sa sito ra yoo ra cua xico tuhun sii ra. Yucuan cuenda i catyi ra: “Ña ndii tandihi ndo.”

¹² Tacuan ta sa ndihi nacatya ra saha ra, ta i naquihin ra zahma ra, ta sicundyaa ra mesa. Ta ziqui i nacatyi ra sihin ra: ¿Atu cutuñi iñi ndo cuhva i zavehi sihin ndo?

¹³ Catyi maa ndo maestro cui, ta catyi ndo ra ndyaca ñaha cui, ta vaha cahan ndo vatyi zuun ra cui.

¹⁴ Tatu yuhvi cuu maestro ta ra ndyaca ñaha ta i nacatye saha ndo. Tacuan tucu maa ndo, tahan si nacatya ndo saha tahan ndo.

¹⁵ Vatyi sa i sehi minoo cuhva sii ndo, ta cuñi si sa cua zavaha tucu ndo cuhva i zavehi sihin ndo.

¹⁶ Sa ndisa ta sa ndisa catyi sihin ndo vatyi ña cahnu ca ra cu muzu ta ziqui patrón ra. Ta cahnu ca cuu ra tava tyiño sii ñiyivi ta ziqui ca ra cuahan sihin tyiño.

¹⁷ Tatu sito ndo tuhun ya, zii xaan cua cuñi ndo tatu zavaha ndo sii si.

¹⁸ Ña quehin sa cuenda tandihi ndo. Sa site yoo ndo i casi. Zoco cua cuu si cuhva catyi tutu Tuhun Ndyoo: “Ra sa sasi pan sihin, cua nduvita ra ziqui.”

¹⁹ Ta vityi sa nacatyi sihin ndo cuee ca sa tahan si vatyi quivi cua tahan si ta cua sino iñi ndo vatyi yuhvi cuu ra sa nacatyi sihin ndo.

²⁰ Sa ndisa ta sa ndisa catyi sihin ndo vatyi ra naquihin vaha sii ra tasi, naquihin vaha ra sii. Ta ra naquihin vaha sii, naquihin vaha ra sii ra sa tasi sii.

Zacoto ra Jesús sii ra i casi ra vatyi cua xico tuhun ra Judas sii ra

²¹ Ta sa ndihi cahan ra Jesús tuhun cuan, ta i quisi minoo sa cuihya xaan cuñi ña ñima ra, ta i catyi ra: Sa ndisa ta sa ndisa catyi sihin ndo vatyi iyo minoo ndo cua xico tuhun ndo sii.

²² Ta cuhva cuan i nandyeha ra i casi ra Jesús sii tahan ra vatyi ña sito ra yoo ra cuu ra cahan ra Jesús tuhun.

²³ Ta minoo ra i casi ra Jesús, ra sa cuñi xaan ra, naña ra sii ra Jesús.

²⁴ Ta i saha ra Simón Pedro minoo zeña sii ra cuan sihin ndaha ra vatyi nanducu tuhun ra sii ra Jesús yoo ra cuu ra sa cahan ra tuhun.

²⁵ Ta ra yucuan, i tuhva ca ra sii ra Jesús ta nducu tuhun ra: Tata, ¿yoo ra cuu ra sa cohon tuhun?

²⁶ Ta i nacahan ra Jesús ta catyi ra: Cua zatyii pan, ta cua cuhve sii si sii minoo ra. Yucuan ra cuu ra. Ta sa zatyii ra Jesús pan cuan, ta i saha ra sii si sii ra Judas Iscariote, zehe ra Simón.

²⁷ Ta sa ndihi sasi ra Judas pan cuan, i quihvi cuihna ña ñima ra. Ta ziqui i catyi ra Jesús sihin ra: Cuhva sa cua zavohon, zavohon sii si yaty ca.

²⁸ Zoco ña sito numinoo ra ndyaa mesa sihin ra Jesús ña cuenda i cahan ra tacuan sihin ra Judas.

²⁹ Iyo ra i sica iñi ra vaziqui i catyi ra Jesús: “Cuahan cua zaton ña sa cua cuñi si sii yo cuenda vico zuhun ya.” A catyi ra: “Cuhvon xuhun sii ñiyivi ndahvi.” Vatyi cumi ra Judas yiti sa ñoho xuhun ra Jesús.

³⁰ Ta sa ndihi sasi ra Judas pan cuan, ta zuun ñi caa cuhva cuan i nduvita ra ta cuahan ra. Ta sa cuaa ñi cuu si.

Minoo tyiño saa saha ra Jesús, ta ñiñi xaan si

³¹ Ta sa yaha cuahan ra Judas ta ziqui i catyi ra Jesús: Vityi sa tahan si cuhva vatyi cua coto ñiyivi vatyi iyo xaan cuhva sii ra i quisi ndya gloria ta cua zacahnu ñu sii ra, ta cua zacahnu xaan ñu sii ra Ndyoo sa cuenda ra.

³² Vatyi tatu ra i quisi ndya gloria zañaha ra vatyi cahnu xaan cuu maa ra Ndyoo. Zuun ñi cuhva cuan cua zañaha ra Ndyoo vatyi cahnu xaan cuu maa ra cuan. Ta numi xaan cua nacoto vaha ndo sii si.

³³ Ndoho zehe luhli, zuhva ñi ca cuhva cua cundyei sihin ndo. Cuee ca cua nanducu ndo sii, ta tañi sa i catyi sihin ra hebreo nacatyi sihin maa ndo vityi vatyi nu cuhin ma cuu cuhun ndo.

³⁴ Sehi minoo tyiño saa sii ndo vatyi cuñi ndo sii tahan ndo tañi cuñi mi sii ndo.

³⁵ Ihya cuhva cua coto tandihi ñiyivi vatyi ndyico ndo sii, tatu cuñi ndo sii tahan ndo.

Zacoto ra Jesús sii ra i casi ra vatyi cua catyi ra Pedro vatyi ña sito ra sii ra

³⁶ Ta i catyi ra Simón Pedro sihin ra: Tata, ¿ndyamaa cua cuhun? Ta i catyi ra Jesús sihin ra: Nu cuhin ma cuu cuhun sihin vityi, zoco cuee ca ta cua cuhun. Catyi ra.

³⁷ Ta i catyi tucu ra Pedro sihin ra: Tata, ¿ña cuenda ma cuu cuhin suhun vityi? Cuhin vazu cui sa cuendon.

³⁸ Ta i nacahan ra Jesús ta catyi ra: ¿Atu cuu cuun sa cuende? Sa ndisa ta sa ndisa catyi suhun vatyi cuee ca sa vacu saa ndivi tyahnu ta cua catyun uñi tahan saha vatyi ña siton sii.

14

Tañi minoo ityi cuu ra Jesús, ta cuu cuhun yo nu ndyaa Zutu ra

¹ I catyi ra Jesús: Ma caca xaan iñi ndo. Sa sino iñi ndo sii ra Ndyoo. Sino tucu iñi ndo sii mi.

² Vehe Zuti, iyo cuaha xaan nu cuu cundyaa ndo. Tatu sa ña ndisa, ma nacatyi sihin ndo. Cuhin cua zanduvehi nu cua cundyaa ndo.

³ Ta tatu cuhin ta zanduvehi nu cua cundyaa ndo, cua quisi inga saha ta naquihin sii ndo vatyi cuhun ndo ta cundyaa ndo nu cua cundyei.

⁴ Sito ndo ndyamaa cuehin, ta sito ndo ityi.

⁵ Ta i catyi ra Tomás sihin ra: Tata, ña sito ndi ndyamaa cuohon ¿ta yozo caa cuu coto ndi ityi? Catyi ra.

⁶ Ta i catyi ra Jesús sihin ra: Yuhvi cui ityi. Ta maa ñi sa ndisa cuii quehin, ta sehi cuhva cundito ñiyivi. Yoñi cuu saa nu ndyaa Zuti tatu ma sino iñi ñu sii.

⁷ Tatu sa vatyi nacoto ndo sii, nacoto tucu ndo sii Zuti. Ta ndya vityi sa nacoto ndo sii ra, ta sa ndyehe ndo sii ra.

⁸ Ta i catyi ra Felipe sihin ra: Tata, zañohon sii ra Ndyoo Zutun sii ndi. Ta sihin sa yucuan ñi ta sa vaha ñi.

⁹ Ta i catyi ra Jesús: Felipe, sa cuaha xaan quivi ndyei sihin ndo. ¿Atu ta nacoto con sii? Ra sa ndyehe sii, sa ndyehe ra sii ra Ndyoo Zuti. ¿Ta ñaa cuenda catyun vatyi zañehi sii ra Ndyoo Zuti sii ndo?

¹⁰ ¿Atu ña sino iñun vatyi ndyaa ra Ndyoo Zuti sihin ta ñin ñi cui sihin ra? Ta tuhun quehin, ña quehin sa cuenda ñi mi. Quehin tuhun ra Ndyoo Zuti, ra ndyaa sihin. Ta tyiño zavehi, maa ra zavaha sii si.

¹¹ Sino iñi ndo vatyi ñin ñi cui sihin ra Ndyoo Zuti ta ndyaa ra sihin. Zoco tatu ña sino iñi ndo cuhva cuan, zoco sino iñi ndo sa cuenda tyiño zavehi.

¹² Sa ndisa ta sa ndisa catyi sihin ndo, ra sa sino iñi sii, cua zavaha ra tyiño tañi tyiño zavehi. Ta tyiño cahnu ca cua zavaha tucu ra vatyi cuehin nu ndyaa ra Ndyoo Zuti.

¹³ Ta tandihí sa cua caca ndo sii, sihin zivi mi, cua cuhve sii si. Ta tacuan ta cua zacahnu ca ñiyivi sii ra Ndyoo Zuti sa cuenda sa cua zavaha Zehe ra.

¹⁴ Tandihí sa cua caca ndo sii, sihin zivi mi, cua cuhve sii si sii ndo.

I catyi ra Jesús vatyi cua zaquisi ra sii Tatyí li

¹⁵ Tatu cuñi ndo sii, zavaha ndo cuhva catyi sihin ndo.

¹⁶ Ta cua caca tahvi sii ra Ndyoo Zuti ta cua zaquisi ra sii inga ra cua tyindyee sii ndo. Ta cua ndoo ra cuan sihin ndo tandihí cuii tyiemvu.

¹⁷ Tatyí li cuu ra, ta maa ñi sa ndisa cahan ra. Ña cuu ñihi ñiyivi ndya vaha ñi sii ra vatyi ña ndyehe ñu sii ra, ta ña nacoto ñu sii ra. Zoco sa sito maa ndo sii ra vatyi ndyaa ra sihin ndo, ta cua coo ra sisi añima ndo.

¹⁸ Ta ma zandoi sii ndo tacuan ñi. Cua quisi tuqui nu ndyaa ndo.

¹⁹ Zuhva ñi ca cuhva, ta ma ndyehe ca ñiyivi ndya vaha ñi sii. Zoco maa ndo cua ndyehe ndo sii. Cua cundite, ta yucuan cuenda cua cundito tucu maa ndo sihin.

²⁰ Ta quivi cuan, cua coto ndo vatyi ñin ñi cui sihin Zuti, ta ñin ñi cua cuu ndo sihin ta mi sihin maa ndo.

²¹ Ta ra sa cumi vaha tandihi cuii tuhun i nacaty sihin ndo ta zavaha ra sii si, yucuan ra cuu ra sa cuñi xaan sii. Ta ra sa cuñi sii, cuñi xaan Zuti sii ra. Ta cua cuñi xein sii ra, ta cua quisi nu ndyaa ra. Tacuan i catyi ra Jesús.

²² Ta i catyi ra Judas, zoco yivi ra Judas Iscariote cuu ra, ta i catyi ra sihin ra: Tata, ¿ña cuenda cua quisun nu ndyaa maa ndi, ta ma cuhun nu ndyaa inga ñiyivi ndya vaha ñi?

²³ Ta i nacahan ra Jesús ta catyi ra sihin ra: Tatu cuñi minoo ra sii mi sa ndisa, cua tyaa ra yahvi tuhun quehin. Ta cua cuñi xaan Zuti sii ra. Ta cua cuhun ndi nu ndyaa ra, ta cua ndoo ndi sihin ra.

²⁴ Zoco ra ña cuñi sii, ña tyaa ra yahvi tuhun quehin. Ta tuhun quehin ta sa siñi ndo, yivi tuhun ñi mi cuu si. Sa cuenda ra Ndyoo Zuti cuu si, ra i tasi sii.

²⁵ Ta sa nacaty cuhva ya sihin ndo ñi ñi sa ndyei sihin ndo vityi.

²⁶ Ta ra sa cua tyindyee sii ndo, ra cu Taty Li, cua tasi ra Ndyoo Zuti sii ra sa cuenda mi. Cua zacua ra sii ndo tandihi. Ta cua zanacohon ra iñi ndo tandihi sa i catyi sihin ndo.

²⁷ Ta sa coo vaha ndo sehi sii ndo. Ta sa coo vaha ndo zandoi sihin ndo. Ña sehi sii si cuhva saha ñiyivi ñuu ñiyivi ya. Ma cuhva ndo sa caca xaan iñi ndo, ta ma yuhu ndo.

²⁸ Ta vityi sa siñi ndo sa catyi vaty cuhin, ta cua quisi tuqui nu ndyaa ndo. Tatu ndisa vaty cuñi xaan ndo sii, zii xaan cua cuñi ndo vaty cuhin nu ndyaa ra Ndyoo Zuti vaty cahnu ca cuu maa ra ta ziqui ca mi.

²⁹ Ta vityi sa nacaty sihin ndo cuee ca sa tahan si vaty quivi cua tahan si ta cua sino iñi ndo.

³⁰ Ña cuaha ca tuhun cua quehin sihin ndo vaty sa vasi ra ndyaca ñaha ñuu ñiyivi ya, ta ña ndyaca ñaha ra sii.

³¹ Zoco sa cua nacoto ñiyivi ñuu ñiyivi vaty cuñi xein sii ra Ndyoo Zuti, yucuan cuenda cua zavehi tyiño i tava ra sii. Ta vityi nanduvita yo ta cuhun yo.

15

Ra Jesús cuu ra tañi minoo yoho uva sihin zoco tu

¹ Yuhvi cui tañi minoo yoho uva, ta Zuti cuu tañi ra zatyño nu ndyaa tu.

² Ta tandihi zoco yoho uva cuan sa ñahñi yucu vixi vaha saha cua cahndya ra sii si. Ta tandihi zoco yoho sa ndyizo yucu vixi vaha, zanduvii ra sii si, ta tacuan ta cua cuhva si cuaha ca.

³ Ta maa ndo sa nduvii ndo sihin tuhun quehin sihin ndo.

⁴ ñi ñi cuu ndo sihin. Tañi mi ñi ñi cui sihin ndo. Tañi minoo zoco yoho, ma cuu cuhva si yucu vixi sa maa ñi maa si, tatu ña ñi ñi cuu si sihin yoho sa cuu saha si. Ta tacuan tucu maa ndo; ma cuu zavaha ndo cuhva catyi sihin ndo tatu ña ñi ñi cua cuu ndo sihin.

⁵ Yuhvi cui tañi yoho uva cuan, ta maa ndo cuu tañi zoco tu. Ra sa ñaña sii, ñanei sii ra. Ta cuaha xaan sa vaha zavaha ra. Vaty tatu ma tyindyee sii ndo ñahñi maa sa cuu zavaha ndo.

⁶ Ta ra sa ña ñaña sii, cua zavite sii ra tañi minoo zoco yoho. Ta cua na-ityi zoco yoho cuan, ta cua quisi naquihin ñiyivi sii si, ta cua tyihi ra sii si nu cayu ñuhu vaty cua cayu si.

⁷ Tatu ñaña ndo sii, ta tuhun quehin iyo vaha si sihin ndo, cua caca ndo ñaa sa cuñi ndo ta cua ñihi ndo sii si.

⁸ Cuhva cuan zacahnu xaan si sii Zuti tatu cuaha xaan sa vaha zavaha ndo. Ta tacuan ta cua cuu ndo ñiyivi ndyico sii mi sa ndisa.

⁹ Cuhva cuñi xaan Zuti sii, ta tacuan cuñi sii maa ndo. Ma naa iñi ndo cuhva cuñi xein sii ndo.

¹⁰ Tatu zavaha ndo tandihi sa catyi sihin ndo, cua cuñi xein sii ndo. Tañi sa i tyaa xein yahvi tandihi sa i catyi Zuti sihin, ta cuñi xaan ra sii.

¹¹ Quehin cuhva ya sihin ndo vaty cuzi cuñi ndo tañi sa zii cuñi mi. Ta sa zii cuñi maa ndo, ma ndihi si.

¹² Ihya cuu tyiño sehi sii ndo vaty cuñi xaan ndo sii minoo ndo ta sii inga ndo tañi cuñi xein sii ndo.

¹³ Tatu cuñi ndisa cuii yo sii inga ñiyivi, cuhva yo sa cuu yo sa cuenda ñu. Ñahñi inga ca cuhva ñihi ca cuñi yo sii ñu.

¹⁴ Maa ndo cuu ñiyivi sa cuñi xein tatu zavaha ndo tandihi cuhva sa i catyi sihin ndo.

¹⁵ Ndyá vityi ma cahan que muzu sihin ndo vatyí minoo muzu ña sito ra ñaa sa zavaha patrón ra. Zoco catyi vatyí ñiyivi sa cuñi xein cuu sii maa ndo vatyí sa i nacatyí sihin ndo tandihi cuii sa i nacatyí Zuti sihin.

¹⁶ Ñá casi ndo sii. Yuhvi cuu ra i casi sii ndo. Ta i sehi tyiño sii ndo vatyí cuhun ndo ta zatyíño ndo tyiño. Ta cua quita vaha tyiño ndo, ta ma cunaa si. Ta tandihi sa cua caca ndo sii Zuti sihin zivi mi cua cuhva ra sii si sii ndo.

¹⁷ Ta ihya cuu tyiño sehi sii ndo vatyí cuñi xaan ndo sii minoo ndo ta sii inga ndo.

Cua cuxaan ñiyivi ndya vaha ñi sihin ndo

¹⁸ Tatu ña cuu ndyehe ñiyivi ña sino iñi sii ndo, sa sito ndo vatyí sa xihna ñi sii mi ña cuu ndyehe ñu ta ziquí sii maa ndo.

¹⁹ Tatu ñiyivi cuenda ñuu ñiyivi ya cuu ndo, cua cuñi xaan ñiyivi ñuu ñiyivi ya sii ndo. Zoco yivi ca ñiyivi ñuu ñiyivi ya cuu ndo vatyí sa i casi sii ndo sisi ñuu ñiyivi ya. Yucuan cuenda, ña cuu ndyehe ñiyivi ndya vaha ñi sii ndo.

²⁰ Nacohon iñi ndo vatyí sa i nacatyí sihin ndo vatyí ña cahnu ca cuu ra cu muzu ta ziquí ca patrón ra. Tatu sa cuxaan ñiyivi sihin mi, cua cuxaan tucu ñu sihin maa ndo. Tatu zavaha ñu cuhva catyi, cua zavaha tucu ñu cuhva catyi maa ndo.

²¹ Zoco tandihi cuii nuu sa ña vaha cua zavaha ñu sihin maa ndo sa cuenda mi vatyí ña sito ñu sii ra i tasi sii.

²² Tatu sa ñá quisi quehin sihin ñu, ñahñi cuatyí ñu. Zoco vityí ñahñi cuhva cuu tyixehe ñu cuatyí ñu.

²³ Ra sa ña cuu ndyehe sii, ña cuu ndyehe tucu ra sii Zuti.

²⁴ Tatu sa ñahñi sa ndyityi i zavehi nu yucu ñu tañi sa yoñi zavaha, ñahñi cuatyí ñu. Zoco vityí sa i ndyehe ñu sii, ta i cuxaan ñu sihin mi ta sihin Zuti.

²⁵ Tacuan cua cuu si vatyí cua tahan si cuhva catyi si sisi zuun ñi ley maa ñu nu catyi si: “Vazu ñahñi cuatyí, zoco ma cuu ndyehe ñu sii.” Catyi si.

²⁶ Zoco quivi naquisi Tatyí Ii, ra cua tasi ndya nu ndyaa ra Ndyoo Zuti, cua tyindyee ra sii ndo, ta maa ñi sa ndisa cua cahan ra. Ra cuan cua cuhva sa ndaa sa cuenda mi.

²⁷ Ta maa tucu ndo cua cuhva ndo sa ndaa vatyí i sindihi ndo sihin ndya quivi i quisaha zatyíño.

16

¹ Ihya tuhun i quehin sihin ndo vatyí ma catyíhi saha ndo.

² Cua tava ndyizo ñiyivi sii ndo sata vehe ñuhu. Ta cua saa cuhva vatyí yoo ra sa cua cahñi sii ndo ta cua caca iñi ra vatyí tyiño ra Ndyoo zatyíño ra.

³ Ta cua zavaha ñu cuhva ya vatyí ña sito ñu sii ra Ndyoo Zutu yo a sii mi.

⁴ Zoco vityí sa i nacatyí cuhva ya sihin ndo vatyí quivi cua tahan si ta cua nacohon iñi ndo vatyí sa i catyi sihin ndo.

Cuhva cua zavaha Tatyí Ii ra Ndyoo

Ñá catyi tuhun ya sihin ndo sa xihna ñi vatyí ndyei sihin ndo.

⁵ Zoco vityí cua cuhin ndya nu ndyaa ra i tasi sii. Ta yoñi ndo cua nducu tuhun ndo sii, ndyamaa cuhin.

⁶ Ta vityí sa nducuihya cuñi añima ndo vatyí sa i catyi tuhun ya sihin ndo.

⁷ Ta catyi sa ndisa sihin ndo vatyí ñiñi xaan cuu si sa cuhin vatyí tatu ma cuhin ma quisi Tatyí Ii ziquí ndo. Cua cuhin ta cua zaquisi sii ra ziquí ndo.

⁸ Ta quivi cua quisi ra, cua zacoto ra sii ñiyivi vatyí iyo cuatyí ñu. Ta cua zañaha ra vatyí iyo minoo ityi ndoo. Ta cua tasi tuñi ra Ndyoo sii ñiyivi sa ma ndu-uu iñi cuatyí.

⁹ Cua catyi ra sihin ñiyivi vatyí iyo cuatyí ñu vatyí ña sino iñi ñu sii.

¹⁰ Cua zañaha ra sii ñu vatyí iyo minoo ityi ndoo vatyí cuhin nu ndyaa Zuti, ta ma ndyehe ca ndo sii.

¹¹ Ta cua zañaha ra cuhva cua tasi tuñi ra Ndyoo vatyí cua tasi tuñi ra Ndyoo sii ra ndyaca ñaha ñuu ñiyívi ya.

¹² Iyo cuaha xaan ca sa cuñi catyi sihin ndo, zoco ma cutuñi iñi ndo sii si vityi.

¹³ Zoco quívi cua quisi Tatyí Ii, cua cahan ra sa ndisa vatyí ra cahan sa ndisa cuu ra. Maa ra cuan, cua zañaha ityi sii ndo sii tandíhi cuii sa ndisa. Ma cahan ra sa cuenda ñi maa ra. Tandíhi sa siñi ra nu ndyaa ra Ndyoo Zutu yo, cua zacoto ra sii ndo. Ta cua zacoto ra sii ndo ñaa sa cua coo ityi nuu ca.

¹⁴ Cua zacahnu ra sii mi vatyí cua quihin ra tuhun quehin sihin ra, ta cua zacoto ra sii ndo.

¹⁵ Tandíhi cuii sa iyo sii Zuti ta sii mi cuu tucu si. Yucuan cuenda catyi vatyí cua quihin ra tuhun quehin sihin ra, ta cua zacoto ra sii ndo.

Cuihya cuñi ra i casi ra Jesús, zoco cuee ca ta cua nduzíi cuñi ra

¹⁶ Zuhva cuii ñi ca quívi, ta ma ndyehe ca ndo sii. Ta inga zuhva ca quívi ta cua nandyehé ndo sii, vatyí cuhin nu ndyaa Zuti. Catyi ra.

¹⁷ Tacuan ta i quisaha natuhun tahan ra i casi ra Jesús sihin tahan ra: ¿Ñaa tuhun cuu si sa catyi ra sihin yo? vatyí catyi ra: “Zuhva cuii ñi ca quívi ta ma ndyehe ca ndo sii, ta inga zuhva ca quívi ta cua nandyehé ndo sii vatyí cuhin nu ndyaa Zuti”. Catyi ra.

¹⁸ ¿Ñaa cuñi si catyi si sa catyi ra zuhva cuii ñi ca quívi? Ña cutuñi iñi yo ñaa tuhun cahan ra. Catyi ra i casi ra Jesús.

¹⁹ Ta i tuu iñi ra Jesús vatyí cuñi nducu tuhun ra sii ra, ta i catyi ra sihin ra: ¿Atu nducu tuhun ndo sii tahan ndo sa cuenda tuhun i catyi vatyí zuhva ñi ca quívi ta ma ndyehe ca ndo sii ta inga zuhva ca quívi ta cua nandyehé ndo sii?

²⁰ Sa ndisa ta sa ndisa catyi sihin ndo vatyí cua vacu xaan ndo ta cua coo xaan tucuihya iñi sii ndo, zoco ñiyívi ñuu ñiyívi ya, cua cuzíi xaan cuñi ñu. Ta cua nducuihya xaan iñi maa ndo, zoco cuee ca ta cua nduzíi xaan cuñi ndo.

²¹ Quívi sa cua cacu zehe minoo ñaha, ndyaa xaan ña tundoho vatyí sa saa cuhva cacu si. Zoco tatu sa yaha cacu zehe ña, ña nacohon ca iñi ña tundoho. Sa nduzíi cuñi ña vatyí i cacu minoo rayíi ñuu ñiyívi.

²² Ta maa ndo vityi, cuihya xaan cuñi ndo. Zoco cua ndyehi sii ndo inga saha, ta cua nduzíi xaan cuñi ndo. Ta yoñi cua cuu tyaa siyo sa zíi cuñi ndo.

²³ Ta quívi cuan, ma nducu tuhun ca ndo sii. Sa ndisa ta sa ndisa catyi sihin ndo, tandíhi sa cua caca ndo sii ra Ndyoo Zuti sihin zíví mi, cua cuhva ra sii si sii ndo.

²⁴ Nu vityi ta tañaha ca caca ndo sihin zíví mi. Caca ndo ta cua ñihi ndo, ta tacuan ta zíi xaan cua cuñi ndo.

I zahacanaa ra Jesús ziqui ñuu ñiyívi ya

²⁵ I quehin tuhun ya sihin ndo sihin minoo cuhva. Zoco cua saa cuhva ta ma cahan que sihin ndo sihin minoo cuhva. Cua catyi casi vehi sihin ndo cuhva iyo ra Ndyoo Zuti.

²⁶ Ta quívi cuan cua caca ndo sii ra Ndyoo sihin zíví. Ta ña catyi vatyí cua caca tahvi sii ra Ndyoo Zuti sa cuenda ndo

²⁷ vatyí zuun ñi maa ra Ndyoo Zuti cuñi xaan ra sii ndo vatyí cuñi xaan ndo sii, ta sino iñi ndo vatyí i quisi ndya nu ndyaa ra Ndyoo.

²⁸ Ndyá nu ndyaa ra Ndyoo Zuti i quite ta vasi ñuu ñiyívi. Ta cua zandoo tuqui ñuu ñiyívi ya ta cunanuhi nu ndyaa ra Ndyoo Zuti inga saha.

²⁹ Tacuan ta i catyi ra i casi ra sihin ra: Vityi casi vaha cohon, ta ña cahan con sihin minoo cuhva.

³⁰ Vityi sito ndi vatyí siton tandíhi, ta ña cuñi si sa nducu tuhun numinoo ra suun (vatyi sa siton tandíhi sa sica iñi ndi). Yucuan cuenda sino iñi ndi vatyí ndya nu ndyaa ra Ndyoo i quisun.

³¹ Ta i catyi ra Jesús sihin ra: ¿Atu sino iñi ndo vityi?

³² Sa cua saa cuhva, ta zuun ñi vityi cuu si, ta cua quití cuatyí ndo minoo minoo ndo ndya vehe ndo, ta cua zandoo ndo sii, maa tuhun ñi. Zoco ña maa tuhun ñi cua ndoo. Ndyaa ra Ndyoo Zuti sihin.

³³ I quehin tuhun ya sihin ndo vatyí tacuan ta cua coo sa taxi añima ndo sa cuenda mi. Ñuu ñiyívi ya cua ndyehe ndo tundoho, zoco ma yuhu ndo vatyí sa i zahacanei ziquí ñuu ñiyívi ya.

17

Sica tahvi ra Jesús sii ra Ndyoo cuenda ra i casi ra

¹ I cahan ra Jesús tuhun ya, ta ziquí i nandyehe ndaa ra ityi andívi ta catyi ra: Ndyoo Zuti, sa saa cuhva. Zacahnun sii zehun ta cuhva cua cuu zacahnu zehun suun.

² I sohon sa cundyaca ñehi ziquí tandíhi ñiyívi sa iyo ñuu ñiyívi, ta i sohon sa vatyí cuu cuhve sa cundito ñu tandíhi cuii tyiemvu, tandíhi ñu sa i sohon sii.

³ Ta ihya cuu cuhva cua cuu cundito ñu sihin, tatu nacoto ñu suun vatyí minoo tuhun ñi ra cuu Ndyoo sa ndisa cuii cuun. Ta sa nacoto ñu sii yuhvi ra Jesucristo, ra i tasun.

⁴ I zacahni suun ñuu ñiyívi ya. I zandíhi tyiño sa i sohon sii.

⁵ Ta vityí, Ndyoo Zuti, zacahnun sii nu ndyoon sihin cuhva sa sicoo sii, quívi i sindyei suhun indyacuan cumañi ca sino ñuu ñiyívi.

⁶ I zañehi sii ra i sohon sii, cuhva iyo moo. Sii moo cuu sii ra, ta i sohon sii ra sii, sisi ñuu ñiyívi ya. Ta i tyaa ra yahvi tuhun cahan moo.

⁷ Ta vityí sa sito ra vatyí tandíhi cuii sa i sohon sii, cuenda moo cuu si.

⁸ Vatyí tuhun sa i sohon sii, i zañehi sii ra ya, ta i naquihin vaha ra sii si. Ta sito ra sa ndisa cuii vatyí ndya nu ndyaa moo i quite. Ta sino iñi ra ya vatyí moo i tasi sii.

⁹ Sica tahvi suun sa cuenda ra ya. Ña sica tahvi cuenda tandíhi ñiyívi ñuu ñiyívi zoco cuenda ñiyívi sa i sohon sii, vatyí cuenda moo cuu sii ñu.

¹⁰ Ta tandíhi ñu cuu sii, sii moo cuu sii ñu. Ta ñu cuu suun cuu tucu sii mi, ndíhi ca. Ta zacahnu ñu sii.

¹¹ Ta vityí ma cundyaa que ñuu ñiyívi ya vatyí quisi nanuhin nu ndyaa moo. Zoco ra ya cua ndoo ra ñuu ñiyívi ya. Zuti, ra ii, zacuendon sii ñu sihin zivi moo, ñu i sohon sii, ta tacuan ta cua ndu-íin ñu tañi maa yo.

¹² Níi ñi sa ndyei sihin ra ya, i zacuende sii ra sihin zivi moo. I sicumi vehi sii ra ya, ta yoñi ra cua naa zoco minoo tuhun ñi ra cua naa tañi catyi Tuhun moo.

¹³ Zoco vityí cua quisi nu ndyoon. Ta níi ñi sa ndyei ñuu ñiyívi ya nacatyí tuhun ya, ta tacuan ta cua coo sa zii sii mi sihin ra ya, ta cua cuzii xaan iñi ra.

¹⁴ Sa i nacatyí Tuhun moo sihin ra, ta ña cuu ca ndyehe ñiyívi ñuu ñiyívi ya sii ra vatyí yivi ca cuenda ñuu ñiyívi ya cuu ra. Tañi mi yivi ra cuenda ñuu ñiyívi ya cui.

¹⁵ Ña sique suun sa tavon sii ra ñuu ñiyívi ya. Zoco sique suun sa vatyí cua zacuendon sii ra sisi sa ña vaha iyo ñuu ñiyívi ya coto ndoyo ñuhu ra.

¹⁶ Yivi ca cuenda ñuu ñiyívi ya cuu sii ra. Tañi mi yivi cuenda ñuu ñiyívi ya cui.

¹⁷ Zanduvaha con cuhva iyo ra sihin tuhun ndisa sii moo. Tuhun cahan moo, tuhun ndisa cuii cuu si.

¹⁸ Tañi i tasun sii mi ñuu ñiyívi ya, zuun ñi tacuan tasi sii ra ya ñuu ñiyívi.

¹⁹ Tyaa siye sii, sii sa ña vaha sa cuenda ra ya vatyí tacuan ta cua tyaa siyo tucu maa ra sii ra sii sa ña vaha ta cundyico ra sii, sa ndisa.

²⁰ Ña íin ñi sa cuenda ra ya sica tahvi, zoco ndya sa cuenda ñiyívi cua sino iñi sii sihin tuhun sa cua cahan ra ya.

²¹ Ta tacuan ta cua ndu-íin tandíhi ñu tañi maa yo vatyí íin ñi iyon sihin, ta íin ñi iye suhun, Ndyoo Zuti. Ta tacuan ta cua ndu-íin tucu maa ñu sihin yo. Ta tacuan ta cua sino iñi ñiyívi ñuu ñiyívi vatyí i zaquisun sii.

²² Ta sa vaha xaan sa sohon sii, i sehi sii ra ya vatyí ndu-íin ra tañi maa yo íin ñi cuu yo.

²³ Yuhvi ta ra ya ñin ñi cuu ndi tañi yoho sihin mi ñin ñi cuu yo, ta nandu-ñin maa ra minoo sa ndisa cuii vatyi tacuan ta cua coto ñiyivi ñuu ñiyivi vatyi moo i tasi sii ta cuñi xoon sii ra ya tañi cuñun sii.

²⁴ Ndyoo Zuti, cuñi sa vatyi ñiyivi sa i sohon sii, cua cundyaa ñu ñin ñi sihin mi nu cua cundyei, ta tacuan ta cua ndyehe ñu sa vaha xaan sa i sohon sii. Vatyi i cuñi xoon sii, cumañi ca sino ñuu ñiyivi.

²⁵ Ndyoo Zuti, ra ndoo xaan, ña nacoto ñiyivi ñuu ñiyivi ya suun, zoco yuhvi site suun, ta sito ra ya vatyi moo i tasi sii.

²⁶ Sa i zacote sii ra ya cuhva iyo moo, ta cua zacote cuaha ca sii ra. Tacuan ta cuhva cuñi xoon sii, cua coo si sisi añima ra, ta cua coo tucu yuhvi sisi añima ra.

18

Cuahan ra Jesús vehe caa

¹ Ta sa ndihi cahan ra Jesús tuhun ya, i quita ra sihin ra i casi ra ta cuahan ra inga siyo yuu sa nañi Cedrón ndya minoo nu iyo cuaha xaan yutu ta ita. Ta yucuan i quihvi ra sihin ra i casi ra.

² Ta ra Judas, ra sa xico tuhun sii ra Jesús, sa sito tucu maa ra nu cuahan ra vatyi tuhva xaan ra Jesús sahan yucuan sihin ra i casi ra.

³ Tacuan ta sa quihin ra Judas minoo ityi zandaru ta cuaha xaan policia cuenda ra zutu nahnu ta ra fariseo, ta cuahan ra sihin lámpara ta yiti ta sihin ndaha tyiño xaan.

⁴ Ta sa sito ra Jesús tandihi tundoho sa cua tahan ra. Ta xihna ca maa ra i quita, ta i nducu tuhun ra sii ra sa vasi cuan: ¿Yoo sii nanducu ndo?

⁵ Ta i nacahan ra ta catyi ra: Sii ra Jesús, ra ñuu Nazaret. Tacuan ta i catyi ra Jesús: Zuun yuhvi cui. Catyi ra. Ta ndihi ra Judas sihin ra cuan. Maa ra cuu ra i xico sii ra Jesús.

⁶ Ta zuun ñi caa cuhva sa i catyi ra Jesús sihin ra: “Zuun yuhvi cui”, ta i sica sata tandihi ra cuan, ta i nduva tandihi cuii ra nu ñuhu.

⁷ Tacuan ta i nducu tuhun ra Jesús sii ra inga saha: ¿Yoo sii nanducu ndo? Ta i catyi ra cuan: Sii ra Jesús, ra ñuu Nazaret.

⁸ Ta i nacahan ra Jesús ta catyi ra: Sa catyi sihin ndo vatyi zuun yuhvi cui. Tatu sii mi nanducu ndo, cuatu ndo nacuhun xihna ra ndihi sihin ya. Catyi ra.

⁹ Tacuan cua cuu si, vatyi cua quita si tañi cuhva catyi Tuhun Ndyoo vatyi catyi si: “Ra sa i sohon sii, ña zacunei numinoo ra.”

¹⁰ Tacuan ta ziqui i tava ra Simón Pedro mityi sa ndyizo ra. Ta i cañi ra sii ra cu muzu sii ra cu nuu sii tandihi ra cu zutu, ta i sahdya ra zoho ra siyo cuaha ra. Malco nañi ra cu muzu cuan.

¹¹ Tacuan ta i catyi ra Jesús sihin ra Pedro: Natyuhun mityun sisi veno si. ¿Atu ña cuñun sa ndyehi tundoho sa saha Zuti sii?

Cuahan ra Jesús nu ndyaa ra cu nuu sii tandihi ra cu zutu

¹² Tacuan ta ziqui minoo ityi zandaru cuan, sihin ra cu nuu sii ra ta ra cu policia cuenda ra hebreo, i ñin ra sii ra Jesús, ta i sihni ra sii ra.

¹³ Ta sa xihna ñi i sindyaca ra sii ra ndya vehe ra Anás vatyi tyizo ra Caifás cuu sii ra. Ta ra Caifás cuu ra cu nuu sii tandihi ra cu zutu cuiya cuan.

¹⁴ Ta ra Caifás, zuun ñi ra cuu ra sa catyi sihin ra hebreo quivi cuan vatyi vaha ca nacuu minoo ñi ra sa cuenda tandihi, ta ma cuu tandihi ñiyivi.

I catyi ra Pedro vatyi ña sito ra sii ra Jesús

¹⁵ Ta i sindyico ra Simón Pedro sii ra Jesús, ta tacuan tucu inga ra. Sito ra mandoñi sahanu Anás sii inga ra cuan, ta yucuan cuenda i cuu quihvi ra sihin ra Jesús ndya yuvehe ra cu nuu sii tandihi ra cu zutu.

¹⁶ Zoco i ndoo ra Pedro sata nuzama. Tacuan ta ziqui i quita inga ra. Sa sito ra cu nuu sii tandihi ra cu zutu sii ra cuan. I cahan ra cuan sihin ñaha zacuenda yuvehe, ta i cuu quihvi ra Pedro.

¹⁷ Ta ñaha sa zacuenda yuvehe cuan, i catyi ña sihin ra Pedro: ¿Atu yivi minoo ra ndyico sii ra cuan cuun? Ta i catyi ra Pedro: Yivi ra cui.

¹⁸ Ta yucuan yucu muzu ta tandihi ra policia. Sa zatahan ra ñúhu vatyí visi xaan, ta yucuan ndyaa ra yunuhu. Tuhva ra Pedro ta nandyaa ra sihin ra.

I nducu tuhun xaan ra Anás sii ra Jesús

¹⁹ Tacuan ta ziqui i nducu tuhun xaan ra mandoñi sahnu, ra Anás, sii ra Jesús yoo ra ndyico sii ra, ta ñaa sa zacuaha ra.

²⁰ Ta i nacahan ra Jesús, ta catyi ra sihin ra: I quehin ityi nuu tandihi ñiyivi. I zacuehi sisi vehe ñuhu tahan ñuu ta sisi vehe ñuhu cahnu ihya nu titahan tandihi ñiyivi hebreo. Ta ñahñi maa sa nacatyí xehi.

²¹ ¿Ñaa cuenda nducu tuhun sii? Nducu tuhun sii ñiyivi i siñi ñaa sa nacatyí sihin ñu. Sito maa ñu ñaa sa nacatyí sihin ñu.

²² Ta sa ndihi cahan ra Jesús tacuan, ta minoo ra cu policia sa ndyaa vatyí ñi i cati ra sii ra Jesús sihin ndaha ra ta catyi ra: Ña tacuan tahan si cohon sihin ra mandoñi sahnu.

²³ Ta i nacahan ra Jesús ta catyi ra: Tatu i quehin ndya vaha ñi, catyun ñaa sa ña vaha quehin. Zoco tatu vaha quehin ¿ñaa cuenda catun sii? Catyi ra.

²⁴ Tacuan ta i tasi ra Anás sii ra Jesús zoco nuhñi ra ndya nu ndyaa ra Caifás, ra cu nuu sii tandihi ra cu zutu.

I catyi ra Pedro inga saha vatyí ña sito ra sii ra Jesús

²⁵ Ta nandyaa ra Simón Pedro yunuhu. Tacuan ta ziqui i catyi ñiyivi sihin ra: ¿Atu yivi minoo ra ndyico sii ra cuan cuun? Ta i catyi ra Pedro: Yivi ra cui. Catyi ra.

²⁶ Minoo muzu ra cu zutu ya cahnu cuu ñiyivi sii ra i sahndya ra Pedro zoho, ta i catyi ra cuan sihin ra Pedro: ¿Atu yivun i ndyehi sihin ra cuan yucuan nu iyo cuaha xaan yutu?

²⁷ Ta i catyi ra Pedro inga saha vatyí yivi. Ta zuun ñi caa cuhva cuan i sacú saa ndivi tyahnu.

Cuahan ra Jesús nuu ra Pilato

²⁸ Tacuan ta i sindyaca ra sii ra Jesús nu ñoho ra vehe ra Caifás ndya vehe tyiño cuenda ra gobernador. Ta nu ñaha ñi cuu si. Ta ñá quihvi ra hebreo sisi vehe tyiño vatyí yivi vehe hebreo cuu si, ta catyi ley hebreo vatyí tatu cua quihvi ra, cua nducuxi caa ra, ta ma cuu ca cuxiñi ra sisi vico zuhun.

²⁹ Yucuan cuenda i quita ra Pilato ityi sata nu yucu ra cuan, ta catyi ra: ¿Ñaa cuatyí tyaa ndo sata ra ya? Catyi ra.

³⁰ Ta i nacahan ra ta catyi ra: Tatu yivi ra iyo cuatyí cuu ra, ma nacuhva ndi sii ra suun.

³¹ Tacuan ta i catyi ra Pilato sihin ra: Quihin maa ndo sii ra ta tyicuhva ndo sii ra cuhva catyi ley maa ndo. Ta i catyi ra hebreo sihin ra: Ña catyi ley ndi sa cahñi ndi numinoo ñiyivi. Catyi ra.

³² Tacuan cua cuu si ta cuhva cua quita si cuhva catyi ra Jesús yozo caa cua cuu ra.

³³ Tacuan ta ziqui i nandihvi ra Pilato sisi vehe tyiño, ta i cana ra sii ra Jesús naquisi ra nu ndyaa ra, ta i catyi ra sihin ra: ¿Atu rey cuenda ñiyivi hebreo cuun?

³⁴ Ta i nacahan ra Jesús ta catyi ra: ¿Atu cohon cuhva sa sica ñi iñi moo a sa iyo ñiyivi nacatyí suhun?

³⁵ Ta i nacahan ra Pilato ta catyi ra: Yivi ra hebreo cui. Zuun ñi ñiyivi ñuu moo sihin ra zutu nahnu i quisi ndyaca suun sii. ¿Ñaa sa zacuun?

³⁶ Ta i nacahan ra Jesús ta catyi ra: Nu ndyaca ñehi, yivi ñuu ñiyivi ya cuu si. Vatyí tatu cuñi cundyaca ñehi ihya, cua cahñi tahan ra ndyico sii, ta ma cuhva ra sii, sii ñiyivi hebreo. Zoco nu ndyaca ñehi, yivi ñuu ñiyivi ya cuu si.

³⁷ Tacuan ta i catyi ra Pilato sihin ra: Vaziqui minoo rey cuun. Ta i catyi ra Jesús: Zuun cui cuhva catyun. Yucuan cuenda i caqui ta vasi ñuu ñiyivi ya vatyí cua cuu cuhve sa ndaa sa cuenda sa ndisa. Ta tandihi ñiyivi zavaha sa vaha, tyaa ñu yahvi sa quehin.

³⁸ Ta i catyi ra Pilato sihin ra Jesús: ¿Ñaa sa cuu sa ndisa? Ta sa catyi ra tacuan ta i quita tucu ra ndya ityi sata nu yucu ñu hebreo, ta i catyi ra sihin ñu: Ñahñi maa cuaty i ra iyo caña ñi.

³⁹ Ta iyo minoo costumbre sii maa ndo sisi vico zuhun vaty i cua zañe sii minoo ra ñoho vehe caa. ¿Atu cuñi ndo vaty i zañe sii ra cu rey cuenda ñiyivi hebreo?

⁴⁰ Ta i cana saa ñiyivi ta catyi ñu: Yivi ra ihya zañon. Zañon sii ra Barrabás. Catyi ñu. Ta ra Barrabás cuan, ra zuhu cuu ra cuan.

19

¹ Ta yucuan cuenda i quihin ra Pilato sii ra Jesús, ta i saha ra sa cañi xaan zandaru sii ra.

² Ta i quihin zandaru iñu, ta zavaha ra minoo corona, ta i tyihi ra sii si xiñi ra Jesús. Ta i tyihi ra minoo zahma cañi tyacu zahma tixinda sii ra.

³ Ta i catyi zandaru: ¡Nacumi suun yoho rey, ra ndyaca ñaha cahnu sii ñiyivi hebreo! Ta i cati ra sii ra Jesús sihin ndaha ra. Ta i sacu ndyaa ra sii ra.

⁴ Tacuan ta ziqui i quita tucu ra Pilato inga saha ityi sata, ta i catyi ra sihin ñiyivi hebreo: Ndyehe ndo, vasi ndyaque sii ra sii ndo vaty i coto ndo vaty i ñahñi maa cuaty i ra iyo sa cuenda mi.

⁵ Ta i quita ra Jesús. Ñoho corona iñu xiñi ra ta ñoho ra zahma tyacu tixinda cuan. Ta i catyi ra Pilato sihin ñu: Ica ra ya.

⁶ Ta sa ndyehe ra zutu nahnu ta ra ndihi sihin ra sii ra Jesús, ta i cana saa ra ta catyi ra: Tyoon sii ra nu cruz. Tyoon sii ra nu cruz. Zoco i catyi ra Pilato sihin ra cuan: Quihin maa ndo sii ra ta tyaa ndo sii ra nu cruz tatu cuñi ndo, zoco sa cuenda mi ñahñi maa cuaty i ra iyo caña ñi.

⁷ Ta i nacahan ra hebreo ta catyi ra: Iyo minoo ley sii maa ndi, ta catyi si vaty i tahan si sa cuu ra vaty i catyi ra vaty i Zehe ra Ndyoo cuu sii ra.

⁸ Ta sa siñi ra Pilato cuhva catyi ñu, ta i yuhu ca ra.

⁹ Ta i nandihvi ra sisi vehe tyiño, ta i catyi ra sihin ra Jesús: ¿Ta ndyamaa i quisun? Zoco ñá cahan ra Jesús sa cahan ra.

¹⁰ Tacuan ta ziqui i catyi ra Pilato sihin ra: ¿Ñacu ña cohon sa quehin? ¿Atu ña siton vaty i iyo cuhva sii, ta cuu catyi vaty i cahñi ñiyivi suun nu cruz, ta cuu zañe suun?

¹¹ Ta i nacahan ra Jesús, ta catyi ra: Ñahñi maa sa cuu zavohon sihin tatu sa yivi ra Ndyoo i saha cuhva suun. Yucuan cuenda cahnu ca cuaty i ra saha cuenda sii suun.

¹² Ta sa ndihi cahan ra Jesús tacuan, ta i nducu ra Pilato cuhva zaña ra sii ra. Zoco i quisaha cana saa ra hebreo ta catyi ra: Tatu zañon sii ra ña, yivi amigo ra César cuun. Yoo ra catyi vaty i minoo rey cuu ra, cuñi ra quindyaa ra tyiño ra César.

¹³ Ta sa siñi ra Pilato cuhva cuan, ta ziqui i sindyaca ra sii ra Jesús ityi sata, ta i sicundyaa ra tyayu ra nu tuhva ra zandaa tyiño, nu nañi si Gabata sihin zahan hebreo. Ta cuñi si catyi si Nu Ndava.

¹⁴ Ta quivi sa zanduvaha ñiyivi cuenda vico zuhun i cuu si tañi maa ora, ta i catyi ra Pilato sihin ñiyivi hebreo: Ica rey ndo ya.

¹⁵ Tacuan ta ziqui i cana saa ñiyivi inga saha, ta catyi ñu: ¡Quihin ndo sii ra! ¡Quihin ndo sii ra! Tyaa ndo sii ra nu cruz. Ta i catyi ra Pilato sihin ñu: ¿Atu cuñi ndo sa cahñi sii rey ndo? Ta i nacahan ra zutu nahnu, ta catyi ra: Yoñi ca inga rey ndi. Maa ñi ra César.

¹⁶ Ta yucuan cuenda i saha cuenda ra Pilato sii ra vaty i cahñi ra sii ra nu cruz. Ta i quihin zandaru sii ra Jesús, ta cuahan ra sihin ra.

Nu i tyaa ra sii ra Jesús nu cruz

¹⁷ Ta ndyizo ra Jesús cruz ra cuahan ra sihin ra ndya nu nañi si Yiqui Xiñi Ndiy i. Ta sihin zahan hebreo nañi si Gólgota.

¹⁸ Ta yucuan i tyaa ra sii ra nuu cruz sihin clavo. Ta inga uu tahan ra, minoo ra siyo cuaha ta minoo ra siyo zaty i ra Jesús, ta ra Jesús mahñu.

¹⁹ Ta i tyaa ra Pilato minoo zivi, ta i catyi ra vatyi cundyaa si xiñi cruz cuan ta catyi si: “Ra Jesús ñuu Nazaret, rey cuenda ñiyivi hebreo cuu ra.”

²⁰ Cuaha xaan ra hebreo i cahvi tuhun sa ndyaa xiñi cruz cuan. Vaty nu sihi ra Jesús, yaty ndyaa si yuhu ñuu. Ta tuhun sa ndyaa xiñi cruz cuan, ndyaa si sihin zahan hebreo, zahan griego ta zahan latín.

²¹ Ta ra zutu nahnu i catyi ra sihin ra Pilato: Ma tyoon: “Rey cuenda ñiyivi hebreo.” Tyoon vaty maa ra catyi vaty rey cuenda ñiyivi hebreo cuu ra.

²² Zoco i nacahan ra Pilato: Cuhva i tyei, sa ndyaa si.

²³ Ta sa yaha i tyaa zandaru sii ra Jesús nu cruz, ta i quihin ra zahma ra. Sa cumi tahan ra i quihin ra minoo minoo si. Ta minoo zahma cañi sa ndisi ra, i cacu si ñin ñi; ñahñi nu i ndicui ñu sii si.

²⁴ Yucuan cuenda i catyi zandaru sihin tahan ra: Ma ndata yo sii si. Nacuziqui yo, ta cua ndyehe yo yoo ra cua zahacanaa. Catyi ra. Ta kuhva ya i quita si kuhva catyi Tutu ra Ndyoo:

I zasa ra zahme sii tahan ra,
Ta i siziqui ra yoo ra cua ñihi zahma cañi vii.

Ta tacuan i zavaha zandaru.

²⁵ Ta nandyaa zihhi ra Jesús yaty ñi saha cruz nu ndyaa ra Jesús nu cruz. Ta nandyaa tucu cuhu ña ta ña María ñazihhi ra Cleofas ta ña María Magdalena tucu.

²⁶ Ta sa ndyehe ra Jesús vaty yaty nandyaa zihhi ra ta minoo ra i casi ra, ra sa cuñi xaan ra, ta i catyi ra Jesús sihin zihhi ra: Ndy vityi, ra ihya cua cuu zehun. Catyi ra.

²⁷ Ta ziqui i catyi ra sihin ra i casi ra: Ta maa ña cua cuu zihun. Ta ndya kuhva cuan i quihin ra sii ña, ta cuahan ña vehe ra.

²⁸ Ta sa yaha cuan, ta ziqui i sito ra Jesús vaty sa i zavaha ra tandihhi ta sa i cuu tandihhi kuhva catyi si nuu Tutu ra Ndyoo. Ta ziqui i catyi ra: Ityi xein.

²⁹ Ta yaty ñi yucuan nandyaa minoo quizi situ cuii ndutya iya. Ta i zatyii zandaru minoo sa ñahma, ta i tyaa ra sii si minoo nuu zoco yutu sa nañi hisopo, ta i tyiña ra sii si yuhu ra Jesús.

³⁰ Ta sa i sihi ra Jesús ndutya iya cuan, ta ziqui i catyi ra: Sa ndihhi tyiño. Ta i nacañi noo ra xiñi ra, ta i nacuhva cuenda ra aña ra.

I tusi minoo zandaru minoo caa xaan xiin ra Jesús

³¹ Cumañi minoo ñi ca quivi ta cua cuu si quivi cahnu sisi vico zuhun cuenda ñiyivi hebreo. Ñá cuñi ra hebreo sa ndoo coño ñuhu cuan nu cruz quivi quitatu ñiyivi vaty cahnu xaan quivi zacuu ñiyivi quivi cuan sa cuenda vico zuhun. Yucuan cuenda i sica ra tumañi iñi sii ra Pilato vaty kuhva ra sa cahnu zandaru yiqui ndoo ra sa ndyaa nu cruz. (Ta sa ndihhi sahnua ra yiqui ndoo ra cuan ta yaty ca cua cuu ra.) Ta cua cuu tyaa siyo ra sii ra.

³² Tacuan ta i saa zandaru, ta i sahnua ra yiqui ndoo minoo ra ta inga tucu ra sa ndyaa inga nu cruz.

³³ Zoco sa saa ra nu ndyaa ra Jesús ta i ndyehe ra vaty sa sihi ra, ta ñá sahnua ca ra saha ra.

³⁴ Zoco i tusi minoo zandaru minoo caa xaan xiin ra Jesús, ta i quita ñiñi ta ndutya.

³⁵ Ta minoo ra i ndyehe, saha ra sa ndaa, ta sa ndisa cahan ra. Sito maa ra vaty sa ndisa cuu sa cahan ra. Ta nacaty ra sii si vaty cua cuu sino tucu iñi maa ndo.

³⁶ Ta kuhva cuan i cuu tandihhi si vaty cua quita si tañi catyi Tutu ra Ndyoo nu catyi si: “Ma cahnu ñiyivi numinoo yiqui ra.”

³⁷ Ta inga tucu nu tutu ra Ndyoo catyi si: “Cua ndyehe ñiyivi sii ra kuhva cua quihvi minoo caa xaan xiin ra.”

I tyihi ra sii ra Jesús sisi ñaña

³⁸ Ta sa yaha cuan, ta ziqui i quisi ra José ra ñuu Arimatea. Sino iñi ra sii ra Jesús, zoco xehe ñi vaty yuhu ra sii ra hebreo. Ta i sica ra tumañi iñi sii ra Pilato vaty cuu quihin ra coño ñuhu ra Jesús. Ta i saha ra Pilato. Ta ziqui i sahan ra, ta i quihin ra coño ñuhu ra Jesús.

³⁹ Ta i quisi tucu ra Nicodemo, ra sa sahan sa xihna ñi nu ndyaa ra Jesús minoo sa cuaa. Ndaha ra cuaha xaan azetye vixi. Nazaca si sihin mirra ta áloe. Tañi minoo oco usi kilo si.

⁴⁰ Tacuan ta ziqui i quihin ra José ta ra Nicodemo coño ñuhu ra Jesús, ta i cava noo ra zahma sa cahyu ra azetye vixi cuan cuhva iyo costumbre ñiyivi hebreo tatu cua tyihi ñu sii minoo ñiyivi sisi ñaña.

⁴¹ Ta yatyi nu i sihi ra Jesús nu cruz sicoo cuaha xaan yutu tyaqui, ta yucuan sicoo minoo ñaña sa ta yoñi ca cutyiño.

⁴² Ta yucuan i tyihi ra sii ra Jesús vatyi yatyi ñi ndyaa si. Ta sa cua cuu si quivi quitatu ñiyivi hebreo.

20

I nandoto ra Jesús

¹ Ta quivi tumingu ñaa ca i saa ña María Magdalena ndya ñaña, ta i ndyehe ña vatyi sa siñi siyo yuu sa sindazi yuñaña cuan.

² Tacuan ta ziqui i sino xaan ña ndya nu ndyaa ra Simón Pedro ta inga ra sa cuñi xaan ra Jesús, ta i catyi ña sihin ra: Sa sitava ñiyivi coño ñuhu ra Jesús sisi ñaña cuan, ta ña sito yo ndyamaa i natyihi ñu sii si.

³ Yucuan cuenda i quita ra Pedro ta inga ra ta cuahan ra ndya ñaña.

⁴ Nduu tahan ra i cacono ra, zoco ñihi xaan ca sino inga ra ta ziqui ra Pedro, ta xihna ca ra cuan i saa ñaña.

⁵ Ta i ndyehe noo ra sisi ñaña, ta i ndyehe ra zahma sa i cava noo sii ra Jesús; catuu si nu ñuhu, zoco ñá quihvi ra.

⁶ Ta ziqui i saa ra Simón Pedro, ta i quihvi ra sisi ñaña, ta i ndyehe ra zahma sa i cava noo sii ra Jesús; catuu si.

⁷ Ta zahma luhlu sa ñoho xiñi ra Jesús, ña ñin ñi catuu si sihin inga zahma cuan. Nacuiñi tahnú vaha si, ta catuu ziin si.

⁸ Tacuan ta ziqui i quihvi tucu inga ra sa saa sa xihna ñi. Ta i ndyehe ra. Ta i sino iñi ra.

⁹ Zoco tañaha ca coto ra vatyi catyi Tuhun Ndyoo vatyi ndyaa si sa cua nandoto tucu ra Jesús sa sa i sihi ra.

¹⁰ Tacuan ta i quita ra i casi ra Jesús, ta cua nuhu ra ndya vehe ra.

I quituu ra Jesús nuu ña María Magdalena

¹¹ Ta i nasaa ña María ndya ñaña, ta sa nandyaa ña yuhu ñaña, ta cuihya xaan i cuñi ña, ta i sacú xaan ña. Ta cuhva sa sacú ña, ta i nandyehé noo ña sisi ñaña.

¹² Ta i ndyehe ña uu tahan ángel sa ñoho zahma cuisí. Minoo ra ndyaa ityi nu sicaa xiñi ra Jesús, ta inga ra ityi nu i sicaa saha ra nu sicaa coño ñuhu ra.

¹³ Ta i catyi ángel sihin ña: Maha, ¿ñacu sacú xoon? Ta i catyi ña: Vatyi i quihin ñiyivi coño ñuhu ra Jesús, ta ña site ndyamaa i tyihi ñu sii si.

¹⁴ Ta sa ndihi cahan ña tacuan, ta i nasico cava ña, ta ndyehe ña sii ra Jesús nandyaa ra. Zoco ñá nacoto ña tatu zuun ra cuu ra.

¹⁵ Ta i catyi ra Jesús sihin ña: Maha, ¿ñacu sacú xoon? ¿Yoo sii nanducun? Ta ña María sica iñi ña vatyi ra zacuenda yucuan cuu ra cahan, ta i catyi ña sihin ra: Tata, tatu yoho i quihin coño ñuhu ra ya, nacatyun sihin ndyamaa i tyuhun sii si vatyi cua naquihin sii si.

¹⁶ Tacuan ta ziqui i catyi ra Jesús sihin ña: María. Ta i nandyehé vaha ña sii ra, ta i catyi ña sihin ra: ¡Rabboni! Zahan hebreo cuu si cuan, ta cuñi si catyi si Maestro.

¹⁷ Ta i catyi ra Jesús sihin ña: Ma tiun sii vatyi tañaha ca nandaa xique ndya nu ndyaa Zuti. Zoco cuahan nu ndyaa tandihi ra sa cuñi xein, ta nacatyun sihin ra vatyi cuehin nu ndyaa Zuti, ta Zutu tucu maa ndo cuu sii ra. Ta nu ndyaa Ndyoo mi, ta Ndyoo tucu maa ndo.

¹⁸ Ta ziqui cuahan ña María Magdalena nu yucu ra i casi ra Jesús, ta i nacatyí ña sihin ra vatyi sa i ndyehe ña sii ra Jesús ta i cahan ra tuhun cuan sihin ña.

Cahan ra Jesús sihin ra i casi ra

¹⁹ Tacuan ta ziqui zuun ñi quivi tuingu cuan sa sahiñi i siyucu ra i casi ra Jesús ñin ñi, ta ndazi cutu yuvehe vatyí yuhu ra sii ra hebreo, ta i quisi ra Jesús ta i sicuñi ndyaa ra mahñu, ta catyí ra sihin ra: Nacoo sa vaha sii ndo.

²⁰ Ta sa yaha catyí ra tacuan, ta ziqui i zañaha ra ndaha ra ta xiin ra. Ta zii xaan i cuñi ra i casi ra sa i ndyehe ra sii ra Jesús.

²¹ Tacuan ta i catyí ra Jesús sihin ra inga saha: Nacoo sa vaha sii ndo. Tañi sa tasi Ndyoo Zuti sii, sihin tyiño ra, zuun ñi cuhva cuan cua tasi sii maa ndo.

²² Ta sa ndihi catyí ra tacuan, ta i tivi ra tatyí ra sii ra, ta catyí ra sihin ra: Naquihin ndo Tatyí li.

²³ Yoo sii cuatyí cua zandasi ndo, cua ndasi si sa ndisa. Ta yoo sii cuatyí ma zandasi ndo, ma ndasi cuatyí ñu. Catyí ra.

Ñihi xaan iñi ra Tomás

²⁴ Ta ra Tomás minoo sa usi uu tahan ra i casi ra Jesús cuu ra. Nañi tucu ra Dídimó. Ta yoñi ra ndyaa cuhva sa quisi ra Jesús.

²⁵ Ta i nacatyí inga ra i casi ra Jesús sihin ra: I ndyehe ndi sii ra Jesús. Zoco i catyí ra Tomás sihin ra: Tatu ma ndyehi nu cahvi ndaha ra nu i quihvi clavo ta tyihi nu ndehi yucuan, ta tatu ma ndyehi xiin ra nu quihvi caa xaan ta tyihi ndehi yucuan, ma sino iñi. Catyí ra.

²⁶ Ta yaha uña quivi, ta ziqui ñoho ndazi tucu ra i casi ra Jesús, ta ndyaa ra Tomás sihin ra. Ta ndazi cutu yuvehe, zoco i quihvi ra Jesús ta i sicuñi ndyaa ra mahñu, ta i catyí ra: Nacoo sa vaha xaan sii ndo.

²⁷ Ta ziqui i catyí ra sihin ra Tomás: Zatumvon ndohon ta tyuhun nu ndohon ndehi, ta zatumvon ndohon ta tyuhun sisi xiin. Ta ma cuu con minoo ra ña sino iñi, zoco sino iñun. Catyí ra.

²⁸ Tacuan ta i catyí ra Tomás sihin ra: Moo cuu ra ndyaca ñaha sii. Ta moo cuu Ndyoo sii.

²⁹ Ta i catyí ra Jesús sihin ra: Tomás, sa i ndyehun sii, ta yucuan cuenda sino iñun. Vaha xaan ca ñiyivi ma ndyehe sii, ta sino iñi ñu.

Iyo cuenda sa vatyí iyo libro ya

³⁰ Ta iyo cuaha xaan inga sa ndyityi i zavaha ra Jesús nuu ra i casi ra, ta ña ndyaa si nuu libro ya.

³¹ Zoco i tyei zuhva si ihya vatyí cua cuu sino iñi ndo vatyí ra Jesús cuu ra Cristo, zehe ra Ndyoo. Ta sihin sa sino iñi ndo, cua ñihi ndo sa cacu ñima ndo tandihi cui tyiemvu sa cuenda maa ra.

21

Cahan ra Jesús sihin usa tahan ra i casi ra

¹ Ta sa yaha tandihi cuhva cuan, ta ziqui ihya cuu cuhva i cahan tucu ra Jesús inga saha sihin ra i casi ra yumiñi sa nañi Tiberias.

² Ñin ñi tayucu ra Simón Pedro sihin ra Tomás, ra nañi Dídimó, ta ra Natanael, ra ñuu Caná nu cu si Galilea, ta zehe ra Zebedeo ta inga uu tahan ra i casi ra Jesús.

³ Ta i catyí ra Simón Pedro sihin inga ra: Cuehin cua tiin tyiyaca. Ta i catyí inga ra sihin ra: Cua cuhun tucu maa ndi suhun. Ta cuahan ra, ta i quihvi ra minoo barco. Zoco ñahñi maa tyiyaca i ñihi ra sa cuaa cuan.

⁴ Ta cuhva sa vasi cundisi, sicuñi ndyaa ra Jesús nu ñiyiti, zoco ñá nacoto ra vatyí ra Jesús cuu ra.

⁵ Ta ziqui i catyí ra Jesús sihin ra: Zehe luhli, ¿atu ñahñi tyiyaca i ñihi ndo? Ta i catyí ra: Yoñi ti.

⁶ Ta i catyí ra Jesús sihin ra: Cañi ndo taraya ndo siyo cuaha, ta cua ñihi ndo. Ta i cañi ra sii si, ta ziqui ñá cuu ca tava ra taraya ra vatyí cuaha xaan tyiyaca ñoho.

⁷ Ta ra sa cuñi xaan ra Jesús i catyi ra sihin ra Pedro: Ra Jesús cuu ra. Ta sa siñi ra Simón Pedro vaty i ra Jesús cuu ra, ta i nazucu ra zahma ra sii ra vaty sa i tava ra sii si sa cua tiin ra tyiyaca. Ta i quihvi ra nu miñi.

⁸ Ta i quisi inga ra sihin barco luhlu. Xita ra taraya sa ñoho tyiyaca vaty ña sica ndyaa yuhu miñi tañi minoo ziendu metro ñi.

⁹ Ta sa i quita tandihi ra nu ñuhu, i ndyehe ra tuñuhu, ta yucuan catuu minoo tyiyaca ta pan tucu.

¹⁰ Ta i catyi ra Jesús: Quisi ndyaca ndo zuhva ca tyiyaca sa naca tiin ndo.

¹¹ Ta i sahan ra Simón Pedro ndya nu ndyaa barco, ta xita ra taraya tyiyaca nahnu cuan ndya nu ñiyiti. Ziendu uu xico usi uñi tahan ti ñoho, ta ñá tahndya taraya vazu cuaha xaan ti.

¹² Ta i catyi ra Jesús sihin ra: Ñaha ndo vaty curumuza ndo. Ta yoñi ra cuñi nducu tuhun sii ra Jesús yoo ra cuu ra vaty sa sito ra vaty ra Jesús cuu ra.

¹³ Ta i sahan ra Jesús, ta i quihin ra pan, ta i saha ra sii si sii ra. Ta tacuan tucu tyiyaca.

¹⁴ Ta ihya cuu sa cu uñi tahan saha i cahan ra Jesús sihin ra i casi ra ta sa yaha sa nandoto ra sisi sa i sihi ra.

Zacuendon mvee ticaty zone

¹⁵ Ta sa yaha i curumuza ra, ta i catyi ra Jesús sihin ra Simón Pedro: Simón, zehe ra Jonás, ¿atu cuñi xaan con sii ta ziqui ca inga ra ya? Ta i catyi ra Pedro sihin ra: Avi, tata, sa siton vaty cuñi suun. Ta i catyi ra Jesús: Cuhvon sa casi mvee ticaty lee zone.

¹⁶ Ta ziqui i catyi ra Jesús sihin ra inga saha: Simón, zehe ra Jonás, ¿atu cuñi xoon sii? Ta i catyi ra Pedro: Avi, tata, sa siton vaty cuñi suun. Ta i catyi ra Jesús sihin ra: Zacuenda vohon sii mvee ticaty zone.

¹⁷ Ta ziqui i catyi ra Jesús sihin ra sa cu uñi saha: Simón, zehe ra Jonás, ¿atu cuñun sii? Ta cuihya xaan i cuñi ra Pedro vaty sa i nducu tuhun ra Jesús sii ra sa cu uñi tahan saha: ¿Atu cuñun sii? Ta i catyi ra sihin ra: Tata, sa sito moo tandihi cuii. Siton vaty cuñi suun. Ta i catyi ra Jesús sihin ra: Cuhvon sa casi mvee ticaty zone.

¹⁸ Sa ndisa ta sa ndisa catyi suhun vaty quivi i culuhlun ta i cuu ndihvun zahmon maa tuhun ñun, ta sohon ndyamaa cuñun cuhun. Zoco quivi cua cusahnun cua zandundoon ndohon, ta inga ra cua natyihi ra zahmon suun. Ta cua cundyaca ra suun nu ña cuñun cuhun. Tacuan i catyi ra Jesús sihin ra Pedro.

¹⁹ Ta sa i catyi ra Jesús tuhun cuan, i saha ra cuhva cutuñi iñi ra yozo caa cua tahan si sii ra Pedro sa cua cuu ra, ta cua zacahnu ra sii ra Ndyoo cuhva cuan. Ta sa ndihi cahan ra Jesús tacuan, ta i catyi ra sihin ra: Cundyicon sii.

Minoo ra i casi ra Jesús, ra sa cuñi xaan ra

²⁰ Tacuan ta ziqui i nandyeha sata ra Pedro, ta i ndyehe ra vaty ndyico inga ra i casi ra Jesús, ra sa cuñi xaan ra Jesús. Zuun ra cuu ra sa nañaa sii ra Jesús minoo sa cuaa nu cua cuxiñi ra nu i nducu tuhun ra sii ra Jesús: ¿Yoo ra cua xico tuhun suun?

²¹ Ta sa ndyehe ra Pedro sii ra cuan, ta i nducu tuhun ra sii ra Jesús: Tata, ¿ta ñaa sa cua cuu sii ra ya?

²² Ta i catyi ra Jesús sihin ra: Tatu cuñi vaty ndoo ra ñuu ñiyivi ndya quivi cua quisi ¿ta ñaa sa cuenda oo? Yoho cundyicon sii. Catyi ra.

²³ Yucuan cuenda i quita tuhun ya, ta i sica iñi tandihi ñiyivi sino iñi vaty i catyi ra Jesús vaty ma cuu ra cuan, zoco ñá catyi ra Jesús sa ma cuu ra. I catyi ra: “Tatu cuñi vaty ndoo ra ndya quivi cua quisi ¿ta ñaa sa cuenda oo?”

²⁴ Ta zuun ñi maa ra cuu ra saha sa ndaa sa cuenda tuhun ya. Ta sito ndi vaty ndisa cuii sa ndaa sa saha ra.

²⁵ Ta iyo cuaha xaan ca sa i zavaha ra Jesús. Ta sica iñi vaty tatu cua tyaa ñiyivi sii si minoo minoo si, ma cutahan tandihi libro nu sisi ñuu ñiyivi. Ndihi si vityi.

Hechos

I catyi ra Jesús vatyí cua tasi ra Tatyí Ii ra Ndyoo

¹ Ta quiví cuan i tyei minoo carta suun Teófilo. Ta yucuan carta saha cuenda tandíhi sa i zavaha ra Jesús ta tandíhi sa zacuahá ra ndya casaha zatyíño ra cuhva

² ndya quiví i ndaa xica ñi ra ta cuahan ra gloria. Zoco cuee ca sa cuhun ra gloria ta sihin cuhva iyo sii Tatyí Ii ra Ndyoo i tahvi ra Jesús tyiño nuu sa usi ñin tahan ca ra apóstol vatyí nacatyí ra tuhun ra Jesús.

³ Ta ziquí i sihi ra Jesús ta sa yaha i sihi ra ta zuun ñi maa ra Jesús i quituu nuu ra apóstol. Uu xico quiví i quituu ra tacuan, ta cuhva cuan i sito ñiyiví vatyí ndisa cuii i nandoto tucu ra. Ta i zacuahá ra sii ra yozo caa ndyaca ñaha ra Ndyoo.

⁴ Ta sa ndyaa ra Jesús sihin ra i catyi ra sihin ra vatyí ma quita ra ñuu Jerusalén. Cua cuatu ra sii sa i cahan ra Ndyoo Zutu yo tuhun vatyí catyi ra Jesús sihin ra:

⁵ Sa catyi sihin ndo vatyí ndisa cuii i zaco ndutya ra Juan sihin ndutya, zoco ña cuaha ca quiví ta cua coo ndutya ndo sihin Tatyí Ndyoo.

Cuahan ra Jesús ityi ziquí

⁶ Tacuan ta quiví i titahan tucu ra Jesús sihin ra apóstol i ndaca tuhun ra cuan sii ra Jesús ta catyi ra: Tata, ¿atu sa cua cuhva tucun sa cundyaca ñaha ñiyiví hebreo tata maa ndi?

⁷ Ta i catyi ra Jesús sihin ra: Ma coto maa ndo ñaa quiví a ñaa yoo cua cundyaca ñaha tucu ñiyiví hebreo. Maa ñi maa ra Ndyoo Zutu yo tahan si coto cuhva cuan.

⁸ Zoco cua ñihi ndo tundyee ñhi sii ra Ndyoo vatyí cua noo xica Tatyí Ii sii ndo, ta cua cahan ndo sa cuenda mi ñuu Jerusalén, nacahnu Judea ta nacahnu Samaria ta nacahnu ñuu ñiyiví.

⁹ Ta sa ndíhi cahan ra Jesús tacuan ta zuun ñi cuhva cuan i ndyehe ra apóstol vatyí i ndaa xica ñi ra Jesús ityi andiví, ta i tyazi minoo vico nu cuahan ra. Ta ñá ndyehe ca ra apóstol cuan sii ra.

¹⁰ Ta zuun ñi cuhva sa ndyehe ra sa i ndaa ra ityi andiví ta nu yucu ra i quituu uu tahan ra yoco ñoho ra zahma cuii.

¹¹ Ta i catyi ra yoco cuan sihin ra: Ndoho ra ñuu Galilea, ¿ñacu ndyehe xaan ndo ityi ziquí? Cuahan ra Jesús gloria, ta zuun ñi cuhva cuahan ra cua quisi tucu ra.

Naquihin ra Matías tyiño i sindyizo ra Judas

¹² Tacuan ta ziquí i quita ra apóstol yucu Olivos cuan. Cuahan ra ñuu Jerusalén. Yatyí ñi ndyaa yucu cuan sihin ñuu Jerusalén, tañi zava ora.

¹³ Ta sa saa ra yucuan, i quihvi ra minoo vehe toto ndya ziquí vatyí yucuan ndyaa ra. Ra Pedro ta ra Juan, sihin ra Jacobo ta ra Andrés ta ra Felipe. Ra Tomás ta ra Bartolomé ta ra Mateo sihin ra Jacobo, zehe ra Alfeo. Ta ra Simón Zelote ta ra Judas yañi ra Jacobo.

¹⁴ Tandíhi quiví i sica tahvi ra sii Ndyoo yucuan ñin ñi sihin ña María zihí ra Jesús sihin inga ñu zihí ta sihin yañi ra.

¹⁵ Ta minoo quiví i titahan cuaha xaan ñiyiví tañi ziendu oco ñu, ta i nduvita ra Pedro (mahñu ñiyiví cuan) ta i catyi ra:

¹⁶ Ndoho yañi xaa, i cuñi si sa natahan si cuhva sa i catyi Tuhun Ndyoo nu i cahan ra David i zacuu Tatyí Ii ta saha cuenda ra sa cuenda ra Judas, ra i zañaha sii ra Jesús sii ra cua tiin sii ra.

¹⁷ Ta ra tahan yo i cuu sii ra Judas, ta zuun ñi tyiño zavaha yo i zavaha tucu ra.

¹⁸ I zata ra Judas cuan minoo ñuhu sihin xuhun i ñihi ra sihin cuatyí ra. Ta zuun ñi maa ra i cuñi cahñi sii ra. I tyihi ra minoo yoho zucu ra, zoco i canacava ra sihin nuu ra ta i ndata sisi ra ta i quita tandíhi siti ra. Ta i sihi ra.

¹⁹ Sito tandíhi ñiyiví ñuu Jerusalén cuhva i tahan ra Judas. Yucuan cuenda i zacunañi ñu ñuhu cuan Acéldama sihin tuhun maa ñu. Cuñi si catyi si: Ñuhu nu i sati ñhiñi ra.

²⁰ Sisi libro Salmos catyi ra Ndyoo sa cuenda ra Judas:
Cua ndoo ihno vehe ra.
Yoñi ñiyivi cua cundyaa yucuan.
Ta tyiño i sindyizo maa ra cua naquihin inga ra.
Caty si.

²¹⁻²² Ta ziqui i catyi tucu ra Pedro: Yucuan cuenda cua naquihin inga ra tyiño i sindyizo ra Judas ta cua nacaty i tucu ra sihin ñiyivi vaty ndisa sa i nandoto tucu ra Jesús. Cuñi si sii minoo ndoho ra i casaha sica sihin ra Jesús quivi i zacoo ndutya ra Juan sii ra ta cutahan ra sihin ra ndya quivi i ndaa xica ñi ra Jesús ityi andivi. ¿Yoo ndoho cuu ndo? Catyi ra Pedro.

²³ Tacuan ta i ñihi ra uu tahan ra. Minoo ra nañi ra José ta nañi tucu ra Barsabás. Justo xiñi zivi ra. Ta inga ra nañi ra Matías.

²⁴ Tacuan ta i sica tahvi tandihi ñu sii ra Ndyoo ta i catyi ñu: Zutu mañi yuu, siton aña tandihi ñiyivi. Zañohon sii ndi yoo ra cuñi moo

²⁵ sa naquihin ra tyiño i sindyizo ra Judas vaty i ndoyo ñuhu ra ta cuahan ra nu tahan si sii maa ra sa cuhun ra, nu xaan. Catyi ñiyivi.

²⁶ Ta i siziqui ra zuhva cua ndyehe ra yoo ra cua zahacanaa, ta i tahan si sii ra Matías. Tacuan ta i nduu tucu ra cuan minoo apostól sihin inga sa usi ñn tahan ra.

2

I quisi Taty Li ra Ndyoo

¹ I saa quivi sa zacahnu ñiyivi hebreo minoo vico sa nañi Pentecostés, ta i titahan tandihi ñiyivi ndyico sii ra Jesús.

² Yaty xaan i quisaha quisi minoo nduzu ndya yuty andivi. Tañi minoo taty cahnu, tacuan i cuu nduzu cuan, ta i situ cuii nduzu vehe nu yucu ñu.

³ Ta i ndyehe ñu minoo tañi caa yaa ñuhu. I quitu cuaty si ta i sicozo si xiñi ñn ñn ñu.

⁴ I situ Taty Li ra Ndyoo sii tandihi ñu, ta i quisaha cahan ñu tuhun sa ña tuhva ñu cahan. I cahan ñu sihin cuhva saha Taty Li sii ñu.

⁵ Ta quivi cuan i siyucu cuaha xaan ñiyivi hebreo ñuu Jerusalén. Ziñ ziñ ñuu i quisi ra ta saa ra ñuu Jerusalén. Ndyico vaha ra sii costumbre maa ra.

⁶ Ta i siñi tucu maa ra cuan nduzu sa quita andivi. Yucuan cuenda i tuhva tandihi ra. Ñá cutuñi iñi ra ñaa cuenda siñi ra sa cahan ñiyivi. Vaty tandihi cuhva cahan ñu, siñi ra hebreo cuan vaty cahan ñu cuhva cahan ñiyivi ziñ ziñ ñuu, nu i quita ra hebreo.

⁷ Iyo xaan i cuñi ra hebreo cuan, ta i quisaha catyi ra sihin tahan ra: Tandihi ñiyivi ya, ñiyivi Galilea cuu ñu, zoco cahan ñu cuhva cahan maa yo.

⁸ Siñi yo sa cahan ñu. Cahan ñu cuhva cahan ñiyivi ñuu nu quita maa yo, ta ziñ ziñ ñuu yo.

⁹ Ñiyivi ñuu Partia, Media, ta Elam cuu yo sihin ñiyivi ñuu Mesopotamia, Judea, Capadocia, Ponto ta Asia.

¹⁰ Iyo yo cuu yo ra ñuu Frigia, Panfilia, Egipto ta Libia vaty ñi Cirene, ta iyo yo cuu yo ra ñuu Roma

¹¹ tata hebreo, ta inga yo ra ñuu Roma, zacuaha yo costumbre ñiyivi hebreo. Iyo yo quita ñuu Creta ta ñuu Arabia ta siñi yo sa cahan ñu tandihi cuhva cahnu xaan zavaha ra Ndyoo. Catyi ra cuan.

¹² Ta iyo xaan i cuñi ra ta ñá sito ra ñaa sa cuu. Ta i natuhun tahan ra ta catyi ra: ¿Ñaa sa cuu? Catyi ra.

¹³ Zoco inga ra i sacu ndyaa ta catyi ra: Sihi xaan ñu ya ndixi (ta siñi ñu).

Cuhva i cahan ra Pedro sihin ñiyivi

¹⁴ Tacuan ta i nacuiñi ndyaa ra Pedro sihin sa usi ñn tahan ca ra apóstol ta saa xaan i cahan ra Pedro sihin ñiyivi cuan ta catyi ra: Ndoho sa ndyaa ihya nu cu si Judea ta tandihi inga ndo sa vasi ñuu Jerusalén ya, tyizoho vaha ndo ta cuiñi ndo sa quehin.

¹⁵ Ña siñi ndi tañi sica iñi maa ndo vaty nacaa cuu si caa ñn sa ñaha ñi.

¹⁶ Sicoo minoo ra sinañi Joel ta tyiemvu. I cahan ra sa cuenda ra Ndyoo ta i catyi ra vatyí cua tahan si cuhva sa ndyehe ndo vityi vatyí i catyi ra:

¹⁷ Nu cua ndihí tyiemvu cua tasi Tatyí lí, catyi ra Ndyoo, ta cua noo ra ziquí tandihí ñiyívi. Zehe ndo cua cahan ñu tuhin. Cua ndyehe ra yoco sa cua zañehi sii ra. Ta cua cahan ñimahna xiñi ra sahnú.

¹⁸ Ndisa, vatyí cua noo Tatyí lí sii tandihí ñiyívi ndyico sii mi sa ndisa, ta cua cahan ñu cuhva cua quehin sihin ñu.

¹⁹ Ta cua zavehi sa ndyityi ityi andívi ta nu ñuhu ñuu ñiyívi. Niñi ta ñuhu ta ñuhma.

²⁰ Cua nduñaa ñicandyi ta cua nducuaaha yoo tañi niñi. Tacuan cua cuu si ta cua coo minoo quívi cahnú xaan, quívi cua tasi tuñi sii ñiyívi.

²¹ Ta tandihí ra cua cahan ndahvi sihin mi, cua cacu ra.

Tacuan i catyi ra Ndyoo, i catyi ra Joel.

²² Ta sa yaha nacatyí ra Pedro cuhva cuan ta i catyi tucu ra: Ndoho, ñiyívi hebreo tyizoho ndo tuhun ya: Ra Jesús ñuu Nazaret i sindyizo ra tyiño saha ra Ndyoo sii ra. Ta tañi sa sito ndo i saha ra Ndyoo sa zavaha ra cuaha xaan sa ndyityi ta cuaha xaan zeña nuu ndo.

²³ Ta i sito ra Ndyoo vatyí cua cuhva ra sa tyaa ñiyívi cuatyí sata ra Jesús. Ta maa ndo i saha ndo sa cahñi ñiyívi ña sito sii ra Ndyoo sii ra nu cruz.

²⁴ Zoco i zanandoto ra Ndyoo sii ra Jesús, ta i tava ra sii ra nu iyo ñiyívi i sihi vatyí ma cuu ndoo ra yucuan.

²⁵ I cahan ra David ta tyiemvu sa cahan ra Jesús ta catyi ra:

Site vatyí ndyaa ra sahnú sihin. Tandihí cuí tyiemvu iyo ra sihin. Yucuan cuenda ma cuyuhi.

²⁶ Yucuan cuenda zii xaan cuñi, ta cua nacatyí sihin ndo vatyí zii cuñi. Site vatyí cua nandote sisi sa i sihi.

²⁷ Ma caca xaan iñi vatyí ma zandoon sii, nu caa ndiyí Ndyoo Zuti. Ta ma cuhvon sa tyahyu coño ñuhi vatyí zehe iun sii.

²⁸ Sa zañohon sii yozo caa cua cundite suhun. Zii xaan cua cuñi vatyí cua cundyei suhun. Tacuan i cahan ra David cuhva i cahan ra Jesús sihin ra Ndyoo Zutu ra ta tyiemvu.

²⁹ Ta i cahan ca ra Pedro ta catyi ra: Ndoho amigos, ndoo xaan cua nacatyí sihin ndo ñaa sa i tahan ra sahnú David, ñiyívi sii yo ta tyiemvu. I sihi ra, ta i quihvi ra ñuhu. Ta ihya iyo ñaña ra ndya cuhva ndya vityí. Ta tacuan cuu cuhva sito yo vatyí yívi tuhun sa zuun ñi maa ra cahan ra.

³⁰ I cahan ra David cuhva i cahan Tatyí lí ra Ndyoo sihin ra, ta i sito ra vatyí cua zavaha ra Ndyoo tuhun i cahan ra sihin ra vatyí i catyi ra Ndyoo sihin ra: “Ityi nuu ca cua cundyaca ñaha minoo ñiyívi suun. Tañi ndyaca ñaha moo tacuan cua cundyaca ñaha maa ra.”

³¹ I sito ra David tyiño cuan ta tyiemvu, ta i catyi ra vatyí cua nandoto tucu ra Jesús. Yucuan cuenda i catyi ra David sa cuenda ra Cristo vatyí ma ndoo ra nu caa ndiyí. Ta ma tyahyu coño ñuhu ra. Catyi ra.

³² I zanandoto ra Ndyoo sii ra Jesús ta i ndyehe tandihí ndi sii ra.

³³ Ta cuahan ra Jesús gloria, ta saha ra Ndyoo cuaha xaan cuhva sii ra. Ndyaa ra ityi siyo cuaha ra Ndyoo. Ndya ta sa naha xaan ca i catyi ra Ndyoo: “Cua saa quívi cua cuhun Tatyí lí vii ñuu ñiyívi.” Ta yucuan cuenda i tasi ra Jesús sii Tatyí lí ihya. Tatyí lí ra Ndyoo zavaha tandihí sa ndyehe ndo ta sa siñi ndo vityi vatyí sa i saa ra. Catyi ra Pedro.

³⁴ Ta ziquí i catyi tucu ra Pedro: I saha ra David cuenda yozo caa cua tahan si sii ra Jesús ityi ziquí vatyí yívi ra David i sahan gloria. Zoco i cahan ra tuhun cuhva cua tahan si sii ra Jesús ta i catyi ra:

Moo cuu ra ndyaca ñaha sii mi.

Ta catyi ra Ndyoo Zutu yo suhun:

“Cundyoón ihya siyo cuehi.

³⁵ Iyo cuaha xaan ra cuxaan suun, zoco cua zahacanoon sii ra vatyí sehi cuhva suun.”

Tacuan i catyi ra Ndyoo sihin ra Jesús, catyi ra David.

³⁶ Tacuan i cahan ra Pedro sihin ñiyivi hebreo tandihi cuhva cuan, ta i catyi tucu ra: I tyaa maa ndo sii ra Jesús nu cruz, zoco i zanducahnu xaan ra Ndyoo sii ra, ta vityi ndyaca ñaha maa ra, ta zacacu ra sii ñiyivi. Yucuan cuenda tyizoho ndo ta coto ndo sa quehin. Catyi ra.

³⁷ Ta sa siñi ñiyivi sa cahan ra Pedro ta i sica xaan iñi ñu, ta i catyi ñu sihin ra Pedro ta sihin tandihi inga ra apóstol: ¿Amigo, ñaa sa cuñi si zavaha ndi? Catyi ñu.

³⁸ Ta i catyi ra Pedro sihin ñu: Tahan tahan ndo ndu-uu iñi ndo cuatyí ndo ta coo ndutya ndo cuenda ra Jesucristo, ta cua zandasi ra Ndyoo cuatyí ndo. Ta cua cuhva ra Ndyoo sa noo Tatyí li sii ndo vatyí yucuan cuu sa cua cuhva ra Ndyoo sii ndo.

³⁹ Vatyí ta tyiemvu i saha ra Ndyoo tuhun ra sii ndo ta sii zehe ndo ta sii tandihi cuii ñiyivi, tandihi ñu sa cua nacana ra Ndyoo. Cua sino iñi ñu sii ra. Ta maa ra cua cundyaca ñaha sii yo.

⁴⁰ Cuaha xaan tuhun i cahan ra Pedro ta i saha ra sa siñi tuñi sii ñiyivi. I catyi ra sihin ñu: Zavaha ndo sa vaha nuu ra Ndyoo coto zanaa ra sii ndo sihin ñiyivi ña vaha. Catyi ra.

⁴¹ Ta cuaha xaan ñiyivi i sino iñi tuhun cahan ra Pedro ta i sicoo ndutya ñu. Yucuan quivi i sino iñi tañi uñi mil ñiyivi sii Tuhun Ndyoo.

⁴² Tandihí quivi i titahan ñu cuan. I zacuaha xaan ñu sihin ra apóstol. Sasi ñu pan ta sihi ñu ndutya uva vatyí nachon iñi ñu vatyí sihi ra Jesús, sa cuenda maa ñu, ta ñin ñi i sica tahvi ñu sii Ndyoo tandihí quivi.

Cuhva i sicoo ñiyivi sino iñi Tuhun Ndyoo ta quivi cuan

⁴³ Cuaha xaan sa ndyityi i zavaha ra apóstol, ta iyo xaan i cuñi ñiyivi vatyí i ndyehe ñu sa zavaha ra cuan ta yuhu ñu vatyí i ndyehe ñu yozo caa iyo ra Ndyoo.

⁴⁴ Tandihí ñiyivi sa sino iñi, ñin ñi i siyucu ñu, ta i tyindyee tahan ñu sii tahan ñu.

⁴⁵ Ta tatu cumañi xuhun i naxico ñu ñaa sa iyo sii ñu. I naxico ñu ñuhu ñu sihin ndaha tyiño ñu ta i saha ñu xuhun ñihi ñu sii inga ñiyivi sino iñi tatu cumañi si sii ñu.

⁴⁶ Tandihí quivi i titahan ñu vehe ñuhu hebreo ta vehe ñiyivi ta i sasi ñu pan ta sihi ñu ndutya uva sa cuenda ra Jesús ta ñin ñi i sasi ñu xita tandihí quivi. Ziñ xaan i cuñi ñu ta ña cuhna iñi ñu sii ñiyivi.

⁴⁷ I zacahnu xaan ñu sii ra Ndyoo, ta vaha xaan cahan tandihí ñiyivi sa cuenda ñu. Ta tandihí quivi i saha ra Ndyoo sa sino iñi inga ca ñiyivi Tuhun ra.

3

Nduvaha minoo ra xii

¹ Minoo quivi cuahan ra Pedro ta ra Juan vehe ñuhu hebreo cuhva caa uñi sa sahiñi. Yucuan cuhva tuhva ñiyivi hebreo cahan sihin ra Ndyoo.

² Ta sa cua saa ra yucuan ta i quisi ndyaca ñiyivi sii minoo ra xii. Tacuan sindyaca ñu sii ra tandihí quivi ta caa ra yuvehe nañi yuvehe tyaqui vatyí caca ra caridad.

³ Ta sa ndyehe ra sii ra Pedro ta ra Juan sa cua quihvi ra vehe ñuhu ta i sica ra caridad sii ra.

⁴ I ndyehe xaan ra Pedro ta ra Juan sii ra, ta ziqui i catyi ra Pedro: Ndyehun sii ndi.

⁵ Ta i ndyehe ra xii cuan vatyí sica iñi ra sa cua cuhva ra xuhun sii ra.

⁶ Zoco i catyi ra Pedro: Ñahñi xuhun ndyize sa cuhve suun zoco iyo cuhva sii sa tyindyeyi suun vatyí iyo cuhva sii maa ra Jesucristo, ra ñuu Nazaret, sa tyindyee ra suun. Sa cuenda maa ra cuan catyi suhun: Nduviton ta cacon. Catyi ra Pedro.

⁷ I tiñ ra Pedro ndaha siyo cuaha ra, ta i zanduvita ra sii ra. Ta zuun ñi caa cuhva cuan ndaha i nduvaha ñi saha ra.

⁸ I ndava ra xii cuan ta i quisaha ra sica ra. I quihvi ra si vehe ñuhu sihin ra Pedro ta ra Juan. Sica ra. Ndava ndava ñi ra, ta zacahnu xaan ra sii Ndyoo.

⁹ I ndyehe tandihí ñiyivi sa sica ra, ta i zacahnu xaan ñu sii Ndyoo.

¹⁰ Ta i nacoto ñu sii ra vatyí ra sica caridad yuvehe ñuhu cuu ra, ra sa tuhva sindyaa yuvehe sa nañi yuvehe tyaqui. Ta iyo xaan i cuñi ñu sihin cuhva sa tahan ra.

Cahan ra Pedro sihin ñiyivi nu cu corredor ra Salomón

¹¹ Ta ñá zaña ra cuan sii ra Pedro sihin ra Juan. Iyo xaan i cuñi ñiyivi, ta yaty i xaan i titahan ñu nu ndyaa ra corredor cuan. Nañi si corredor sii ra Salomón.

¹² I ndyehe ra Pedro sa titahan ñiyivi ta i quisaha catyi ra: Iyo xaan cuñi ndo amigo vaty ndyehe ndo sa nduvaha saha ra ya. Ndyehe xaan ndo sii ndi vaty sica iñi ndo vaty iyo xaan cuhva sii maa ndi a sica iñi ndo vaty vaha xaan ñiyivi cuu ndi ta yucuan cuenda i zanacaca ndi sii ra ya. Zoco ña tacuan amigo.

¹³ Ñiyivi sahnü sii yo, ra Abraham, ra Isaac, ta ra Jacob i zacahnu ra sii Ndyoo. Ta zuun ñi maa ra Ndyoo i zacahnu sii ra Jesús, zehe ra. (I saha maa ndo sii ra Jesús sii ra ndyaca ñaha) ta i catyi maa ndo nuu ra Pilato vaty ña vaha ra. Sa sica iñi ra Pilato sa cua zaña ra sii ra Jesús, zoco ñá saha maa ndo.

¹⁴ Ñá saha ndo sa zaña ra Pilato sii ra ta ra ii xaan cuu ra Jesús. Ra vaha xaan cuu maa ra. I sica ndo tumañi iñi sii ra Pilato sa zaña ra sii inga ra cuhva iyo costumbre sa cua zaña ra sii minoo ñiyivi quivi vico cuan. Ta yucuan cuenda i zaña ra sii inga ra cuan, ra sahnü sii ñiyivi.

¹⁵ Cuhva cuan i sahnü maa ndo sii ra Jesús vazu maa ra saha cuhva cundito ñiyivi sihin Ndyoo. Zoco i zanandoto tucu ra Ndyoo sii ra. Ñá ndoo ra nu iyo ndiyi. Ta i ndyehe maa ndi sa yaha nandoto ra.

¹⁶ Sa ndyehe ndo sii ra xii ya, nacoto ndo sii ra. Sino iñi ndi vaty iyo cuhva sii ra Jesús ta yucuan cuenda i zanduvaha ra Ndyoo saha ra. Sino iñi ndi sii ra Jesús. Yucuan cuenda i nduvaha ra ya, ta i ndyehe tandihi ndo.

¹⁷ Amigo. Site vaty ña sito ndo sa zavaha ndo sa ña vaha (sa sahnü ndo sii ra Jesús) ta tacuan tucu ra ndyaca ñaha sii ndo.

¹⁸ Ta tyiemvu i nacaty ra Ndyoo sihin yo vaty cua tahan ra Cristo tundoho. Maa ra cuu ra i casi ra Ndyoo vaty cua zacacu ra sii yo, ta cua cuu ra vaty tacuan i catyi ra Ndyoo sihin tandihi ra profeta. Ta tacuan i tahan si sii ra Jesús, zuun ñi cuhva i catyi ra Ndyoo.

¹⁹ Ta vityi zandoo ndo cuaty ndo ta nanducu ndo sii Ndyoo ta cua zandasi ra cuaty ndo ta cua nduvaha añima ndo ta zii cua cuñi ndo.

²⁰ Ta cua tasi tucu ra Ndyoo sii ra Jesús inga saha vaty maa ra cuu ra ndyizo tyiño i zacuu ra Ndyoo. Nu ndyaa ndo cua tasi tucu ra Ndyoo sii ra.

²¹ Zoco vityi ndyaa ra gloria ndya quivi cua ndusaa ñuhu ñuu ñiyivi inga saha tañi i catyi ra Ndyoo. Vaty tacuan i catyi ra Ndyoo sihin ra profeta ta sa naha.

²² Ta sa naha i catyi ra Moisés: “Cua tasi ra Ndyoo minoo ra cuu ñiyivi sii yo tañi i tasi ra sii mi, ta cua cahan ra Tuhun Ndyoo. Tyizoho ndo tandihi ñaa sa cua cahan ra sihin ndo.

²³ Tatu ma tyizoho ñiyivi sa cahan ra cuan, cua cuu ñu, ta ma cuu quihvi ñu sihin ñiyivi i casi ra Ndyoo.” Tacuan i catyi ra Moisés i catyi ra Pedro. Ta ziqui i catyi tucu ra:

²⁴ Ndisa vaty tandihi ra profeta ta tyiemvu ndya quivi i quisaha cahan ra Samuel i catyi ra yozo caa cua quisi ra Jesús nu cua quisi quivi. Ta sa i tahan si cuhva catyi ra cuan.

²⁵ Ta maa yo ñiyivi hebreo cuu ñiyivi sii ra profeta cuan, ta i saha ra Ndyoo tuhun ra sii ñiyivi sii maa yo vaty i catyi ra Ndyoo sihin ra Abraham: “Cua cuhve ndatu sii tandihi ñiyivi ñuu ñiyivi sa cuenda minoo ñiyivi suun.” Catyi ra.

²⁶ Ta yucuan cuenda i saha ra Ndyoo tyiño sii ra Jesús, zehe ra. I tasi ra Ndyoo sii ra nu iyo maa ndo sa xihna ñi vaty cuñi ra zavaha ra tumañi iñi sii tandihi ndo. Cuñi ra sa zandoo tandihi ndo cuaty ndo. Tacuan i catyi ra Pedro sihin ñu.

4

Tiin ra cu tyiño sii ra Pedro sihin ra Juan

¹ Ta cahan ca ra Pedro ta ra Juan sihin ñiyivi ta i quisi ra cu zutu ta ra cu nuu sii policia sa cuenda vehe ñuhu ta ra saduceo. (Ña sino iñi maa ra saduceo cuan vaty cua nandoto ñiyivi tatu sa sihi ñu.)

² Cuxaan ra cuan vatyí zacuaha ra apóstol sii ñiyívi cuhva i nandoto tucu ra Jesús sisi sa i sihi ra.

³ I tñin ra sii ra Pedro ta ra Juan, ta i tyihi ra sii ra vehe caa sa iyo cuenda vehe ñuhu cuan. Ndyá inga quívi cua cutuñi ra vatyí sa cua cuaa cuhva i tñin ra sii ra.

⁴ Cuaha xaan ñiyívi i siñi ñu tuhun zacuaha ra Pedro ta ra Juan ta i quisaha sino iñi ñu sii ra Jesús. I sino iñi sa vatyí ñi ohon mil rayíi quívi cuan ta zñin ñu zihí.

⁵ Ta inga quívi i titahan tandíhi ra cu zutu nahnu sihin ra mandoñi ta ra maestro cuenda ley. I titahan ra cuan ñuu Jerusalén.

⁶ I quisi ra Anás, ra cu nuu sii zutu nahnu sihin ra Caifás ta sihin ra Juan ta ra Alejandro ta tandíhi ñiyívi sii ra cu nuu sii zutu nahnu cuan, ndíhi ca.

⁷ I cana ra sii ra Pedro ta ra Juan ta i quihvi ra nu yucu ra cu tyiño cuan ta i quisaha ndaca tuhun ra cuan sii ra ta catyi ra: ¿Yozo caa i zanduvaha ndo sii ra xii cuan? ¿Yoo ra i saha cuhva cuan sii ndo? Catyi ra.

⁸ I tyindyee Tatyí li ra Ndyoo sii ra Pedro, ta i quisaha catyi ra Pedro: Ndoho ra ndyaca ñaha ta ra nahnu,

⁹ ndaca tuhun xaan ndo sii ndi vityi sa cuenda minoo sa vaha i zavaha ndi sihin ra xii ndahvi ya. Cuñi ndo coto ndo yozo caa i nduvaha ra.

¹⁰ Tatu yucuan cuñi ndo coto ndo, cua nacatyí sihin ndo ta cua coto ndo sihin tandíhi ñiyívi hebreo vatyí i nduvaha ra vatyí iyo xaan cuhva sii ra Jesús, ra ñuu Nazaret. I tyaa ndo sii ra nu cruz, zoco i zanandoto ra Ndyoo sii ra.

¹¹ Tañi minoo ra zandaa vehe sihin yuu cuu ndo ta zavita ndo yuu vaha. Tañi minoo yuu vaha xaan cuu ra Jesús, ta i tava ndo sii ra, ta ra ñiñi xaan cuu ra.

¹² Zacacu ra Jesús sii ñiyívi, ta yoñi inga ca ra nacahnu ñuu ñiyívi sa cuu zacacu sii yo ta ma cuhun yo andyaya. Tacuan i catyi ra Pedro.

¹³ Ta i ndyehe ra cu tyiño vatyí ña yuhu ra Pedro ta ra Juan ta sito ra vatyí ñahñi zicuela siñohe ra (ta yívi ra tuhva cuu ra). Ta yucuan cuenda iyo xaan i cuñi ra zoco i nacoto ra vatyí ra i sica noo sihin ra Jesús cuu ra.

¹⁴ Ta i ndyehe ra cu tyiño vatyí ndyaa ra xii cuan sihin ra. Sa nduvaha ra. Ta yucuan cuenda ñá ñihi ca ra cuhva cahan ra.

¹⁵ Tacuan ta i tava ra sii tandíhi uñi tahan ra sata vehe vatyí cuñi ra sa natuhun tahan xihna ra.

¹⁶ I catyi ra: ¿Ñaa sa cuu zacuu yo sihin ra ya? Ma cuu catyi yo vatyí zavaha ra sa ña vaha vatyí i zavaha ra minoo sa ndyityi cahnu xaan ta sito vaha tandíhi ñiyívi ñuu ya.

¹⁷ Cua zayuhu yo sii ra ta cua catyi yo: “Ma cahan ca ndo tuhun ra Jesús.” Tacuan cua catyi yo ta ma coto cuaha ca ñiyívi cuhva i nduvaha ra xii. Catyi ra.

¹⁸ Tacuan ta ziquí i cana ra sii ra ta i catyi ra: Ma cahan ca ndo tuhun ra Jesús, ta ma zacuaha ca ndo sii ñiyívi. Catyi ra.

¹⁹ Zoco i catyi ra Pedro ta ra Juan: Nacañi xihna iñi ndo ta ziquí catyi ndo ñaa sa cuu sa vaha sa cuenda ra Ndyoo. ¿Atu vaha cua tyaa ndi yahvi sa cahan maa ndo a vaha tyaa ndi yahvi sa cahan ra Ndyoo?

²⁰ Catyi ndi vatyí ma cuu sa cutaxi ndi vatyí ñiñi xaan cua nacatyí ndi sa ndyehe ndi. Cua nacatyí ndi sa siñi ndi. Tacuan i catyi ra Pedro.

²¹ Tacuan i cuu si, ta i zayuhu ra cu tyiño sii ra inga saha, ta ziquí i zaña ra sii ra vatyí ñá ñihi ra cuhva tyaa ra cuatyí sata ra coto cuxaan ñiyívi ñuu. Zacahnu xaan ñiyívi cuan sii ra Ndyoo vatyí sito ñu cuhva i nduvaha ra xii cuan.

²² Vatyí sa uu xico cuiya sa ndyaa ra cuan tundoho ta i nduvaha ra. I ndyehe ñiyívi cuhva iyo ra Ndyoo vatyí i zanduvaha ra sii ra xii cuan.

Sica tahvi ñiyívi sino iñi sii ra Jesús sii ra Ndyoo vatyí ma yuhu ñu

²³ I quita ra Pedro ta ra Juan ta cuahan ra ndya nu yucu inga ñiyívi sino iñi sii ra Jesús. I nacatyí ra sihin ñu tandíhi sa i catyi ra zutu nahnu ta ra sahnu cuan sihin ra.

²⁴ I tyizoho ñu sa cahan ra, ta ziqui ñin ñi cuhva i sica tahvi ñu sii ra Ndyoo ta catyi ñu: Zutu mañi yo, i zavohon yutyi andivi ta ñuhu ñuu ñiyivi sihin tyañuhu. Yoho i zavaha tandihi cuii sa iyo.

²⁵ Ta tyiemvu i cohon sihin ra David ra i cuu muzun ta ñiyivi sahnu sii ndi. Ta i tyaa ra cuhva i cohon:

Ndisa cuxaan xaan ñiyivi inga ñuu. Ta ndisa vatyi cuaha xaan cuhva sica iñi ñiyivi hebreo ta sa caha ñi cuu cuhva sica iñi ñu.

²⁶ Cua titahan ra cu tyiño sii ñu sihin ra cu tyiño hebreo. Cua cuñi ra cahñi tahan ra sihin ra Ndyoo ta sihin ra Cristo, ra ndyizo tyiño ra Ndyoo.

Tacuan i tyaa ra David ta tyiemvu.

²⁷ Ta i cahan ca ñiyivi cuan sihin ra Ndyoo ta catyi ñu: Ihya ñuu ya ndisa cuii vatyi i titahan ra Herodes ta ra Poncio Pilato ta ra i quisi inga ñuu ta ra tata hebreo, ta i sahñi ra sii ra Jesús, ra cuu muzu iun. Ta ra Jesús cuu ra i tasun vatyi cua cuizo ra tyiñon.

²⁸ Zoco tacuan i zavaha ra cuan vatyi ta tyiemvu i tyoon cuhva yozo caa cua tahan si.

²⁹ Ta vityi Zutu mañi yo, cuñi ra zayuhu ra sii ndi. Cuhvon tundyee iñi sii ndi vatyi muzun cuu sii ndi. Ma cuhvon sa cua yuhu ndi nu zuhva. Ta cuhvon sa cua zacoto maa ndi sii ñiyivi Tuhun moo.

³⁰ Zanduvohon sii ñiyivi cuhu ta zavohon sa ndyityi sa cuenda ra Jesús, ra cuu muzu iun. Catyi ñu.

³¹ Ta sa ndihi sica tahvi ñu sii Ndyoo, ta i taan nu yucu ñu, ta i situ Tatyí li ra Ndyoo sii tandihi ñu, ta ñá yuhu ca ñu, ta i nacatyi ñu Tuhun Ndyoo sihin ñiyivi.

Ñahñi sa i cumañi sii ñiyivi sino iñi sii ra Jesús

³² Inuu ndita ñi i sicoo tandihi ñu sino iñi. Numinoo ra ta ñá catyi ra vatyi iyo ndaha tyiño ra vatyi inuu ndita ñi i sicoo tandihi ñu.

³³ Sihin cuaha xaan cuhva i nacatyi ra apóstol sihin ñiyivi cuhva i nandoto tucu ra Jesús. Ta i saha xaan ra Ndyoo tumañi iñi sii tandihi ñu sino iñi.

³⁴ Ñahñi i cumañi sii tandihi ñu vatyi tatu iyo ñuhu a vehe ñu i xico ñu sii si tatu cumañi xuhun. Ta i quisi ndyaca ñu xuhun sa cuyahvi si.

³⁵ Ta i saha ñu sii si sii ra apóstol, ta i saha maa ra sii ñu nu cumañi si.

³⁶ Tacuan i zavaha minoo ra nañi José. I zama ra apóstol zivi ra. Bernabé i zacunañi ra sii ra vatyi i saha xaan ra tundyee iñi sii tandihi ñiyivi. Ra ñuu Chipre i cuu ra ta ñiyivi sii ra Leví, ra i sihi ta tyiemvu.

³⁷ I xico ra ñuhu ra, ta i quisi ndyaca ra xuhun yahvi si, ta i saha ra sii si sii ra apóstol.

5

Cuatyi i zavaha ra Ananías ta ña Safira

¹ Ta sicoo minoo ra nañi Ananías. Ta Safira nañi ñazihí ra. I xico tucu maa ñu minoo ñuhu ñu.

² I tava ra Ananías zuhva xuhun sa cuu yahvi si, ta sito tucu ñazihí ra. Ta i sindyaca ra tandihi ca si, sii ra apóstol ta catyi ra: Vasi ndyaque tandihi xuhun sa cuu yahvi ñuhu i xique.

³ Ta i quisaha catyi ra Pedro sihin ra: Yoho Ananías, sohon sa zativi cuilhna suun vatyi zandavi ñohon sii Tatyí li. I tavon zuhva xuhun sa cuu yahvi ñuhu cuan.

⁴ Ndisa, ñuhu moo i cuu si, ta yoñi sa catyi suhun vatyi xicon sii si. Ta ndisa vatyi yahvi ñuhu cuan cuu sii moo sa i xicon sii si. Ta ¿ña cuenda sica iñun cuhva ña vaha ya? Yivi sii ñiyivi zandavi ñohon. Sii ra Ndyoo zandavi ñohon.

⁵ Ta sa siñi ra Ananías tuhun cahan ra Pedro ta i nduva ra, ta i sihi ra. Ta tandihi ñiyivi i sito tuhun cuan, i yuhu xaan ñu.

⁶ I quihvi ra yoco ta i nazucu ra zahma sii coño ñuhu ra, ta i quihin ra sii ra, ta tyihi ra si ñuhu.

⁷ Ta i yaha tañi uñi ora ta i saa ñazihí ra. Ta coto ca ña ñaa sa tahan yih ña.

⁸ I quisaha ndaca tuhun ra Pedro sii ña ta catyi ra: ¿Atu ihya ñi yahvi i xico ndo ñuhu ndo? Ta i catyi tucu maa ña: Avi. Tacuan ñi i cuu yahvi si.

⁹ I catyi tucu ra Pedro sihin ña: Ña vaha sa zacasi tahan ndo tuhun ta zandavi ñaha ndo sii Tatyí Ii. Ndyehe, vatyí sa vasi tucu ra yoco. Ndyá sehe ca i tyíhi ra sii yíun si ñuhu. Ta vityí vasi quihin tucu ra suun.

¹⁰ Ta ta sica cuii ñi i nduva ña saha ra Pedro ta i sihi ña. I quíhvi ra yoco ta i ndyehe ra vatyí sa i sihi ña, ta i cañihi ra sii ña ta tyíhi ra sii ña si ñuhu yatyí ñi nu i quíhvi yíi ña.

¹¹ I sito tandíhi ñiyívi sa tahan ñu ta yuhu xaan ñu, ta yuhu xaan ñiyívi sino iñi sii Ndyoo.

Zavaha ra apóstol cuaha xaan sa ndyityi

¹² Zavaha ra apóstol cuaha xaan sa ndyityi nu yucu ñiyívi. Tandíhi ñiyívi sino iñi sii ra Jesús i titahan ñu sisi vehe ñuhu hebreo minoo corredor nañi si Corredor sii ra Salomón.

¹³ Yoñi inga ñiyívi i cahan ndya vaha ñi sii ñu vatyí i sito tandíhi ñiyívi vatyí vaha xaan ñiyívi cuu ñu sino iñi.

¹⁴ Ta vazu i yuhu ñiyívi, zoco cuaha xaan ca ñu i sino iñi sii ra Jesús. I sino iñi rayíi ta tacuan tucu ñu zíhi.

¹⁵ Ta sa cuenda tyiño ra apóstol i saqui ñiyívi sii ñiyívi cuhu ityi, nu sito a nu yuu vatyí tatu cua yaha ra Pedro vazu xiñahñu ñi ra cua nañi sii ñu ta cua nduvaha ñu.

¹⁶ Ta ñiyívi inga ñuu vatyí ñi Jerusalén i quisi ndyaca tucu ñu sii ñiyívi cuhu ta ñiyívi iyo tatyí cuihna añima, ta i nduvaha tandíhi ñu.

Tahan ra Pedro ta ra Juan tundoho

¹⁷ Tacuan ta i cucuíhna xaan iñi ra cu nuu sii ra cu zutu ta cuaha xaan ra saduceo sii ra apóstol.

¹⁸ Yucuan cuenda i tiin ra sii ra, ta i tyíhi ra sii ra vehe caa.

¹⁹ Zoco sa cuaa cuan i quisi minoo ángel ra Ndyoo, ta i nuña ra yuvehe caa cuan ta i tava ra sii ra apóstol. Ta i catyi ra sihin ra:

²⁰ Cuahan ndo vehe ñuhu hebreo ta nacatyí ndo sihin ñiyívi yozo caa cuu nduvaha añima ñu. Catyi ángel cuan.

²¹ I tyaa ra apóstol yahvi sa cahan ra. Ta sa vasi cundisi i quíhvi ra vehe ñuhu ta zacuahá ra sii ñiyívi. Tacuan ta i cana ra cu nuu sii ra cu zutu ta ra zutu nahnu sii tandíhi ra mandoñi vatyí cua titahan ra. Ta i tasi ra tyiño ndya vehe caa vatyí cua tava ra sii ra apóstol vatyí cua quisi ra nu yucu ra.

²² Zoco sa saa ra policía ndya vehe caa cuan, ta ñá nañihi ca ra sii ra apóstol ta cua nanuhu tucu ra ndya nu yucu ra cu tyiño, ta i catyi ra:

²³ I sahan maa ndi vehe caa ta ndyehe ndi vatyí ndazi cutu yuvehe ta yucu tandíhi ra zacuenda yuvehe. Zoco sa nuña ndi yuvehe cuan ta ñá nañihi ndi numinoo ñiyívi sisi si.

²⁴ Ta sa siñi ra cu nuu sii policía sihin ra zutu nahnu ta ra cu nuu sii ra cuhva i nacatyí ra ta iyo xaan i cuñi ra ta sica iñi ra yozo ca caa cuu ra cuhva cuan.

²⁵ Tacuan ta i quíhvi minoo ra ta catyi ra: Ra i tyíhi ndo si vehe caa cuan, vityí nandyaa ra sisi vehe ñuhu ta zacuahá ra sii ñiyívi.

²⁶ Tacuan ta cuahan ra cu nuu sihin policía ra, ta i tava ra sii ra apóstol. Vii ñi i tava ra sii ra coto cuxaan ñiyívi ta cañi ñu sii ra policía sihin yuu.

²⁷ I sindyaca ra sii ra apóstol ndya nu yucu ra cu tyiño, ta i cahan ra cu nuu sii ra cu zutu sihin ra ta catyi ra:

²⁸ Sa saha maa ndi cuenda sii ndo vatyí i catyi ndi vatyí ma zacuahá ca ndo sa cuenda ra Jesús. Ta vityí ñihi ca zacuahá ndo. Nacahnu Jerusalén sito ñiyívi tuhun ya, ta tyaa ndo cuatyí sata maa ndi vatyí i sihi ra Jesús.

²⁹ Ta ziqui i catyi ra Pedro ta inga ra apóstol: Ñiñi xaan ca sa tyaa ndi yahvi sii Ndyoo ta yívi sii ñiyívi.

³⁰ I tyaa xaan ñiyívi sahnú sii yo yahvi sii Ndyoo. Ta zuun ñi ra Ndyoo cuan i zanandoto ra sii ra Jesús. Ta maa ndo cuu ra i sahñi sii ra vatyí i tyaa ndo sii ra nu cruz.

³¹ Ta vityi zanducahnu xaan ca ra Ndyoo sii ra Jesús. Yucuan cuenda ndyaca ñaha ra tandihi, ta cuu cacu ñiyivi maa ñi sa cuenda maa ra ta zanduvaha ra añima yo, maa yo ñiyivi hebreo. Ta zandasi ra cuatyí yo.

³² Zacuaha maa ndi tuhun ya vatyí sito ndi vatyí tuhun ndisa cuu si. Ta tacuan tucu zacuaha Tatyí li, ra saha ra Ndyoo sii ñiyivi tyaa yahvi sii ra.

³³ Ta sa siñi ra cu tyiño sa catyí ra, ta i cuxaan xaan ra, ta i cuñi ra sa cahñi ra sii ra apóstol.

³⁴ Zoco minoo ra fariseo nañi ra Gamaliel ta i nduvita ra zava mahñu. Minoo maestro cuu ra cuenda ley ra Moisés, ta i tyaa xaan ñiyivi yahvi sii ra. I catyí ra vatyí natava ra cu tyiño sii ra apóstol.

³⁵ Ta ziqui i catyí ra sihin inga ra cu tyiño: Amigo, tandihi inga ndoho ra ndyizo tyiño, cuñi si zacuenda xaan yo ñaa sa zavaha yo sihin rayi ya.

³⁶ Nacohon iñi ndo vatyí quivi cuan i sicoo minoo ra nañi Teudas. I sica iñi ra vatyí ñiñi xaan ra, ta cuaha xaan ra i cutahan sihin ra, tañi cumi ziendu ra. Zoco i sañi ñiyivi sii ra Teudas ta i quiti cuatyí tandihi ra sindyico sii ra, ta i naa cuhva sa zacuu ra sihin ñiyivi.

³⁷ Ta ziqui zuun ñi quivi sa i cahvi ñiyivi sii ñiyivi ñn ñn vehe ñu ta i sicoo minoo ra nañi Judas, ra ñuu Galilea. I zatitahan ra sii cuaha xaan ñiyivi. Zoco zuun ñi i sihi tucu ra cuan, ta i quiti cuatyí ra sindyico sii ra.

³⁸ Ta vityí catyí sihin ndo vatyí nazaña yo sii rayi ya ta cuhva yo sa zavaha ra cuhva cuñi ra. Tatu zavaha ra cuhva cuñi ñiyivi ñi, cunaa tyiño ra.

³⁹ Zoco tatu zavaha ra cuhva cuñi ra Ndyoo, ma cuu zanaa yo sa zavaha ra. Nazaña yo sii ra coto cuxaan ra Ndyoo sihin yo.

⁴⁰ Tacuan i catyí ra Gamaliel, ta i tyaa ra cu tyiño yahvi sa cahan ra. Tacuan ta i cana ra cu tyiño sii ra apóstol. I cañi ra sii ra, ta ñihi xaan i catyí ra sihin ra vatyí ma cahan ca ra tuhun ra Jesús, ta ziqui i zaña ra sii ra.

⁴¹ I quita ra apóstol nu yucu ra cu tyiño cuan. Zi xaan i cuñi ra vatyí saha ra Ndyoo sa ndyehe ra ticahan nuu sa cuenda ra Jesús.

⁴² Ta tandihi quivi i zacuaha ra sii ñiyivi vehe ñiyivi ta vehe ñuhu hebreo. I zacuaha ra sii ñu vatyí sa i quisi ra Jesús ta i sihi ra sa cuenda cuatyí maa ñu.

6

Tyaa tyiño ra sii usa tahan ra cua tyindyee sii ra apóstol

¹ Ta quivi cuan i nducuaha ca ñiyivi sino iñi sii ra Jesús. Tandihí ñu i cuu ñu ñu hebreo, zoco i cuu ñu ñiyivi cahan zahan griego ta ñiyivi cahan zahan hebreo. I quisaha cuxaan ñiyivi cahan griego ta catyí ñu vatyí ña ñihi ñundahvi ñu tahan ñu, ñu sihi yi, xuhun i zasa ra apóstol.

² Tacuan ta i cana sa usi uu tahan ra apóstol sii tandihí ñiyivi sino iñi sii ra Jesús vatyí cua titahan ñu ta i catyí ra sihin ñu: Ña vaha sa zaña maa ndi tyiño sa zacuaha ndi sii ñiyivi Tuhun Ndyoo ta zasa ndi xuhun.

³ Yucuan cuenda, ndoho amigo, nducu ndo usa tahan ra tahan ndo. Ra iyo xaan Tatyí li ra Ndyoo añima ta ra iyo sa siñi tuñi vaha xiñi. Ta cua cuizo maa ra tyiño ya sa zasa ra xuhun.

⁴ Ta maa ndi, tandihí tyiemvu cua caca tahvi ndi sii ra Ndyoo ta cua zacuaha ndi sii ñiyivi.

⁵ Tacuan, ta vaha nduu cuñi tandihí ñu sihin cuhva i cahan ra apóstol, ta i casi ñu sii ra Esteban vatyí vaha xaan sino iñi ra sii ra Jesús ta iyo xaan Tatyí li ra Ndyoo sihin ra. Ta i casi tucu ñu sii ra Felipe, ra Prócoro, ra Nicanor, ra Timón, ra Parmenas, ta ra Nicolás. Ra ñuu Antioquía cuu ra Nicolás. Ta quivi ta coto ca ra sii ra Jesús i tyaa xaan ra yahvi sii costumbre ñiyivi hebreo. Zoco yivi ra hebreo cuu ra.

⁶ I yaha sa usa tahan ra cuan ityí nuu ra apóstol, ta i sica tahvi ra sii ra Ndyoo, ta i tyizo ra ndaha ra sii ra vatyí cua cuizo tyiño ra cuan.

⁷ I nducahnu ca tyiño ra Ndyoo. I ndutuu xaan ñiyivi sino iñi sii ra Jesús ñuu Jerusalén ta sino iñi tucu cuaha ra cu zutu.

Tiin ra cu tyiño cuenda vehe ñuhu sii ra Esteban

⁸ I tyindyee xaan ra Ndyoo sii ra Esteban ta i zavaha xaan ra sa ndyityi. Ta vaha xaan ñiyivi i cuu ra. Ta cuaha xaan sa ndyityi ta zeña i zavaha ra nu yucu ñiyivi.

⁹ Zoco zuhva ra i cuxaan ra sihin ra. Minoo ityi ra nañi ra ra libre. Ñiyivi hebreo ñuu Cirene ta ñuu Alexandría cuu ra. Maa ra sihin inga ra hebreo nu cu si Cilicia ta nu cu si Asia i quisaha cahan ra sihin ra Esteban.

¹⁰ Zoco i saha Tatyí li cuaha xaan sa siñi tuñi sii ra Esteban, ta tatu sa cahan ra Esteban ña ñihi ca inga ra cuhva cahan ra.

¹¹ Yucuan cuenda i tyiyahvi inga ra cuan sii ra cua catyi: “Siñi ndi sa cahan ra Esteban ndya vaha ñi sii ra Moisés ta sii ra Ndyoo.” Ta tacuan i catyi inga ra cuan.

¹² Ta yucuan cuenda i nduxaan ñiyivi. I cuxaan ra mandoñi ta ra maestro cuenda ley ra Moisés. I sahan ra nu ndyaa ra Esteban, ta i tiin ra sii ra ta i sindyaca ra sii ra nu yucu ra cu tyiño.

¹³ Ta ziqui i ñihi ra sii ra cu sa ndaa sii ra vatyí cua cahan ra cuendu ziqui ra Esteban. I catyi ra cuan: Ihya rayii, cahan xaan ra ndya vaha ñi sii vehe ñuhu maa yo ta sii ley ra Moisés.

¹⁴ Sa siñi ndi vatyí catyi maa ra vatyí cua zanduva ra Jesús, ra ñuu Nazaret, vehe ñuhu ya ta cua zanaa ra costumbre i zacuaha ra Moisés. Tacuan i catyi ra cu sa ndaa cuan, ra cahan cuendu cuan.

¹⁵ I ndyehe xaan tandihí ra cu tyiño sii ra Esteban ta i ndyehe ra vatyí ndisi xaan i nduu nuu ra tañi cuhva caa nuu ángel.

7

Cuhva i cahan ra Esteban

¹ Ta i ndaca tuhun ra cu nuu sii zutu sii ra Esteban ta catyi ra: ¿Atu ndisa ra cuan sa cahan ra?

² Tacuan ta i catyi ra Esteban sihin ra cu tyiño cuan: Amigos. Tyizoho ndo sa quehin. Ñiyivi sahnú sii yo i cuu maa ra Abraham. Ta tyiemvu i ndyehe ra sii ra Ndyoo ra cahnu. Ndyaa ra Abraham ñuu Mesopotamia quivi cuan, ta cuhun ca ra ñuu Harán ta i ndyehe ra sii ra Ndyoo.

³ I cahan ra Ndyoo sihin ra Abraham ta catyi ra: “Quiton ñuun ta ñiyivi suun ta cua cuhun inga ñuu sa cua zañehi suun.”

⁴ Tacuan ta i quita ra Abraham ñuu Caldea ta cuahan ra cua cundyya ra ñuu Harán. Ta sa sihi zutu ra Abraham ta i zaquisi ra Ndyoo sii ra Abraham ihya ñuu nu ndyaa ndo vityi.

⁵ Ñá saha ra Ndyoo ñuhu cuan nu zuhva si sii ra Abraham, zoco saha ra Ndyoo tuhun ra vatyí cua cuhva ra sii si sii ra, ta sii maa ra cua cuu si ta sii ñiyivi sii ra sa i sihi ra. Ta quivi cuan ta coo ca zehe ra Abraham.

⁶ Ihya cuu cuhva i cahan ra Ndyoo sihin ra: “Cua cundito ñiyivi suun inga ñuu nu iyo inga ñiyivi. Cumi ziendu cuiya cua zatyíño ñu tyiño ñiyivi ñuu cuan sihin tundoho vatyí cua cañi ñiyivi ñuu cuan sii ñu.

⁷ Zoco cua tasi tuñi sii ñiyivi ñuu cuan, ta sa yaha cuhva cuan ta cua quita ñiyivi suun ñuu cuan, ta cua zacahnú ñu sii mi ihya.”

⁸ Tacuan i catyi ra Ndyoo, ta ziqui i saha ra sii ra Abraham minoo costumbre sa cua tahndya ñii xiñi xuu lee. Tacuan ta cua coo minoo cuhva sii ñiyivi cuan ta cua nacohon iñi ñu vatyí saha ra Ndyoo tuhun ra sii ñu. Ta sa yaha cacu ra Isaac zehe ra Abraham ta i zavaha Abraham costumbre cuan sihin ra Isaac sa quita uña quivi ra. Ta tacuan tucu i zavaha ra Isaac sihin ra Jacob zehe ra, ta i zavaha tucu ra Jacob sii si sihin tandihí sa usi uu tahan zehe ra. Maa ra cuu ñiyivi sahnú sii yo.

⁹ Ta zuun ñi ra Esteban cuan cahan sihin ra cu tyiño cuan ta catyi ra: Ta minoo zehe ra Jacob, nañi ra José. Ta i cucuihna iñi tandihi yañi ra sii ra. Yucuan cuenda i xico ra sii ra sii ra inga ñuu. Cuahan ra ñuu Egipto, zoco ñá zandoo ra Ndyoo sii ra José.

¹⁰ I tyindyee xaan ra Ndyoo sii ra José vazu i ndyehe ra tundoho. Quivi i saa ra José nu ndyaa ra Faraón, ra cu rey ñuu Egipto, i saha ra Ndyoo sa siñi tuñi sii ra José ta i tahan iñi ra Faraón sii ra ta i saha ra Faraón tyiño sii ra José sa cuu ra gobernador sii tandihi ñuu cuan ta cuhva ndya vehe ra Faraón.

¹¹ Tacuan ta i quisi minoo tama nacahnu nu cu si Egipto sihin nu cu si Caanán, ta i ndyehe xaan ñiyivi tundoho. Ñá ñihi ñiyivi sahnu sii yo sa casi ñu.

¹² I sito ra Jacob vaty iyo trigo ñuu Egipto, ta i tasi ra sii zehe ra, zuun ñi ra cu ñiyivi sahnu sii yo. Yucuan cuu sa xihna ñi saha i sahan ra.

¹³ Ta sa cu uu saha i sahan ra, i zacoto ra José sii ra vaty yañi ra cuu sii ra. Ta yucuan quivi i quisaha sito ra Faraón sii ñiyivi sii ra José.

¹⁴ Ta ziqui i tasi ra José tyiño sii ra Jacob zutu ra vaty quisi ra sihin tandihi ñiyivi sii ra. Ta sa tandihi ñiyivi sii ra, uñi xico sahan tahan ñu.

¹⁵ Ta cuahan ra Jacob ñuu Egipto. Ta yucuan i ndoo ra cuhva ndya i sihi ra, ta tacuan tucu tandihi zehe ra i sihi ra yucuan. Ñá sananuhu ca ra ñuu ra.

¹⁶ Ta i saa quivi sa sindyaca ñiyivi yiqui ra Jacob ta yiqui zehe ra ndya ñuu Siquem. Yucuan i quihvi ra ñuhu vaty sa i nazata ra Abraham ñuhu cuan sii zehe ra Hamor.

¹⁷ Ta ñiyivi sii ra Abraham i nducuaaha xaan ñu ñuu Egipto, ta sa cua saa quivi cua cuhva ra Ndyoo ñuhu sii ñu tañi sa i catyi ra sihin ra Abraham.

¹⁸ Ta i quisaha sindyaca ñaha inga rey ñuu Egipto cuan, rey ra ñá sito sii ra José.

¹⁹ I zandyeha xaan ra tundoho sii ñiyivi sahnu sii yo. Quiñi xaan cuu cuhva i zavaha ra sihin ñu vaty i catyi ra vaty tatu cua cacu zehe ñu cua zavita ñu sii si. Tacuan i catyi ra vaty cuñi ra sa cuu si.

²⁰ Ta zuun ñi tyiemvu cuan i cacu ra Moisés ta ndasa xaan ra nuu ra Ndyoo. I tyixehe zihra ra sii ra sisi vehe uñi yoo.

²¹ Ta minoo quivi ñá cuu ca tyixehe ña sii ra ta i tyihi ña sii ra sisi minoo tyica ta saqui ña sii ra sisi tuyoo caxtyila yuyuu. Ta yucuan nañihi zehe ra Faraón sii ra. I nduu zehe ra sii ña. Maa ña i zacuahnu sii ra.

²² Yucuan cuenda i cahvi ra Moisés tandihi cuhva i sito ñiyivi Egipto. I nducahnu xaan ra. Vaha xaan i cuu cahan ra ta cuaha sa vaha i zavaha ra.

²³ Zuun ñi ra Esteban cuan cahan sihin ra cu tyiño cuan ta catyi ra: Ta sa i ndusi ra Moisés uu xico cuiya ra ta i cuñi ra sa cua ndyehe ra sii ñiyivi sii ra, ñiyivi hebreo.

²⁴ Tacuan ta minoo quivi i ndyehe ra vaty i cañi minoo ra Egipto sii minoo ra hebreo, ta cuahan ra Moisés cua tyindyee ra sii ra hebreo cuan, ta i sañhi ra sii ra Egipto.

²⁵ Sica iñi ra vaty cua coto ñiyivi sii ra vaty i tasi ra Ndyoo sii ra sa zacacu ra sii ñu sii ñiyivi Egipto. Zoco ñá cutuñi iñi ñu.

²⁶ Ta inga quivi i ndyehe ra Moisés vaty sañhi tahan uu tahan ra hebreo, ta i nducu ra Moisés cuhva sa coo vaha ra cuan ta ma cañhi tahan ca ra ta catyi ra: “Tyizoho ndo, amigo. Ña vaha cañhi tahan ndo.”

²⁷ Zoco minoo ra sañhi tahan cuan i quiñi ndaha ra sii ra Moisés ta catyi ra: “¿Yoo ra catyi suhun vaty cundyaca ñohon sii ndi?”

²⁸ Cuñun cañhun sii, tañi i sañhun sii ra Egipto icu.”

²⁹ Ta sa siñi ra Moisés cuhva cuan, ta i sino ra ta cuahan ra ndya inga ñuu vaty yuhu xaan ra. I quita ra Egipto ta cuahan ra ndya Madián. Yucuan i sicoo ñazihra ra, ta i cacu uu tahan zehe ra.

³⁰ I yaha uu xico cuiya. Tacuan ta minoo quivi ñoho ra Moisés sisi cuhu, ta i ndyehe ra minoo taca iñu vaty ñi yucu Sinaí. Cayu tu zoco ñá ndihi tu. Tacuan ta i quituu minoo ángel mahnu tu.

³¹ Iyo xaan i cuñi ra Moisés sa ndyehe ra, ta i tuhva ra nu ndyaa taca iñu cuan vaty cua ndyehe vaha ra. Ta i siñi ra vaty cahan ra Ndyoo sihin ra ta catyi ra Ndyoo:

³² “Yuhvi cui Ndyoo. I zacahnu ñiyivi sahnun sii. Ra Abraham, ra Isaac, ta ra Jacob i zacahnu tandihi ra sii.” Nihi tacuan ñi ca ra Moisés, ta i yuhu xaan ra sa ndyehe ca ra.

³³ Ta ziqui i catyi ra Ndyoo sihin ra: “Tavon ndison vatyi ihya nu nandyoon ñuhu ii cuu si vatyi ihya ndyei.”

³⁴ Ta ziqui catyi tucu ra Ndyoo: “Sa ndyehi ta site vatyi tahan xaan ñiyivi i casi tundoho nu iyo ñu ñuu Egipto cuan. Siñi sa cahan ñu ta site vatyi ña cundyee ca iñi ñu tundoho. Ta vityi noo xique vatyi cua zacacui sii ñu. Ñaha. Coho yo ñuu Egipto.” I catyi ra Ndyoo.

³⁵ Ta zuun ñi ra Moisés cuan cuu ra sa cahan ñiyivi sihin ta catyi ñu: “¿Yoo ra catyi suhun vatyi cuun juez sii ndi ta cundyaca ñohon sii ndi?” Catyi ñu. Ta vityi zuun ñi maa ra cuu ra i tasi ra Ndyoo vatyi cua zacacu ra sii ñiyivi cuan ta cua cundyaca ñaha ra sii ñu. Vatyi tacuan i catyi ángel sa cahan si sihin ra sisi taca iñu cuan.

³⁶ I tava ra Moisés sii ñiyivi ñuu Egipto. I zavaha ra cuaha xaan sa ndyityi ñuu Egipto ta Tyañuhu Cuaha. Ta i zavaha tucu ra sa ndyityi nu i sica noo ñiyivi cuan minoo nu yoñi ñiyivi iyo sisi sa uu xico cuiya.

³⁷ Zuun ñi maa ra Moisés cuan i catyi sihin ñiyivi hebreo: “Cua tasi ra Ndyoo sii minoo ra cua cahan Tuhun Ndyoo. Tañi i tasi ra sii mi, tacuan tucu cua quisi ra. Minoo ra hebreo cua cuu ra.” Catyi ra Moisés.

³⁸ Ta maa ra Moisés cuan cuu ra i sica sihin ñiyivi sa sica noo ñu nu yoñi ñiyivi iyo. Sihin maa ra i cahan ángel cuan yucu Sinaí cuan. Yucuan i siyucu ra sihin ñiyivi sahnun sii yo, ta i ñihi ra Ley ra Ndyoo sa saha ra sii yo.

³⁹ Maa ra Esteban cuu ra cahan tandihi cuhva ya sihin ra cu tyiño ta catyi ra: Zoco ñá tyaa ñiyivi sahnun sii yo yahvi sii ra Moisés. Ñá cuñi ñu tyizoho ñu sa cahan ra. I cuñi ñu sa cunanuhu tucu ñu ndya ñuu Egipto.

⁴⁰ Ta quivi sa ñoho ra Moisés xiñi yucu Sinaí i catyi ñu sihin ra Aarón: “Zavohon inga ndyoo sii ndi vatyi cua zañaha si sii ndi ityi. Ña sito ndi ndya ma cua naa ra Moisés, ra i tava sii ndi ñuu Egipto.”

⁴¹ Yucuan cuu nu i zavaha ñu minoo ndyoo. Tañi caa minoo zindiqui luhlu caa si, ta i zacahnu ñu minoo vico cuenda si, ta sahnun ñu quiti vatyi cua zacahnu ñu vico ndyoo ñu. Ta i sica tahvi ñu sii si. Ta zii xaan i cuñi ñu sihin cuhva i zavaha ñu.

⁴² Yucuan cuenda i saha ra Ndyoo sa zavaha ñu cuhva cuñi maa ñu. Saha ra sa zacahnu ñu ñicandyi ta luna ta tiño. I zavaha ñu cuhva catyi minoo profeta ta tyiemvu. I catyi ra cuan vatyi catyi ra Ndyoo:

Ndoho ñiyivi hebreo.

Yivi sii mi i zacahnu ndo sa sica noo ndo sa uu xico cuiya cuan.

⁴³ I cuñi ca ndo sii ndyoo sa yivi Ndyoo cuu sa ndisa. Nacahnu nu i sica noo ndo i sica noo tucu minoo vehe ñii sa cuenda ra Moloc.

Ta inga ndyoo sindyizo ndo caa si cuhva caa tiño. Nañi si Renfán.

Maa ndo i zavaha sii ndyoo cuan, ta maa ndo i zacahnu sii si. Ta yucuan cuenda cua tasi sii ndo sica xaan.

Cua yaha ndo ñuu Babilonia.

Tacuan i catyi ra Ndyoo sihin ñiyivi cuan.

⁴⁴ Ta i cahan ca ra Esteban sihin ñiyivi ta catyi ra: Ñiyivi sahnun sii yo, i sica noo minoo vehe ñii sihin ñu nu i sica noo ñu nu yoñi ñiyivi iyo. Ta sisi si i zacahnu ñu sii ra Ndyoo. I zañaha ra Ndyoo sii ra Moisés cuhva cua sino si, ta zuun cuhva i catyi ra Ndyoo, tacuan i sino si.

⁴⁵ Ta quivi i sindyaca ñaha ra Josué i quisi ndyaca ñiyivi vehe cuan ihya ñuu Jerusalén, ta sahnun tahan ñu sihin ñiyivi ihya ta i tava ra Ndyoo sii ñu. Tacuan i ñihi ñiyivi sahnun sii yo ñuhu nu ndyaa yo vityi vatyi saha ra Ndyoo sa zahacanaa ñu. Ta sisi vehe ñii cuan i zacahnu ñu sii Ndyoo ndya ta quivi ra rey David.

⁴⁶ I saha xaan ra Ndyoo ndatu sii ra David. Tacuan ta i sica ra David minoo tumañi iñi sii Ndyoo sa cua zandaa ra minoo vehe vaha sa cuenda Ndyoo. Zuun ñi Ndyoo ra i zacahnu ra Jacob ta tyiemvu cuu ra.

⁴⁷ Ta ñá saha ra sa zandaa ra David vehe ra. Maa ra rey Salomón cuu ra i zandaa vehe ra Ndyoo.

⁴⁸ Zoco ña ndyaa ra Ndyoo sisi vehe zavaha ñiyivi. I catyi minoo profeta:

⁴⁹ Catyi ra Ndyoo: Yuhvi ndyaca ñehi andivi ta ñuu ñiyivi.

Ma cuu zavaha ndo minoo vehe vaha xaan ta cua cundyei sisi si vatyi ña cuñi si nu cua cundyei ta nu cua quitati.

⁵⁰ Yuhvi cuu ra i zavaha tandihi. Catyi ra Ndyoo.

⁵¹ Ta ziqui i catyi tucu ra Esteban sihin ñiyivi cuan: Ñihi xaan iñi ndo. Inuu cuii ñi caa ndo tañi i cuu ñiyivi sahnu sii yo. Ña saha ndo sa cundyaca ñaha ra Ndyoo añima ndo. Ña tyisaha ndo sa ndisa. Sahñi tahan ndo sihin Tatyí Ii ra Ndyoo.

⁵² I cañi ñiyivi sahnu sii ndo sii tandihi cuii ra i cuu profeta. I sahñi ñu sii tandihi ra i nacatyi vatyi nu cua quisi quivi ta cua quisi minoo ra vaha xaan. Ta sa quisi ra vaha xaan cuan, ra Jesús cuu ra. Ta maa ndo i tyaa ndo cuatyi sata ra, ta i sahñi ndo sii ra.

⁵³ Maa ndo cuu ra ñihi ley Ndyoo i saha ángel sii ndo, ta ña tyaa ndo yahvi sii si. Catyi ra Esteban.

Sihi ra Esteban

⁵⁴ I siñi ra cu tyiño sa cahan ra Esteban, ta i cuxaan xaan ra sihin ra ndya cuhva sisi quihñi noho ra.

⁵⁵ Zoco i situ cuii Tatyí Ii sii ra Esteban. I nandyehé ndaa ra Esteban ityi ziqui, ta i ndyehé ra sii ra Ndyoo cahnu, ta i ndyehé ra sii ra Jesús nandyaa ra ityi siyo cuaha ra Ndyoo.

⁵⁶ Ndyehé ndo, catyi ra. Ndyehi sa nuña gloria ta ndyehi sii ra i quisi ndya gloria. Nandyaa ra ityi siyo cuaha ra Ndyoo.

⁵⁷ Tacuan ta i tyazi ndaha ra cu tyiño cuan zoho ra. I cana saa xaan ra vatyi cuxaan ra. Yatyí cuii ñi i tuhva ra nu iñi ndyaa ra Esteban vatyi cuñi ra queen ra sii ra.

⁵⁸ I tava ra sii ra Esteban ndya yu ñuu vatyi cua cañi ra sii ra sihin yuu ta cua cahñi ra sii ra. I zandoo ra cu tyiño cuan zahma cahnu ndisi ra sihin minoo ra yoco nañi Saulo vatyi cua cucumi ra sii si.

⁵⁹ Ta i cañi ra sii ra Esteban sihin yuu, ta maa ra Esteban i sica tahvi xaan ra sii ra Ndyoo ta catyi ra: Jesús yoho ndyaca ñohon sii. Nacuhun añime suhun.

⁶⁰ Ta yucuan i sicuiñi siti ra Esteban, ta i cana saa ra: Jesús, ma tyoon cuatyi ndyicuu ra ya ziqui ra. Tacuan i cahan ra Esteban ta i sihi ra.

8

Sahñi tahan ra Saulo sihin ñiyivi sino iñi sii ra Jesús

¹⁻² Tahan xaan iñi ra Saulo sa i sahñi ñiyivi sii ra Esteban. Tacuan ta i quisi zuhva ra ndyico sii ra Jesús, ta i tyihi ra sii ra Esteban si ñuhu. Sacu ra vatyi i sihi ra Esteban. Ta zuun ñi quivi cuan i sahñi tahan ñiyivi ña sino iñi sihin ñiyivi sino iñi sii ra Jesús ñuu Jerusalén cuan. Ta i sino ñiyivi sino iñi. Zuhva ñu i sino ndya nu cu si Judea, ta inga ñu i sino ñu ndya Samaria. Zoco sa usi uu tahan ra apóstol ñá sino ra cuan.

³ Ta ra Saulo cuan i zayanga xaan ra sii ñiyivi ndyico sii ra Jesús. Cuaha xaan nu i quihvi ra vehe ñiyivi ta caño ho ra sii rayi a sii ñu zihí, ta tyihi ra sii ñu vehe caa.

Cuhva i sito ñiyivi nu cu si Samaria Tuhun Ndyoo

⁴ Ta sa i quita ñiyivi ñuu Jerusalén cuan sa i sino ñu ta i zacoto ñu sii ñiyivi tandihi ñuu nu i yaha ñu Tuhun Ndyoo.

⁵ Ta minoo ra sa nañi Felipe i saa ra nu cu si Samaria, ta i quisaha ra nacatyi ra sihin ñiyivi tuhun ra Jesús.

⁶ I titahan ñiyivi, ta vaha xaan i tyizoho tandihi ñu sa cahan ra Felipe, ta i ndyehé ñu sa ndyityi i zavaha ra.

⁷ Vatyi i tava ra cuaha xaan tatyí cuihna sii ñiyivi. I cana saa xaan tatyí cuihna sa quita si sii ñiyivi, ta ziqui i nduvaha ñu. Cuaha xaan ra xii i nduvaha ta ra coxo.

⁸ Yucuan cuenda i tahan xaan iñi tandihi ñiyivi ñuu cuan.

⁹ Zoco minoo ra sinañi Simón, i cuu ra ra tazi ñuu cuan, ta i zandavi ñaha ra sii cuaha xaan ñiyivi ityi Samaria vaty catyi ra vaty ra ñiñi xaan cuu ra. Iyo xaan i cuñi tandihi ñiyivi sa cuenda maa ra quivi cuan.

¹⁰ Ta tandihi ñiyivi cuca cuhva ndya ñiyivi ndahvi i tyizoho ñu sa cahan ra ta catyi ñu: Cahnu xaan cuu cuhva ra ya vaty maa ra Ndyoo cuu ra saha cuhva cuan sii ra.

¹¹ Ta i tyizoho ñu sa cahan ra vaty sa naha xaan i zandavi ñaha ra sii ñu sihin cuhva i zavaha ra.

¹² Tacuan ta i saa ra Felipe, ta i zacuaha ra sii ñiyivi cuhva ndyaca ñaha ra Ndyoo ta cuhva cahnu xaan iyo cuhva sii ra Jesucristo. Tacuan ta i sino iñi ñu sa cahan ra Felipe. Ta i sicoo ndutya cuaha rayii ta ñu zihí.

¹³ Ta i sino tucu iñi ra Simón, ra tazi cuan, ta i sicoo ndutya ra ta ndutahan ra sihin ra Felipe. Iyo xaan i cuñi ra sihin sa ndyityi nahnu i zavaha ra Felipe.

¹⁴ Ta ra apóstol i ndoo ra ñuu Jerusalén ta sa siñi ra vaty sino iñi ñiyivi ñuu Samaria sii ra Jesús ta ziqui i tasi ra sii ra Pedro ta ra Juan ndya indyacuán.

¹⁵ I saa ra Pedro ta ra Juan ta i sica tahvi ra sii Ndyoo sa natasi ra Taty Li ra aña ñiyivi sino iñi sii ra Jesús indyacuán.

¹⁶ Vaty i sicoo ndutya ñiyivi cuan maa ñi sa cuenda ra Jesús ta tañaha ca noo xica Taty Li sii ñu.

¹⁷ Tacuan ta i tyizo ra Pedro ta ra Juan ndaha ra sii ñu ta i quihvi Taty Li aña ñu.

¹⁸ I ndyehe ra Simón cuhva i tyizo ra apóstol ndaha ra sii ñiyivi cuan ta i quisi Taty Li sii ñu ta i catyi ra Simón:

¹⁹ Cua tyiyahvi sii ndo tatu cuhva ndo cuhva cuan sii, vaty yoo ra cua tyize ndehi ta cua quihvi Taty Li aña ra.

²⁰ Tacuan i catyi ra. Ta catyi ra Pedro sihin ra: Nacunaa moo sihin xuhun vaty sica iñun vaty cuu zaton sa saha maa ra Ndyoo.

²¹ Ma cuu zatyíño moo tyíño ya vaty ña vaha aña sihin ra Ndyoo.

²² Zañon cuhva sa quiñi xaan sica iñun ta caca tahvun sii Ndyoo sa cua zandasi ra cuatyun.

²³ Vaty site yozo caa iyon. Vaty cucuihna xaan iñun. Tañaha ca zandon cuaty zacuun. Ta cua zatívi si suun.

²⁴ Tacuan i catyi ra Pedro, ta i catyi ra Simón sihin ra: Caca tahvi ndo sii ra Ndyoo sa cuenda mi vaty ma tahan si sii cuhva sa catyi ndo. Catyi ra.

²⁵ Tacuan i cuu. Ta sa yaha zacuaha ra Pedro ta ra Juan Tuhun Ndyoo, ta i saha ra cuenda yozo caa zavaha ra Ndyoo, ta nacaty ra sihin ñiyivi yozo caa cuu cacu ñu ta ma cuhun ñu andyaya. Nacahnu Samaria i sahan ra, ta ziqui i sinanuhu ra ndya ñuu Jerusalén.

Natuhun ra Felipe sihin minoo ra ñuu Etiopía

²⁶ Ta sa yaha cuhva cuan ta ziqui i cahan minoo ángel ra Ndyoo sihin ra Felipe ta catyi si: Nduviton ta cuahan ityi tyañuhu ityi quita ñuu Jerusalén ya ta cuhun ndya nu cu si Gaza. Ityi cuan cuu nu yoñi maa ñiyivi iyo.

²⁷ I nduvita ra Felipe ta cuahan ra. Ta ityi cuahan ra i ñihi tahan ra sihin minoo ra ñuu Etiopía. Ra yucuan, ica iyo ra. Ta ndyizo ra minoo tyíño cahnu sa sicumi ra tandihi xuhun ña Candace, ñaha ndyaca ñaha sii ñiyivi ñuu Etiopía cuan. Sahan ra cuan ñuu Jerusalén vaty tuhva maa ra zacahnu sii ra Ndyoo tañi zavaha ñiyivi hebreo.

²⁸ Ñoho ra cuan sisi carreta ra sa cua nuhu ra. Ta cahvi ra tuhun i tyaa ra Isaías, minoo profeta ta tyiemvu.

²⁹ Tacuan ta i catyi Taty Li sihin ra Felipe: Cuahan cua zatohon sii ra vasi sihin carreta cuan.

³⁰ Ta sa tuhva ra Felipe nu vasi ra ta i siñi ra sa cahvi ra nuu libro ra Isaías, ta i ndaca tuhun ra Felipe sii ra ta catyi ra: ¿Atu cutuñi iñun sa cahvun?

³¹ Ta i catyi ra cuan sihin ra: Ña cutuñi iñi vaty yoñi ra cuu nacaty sihin ñaa cuñi si catyi si. Ta i cahan ra sihin ra Felipe sa ndaa ra ta cundyaa ra sihin ra.

³² Ihya cuu tuhun i cahvi ra cuan:

Quihin ñiyivi sii mvee ticatyi ta yoco ñu ixi ti ta ñahñi sa cahan ti.

Ta quihin ñu sii ti, ta cua cahñi ñu sii ti ta ñahñi sa cahan ti.

Ta tacuan tucu maa ra, cua ndyehe ra tundoho ta ñahñi cua catyi ra.

³³ Cua vacu ndyaa xaan ñu sii ra ta ña ndoo cua zandaa ñu tyiño cuenda ra.

Cua caca iñi ñiyivi zavaha ndya vaha ñi sihin ra vatyí yoñi zehe ra cua coo vatyí sahñi ñu sii ra.

Yucuan cuu tuhun cahvi ra cuan.

³⁴ Tacuan ta i catyi ra Etiopía sihin ra Felipe: Nacatyun sihin sa ndyoo ñi. ¿Yoo sii cuenda cahan ra Isaías? ¿Atu zuun ñi tuhun maa ra cahan ra? a ¿atu cahan ra sii inga ra?

³⁵ Yucuan ta zuun ñi sihin tuhun cuan i quisaha ra Felipe nacatyí ra, ta i sityiño tucu ra inga Tuhun Ndyoo, nu cahan si sa cuenda ra Jesús. Ta i zacuahá ra sii ra vatyí ra Jesús cuu ra cua zacacu sii ñiyivi. Ra sa ndatu xaan ñu.

³⁶ Ta sa cua yaha ra nu iyo ndutyá ta i catyi ra Etiopía: Ndyehe, ihya iyo ndutyá. ¿Atu cuu coo ndutyé?

³⁷ Ta catyi ra Felipe sihin ra: Cuu tatu sino iñun sii ra Jesús sihin tandihí cuii añimon. Ta i catyi ra cuan: Sino iñi vatyí ra Jesús, zehe ra Ndyoo Zutu yo cuu sii ra.

³⁸ Tacuan ta i catyi ra Etiopía vatyí nanacuiñi carreta, ta i noo nduu tahan ra. Ta i sicoo ndutyá ra i zacuu ra Felipe sisi ndutyá cuan.

³⁹ Ta sa cua quita ra sisi ndutyá, ta i quihin Tatyí Ii sii ra Felipe. Ná ndyehe ca ra Etiopía cuan sii ra Felipe, ta zii xaan i cuñi ra Etiopía sa ñihi ra cuhva cuenda ra Jesús.

⁴⁰ Ta i sindyaca Tatyí Ii sii ra Felipe ndya ñuu Azoto. Yucuan sahan ra minoo minoo ñuu sa zacuahá ra sii ñiyivi sa cuenda ra Jesús ta cuhva cua cacu ñiyivi ta ma cuhun ñu andyaya. Ta cuhva cuan cuahan ra ndya cuhva ndya i saa ra Cesarea.

9

Cuhva i nazama ra Saulo cuhva iyo ra

¹ Ta ra Saulo tañaha ca cua zaña ra cuhva sa sahñi tahan ra sihin ñiyivi ndyico sii ra Jesús, ta ñá zaña ra sa nducu cahñi ra sii ñu. Ta yucuan cuenda sahan ra nu ndyaa ra cu nuu sii ra cu zutu.

² Ta i sica ra Saulo sa tyaa ra cu nuu carta sa cuhun sihin ra ñuu Damasco ndya vehe ñuhu hebreo. Ta tacuan cua ñihi ra Saulo cuhva vatyí tatu nañihi ra sii ñiyivi ndyico sii ra Jesús ta cua cuu tiin ra sii ñu cundyaca ra sii ñu vehe caa ñuu Jerusalén, tandihí ñu, ñu zihí ta rayii.

³ Ta i quihin ra Saulo ityi cuahan ra. Ta sa cua saa ra ñuu Damasco ta zuun ñi caa cuhva cuan i ndyehe ra minoo ñuhu cahnu xaan. I zandisi si nacahnu nu cuahan ra.

⁴ Ta i nduva ra nu ñuhu ta i siñi ra nduzu ra Jesús sa cahan ra sihin ra ityi ziqui ta catyi ra sihin ra: Saulo, Saulo. Sahñi tohon sihin mi.

⁵ Ta i catyi ra Saulo: ¿Yoo sa cahan, tata? Ta i catyi ra Jesús sihin ra: Yuhvi cui Jesús. Sahñi tohon sihin mi, zoco zuun ñi sii moo zañicuehun.

⁶ Tacuan ta i yuhu xaan ra Saulo ta catyi ra: ¿Ñaa sa cuñun zavehi? Ta i catyi ra Jesús sihin ra: Nduviton ta cuhun ndya ñuu ya, ta cua nacatyí ñiyivi suhun ñaa sa cua zavohon.

⁷ Ta ra ndihí sihin ra Saulo iyo xaan i cuñi ra ndya cuhva ñá cuu ca cahan ra vatyí i siñi ra nduzu sa cahan, zoco yoñi ñiyivi i ndyehe ra.

⁸ I nduvita ra Saulo, ta i nuña ra nuu ra, zoco ñá cuu ca ndyehe ra. Yucuan cuenda i tiin amigo ra ndaha ra, ta i sindyaca ra sii ra ndya ñuu Damasco cuan.

⁹ Yaha uñi quivi sa ñá cuu ndyehe ra Saulo. Ná sasi maa ra, ta nu ñá sihi ra ndutyá.

¹⁰ Ta zuun ñi ñuu Damasco cuan iyo minoo ra nañi Ananías. I sindyico ra sii ra Jesús. Minoo saha i cahan ra Ndyoo sihin ra sisi ñimahna ta catyi ra: ¡Yoho Ananías! Ta i catyi ra Ananías: ¿Ñaa sa cuñun sihin, tata?

¹¹ Ta i catyi ra Ndyoo Zutu yo sihin ra: Nduvita ta cuhun calle sa nañi ñin ndoo ndita ñi. Ta sisi vehe ra Judas cua nanducun sii minoo ra ñuu Tarso. Nañi ra Saulo ta sica tahvi ra sii mi vityi.

¹² Sa tahan tucu maa ra Saulo ñimahna ta sisi ñimahna i ndyehe ra vatyí vasun. I ndyehe ra vatyí quihvun ta tyizon ndohon sii ra vatyí cua nandyehé tucu ra. Tacuan i catyi ra Ndyoo sihin ra Ananías.

¹³ Ta sa siñi ra Ananías cuhva cuan ta i catyi ra: Ndyoo Zuti, sa cuaha xaan ñiyivi i nacatyí ñu sihin mi vatyí cuaha xaan sa ña vaha i zavaha ra cuan sihin ñiyivi sino ñni suun ñuu Jerusalén.

¹⁴ Ta vityi vasi ra ihya ta iyo cuhva sii ra sihin ra cu nuu sii zutu nahnu vatyí cua tñin ra sii tandihí ñiyivi sica tahvi suun ta tyihi ra sii ndi vehe caa.

¹⁵ Zoco i catyi ra Ndyoo sihin ra Ananías: Cuahan vatyí i casi mi sii ra Saulo cuan vatyí cua cahan ra sa cuenda mi sihin ñiyivi sa yivi ñiyivi hebreo cuu, ta sihin rey ñiyivi cuan ta cua zacuaha ra sii ñiyivi hebreo, ñiyivi sii ndo, ndihí ca.

¹⁶ Ta cua zañehi sii ra cuhva cua tahan ra tundoho sa cuenda mi.

¹⁷ Tacuan ta ziqui cuahan ra Ananías ndya vehe nu iyo ra Saulo. I quihvi ra ta i tyizo ra ndaha ra sii ra ta i catyi ra: Amigo Saulo, ra Jesús cuu ra ndyaca ñaha sii yo. Ta i quituu ra nuu moo ityi vasun. Ta vityi i tasi ra sii mi ihya vatyí cua nandyehun inga saha ta cua quihvi Tatyí li añimon.

¹⁸ Ta zuun ñi caa cuhva cuan i quita minoo sa quita tañi caa zoo tyiyaca siti nuu ra Saulo. Ta ziqui i cuu nandyehé ra. Tacuan ta cuahan ra Saulo ta i sicoo ndutya ra (vatyi cua cundyico ra sii ra Jesús).

¹⁹ Ta ziqui i sasi ra xita, ta i nacoo tundyee ñni sii ra. Ta i ndoo ra zuhva quivi sihin ñiyivi sino ñni sii ra Jesús ñuu Damasco.

Zacuaha ra Saulo Tuhun Ndyoo sii ñiyivi ñuu Damasco

²⁰ Tacuan i cuu ta ziqui i quisaha ra Saulo zacuaha ra sii ñiyivi tandihí vehe ñuhu hebreo ñuu Damasco. I nacatyí ra sihin ñu vatyí ra Jesús, zehe Ndyoo cuu sii ra.

²¹ Ta sa siñi ñiyivi sa cahan ra, ta iyo xaan i cuñi tandihí ñu. Ta i quisaha catyi ñu sihin tahan ñu: Zuun ñi ra ihya cuu ra sahñi tahan xaan sihin ñiyivi sino ñni sii ra Jesús ñuu Jerusalén. Ta i saa ra ihya vatyí cua tñin ra sii ñiyivi sino ñni sii ra Jesús ñuu ya ta cundyaca ra sii ñu ndya nu ndyaa ra cu nuu sii zutu nahnu. Catyi ñu.

²² Zoco ñá zaña ra Saulo sa zacuaha ra sii ñiyivi. I zacuaha ra sii ñu vatyí ra Jesús cuu ra cu Cristo sa ndisa. Ta ñá ñihí ca ñiyivi hebreo ñuu Damasco cuhva cahan ñu inga cuhva.

I sino xehe ra Saulo

²³ Naha zuhva ta ziqui i zacasi tahan ra hebreo, ra ña sino ñni Tuhun Ndyoo, tyiño sa cua cahñi ra sii ra Saulo.

²⁴ Zoco i sito ra Saulo cuhva sa sica ñni ra cuan. Ta ñuu cuan sicoo minoo nuzama siconduu. Ñiyaca ta ndiyaca i sicumi xaan ra hebreo cuan tandihí yuvehe si vatyí cua tñin ra sii ra Saulo tatu cua yaha ra ta cua cahñi ra sii ra.

²⁵ Zoco i zacacu amigo ra Saulo sii ra minoo sa cuaa vatyí i zanoo ra sii ra nuzama cuan sisi minoo tyica cahnu, ta i sino ra Saulo.

Cuahan ra Saulo ñuu Jerusalén

²⁶ Cuahan ra Saulo ñuu Jerusalén. I cuñi ra sa cua ndutahan ra sihin ñiyivi sino ñni sii ra Jesús yucuan, zoco yuhu xaan ñu sii ra. Ñá sino ñni ñu sa cua cundyico ra sii ra Jesús sa ndisa cuii.

²⁷ Tacuan ta i quihin ra Bernabé sii ra Saulo ta sindyaca ra sii ra ndya nu ndyaa ra apóstol ta catyi ra sihin ra: Ica ra Saulo ya i ndyehe ra sii ra Jesús ityi, ta i cahan ra Jesús sihin ra. Ta ziqui vaha xaan i zacuaha ra Saulo sii ñiyivi ñuu Damasco sa cuenda ra Jesús ta ñá yuhu ra. Catyi ra Bernabé.

²⁸ Tacuan ta i ndoo ra Saulo sihin ñiyivi sino ñni sii ra Jesús.

²⁹ Ta nacahnu ñuu Jerusalén i zacuahá ra sii ñiyivi tuhun ra Jesús. Ta i natuhun xaan ra Saulo sihin ñiyivi hebreo, ra cahan zahan griego. Ta i cuñi ra cuan sa cahñi ra sii ra Saulo (vatyi ñá sino iñi ra sa cahan ra).

³⁰ Ta sa sito ra sino iñi sii ra Jesús cuhva cuan ta i sindyaca ra sii ra Saulo ndya ñuu Cesarea. Ta yucuan i tyihi ra sii ra Saulo sisi minoo barco ta natasi ra sii ra ityi ñuu ra, ñuu Tarso.

³¹ Tacuan ta i ndutaxi nu yucu ñiyivi sino iñi sii ra Jesús nacahnu nu cu si Judea ta Galilea ta Samaria. Ta ñá cuxaan inga ñiyivi sihin ñu. Ta cuaha xaan ca ñiyivi i quisaha sino iñi ñu Tuhun Ndyoo, ta i tyindyee xaan Tatyí li sii tandihí ñu. Ta i yuhu ñu sa ma tyaa ñu yahvi sii Ndyoo.

Nduvaha ra Eneas

³² Cuahan ra Pedro nacahnu ñuu nu iyo ñiyivi sino iñi sii ra Jesús. Ta i saa ra ñuu Lida.

³³ Yucuan i ndyehe ra sii minoo ra xii. Nañi ra Eneas. Sa uña cuiya caa ra vatyi ñá cuu caca ra.

³⁴ Tacuan ta i catyi ra Pedro sihin ra: Eneas, zanduvaha ra Jesucristo suun. Nduviton ta natuun yuun. Tacuan ta i nduvita ra Eneas vatyi sa i nduvaha ra.

³⁵ Tandihí ñiyivi ñuu Lida cuan sihin ñu ñuu Sarón i ndyehe ñu sa nduvaha ra Eneas. Ta i sino iñi ñu sii ra Jesús. Ta i zandoo ñu costumbre sahnu sii ñu.

Nandoto tucu ña Dorcas

³⁶ Ta ñuu Jope cuan sicoo minoo ñaha nañi ña Tabita. Ta sihin zahan griego nañi ña Dorcas. Sino iñi ña sii ra Jesús, ta tandihí quivi i zavaha ña sa vaha, ta i tyindyee ña sii ñiyivi ndahvi.

³⁷ Ta quivi cuan i quihin cuehe sii ña Dorcas, ta i sihi ña, ta i zacutyi ñiyivi sii coño ñuhu ña, ta i saqui ñu sii ña si vehe ña, sa cu uu vehe toto ndya ziqui.

³⁸ Ta sa ñihí ñiyivi tuhun vatyi ndyaa ra Pedro inga ñuu nañi Lida yatyi ñi ñuu Jope cuan. Ta i tasi ñu sino iñi sii uu tahan ra cua zañiñi ra sii ra sa quisi ra.

³⁹ Tacuan, ta cuahan ra Pedro sihin ra cuan. Ta sa saa ra yucuan ta i sindyaca ñu sii ra ndya nu caa ndiyi sisi vehe toto cuan ndya ziqui. Yucu tandihí ñu ndahvi, ñu sihi yí, sisi vehe cuan. Sacu xaan ñu. Zañaha ñu tandihí vestido, tandihí coto i zavaha ña Dorcas ta ndito ña.

⁴⁰ Tacuan ta i tava ra Pedro sii tandihí ñu, ta i sicuñi siti ra, ta i sica tahvi ra sii Ndyoo. Ta ziqui i catyi ra sihin ñaha cuan: Nduviton maha Tabita. Tacuan ta nandyehe ña. I ndyehe ña sii ra Pedro ta nacundyaa ña.

⁴¹ I tiin ra Pedro ndaha ña ta i zanacuiñi ndyaa ra sii ña. Tacuan ta i cana ra sii ñu sino iñi ta sii ñu ndahvi, ñu sihi yí cuan, vatyi sa nandoto ña.

⁴² Ta i sito tandihí ñiyivi ñuu Jope. Ta cuaha xaan ñu i sino iñi sii ra Jesús.

⁴³ Ta i ndoo ra Pedro zuhva ca quivi ñuu cuan vehe ra nañi Simón. Ta ra Simón zatyahyu ra ñi vatyi yucuan cuu tyiño ra.

10

Ra Pedro sihin ra Cornelio

¹ Ñuu Cesarea i sicoo minoo ra nañi Cornelio. Ra cu nuu i cuu ra sii minoo ziendu zandaru. Ra Italia i cuu zandaru sa ndyaca ñaha ra.

² Vaha xaan ra i cuu ra Cornelio sihin tandihí ñiyivi sii ra. I zacahnu ra sii Ndyoo, ta yuhu ra sa ma tyaa ra yahvi sii ra. I tyindyee xaan ra sii ñiyivi hebreo sihin xuhun ra. Ta i cahan ra sihin ra Ndyoo tandihí cuhva.

³ Minoo saha tañi caa uñi sa sahiñi i ndyehe ra minoo ángel. I quihvi si nu ndyaa ra ta catyi si: ¡Cornelio!

⁴ Yuhu xaan ra Cornelio ta i ndyehe xaan ra sii ángel cuan ta catyi ra: ¿Ñaa sa cuñun sihin, tata? Tacuan ta i catyi ángel cuan sihin ra: Sa siñi ra Ndyoo tandihí cuhva i cohon sihin ra. Ta zii cuñi ra vatyi tyindyee xoon sii ñiyivi ndahvi.

⁵ Ta vityi cuñi si sa tasun uu a uñi tahan muzun ndya ñuu Jope. Indyacuan iyo minoo ra nañi Simón. Ta zuun ñi nañi tucu ra Pedro. Cua canon sii ra vatyí quisi ra ihya.

⁶ Ndyaa ra vehe inga ra nañi Simón. Ra zatyahyu ñii cuu ra. Yuhu tyañuhu iyo vehe ra. Cua catyi maa ra Pedro cuan ñaa sa cua zavohon. Tacuan i catyi ángel cuan.

⁷ Ta sa cuahan ángel cuan ta i cana ra Cornelio sii uu tahan muzu ra sihin minoo zandaru ra cumi sii ra. Sino iñi zandaru cuan sii Ndyoo.

⁸ I nacatyí ra Cornelio sihin ra tandihí sa ndyehe ra ta ziqui i tasi ra sii ra ndya ñuu Jope.

⁹ Ta inga quívi i quihin ra ityi cuahan ra. Ta sa cua saa ra ñuu Jope tañi maa ora ta zuun ñi caa cuhva cuan i ndaa ra Pedro xiñi vehe ra vatyí cua cahan ra sihin Ndyoo.

¹⁰ Sizoco ra ta cuñi ra sa cuzama ra zoco ñii ñi sa zavaha ñu sa casi ra i ndaa ra xiñi vehe. Tacuan ta i quisaha zandyehe ra Ndyoo sii ra minoo sa ndyehe ra.

¹¹ I ndyehe ra vatyí nuña yutyí andívi ta i noo xica minoo tañi minoo zahma yuu cahnu. I noo si sihin cumi tahan siqui si.

¹² Sisi zahma yuu cuan ñoho tandihí cuii nuu quití sa iyo cumi tahan saha sihin coo nahnu ta sihin zaa.

¹³ Tacuan ta i siñi ra Pedro sa cahan ra Ndyoo ta catyi ra: Nduviton Pedro ta cahñun sii tí ta casun.

¹⁴ Zoco i catyi ra Pedro: Ma cuu tata vatyí ña tuhve casi tandihí ñaa sa ica cuenda costumbre maa ndi.

¹⁵ Inga saha i catyi tucu ra Ndyoo sihin ra: Ña vaha catyi moo vatyí ica sa sehi suun.

¹⁶ Ta tacuan i cahan tucu ra Ndyoo sihin ra. Ta sa cu uñi saha i cahan ra tacuan ta ziqui i nandaa tucu zahma cuan ityi ziqui.

¹⁷ Ta i sica iñi ra Pedro ñaa cuhva cuu si cuan, ta zuun ñi caa cuhva cuan i saa sa uñi tahan ra i tasi ra Cornelio yuvehe. Vatyí i ndaca tuhun ra sii ñiyívi ta tacuan i nañihi ra vehe ra Simón.

¹⁸ Ta sa saa ra yuvehe cuan, i cana saa ra ta catyi ra: ¿Atu iyo minoo ra nañi Simón Pedro ihya?

¹⁹ Ta zuun ñi cuhva cuan, sica iñi ra Pedro ñaa sa ndyehe ra ta i catyi Tatyí li sihin ra: Nanducu uñi tahan ra suun.

²⁰ Cua noon ta cua cuhun sihin ra. Ma caca iñun vazu yívi ñiyívi hebreo cuu ra vatyí yuhvi cuu ra i tasi sii ra nu ndyoon.

²¹ Tacuan ta i noo ra Pedro nu yucu ra i tasi ra Cornelio ta catyi ra: Zuun yuhvi cui ra nanducu ndo. ¿Ñaa cuenda vasi ndo?

²² Ta i catyi inga ra cuan: Vasi maa ndi cuenda ra Cornelio. Minoo ra vaha xaan cuu ra. Ta cuñi xaan ra sii Ndyoo ra zacahnu ndoho ñiyívi hebreo. Sa catyi minoo ángel Ndyoo sihin ra vatyí vaha cua cana ra suun sa cuhun ndya vehe ra. Ta cua tyizoho ra ñaa sa cua nacatyun sihin ra.

²³ Tacuan ta i quihvi ra cuan sisi vehe. Ta i ndoo ra sihin ra Pedro minoo ñuu. Ta inga quívi cuahan ra Pedro sihin ra ta cuahan tucu zuhva ra sino iñi sii ra Jesús, ra ñuu Jope cuan.

²⁴ Ta sa cu uu quívi i saa ra ñuu Cesarea nu i ndatu ra Cornelio sii ra sihin cuaha xaan ñiyívi sii ra sihin amigo ra vatyí i cana ra Cornelio sii tandihí ra.

²⁵ Ta sa saa ra Pedro vehe ra ta i quita ra Cornelio si vehe ra ta i sicuñi siti ra nuu ra vatyí cua zacahnu ra sii ra.

²⁶ Zoco i zanduvita ra Pedro sii ra ta catyi ra: Nduviton vatyí ñiyívi cuu mi tañi moo.

²⁷ Ta ziqui i quisaha natuhun ra ta i quihvi ra sisi vehe ra Cornelio. I ndyehe ra Pedro vatyí tuu xaan ñiyívi yucu.

²⁸ Ta i catyi ra Pedro: Sito maa ndo vatyí ña saha costumbre maa ndi ñiyívi hebreo sa titahan ndi sihin ra sa yívi ñiyívi hebreo cuu, nu sa quihvi ndi vehe ra. Zoco i zañaha ra Ndyoo sii vatyí ña vaha cua catyi vatyí cuxi caa iyo ndo ta ña vaha cua catyi vatyí ma cuu titehin sihin ndo.

²⁹ Yucuan cuenda yatyí xaan vasi sa i cana ndo sii. Ta ñá catyi sa ma cuu quisi. Ta vityí cuñi cote ¿ñaa cuenda i cana ndo sii?

³⁰ Tacuan i cahan ra Pedro ta ziqui i catyi ra Cornelio: Sa yaha cumi quivi ta zuun ñi tyehen cuhva i sica tahvi sii ra Ndyoo sisi vehi vatyi tacuan tuhve zacuu sa sahiñi, ta i quituu minoo ra nui. Cuisi xaan zahma ra.

³¹ Ta i catyi ra cuan sihin: “Cornelio, i siñi ra Ndyoo sa cohon sihin ra ta nacohon iñi ra tandihi sa zavohon ta cuhva tyindyeun sii ñiyivi ndahvi.

³² Vityi cua tasun tyiño ndya ñuu Jope vatyí cua canon sii minoo ra sa nañi Simón Pedro. Ndyaa ra vehe minoo ra zatyahyu ñii. Nañi tucu ra cuan Simón. Yuhu tyañuhu iyo vehe ra. Naquisi maa ra ta cua zacuaha ra suun.”

³³ Tacuan i cuu si, ta vatyí i tasi tyiño sa nanducu ñiyivi suun. Ta vaha vatyí i quisun. Ta vityi yucu yo ihya nuu ra Ndyoo, ta cuñi ndi tyizoho ndi tandihi cuii cuhva tasi ra Ndyoo suun sa zacoton sii ndi.

Cuhva i cahan ra Pedro vehe ra Cornelio

³⁴ Tacuan ta i quisaha cahan ra Pedro ta catyi ra: Vityi cutuñi iñi vatyí inuu ñi cuñi ra Ndyoo sii tandihi cuii ñiyivi. Ñahñi sa zñn iyo yo cuhva cuñi ra sii yo.

³⁵ Ta tandihi ñuu cuñi ra Ndyoo sii yoo ra zavaha sa vaha, sii yoo ra yuhu ta tyaa ra yahvi sii ley ra Ndyoo.

³⁶ I cahan ra Ndyoo sihin nduhvi ñiyivi hebreo, ta nacatyí ra sihin ndi vatyí cua coo sa taxi ñi añima yo sa cuenda ra Jesucristo. Ta maa ra cuu ra ndyaca ñaha sii tandihi sa iyo.

³⁷ Sito vaha maa ndo ñaa sa sicoo ñuu ra hebreo. I quisaha si ñuu sa nañi Galilea. Xihna ca i zacoo ndutya ra Juan sii ñiyivi, ta i zacuaha ra sii ñu.

³⁸ Ta ziqui i quita ra Jesús, ra ñuu Nazaret, ta saha ra Ndyoo cuhva sii ra sa cuenda Tatyí li. Ta i sica noo ra Jesús, ta i zavaha ra sa vaha, ta i zanduvaha ra sii ñu ndyehe tundoho cuenda cuihna. Tacuan i zavaha ra vatyí i tyindyee ra Ndyoo sii ra.

³⁹ Ta maa ndi cuu ra cu sa ndaa sa cuenda tandihi sa i zavaha ra Jesús nu cu si Judea ta ñuu cahnu Jerusalén. Ta i tyaa ñu sii ra nu cruz, ta i sahiñi ñu sii ra.

⁴⁰ Zoco sa yaha uñi quivi ta i zanandoto ra Ndyoo sii ra. Ta i saha ra sa ndyehe maa ndi sii ra Jesús.

⁴¹ Ná quituu ra nuu tandihi ñiyivi. Maa ñi nuu maa ndi, ra i casi ra Ndyoo vatyí cua cuu ndi sa ndaa. Sasi ndi sihin ra ta sihi ndi ndutya sihin ra ta sa yaha nandoto ra sa sihi ra.

⁴² Ta i tasi ra sii ndi sa nacatyí ndi sihin ñiyivi. Ta sa ndaa cuu ndi vatyí vityí i saha ra Ndyoo tyiño sii ra Jesús sa cuu ra juez sii ñiyivi ndito ta sii ñiyivi i sihi.

⁴³ Sa cuenda ra Jesús i cahan tandihi ra profeta ta tyiemvu ta catyi ra vatyí tandihi ñiyivi sino iñi sii ra Jesús cua zandasi ra cuatyí ñu.

Cuhva i quihvi Tatyí li añima ñiyivi sa yivi ñiyivi hebreo cuu

⁴⁴ Ta zuun ñi cuhva sa cahan ra Pedro ta i noo Tatyí li sii tandihi ñu tyizoho.

⁴⁵ Ta ra hebreo sa sino iñi Tuhun Ndyoo, ra i quisi sihin ra Pedro, iyo xaan i cuñi ra vatyí saha ra Ndyoo Tatyí li ra sii inga ñiyivi sa yivi ñiyivi hebreo cuu.

⁴⁶ Vatyí siñi ra sa cahan ñu inga tuhun sa ña tuhva ñu cahan ta zacahnu ñu sii Ndyoo.

⁴⁷ Tacuan ta i catyi ra Pedro: Sa i saa Tatyí li sii ñiyivi ya cuhva i saa ra sii maa yo. Ta vityí yoñi ra cua catyi vatyí ma cuu coo ndutya ñu.

⁴⁸ Tacuan, ta i catyi ra Pedro vatyí cua coo ndutya ñu sa cuenda ra Jesucristo. Ta sa yaha sicoo ndutya ñu ta i sica ca ñu sa ndoo ra Pedro zuhva ca quivi ñuu ñu.

11

Saha ra Pedro cuenda sii ra ndyizo tyiño nu iyo ñiyivi sino iñi ñuu Jerusalén

¹ Ra apóstol ta inga ra sino iñi Tuhun Ndyoo nu cu si Judea i ñihi ra tuhun vatyí sino iñi ñiyivi Tuhun Ndyoo. Ta yivi ñiyivi hebreo cuu ñu.

² Ta sa naquita ra Pedro ñuu Jerusalén ta ra hebreo ra sino iñi sii ra Jesús i cahan ra sii ra Pedro vatyí ra hebreo cuan ñihi xaan ndyico ra costumbre ñiyivi hebreo ta sica iñi ra vatyí ñiñi xaan sa tahndya ñii xiñi xuu rayii ndihi ca, ta tacuan ta cua cacu añima ra, sica iñi ra cuan.

³ Ta i catyi ra: ¿Ñaa cuenda sohon vehe ñiyivi cuan ta yivi ñiyivi hebreo cuu ñu? ¿Ta ñaa cuenda sasun sihin ñu ta ña ndyico ñu costumbre maa yo?

⁴ Tacuan ta i nacaty ra Pedro tandihi sihin ra ndya cuhva quisaha tyiño cuan ta catyi ra:

⁵ Ta sindyaa mi ñuu Jope ta zuun ñi cuhva sa sica tahvi sii ra Ndyoo ta i ndyehi minoo sa ndyehi. I noo minoo tañi minoo zahma yuu cahnu. I noo si sihin cumi tahan siqui si ndya nu ndyei.

⁶ Ta i ndyehe vehi vaty cua ndyehi ñaa sa ñoho sisi si, ta i ndyehi vaty ñoho tandihi nuu quití iyo cumi tahan saha ta ñoho coo ta ñoho zaa.

⁷ Ta i siñi sa cahan ra Ndyoo ta catyi ra: “Nduviton Pedro. Cahñun sii ti ta casun.”

⁸ Zoco i catyi: “Ma cuu tata vaty tañaha ca casi sa cuxi caa.” (Ta ica casi quití cuan sa cuenda costumbre maa yo.)

⁹ Tacuan ta ziqui i cahan tucu ra Ndyoo ta catyi ra: “Ma catyun vaty ica sa sehi suun.”

¹⁰ Tacuan i cuu si uñi tahan saha, ta ziqui i nandaa tucu si ityi ziqui.

¹¹ Ta zuun ñi caa cuhva cuan i saa uñi tahan ra vehe nu ndyei. I tasi ñiyivi sii ra ndya ñuu Cesarea vaty cua nanducu ra sii.

¹² Ta i tasi Taty li sii sa cuhin sihin ra ta i catyi si sihin vaty ma caca xaan iñi. Ta i sahan tucu maa ra ihya sa iñu tahan ca ra sino iñi Tuhun Ndyoo. Tandihi ndi i quihvi ndi vehe ra sa i cana sii ndi.

¹³ Ta i nacaty maa ra sihin ndi cuhva i ndyehe ra minoo ángel sisi vehe ra. Nandyaa si ta catyi si: “Tasun sii ra cua cana sii ra Simón Pedro ndya ñuu Jope.

¹⁴ Ta cua nacaty ra Pedro cuan suhun yozo caa cua cacun sihin ñiyivi suun.” Tacuan i catyi ángel cuan sihin ra.

¹⁵ Ta sa quisehi quehin sihin ñu ta i noo Taty li sii ñu tañi i noo ra sii maa yo sa xihna ñi.

¹⁶ Tacuan ta i nacohon iñi cuhva i catyi ra Jesús: “Ndisa i zaco ndutya ra Juan sii ñiyivi sihin ndutya, zoco sihin Taty li cua coo ndutya maa ndo.”

¹⁷ Ta vityi tatu ñi ñi cuhva saha tucu ra Ndyoo sii ñu inuu ñi tañi saha ra sii maa yo ra sino iñi sii ra Jesucristo, ¿ñaa cuenda ma tahan iñi yo cuhva zavaha ra Ndyoo? I catyi ra Pedro.

¹⁸ Tacuan i cuu ta sa siñi ra sino iñi Tuhun Ndyoo ñuu Jerusalén cuhva cuan, ta ña cahan ca ra, ta i zacahnu ra sii ra Ndyoo. Ta i catyi ra: Saha ra Ndyoo sa sino tucu iñi inga ñiyivi vazu yivi ñiyivi hebreo cuu ñu. Ta vityi cua zama ñu cuhva iyo ñu, ta tacuan ta cua ñihi ñu sa cundito ñu tandihi cui tyiemvu.

Ñiyivi sino iñi Tuhun Ndyoo ñuu Antioquía

¹⁹ Ta sa i sahñi ñiyivi sii ra Esteban ta ziqui i quisaha sicoo tundoho sii inga ñiyivi sino iñi Tuhun Ndyoo. Ta tandihi ñu i sitya cuaty. Zuhva ñu i saa nu cu si Fenicia ta ñuu Antioquía ta inga ñu i saa minoo ñuhu sa nañi Chipre sa ndyaa mahñu tyañuhu. Ta i nacaty maa ñu Tuhun Ndyoo maa ñi sihin ñiyivi hebreo.

²⁰ Zoco zuhva ñu sino iñi, ñiyivi ñuu Chipre ta ñuu Cirene, cuahan ñu ndya ñuu Antioquía ta i nacaty maa ñu Tuhun Ndyoo sihin ñiyivi sa yivi ñiyivi hebreo cuu. I nacaty ñu sihin ñu tuhun ra Cristo Jesús.

²¹ I saha xaan ra Ndyoo cuhva sii ñu, ta cuaha xaan ñiyivi i sino iñi ta i zandoo ñu costumbre sañu sii ñu. Ta i sindyico ñu sii ra Jesús.

²² I saa tyiño ya ndya nu yucu ñu sino iñi ñuu Jerusalén, ta i tasi ñu sii ra Bernabé ndya ñuu Antioquía.

²³ Ta sa saa ra, ta i ndyehe ra vaty ndisa i tyindyee xaan ra Ndyoo sii ñiyivi cuan. Zi xaan i cuñi ra, ta i saha ra tyiño sii ñu sa tyaa xaan ñu yahvi sii ra Jesús ta cundyico ñu sii ra sihin tandihi cui añima ñu.

²⁴ Vaha xaan ra cuu ra Bernabé, iyo xaan Taty li sii ra, ta ñi xaan iñi ra. Ta cuaha xaan ñiyivi i sino iñi sii ra Jesús sa cuenda maa ra.

²⁵ Tacuan ta ziqui cuahan ra Bernabé ndya ñuu Tarso vaty cua nanducu ra sii ra Saulo.

²⁶ Ta sa nañihi ra sii ra, i sindyaca ra sii ra ndya ñuu Antioquía. Ta minoo maa cuiya i sindyaa nduu tahan ra sihin ñiyivi sino iñi yucuan, ta i zacuaha ra sii cuaha xaan ñiyivi. Ta ñuu Antioquía cuan cuu ñuu sa xihna ñi nu i zacunañi ñiyivi cristiano sii ñu ndyico sii ra Cristo.

²⁷ Ta quivi cuan i quita zuhva ra profeta ñuu Jerusalén ta cuahan ra ndya ñuu Antioquía.

²⁸ Minoo ra nañi ra Agabo. I nduvita ra nu yucu ra sino iñi Tuhun Ndyoo ta i cahan ra cuhva catyi Tatyí li sihin ra. I catyi ra vatyí cua quisi minoo tama cahnu xaan nacahnu ñuu ñiyivi. Ta tacuan i tahan si cuhva i catyi ra zuun ñi sisi quivi i sindyaca ñaha ra emperador Claudio.

²⁹ Tacuan ta ñu sino iñi ñuu Antioquía i sica iñi ñu vatyí cua tasi ñu xuhun ta tyindyee ñu sii ñu sino iñi nu cu si Judea. Cua tasi tahan tahan ñu yozo cuhva sa cundyee iñi ñu.

³⁰ Ta tacuan i zavaha ñu. I tasi ñu xuhun i zacasi tahan ñu sihin ra Bernabé ta ra Saulo ndya nu ndyaa ra ndyizo tyiño nu yucu ñu sino iñi Tuhun Ndyoo ñuu cuan.

12

Sihi ra Jacobo ta quihvi ra Pedro vehe caa

¹ Ta zuun ñi tyiemvu cuan i quisaha ra rey Herodes zavaha ra sa ña vaha sihin ñiyivi sino iñi Tuhun Ndyoo.

² Sahñi ñiyivi sii ra Jacobo yañi ra Juan sihin minoo mityi i zacuu ra Herodes.

³ Ta sa ndyehe ra Herodes vatyí tahan iñi ñiyivi hebreo sa tacuan ta ziqui i tiin ra sii ra Pedro. Ta i cuu si quivi vico zavaha ñiyivi hebreo sa nacohon iñi ñu quivi i quita ñu ñuu Egipto. Ta vico cuan tuhva ñu casi pan ña ndaa.

⁴ Ta i tiin ra Herodes sii ra Pedro ta i tyihi ra sii ra vehe caa. Cumi ityi zandaru i sicumi sii ra. Ta cumi tahan zandaru i cuu tahan tahan ityi ra. Sa cumi tahan zandaru i sicumi sii ra tahan tahan ora. Sica iñi ra Herodes vatyí ndya sa yaha vico tacuan ta ziqui cua cutuñi ra Pedro ta cua cuu ra nuu ñiyivi hebreo vatyí tacuan ta zii cua cuñi ñu.

⁵ Ñoho ra Pedro vehe caa ta sicumi xaan zandaru sii ra, zoco ñiyivi sino iñi Tuhun Ndyoo sica tahvi xaan ñu sii ra Ndyoo sa cuenda ra.

Zacacu ra Ndyoo sii ra Pedro sisi vehe caa

⁶ Tacuan ta zuun ñi sa cuaa cuan sica iñi ra Herodes vatyí inga quivi cua tasi ra sii ra Pedro cunahma ra nu yucu ñiyivi. Ta sa cuaa cuan i quixi ra Pedro ticui uu tahan zandaru. Nuhñi ra sihin uu tahan cadena. Ta cumi inga zandaru yuvehe caa cuan.

⁷ Ta ta sica ñi i quihvi minoo ángel Ndyoo sisi vehe caa ta i ndundisi. I tiin ángel cuan zoco ra Pedro vatyí cua zandoyo ra sii ra. Ta i catyi ra sihin ra: Zanumi. Nduviton. Ta ta sica ñi i ndasi cadena ndaha ra Pedro.

⁸ Ta i catyi ángel sihin ra: Nacuhñi vaha sisun ta natyuhun zapato sohon. Ta tacuan i zavaha ra. Ta i catyi ángel sihin ra: Nazucun zahmon suun. Ta quisi ndyicon sii.

⁹ I sindyico ra Pedro sii ángel cuan sisi vehe caa cuan. Ña sito ra a sa ndisa zacuu ángel a ñimahna tahan ra.

¹⁰ I yaha nduu tahan ra sa xihna ñi nu cumi minoo zandaru, ta ziqui i yaha ra sa cu uu nu cumi inga ra ta i saa ra minoo yuvehe cahnu. Vee xaan si. Maa caa cuu si. Ta yucuan yuvehe quita si ndya calle. I nuña ñi maa yuvehe cuan ta i quita ra. I sica ra zuhva ca ta i zandoo ángel sii ra Pedro.

¹¹ Tacuan ta ziqui i sito ra Pedro sa ndisa ta i catyi ra: Vityi site vatyí ndisa cuu si. I tasi ra Ndyoo minoo ángel ta i zacacu ra sii mi si ndaha ra Herodes ta cuhva sa ña vaha sa cuñi ñiyivi hebreo zavaha ñu sihin.

¹² Tacuan i sica iñi ra Pedro ta cuahan ra ndya vehe ña María zihí ra Juan Marcos. Yucuan siyucu cuaha xaan ñiyivi. Sica tahvi ñu sii Ndyoo.

¹³ I cati ra Pedro yuvehe nuzama. Ta i quisi minoo ña cu muzu. Nañi ña Rode.

¹⁴ I nacoto ña nduzu ra Pedro sa cahan ra, ta zii xaan i cuñi ña ta nu yuvehe ña nuña ña. Sino ña i sinacatyí ña sihin ñiyivi vatyí ndyaa ra Pedro yuvehe cuan.

¹⁵ Zoco ñiyivi cuan i catyi ñu sihin ña: Zana tahan xiñun. Ta i catyi maa ña vatyi ndisa cuii vatyi maa ra cuu ra. Ta ziqui i catyi ñiyivi: Ángel sa zacuenda sii ra cuu si.

¹⁶ Ta ra Pedro ndita ñi i cati ra yuvehe cuan. Tacuan ta i nuña ñu yuvehe ta iyo xaan i cuñi ñu sa nandyehe ñu sii ra Pedro.

¹⁷ Ta saha ra Pedro zeña sii ñu sihin ndaha ra nacutaxi ñu, ta i nacatyi ra sihin ñu yozo caa i tava ra Ndyoo sii ra vehe caa. Ta catyi ra sihin ñu: Tacuan nacatyi ndo sihin ra Jacobo ta sihin inga ra sino iñi Tuhun Ndyoo, i catyi ra. Tacuan i cahan ra ta ziqui cuahan ra.

¹⁸ Ta sa vasi cundisi ta sica xaan iñi tandihi zandaru vatyi ña sito ra ndyamaa cuahan ra Pedro.

¹⁹ I tasi ra Herodes tyiño sa cua nanducu ra sii ra Pedro, zoco ñá nañihi ra sii ra. Tacuan ta ziqui i zanahma xaan ra Herodes sii zandaru cuan. Ñá ñihi zandaru cuhva nacatyi ra. Tacuan i cuu, ta i catyi ra Herodes vatyi cua cuu tandihi zandaru cuan. Tacuan ta cuahan ra Herodes inga ñuu sa nañi Cesarea cua cundyaa ra.

Sihi ra Herodes

²⁰ Xaan xaan cuñi ra Herodes sihin ñiyivi ñuu Tiro ta ñiyivi ñuu Sidón ta ñá cuñi ra tyindyee ra sii ñu. Ta ziqui i saa ñiyivi ñuu cuan nu iyo ra ta i cahan ñu sihin ra Blasto. Minoo ra ndyizo tyiño nuu ra Herodes cuu ra. I tyiyahvi ñiyivi sii ra sa cuu ra yuhu ñu nuu ra Herodes. I sica ñiyivi cuan sa coo sa taxi ñi sihin ra Herodes ta sihin ñuu ñu vatyi tandihi sa sasi ñu quita si ñuhu nu ndyaca ñaha ra Herodes.

²¹ Ta i sata ra Herodes quivi sihin ñu. Ta sa saa quivi i ndihvi ra zahma vaha ra ta i sindyaa ra tyayu cahnu ra ta i cahan ra sihin ñu.

²² Ta sa ndihi cahan ra ta tandihi cuii ñiyivi i catyi: Yivi ñiyivi cuu ra cahan ya. Ndyoo cuu ra.

²³ Zuun ñi caa cuhva cuan i quihin cuehe sii ra Herodes i zacuu minoo ángel Ndyoo vatyi tahan iñi ra Herodes sa catyi ñiyivi vatyi Ndyoo cuu maa ra. Cahnu xaan tundoho i ndyehe ra vatyi sasi tindacu sii ra ta sihi ra.

²⁴ Tacuan i cuu ta Tuhun Ndyoo cuahan ca nducahnu ca si. Nacatyi xaan ca ñiyivi Tuhun Ndyoo sihin inga ñiyivi.

²⁵ Sa ndihi tyiño ra Bernabé ta ra Saulo ñuu Jerusalén, ta i ndisi nanuhu ra ndya ñuu Antioquía. I quihin ra sii ra Juan Marcos ta vasi ra sihin ra.

13

Zatyiño tucu ra Bernabé ta ra Saulo tyiño Ndyoo

¹ Ihya cuu zivi ra profeta ta ra zacuaha Tuhun Ndyoo sii ñiyivi ñuu Antioquía. Minoo ra nañi ra Bernabé, inga ra nañi ra Simón, ra nengu cuu inga zivi ra. Inga ra nañi ra Lucio ra ñuu Cirene sihin ra Saulo ta ra Manaén. ñin ñi i sahnu ra Manaén sihin ra Herodes ra ndyaca ñaha nu cu si Galilea.

² Minoo quivi i siyucu tandihi ra cuan. Ta ñá sasi ra xita vatyi zacahnu ra sii ra Ndyoo ta ziqui i catyi Tatyí Ii sihin ra: Cua tasi ndo sii ra Bernabé sihin ra Saulo nu cua zatyiño ra sa cuenda mi vatyi cua cuhve tyiño sii ra.

³ Tacuan ta i sica tahvi ca ra cuan sii Ndyoo ta ñá sasi ra xita, ta ziqui i tyizo ra ndaha ra sii ra vatyi cua cuizo tyiño ra ta i tasi ra sii ra.

Nacatyi ra Pablo Tuhun Ndyoo nu cu si Chipre

⁴ Tacuan i tava Tatyí Ii tyiño sii ra Bernabé sihin ra Saulo ta cuahan ra ndya Seleucia, ta indyacuán i quihin ra barco vatyi cua cuhun ra ndya minoo ñuhu sa ndyaa mahñu tyañuhu, nañi si Chipre.

⁵ Ta yucuan i saa ra, minoo yuhu tyañuhu nu nañi si Salamina ta i quisaha zacuaha ra Tuhun Ndyoo sii ñiyivi vehe ñuhu ñiyivi hebreo. Ta cuahan tucu ra Juan sihin ra cua tyindyee ra sii ra.

⁶ I sica noo ra nacahnu ñuhu Chipre ta i saa ra ñuu Pafos. Indyacuan i tahan ra sii minoo ra nañi Barjesús. Minoo ra tazi cuu ra. Vatya xaan ra ta catyi ra vatyi cahan ra sa cuenda ra Ndyoo.

⁷ Ndyaa ra cuan sihin ra Sergio Paulo, ra cu gobernador. Casi xaan iñi ra Sergio cuan. I cana ra sii ra Bernabé ta ra Saulo vatyi cuñi ra tyizoho ra Tuhun Ndyoo.

⁸ Zoco ra tazi cuan, Elimas cuu inga zivi ra. Ñá saha ra sa tyizoho ra gobernador sa cahan ra Saulo vatyi ñá cuñi ra sa cua sino iñi ra sii ra Jesús.

⁹ Ta ra Saulo, ta nañi tucu ra Pablo, situ xaan Tatyí li sii ra ta ñihi xaan i ndyehe ra sii ra ta catyi ra:

¹⁰ Ra zandavi ñaha cuun. Tandíhi cuii sa ña vaha zavohon. Zehe cuihna cuu suun ta numinoo sa vaha ña zavohon. Ta zamon cuhva cahan ra Ndyoo sa ndisa ta nacatyun sa vatya.

¹¹ Ta vityi cua tasi tuñi ra Ndyoo suun. Cua cuoon zuhva quivi, ta ma ndyehun ñuhu ñicandyi. Ta ta sica ñi i cuaa ra. Ta i nducu ra yoo ra tiin ndaha ra ta cundyaca ra sii ra vatyi ña cuu ndyehe ra.

¹² Ta sa ndyehe ra gobernador sa tahan ra tazi cuan ta i sino iñi ra sii ra Jesús vatyi iyo xaan i cuñi ra sa ndyehe ra yozo caa iyo tuhun sa cuenda ra Jesús.

Cuahan ra Pablo ta ra Bernabé ndya ñuu Antioquía sa cuu cuenda Pisidia

¹³ I quita ra Pablo sihin ra tahan ra ñuu Pafos sihin barco ta cuahan ra ndya ñuu Perge sa iyo cuenda Panfilia. Yucuan i zandoo ra Juan sii ra ta cua nanuhu ra ndya ñuu Jerusalén.

¹⁴ Ta ziqui i quita ra Pablo ñuu Perge ta cuahan ra minoo ñuu cahnu sa nañi Antioquía sa cuu cuenda Pisidia. Ta yucuan sahan ra vehe ñuhu ñiyivi hebreo quivi quitatu ñiyivi, ta i sicundyaa ra.

¹⁵ Sa xihna ñi i cahvi ñiyivi zuhva sa i tyaa ra Moisés ta ziqui i cahvi ñu sa tyaa inga ra profeta ta tyiemvu. Tacuan i cuu ta ziqui i tasi ra cu nuu sii vehe ñuhu cuan tyiño sii ra Pablo ta catyi ra: Yañi xaa, tatu iyo minoo tuhun sa cuñi ndo zacoto ndo sii ñiyivi. Cua nacatyí ndo sihin ndi vityi.

¹⁶ Tacuan ta i nduvita ra Pablo ta saha ra minoo zeña sihin ndaha ra sa cua cutaxi ñiyivi ta catyi ra: Tyizoho ndo yañi xaa, ndoho ra hebreo, ta tandíhi inga ndoho, ra yuhu sii ra Ndyoo.

¹⁷ Ra cu Ndyoo sii maa yo ñiyivi hebreo i casi ra sii ñiyivi sahanu sii yo. Ta i tyindyee ra sii ñu, ta i nduu ñu minoo ityi ñiyivi cahnu xaan vazu i sica noo ndahvi ñu ñuu Egipto. Ta ziqui sihin cuhva iyo sii maa ra i tava ra sii ñu ñuu cuan.

¹⁸ I cundyee xaan iñi ra Ndyoo sihin ñu tañi uu xico cuiya sa sica noo ñu nu yoñi maa ñiyivi iyo ta i zavaha ñu cuhva cuñi maa ñu.

¹⁹ Ta i zanaa ra usa tahan ityi ñiyivi nu cu si Canaán vatyi cua cuhva ra ñuhu cuan sii ñiyivi sahanu sii yo.

²⁰ Ta ziqui cumi ziendu uu xico usi cuiya saha ra Ndyoo sa cundyaca ñaha juez sii ñiyivi ndya quivi i naquihin ra Samuel tyiño cuan. Ta ra Samuel i cuu tucu ra minoo ra cu profeta.

²¹ Ta ziqui i sica ñiyivi minoo rey, ra cua cundyaca ñaha sii ñu. Ta i saha ra Ndyoo sii ra Saúl zehe ra Cis sii ñu. Ñiyivi sii ra Benjamín i cuu sii ra. I sindyaca ñaha ra Saúl sii ñu uu xico cuiya.

²² Ta i tava ra Ndyoo sii ra. Ta ziqui i saha ra sii ra David sa cuu ra rey, ta sa cuenda maa ra i catyi ra Ndyoo: “Site sii ra David zehe ra Isaí. Zii xaan cuñi sihin ra vatyi cua zavaha ra tandíhi cuii sa cuñi.”

²³ Ta ñiyivi sahanu sii ra Jesús i cuu sii ra David. Ta i tasi ra Ndyoo sii ra Jesús vatyi cua zacacu ra sii ñiyivi hebreo tañi sa i catyi ra Ndyoo ta tyiemvu.

²⁴ Cumañi ca saa ra Jesús ta i nacatyí xaan ra Juan sihin tandíhi ñiyivi hebreo vatyi ndu-uu iñi ñu cuatyí ñu ta coo ndutya ñu.

²⁵ Ta sa cuñi ndihi tyiño ra Juan ta i catyi ra: “Ndatu ndo sii minoo ra cahnu xaan. Ta sica iñi ndo vatyí zuun ra cui. Zoco yívi ra cui. Ra i tasi ra ityi nuu cui. Ra vaha xaan ca cuu maa ra, ta ñiñi xaan ra, ta yucuan cuenda ma cuu tyindyeyi sii ra nu zuhva tañi sa ndasi tyiendu ndisa ra.” Tacuan i catyi ra Juan.

²⁶ Ta cahan ca ra Pablo ta catyi ra: Yañi xaa, ndoho ñiyivi ra Abraham ta tandihi inga ndo, ra yuhu sii ra Ndyoo. Saha ra Ndyoo cuhva cacu ndo.

²⁷ Ñiyivi ñuu Jerusalén sihin ra ndyaca ñaha sii ñu, ñá sito ñu yoo ra cuu ra Jesús vatyí zehe Ndyoo cuu sii ra, ta ñá ñihi ñu cuhva sihin tuhun i tyaa ra profeta ta tyiemvu vazu cahvi ñu sii si vehe ñuhu ñu tahan xiñi vitya. Ta zuun ñi ñiyivi cuan i tyaa cuatyí sata ra Jesús. Ta tacuan i natahan si tañi sa catyi ra profeta.

²⁸ Ta vazu ñá ñihi ñiyivi cuhva sa tyaa ñu cuatyí sata ra Jesús sa ndisa cuii, zoco i sica ñu sii ra Pilato sa cuu ra.

²⁹ Ta sa yaha zavaha ñu tandihi cuhva catyi Tuhun Ndyoo sa cuenda ra Jesús ta ziqui i zanoo ñu sii ra nuu cruz ta tyihi ñu sii ra ñaña sisi minoo yavi yuu.

³⁰ Zoco i zanandoto ra Ndyoo sii ra sisi sa i sihi ra.

³¹ Ta cuaha xaan quívi i quituu ra Jesús nuu ñiyivi i quisi sihin ra ndya Galilea ta ñoho ñu ñuu Jerusalén. Ta vityí maa ñu cu ñu nacatyí sihin ñiyivi vatyí i ndyehe ñu sii ra.

³² Ta vityí nacatyí maa ndi minoo cuhva vaha sihin ndo vatyí tañi sa sito ndo vatyí ta tyiemvu saha ra Ndyoo cuenda sii ñiyivi sahnú sii yo yozo caa cua zavaha ra nu cuahan quívi.

³³ Ta vityí sito yo vatyí sa zavaha ra Ndyoo cuhva catyi ra vatyí saha ra tundyee iñi sii ra Jesús, ta i nandoto tucu ra. I tyaa ra David salmo número uu. I tyaa ra David cuhva i cahan ra Ndyoo sa cuenda ra Jesús ta catyi ra: “Zehe mi cuu suun, ta vityí cua ndyehe ñiyivi vatyí sehi sa cua nandoton.”

³⁴ Iyo inga nu catyi tucu ra Ndyoo sa cuenda ra Jesús: “Cua tyindyeyi suun sa ndisa, cuhva i catyi sihin ra David.” Tacuan i catyi ra Ndyoo vatyí cua zanandoto ra sii ra Jesús sisi sa i sihi ra. Ma cuhva ra Ndyoo sa tyahyu coño ñuhu ra Jesús.

³⁵ Yucuan cuenda catyi tucu inga salmo: “Ma cuhvon sa tyahyu coño ñuhu ra tyaa xaan yahvi suun.”

³⁶ Sa ndisa cuu si vatyí i zavaha ra David cuhva cuñi ra Ndyoo sa sindito ra ñuu ñiyivi, ta ziqui i sihi ra ta i tyihi ñiyivi sii ra sisi ñaña ta i tyahyu coño ñuhu ra.

³⁷ Zoco coño ñuhu ra i zanandoto ra Ndyoo, ña tyahyu si.

³⁸ Yañi xaa, cuñi si sa coto ndo vatyí sa cuenda ra Jesús ta cua zandasi ra Ndyoo cuatyí ndo.

³⁹ Ma nduvaha añima ndo vazu cumi vaha xaan ndo ley i saha ra Ndyoo sii ra Moisés. Vatyí ma nduvaha añima ndo sa tacuan ñi. Ra Jesús cua zanduvaha añima ndo tatu cua sino iñi ndo sii ra.

⁴⁰ Zacuenda vaha ndo sii ndo coto cua tahan ndo cuhva i tyaa ra profeta ta tyiemvu. I catyi ra:

⁴¹ Ndyehe ndoho, ra ña sino iñi.

Cu-iyó xaan ndo ta cua cunaa ndo.

Vatyí cua zavehi minoo cuhva. Ta iyo xaan cua cuñi ndo.

Ta ma sino iñi ndo

Numaa nacatyí xaan ñiyivi sito sihin ndo.

Ta ihya i ndihi sa cahan ra Pablo sihin ñiyivi.

⁴² Ta sa quita ra Pablo sihin ra tahan ra sisi vehe ñuhu hebreo cuan. Ta i sica ñiyivi sa yívi ñiyivi hebreo cuu sii ra Pablo vatyí cua zacuaha tucu ra sii ñu inga quívi quitatu ñiyivi.

⁴³ Ta sa quita tandihi ñiyivi vehe ñuhu ta cuaha xaan ñiyivi hebreo ta ñiyivi tyaa xaan yahvi ley ñiyivi hebreo, i sindyico ñu sii ra Pablo ta ra Bernabé. Ta i nacatyí xaan ra Pablo ta ra Bernabé sihin ñu vatyí ma naa iñi ñu sa nacatyí ra sihin ñu ta nacañi vaha iñi ñu yozo caa zavaha xaan ra Ndyoo tumañi iñi sii ñu.

⁴⁴ Ta inga vitya quivi quitatu ñiyivi i titahan sa yaty tandihi ñiyivi ñuu cuan vaty cua tyizoho ñu Tuhun Ndyoo.

⁴⁵ Zoco sa ndyehe ñiyivi hebreo, ra ña sino iñi, vaty i titahan cuaha xaan ñiyivi ta i cucuihna iñi ra. Ta i quisaha catyi ra vaty ña vaha sa cahan ra Pablo ta i cahan ra ndya vaha ñi sii ra.

⁴⁶ Zoco ñá yuhu ra Pablo ta ra Bernabé ta i quisaha catyi ra sihin ñu: Cuñi si sa nacaty ndi Tuhun Ndyoo xihna ca sihin maa ndo vaty ñiyivi hebreo cuu ndo, zoco ña cuñi ndo tyizoho ndo. Ta cuhva zavaha ndo zañaha ndo vaty ña cuñi ndo sa cuhun ndo gloria. Ta yucuan cuenda cua cuhun ndi nu iyo inga ñiyivi sa yivi ñiyivi hebreo cuu.

⁴⁷ Tacuan cua zavaha ndi vaty ndya ta tyiemvu i catyi maa ra Ndyoo: “Tañi minoo ñúhu cua cuu maa ndo sii tandihi ñiyivi ñuu ñiyivi vaty cua nacaty ndo sihin tandihi cui ñiyivi yozo caa cua nduvaha añima ñu.” Ta i cahan ra Ndyoo cuhva cuan sa cuenda maa ndi.

⁴⁸ Ta sa siñi ñiyivi, ñu sa yivi ñiyivi hebreo cuu, ta zii xaan i cuñi ñu, ta i quisaha catyi ñu vaty vaha xaan cuu Tuhun Ndyoo. Ta tandihi ñu i casi ra Ndyoo vaty cuhun ñu gloria, i sino iñi ñu.

⁴⁹ Tacuan i cuu ta i sitya Tuhun Ndyoo tandihi ñuu yucuan.

⁵⁰ Zoco i cahan ra hebreo, ra ña sino iñi, sihin minoo ityi ñu zihí, ñu zacahnu sii ra Ndyoo cuhva iyo costumbre maa ñu, ta i cahan tucu ra hebreo sihin ra ñiñi ñuu cuan ta i quisaha ra cuaty cuhva ndya i tava ra sii ra Pablo ta ra Bernabé ñuu cuan.

⁵¹ Tacuan ta ziqui i quizi ra Pablo ta ra Bernabé saha ra ta i tava ra ñiyaca ñuu cuan vaty ma ndoo ca ra sihin ñiyivi ñuu cuan ta cuahan ra ndya minoo ñuu cahnu sa nañi Iconio.

⁵² Zoco zii xaan i cuñi ñu sino iñi ñuu Antioquía cuan, ta i sicoo xaan Taty Ii sihin ñu.

14

Ñoho ra Pablo ta ra Bernabé ñuu Iconio

¹ Ñoho ra Pablo ta ra Bernabé ñuu Iconio ta i quihvi ra vehe ñuhu ñiyivi hebreo. Vaha xaan i cahan ra yucuan ndya cuhva ndya i sino iñi cuaha xaan ñiyivi, ñu hebreo ta inga ñiyivi.

² Zoco ra hebreo, ra ña sino iñi, i cahan ra ndya vaha ñi sii ra sino iñi Tuhun Ndyoo ta i zasino ra iñi ñiyivi sa yivi ñiyivi hebreo cuu minoo cuhva ña vaha.

³ Yucuan cuenda i ndoo ra Pablo ta ra Bernabé naha xaan indyucuan. Ñá yuhu ra ta cahan ra Tuhun Ndyoo vaty ñi cuu iñi ra sii Ndyoo. Ta i saha ra Ndyoo cuhva sii ra sa zavaha ra sa ndyityi vaty tacuan ta cua coto ñiyivi vaty cahan ra sa ndisa sa catyi ra vaty cuñi xaan ra Ndyoo sii ñu.

⁴ Ñá ndu-iiñ ñiyivi ñuu Iconio cuan. Iyo ñu sino iñi ñu sa cahan ra hebreo, ra ña sino iñi, ta iyo ñu sino iñi ñu sa cahan ra apóstol.

⁵ Tacuan ta ziqui ra hebreo ta inga ra sa yivi ra hebreo cuu i ndu-iiñ ra sihin ra cu tyiño vaty cua zavaha ra ndya vaha ñi sihin ra Pablo ta ra Bernabé. Ta cua cañi ra sii ra sihin yuu ndya cua cuu ra.

⁶ Zoco i ñihi ra Pablo ta ra Bernabé tuhun cuan, ta sa sito ra sii si i sino ra ta cuahan ra ndya ñuu Listra ta ndya ñuu Derbe nu cu si Licaonia ta tandihi inga ñuu iyo yucuan.

⁷ Ta i nacaty ra sihin ñiyivi yozo caa cua zacacu ra Ndyoo sii ñu.

Cañi xaan ñiyivi sii ra Pablo sihin yuu ñuu Listra

⁸ Ñuu Listra sicoo minoo ra coxo. Ñá cuu caca ra. Maa sa ndyaa ñi ra vaty coxo ra cacu ra.

⁹ I tyizoho ra coxo sa cahan ra Pablo ta ndyehe ra Pablo sii ra ta nacoto ra vaty ñi cuu iñi ra ta cua nduvaha ra.

¹⁰ Tacuan ta ñihi xaan i cahan ra Pablo ta catyi ra: Nacuiñi ndyaa vohon. Tacuan ta i nduvita ra ta i quisaha sica ra.

¹¹ Ta sa ndyehe ñiyivi sa zavaha ra Pablo ta i quisaha cana saa ñu sihin zahan maa ñu, zahan ñuu Licaonia ta catyi ñu: Sa vasi uu tahan ndyoo ihya nu iyo yo. Caa ra cuhva caa maa yo. Catyi ñu.

¹² Ta tyiemvu sica iñi ñiyivi vaty ra Júpiter ta ra Mercurio cuu ra cuu Ndyoo. Yucuan cuenda i catyi ñu vaty minoo ndyoo nañi Mercurio cuu ra Pablo vaty maa ra cuu ra cahan. Ta ra Bernabé cuu ra ndyoo sa nañi Júpiter.

¹³ Ta i sicoo minoo zutu cuenda ra Júpiter. Ta i sicumi ra vehe ñuhu yu ñuu cuan. I sindyaca ra uu tahan zindiqui. Ta i sindyaca ra corona ita. I cuñi maa ra ta i cuñi ñiyivi sa zacahnu ñu vico nu saa ra Pablo ta ra Bernabé vaty sica iñi ñu vaty Ndyoo cuu ra. Ta yucuan cuenda cua cahñi ñu sii zindiqui cuan.

¹⁴ Zoco sa sito ra Pablo ta ra Bernabé tuhun cuan ta i ndata ra zahma ndisi ra vaty ñá tahan iñi ra sa zacuu ñiyivi Ndyoo sii ra. Ta cacono ra quihvi ra ndya mahñu ñiyivi ta i cana saa ra Pablo ta catyi ra:

¹⁵ Ndoho tata, ¿ña cuenda zavaha ndo tacuan ta ñiyivi cuu ndi tañi maa ndo? ta vasi nacaty ndi sihin ndo vaty zandoo ndo sa zavaha ndo cuhva ya vaty ñahñi tyindyee si. Sino iñi ndo sii ra Ndyoo sa ndisa cui vaty maa ra i zavaha andivi, ñuu ñiyivi ta tyañuhu ta tandihi sa iyo.

¹⁶ Ndya ta tyiemvu ta ndya vityi saha ra Ndyoo sa zavaha tandihi ñiyivi cuhva cuñi maa ñu

¹⁷ vazu zañaha ra sii ñu yoo ra cuu ra vaty zavaha ra cuaha xaan sa vaha. Saha ra sa coon zavi ta sa coo vaha itu tandihi cuiya. Saha ra sa casi yo ta sa cuzi iñi yo. Catyi ra Pablo.

¹⁸ Zoco vazu i nacaty ra Pablo tuhun cuan, yi xaan ta i ñihi ra cuhva zandumazu ra iñi ñiyivi ta ma cahñi ñu zindiqui cuan ta ma zacahnu ñu vico sa cuenda ra.

¹⁹ Tacuan ta i saa minoo ityi ñiyivi hebreo, ra ña sino iñi. Ra ñuu Antioquía ta ra ñuu Iconio cuu ra. I sino iñi ñiyivi sa cahan ra ndya vaha ñi sii ra Pablo. Ta i cañi xaan ñu sii ra Pablo sihin yuu cuhva ndya sica iñi ñu vaty sa sihi ra, ta i xita cañoho ñu sii ra i sindyaca ñu sii ra ndya zava yu ñuu.

²⁰ Ta i titahan ra sino iñi Tuhun Ndyoo siconduu nu caa ra Pablo, ta i nduvita ra ta nandihvi tucu ra ñuu cuan. Ta inga quivi i quita ra yucuan sihin ra Bernabé, cua cuhun ra ñuu Derbe.

²¹ Ta sa yaha nacaty ra Tuhun Ndyoo ñuu Derbe ta i sino iñi cuaha xaan ñiyivi, ta ziqui cua nanuhu tucu ra ndya ñuu Listra, ñuu Iconio ta ñuu Antioquía.

²² Indyacuan saha tucu ra tundyee iñi sii tandihi ñiyivi sino iñi Tuhun Ndyoo. Ta i catyi ra sihin ñu: Sino vaha iñi ndo sii ra Jesús, ta ma zaña ndo sii ra. Cua coo tundoho sii yo, zoco tacuan ta cua quihvi yo nu ndyaca ñaha ra Ndyoo, catyi ra.

²³ Tacuan i cuu ta i tyaa tyiño ra sii uu a uñi tahan ra tahan tahan ñuu nu sino iñi ñiyivi Tuhun Ndyoo vaty cua zacuenda ra sii ñu. Ta ñá sasi ra Pablo ta ra Bernabé xita ta i sica tahvi ra sii Ndyoo sa cuenda ra cuan. Ta ziqui i catyi ra: Sa sino iñi ndo sii ra Ndyoo. Maa ra cuu ra cua cucumi vaha sii ndo. Catyi ra.

Cua nanuhu tucu ra Pablo ta ra Bernabé ñuu Antioquía, nu cu si Siria

²⁴ Tacuan ta ziqui i yaha tucu ra nu cu si Pisidia, ta saa ra nu cu si Panfilia.

²⁵ I nacaty ra sihin ñiyivi Tuhun Ndyoo ñuu cahnu sa nañi Perge, ta ziqui cuahan ra ndya Atalia.

²⁶ Yucuan i quihvi ra minoo barco ta cua nanuhu ra ndya ñuu Antioquía nu i quita ra sa xihna ñi. Yucuan cuu ñuu nu i sica ñiyivi tumañi iñi sii ra Ndyoo sa xihna ñi sa cua tyindyee ra sii ra Pablo ityi cuahan ra. Ta vityi ndihi tyiño ra.

²⁷ Ta sa saa ra ñuu Antioquía i zatitahan ra sii ñiyivi sino iñi Tuhun Ndyoo ta i nacaty ra sihin ñu tandihi sa i zavaha ra Ndyoo ta cuhva i tyindyee ra Ndyoo sii ra. Ta cuhva i saha ra Ndyoo sa sino iñi inga ñiyivi vazu yivi ñiyivi hebreo cuu ñu.

²⁸ Tacuan cuu ta i ndoo ra Pablo ta ra Bernabé naha ca sihin ñiyivi sino iñi ñuu cuan.

15

Cuhva i titahan ra apóstol ñuu Jerusalén

¹ Ta sa ndyaa ra Pablo ta ra Bernabé ñuu Antioquía sihin ñu sino iñi Tuhun Ndyoo, ta i saa minoo ityi ñiyivi, ra i quita nu cu si Judea. Ta i quisaha zacuaha ra sii ñiyivi vatyí tatu cuñi rayii sa cacu añima ra cuñi si vatyí yivi sa sino ñi iñi ra sii ra Jesús zoco cua cuhva ra sa tahndya ñii xiñi xuu ra vatyí tacuan i catyi ley ra Ndyoo ta tyiemvu cuhva i tyaa ra Moisés.

² Ñihi xaan i natuhun ra Pablo ta ra Bernabé sihin ra vatyí ñá ndu-iiin ra sihin ra, cuhva cuan. Tacuan ta ziqui i saha ñiyivi tyiño sii ra Pablo ta ra Bernabé ta sii zuhva ca ra cua cuhun ra ñuu Jerusalén vatyí cua natuhun ra sihin ra apóstol ta sihin ra ndyizo tyiño nu iyo ra sino iñi indyacuán. Vatyí tacuan ta cua nacoto ra yozo caa cua ndundoo tyiño cuan.

³ Ñiyivi sino iñi Tuhun Ndyoo ñuu Antioquía cuu ñu i tasi sii ra. Ta sa cuahan ra i yaha ra nu cu si Fenicia, ta nu cu si Samaria. Ta i nacatyí ra sihin ñiyivi yozo caa i zandoo ñiyivi sa yivi ñiyivi hebreo cuu costumbre sahnú ñu. Ta vityí tyaa ñu yahvi sii Ndyoo. Ta zii xaan i cuñi tandihi ñu, sa siñi ñu tuhun cuan.

⁴ Ta sa saa ra Pablo ta ra Bernabé ñuu Jerusalén ta i ndyehe vaha ra apóstol ta ra ndyizo tyiño nu iyo ra sino iñi nu saa ra. Ta tacuan tucu i zavaha tandihi ñiyivi sino iñi Tuhun Ndyoo yucuan. Tacuan ta ziqui i quisaha nacatyí ra Pablo tandihi sa zavaha ra Ndyoo tandihi ñuu nu sahan ra.

⁵ Tacuan i zavaha ra ta i nduvita uu, a uñi tahan ra. Ra fariseo cuu ra, ta sa sino iñi ra sii ra Jesús. Maa ra cuan i catyi: Cuñi si sa tahndya ñii xiñi xuu tandihi ra quihvi cuenda ra Jesús ta nacatyí yo sihin ra vatyí tyaa tucu ra yahvi sii ley i saha ra Moisés.

⁶ Tacuan ta i titahan tandihi ra apóstol sihin ra ndyizo tyiño nu iyo ñiyivi sino iñi vatyí cua nacañi iñi ra ñaa sa cuñi si sa ndisa.

⁷ Sa naha xaan natuhun ra ta i nduvita ra Pedro ta catyi ra: Yañi xaa, sito ndo vatyí sa iyo quivi i casi ra Ndyoo sii, sihin maa ndo vatyí cua nacatyí Tuhun Ndyoo sihin ñiyivi sa yivi ñiyivi hebreo cuu vatyí cua coto ñu ta cua sino iñi ñu.

⁸ Ta maa ra Ndyoo, sito ra añima tandihi ñiyivi, ta zañaha ra sii yo vatyí cua quihin ra sii ñu vatyí saha ra Tatyí li sii ñu inuu ñi tañi saha ra sii maa yo.

⁹ Ta ña catyi ra Ndyoo sihin yo vatyí ña vaha maa ñu ta vaha xaan maa yo. Zanduvaha ra añima ñu vatyí sino iñi ñu sii ra.

¹⁰ Vityí caca iñi yo cuhva cuñi ra Ndyoo. Ña vaha sa cua cuhva yo tundoho sii ñiyivi sino iñi sii ra ta cua catyi yo vatyí cua zavaha ñu costumbre i saha ra Moisés. Sito yo vatyí ñá cuu cundyee iñi ñiyivi sahnú sii yo sa zavaha ñu tandihi sa catyi ra Moisés, ta sito yo vatyí ñá cundyee tucu iñi maa yo zavaha yo sii si.

¹¹ Ña tacuan ta nduvaha añima yo. Sito yo vatyí nduvaha añima yo vatyí iyo xaan tumañi iñi sii ra Jesús. Ta ñahñi ca cuhva nduvaha añima ñiyivi.

¹² Taxi ñi i nduu tandihi ñiyivi sa siñi ñu cuhva nacatyí ra Pablo ta ra Bernabé tandihi sa i cuu ta tandihi sa ndyityí i zavaha ra Ndyoo nu sahan ra nu iyo ñiyivi sa yivi ñiyivi hebreo cuu.

¹³ Ta sa ndihi cahan ra ta i cahan ra Jacobo ta catyi ra: Tyizoho ndo, yañi xaa.

¹⁴ Sa saha ra Simón Pedro cuenda yozo caa i quisaha ra Ndyoo zasino ra iñi inga ñiyivi vatyí sii maa ra Ndyoo cua cuu ñu vazu yivi ñiyivi hebreo cuu ñu.

¹⁵ Ta zuun ñi cuhva ya cuu cuhva i cahan Tuhun Ndyoo ta tyiemvu vatyí i tyaa minoo ra profeta cuhva cahan ra Ndyoo:

¹⁶ Nu vasi quivi cua quisi ra Cristo vatyí cua cuhve tyiño sii ra.

Quivi i sicoo ra rey David i zacahnu ñiyivi sii sa ndisa cuii.

Zoco zuhva ñi quivi ta i zaña tucu ñu sii.

Cuhva i zacahnu ñu sii, ta quivi ra David cua zacahnu tucu ñiyivi hebreo sii nu vasi quivi.

¹⁷ Ta sa cuenda maa ñu hebreo ta tacuan tucu cua zavaha inga ñiyivi, ñu yivi ñiyivi hebreo cuu, ta cua sino iñi ñu sii.

¹⁸ Tacuan i catyi ra Ndyoo vaty sa sito ra vaty cua zavaha ra cuhva cuan cumañi ca sino ñuu ñiyivi. Ta yucuan cuenda i catyi ra tacuan.

¹⁹ Tacuan ta ziqui i catyi tucu ra Jacobo sihin ñiyivi: Sica iñi vaty vaha ca ma cuhva yo tundoho sii ñiyivi, ñu yivi ñiyivi hebreo cuu tatu sa i zandoo ñu costumbre sahnu ñu ta ndyico ñu sii Ndyoo sa ndisa cuii.

²⁰ Vaha ca tatu cua tyaa yo minoo carta sii ñu ta catyi yo sihin ñu vaty ma casi ñu sa saha ñiyivi sii zandu ta naquihin tucu ñu. Ta cua coo minoo rayii sihin minoo ñi ñaha ta minoo ñi ñaha sihin minoo ñi rayii. Ta inga cuhva cua cahan yo sihin ñu sa ma casi ñu coño quititi tatu ña sati vaha niñi ti ta ma casi ca ñu niñi quititi.

²¹ Vaty ndya ta tyiemvu xaan iyo ra tandihi ñuu, ra cahvi ley saha ra Moisés sisi vehe ñuhu hebreo. Tahan tahan vitya cahvi ra sii si quivi quitatu ñiyivi. Tacuan i catyi ra Jacobo.

²² Tacuan i cuu si, ta i catyi ra apóstol ta ra ndyizo tyiño nu iyo ñiyivi sino iñi ta tandihi inga ñiyivi sino iñi Tuhun Ndyoo yucuan vaty cua tasi ra sii a uu, a uñi tahan ra tahan ra, cua cuhun ra ndya ñuu Antioquía sihin ra Pablo ta ra Bernabé. Ta i saha ra tyiño cuan sii ra Judas. Nañi tucu ra Barsabás ta sii ra Silas. Nduu tahan ra cuu ra ndyizo tyiño cahnu nu iyo ñiyivi sino iñi.

²³ Ihya cuu sa catyi carta i tasi ra sihin ra ndya nu iyo ñiyivi sa yivi ñiyivi hebreo cuu ñuu Antioquía ta nu cu si Siria ta Cilicia. Catyi si: “Maa ndi cuu ra apóstol ta ra ndyizo tyiño nu iyo ñiyivi sino iñi ta sihin tandihi ñu sino iñi Tuhun Ndyoo ityi ya. Saha ndi minoo ndyoo nacucumi sii maa ndo.

²⁴ Ñihi ndi tuhun vaty sahan ñiyivi ñuu ya ndya ñuu ndo, ta yivi maa ndi saha tyiño sii ñu ta i zayanga ñu sii ndo vaty catyi ñu sihin ndo vaty cuñi si sa cahndya ndo ñiñi xiñi xuu tandihi rayii ta tyaa ndo yahvi ley ra Moisés.

²⁵ Yucuan cuenda sica iñi tandihi ndi vaty cua tasi ndi sii zuhva ra iyo ihya vaty cua cuhun ra nu ndyaa ndo sihin ra tahan yo, ra Bernabé ta ra Pablo, ra sa cuñi xaan ndi.

²⁶ Sa cuaha xaan saha cuñi cahñi ñiyivi sii ra sa cuenda tyiño ra Jesucristo.

²⁷ Tacuan cuu. Ta yucuan cuenda i tava ndi tyiño sii ra Judas ta ra Silas vaty cuhun ra ta nacaty ra sihin ndo tandihi sa i tyaa ndi nuu carta ya.

²⁸ Vaty sa ndu-ñin ndi sihin Taty li ta sica iñi ndi vaty ma zavaha ndo cuaha xaan cuhva. Ihya ñi cuu cuhva ñiñi cua zavaha ndo:

²⁹ Ma casi ndo sa saha ñiyivi sii zandu ta naquihin tucu ñu. Ma casi ndo niñi quititi, ta ma casi ndo coño quititi tatu ña sati vaha niñi ti. Ta minoo ñi ñaha cua coo sii minoo rayii ta minoo ñi rayii sihin minoo ñaha. Tatu cua cucumi vaha ndo cuhva ya, vaha tacuan ñi.”

³⁰ Tacuan i tyaa ra cuan nuu carta ta ra ndyizo tyiño cuan i quihin ra ityi cuahan ra ndya ñuu Antioquía. Ta yucuan i zatitahan ra sii tandihi ñiyivi sino iñi Tuhun Ndyoo. Ta i saha ra carta cuan sii ñu.

³¹ Ta sa cahvi ñu sii si, zii xaan i cuñi ñu vaty vaha xaan cuu cuhva cahan si cuñi ñu.

³² Ta ra Judas ta ra Silas i cuu cahan ra profecía, ta i quisaha cahan ra, ta i tyindyee xaan ra sii ñiyivi ta zii xaan i cuñi ñu.

³³ Ta sa yaha zuhva quivi ta cua nanuhu tucu ra. Ta i catyi ñiyivi sino iñi Tuhun Ndyoo sihin ra: Ndyoo cua tyindyee sii ndo ityi cuahan ndo.

³⁴ Zoco i cuñi ra Silas sa ndoo ra.

³⁵ Tacuan tucu ra Pablo ta ra Bernabé i ndoo ra ñuu Antioquía. Maa ra cuan sihin cuaha ca ñiyivi sito Tuhun Ndyoo, i zacuaha ra sii ñiyivi ta i nacaty ra Tuhun Ndyoo sihin ñu.

Quihin tucu ra Pablo ityi cuahan ra vaty cua nacaty ra Tuhun Ndyoo

³⁶ I yaha zuhva ca quivi ta ziqui catyi ra Pablo sihin ra Bernabé: Coho tucu yo tandihi ñuu nu i sahan yo. Cua ndyehe yo sii ra tahan yo, tandihi ñiyivi i sino iñi Tuhun Ndyoo nu i nacaty yo sihin ñu. Cua ndyehe yo yozo caa iyo ñu.

³⁷ I cuñi ra Bernabé sa cuhun tucu ra Juan, ra sa nañi tucu Marcos sihin ra.

³⁸ Zoco i sica iñi ra Pablo vatyí vaha ca ma quihin ra sii ra vatyí ñá ndoo ra sa sahan ra sihin ra sa xihna ñi. Quívi cuan i zandoo ra Juan Marcos sii ra Pablo ta ra Bernabé nu cu si Panfilia ta i sinuhu ra.

³⁹ Ña nacasi tahan sa cahan ra Bernabé sihin ra Pablo sa cuenda tyiño cuan. I cuxaan ra zuhva. Tacuan ta ziquí i cuziin tahan ra. I quihin ra Bernabé sii ra Marcos ta i quihvi ra minoo barco ta cuahan ra nu cu si Chipre.

⁴⁰ Ta i quihin ra Pablo sii ra Silas. Ta i sica ñiyívi tumañi iñi sii Ndyoo sa tyindyee ra sii ra Pablo inga saha. Ta ziquí cuahan ra.

⁴¹ I yaha ra nu cu si Siria. I yaha ra Cilicia. Ta i saha ra tundyee iñi sii ñiyívi sino iñi Tuhun Ndyoo yucuan.

16

Cuahan ra Timoteo sihin ra Pablo ta ra Silas

¹ I saa ra Pablo ta ra Silas ndya ñuu Derbe ta ñuu Listra. Yucuan i nañihi ra sii minoo ra sino iñi. Nañi ra Timoteo. Ñiyívi hebreo cuu zihí ra ta sino iñi ña sii ra Jesús. Ta zutu ra, ra cahan zahan griego cuu ra.

² Vaha ñiyívi cuu ra Timoteo catyi ñiyívi sino iñi Tuhun Ndyoo ñuu Listra ta ñuu Iconio.

³ I cuñi ra Pablo sa cuhun ra Timoteo sihin ra. Zoco i quihin xihna ra sii ra ta i sahndya ra ñiñ xihni xuu ra coto cahan xaan ñiyívi hebreo ñuu cuan vatyí sito ñu vatyí ra griego cuu zutu ra ta ña tuhva ra zavaha costumbre maa ñu.

⁴ Tacuan ta sahan ra tahan tahan ñuu. I nacatyí ra sihin ñiyívi tuhun i nacatyí ra apóstol ta ra ndyizo tyiño nu iyo ñiyívi sino iñi ñuu Jerusalén vatyí tacuan ta cua zacuenda ñu sii ñu cuhva i tyaa ra nuu carta cuan.

⁵ Tacuan ta sicoo ca tundyee iñi sii ñiyívi sino iñi Tuhun Ndyoo, ta vaha xaan ca sino iñi ñu sii ra Ndyoo ta tandihí quívi i ndutuu ca ñu.

Tahan ra Pablo ñimahna ta ndyehe ra sii minoo ra nu cu si Macedonia

⁶ Ñá saha Tatyí Ii sa nacatyí ra Pablo Tuhun Ndyoo sihin ñiyívi nu cu si Asia. Yucuan cuenda i yaha ñi ra ndya nu cu si Frigia ta Galacia.

⁷ Ta i saa ra nu cu si Misia. Ndyá indyacuan cua cuhun ra ndya nu cu si Bitinia sica iñi ra, zoco ñá saha tucu Tatyí Ii sa cuhun ra yucuan.

⁸ Tacuan ta i yaha ra nu cu si Misia, ta i quihvi ra ñuu Troas sa cuu cuenda Misia. Ta Troas cuan ndyaa si yuhu tyañuhu.

⁹ Yucuan i tahan ra Pablo ñimahna ta sisi ñimahna i ndyehe ra sii minoo ra nu cu si Macedonia. Ta i sica ra cuan tumañi iñi sii ra Pablo ta catyi ra: “Quisun ndya Macedonia ta tyindyeeun sii ndi.”

¹⁰ Ta sa yaha ndyehe ra Pablo ñimahna cuan ta yuhvi ra Lucas sihin ra Pablo ta inga ra i zanumi ndi sa cuhun ndi ndya Macedonia vatyí sito ndi vatyí sa tasi ra Ndyoo sii ndi sa cua nacatyí ndi tuhun ra indyacuan.

Ndyaa ra Pablo ta ra Silas ñuu Filipos

¹¹ I quihvi ndi barco ñuu Troas ta sa ndoo ñi cuahan ndi ndya cuhva ndya saa ndi minoo ñuhu mahñu tyañuhu. Nañi si Samotracia ta inga quívi i saa ndi ñuu Neápolis.

¹² Ndyá indyacuan i quisaha sica ndi sihin saha ndi ndya ñuu Filipos. Cahnu xaan ñuu cuan. Ñahñi inga ca ñuu ñiñi ca iyo yucuan. Ndyaca ñaha ñiyívi romana sii si. Yucuan i ndoo ndi zuhva quívi.

¹³ Mínoo quívi quitatu ñiyívi i quita ndi sata ñuu ndya nu iyo minoo yuu vatyí yucuan tuhva ñiyívi sahan ta sica tahvi ñu sii Ndyoo. Yucuan i sindyaa ndi ta i nacatyí ndi Tuhun Ndyoo sihin ñu zihí, ñu i titahan yucuan.

¹⁴ Mínoo ña nañi ña Lidia. Ñuu Tiatira cuu ñuu ña. Xico ña zahma vaha, zahma yuhva tixinda, vatyí yucuan cuu tyiño ña. Zacahnu ña sii ra Ndyoo cuhva zacahnu ñiyívi hebreo sii ra. I tyizoho ña sa cahan ra Pablo, ta i nuña ra Ndyoo sa siñi tuñi sii ña, ta i sino iñi ña sa catyi ra Pablo.

¹⁵ Sicoo ndutya ña sihin ñiyivi sii ña, ta ziqui i catyi ña: Sa sito ndo vatyi ndisa cuii sino iñi sii ra Jesús, yucuan cuenda cuhun ndo ta cua ndoo ndo zuhva quivi vehi. Catyi ña ta i zañiñi ña sii ndi ta cuahan ndi vehe ña.

¹⁶ Mínoo quivi sahan ndi nu sica tahvi ñiyivi sii Ndyoo ta tahan ndi sii minoo ña yoco. Ñoho tatyí cuihna sii ña, ta cuu nacatyí ña ñaa sa cua tahan ñiyivi nu cuahan quivi. Cuhva cuan i zahacanaa ña xuhun ta ñihi sitoño ña xuhun cuan.

¹⁷ I quisaha ndyico ña sii ra Pablo ta sii maa ndi ta i cana saa ña ta catyi ña: Ra ihya zavaha ra cuhva cuñi ra Ndyoo cahnu. Ta vasi nacatyí ra sihin ndo yozo caa cua cacu añima ndo ta ma cuhun ndo andyaya. Catyi ña.

¹⁸ Tacuan i zavaha ña cuaha xaan quivi cuhva ndya ñá cundyee ca iñi ra Pablo, ta ziqui i nandyehé sata ra ta i catyi ra sihin tatyí cuihna cuan: Yuhvi catyi vatyi quiton añima ña ya vatyi iyo tundyee iñi sii ra Jesús. Catyi ra. Ta zuun ñi caa cuhva cuan i quita tatyí cuihna añima ña.

¹⁹ Ta sa sito sitoño ña vatyi ma ñihi ca ra xuhun sihin ña vatyi sa i quita tatyí cuihna añima ña ta i tiin ra sii ra Pablo ta ra Silas ta sindyaca ra sii ra ndya vehe tyiño.

²⁰ I sindyaca sitoño ña sii ra nuu ra juez ta catyi ra sihin ra juez: Ra ihya zativi tyiño ñuu yo ta ñiyivi hebreo cuu ra.

²¹ Zacuaha ra costumbre sa ma cuu sino iñi yo ta ma cuu zavaha yo vatyi ñiyivi romano cuu yo. Tacuan i catyi ra cuan.

²² Tacuan ta i tyaa tandihi ñiyivi cuatyí sata ra Pablo ta ra Silas. Ta i tava ra cu tyiño tyiño sa quita zahma ra Pablo ta ra Silas. Ta i catyi ra sihin ra policía: Cañi vaha vaha ndo sii ra sihin yutu.

²³ Ta sa yaha cañi xaan ra sii ra ta i tyihi ra sii ra vehe caa ta catyi ra sihin ra cumi vehe caa vatyi nacucumi vaha xaan ra sii ra.

²⁴ Ta sa ñihi ra cumi vehe caa cuan tuhun cuan ta i tyihi ra sii ra vehe nu cutu ca, ta i tyihi ra saha ra sisi vitu.

²⁵ Tañi cuhva maa ñuu sata ra Pablo ta ra Silas yaa Ndyoo ta sica tahvi ra sii Ndyoo ta i tyizoho inga ra ñoho si vehe caa cuan.

²⁶ Ta ta sica cuii ñi i taan minoo sa ñihi xaan. Ñihi xaan i quizi si vehe caa cuan. Ta zuun ñi caa cuhva cuan i nuña tandihi yuvehe ta i ndasi cadena sa nuñi ra ñoho vehe caa cuan.

²⁷ I natahvi iñi ra cumi vehe caa cuan. Ta ndyehé ra vatyi nuña tandihi yuvehe, ta sica iñi ra vatyi sa sino tandihi ra ñoho si vehe cuan. Yucuan cuenda i tava ra mityi ra ta cua cahñi ra zuun ñi sii maa ra.

²⁸ Zoco i catyi ra Pablo: Ma cahñun suun. Ñoho tandihi ndi ihya.

²⁹ I sica ra cumi vehe caa cuan ñúhu ta i cacono ra sisi vehe cuan. Ñihi tacuan ñi ca ra vatyi yuhu xaan ra. I sicuñi siti ra nuu ra Pablo ta ra Silas.

³⁰ Ta ziqui i tava ra sii ra ta i ndaca tuhun ra sii ra: ¿Ñaa sa cuñi si zavehi, tata, ta cua cacu añime?

³¹ Ta i catyi ra Pablo sihin ra: Sino iñun sii ra Jesús, ta cua cacun, yoho ta tandihi ñiyivi suun.

³² Tacuan ta ziqui i nacatyí ra Pablo Tuhun Ndyoo sihin ra ta sihin tandihi ñiyivi vehe ra.

³³ Ta zuun ñi sa cuaa cuan i nacatya ra cumi vehe caa cuan nu ñicuehe nduu tahan ra. Ta i sicoo ndutya ra cumi vehe caa cuan sihin tandihi ñiyivi sii ra.

³⁴ Tacuan ta i quihin ra sii ra Pablo ta cuahan ra sihin ra ndya vehe ra, ta saha ra sa casi ra. Ta zii xaan i cuñi ra ta ñiyivi sii ra vatyi sa sino iñi ñu sii ra Jesús. (Tacuan ta ziqui i nandihvi tucu ra Pablo ta ra Silas vehe caa cuan coto cuxaan ra cu tyiño sihin ra cumi vehe caa.)

³⁵ Ta inga quivi sa ñaha ñi i tasi ra juez sii ra policía ta catyi ra sihin ra cumi vehe caa: Zaña ndo sii ra cuan.

³⁶ Ta tacuan i catyi ra cumi vehe caa cuan sihin ra Pablo vatyi sa cuu quita ra sihin ra Silas.

³⁷ Zoco i catyi ra Pablo: Ra ñuu Roma cuu nduhvi. Ta ñahñi cuhva iyo sii ra ihya sa cañi ra sii ndi nuu ñiyivi ta tyihi ra sii ndi vehe caa. Ta ñá saha ra sa cahan ndi ta nu sa ñá cutuñi ndi. Ta vityi cuñi ra sa cua zaña xehe ra sii ndi. Ña tacuan cuu si. Nacatyí ndo sihin ra juez vatyí naquisi tava maa ra sii ndi ta cua cuhun ndi. Tacuan i catyi ra Pablo.

³⁸ Ta tacuan i nacatyí ra policia sihin ra juez. Ta i yuhu ra juez sa ñihi ra tuhun vatyí ra ñuu Roma cuu ra Pablo ta ra Silas.

³⁹ Yucuan cuenda sahan ra nu ñoho ra Pablo sihin ra Silas ta i sica ra tumañi iñi sii ra sa ma cuxaan ra, ta ziqui i tava ra sii ra, ta i catyi ra sihin ra vatyí sa ndyoo ñi naquita ra ñuu cuan.

⁴⁰ Ta sa quita ra Pablo ta ra Silas vehe caa ta cuahan ra vehe ña Lidia. Ta i ndyehe ra sii inga ñiyivi sino iñi Tuhun Ndyoo ta saha ra tundyee iñi sii ñu ta ziqui i quita ra ñuu cuan.

17

Siñi ñiyivi ñuu Tesalónica Tuhun Ndyoo

¹ I yaha ra Pablo ta ra Silas ñuu Anfípolis ta ñuu Apolonia ta cuahan ra minoo ñuu cahnú. Nañi si Tesalónica. Yucuan iyo minoo vehe ñuhu hebreo.

² Ta tañi sa tuhva ra Pablo sahan, tacuan i sahan ra yucuan. Uñi quivi, quivi quitatu ñiyivi, i zacuaha ra sii ñiyivi cuhva catyi Tuhun Ndyoo.

³ Tyehen i catyi ra: I catyi Tuhun Ndyoo vatyí cua ndyehe ra Cristo tundoho. Cua cuu ra, ta ziqui cua nandoto tucu ra. Yuhvi catyi vatyí ra Jesús cuu ra cu Cristo vatyí tacuan i tahan si sii ra. Ta cua zacacu ra sii ñiyivi nu iyo ñu ndyehe tundoho. Tacuan i catyi ra Pablo.

⁴ Ta ñiyivi i tyizoho, cuaha ñu i sino iñi. Ta cuaha ca ra, ra griego cuu ra. Ta sa sino iñi ra cuhva zacuaha ñiyivi hebreo. Ta inga ñu cuu ñu ñazihi ra cuca ñuu cuan.

⁵ Tacuan ta sa ndyehe ra hebreo, ra ña sino iñi, vatyí sino xaan iñi ñiyivi ta i cucuihna iñi ra sa cuenda si. I quihin ra sii minoo ityi ra sica noo ñi, ra ña zatyíño, ta ra yucuan i zatitahan sii ñiyivi, ta i zanduvaa ra sii ñu. Sahán ra vehe ra Jasón sa nanducu ra sii ra Pablo vatyí cua cundyaca ra sii ra nu yucu tandihi ñiyivi.

⁶ Zoco ñá nañihi ra sii ra. Tacuan ta ziqui i xita cañoño ra sii ra Jasón ta sii zuhva ca ra sino iñi nuu ra cu tyiño. Ta i cana saa ra ta catyi ra: Ra ihya zayanga sii ñiyivi nacahnú ñuu ñiyivi ta vityí vasi zayanga ra sii ñiyivi ñuu yo.

⁷ I saha ra Jasón ya sa cundyaa ra cuan vehe ra. Catyi ra ya vatyí ra Jesús cuu ra cu rey ta yivi ra César. Cuatyí cuu si sa tacuan vatyí ra César cuu rey sii maa yo.

⁸ Tacuan i cahan ra cuñi cuatyí cuan cuhva ndya zanduvaa xaan ra sii ñiyivi sihin ra cu tyiño.

⁹ Zoco i saha ra Jasón ta inga ra zuhva xuhun, ta i quita ica ra.

Cuahan ra Pablo ta ra Silas ñuu Berea

¹⁰ Zuun ñi sa cuaa cuan i zanumi ra sino iñi Tuhun Ndyoo sii ra Pablo ta ra Silas ta cuahan ra ndya ñuu Berea. Ta cuhva sa saa ra yucuan, i sahan ra vehe ñuhu hebreo.

¹¹ Ñiyivi hebreo ñuu cuan vaha ca ñiyivi cuu ñu. Ñá zavaha ñu cuhva i zavaha ñiyivi hebreo ñuu Tesalónica. Cuñi xaan ñiyivi ñuu Berea sa tyizoho ñu Tuhun Ndyoo. Ta tandihi quivi i cahvi ñu Tuhun Ndyoo vatyí cuñi ñu coto ñu tatu ndisa sa cahan ra Pablo.

¹² Yucuan cuenda i sino iñi cuaha xaan ra hebreo, ta cuaha ñuzihi griego, ñu ñiñi.

¹³ Zoco sa ñihi ñiyivi hebreo ñuu Tesalónica tuhun vatyí zacuaha ra Pablo Tuhun Ndyoo ñuu Berea ta ziqui sahan ra cua zanduvaa ra sii ñiyivi ñuu Berea ta cua cahñi ñu sii ra Pablo.

¹⁴ Yatyí xaan i tasi ñiyivi sino iñi Tuhun Ndyoo sii ra Pablo ndya yuhu tyañuhu. Ta i ndoo ra Silas ta ra Timoteo ñuu Berea.

¹⁵ Cuahan uu tahan ñiyivi sihin ra Pablo. Sindyaca ra sii ra ndya ñuu Atenas. Ta ziqui i tasi ra Pablo tyiño sihin ra sa nacatyí ra sihin ra Silas ta ra Timoteo vatyí zanumi ra ta cuhun ra nu iyo ra Pablo.

Ndyaa ra Pablo ñuu Atenas

¹⁶ I ndatu ra Pablo ñuu Atenas ndya cua quisi ra Silas ta ra Timoteo. Ta sica xaan iñi ra Pablo vaty ndyehe ra vaty cuaha xaan zandu yutu iyo ñuu cuan.

¹⁷ Yucuan cuenda sahan ra vehe ñuhu vaty cua natuhun ra sihin ñiyivi hebreo ta sihin inga ñiyivi sino iñi sii Ndyoo. Ta tandihi quivi i nacaty ra sihin ñiyivi i ndyehe ra nuyahvi.

¹⁸ Ta ziqui i natuhun tahan ñiyivi cuhva i cahan ra Pablo. Iyo ñu zacuaha ñu tuhun ra Epicúreo ta iyo ñu zacuaha ñu tuhun ñiyivi estoico. Ta zuhva ñu i catyi: ¿Ñaa tuhun cuu si sa nacaty xaan ra ya vaty cahan xaan ra tuhun inga ndyoo, ra ña sito yo? Tacuan i catyi ra cuan vaty cahan ra Pablo tuhun ra Jesús ta cuhva i nandoto ra Jesús.

¹⁹ Tacuan ta ziqui i sindyaca ñu sii ra Pablo ndya xiñi yucu Areópago nu titahan ra ndyizo tyiño ñuu cuan ta i catyi ra sihin ra Pablo: Cuñi ndi coto ndi ñaa tuhun cuu si sa zacuohon sii ñiyivi.

²⁰ Tucu xaan cuu tuhun nacatyun, ta cuñi ndi coto ndi ñaa sa cuu si. Tacuan i catyi ñu.

²¹ Vaty tandihi ñiyivi ñuu Atenas sihin ñiyivi inga ñuu, ñu iyo ñuu Atenas cuan, ñahñi tyiño zavaha ñu. Maa ñi sa tyizoho ñu ta sa nacaty ñu ñaa cuhva saa iyo.

²² Tacuan i cuu ta ziqui i nduvita ra Pablo mahñu nu yucu ra cuan xiñi yucu Areópago ta i catyi ra sihin ra ñuu Atenas cuan: Ndoho ra ñuu Atenas, ndyehi vaty zacahnu xaan ndo ndyoo sii maa ndo sihin tandihi cuui aña ndo.

²³ Vaty sehín sa ndyehi nu zacahnu ndo sii ndyoo ndo ta i ndyehi minoo altar ta ndyaa letra. Tyehen catyi si: “Cuenda ndyoo sa ña sito yo.” Zacahnu ndo sii ra vazu ña sito ndo sii ra. Ta vityi cua nacaty sihin ndo yoo ra cuu ra.

²⁴ Ndyoo, ra zavaha ñuu ñiyivi cuu ra. I zavaha ra tandihi sa iyo. Sitoho yuty andivi ta ñuhu ñuu ñiyivi cuu sii ra. Ña iyo maa ra sisi vehe ñuhu zavaha ñiyivi.

²⁵ Ña cuñi si sa cua tyindyee ñiyivi sii ra vaty ñahñi sa cumañi sii ra vaty zuun ñi maa ra saha tandihi sa iyo. Saha ra sa cundito yo. Saha ra sa coo taty yo.

²⁶ Minoo tuhun ñi ñiyivi i zavaha ra Ndyoo sa xihna ñi. Tacuan i cuu ta ziqui i ndutuu ca ñiyivi ta i catyi ra Ndyoo vaty cua coo ñiyivi nacahnu ñuu ñiyivi. I catyi maa ra ndyamaa cua coo sa ziin ziin tata ñiyivi ñuu ñiyivi, ta i saha ra ñaa ñuhu cua cuu sii ñu. Ta i catyi ra ñaa ñiyivi cua cundyaca ñaha sa ziin ziin ñuhu ta ama cua cundyaca ñaha ñu.

²⁷ Tacuan i zavaha ra Ndyoo vaty cua nanducu ñiyivi sii ra. Sica iñi ra vaty ña yñi ta cua nañihi ñu sii ra. Vaty ña sica iyo ra sihin yo.

²⁸ Vaty sa cuenda maa ra ta ndito yo, cuu caca yo ta cuu coo yo cuhva iyo yo. Tañi sa i tyaa minoo ra ñuu ndo ta tyiemvu vaty catyi ra: “Maa ra Ndyoo i zavaha sii yo.” Catyi ra.

²⁹ Ta ndisa vaty i zavaha ra sii yo, ta yucuan cuenda ña vaha caca iñi yo vaty caa ra tañi caa minoo ndyoo xuhun cuan a xuhun cuisí, a yuu a ñaa sa zavaha ñiyivi cuhva caa ra.

³⁰ Ta tyiemvu ñá sito maa ñiyivi ñaa sa zavaha ñu. Ta ñá cuxaan ra Ndyoo sihin ñiyivi quivi cuan vaty ñá sito ñu. Zoco vityi catyi ra vaty nazandoo ñiyivi nacahnu ñuu ñiyivi cuaty zavaha ñu.

³¹ Vaty sa sata ra quivi sa cua tasi tuñi ra sii ñiyivi ñuu ñiyivi sihin sa ndoo. Ta saha ra tyiño sii minoo ra sa cua ndyehe ra a sa vaha zavaha ñiyivi a sa ña vaha. I zañaha ra Ndyoo sii yo vaty iyo cuhva sii ra cuan vaty i zanandoto ra sii ra.

³² Ta sa siñi ñiyivi vaty catyi ra Pablo vaty i nandoto minoo ñiyivi ta zuhva ñu tyizoho cuan, i sacú ndyaa ñu sii ra Pablo. Zoco inga ñu i catyi ñu: Cuñi ndi sa tyizoho ndi sa cohon inga saha.

³³ Tacuan ta i quita ra Pablo nu titahan ñiyivi.

³⁴ Ta zuhva ra cuan i sino iñi ra ta i titahan ra sihin ra Pablo. Minoo ra nañi ra Dionisio. Ra ndyizo tyiño ñuu cuan cuu ra. Ta minoo ñaha sino iñi, nañi ña Dámaris. Ta iyo ca ñu sino iñi ndihi ca.

¹ Tacuan ta ziqui i zandoo ra Pablo ñuu Atenas ta cuahan ra ñuu cahnu Corinto.

² Yucuan i nañihi ra sii minoo ra hebreo tañi maa ra. Aquila nañi ra. Ñuu Ponto i cacu ra. Ta cunaha ca sa quita ra nu cu si Italia sihin ñazihí ra. Nañi ña Priscila. I quita ñu ñuu cuan vatyi i tava ra ndyaca ñaha Claudio sii tandihí ñiyivi hebreo ñuu Roma nu sindyaa ñu. Sahan ra Pablo vehe ñu nu ndyaa ñu ñuu Corinto.

³ Yucuan i ndoo ra Pablo ta i zatyíño ra sihin ñu vatyi sa tuhva ra zatyíño tañi zatyíño maa ñu. I zavaha ñu vehe zahma. Ta tacuan i zahacanaa ñu xuhun.

⁴ Ta i natuhun ra Pablo sihin ñiyivi vehe ñuhu hebreo tandihí quivi sa cu quivi quitatu ñiyivi. I natuhun tahan ra sihin ñiyivi hebreo ta i natuhun tahan ra sihin ñiyivi griego vatyi cuñi ra sa cua sino iñi ñu sii ra Jesús.

⁵ Ta sa quita ra Silas ta ra Timoteo ñuu Macedonia ta i saa ra nu ndyaa ra Pablo, ta ziqui i zaña ra Pablo inga tyiño ra ta tandihí tyiemvu i zacuaha ra Tuhun Ndyoo. I nacatyi ra sihin ñiyivi hebreo vatyi ra Jesús cuu ra sa ndatu ñu, ra cua tasi ra Ndyoo. Ta cua zacacu ra sii ñiyivi nu iyo ñu ndyehe tundoho.

⁶ Tacuan ta ziqui i quisaha nduxaan ñiyivi hebreo cuan sihin ra Pablo ta i cahan ñu ndya vaha ñi sii ra Jesús. Tacuan i cuu si ta i naquizi ra Pablo zahma ra vatyi ña cundyee ca iñi ra sa cahan ñu. I catyi ra sihin ñu: Cuatyi maa ndo cuu ta ma cuhun ndo gloria. Yivi cuatyi mi. Ta vityi cuhin cua nacatyi Tuhun Ndyoo maa ñi sihin ñiyivi, sa yivi ñiyivi hebreo cuu.

⁷ I quita ra vehe ñuhu hebreo ta cuahan ra vehe minoo ra nañi Justo vatyi zacahnu maa ra Justo sii Ndyoo. Ta iyo vehe ra vatyi ñi xiin vehe ñuhu.

⁸ Sino iñi minoo ra nañi Crispo Tuhun Ndyoo. Ra cu nuu sii vehe ñuhu hebreo cuu ra. Sino iñi tandihí ñiyivi vehe ra. Ta i sino tucu iñi cuaha xaan inga ñiyivi ñuu Corinto sa siñi ñu Tuhun Ndyoo. Ta i sicoo ndutya ñu.

⁹ Tacuan ta minoo sa cuaa i ndyehe ra Pablo sii ra Jesús sisi ñimahna ta i catyi ra Jesús sihin ra: Ma yuhun Pablo, ta ma cutaxun. Zacuohon Tuhun Ndyoo.

¹⁰ Vatyi zacuenda mi suun. Yoñi ñiyivi cuu tñn suun sa zaha ñu maña suun vatyi iyo cuaha xaan ñiyivi ñuu ya sa cua sino iñi sii.

¹¹ Yucuan cuenda i ndoo ra Pablo minoo cuiya zazava ñuu Corinto sa zacuaha ra sii ñiyivi Tuhun Ndyoo.

¹² Zoco tyiemvu sa cuu ra Galión gobernador nu cu si Acaya, i ndu-ñn ñiyivi hebreo sa ña sino iñi, ta i tñn ñu sii ra Pablo. I sindyaca ñu sii ra nuu ra ndyaca ñaha.

¹³ Ta i catyi ñu sihin ra Galión: Ra ihya, nacatyi xaan ra sihin ñiyivi cuhva zacahnu ñu sii Ndyoo, zoco yivi cuhva catyi ley ndi cuu si cuan.

¹⁴ Sa cua cahan ra Pablo ta i catyi ra Galión sihin ñiyivi hebreo: Tyizoho ndo. Ñahñi sa i zavaha ra ya. Tatu zavaha ra sa ña vaha a cuatyi cua zayange sii ta cua tyizohi sa cahan ndo. Zoco ña tacuan cuu si vatyi ñahñi sa zavaha ra. Ta ma tyizohi sa cahan ndoho ñiyivi hebreo.

¹⁵ Cuñi ndo cuatyi sihin ra vatyi zacuaha ra inga tuhun. Inga tuhun nacatyi ra ta tucu iyo ley maa ndo. Ma ndyehi tyiño cahan ndo. Catyi ra.

¹⁶ Tacuan ta i tava ra sii ra hebreo sata vehe.

¹⁷ Tandihí ñiyivi griego, i tñn ñu sii ra Sóstenes. Ra cu nuu sii vehe ñuhu hebreo cuu ra. I cañi xaan ñu sii ra zuun ñi yuvehe tyiño vatyi cuñi ñu cuatyi sihin ñiyivi hebreo. Ta ñá cahan maa ra gobernador Galión.

Sa nanuhu tucu ra Pablo ndya ñuu Antioquía ta ziqui i quihin tucu ra ityi cuahan ra sa cu uñi saha

¹⁸ Cuaha ca quivi i ndoo ra Pablo yucuan. Tacuan ta ziqui i cuziñn tahan ra sihin ñiyivi yucuan. Ta cuahan ra ñuu Cencrea. I zatya tyehe ra Pablo xiñi ra vatyi cua zavaha ra minoo cuhva sa catyi ra sihin ra Ndyoo. Ta ziqui i quihvi ra barco vatyi cua cuhun ra ityi Siria sihin ña Priscila ta ra Aquila. Yñ maa ña Priscila sii ra Aquila.

¹⁹ Ta sa saa ñu ñuu Efeso i zandoo ra sii ra Aquila ta sii ña Priscila ta cuahan ra vehe ñuhu hebreo ta cahan ra sihin ñu hebreo ñu titahan yucuan.

²⁰ I sica ñu sii ra sa ndoo ra naha ca, zoco ñá cuñi ra.

²¹ Tacuan ta ziqui cua cuziin tahan ra sihin ñiyivi ta catyi ra: Cuñi si sa cuhin ñuu Jerusalén sa cuenda vico. Zoco tatu cuhva ra Ndyoo cua quisi tuqui nu ndyaa ndo. Ta i quihin ra ityi cuahan ra. I quita ra ñuu Efeso sihin barco.

²² Ta sa saa ra Pablo ñuu Cesarea i quihin ra ityi cuahan ra ñuu Jerusalén, ta i saa ra nu iyo ra ndyizo tyiño cuenda ñiyivi sino iñi Tuhun Ndyoo yucuan. Ta i nacaty ra Pablo sihin ra tandihi sa i zavaha ra nu sahan ra. Ta ziqui cuahan ra ñuu Antioquía.

²³ I ndoo ra zuhva quivi ñuu Antioquía cuan ta ziqui i quihin tucu ra ityi cuahan ra nu cu si Galacia ta nu cu si Frigia. Tahan tahan ñuu sahan ra ta saha ra tundyee iñi sii ñiyivi sino iñi Tuhun Ndyoo.

Zacuaha ra Apolos sii ñiyivi Tuhun Ndyoo ñuu Efeso

²⁴ I quisi minoo ra hebreo ñuu Efeso. Nañi ra Apolos. Ra ñuu Alejandría cuu ra. Casi xaan zacuaha ra Tuhun Ndyoo. Sito xaan ra Tuhun Ndyoo, tutu sahanu.

²⁵ Zacuaha ra yozo caa iyo ra Ndyoo. Zacuaha ra sihin tandihi cuii añima ra. Vaha xaan zacuaha ra cuhva sito ra sa cuenda ra Jesús, zoco ta coto ca ra tandihi sa cuenda ra Jesús. Sito ra maa ñi cuhva i zacuaha ra Juan sa zaco ndutya ra sii ñiyivi.

²⁶ Ñá yuhu ra Apolos ta i quisaha zacuaha xaan ra sii ñiyivi sisi vehe ñuhu hebreo. I siñi ña Priscila ta ra Aquila sa cahan ra. Ta ziqui i quihin ñu sii ra ta sahan ñu ndya zava ta i nacaty ñu sihin ra tandihi sa cumañi ca coto ra, tandihi sa i zavaha ra Ndyoo ta cuhva zacacu ra sii ñiyivi sa cuenda ra Jesús, i nacaty ñu sihin ra.

²⁷ Tacuan ta i cuñi ra Apolos sa cuhun ra ndya nu cu si Acaya, ta i tyindyee ñiyivi sino iñi Tuhun Ndyoo sii ra vaty saha ñu xuhun ta i tyaa ñu minoo carta sii inga ñiyivi sino iñi Tuhun Ndyoo ityi cuan vaty cua nacoto ñu sii ra. Ta sa saa ra Apolos nu cu si Acaya i tyindyee xaan ra sii ñiyivi yucuan. Sa sino iñi ñu sii ra Jesús vaty iyo xaan tumañi iñi sii ra Ndyoo.

²⁸ I ndyehe tandihi ñiyivi yucuan vaty vaha xaan cahan ra Apolos sihin ñiyivi hebreo sa ña sino iñi vaty saha xaan ra Ndyoo cuhva sii ra. Ta i zañaha ra cuhva catyi Tuhun Ndyoo. I catyi ra sihin ñu: Ndatu ndo sii ra Cristo. Yuhvi catyi vaty ra Jesús cuu ra vaty i tava ra Ndyoo tyiño sii ra sa cua zacacu ra sii ñiyivi nu iyo ñu ndyehe tundoho. Catyi ra Apolos.

19

Sahan tucu ra Pablo ñuu Efeso

¹ Ta sa ndyaa ra Apolos ñuu Corinto ta i yaha ra Pablo ityi yucu nu cu si Asia cuan ta cuahan ra ñuu Efeso. Yucuan nañihi ra sii zuhva ra sino iñi Tuhun Ndyoo.

² Ta i ndaca tuhun ra Pablo sii ra ta catyi ra: ¿Atu i naquihin ndo Taty Ii quivi i sino iñi ndo Tuhun Ndyoo? Ta i catyi ra cuan sihin ra Pablo: Tañaha ca ma coto ndi tuhun sa cuenda Taty Ii.

³ Ta i catyi ra Pablo: ¿Ta yozo caa i sicoo ndutya ndo? Ta i catyi ra sihin ra Pablo: I sicoo ndutya ndi cuhva catyi ra Juan.

⁴ Ta ziqui i catyi ra Pablo sihin ra: I zaco ndutya ra Juan sii ñiyivi sa yaha ndu-uu iñi ñu cuaty ñu. I nacaty ra sihin ñu vaty cua quisi inga ra cuee ca ta sii maa ra cuan cua sino iñi ñu. Ra yucuan cuu Jesús. Tacuan i zacuaha ra Juan, catyi ra Pablo.

⁵ Ta sa siñi ra cuan tuhun cuan ta i sicoo ndutya ra sa cuenda ra Jesús.

⁶ Ta ziqui i tyizo ra Pablo ndaha ra ziqui ra, ta i noo xica Taty Ii sii ra, ta i quisaha cahan ra inga zahan sa ña tuhva ra cahan ta i zaha ra profetizar, ndihi ca.

⁷ Tañi usi uu tahan ra cahan tacuan.

⁸ I sahan ra Pablo vehe ñuhu ñiyivi hebreo. Uñi yoo i zacuaha ra sii ñiyivi yucuan. Ñá yuhu ra ta i natuhun tahan xaan ra sihin ñiyivi hebreo sa ña sino iñi. Ta i nacaty ra sihin ñu cuhva ndyaca ñaha ra Ndyoo. Ta i zañiñi ra sii ñu vaty ndu-uu iñi ñu cuaty ñu.

⁹ Zoco zuhva ñiyivi yucuan ñihi xaan iñi ñu. Ñá cuñi ñu sa sino iñi ñu. Ta quiñi xaan i cahan ñu sii tuhun ra Jesús nuu ñiyivi yucuan. Tacuan ta i zandoo ra Pablo sii ñu. I

quihin ra sii ñu sino iñi, ta tandihi quivi i natuhun tahan xaan ra sihin ñu sa cuenda Tuhun Ndyoo nu iyo zicuela ra maestro nañi Tiranno.

¹⁰ Ta tacuan i sicoo tyiño uu cuiya cuhva ndya tandihi ñiyivi hebreo ta tandihi inga ñiyivi nacahnu Asia i siñi ñu tuhun ra Jesús.

¹¹ Cuaha xaan sa ndyityi i zavaha ra Pablo i zacuu ra Ndyoo.

¹² Cuhva ndya pañitu a ñaa zahma cua tiin ra Pablo ta cuhun si sihin ñiyivi ndya nu caa ñu cuhu ta i quita cuehe a ñaa taty cuihna ñoho añima ñu.

¹³ Tacuan ta sicoo minoo ityi ñiyivi hebreo. Ndihi noo ñu ta catyi ñu vaty cuu tava ñu taty cuihna sii ñiyivi, ta i cuñi ñu sa cua cutyiño ñu zivi ra Jesús. I cahan ñu cuan sihin taty cuihna ta catyi ñu: Catyi xaan ra Pablo yozo caa iyo ra Jesús. Cuenda ra Jesús cuan catyi ndi vaty cua quiton. Catyi ñu.

¹⁴ Tacuan i zavaha usa tahan ñiyivi, zehe ra Esceva, minoo ra cu zutu cahnu sii ñiyivi hebreo. Usa tahan ñu i zavaha tacuan.

¹⁵ Zivi ra Jesús i cahan ñu sihin taty cuihna ta catyi si sihin ñu: Nacote sii ra Jesús. Ta nacote sii ra Pablo, zoco ña nacote yoo ndoho cuu ndo vaty ñahñi cuhva iyo sii ndo. Catyi si.

¹⁶ Tacuan ta i ndava ra ñoho taty cuihna ziqui ñu ñihi xaan. I tiin ra sii ñu ta cañi xaan ra. Zañicuehe ra sii ñu. I sahndya ra zahma ñu ta i sino ñu vehe ra.

¹⁷ Tacuan i cuu si ta i sito tandihi ñiyivi ñuu Efeso cuhva i tahan ñu. I sito ñu hebreo ta tandihi inga ñiyivi. Ta yuhu xaan ñu. Ta i quisaha catyi ñu vaty cahnu xaan cuu ra Jesús.

¹⁸ Cuaha xaan ñiyivi sa sino iñi Tuhun Ndyoo i quisi nahma ñu nuu ra Pablo tandihi sa ña vaha i zavaha ñu vaty i zatyño ñu sihin tuhun tazi.

¹⁹ I sahmi ñu libro sa sityiño ñu sa zatazi ñu sii ñiyivi. Ta i sahmi ñu tandihi sa sityiño ñu sa cuenda tyiño cuan. Ta sa yaha sahmi ñu tandihi libro ñu ta i zaha ñu cuenda yozo xuhun i siquihi si ta catyi ñu vaty siquihi si uu xico usi mil xuhun cui si.

²⁰ Tacuan i nducahnu ca Tuhun Ndyoo, ta cuaha ca ñiyivi sino iñi ñu, ta saha xaan ca Ndyoo tundyee iñi sii ñu (sa cundyico ñu sii ra).

²¹ Tacuan ta i sica iñi ra Pablo sihin añima ra vaty cua yaha tucu ra nu cu si Macedonia. Cua yaha tucu ra nu cu si Acaya, ta cua cuhun tucu ra ñuu Jerusalén vaty catyi ra: Cua cuhun xihne ñuu Jerusalén. Ta ziqui cuñi xaan si sa cuhun tuqui ñuu Roma. Catyi ra.

²² I tasi ra Pablo sii ra Timoteo sihin ra Erasto, uu tahan ra zatyño sihin ra, ityi nu cu si Macedonia. Ta i ndoo ca ra Pablo nu cu si Asia.

Cuhva i cuvaa xaan ñiyivi ñuu Efeso

²³ Ta tyiemvu cuan sicoo sa sahñi tahan ñiyivi ñuu Efeso sa cuenda Tuhun Ndyoo.

²⁴ Minoo ra nañi Demetrio quisaha sihin si vaty cuaha xaan ñiyivi sino iñi Tuhun Ndyoo. Maa ra Demetrio cuan tuhva zavaha inga ndyoo xuhun cui si, nañi si Diana. Ta sihin tyiño zavaha ra cuaha xaan zahacanaa ra sihin ra zatyño sihin ra.

²⁵ Yucuan cuenda i cana ra sii tandihi ra sihin inga ra zatyño tañi zatyño maa ra ta i catyi ra sihin ra: Yañi xaa, sito ndo vaty vaha xaan zahacanaa yo sihin tyiño ya.

²⁶ Ta vityi sa ndyehe yo ta sa siñi yo cuhva cahan ra Pablo. Catyi ra vaty ndyoo zavaha ñiyivi yivi ndyoo cuu si. Ta cuaha xaan ñiyivi sa sino iñi sa cahan ra ihya ñuu Efeso ta nacahnu Asia.

²⁷ Tatu tacuan cua cuu si, ta ma zata ca ñiyivi sa zavaha yo. Ta tatu cua zaña ñiyivi sa zacahnu ñu sii vehe ñuhu ña Diana, ña vaha sa tacuan vaty cahnu xaan ndyoo cuu ña. Vityi zacahnu tandihi ñiyivi nu cu si Asia ta tandihi ñiyivi ñuu ñiyivi sii ña. Ta nu cuahan quivi ma zacahnu ca ñu sii ña tatu sino iñi ñu sa cahan ra Pablo. Catyi ra Demetrio.

²⁸ Ta sa siñi inga ra sa nacaty ra ta i cuxaan xaan ra ta i cana saa ra ta catyi ra: Cahnu xaan ndyoo cuu ña Diana ña cu sito ho yo ñuu Efeso ya.

²⁹ Tacuan i cuu ta i cuvaa ñiyivi nacahnu ñuu cuan. I tiin ñu sii ra Gayo ta ra Aristarco. Uu tahan ra tahan ra Pablo cuu ra, ra ñuu Macedonia, ta sica noo ra sihin ra Pablo. Ta i xita cañoho ñiyivi sii ra ndya nu cua cundaa tyiño.

³⁰ I cuñi ra Pablo cuhun ra nu cuvaa ñiyivi ta cahan ra sihin ñu, zoco ñá saha inga ra sino iñi Tuhun Ndyoo.

³¹ Ta zuhva ra cu tyiño cuenda Asia, amigo ra Pablo cuu sii ra. Ta i tasi tucu ra cu tyiño cuan tyiño ta catyi ra vatyí ma cuhun ra Pablo.

³² Ta nu titahan ñiyivi iyo ñu cana saa minoo cuhva ta inga ñu cana saa inga cuhva vatyí cuaha xaan ñu cuvaa. Ta cuaha xaan ñu ñá sito ñu ñaa cuenda titahan ñu.

³³ Tacuan ta i tyaa ñiyivi hebreo sii minoo ra ñaño Alejandro ityi nuu, ta i nacatyí ñu sihin ra ñaa sa cua cahan ra. Vatyí ñá sito tucu maa ra cuan ñaa sa cuu. Tacuan ta i saha ra Alejandro minoo zeña sihin ndaha ra vatyí cua cutaxi ñiyivi vatyí cuñi ra catyi ra vatyí ñahñi cuatyí ndyicuu ñiyivi hebreo. Zoco inga ñiyivi i cuvaa xaan ca ñu.

³⁴ Ta sa sito ñu vatyí ra hebreo cuu ra ta quisaha cana saa tandihí ñu vatyí ñá tahan iñi ñu. Tañi uu ora i cana saa ñu ta catyi ñu: ¡Cahnu xaan ndyoo cuu ña Diana ña cu sito ho yo ñuu Efeso ya! Tacuan ñi i cana saa ñu.

³⁵ Tacuan ta cuee ca i zacutaxi ra cu secretario sii ñiyivi ta i catyi ra: Ndoho ra ñuu Efeso, sito tandihí ñiyivi ñuu ñiyivi vatyí cumi vaha yo vehe ñuhu ña Diana vatyí cahnu xaan ndyoo cuu ña. Ta cumi yo sii ña vatyí i quisi ña ndya ityi ziquí ta i canacava ña.

³⁶ Yoñi ñiyivi cua catyi vatyí ña ndisa. Cutaxi ndo. Ta ñahñi ca sa zavaha ndo tatu ma nacañi vaha iñi ndo sa xihna ñi.

³⁷ Vatyí nduu tahan ra sindyaca ndo ihya, ñahñi cuatyí i zavaha ra, ta ñahñi ndya vaha ñi i cahan ra sii ndyoo yo.

³⁸ Yucuan cuenda catyi tatu cuatyí cuñi ra Demetrio ta inga ra zatyíño sihin ra. Cuu cutyihí ra cuatyí saha ra nuu ra cu tyiño. Yucuan cuenda iyo ra juez ta iyo ra cu tyiño. Cuu zandaa ra sihin ra.

³⁹ Ta tatu inga tyiño cuñi ndo. Titahan tucu ndo cuhva catyi ley.

⁴⁰ Ta sa cuenda sa ndyicuu ndo vityí cuu tyaa ñiyivi cuatyí sata ndo nuu ra cu tyiño. Cuu catyi ñiyivi vatyí cuñi ndo cahñi tahan ndo sihin ra cu tyiño vatyí i titahan maa ndo tacuan ñi. Tatu cuñi ra cu tyiño coto ra ñaa cuenda cuvaa xaan ndo, ma ñihi yo cuhva cahan yo sihin ra. Tacuan i catyi ra secretario cuan.

⁴¹ Tacuan i catyi ra ta natasi ra sii ñu nacunuhu ñu ndya vehe ñu.

20

Yaha ra Pablo nu cu si Macedonia ta cuahan ra nu cu si Grecia

¹ Ta sa cutaxi ñiyivi ta ziquí i cana ra Pablo sii tandihí ñiyivi sino iñi Tuhun Ndyoo. I tahvi ra tyiño nuu ñu, ta saha ra tundyee iñi sii ñu. Ta ziquí i catyi ra vatyí cuhun ra. Ta i quita ra ta cuahan ra ndya nu cu si Macedonia.

² I saa ra nu cu si Macedonia, ta saha ra tundyee iñi sii ñiyivi sino iñi Tuhun Ndyoo. Ta ziquí cuahan ra Grecia.

³ Yucuan i ndoo ra uñi yoo, ta ziquí sa cuñi quihvi ra barco ta cuhun ra nu cu si Siria, zoco i ñihi ra tuhun vatyí cuñi ñu hebreo, sa ña sino iñi, cahñi ñu sii ra. Yucuan cuenda i sica iñi ra vatyí vaha ca cua cunuhu ra ityi nu ñuhu ndya nu cu si Macedonia.

⁴ Ihya cuu ra cutahan sihin ra. Ra Sópater, ra ñuu Berea cuu ra, ra Aristarco ta ra Segundo. Ra ñuu Tesalónica cuu nduu tahan ra. Ra Gayo, ra ñuu Derbe cuu ra ta ra Timoteo. Ra Tíquico ta ra Trófimo. Nduu tahan ra cuan i cacu nu cu si Asia.

⁵ Xihna ca tandihí maa ra cuahan ityi nuu ta ndatu ra sii ra Pablo ta sii mi ñuu Troas. (Ra Lucas cuu ra tyaa tutu ya.)

⁶ Maa ndi, i ñoho ndi zuhva ca quivi ñuu Filipos ndya sa yaha vico sa sasi ñiyivi pan ña ndaa, ta ziquí i quita ndi ñuu cuan sihin barco. Ta sa yaha ohon quivi ta ziquí i ñihi tahan ndi sihin inga ra ñuu Troas. Yucuan i ndoo ndi usa quivi.

Sindyehé ra Pablo nu yucu ñiyivi sino iñi ñuu Troas

⁷ Quivi tumingu i tatahan tandihí ñu sino iñi Tuhun Ndyoo. Sasi ñu pan ta sihi ñu ndutya uva vatyí cua nacohon iñi ñu cuhva sihi ra Jesús sa cuenda ñu. Ta i zacuahá ra Pablo sii ñu cuhva ndya maañuu vatyí cua cuhun ra inga quivi.

⁸ I titahan ndi minoo vehe toto ndya ziqui nu cayu cuaha xaan lámpara (cuhva cuu ndyehe ndi).

⁹ Ta ndyaa minoo ra yoco, nañi ra Eutico, ventana vehe sa cu uñi toto cuan. Ta naha xaan i cahan ra Pablo ta cuñi xaan ra Eutico cuzu ra. Ta i quixi ra ta i canacava ra ndya nu ñuhu. Ta ndaha sihi ra, ta i naquihin ñu sii ra.

¹⁰ Tacuan ta i noo ra Pablo ndya nu candyaa ra. Ta sa cunumi ra sii ra ta i catyi ra sihin ñu sino iñi Tuhun Ndyoo: Ma yuhu ndo. Sa nandoto ra.

¹¹ Tacuan ta i nandaa tucu ra Pablo ndya ziqui cuan. Sasi ra sihin ñu, ta naha ca i zacuaha ra sii ñu cuhva ndya sa vasi cundisi. Ta ziqui cuahan ra.

¹² Ta ra yoco cuan, i nduvaha ra, ta cuanuhu ra ndya vehe ra. Ta zii xaan i cuñi tandihi ñiyivi.

Quita ra ñuu Troas ta cuahan ra ñuu Mileto

¹³ Ta maa ndi yatyi ca cuu ndi nuu. Cuahan ndi sihin barco ndya ñuu Asón. Yucuan cua ñihi tahan ndi sihin ra Pablo, ta cua cuhun ra sihin ndi. Vatyí maa ra cuñi ra cuhun ra ityi nu ñuhu ndya ñuu Asón.

¹⁴ Ta sa ñihi tahan ndi sihin ra ñuu Asón, i quihvi ra sisi barco ta cuahan ra sihin ndi ndya minoo ñuhu mahñu tyañuhu. Nañi si Mitilene.

¹⁵ I quita tucu ndi yucuan, ta inga quivi i yaha ndi Quío, sa cuu inga ñuhu mahñu tyañuhu. Ta inga tucu quivi i saa ndi Samos minoo ñuhu mahñu tyañuhu. I quitatu ndi ñuu Trogilio nu cu si Asia ta inga quivi i saa ndi Mileto.

¹⁶ I yaha ñi ndi ñuu Efeso vatyí ñá cuñi ra Pablo ndoo ra naha Asia cuan. Tacuan i zavaha ra vatyí numi ra. Tatu cua cuu, cuñi ra zacahnu ra vico Pentecostés ndya ñuu Jerusalén.

Natuhun ra Pablo sihin ra ndyizo tyiño cuenda ñiyivi sino iñi ñuu Efeso

¹⁷ I cana ra Pablo sii ra ndyizo tyiño cuenda ñiyivi sino iñi ñuu Efeso ndya ñuu Mileto nu ndyaa ra.

¹⁸ Ta sa saa ra cuan i catyi ra Pablo sihin ra: Sa sito ndo yozo caa i cui ta sindyei sihin ndo quivi i sei sa xihna ñi Asia ya.

¹⁹ I zatyíño xein tyiño ra Ndyoo. Ñá zacahni sii. Cuihya xaan i cuñi añime sa ndyehi cuhva zavaha ñiyivi. I ndyehe xein tundoho ta cuaha xaan sa cuñi zavaha ñiyivi hebreo, ñu ña sino iñi cuan, sihin.

²⁰ Sito ndo vatyí ñá yuhi ta nacatyí sihin ndo tandihi cuhva ñaa sa cua tyindyee sii ndo. I zacuehi sii ndo nu titahan ndo. Ta i zacuehi sii ndo ndya vehe ndo.

²¹ I nacatyí sihin ñiyivi hebreo ta sihin inga ñiyivi vatyí cuñi si sa zama ñu cuhva iyo ñu. Nazandoo ñu cuatyí ñu ta nasino iñi ñu sii ra Jesucristo.

²² Ta vatyí cuehin ñuu Jerusalén vatyí tacuan catyi Tatyí li sihin. Ña site ñaa sa cua cuu sii yucuan.

²³ Zoco tandihi ñuu yehi catyi Tatyí li sihin vatyí cuaha xaan tundoho cua ndyehi ta cua quihí vehe caa.

²⁴ Zoco nu ña sica iñi sa cuenda cuan ta vazu cui ñahñi sa cuu. Cuñi xein zavehi tyiño saha ra Jesús sii. Tacuan ta nduzii cuñi. Cuñi xein zacote cuhva saha xaan ra Ndyoo tumañi iñi sii ñiyivi.

²⁵ Ta sa i nacatyí xein sihin ndo cuhva ndyaca ñaha ra Ndyoo, ta site vatyí ma ndyehe ca ndo sii.

²⁶ Yucuan cuenda cuñi nacatyí sihin ndo vatyí yivi ca cuatyí mi cuu tatu ña cuñi ndo sino iñi ndo sii ra Jesús.

²⁷ Vatyí i nacatyí tandihi cuii sa cuñi ra Ndyoo zavaha ndo. Ñahñi sa i tyixehi.

²⁸ Yucuan cuenda zacuenda ndo sii ndo ta zacuenda ndo sii tandihi ñiyivi sino iñi Tuhun Ndyoo vatyí maa Tatyí li saha tyiño cuan sii ndo vatyí i zata ra Jesús sii ñiyivi sino iñi sii ra sihin niñi ra.

²⁹ Site vatyi tatu sa cuehin cua quisi inga ñiyivi, ta ma tahan iñi ñu sa sino iñi ndo Tuhun Ndyoo. Ta tañi zavaha ina nduvahu maña sii mvee ticatyi tacuan cua zavaha ñu maña sii ndo.

³⁰ Ta cuhva ndya nu yucu maa ndo ta cua coo ñu zacuaha sa ña ndisa vatyi cuñi ñu sa cundyico ndo sii ñu.

³¹ Zacuenda xaan ndo sii ndo sihin ñu. Ta nacohon iñi ndo vatyi uñi cuiya i sindyei sihin ndo, ta i zacuehi sii ndo ñiyaca ta ndyiyaca ndya cuhva sacu ñi que vatyi cuñi xein sa zavaha ndo sa vaha.

³² Ta vityi, yañi xaa, zandoi sii ndo sihin ra Ndyoo ta zandoi Tuhun ra sihin ndo vatyi cuñi xaan ra sii ndo, ta cuu cuhva ra tundyee iñi sii ndo. Ta cua cuhva ra tandihi sa cuñi ra cuhva ra sii ndo vatyi zehe ra sii ndo sihin tandihi ñiyivi sa zanduvaha ra aña.

³³ Ñá quihin xuhun ndo, ta nu zahma ta ñá sique sii ndo.

³⁴ Sito vaha ndo vatyi i zatyine sihin ndehei ta ñihi tandihi sa siñi ñuhu sa cuenda mi ta sa cuenda ra ndihi sihin.

³⁵ Tandihí tyiemvu i zacuehi sii ndo vatyi cuñi si sa zatyino ndo ta tyindyee ndo sii ñiyivi ndahvi ca. Nacohon iñi ndo vatyi zuun ñi maa ra Jesús i catyi: “Zi cua cuñi ndo tatu tyindyee ñiyivi sii ndo, zoco zi xaan ca cua cuñi ndo tatu tyindyee ndo sii ñiyivi.”

³⁶ Ta sa ndihi cahan ra Pablo ta i sicuñi siti tandihi ñiyivi ta i sica tahvi ra Pablo sii Ndyoo sa cuenda tandihi ñu.

³⁷ Ta tandihi ñu i sacu xaan ñu ta i sicunumi ñu sii ra Pablo ta sihi ñu xiti ra.

³⁸ Cuihya xaan cuñi ñu vatyi sa catyi ra vatyi ma ndyehe ca ñu sii ra. Ta ziqui i sindyaca ñu sii ra ndya nu ndyaa barco.

21

Cuahan tucu ra Pablo ñuu Jerusalén

¹ Ta zandoo ndi sii ñiyivi ñuu Efeso ta cuahan ndi sihin barco. Ta sa ndoo ñi cuahan ndi ta saa ndi minoo ñuhu mahñu tyañuhu nañi si Cos. Ta inga quivi cuahan ndi inga ñuhu mahñu tyañuhu sa nañi Rodas. Ta yucuan i quita ndi ta cuahan ndi ñuu Pátara.

² Ta ñuu Pátara cuan i quihvi ndi inga barco, yutu cuahan nu cu si Fenicia. I quihvi ndi sii tu ta cuahan ndi.

³ Ta sa yaha ndi, ndyehe ndi minoo ñuhu luhlu nañi si Chipre. I yaha ndi sii si ityi siyo zatyí ndi ta cuahan ndi ndya nu cu si Siria. Ta ziqui cuahan barco ñuu Tiro vatyi cua zandoo tu carga. Ta yucuan cuenda i ndoo ndi ñuu Tiro cuan.

⁴ I nanducu ndi sii ñiyivi sino iñi Tuhun Ndyoo, ta i ndoo ndi sihin ñu usa tahan quivi. Ta maa ñu i nacatyi ñu sihin ra Pablo vatyi ña vaha cahun ra ñuu Jerusalén vatyi tacuan catyi Tatyí li sihin ñu.

⁵ Zoco sa ndihi sa usa quivi cuan ta i quita ndi. Tandihí ñiyivi sino iñi Tuhun Ndyoo ta ñu zihí ta sa ndyihí i cutahan ñu sihin ndi i sindyaca ñu sii ndi ndya yuñuu cuan. Ta i sicuñi siti ndi yuhu tyañuhu ta sica tahvi ndi sii Ndyoo.

⁶ Tacuan ta i nacahan ndi sihin ñu. I quihvi ndi barco ta cuanuhu tandihi ñu ndya vehe ñu.

⁷ I quita ndi ñuu Tiro ta cuahan ndi ñuu Tolemaida. Ta yucuan i zandoo ndi barco ta i sahan ndi nu ndyaa ñiyivi sino iñi Tuhun Ndyoo yucuan. Minoo ñi quivi i ndoo ndi sihin ñu.

⁸ Ta inga quivi i quita ra Pablo ta tandihi ndi, ra ndihi sihin ra, ta cuahan ndi ñuu Cesarea. Yucuan i saa ndi vehe minoo ra sa nacatyi xaan Tuhun Ndyoo sihin ñiyivi. Nañi ra Felipe. Maa ra cuu minoo sa usa tahan ra i casi ñiyivi vatyi cua tyindyee ra sii ra apóstol.

⁹ Ta iyo cumi tahan zehe zihí ra Felipe. Ñu yoco cuu ñu. Ta i zaha ñu profetizar.

¹⁰ Ta sa yucu ndi ñuu cuan zuhva quivi ta i saa minoo ra ndya nu cu si Judea. Nañi ra Agabo. Ta i zaha tucu maa ra profetizar.

¹¹ I quisi ndyehe ra sii ndi. Ta sa i saa ra i quihin ra ñii ñoho sisi ra Pablo ta i sihñi ra saha ra ta i sihñi ra ndaha ra ta i catyi ra: Catyi Taty i vaty ñuu Jerusalén cua cunuhñi sitohe ñii ya tañi nuhñi mi, ta cua cuhva ñu sii ra sii ñiyivi sa yivi ñiyivi hebreo cuu.

¹² Ta sa siñi ñiyivi sa cahan ra cuan ta maa ndi ra ndihi sihin ra Pablo ta ñiyivi ñuu Cesarea i catyi xaan ndi sihin ra Pablo vaty sa ndyoo ñi ma cahun ra ñuu Jerusalén.

¹³ Zoco i catyi ra Pablo: ¿Ñacu saca xaan ndo? ¿Ñaa cuenda saha ndo tucuihya iñi sii? Vaty yuhvi sa ndyaa listi yivi sa cunuhñi ñi sehi ta vazu cui ñuu Jerusalén sa cuenda ra Jesús vaty maa ra ndyaca ñaha sii.

¹⁴ Tacuan i catyi ra, ta ñá cuu zama ndi cuhva sica iñi ra. Yucuan cuenda i zandoo ndi tyiño cuan ta catyi ndi: Nazavaha maa ra Ndyoo cuhva cuñi ra.

¹⁵ Ta ziqui i tyihi vaha ndi ndaha tyiño ndi ta cuahan ndi ñuu Jerusalén.

¹⁶ Cuahan zuhva ra ñuu Cesarea sihin ndi, ra sino iñi Tuhun Ndyoo. Ta cuahan minoo ra ñuu Chipre. Mnasón nañi ra. Sa iyo cuiya sino iñi ra sii ra Jesús. Vehe ra Mnasón sindyaca ra cuan sii ndi vaty cua cundyaa noo ndi sihin ra nu iyo vehe ra ñuu Jerusalén.

Natuhun ra Pablo sihin ra Jacobo

¹⁷ Ta sa saa ndi ñuu Jerusalén zii xaan i cuñi tandihi ñu sino iñi Tuhun Ndyoo sa ndyehe ñu sii ndi.

¹⁸ Ta inga quivi sahan ndi sihin ra Pablo vaty cua natuhun ra sihin ra Jacobo. Ta i titahan tandihi ra ndyizo tyiño sa cuenda ñiyivi sino iñi.

¹⁹ Ta i catyi ra Pablo: Nacumi sii maa ndo. Ta ziqui i nacaty ra tandihi cuu cuhva i zavaha ra Ndyoo. Ta i saha ra cuenda yozo caa i tyizoho ñiyivi sa yivi ñiyivi hebreo cuu Tuhun Ndyoo tandihi ñuu nu sahan ra.

²⁰ Ta sa siñi ñu cuhva cuan i zacahnu xaan ñu sii Ndyoo. Ta i catyi ñu sihin ra Pablo: Vaha yañi xaa, zoco sa siton vaty iyo cuaha xaan ñiyivi hebreo sa sino iñi sii ra Jesús vityi. Tandihi ñu catyi vaty ñiñi xaan cua cundyico yo tandihi ley saha ra Moisés.

²¹ Ta catyi xaan ñiyivi sihin ñu vaty moo zacuaha sii tandihi ñiyivi hebreo, ñu iyo ñuu nu iyo inga ñiyivi, vaty nazaña ñu tandihi costumbre i saha ra Moisés. Catyi ñu vaty moo catyi sihin ñu vaty ma tahndya ca ñii xiñi xuu lee ta ma zavaha ca ñu costumbre sahan ñu.

²² Yucuan cuenda ña ñihi ndi cuhva ñaa sa cua zavaha yo vaty cua titahan ñiyivi tatu sa ñihi ñu tuhun vaty saa ndo.

²³ Yucuan cuenda vaha tatu cua zavohon cuhva catyi ndi. Iyo cumi tahan ra tahan yo ihya. Cua zavaha ra minoo cuhva sa catyi ra sihin Ndyoo.

²⁴ Ta catyi maa ndi vaty vaha xaan tatu cua cahun sihin ra vehe ñuhu hebreo. Ta cua coo ica moo sihin ra sa cuenda ra Ndyoo. Cua tyiyahvun yahvi cuenda mvee ticaty sa cua cahmi ra sa cua cuhva ra sii Ndyoo. Ta cua zatya tyehe xiñi ra cuhva iyo costumbre. Tacuan ta cua coto ñiyivi sii yo vaty yivi sa ndisa cuu sa cahan ñiyivi sa cuendon. Cua ndyehe ñu vaty cumi vaha moo costumbre maa yo.

²⁵ Ta sa cuenda ñiyivi sa yivi ñiyivi hebreo cuu ta sino iñi ñu Tuhun Ndyoo. Sa tyaa ndi carta sii ñu ta catyi ndi vaty ma caca iñi ñu cuenda costumbre hebreo. I catyi ndi maa ñi sa ma casi ñu coño sa saha ñiyivi sii inga ndyoo. Ma casi ñu niñi quití ta ma casi ñu coño quití tatu ñá sati vaha niñi ti. Ta ña vaha cua coo minoo ñaha sihin ndya vaha ñi rayii tatu yivi yii ñu cuu. Ta tacuan tucu rayii. Tacuan i catyi ra cuan sihin ra Pablo.

Tiin ñiyivi sii ra Pablo vehe ñuhu hebreo

²⁶ Tacuan cuu ta i quihin ra Pablo sii sa cumi tahan ra cuan. Ta inga quivi cuahan ra vehe ñuhu hebreo vaty cua coo ica ra sa cuenda ra Ndyoo. Cuahan ra vehe ñuhu hebreo vaty cua zacoto ra sii ra cu zutu hebreo ñaa quivi cua ndihi sa coo ica ra ta ñaa quivi cua cuhva ra ofrenda sii ra Ndyoo (vaty tacuan i cuu costumbre sii ñiyivi hebreo).

²⁷ Zoco sa cuñi ndihi ra sihin sa usa quivi sa iyo ica ra ta i quisi minoo ity ñiyivi hebreo, ñu ña sino iñi, ñu Asia ta i ndyehe ñu sii ra Pablo sisi vehe ñuhu hebreo, ta i zacuvaa ñu sii ñiyivi. Ta i tiin ñu sii ra Pablo.

²⁸ I cana saa ñu ta catyi ñu: Ñiyivi ñuu Israel, tyindyee ndo sii ndi. Ra ihya cuu ra zacuaha sii tandihi ñiyivi ñuu ñiyivi ta catyi ra vatyí ña vaha ley saha ra Moisés ta ñahñi tyindyee vehe ñuhu ya. Ta vityi i tyihi ra sii ra griego vehe ñuhu ya ta zativi ra ihya ta ii xaan cuu ihya. Ta ña zacahnu ra sii ra Ndyoo sa ndisa cuii.

²⁹ Tacuan i cahan ñu vatyí sa ndyehe ñu vatyí ndihi ra Trófimo ra ñuu Efeso sihin ra Pablo si ñuu ta sica iñi ñu vatyí sindyaca ra Pablo sii ra sisi vehe ñuhu hebreo, zoco ña tacuan.

³⁰ Tacuan ta i quisaha cuvaa tandihi ñiyivi, ta i cacono ñiyivi ndya vehe ñuhu cua ndyehe ñu ñaa sa cuu. Ta yucuan i tiin ñu sii ra Pablo ta i xita cañoño ñu sii ra cuhva ndya sata vehe ñuhu ta ta sica ñi i nacazi ñu yuvehe.

³¹ I cuñi ñu cahñi ñu sii ra ta i saa tuhun cuan ndya nu ndyaa ra cu nuu sii minoo mil zandaru vatyí i cuvaa nacahnu ñuu Jerusalén.

³² Ta ta sica cuii ñi i quihin ra cu nuu sii zandaru sii inga ra ñiñi cuenda zandaru sihin zandaru ra. Ta i cacono tandihi ra ndya nu yucu tuu ñiyivi. Ta sa ndyehe ñiyivi vatyí vasi zandaru ta i zaña ñu sa cañi ñu sii ra Pablo.

³³ I tuhva ra cu nuu cuan nu ndyaa ra Pablo, ta i tava ra tyiño vatyí cua tiin zandaru sii ra ta cua cuhñi ra sii ra sihin uu tahan cadena. Ta ziqui i ndaca tuhun ra cu nuu sii ra Pablo yoo ra cuu ra. Ta i ndaca tuhun ra ñaa cuatyí i zavaha ra.

³⁴ Zoco i cana saa xaan ñiyivi. Ziin ziin cuhva cahan ñu ta ñá siñi ra cu nuu sa cahan ñu vatyí cuvaa xaan ñu. Ta ziqui i tava ra tyiño sii zandaru vatyí cundyaca ra sii ra Pablo ndya vehe nu ndyaa zandaru.

³⁵ Ta sa saa zandaru nu iyo cuayu yuvehe ra ta i cañihi ra sii ra Pablo ndyizo ra vatyí i nduxaan xaan ñiyivi.

³⁶ Ndyico tandihi ñu sii ra ta cana saa ñu: ¡Nacuu ra cuan! Catyi ñu.

Nacatyí ra Pablo cuhva i zavaha ra

³⁷ Sa cua quihvi ra sisi vehe ra zandaru ta i quisaha cahan ra Pablo sihin ra cu nuu sii zandaru ta catyi ra: Cuñi quehin minoo tuhun suhun. Ta iyo xaan i cuñi ra cu nuu ta catyi ra: Aan, ziqui cuu cahan moo zahan griego.

³⁸ Vaziqui yivi yoho cuu ra i quisi ndya Egipto, ra cuñi cahñi tahan sihin ra ndyaca ñaha quivi cuan, ra i zandu-ñi sisi huhu cumi mil ra cahñi sii ñiyivi.

³⁹ Tacuan i cahan ra ta i catyi ra Pablo: Yivi yuhvi. Ra hebreo cui. Ra ñuu Tarso sa iyo cuenda Cilicia cui. Cahnu xaan ñui. Sa ndyoo ñi cuhvon minoo tumañi iñi sii, naquehin sihin ñiyivi yucu ihya.

⁴⁰ I saha ra cu nuu cuan permiso vatyí cahan ra Pablo. Ta i sicuiñi ndyaa ra Pablo nu iyo cuayu ta saha ra zeña sihin ndaha ra vatyí cua cutaxi ñiyivi. Ta sa cutaxi ñu ta ziqui i cahan ra sihin ñu sihin zahan hebreo. Zahan cahan maa ñu cuu si cuan. Ta catyi ra:

22

¹ Ndoho tata sahnu ta ndoho yañi xaa, tyizoho ndo tuhun cua quehin sihin ndo vityi vatyí ñahñi cuatyí i zavehi. Catyi ra.

² Ta sa siñi ñiyivi vatyí cahan ra zahan hebreo ta i cutaxi ca ñu. Ta i catyi ra Pablo.

³ Ra hebreo cui tañi maa ndo. I caqui ñuu Tarso, ñuu iyo cuenda Cilicia, zoco ñuu ya i sahnu mi vatyí i zacuehi sihin ra sahnu Gamaliel. Vaha xaan i zacuaha ra sii, cuhva iyo ley sa cuenda ñiyivi sahnu sii yo. Tandihi quivi sica iñi cuhva cua tyei yahvi sii Ndyoo sihin tandihi cuii añime tañi sica iñi tucu maa ndo.

⁴ Ta quivi cuan i sahñi tahan xein sihin ñiyivi sino iñi sii ra Jesús, ta iyo ñu i sahñi. Ta i quihin sii rayi ta sii ñu zihí, ta i tyihi sii ñu vehe caa.

⁵ Sa ndaa cuu ra cu nuu sii zutu sihin tandihi ra sahnu vatyí maa ra cuu ra i saha tutu sii, sa sindyize ta sehin nu ndyaa ra hebreo yañi yo ñuu Damasco. Sehin sa nandiqui sii ñu sino iñi sii ra Jesús cua quisi ndyaque sii ñu ihya ñuu Jerusalén vatyí cua ndoho ñu.

Nacatyí ra Pablo yozo caa i zama cuhva iyo ra

⁶ Ta cuehin ta maa ora sa cuñi sei ñuu Damasco. Ta ta sica ñi i quituu minoo ñúhu ndisi xaan. Siconduu si sii.

⁷ I nduve nu ñuhu. Ta ziqui i siñi sa cahan minoo ra cahan ta catyi ra: “Saulo, Saulo. Ña vaha sa cahñi tohon sihin mi,” catyi ra.

⁸ Ta i ndaca tuhin ta catyi: “¿Yoo ra cuun, tata?” Ta i catyi ra: “Yuhvi cui ra Jesús, ra ñuu Nazaret. Sihin mi sahñi tohon.” Catyi ra Jesús.

⁹ I yuhu xaan ra ndihi sihin vatyí ndyehe ra ñúhu cuan, zoco ña siñi ra sa cahan ra cahan sihin.

¹⁰ Tacuan ta i catyi: “¿Ñaa sa cuñun zavehi tata?” Ta i catyi ra Jesús: “Nduviton ta cahun ñuu Damasco. Indyacuan cua nacatyí ñiyívi suhun tandihi sa cua zavohon.”

¹¹ Zoco ñá cuu ndyehe. Ndaha i cuei zacuu ñuhu cuan. Yucuan cuenda i tiin ra ndihi sihin ndehi, ta i sindyaca ra sii ndya ñuu Damasco.

¹² Yucuan iyo minoo ra nañi Ananías. Zacahnu ra sii Ndyoo tañi catyi ley saha ra Moisés. Tandihí ñiyívi hebreo iyo yucuan catyi ñu vatyí ra vaha xaan cuu ra.

¹³ Saa ra Ananías nu ndyei ta i quisaha catyi ra: “Yoho yañi Saulo, cua ndundisi tucu ndyehun vityi.” Catyi ra. Ta zuun ñi caa cuhva cuan i ndundisi tucu ndyehe. Ta i cuu ndyehe sii ra Ananías.

¹⁴ Ta i catyi ra sihin: “Ndya ta sa naha ta cuhva ndya vityi i zacahnu ñiyívi sahnu sii yo sii ra Ndyoo, ta zuun ñi maa ra i casi suun ta tyiemvu vatyí cua coton ñaa sa cuñi ra zavohon ta cua ndyehun sii ra Jesús, ra ñahñi cuatyí iyo. Ta i saha ra Ndyoo sa cuiñi moo tuhun cahan ra suhun.

¹⁵ Ta vityi cua nacatyun sihin ñiyívi nacahnu ñuu ñiyívi cuhva iyo ra. Cua nacatyun tandihí sa i ndyehun ta tandihí sa i tyizohon.

¹⁶ Ta vityi ma cuatu con. Nduviton ta coo ndutyon cuenda ra Jesús. Ta cua zandasi ra cuatyun.”

Nacatyí ra Pablo cuhva i sahan ra inga ñuu nu iyo ñiyívi sa yívi ñiyívi hebreo cuu

¹⁷ Tacuan i tahan si sii tañi sa nacatyí sihin ndo ta ziqui i quisi nanuhi ndya ñuu Jerusalén ya. Sehin vehe ñuhu hebreo cua caca tahvi sii Ndyoo, ta i ndyehe sii ra Jesús.

¹⁸ Ta i cahan ra sihin ta catyi ra: “Zanumon, ta quiton yatyí ñi ñuu Jerusalén. Vatyí ma sino iñi ñiyívi ya sa nacatyun sihin ñu sa cuenda mi.”

¹⁹ Tacuan ta i catyi sihin ra: “Tata, sito ñiyívi vatyí i sehin tandihí vehe ñuhu hebreo. Ta i tiin sii ñiyívi sino iñi suun, ta i tyihi sii ñu vehe caa. Ta i cañi sii ñu.

²⁰ Ta sito ñiyívi cuhva i sihi ra Esteban, ra i cahan xaan sa cuenda moo. Ta sito ñu vatyí tahan xaan iñi sa sahñi ñiyívi sii ra. Ta yuhvi cuu ra i sicumi zahma ndisi ra sahñi sii ra.”

²¹ Zoco i catyi tucu ra Jesús sihin: “Cuahan vityi vatyí mi tava tyiño suun sa cohon sa cuenda mi, ta cua cahun nu sica ca nu iyo inga ñiyívi, ñu yívi ñiyívi hebreo cuu.” Tacuan i nacatyí ra Pablo sa cahan ra sihin ñiyívi yuvehe nu ndyaa zandaru.

Cuhva i zavaha ra cu nuu sii zandaru sihin ra Pablo

²² I tyizoho ñiyívi sa cahan ra Pablo sa xihna ñi, zoco ñá tyizoho ca ñu sa quisaha cahan ra sa cuenda inga ñiyívi, ñu yívi ñiyívi hebreo cuu. I quisaha cana saa ñu ta catyi ñu: ¡Nacuu ra ya vatyí yívi sa vaha zavaha ra!

²³ I cana saa ñu, ta i zavico ñu zahma ñu, ta i cañi ihno ñu ñiyiti ityi ziqui.

²⁴ Tacuan ta i catyi ra cu nuu sii zandaru vatyí nacundyaca zandaru sii ra Pablo sisi vehe. I catyi ra cu nuu sihin inga zandaru vatyí cua cañi ra sii ra sihin cuarta ndya cua nacatyí ra ñaa cuenda cana saa xaan ñiyívi. Cuñi ra cu nu coto ra ñaa cuatyí cuñi ñu sihin ra Pablo.

²⁵ I sihñi zandaru sii ra Pablo sihin minoo yutu sihin ñii. Ta ziqui i quisaha catyi ra Pablo sihin minoo ra cu capitán: Ña saha ley ndo sa cañi ndo sii minoo ra ñuu Roma. Ta tañaha ca cuhin nuu ra juez, ndihi ca.

²⁶ Ta sa siñi ra capitán sa cahan ra Pablo ta cuahan ra nu iyo ra cu nuu sii zandaru ta catyi ra: Zacuendon cuhva zavohon vatyí ra yucuan, ra ñuu Roma cuu ra.

²⁷ Tacuan ta cuahan ra cu nuu sii zandaru nu ndyaa ra Pablo ta i ndaca tuhun ra sii ra ta catyi ra: ¿Atu ndisa cuii vatyí ra ñuu Roma cuun? Ta i catyi ra Pablo: Zuun.

²⁸ Ta ziquí i catyi ra cu nuu sii zandaru: Cuaha xaan xuhun i tyiyahvi ta i ndui ra ñuu Roma. Ta i catyi ra Pablo: Yuhvi, ra cuenda ñuu Roma cui vatyí i caqui minoo ñuu nu ndyaca ñaha ñuu Roma.

²⁹ Tacuan i catyi ra Pablo, ta yatyi xaan i zandihí zandaru tuhun sa cua cañi ra sii ra. Ta i yuhu xaan ra cu nuu sii zandaru sa sito ra vatyí ra ñuu Roma cuu ra Pablo. Ta sa saha ra sa cuhñi zandaru sii ra.

Sahan ra Pablo nuu tandihí ra ñiñi hebreo

³⁰ Cuñi ra cu nuu sii zandaru coto ra ñaa cuatyí cuñi ñiyívi hebreo sihin ra Pablo. Yucuan cuenda inga quívi i zatitahan ra sii ra zutu nahnu sihin tandihí inga ra ñiñi. Tacuan ta i ndasi zandaru sii ra Pablo ta sindyaca ra sii ra nu titahan ra cuan.

23

¹ Ta sa saa ra Pablo nu yucu ra cuan, ta i ndyehe ra sii tandihí ra hebreo, ra ñiñi ñuu cuan, ta i catyi ra sihin ra: Tandihí ndoho tata sahnu, yuhvi catyi vatyí iyo vehi sa cuenda ra Ndyoo ndya cuhva ndya vityí vatyí ñahñi cuatyí i zavehi. Tacuan i catyi ra Pablo.

² Tacuan ta i catyi ra Ananías, ra cu nuu sii ra cu zutu, sihin ra ndyaa yatyi ñi nu nandyaa ra Pablo vatyí cua cati ra yuhu ra Pablo.

³ Tacuan i cuu ta i catyi ra Pablo sihin ra cu nuu sii ra cu zutu: Yoho, zaha xoon tuhun vatyí vaha xoon, zoco ña ndisa. Cua zandyehe ra Ndyoo tundoho suun. Ihya ndyoon ta catyun vatyí cua tasi tuñun sii, cuhva catyi ley. Ta ¿ña cuenda catyun vatyí cua cati ra cuan yuhi? Ñahñi cuhva sa tacuan catyi ley.

⁴ Tacuan i cahan ra Pablo ta i catyi inga ra yucu yucuan: Ña vaha cohon ndya vaha ñi sihin ra cu nuu sii ra cu zutu vatyí ra zatyíño tyiño Ndyoo cuu ra.

⁵ Ta ziquí i catyi tucu ra Pablo sihin tandihí ra: Yañi xaa, ñá site vatyí ra cu nuu sii ra cu zutu cuu ra. Tatu sa site ma quehin tacuan vatyí catyi Tuhun Ndyoo vatyí ma cahan yo ndya vaha ñi sihin ra ndyaca ñaha sii yo.

⁶ Tacuan i cuu ta ziquí i nacoto ra Pablo vatyí zñin zñin iyo cuhva sii ra cu tyiño cuan. Zuhva ra iyo cuenda ley saduceo ta inga ra cuu cuenda ley fariseo. Ña inuu ñi sino iñi ra. Yucuan cuenda i cana saa ra Pablo nu yucu ra ta catyi ra: Ndoho tata sahnu ta ndoho yañi xaa, yuhvi ra fariseo cui. Ta ra fariseo i cuu zuti. Cua tasi tuñi ndo sii, ihya saha sa vatyí sino iñi vatyí cua nandoto tucu ñiyívi i sihi.

⁷ Ta sa catyi ra Pablo tacuan ta ta sica ñi i quisaha natuhun tahan ra fariseo sihin ra saduceo, ta ñá ndu-ñin ra.

⁸ Catyi ra saduceo vatyí ma nandoto tucu ñiyívi tatu sa i sihi ñu ta yoñi ángel Ndyoo iyo ta ñahñi tatyí cuihna iyo catyi ra cuan. Ra fariseo cuu ra catyi vatyí cua nandoto tucu ñiyívi i sihi. Ta iyo ángel Ndyoo ta iyo tatyí cuihna cuñi ra. Tacuan cuu ta ñá ndu-ñin ra sihin ra tahan ra.

⁹ Tacuan ta ziquí saa xaan i nduu cahan tandihí ra, ta zuhva ra fariseo, ra cu maestro cuenda ley, i nduvita ra ta ñihi xaan cahan ra ta catyi ra: Ñahñi cuatyí i zavaha ra ya. Vaziquí cahan minoo ángel sihin ra. Tatu tyaa yo cuatyí sata ra sahñi tahan yo sihin Ndyoo. Catyi ra.

¹⁰ Ñihi ca i nduu sahñi tahan ñiyívi. Nama tahan ra sii ra Pablo, ta i yuhu xaan ra cu nuu sii zandaru coto cahñi ra sii ra Pablo. Yucuan cuenda i tasi ra sii zandaru cua tava sii ra Pablo ticui ñiyívi cuan ta cundyaca ra sii ra ndya vehe zandaru.

¹¹ Tacuan i cuu si. Ta zuun ñi quívi cuan ta sa cuaa i quituu ra Jesús nuu ra Pablo. I quisi ra nu ndyaa ra Pablo ta catyi ra sihin ra: Zandyeun iñun. I cohon sa cuenda mi ihya ñuu Jerusalén, ta cua cahan tucun cuenda mi ñuu Roma.

Ndu-ñin ra hebreo vatyí cua cahñi ra sii ra Pablo

¹² Inga quivi i ndu-ïin ra hebreo vatyi cua cahñi ra sii ra Pablo. I sihñi tahan ra tuhun sihin ra tahan ra ta catyi ra: Ma casi maa yo ta ma coho yo ndya cuhva ndya cahñi yo sii ra Pablo. Cua cahñi yo sii ra vazú cuxaan ra Ndyoo sii yo.

¹³ Yaha uu xico tahan ra ndu-ïin sa tacuan.

¹⁴ Tacuan ta cuahan ra nu iyo ra zutu nahnu ta catyi ra sihin ra: Sa sihñi tahan ndi tuhun vatyi ñahñi maa cua casi ndi cuhva ndya cahñi ndi sii ra Pablo. Cua cahñi ndi sii ra vazú cuxaan ra Ndyoo sii ndi.

¹⁵ Ta maa ndo ta ra mandoñi cuñi si sa tasi ndo tyiño nu ndyaa ra cu nuu sii zandaru vatyi cua quisi ndyaca ra sii ra Pablo nuu ndo ihya. Catyi ndo vatyi cua nducu tuhun vaha ndo sii ra. Cua cundyaa listo maa ndi ityi vasi ra ta cua cahñi ndi sii ra cuee ca sa saa ra ihya. Tacuan i catyi ra cuan.

¹⁶ Tacuan i cuu si, ta i siñi minoo zasi ra Pablo, zehe cuhva ra, cuhva cahan ra cuan yozo caa cua cahñi ra sii ra Pablo. Ta cuahan ra ndya vehe zandaru cua nacatyí ra sihin ra Pablo.

¹⁷ Tacuan ta i cana ra Pablo sii minoo ra cu capitán ta catyi ra sihin ra: Zavohon minoo tumañi iñi sii sa ndyoo ñi. Cundyacon sii ra luhlu ya nuu ra cu nuu vatyi iyo sa cua nacatyí ra sihin ra.

¹⁸ I quihin ra capitán sii ra sindyaca ra sii ra nu iyo ra cu nuu sii zandaru ta i catyi ra capitán sihin ra cu nuu: Ra Pablo, ra ñoho vehe caa, i cana sii, ta catyi ra vatyi quisi ndyaque sii ra luhlu ya vatyi iyo sa cua nacatyí ra suhun.

¹⁹ Ta ziqui i tiin ra cu nuu sii zandaru ndaha ra luhlu cuan ta sahan ra ndya zava. Ta i ndaca tuhun ra sii ra: ¿Ñaa sa cuñun nacatyun sihin?

²⁰ Ta i quisaha nacatyí ra luhlu cuan sihin ra ta catyi ra: Sa ndyaa tuhun sa cua caca ra hebreo tumañi iñi suun. Cuñi ra sa cuhun ra Pablo ityaan nu cua titahan ra cu tyiño. Cua catyi ra vatyi cuñi ra sa cua ndaca tuhun vaha ca ra sii ra Pablo.

²¹ Ma tyoon yahvi sa cahan ra vatyi yaha uu xico tahan ra cua quihí xehe ta cua cuatu ra sii ra Pablo ityi cuhun ra. Sa sihñi tahan tandihí ra tuhun sa ma casi ra ta ma coho ra ndya cuhva ndya cahñi ra sii ra Pablo. Sa ndyaa listo ra vatyi sica iñi ra vatyi cua cuhva moo sa cuhun ra Pablo nu titahan ra cu tyiño. Tacuan i nacatyí ra luhlu cuan sihin ra cu nuu.

²² Ta ziqui i catyi ra cu nuu sihin ra: Ma nacatyun nu sihin minoo ñiyivi tuhun sa zacoton sii vityi. Ta ziqui i natasi ra sii ra luhlu cuan.

Tasi zandaru sii ra Pablo nu iyo ra gobernador Félix

²³ Tacuan ta i cana ra cu nuu sii zandaru sii uu tahan ra cu capitán ta catyi ra sihin ra: Cua tyihí vaha ndo ndaha tyiño ndo vatyi cua cuhun ndo ñuu Cesarea. Caa ñin sa sa cuaa cua quita ndo ihya. Uu ziendu zandaru cua cuhun sihin saha ra, inga uñi xico usi tahan ra cua cozo ra caballo, ta inga uu ziendu ra cua cuñaa ra lanza iñu ta cuhun ra.

²⁴ Cuhva ndo uu a uñi tahan caballo cozo ra Pablo vatyi sica xaan nu cuhun ra ta cucumi vaha ndo sii ra ndya cua saa ra nuu ra gobernador Félix. Tacuan i catyi ra sihin ra.

²⁵ Ta ziqui i tyaa ra cu nuu sii zandaru minoo carta cua tasi ra sii ra Félix. Ihya cuu sa catyi ra nuu carta cuan:

²⁶ “Nacumi suun tata gobernador Félix catyi yuhvi ra Claudio Lisias.

²⁷ Ihya cuu minoo cuhva cuñi quehin suhun. I tiin ñiyivi hebreo sii ra ya ta cuñi ñu cahñi ñu sii ra. Zoco i ñihí tuhun vatyi ra ñuu Roma cuu ra, ta yucuan cuenda i tasi zandaru ta i zacaqui sii ra.

²⁸ Cuñi cote ñaa cuu cuatyí tyaa ñiyivi hebreo sata ra. Yucuan cuenda i sindyaque sii ra nu titahan ra ndyaca ñaha sii ñiyivi hebreo.

²⁹ Ta yucuan i site vatyi tyaa ra cuatyí sata ra cuenda ley hebreo ñi. Ñahñi cuatyí zavaha ra ta cahñi yo sii ra sa cuenda ley maa yo. Ta nu ñahñi sa zavaha ra ta tyihí yo sii ra vehe caa.

³⁰ Zoco i ñihí tuhun vatyi sa sica iñi ra hebreo cuhva cahñi ra sii ra. Yucuan cuenda tasi sii ra nu ndyoon, ta i catyi sihin ñiyivi hebreo vatyi cua quisi nacatyí ra sihin moo

ñaa cuu cuatyí cuñi ra sihin ra. Tacuan ñi tyei vityi.” Ta tacuan i ndíhi carta i tyaa ra Claudio.

³¹ Tacuan ta i quihin zandaru ityi cuahan ra cuhva sa catyi ra Claudio sihin ra. I quihin ra sii ra Pablo sa sa cuaa ta i sindyaca ra sii ra ndya ñuu Antípatris.

³² Ta inga quívi cua nanuhu zandaru, ra sahan sihin saha ra, ta maa ñi ca ra yozo caballo cuahan sihin ra Pablo.

³³ Ta sa saa ra ñuu Cesarea i saha ra carta i tasi ra Claudio sii ra gobernador Félix, ta i nacuhva cuenda ra sii ra Pablo sii ra.

³⁴ I cahvi ra gobernador cuan carta cuan. Ta ziquí i ndaca tuhun ra ndya cuu ñuu ra Pablo. Ta sa sito ra vatyí ra cuenda Cilicia cuu ra.

³⁵ Ta ziquí i catyi ra sihin ra Pablo: Ndyá quisi xihna ra tyaa cuatyí saton ta ziquí cua tyizohi ñaa sa cua catyun sihin. Tacuan i cahan ra ta ziquí i catyi ra vatyí cua cucumi zandaru sii ra sisi vehe tyiño i zandaa ra Herodes ta sa naha.

24

Cuhva i nacatyí ra Pablo nuu ra Félix

¹ I yaha ohon quívi ta ziquí i saa ra Ananías, ra cu nuu sii ra cu zutu. I saa ra ñuu Cesarea sihin inga uu, a uñi tahan ra sahnu ca ta sihin minoo ra nañi Tértulo. Ra Tértulo cutahan sihin ñiyívi hebreo ta tyaa ra cuatyí sata ra Pablo vatyí sito xaan ra Tértulo ley romana. Ta cua cuu ra yuhu ra hebreo cuan tañi minoo abogado. Ta cua tyiyahvi ra hebreo sii ra. Cuahan tandíhi ra nuu ra gobernador Félix vatyí cua tyaa ra cuatyí sata ra Pablo.

² Ta ziquí i tasi ra Félix tyiño vatyí cua quisi ndyaca zandaru sii ra Pablo. Ta sa i saa ra i quisaha tyaa ra Tértulo cuatyí sata ra. I catyi ra Tértulo sihin ra Félix: Tata Félix, nacuhva ndi tyahvi ndyoo suun vatyí vaha xaan iyo ndi. Sito xaan moo ta yucuan cuenda iyo sa taxi ñi vityí tandíhi ñuu nu iyo ndi. Vaha xaan ndyaca ñohon.

³ Tandíhi nduhvi ra hebreo nacuhva ndi uu xico tyahvi ndyoo suun. Ta zacahnu xaan ndi suun tata Félix.

⁴ Ta vityí zandyeun iñun zuhva ta tyizohon minoo tuhun cua cahan ndi vatyí ña naha xaan cua cahan ndi.

⁵ Sa ñíhi ndi cuhva vatyí yívi ra vaha cuu ra Pablo ya. Zayanga xaan ra vatyí zacuvaa ra sii ñiyívi hebreo nacahnu ñuu ñiyívi. Ta maa ra cuu ra ñíhi sa cuenda minoo ityi ñiyívi ndyico sii ra Jesús, ra ñuu Nazaret.

⁶ Ta i cuñi ra zavaha ra ndya vaha ñi sisi vehe ñuhu cahnu ndi. Zoco i tñin ndi sii ra. Cuñi ndi tasi tuñi ndi sii ra cuhva catyi ley maa ndi.

⁷ Zoco i quisi ra Lisias, ra cu nuu sii zandaru. Ñíhi xaan i tyaa siyo ra sii ndi, ta i quihin ra sii ra Pablo.

⁸ Ta i catyi ra vatyí tatu cua tyaa ndi cuatyí sata ra cuñi si sa quisi ndi nuu moo. Tatu cua zannahma moo sii ra cua coton vatyí sa ndisa cuu cuhva tyaa ndi cuatyí sata ra. Tacuan cuu cuhva cahan ra Tértulo.

⁹ Ta tandíhi ra hebreo i catyi ra vatyí sa ndisa cuu tandíhi sa nacatyí ra.

¹⁰ Tacuan ta i catyi ra gobernador vatyí nacahan ra Pablo. Ta i quisaha cahan ra Pablo sihin ra ta catyi ra: Zíi cuñi vatyí moo cuu ra cua tyizoho cuhva cua quehin. Site vatyí sa cuaha cuiya ndyaca ñaha moo sii ñiyívi hebreo.

¹¹ Tatu cua ndaca tuhun cua coton vatyí iyo usi uu quívi ñi sa sei ñuu Jerusalén. Sehin yucuan vatyí cua zacahni sii ra Ndyoo.

¹² Ná natuhun tahan xein nu sihin minoo ñiyívi. Ta ná zacuvei sii ñiyívi vehe ñuhu cahnu. Ná zacuvei sii ñiyívi vehe ñuhu ndyíhi. Ta ñahñi zacuvei sii ñiyívi sisi ñuu cuan.

¹³ Ñahñi cuhva cuu tyaa ra ya cuatyí sate vatyí yívi sa ndisa cahan ra.

¹⁴ Zoco ndisa cua catyi suhun vatyí zacahni sii ra Ndyoo. Zuun ñi Ndyoo ra i zacahnu ñiyívi sahnu sii ndi ta sa naha cuu ra. Sino iñi tandíhi tuhun i tyaa ra Moisés sa cuu ley ndi. Ta sino iñi tandíhi tuhun i tyaa tandíhi ra profeta. Ndisa vatyí zacahni sii ra Ndyoo cuhva catyi ra Jesús. Ta cuhva cuan ña vaha catyi ñiyívi hebreo.

¹⁵ Sino iñi vatyi cua zanandoto ra Ndyoo sii tandihi ñiyivi nu cuahan quivi. Ta yucuan cuhva sino iñi ñiyivi hebreo, ndihi ca. Cua nandoto ñiyivi vaha, ta cua nandoto ñiyivi ña vaha.

¹⁶ Yucuan cuenda nducu xein cuhva coo vaha mi sihin ra Ndyoo ta sihin ñiyivi tandihi cuhva.

¹⁷ Cuaha cuiya i ñohi inga ñuu ta ziqui i nasei ñui vatyi cua tyindyeyi sii ñiyivi ndahvi ta cua cuhve ofrenda sii ra Ndyoo.

¹⁸ Tacuan ñi zacui, vatyi sa sicoo ique sa cuenda ra Ndyoo, ta i nduvaha tuqui cuenda ra cuhva catyi costumbre maa ndi. Ta i nañihi ñiyivi hebreo sii sisi vehe ñuhu cuan. Ñiyivi ñuu Asia cuu ñu i tñin sii. Zoco ñá ñohi sihin cuaha xaan ñiyivi sisi vehe ñuhu ta ñá cuvaan di.

¹⁹ Cuñi si sa quisi ñu Asia cuan ta tyaa ñu cuatyti sate tatu iyo cuatyti sa ndisa cuii. Zoco ñá quisi ñu cuan.

²⁰ Vaha, vityi cuñi si sa nacatyti ra ihya ñaa cuatyti i zavehi. Sa ndaca tuhun ra sii, quivi i sehin nu titahan ra.

²¹ Ñahñi cuatyti i zavehi, zoco iyo minoo tuhun i quehin sihin ra quivi cuan. Tyehen i catyi sihin ra: “Vityi cua tasi tuñi ndo sii vatyi catyi vatyi cua nandoto tucu ñiyivi.” Tacuan i catyi sihin ra cuan, catyi ra Pablo sihin ra Félix.

²² Sito vaha ra Félix yozo caa iyo cuhva sii ñiyivi sino iñi sii ra Jesús. Yucuan cuenda i catyi ra sihin ra Pablo ta sihin tandihi inga ra cuan: Vaha ñi vityi. Sa cuu cuhun ndo. Naquisi xihna ra Lisias, ra cu nuu sii zandaru, ta ziqui cua catyi yozo caa cundoo tyiño ya. Catyi ra.

²³ Tacuan ta i catyi ra Félix sihin ra cu capitán vatyi cucumi ra sii ra Pablo vehe caa, zoco catyi tucu ra: Cuu tava ndo zuhva sii ra Pablo. Cuhva ndo sa quisi ñiyivi nu ñoho ra vatyi quisi ndyaca ñu ñaa sa siñi ñuhu sii ra.

²⁴ I yaha zuhva quivi ta i sahan tucu ra Félix sihin ñazihí ra ndya vehe tyiño. Nañi ñazihí ra Drusila. Ñaha hebreo cuu ña. I cana ra Félix sii ra Pablo. Ta i tyizoho ra sa cahan ra Pablo cuhva sino iñi ñiyivi sii ra Jesucristo.

²⁵ Ta i cahan tucu ra Pablo sa cuenda cuhva cua zavaha ñiyivi sa vaha ta cuhva cua zacuenda vaha ñu sii ñu ta ma zavaha ca ñu sa ndya vaha ñi, cuhva cuñi maa ñu. I nacatyti ra Pablo vatyi ña cuaha ca quivi ta cua tasi tuñi ra Ndyoo sii ñiyivi. Tacuan ta i quisaha yuhu ra Félix ta i catyi ra sihin ra: Sa cuu cuhun vityi. Nacuyatyti inga saha ta cua cana tuqui suun.

²⁶ Cuñi ra Félix sa tyiyahvi ra Pablo sii ra ta cua zaña ra sii ra. Yucuan cuenda i cana ra Félix sii ra cuaha saha. Ta i natuhun ra sihin ra.

²⁷ Tacuan ta i yaha uu cuiya ta ziqui i quita ra Félix tyiño gobernador cuan. Cuñi ra sa coo vaha ra sihin ñiyivi hebreo. Yucuan cuenda i zanandoo ra sii ra Pablo vehe caa. Ta i quihvi inga ra nañi Porcio Festo tyiño gobernador.

25

Cuahan ra Pablo nuu ra Festo

¹ Tacuan ta i saa ra Festo ta i quihin ra tyiño gobernador. I yaha uñi quivi ta i quita ra ñuu Cesarea ta cuahan ra ñuu Jerusalén.

² Yucuan i cahan ra zutu nahnu ta inga ra ñiñi hebreo sihin ra. I catyi ra ñaa cuu cuatyti i tyaa ra sata ra Pablo.

³ Sica xaan ra hebreo tumañi iñi sii ra Festo sa natasi ra sii ra Pablo ñuu Jerusalén. Sica iñi ra hebreo vatyi cua quihvi xehe ra ta cua cahñi ra sii ra Pablo ityi vasi ra.

⁴ Zoco i catyi ra Festo: Cua ndoo ra Pablo ñuu Cesarea vatyi ña naha ca ta cunanuhi yucuan.

⁵ Yucuan cuenda catyi vatyi nacuhun ra ndyizo tyiño sii ndo indyacuan. Natyaa ra cuatyti sata ra Pablo indyacuan tatu ndisa vatyi iyo cuatyti ra. Tacuan i catyi ra Festo.

⁶ Ta sindyaa ra Festo uña, a usi tahan quivi ñuu Jerusalén ta ziqui i sinanuhu ra ndya ñuu Cesarea. Ta inga quivi cuahan ra vehe tyiño ta i tava ra tyiño sa cua quisi ndyaca zandaru sii ra Pablo.

⁷ Tacuan ta i quihvi ra Pablo nu ndyaa ra, ta sa yucu ra hebreo. Sa quisi ra ndya ñuu Jerusalén. I tuhva ra hebreo ta i tyaa xaan ra cuatyí sata ra Pablo. Zoco ñá cuu cuhva cuñi ra vatyí ña ndisa ra.

⁸ Tacuan ta i catyí ra Pablo sihin ra Festo: Ñahñi numinoo cuatyí i zavehi. Ñá zavehi cuatyí cuenda ley ñiyivi hebreo. Ñá zavehi cuatyí cuenda vehe ñuhu cahnu ndi. Ta ñahñi cuatyí i zavehi cuenda ra César, ra cu tyiño cahnu ñuu Roma. Tacuan i catyí ra Pablo.

⁹ Cuñi ra Festo sa coo vaha ra sihin ñiyivi hebreo ta yucuan cuenda i ndaca tuhun ra sii ra Pablo: ¿Atu cuñun sa cuhun tucun ñuu Jerusalén? Ta yucuan cua catyí yozo caa cua cundoo tyiño ya. Catyí ra.

¹⁰ Ta i catyí ra Pablo sihin ra: Sa ndyei nuu moo ta moo cuu ra ndyaca ñaha cuenda ra César, ra cu tyiño cahnu. Ihya cuu nu cuñi si sa cundoo tyiño ya vatyí ra ñuu Roma cui. Sito vohon vatyí ñahñi cuatyí i zavehi sihin ñiyivi hebreo.

¹¹ Zoco tatu minoo cuatyí cahnu i zavehi ta saha si cuhva cahñi ñiyivi sii, ma nduqui cuhva caqui. Zoco tatu ña ndisa cuhva cahan ra hebreo, ma cuu cuhvon sii, sii ra. Yuhvi catyí vatyí nacatyí maa ra César yozo caa cua cundoo tyiño ya. Catyí ra.

¹² Tacuan ta ziqui i natuhun tahan ra Festo sihin ra ndyizo tyiño sihin ra ta ziqui i catyí ra: Sa catyun vatyí cuñun sa cua catyí ra César yozo caa cua cundoo tyiño ya. Vaha, cua cuhun nuu ra.

Cuahan ra Pablo nuu ra rey Agripa

¹³ I yaha zuhva quivi ta ziqui i quisi ra Agripa, ra cu rey cuenda ñiyivi hebreo. I saa ra sihin ña Berenice ñuu Cesarea cuan. Vasi zaha ñu saludar sii ra Festo.

¹⁴ Cuaha quivi i ndoo ñu yucuan ta ziqui i nacatyí ra Festo sihin ra rey cuan ñaa sa cuu sa cuenda ra Pablo. Tyehen i catyí ra: Iyo minoo ra zandoo ra Félix vehe caa quivi i quita ra sa cuu ra ra cu tyiño.

¹⁵ Ta sa sehin ñuu Jerusalén i quisi ra zutu nahnu ta ra ñiñi sii ñiyivi hebreo nu ndyei ta i nacatyí xaan ra sihin sa cuenda ra Pablo ta cuñi xaan ra sa cua cahñi sii ra.

¹⁶ Zoco i nacatyí sihin ra yozo caa iyo cuhva sii maa ndi. Vatyí ra cu tyiño cuenda ñuu Roma cui. I catyí sihin ra vatyí ña tuhva ndi cahñi sii ñiyivi tatu ñá cundaa vaha tyiño. Ta saha ndi sa zacacu ñiyivi sii ñu yozo caa tyaa ñiyivi cuatyí sata ñu.

¹⁷ Tacuan ta i quisi tucu ra hebreo cuan ihya. Yucuan cuenda ñá ndatu que. Inga quivi i sehin vehe tyiño. Ta i tasi tyiño vatyí cua quisi ndyaca zandaru sii ra Pablo.

¹⁸ Sica iñi vatyí cahnu xaan cuu cuatyí i zavaha ra, zoco ña tacuan cuu cuatyí ra cuhva catyí ra hebreo.

¹⁹ Cuñi ra hebreo cuatyí sihin ra vatyí ña sino iñi ra cuhva iyo costumbre maa ndo hebreo. Cahan ra hebreo cuenda minoo ra ñañi Jesús. Catyí ra vatyí ña ndito ca ra Jesús, zoco catyí ra Pablo vatyí ndito ra.

²⁰ Tacuan ta ñá ñihi cuhva ñaa sa cua zavehi vatyí ziiñ ziiñ cahan ra. Yucuan cuenda i nducu tuhun sii ra Pablo tatu ña cuñi ra sa cuhun ra ndya ñuu Jerusalén vatyí yucuan cua cutuñi ra sa cuenda tyiño ya.

²¹ Zoco i sica ra sa ndoo ra vehe caa ndya cua cuu cuhun ra ta cutuñi ra nuu ra César ñuu Roma. Yucuan cuenda ñoho ca ra vehe caa ndya cua cuu tasi sii ra ñuu Roma. Tacuan i catyí ra Festo.

²² Ta ziqui i catyí ra Agripa sihin ra: Cuñi tucu mi tyizohi ñaa sa cua catyí ra Pablo. Ta i catyí ra Festo sihin ra: Zuun ñi ityaan cua tyizohon sa cahan ra.

²³ Inga quivi i quisi ndyaca ñiyivi sii ra Agripa sihin ña Berenice. Tyaqui xaan zahma ndisi ñu. I quihvi ñu vehe nu cua tyizoho ñu sa cahan ra Pablo. I quihvi tucu zandaru ra ndyizo tyiño nahnu ta tandiñi ra mandoñi ñuu cuan. Tacuan ta i tasi ra Festo tyiño vatyí cua quisi ndyaca zandaru sii ra Pablo. Ta sa saa ra yucuan

²⁴ ta ziqui i cahan ra Festo sihin tandihi ñiyivi yucu yucuan ta catyi ra: Yoho rey Agripa ta tandihi ndoho ra yucu ihya, ica ndo sii ra ya. Cuaha xaan ra hebreo cuñi cuaty sihin ra ityi ñuu Jerusalén. Ta tacuan tucu ñu ihya. Ña zaña ñu cuhva sa catyi ñu sihin, vatyi nacuu ra.

²⁵ Sica iñi vatyi ñahñi cuaty ra sa cua cuu ra, zoco maa ra Pablo i catyi vatyi nacaty maa ra César yozo caa cua cundoo tyiño ya. Yucuan cuenda sica iñi vatyi cua tasi sii ra nu iyo ra César.

²⁶ Cua tasi minoo carta sii ra César. Zoco ña ñihi cuhva ñaa sa cua catyi sihin ra. Yucuan cuenda catyi vatyi cua quisi ra Pablo nuu moo tata Agripa ta nuu inga ndoho, ndihi ca. Cua tyizoho ndo ñaa sa cua catyi ra, ta cua nacaty ndo sihin yozo caa sica iñi ndo. Tacuan ta cua cote ñaa tuhun cua tasi sii ra César.

²⁷ Sica iñi vatyi ña vaha cua tasi sii minoo ra nuhñi, nuu ra cu tyiño cuan tatu ma nacaty sihin ra cu tyiño ñaa cuaty ra iyo. Tacuan i catyi ra Festo.

26

Cuhva i cahan ra Pablo nuu rey Agripa

¹ Tacuan ta i catyi ra Agripa sihin ra Pablo: Sa cuu cahan moo vityi. Ta ziqui i zaha ra Pablo saludar sii ra rey Agripa sihin ndaha ra ta i quisaha catyi ra sihin ra Agripa:

² Yoho rey Agripa, zii xaan cuñi vityi vatyi saha moo sa nacaty suhun. Cuaha xaan cuaty cuñi ñiyivi hebreo ra tahan yo sihin.

³ Zoco zii cuñi vatyi sito moo tandihi costumbre iyo sii maa yo ñiyivi hebreo. Ta sa sica iñun sa cuenda tandihi sa sino iñi maa yo hebreo. Yucuan cuenda sique tumañi iñi suun sa naco tundyee iñi suun ta tyizohon tandihi cui sa cua quehin suhun.

Nacaty maa ra Pablo yozo caa i cuu ra ta ta coto ca ra sii ra Cristo

⁴ Ta cahan ca ra Pablo sihin ra Agripa ta catyi ra: Tandihi ñiyivi hebreo sito vaha ñu vatyi i sahnu mi cuhva iyo costumbre maa yo. Sito ñu yozo caa i cui ndya ta luhli ndya ñui. Ta sito ñu yozo caa i cui ndya ñuu Jerusalén.

⁵ Cuaha xaan cuiya sa sito ñu sii. Tatu cua cuhva ñu cuenda cua catyi ñu vatyi ra fariseo cui ndya ta luhli. Ta ra fariseo, ñihi ca zatyño ra sa tyaa ra yahvi sii tandihi ley hebreo ta ziqui tandihi inga ra hebreo.

⁶ Ta vityi cuñi ñiyivi hebreo cuaty sihin vatyi sino iñi vatyi sa quisi minoo ra cua zacacu sii yo tañi sa catyi ra Ndyoo sihin ñiyivi sahnu sii yo ta tyiemvu.

⁷ Zoco ña sino iñi tandihi sa usi uu tahan ityi ñiyivi hebreo vatyi sa i quisi ra ta ndatu ca ñu sii ra. Yucuan cuenda zacahnu ñu sii Ndyoo ta zavaha ñu tyiño ra ñiyaca ta ndiyaca. Ta zuun ñi cuenda cuan tyaa ñu cuaty sate vatyi catyi vatyi sa yaha quisi ra zacacu sii yo.

⁸ ¿Ñacu ña cuu sino iñi ndo vatyi i zanandoto ra Ndyoo sii ra sisi sa i sihi ra?

Nacaty ra Pablo yozo caa i sahñi tahan ra sihin ñiyivi ndyico sii ra Jesús ta quivi ca

⁹ Ta cahan ca ra Pablo sihin ra Agripa ta catyi ra: Ta quivi ca zuun ñi mi sica iñi vatyi vaha cua zavehi ndya vaha ñi sihin ñiyivi sino iñi sii ra Jesús, ra ñuu Nazaret.

¹⁰ Tacuan i zavehi ñuu Jerusalén. Saha ra zutu nahnu tundyee iñi sii sa cua tyihi cuaha xaan ñiyivi ndyico sii ra Jesús vehe caa. Ta i tahan iñi sa sahñi ñiyivi sii ñu.

¹¹ Cuaha xaan saha i cañi sii ñiyivi tatu ma zaña ñu tuhun ra Jesús. Sehin vehe ñuhu hebreo nu zacahnu ñu sii Ndyoo ta i cañi sii ñu. I cuxaan xein sihin ñu ndya cuhva i sehin inga ñuu nu cuahan ñu ta i cañi sii ñu indyacuan.

Nacaty ra Pablo yozo caa zama cuhva iyo ra

¹² Cahan ca ra Pablo sihin ra Agripa ta catyi ra: Tacuan ta ziqui i ñihi cuhva sihin ra zutu nahnu. Saha ra tundyee iñi sii sa cua tyihi sii ñiyivi vehe caa, ta yucuan cuenda i quihin ityi cua cuhin ñuu Damasco.

¹³ Yoho rey, yuhvi catyi vatyí zuun ñi ityi cuehin ta maa ora i ndyehi minoo ñúhu ityi andivi. Ñihi ca si ta ziquí ñuhu ñicandyi. Nacahnu ndundisi ityi cuehin sihin inga ra ndíhi sihin.

¹⁴ Tacuan ta i nduva tandíhi ndi nu ñúhu ta siñi sa cahan ra cahan. Cahan ra zahan hebreo ta catyi ra sihin: “Saulo, Saulo. Ña vaha cahñi tohon sihin mi. Zuun ñi sii moo zañicuehun. Tañi minoo burro sañi ndyaa tatu cañi sitocho ti sii ti.”

¹⁵ Tacuan ta ziquí i catyi: “¿Yoo sa cahan, tata?” Ta i catyi ra: “Ra Jesús cui. Sahñi tahan xoon sihin.

¹⁶ Vityi nduviton. Nacuiñi ndyoon. I quitui nuun vatyí cua zatyíñon tyiñe, ta cua nacatyun sihin ñiyívi cuhva sa ndyehun sii vityi ta cuhva cua ndyehun sii cuee ca.

¹⁷ Cua zacuenda mi suun sii ñiyívi hebreo ta sii inga ñiyívi. Ta vityi cua tasi suun nu iyo ñiyívi sa yívi ñiyívi hebreo cuu.

¹⁸ Cua zañohon sii ñu minoo sa ndisa cuii ta cua zaña ñu sa zavaha ñu ndya vaha ñi ta cua sino iñi ñu sii. Ma zavaha ca ñu cuhva cuñi cuihna, ta cua zavaha ñu cuhva cuñi mi. Tacuan ta cua ndasi cuatyí ñu ta cua coo vaha ñu sihin mi tañi iyo ñiyívi sino iñi sii.” Tacuan i catyi ra Jesús sihin. Catyi ra Pablo.

Nacatyí ra Pablo vatyí tyaa ra yahvi sa catyi ra Ndyoo sihin ra

¹⁹ Cahan ca ra Pablo sihin rey Agripa ta catyi ra: I tyei yahvi sa cahan ra Jesús sihin, yoho rey Agripa, vatyí i ndyehi sii ra.

²⁰ I nacatyí sihin ñiyívi vatyí cuñi si sa ndu-uu iñi ñu cuatyí ñu ta tyaa ñu yahvi sii Ndyoo. Nazavaha ñu sa vaha cuhva zavaha ñiyívi sino iñi sii ra Jesús. Tacuan i quehin sa xihna ñi ñuu Damasco. Ta tacuan i cahan tuqui ñuu Jerusalén. Zuun ñi tuhun cuan i quehin nu cu si Judea ta inga ñuu nu iyo inga ñiyívi, ñu yívi ñiyívi hebreo cuu.

²¹ Yucuan cuenda i tiin ra hebreo sii, vehe ñuhu cahnu ta nducu ra cuhva cahñi ra sii.

²² Zoco ndya quívi cuan ta cuhva ndya vityí tyindyee ra Ndyoo sii. Nacatyí sihin ñiyívi ñiñi ta nacatyí sihin ñiyívi ndahvi Tuhun Ndyoo. ñin ñi cuhva quehin tañi i cahan ra profeta ta tyiemvu ta tañi i cahan ra Moisés, ndíhi ca. Ña zama mi sii si.

²³ Vatyí i catyi ra cuan vatyí cua tahan ra Cristo tundoho ta cua cuu ra. Ta maa ra cuu ra cua nandoto sa xihna ñi sisi sa i sihi ra. Ta cua nacatyí ra sihin ñiyívi hebreo ta sihin inga ñiyívi yozo caa cua cacu añima ñu. Tacuan i catyi ra Pablo cuhva i nacatyí ra Tuhun Ndyoo.

Catyí ra Pablo vatyí nasino iñi ra Agripa sii ra Jesús

²⁴ Tacuan i cahan ra Pablo ta ziquí ñihi xaan i cana saa ra Festo ta catyi ra: Yoho Pablo, zana xiñun. Cuaha xaan i cahvun ndya cuhva ndya sa nduzana xiñun.

²⁵ Ta i catyi ra Pablo: Tata sahnu Festo, ña zana xiñi. Ta tuhun quehin, maa ñi sa ndisa, maa ñi sa vaha cuu si.

²⁶ Sito vaha rey Agripa ya tuhun quehin. Ña sica iñi ta quehin tuhun ya sihin maa ra vatyí site vatyí sa sito ra tandíhi tuhun nacatyí sihin ndo. Sito ra vatyí sito tandíhi ñiyívi cuhva i cuu ra Jesús. Ñahñi sa xehe i sicoo.

²⁷ Tacuan i catyi ra Pablo sihin ra Festo ta ziquí i cahan tucu ra sihin rey Agripa: Yoho rey Agripa, site vatyí sino iñun sa i tyaa ra profeta ta tyiemvu.

²⁸ Ta i catyi rey Agripa sihin ra Pablo: ¿Atu sica iñun vatyí ta sica ñi cua sino iñi sii ra Jesús?

²⁹ Ta i catyi ra Pablo: Nacuhva ra Ndyoo vatyí cua sino iñun sii ra Jesús a vityí a cuee ca. Cuñi xein sa cua sino iñi tandíhi ndo. Cuñi xein sa cua coo ndo cuhva iyo mi, zoco ña cuñi sa cua quíhi ndo vehe caa cuhva ñohi. Catyi ra.

³⁰ Ta sa yaha cahan ra Pablo ta ziquí i sicuiñi ndyaa ra rey sihin ra gobernador cuan sihin maha Berenice ta tandíhi inga ra yucu yucuan.

³¹ I quita ñu vatyí cua natuhun tahan ñu tuhun sa siñi ñu. Ta i catyi ñu: Ñahñi sa i zavaha ra cuan ta cua cuu ra. Ta ñahñi sa i zavaha ra ta cua ndoo ra vehe caa. Catyi ñu.

³² Ta i catyi ra Agripa sihin ra Festo: Sa xihna ñi cuu zaña moo sii ra Pablo, zoco vityí ma cuu ca vatyí sa sica ra sa cua cutuñi ra nuu ra César.

27

Tasi ra cu tyiño sii ra Pablo ñuu Roma

¹ Tacuan ta ziqui i nacasi tahan tyiño vaty cuahun ra Pablo nu cu si Italia nuu ra César. Ta i quihin minoo ra cu capitán sii ra Pablo sihin zuhva ca ra ñoho vehe caa tañi cuhva i catyi ra cu tyiño. Julio nañi capitán cuan ta iyo ra cuenda zandaru ra Augusto. Yuhvi ra Lucas cuehin sihin ra Pablo.

² Cuahan tucu ra Aristarco, ra ñuu Tesalónica. Cuenda Macedonia cuu ñuu Tesalónica cuan. I quihvi ndi minoo barco sa i quita ñuu Adramitio minoo ñuu sa ndyaa yuhu tyañuhu. Cua nanuhu tu, ta yaha tu ñuu sa iyo yuhu tyañuhu nu cu si Asia. Tacuan i quita ndi sihin maa tu.

³ Inga quivi i saa ndi ñuu Sidón. Vaha zavaha ra Julio sihin ra Pablo vaty saha ra sa cua cuhun ra nu iyo amigo ra ñuu cuan. Ta i saha ñu ñaa sa siñi ñuhu sii ra.

⁴ Tacuan ta ziqui i nandihvi tucu ndi barco cuan ta i zandaa ra zahma sa zacuhun sii barco cuan sihin taty ta cuahan ndi. I yaha tu minoo ñuhu sa ndyaa mahñu tyañuhu sa nañi Chipre. I yaha ndi ticui Chipre ta ñuhu cahnu vaty ñihi xaan quihvi ndaha taty inga siyo cuan ta ñá cuu yaha ndi yucuan.

⁵ I yaha ndi ityi yuhu tyañuhu nu cu si Cilicia. Ta i yaha ndi ityi yuhu tyañuhu ñuu Panfilia. Ta ziqui i saa ndi ñuu Mira sa iyo cuenda Licia.

⁶ Ta ñuu Mira cuan i nañihi capitán cuan inga barco, yutu sa quita ñuu Alejandría. Cua cuhun tu ndya nu cu si Italia. Ta i catyi ra capitán vaty cuhun ndi sihin tu cuan.

⁷ Tacuan ta i quita tucu ndi cuahan ndi. Cuaha quivi cuahan barco cuee cuee ñi, ta sihin tundoho i saa tu yaty inga ñuhu mahñu tyañuhu sa nañi Gnido. Ñá cuu ca cuhun barco ityi nuu vaty ñihi xaan caa taty. Yucuan cuenda i yaha ndi ticui minoo ñuhu mahñu tyañuhu sa nañi Creta ta inga sa nañi Salmón. Ña ñihi xaan ñoho taty yucuan.

⁸ Cuahan barco yuhu yuhu tyañuhu ñi yuhu ñuhu Creta cuan. Tacuan ta i quihvi barco vaty ñi ñuu Lasea nu nañi si Nu Vaha Cua Nacuiñi Barco.

⁹ Sa yaha xaan quivi, ta sa yaha minoo vico sii ñiyivi hebreo nu ñahñi maa sasi ñu, ta ziqui ñá cuu ca cuhun barco vaty sa cua saa quivi cua nduñihi xaan taty vaty sa cuñi noo zavi. Ta ña vaha cuhun barco coto ndyee tu. Yucuan cuenda i catyi ra Pablo sihin ra zacaca barco cuan:

¹⁰ Tata, cutuñi iñi vaty tatu cua cuhun yo cua coo xaan tundoho sii yo. Cua ndyee barco sihin ndaha tyiño ta cua cuu ñiyivi.

¹¹ Ñá tyaa ra capitán cuan yahvi sa cahan ra Pablo, zoco i tyaa ra yahvi sa cahan ra zacaca barco ta sa cahan ra cu sitioho tu.

¹² Ña vaha cua ndoo barco nu sicuñi tu vaty cua coon xaan zavi ta ñihi xaan cua quihvi taty quivi cuan. Yucuan cuenda tandihvi ra i catyi: Naquita yo ihya ta nducu yo cuhva cuhun yo ñuu Fenice sa iyo zuun ñi cuenda Creta ya. Tatu cuu saa yo yucuan, vaha cua ndoo barco. Ña ñihi xaan caa taty yucuan ta ndyaa ñuu cuan siyo caña ñicandyi. Ta cua yaha yo vico zavi yucuan. Tacuan i catyi ra.

Ñihi xaan caa taty nu tyañuhu

¹³ Tacuan ta ziqui i quisaha caa taty ityi tyañuhu zoco ña ñihi xaan. Yucuan cuenda i sica iñi ra vaty cua cuu cuhun ra cuhva cuñi ra. Tacuan ta i tava ra minoo caa vee xaan sa ñoho sisi ndutya sa ña saha caca barco ta ziqui cuahan ndi. Yaty ñi yuhu tyañuhu cuan cuahan ndi nu iyo ñuhu Creta.

¹⁴ Zuhva ñi cuahan ndi ta ziqui ñihi xaan quisaha caa taty. Ityi caña ñicandyi ta ityi yucu quisi taty cuan.

¹⁵ Ñá cuu ca caca barco ityi nuu vaty ñihi xaan caa taty. Yucuan cuenda i saha ra cuhun tu sihin taty nu yivi ityi cuhun ra.

¹⁶ Tacuan i cuu ta i yaha ndi minoo ñuhu luhlu mahñu tyañuhu nañi si Clauda. Siyo taty i yaha ndi sihin barco vaty ñihi ca caa taty inga siyo. Ña ñihi xaan caa taty nu yaha ndi yucuan. Cuu, i natyihvi ra lancha luhlu sisi barco vaty cuñi ndyee xaan lancha.

¹⁷ I tyihi ra sii tu sisi barco coto cunaa tu. Tacuan ta i cava ra yoho nahnu sii barco cahnu cuan. I sihñi ra sii tu coto tahvi cuatyti tu. Tacuan ta i quisaha yuhu ra coto cañi ndutya sii barco nu ñiyiti yuhu tyañuhu nu cu si Sirte. Yucuan cuenda i zanoo ra zahma sa iyo sii barco sa quiñi ndaha tatyti ta saha ra sa cuhun tu ndya vaha ñi.

¹⁸ Inga quivi zuun ñi ñihi xaan coon zavi ta ñihi xaan quiñi ndaha tatyti sii barco. Yucuan cuenda i casaha zavita ra carga tu sisi tyañuhu.

¹⁹ Ta quivi cu uñi cuan i zavita ndi ndaha tyiño barco cuan.

²⁰ Cuaha xaan quivi ñá ndyehe ndi ñicandyi ta ñá ndyehe ndi tiño. Tacuan ta i sica iñi ndi vatyti ma cacu ca ndi vatyti ñihi xaan caa tatyti ta coon xaan zavi.

²¹ Cuaha xaan quivi ñá sasi ndi. Tacuan ta i catyti ra Pablo sihin tandihi ra: Ndoho amigo, vaha xaan ca tatu sa i tyizoho ndo sa quehin quivi cuan ta ñá quita yo nu cu si Creta. Vatyti ndyehe, cahnu xaan tundoho ndyehe yo vityi, ta cuaha xaan ndaha tyiño cua naa.

²² Zoco vityi catyti vatyti zanduzii ndo iñi ndo. Yoñi maa cua naa. Barco ñi cua naa.

²³ Sito ndo vatyti ndyaca ñaha ra Ndyoo sii ta zatyine tyiño ra. Cuñi i quisi minoo ángel Ndyoo nu ndyei.

²⁴ Ta catyti ra: “Ma yuhun Pablo. Cuñi ra Ndyoo sa cua nacatyti moo tuhun ra nu ndyaa ra César. Catyti ra Ndyoo vatyti cua zavaha ra tumañi iñi suun. Cua zacacu ra suun ta sa cuenda moo cua cacu tandihi inga ra ñoho sisi barco ya.” Tacuan i catyti ángel cuan.

²⁵ Yucuan cuenda catyti vatyti zanduzii ndo iñi ndo, xaa. Sino iñi mi sii ra Ndyoo. Site vatyti cua zavaha ra cuhva catyti ángel cuan sihin.

²⁶ Iyo minoo ñuhu nu cua catyihii barco ya, ñuhu sa iyo mahñu tyañuhu ya. Catyti ra Pablo.

²⁷ Sa yaha uu vitya sa sica ndi tacuan. Ityiti cuan ityiti ya cuahan barco zacuu tatyti. Ta minoo sa cuaa cuahan barco tyañuhu sa nañi Adria. Ta maañuu i nacoto ra zacaca barco vatyti yatyi ñi ndya ñuhu yucuan.

²⁸ Tacuan ta ziqui i tyicuhva ra yozo cuhva sa cono ñoho ndutya nu yaha ndi. Ta ndyehe ra vatyti oco sahun iin metro. Cuahan ndi zuhva ca ityiti nuu, ta i tyicuhva tucu ra ta ndyehe ra vatyti oco usa metro ñoho ndutya.

²⁹ Yuhu xaan ra zacaca barco coto tahvi cuatyti tu tatu nañi tu nu yuu. Yucuan cuenda i zanoo ra cumi tahan caa vee xaan sisi ndutya ityiti zuhma tu vatyti zanacuiñi si sii barco. Tacuan ta i ndatu ra ta cuñi xaan ra sa cundisi.

³⁰ Nducu xaan zuhva ra zatyino sisi barco cuhva cono xehe ra. Yucuan cuenda i quisaha zanoo ra lancha. I catyti ra vatyti cua zanoo ra caa nahnu ityiti xiñi barco zoco zandavi ñaha ra.

³¹ Tacuan ta i catyti ra Pablo sihin ra capitán ta sihin inga ra cu zandaru: Tatu ma ndoo ra ya sisi barco sihin maa yo ma cacu ndo. Catyti ra.

³² Tacuan ta i sahndya zandaru yoho nuhñi lancha cuan. Cuahan ñi tu.

³³ Sa vasi cundisi ta catyti ra Pablo sihin tandihi ra: Casi ndo. Vityi sa iyo uu vitya sa ñá sasi ndo ta ñá quixi ndo.

³⁴ Catyti sihin ndo vatyti sa ndyoo ñi casi ndo vatyti tacuan ta cua coo tundyee iñi sii ndo. Ta yoñi maa cua tahan tundoho ndaha ñi. Catyti ra.

³⁵ Ta sa yaha cahan ra Pablo tacuan ta i quihin ra minoo pan. Saha ra tyahvi ndyoo sii Ndyoo nuu tandihi ra yucu yucuan. Ta ziqui i sahnura ra sii si ta quisaha sasi ra.

³⁶ Tacuan ta i nduzii ca iñi inga ra ta sasi ra.

³⁷ Uu ziendu uñi xico sahun iin tahan nduhvi ra ñoho sisi barco cuan.

³⁸ Sasi ndi ndya sa ndaha iñi ndi ta ziqui i zavita ra siti trigo sisi tyañuhu vatyti cua nduñahma ca barco.

Cuhva i ndyee barco

³⁹ Tacuan ta ziqui i cundisi, ta i ndyehe ra zacaca barco vatyti yatyi ñi iyo ñuhu, zoco ñá sito ra ñaa ñuhu cuu si. I ndyehe ra minoo ityiti nu cuu quihvi barco, ta vaha xaan iyo yuhu tyañuhu yucuan. Yucuan cuenda cuñi ra tyihi ra barco yucuan.

⁴⁰ Tacuan ta i sahdya ra yoho nuhñi caa sa zacuiñi sii barco cuan. Ta ziqui i ndasi ra yoho sa sinuhñi vitu sa zavico cava barco. Ta i zandaa tucu ra zahma tu vatyi cua zacuhun tatyi sii tu. Tacuan ta ziqui i quisaha cuahan barco ndya ñuhu cuan.

⁴¹ Zoco i sicuiñi barco nu ñiyiti, ta i ndoo tu. Ñá cuu ca natava ra barco vatyi sa ndyee ityi xiñi tu sisi ñiyiti, ta ityi yii tu i quisaha tahvi cuaty tyañuhu vatyi ñihi xaan quiñi ndaha si sii barco.

⁴² I cuñi zandaru cahñi ra sii ra ñoho vehe caa, ra cuahan sihin ra, coto cua zutya ra ta quita ra nu ñuhu ityi ta cono ra.

⁴³ Zoco ñá saha ra capitán sa cahñi zandaru sii ra ñoho vehe caa vatyi ñá cuñi ra sa cuu ra Pablo. I catyi ra vatyi naquihvi xihna ra cuu zutya tyañuhu, ta cua saa ra ndya ñuhu ityi sa xihna ñi.

⁴⁴ Ta ziqui cua cuhun inga ra ityi sata ra nu vitu vaha a nu vitu barco sa tahvi cuaty. Ta tacuan cuu cuhva i cacu tandihí ndi ta i quita ndi nu ñuhu ityi.

28

Iyo ra Pablo minoo ñuhu mahñu tyañuhu sa nañi Malta

¹ Tacuan cuu cuhva i cacu ndi. I catyi ñiyivi yucuan vatyi Malta nañi ñuhu cuan sa iyo mahñu tyañuhu.

² I cundahvi iñi ñiyivi sii ndi ta zatahan ñu ñúhu vatyi coon xaan zavi ta visi xaan ndi. Tacuan i tyindyee ñu sii ndi.

³ I naquihin ra Pablo zuhva nducu ndyihí cua tyihí ra nu ñúhu. Ta ziqui i quita minoo coo xaan sihin sa ihñi. Ta i tñin ti ndaha ra ta ñá zaña ti.

⁴ I ndyehe ñiyivi yucu yucuan vatyi ñá zaña ti ndaha ra Pablo, ta i quisaha catyi ñu sihin tahan ñu: Ra sañi sii ñiyivi cuu ra ya. Sa cacu ra sisi tyañuhu, zoco ña saha ra Ndyoo sa cundito ra ñuu ñiyivi ya. Catyi ñu.

⁵ Tacuan ta ziqui i naquizi ra Pablo ndaha ra ta i canacava coo cuan sisi ñúhu, ta ñahñi sa tahan ra Pablo.

⁶ I ndatu ñiyivi ta sica iñi ñu tatu zandaa si sii ra Pablo a ta sica ñi cua cuu ra. Naha xaan i ndatu ñu, ta i ndyehe ñu vatyi ñahñi i tahan ra. Tacuan ta i sica iñi ñu inga cuhva ta catyi ñu: Minoo ndyoo cuu ra.

⁷ Yaty ñi nu i siyucu ndi ndyaa terreno minoo ra nañi Publio. Ra ndyaca ñaha yucuan cuu ra. I saha ra sa cundyaa ndi vehe ra. Ta vaha xaan i siyucu ndi uñi quivi i zacuu ra.

⁸ Ñihi xaan caa zutu ra Publio vatyi cuhu ra. Zaa ra ta siyo ra niñi. Cuahan ra Pablo nu caa ra. Sica tahvi ra sii Ndyoo ta tyizo ra ndaha ra sii ra ta zanduvaha ra sii ra.

⁹ I ndyehe ñiyivi vatyi tacuan i cuu si, ta ziqui i quisi tandihí ñiyivi cuhu iyo ñuu cuan. Ta i nduvaha ñu.

¹⁰ Ta ziqui cuaha xaan sa saha maa ñu sii ndi. Ta quivi i quita tucu ndi sihin barco i saha maa ñu tandihí sa siñi ñuhu sii ndi sa cuenda ityi.

Saa ra Pablo ñuu Roma

¹¹ Uñi yoo i sindyaa ndi Malta cuan, ta ziqui i quihvi ndi minoo barco sa iyo yucuan. Yucuan i ndoo tu vico zavi. Yutu sa quita ñuu Alejandría cuu tu, ta ndyaa uu tahan ndyoo, ra nañi Cástor ta ra nañi Pólux sa zanandacu ñiyivi xiñi barco.

¹² I quihvi ndi sisi tu ta cuahan ndi ñuu Siracusa. Ta yucuan i ndoo ndi uñi quivi.

¹³ Ta ziqui i quita ndi yucuan ta cuahan ndi ñuu Regio. Inga quivi i quisi minoo taty ityi yuhu tyañuhu ta i sica barco uu quivi ca ta i saa ndi ñuu Puteoli.

¹⁴ Ñuu cuan i nañihi ndi zuhva ñiyivi sino iñi sii ra Jesús. I sica ñu sa cua ndoo ndi sihin ñu minoo vitya. Tacuan ta ziqui i quita ndi ta cuahan ndi ñuu Roma sihin saha ndi.

¹⁵ Ta sa ñihi ñiyivi sino iñi sii ra Jesús tuhun vatyi vasi ndi ta i quita ñu ñuu Roma ta i quisi zatahan ñu sii ndi ityi vasi ndi. Zuhva ñu i quisi, ñihi tahan ñu sihin ndi minoo nuyahvi nu nañi si Foro Apio. Ta inga ñu quisi, ñihi tahan ñu sihin ndi nu nañi si Uñi Tahan Vehe Posada. Sa ndyehe ra Pablo sii ñu ta saha ra tyahvi ndyoo sii Ndyoo ta sicoo ca tundyee iñi sii ra ta zii ca cuñi ra.

¹⁶ Tacuan ta i saa ndi ñuu Roma. Saha cuenda ra capitán sii ra Pablo ta sii inga ra sindyaca ra sii ra cumi vehe caa. I tyaa ica ra cuan sii ra Pablo. Ndyaa ziiin ra minoo vehe, ta minoo ñi zandaru cumi sii ra.

Zacuaha ra Pablo Tuhun Ndyoo ñuu Roma

¹⁷ I yaha uñi quivi ta ziqui i cana ra Pablo sii tandihi ra ñiñi hebreo. Ta sa titahan ra i catyi ra sihin ra: Yañi xaa, ñahñi cuaty i zavehi sihin ñiyivi hebreo ñu tahan yo. Ñahñi sa ña vaha i zavehi sa cuenda costumbre sahnu sa zavaha ñiyivi sahnu sii yo ta sa naha. Zoco i tiin ñiyivi sii, ñuu Jerusalén ta saha ñu sii, sii ra ndyaca ñaha cuenda ñuu Roma.

¹⁸ I tasi tuñi ra cuan sii, ta ziqui i cuñi zaña ra sii, vaty ñahñi cuaty i zavehi ta cui.

¹⁹ Zoco ñá saha ra hebreo sa zaña ra ndyaca ñaha ñuu Roma sii. Yucuan cuenda i catyi vaty cua cuhin nuu ra César ta cua cundaa tyiño ya. Tacuan i catyi vazú ña cuñi cuaty sihin ñiyivi hebreo.

²⁰ Yucuan cuenda i sique sa ndyehi sii ndo ta sa quehin sihin ndo. Cuñi zandei sihin ndo vaty sino iñi vaty sa yaha quisi ra cua zacacu sii tandihi yo. Maa ra cuu ra sa ndatu xaan tandihi maa yo ñiyivi hebreo. Ta yucuan cuenda nuhñi sihin cadena ya. Tacuan cuu cuhva i catyi ra Pablo.

²¹ Tacuan ta ziqui i nacaty ra hebreo cuan sihin ra Pablo: Ñahñi carta i tasi ra hebreo sii ndi sa cuenda moo. Ta ñiyivi hebreo ñu tahan yo, ñu i quita ñuu Jerusalén ta saa ñu ihya, ñahñi ndya vaha ñi i cahan ñu suun.

²² Cuñi ndi tyizoho ndi sa cohon. Cuñi ndi coto ndi yozo caa sica iñi moo vaty sito ndi vaty catyi ñiyivi nacahnu ñuu ñiyivi vaty ña vaha ñiyivi cuu ñiyivi ndyico sii ra Jesús. Tacuan i catyi ra hebreo cuan.

²³ Tacuan i cahan ra, ta ziqui i sata ra hebreo cuan minoo quivi cua titahan tucu ra sihin ra Pablo. Ta quivi cuan tuu xaan ñiyivi i quisi vehe nu ndyaa ra Pablo. Ndyiyaca cui i nacaty tucu ra Pablo sihin ñu yozo caa cuñi ra Ndyoo cundyaca ñaha ra sii yo. I catyi ra vaty nacaty ra Moisés ndya ta tyiemvu yozo caa cua cuu ra Jesús. Ta zuun ñi cuhva cuan i cahan ra profeta ta tyiemvu, catyi ra Pablo. Tacuan i nacaty xaan ra Pablo sihin ñu vaty cuñi xaan ra sa cua sino iñi ñu sii ra Jesús.

²⁴ Ta sicoo zuhva ñu sino iñi sa cahan ra Pablo, ta inga ñu ñá sino iñi ñu.

²⁵ Ñá ndu-ñin ñu. Ta sa numi ñu cunuhu ñu ndya vehe ñu ta ziqui i catyi ra Pablo minoo ca cuhva sihin ñu. Catyi ra: Ndisa cui cuu si cuhva i cahan ra Isaías sa cahan ra cuenda Ndyoo i zacuu Taty i li ta tyiemvu sihin ñiyivi sahnu sii yo.

²⁶ Vaty i catyi ra:

Cua cuhun nu iyo ñiyivi ya ta cua catyun sihin ñu:

“Tyizoho xaan ndo Tuhun Ndyoo, zoco ña cutuñi iñi ndo sa tyizoho ndo.

Ndisa, ndyehe ndo yozo caa iyo ra Ndyoo, zoco ña sito ndo ñaa sa cuu sa ndyehe ndo.”

²⁷ Ta cahan ca Taty i li sihin ra Isaías ta tyiemvu ta catyi ra:

Ndisa cui zanduñihi xaan ñiyivi iñi ñu coto cua nduvaha añima ñu.

Ña cuñi ñu tyizoho ñu coto cua cutuñi iñi ñu.

Ña cuñi ñu sa nducu ñu cuhva, coto cua quisi ñu sii ta cua zame cuhva iyo ñu ta zanduvehi sii ñu.

Tacuan i catyi Taty i li sihin ra Isaías.

²⁸ Ta ziqui i catyi tucu ra Pablo sihin ñiyivi yucu yucuan: Nacoto vaha ndo vaty ndya vityi cua nacaty ndi Tuhun Ndyoo sihin ñiyivi, ñu sa yivi ñiyivi hebreo cuu. Cua tyizoho ñu cuhva zanduvaha ra Ndyoo añima ñiyivi, ta cua sino iñi ñu. Tacuan i catyi ra Pablo.

²⁹ Ta sa yaha cahan ra Pablo tacuan ta i quita tandihi ñu hebreo. Sahñi tahan ñu zuhva vaty ñá ndu-ñin ñu sihin tahan ñu sa cuenda cuhva cahan ra Pablo.

³⁰ Uu cuiya i ndoo ra Pablo ñuu cuan. I sica noo ra minoo vehe ta tyiyahvi ra yahvi si. Ta vaha xaan i cahan ra sihin tandihi ñiyivi i saa vehe ra.

³¹ I nacaty ra sihin ñu yozo caa cuñi ra Ndyoo cundyaca ñaha ra sii yo. Ta i zacuahra ra sii ñu yozo caa iyo ra Jesús. Ñá yuhu ra ta nacaty ra, ta yoñi i zayanga sii ra.

Carta Sa I Tyaa Ra San Pablo Sii Ñiyivi Sino Iñi Sii Ra Ndyoo Ñuu Roma

I tyaa ra Pablo carta ya sii ñiyivi sino iñi sii ra Ndyoo ñuu Roma

¹ Yuhvi ra Pablo tasi carta ya sii ndo. Minoo muzu ra Jesucristo cui. I casi ra Jesucristo sii, ta i saha ra tyiño sii vatyi cui minoo ra sa cua zacoto Tuhun Vaha ra sii ñiyivi, cuhva cacu ñu.

² Ta ihya Tuhun Vaha cuu zuun ñi tuhun sa i catyi ra Ndyoo ta sa naha vatyi cua quisi si. I cahan ra Ndyoo sa cuenda si quivi i cahan ra profeta ta sa naha.

³ Cuenda zehe ra Ndyoo cuu tuhun ya. I zacacu minoo ñaha sii ra cuhva cacu maa yo. Ta ñiyivi ra rey David i cuu sii ra.

⁴ Ta i sihi ra Jesús, ta i zanandoto ra Ndyoo sii ra. Ta cuhva cuan i zavaha ra Ndyoo minoo sa cahnu xaan, ta i zañaha ra vatyi zehe ra cuu sii ra Jesús. Ta ii xaan cuu ra Jesús, ra ndyaca ñaha sii yo, tañi ii maa ra Ndyoo.

⁵ Sa cuenda ra Jesús i cundahvi iñi ra Ndyoo sii, ta i saha ra tyiño sii sa zacote Tuhun ra. Ta tacuan ta cua sino iñi ñiyivi sa yivi ñiyivi hebreo cuu, ta cua tyaa ñu yahvi. Ta cua zacahnu ñu sii ra Jesucristo.

⁶ Ta zuun ñi ñiyivi cuan cuu tucu maa ndo. I casi ra Ndyoo sii ndo vatyi cuu ndo ñiyivi sii ra Jesucristo.

⁷ Tyei carta ya sii maa ndo, ra sino iñi ñuu Roma. Cuñi xaan ra Ndyoo sii ndo, ta i casi ra sii ndo vatyi cuu ndo ñiyivi ra. Cuñi vatyi nacundahvi xaan ca iñi ra Ndyoo ta ra Jesucristo sii ndo, ta nacuhva ra sa coo sa taxi añima ndo. Ta ra Jesucristo, cuu ra ndyaca ñaha sii yo.

Cuñi ra Pablo cuhun ra ñuu Roma

⁸ Sa xihna ñi sehi tyahvi ndyoo sii ra Ndyoo, ra zacahni. Sehi tyahvi ndyoo sii ra sa cuenda sa i zavaha ra Jesucristo ta vityi sino iñi tandihi ndo. Ta cuhva sa sino xaan iñi maa ndo, sa sito ñiyivi nacahnu cuhva sino iñi ndo.

⁹ Muzu maa ra Ndyoo cui. Tyaa xein yahvi sii ra sihin tandihi cuii añime, ta zacote Tuhun ra sa cuenda Zehe ra. Ta sito vaha ra vatyi ña zañe sa quehin sihin ra cuenda ndo.

¹⁰ Ta sique sii ra vatyi tatu cuñi maa ra, nacuhva ra vatyi cuhin cundyehe sii ndo. Sa naha xaan cuñi ndyehi sii ndo, ta ñá cuu.

¹¹ Cuñi xein cuhin nu yucu ndo, ta cua nacaty que Tuhun Ndyoo sihin ndo, ta cua sino ca iñi ndo.

¹² Cuñi cuhve tundyee iñi sii ndo, ta cua cuhva tucu maa ndo tundyee iñi sii. Cua tyindyee tahan yo sii yo sihin cuhva sino iñi yo sii maa ra Ndyoo.

¹³ Cuñi sa coto ndo yañi xaa vatyi sa cuaha xaan saha cuñi cuhin nu yucu ndo, zoco ndya vityi ta ña cuu cuhin. Cuñi cuhin vatyi cuñi zacote Tuhun Ndyoo nu yucu ndo, ta cua sino ca iñi ndo, ta cua nducuaha ca ndoho ra sino iñi sa yivi ñiyivi hebreo cuu.

¹⁴ Ñiñi xaan cuñi si zacote sii ñiyivi cahan zahan griego ta ñiyivi ña cahan zahan griego ta sihin ñiyivi sito ta ñiyivi ña cuaha sito.

¹⁵ Cuñi si sa zacote sii tandihi ñiyivi, ta yucuan cuenda cuñi xein zacote sii maa ndo, ra ndyaa ñuu Roma.

Iyo xaan tundyee iñi sihin Tuhun Vaha ra Ndyoo

¹⁶ Ña cahan nui sa cuenda Tuhun Vaha ra Ndyoo vatyi cuhva cuu si sii maa ra Ndyoo, ta cua zacacu si sii yoo ra sino iñi. Sa xihna ñi i saa si nu iyo ñiyivi hebreo, ta cuee ca i saa si nu iyo inga ñiyivi.

¹⁷ Vatyi cuhva zacacu ra Ndyoo sii ñiyivi zañaha si vatyi zandasi ra cuaty ñu ta zanduvaha ra añima ñu sihin sa sino iñi ñu sii ra. Tañi cuhva catyi Tuhun Ndyoo: “Minoo ra sa zanduvaha ra Ndyoo añima, cua cundito ra tandihi cui tyiemvu vatyi i sino iñi ra.”

Iyo xaan cuaty ñiyivi ñuu ñiyivi

¹⁸ Zoco cuxaan xaan ra Ndyoo sa cuenda cuatyí ñiyívi, ta cua tasi tuñi ra sii ñu sa cuenda tandíhi sa ña vaha zavaha ñu. Cuaha xaan cuatyí ñiyívi iyo, ta cuatyí ñu cuan cuu ta ña cuu sino iñi inga ñiyívi.

¹⁹ Ta cuhva cuu coto ñiyívi cuhva iyo ra Ndyoo, casi xaan iyo si vatyí i zañaha maa ra sii yo, ta sa sito ñiyívi.

²⁰ Ndyá ta sino ñuu ñiyívi ta casi xaan cuu ndyehe ñiyívi cuhva iyo ra Ndyoo. Tandíhi sa i zavaha ra zañaha si vatyí iyo xaan cuhva sii ra, ta cuaha xaan ca sa siñi tuñi iyo sii maa ra ta ziqui sii maa yo. Ndyoo cuu ra sa ndisa. Ta sito ñiyívi vatyí iyo ra Ndyoo vazu ña cuu ndyehe yo sii ra. Zoco cuu sino iñi yo sii ra. Yucuan cuenda ma cuu catyí ñiyívi sa ndisa vatyí ña sito ñu ñaa sa cuu sa vaha.

²¹ Sa i sito ñiyívi vatyí iyo ra Ndyoo, zoco ñá cuñi ñu zacahnu ñu sii ra tañi tahan si zacahnu yo sii ra. Ta ñá saha ñu tyahvi ndyoo sii ra. I quisaha sica iñi ñu tuhun sa ña ñiñi, ta i naa sa siñi tuñi vaha sii ñu.

²² Catyí ñu vatyí sa cuaha xaan i cutuhva ñu ta siñi tuñi xaan ñu, catyí ñu, zoco i nduu ñu ñiyívi ñá sito yozo caa iyo ra Ndyoo.

²³ Ñá zacahnu ca ñu sii sa minoo ñi Ndyoo, ra ndito tandíhi cuii tyiemvu, ra Ndyoo ra ndisi xaan ta tyaqui xaan. Zoco i zavaha ñu ndyoo sa cua zacahnu ñu, ta caa si cuhva caa ñiyívi a cuhva caa zaa a quití a cuhva caa coo.

²⁴ Yucuan cuenda i zaña ra Ndyoo sii ñu, ta i zavaha ñu tandíhi cuii sa ña vaha sa cuñi añaima ñu. I zavaha ñu cuatyí zuun ñi sihin tahan ñu.

²⁵ I zaña ñu sii sa ndisa sa cuenda ra Ndyoo, ta cuñi ca ñu sii inga ndyoo sa yívi Ndyoo sa ndisa cuii. Ta inga tucu cuhva vatyí i zacahnu ñu ta i tyaa ca ñu yahvi sii sa zavaha ra Ndyoo ta ziqui sii maa ra vazu maa ra i zavaha tandíhi cuii. Ta tahan si zacahnu yo sii ra tandíhi cuii cuhva. Ta nacuu si tacuan, ta nacuu si sa ndisa.

²⁶ Yucuan cuenda i zaña ra Ndyoo sii ñu, ta i zavaha ñu tandíhi cuii cuhva ña vaha. I zandoo ñu cuhva vaha sa coo minoo rayíi sihin minoo ñi ñaha. Ta i zama ñu inga cuhva, minoo cuhva ña vaha. I zavaha ñu zihí sa ña vaha sihin inga ñu zihí,

²⁷ ta tacuan tucu i zavaha rayíi sihin inga rayíi. I zandoo ra cuhva tahan si coo ra sihin ñu zihí, ta i zavaha ra sii si sihin inga rayíi. Ta sihin coño ñuhu ra tasi tuñi ra Ndyoo sii ra vatyí cahnu xaan cuatyí ra.

²⁸ Ñá cuñi ca ñiyívi nacohon iñi ñu sii ra Ndyoo a tyaa ñu yahvi sii ra. Ta yucuan cuenda i zaña ra Ndyoo sii ñu ta saha ra sa coo minoo sa siñi tuñi ña vaha sii ñu, ta ziqui i zavaha ñu tandíhi cuii sa ña vaha.

²⁹ Ta i situ cuii sa quiñi caa sii ñu sa cuenda tandíhi cuii cuhva ña vaha i zavaha ñu. Quihin rayíi sii ñu zihí ta ña tandaha ra sihin ñu. Tandíhi cuii cuhva ña vaha zavaha ñu. Ndyiyo iñi ñu ndaha tyiño inga ñiyívi. Ñahñi sa ndoo iyo sii ñu. Cuxaan ñu tatu iyo sa vaha sii inga ñiyívi. Sahñi ñu ñiyívi. Nducu ñu tizihí. Zandavi ñaha ñu. Quiñi xaan iyo ñu. Cahan ñu ndya vaha ñi sii inga ñiyívi zoco xehe ñi.

³⁰ Quiñi cahan ñu sii ñiyívi vazu ña ndisa. Cuxaan xaan ñu sihin ra Ndyoo. Cahan ñu ndya vaha ñi sihin ñiyívi. Zacahnu xaan ñu sii ñu, ta catyí ñu vatyí vaha xaan ñu. Cuaha xaan cuhva ña vaha tava ñu. Ña tyaa ñu yahvi sii zutu ñu ta sii zihí ñu.

³¹ Ñahñi sa siñi tuñi vaha iyo xiñi ñu vatyí ña cutuñi iñi ñu ñaa sa cuu sa vaha. Saha ñu tuhun ta ña tyaa ñu yahvi sii si. Ña cuñi ñu nu sii ñiyívi sii ñu. Cuxaan ñu sihin ñiyívi, ta ma zaha ñu tucahnu iñi sii ñu. Ta ña cundahvi iñi ñu sii ñiyívi.

³² Sito vaha ñu cuhva i catyí maa ra Ndyoo vatyí tahan si sa cuu cuii ñiyívi zavaha cuhva ña vaha cuan. Zoco zavaha ñu sii si. Ta ña tacuan ñi, ndya cuhva cuzíi xaan iñi ñu tatu zavaha tucu inga ñiyívi sii si.

2

Cua tasi tuñi ra Ndyoo sii ñiyívi cuhva iyo ñu

¹ Yucuan cuenda yoho, yoo ra cuun, tatu ndyehe xoon tatu zavaha inga ñiyivi sa vaha a sa ña vaha, zuun ñi ziqui moo cua ndoo cuaty, ta ma zandasi ra Ndyoo cuatyun. Vaty tyicuhvon sii inga ñiyivi, ta zuun ñi cuaty zavaha ñu, zavohon.

² Ta sito yo vaty tasi tuñi ra Ndyoo sihin minoo cuhva ndoo sii ñiyivi zavaha cuhva cuan.

³ ¿Atu sica iñun vaty cuu tyicuhvon sii ñiyivi? Ta zuun ñi cuhva ña vaha zavaha ñu zavaha tucu moo. ¿Atu sica iñun vaty ma tasi tuñi ra Ndyoo suun?

⁴ Ndyee xaan iñi ra Ndyoo sihin ñiyivi, ta cundahvi xaan iñi ra sii ñu. ¿Atu sica iñun vaty yucuan cuenda ma tasi tuñi ra suun? Tatu tacuan sica iñun, ña cutuñi iñun vaty cuñi ra Ndyoo sa cua zandoon cuatyun, ta yucuan cuenda cundahvi iñi ra suun.

⁵ Ta cuenda sa ndava xaan iñun ta ña cuñun zandoon cuatyun, ta yucuan cuenda zanducahnu con cuatyun, ta cua cuxaan xaan ra Ndyoo suhun quivi cua tasi tuñi ra sii ñiyivi sihin minoo cuhva ndoo ta cua cuhva ra tundoho ndyehe ñu.

⁶ Quivi cuan cua cuhva maa ra Ndyoo sii sa minoo minoo ñiyivi cuhva tahan si sii ñu sa cuenda tyiño i zavaha ñu.

⁷ Ñiyivi ña zaña sa zavaha sa vaha, cuñi ñu vaty cua cuzi iñi ra Ndyoo sihin ñu. Ta cuñi ñu vaty catyi ra vaty vaha zavaha ñu. Ta nducu ñu cuhva ñihi ñu sa cundito ñu tandihi cui tyiemvu. Sii maa ñu cuan cua cuhva ra sa cundito ñu.

⁸ Zoco ñihi xaan cua tasi tuñi ra Ndyoo sii ñiyivi ña tyaa yahvi sii maa ra ta sii sa ndisa. Zavaha ñu sa ña vaha. Yucuan cuenda ñihi xaan cua tasi tuñi ra sii ñu cuhva tahan si sii ñu.

⁹ Cua coo xaan tucuihya iñi ta tundoho sii ñiyivi zavaha sa ña vaha, xihna ca sii ñiyivi hebreo ta ziqui sii tandihi inga ñiyivi.

¹⁰ Ta cua cuzi xaan iñi ra sihin ñiyivi zavaha sa vaha, ta cua catyi ra vaty vaha zavaha ñu. Ta cua coo sa taxi ñi sii ñu sihin ra, ta ma caca xaan ca iñi ñu. Sa xihna ñi cua cuhva ra cuhva ya sii ñiyivi hebreo ta ziqui sii tandihi inga ñiyivi.

¹¹ Tacuan cua zavaha ra vaty minoo cuhva ndoo zavaha ra Ndyoo, ta cua cuhva ra cuhva tahan si sii sa minoo minoo yo.

¹² Tandihi ñiyivi zavaha cuaty ta ña sito ñu tuhun i saha ra Ndyoo sii ra Moisés, cua cuu ñu zoco yivi sa cuenda tuhun i saha ra Ndyoo sii ra Moisés. Ta ñiyivi sa sito tuhun i saha ra Ndyoo sii ra Moisés ta zavaha ñu sa ña vaha, cua tasi tuñi ra Ndyoo sii ñu cuhva catyi tuhun i saha ra sii ra Moisés.

¹³ Vaty yivi ñiyivi sa siñi ñi Tuhun Ndyoo cuu ñu cua quita vaha ityi nuu maa ra. Ñiyivi zavaha cuhva catyi Tuhun ra cuu ñu cua catyi ra vaty ñahñi cuaty ñu.

¹⁴ Iyo ñiyivi sa ña sito tuhun i saha ra Ndyoo sii ra Moisés, zoco zuun ñi zavaha ñu cuhva catyi si vazú ña sito ñu vaty iyo si. Sa siñi tuñi vaha sii ñu cuu sa catyi sihin ñu ñaa sa cuu sa vaha vazú ña sito ñu tuhun i saha ra Ndyoo.

¹⁵ Zoco zañaha ñu vaty iyo si aña ñu. Inuu ñi cahan sa siñi tuñi vaha sii ñu sihin ñu tañi cuhva catyi Tuhun i saha ra Ndyoo. Ta tyaa sa siñi tuñi vaha sii ñu cuaty sata ñu a catyi si sihin ñu vaty vaha cuu cuhva zavaha ñu.

¹⁶ Ta tacuan cua cuu si quivi cua cuhva ra Ndyoo tyiño sii ra Jesucristo sa cua tyicuhva ra sii ñu, ta cua ndyehe ra tatu zavaha ñu sa vaha a sa ña vaha. Sa i zacote cuhva ya sii ndo quivi i nacaty Tuhun Vaha ra sihin ndo. Vazu xehe xaan zavaha ñiyivi sa ña vaha a cuenda sa sica ñi iñi ñu, zoco sito ra Ndyoo, ta cua tyicuhva ra Jesucristo sii ñu.

Tyaa ñiyivi hebreo yahvi tuhun i saha ra Ndyoo sii ra Moisés

¹⁷ Catyi ndo vaty ñiyivi hebreo cuu ndo. Ta ndisa. Ta catyi ndo vaty tyaa xaan ndo yahvi tandihi tuhun i saha ra Ndyoo sii ra Moisés vaty tacuan ta cua cacu ndo cuñi ndo. Ta zacahnu ndo sii ndo vaty maa ñi maa ndo zacahnu sii ra Ndyoo sa ndisa, catyi ndo.

¹⁸ Ta catyi ndo vaty sito ndo cuhva cuñi maa ra. Ta sito ndo ñaa sa cuu sa vaha xaan vaty sito ndo tuhun i saha ra. Catyi ndo.

¹⁹ Sica iñi ndo vaty cuu zaquihin ityi vaha ndo sii ñiyivi ña sito. Ta sica iñi ndo vaty cuu ndo tañi minoo ñúhu ndisi zandisi sii ñiyivi sica noo nu ñaa.

²⁰ Cuu zacuaha ndo sii ñiyivi ña sito sa vaha, cuñi ndo, ta zaquihin ityi vaha ndo sii ñu tañi sa ndiyi cuu ñu vaty sihin tuhun i saha ra Ndyoo sii ra Moisés ta sa sito ndo tandihi cui sa vaha ta sa ndisa, catyi ndo.

²¹ Zacuaha ndo sii inga ñiyivi, zoco ta cutuhva ca maa ndo. Zacuaha xaan ndo sii ñiyivi vaty ma zuhu ñu, zoco zuun ñi maa ndo zuhu ndo. ¿Atu ña ndisa?

²² Catyi ndo vaty ña vaha cua cuzu minoo rayi sihin minoo ñaha tatu yivi ñazih ra cuu, zoco zavaha ndo cuhva cuan. ¿Atu ña tacuan? Cuxaan ndo tatu zacahnu ñiyivi zandu yutu, zoco zuhu ndo ndaha tyiño nu iyo vehe ñuhu si.

²³ Vaha xaan ñiyivi cuu maa ndo vaty tyaa ndo yahvi tuhun i saha ra Ndyoo sii ra Moisés, catyi ndo. Zoco ña tyaa ndo yahvi sii si sa ndisa cui, ta sihin cuhva cuan ña zacahnu ndo sii ra Ndyoo.

²⁴ Tañi catyi Tuhun Ndyoo: “Ñiyivi sa yivi ñiyivi hebreo cuu, cahan ñu ndya vaha ñi sii ra Ndyoo sa cuenda sa ña vaha sa zavaha maa ndo.”

²⁵ Tatu ndisa cui vaty zavaha ndo cuhva catyi tuhun i saha ra Ndyoo sii ra Moisés, tyindyee si sa tyaa ndo yahvi costumbre sa tahndya ñi xiñi xuu lee. Zoco tatu ña tyaa ndo yahvi tandihi tuhun i saha ra Ndyoo, yivi ñiyivi ra cuu sii ndo. Ñahñi tyindyee si sa tyaa ndo yahvi sii costumbre cuan. Tañi minoo zeña ñi cuu si vaty ñiyivi cuenda ra Ndyoo cuu sii ndo, zoco yivi.

²⁶ Ta ñiyivi tyaa yahvi sa ndisa tuhun i saha ra Ndyoo sii ra Moisés, vazu ña tyaa ñu yahvi costumbre cuan, zoco zuun ñi cua tñin cuenda ra Ndyoo sii ñu tañi tatu zavaha ñu sii si.

²⁷ Vazu ña zavaha ñu costumbre cuan, zoco tyaa ñu yahvi sii tuhun i saha ra Ndyoo. Maa ñu cuu ñu cua zañaha sii maa ndo vaty iyo cuaty ndo. Vaty maa ndo i ñihi ndo tuhun i saha ra Ndyoo sii ra Moisés ta zavaha ndo costumbre cuan, zoco ña tyaa ndo yahvi cuhva catyi tuhun i saha ra Ndyoo sa ndisa.

²⁸ Vazu ñiyivi hebreo cuu ndo zoco ña cuñi si catyi si vaty ñiyivi cuenda ra Ndyoo cuu sii ndo sa ndisa. Ta costumbre sa tahndya ñi xiñi xuu lee, ña zatyño si maa ñi sa cuenda coño ñuhu ñiyivi.

²⁹ Zoco ñiyivi sa cuu ñiyivi hebreo sa ndisa cui cuu ñu sa zama cuhva iyo ñu ndya aña ñu. Tyaa ñu yahvi tuhun i saha ra Ndyoo, ta zavaha tucu ñu costumbre cuan vaty cuñi ñu zañaha ñu vaty zehe ra Ndyoo cuu sii ñu sa ndisa. Ta vazu ma zacahnu ñiyivi sii ñu cuhva cuan, zoco cua catyi ra Ndyoo vaty vaha ñu.

3

¹ ¿Atu vaha ca sa cuu yo ñiyivi hebreo? ¿Atu tyindyee costumbre circuncisión cuan sii yo?

² Iyo cuaha xaan cuhva tyindyee si sa cuu yo ñiyivi hebreo, ta sa ñiñi ca cuu sa saha maa ra Ndyoo tandihi tuhun ra sii ñiyivi sahnu sii yo.

³⁻⁴ Vazu cuaha xaan ra hebreo ña sino iñi cuhva catyi ra Ndyoo, zoco zuun ñi cua zavaha maa ra Ndyoo cuhva catyi ra. Vazu catyi tandihi cui ñiyivi vaty ma zavaha ra cuhva catyi ra, zoco cua zavaha ra sii si. Tañi catyi si nuu tutu ra Ndyoo: “Cua ndyehe ñiyivi vaty tuhun cohon cuu sa ndisa, ta cua coto ñu vaty ra cahan sa ndisa cuun.”

⁵ Ta vityi cua quehin cuhva cahan ñiyivi. Catyi ñu vaty vaha xaan ca sa zavaha yo sa ña vaha, ta sihin cuhva cuan zañaha si vaty vaha xaan ca cuu ra Ndyoo. Ta catyi ñu vaty ña vaha sa tasi tuñi ra Ndyoo sii yo vaty tyindyee si sii ra sa zavaha yo sa ña vaha vaty zañaha si vaty vaha xaan maa ra, catyi ñu.

⁶ Zoco ña ndisa sa tacuan vaty tatu tacuan cuu si, ma tyicuhva ra Ndyoo sii ñiyivi ñuu ñiyivi.

⁷ Tatu sica iñi yo vaty vaha ca sa cuvarya yo ta ziqui cua coto ñiyivi vaty ndisa xaan cuu tuhun cahan maa ra Ndyoo ta cua zacahnu ca ñu sii ra. Zoco ña tacuan cuñi si vaty tatu tacuan sica iñi yo, ma cutuñi iñi yo ñaa cuenda cua tyicuhva ra Ndyoo sii yo tañi ñiyivi iyo cuaty.

⁸ Iyo ñiyivi catyi ñu: “Nazavaha ca yo sa ña vaha ta cua zañaha si vatyi vaha xaan ca ra Ndyoo vatyi cuaha xaan cuatyí yo cua zandasi ra.” Ta catyi ñiyivi cahan ndya vaha ñi sii maa yo vatyi zuun ñi cuhva cuan zacuaha yo, catyi ñu. Ñihi xaan cua zandyehe ra Ndyoo tundoho sii ñiyivi cahan cuhva cuan vatyi tacuan tahan si sii ñu.

Iyo cuatyí sii tandíhi cuii yo

⁹ Ta yozo caa ¿atu vaha ca cuu maa yo ñiyivi hebreo ta ziqui inga ñiyivi? Ña ndisa. Sa nacatyí ndi sihin ndo vatyi iyo cuatyí sii tandíhi cuii ñiyivi. Iyo cuatyí sii ñiyivi hebreo ta sii ñiyivi sa yivi ñiyivi hebreo cuu.

¹⁰ Tañi catyi Tuhun ra Ndyoo:

Yoñi minoo ñiyivi vaha sa ndisa cuii, numinoo.

¹¹ Yoñi minoo ñu sa cutuñi iñi.

Yoñi maa nanducu sii ra Ndyoo.

¹² Tandíhi cuii ñu i naa iñi ñu sii ra Ndyoo.

I zandoo ñu ityi ra, ta ñahñi minoo cuhva vaha zavaha ñu sa cuenda ra Ndyoo.

Numinoo ñu ña zavaha sa vaha, yoñi maa.

¹³ Quiñi xaan cahan ñu, ta vatya xaan ñu sihin yuhu ñu.

Cuu si minoo xico iñi xaan sahan sa quita sisi ñaña sa tacoho yuhu.

¹⁴ Cahan ñu ndya vaha ñi sihin ñiyivi.

Ta quiñi xaan cahan ñu sii ñu.

¹⁵ Yatyí xaan cua cahñi ñu ñiyivi.

¹⁶ Nu yucu ñu saha ñu tundoho, ta saha xaan ñu sa cuihya iñi sii inga ñiyivi.

¹⁷ Ña sito ñu yozo caa zacuu ñu ta coo sa taxi sii ñu sihin ra Ndyoo ta sihin inga ñiyivi.

¹⁸ Ta ña yuhu maa ñu sii ra Ndyoo.

Catyí Tuhun ra Ndyoo.

¹⁹ Sito yo vatyi tandíhi tuhun i saha ra Ndyoo sii ra Moisés, cahan si sa cuenda ñiyivi hebreo. Ta cua coto tandíhi ñu vatyi iyo cuatyí ñu nuu ra Ndyoo, ta ma cuu catyi ñu vatyi ñahñi cuatyí ñu. Ta tacuan tucu tandíhi ñiyivi ñuu ñiyivi.

²⁰ Yoñi numinoo ñiyivi cua nduvaha aña ityi nuu maa ra Ndyoo sihin sa tyaa xaan ñu yahvi tuhun i saha ra Ndyoo sii ra Moisés vatyi tuhun cuan cuenda zacoto ñi si sii ñu ñaa sa cuu cuatyí ñu.

Ñihi yo sa cacu aña yo sihin sa sino ñi iñi yo sii ra Ndyoo

²¹ Vityi sito yo vatyi yivi sihin tuhun i saha ra Ndyoo sii ra Moisés ta nduvaha aña yo ityi nuu maa ra. Zuun ñi Testamento Sahnu catyi si cuhva cuan.

²² Vityi zanduvaha ra Ndyoo cuhva iyo ñiyivi sihin sa sino ñi iñi ñu sii ra Jesucristo. Ta inuu cuii ñi tiin cuenda ra sii ñu sino iñi tacuan vazú ñu hebreo a inga ñu vatyi ña zñn ndyehe ra sii yo.

²³ Ta iyo cuatyí sii tandíhi cuii ñiyivi. Sica xaan ndyaa tandíhi yo nuu ra Ndyoo ta sihin cuhva cuñi ra.

²⁴ Zoco i zavaha maa ra Ndyoo minoo tumañi iñi cahnu xaan sii yo sa tyiyahvi ra Jesucristo sa cuenda cuatyí yo. Ta vityi catyi ra Ndyoo vatyi ñahñi ca cuatyí maa yo sa sino iñi sii ra Cristo vatyi i zavaha ra cuhva cuan.

²⁵ I zaquisi ra Ndyoo sii ra Cristo. Ta i ndoho ra. Ta i sihi ra sa cuenda cuatyí maa yo. Ta ma cuxaan ca ra Ndyoo sihin yo tatu sino iñi yo vatyi sati niñi ra Cristo sa cuenda maa yo. Ta i zandyehe xaan ra Ndyoo iñi ra ndyehe ra sii yo, ta ña cañi ra sii yo cuenda cuatyí i zavaha yo quivi cumañi ca coto yo Tuhun ra.

²⁶ Ta i zañaha ra vatyi vaha xaan ra sihin yo vatyi i ndoho ra Cristo sa cuenda cuatyí maa yo. Ta yucuan cuenda catyi ra Ndyoo vatyi ñahñi cuatyí iyo sii ñiyivi sino iñi sii ra Jesús.

²⁷ Ihya cuu cuenda sa ma cuu catyi yo vatyi vaha xaan maa yo. Ma cuu cahan yo tacuan vatyi ma nduvaha aña yo ityi nuu ra Ndyoo sihin sa zavaha yo sa vaha. Maa ñi sihin sa sino iñi yo sii ra Jesucristo ta nduvaha aña yo nuu ra Ndyoo.

²⁸ Sito ndi vatyí catyí ra Ndyoo vatyí ñahñi cuatyí iyo sii minoo ra tatu sino iñi ra sii ra Cristo vazu ña tyaa ra yahvi sii tuhun i saha ra Ndyoo sii ra Moisés.

²⁹ Ndisa vatyí zacahnu ñiyivi hebreo sii ra Ndyoo, zoco zacahnu tucu inga ñiyivi sii ra. Zandasi ra Ndyoo cuatyí ñiyivi hebreo, ta tacuan tucu sihin inga ñiyivi vatyí yivi Ndyoo cuenda ñiyivi hebreo ñi cuu ra. Ndyoo cuu ra sa cuenda tandihi ñiyivi.

³⁰ Minoo tuhun ñi ra Ndyoo iyo, ta catyí ra vatyí ñahñi ca cuatyí iyo sii ñiyivi sino iñi sii ra Cristo vazu zavaha ñu costumbre circuncisión cuan a vazu ma zavaha ñu sii si.

³¹ ¿Atu sa cuenda sa sino iñi yo ta catyí yo vatyí ña ñiñi ca tuhun i saha ra Ndyoo sii ra Moisés? Ma catyí yo tacuan. Vityí iyo cuhva sii yo ta cuu tyaa yo yahvi sii si sa ndisa cuií vatyí tyindyee ra Cristo sii yo.

4

Cuhva i zañaha ra Abraham cuhva i sicoo ra

¹ ¿Ta yozo caa cuu si sa cuenda ra Abraham, ra cu ñiyivi sahnú sii maa yo ñiyivi hebreo? ¿Ñaa cuenda catyí ra Ndyoo vatyí vaha ra Abraham?

² Tatu catyí ra Ndyoo vatyí ñahñi cuatyí ra Abraham vatyí i zavaha ra sa vaha, cuu catyí maa ra Abraham vatyí vaha xaan ra. Zoco ñá cuu catyí ra Abraham tacuan ityí nuu ra Ndyoo.

³ I catyí ra Ndyoo vatyí vaha ra Abraham cuhva catyí Tuhun Ndyoo: “I sino iñi ra Abraham sa catyí ra Ndyoo, ta yucuan cuenda catyí ra Ndyoo vatyí ñahñi cuatyí ra.” Catyí si.

⁴ Minoo ra zatyíño, ña ñihi ra xuhun sa caha ñi. Tyiyahvi ñu sii ra vatyí zatyíño ra.

⁵ Zoco minoo ra ña zatyíño sa cuenda cuhva cacu añima ra zoco sino iñi ra sii ra zandasi cuatyí ñiyivi, sihin sa sino ñi iñi ra cuan ta ñihi ra cuhva catyí ra Ndyoo sihin ra vatyí ñahñi cuatyí ra.

⁶ I catyí tucu ra David vatyí zii xaan cuñi minoo ra tatu catyí ra Ndyoo sihin ra vatyí ñahñi cuatyí ra. Ñahñi sa zavaha ra ta ñihi ra sa tacuan. Tumañi iñi ñi cuu si sa saha maa ra Ndyoo sii ra.

⁷ Ihya cuu cuhva i catyí ra David:

Zii xaan cuñi ñiyivi, ñu i zandasi ra Ndyoo cuatyí.

⁸ Zanaa ra sii si.

Zii xaan cuñi ñiyivi, ñu ña tyaa ca ra Ndyoo cuatyí ziquí.

⁹ Ma cuu catyí yo vatyí maa ñi ñiyivi tyaa yahvi costumbre circuncisión cuu ñu ñihi tumañi iñi cuan sii ra Ndyoo. Zuun ñi cuhva cua ñihi ñiyivi ña tyaa yahvi costumbre cuan. Sihin sa sino ñi iñi ra Abraham ta catyí ra Ndyoo sihin ra vatyí ñahñi ca cuatyí ra.

¹⁰ ¿Ta ama i catyí ra Ndyoo vatyí ñahñi cuatyí ra Abraham? ¿Atu sa yaha zavaha ra costumbre circuncisión a cumañi ca? Cumañi ca zavaha ra sii si ta sa i catyí ra Ndyoo sihin ra vatyí sa i nduvaha añima ra.

¹¹ Ta ziquí i zavaha ra costumbre cuan tañi minoo zeña vatyí sa yaha nduvaha añima ra sihin sa sino iñi ra, cuee ca sa zavaha ra cuhva cuan. Ta ziquí i nduu ra minoo ñiyivi sahnú sii tandihi ñiyivi sino iñi sii ra Ndyoo ta ña zavaha ñu costumbre cuan. Sa cuenda sa sino ñi iñi ñu ta catyí ra Ndyoo vatyí ñahñi ca cuatyí ñu.

¹² Ta nduu tucu ra Abraham minoo ñiyivi sahnú sii ñiyivi zavaha costumbre cuan, zoco tatu maa ñi costumbre cuan zavaha ñu, yivi ñiyivi ra Abraham cuu sii ñu. Nduu ra ñiyivi sii ñu ndyico sii ra sa ndisa sihin cuhva sino xaan iñi ra. Ta sino ndisa cuií iñi ñu cuan sii ra Ndyoo cuee ca sa zavaha ñu costumbre cuan.

Sihin sa sino ñi iñi yo ta ñihi yo tumañi iñi sii ra Ndyoo

¹³ Ndyá ta sa naha i catyí ra Ndyoo sihin ra Abraham vatyí maa ra sihin ñiyivi sii ra cua ñihi ñu tandihi ñuu ñiyivi. Ñá ñihi ñu cuhva cuan sihin sa tyaa ñu yahvi sii tuhun i saha ra Ndyoo sii ra Moisés. I ñihi ñu sii si sihin sa sino ñi iñi ñu sii ra Ndyoo vatyí zavaha ra cuhva catyí ra. Ta i catyí ra Ndyoo vatyí ñahñi cuatyí ñu.

¹⁴ Vatyí tatu maa ñi ñiyivi tyaa xaan yahvi ley sa saha ra Ndyoo sii ra Moisés cuu ñu cua ñihi ndatu sii ra Ndyoo, tacuan ta ñahñi cua tyindyee si sa sino iñi yo sii ra Jesucristo, zoco ña tacuan cuu si, vatyí tatu tacuan cuu si, ña zavaha ra Ndyoo cuhva catyi ra sa ndisa.

¹⁵ Sa cuenda tuhun i saha ra Ndyoo sii ra Moisés ta catyi ra Ndyoo vatyí iyo cuatyí ñiyivi. Tatu ñahñi sa catyi ñaa sa cuu sa ña vaha, ma cuu tyaa ñiyivi yahvi sii si, ta ma cuu sa ma tyaa ñu yahvi sii si.

¹⁶ Yucuan cuenda sihin sa sino ñi iñi yo ta ñihi yo sa vaha vatyí tacuan ta cuu cuu si minoo tumañi iñi saha maa ra Ndyoo sii yo. I catyi ra Ndyoo sihin ra Abraham vatyí cua ñihi ra minoo sa vaha. Ta i catyi tucu ra Ndyoo vatyí tandihi ñiyivi sino iñi sii ra cua ñihi ñu sa vaha vatyí sino iñi ñu cuhva i sino iñi ra Abraham. Cua cuhva ra Ndyoo sii si sii ñiyivi tyaa xaan yahvi tuhun i saha ra sii ra Moisés tatu sino iñi ñu sii ra Jesucristo. Ta cua cuhva ra sii si sii ñiyivi sino ñi iñi tañi maa ra Abraham. Ta maa ra cuu minoo ñiyivi sahnu sii tandihi cuii yo sa sino iñi.

¹⁷ Catyi tutu ra Ndyoo sa cuenda ra Abraham: “Cuaha xaan zehun cua coo nacahnu ñuu ñiyivi.” Zutu yo cuu sii ra Abraham nuu ra Ndyoo. Sino xaan iñi ra Abraham sii ra Ndyoo. Cuu zanandoto ra Ndyoo sii ñiyivi i sihi. Ta tandihi sa cua cuu ityi nuu ca, cua cuu si vatyí maa ra Ndyoo cua zavaha sii si.

¹⁸ I sino iñi ra Abraham sa cahan ra Ndyoo vazu ma cuu si cuñi ra, zoco i cuu si. Ta i nduu ra zutu sahnu sii cuaha xaan ñiyivi. Tañi i catyi ra Ndyoo sihin ra: “Tyehen cua nducuaha ñiyivi suun.”

¹⁹ I sito ra Abraham vatyí sa sahnu xaan ra. Sa yatyí minoo ziendu cuiya ra. Sahnu xaan tucu maa ña Sara, ta ma cuu ca coo zehe ña. Zoco ña siin sino iñi ra Abraham vazu sa sahnu xaan nduu tahan ñu.

²⁰ Ñá sica iñi ra Abraham vatyí ma cuu ca coo zehe ñu, zoco i sino iñi ra tuhun i catyi ra Ndyoo sihin ra. Ñá ndu-uu iñi ra. I zacahnu ra sii ra Ndyoo.

²¹ I sito vaha xaan ra vatyí cuu zacuu ra Ndyoo tandihi sa i catyi ra sihin ra.

²² Yucuan cuenda i catyi ra Ndyoo vatyí ñahñi cuatyí ra Abraham vatyí i sino iñi ra.

²³⁻²⁴ Tacuan i catyi ra Ndyoo sa cuenda ra Abraham. Ta i cahan tucu ra tuhun cuan ndya sa cuenda maa yo. Cua catyi tucu ra vatyí ñahñi cuatyí iyo sii maa yo vatyí sino iñi yo sii ra Ndyoo, ra i zanandoto sii ra Jesús sa i sihi ra. Ta ra Jesús cuu ra ndyaca ñaha sii yo.

²⁵ I sihi ra Jesús sa cuenda cuatyí maa yo. Ta i nandoto ra vatyí tacuan ta cua cuu catyi maa ra Ndyoo vatyí ñahñi ca cuatyí yo iyo.

5

Ñahñi cuatyí cua tyaa ra Ndyoo sata yo

¹ Yucuan cuenda catyi ra Ndyoo vatyí ñahñi ca cuatyí yo vatyí sino iñi yo. Sa iyo sa taxi sii yo sihin ra Ndyoo vityí sa cuenda maa ra Jesucristo.

² Sa cuenda maa ra ñihi yo tumañi iñi sii ra Ndyoo vatyí sino iñi yo. Ñihi xaan yo tumañi iñi sii ra Ndyoo, ta zii xaan cuñi yo. Ta nii cuu iñi yo vatyí cua cuhun yo nu ndyaa ra Ndyoo ta cua nduu yo tañi maa ra.

³ Ta ña tacuan ñi, zoco zii cuñi tucu yo vazu ndyehe yo tundoho vatyí sito yo vatyí tyindyee si sii yo ta cua coo ca tundyee iñi sii yo tatu cuaha tundoho ndyehe yo.

⁴ Ta tatu iyo tundyee iñi sii yo vaha xaan cuu yo ityi nuu ra Ndyoo. Ta tatu vaha xaan yo nuu ra, nii xaan cua cuu iñi yo vatyí cua ñihi yo tandihi sa vaha sa saha maa ra.

⁵ Ta tatu sa cunii vaha iñi yo, sito yo vatyí ma zandavi ñaha ra Ndyoo sii yo. Tacuan sito yo vatyí sito yo vatyí cuñi xaan ra Ndyoo sii yo. Ta Tatyí li sa saha maa ra sii yo, iyo si añaima yo ta zacoto si sii yo vatyí cuñi xaan maa ra Ndyoo sii yo sihin minoo cuhva vaha xaan.

⁶ Ñá cuu zacacu yo sii yo, zoco sa tahan si quivi sa i catyi ra Ndyoo ta ziqui i quisi ra Cristo. Ta i sihi ra sa cuenda ñiyivi ña vaha tañi maa yo.

⁷ Sito yo vaty ma cuu cuu yo sa cuenda ñiyivi ña vaha. Zoco iyo saha cua cuu minoo ñiyivi sa cuenda inga ñiyivi vaha xaan ca.

⁸ Ta maa ra Ndyoo zañaha ra vaty cuñi xaan ra sii yo vaty vazu ñiyivi iyo xaan cuaty cuu maa yo, zoco i sihi ra Cristo sa cuenda yo.

⁹ Ta vity sa cuenda ñiñi ra Cristo ta caty ra Ndyoo vaty ñahñi ca cuaty yo. Sa cuenda ra Cristo i tiin cuenda ra Ndyoo sii yo, ta ma zandyehe ra tundoho sii yo quivi cua cuxaan ra ta cua zandyehe ra tundoho sii ñiyivi iyo cuaty, quivi cua ndihi ñuu ñiyivi.

¹⁰ Ta maa yo i cuu ñiyivi xaan iñi sii ra Ndyoo, zoco i zanduvaha ra sii yo sihin ra quivi i sihi Zehe ra sa cuenda yo. Ta vity ndito ra tandihi cui tyiemvu, ta sito yo vaty iyo xaan ca cuhva sa cua zacacu ra sii yo vaty iyo ra sisi añima yo.

¹¹ Ta ña tacuan ñi. Zi xaan cuñi yo vity vaty iyo sa taxi sii yo sihin ra Ndyoo sa cuenda cuhva i zavaha ra Jesucristo, ra ndyaca ñaha sii yo.

Cuhva i zavaha ra Adán ta cuhva i zavaha ra Cristo

¹² Sa cuenda minoo ra ta i quihvi cuaty ñuu ñiyivi. Ta cuenda cuaty i zavaha ñiyivi, ta i quisaha cuhva sa sihi tandihi ñu vaty iyo cuaty sii tandihi yo.

¹³ Ta sa iyo cuaty ñuu ñiyivi cumañi ca cuhva ra Ndyoo tuhun ra sii ra Moisés. Ta quivi cumañi ca cuhva ra Ndyoo tuhun ra, ñá tyaa ra cuaty sata ñiyivi sa minoo minoo cuaty zavaha ñu vaty ta coto ca ñu tuhun i saha ra sii ra Moisés.

¹⁴ Zoco i sihi ñu ndya quivi i zavaha ra Adán cuaty cuan ndya cuhva ndya quivi i sicoo ra Moisés vazu ñá zavaha ñu sa zuun ñi cuaty i zavaha ra Adán. Ta i cuu ra Adán tañi minoo ra sa cua quisi ityi nuu ca.

¹⁵ Saha maa ra Ndyoo tumañi iñi sii ñiyivi, ta tucu xaan cuu cuhva i zavaha ra Ndyoo ta ziqui cuhva i zavaha ra Adán. Vaty sihin sa minoo tuhun ñi cuaty i zavaha ra Adán ta cuaha xaan ñiyivi i sihi, zoco sihin tumañi iñi sa saha xaan ra Ndyoo ta i zavaha ra Jesucristo minoo cuhva vaha xaan sa cua zanaa ra cuaty sii cuaha xaan ñiyivi.

¹⁶ Tucu ca cuu tumañi iñi sa saha maa ra Ndyoo ta ziqui cuhva i zavaha ra Adán. Minoo ñi cuaty i zavaha ra cuan, ta yucuan cuenda cua tasi tuñi ra Ndyoo sii tandihi ñiyivi. Zoco vity sihin tumañi iñi sa saha maa ra Ndyoo ta ña tyaa ca ra cuaty ziqui ñiyivi vazu cuaha xaan cuaty ñu.

¹⁷ Ndisa vaty i sihi cuaha xaan ñiyivi sa cuenda sa i zavaha sa minoo tuhun ñi ra Adán. Zoco vity cuaha xaan ñiyivi cua ñihi tumañi iñi sa saha maa ra Ndyoo, ta cua cundito ñu tandihi cui tyiemvu. Cua nduvaha añima ñu sa cuenda sa zavaha minoo ñi ra, ra Jesucristo.

¹⁸ Sa cuenda cuaty sa i zavaha minoo ñi ra, ta i caty ra Ndyoo vaty iyo cuaty sii tandihi ñiyivi, ta tahan si sa cuu ñu. Ta zuun ñi cuhva sa cuenda minoo sa vaha sa i zavaha minoo ñi ra ta i caty ra Ndyoo vaty ñahñi cuaty iyo sii tandihi ñiyivi, ta cua cundito ñu tandihi cui tyiemvu.

¹⁹ Sa cuenda sa ñá tyaa minoo ra yahvi, ta i nduu tandihi ñiyivi ñiyivi cuaty. Zoco sa cuenda sa i tyaa inga ra yahvi, ta cua tiin cuenda ra Ndyoo sii ñiyivi tañi sa ñahñi ca cuaty ñu.

²⁰ I saa quivi i saha ra Ndyoo tuhun ra sii ra Moisés, ta i nacoto ñiyivi vaty cuaha xaan cuaty ñu. Zoco vazu cuaha xaan cuaty ñu, zoco vaha xaan añima maa ra Ndyoo, ta i saha xaan ca ra tumañi iñi.

²¹ Sa cuenda cuaty ñiyivi ta i quisaha sihi ñu. Ndyaca ñaha tuhun sihi sii ñu. Ta vity sa cuenda sa i zavaha ra Jesucristo, ra ndyaca ñaha sii yo, ta saha ra Ndyoo tumañi iñi sii ñiyivi. Caty ra vaty ñahñi ca cuaty ñu. Yucuan cuenda cua cundito ñu tandihi cui tyiemvu. Vity sihin sa saha maa ra Ndyoo tumañi iñi sii yo, ta ña ndyaca ñaha ca tuhun sihi sii yo.

¹ ¿Atu vaha catyi yo nazavaha ca yo cuatyí vatyí tacuan ta cua cundahvi ca iñi ra Ndyoo sii yo?

² Ña tacuan. Tatu sa i zaña yo cuatyí yo sa ndisa, ma cuu ca zavaha ca yo sii si.

³ I sicoo ndutya yo sa cuenda ra Cristo Jesús, ta sa sicoo ndutya yo cuu tañi sa sihi yo sihin ra Cristo.

⁴ Cuu si tañi sa i sihi yo ta i quihvi coño ñuhu yo sisi ñaña ñin ñi sihin ra nu i sicoo ndutya yo cuenda ra, ta i nandoto yo sihin ra vatyí ñin ñi cuu yo sihin ra. Ta iyo xaan cuhva sii Zutu ra, ta i zanandoto ra sii ra Jesús vatyí tacuan ta nduu maa yo ñiyivi saa ta coo yo minoo cuhva saa.

⁵ Tatu sa ndu-ñin yo sihin ra nu i sihi ra, cua ndu-ñin tucu yo sihin ra inga cuhva, ta cua coo yo minoo cuhva saa sihin ra.

⁶ Sito yo vatyí i ndihi cuhva sa sicoo ityi sata. Ña iyo ca yo cuhva i tyaa yo yahvi sii coño ñuhu yo ta zavaha yo cuhva ña vaha sa cuñi si. Ña tacuan.

⁷ Vatyí maa yo sa i sihi sihin ra Cristo, ñahñi ca cuhva cuu zacuu cuatyí sihin yo. Ma cuu ca cundyaca ñaha si sii yo.

⁸ Ta tatu sa i sihi yo sihin ra Cristo, sino iñi yo vatyí cua cundito tucu yo sihin ra.

⁹ Vatyí sito yo vatyí i nandoto ra Cristo sisi sa i sihi ra, ta ma cuu ca ra. Ma cundyaca ñaha ca tuhun sihi sii maa ra.

¹⁰ Minoo saha ñi i sihi ra sa cuenda cuatyí ñiyivi. Ta vityí ndito ra. Ta iyo ra ñin ñi sihin ra Ndyoo tandihi cuii tyiemvu.

¹¹ Yucuan cuenda maa ndo, zaha ndo tuhun sa i sihi ndo ityi nuu cuatyí cuan vatyí ma cuu ca cundyaca ñaha si sii ndo. Zoco ndito ndo sa cuenda ra Ndyoo vatyí sa ndu-ñin ndo sihin ra Cristo Jesús, ra ndyaca ñaha sii yo.

¹² Yucuan cuenda ma cuhva ca ndo sa cundyaca ñaha cuatyí cuan sii ndo. Ma tyaa ca ndo yahvi cuhva ña vaha sa cuñi coño ñuhu ndo zavaha si.

¹³ Ma cuhva cuenda ndo coño ñuhu ndo sii cuatyí cuan, ta ma zavaha ndo sa ña vaha. Cuhva ndo sii ndo sii ra Ndyoo vatyí ñiyivi sa i nandoto cuu ndo. Ta zatyiño ndo sa cuenda ra Ndyoo, ta zavaha ndo sa vaha.

¹⁴ Vatyí cuatyí cuan, ñahñi ca sa cuu zacuu si sihin ndo vatyí ña ndyaca ñaha ca tuhun i saha ra Ndyoo sii ra Moisés sii ndo. Ña tacuan ñihi ndo cuhva cacu aña ndo. Vityí ndito ndo sa cuenda tumañi iñi sa saha maa ra Ndyoo sii ndo.

Nacuhva ndo sii ndo sii ra Ndyoo ta zavaha ndo maa ñi sa vaha

¹⁵ Ta yozo caa vityí ¿atu zavaha ca yo cuatyí vatyí ña ndyaca ñaha ca tuhun i saha ra Ndyoo sii ra Moisés sii yo ta vityí saha xaan maa ra Ndyoo tumañi iñi sii yo? Ña tacuan cuñi si.

¹⁶ Sito ndo vatyí tatu nduu ndo muzu sii minoo ñiyivi, tyaa ndo yahvi sa catyi ra. Ta muzu cuu ndo sii ra sa tyaa ndo yahvi. Tatu tyaa ndo yahvi sii cuatyí, cua cuu cuii ndo. A tatu tyaa ndo yahvi sii ra Ndyoo cua catyi ra vatyí sa nduvaha ndo sihin cuhva iyo ndo.

¹⁷ Ityi sata maa ñi cuatyí i zavaha ndo, zoco vityí sehi tyahvi ndyoo sii ra Ndyoo vatyí vityí sihin tandihi cuii aña ndo tyaa ndo yahvi Tuhun Vaha sa i sino iñi ndo.

¹⁸ Sa ndasi cuatyí ndo. Ña cuu ca ndo muzu sii cuatyí cuan. Sa i nduu ndo muzu sii sa vaha tañi cuñi ra Ndyoo.

¹⁹ Quehin ziqui minoo cuhva vatyí ta coto ca ndo tandihi yozo caa iyo maa ra Ndyoo. Ityi sata i zavaha ndo cuatyí. Maa ñi sa ña vaha i zavaha ndo. Ta quiñi xaan ca nanduu cuhva zavaha ndo. Zoco vityí nacuhva ndo sii ndo sii ra ta zavaha ndo maa ñi sa vaha sa ndisa cuii vatyí cua nduu ndo ñiyivi vaha xaan cuhva cuñi ra Ndyoo.

²⁰ Quivi sa i cuu ndo muzu sii cuatyí cuan, ña cuu zavaha ndo sa vaha.

²¹ ¿Ta ñaa sa vaha ñihi ndo sihin cuhva i zavaha ndo? Ñahñi maa. Ta vityí cucahan nuu ndo sa cuenda sa i zavaha ndo vatyí sa cuenda cuhva ña vaha cuan ta cua ndoho ñiyivi zavaha sii si tandihi cuii tyiemvu.

²² Zoco vityí sa zandasi ra Ndyoo cuatyí ndo, ta ña ndyaca ñaha ca si sii ndo. Ta sa i nduu ndo muzu maa ra Ndyoo. Ta sa ñihi ndo sihin cuhva ya cuu sa nduu ndo ñiyivi

vaha. Ta quivi cua ndihi sa ndito ndo ihya ñuu ñiyivi ya, cua cundito ndo tandihi cui tyiemvu sihin ra Ndyoo.

²³ Tatu zavaha yo sa ña vaha, sa cua ñihi yo sihin kuhva cuan cuu sa cua cuu cui yo. Zoco tatu tiin cuenda yo sa vaha xaan sa saha maa ra Ndyoo sii yo, cua cundito yo tandihi cui tyiemvu sihin ra Jesucristo, ra ndyaca ñaha sii yo.

7

Ziqui minoo kuhva, kuhva iyo ñiyivi tatu sa tindaha ñu

¹ Ndoho yañi xaa, sa sito maa ndo tuhun i saha maa ra Ndyoo sii ra Moisés. Ta sito ndo vaty tatu sa i sihi minoo ñiyivi, ña cuñi ca si sa tyaa ñu yahvi sii si.

²⁻³ Cua quehin ziqui minoo kuhva. Tatu tindaha minoo ñaha sihin minoo rayii, catyi tuhun i saha ra Ndyoo sii ra Moisés vaty ñazih ra cuu sii ña ndya quivi cua cuu ra. Nii ñi sa ndito ra ta cua cuu ña minoo ñaha zana tatu cua coo ña sihin inga ra ta ndito ca ra tindaha sihin ña. Zoco tatu sa sihi ra, ña ndyaca ñaha ca tuhun sa tindaha sii ña. Cua tindaha ña inga saha, ta ma cuu catyi ñiyivi vaty ñaha zana cuu ña.

⁴ Ta zuun ñi kuhva cuan iyo sihin ndoho yañi xaa. Cua catyi yo vaty iin ñi cuu ndo sihin ra Cristo. Quivi i sihi ra ta cuu si tañi sa sihi tucu maa yo. Ta yucuan cuenda ña iyo ca ndo cuenda tuhun i saha ra Ndyoo sii ra Moisés. Vityi ñiyivi ra Cristo cuu sii ndo. Maa ra cuu ra i nandoto sisi sa i sihi ra, ta sihin kuhva cuan ta cuu zatyño vaha ndo tyiño maa ra Ndyoo.

⁵ Quivi sa tañaha ca sino iñi yo sii ra Cristo, cuaha xaan sa ña vaha i zavaha yo. I sito yo kuhva catyi tuhun i saha ra Ndyoo sii ra Moisés vaty ma zavaha ca yo sa ña vaha, ta yucuan cuenda cuñi ca yo zavaha yo sa ña vaha cuan. Ta sihin kuhva cuan ta cua cuu cui yo.

⁶ Zoco vityi ña ndyaca ñaha ca tuhun i saha ra Ndyoo sii ra Moisés sii yo vaty sa i sihi yo sihin ra Cristo, ta i ndihi kuhva cuan sa cuenda maa yo. Ta yucuan cuenda ña iyo ca yo kuhva catyi si nuu tutu, tuhun sahnu. Iyo yo minoo kuhva saa vaty tyindyee Taty li maa ra Ndyoo sii yo.

Iyo ca cuaty yo vazu sa sino iñi yo

⁷ ¿Ta yozo caa vityi? ¿Atu catyi tuhun sahnu vaty zavaha ca yo cuaty? ¡Ña catyi si numinoo saha! Zoco vityi site ñaa sa cuu cuaty sa cuenda tuhun cuan. Catyi si: “Ma ndyio iñun ndaha tyiño inga ñiyivi.” Ta yucuan cuenda site vaty ña vaha zavehi kuhva cuan.

⁸ Tatu sa vaty ñahñi tuhun cuan, ma cote ñaa sa cuu cuaty, ta ma cuñi zavehi sii si. Zoco quivi sa site vaty ña vaha sa ndyio iñi yo, ta i cuñi zavehi sii si vaty iyo cuaty anime.

⁹ Ta quivi ña site ñaa sa catyi tuhun i saha ra Ndyoo sii ra Moisés, i sica iñi vaty vaha ñiyivi cui. Zoco i saa quivi ta i cutuñi iñi kuhva catyi tuhun cuan, ta ziqui i site vaty iyo cuaty anime, ta i site vaty minoo ñiyivi ña vaha cui.

¹⁰ Catyi tuhun cuan vaty tatu tyaa ñiyivi yahvi sii si cua cundito ñu tandihi cui tyiemvu. Zoco zuun ñi tuhun cuan cuu sa i zativi sii, vaty ña tyei yahvi sii si. Vaty catyi si vaty ra ña tyaa yahvi sii si, tahan si sa cua cuu cui ra.

¹¹ Ta kuhva sa ña vaha i cuñi zavehi, i zandavi ñaha si sii. Ta kuhva catyi tuhun i saha ra Ndyoo sii ra Moisés vaty ma cuu zavehi, i zavehi sii si. Ta yucuan cuenda tahan si sa cui.

¹² Tuhun i saha ra Ndyoo sii ra Moisés, vaha xaan si vaty tuhun i saha maa ra Ndyoo cuu si cuan. Ta tandihi tyiño sa catyi ra Ndyoo vaty zavaha yo, vaha xaan ta ndoo xaan si.

¹³ Ta tuhun vaha xaan cuan ¿atu sa yucuan cuu sa i zativi sii? Yivi. Sa ña vaha sa i cuñi zavehi cuu sa i zativi sii. Sa cuenda sa zavehi sii si ta tahan si sa cui. Tuhun i saha ra Ndyoo sii ra Moisés cuu sa i zañaha sii, vaty cuaty cuu kuhva cuñi zavehi, zoco zuun ñi i zavehi sii si. Ta sihin kuhva cuan ta i zañaha tuhun cuan sii, vaty quiñi xaan cuu kuhva cuñi zavehi.

¹⁴ Sito yo vatyí tuhun cuan nacatyí si sihin yo cuhva cuñi ra Ndyoo sa zavaha yo. Ta yuhvi cui minoo ñiyívi iyo cuatyí vatyí zavehi cuhva ña vaha sa cuñi zavehi, ta ndyaca ñaha cuatyí cuan sii.

¹⁵ Ña cutuñi iñi ñaa sa tehin vatyí ña zavehi cuhva cuñi zavehi sa ndisa. Ta sa ña tahan maa iñi, yucuan cuu sa zavehi.

¹⁶ Ta tatu zavehi minoo cuhva ña vaha, sa siñi tuñi vaha sa iyo sii, catyí si sihin vatyí ña vaha cuu cuhva zavehi, ta catyí si vatyí vaha tuhun i saha ra Ndyoo sii ra Moisés.

¹⁷ Ta vityí ña cuñi zavehi sa ña vaha, zoco iyo ca cuatyí. Ta yucuan cuenda zavehi sii si.

¹⁸ Nacote vatyí minoo ñiyívi iyo cuatyí cui. Ñahñi numinoo cuhva vaha iyo sii. Cuñi zavehi sa vaha, zoco ña ñihi cuhva yozo caa zavehi sii si vatyí minoo ñiyívi cuatyí cui.

¹⁹ Vatyí ña zavehi sa vaha sa cuñi zavehi, zoco zavehi sa ña vaha vazu ña cuñi zavehi sii si.

²⁰ Ta sa zavehi sa ña vaha, zañaha si sii, vatyí iyo ca cuatyí. Ta cuatyí cuan cuu sa ndyaca ñaha sii.

²¹ Tacuan cuu si. Iyo minoo cuhva sii. Vazu cuñi zavehi sa vaha, zoco maa ñi sa ña vaha zavehi tandíhi saha.

²² Vatyí sihin sa siñi tuñi vehi tahan xaan iñi tandíhi tuhun i saha maa ra Ndyoo.

²³ Zoco iyo inga cuhva sii, ta ña tahan iñi si cuhva cuñi sa siñi tuñi vehi. Ta cuhva sa iyo sii, ña cuñi maa si zavaha si sa vaha. Maa maa ñi sa ña vaha cuñi si zavaha si. Ta ndyaca ñaha si sii.

²⁴ ¡Ndahvi yuhvi ra ndahvi! ¿Yoo sa cua zacacu sii, sihin cuhva sa zavehi sa ña vaha cuan?

²⁵ Sehi tyahvi ndyoo sii ra Ndyoo sa cuenda ra Jesucristo ra ndyaca ñaha sii yo vatyí maa ra cua zacacu sii. Sihin sa siñi tuñi vehi cuñi xein cundyique tandíhi tuhun i saha maa ra Ndyoo, zoco sihin inga cuhva sa iyo sii, ta zatívi si sii, ta zavaha que sa ña vaha.

8

Tyindyee xaan Tatyí Ii ra Ndyoo sii yo ta cuu coo yo minoo cuhva saa

¹⁻² Vityí ma zandoho ca ra Ndyoo sii ñiyívi sa ndu-ñin sihin ra Cristo Jesús vatyí ña zavaha ca ñu cuhva cuñi coño ñuhu ñu, zoco zavaha ñu cuhva cuñi Tatyí Ii. Vatyí Tatyí Ii cuan saha xaan si sa vaha sii yo sa cuenda ra Cristo Jesús. Ta i ndasi si sii, cuhva i sindyaca ñaha cuatyí sii, ta tuhun sihi.

³ I zaquisi ra Ndyoo sii Zehe ra cuhva caa maa yo ñiyívi cuatyí. I quisi ra vatyí cua tyiyahvi ra sa cuenda cuatyí ñiyívi, ta i zandíhi ra cuhva ndyaca ñaha sa ña vaha sii yo. Vatyí tuhun i saha ra Ndyoo sii ra Moisés ña cuu zavaha si cuhva cuan vatyí ñahñi tundyee iñi iyo sii si sa cuenda cuatyí sa ndyaca ñaha sii ñiyívi.

⁴ Zoco i quisi ra Cristo vatyí cua cuhva ra cuhva sii yo, ta cua cuu tyaa yo yahvi sii cuhva vaha sa catyí tuhun sahnú cuan. Maa yo cuu ñiyívi zavaha cuhva cuñi Tatyí Ii ta yívi ca cuhva ña vaha sa cuñi maa yo.

⁵ Ñiyívi zavaha cuhva cuñi maa ñu, ndyico ñu ta zacuu ñu cuhva ña vaha sa cuñi ñu. Zoco ñiyívi cuu cuenda Tatyí Ii, ndyico ñu cuhva cuñi ra Ndyoo.

⁶ Tatu ndyico ñiyívi minoo cuhva ña vaha, cuhva cuñi maa ñu, cua cuu ñu. Zoco tatu ndyico ñu ta zavaha ñu cuhva cuñi Tatyí Ii cua coo sa taxi sii ñu sihin ra Ndyoo, ta cua cundito ñu sihin ra.

⁷ Vatyí tatu ndyico ñu minoo cuhva ña vaha, cuhva cuñi maa ñu, ñahñi sa taxi iyo sii ñu sihin ra Ndyoo vatyí ña tyaa ñu yahvi tuhun i saha ra Ndyoo sii ra Moisés, ta nu ña cuu zacuu ñu sihin si.

⁸ Ta ñiyívi zavaha sa ña vaha cuhva cuñi maa ñu, ña cuu zavaha ñu cuhva tahan iñi ra Ndyoo.

⁹ Zoco maa ndo, ña zavaha ca ndo sa ña vaha cuhva cuñi ndo, zavaha ndo cuhva cuñi Tatyí Ii tatu ndisa vatyí iyo Tatyí Ii ra Ndyoo sihin ndo. Vatyí tatu ñahñi Tatyí Ii sa saha ra Cristo iyo sihin minoo ñiyívi, yívi ñiyívi ra Cristo cuu ñu cuan.

¹⁰ Ta tatu iyo ra Cristo sisi añima ndo, tañi sa sihi coño ñuhu ndo cuu si sa cuenda cuaty, zoco ndito añima ndo vaty catyi ra Ndyoo vaty ñahñi ca cuaty ndo.

¹¹ I zanandoto ra Ndyoo sii ra Jesús sisi sa i sihi ra. Ta tacuan tucu maa ndo tatu iyo Taty li ra Ndyoo sihin ndo cua zanandoto tucu ra sii ndo sihin coño ñuhu ndo.

¹² Ta vityi ndoho yañi xaa, sa cuenda sa vaty iyo Taty li ra Ndyoo sii yo ta ña tahan ca si sa tyaa yo yahvi sii cuhva ña vaha sa iyo sii yo ta cuhva ña vaha sa cuñi yo.

¹³ Vaty tatu iyo ndo cuhva ña vaha, cuhva cuñi coño ñuhu ndo, cua cuu cuii ndo. Zoco tatu sihin tundyee iñi sa saha Taty li ra Ndyoo sii ndo ta zaña ndo sa ña vaha cuan, cua cundito ndo sa ndisa cuii.

¹⁴ Vaty ñiyivi ndyico cuhva zañaha Taty li maa ra Ndyoo, yucuan ñu cuu zehe ra Ndyoo.

¹⁵ Ndy quivi i tiin cuenda ndo Taty li maa ra Ndyoo ta ña yuhu ca ndo sii ra. Yuhu minoo muzu sii ra ndyaca ñaha sii ra tatu xaan xaan ra, zoco ña yuhu ca maa ndo vaty i tiin cuenda ndo Taty li ra, ta i nduu ndo zehe ra. Ta yucuan cuenda cuu catyi ndo sihin ra: “¡Ndyoo Zuti!”

¹⁶ Ta zuun ñi Taty li maa ra Ndyoo cuu sa zacoto sii yo vaty zehe ra Ndyoo cuu sii yo.

¹⁷ Ta vityi cua ñihi yo sa vaha sa saha maa ra Ndyoo sii zehe ra. ñin ñi cua ñihi yo sii si sihin ra Cristo tatu ndyehe yo tundoho ñin ñi sihin ra. Ta ziqui cua catyi ra Ndyoo vaty vaha xaan ñiyivi cuu yo ñin ñi sihin ra Cristo.

¹⁸ Sito vehi vaty tundoho sa ndyehe yo vityi ma cuu caca iñi yo vaty cahnu xaan si. Vaty ityi nuu ca cua zañaha maa ra Ndyoo sii yo cuhva caa ra ta zii xaan cua cuñi yo quivi cuan.

¹⁹ Tandihí cuii sa i zavaha ra Ndyoo ndatu si ta ñihi xaan cuñi si sa cua tahan si quivi ta cua zañaha maa ra Ndyoo yoo sa cuu tandihí zehe ra.

²⁰ Vaty tandihí sa i zavaha ra Ndyoo i tivi si. Vazu ñahñi cuaty i zavaha si, zoco i saha ra Ndyoo vaty tandihí sa i zavaha ra cua tahan si tundoho ta cua tivi si (sa cuenda cuaty sa zavaha ñiyivi). Ndy quivi cua catyi ra Ndyoo, ta cua ndusaa tucu si inga saha.

²¹ Tandihí cuii sa i zavaha ra Ndyoo ta cua ndusaa tucu si inga saha quivi cua zama ra Ndyoo cuhva iyo si vityi, ta ma tivi ca si. Ta ñahñi ca tundoho cua ndyehe si. Ta tacuan tucu tandihí cuii zehe ra Ndyoo.

²² Sito yo vaty tandihí sa i zavaha ra Ndyoo ta ndyehe xaan si tundoho. Cahnu xaan cuu tundoho ndyehe si.

²³ Ta ña maa ñi ñuu ñiyivi sa zavaha ra Ndyoo cua ndyehe si tundoho, ndya maa yo ñiyivi sa i tiin cuenda Taty li ra Ndyoo sa saha ra Ndyoo sii yo sa xihna ñi, ta ndyehe xaan tucu yo tundoho. Cahnu xaan tundoho ndyehe yo, ta ndahvi xaan cuñi yo vaty cuñi xaan yo sa cua tahan si quivi cua zama ra Ndyoo cuhva iyo yo. Ta quivi cuan cua zandihí ra tandihí tundoho sa ndyehe yo ta tandihí cuaty yo. Cua zama ra cuhva iyo coño ñuhu yo. Ta cua nduu yo minoo cuhva saa.

²⁴ Vazu tañaha ca ndyehe yo cuhva cuan, zoco sino iñi yo vaty cua tahan si quivi cua nduu yo cuhva caa maa ra Ndyoo. Tatu ndatu yo quivi cuan ña cuñi si catyi si vaty sa ñihi yo sa ndatu yo. Tatu sa yaha ñihi yo sii si, ma cuatu ca yo.

²⁵ Zoco tatu sino ndisa cuii iñi yo vaty cua saa quivi ityi nuu ca ta cua zavaha ra Ndyoo cuhva cuan ta vazu ña ndyehe yo sii si vityi zoco zandyee yo iñi yo ta cuatu yo sii si. (Sino iñi yo vaty cua ñihi yo sii si, ta yucuan cuenda ndatu yo sii si.)

²⁶ Ta zuun ñi cuhva cuan tyindyee Taty li ra Ndyoo sii yo sihin sa ña cuu sii yo vaty ña sito yo yozo caa cua caca yo sii ra Ndyoo cuhva cuñi si. Ta Taty li cuan sica si sii ra Ndyoo sa cuenda maa yo nu ña ñihi ca yo cuhva cahan yo sihin ra.

²⁷ Sito maa ra Ndyoo ñaa sa sica iñi yo sihin añima yo, ta sito ra ñaa sa cuñi Taty li cuan caca si vaty sica si cuhva cuñi maa ra Ndyoo sa cuenda ñiyivi sino iñi sii ra Ndyoo sa ndisa cuii.

Ñahñi sa cuu tyaa siyo sii yo sihin cuhva cuñi xaan maa ra Ndyoo sii yo

²⁸ Sito yo vatyí ñiyívi cuñi sii ra Ndyoo, tandíhi cuii sa tahan ñu zoco tyindyee si sii ñu. Maa ñu cuu ñu i casi ra Ndyoo vatyí ñiyívi ra cua cuu sii ñu.

²⁹ Ndyaa sa xihna cuii ñi ta sa sito ra Ndyoo yoo cuu ñiyívi cua cundyico sii ra, ta i catyi ra vatyí cua nduu ñu tañi cuhva caa Zehe ra. Ta ra Jesucristo cuu Zehe ra Ndyoo. Maa ra cuu Zehe Ndyoo sa ndisa sa xihna ñi, ta ziqui i nacacu saa cuaha xaan ca yo vatyí cuu yo yañi ra.

³⁰ Ta i cana ra Ndyoo sii ñiyívi sa sito ra vatyí cua cundyico ñu sii ra. Ta sii ñiyívi sa i cana ra i catyi ra vatyí ñahñi ca cuatyí ñu. Ta vaha xaan cua zanduu ra sii ñu tañi cuhva caa Zehe ra.

³¹ ¿Ta ñaa ca sa cuu catyi yo vityi? Ndyaa maa ra Ndyoo sihin yo. Ta yoñi sa cuu tyaa siyo sii yo sii maa ra Ndyoo.

³² Vatyí i zaquisi maa ra Ndyoo sii sa zuun ñi maa Zehe ra, ta i saha ra Ndyoo sa cuu ra Jesús sa cuenda tandíhi cuii yo. Yucuan cuenda sito yo vatyí tañi cuhva i saha ra Ndyoo sa cuu Zehe ra cuenda yo, ta tacuan tucu cua cuhva tucu maa ra tandíhi cuii ca sa vaha sii yo.

³³ Ta ityi nuu maa ra Ndyoo ¿yoo sa cuu tyaa cuatyí sata ñiyívi i casi ra? Yoñi. Vatyí maa ra cuu ra catyi vatyí ñahñi ca cuatyí ñu.

³⁴ Yoñi cua catyi ityi nuu ra Ndyoo vatyí iyo cuatyí yo vatyí ra Cristo cuu ra i sihi sa cuenda cuatyí yo, ta ziqui i nandoto ra. Ta vityi ndyaa ra siyo cuaha ra Ndyoo. Ta cahan ra sihin ra Ndyoo sa cuenda maa yo.

³⁵ ¿Yoo sa cuu tyaa siyo sii yo sihin cuhva cuñi xaan ra Cristo sii yo? Yoñi. Vazu ndyehe xaan yo tucuihya iñi a tundoho a sañi tahan ñiyívi sihin yo sa cuenda Tuhun Ndyoo a vazu iyo tama a ñahñi zahma yo iyo a cuaha xaan sa zayuhu sii yo a cuñi cahñi ñiyívi sii yo, zoco ma zaña ra Cristo sa cuñi ra sii yo.

³⁶ Ndisa cua tahan yo tundoho tañi catyi si nuu tutu ra Ndyoo:
Sa cuenda moo ta cuñi cahñi ñiyívi sii ndi tandíhi quívi.
Ta zacuu ñiyívi sii ndi tañi minoo mvee ticatyí sa cua cahñi ñu.
Tacuan catyi Tuhun ra Ndyoo.

³⁷ Zoco vazu tahan yo tandíhi cuii cuhva ya, zoco vaha xaan cua zahacanaa yo ziqui si sa cuenda ra sa cuñi xaan sii yo.

³⁸⁻³⁹ Sito vehi vatyí ñahñi maa sa cuu tyaa siyo sii yo sihin cuhva cuñi xaan maa ra Ndyoo sii yo. Ta zañaha ra sii yo vatyí cuñi xaan ra sii yo sihin cuhva i sicoo ra Cristo ta cuhva i zavaha ra. Vazu ndito ca yo a vazu sa sihi yo zoco cua cuñi ca ra Ndyoo sii yo. A vazu ángel a tatyí cuihna cuñi tyaa siyo sii yo, zoco ma cuu. A ñaa sa tahan yo vityi a sa cua ndyehe yo ityi nuu ca a sa iyo ityi ziqui a nu ñuhu. A ñaa cuii ca maa sa iyo, zoco ma cuu tyaa siyo si sii yo sihin cuhva cuñi xaan maa ra Ndyoo sii yo sa cuenda ra Cristo Jesús, ra ndyaca ñaha sii yo.

9

I casi ra Ndyoo sii ñiyívi hebreo

¹ Ñiyívi ra Cristo cui, ta quehin sa ndisa. Ña vatye. Ta tyindyee Tatyí Ii ra Ndyoo sii sa siñi tuñi sii, ta site vatyí (tandíhi sa tyei ihya ta) sa ndisa cuu si.

² Cuihya xaan cuñi añime. Ta yaha xaan ndahvi cuñi si. (Sa cuenda ñu hebreo, ñiyívi sii.)

³ Ta ndya cuhva cuñi sa cua tyaa siyo ra Ndyoo sii, sii ra Cristo ta zacuhun ra sii nu xaan tatu zacacu zuhva ra sii ñu hebreo, ñiyívi sii. Tatu sa vatyí cuu tacuan, zoco ma cuu sa tacuan.

⁴ Quehin sa cuenda ñiyívi hebreo vatyí i casi ra Ndyoo sii ñu vatyí cuñi ra zañaha ra vatyí cuñi xaan ra sii ñu. Zuun ñi sii maa ñu i zañaha ra Ndyoo cuhva caa ra sa ndisi xaan ra. Ta sihin maa ñu i catyi ra Ndyoo cuhva cua zavaha ra sa vaha xaan sihin ñu. Ta i saha ra tuhun sa i saha ra sii ra Moisés sii ñu, ta i catyi ra sihin ñu yozo caa cua zavaha ra sa vaha sihin ñu ityi nuu ca. Ta i zañaha ra sii ñu cuhva cuñi ra sa cua zacahnu ñu sii ra.

⁵ Ra hebreo i cuu tandihi ñiyivi sahnú sii yo, ta i sino xaan iñi ra sii ra Ndyoo (tañi maa ra Abraham, ra Isaac, ta ra Jacob). Ta zuun ñi ñiyivi hebreo cuu ra Cristo. Ndyaca ñaha ra ziqui tandihi cuii sa iyo. Nazacahnu yo sii maa ra Ndyoo tandihi cuii tyiemvu. Ta nacuu si tacuan.

⁶ Ña catyi sa ñá zavaha ra Ndyoo cuhva i catyi ra ta sa naha, cuhva cua zavaha ra sihin ñiyivi hebreo vatyi ña tandihi ñiyivi hebreo ta cuu ñu ñiyivi ra Ndyoo sa ndisa.

⁷ Ña tandihi ñiyivi ra Abraham ta cuu ñu ñiyivi sii ra Ndyoo vatyi catyi Tuhun ra Ndyoo nu cahan ra sihin ra Abraham ta catyi ra: “Maa ñi sa cuenda ra Isaac ta cua coo ñiyivi suun.” (Tacuan i catyi ra Ndyoo sihin ra Abraham yoo cuu sa cua cuu ñiyivi sii ra sa ndisa cuii.)

⁸ Cuñi si catyi si vatyi tandihi cuii ñiyivi i zacacu zihí sii cuhva iyo ñuu ñiyivi ya, yivi ñiyivi ra Ndyoo cuu sii ñu. Zoco tandihi cuii ñiyivi sa cua càcù cuhva cuñi ra Ndyoo, yucuan ñu cuu zehe ra sa ndisa cuii.

⁹ Ta ihya cuu cuhva i saha ra Ndyoo tuhun ra sii ra Abraham: “Cua quisi nu ndyaa ndo cuhva i catyi, ta cua coo zehe ña Sara”, catyi ra. (Ihya cuu cuhva i cacu ra Isaac, cuhva i catyi maa ra Ndyoo.)

¹⁰ Ta ña tacuan ñi, vatyi ña Rebeca tindaha ña sihin ra Isaac yihí ña, zehe ña Sara. Maa ra cuu minoo ñiyivi sahnú sii yo. Ta sicoo zehe ñu. (Tinihi ra i cacu ra.)

¹¹⁻¹² Zoco cuee ca sa cacu ra, ñá zavaha ra sa vaha a sa ña vaha, ta sa i catyi ra Ndyoo sihin ña Rebeca: “Ra cua cacu sa xihna ñi cua cuu ra muzu sii ra luhlu ca.” Tacuan i zañaha ra Ndyoo vatyi casi ra sii ñiyivi sa cuñi maa ra ta yivi sa cuenda cuhva zavaha ñu (vatyi i cuñi ca ra Ndyoo sii ra luhlu ca cuee ca sa cacu ra).

¹³ Tañi i catyi ra Ndyoo: “I cuñi que sii ra Jacob, zoco ñá cuñi sii ra Esaú.”

¹⁴ Tacuan i zavaha ra Ndyoo, zoco ma cuu catyi yo vatyi ña vaha cuhva zavaha ra.

¹⁵ I catyi ra Ndyoo sihin ra Moisés: “Cua cundahvi iñi sii ñiyivi, zoco zuun ñi mi cua catyi yoo sii cua cundahvi iñi.” Catyi ra.

¹⁶ Ta tacuan cuu cuhva sito yo vatyi ma cundahvi iñi ra Ndyoo sii ñiyivi sa cuhva cuñi ñi maa ñu ta nducu xaan ñu cuhva. Zoco cua cuu si cuhva cuñi maa ra Ndyoo vatyi maa ra cuu ra cundahvi iñi yoo sii cuñi maa ra.

¹⁷ Catyi Tuhun Ndyoo cuhva i cahan ra sihin ra Faraón rey ñuu Egipto ta sa naha. (Vatyi ñihi xaan iñi rey cuan), ta i catyi ra Ndyoo sihin ra: “I sehi sa cundyaca ñohon ta cua zañehi vatyi iyo xaan cuhva sii. Ta nacahnu ñuu ñiyivi cua zacahnu ñiyivi sii.” Catyi ra.

¹⁸ Tacuan iyo maa ra Ndyoo. Cundahvi iñi ra sii yoo ra cuñi ra cundahvi iñi ra. Ta saha ra sa nduñihi iñi inga ñiyivi cuhva cuñi maa ra.

¹⁹ Ta yucuan cuenda cua catyi ndo sihin: “¿Ta ñaa cuenda tyaa ra Ndyoo cuatyi sata ñiyivi? ¿Ta yoo cuu sa ña zavaha cuhva cuñi ra?”

²⁰ Zoco ña vaha cuhva sica iñun vatyi ¿yoo ra cuun ta cohon nu cahan ra Ndyoo? Vatyi minoo quiyi cuan, ña catyi si sihin ñiyivi i zavaha sii si: “Ña vaha cuhva i zavohon sii. ¿Ñaa cuenda i zavohon sii tyehen?”

²¹ Tucuñun minoo ñiyivi zatyíño sihin ndyahyu ta zavaha ñu ndaha tyiño sa cua cutyiño ñu sisi vehe, ta cuu zavaha ñu ñaa sa cuñi maa ñu sihin zuun ñi maa ndyahyu cuan tu cuu si minoo ndaha tyiño vaha ca a cuu si minoo sa ndahvi ñi caa.

²² I cuñi ra Ndyoo zañaha ra sii ñiyivi cuhva tahan si zandoho ra sii ñu tatu zavaha ñu sa ña vaha. Ta cuñi tucu ra zañaha ra vatyi cuaha xaan cuhva iyo sii ra. Yucuan cuenda zandyee xaan ra iñi ra sihin ñiyivi ña vaha. Maa ñu cuu ñiyivi tahan si ndoho. Ta cué ca ta cua zanaa ra sii ñu.

²³ Ta inga tucu cuhva. I cuñi ra zañaha ra cuhva vaha xaan sa zavaha ra sihin inga ñiyivi, ñu i saha maa ra tumañi iñi sii. Maa ñu cuu ñu i casi ra vatyi cua ñihi ñu tandihi cuii sa vaha xaan ta cua cundito ñu sihin ra.

²⁴ Ta zuun ñi maa yo cuu ñiyivi cuan. Iyo yo cuu yo ñiyivi hebreo. Ta iyo yo yivi. Zoco i casi ra Ndyoo sii tandihi yo.

²⁵ Tañi i catyi maa ra Ndyoo nuu tutu i tyaa ra Oseas ta sa naha:

Iyo ñiyivi sa yivi ñiyivi mi, zoco cua zandui ñiyivi sii sii ñu.

Ñá cuñi sii ñu, zoco vityi cua cuñi sii ñu.

²⁶ Ta zuun ñi nu i catyi sihin ñu: “Yivi ñiyivi sii mi cuu sii ndo”, zuun ñi yucuan cua nduu ñu ñiyivi sii mi, ra Ndyoo ndito.

²⁷ Ta i catyi ra Isaías sa cuenda ñiyivi hebreo: “Vazu cuaha xaan ñiyivi hebreo tañi ñiyiti yuhu tyañuhu, zoco zuhva cuii ñi ñu cua cacu.

²⁸ Vaty yaty xaan ta cua zavaha ra Ndyoo tandihi cuii cuhva catyi ra ihya ñuu ñiyivi.”

²⁹ Tañi i catyi tucu maa ra Isaías:

Tatu ma zacacu ra Ndyoo sii uu a uñi tahan yo, cunaa tandihi yo

Tañi i naa ñiyivi ñuu Sodoma ta ñuu Gomorra ta sa naha.

Sica iñi ñiyivi hebreo vaty cua càcù ñu vaty zavaha ñu sa vaha

³⁰ ¿Ta ñaa cua catyi yo vityi? Ñiyivi sa yivi ñiyivi hebreo cuu ñá nanducu maa ñu cuhva coo vaha ñu ityi nuu ra Ndyoo. Zoco vityi nañihi ñu cuhva cuan sihin sa sino ñi iñi ñu.

³¹ Ta ñiyivi hebreo i zavaha xaan ñu cuhva sa sica iñi maa ñu vaty cua nduvaha ñu ityi nuu ra Ndyoo. Zoco ñá cuu. Ñá cuu zavaha ñu tandihi cuii cuhva vaha tañi catyi tuhun i saha ra Ndyoo sii ra Moisés.

³² ¿Ta ñaa cuenda ñá ñihi ñu cuhva catyi ra Ndyoo sihin ñu vaty ñahñi ca cuaty ñu? Ñá ñihi ñu cuhva cuan vaty ñá sino iñi ñu vaty cua càcù ñu maa ñi sihin tumañi iñi sa saha maa ra Ndyoo. Sica iñi ñu vaty cua càcù ñu sa cuenda sa vaha i zavaha ñu. Ta i cuu si tañi minoo cuhva tatu catyih saha ñiyivi sihin minoo yuu.

³³ Tañi catyi si nuu tutu ra Ndyoo:

Cua caqui sii minoo ra tañi minoo yuu nu iyo ñiyivi hebreo.

Ta cua catyih saha ñu sii ra.

Zoco tatu sino iñi ñu sii ra, cua quita vaha ñu.

10

¹ Ndoho yañi xaa, cahan xein sihin ra Ndyoo sa cuenda ñiyivi hebreo, ta sihin tandihi cuii añime cuñi xein sa cua cacu ñu.

² Sehi sa ndaa cuenda ñu vaty cuñi xaan ñu zacahnu ñu sii ra Ndyoo, zoco ña ñihi ñu cuhva yozo caa zavaha ñu sii si sa ndisa.

³ Vaty ña sito ñu cuhva zanduvaha ra Ndyoo sii ñu cuhva cuñi maa ra, ta i nducu ñu inga cuhva sa cuñi maa ñu, ta ña tyaa ñu yahvi cuhva i saha maa ra Ndyoo.

⁴ Ta sa naha cuñi ñu nduvaha ñu ityi nuu ra Ndyoo sihin sa tyaa ñu yahvi tuhun i saha ra sii ra Moisés. Zoco vityi sa i quisi ra Cristo ta zandih ra cuhva cuan. Vityi sa sino ñi iñi yo sii ra ta nduvaha yo ityi nuu maa ra Ndyoo ta natiin cuenda ra sii yo.

⁵ Ta nu i tyaa ra Moisés i catyi ra vaty tatu zavaha minoo ra tandihi cuii sa vaha cuhva catyi tuhun i saha ra Ndyoo sii ra, tacuan ta cua coo ra minoo cuhva vaha xaan ta cua cundito ra tandihi cuii tyiemvu.

⁶ Zoco cuhva nduvaha yo sihin sa sino iñi yo, yivi minoo cuhva sa ñihi xaan nanducu yo cuu si vaty catyi si: “Ma catyi ndo sihin añima ndo: ¿Yoo cua cuhun ndya gloria ta cua zanoo ra sii ra Cristo?”

⁷ Ta ma catyi ndo: ¿Yoo cua noo sisi ñuhu vaty cua zanandoto ra sii ra Cristo sisi sa i sihi ra?”

⁸ Vaty ihya cuu cuhva catyi si: “Vaty xaan iyo tuhun vaha ra Ndyoo sii ndo. Yuhu ndo ta sisi añima ndo iyo si.” Ta zuun ñi tuhun cuan cuu tuhun sa zacoto maa ndi. Tuhun sa cuenda sa sino iñi yo sii ra Cristo cuu si.

⁹ Ta tatu catyun sihin ñiyivi vaty ra Jesús cuu ra ndyaca ñaha suun ta sino ndisa iñun sihin añimon vaty i zanandoto ra Ndyoo sii ra sisi sa i sihi ra, cua cacun.

¹⁰ Vaty sihin añima yo sino iñi yo (sa i sihi ra Jesús ta i nandoto ra vaty cua zacacu ra sii yo), ta tacuan ta nduvaha añima yo. Ta sihin yuhu yo saha yo sa ndaa cuhva sino iñi yo. Tacuan ta cua cacu yo.

¹¹ Vaty catyi Tuhun ra Ndyoo: “Tandihí ñiyivi sa sino iñi sii ra, cua ñihi ñu sa vaha xaan sa cua cuhva ra.”

¹² Vaty ra Ndyoo ña ziin ndyehe ra sii minoo ñiyivi ta sii inga ñu vazu tata hebreo cuu yo a griego a ñaa ñi maa tata cuu yo vaty minoo tuhun ñi maa ra ndyaca ñaha sii tandihí cuii yo. Ta saha xaan maa ra tumañi iñi sii tandihí cuii yo sa sica sii ra.

¹³ Tañi catyi Tuhun ra Ndyoo vaty tandihí ñiyivi sa cua caca sii ra Jesús, ra ndyaca ñaha sii yo, cua cacu ñu.

¹⁴ ¿Ta yozo caa cuu caca ñu sii ra tatu ña sino iñi ñu sii ra? ¿Ta yozo caa cuu sino iñi ñu sii ra tatu tañaha ca coto ñu vaty i quisi zacacu ra sii yo? Ta ma cuu coto ñu tatu yoñi sa nacaty sihin ñu.

¹⁵ Ta ma cuu nacaty ñiyivi Tuhun ra Ndyoo tatu yivi maa ra tasi sii ñu. Ta catyi Tuhun ra Ndyoo: “Vaha xaan tatu quisi ñiyivi nacaty tuhun vaha cuhva cacu yo”, catyi si.

¹⁶ Zoco ña tandihí ñiyivi sa siñi tuhun cuan ta tyaa ñu yahvi sii si vaty iyo ñu tañi cuhva catyi ra Isaías: “Tata, yoñi sa sino iñi tuhun i zacoto ndi”, catyi ra.

¹⁷ Xihna ca siñi yo tuhun vaha sa cuenda ra Cristo, ta ziqui sino iñi yo sii si.

¹⁸ Ta catyi vaty sa ndisa sa siñi ñiyivi hebreo tuhun vaha vaty catyi Tuhun ra Ndyoo: Sa i zacoto ñiyivi Tuhun moo nacahnu cuii ñuu ñiyivi, catyi Tuhun ra Ndyoo.

¹⁹ Ta cua catyi tuqui inga cuhva: ¿Atu ñá sito ñiyivi hebreo vaty cua zacacu tucu ra Ndyoo sii inga ca ñiyivi? Sa i sito ñu vaty i cahan ra Moisés sa cuenda ra Ndyoo ta sa naha, ta i catyi ra:

Cua zacuxein sii ndo sihin ñiyivi sa ñahñi sa siñi tuñi sa cuaha,

Vaty ñu cuan cua nanduu ñu ñiyivi mi.

Ta maa ndo cua cuxaan ndo.

²⁰ Ta ñá yuhu ra Isaías, ta i cahan ra sa cuenda ra Ndyoo ta catyi ra:

Ñiyivi sa ñá nanducu sii, yucuan ñu i nañihi sii.

I zañehi cuhva iye sii ñu vazu ñá nducu tuhun ñu.

²¹ Zoco sa cuenda ñiyivi hebreo catyi ra Ndyoo: “Ndyiyaca cuii i cane sii ñiyivi sii, vaty quisi ñu, zoco ñá tyaa ñu yahvi. Ñihi xaan iñi ñu.”

11

Iyo zuhva ñiyivi hebreo sa nañihi ñu cuhva cacu ñu

¹ Na catyi vaty ndaha i tyaa siyo ra Ndyoo sii ñiyivi hebreo. Ña tacuan, yañi xaa. Yuhvi tucu ra hebreo cui, ñiyivi ra Abraham ta ñiyivi ra Benjamín.

² I casi ra Ndyoo sii ñiyivi ra ta sa naha, ta ñá tyaa siyo ra sii ñu ndaha ñi. ¿Atu ña sito ndo nu cahan Tuhun ra Ndyoo sa cuenda ra Elías? nu i cuxaan ra ta cahan xaan ra sii ñiyivi hebreo ta i catyi ra:

³ “Tata, i sahñi ñiyivi sii ñu cahan tuhun moo, ta i sani ñu altar nu i zacahnu ñu suun. Yuhvi ñi ca zacahnu suun, ta cuñi cahñi ndihí ñu sii”, catyi ra.

⁴ Ta i nacahan ra Ndyoo ta catyi ra: “Iyo usa mil ca ñiyivi sa i naquihin vehi. Tañaha ca cua cuiñi siti ñu nuu ndyoo sa nañi Baal, ta ña zacahnu ñu sii ndyoo cuan”, catyi ra Ndyoo.

⁵ Ta zuun ñi cuhva cuan cuu si ndya cuhva ndya vityi vaty iyo zuhva ca ñiyivi hebreo sa zacahnu sii ra Ndyoo sa ndisa cuii. I casi ra sii ñu, ta saha maa ra tumañi iñi sii ñu.

⁶ Saha maa ra Ndyoo tumañi iñi ta yivi sa cuenda sa vaha sa zavaha ñu vaty tatu saha ra sa vaha sa cuenda sa zavaha ñu, yivi ca tumañi iñi cuu si.

⁷ Ihya cuu cuhva iyo si. Nanducu xaan ñiyivi hebreo cuhva nduvaha ñu sihin ra Ndyoo, ta ña nañihi ñu cuhva cuan. Zoco ñiyivi i casi ra Ndyoo, yucuan cuu ñu sa i nañihi cuhva cuan. Ta tandihí inga ñiyivi cuan, i zanduñihi ra Ndyoo iñi ñu.

⁸ Tañi catyi si nuu tutu ra Ndyoo: “Saha ra Ndyoo minoo sa siñi tuñi sii ñu sa ma cutuñi iñi ñu. Ndyehe ñu, zoco ña cutuñi iñi ñu sa ndyehe ñu. Siñi ñu, zoco ndya vityi ta ña cutuñi iñi ñu sa siñi ñu.”

⁹ Ta i cahan tucu ra David ziqui cuhva cuan, ta catyi ra:
Cua cuzii iñi ñu sihin sa vaha sa sasi ñu ta tandihi ndaha tyiño vaha ñu.
Zoco yucuan cuu sa cua zandoyo ñuhu sii ñu.
Ta sa cuenda cuhva cuan ta cua ndoho ñu.

¹⁰ Tañi cua nducuaa ñu ta ma ndyehe ñu vaty ma coto ñu sa ndisa.
Ta tandihi cuii quivi cua ndyehe ñu tundo.

Cuhva cacu ñiyivi sa yivi ñiyivi hebreo cuu

¹¹ ¿Atu i catyih saha ñiyivi vaty ndaha nduva cuii ñu? Yivi. Zoco i zavaha ñu sa ña vaha (sa ñá sino iñi ñu sii ra i zaquisi ra Ndyoo), ta tacuan ta i saha maa ra Ndyoo sa cacu aña inga ñiyivi sa yivi ñiyivi hebreo cuu. Ta tacuan ta cua cuxaan ñiyivi hebreo vaty cua sino iñi inga ñiyivi. Ta sihin cuhva cuan ta cua cuñi tucu ñiyivi hebreo sa cacu ñu.

¹² Ñá tiin cuenda ñiyivi hebreo cuhva i saha maa ra Ndyoo, zoco cuhva cuan i quita vaha si sa cuenda inga ñiyivi vaty cuu sino iñi ñu. Ta ndya vityi zuhva cuii ñi ñiyivi hebreo cua cacu vaty i tyaa siyo ñu cuhva i saha maa ra Ndyoo, ta i saha ra sii si inga ñiyivi. Ta cuaha xaan ñu i sino iñi. Zoco quivi cua quihvi tucu ñiyivi hebreo cuenda ra Ndyoo sa ndisa, yucuan quivi vaha xaan ta tyaqui xaan cua cuu.

¹³ Ta ndoho sa yivi ñiyivi hebreo cuu, sihin maa ndo quehin. Yuhvi cui minoo ra i tava ra Jesús tyiño sa cuhin nu iyo ñiyivi sa yivi ñiyivi hebreo cuu. Ta site vaty ñiñi xaan cuu tyiño i saha maa ra Ndyoo sii.

¹⁴ Ta zacote Tuhun Ndyoo sii ndo vaty cuñi vaty cua ndyehe ñiyivi hebreo cuhva sino iñi maa ndo ta cua cuñi tucu maa ñu zavaha ñu cuhva cuan. Ta tacuan ta cua cacu ñu.

¹⁵ Sa cuenda sa i tyaa siyo ra Ndyoo sii ñiyivi hebreo ta i tiin cuenda ra sii inga ñiyivi ndya vaha ñi. Ta quivi cua natiin cuenda tucu ra sii ñiyivi hebreo ta cua cuu si tañi cua nandoto tucu ñu sisi sa i sihi ñu.

¹⁶ Tatu siin yusa sa quita nuu sa cuaha cuan ta cuenda ra Ndyoo cuu si, cuenda ra Ndyoo cua cuu tandihi ca si sa cuaha ca cuan. A tatu minoo yoho yutu cuan cuu cuenda ra Ndyoo, cuenda ra cua cuu tucu tandihi yutu cuan.

¹⁷ Zoco tatu i tahn zuhva zoco yutu olivos, ta maa ndo i ndihvi yucuan, vazu zoco yutu olivos ndya vaha ñi cuu ndo sa iyo sisi huhu, zoco cua ñiñi tucu ndo tundyee iñi sihin sa vaha sa iyo sii yoho yutu olivos vaha cuan.

¹⁸ Ma zacahnu ndo sii ndo ta catyi ndo vaty vaha xaan ca maa ndo ta ziqui zoco tu sa i quita. Nacohon iñi ndo vaty yoho yutu cuan cuu sa tyindyee sii tu ta ma nduva tu, ta yivi ndoho sa cuu zoco tu.

¹⁹ Cua catyi ndo: “I tahn zuhva zoco tu vaty tacuan ta cuu ndihvi nduhvi”, catyi ndo.

²⁰ Ndisa vaty i tahn zuhva zoco tu cuan vaty ña sino iñi ñiyivi cuan tuhun sa cuenda maa ra Jesús. Ta maa ndo i ndihvi ndo vaty i sino iñi ndo. Ma zacahnu ndo sii ndo. Vaha ca zacuenda ndo sii ndo coto tava ra Ndyoo sii ndo.

²¹ Vaty ñá cundahvi iñi maa ra Ndyoo sii zoco yutu sa i sindyaa nu yutu cuan. Tacuan tucu maa ndo, zacuenda ndo sii ndo coto ma cundahvi tucu iñi ra sii ndo.

²² Coto ndo vaty vaha xaan aña maa ra Ndyoo ta xaan xaan tucu ra, nduu cuhva. Sii ñiyivi ña tyaa yahvi sii ra, cuxaan ra. Zoco sihin ndoho, vaha xaan ra tatu ndoo ndo sihin ra. Zoco tatu ma ndoo ndo cua tyaa siyo tucu ra sii ndo.

²³ Ta ñiyivi hebreo tatu nasino iñi ñu, cua nanduu tucu ñu zoco yutu vaha cuan vaty iyo cuhva sii maa ra Ndyoo, ta cuu zananduu tucu ra sii ñu.

²⁴ Vaty tatu i sahndya ra Ndyoo sii ndo sii minoo yutu olivos ndya vaha ñi sa iyo sisi huhu ta tyih ra sii ndo nuu minoo yutu olivos vaha, ñiñi xaan ca cuñi si sa nandihvi zuun ñi zoco vaha maa tu.

Nu ndihi tuhun cua cacu ñiyivi hebreo

²⁵ Ta ndoho yañi xaa, ña cuñi sa ma cutuñi iñi ndo tuhun xehe ya coto caca iñi ndo vaty ñiñi xaan ca maa ndo. Cuñi sa coto ndo vaty i nduñi iñi ñiyivi hebreo zuhva quivi vaty tacuan ta cuu sino iñi tandihi inga ñiyivi sa cuñi maa ra Ndyoo.

²⁶ Ta ziqui cua cacu tandihi ñiyivi hebreo tañi catyi si nuu tutu ra Ndyoo:

Minoo ra sa cua zacacu cua quisi sa cuenda ñiyivi hebreo, ta minoo ra hebreo cua cuu tucu ra.

Cua tyaa siyo ra cuatyí sa iyo añima ñiyivi ra Jacob.

²⁷ Ta ihya cuu tuhun sa sehi sii ñu vatyí ndisa cua tyaa siye cuatyí sa iyo añima ñu, catyí sí.

²⁸ Cuxaan ñiyivi hebreo sihin ra Ndyoo sa cuenda tuhun vaha cuenda ra Cristo. Ta tacuan ta cuu sino iñi maa ndo. Zoco maa ñu cuan cuu ñu i casi ra Ndyoo ndya ta sa naha, ta cuñi xaan ra sii ñu vatyí i sino iñi ñiyivi sahnu sii ñu sii ra.

²⁹ Ta ma cuu zama ra Ndyoo cuhva tatu sa i casi ra sii ñiyivi ta cuhva saha maa ra sa vaha sii ñu.

³⁰ Ná tyaa maa ndo yahvi sii ra Ndyoo ta sa naha, zoco vityí cundahvi iñi ra sii ndo vatyí ñá i tyaa ñiyivi hebreo yahvi sii ra.

³¹ Ta tacuan tucu, ña tyaa ñiyivi hebreo yahvi sii ra ndya vityí. Ta sa cuenda sa vatyí cundahvi iñi ra Ndyoo sii maa ndo ta cua cundahvi tucu iñi ra sii ñu ityí nuu ca.

³² Vatyí saha maa ra Ndyoo sa ma tyaa tandíhi cuii ñiyivi yahvi sii ra vatyí tacuan ta cuu cundahvi iñi ra sii tandíhi cuii yo.

³³ Cuaha xaan cuaha xaan sa siñi tuñi maa ra Ndyoo, ta sito ra tandíhi cuii. Ma cuu cutuñi iñi maa yo cuhva sica iñi ra ta cuhva zavaha ra. Maa ra cuu ra zacuu tandíhi.

³⁴ Catyí Tuhun ra Ndyoo: “Yoñi sa sito cuhva sica iñi maa ra ndyaca ñaha sii yo, ta yoñi sa cuu cuhva sa siñi tuñi vaha sii maa ra.

³⁵ Yoñi sa cuu cuhva sa vaha sii ra Ndyoo ta ziquí tyiyahvi ra Ndyoo sii ra.”

³⁶ Vatyí ndya nu ndyaa maa ra i quita tandíhi sa iyo. Maa ra i zavaha sii si. Ta zavaha ra vatyí cua cacu tandíhi cuii tyiño sihin minoo cuhva sa cua zacahnu si sii maa ra. Nazacahnu yo sii ra tandíhi cuii tyiemvu. Ta nacuu si tacuan.

12

Cuhva vaha cua coo yo vityí sa sino iñi yo

¹ Yucuan cuenda zañiñi sii ndo, ndoho yañi xaa, vatyí nacuhva ndo sii ndo sii ra Ndyoo vatyí cundahvi iñi ra sii ndo. Nacuhva ndo sii ndo sii ra ta nduvaha ndo cuhva cuñi ra vatyí yucuan cuu cuhva cuñi si sa zacahnu ndo sii ra.

² Ta ma coo ca ndo cuhva iyo ñiyivi ñuu ñiyivi ya. Zama ndo cuhva sica iñi ndo. Ta tacuan ta cua coto ndo cuhva cuñi maa ra Ndyoo sihin ndo. Cua coto tucu ndo vatyí cuhva tahan iñi maa ra Ndyoo, maa ñi maa sa vaha cuu, ta ndoo xaan si, ta ñahñi cumañi si.

³ I casi ra Ndyoo sii, ta i saha ra tyiño sii. Yucuan cuenda catyí sihin tandíhi ndo vatyí ma caca iñi ndo vatyí sito xaan ndo. Zoco caca iñi ndo minoo cuhva vaha sihin minoo sa siñi tuñi vaha cuhva saha ra Ndyoo sa zatyíño ndo tyiño ra. Sii sa minoo minoo ndo saha ra sa zñin zñin cuhva zatyíño ndo tyiño ra. Iyo ndo cuu zavaha ndo tyiño ra minoo cuhva. Ta iyo ndo zavaha ndo sii si inga cuhva.

⁴ Tañi minoo coño ñuhu yo, cuaha xaan nu ndyaa tahan si, zoco zñin zñin cuhva zatyíño si. Ta ña inuu ñi tyiño zavaha sa minoo minoo si vazu minoo ñi coño ñuhu cuu si.

⁵ Ta tacuan tucu maa yo, cuaha ñiyivi cuu yo, zoco sa tandíhi yo ta iñin ñi cuu yo sihin ra Cristo. Ta sa ndu-ñin yo sihin minoo ta inga.

⁶ Saha maa ra Ndyoo ndatu sii sa minoo minoo yo sa zatyíño yo tyiño ra zñin zñin cuhva. Yucuan cuenda nazatyíño yo sihin cuhva sa saha maa ra sii yo. Tatu saha maa ra Ndyoo cuhva sii minoo yo ta cuu cahan yo tuhun saha ra Ndyoo sii yo, nacahan yo sihin sa ñi iñi yo. Yucuan cuu sa cuu profecía.

⁷ Ta tatu inga yo cuu tyindyee yo sii inga hermano, natyindyee vaha yo. A ra zacuaha, nazacuaha vaha ra.

⁸ A ra cuu cuhva minoo tuhun vaha sii inga ñiyivi, nacuhva vaha ra tuhun sii ñu. A ra saha xuhun, nacuhva ra cuaha. A ra ndyaca ñaha sii inga hermano, nacundyaca ñaha vaha ra. Ta ra cundahvi iñi sii inga ñiyivi, natyindyee ra sii ñu sihin sa zñi cuñi ra.

Cuhva cuñi si zavaha yo tatu cuenda ra Cristo cuu yo

⁹ Cuhva cuñi ndo sii inga ñiyivi, nacuu si minoo sa ndisa cuii, ta ma zandavi ñaha ndo. Cuñi si vatyí zaña ndo tandíhi cuii sa ña vaha, ta zavaha xaan ndo sa vaha.

¹⁰ Cuñi ndo sii minoo ndo ta sii inga ndo tañi yañi ndo. Ta tyaa ndo yahvi tandíhi tuhun sa cahan tandíhi hermano.

¹¹ Ma cuzusa ndo. Zatyíño xaan ndo tyiño ra Ndyoo.

¹² Cuzíi íñi ndo vatyí sito ndo vatyí cua cundyaa ndo sihin ra Ndyoo ityi nuu ca. Cundyee íñi ndo tatu ndyehe ndo tundoho, ta cahan ndo sihin ra Ndyoo tandíhi cuii cuhva.

¹³ Tyindyee ndo sii inga ra yañi yo ñaa sa cumañi sii ra, ta tíin cuenda vaha ndo sii ñiyivi saa vehe ndo.

¹⁴ Caca tahvi ndo sii Ndyoo sa cuenda ñiyivi sahñi tahan sihin ndo. Cahan vaha ndo sihin ñu, ta ma cahan ndo ndya vaha ñi sii ñu.

¹⁵ Cuzíi íñi ndo sihin ñiyivi zii cuñi, ta vacu ndo sihin ñiyivi cuihya íñi vatyí tacuan ta cua ndu-íin ndo.

¹⁶ Ta nacco sa taxi ñi sihin minoo ndo ta sihin inga ndo. Ma zacahnu ndo sii ndo, ta ma caca íñi ndo vatyí ñiñi xaan ndo. Coó vaha ndo sihin ñiyivi ndahvi vazu ñahñi sa iyo sii ra. Ta ma caca íñi ndo vatyí sito xaan ndo.

¹⁷ Tatu zavaha ñiyivi sa ña vaha sihin ndo, ma zavaha tucu maa ndo sa ña vaha sihin ñu. Zavaha ndo tandíhi sa cuu sa vaha sa ndisa, ta cuhva cuan yoñi cuu tyaa cuatyí sata ndo.

¹⁸ Nducu ndo cuhva coo sa taxi ñi sii ndo sihin tandíhi cuii ñiyivi tatu cuu.

¹⁹ Cuñi xein sii ndo, ndoho yañi xaa. Tatu zavaha ñiyivi sa ña vaha sihin ndo ma zavaha tucu ndo sa ña vaha sihin ñu. Nacuxaan maa ra Ndyoo sihin ñu tañi catyi si nuu tutu ra: “Yuhvi cui ra cua tasi tuñi sii ñu. Yuhvi cua tyiyahvi”, catyi ra Ndyoo.

²⁰ Zoco tatu sizoco minoo ra cuxaan sii ndo, cuhva ndo sa casi ra. Tatu ityi ra, cuhva ndo ndutya coho ra vatyí tacuan ta cua cucahan nuu ra ta cua ndundahvi cuñi ra vatyí zavaha ra sa ña vaha sihin ndo.

²¹ Ma zavaha tucu maa ndo sa ña vaha vatyí zavaha ñiyivi sa ña vaha sihin ndo coto cundyaca ñaha sa ña vaha cuan sii ndo. Maa ndo zavaha ndo sa vaha, ta cua zahacanaa ndo sii sa ña vaha cuan.

13

¹ Natyaa tandíhi ñiyivi yahvi sii ra cu tyiño vatyí maa ra Ndyoo cuu ra saha tyiño sii ra, ta yucuan cuenda ndyizo ra tyiño.

² Tatu ma tyaa minoo ñiyivi yahvi sii ra cu tyiño, ña tyaa ra yahvi sii Ndyoo. Ta cua tasi tuñi ra Ndyoo ta ra cu tyiño sii ra cuan.

³ Ña zayuhu ra cu tyiño sii ñiyivi zavaha sa vaha. Zayuhu ra sii ñiyivi zavaha sa ña vaha. Tatu yuhu ndo sii ra cu tyiño, cuñi si sa zavaha ndo sa vaha. Ta cua catyi ra vatyí vaha ñiyivi cuu ndo.

⁴ Zatyíño ra cu tyiño sa cuenda ra Ndyoo, ta tacuan ta cuu coo vaha ndo. Zoco tatu cua zavaha ndo sa ña vaha cua yuhu ndo vatyí ndisa cuii cua tasi tuñi ra sii ndo. Zatyíño ra sa cuenda ra Ndyoo, ta yucuan cuenda cua tasi tuñi ra sii ñiyivi zavaha sa ña vaha.

⁵ Yucuan cuenda cuñi si sa tyaa ndo yahvi sii ra sa xihna ñi vatyí yuhu ndo sii ra Ndyoo ta sa cu uu vatyí cuhva cuan catyi sa siñi tuñi vaha sii ndo.

⁶ Tyiyahvi tucu ndo xuhun tatu catyi ra, vatyí zatyíño ra cu tyiño sa cuenda ra Ndyoo. Yucuan cuu tyiño ra.

⁷ Tyiyahvi ndo sii tandíhi ra, tandíhi sa tahan si sii ra. Tyiyahvi ndo xuhun sa cuenda zicuela. Tyiyahvi ndo xuhun ñuhu sii ra zatyiyahvi sii ndo. Tyaa ndo yahvi sii ra tahan si tyaa ndo yahvi. Ta zacahnu ndo sii ra sa tahan si zacahnu ndo.

⁸ Ma cutavi ndo sii numinoo ñiyivi, zoco cuñi ndo sii minoo ndo ta sii inga ndo. Yoo ra cuñi sii inga ñiyivi sa ndisa cuii, sa zavaha ra tandíhi sa catyi tuhun i saha ra Ndyoo sii ra Moisés.

⁹ Vatyí ihya cuu cuhva catyí Tuhun Ndyoo: “Ma cuzu ndo sihin minoo ñaha tatu yívi ñazíhi ndo cuu. Ma cahñi ndo ñiyívi. Ma zuhu ndo. Ma ndyíyo íni ndo sa sii inga ñiyívi.” Tatu tyaa ndo yahví sa ndisa cuii sii tuhun sa catyí vatyí cuñi ndo sii inga ñiyívi inuu ñi tañi cuñi ndo sii maa ndo, tatu ndisa cuii tyaa ndo yahví sii si cuan, sa tyaa ndo yahví sii tandíhi cuii tuhun i saha ra Ndyoo.

¹⁰ Tatu cuñun sii inga ñiyívi ñahñi sa ndya vaha ñi cua zavohon sihin ñu. Sihin sa cuñi yo sii ñu sa ndisa cuii ta sa zavaha yo tandíhi sa catyí tuhun i saha ra Ndyoo.

¹¹ Ta inga tucu tuhun catyí sihin ndo vatyí ma naa íni ndo ñaa cuhva cuu si vityí. Sa tahan si cuhva ndoyo ndo vatyí sa cuyatyí xaan ca quívi cua cacu yo vityí ta ziquí quívi i quisaha sino íni yo.

¹² Sa cuñi ndíhi quívi zavaha ñiyívi sa ña vaha, ta sa cua saa quívi cuzíi íni yo sihin ra Ndyoo. Nazaña yo sa ña vaha sa zavaha yo, ta nazavaha yo tandíhi sa vaha tañi zavaha ñiyívi nu ndisi.

¹³ Nazavaha yo sa vaha sa ndisa tañi zavaha ñiyívi ora. Ma zacahnu xaan yo vico ta coho yo ndixi. Ma zavaha yo sa quiñi sihin yoo ñi maa ñaha. Ta ma nducu yo tizíhi, ta ma ndyíyo íni yo sa sii inga ñiyívi.

¹⁴ Zavaha ndo cuhva i zavaha ra Jesucristo, ra ndyaca ñaha sii yo. Ta ma nducu ndo cuhva zavaha ndo ñaa ñi sa ndisi xiñi maa ndo, tandíhi sa ña vaha.

14

Ma cahan cuehe ndo sii minoo hermano

¹ Tiin cuenda vaha ndo sii tandíhi hermano vazu iyo ra ta sino vaha ca íni ra. Zoco ma natuhun xaan ndo sihin ra sa cuenda cuhva sica íni ra tatu yívi sa ñiñi xaan cuu si.

² Vatyí iyo ra ñi xaan íni ra, ta catyí ra vatyí cuu casi ra tandíhi. Zoco inga ra, tañaha ca sino vaha íni ra, ta sasi ra maa maa yucu ñi.

³ Ra sasi tandíhi, ña vaha cua catyí ra vatyí ñahñi maa sa sito inga ra sa ma casi cuan. Ta ra sa ma casi cuan, ña vaha cua catyí maa ra vatyí ña vaha ra sa tuhva sasi tandíhi vatyí zuun ñi maa ra Ndyoo i tiin cuenda sii ra cuan.

⁴ Ñahñi cuhva iyo suun sa catyun vatyí ña vaha cuhva zavaha inga ra. Maa ra Ndyoo cuu ra ndyaca ñaha sii ra cuan, ta cua catyí maa ra tatu vaha a ña vaha sa zavaha muzu ra. Ta cua tyindyee ra Ndyoo sii ra, ta cua cuu zavaha ra sa vaha.

⁵ Iyo yo sica íni yo vatyí ñiñi ca minoo quívi ta ziquí inga. Ta inga yo sica íni yo vatyí inuu ñi cuu tandíhi quívi. Nacaca íni minoo minoo yo cuhva cuñi yo, ta ma ndu-uu íni yo.

⁶ Ra zacahnu minoo quívi, zacahnu ra sii si sa cuenda ra Ndyoo. Ta ra tuhva sasi tandíhi, zavaha ra tacuan sa cuenda ra Ndyoo vatyí saha ra tyahví ndyoo sii ra. Ta ra sa ma casi tandíhi, sa cuenda ra Ndyoo ta ma casi ra vatyí sica íni ra vatyí ña vaha, ta saha ra tyahví ndyoo sii ra Ndyoo.

⁷ Yoñi yo ta ndito yo vatyí cuñi yo. Ta yoñi yo cuu quívi cuñi maa yo.

⁸ Tatu ndito yo, ndito yo sa cuenda maa ra Jesús. A tatu cuu yo, cua cuu yo vatyí maa ra catyí, vatyí maa ra ndyaca ñaha sii yo. Vazu ndito yo a vazu cuu yo, zoco cuenda ra Jesús iyo yo

⁹ vatyí yucuan cuenda i sihi ra Cristo, ta i nandoto tucu ra vatyí cua cuu ra ra ndyaca ñaha sii ñiyívi sa sihi ta sii ñiyívi ndito.

¹⁰ Ta yoho ¿ña cuenda catyun vatyí ña vaha cuhva zavaha inga hermano? Ña vaha cua catyí ndo vatyí ña vaha ra vatyí maa ra Ndyoo cuu ra cua tasi tuñi sii sa minoo minoo yo.

¹¹ Vatyí catyí Tuhun ra Ndyoo:

Sa ndisa cuii cuu si vatyí ndite.

Ta zuun ñi sa ndisa cuu si vatyí cua cuiñi siti tandíhi cuii ñiyívi nui.

Ta cua zacahnu tandíhi ñu sii sihin yuhu ñu.

¹² Tacuan ta tandíhi yo cua catyí yo sihin ra tandíhi sa i zavaha yo.

Ma zandoyo ñuhu ndo sii inga hermano

¹³ Yucuan cuenda ma catyi ca yo vatyi ña vaha sa zavaha inga hermano ñaa ñi maa cuhva sa ndyico ra. Zoco nananducu yo cuhva ta ñahñi cua zavaha maa yo sa cua zandoyo ñuhu si sii minoo yañi yo.

¹⁴ Iyo minoo cuhva i zañaha ra Jesús sii, ta yucuan cuenda site vatyi ñahñi sa ma cuu casi yo. Zoco tatu iyo minoo hermano ta sica iñi ra vatyi iyo minoo sa ma cuu casi yo tatu tyaa yo yahvi sii ra Ndyoo, sa cuenda maa ra cuan ta ña vaha tatu casi ra.

¹⁵ Vatyi tatu sa cuenda sa tuhva yo sasi ta zativi yo sii minoo hermano, ña iyo ca yo cuhva cuñi ra Ndyoo cuhva cuan. Ta ña cuñi yo sii yañi yo tatu zavaha yo minoo cuhva ta sica iñi ra vatyi ña vaha si ta cuu zativi si sii ra.

¹⁶ Vazu yivi cuatyí cuu minoo cuhva sa zavaha yo, zoco tatu cahan ñiyivi sa cuenda si, vaha ca ma zavaha yo sii si.

¹⁷ Vatyi tatu ndyaca ñaha ra Ndyoo sii yo, ña ñiñi xaan ñaa sa casi yo a ma casi yo a sa coho yo a sa ma coho yo. Zoco ñiñi xaan cuu yo ñiyivi vaha xaan ta coo sa taxi sii yo sihin ra Ndyoo ta sihin ñiyivi ta coo sa zii sii yo sa cuenda Tatyí Ii sa iyo sihin yo.

¹⁸ Tatu tacuan iyo yo ta zatyíño yo sa cuenda ra Cristo, zii cua cuñi ra Ndyoo ndyehe ra sii yo ta zii cua cuñi tucu ñiyivi.

¹⁹ Yucuan cuenda nanducu yo cuhva coo sa taxi sii yo sihin ñiyivi tandihi saha, ta natyindyee yo sii tahan yo, ta ziqui cua cuu ca zacuu tandihi yo cuhva cuñi ra Ndyoo.

²⁰ Ma zativi ndo tyiño ra Ndyoo sa cuenda sa sasi ndo. Ndisa vatyi ñahñi sa ica, ta cuu casi yo tandihi, zoco ña vaha tatu casi yo tatu cua zandoyo ñuhu si sii minoo hermano.

²¹ Vaha ca sa ma casi yo coño ta ma coho yo ndixi ta ma zavaha yo ñaa ca sa cuu si tatu zandoyo ñuhu si sii minoo yañi yo ta ma sino vaha ca iñi ra.

²² Tatu sica iñun vatyi cuu casun tandihi, vaha. Zoco ma cohon tuhun cuan sihin inga hermano sa sica iñi inga cuhva. Cohon maa ñi sihin ra Ndyoo sa cuenda si. Zii xaan cua cuñi yo tatu sito yo vatyi ñahñi sa ña vaha zavaha yo.

²³ Zoco tatu ndu-uu iñi yo ta ña sito yo tatu vaha a ña vaha tatu casi yo, zativi si sii yo sa tacuan vatyi ña ñi iñi yo ta sasi yo. Ta ñaa ñi maa sa zavaha yo ta ña sito yo tatu vaha a ña vaha si, cuatyí cuu si.

15

Nazavaha yo ñaa sa cua tahan iñi inga hermano

¹ Maa yo sa sino vaha iñi, cuñi si sa cundyee iñi yo sihin inga hermano tatu tañaha ca sino vaha iñi ra. Ta ma zavaha yo maa ñi cuhva cuñi maa yo.

² Nanducu yo cuhva zavaha yo sa cua tahan iñi inga hermano, ñaa sa cua tyindyee sii ra ta cuu ra ñiyivi vaha ta sino vaha iñi ra sii ra Ndyoo.

³ Vatyi ndya ra Cristo, ta ñá zavaha ra sa cuñi maa ra. I zavaha ra cuhva cuñi ra Ndyoo. Ta i ndyehe xaan ra tundoho tañi catyi si nuu tutu ra Ndyoo: “Cahan ñiyivi ndya vaha ñi suun, ta tañi sii mi cahan ñu cuu si”, catyi si.

⁴ Ta tandihi sa i tyaa ra tyaa Tuhun Ndyoo ta sa naha, i sicundyaa si vatyi cua zacuahha si sii yo ta cua sino xaan iñi yo ta coo tundyee iñi sii yo. Ta zii cua cuñi yo vatyi cua cahvi yo sii si ta coto yo vatyi cua cuhva ra Ndyoo sa vaha sii yo sa ndisa.

⁵ Saha maa ra Ndyoo tundyee iñi sii yo ta minoo cuhva sa ma nducuihya xaan iñi yo. Sino iñi tandihi ndo vatyi ra Jesús cuu ra ndyaca ñaha sii ndo, yucuan cuenda nacuhva maa ra Ndyoo cuhva sii ndo sa coo sa taxi sihin minoo ndo ta inga ndo, ta cua ndu-ñin ndo sa ndisa cuii.

⁶ Vatyi tacuan ta ñin ñi cuhva cua caca iñi ndo, ta ñin ñi tañi minoo ñi nduzu cua zacahnu ndo sii ra Ndyoo Zutu ra Cristo Jesús, ra ndyaca ñaha sii yo.

Cua cuiñi ñiyivi sa yivi ñiyivi hebreo cuu Tuhun Ndyoo

⁷ Tiin cuenda vaha ndo sii minoo ndo ta sii inga ndo tañi i tiin cuenda ra Cristo sii ndo vatyi cuhva cuan zacahnu si sii ra Ndyoo.

⁸ Ta catyi sihin ndo vaty ra Cristo cuu ra tyindyee sii ñiyivi hebreo, ta cuhva cuan zañaha ra vaty ndisa cuii maa ra Ndyoo vaty ra Cristo cuu ra i catyi ra Ndyoo sihin ñiyivi sahnú sii yo vaty cua quisi ra.

⁹ (Ta i quisi tyindyee tucu ra Cristo sii ñiyivi sa yivi ñiyivi hebreo cuu), ta tacuan ta cuu zacahnu tucu ñu cuan sii ra Ndyoo vaty i cundahvi iñi ra sii ñu tañi catyi si nuu tutu ra: Yucuan cuenda cua zacahni suun nu iyo inga ñiyivi.

Cua cate yaa, ta zacahni zivun.

Caty si.

¹⁰ Ta inga tucu saha catyi ra:

Cuzii iñi ndo, ndoho sa yivi ñiyivi hebreo cuu.

Cuzii iñi ndo iin ñi sihin ñiyivi ra Ndyoo.

¹¹ Ta iyo inga nu catyi si tyehen:

Zacahnu ndo sii ra ndyaca ñaha sii yo, ndoho sa yivi ñiyivi hebreo cuu.

Ta nazacahnu tandihi ñiyivi sii ra.

¹² Ta iyo tucu nu cahan ra Isaías ta catyi ra:

Cua cacu minoo ñiyivi ra Isaí.

Cua quisi ra vaty cua cundyaca ñaha ra sii ñiyivi sa yivi ñiyivi hebreo cuu.

Ta sa cuenda maa ra ta cua coo cuhva cacu ñu.

¹³ Tyindyee maa ra Ndyoo sii yo, ta sito yo vaty sa ndisa cua cuhva ra sa vaha sii yo. Sihin cuhva saha maa Taty li sii ndo ta cua sino xaan iñi ndo sii ra. Ta vityi sa cuenda sa sino iñi ndo sii ra ta zii xaan cua cuñi ndo, ta cua coo sa taxi sii ndo sihin ra.

¹⁴ Ta sito vehi sa cuenda maa ndo hermanos vaty vaha xaan ndo, ta sito ndo cuaha xaan, ta cuu cuhva ndo minoo sa siñi tuñi vaha sii minoo ndo ta sii inga ndo.

¹⁵ Zoco vazu sa site cuhva cuan zoco zuun ñi i tyei zuhva tuhun ya, ta ñihi xaan i quehin sihin ndo, ta zanaohin iñi ndo inga saha zuun ñi cuhva sa i nacaty sihin ndo. Vaty maa ra Ndyoo i saha tyiño sii, sa zatyíne tyiño maa ra.

¹⁶ Ta i ndui minoo ra zatyíño sa cuenda ra Jesucristo nu iyo ñiyivi sa yivi ñiyivi hebreo cuu. Nacaty xein Tuhun ra Ndyoo vaty zacahnu si sii ra cuhva cuan. Ta cua sino iñi ñu cuan, ta cua cuu cuhve sii ñu sii ra Ndyoo. Ta cua tñin cuenda ra sii ñu vaty sa zanduvaha Taty li sii ñu.

¹⁷ Tyindyee xaan ra Cristo Jesús sii, ta yucuan cuenda cuu catyi vaty vaha xaan cuu tyiño i zavehi sa cuenda ra Ndyoo.

¹⁸ Ma cuu catyi inga cuhva vaty maa ra Cristo i sityiño sii, ta sa cuenda maa ra ta ñihi cuhva ta i sino iñi ñiyivi sa yivi ñiyivi hebreo cuu. I siñi ñu tuhun quehin, ta i ndyehe ñu cuhva zavehi

¹⁹ vaty i zavehi sa ndyityi ta cuaha xaan cuhva sihin tundyee iñi sa saha maa Taty li maa ra. Ta ndya cuhva ndya ñuu Jerusalén ta ndya ñuu Ilírico i zacoto vehi tandihi Tuhun Vaha sa cuenda ra Cristo.

²⁰ Ta i nducu xein cuhva zacote Tuhun Vaha nu ña sito ñiyivi sii ra Cristo vaty ña cuñi zatyíne nu i quisaha inga ra sa xihna ñi.

²¹ Vaty catyi si nuu tutu ra Ndyoo:

Cua coto ñiyivi, ñu tañaha ca coto, sa cuenda ra.

Ta ñiyivi tañaha ca cuiñi, cua cutuñi iñi ñu, catyi si.

Cuñi ra Pablo cuhun ra ñuu Roma

²² Yucuan cuenda ñá cuu quisi nu yucu ndo.

²³ Zoco vityi sa ndihi zatyíne ityi ya, ta cuñi xein quisi ndyehi sii ndo. Sa cuaha cuiya cuñi quisi nu yucu ndo.

²⁴ Yucuan cuenda sica iñi vaty cua ndyehi sii ndo quivi cua cuhin ñuu España. Cua ndoi sihin ndo zuhva quivi, ta ziqui cua cuu tyindyee ndo sii zuhva, ta cua cuu cuhin ityi nuu ca.

²⁵ Zoco vityi cuahan xihne ñuu Jerusalén vaty cua tyindyeyi sii ñiyivi sino iñi Tuhun Ndyoo yucuan.

²⁶ Vaty i saha maa ñiyivi ñuu Macedonia ta ñuu Acaya xuhun sa tyindyee sii ñu ndahvi sino iñi sii ra Jesús ñuu Jerusalén.

²⁷ Vaha xaan sa cuñi ñu tyindyee ñu, ta cuhva cuan cuñi si, vaty sa xihna ñi i tyindyee ñiyivi hebreo sii ñu cuan sihin sa zacoto maa ra Ndyoo sii ñu, ta i sito ñu yozo caa iyo ra Ndyoo.

²⁸ Yucuan cuenda xihna ca cundyaque xuhun sa tyindyee ñiyivi sii ñu ñuu Jerusalén. Ta ziqui cua yehi nu yucu ndo ityi cuhin ñuu España.

²⁹ Ta sa site vaty cua cuhva xaan ra Cristo sa vaha sii ta sii maa ndo quivi cua sei nu yucu ndo.

³⁰ Cuñi xaan ndo sii ra Jesucristo, ndoho yañi xaa. Ta saha xaan Taty i cuhva sii ndo sa cuñi ndo sii inga ñiyivi sino iñi. Yucuan cuenda vityi zañiñi sii ndo vaty cahan xaan ndo sihin ra Ndyoo sa cuenda mi.

³¹ Caca ndo sii ra vaty cua zacacu ra sii, sii ñiyivi ña tyaa yahvi sii ra ityi Judea. Ta caca ndo sii ra vaty cua cuzii iñi ñiyivi ñuu Jerusalén sihin sa cua cuhve sii ñu.

³² Ta caca ndo sii ra Ndyoo vaty cua cuu quisi sihin sa zii cuñi nu ndyaa ndo tatu tacuan cuñi maa ra Ndyoo. Ta caca ndo sii ra vaty cua cuu quitati zuhva nu ndyaa ndo ta cua coo ca tundyee iñi sii sa cuenda Tuhun Ndyoo ta sa cuenda coño ñuhi.

³³ Ta vityi, Ndyoo cua ndoo xaan sihin ndo. Ta nacuhva xaan ra sa coo sa taxi sii ndo sihin ra ta sa coo vaha ndo tandihi cuhva. Ta nacuu si tacuan.

16

Zacuhun ra Pablo minoo nacumi sii amigo ra

¹ Zacote sii ndo sa cuenda ña hermana Febe ya. Tyindyee xaan ña sii ñiyivi sino iñi Tuhun Ndyoo ñuu Cencrea.

² Ta catyi sihin ndo vaty tiin cuenda vaha ndo sii ña vaty iin ñi cuu ña sihin ndo sa cuenda ra Cristo, ra ndyaca ñaha sii yo. Tiin cuenda vaha ndo sii ña minoo cuhva vaha tañi tahan si zavaha ñiyivi ra Ndyoo. Ta tyindyee ndo sii ña ñaa sa cumañi sii ña vaty i tyindyee maa ña sii cuaha xaan ñiyivi. Ta sii tucu mi i tyindyee ña, ndihi ca.

³ Cuhva ndo minoo nacumi sii ña Priscila ta ra Aquila. Iñ ñi zatyño ñu tyiño ra Cristo sihin.

⁴ Sa yaty cuu ñu minoo saha nu i zacacu ñu sii. Saha xein tyahvi ndyoo sii ñu, ta tacuan tucu zavaha tandihi ñiyivi sino iñi. Ñiyivi sa yivi ñiyivi hebreo cuu, saha xaan ñu tyahvi ndyoo sii ñu.

⁵ Sa cuenda mi cuhva tucu ndo minoo nacumi sii ñiyivi sino iñi tuhun vaha, ñu titahan vehe ña Priscila. Ta sii ra sa nañi Epeneto. Ñoho xaan iñi sii ra. Maa ra cuu ra sino iñi sii ra Cristo sa xihna ñi ityi Asia.

⁶ Cuhva ndo minoo nacumi sii ña María. I zatyño xaan ña sa cuenda ndo.

⁷ Cuhva ndo minoo nacumi sii ra Andrónico ta ra Junias. Iñ ñi ñuu ra sihin ñuu mi. Ta i siñoho tucu ra vehe caa sihin. Ta xihna ca nduu tahan maa ra i sino iñi ta ziqui mi. I zacuhun ra Jesucristo sii nduu tahan ra sihin tyiño ra. Ta tyaa xaan ñiyivi yahvi sii ra.

⁸ Cuhva ndo minoo nacumi sii ra Amplias. Ñoho xaan iñi sii ra sa cuenda ra Cristo.

⁹ Cuhva ndo minoo nacumi sii ra Estaquis. Ñoho xaan iñi sii ra. Ta tacuan tucu ra Urbano. I zatyño xaan ra sihin ndi sa cuenda ra Cristo.

¹⁰ Cuhva ndo minoo nacumi sii ra Apeles. Sino xaan iñi ra sii ra Cristo vazu ndyehe ra tundoho. Cuhva ndo minoo nacumi sii ñiyivi ra Aristóbulo.

¹¹ Cuhva ndo minoo nacumi sii ra Herodión. Iñ ñi ñuu ndi. Cuhva ndo minoo nacumi sii ñiyivi sino iñi vehe ra Narciso.

¹² Cuhva ndo minoo nacumi sii ña Trifena ta ña Trifosa. Zatyño ñu tyiño ra Cristo, ra ndyaca ñaha sii yo. Ta cuhva ndo minoo nacumi sii ña Pérsida, ña cuhva yo. Ñihi xaan i zatyño ña tyiño ra Ndyoo.

¹³ Cuhva ndo minoo nacumi sii ra Rufo ta sii zihí ra. Vaha xaan sino iñi ra sii ra Jesús. Ta zihí ra cuu tañi zihí mi.

¹⁴ Cuhva ndo minoo nacumi sii ra Asíncrito, ra Flegonte, ra Hermas, ra Patrobas, ra Hermes, ta inga ra yañi yo sa yucu sihin ra.

¹⁵ Cuhva ndo minoo nacumi sii ra Filólogo ta sii ña Julia ta sii ra Nereo sihin cuhva ra ta sii ra Olimpas ta sii tandihi inga ñiyivi sino iñi sa yucu sihin ñu.

¹⁶ Cuhva xaan ndo ndyoo nacucumi sii minoo ndo ta sii inga ndo. Tandihi ñiyivi cuenda ra Cristo zaquisi ñu minoo nacumi sii ndo.

¹⁷ Vityi zañiñi sii ndo yañi xaa vatyi zaha vaha ndo cuenda yoo cuu ñiyivi zacahñi tahan sii ñiyivi sino iñi. Zativi ñu cuhva sino iñi ñiyivi sihin minoo cuhva ña tuhva maa ndo zavaha. Ma cutahan ndo sihin ñu zavaha tacuan, ta ma zavaha ndo cuhva catyi ñu

¹⁸ vatyi ñu zavaha tacuan, ña zatyíño ñu tyiño ra Cristo ra ndyaca ñaha sii yo. Zatyíño ñu cuhva cuñi maa ñu. Vaha xaan ta vii xaan cahan ñu, ta zandavi ñaha ñu sii ñiyivi ña sito vaha.

¹⁹ Sito tandihi ñiyivi vatyi tyaa xaan ndo yahvi Tuhun Ndyoo. Yucuan cuenda zii xaan cuñi sihin ndo, zoco cuñi sa cua zacuenda vaha ndo sii ndo ta zavaha ndo maa ñi sa vaha. Ta ma cutuhva ndo zavaha ndo sa ña vaha.

²⁰ Ra Ndyoo cuu ra saha sa coo sa taxi sii ndo, ta ña naha ca ta cua zandihi ra sa ña vaha nu yucu ndo. Cua cuhva ra sa cuañi ndo ziqui cuihna. Ta vityi nacoo xaan sa vaha sa saha maa ra Jesucristo sii ndo. Maa ra ndyaca ñaha sii yo.

²¹ Zaquisi ra Timoteo minoo nacumi sii ndo. Zatyíño ra sihin. Ta ra Lucio ta ra Jasón ta ra Sosípater zaquisi tucu ra minoo nacumi sii ndo. Ìn ñi ñuu tandihi ra sihin ñuu mi.

²² Yuhvi ra Tercio tyei carta ya, ta zaquisi minoo nacumi sii ndo sa cuenda ra ndyaca ñaha sii yo.

²³ Zaquisi maa ra Gayo minoo nacumi sii ndo. Saha noo ra vehe ra sii, ta ndu-ín tucu tandihi ñu sino iñi ihya. Zaquisi ra Erasto minoo nacumi sii ndo sihin ra Cuarto yañi yo. Ra Erasto cuu ra cumi xuhun ñuu ya.

²⁴ Cuñi vatyi cua cuhva xaan ra Jesucristo, ra ndyaca ñaha sii yo, sa vaha sii tandihi ndo. Ta nacuu si tacuan.

Zacahnu ra sii ra Ndyoo nu ndihi tyaa ra carta ya

²⁵ Zacahnu ndo sii ra Ndyoo vatyi maa ra cuu ra cua cuhva tundyee iñi sii ndo, ta ma ndoyo ñuhu ndo sihin tuhun vaha sa i zacote sii ndo sa cuenda ra Jesucristo. Ta i zacoto ra Ndyoo sii ndo tuhun vaha cuhva iyo ra. Ta sa naha ñá sito ñiyivi tuhun sa cuenda ra Cristo, zoco vityi sito ñu.

²⁶ Vityi sito ñu tuhun sa cuenda ra Cristo. Saha ra Ndyoo tyiño sa cua coto tandihi ñiyivi ñuu ñiyivi, ta cua cutuñi iñi ñu sa i tyaa ra profeta ta sa naha. Maa ra Ndyoo tava tyiño ya, ta ndito ra tandihi cui tyiemvu. Ta vityi sa cuenda sa sito ñiyivi, ta cuu sino iñi tandihi ñu, ta cuu tyaa ñu yahvi sii ra.

²⁷ Maa ñi maa ra cuu Ndyoo. Maa ñi maa ra cuu ra iyo sa siñi tuñi sa ndisa. Nazacahnu yo sii ra sa cuenda sa i zavaha ra Jesucristo. Nazacahnu yo sii ra tandihi cui tyiemvu. Ta nacuu si tacuan.

Sa Xihna Ñi Carta I Tyaa Ra San Pablo Sii Ñiyivi Sino Iñi Sii ra Ndyoo Ñuu Corinto

Tyaa ra Pablo minoo carta sii ñiyivi sino iñi sii ra Ndyoo ñuu Corinto

¹ Yuhvi ra Pablo i casi ra Ndyoo sii vatyí cui minoo ra cua zatyíño tyíño ra Jesucristo. Ta vityi tyei carta ya sihin ra Sóstenes hermano yo.

² Ta zacuhun ndí sii si sii maa ndo ra cuu vehe ñuhu ra Ndyoo ñuu Corinto. Ñiyivi ra Ndyoo cuu sii ndo vityi vatyí sa ndu-íin ndo sihin ra Cristo Jesús. I casi ra Ndyoo sii ndo vatyí cuu ndo ñiyivi vaha xaan tañi tandíhi ñiyivi sa zacahnu sii ra Jesucristo nacahnu ñuu ñiyivi. Ndyaca ñaha ra sii tandíhi yo sa cuu cuenda ra.

³ Sique sii ra Ndyoo Zutu yo ta sii ra Jesucristo ra ndyaca ñaha sii yo vatyí nacuhva xaan ra tumañi iñi sii ndo ta sa coo sa taxi añima ndo.

Cuhva i saha xaan ra Ndyoo sa vaha sii ñiyivi ra ñuu Corinto

⁴ Tandíhi cuhva saha xein tyahvi ndyoo sii ra Ndyoo sa cuenda tandíhi ndo vatyí i saha xaan maa ra tumañi iñi sii ndo sa cuenda ra Cristo Jesús.

⁵ Ta vityi i saha xaan ra cuhva sii ndo, ta cuu cahan ndo Tuhun ra, ta iyo xaan sa siñi tuñi sii ndo.

⁶ Tandíhi sa i catyi ndi sihin ndo sa cuenda ra Cristo, ta i cuu si cuhva cuan sa cuenda maa ndo.

⁷ Ta yucuan cuenda ñahñi sa cumañi sii ndo. Saha xaan maa ra Ndyoo tandíhi cuii ndatu sii ndo ñi ñi sa ndatu ndo quívi cua quisi tucu ra Jesucristo, ra ndyaca ñaha sii yo.

⁸ Ta cua tyindyee ra sii ndo sihin tandíhi cuii cuhva, ta ma ndoyo ñuhu ndo, ta yoñi cua cuu tyaa cuatyí sata ndo quívi cua quisi ra Jesucristo.

⁹ Zavaha ra Ndyoo cuhva catyi ra tandíhi saha. Ta maa ra cuu ra i casi sii ndo vatyí cu-íin ndo sihin ra Jesucristo zehe ra. Maa ra cuu ra ndyaca ñaha sii yo.

Ña vaha sa coo zíin zíin ityi yo

¹⁰ Ta vityi sihin zívi ra Jesucristo, ra ndyaca ñaha sii yo, sica xein sii ndo hermano vatyí íin ñi cuu ndo, ta ma coo zíin ndo. Íin ñi cuhva caca íñi ndo. Íin ñi cuhva naco sa siñi tuñi sii ndo.

¹¹ Tacuan catyi sihin ndo hermano vatyí sa i nacatyí ñiyivi ra Cloé sihin vatyí iyo tizíhi nu yucu ndo

¹² vatyí zíin zíin cahan ndo. Iyo ndo catyi ndo: “Yuhvi ndyique sii ra Pablo”, catyi ndo. Ta inga ndo catyi ndo: “Ta yuhvi ndyique sii ra Apolos.” Ta iyo ndo catyi ndo: “Ndyique sii ra Pedro.” Ta inga tucu ndo catyi ndo vatyí ndyico ndisa cuii ndo sii ra Cristo.

¹³ Ña vaha sa cahan ndo tacuan vatyí ma cuu sa coo zíin yo vatyí íin ñi coño ñuhu ra Cristo cuu yo tatu sino iñi yo sii ra. ¿Atu yuhvi ra Pablo i sihi nu cruz sa cuenda ndo? ¿Atu i sicoo ndutya ndo sihin zívi mi? Yívi.

¹⁴ Sehi tyahvi ndyoo sii ra Ndyoo vatyí ñá zacoo ndutye sii numinoo ndo, maa ñi ra Crispo sihin ra Gayo ta yoñi inga ra

¹⁵ coto catyi ndo vatyí i zacoo ndutye sii ndo sihin zívi mi ta cundyico ndo sii.

¹⁶ Aan, ndisa i zacoo ndutye sii ñiyivi ra Estéfanos, zoco sica iñi vatyí yoñi ca inga ra i zacoo ndutye.

¹⁷ Vatyí ñá zaquisi ra Cristo sii mi sa zacoo ndutye sii ñiyivi. I tava ra tyíño sii, vatyí nacatyí tuhun ra, cuhva zacacu ra sii yo. Zoco ña quehin sihin sa siñi tuñi sa iyo ñuu ñiyivi ya coto caca iñi ñiyivi vatyí tyaqui xaan cuhva quehin, ta ma nacañi vaha iñi ñu cuhva catyi si sa cuenda cuhva i sihi ra Cristo nu cruz sa cuenda cuatyí yo.

Sito yo vatyí vaha ca sa siñi tuñi sa iyo sii maa ra Ndyoo ta ziqui sa siñi tuñi sa iyo sii ñiyivi ñuu ñiyivi

¹⁸ Ñiyivi cua cunaa, sica iñi ñu vatyí sa tondo ñi cuu cuhva i sihi ra Jesús nu cruz sa cuenda cuatyí yo. Zoco sa cuenda maa yo, ra i zacacu ra Ndyoo, ta tundyee iñi cuu si vatyí sihin sa sino iñi yo sii si ta cacu yo.

¹⁹ Vatyí catyí Tuhun Ndyoo:

Sica iñi ñiyivi sa sito xaan, vatyí cuu ñihi ñu cuhva ta cacu ñu.

Zoco cua zanei tandíhi cuhva cuan, ta ma ñihi ñu cuhva cacu ñu sihin sa siñi tuñi maa ñu.

Tacuan catyí Tuhun Ndyoo.

²⁰ Ñahñi maa tyindyee si sa cuu yo ra sito xaan a ra maestro a ra sito natuhun ziquí tyiño sa iyo ñuu ñiyivi. Tandíhi sa sito xaan ñiyivi ñuu ñiyivi ya, ñahñi cuu si ityí nuu ra Ndyoo.

²¹ Casi xaan iñi ra Ndyoo, ta ña saha ra sa coto ñiyivi sii ra sihin sa siñi tuñi ñu. Zoco i zavaha ra inga cuhva, ta cuu coto ñiyivi sii ra ta cacu ñu tatu cuiñi ñu Tuhun ra ta sino iñi ñu sii si. Ta iyo ñiyivi sica iñi ñu vatyí sa tondo ñi cuu Tuhun Ndyoo.

²² Vatyí cuñi ñiyivi hebreo ndyehe ñu sa ndyityi. Ta ñu griego nanducu xaan ñu sa siñi tuñi, cuhva sica iñi ñu.

²³ Zoco maa yo nacatyí yo sihin ñiyivi cuhva i sihi ra Cristo nuu cruz. Cuxaan ñiyivi hebreo sihin cuhva cuan, ta sica iñi inga ñiyivi vatyí minoo sa tondo ñi cuu si.

²⁴ Zoco sa cuenda ñiyivi i casi ra Ndyoo, vazu ñiyivi hebreo a ñiyivi griego cuu ñu, zoco sito tandíhi ñu vatyí sa cuenda ra Cristo ta cuu zacacu ra Ndyoo sii yo. Ta yucuan cuu cuhva zañaha maa ra Ndyoo vatyí casi xaan ca iñi maa ra.

²⁵ Sica iñi ñiyivi vatyí i zavaha maa ra Ndyoo minoo sa tondo, zoco vaha xaan ca cuhva i zavaha maa ra Ndyoo ta ziquí sa zavaha ñiyivi. Ta iyo xaan ca tundyee iñi sii maa ra Ndyoo ta ziquí sii ñiyivi.

²⁶ Ndoho hermanos, zaha vaha ndo cuenda cuhva i casi maa ra Ndyoo sii yo vatyí ña cuaha yo cuu ra casi xaan iñi sihin sa siñi tuñi sa iyo ñuu ñiyivi ya. Ña cuaha yo cuu ra ñiñi ta ra cuca ñuu ñiyivi ya.

²⁷ Zoco i casi ra Ndyoo sii yo ta cua catyí inga ñiyivi vatyí tondo xaan iyo yo. Vatyí cua cuu si ticahan nuu sii ñiyivi sa sica iñi vatyí casi xaan iñi ñu. Ta i casi ra sii yo, ra ña ñiñi ta ña cuca, vatyí cua zaha yo ticahan nuu sii ñiyivi iyo xaan cuhva sii ihya ñuu ñiyivi.

²⁸ Ta i casi ra sii ñiyivi ndyíhi, ñiyivi sa ñahñi maa sa sito, ñiyivi sa ña cuu ndyehe ñiyivi sii. Tacuan i zavaha ra vatyí cua cutyiño ra sii yo, ta cua quindyaa ra sa tuhva inga ñiyivi, ñu cuu ñiyivi ñiñi vityi.

²⁹ Tacuan i zavaha ra Ndyoo, ta yoñi cua catyí vatyí ra cahnu xaan cuu ra ityí nuu ra Ndyoo.

³⁰ Zoco zuun ñi maa ra Ndyoo cuu ra sa zandu-ín sii maa ndo sihin ra Cristo Jesús. I saha maa ra Ndyoo vatyí cuu ra Jesús sa siñi tuñi vaha sii yo. Sihi ra Jesús, ta tyiyahvi ra sa cuenda tandíhi cuatyí yo. Sa cuenda ra Cristo, ta ñahñi ca cuatyí yo ityí nuu ra Ndyoo. I zanduvaha ra cuhva iyo yo.

³¹ Tacuan i zavaha ra Ndyoo, ta i cuu si cuhva catyí Tuhun Ndyoo: “Tatu iyo minoo ra cuñi ra catyí ra vatyí vaha xaan ra, ma cuu. In ñi sii maa ra Ndyoo zacahnu yo vatyí i zavaha maa ra tandíhi.”

2

Cuhva nacatyí ra Pablo cuhva i sihi ra Jesús nuu cruz

¹ Hermanos, quívi sa sehin nu yucu ndo ta nacatyí Tuhun Ndyoo sihin ndo. Ná cahan xeín tuhun nahnu, ta ná quehin sihin cuhva iyo sa siñi tuñi ihya ñuu ñiyivi.

² Ná quehin inga cuhva nu yucu ndo, maa ñi cuhva i sihi ra Cristo nuu cruz sa cuenda cuatyí maa yo vatyí maa ñi cuhva cuan cuu sa cuñi quehin sihin ndo.

³ Ta quívi i sei nu yucu ndo, i yuhu xeín quehin sihin ndo ndya cuhva nehi.

⁴ Ta ndoo xaan i nacatyí Tuhun Ndyoo sihin ndo. Ñá nazaque cuaha tuhun nahnu a tuhun tañi sa sito ra tuhva xaan cahan. Ñahñi. Zoco i ndyehe ndo vatyí i quehin sihin tundyee iñi sa iyo sii Tatyí li maa ra Ndyoo, ta sicoo xaan cuhva sihin tuhun quehin.

⁵ Tacuan i quehin vatyí cuñi sa cua sino iñi ndo sa cuenda cuhva sa iyo sii maa ra Ndyoo ta yívi sa vatyí tyaqui xaan quehin a vatyí i quehin sihin sa siñi tuñi sa iyo ñuu ñiyívi ya.

Sihin Tatyí li maa ra Ndyoo ta zañaha ra Ndyoo sii ra sii yo

⁶ Zoco cahan ndi sihin minoo cuhva vaha xaan sihin ñiyívi sa naha sino iñi. Zoco sa siñi tuñi sa cuenda maa ra Ndyoo cuu si ta yívi sa siñi tuñi sa iyo cuenda ñuu ñiyívi ya a sa cuenda sa iyo sii ra ndyaca ñaha ñuu ñiyívi ya vatyí cuee ca ta cua naa tyiño sii tandíhi ra.

⁷ Zoco cahan ndi sihin sa siñi tuñi sa saha maa ra Ndyoo. Nacatyí ndi cuhva i tyaa ra Ndyoo cuhva cumañi ca sino ñuu ñiyívi vatyí cua zanduu ra sii yo tañi maa ra. Xehe xaan i cuu tuhun ya ta sa naha, zoco vityí cuu coto yo sii si.

⁸ Yoñi numinoo ra ndyaca ñaha ñuu ñiyívi ya ta i cutuñi iñi ra tuhun ya vatyí tatu cutuñi iñi ra, ma cahñi ra sii ra ndyaca ñaha sii yo nuu cruz. Ta ra cahnu ca cuu ra ndyaca ñaha sii yo.

⁹ Catyí Tuhun Ndyoo:

Yoñi maa sa ndyehe a sa siñi a sa cutuñi iñi tandíhi sa vaha xaan sa zanduvaha ra Ndyoo sa cuenda ñiyívi cuñi xaan sii ra. Catyí si.

¹⁰ Zoco vityí sa cuenda Tatyí li maa ra Ndyoo ta saha ra Ndyoo sa coto yo vatyí zañaha Tatyí li maa ra tandíhi cuii sii yo ndya cuhva ndya sa xehe xaan ca ta tuhun sa tuhva xaan maa ra Ndyoo tyixehe.

¹¹ Ma cuu coto numinoo yo ñaa sa sica iñi inga yo. Zoco sito maa yo ñaa sa sica iñi yo. Ta zuun ñi cuhva cuan, sito Tatyí li maa ra Ndyoo tandíhi sa sica iñi maa ra Ndyoo.

¹² Ta saha maa ra Ndyoo Tatyí li ra sii yo vatyí cua zacoto ra sii yo tandíhi sa vaha xaan sa saha maa ra Ndyoo sii yo.

¹³ Ta nacatyí ndi cuhva zacuahá Tatyí li sii ndi ta yívi sihin sa siñi tuñi sa iyo ñuu ñiyívi ya. Nacatyí ndi tuhun sa saha maa ra Ndyoo sihin maa ndo sa iyo Tatyí Ndyoo sii.

¹⁴ Zoco ñiyívi ta ñihi ca Tatyí li ra Ndyoo, ña cuñi ñu cuiñi ñu cuhva nacatyí Tatyí Ndyoo. Tañi sa tondo cuu si cuñi ñu vatyí ña cutuñi iñi ñu sii si. Maa ñi ñiyívi sa iyo Tatyí Ndyoo sii, ta cuu cutuñi iñi ñu.

¹⁵ Zoco ra sa iyo Tatyí li ra Ndyoo, cutuñi iñi ra tandíhi. Zoco ñiyívi ndya vaha ñi ña cutuñi iñi ñu cuhva iyo maa ra cuan.

¹⁶ Catyí Tuhun Ndyoo: “Yoñi cuu cutuñi iñi ñaa sa sica iñi ra Ndyoo. Yoñi cuu zacuahá sii maa ra”, catyí si. Zoco sica iñi maa yo cuhva sica iñi ra Cristo.

3

Cuhva cuñi si sa zatyíño yo tyiño ra Ndyoo

¹ Zoco hermanos i quehin sihin ndo quívi cuan tañi sa lee cuu ndo vatyí tañi sa naca cacu ndo cuhva saa ya cuu si, ta tacuan iyo ndo ndya vityí. Vatyí cumañi nduvaha cuhva iyo ndo sa ndisa cuii. Ta ñá cuu quehin sihin ndo quívi cuan tañi ñiyívi sa zatyíño Tatyí li maa ra Ndyoo añaíma.

² Tañi sa tuhva yo cuhva zicui sii sa ndyíhi tatu ta cuu ca casi si. Tacuan i quehin sihin maa ndo sihin tuhun ña yí ñi. Tañi sa lee cuu ndo cuu si vatyí ta cuu ca casi vaha ndo. Siin xaan cuhva sino iñi ndo, ta tacuu ca cutuñi iñi ndo sa siñi tuñi sii maa ra Ndyoo.

³ Maa ñi ñiyívi ta sino vaha ca iñi cuu ndo ndya vityí, ta cuñi ndo cuu sii ndo tañi cuu sii inga ñiyívi, ta sañi tahan ndo sihin minoo ndo ta sihin inga ndo. Zavaha ndo cuhva zavaha ñiyívi sa cuu cuenda ñuu ñiyívi ya, ta ña zavaha ndo tañi ñiyívi cuenda ra Ndyoo.

⁴ Yucuan cuenda iyo ndo catyí ndo: “Yuhvi ndyique sii ra Pablo.” Ta inga ndo catyí ndo: “Yuhvi ndyique sii ra Apolos.” Catyí ndo. Ta sihin cuhva cuan zañaha ndo vatyí ta cuahnu ca ndo sihin Tuhun Ndyoo.

⁵ Zoco ¿yoo ra cuu yuhvi? ta ¿yoo ra cuu ra Apolos ta sahñi tahan ndo sa cuenda ndi? Maa ñi ra zacoto Tuhun Ndyoo sii ndo cuu nduhvi, ta i sino iñi ndo. Tahan tahan ndi i zavaha ndi cuhva i catyi maa ra Ndyoo sihin ndi.

⁶ Yuhvi i tasi siti sa cuu Tuhun Ndyoo. Ta ra Apolos i quisi cozo. Ta i zacuahnu maa ra Ndyoo tyiño cuan.

⁷ Yucuan cuenda ñahñi cuu ra tasi ta ra tyozo, zoco maa ra Ndyoo cuu ra ñiñi ca vatyi maa ra zacuahnu tyiño cuan.

⁸ Ñin ñi cuu si tatu tasi yo a tyozo yo, ta tahan tahan yo cua cuhva maa ra Ndyoo sa vaha sii yo cuhva tahan si sa cuenda tyiño yo.

⁹ Ñin ñi i zatyíño maa ndi sihin ra Ndyoo. Ta maa ndo cuu tañi minoo ñuhu nu zatyíño maa ra Ndyoo. A tañi minoo vehe zandaa ra cuu ndo.

¹⁰ I catyi maa ra Ndyoo vatyi yuhvi cua cui tañi minoo ra sa sito xaan zandaa vehe. Sa i saqui cimientó si, ta inga ra zandaa vehe nuu cimientó. Zoco ra cua zandaa vehe nuu cimientó cuan, cuñi si sa zacuenda ra cuhva zatyíño ra.

¹¹ Ta yoñi ra cuu caqui inga cimientó ta ziqui cimientó sa sa ndyaa vatyi ra Jesucristo cuu cimientó vehe cuan.

¹² Zoco cuu zandaa maa yo minoo vehe nuu cimientó cuan. Cuu cutyiño yo xuhun cuaan a xuhun cui si a yuu tyaqui. A cuu cutyiño yo yutu a itya a mihin.

¹³ Ta quivi quisi ra Cristo cua ndyehe ra tyiño zacuu minoo minoo yo. Cua zaquisi ra ñúhu, ta cua ndyehe ra tatu vaha tyiño yo a ña vaha si.

¹⁴ Tatu ma cayu tyiño yo sa zandaa yo nuu cimientó cuan, cua cuhva ra Ndyoo sa vaha sii yo.

¹⁵ Zoco tatu cayu tyiño i zacuu minoo yo, cua ndoyo ñuhu si, ta cunaa si, zoco ra cuan, cacu ra. Sa vatyi cui ca sa ma cacu ra tañi minoo ra quita si vehe sa cayu.

¹⁶ ¿Atu ña sito ndo vatyi sa tandihi maa ndo cuu vehe ñuhu ra Ndyoo ta ndyaa Tatyí li ra Ndyoo sihin ndo?

¹⁷ Tatu zatívi minoo ra vehe ñuhu ra Ndyoo, cua zanaa ra Ndyoo sii ra cuan vatyi ii xaan vehe ñuhu ra Ndyoo, ta maa ndo cuu vehe ñuhu ra.

¹⁸ Numinoo ndo ta ma zandavi ñaha ndo sii ndo. Tatu caca iñi ndo vatyi sito xaan ndo sihin sa siñi tuñi sa iyo ñuu ñiyívi ya, vaha ca zanduu ndo sii ndo tañi minoo ra sa ñahñi maa sito, ta cua cuhva ca maa ra Ndyoo sa siñi tuñi maa ra sii ndo.

¹⁹ Vatyi sa siñi tuñi sa iyo ñuu ñiyívi ya, ñahñi maa cuu si ityi nuu ra Ndyoo. Sa tondo ñi cuu si sa cuenda maa ra. Vatyi catyi Tuhun Ndyoo: “Sihin sa siñi tuñi sa iyo sii ñiyívi, ta cua zanduva ra Ndyoo sii ñu.”

²⁰ Ta inga tucu cuhva catyi Tuhun Ndyoo: “Sito ra Ndyoo cuhva sica iñi minoo ra casi xaan iñi vatyi ñahñi vale si.”

²¹ Yucuan cuenda yoñi ndo tyaa xaan ndo yahvi sii numinoo ñiyívi vatyi sa saha maa ra Ndyoo tandihi cui sa cuñi si sii ndo.

²² Saha maa ra Ndyoo sii yuhvi ra Pablo sii ndo, ta saha ra sii ra Apolos ta ra Pedro tucu vatyi tyindyee ndi sii ndo. Ta tandihi cui sa iyo ñuu ñiyívi saha ra sii ndo. Ta vazu ndito ndo a sa sihi ndo, zoco ndyaa ra sihin ndo. Ta tandihi sa iyo vityi ta sa cua coo ityi nuu ca, tandihi cui ñaa sa cuu si, ta cuu si cuenda maa ndo vatyi tyindyee si sii ndo.

²³ Ta maa ndo cuu sii ra Cristo, ta ra Cristo cuu sii ra Ndyoo.

4

Tyiño i zavaha ra apóstol

¹ Cuñi si sa nacoto ndo sii ndi tañi ra zatyíño sa cuenda ra Cristo. Tyiño maa ndi cuu sa zacuahna ndi sii ñiyívi tuhun xehe ca sii maa ra Ndyoo.

² Ta sa cuenda maa ndi, ra cuu muzu ra Ndyoo, cuñi si vatyi tandihi saha tyaa ndi yahvi tandihi sa nacatyi ra Ndyoo sihin ndi.

³ Ta ña sica iñi atu catyi ndo vatyi vehi a ña vehi a tatu catyi inga ñiyívi. Ñahñi sa cuu. Ta nu mi ta ma cuu catyi tatu zavehi sa vaha a sa ña vaha.

⁴ Catyi sa siñi tuñi vehi sihin, vatyí ñahñi ca cuatyí. Zoco numaa tacuan ta ña cuñi si catyi si vatyí ñahñi maa cuatyí caña ñi. Maa ra Ndyoo cuu ra cua tyicuhva sii.

⁵ Yucuan cuenda ma catyi ndo tatu vaha a ña vaha sa zavaha ñiyivi vatyí ta saa ca quivi. Quivi cua quisi ra Cristo ta cua zandundisi ra nu ñaa. Ta cua zatu ra sa xehe sa iyo añima yo. Ta ziqui cua tyiyahvi ra Ndyoo sii minoo minoo yo cuhva tahan si sii yo.

⁶ Ndoho hermanos quehin cuhva ya vatyí cua tyindyee si sii maa ndo. Natyicuhva maa ra Ndyoo sii mi ta sii ra Apolos, ta ma zacahnu maa ndo cuaha ca sii minoo ndi a sii inga ndi. Ña tacuan catyi Tuhun Ndyoo.

⁷ Yoñi minoo ndo sa ñiñi ca ta ziqui inga ndo. Tandihí sa cuu sii ndo, maa ra Ndyoo i saha. Yucuan cuenda ma zacahnu ndo sii ndo.

⁸ Zoco sica iñi maa ndo vatyí sito ndo tandihí cui sa iyo sa cuenda maa ra Ndyoo ta ñahñi sa cumañi sii ndo. Sa ndyaca ñaha ndo tañi sa rey cuu ndo, ta cuu tyaa siyo ndo sii maa ndi. Vaha xaan tatu sa ndisa vatyí rey cuu ndo, ta tacuan ta cua cuu cundyaca ñaha ndi sihin ndo.

⁹ Ta sica iñi vatyí maa ndi, ra apóstol, i zanduluhlu xaan ca ra Ndyoo sii ndi. Ndyehe xaan ndi tundoho tañi minoo ra sa ñoho vehe caa, ta cuñi cuu ra. Tañi sa sindyaca zandaru sii ndi ityi cahnu ta ndyehe ñiyivi ta ángel sii ndi. Ta saha xaan si ticahan nuu sii ndi cuu si.

¹⁰ Sa cuenda ra Cristo ta sica iñi ñiyivi vatyí tondo xaan maa ndi, zoco maa ndo sito xaan ndo cuñi ndo sa cuenda ra Cristo. Tañi sa ñahñi sa cuu zacuu maa ndi, zoco maa ndo cuu xaan sii ndo, cuñi ndo. Sacu ndyaa ñiyivi sii maa ndi, zoco sii ndoho zacahnu ñu.

¹¹ Ndyá cuhva ndyá vityí ta ndyehe xaan ndi tundoho. Sizoco ndi. Ityi ndi. Ñahñi ca zahma ndi. Ñahñi vehe ndi. Ta tuhva ñiyivi cañi sii ndi.

¹² Sitatu xaan ndi vatyí ñihi xaan zatyíño ndi. Quiñi cahan ñiyivi sihin ndi, zoco vaha cahan ndi sihin ñu. Zavaha ñu sa ña vaha sihin ndi, zoco zandyee ndi iñi ndi.

¹³ Cahan ñu sii ndi. Zoco vii ñi cahan ndi sihin ñu. Zaha ñu tuhun tañi mihin cuu ndi tañi sa ñahñi yahvi ndyaa ndi ndyá cuhva ndyá vityí.

¹⁴ Ña tyei cuhva ya sii ndo sa cua cucahan nuu ndo. Zoco tañi sa sehi tyiño sii zehe ndyíhi, ra cuñi xein.

¹⁵ Vazu usi mil maestro zacuaha sii ndo sa cuenda ra Cristo, zoco ña cuaha zutu ndo. Mi cuu tañi zutu ndo sa cuenda ra Jesucristo vatyí xihna ca mi i nacatyí sihin ndo yozo caa cuu cacu añima ndo.

¹⁶ Yucuan cuenda zañiñi sii ndo vatyí zavaha ndo tandihí cuhva zavehi.

¹⁷ Ta yucuan cuenda tasi sii ra Timoteo nu yucu ndo. Cuñi xein sii ra tañi minoo zehi. Vaha xaan ndyico ra sii ra ndyaca ñaha sii yo. Cua zanacohon ra iñi ndo cuhva iye sa cuenda ra Cristo ta cuhva zacuehi tahan tahan vehe ñuhu.

¹⁸ Iyo ndo zacahnu xaan ndo sii ndo. Sica iñi ndo vatyí ma cahun que nu yucu ndo.

¹⁹ Zoco tatu cuhva cuñi maa ra Ndyoo cuu, ña naha ca ta cua cuhin nu yucu ndo. Ta cua ndyehi sii ndoho sa zacahnu sii ndo tatu ndyizo ndo tundyee iñi maa ra Ndyoo a tuhun cahan ñi ndo.

²⁰ Vatyí tatu ndisa vatyí ndyaca ñaha ra Ndyoo sii ndo, yivi sa cahan ñi maa ndo cuu si, zoco cua cuu zatyíño ndo sihin tundyee iñi maa ra Ndyoo.

²¹ ¿Yozo caa cuñi maa ndo? ¿Atu cuñi ndo sa quisi quehin sii ndo? ¿A cuñi ndo sa quisi zañehi sii ndo cuhva cuñi xein sii ndo ta vii ñi cua quehin sihin ndo?

5

Tatu ña cuñi minoo hermano zandoo ra cuatyí ra, cuñi si sa tava yo sii ra

¹ Catyi ñiyivi sihin vatyí iyo minoo ra nu yucu ndo ndyaa ra sihin zihí ndahvi ra. Cahnu xaan cahnu xaan cuatyí cuan. Ndyá cuhva ndyá ñiyivi ta coto ca Tuhun Ndyoo ta ña tuhva ñu zavaha sii si.

² Sica iñi ndo vatyí vaha xaan ndo, ta ña nducuihya iñi ndo sa cuenda cuatyí cuan tañi tahan si. Ta ña tava ndo sii ra zavaha cuhva quiñi xaan cuan.

³ Ndisa yoñi ndyaa sihin ndo sihin coño ñuhi, zoco tañi sa ndyei sihin ndo cuu si vatyi ñoho xaan iñi sii ndo. Ta sihin zivi ra Jesús, ra ndyaca ñaha sii yo, sa cundaa iñi cuhva cuñi si zavaha ndo sihin ra zavaha cuatyí cuan.

⁴ Cuñi si sa titahan ndo. Ta zaha ndo tuhun vatyi ndyei sihin ndo. Ta cua coo xaan tundyee iñi ra Jesús sihin ndo.

⁵ Ta ziqui cuhva cuenda ndo sii ra cuan sii cuihna vatyi cua cuu zativi ra sii coño ñuhu ra, ta cua cuu cacu añima ra quivi cua tasi tuñi ra Ndyoo sii ñiyivi.

⁶ Ña vaha sa catyi ndo vatyi vaha xaan ndo vatyi saha ndo sa coo cuatyí cuan nu yucu ndo. ¿Atu ña sito ndo tuhun sa catyi si vatyi cua ndaa pan tatu tyihi yo zuhva ñi yusa iya? (Ta tañi yusa iya cuu ra cuan. Ta coto cua nduu tandihi ndo tañi maa ra.)

⁷ Tava ndo yusa iya ña vaha cuan coto zativi si sii tandihi ndo. Tacuan ta cua cuu ndo tañi pan ña ndaa vatyi ñahñi yusa iya ña vaha cuan cua quihvi ticui ndo. Ta zuun ñi maa ra Cristo cuu ra i sihi nu cruz sa cuenda yo. Ta sa naha i sahñi ñiyivi mvee ticatyí ta ndasi cuatyí ñu sihin niñi ti. Ta zuun ñi cuhva cuan i sati niñi ra Cristo nu sihi ra, ta sihin niñi cuan zandasi ra Ndyoo cuatyí yo ta zacacu ra sii yo.

⁸ Yucuan cuenda nacuu yo ñiyivi vaha sa ndisa. Ma zavaha ca yo sa quiñi ta sa ña vaha. Zoco nazavaha yo sa vaha sa ndisa cuii ta sa ndoo.

⁹ Nu inga carta i tasi sii ndo i catyi sihin ndo vatyi ma coo ndo sihin ñiyivi iyo cuatyí.

¹⁰ Zoco ñá quehin tuhun cuan sa cuenda ñiyivi ta sino ca iñi Tuhun Ndyoo. Iyo ra zavaha ra sa quiñi sihin sa ziin ziin ñaha. Iyo ra cuñi xaan ra sa coo xaan sa sii ra. Iyo ra zuhu ra ta zandavi ñaha ra. Zoco ma cuu cuiñi siyo ndo sii tandihi ñiyivi sa iyo tacuan vatyi ndyaa ndo ñuu ñiyivi sihin ñu.

¹¹ Zoco quehin tuhun cuenda ra cuu hermano. Ma cutahan ndo sihin ra tatu zavaha ra sa quiñi sihin sa ziin ziin ñaha, a tatu cuñi xaan ra sa coo xaan sa sii ra, a tatu zacahnu ra sii inga ndyoo, a tatu quiñi cahan ra ta sahñi tahan ra sihin ñiyivi a tatu ra siñi cuu ra a ra zuhu. Ta ma casi ndo xita sihin numinoo ra zavaha minoo cuhva cuan tatu catyi ra vatyi hermano cuu ra.

¹²⁻¹³ Vatyi maa yo ña tahan si tyaa yo cuatyí sata ñiyivi ityi sata. Cua tasi tuñi maa ra Ndyoo sii maa ñu. Zoco cuñi si sa coto vaha ndo sii ñiyivi ndyico sii ra Ndyoo nu yucu ndo. Yucuan cuenda tava ndo sii ra iyo cuatyí cuan nu yucu ndo, ra sa quehin tuhun.

6

Ma tyaa yo cuatyí sata ra hermano nuu ra cu tyiño

¹ ¿Ñaa cuenda tuhva maa ndo tyaa cuatyí sata inga hermano nuu ra cu tyiño, ra ña sino iñi Tuhun Ndyoo? ¿Ñaa cuenda ma zandaa ndo tyiño cuan nuu tandihi hermano?

² ¿Atu ña sito ndo vatyi ityi nuu ca cua tyicuhva maa yo sii ñiyivi ñuu ñiyivi? Tatu cua cuu tyicuhva ndo ñuu ñiyivi, ¿ñaa cuenda sica iñi ndo vatyi ma cuu tyicuhva ndo tyiño ndyihí vityi?

³ Ityi nuu ca cua tyicuhva maa yo sii ángel. Yucuan cuenda cuu tucu tyicuhva ndo tyiño ña ñiñi xaan tañi sa iyo vityi.

⁴ Tatu iyo cuatyí nu yucu ndo ¿ñaa cuenda saha ndo sa zandaa inga ñiyivi tyiño? Ñahñi ra cuu ra cuan sa cuenda maa ndo.

⁵ Quehin cuhva ya sihin ndo vatyi cuñi sa cua cucahan nuu ndo. Zaha ndo tuhun vatyi yoñi sa iyo sa siñi tuñi vaha nu yucu ndo vatyi ña saha ndo sa zandaa ra cuan tyiño.

⁶ Zoco sahan ndo nuu ra cu tyiño ta tyaa ndo cuatyí sata hermano ndo nuu ra ña sino iñi.

⁷ Iyo cuatyí nu yucu ndo vatyi sahan ndo nuu ra cu tyiño sihin hermano ndo. Vaha ca zandyee ndo iñi ndo sihin ñaa sa zavaha ñiyivi sihin ndo vazu zuhu ñu ndaha tyiño ndo.

⁸ Zoco maa ndo cuu ra zavaha sa ña vaha. Ndyaa sa sii hermano ndo ta zuhu ndo.

⁹ ¿Atu ña sito ndo vatyi ma cuu quihvi ñiyivi ña vaha nu ndyaca ñaha ra Ndyoo? Ma zandavi ñaha ndo sii ndo. Ma cuu quihvi ra sa ndyaa sihin minoo ñaha ta ña tindaha ra,

a ñiyivi zacahnu sii inga ndyoo, a ra ndyaa sihin inga ñaha sa yivi ñazihhi ra a ra ndyaa sihin inga ra.

¹⁰ Ta ma cuu quihvi ra zuhu a ñiyivi cuñi xaan sa coo sa sii ñu, a ra siñi, a ñiyivi quiñi cahan sihin inga ñiyivi. Ma cuu cahun tandihhi ñiyivi sa tacuan caa nu ndyaca ñaha ra Ndyoo.

¹¹ Ta tacuan i cuu zuhva maa ndo. Zoco i nacatya ra Ndyoo añaima ndo. Sihin Taty i maa ra Ndyoo i zanduvaha ra cuhva iyo ndo. Sa cuenda sa i zavaha ra Jesucristo, ra ndyaca ñaha sii yo, ta ñahñi ca cuaty ndo ityi nuu maa ra Ndyoo.

Coño ñuhu maa yo cuu vehe ñuhu ra Ndyoo

¹² Cuu zacui ñaa sa cuñi, zoco ma tyindyee tandihhi si sii. Saha ra Ndyoo sa zacui sii si, zoco ma cuhve sa cundyaca ñaha si sii.

¹³ Iyo sa casi yo sa cuenda sisi yo, ta sisi yo iyo sa cuenda sa casi yo. Zoco ityi nuu ca cua naa tandihhi cuhva cuan cua zacuu ra Ndyoo. Zoco ña iyo coño ñuhu yo sa vaty zavaha yo sa quiñi sihin sa ziiin ziiin ñaha. Coño ñuhu yo cuu sii maa ra Ndyoo. Ta cuñi maa ra cundyaca ñaha ra coño ñuhu yo sihin Taty i ra.

¹⁴ I zanandoto ra Ndyoo sii ra Jesús, ta zuun ñi cuhva cuan cua zanandoto ra sii coño ñuhu yo sihin tundyee iñi maa ra.

¹⁵ ¿Atu ña sito ndo vaty cuu ndo zuhva coño ñuhu ra Cristo? ¿Atu vaha tatu zandu-iiin ndo coño ñuhu ra Cristo sihin minoo ñaha zana? ¡Numinoo saha!

¹⁶ ¿Atu ña sito ndo vaty tatu zandu-iiin minoo ra sii coño ñuhu ra sihin minoo ñaha zana sa nduu ñu tañi minoo ñi ñiyivi? Catyi maa ra Ndyoo sisi Tuhun ra vaty ndyehe ra sii ñu tañi minoo ñi ñiyivi.

¹⁷ Zoco ra sa ndu-iiin sihin ra Cristo, sa ndu-iiin añaima ra sihin ra Cristo vaty zuun ñi Taty i iyo sii nduu tahan ra.

¹⁸ Zandoo ndo sii cuaty sa cuñi ndo sii minoo ñaha sa yivi ñazihhi ndo cuu. Iyo inga cuaty sa ma zativi xaan sii ndo. Zoco ñiyivi zavaha cuaty ya, zuun ñi sii maa ñu zativi ñu.

¹⁹ ¿Atu ña sito ndo vaty coño ñuhu maa yo cuu vehe Taty i? Saha maa ra Ndyoo sii ra sii yo, ta iyo ra sisi añaima yo. Ta yivi ca cuenda maa yo cuu yo.

²⁰ Yahvi xaan i zata maa ra Ndyoo sii yo. Yucuan cuenda zacahnu xaan ndo sii ra Ndyoo sihin coño ñuhu ndo.

7

Cuhva cuñi si coo ñiyivi sa yaha tindaha

¹ Ta vaty cua nacaty sihin ndo sa cuenda cuhva i nducu tuhun ndo sii, nuu carta i zaquisi ndo. Sa xihna ñi, sa ndisa cuu si vaty vaha ca tatu ma tindaha ñiyivi.

² Zoco coto coo cuaty ndo natindaha tahan tahan ndo sihin minoo ñaha ta tahan tahan ñaha sihin minoo rayii.

³ Nazavaha rayii cuhva tahan si sihin ñazihhi ra. Ta tacuan tucu ñaha, nazavaha ña cuhva tahan si sihin yii ña.

⁴ Ma cuu zavaha ñaha cuan ñaa sa cuñi maa ña sihin coño ñuhu ña vaty tahan tucu si sii yii ña catyi ra yozo caa cua zavaha ña. Ta tacuan tucu rayii, sii ñaha ra cuu tucu coño ñuhu ra.

⁵ Ma catyi ndo vaty ma cuu cuzu ndo sihin ñaha ndo a sihin yii ndo. Zoco tatu cuñi ndo, cuu zaña ndo sii si zuhva quivi tatu nduu tahan ndo cuñi cuhva cuan. Ta cuu coo ndyitya ndo ta cahan ndo sihin ra Ndyoo. Ta ziqui ndu-iiin tucu ndo coto zandavi ñaha cuhna sii ndo ta coo cuaty ndo vaty ma cuu cundyaca ñaha ndo sii ndo.

⁶ Quehin cuhva ya vaty sehi sa tindaha ndo, zoco yivi sa zañiñi sii ndo.

⁷ Vaty vaha xaan tatu cuu coo tandihhi ndo tañi mi. Zoco ziiin ziiin cuhva saha ra Ndyoo sii sa minoo minoo yo.

⁸ Catyi sihin ñu yoco ta sihin ñundahvi vaty vaha tatu ndoo ñu tacuan ñi tañi mi.

⁹ Zoco tatu ma cuu cundyee iñi ñu sa ma tindaha ñu, vaha ca natindaha ñu.

¹⁰ Ta sihin ñiyivi sa yaha tindaha, catyi minoo cuhva sa cuenda ra ndyaca ñaha sii yo vaty ma zandoo ñuzihi sii yii ñu.

¹¹ Ta tatu zandoo minoo ña sii yii ña, ma cuu tindaha tucu ña sihin inga ra. Zoco cuu naco vaha ña sihin yii ña. Ta ma cuu sa sino tutu ta zandoo minoo ra sii ñazih ra.

¹² Ta vityi cua quehin ziqui inga zuhva ca cuhva, ta ña site tatu catyi maa ra Ndyoo cuhva ya a maa ñi mi, zoco tyehen catyi. Tatu iyo minoo hermano ta ña sino iñi ñazih ra, zoco cuñi ña cundyaa ña sihin ra, ma cuu sa sino tutu ta zandoo ra sii ña.

¹³ A tatu iyo minoo hermana ta ña sino iñi yii ña, zoco cuñi ra cundyaa ra sihin ña. Ma cuu natani tutu ñu ta zandoo ña sii ra.

¹⁴ Vaty sa cuenda sa sino iñi ñazih ra ta tyindyee tucu ra Ndyoo sii maa ra. Ta zuun ñi cuhva tyindyee ra Ndyoo sii minoo ñaha ña sino iñi tatu sino iñi yii ña. Ta sihin cuhva cuan ta nduu zehe ñu tañi zehe ñiyivi sino iñi ta yivi tañi zehe ñiyivi ña sino iñi.

¹⁵ Zoco tatu zandoo, ra ña sino iñi sii ñaha ra a ñaha ña sino iñi sii yii ña, nacuhun ñu. Ta sihin cuhva cuan sa i ndasi ra hermano a ña hermana. Cuñi maa ra Ndyoo sa coo sa taxi.

¹⁶ Vaty ña siton hermana tatu cua cuu zasinon iñi yiu. Ta ña siton hermano tatu cua cuu zasinon iñi ñazihun.

¹⁷ Ta tyehen catyi sihin ndo: Coo ndo cuhva catyi ra Ndyoo sihin ndo. Ta ndoo ndo vaha sihin cuhva iyo ndo quivi i cana ra Ndyoo sii ndo. Ta tacuan catyi sihin tandih ñiyivi sino iñi ziiñ ziiñ vehe ñuhu.

¹⁸ Tatu i casi ra Ndyoo sii minoo ndo ta sa yaha tahndya ñii xiñi xuu ndo. Ma caca xaan iñi ndo sa cuenda si. A tatu iyo ndo tañaha ca coo costumbre cuan sii ndo, ña cuñi si sa coo si vityi.

¹⁹ Ña ñiñi tatu zavaha yo costumbre cuan a ma zavaha yo sii si. Sa ñiñi cuu sa tyaa yo yahvi tuhun cahan maa ra Ndyoo.

²⁰ Ndo ndo vaha tañi iyo ndo quivi i cana ra Ndyoo sii ndo.

²¹ Tatu iyo patrón quivi i cana ra Ndyoo suun, ma caca iñun. Zoco tatu cuu ndasun, nducun cuhva.

²² Vaty quivi i cana ra Ndyoo sii minoo ra iyo patrón, ndisa iyo patrón ra, zoco ña ndyaca ñaha ca cuaty ra sii ra. Zoco ra sa yoñi patrón quivi i cana ra Ndyoo sii ra, nduu ra tañi ra iyo patrón vaty nduu ra muzu ra Ndyoo.

²³ Yahvi xaan i zata ra Ndyoo sii ndo. Ma cuhva ndo sa cundyaca ñaha sa ña vaha sii ndo. (Cuhva ndo sii ndo sii ra Ndyoo nacundyaca ñaha ra sii ndo, ta zatyño ndo tyiño ra.)

²⁴ Catyi sihin ndo hermano vaty ndoo ndo vaha cuhva iyo ndo quivi i cana ra Ndyoo sii ndo, ñaa ñi maa tyiño.

²⁵ Ta catyi sihin ñu yoco, ñahñi tuhun i saha ra Ndyoo sii sa cuenda ndo, zoco catyi sihin ndo cuhva sica iñi, ta cuu tiñ cuenda ndo tuhun vaty sito ndo vaty i saha maa ra Ndyoo tumañi iñi sii, ta tuhve cahan maa ñi sa vaha sa saha maa ra sii.

²⁶ Ta sica iñi vaty vaha ca ma tindaha ñu yoco sa vityi vaty ndyehe xaan maa yo, ra sino iñi, tundoho sisi quivi ya.

²⁷ Zoco tatu sa iyo ñazihun, ma nducu ndo cuhva natani tutu ndo. Zoco tatu ta coo ca ñazihun, ma cuñun sa coo.

²⁸ Zoco tatu tindohon, yivi cuaty cuu si. Ta tatu tindaha ñu yoco, yivi cuaty cuu si. Zoco tatu tindaha ndo cua coo xaan tizih ta tundoho sii ndo ihya ñuu ñiyivi. Ta yucuan cuenda catyi sihin ndo vaty vaha ca sa ma tindaha ndo vaty ña cuñi sa ndyehe xaan ndo tundoho ta tizih cuan.

²⁹ Ta tyehen catyi sihin ndo hermanos vaty ña cuaha ca quivi ndyaa. Cuñi si vaty ra iyo ñazih ma quih xaan iñi ra sii ña vaty cuñi si sa caca iñi ra sa cuenda tyiño ra Ndyoo tandih saha.

³⁰ Ta tatu cuhya xaan cuñi ndo zoco ma tyaa xaan ndo yahvi sii si. Ta tatu zii cuñi ndo ma tyaa xaan ndo yahvi sii si. A tatu cuca ndo ma tyaa xaan ndo yahvi sii si, zatyño xaan ndo tyiño ra Ndyoo.

³¹ Ta ra sa iyo ndaha tyiño vityi, nacutyiño ra sii si sa cuenda tyiño ra Ndyoo vatyi ñuu ñiyivi sa ndyehe yo vityi sa cuñi naa si.

³² Cuñi sa ma caca xaan iñi ndo sa cuenda sa iyo ñuu ñiyivi ya. Caca iñi ndo maa ñi sa cuenda tyiño ra Ndyoo. Minoo ra sa ta coo ca ñazihí, sica iñi ra sa cuenda tyiño ra Ndyoo, ta cuu zatyíño ra tyiño ra Ndyoo.

³³ Zoco ra sa iyo ñazihí, sica iñi ra cuhva coo vaha ra ihya ñuu ñiyivi ta cuhva cua cuzii iñi ñazihí ra.

³⁴ Ta ziiin ziiin cuhva iyo sii ñuzihí sa iyo yii ta ñu yoñi. Ñaha sa tañaha ca coo yii, sica iñi ña sa cuenda tyiño maa ra Ndyoo. Sii ra Ndyoo cuu coño ñuhu ña ta sa siñi tuñi sii ña. Zoco ñaha sa iyo yii, sica iñi ña cuhva coo sa vaha sii ña ihya ñuu ñiyivi ta cuhva cua cuzii iñi yii ña.

³⁵ Nacatyí cuhva ya sihin ndo vatyí cuñi tyindyeyi sii ndo. Ña cuñi catyí vatyí ma cuu tindaha ndo. Zoco cuñi sa cua coo ndo minoo cuhva vaha ta minoo cuhva ma zayanga si sii ndo ta cua cuu zacahnu ndisa cuii ndo sii maa ra Ndyoo.

³⁶ Zoco tatu iyo ndo sica iñi ndo vatyí vaha natindaha zehe ndo vatyí cua yaha quivi ñu, vaha cuhva cuan. Natindaha ñu tatu cuñi ndo. Yivi cuatyí cuu si.

³⁷ Zoco tatu iyo inga ndo sa nacañi vaha iñi ndo ta cuñi ndo sa ma tindaha zehe ndo. Vaha sa ma tindaha ñu.

³⁸ Vaha zavaha ra saha tindaha zehe, zoco vaha ca zavaha ra sa ña saha.

³⁹ Catyí ley maa ra Ndyoo vatyí ñii ñi sa ndito minoo ra, iin ñi cuu ra sihin ñazihí ra. Zoco tatu sa sihi ra, cuu tindaha ña sihin yoo ra cuñi ña tatu sino iñi ra sii ra Cristo.

⁴⁰ Zoco sica iñi vatyí zii ca cua cuñi ña tatu ma tindaha tucu ña. Ta sica iñi vatyí sehi tuhun ya sa cuenda Tatyí Ii ra Ndyoo.

8

Ma zanduva yo sii hermano yo

¹ Ta vityí cua quehin sa cuenda ndyayu sa saha maa ñiyivi sii inga ndyoo. Sica iñi tahan tahan yo vatyí sito yo ñaa sa cuu sa ndoo sa cuenda cuhva ya. Zacahnu yo sii yo vatyí iyo xaan sa siñi tuñi sii yo cuñi yo. Zoco minoo cuhva vaha ca cuu sa cuñi yo sii tahan yo.

² Ta tatu iyo yo sica iñi yo vatyí sito xaan yo, cuñi si catyí si vatyí tañaha ca coto yo cuhva cuñi si coto yo.

³ Zoco yoo ra cuñi xaan sii ra Ndyoo, sito ra Ndyoo sii ra cuan.

⁴ Ta vityí sa cuenda sa casi yo ndyayu sa saha maa ñiyivi sii inga ndyoo, sito maa yo vatyí inga ndyoo cuan ña vale si vatyí minoo tuhun ñi ra Ndyoo iyo sa ndisa.

⁵ Ityí ziqui ta nu ñuhu iyo cuaha sa catyí ñiyivi vatyí ndyoo cuu si.

⁶ Zoco sa cuenda maa yo, iyo minoo tuhun ñi ra cuu Ndyoo Zutu yo. Ta i zavaha maa ra tandihí sa iyo. Ta sa cuenda maa ra iyo yo. Ta iyo minoo tuhun ñi ra ndyaca ñaha sii yo, ra Jesucristo. Ta sa cuenda maa ra ta iyo tandihí sa iyo; ndya maa yo ta sa cuenda maa ra i sino yo.

⁷ Zoco ña sito tandihí ñiyivi cuhva ya vatyí iyo ñiyivi i zacahnu inga ndyoo cumañi ca coto ñu sii ra cuu Ndyoo sa ndisa, ta ndya cuhva ndya vityí sica iñi ñu vatyí ndito inga ndyoo cuan. Ta tatu cua casi ñu ndyayu cuan, sica iñi ñu vatyí cuatyí cuu si nuu ra Ndyoo.

⁸ Zoco Ndyoo ñahñi cuenda ra tatu casi yo sii si a ma casi yo. Yivi cuatyí cuu tatu casi yo, ta yivi cuatyí cuu tatu ma casi yo.

⁹ Zoco zacuenda ndo sii ndo coto zatívi ndo sii minoo hermano, ra tañaha ca sino vaha iñi, sihin minoo cuhva sa cua zavaha ndo.

¹⁰ Tatu ndyehe minoo ra sii yoho vatyí sasun ndyayu sa saha maa ñiyivi sii inga ndyoo. Cua casi tucu ra cuan vazu sica iñi ra vatyí ña vaha.

¹¹ Ta sa cuenda sa sito xoon ta sasun ta cua zatíviun sii minoo hermano. Ta sa cuenda tucu ra cuan i sihi ra Cristo vatyí ma cunaa ra.

¹² Tatu tacuan zavaha yo ta zatívi yo sii minoo hermano ta sino vaha ca iñi, cuatyí cuu si ityí nuu ra Cristo.

¹³ Yucuan cuenda catyi, tatu sa cuenda sa casi mi coño cuan ta zativi si sii minoo hermano. Ma casi que sii si caña ñi coto zativi sii ra ta coo cuatyi ra.

9

Tyiño tahan si zavaha minoo ra apóstol

¹ Yuhvi cui minoo ra apóstol. Ta ndisa vatyi yoñi ñiyivi ndyaca ñaha sii. I ndyehi sii ra Jesucristo, ra ndyaca ñaha sii yo. Ta maa ndo cuu tyiño mi vatyi sa cuenda mi i sino iñi ndo sii ra ndyaca ñaha sii yo.

² Vazu sica iñi inga ñiyivi vatyi yivi minoo apóstol cui, zoco sito vaha maa ndo vatyi zuun ra cui. I sino iñi ndo Tuhun Ndyoo vatyi maa ra Jesús i tava tyiño sii, sa zacote sii ndo.

³ Vityi cua nacatyi minoo kuhva sihin ñiyivi sa cuñi tyaa cuatyi sate.

⁴ Iyo kuhva sii, ta cuu quihin tandihi sa saha maa ñiyivi sa casi ta sa cohi.

⁵ Ta tatu coo ñazihí, ñaha sino iñi, cuu caca noo ña sihin, tyiño ra Ndyoo. Tacuan zavaha inga ra apóstol, ta yañi ra Jesús, ta ra Pedro tucu.

⁶ Yuhvi ta ra Bernabé i zandoo ndi tyiño ndi vatyi cua cahan ndi Tuhun Ndyoo. Ta ña cuñi ndo tyindyee ndo sii ndi. ¿Ñaa cuenda sa ña cuñi ndo tyindyee ndo sii maa ndi, ta tyindyee ndo sii tandihi inga ra cahan Tuhun Ndyoo?

⁷ Tyiyahvi ra ndyaca ñaha sii ra cu zandaru. Ta ra tasi yoho uva, sasi ra yucu vixi si. Ta ra zacuenda quití, cuu coho ra zicui tí.

⁸⁻⁹ Ta ma caca iñi ndo vatyi maa ñi kuhva sa sica ñi iñi mi cuu sa nacatyi ihya. Ña tacuan vatyi nu ley ra Ndyoo i tyaa ra Moisés catyi si tyehen: “Ma cuñi ndo yuhu zindiqui nu zatyíño tí nu sañi tí siti yutu ta quita zoo si. Nacasi tí zuhva.” Ña ñi ñi sa cuenda quití cahan ra Ndyoo tuhun cuan.

¹⁰ Cahan ra sii si sa cuenda maa yo vatyi ra tahvi ñuhu ta ra naquihin ndaha tyiño, nduu tahan ra cuñi ra quihin ra zuhva zuhva sa vaha sa cuenda tyiño ra.

¹¹ I tasi maa ndi Tuhun Ndyoo nu yucu ndo. Ta yivi sa cuaha cuu si tatu quihin ndi zuhva zuhva sa vaha sii ndo (tatu tyindyee ndo sii ndi zuhva sihin ndaha tyiño).

¹² Tatu tyindyee ndo sii inga ra nacatyi Tuhun Ndyoo sihin ndo, ñihi ca cua tyindyee ndo sii nduhvi. Zoco ña cahan ndi. Zandyee ndi iñi ndi sihin tandihi cuii kuhva coto ma cuñi ndo Tuhun Ndyoo.

¹³ Sito tandihi ndo vatyi ra zatyíño vehe ñuhu hebreo sasi ra sa iyo yucuan. Zatyíño ra nu saha maa ñiyivi quití sii ra Ndyoo, ta cuu quihin ra coño tí.

¹⁴ Ta zuun ñi kuhva cuan cuñi ra Ndyoo vatyi ñiyivi nacatyi Tuhun Vaha ra, cuñi si sa tyindyee ñiyivi sino iñi cuan sii ra.

¹⁵ Zoco yuhvi tañaha ca cua caque tundyee iñi sii maa ndo. Ta ña tyei kuhva ya vityi vatyi cuñi sa cua tyindyee ndo sii. Ña tahan iñi sa tyiyahvi ñiyivi sii ta nacatyi Tuhun Ndyoo. Vaha ca nacui zoco.

¹⁶ Ta vazu nacatyi xein Tuhun Vaha ra, zoco ma cuu catyi vatyi vaha xein vatyi maa ra Ndyoo zañiñi sii. Ta ndahvi vii ra ndahvi tatu ma zavehi kuhva catyi ra.

¹⁷ Tatu zatyíñe tyiño ya vatyi cuñi, cua tyiyahvi ra Ndyoo sii. Zoco vazu ña cuñi zatyíñe sii si, zoco tyiño sa i saha maa ra Ndyoo sii cuu si.

¹⁸ Ta yahvi sa ñihi cuu sa zii xaan cuñi vatyi cuu nacatyi Tuhun Ndyoo ta ma zatyiyahvi sii ñiyivi. Ña sique sa tahan si sii sa cuenda tyiñe.

¹⁹ Ta yivi minoo muzu cui, zoco minoo muzu zandui sii, sii tandihi cuii ñiyivi vatyi tacuan ta cuu zasine iñi ñu tuhun ra Cristo.

²⁰ Tatu cuhin nu ndyaa ñiyivi hebreo, ndui tañi maa ñu vatyi cuñi sa cua sino iñi ñu sii ra Cristo. A tatu ndyei sihin ñiyivi tyaa xaan yahvi tandihi ley sahnu, tyei yahvi sii si vatyi cuñi sa cua sino iñi ñu sii ra Cristo. Zoco ña ndyaca ñaha ley cuan sii, sa ndisa cuii.

²¹ Ta tatu cuñi tyindyeyi sii ñiyivi tañaha ca sino iñi, ndui tañi maa ñu, zoco ña zavehi sa ña vaha tañi maa ñu vatyi tyei yahvi sii ra Cristo.

²² Tatu ndyei sihin ñiyivi tañaha ca sino vaha iñi, ndui tañi maa ñu vaty tacuan ta cuu cahan que Tuhun Ndyoo sihin ñu, ta cua sino ca iñi ñu. Ndui tañi cuhva iyo sa ziiñ ziiñ ñiyivi vaty tacuan ta cua tyizoho ñu sa quehin, ta iyo ñu cua cacu ñu.

²³ Tacuan zavehi sa cuenda Tuhun Vaha ra Ndyoo vaty cuñi sa cua tyindyee si sii tandihi ñiyivi, ta cua zacacu si sii yo.

²⁴ Sito ndo vaty nu iyo minoo carrera, sino tandihi ra sino, zoco minoo tuhun ñi ra zahacanaa. Vaty cono ndo tacuhva cuu zahacanaa ndo.

²⁵ Ta yoo ra cuñi zahacanaa, zandoo ra tandihi sa cuu zativi sii ra. Cumi vaha xaan ra sii ra. Tacuan zavaha ra vaty cuñi ra zahacanaa ra minoo corona ndaha yutu ñi sa cua tivi. Zoco maa yo nducu yo cuhva zahacanaa yo minoo sa ma ndihi.

²⁶ Yucuan cuenda sino mi, zoco yivi tañi sa ña site ndyamaa cuehin. Ta sahñi tehin tañi minoo ra cuñi zahacanaa.

²⁷ Ta zandyehi tundoho sii coño ñuhu ta cundyaca ñehi sii si coto sa yaha zacuehi sii inga ñiyivi ta ziqui zuun ñi mi cua nandoi ityi sata.

10

Ma zacahnu yo sii inga ndyoo

¹ Cuñi sa cua coto ndo, hermanos, tandihi sa i tahan zutu sahnü yo ityi cuahan ra nu cu si desierto ta sa naha. I tasi ra Ndyoo minoo vico sa cuahan ityi nuu tandihi ra, ta zañaha si ityi sii ra. Ta i yaha tandihi ñu sisi tyañuhu.

² Ta tacuan i sicoo ndutya tandihi ñu sisi vico cuan ta sisi tyañuhu vaty cua cundyico ñu sii ra Moisés.

³ Ta i sasi tandihi ñu ndyayu i saha maa ra Ndyoo sii ñu.

⁴ Ta i sihi tandihi ñu ndutya i saha maa ra Ndyoo sii ñu. Ta ndutya i sihi ñu i tava ra Ndyoo sisi minoo yuu vaty coho ñu. Ta yuu cuan cuu tañi maa ra Cristo.

⁵ Zoco vazu i ndyehe tandihi ñu sa ndyityi i zavaha maa ra Ndyoo ityi, zoco cuaha xaan ñu ñá zavaha ñu cuhva cuñi ra Ndyoo, ta ñá tahan iñi ra, ta i zanaa ra sii ñu.

⁶ Ta tandihi cuhva cuan zañaha si minoo cuhva sii maa yo vaty ma cuñi yo sii sa ña vaha tañi i cuñi maa ñu.

⁷ Ta ma zacahnu yo sii inga ndyoo tañi i zavaha zuhva maa ñu. Catyi Tuhun Ndyoo: “I sasi ñiyivi, ta i sihi ñu, ta ziqui i nduvita ñu vaty cua cata saha ñu” (vaty zacahnu ñu sii zindiqui xuhun cuaan).

⁸ Ta ma cuzu yo sihin numinoo ñaha tatu ma tindaha xihna yo. Minoo quivi i sihi oco uñi mil ñu vaty i zavaha ñu cuaty cuan.

⁹ Ta ma coto ihñi yo sii ra ndyaca ñaha sii yo tañi i zavaha zuhva maa ñu, ta i sahñi coo sii ñu.

¹⁰ Ta ma cahan ndo sii ra Ndyoo tañi i zavaha zuhva maa ñu, ta i tasi ra Ndyoo sii minoo ángel sa cua cahñi sii ñu, ta i sihi ñu.

¹¹ Tandihi cuhva ya i tahan zutu sahnü yo ta sa naha, ta i sicundyaa si nuu tutu Ndyoo vaty coto yo. Ta zañaha si sii yo vaty ma zavaha yo cuhva cuan. Ta maa yo cuu yo ndito nu sa cuñi ndihi tyiemvu.

¹² Yucuan cuenda tatu sica iñun vaty ñi xaan iñun sii ra Ndyoo, zoco coto vohon suun coto zavohon cuaty.

¹³ Tandihi cuñi cuaty sa cuñun zavohon ta iyo tucu inga ñiyivi cuñi zavaha cuhva cuan. Zoco cuu cuniñ iñi yo sii ra Ndyoo vaty ma cuhva maa ra sa cuñi xaan con zavohon sa ña vaha. Cua zañaha ra minoo ityi suun, ta cua cuu conon sii sa cuñi zativi suun. Ta cua cundyee iñun ta ma zavohon sii si.

¹⁴ Yucuan cuenda, ndoho hermanos, zandoo ndo sa zacahnu ndo sii inga ndyoo.

¹⁵ Quehin sihin ndo tañi sa ñiyivi siñi tuñi xaan cuu ndo. Tyizoho vaha ndo sa catyi tatu ndisa a ña ndisa cuu si.

¹⁶ Quivi sa nacohon iñi yo vaty i sihi ra Cristo nuu cruz sa cuenda maa yo, sihi yo vino ta sasi yo pan. Sa sihi yo vino cuan iñi ñi, cuñi si catyi si vaty tyindyee ñiñi ra Cristo sii tandihi yo. Ta pan cuan cuñi si catyi si vaty tyindyee coño ñuhu ra Cristo sii tandihi yo.

¹⁷ Vazu cuaha yo cuu yo, zoco minoo ñi pan sasi yo, ta yucuan cuenda minoo ñi coño ñuhu cuu yo.

¹⁸ Ndyehe ndo cuhva iyo ñiyivi hebreo, saha ñu sa saha maa ñu sii ra Ndyoo, ta sasi ñu zuhva si. Ta sihin cuhva cuan ndu-ïin ñu.

¹⁹ Ña catyi sihin ndo vaty ndisa iyo cuhva sii inga ndyoo. Ñahñi. Ta ñahñi tucu cuhva iyo sii coño sa saha maa ñiyivi sii inga ndyoo.

²⁰ Zoco tyehen catyi vaty ñiyivi sa ña sito sii ra Ndyoo, saha ñu sa saha maa ñu sii cuihna ta yivi sii ra Ndyoo. Ta ña cuñi sa ndu-ïin ndo sihin cuihna.

²¹ Ma cuu coho ndo vino cuenda ra Cristo ta vino cuenda cuihna. Ta ma cuu casi ndo nu ndyaa mesa ra Ndyoo ta nu ndyaa mesa sii cuihna.

²² ¿Atu cuñi yo sa cuxaan ra Ndyoo sihin yo? ¿Atu iyo ca tundyee iñi sii maa yo ta ziqui ca ra Ndyoo?

Cuu zavaha yo ñaa sa cuñi yo tatu ma zativi si sii inga hermano

²³ Cuu zacuu yo ñaa sa cuñi maa yo, zoco ma tyindyee tandihi si sii yo. Ndisa, saha maa ra Ndyoo sa zavaha yo ñaa sa cuñi yo, zoco ma tyindyee tandihi si sii yo ta ndundyee ca yo sihin Tuhun Ndyoo.

²⁴ Cuñi si sa nducu yo cuhva coo sa vaha sii inga ñiyivi ta yivi sii sa maa ñi maa yo.

²⁵ Casun ñaa ñi maa sa xico ñiyivi nuyahvi, ta ma nducu tuhun tatu sa saha maa ñiyivi sii si sii inga ndyoo coto caca iñi ndo tatu vaha a ña vaha tatu casi ndo.

²⁶ Vaty tandihi sa iyo ñuu ñiyivi cuu cuenda ra ndyaca ñaha sii yo.

²⁷ Ta tatu cua cana minoo ñiyivi ña sino iñi sii ndo vaty casi ndo vehe ñu ta cuñi ndo cuhun ndo, cuu cuhun ndo ta casi ndo ñaa sa saha maa ñu sii ndo. Ta ma nducu tuhun ndo tatu sa cuenda inga ndyoo cuu si.

²⁸ Zoco tatu catyi ñu sihin ndo: “Coño sa saha maa ñiyivi sii inga ndyoo cuu ya”, catyi ñu. Ma casi ndo sii si coto zativi ndo sii ñu nacaty sihin ndo ta caca iñi ñu vaty zavaha ndo cuaty.

²⁹ Zativi si sii inga ñiyivi ta yivi sii maa ndo. Ta iyo ndo cua catyi ndo: “¿Ñaa cuenda cua zaña ndi sa vaha, tatu sa sica iñi ñiyivi ñi cuu si?”

³⁰ Saha ndi tyahvi ndyoo sii Ndyoo sa cuenda sa cua casi ndi, ta ¿ña cuenda cua cahan ñiyivi sii ndi tatu casi ndi sii si?” cua catyi ndo.

³¹ Ta cua catyi sihin ndo vaty ñaa ñi maa sa casi ndo a ñaa ñi maa sa coho ndo, zavaha ndo sii si minoo cuhva sa cua tahan iñi ra Ndyoo ta cua zacahnu si sii ra.

³² Ma zativi ndo sii ñiyivi hebreo a sii inga ñiyivi a sii ñiyivi sino iñi Tuhun Ndyoo.

³³ Zavaha ndo cuhva zavehi vaty zavehi cuhva tahan iñi ñiyivi, ta ma caca iñi ñu vaty iyo cuaty. Ta ña nduqui sa vaha sa cuenda ñi mi. Nduqui sa vaha sa cuenda cuaha xaan ñiyivi vaty tacuan ta cua sino iñi ñu ta cua cacu ñu.

11

¹ Cundyico ndo sii mi tañi ndyique sii ra Cristo.

Cuhva cuñi si zavaha ñuzihi nu iyo culto

² Ta vityi, zii xaan cuñi, hermanos, vaty nacohon iñi ndo sii mi tandihi cuhva ta tyaa ndo yahvi cuhva sa zacuehi sii ndo.

³ Zoco cuñi sa cua coto ndo vaty ra Cristo cuu xiñi sii tandihi rayi vaty ndyaca ñaha ra sii ra. Ta rayi cuu xiñi sii ñazih ra. Ta ra Ndyoo cuu xiñi ra Cristo.

⁴ Tatu zahvi minoo ra zahma xiñi ra ta cahan ra sihin ra Ndyoo sisi vehe ñuhu a cuhva sa cahan ra tuhun saha ra Ndyoo sii ra, saha ra ticahan nuu sii ra Cristo cuhva cuan.

⁵ Zoco tatu ma zahvi ñuzihi zahma xiñi ñu cuhva cahan ñu sihin ra Ndyoo a cuhva cahan ñu tuhun i saha ra Ndyoo sii ñu, cuu si tañi sa zatya xiñi ñu. Ta saha ñu ticahan nuu sii yi ñu vaty tatu ma zahvi ñu zahma xiñi ñu cuñi si catyi si vaty ña ndyaca ñaha yi ñu sii ñu.

⁶ Tatu ña cuñi ñuzihi sa cuzahvi xiñi ñu, nazatya xiñi ñu. Zoco tatu saha si ticahan nuu sii ñuzihi sa zatya xiñi ñu, nazahvi ñu zahma xiñi ñu.

⁷ Ña vaha sa zahvi rayii zahma xiñi ra vatyí tañi caa maa ra Ndyoo caa ra. Ta ndyaca ñaha ra sii ñazihí ra tañi ndyaca ñaha ra Ndyoo sii maa ra.

⁸ Quivi i zavaha ra Ndyoo sii rayii, ñá zavaha ra sii ra sihin yiqui naha ñaha. Zoco i zavaha ra sii ñaha sihin yiqui naha rayii.

⁹ Xihna ca i zavaha ra Ndyoo sii rayii. Ta sa cuenda rayii i zavaha ra sii ñaha.

¹⁰ Yucuan cuenda cuñi si sa zahvi ñuzihí zahma xiñi ñu. Zañaha si vatyí ndyaca ñaha yii ñu sii ñu. Ta tacuan ta zii cua cuñi ángel sa ndyehe si cuhva cuan.

¹¹ Zoco sa cuenda maa yo, ra sino iñi, ta siñi ñuhu rayii sii ñu zihí, ta siñi ñuhu ñu zihí sii rayii. Ta cuñi si nduu tahan ñu sa cuenda tyiño ra Ndyoo.

¹² Yiqui naha rayii i sino minoo ñu zihí sa xihna ñi, ta vityí zacacu ñu zihí sii tandihí rayii. Ta maa ra Ndyoo zavaha tandihí sa iyo.

¹³ Ta vityí catyí maa ndo tatu vaha a ña vaha tatu ma zahvi ñuzihí zahma xiñi ñu ta cahan ñu sihin ra Ndyoo.

¹⁴ Sito ndo vatyí saha si ticahan nuu sii rayii tatu nañi xaan xiñi ra.

¹⁵ Zoco tatu nañi xaan xiñi ñu zihí, zii xaan cuñi ñu sihin si vatyí saha ra Ndyoo sa cunañi ixi xiñi ñu vatyí zahvi si xiñi ñu.

¹⁶ Ta tatu iyo minoo ra cuñi cahñi tahan saha tuhun ya, cuñi si sa coto ndo vatyí ñahñi inga ca costumbre iyo sii maa ndi a sii vehe ñuhu ra Ndyoo.

Nacatyí ra Pablo vatyí ña vaha cuhva zavaha ñu Santa Cena

¹⁷ Ta vityí iyo inga cuhva cuñi nacatyí sihin ndo. Ta ña zii cuñi sihin ndo cuhva ya vatyí titahan ndo, zoco ña tyindyee si sii ndo. Zativí si sii ndo.

¹⁸ Nacatyí ñiyivi sihin, vatyí cuhva titahan ndo sa zavaha ndo culto ta ña iin ñi cuhva sica iñi ndo. Ta sino iñi zuhva sa cahan ñiyivi sii ndo.

¹⁹ Cuñi ndo sa coo ziiñ ndo, ta tacuan ta cua coto ñiyivi yoo ndo sino iñi sa ndisa cuí, cuñi ndo.

²⁰ Ta cuhva sa titahan ndo, yivi Santa Cena cuu sa sasi ndo sa ndisa

²¹ vatyí minoo minoo ndo cuxiñi ndo cuhva cuñi maa ndo. Iyo ndo numi ndo ta sasi ndo cuaha, ta inga ra ña ñihi ra ta sizoco ra. Ta iyo tucu ndo siñi ndo.

²² ¿Atu ñahñi vehe ndo nu cuu casi ndo ta coho ndo? Zanduquiñi caa ndo sii vehe ñuhu ra Ndyoo, ta saha ndo ticahan nuu sii ra hermano ndahvi, ra ñahñi sa cuaha casi. ¿Yozo caa cua catyí sihin ndo vityí sa cuenda cuhva ya? ¿Atu catyí vatyí vaha zavaha ndo? Ma catyí.

Cuenda sa vatyí iyo Santa Cena

²³ Saha maa ra Jesús cuhva ya sii mi tañi sa nacatyí sihin ndo vatyí zuun ñi sa cuaa sa saha cuenda ra Judas sii ra Jesús, sa xihna ñi i quihin ra Jesús pan.

²⁴ Ta sa yaha saha ra tyahvi ndyoo sii ra Ndyoo, ta i tahví ra sii si, ta zasa ra sii ra apóstol, ta catyí ra: “Casi ndo. Ihya cuu tañi coño ñuhi. Cua tahví si sa cuenda maa ndo. Zavaha ndo cuhva ya vatyí cua nacohon iñi ndo sii.” Catyí ra.

²⁵ Ta sa yaha sasi tandihí ra pan, ta i tiin ra Jesús tasa ta catyí ra: “Sihin ihya zandaa ra Ndyoo minoo tyiño saa sihin ndo. Ihya ñoho vino ta cuu si tañi niñi. Tandihí saha sa cua coho ndo sii si, coho ndo sii si vatyí nacohon iñi ndo sii.” I catyí ra Jesús quivi cuan.

²⁶ Ta tandihí saha titahan ndo ta casi ndo pan ta coho ndo vino cuhva ya, zañaha ndo sii ñiyivi cuhva i sihi ra Jesús ndya quivi cua quisi tucu ra.

Cuhva cuñi si zavaha yo Santa Cena

²⁷ Tatu casi yo pan ya ta coho yo vino ra Cristo sihin minoo cuhva ña tahan iñi ra Ndyoo, cua coo cuatyí yo vatyí ña tyaa yo yahvi sii coño ñuhu ta niñi ra ndyaca ñaha sii yo.

²⁸ Cuñi si sa ndyehe vaha yo sii yo tatu iyo vaha yo sihin ra Ndyoo, ta ziqui casi yo pan cuan ta coho yo vino cuan.

²⁹ Vatyí tatu casi yo ta coho yo ta ña zaha yo cuenda vatyí coño ñuhu ra Cristo cuu si, zavaha yo minoo cuhva sa cua tasi tuñi ra Ndyoo sii yo.

³⁰ Ta zuun ñi yucuan cuenda cuaha xaan ndo cuhu ndo ta vita iyo ndo, ta iyo ñu tahan ndo sa yaha sihi ñu.

³¹ Zoco tatu ndyehe vaha yo sii yo, ma tahan yo tacuan.

³² Zoco tatu tacuan zavaha ra Ndyoo sihin maa yo, cañi ra sii yo vityi sa vaty ma cunaa yo sihin inga ñiyivi ñuu ñiyivi.

³³ Ta yucuan cuenda, ndoho hermanos, tatu titahan ndo sa cuenda Santa Cena, cuatu noo ndo sii inga ndo ta ñin ñi casi ndo ta coho ndo.

³⁴ Zoco tatu iyo ndo sizoco ndo, casi xihna ndo ndya vehe ndo coto zavaha ndo minoo cuhva sa ma tahan ñi ra Ndyoo ta cua tasi tuñi ra sii ndo. Ta inga tucu tyiño sa cumañi ndundoo cua zandundoi quivi cua cuhin nu yucu ndo.

12

Ndatu sa saha Taty Li sii minoo minoo yo

¹ Hermanos, cuñi sa cua coto ndo tandihi sa vaha sa saha maa Taty Li ra Ndyoo sii sa minoo minoo yo.

² Sito ndo vaty quivi sa ña sito ndo sii ra Ndyoo, i saha ndo sii ndo sa cundyaca ñaha inga ndyoo sa ña cuu cahan.

³ Yucuan cuenda cuñi sa coto maa ndo vaty tatu cahan minoo ra sihin cuhva saha Taty Li sii ra, ma cuu cahan ra ndya vaha ñi sii ra Jesús. Ta ma cuu catyi ra vaty ndyaca ñaha ra Jesús sii ra tatu ña tyindyee Taty Li sii ra.

⁴ Ziin ziin ndatu saha maa ra Ndyoo sii minoo minoo yo. Zoco zuun ñi maa Taty Li cuu ra saha sii si.

⁵ Ta ziin ziin cuhva zatyño yo tyiño ra Ndyoo, zoco minoo ñi ra ndyaca ñaha sii yo.

⁶ Ziin tyiño saha ra sii sa minoo minoo yo, zoco minoo ñi ra Ndyoo cuu ra sityiño sii tandihi yo.

⁷ Saha maa ra Taty Li ra sii minoo minoo yo sihin minoo cuhva sa cuu tyindyee si sii tandihi yo.

⁸ Vaty sii minoo yo saha xaan ra sa siñi tuñi sa cuenda Taty Li. Ta sii inga ra saha Taty Li ndatu sa cuu nacoto ra minoo sa zacoto ra Ndyoo sii ra.

⁹ Ta sii inga ra saha ra sa cuniñi xaan ñi ra. Ta inga ra cuu zanduvaha ra sii ñiyivi cuhu sihin Taty Li.

¹⁰ Inga ra cuu zavaha ra sa ndyityi. Ta inga ra cuu xaan nacaty ra Tuhun Ndyoo. Inga ra cuu nacoto ra tatu cahan Taty Li a taty ña vaha; inga ra cuu cahan ra zahan sa ña tuhva ra cahan; ta inga ra cuu nacaty ra ñaa sa cahan ra cahan cuhva cuan.

¹¹ Ta tandihi cuhva ya zavaha sa minoo tuhun ñi Taty Li; ziin ziin cuhva saha maa ra sii sa minoo minoo yo cuhva cuñi maa ra.

Tandihí yo cuu yo minoo ñi coño ñuhu ra Cristo

¹² Ra Cristo cuu tañi minoo coño ñuhu. Ta minoo coño ñuhu iyo sa ziin ziin cuhva sii si. Iyo xiñi si, iyo saha si, iyo ndaha si. Zoco sa tandihi si cuan minoo ñi coño ñuhu cuu si.

¹³ Ta tacuan cuu maa yo vaty minoo ñi Taty Li i zacoo ndutya sii tandihi yo, ta minoo ñi coño ñuhu cuu tandihi yo sa sino ñi vazu cuu yo ñiyivi hebreo a griego a vazu iyo patrón yo a vazu yoñi. I ñihi tandihi yo sa minoo ñi Taty Li

¹⁴ vaty sa minoo coño ñuhu, iyo cuaha cuhva sii si, yivi sa minoo ñi.

¹⁵ Tatu catyi saha cuan: “Yivi ndaha cui, ta yucuan cuenda yivi sa cuenda coño ñuhu cui.” ¿Atu ndisa sa cahan si?

¹⁶ A tatu catyi zoho cuan: “Yivi siti nuu cui, ta yucuan cuenda yivi sa cuenda coño ñuhu cui.” ¿Atu ndisa?

¹⁷ Tatu tandihi coño ñuhu cuan cuu siti nuu, ¿yozo caa cua cuiñi si? A tatu tandihi coño ñuhu cuu zoho, ¿yozo caa cua ñihi si xico?

¹⁸ Zoco i zavaha ra Ndyoo ziin ziin cuhva sihin minoo coño ñuhu cuhva cuñi maa ra.

¹⁹ Tatu iin ñi cuhva caa tandihi si, yivi minoo coño ñuhu cuu si, ta ña tyaqui cua cuu si.

²⁰ Zoco sa cuenda sa cuaha cuhva iyo sii si, ta minoo ñi coño ñuhu cuu si.

²¹ Ma cuu catyi siti nuu cuan sihin ndaha cuan: “Ña siñi ñuhun sii, cuahan.” Ta ma cuu catyi xiñi cuan sihin saha cuan: “Ña siñi ñuhun sii.”

²² Ña tacuan, vatyí zuhva coño ñuhu caa si tañi sa ña ñiñi si, yucuan cuu sa ñiñi xaan ca.

²³ Ta zuhva coño ñuhu sa sica iñi yo vatyí ma tyaa yo yahvi sii si, yucuan cuu sa ñiñi ca zacuenda yo. Ta sii sa quiñi ca caa, zandutyaqui ca yo sii si.

²⁴ Ta sihin sa tyaqui ca caa, ñahñi zavaha yo. Ta i zandu-iin ra Ndyoo sii coño ñuhu ra sihin minoo cuhva zacahnu ca si sii ra hermano ña tuhva ñiyivi tyaa yahvi. Ta maa yo cuu coño ñuhu ra.

²⁵ Ta tacuan i zavaha ra vatyí ma cuziin ziin coño ñuhu ra, zoco cua zacuenda tahan si sii tahan si.

²⁶ Tatu zuhva coño ñuhu ra Cristo ndyehe si tundoho, ndyehe tandihi si tundoho. Ta tatu iyo zuhva si zacahnu ñiyivi, tandihi si cua cuzii iñi.

²⁷ Ta maa yo cuu coño ñuhu ra Cristo. Minoo minoo yo cuu yo zuhva zuhva coño ñuhu ra.

²⁸ Ta i tyihi ra Ndyoo sii minoo minoo yo sisi vehe ñuhu ra vatyí cuu tyindyee yo sii inga yo. Ra ñiñi ca cuu ra tava ra Jesús tyiño sa cuu ra apóstol. Sa cu uu cuu ra cahan tuhun saha ra Ndyoo sii ra; profeta cuu ra. Sa cu uñi cuu ra zacuaha. Ta ziqui iyo ra zavaha sa ndyityi, ta ra zanduvaha sii ñiyivi cuhu, ta ra cuu tyindyee sii inga hermano, ta ra cuu cundyaca ñaha sii inga hermano, ta ra cuu cahan inga zahan sa ña tuhva ra cahan.

²⁹ Ña tandihi yo cuu yo apóstol a ra cahan tuhun saha ra Ndyoo sii ra, a ra zacuaha, a ra zavaha sa ndyityi.

³⁰ Ña tandihi yo cuu zanduvaha yo sii ñiyivi cuhu a cahan yo lengua a nacatyí yo ñaa sa cahan ñiyivi cahan lengua.

³¹ Zoco nacuñi yo sa vaha ca. Ta cua zañehi sii ndo minoo ityi vaha xaan ca.

13

Cuhva cuñi si sa cuñi xaan yo sii ñiyivi

¹ Vazu cuu quehin zahan sa cahan ñiyivi ta sa cahan ángel, zoco tatu ña cuñi sii ñiyivi, minoo nduzu ñi cui tañi nañi minoo tamvu a nañi minoo caa.

² Ta vazu cuu xaan quehin tuhun saha ra Ndyoo sii, ta cutuñi iñi tandihi sa xehe ta tandihi sa siñi tuñi sii maa ra Ndyoo, ta tatu nii xaan cuu iñi ndya cuhva ndya cuu zacuiñi siye yucu zoco ña cuñi sii ñiyivi, ñahñi maa ra cui.

³ A tatu sehi tandihi cui ndaha tyiñe sii ñiyivi ndahvi ta cuhve sa cayu coño ñuhi zoco ña cuñi sii ñiyivi, ñahñi maa cua tyindyee si sii.

⁴ Tatu cuñi xaan yo sii ñiyivi, zandyee xaan yo iñi yo sihin ñu ta zavaha xaan yo sa vaha sihin ñu. Ma cuxaan yo tatu iyo sa vaha sii ñu. Ma zacahnu yo sii yo ta catyi yo vatyí vaha xaan maa yo.

⁵ Tatu cuñi xaan yo sii ñiyivi, ma cuhva yo ticahan nuu sii ñu. Cua nanducu yo sa vaha sii ñu ta yivi sa cuenda ñi maa yo. Ma vatyí xaan cuxaan yo. Ta ma ndoo sa cuxaan yo aña yo.

⁶ Tatu cuñi xaan yo sii ñiyivi, ma cuzii iñi yo tatu zavaha ñu sa ña vaha, zoco cua cuzii iñi yo sihin sa vaha ta sa ndoo.

⁷ Tatu cuñi xaan yo sii ñiyivi, zandyee yo iñi yo sihin tundoho sa saha ñu sii yo; sino iñi yo vatyí cua zavaha ñu sa vaha; ñi cuu iñi yo sii ñu. Ta cua zandyee yo iñi yo ñaa ndihi cui ca tundoho.

⁸ Cuhva sa cuñi xaan yo sii ñiyivi ma naa si. Cua coo quivi ma cahan ca yo tuhun saha ra Ndyoo sii yo. Ma cahan ca yo lengua. Ma nacoto ca yo minoo sa zacoto ra Ndyoo sii yo.

⁹ Vatyí vityí zuhva ñi sito yo, ta zuhva ñi cuu nacatyí yo Tuhun Ndyoo.

¹⁰ Zoco quivi cua quisi ra Cristo ta cua naa tandihi inga cuhva cuan vatyí cua coto yo vatyí zuhva cuii ñi cuu sa sito yo vityí.

¹¹ Quivi i culuhli i quehin tañi cahan minoo ra luhlu, ta tacuan i cuu sa siñi tuñi, ta tacuan ñi i cutuñi iñi. Zoco quivi i sahani, i zandoi cuhva zacuu sa ndyíhi.

¹² Ta zuun ñi cuhva cuan vityí, cuu yo tañi sa ndyíhi sa cuenda ra Ndyoo. Cuu si tañi ndyehe yo zuhva ñi sihin minoo ino ta ña casi xaan ndyehe yo. Zoco quivi cua quisi ra Cristo, ta cua ndyehe vaha yo sii ra ityi nuu ra. Zuhva ñi sito yo vityí, zoco quivi cuan cua coto yo tandihi tañi sito ra Ndyoo sii maa yo vityí.

¹³ Ta vityí ñi iñi yo sii ra Ndyoo. Ta iyo minoo sa ndatu yo. Quivi cua quisi ra Cristo cuu sa ndatu yo. Ta cuñi xaan yo sii ñiyivi. Ta sa ñiñi ca sisi sa uñi tahan ya cuu sa cuñi xaan yo sii ñiyivi.

14

Cuhva cahan yo inga zahan sa ña tuhva yo cahan

¹ Nducu ndo cuhva cuñi xaan ndo sii ñiyivi. Ta cuñi xaan ndo sa cua cuhva ra Ndyoo sa zñin zñin ndatu sa saha maa Tatyí li sii ndo. Ta sa ñiñi ca cuu sa cahan yo tuhun saha ra Ndyoo sii yo. Sa zaha yo profetizar cuu cuhva cuan.

² Vatyí tatu cahan ndo lengua, cahan ndo sihin ra Ndyoo, ña cahan ndo sihin ñiyivi vatyí yoñi cutuñi iñi sa cahan ndo. Cahan ndo sa xehe sihin maa ra Ndyoo.

³ Zoco tatu cahan yo tuhun saha ra Ndyoo sii yo, cua cutuñi iñi ñiyivi. Cua zandundyee ca ra Ndyoo iñi ñu, ta cua cuhva ca ra tundyee iñi sii ñu tatu cuihya cuñi ñu.

⁴ Tatu cahan yo lengua ndundyee iñi maa yo, zoco tatu cahan yo tuhun saha ra Ndyoo sii yo zandundyee yo iñi tandihi ñiyivi tyizoho.

⁵ Cuñi vatyí cahan tandihi ndo lengua, zoco sa ñiñi ca cuñi sa zaha ndo profetizar vatyí tyindyee ca ra cahan cuhva cuan ta ziqui ra cahan lengua. Zoco tatu cuu nacatyí ra cahan lengua ñaa tuhun i cahan ra a tatu cuu nacatyí inga ndo, cua tyindyee si sii tandihi ndo.

⁶ Ta quivi sei nu yucu ndo, hermanos, tatu maa lengua ñi quehin ma tyindyee si sii ndo vatyí ma cutuñi iñi ndo. Zoco tatu quehin sihin tuhun sa cutuñi iñi ndo ta nacatyí tuhun sa saha ra Ndyoo sii a ñaa minoo cuhva sa catyí Tuhun ra ta zanducasi sii si, tyindyee si sii tandihi ndo.

⁷ Tañi ra zavacu guitarra a ra tiví cutu, tatu ma ñihi ra cuhva tiví ra a ma ñihi ra cuhva zavacu ra, ma nacoto yo ñaa yaa cuu si.

⁸ Ta nu iyo cuatyí tatu ma tiví vaha ra tiví trompeta, ma coto zandaru yozo caa nu cundyaa listo ra.

⁹ Ta tacuan tucu maa yo, tatu ma cahan yo tuhun sa cuu cutuñi iñi ñiyivi, ma coto ñu ñaa sa catyí yo. Tañi sa ndyayu ñi yuhu yo cuu si.

¹⁰ Iyo cuaha xaan nuu zahan ñuu ñiyivi ya, ta tandihi cuii si iyo cuhva cuñi si catyí si.

¹¹ Zoco tatu ña cutuñi iñi yo zahan sa cahan minoo ñiyivi, ma cuu natuhun yo sihin ra, ta ma cuu natuhun ra sihin yo.

¹² Site vatyí cuñi tandihi ndo ñihi ndo ndatu sa saha Tatyí li sii ndo; yucuan cuenda catyí sihin ndo vatyí ñihi xaan cuñi ndo cuhva vaha ca vatyí tacuan ta cua cuu tyindyee ndo sii tandihi hermano.

¹³ Ta ndoho sa cahan lengua, caca ndo sii ra Ndyoo vatyí cuhva ra cuhva sa cuu nacatyí ndo ñaa sa cahan ndo.

¹⁴ Vatyí tatu cahan yo lengua, cahan aña yo, zoco ña tyindyee sa siñi tuñi sii yo.

¹⁵ Cuñi si sa cahan yo sihin ra Ndyoo sihin aña yo ta sihin sa siñi tuñi tucu yo. Cuu cata yo sihin aña yo (sihin lengua) ta sihin sa siñi tuñi tucu yo (sihin tuhun sa cutuñi iñi yo).

¹⁶ Vatyí tatu maa ñi sihin lengua zacahnun sii ra Ndyoo ta ndyaa inga ra ña sito ñaa sa cuu si, ma cuu zacahnu ra Ndyoo suhun vatyí ña cutuñi iñi ra sa cohon.

¹⁷ Vazu vaha xaan nacuhvon tyahvi ndyoo sii ra Ndyoo, zoco ñahñi maa tyindyee si sii inga ra cuan.

¹⁸ Sehi tyahvi ndyoo sii ra Ndyoo vatyí cuaha ca quehin lengua ta ziqui tandihi ndo.

¹⁹ Zoco nu iyo culto vaha ca cuñi vazu ohon tahan ñi tuhun sa cuu cutuñi iñi ñiyivi quehin ta zacuehi sii ñu ta ziqui ca sa quehin usi mil tuhun sihin lengua sa ma cutuñi iñi ñu.

²⁰ Hermanos, ma cuu ndo tañi sa ndyihí sihin cuhva iyo sa siñi tuñi sii ndo. Caca iñi ndo cuhva sica iñi ra sahnu, zoco tañi sa ña tuhva ra ndyihí zavaha sa quiñi, cuhva cuan cuu tucu maa ndo.

²¹ Catyi ra Ndyoo nuu libro sa cuu ley maa ra: “Cua quehin sihin ñiyivi ya sihin inga zahan, ta cua cutyiñe ñiyivi inga ñuu, zoco numaa tacuan ta ma tyaa ñu yahvi sa quehin.” Catyi ra.

²² Yucuan cuenda, sa cahan yo lengua cuu minoo zeña zañaha ra Ndyoo sii ñiyivi sa ña sino iñi sii ra. Zoco sa cahan yo tuhun i saha ra Ndyoo sii yo cuu sa cuenda ñiyivi sa sino iñi ta yivi sa cuenda ñiyivi ña sino iñi.

²³ Tatu titahan tandihí ndo ta cahan tandihí ndo lengua, ta tatu quisi ñiyivi ña sito ñaa sa cuu si a ñiyivi ña sino iñi sii ra Ndyoo, cua catyi ñu vatyí zana xiñi ndo.

²⁴ Zoco tatu tandihí ndo cahan ndo tuhun i saha ra Ndyoo sii ndo ta quihvi ñiyivi ña sino iñi a ña sito, cua nacoto ñu vatyí iyo cuatyí ñu vatyí cutuñi iñi ñu sa cahan ndo.

²⁵ Cua coto ñu vatyí sito ra Ndyoo sa xehe sa iyo añima ñu. Ta cua cuiñi siti ñu, ta cua zacahnu ñu sii ra Ndyoo ta catyi ñu vatyí ndisa cui ndyaa xaan ra Ndyoo sihin ndo.

Cuhva zavaha yo culto sihin minoo cuhva tyaqui ta vaha

²⁶ Ihya cuu cuhva cuñi si, hermanos; tatu cua titahan ndo, tahan tahan ndo quisi ndo sihin minoo coro sa cuñi ndo cata ndo a minoo cuhva sa cua zacuaha ndo a minoo cuhva sa zacuaha ra Ndyoo sii ndo, ta nacatyí ndo sii si. A cuu cahan ndo lengua a cuu nacatyí ndo ñaa sa catyi ra cahan lengua. Tahan tahan ndo zavaha ndo cuhva sa cua tyindyee sii tandihí ndo.

²⁷ Tatu iyo ndo cuñi ndo cahan ndo lengua, nacahan a uu a uñi tahan ñi ndo minoo minoo ndo. Ta nacatyí minoo ra ñaa sa catyi ndo.

²⁸ Zoco tatu yoñi nacoto, vaha ca ma cahan ndo lengua nu iyo culto. Cuee ñi cahan ndo maa ñi maa ndo sihin ra Ndyoo.

²⁹ Ta tatu iyo ndo cuñi ndo cahan ndo tuhun i saha ra Ndyoo sii ndo, cuu cahan a uu a uñi tahan ndo minoo minoo ndo. Tyizoho inga ndo ta ndyehe ndo tatu vaha a ña vaha sa cahan ra cahan.

³⁰ Ta tatu zacoto ra Ndyoo ñaa minoo cuhva sii minoo ra tyizoho, cuñi si vatyí nacutaxi ra cahan cuan ta nacahan inga ra.

³¹ Ta tacuan tandihí ndo sa ñihí ndo tuhun i saha ra Ndyoo sii ndo, cuu cahan ndo sii si minoo minoo ndo, ta cua cutuhva tandihí ndo cuaha ca, ta cua ñihí ca ndo tundyee iñi sihin Tuhun Ndyoo.

³² Tatu saha maa ra Ndyoo minoo tuhun sii ndo sa cua cahan ndo, cuu cuatu noo ndo.

³³ Vatyí ña cuñi ra Ndyoo sa coo tizihí ta sa cuvaa. Cuñi ra sa coo sa vii tañi iyo tandihí inga vehe ñuhu nu titahan ra hermano.

³⁴ Nacutaxi ñu zihí nu iyo culto. Ma cuu cahan ñu vatyí catyi ley maa ra Ndyoo vatyí nacundyaca ñaha rayii.

³⁵ Ta tatu iyo sa cuñi ñu coto ñu, nandaca tuhun ñu sii yii ñu ndya vehe ñu vatyí ña tyaqui cuu si tatu cahan ñu nu iyo culto.

³⁶ Tatu sica iñi ndo inga cuhva, cuñi si sa nacohon iñi ndo vatyí ñá quisaha Tuhun Ndyoo sihin maa ndo. Ta ña vasi si sa cuenda sa maa ñi maa ndo.

³⁷ Tatu iyo ndo sica iñi ndo vatyí cuu cahan ndo tuhun saha ra Ndyoo sii ndo a tatu iyo ndo sica iñi ndo vatyí saha ra Ndyoo Tatyí Ii ra sii ndo, cua nacoto ndo vatyí cuhva tyei ihya cuu tyiño i tava ra ndyaca ñaha sii yo.

³⁸ Zoco tatu iyo ndo ña cuñi ndo coto ndo ñaa sa cuu sa ndisa, nandoo ndo tacuan ñi.

³⁹ Tacuan catyi sihin ndo hermanos, cuñi xaan ndo sa cahan ndo tuhun saha ra Ndyoo sii ndo, ta ma catyi ndo vatyí ma cuu cahan ñiyivi lengua.

⁴⁰ Vii ñi zavaha ndo tandihí ta ña vaa xaan.

15

Cuhva i nandoto ra Cristo

¹ Vityi, yañi xaa, cuñi sa cua nacohon iñi ndo tuhun sa cuenda cuhva cacu yo, tuhun sa i zacote sii ndo. Sa i tiin cuenda ndo sii si, ta sino iñi ndo sii si ndya vityi.

² Ta zuun ñi si cuu sa zacacu sii ndo tatu ma naa iñi ndo tuhun sa zacote sii ndo, ta tatu ndisa cuii i sino iñi ndo sii si.

³ Sa xihna ñi sa i zacote sii ndo cuu cuhva i sihi ra Cristo sa cuenda cuatyí maa yo tañi catyí Tuhun Ndyoo. Ihya cuu sa i cutuhva mi sa xihna ñi.

⁴ Ta i tyihi ñiyivi sii ra sisi ñaña, ta sa cu uñi quivi i nandoto ra tañi catyí si nu tutu ra Ndyoo cuhva cua tahan ra.

⁵ Ta i ndyehe ra Pedro sii ra ta ziqui ca tandihi usi uu tahan ra i tava ra tyiño.

⁶ Yaha cuan ta i ndyehe ohon ziendu ra hermano sii ra ñin ñi cuhva. Ta cuaha xaan ra cuan ndito ra ndya vityi, zoco iyo ra sa sihi ra.

⁷ Cuee ca i ndyehe ra Jacobo sii ra, ta ziqui ca tandihi ra i tava ra Jesús tyiño.

⁸ Ta sa yaha tandihi cuan ta ziqui i ndyehe tucu mi sii ra. Tañi minoo ra cuee xaan i cacu cui.

⁹ Vatyí ñiñi ca tandihi inga ra i tava ra tyiño ta ziqui ca mi. Yivi ra vaha cui tañi inga ra i tava ra tyiño vatyí i zavaha xein sa ña vaha sihin ñiyivi ñoho cuenda ra Ndyoo quivi ta sino ca iñi.

¹⁰ Zoco cahnu xaan cuu cuhva cundahvi iñi ra Ndyoo sii. Zaha xaan ra tumañi iñi sii, ta i tava ra tyiño sii. Ta yivi sa caha ñi i tava ra tyiño sii vatyí i zatyíne ñihi ca ta ziqui tandihi inga ra i tava ra tyiño. Zoco yivi mi zatyíno sa ndisa vatyí maa ra Ndyoo ndyaa sihin, ta maa ra zacuu tyiño cuan.

¹¹ Ta zuun ñi si cuu si a mi a inga ra vatyí sa ñiñi ca cuu sa i zacoto ndi Tuhun Ndyoo sii ndo, ta i sino iñi ndo sii si.

Ndisa vatyí cua nandoto ñiyivi i sihi

¹² Nacatyí ndi sihin ndo vatyí i nandoto ra Cristo sa yaha i sihi ra. ¿Ta ñaa cuenda iyo ndo catyí ndo vatyí ma nandoto ñiyivi tatu sa yaha i sihi ñu?

¹³ Zoco tatu sica iñi ndo vatyí ma nandoto ñiyivi, vaziqui ndya ra Cristo ta ñá nandoto ra.

¹⁴ Ta tatu ñá nandoto ra Cristo, sa caha ñi cuu sa nacatyí ndi Tuhun Ndyoo, ta sa caha ñi sino iñi ndo.

¹⁵ Tatu ña ndisa vatyí i zanandoto ra Ndyoo sii ra Cristo, ra vatyí cuu maa ndi vatyí catyí ndi vatyí i zanandoto ra Ndyoo sii ra. Ta ñá zanandoto ra sii ra tatu ma nandoto ñiyivi i sihi, (tañi catyí maa ndo).

¹⁶ Vatyí tatu ma nandoto ñiyivi i sihi, ñá nandoto ra Cristo.

¹⁷ Ta tatu ñá nandoto ra Cristo, sa caha ñi sino iñi ndo sa i zandasi ra cuatyí ndo. Ndo ca cuatyí ndo sata ndo tatu ñá nandoto ra.

¹⁸ Ta tatu tacuan cuu si, ndya cuhva ndya ra sino iñi sii ra Cristo, ra sa sihi, cunaa ra.

¹⁹ Tatu cuhva sino iñi yo sii ra Cristo tyindyee si sii yo maa ñi ihya ñuu ñiyivi, ndahvi ñi cuu yo. Yoñi ca inga ñiyivi ndyehe ca tundoho ta ziqui maa yo.

²⁰ Zoco sa ndisa cuu si vatyí i nandoto ra Cristo. Sa xihna ñi maa ra i nandoto nu yucu ñiyivi i sihi, ta yucuan cuenda cua nandoto tucu maa yo.

²¹ Sa cuenda minoo rayii, ta i quisaha cuhva sihi ñiyivi. Ta sa cuenda inga rayii, ta i quisaha coo cuhva sa nandoto ñiyivi.

²² Sa cuenda ra Adán ta sihi tandihi ñiyivi. Ta sa cuenda ra Cristo ta cua nandoto tandihi yo sa cuu cuenda ra.

²³ Zoco cua nandoto yo quivi tahan si sii yo. Xihna ca ra Cristo i sihi ta i nandoto ra, ta cuee ca, quivi quisi tucu ra, cua nandoto ñiyivi sa cuu cuenda ra.

²⁴ Yucuan cuu nu cua ndihi tuhun. Xihna ca cua zanaa ra Cristo cuhva sii tandihi ra ndyaca ñaha ta ra cu tyiño ta tandihi ra xaan iñi sii ra. Ta cua nacuhva cuenda ra tandihi si, ta cua cundyaca ñaha ra Ndyoo Zutu yo sii si.

²⁵ Vatyí tahan si sii ra Cristo cundyaca ñaha ra ndya cua zandíhi ra cuhva sii tandíhi ra xaan íñi sii ra.

²⁶ Ta minoo sa xaan íñi sii ra Cristo cuu cuhva sa sihi ñiyívi. Ta nu ndíhi tuhun, cua zanaa ndíhi ra cuhva cuan

²⁷ vatyí i saha ra Ndyoo sa cundyaca ñaha ra Cristo tandíhi. Zoco nu catyí Tuhun Ndyoo vatyí cua cundyaca ñaha ra tandíhi, ña cuñi si catyí si vatyí cua cundyaca ñaha ra sii ra Ndyoo vatyí maa ra Ndyoo cuu ra saha sa cundyaca ñaha ra Cristo tandíhi.

²⁸ Zoco tatu sa ndyaca ñaha ra Cristo, zehe ra Ndyoo, tandíhi ta ziquí cua cuhva cuenda ra tandíhi si sii Zutu ra sa cundyaca ñaha maa ra, ta zuun ñi maa ra cua cuhva ra sii ra cundyaca ñaha Zutu ra. Ta ra Ndyoo cua cuu ra Ndyoo sii tandíhi sa iyo.

²⁹ Ta inga tucu cuhva; iyo ndo sicoo ndutya ndo sa cuenda ñiyívi i sihi. Zoco sica íñi ndo vatyí ma nandoto ñiyívi i sihi, ta sa caha ñi sa coo ndutya ndo sa cuenda ñu tatu ma nandoto ñu.

³⁰ Ta tatu ma nandoto yo cuñi ndo, ¿ña cuenda sino íñi yo Tuhun Ndyoo? Ta tatu ma nandoto yo cuñi ndo, sa caha ñi cuu sa sino íñi yo Tuhun Ndyoo ta saha yo cuhva sii ñiyívi sa cahñi ñu sii yo ndya vaha ñi cuhva.

³¹ Ndisa vatyí tandíhi quívi cuñi cahñi ñiyívi sii. Ndisa xaan cuhva cuan tañi sa ndisa tucu vatyí zii xaan cuñi sihin maa ndo sihin cuhva sino xaan íñi ndo sii ra Cristo Jesús, ra ndyaca ñaha sii yo.

³² Ta quívi sahñi tehin sihin ñiyívi tañi quítí xaan cuu ñu ñuu Efeso ¿yozo caa cua tyindyee si cuan sii, tatu ma nandoto ñiyívi i sihi? Ta tatu sa ndisa vatyí ma nandoto ñiyívi, nacasi yo ta nacoho yo ta nacuzii íñi yo ñuu ñiyívi ya vatyí ityaan a iza cua cuu yo, ta cua ndíhi si yucuan ñi.

³³ Ma cuhva ndo sa zandavi ñaha ñiyívi sii ndo. Ndisa minoo cuhva catyí si: “Tatu cu-íin ndo sihin ñiyívi ña vaha, cua zatívi ñu sii ndo.”

³⁴ Zaha cuenda ndo ñaa sa cuu sa vaha, ta ma zavaha ca ndo cuatyí vatyí ndya vityí iyo ndo tañaha ca coto ndo sii ra Ndyoo. Catyí cuhva ya vatyí cuñi sa cucahan nuu ndo.

Cuhva cua nandoto ñiyívi i sihi

³⁵ Ta iyo ndo cua catyí ndo: ¿Yozo caa cua nandoto tucu ñiyívi i sihi? ¿Yozo caa cua nduu coño ñuhu ñu?

³⁶ Ma tondo xaan cuu ndo. Ñaa ñi maa sa tasi yo, ma caña si tatu ma tyahyu xihna coño si.

³⁷ Vatyí ña tuhva yo tasi tuñama, tasi yo nuñi. Ta tatu cuñi yo sa caña yoho ndutyí, cua tasi yo ndutyí. Maa sítí ñi cuu sa tasi yo.

³⁸ Ta cua caña si cuhva cuñi ra Ndyoo vatyí ziiin ziiin cuhva caña sa ziiin ziiin sítí.

³⁹ Ña inuu ñi caa tandíhi coño ñuhu. Ziiin caa coño ñuhu ñiyívi, ta ziiin caa coño quítí. Ta tucu caa coño zaa ta coño tyiyaca.

⁴⁰ Ta tucu caa sa iyo ityí ziquí sihin sa iyo nu ñuhu. Tyaqui xaan sa iyo ityí ziquí, ta tyaqui tucu sa iyo nu ñuhu, zoco tucu caa si.

⁴¹ Ziiin caa sa ndisi ñicandyí ta sa ndisi yoo, ta ziiin tucu caa tiño. Ta ña inuu ñi caa tandíhi tiño.

⁴² Ta zuun ñi cuhva cuan cua cuu quívi nandoto yo vatyí cua ndu-ziiin yo. Sa tyíhi ñiyívi sisi ñuhu cuu coño ñuhu yo sa cua tyahyu, zoco sa cua nandoto cuu minoo sa ma tyahyu ta ma tiví.

⁴³ Coño ñuhu yo sa iyo vityí, yívi sa vaha xaan cuu si vatyí cua tyahyu si tatu quíhvi si sisi ñuhu, zoco cuhva sa cua nandoto yo, yaha xaan tyaqui cua nduu yo. Ñahñi ca sa cuu zacuu coño ñuhu yo quívi quíhvi si ñaña, zoco cua nandoto si sihin cuaha xaan cuhva.

⁴⁴ Coño ñuhu yo sa cuu cuenda ñuu ñiyívi ya, cua quíhvi si sisi ñaña, zoco quívi cua nandoto si, yívi ca cuenda ñuu ñiyívi ya cua cuu si. Iyo coño ñuhu yo sa cuu cuenda ñuu ñiyívi ya, ta cua coo tucu inga si sa yívi cuenda ñuu ñiyívi ya zoco sa cuenda andívi. Ta yucuan cuu sa ma tiví.

⁴⁵ Catyí Tuhun Ndyoo: “Rayí sa sicoo sa xihna ñi, ra Adán, i sicoo coño ñuhu ra ta ndito añima ra”, zoco vaha ca ra Cristo vatyí saha maa ra cuhva sii ñiyívi sa nandoto ñu.

⁴⁶ Sa xihna ñi iyo coño ñuhu yo. Sa cuenda ñuu ñiyivi ya cuu si. Cuee ca cua cuhva ra Ndyoo inga coño ñuhu sii yo sa cuu cuenda andivi.

⁴⁷ Tacuan cuu si vatyí sa xihna ñi rayii i zavaha ra Ndyoo, ñuhu i cuu ra. Zoco sa cuu uu i quisi inga ra ndya andivi. Ta maa ra cuu ra ndyaca ñaha sii yo.

⁴⁸ Coño ñuhu maa yo cuu sa sino sihin ndyahyu tañi coño ñuhu ra Adán, ta tatu sino iñi yo sii ra Cristo cuee ca cua cuhva maa ra minoo coño ñuhu saa sii yo sa cua cundito andivi, ta cua cuu yo tañi maa ra.

⁴⁹ Vityi caa yo tañi caa rayii i sino sihin ndyahyu, ta cuee ca cua nduu yo tañi caa ra Cristo.

⁵⁰ Cuñi catyi sihin ndo hermanos, vatyí ma cuu quihvi coño ñuhu yo nu ndyaca ñaha ra Ndyoo. Ma cuu quihvi minoo sa cua tiví nu ñahñi sa tiví iyo.

⁵¹ Vityi cua nacatyí minoo tuhun xehe sihin ndo. Ña tandihí cuii yo cua cuu, zoco cua nazama ra Ndyoo sii tandihí yo.

⁵² Natahan si quivi, yatyí xaan cua nacasi tahan tyiño; tañi tyehen ñi, tañi minoo tuhun zatahan nuu ñi cua cuu si. Sa xihna ñi cua coo nduzu cutu, ta ziqui cua nandoto ñiyivi i sihi. Cua zama ra Ndyoo cuhva iyo ñu, ta ma cuu ca ñu. Ta maa yo tatu ndito ca yo, cua zama tucu ra Ndyoo cuhva iyo yo.

⁵³ Vityi cuu tiví coño ñuhu yo, zoco cua zama ra Ndyoo sii yo minoo cuhva sa ma tiví ca yo.

⁵⁴ Vityi iyo coño ñuhu yo minoo cuhva sa cuu cuu si, zoco quivi cua nazama ra Ndyoo sii si, ta ma cuu ca si. Tacuan ta cua tahan si cuhva catyi si sisi Tuhun Ndyoo nu catyi si: “Zahacanaa ra Ndyoo sii tuhun sihi ñiyivi.”

⁵⁵ Ta catyi tucu Tuhun Ndyoo: “Cua zacaqui sii ndo sisi sa i sihi ndo, ta ma cuu cuii ndo. Ta ma zahacanaa ca tuhun sihi sii ñiyivi.”

⁵⁶ Sa saha cuhva sii tuhun sihi cuu cuatyí yo. Ta catyi ley sahnu ñaa sa cuu cuatyí yo.

⁵⁷ Zoco tyahvi ndyoo sii ra Ndyoo vatyí saha ra cuhva sii maa yo, ta cuu zahacanaa yo sa cuenda ra Jesucristo, ra ndyaca ñaha sii yo.

⁵⁸ Yucuan cuenda, ndoho hermanos, ra sa ñoho xaan iñi, ñin xaan cuu ndo sihin Tuhun Ndyoo. Coto ñaha cuiñi siyo ndo. Ñihi xaan zatyíño ndo tyiño ra ndyaca ñaha sii yo vatyí sa sito ndo vatyí yivi sa caha ñi zatyíño ndo tyiño ra. (Vatyí cua coo quivi cua nandoto yo, ta cua cundyaa yo minoo nu tyaqui xaan sihin ra.)

16

Cuhva cuñi si tyindyee yo sii inga hermano sihin xuhun

¹ Vityi cua nacatyí sihin ndo cuhva cuñi si tyindyee ndo sii ñiyivi cuenda ra Ndyoo sihin xuhun. Zavaha ndo cuhva i nacatyí sihin sa ziiñ ziiñ ityi ra hermano nu cu si Galacia.

² Ma cuatu ndo ndya sa sei yucuan ta ziqui zatahan ndo xuhun. Tahan tahan tumingu tava ziiñ ndo sa minoo minoo ndo ñaa sa cua cuhva ndo. Tatu cuaha ca zahacanaa ndo, cuaha ca cuhva ndo.

³ Ta tatu sa sei yucuan, cua tasi yoo ra cuñi ndo ndya ñuu Jerusalén vatyí cundyaca ra xuhun cua cuhva ndo sihin carta ndo ndya nu yucu ra hermano yucuan.

⁴ Ta tatu iyo tyiño sa cuhin yucuan, cua cuhun ra sihin.

Nacatyí ra Pablo ndyamaa cua cahan ra Tuhun Ndyoo

⁵ Sa cuñi quisi nu yucu ndo, zoco xihna ca cua cuhin nu cu si Macedonia, ta yaha cuan ta cua sei nu yucu ndo.

⁶ Ta tatu cuu, cua ndoi sihin maa ndo ndya yaha tyiemvu sa visi xaan. Ta cua tyindyee ndo sii, ta cua cuu ca cuhin ityi nuu ca ndya inga ñuu.

⁷ Ña cuñi sa ñin yaha ñi nu yucu ndo. Cuñi ndoi naha tatu cuhva maa ra Ndyoo.

⁸ Zoco cua ndoi ihya ñuu Efeso ndya sa yaha vico Pentecostés.

⁹ Cua ndoi vazu sahñi tahan xaan ñiyivi sihin, saha Tuhun Ndyoo ñuu ya vatyí iyo xaan cuhva sa cuu nacatyí Tuhun Ndyoo ihya.

¹⁰ Tatu saa ra Timoteo nu yucu ndo, cuu ndo ñiyivi vaha sihin ra ta tyindyee ndo sii ra ñaa sa cumañi sii ra vatyi zatyño tucu maa ra tyiño ra Ndyoo tañi mi.

¹¹ Tyaa tandihi ndo yahvi sii ra, ta tasi ndo sii ra ihya sihin sa vaha quivi cua quisi ra nu ndyei vatyi ndati sii ra sihin inga ra hermano.

¹² Ta ra hermano Apolos, i zañiñi sii ra sa cuhun ra nu yucu ndo ñi sihin inga ra hermano, zoco ñá cuñi maa ra cuhun vityi. Zoco cua cuhun ra quivi nacuyatyi ra.

Saha maa ra Pablo minoo nacumi sii tandihi ñu sino iñi ñuu Corinto

¹³ Coto ñáha cuzu ndo; coto ñáha zaña ndo cuhva sino iñi ndo. Zandyee xaan ndo iñi ndo, ta ma cuu ndo tañi sa ndyih.

¹⁴ Ñaa ñi maa sa zavaha ndo, zavaha ndo sii si sihin minoo cuhva zañaha si vatyi cuñi ndisa cuii ndo sii inga ñiyivi.

¹⁵ Sito ndo sii ñiyivi ra Estéfanos vatyi xihna ca maa ñu i sino iñi Tuhun Ndyoo nu cu si Acaya, ta vityi zatyño xaan ñu sa tyindyee ñu sii inga ñiyivi sino iñi.

¹⁶ Ta zañiñi sii ndo, hermanos, vatyi tyaa ndo yahvi sii ñiyivi tañi maa ñu ta sii tandihi inga ñiyivi tyindyee sihin tyiño ra Ndyoo.

¹⁷ Zi xaan cuñi vatyi i quisi ra Estéfanos, ra Fortunato ta ra Acaico vatyi cuu tyindyee ra sii ndi sa cuenda maa ndo vatyi ñá cuu quisi ndo.

¹⁸ Saha xaan ra tundyee iñi sii, tañi saha ra sii maa ndo. Cuñi si sa tyaa xaan ndo yahvi sii ñiyivi tañi maa ra.

¹⁹ Tasi tandihi ra hermano ityi Asia minoo nacumi sii ndo. Tacuan tucu ra Aquila ta ña Priscila sihin tandihi ñu sino iñi, ñu titahan vehe ñu, zaquisi ñu minoo nacumi sii maa ndo sa cuenda ra Jesús.

²⁰ Tandihi cuii ra hermano tasi ra minoo nacumi sii maa ndo. Cuhva ndo minoo nacumi sii minoo ndo ta sii inga ndo.

²¹ Ta ihya tyei yuhvi ra Pablo minoo nacumi sii ndo. Sihin ndaha mi tyei ihya.

²² Tatu iyo ra ña cuñi sii ra Jesucristo, ra ndyaca ñaha sii yo, nacuhun ra cuan andyaya. Ta catyi mi: ¡Quisi tucun Jesús, quisi tucun!

²³ Ta cuñi sa cua cuhva xaan ra Jesucristo sa vaha sii ndo.

²⁴ Ta catyi sihin ndo vatyi cuñi xein sii ndo sa cuenda ra Cristo Jesús. Ta nacuu si tacuan.

Sa Cu Uu Carta I Tasi Ra San Pablo Sii Ñiyivi Sino Iñi Sii Ra Ndyoo Ñuu Corinto

Sa cu uu carta i tasi ra Pablo ndya ñuu Corinto

¹ Yuhvi ra Pablo i casi ra Ndyoo sii vatyí cui minoo apóstol ra Jesucristo. Ta tyei carta ya sihin ra Timoteo yañi yo, ta cua tasi ndi sii si sii maa ndo, ra cu vehe ñuhu ra Ndyoo ñuu Corinto, ta sii tandíhi ñiyivi sa cuu cuenda ra Ndyoo nacahnu Acaya.

² Nacuhva xaan ra Ndyoo tumañi iñi sii tandíhi ndo, ta nacuhva ra sa coo sa taxi añima ndo, ta tacuan tucu nazavaha ra Jesucristo, ra ndyaca ñaha sii yo.

Cuhva i ndyehe xaan ra Pablo tundoho

³ Zacahnu xaan ndi sii ra Ndyoo, Zutu ra ndyaca ñaha sii yo, ra Jesucristo. Cundahvi xaan iñi ra Ndyoo sii ndi tañi minoo zutu sa ndyíhi, ta saha xaan ra tundyee iñi sii ndi nu ndyehe ndi tundoho.

⁴ Nu ndyehe ndi tundoho saha xaan ra tundyee iñi sii ndi vatyí sihin cuhva cuan ta cuu cuhva maa ndi tundyee iñi sii inga ñiyivi ndyehe tundoho zuun ñi cuhva sa saha maa ra tundyee iñi sii maa ndi.

⁵ Ndyehe xaan ndi tundoho sa cuenda ra Cristo. Ta zuun ñi sa cuenda ra Cristo ta saha xaan ra Ndyoo tundyee iñi sii ndi.

⁶ Ndyehe xaan ndi tundoho vatyí i zacoto ndi sii maa ndo cuhva saha ra Ndyoo tundyee iñi sii yo ta cuhva zacacu ra sii yo. Ta sisi tundoho sa ndyehe ndi, ta saha ra Ndyoo tundyee iñi sii ndi, ta tyindyee tucu si sii maa ndo vatyí saha tucu si tundyee iñi sii maa ndo vatyí ndyehe ndo cuhva saha xaan ra Ndyoo tundyee iñi sii ndi. Ta zuun ñi tundoho sa ndyehe ndi ta ndyehe tucu maa ndo, ta cuu cundyee iñi ndo sii si.

⁷ Ñi xaan iñi ndi sa cuenda ndo vatyí sito ndi vatyí tañi ndyehe ndo tundoho ta tacuan tucu cua cuhva ra Ndyoo tundyee iñi sii ndo.

⁸ Ta ndoho hermanos, cuñi ndi sa cua coto ndo vatyí i ndyehe xaan maa ndi tundoho nu cu si Asia. Yaha xaan cahnu tundoho i cuu sii ndi ndya cuhva i sica iñi ndi vatyí ma cundyee ca iñi ndi. Ta i yuhu ndi coto cuu ndi sihin tundoho cuan.

⁹ I sica iñi ndi vatyí cua cahñi ñiyivi sii ndi ta ma cuu zacacu ndi sii ndi. Ta sihin cuhva cuan ta i sino ca iñi ndi sii ra Ndyoo vatyí cuu zacacu maa ra sii ndi ta cuu tucu zanandoto ra sii ñiyivi i sihi.

¹⁰ Ta ndisa i zacacu ra sii ndi, ta ñá sihi ndi sihin minoo cuhva sa quiñi xaan nu cuñi cahñi ñiyivi sii ndi. Ta ñi xaan iñi ndi sii ra Ndyoo vatyí cua zacacu tucu ra sii ndi inga saha

¹¹ tatu tyindyee maa ndo sii ndi sihin sa cahan ndo sihin ra sa cuenda ndi. Ta tatu cua caca tandíhi ndo sii ra, cuee ca ta tandíhi ndo cua nacuhva xaan ndo tyahvi ndyoo sii ra sa cuenda sa vaha cua zavaha ra sihin ndi.

Nacatyí ra Pablo ñaa cuenda ñá saa ra yatyí ca ñuu Corinto

¹² Zi xaan cuñi ndi vatyí catyí sa siñi tuñi vaha sii ndi vatyí vaha xaan cuu cuhva i zavaha ndi ta ndoo xaan, ta yoñi sii zandavi ñaha ndi ihya ñuu ñiyivi. Ta sihin maa ndo cuaha ca sa vaha i zavaha ndi ndíhi ca. I tyindyee ra Ndyoo sii ndi sihin cuhva ya, ta ñá zavaha ndi sii si sihin sa siñi tuñi ñi maa ndi.

¹³ Ta sa tyaa ndi carta sii ndo, ñahñi sa xehe cahan si. Maa ñi sa casi cahan si, cuhva cuu cutuñi iñi ndo. Ta cuñi sa cua cutuñi vaha iñi ndo tandíhi si

¹⁴ tañi sa cutuñi iñi ndo zuhva. Ta quívi cua quisi ra Jesús ra ndyaca ñaha sii yo ta zii xaan cua cuñi ndo sihin maa ndi, ta zii xaan cua cuñi tucu ndi sihin ndo.

¹⁵ Ta sa cuenda cuhva cuan, cuñi cuhin inga saha nu yucu ndo vatyí cuñi tyindyeyi sii ndo uu saha.

¹⁶ I sica iñi vatyí cua yehi nu yucu ndo ityi cuhin ñuu Macedonia. Ta sa yaha cuhin Macedonia ta cua cuhin inga saha nu yucu ndo sica iñi, ta cua tyindyee ndo sii, ta cua cuhin nu cu si Judea.

¹⁷ ¿Atu sica iñi ndo vatyí ñá ndise sa cua cuhin nu yucu ndo? ¿Atu sica iñi ndo vatyí ñá nacañi vaha iñi ta quehin? Ña tacuan iye vatyí ña caa que tañi caa ñiyivi ñuu ñiyivi ya. Catyi ñu vatyí cua zavaha ñu minoo cuhva, ta ña zavaha ñu sii si.

¹⁸ Zoco sito vaha ra Ndyoo vatyí quehin sa ndisa, ta ña zandavi ñehi.

¹⁹ Vatyí ña tacuan iyo ra Jesús Zehe ra Ndyoo. Ña zandavi ñaha ra. Tatu catyi ra minoo cuhva, sa ndisa cuii cuu si. Ta mi sihin ra Silvano ta ra Timoteo i zacoto ndi tuhun ra Jesús sii ndo.

²⁰ Sa cuenda ra Cristo ta ñihi yo tandihi sa catyi ra Ndyoo ta sa naha vatyí cua cuhva ra sii yo. Ta cuhva zacahnu yo sii ra Ndyoo ta cahan yo sihin ra, catyi yo: “Nacuu si tacuan” vatyí sito yo vatyí cua cuhva ra sa vaha sii yo sa cuenda ra Cristo.

²¹ Maa ra Ndyoo tyindyee sii yo, ta ma ndoyo ñuhu yo. Ta zandu-ñin ra sii yo sihin ra Cristo. Ta saha ra Tatyí li ra sii yo.

²² Cuu si tañi i tyaa ra tuñi ra sii yo vatyí saha ra Tatyí li ra sii yo vatyí coo si añaima yo vatyí cuee ca cua cuhva ra cuaha xaan ca sa vaha sii yo.

²³ Ta sito vaha ra Ndyoo vatyí ñá sehin ñuu ndo quivi sa i sica iñi cuhin vatyí cundahvi iñi sii maa ndo coto cuxein sihin ndo. Ta sito maa ra Ndyoo tandihi sa iyo añaime.

²⁴ Ta ña ñiñi nacatyí que sihin ndo yozo caa cundyico ndo sii ra Ndyoo vatyí sa sino vaha iñi ndo. Zoco cuñi tyindyeyi sii ndo ta cua coo ca sa zii sa saha ra Ndyoo añaima ndo.

2

¹ Yucuan cuenda ñá cuñi cuhin inga saha nu yucu ndo sihin tucuihya iñi.

² Vatyí tatu sihin cuhva cua quehin sihin ndo ta zanducuihye iñi ndo, yoñi cua zanduzii iñi mi vatyí ma cuu zanduzii ndo iñi tatu sa zanducuihye iñi ndo.

³ Yucuan cuenda i tasi carta cuan sii ndo vatyí cua zandundoo ndo tyiño cuee ca sa quisi nu yucu ndo coto nducuihya iñi zacuu ndo sihin cuhva iyo ndo. Tahan si sii ndo sa zanduzii ndo iñi. Ta ñii cuu iñi vatyí tatu zii cuñi mi, zii cua cuñi tucu maa ndo.

⁴ Yucuan cuenda i tyei carta cuan vazu yaha xaan cuihya i cuñi quivi i tyei sii si ndya cuhva saqui. Zoco ñá cuñi zanducuihye iñi ndo sihin carta cuan. I cuñi sa cua coto ndo vatyí cuñi xein sii ndo.

Cuñi si sa zanaa yo iñi yo cuatyí ñiyivi

⁵ Sa cuihya iñi saha minoo ra cuan, yivi sii maa ñi mi saha ra sii si. Sii tucu maa ndo saha ra zuhva. Zuhva catyi vatyí ña cuñi cañi ñihi sii ra.

⁶ Ta cuhva sa tasi tuñi tandihi ndo sii ra, sa vaha ñi vityi.

⁷ Ta vityi cuñi si vatyí zanaa ndo iñi ndo cuatyí i zavaha ra quivi cuan ta cuhva ndo tundyee iñi sii ra coto yaha xaan nducuihya iñi ra.

⁸ Yucuan cuenda zañiñi sii ndo vatyí zacoto ndo sii ra vatyí cuñi ca ndo sii ra.

⁹ I tyei carta cuan sii ndo quivi cuan vatyí cuñi cote tatu cua tyaa ndo yahvi tandihi sa catyi sihin ndo.

¹⁰ Ta vityi yoo ra zaha ndo tucahnu iñi, zaha tucu mi tucahnu iñi sii ra. Ta yoo ra zehi tucahnu iñi, zavehi sii si ndya nuu ra Cristo sa cuenda maa ndo.

¹¹ Ta sito yo vatyí tatu ma zaha yo tucahnu iñi sii ñiyivi, cua tyihi cuihna minoo cuhva ña vaha añaima yo vatyí sa sito yo cuhva tuhva maa ra zavaha.

Ñá ndoo ra Pablo ñuu Troas

¹² Quivi i sei ñuu Troas cua zacote Tuhun Vaha sa cuenda ra Cristo, ta i nuña xaan ra ndyaca ñaha sii yo ityi, ta i cuu zacoto xein Tuhun ra.

¹³ Zoco ña zii i cuñi vatyí ñá nañihi sii ra Tito, yañi yo. Yucuan cuenda i zandoi sii ñu ñuu cuan, ta sehin ndya Macedonia.

Zacoto ra Pablo Tuhun Ndyoo sihin tandihi cuii añaima ra

¹⁴ Ta vityi sehi tyahvi ndyoo sii ra Ndyoo vaty zahacanaa yo tandihi saha sa cuenda ra Cristo, ta sihin tyiño maa ndi zacoto ra Ndyoo tuhun ra nacahnu cuii. Ta tañi minoo sa vixi xaan sahan cuu tuhun ra.

¹⁵ Vaty tuhun sa nacaty ndi cuu tañi minoo sa vixi xaan sahan sa saha maa ra Cristo sii ra Ndyoo. Ta ñihi tandihi ñiyivi xico cuan, ñu cua cacu ta ñu cunaa.

¹⁶ Ñiyivi sa ma cacu, sica iñi ñu vaty minoo xico quiñi xaan sahan cuu si tañi minoo xico sa cua cahñi sii ñu vaty nacaty tuhun cuan cuhva cunaa ñu. Zoco ñiyivi cua cacu, minoo xico tyaqui xaan sahan cuu si cuñi ñu cuhva cahan ndi. Ta ma cuu zavaha ndya vaha ñi ñiyivi tyiño ya.

¹⁷ Ta maa ndi ña iyo ndi tañi iyo cuaha xaan ra. Vaty nazaca ra tuhun ña ñiñi sihin Tuhun Ndyoo vaty iyo sa cuñi ra ñihi ra sihin cuhva cuan. Zoco ndoo xaan zacuaha maa ndi cuhva i tava ra Ndyoo tyiño sii ndi. ñin ñi cuu ndi sihin ra Cristo, ta sito ndi vaty ndyehe ra Ndyoo tandihi sa zavaha ndi.

3

Cuhva saa iyo sa cuenda ra Cristo

¹ Ta sa cahan ndi tuhun cuan ¿atu sica iñi ndo vaty zacahnu ndi sii ndi? Ña zacahnu ndi sii ndi. ¿A atu sica iñi ndo vaty cuize carta tañi ndyizo inga ra ta catyi si sihin ndo vaty vaha ñiyivi cui a cuize carta sa tyaa maa ndo ta catyi si sihin inga ñiyivi vaty vaha ñiyivi cui?

² Zoco maa ndo cuu carta ndi. (Sa cuenda tyiño i zavaha ndi nu yucu ndo.) Ta carta ya iyo si añima ndi. Ta cuu coto tandihi ñiyivi sii si ta cahvi ñu sii si.

³ Ta maa ndo cuu tañi minoo carta i zaquisi ra Cristo, ta i tyaa maa ndi sii si. Ta carta ya yoñi tyaa sii si sihin minoo lapicero a nu minoo yuu, zoco Taty Ii maa ra Ndyoo ndito i tyaa si sisi añima ndo.

⁴ Ta tyehen cuhva quehin vaty site vaty cua cuhva ra Ndyoo sa quita vaha tyiño zavehi. Vaty tyindyee ra Cristo sii.

⁵ Ta ña quehin cuhva ya vaty cuu zacuu sa maa ñi mi. Ña tacuan, vaty tandihi sa zavehi, ra Ndyoo saha cuhva cuan sii.

⁶ I saha ra cuhva sii, ta cuu nacaty sihin ñiyivi sa cuenda tuhun saa i saha ra Ndyoo. Zacacu tuhun saa ya sii yo, ta saha si minoo cuhva saa, cundito yo vaty iyo Taty Ii maa ra Ndyoo sihin yo. Ta ley sahanu sa saha ra Ndyoo sii ra Moisés, ma cuu zacacu si sii yo. Zañaha si ñaa sa cuu cuaty yo. Ta sa cuenda cuaty yo, ta cuu si tañi sa sihi añima yo vaty ma cuu tyaa yo yahvi sii tandihi cuii ley sahanu cuan.

⁷ Ta ley sahanu sa i tyaa ra Ndyoo sata minoo yuu, vaha xaan i cuu si ndya cuhva ndya ñá cuu ndyehe ñiyivi nuu ra Moisés quiñi i ñihi ra sii si vaty ndisi xaan i nduu nuu ra. Ta i naa sa ndisi cuan cuee cuee ñi.

⁸ Ta vityi iyo tuhun saa sa saha ra Ndyoo, ta vaha xaan ca si ta ziqui tuhun sahanu cuan.

⁹ Vaty tatu vaha xaan cuu tuhun sahanu cuan ta saha si sa cuu yo ¿ta ñacu ma cuvaha xaan ca tuhun saa ya vaty zanduvaha si sii yo ityi nuu ra Ndyoo?

¹⁰ Ta ley sahanu sa vaha xaan cuan, ña vale ca si ityi nuu tuhun saa ya vaty vaha xaan ca cuu tuhun saa ya.

¹¹ Ta tatu tuhun sahanu sa cua naa ta vaha xaan i cuu si ta tyaqui xaan i cuu si, vaha xaan ca cuu tuhun saa ya vaty ma naa si ndaha ñi.

¹² Ta sito ndi vaty ma naa tuhun saa ya, ta yucuan cuenda niñ xaan cuñi ndi ta nacaty ndi Tuhun Ndyoo.

¹³ Ña zavaha ndi cuhva i zavaha ra Moisés. I tyazi ra zahma nuu ra vaty ma ndyehe ñiyivi hebreo cuhva cua naa sa ndisi xaan nuu ra cuee cuee ñi. Vaty ñá cuu ndoo sa ndisi cuan nuu ra.

¹⁴ Ta ña ñin ñi nuu ra Moisés i tyazi sa tyazi, zoco ndya sa siñi tuñi sii ñiyivi cuan ta i tyazi tucu si. Ta ndya cuhva ndya vityi ta ña cutuñi vaha iñi ñu tatu cahvi ñu tuhun

sahnu cuan vatyí maa ñi sa sino iñi yo sii ra Cristo cuu sa tyaa siyo sa tyazi sa siñi tuñi yo.

¹⁵ Ta ndya cuhva ndya vityi tatu cahvi ñiyivi hebreo tuhun i tyaa ra Moisés, ña cutuñi ndisa cuii iñi ñu sa cahvi ñu.

¹⁶ Zoco tatu sino ndisa iñi ñu sii ra ndyaca ñaha sii yo, cua tyaa siyo ra sa tyazi sa siñi tuñi sii ñu.

¹⁷ Ta maa ra ndyaca ñaha sii yo cuu ra Tatyí li. Ta tatu iyo Tatyí li ra ndyaca ñaha sii yo añima yo, ña ndyaca ñaha ca ley sahnu cuan a cuatyí yo sii yo.

¹⁸ Ñahñi sa tyazi nuu yo. Ndyehe yo cuhva vaha xaan iyo ra ndyaca ñaha sii yo tañi sa ndyehe yo minoo nu ino. Ta cuhva sa ndyehe yo iyo maa ra, tacuan nduu tucu maa yo cuee cuee ñi. Tatyí li ra Ndyoo zama si cuhva iyo yo ta nduvaha ca yo ta nduvaha ca yo, ta cuahan nduu yo tañi iyo ra Cristo.

4

¹ Saha ra Ndyoo tyiño ya sii ndi, ta cundahvi iñi ra sii ndi, ta tyindyee ra sii ndi. Ta yucuan cuenda ña nducuihya iñi ndi ta ña zandihí ndi tuhun.

² Ta ña zavaha ndi sa xehe, sa saha ticahan nuu. Ña zandavi ñaha ndi. Maa ñi Tuhun Ndyoo zacuaha ndi, ta ña nazaca ndi inga tuhun sihin si. Maa ñi sa ndisa cahan ndi. Ta sihin cuhva cuan ta sito ñiyivi sihin sa siñi tuñi vaha ñu vatyí vaha ñiyivi cuu ndi, ta ndyehe ra Ndyoo cuhva zavaha ndi.

³ Ña tyixehe ndi Tuhun Ndyoo. Zoco xehe xaan si sa cuenda ñiyivi cua cunaa.

⁴ Ra ndyaca ñaha ñuu ñiyivi ya zatívi ra sa siñi tuñi sii ñiyivi ña sino iñi coto cutuñi iñi ñu tuhun vaha xaan sa cuenda ra Cristo, cuhva zacacu ra sii yo. Ta ra Cristo cuu ra Ndyoo, ta iin ñi caa maa ra tañi ra Ndyoo Zutu ra.

⁵ Ta cuhva nacatyí ndi Tuhun Ndyoo sihin ñiyivi, ña cahan ndi tuhun maa ndi, cahan ndi tuhun ra Jesucristo, ra ndyaca ñaha sii yo. Ta catyí ndi vatyí maa ndi cuu muzu ndo vatyí cuñi ndi sii ra Cristo.

⁶ Maa ra Ndyoo cuu ra catyí vatyí cua coo sa ndisi quívi zavaha ra sa ndisi, ta zuun ñi maa ra zandundisi añima yo. Ta tacuan ta sihin sa sito yo sii ra Cristo ta sa sito yo cuhva sa vaha xaan ta tyaqui xaan iyo maa ra Ndyoo.

Sihin sa sino ñi iñi yo sii ra Ndyoo ta cuu coo yo minoo cuhva saa

⁷ Coño ñuhu yo cuu tañi quívi ñi vatyí ñahñi ra cuu maa yo. Ta tacuan ta cuu ndyehe ñiyivi vatyí tandihí cuhva sa vaha xaan sa cuu sii ndi, cuenda ra Ndyoo cuu si ta yívi sa cuenda maa ndi.

⁸ Yucuan cuenda vazu iyo tizihí nacahnu nu cuahan ndi, zoco ña zandihí ndi tuhun. Ta vazu ña cutuñi iñi ndi tandihí sa tahan ndi, zoco sito ndi vatyí cua quita vaha ndi.

⁹ Cuñi cahñi ñiyivi sii ndi, zoco ña maa tuhun ñi ndi vatyí ndyaa ra Ndyoo sihin ndi. Cañi ñu sii ndi, zoco ñá sihi ndi.

¹⁰ Tandihí nu cuahan ndi ndatu ndi sa cua cuu ndi sa cuenda ra Jesús vatyí tacuan ta cua ndyehe ñiyivi vatyí ndito ndi minoo cuhva saa, cuhva saha ra Jesús sii ndi.

¹¹ Tandihí quívi sa yatyí cuii cuu ndi sa cuenda ra Cristo vatyí cuhva cuan ta cua ndyehe ñiyivi vatyí iyo ra Cristo añima ndi ta saha ra minoo cuhva saa coo ndi.

¹² Ndatu ndi sa cua cahñi ñiyivi sii ndi vatyí nacatyí ndi Tuhun Ndyoo. Ndyehe xaan ndi tundoho sa cuenda si, zoco sa cuenda sa nacatyí ndi Tuhun Ndyoo sihin ndo ta ñihi ndo cuhva coo ndo minoo cuhva saa.

¹³ Sino iñi ndi tañi i sino iñi ra rey David quívi i catyí ra: “Sino iñi, ta yucuan cuenda nacatyí sihin ñiyivi.” Catyí ra. Ta tacuan tucu maa ndi, sino tucu iñi ndi, ta yucuan cuenda nacatyí ndi.

¹⁴ Vatyí sito ndi vatyí cuhva i zanandoto ra Ndyoo sii ra Jesús sisi sa i sihi ra ta cua zanandoto tucu ra sii maa ndi vatyí sa ndu-iin ndi sihin ra Jesús, ta cua cundyaca ra sii ndi sihin maa ndo ityí nuu maa ra.

¹⁵ Tandihî tundo ho sa ndyehe ndi cuu cuenda maa ndo vatyî tyindyee si sii ndo. Ta tatu cuaha ndo cua ñihî ndo sa vaha sa saha maa ra Ndyoo sii ndo, cuaha ndo cua nacuhva xaan ndo tyahvi ndyoo sii ra, ta cua zacahnu ndo sii ra.

¹⁶ Yucuan cuenda ña ndu-uu iñî ndi tyiño ya. Ta vazu sa cuñî cuu coño ñuhu ndi, zoco ndundyee ca iñî ndi tahan tahan quivi.

¹⁷ Ta sito ndi vatyî tundo ho sa ndyehe yo ñuu ñiyivi ya yivi sa ñiñî xaan cuu si, ta vatyî cua yaha si. Zoco sa cuenda maa si ta cua ñihî ndi cuaha xaan sa vaha tandihî cuii tyiemvu nu ndyaa ra Ndyoo.

¹⁸ Yucuan cuenda ña tyaa ndi yahvi sa ndyehe yo vityî. Tyaa ca ndi yahvi sii sa ña cuu ndyehe yo vatyî yucuan cuu sa cua coo tandihî cuii tyiemvu. Ta sa cuu ndyehe yo vityî, cunaa tandihî si.

5

¹ Sito ndi vatyî tatu cua cuu ndi cua tyahyu coño ñuhu ndi vatyî tañî minoo vehe sa cuu cuenda ñuu ñiyivi ñi cuu coño ñuhu yo. Zoco iyo vehe ndi ityî ziqui sa yivi ñiyivi i zavaha. Maa ra Ndyoo i zavaha sii si, ta cua coo si tandihî cuii tyiemvu.

² Ndisa vatyî ñî ñî sa ndyaa ndi ñuu ñiyivi ya nducuihya xaan iñî ndi vatyî cuñî xaan ndi coo ndi sisi sa cua cuhva ra Ndyoo andivi.

³ Sisi sa cua cuhva ra Ndyoo cua coo aña ndi, ta ma coo si tacuan ñî.

⁴ Ñî ñî sa iyo ndi sisi coño ñuhu ndi sa cuu cuenda ñuu ñiyivi ya, nducuihya iñî ndi vatyî zayanga si sii ndi. Ña cuñî ndi sa ma coo coño ñuhu ndi, zoco cuñî ndi coo ndi cuhva saa sa cua cuhva ra Ndyoo sii ndi. Cuñî ndi sa cunaa coño ñuhu sa cuu cuenda ñuu ñiyivi ya ta cua coo ndi minoo cuhva saa sa ma ndihî.

⁵ Ta maa ra Ndyoo cuu ra catyî vatyî tacuan cua cuu si, ta i saha ra Tatyî li ra sii yo. Ta cuhva cuan zañaha si vatyî cua ñihî yo tandihî cuii sa cua cuhva ra.

⁶ Ta yucuan cuenda ña yuhu ndi sa cuu ndi. Ta sito ndi vatyî ñî ñî sa iyo ndi ihya ñuu ñiyivi ya sisi coño ñuhu ndi, ña iyo ndi gloria sihin ra Ndyoo.

⁷ Sito ndi vatyî ndisa cuu cuhva ya vatyî sino iñî ndi sii ra Ndyoo ta yivi sa cuenda minoo sa ndyehe ndi.

⁸ Ta ñî xaan iñî ndi, ta sica iñî ndi vatyî vaha ca tatu zandoo ndi coño ñuhu ya ta cuhun ndi nu ndyaa ra ndyaca ñaha sii yo.

⁹ Yucuan cuenda ñihî xaan nducu ndi cuhva zavaha ndi cuhva tahan iñî ra a cuu si sa ñoho ca ndi sisi coño ñuhu ndi ihya ñuu ñiyivi a cuu si sa cuahan ndi nu ndyaa ra.

¹⁰ Vatyî sa minoo minoo yo cua yaha yo ityî nuu ra Cristo, ta cua zandaa ra tyiño cuenda yo, ta cua ñihî yo sa tahan si sii yo sa cuenda cuhva i zavaha yo sa vaha a sa ña vaha quivi i sicoo yo sisi coño ñuhu yo ñuu ñiyivi ya.

Zacoto ra Pablo cuhva nduvaha yo ityî nuu ra Ndyoo

¹¹ Sito ndi vatyî cua tasi tuñî ra Ndyoo sii ndi tatu ma zavaha ndi cuhva catyî ra. Yucuan cuenda nducu xaan ndi cuhva cahan ndi sihin ñiyivi vatyî nacuhva cuenda ñu sii ñu sii ra Ndyoo. Sito vaha ra Ndyoo cuhva iyo ndi, ta sito tucu maa ndo sihin aña ndo, cuñî.

¹² Ña cuñî ndi zacahnu ndi sii ndi sihin sa cahan ndi ihya, zoco cuñî ndi sa nacohon iñî ndo vatyî tuhun ndisa i zacoto ndi sii ndo. Tacuan ta cua tahan ca iñî ndo sii ndi. Ta cua ñihî ndo cuhva cahan ndo sihin ra zacahnu sii. Catyî ra cuan vatyî vaha ra, zoco ñahñî sa vaha iyo aña ra.

¹³ Tatu ra loco cuu ndi (vatyî cahan ndi sa vaha sa cuenda maa ndi), zoco zavaha ndi cuhva ya vatyî cuñî ndi zacahnu ndi sii ra Ndyoo. Ta tatu iyo sa vaha sii sa siñî tuñî ndi, tacuan iyo ndi vatyî cuñî ndi tyindyee ndi sii maa ndo.

¹⁴ Zañiñî ndi ta zacoto ndi Tuhun Ndyoo sii ñiyivi vatyî sito ndi cuhva cuñî xaan ra Cristo sii tandihî ñiyivi. Sihi ra Cristo sa cuenda cuatyî tandihî ñiyivi, ta yucuan cuenda sito yo vatyî cuu si tañî sa sihi yo sihin ra Cristo, ta cuu zaña yo sa zavaha yo sa ña vaha.

¹⁵ I sihi ra sa cuenda tandihî yo, ta yucuan cuenda ma cuu ca coo yo cuhva cuñî maa yo. Cua zavaha yo cuhva cuñî maa ra i sihi ta nandoto ra sa cuenda yo.

¹⁶ Ta vityi ma cuu catyi yo tatu vaha a ña vaha sa zavaha ñiyivi cuhva caa ñu ihya ñuu ñiyivi. Ndyaa sii ra Cristo ta i quehin cuhva cuan vatyi sica iñi vatyi cuu ra minoo ñiyivi tañi maa yo, zoco vityi ma cuu ca caca iñi cuhva cuan.

¹⁷ Vaty quivi saha cuenda yo sii yo sii ra Cristo, i zama ra tandihi cuhva iyo yo. Tandihi cuhva i sica iñi yo ityi sata sa i nazama si vaty i saha ra inga sa siñi tuñi saa sii yo.

¹⁸ Ta tandihi cuhva ya, maa ñi ra Ndyoo i zavaha sii si vaty cuñi ra sa cua zanduvaha ra sii yo sihin ra sihin cuhva i zavaha ra Cristo. Ta i saha ra tyiño sii maa ndi vaty nacaty ndi sihin ñiyivi cuhva cuu nduvaha ñu sihin ra.

¹⁹ Sihin cuhva i zavaha ra Cristo, ta i zanduvaha ra Ndyoo sii tandihi ñiyivi ñuu ñiyivi sihin ra. Ña tyaa ca ra cuaty i zavaha ñu sata ñu. Ta saha ra tyiño sii maa ndi sa zacoto ndi sii ñiyivi vaty cuñi ra sa nduvaha ñu sihin ra.

²⁰ Maa ndi cuu ra sica sihin tyiño ra Cristo. Cuu si tañi sa maa ra Ndyoo zañiñi sii ndo sihin tuhun cahan ndi vaty sihin tyiño maa ra sica ndi. Yucuan cuenda zañiñi ndi sii ndo vaty nanduvaha ndo sihin ra Ndyoo vaty yucuan cuu sa cuñi ra Cristo.

²¹ Ñahñi numinoo cuaty i zavaha ra Cristo, zoco sa cuenda maa yo i ndyehe ra Ndyoo sii ra tañi minoo ra iyo cuaty. Ta cuhva vaha xaan iyo ra Cristo, i saha ra Ndyoo sii maa yo, ta nduu yo ñiyivi vaha ityi nuu ra Ndyoo.

6

¹ Zatyño ndi iñi ñi sihin ra Cristo, ta yucuan cuenda zañiñi ndi sii ndo vaty ma coo ndo tañi ra ña sito sii ra Ndyoo. Cutyño ndo tandihi sa vaha sa saha ra Ndyoo sii minoo minoo ndo.

² Vaty tyehen catyi ra Ndyoo nuu tutu ra: “Siñi sa cahan ndo quivi i zacaqui sii ñiyivi, ta i tyindyeyi sii ndo”, catyi ra. Ta vityi cuu tyiemvu vaha, tyiemvu zacacu ra Ndyoo sii ñiyivi.

³ Nducu xaan ndi cuhva cuu ndi ñiyivi vaha xaan coto ma tahan iñi ñiyivi cuhva zavaha ndi ta catyi ñu vaty ña vaha Tuhun Ndyoo ta ma sino iñi ñu.

⁴ Cuñi ndi sa cua ndyehe ñu vaty muzu maa ra Ndyoo cuu sii ndi sa ndisa cuii sihin cuhva zandyee xaan ndi iñi ndi ndyehe ndi tundoho, ta tandihi sa yñi xaan. Ta sihin cuhva cundyee xaan iñi ndi.

⁵ Vazu cañi ñiyivi sii ndi ta tyihi ñu sii ndi vehe caa ta cuvaa xaan ñu, zoco zandyee ndi iñi ndi. Ñihi xaan zatyño ndi. Iyo saha ndya cuhva ña quixi ndi, ta ña ñihi ndi sa casi ndi.

⁶ Zandyee ndi iñi ndi sihin tandihi cuhva ya vaty muzu maa ra Ndyoo cuu sii ndi sa ndisa cuii. Yucuan cuenda zavaha ndi sa vaha xaan. Sito xaan ndi Tuhun Vaha ra Ndyoo, ta cundyee xaan iñi ndi sihin ñiyivi. Zavaha xaan ndi sa vaha sihin ñu. Situ cuii Taty i ña ña iñi ndi, ta cuñi ndi sii ñiyivi sa ndisa cuii.

⁷ Maa ñi sa ndisa cahan ndi. Iyo xaan tundyee iñi maa ra Ndyoo sihin ndi, ta sityiño ndi tandihi sa vaha sa saha maa ra sii ndi, ta sihin cuhva cuan zativi ndi tyiño cuhna.

⁸ Iyo quivi tahan iñi ñiyivi sii ndi, ta iyo quivi ña cuu ndyehe ñu sii ndi. Iyo quivi cahan ñu sa vaha sii ndi, ta iyo quivi cahan ñu ndya vaha ñi. Catyi ñu vaty zandavi ñaha ndi sii ñiyivi, zoco maa ñi sa ndisa cahan ndi.

⁹ Iyo ñiyivi ña tyaa ñu yahvi sii ndi, ta iyo ñiyivi tyaa xaan ñu yahvi sii ndi. Iyo saha sa vaty cuu ndi, zoco ña sihi ndi. Iyo saha saha ra Ndyoo sa ndoho ndi, zoco ña sihi ndi.

¹⁰ Iyo quivi cuhya xaan cuñi ndi, zoco zñi xaan cuñi ndi sihin cuhva zavaha ra Ndyoo. Ndahvi xaan ndi, zoco saha xaan ndi sa vaha ra Ndyoo sii ñiyivi. Vazu ñahñi maa sa iyo sii ndi, zoco iyo tandihi sa vaha ra Ndyoo sii ndi.

¹¹ Ndoho hermanos ñuu Corinto, casi xaan cahan ndi sihin ndo ta ña tyixehe ndi. Cuñi xaan ndi sii ndo.

¹² Ñahñi cuhva sa ña cuñi ndi sii ndo, zoco maa ndo ña cuñi ndo sii ndi sa ndisa.

¹³ Ta vityi quehin sihin ndo tañi sa zehi sii ndo sa ndisa cuii. Zanduvita ndo ña ña ndo. Cuñi ndo sii ndi.

Maa yo cuu vehe ñuhu ra Ndyoo ndito

¹⁴ Ma cuu ndo ra cu tahan sihin ñiyivi ña sino iñi vaty ma cuu cu-ñin añima ndo sihin añima maa ñu. Ma cuu cu-ñin sa vaha sihin sa ña vaha. Sa iyo ñuhu sihin maa ndo, ta maa ñu sica noo ca ñu nu ñaa.

¹⁵ Ma cuu cu-ñin ra Cristo sihin cuihna a ñiyivi sino iñi sihin ñiyivi ña sino iñi.

¹⁶ Ma cuu zacahnu yo sii ra Ndyoo ta sii zandu. Maa yo cuu vehe ñuhu ra Ndyoo ndito tañi i catyi maa ra:

Cua cundyei sihin ñu ta caca noi sihin ñu;

ra Ndyoo sii maa ñu cua cui, ta maa ñu cua cuu ñiyivi sii.

¹⁷ Yucuan cuenda i catyi tucu ra:

Quita ndo ticui ñiyivi ña sino iñi, ta ma cutahan ca ndo sihin ñu;

ma zavaha ca ndo sa ña vaha; tacuan ta cua tiin cuende sii ndo.

¹⁸ Zutu ndo cua cuu sii, ta zehi cua cuu sii ndo, catyi ra Ndyoo ra iyo tandihi cuii cuhva sii.

7

¹ Ihya cuu cuhva saha ra Ndyoo tuhun ra sii yo, hermanos. Yucuan cuenda cuñi si sa nducu yo cuhva cuu yo ñiyivi vaha xaan ityi nuu ra Ndyoo. Ma zavaha yo sa quiñi, ta ma caca iñi yo sa ña vaha coto cañi ra sii yo.

Sa i zama ra hermano ñuu Corinto cuhva iyo ra

² Sica ndi sii ndo vaty tiin cuenda vaha ndo sii ndi vaty ñahñi sa ña vaha i zavaha ndi sihin numinoo ndo. Yoñi ndo zativi ndi sa siñi tuñi, ta yoñi sii zandavi ñaha ndi.

³ Ña quehin cuhva ya sihin ndo sa cuñi tyei cuaty sata ndo. Zoco catyi sihin ndo inga saha zuun ñi cuhva sa i catyi sihin ndo vaty cuñi xein sii ndo. Ñoho xaan iñi sii ndo. ñin ñi ra cuu yo a ndito yo a sa sihi yo.

⁴ Niñ xaan iñi sihin ndo, ta zii xaan cuñi sihin cuhva iyo ndo. Yucuan cuenda vazú ndyehe xaan ndi tundoho ihya, zoco cuhva iyo ndo tyindyee si sii, ta zii xaan cuñi.

⁵ Ndyá quivi i saa ndi Macedonia ya ta ñá quitatu ndi. Ndyehe xaan ndi tundoho, ta iyo xaan tizihí. Sahñi tahan xaan ñiyivi sihin ndi, ta yuhu xaan añima ndi.

⁶ Zoco saha ra Ndyoo tundyee iñi sii yo tatu nducuihya xaan iñi yo, ta i zandundyee ra añima ndi quivi i saa ra Tito.

⁷ Ta ña maa ñi sa cuenda sa saa maa ra, sa cuenda sa i saha xaan maa ndo tundyee iñi sii ra ta tyindyee tucu si sii maa ndi. I catyi ra sihin ndi cuhva cuñi xaan ndo ndyehe ndo sii ndi, cuhva nducuihya xaan iñi ndo sa cuenda sa ña vaha i zavaha ndo ta cuhva i tyaa xaan ndo yahvi tuhun sa tasi sii ndo. Ta sihin tandihi cuhva ya i nduzii xaan ca cuñi.

⁸ Ta vityi ña cuihya ca cuñi sa cuenda carta sa i tasi sii ndo. Ndisa i nducuihya iñi ndo i zacuu carta cuan, zoco zuhva ñi quivi.

⁹ Ta vityi zii xaan cuñi, zoco yivi sa cuenda sa nducuihya iñi ndo, sa cuenda sa i zama ndo cuhva iyo ndo. I nducuihya iñi ndo minoo cuhva tahan iñi ra Ndyoo. I zavaha ndi minoo sa vaha sihin ndo sa zanducuihya ndi iñi ndo.

¹⁰ Vaty tatu nducuihya iñi yo cuhva tahan iñi ra Ndyoo, zama yo cuhva iyo yo, ta cua cacu yo. Ta ña tahan si sa ma cuñi yo nducuihya iñi yo cuhva cuan. Zoco tucuihya iñi sa iyo sii ñiyivi ña sito sii ra Ndyoo, ma tyindyee si sii ñu sa ma cuhun ñu andyaya.

¹¹ Zaha ndo cuenda cuhva i tyindyee si sii ndo vaty i nducuihya iñi ndo cuhva tahan iñi ra Ndyoo. I quisaha cuñi xaan ndo zavaha ndo sa vaha. I zavaha ndo cuhva cuñi si sihin ra sicoo cuaty cuan. I tasi tuñi ndo sii ra, ta cuñi xaan ndo sa ma coo ca cuaty nu yucu ndo. I cuxaan ndo sa cuenda sa sicoo cuaty nu yucu ndo, ta i yuhu ndo sii ra Ndyoo. Ta sa yaha cuan ta ziqui i cuñi xaan ndo ndyehe ndo sii. Zañaha ndo vaty ñahñi ca cuaty ndo iyo sa cuenda tuhun cuan.

¹² I tyei carta cuan vaty cuñi sa cua nacoto maa ndo cuhva cuñi xaan ndo sii ndi sa ndisa cuii ta yivi sa sica xaan iñi sa cuenda ra zavaha cuaty cuan ta nu sa cuenda zutu ra, vazú i zavaha ra sa ña vaha cuan sihin ra.

¹³ Ta yucuan cuenda i saha xaan ndo tundyee iñi sii, sihin cuhva i zavaha ndo sa vaha, ta zii xaan ca cuñi sa cuenda cuhva i zavaha ndo sihin ra Tito. I tiin cuenda vaha ndo sii ra, ta zanduzii ndo iñi ra.

¹⁴ I catyi sihin ra Tito cuee ca sa cuhun ra nu yucu ndo vatyi sino xaan iñi ndo, ta ñá zaha ndo ticahan nuu sii, cuhva cuan. Tandihí sa i quehin sihin maa ndo, maa ñi sa ndisa cuu si. Ta sa vaha i nacatyí sihin ra sa cuenda ndo, i quita si cuhva cuan, maa ñi sa ndisa cuii, ta ñá zacuu ndo sii, tañi minoo ra vatyá.

¹⁵ Ta cuñi xaan ca ra Tito sii ndo vityi vatyí nacohon iñi ra cuhva i tiin cuenda vaha xaan ndo sii ra ta i tyaa xaan ndo yahvi sii ra. Ta i yuhu xaan ndo coto ma zavaha ndo tandihí sa cuñi si.

¹⁶ Nii xaan iñi sihin ndo tandihí cuii cuhva, ta yucuan cuenda zii xaan cuñi vityi.

8

Natyindyee vaha yo sii ñiyivi sihin xuhun

¹ Ta vityi cuñi ndi nacatyí ndi sihin ndo hermanos cuhva i saha xaan ra Ndyoo tundyee iñi sii ñiyivi sino iñi ñuu Macedonia.

² Vazu ndyehe xaan ñu tundoho, zoco zii xaan cuñi ñu sihin ra Ndyoo. Ta vazu ndahvi xaan ñu, zoco i saha xaan maa ñu sa sii ñu sii ñiyivi tañi ñiyivi cuca.

³ Sehi sa ndaa cuenda ñu vatyí saha maa ñu sa sii ñu vatyí cuñi ñu. Ta iyo saha yaha ca saha ñu.

⁴ I zañiñi ñu sii ndi cuaha xaan saha vatyí quihin ndi sa saha maa ñu ta cuhva ndi sii si sii inga hermano.

⁵ I zavaha ñu cuaha ca ta ziquí cuhva sica iñi ndi vatyí sa xihna ñi i saha maa ñu sii ñu sii ra ndyaca ñaha sii yo ta ziquí i cuñi ñu sa cua cutyiño ra Ndyoo sii maa ndi sa zacuaha ndi sii ñu.

⁶ I ndyehe ndi cuhva zavaha ñu ñuu Macedonia, ta ziquí i catyi sihin ra Tito vatyí maa ra cuu ra i quisaha sihin tyiño ya sihin maa ndo, ta yucuan cuenda i catyi sihin ra nacuhva ca ra cuhva sii ndo sa cuhva ca ndo xuhun.

⁷ Sito xaan maa ndo cuaha xaan cuhva. Nii xaan iñi ndo. Vaha xaan zacuaha ndo Tuhun Ndyoo. Sito xaan ndo sihin sa siñi tuñi sa saha ra Ndyoo. Ta vaha xaan ndyico ndo sii ra. Cuñi xaan ndo sii ndi. Ta vityi cuñi tucu si sa tyindyee vaha ndo sii ra hermano ndahvi.

⁸ Zoco ña zañiñi sii ndo. Zoco cuñi inga ñiyivi sa tyindyee ndo sii ñu. Ta sihin cuhva ya cua zañaha ndo vatyí cuñi ndo sii ñiyivi sa ndisa cuii.

⁹ Sa sito ndo cuhva cuñi xaan ra Jesucristo sii yo. Cuca xaan maa ra, zoco sa cuenda maa yo i zandudahvi xaan ra sii ra sa quisi ra ihya ñuu ñiyivi. Ta vityi zanducuca ra sii yo vatyí sa cuenda sa i sihi ra nuu cruz, ta cua ñihi maa yo sa vaha sa saha ra Ndyoo sii yo.

¹⁰ Vityi sehi minoo sa siñi tuñi vaha sii ndo vatyí tañi sa quisaha saha xaan ndo xuhun cuyava,

¹¹ vityi zavaha ca ndo sii si tañi zavaha ndo quivi cuan. Cuhva ndo ñaa sa cuu cuhva ndo.

¹² Tatu ndisa cuii cuñi ndo cuhva ndo, ña ñiñi xaan yozo cuhva ndo. Cua quihin ra Ndyoo ñaa sa cuu cuhva ndo. Ta ña cuñi ra sa cuhva yo minoo cuhva sa ña cuu sii yo.

¹³ Ña cuñi sa ndyehe xaan maa ndo tundoho vatyí saha xaan ndo xuhun ndo sii inga ñiyivi ta ñahñi tundoho cua ndyehe maa ñu. Ña tacuan cuñi si.

¹⁴ Zoco vityi iyo cuaha xuhun ndo, ta cuu tyindyee ndo sii ñiyivi ndahvi ca. Ta cuee ca inga saha cua cuu tyindyee maa ñu sii ndo tatu siñi ñuhu si sii ndo. Tacuan ta cua cuu ndo inuu ñi.

¹⁵ Tañi catyi si nuu tutu ra Ndyoo: “Ra i ñihi cuaha ca, ñá ndoo si sii ra. Ta ra i ñihi zuhva ñi, ñá cumañi si sii ra.” Catyi si.

Cua cuhun ra Tito sihin ra hermano ndya ñuu Corinto

¹⁶ Tyahvi ndyoo sii ra Ndyoo vatyí inuu ñi cuñi ra Tito sii maa ndo tañi cuñi mi sii ndo.

¹⁷ I quihin ra tyiño sehi sii ra sa cuhun ra cundyeha ra sii ndo vatyí sa sica iñi ra zavaha ra cuhva cuan. Ta yucuan cuenda cua quisi ndyeha ra sii ndo vatyí cuñi ra.

¹⁸ Tasi ndi inga ra hermano sihin ra. Tandíhi ñiyívi sino iñi, cahan xaan nu sa vaha sa cuenda ra ya. Ta cuu xaan nacatyí ra Tuhun Vaha ra Ndyoo.

¹⁹ Ta ña tacuan ñi vatyí i casi tandíhi ra hermano sii ra sa caca noo ra sihin ta tyindyee ra sii, sa naquihin xuhun sa cuenda ñiyívi ndahvi. Zavaha ndi cuhva ya vatyí zacahnu si sii ra ndyaca ñaha sii yo ta zañaha si vatyí cuñi ndisa cuii ndi sii ñiyívi.

²⁰ Tyehen zavaha ndi tyiño ya coto tyaa ñiyívi cuatyí sata ndi sa cuenda cuhva zacasi tahan ndi sa cuaha xaan xuhun ya.

²¹ Cuñi ndi zavaha ndi sii si minoo cuhva ndoo xaan ityi nuu ra Ndyoo ta cuhva cuñi ñiyívi.

²² Ta sihin ra Tito tasi tucu ndi minoo ca ra hermano yo vatyí ndyeha ndi vatyí cuñi xaan ra zatyíño ra tyiño ra Ndyoo. Sa nacatyí sihin ra cuhva cuñi xaan ndo tyindyee ndo sihin xuhun, ta vityí cuñi xaan ra cuhun ra nu yucu ndo.

²³ Sa sito ndo vatyí ra Tito cuu ra tehin ta ra tyindyee sii, sihin tyiño ra Ndyoo nu yucu ndo. Tacuan nacatyí ndo tatu yoo ra ndaca tuhun sii ndo. A tatu ndaca tuhun ñiyívi sa cuenda inga ra hermano sa vasi sihin ra, catyí ndo vatyí ra hermano ityi ya tasi sii ra, ta sino xaan iñi nduu tahan ra sii ra Cristo.

²⁴ Yucuan cuenda ityi nuu tandíhi hermano tyindyee ndo sii ra ya, ta zañaha ndo vatyí cuñi xaan ndo sii ra sa cuenda mi. Tacuan ta cua coto ra ñaa cuenda cahan xaan ndi tuhun ndo ta catyí ndi vatyí vaha xaan ñiyívi cuu ndo.

9

Cuhva cua tyindyee ra hermano sii ñiyívi ndahvi sihin xuhun

¹ Sa cuenda tuhun sa cuhva ndo xuhun sii ra hermano ndahvi, ña cuñi si sa tyei ihya

² vatyí sa site ñaa sa iyo añima ndo. Yucuan cuenda zii xaan cuñi, ta nacatyí xein sa cuenda ndo sihin ra hermano ihya nu cu si Macedonia. Nacatyí vatyí ndoho nu cu si Acaya sa ndyaa listo ndo ndya cuyava sihin xuhun sa cua cuhva ndo. Ta cuhva iyo maa ndo zañaha si minoo cuhva vaha, ta yucuan cuenda iyo cuaha xaan ca inga ra cuñi tyindyee.

³ Zoco nu ndíhi tuhun, tasi sii ra hermano nu yucu ndo vatyí cua zanumi ndo ta zatitahan ndo xuhun cuan tañi sa catyí cua zavaha ndo vatyí coto catyí ra hermano ñuu Macedonia vatyí ña ndisa cuu tuhun quehin sa cuenda ndo.

⁴ Tatu ndyeha ra hermano Macedonia vatyí ña ndyaa listo ndo quívi cuhun ra sihin mi nu yucu ndo, cua cucahan nui tatu ña sa ndyaa listo xuhun ndo vatyí sa cahan xein sa vaha sa cuenda ndo. Ta cua cucahan tucu nuu maa ndo.

⁵ Yucuan cuenda sica iñi vatyí vaha ca tatu cuhun xihna ra hermano ya nu yucu ndo, ta tyindyee ra sii ndo sa zatitahan ndo xuhun cuan, yozo cuñi maa ndo cuhva ndo. Ta ziquí cua cundyaa listo si tañi minoo sa cundaa iñi ndo ta cuhva ndo ta yívi tañi minoo sa zañiñi ndi sii ndo ta cuhva ndo.

⁶ Zoco nacohon iñi ndo minoo tuhun ya; ra sa zuhva ñi tasi, zuhva ñi cua naquihin ra. Ta ra tasi cuaha, cuaha ca cua naquihin ra.

⁷ Cuhva minoo minoo ndo yozo sa cundaa iñi ndo, yívi sa zañiñi minoo ñiyívi sii ndo ta yívi sihin sa cuihya iñi. Vatyí cuñi xaan ra Ndyoo sii ñiyívi, ñu saha maa xuhun ta cuzii iñi ñu.

⁸ Ta cuu cuhva ra Ndyoo cuaha ca sii ndo. Cua cuhva ra tandíhi nuu sa vaha sii ndo. Ta tacuan ta cua coo tandíhi sa siñi ñuhu sii ndo, ta cua cuu tyindyee ndo cuaha xaan cuhva sii inga ñiyívi.

⁹ Tyehen catyí Tuhun ra Ndyoo:

Minoo ra vaha, saha maa ra sa sii ra sii ñiyívi ndahvi.

Ma naa iñi ra Ndyoo cuhva vaha zavaha ra.

¹⁰ Maa ra Ndyoo cuu ra saha siti sa cua tasi yo. Ta cua cuhva tucu maa ra sa cua casi yo. Cua zanducuaha ca ra siti sa tasi maa ndo, ta cua cuhva ca ra cuhva sii ndo sa zavaha ndo sa vaha sihin sa saha maa ra.

¹¹ Cua coo tandihi nuu sa vaha sii ndo, sa cua cuu cuhva maa ndo ta tyindyee ndo sii inga ñiyivi. Ta quivi cua cundyaca ndi xuhun ndo nu yucu ra hermano ndahvi, cua nacuhva xaan ra tyahvi ndyoo sii ra Ndyoo.

¹² Iyo uu nuu sa vaha sa cua coo sa cuenda xuhun sa cua cuhva maa ndo. Sa xihna ñi tyindyee si sii ñiyivi sa siñi ñuhu. Ta sa cu uu cuu sa cua nacuhva xaan ñu tyahvi ndyoo sii ra Ndyoo.

¹³ Cua zacahnu xaan ñu sii ra Ndyoo vaty tyindyee ndo sii ñu ta ndyehe ñu vaty sa ndisa tyaa ndo yahvi tuhun ra Cristo. Ta cua zacahnu ñu sii ra vaty tyindyee xaan ndo sii ñu ta sii tandihi ñiyivi.

¹⁴ Ta cua caca ñu tumañi iñi sii ra Ndyoo sa cuenda maa ndo, ta cua cuñi xaan ñu sii ndo sa cuenda cuhva vaha xaan sityiño ra Ndyoo sii ndo.

¹⁵ Tyahvi ndyoo sii ra Ndyoo sa cuenda sa saha maa ra. Saha ra sii zehe ra. Vaha xaan sa saha maa ra ndya cuhva ña ñihi ca ndi tuhun cahan ndi sa cuenda si.

10

Iyo cuhva sii ra Pablo sa cahan ra sihin ra hermano vaty minoo ra cuu apóstol cuu ra

¹⁻² Yuhvi ra Pablo sique minoo tumañi iñi sii ndo sihin sa vii, tañi sa vii sa iyo sii ra Cristo. Vaty iyo ndo catyi ndo vaty tatu zacote ñaa tyiño sii ndo sihin carta, xaan xaan quehin, catyi ndo. Ta tatu ndyei sihin ndo vii xaan quehin, catyi ndo. Zoco sique tumañi iñi sii ndo vityi vaty ña cuñi cuxein sihin ndo tatu cuhin nu yucu ndo. Zoco site vaty cua cuxein sihin zuhva ndo quivi cuhin nu yucu ndo vaty iyo ndo catyi ndo vaty zavehi cuhva zavaha ñiyivi ña sito sii ra Ndyoo.

³ Ndisa vaty ñiyivi cuu ndi, zoco ña sahñi tahan ndi tañi sahñi tahan ñiyivi ñuu ñiyivi. Sahñi tahan ndi sihin sa ña vaha sihin tundyee iñi sa saha ra Ndyoo.

⁴ Ta ndaha tyiño sa sityiño ndi nu sahñi tahan ndi, ndaha tyiño sa saha maa ra Ndyoo cuu si. Ta iyo xaan tundyee iñi sii si, ta cuu zativi si tyiño cuhna.

⁵ Cua zahacanaa ndi ziqui tandihi sa ña vaha sa cahan ñiyivi sii ra Ndyoo ta ziqui tandihi inga sa ña vaha sa ña saha tyaa ñiyivi yahvi sii Tuhun Ndyoo. Ta tandihi cuhva sica iñi ñiyivi ñuu ñiyivi ya, saha cuenda ndi sii ra Cristo sa cundyaca ñaha ra sii si, ta tandihi si cua tyaa si yahvi sii ra.

⁶ Cua ndyehe ndi tatu sa tyaa vaha tandihi ndo yahvi sii ra Cristo, ta ziqui cua tasi tuñi ndi sii yoo ra ña tyaa yahvi.

⁷ Zoco maa ndo zaha xaan ndo cuenda cuhva caa ñiyivi tatu vaha ñu a ña vaha ñu, ta ña sito ndo ñaa sa iyo añima ñu. Tatu iyo ndo sito ndo vaty cuenda ra Cristo cuu ndo, cua coto tucu ndo vaty cuenda ra Cristo cuu tucu maa ndi.

⁸ Ta ña cahan nui vazu cuaha quehin sa cuenda cuhva saha ra Ndyoo sii, vaty ndisa i saha ra tyiño sii, sa tyindyeyi sii ndo ta yivi sa zativi sii ndo.

⁹ Ña cuñi sa caca iñi ndo vaty cuñi zayuhi sii ndo sihin carta ñi.

¹⁰ Vaty catyi ndo: Xaan xaan cahan carta ra. Ñihi xaan cahan si. Zoco mazu xaan ra tatu sa ndyaa ra, ta ña cuu vaha cahan ra, ndihi ca. Catyi ndo.

¹¹ Zoco tatu tacuan catyi ndo, cuñi si sa coto ndo vaty tañi cuhva tyei nuu carta ta zuun ñi cuhva cuan cua quehin quivi cua sei nu yucu ndo.

¹² Ña zaha maa ndi tuhun sa vaha xaan ndi tañi iyo inga ra nacaty sihin ndo vaty vaha xaan ra. Ndyehe ra cuhva iyo ra tahan ra, ta ndyehe ra sii maa ra, ta sica iñi ra vaty vaha xaan ra. Zoco ñahñi sa siñi tuñi vaha iyo sii ra cuhva cuan.

¹³ Zoco ma zacahnu maa ndi sii ndi minoo cuhva ña tahan si. Maa ra Ndyoo cuu ra i catyi ndyamaa cua zatyiño ndi, ta i saa ndi nu ndyaa maa ndo.

¹⁴ Tatu yivi maa ndi zacoto Tuhun Ndyoo sii ndo sa xihna ñi, ma tahan si sii ndi vityi sa zaha ndi cuenda sii ndo. Zoco tahan si sii ndi vatyí xihna ca maa ndi i saa nu ndyaa ndo sihin tuhun ra Cristo.

¹⁵ Ña catyi ndi vatyí tyiño inga ra cuu tyiño maa ndi. Zoco cuñi ndi vatyí nduvaha ca cuhva sino iñi ndo, ta ziqui cua nducahnu ca tyiño maa ndi nu tahan si zatyíño ndi.

¹⁶ Ta ziqui cua zacoto ca ndi tuhun ra Cristo ñuu sica ca ityi nuu ca nu yucu ndo, nu ta coto ca ñu Tuhun Ndyoo. Ña cuñi ndi zatyíño ndi nu sa quisaha inga ra sa xihna ñi. Ña cuñi ndi zacahnu ndi sii ndi ta catyi ndi vatyí tyiño inga ra cuu tyiño maa ndi.

¹⁷ Tatu iyo ra cuñi ra zacahnu ra sii ra, vaha ca nacatyí ra cuhva i zavaha ra Ndyoo ta zacahnu ra sii ra Ndyoo.

¹⁸ Vatyí ña quita vaha minoo ra catyi vatyí vaha xaan ra. Quita vaha ra sa ndisa tatu catyi ra Ndyoo vatyí vaha ra.

11

Zacuenda ndo sii ndo sihin ra zandavi ñaha

¹ Zandyee ndo iñi ndo zuhva ca vatyí cua quehin zuhva ca sa tondo. Zandyee ndo iñi ndo nanacatyí ñaa sa iyo añime.

² Vatyí ñoho xaan iñi sii maa ndo sihin minoo cuhva i saha ra Ndyoo sii, vatyí mi i tyihi sii ndo ityi ra Cristo, ta cuñi vatyí ñin ñi sii maa ra cuan cua cuñi xaan ndo tañi cuñi xaan minoo ñaha yoco sii ra cua tandaha sihin ña.

³ Zoco sica xaan iñi sa cuenda ndo coto tahan si sii ndo tañi i tahan si sii cu Eva vatyí i zandavi ñaha cuihna sii ña. Ta yucuan cuenda sica xaan iñi sa cuenda ndo coto caca iñi ndo inga cuhva sa cuenda ra Cristo ta coto zandoo ndo cuhva sa zacahnu ndo ñin ñi sii maa ra.

⁴ Vatyí maa ndo tuhva ndo tyizoho sa cahan inga ra, tuhun inga Jesús, ra ña tuhva ndi cahan tuhun. Ta ra yucuan cahan sa cuenda inga tatyí, sa yivi Tatyí Ii sa ñihi maa ndo. A tatu catyi ra cuan, inga cuhva cua cacu ndo, vaha xaan tyizoho ndo sa cahan ra.

⁵ Ta ña sica iñi vatyí vaha ca numinoo ca ra zatyíño tyiño ra Ndyoo ta ziqui mi vazu sica iñi ra cuan vatyí vaha xaan ca ra.

⁶ Vazu ña cuu vaha quehin, zoco sito xein Tuhun Ndyoo. Ta sa cuaha xaan saha zañaha ndi sii ndo cuhva sa cuu zavaha ndi.

⁷ ¿Atu sica iñi ndo vatyí i zavehi sa ña vaha vatyí ñá quihin xuhun ndo quivi i zacote tuhun ra Cristo sii ndo? I zanduluhli sii, vatyí cuñi sa cua sino iñi ndo.

⁸ I tyindyee ra hermano inga ñuu sii, sihin xuhun. I quihin xuhun ra sita sasi ñi ñi sa tyindyeyi sii maa ndo sihin Tuhun Ndyoo.

⁹ Ta quivi sa siñi ñuhu xuhun sii, zoco ñá sique xuhun sii maa ndo vatyí i quisi ra hermano ndya Macedonia ta saha maa ra sa siñi ñuhu sii. Ta nu ñá yozo ziqui numinoo ndo sii. Ta nu ma cozo ziqui ndo sii ityi nuu ca.

¹⁰ Vatyí tañi sa site vatyí maa ñi tuhun ndisa ra Cristo quehin, ta tacuan tucu site vatyí ma cuhve sa quindyaa ndoho, ra nu cu si Acaya, sa zii cuñi vatyí ñá sique xuhun sii ndo ta ma caque xuhun sii ndo ityi nuu ca.

¹¹ ¿Ta ñaa cuenda zavehi cuhva ya? ¿Atu zavehi sii si vatyí ña cuñi sii ndo? Sito vaha ra Ndyoo vatyí cuñi xein sii ndo.

¹² Ta cua zavaha que cuhva ya vatyí cuñi zañehi vatyí ña ndisa inga ra sa catyi vatyí inuu ñi zatyíño ra tañi mi. Zoco ña ndisa ra cuan vatyí sica ra xuhun.

¹³ Catyi ra cuan vatyí apóstol cuu ra, zoco ña ndisa. Zandavi ñaha ra.

¹⁴ Ta ña iyo cuñi sihin cuhva cuan vatyí ndya cuihna ta cuu zanduu ra sii ra tañi cuhva caa minoo ángel sa ndisi xaan sihin sa ndisi maa ra Ndyoo.

¹⁵ Ta ñiyivi cuu tucu zandavi ñaha ñu tatu cuñi ñu. Yucuan cuenda ra ndyico sii ra ña vaha, zaha ra tuhun vatyí ra zavaha sa vaha cuu ra. Zoco cua coo quivi cua tasi tuñi ra Ndyoo sii ra sihin cuhva tahan si sii ra.

Cuhva i ndyehe ra Pablo tundoho vatyí minoo apóstol cuu ra

¹⁶ Catyi inga saha vatyí ma caca iñi ndo vatyí minoo ra loco cui vatyí quehin cuhva ya. Zoco tatu tacuan sica iñi ndo, naquehin sihin ndo tañi sa ra loco cui. Ta cua zacahni sii zuhva.

¹⁷ Yívi ra ndyaca ñaha sii yo cuu ra catyi sihin vatyí quehin cuhva ya, zoco quehin tañi minoo ra loco vatyí zacahni sii.

¹⁸ Iyo cuaha xaan ra zacahnu sii ra vatyí vaha xaan ra cuñi maa ra ityi nuu ñiyívi ñi. Ta yucuan cuenda cua zacahnu tucu mi sii.

¹⁹ Vatyí zii xaan cuñi ndo tyizoho ndo sa cahan inga ra loco cuan, ta sito xaan maa ndo cuñi ndo.

²⁰ Cundyee iñi ndo tatu catyi inga ra cuan sihin ndo vatyí cua zatyíño ndo tyiño ra. Zuhu ra sa sii ndo, ta ña tuu iñi ndo. Cuñi ra cundyaca ñaha ra sii ndo. Ña cuu ndyehe ra sii ndo, ndya cuhva cati ra nuu ndo, ta cundyee iñi ndo sihin tandíhi sa zavaha ra sihin ndo.

²¹ ¿Atu sicoo cuatyí mi vatyí ñá caña iñi zavehi cuhva cuan sihin ndo, cuñi ndo? Ña yuhu maa ra cuan zacahnu ra sii ra, ta vityí ña yuhu tucu mi. Ta cua quehin tañi minoo ra loco.

²² Catyi ra cuan vatyí ra hebreo cuu ra. Ra hebreo cuu tucu yuhvi. Ta ra ñuu Israel cuu ra cuan. Ta zuun tucu ra cuu ii. Ñiyívi sii ra Abraham cuu ra, ta zuun tucu cuu ii.

²³ Catyi ra cuan vatyí muzu ra Cristo cuu ra. Ta vityí cua quehin tañi minoo ra loco vatyí cuñi catyi sihin ndo vatyí ñihi ca cui muzu ra Cristo vatyí cuaha xaan ca zatyíñe tyiño ra Cristo ta ziqui inga ra cuan. Cuaha ca saha i tyihi ñiyívi sii, vehe caa. Cuaha xaan saha i cañi ñu sii. Ta cuaha xaan saha i cuñi cahñi ñu sii.

²⁴ Ohon tahan saha i cañi ñiyívi hebreo sii sihin cuarta. Oco sahun cumi saha tahan tahan saha.

²⁵ Uñi saha i cañi ñiyívi sii sihin yutu, ta minoo saha i cañi ñu sii sihin yuu. Uñi tahan saha i ndyee barco sa ñohi, ta minoo ñiyaca ta minoo ndyiyaca i ndoi sisi tyañuhu.

²⁶ Cuaha xaan, cuaha xaan sica noi. Iyo saha sa yatyí tyañi yuu. Zayuhu ra zuhu sii. Quiñi xaan zavaha ra hebreo ra tehin sihin. Quiñi xaan zavaha ñiyívi inga tata sihin. Cuaha xaan sa ica i cuu sii, ñuu nahnu, sisi cuhu, nu tyañuhu ta nu iyo ñiyívi catyi vatyí sino iñi ñu, zoco ña ndisa ñu.

²⁷ Ñihi xaan zatyíñe ta ndyehi tundoho ta cundihi xaan iñi. Cuaha saha ñá quixi. I sizoque, ta ityi ndutya. Cuaha saha ñá ñihi sa casi. Visi xaan i cui, ta ña cuaha zahme.

²⁸ I ndyehi tandíhi cuhva cuan ta inga tucu cuhva vatyí tandíhi quívi sica xaan iñi tatu iyo vaha tandíhi ñiyívi sino iñi.

²⁹ Tatu iyo minoo ndo nduvita cuhva sino iñi ndo, cuñi xein tyindyeyi sii ra tañi sa iin ñi cui sihin ra. Tatu iyo minoo ra zandoyo ñuhu sii hermano ta ña sino vaha ca iñi ra, cuxein.

³⁰ Tatu cuñi si vatyí zacahni sii sa zuun ñi mi (ta tacuan ta cua coto ndo vatyí muzu maa ra Ndyoo cui sa ndisa cui; cua zavehi sii si) zoco cua nacatyí maa ñi cuhva zañaha si vatyí ñahñi tundyee iñi iyo sii mi sa maa tuhun ñi.

³¹ Maa ra Ndyoo, Zutu ra Jesucristo ra ndyaca ñaha sii yo, cuu ra cuñi si zacahnu yo tandíhi cui tyiemvu. Ta sito maa ra vatyí quehin sa ndisa ta ña vatyé.

³² Quívi sa sehin ñuu Damasco, ra cu gobierno cuenda ra rey Aretas i sicumi ra yuvehe cahnu ñuu cuan sihin zandaru vatyí cuñi ra tiin ra sii.

³³ Zoco i zanoo ñiyívi sii sisi minoo tyica cahnu nu ndyaa minoo ventana nuzama cuan, ta cuhva cuan i quite ta i sino xehi sii ra cuan.

12

Sa zañaha ra Ndyoo sii ra Pablo

¹ Site vatyí ñahñi cua ñihi sihin cuhva sa zacahni sii, zoco cua nacatyí cuhva i zañaha ra ndyaca ñaha sii yo sii.

² Site minoo ra sino iñi sii ra Cristo. (Ihya cahan ra Pablo zuun ñi sa cuenda maa ra.) Sa yaha usi cumi cuiya vityi ndya quivi i sindyaca ra Ndyoo sii ra ndya sa cu uñi yutyi andivi. Ña site tatu sahan coño ñuhu ra a ña sahan. Yuhvi ña site. Maa ñi ra Ndyoo sito.

³⁻⁴ Zoco site vatyí sahan ra cuan nu ñoho ñiyivi vaha, ñu sa sihi. Ña site tatu sahan coño ñuhu ra sa quehin tuhun ya a ña sahan si. Maa ñi ra Ndyoo sito. Ta i sahan ra cuan nu i siñi ra tuhun xehe. Xehe xaan tuhun cuan, ta yoñi rayi cuu nacatyí sii si.

⁵ Tahan si sii, sa zacahni sii, sa cuenda cuhva i zañaha ra Ndyoo sii minoo ra cuan (vatyi zuun ñi ra cuan cui), zoco ma catyi vatyí ra vaha xaan cui sa cuenda cuhva cuan. Cua catyi vatyí ra vaha cui maa ñi sa cuenda sa ñahñi tundyee iñi iyo sii sa maa ñi mi.

⁶ Zoco tatu cuñi zacahni sii, yivi ra loco cui vatyí maa ñi sa ndisa cuu sa quehin. Zoco ma catyi vatyí ra vaha cui coto yaha xaan zacahnu ñiyivi sii, minoo cuhva ña tahan si. Cuñi sa ndyehe ndo cuhva iye ta cuhva zacuehi ta ziqui cua coto ndo tatu vehi a ña vehi.

⁷ Ta coto caca iñi vatyí vaha xein sa cuenda sa cuaha xaan cuhva i zañaha ra Ndyoo sii, i saha tucu ra sa cañi cuhna sii coño ñuhi. Cahnu xaan tundoho i tasi cuhna sii, coto caca iñi vatyí vaha xein.

⁸ Uñi tahan saha i sique sii ra ndyaca ñaha sii yo natyaa siyo ra tundoho ya sii.

⁹ Ta tyehen i catyi maa ra Ndyoo sihin: “Cuaha xaan sa vaha sehi suun, ta ñahñi ca sa siñi ñuhu suun. Ta ma nduvohon. Ta tatu ñahñi tundyee iñi iyo suun, zoco ndyehe ca ñiyivi tundyee iñi mi sa iyo suhun”, catyi ra. Ta yucuan cuenda zii xaan cuñi vatyí ñahñi tundyee iñi iyo sii. Ta tacuan ta cua coo xaan tundyee iñi ra Cristo sihin.

¹⁰ Yucuan cuenda zii xaan cuñi tatu vita xein, tatu cuxaan ñiyivi sihin, tatu iyo sa siñi ñuhu sii, tatu cuñi cahñi ñiyivi sii, ta tatu ndyehe xein tundoho sa cuenda ra Cristo vatyí tatu ñahñi tundyee iñi iyo sii sa maa ñi mi, ñihi que tundyee iñi ra Ndyoo.

Sica xaan iñi ra Pablo sa cuenda ñiyivi sino iñi sii ra Ndyoo ñuu Corinto

¹¹ Tañi minoo ra loco cui tatu zacahni sii, zoco maa ndo zañiñi sii, sa zavehi sii si vatyí ña tyaa ndo yahvi sii. Maa ndo tahan si sa cahan vaha sa cuenda mi, zoco ña cuñi ndo. Ndyico ndo sii ra catyi vatyí vaha xaan zatyíño ra tyíño ra Jesús, ta ñahñi cuhva sa luhlu que ta ziqui maa ra vazu ñahñi ra cui.

¹² I ndyehe ndo cuhva i zatyíñe tyíño ra Ndyoo nu yucu ndo. I zandyee xein iñi cuhva ndyehi tundoho, ta i zavaha xein zeña ta sa ndyityi ta tyíño sihin tundyee iñi ra Ndyoo.

¹³ ¿Atu vaha ca ñiyivi i cui sihin ra hermano inga ñuu ta ziqui sihin maa ndo? Ña tacuan. Inuu ñi cui sihin tandiñi ndo. Minoo ñi cuhva sa ñá zavehi sihin maa ndo cuu sa ñá yozo ziqui ndo sii. Zaha ndo tucahnu iñi sii, tatu zavehi sa ña vaha cuhva cuan.

¹⁴ Ta vityí sa ndyaa listi sa cu uñi saha sa cua quisi ndyehi sii ndo. Ta ma cozo ziqui ndo sii, vatyí ña cuñi ndaha tyíño ndo. Cuñi sii maa ndo. Minoo ra cu zutu sa ndyihí, tyindyee ra sii zehe ra ta yivi zehe ra tyindyee sii ra.

¹⁵ Ta yuhvi zii xaan cua cuñi cuhve sa sii, sa cuenda maa ndo. Ta cuhva ndya mi, ta cua zandiñi tundyee iñi sii, sa cuenda maa ndo. Zoco zehi cuenda vatyí tatu cuaha ca cuñi sii ndo, siin xaan cuñi ndo sii.

¹⁶ Ta vazu sito vaha ndo vatyí ñá yozo ziqui ndo sii, zoco iyo ndo catyi ndo vatyí i zandavi ñehi sii ndo minoo cuhva ñá tuu iñi ndo ta i quihin sa sii ndo. Catyi ndo.

¹⁷ ¿Atu i zandavi ñehi sii ndo sihin minoo ra i tasi nu yucu ndo quivi cuan?

¹⁸ Quivi i tasi sii ra Tito sihin inga ra hermano cuan, ¿atu i zandavi ñaha ra Tito cuan sii ndo ta quihin ra sa sii ndo? Ña tuhva ndi zandavi ñaha sii ndo. ñin ñi cuhva zavaha nduu tahan ndi.

¹⁹ ¿Atu sica iñi ndo vatyí nduqui cuhva zacaqui sii, ityi nuu ndo sihin tuhun ya? Zoco ña tacuan. Sito ra Ndyoo cuhva cahan ndi. Ta cahan ndi sa cuenda ra Cristo. Ta tandiñi sa zavaha ndi, zavaha ndi sii si vatyí cuñi ndi tyindyee ndi sii ndo. Cuñi xaan ndi sii ndo, ta cuñi ndi sa cua coto vaha ca ndo sii ra Ndyoo.

²⁰ Yuhi coto cua sei yucuan ta nañihi sii ndo minoo cuhva sa ma tahan iñi. Ta ziqui ma tahan iñi maa ndo cuhva cua zavehi tatu nañihi sii ndo sañi tahan ndo, tatu ndyiyi iñi ndo sa sii tahan ndo, a tatu tuhva ndo cuxaan, a tatu ña sica maa iñi ndo sa cuenda ra

tahan ndo, a tatu cahan ndo ndya vaha ñi sii ra tahan ndo, a tatu tyaa xaan ndo cuatyí sata ra tahan ndo, a tatu zacahnu ndo sii ndo a tatu iyo tizihí nu yucu ndo. Tatu zavaha ndo cuhva cuan, ma tahan iñi ndo cuhva cua zavehi sihin ndo.

²¹ Ta yuhi coto cuhva ra Ndyoo sa coo sa cahan nuu sii, sa cuenda ndo quiví sei nu yucu ndo. Ta cua nducuihya xaan iñi vatyi ndoho sa zavaha cuatyí, tañaha ca ndu-uu iñi ndo cuatyí ndo. Zavaha ca ndo sa quiñi. Quixi ndo sihin ñaha sa yívi ñazihí ndo cuu, ta zavaha ndo tandihí inga nuu sa ña vaha.

13

Zaha ndo cuenda tatu ndyico vaha ndo sii ra Cristo a ña ndyico ndo

¹ Sa cuñi cuu si sa cu uñi saha quisi ndyehi sii ndo. Tatu iyo uu a uñi tahan sa ndaa, cua cundaa tyiño sa cuenda minoo minoo ndoho ra zavaha sa ña vaha.

² Quiví i sindyei sihin ndo sa cu uu saha cuan, i catyi sihin ndoho ra zavaha cuatyí vatyi nazandoo ndo cuatyí ndo. Ta vityi nacatyí tuqui zuun ñi cuhva cuan sihin ndoho ra ñá zaña cuatyí ndya quiví cuan. Ta sihin tandihí inga ndo nacatyí tuqui inga saha vatyi ma cundahvi iñi sii ndo quiví cua sei nu yucu ndo.

³ Ta ziqui cua coto ndo cuhva sa cuñi xaan ndo coto ndo: tatu quehin tuhun ra Cristo a yívi. Ta ña vita iyo ra Cristo sihin maa ndo, zoco iyo xaan tundyee iñi maa ra sisi aña ndo.

⁴ Ndisa, i cuu si tañi vita xaan ra quiví i sihi ra nu cruz, zoco vityi ndito ra sihin tundyee iñi maa ra Ndyoo. Ta tacuan tucu maa ndi, vita iyo ndi sihin ra sa catyi coño ñuhu ndi; zoco iyo tundyee iñi ra Ndyoo sii ndi sa cuenda cuhva cua zavaha ndi sihin maa ndo vatyi iñi ñi cuu ndi sihin ra.

⁵ Ndyehé vaha ndo sii ndo tatu sino iñi ndo sa ndisa cuii. Nacoto ndo vatyi iyo ra Cristo aña ndo tatu sino ndisa cuii iñi ndo sii ra. Zoco tatu ña sino iñi ndo sa ndisa, yoñi ra ndyaa sihin ndo.

⁶ Ta cuñi sa cua nacoto ndo sa ndisa cuii vatyi iyo ra Cristo sihin mi.

⁷ Ta vityi sique sii ra Ndyoo vatyi ma zavaha ndo cuatyí. Ña cuñi sa cua cahan vaha ñiyívi sa cuenda maa ndi cuhva cuan. Cuñi sa cua zavaha ndo sa ndoo vazu cahan vaha ñiyívi sa cuenda ndi a vazu cahan ñu ndya vaha ñi sii ndi.

⁸ Vatyi ma cuu tyixehe maa ndi sii sa ndisa, sino ca cuñi si sa zañaha ndi sii ñiyívi ñaa sa cuu sa ndisa.

⁹ Yucuan cuenda zii xaan cuñi ndi tatu ñahñi tundyee iñi sa zuun ñi sii maa ndi iyo sii ndi ta tatu ndyee iñi maa ndo sihin tundyee iñi maa ra Ndyoo. Ta ihya cuu minoo cuhva sa ñihi xaan cuñi ndi vatyi nanduu ndo ñiyívi vaha xaan sa ndisa cuii.

¹⁰ Tasi carta ya sii ndo cuee ca sa cuhin nu yucu ndo vatyi cua zanduvaha ndo sii ndo. Ta ña cuñi ca si sa cuxein sihin ndo quiví cua sei yucuan. Cuñi cutyiñe tundyee iñi sa saha ra Ndyoo sii, ta zandundyee que iñi ndo, ta yívi sa zatívi ndihí sii ndo.

¹¹ Ta vityi sa cuñi ndihí carte hermanos. Ihya ñi ca tuhun quehin: cuzii iñi ndo, zanduvaha ndo cuhva iyo ndo, tyaa ndo yahvi sa quehin, iñi ñi cuhva caca iñi ndo, ta naco sa taxi sii ndo sihin minoo ndo ta sihin inga ndo. Ta cua coo ra Ndyoo sihin ndo. Maa ra saha sa coo sa taxi sii yo sihin ra ta cuñi xaan ra sii yo.

¹² Cuhva ndo minoo ndyoo nacucumi sii minoo ndo ta sii inga ndo.

¹³ Tandihí cuii ñiyívi sino iñi ihya tasi ñu minoo nacumi sii maa ndo.

¹⁴ Naco xaan tumañi iñi sa saha ra Jesucristo sihin ndo, ta nandoo vaha xaan ndo sihin cuhva cuñi xaan ra Ndyoo sii ndo. Ta nandu-iñi tandihí ndo sihin Tatyí Ii. Nacuu si tacuan, ta nacuu si sa ndisa.

Minoo Carta I Tasi Ra San Pablo Sii Ñiyivi Sino Iñi Sii Ra Ndyoo Ñuu Galacia

Tyaa ra Pablo minoo carta sii ñiyivi sino iñi sii ra Ndyoo ñuu Galacia

¹ Yuhvi ra Pablo, minoo ra apóstol ra i casi ra Jesucristo cui. Yivi ñiyivi i saha tyiño ya sii, ta yivi ñiyivi i tasi sii, sino ca ra Jesucristo ta ra Ndyoo Zutu yo, ra i zanandoto sii ra Jesús sisi sa i sihi ra.

² Yuhvi ta tandihi ra hermano ndyaa ihya sihin, tyaa ndi carta ya sii ñiyivi sino iñi ñuu Galacia.

³ Nacuhva xaan ra Ndyoo Zutu yo tumañi iñi sii ndo ta sa coo sa taxi añima ndo, ta tacuan tucu nacuhva ra Jesucristo, ra ndyaca ñaha sii yo.

⁴ I saha maa ra Jesús sa cuu ra sa cuenda cuatyí maa yo vatyí tacuan ta cua zacacu ra sii yo sii sa quiñi iyo ñuu ñiyivi ya vatyí yucuan cuu sa cuñi ra Ndyoo Zutu yo.

⁵ Yucuan cuenda ¡nazacahnu yo sii ra Ndyoo tandihi cui tyiemvu! Amén.

Ñahñi inga ca cuhva cuu cacu añima yo

⁶ Iyo xaan cuñi vatyí yatyí xaan cuñi zanandoo ndo sii ra Ndyoo. I cana ra sii ndo sihin cuhva cuñi xaan ra Cristo sii ndo, zoco vityí tyaa ndo yahvi sii inga tuhun ta ndyico ndo inga cuhva cua cacu ndo cuñi ndo.

⁷ Zoco ñahñi inga ca cuhva cua cacu yo sa ndisa. Iyo zuhva ra cuñi nazaca ra sa siñi tuñi sii ndo, ta cuñi ra zatívi ra Tuhun Vaha sa cuenda ra Cristo.

⁸ Zoco vazu maa ndi a minoo ángel quisi ndya andívi ta zacuahá ndi inga Tuhun Vaha sii ndo sa cuenda ra Cristo ta ziquí tuhun sa yaha zacoto ndi sii ndo, tatu yoo ra zacuahá inga cuhva cuan, nacuxaan xaan maa ra Ndyoo sihin ra.

⁹ Ta tañi sa catyí, cua catyí tuqui inga saha. Tatu yoo ra zacuahá inga Tuhun Vaha sii ndo ta ziquí tuhun sa yaha tiin cuenda ndo, nacuxaan xaan maa ra Ndyoo sihin ra cuan.

¹⁰ Ta sihin cuhva ya, cuu ndyehe ndo vatyí ña nduqui cuhva caca iñi ñiyivi vatyí vaha xein. Nduqui cuhva cui minoo ñiyivi vaha ityi nuu ra Ndyoo vatyí tatu nducu que cuhva cuzi iñi ñiyivi sihin, yivi muzu vaha ra Cristo cui.

Cuhva i nduu ra Pablo minoo apóstol

¹¹ Ta zacote sii ndo hermanos vatyí tuhun vaha sa i zacote sii ndo, yivi tuhun sa quisi xiñi ñiyivi ñi cuu si.

¹² Yivi tuhun ñiyivi i tiin cuende, ta yivi ñiyivi i zacuahá sii. Maa ra Jesucristo i zacoto sii.

¹³ Sa sito ndo cuhva i cui quívi tañaha ca sino iñi ta sindyique cuhva sino iñi ñiyivi hebreo. Sito ndo cuhva i zayanga xein sii ñiyivi i casi ra Ndyoo ta cuhva i cuñi sa ndaha zacunei cuhva yucu ñu.

¹⁴ Quívi i sindyique ley hebreo ta minoo ra cu nuu i cui sii inga ra sa iin ñi cuiya ndi vatyí i cuñi xein zavehi tandihi costumbre sa i zavaha ñiyivi sahnu sii ndi.

¹⁵ Zoco cumañi ca càqui, ta sa cundaa iñi ra Ndyoo vatyí cua casi ra sii. Ta sa saa si quívi i catyí ra ta ziquí i cana ra sii, vatyí cuñi xaan ra sii. Ta catyí ra vatyí cua zatyiñe tyiño ra.

¹⁶ Ta i zacoto ra sii, sa cuenda Zehe ra vatyí cua quehin tuhun ra nu ndyaa ñiyivi sa yivi ñiyivi hebreo cuu. Ta quívi i tehin cuhva cuan yoñi sii i nducu tuhun tatu vaha.

¹⁷ Ta ñá sehin ñuu Jerusalén nu ndyaa inga ra apóstol i casi ra Jesús cuee ca ta ziquí mi. Zoco i sehin nu cu si Arabia, ta ziquí i sinanuhin ndya ñuu Damasco.

¹⁸ I yaha uñi cuiya ta ziquí i sehin ñuu Jerusalén vatyí cuñi quehin sihin ra Pedro. Ta i ndoi sahun quívi sihin ra.

¹⁹ Zoco yoñi inga ra apóstol i ndyehi, maa ñi ca ra Jacobo yañi ra Jesús.

²⁰ Sito vaha ra Ndyoo vatyí cuhva tyei ihya maa ñi sa ndisa cuu si.

²¹ Ta sa yaha sehin ñuu Jerusalén ta ziquí i sehin nu cu si Siria ta nu cu si Cilicia.

²² Ta ñiyivi sino iñi sii ra Cristo nu cu si Judea, ta coto ca ñu sii, quivi cuan.

²³ Zoco i siñi ñu sa cahan ñiyivi sa cuende ta catyi ñu: “Ra i zayanga xaan sii yo quivi cuan, vityi sino iñi ra ta nacatyí ra tuhun ra Cristo. Ta quivi cuan i cuñi ra zanaa ra sii si.” Catyi ñu.

²⁴ Ta i zacahnu xaan ñu sii ra Ndyoo sa cuenda mi.

2

Inga ra apóstol, ndoo ra vaha sihin cuhva zacuaha ra Pablo

¹ I yaha usi cumi cuiya, ta ziqui i sehin ñuu Jerusalén inga saha sihin ra Bernabé. Ta i sahan tucu ra Tito sihin ndi.

² I sehin vatyí maa ra Ndyoo i zañaha sii, vatyí cuñi si sa cuhin. Ta i nacatyí sihin ra yucuan, cuhva zacuehi tuhun sa cuenda ra Cristo sii ñiyivi sa yivi ñiyivi hebreo cuu. Maa ñi sihin ra cu nuu sii ra hermano yucuan i quehin vatyí cuñi cote yozo caa sica iñi ra coto ma tahan iñi ra cuhva zacuehi ta catyi ra vatyí sa caha ñi cuu tyiño zacui.

³ Ta i ndoo ra vaha sihin cuhva zacuehi. Ta ñá zañiñi ra sii ra Tito sa zavaha ra costumbre circuncisión cuan, ta yivi ñiyivi hebreo cuu ra Tito.

⁴ Ndisa vatyí i quihvi xehe zuhva ra catyi vatyí hermano cuu ra, zoco ña ndisa ra. I cuñi maa ra cahan cuehe ra sa cuenda cuhva iyo yo. Sa cuenda ra Cristo, ta ñahñi ca sa ndyaca ñaha sii yo, zoco cuñi ra cuan vatyí tyaa yo yahvi sii tandihi costumbre sahanu.

⁵ Zoco ñá saha maa ndi sa cundyaca ñaha ra cuan sii ndi nu siin vatyí ña cuñi ndi sa zandoo maa ndo tuhun ndisa sa cuenda ra Cristo. (Vatyí yivi ñiyivi hebreo cuu ndo, ta ña cuñi ndi sa caca iñi ndo vatyí cuñi ca si sa tyaa yo yahvi sii ley sahanu ta cacu yo.)

⁶ Ta ra hermano, ra ndyaca ñaha sii ñiyivi sino iñi ñuu Jerusalén, ñahñi inga sa siñi tuñi vaha i saha ra sii, quivi cuan. Catyi ra ñiñi ca sii ra, zoco ña ñiñi ra sa cuenda mi vatyí ña ndyehe ra Ndyoo tatu sica iñi ñiyivi vatyí ra ñiñi cuu yo. Ndyehe maa ra ñaa sa iyo añima yo.

⁷ Ñahñi inga ca tuhun i saha ra cuan sii. I nacoto ra vatyí maa ra Ndyoo i tasi sii, sa quehin tuhun ra Cristo sihin ñiyivi sa yivi ñiyivi hebreo cuu tañi i tasi ra sii ra Pedro sa cahan ra sihin ñiyivi hebreo.

⁸ Vatyí zuun ñi ra Ndyoo cuu ra i tasi sii ra Pedro sa cuu ra minoo apóstol nu ndyaa ñiyivi hebreo tañi yuhvi cui sa cuenda ñiyivi sa yivi ñiyivi hebreo cuu.

⁹ Yucuan cuenda i nacoto ra Jacobo, ta ra Pedro, ta ra Juan, ra cu nuu cuu tandihi ra yucuan, ta i nacoto ra vatyí maa ra Ndyoo cuu ra i saha sa vaha sii, sa quehin tuhun ra Cristo sihin ñiyivi. Ta ziqui i natiin ndaha tahan ra sihin mi ta sihin ra Bernabé vatyí ndoo ra vaha vatyí cua zatyíño ndi sihin ñiyivi sa yivi ñiyivi hebreo cuu, ta cua zatyíño maa ra sihin ñiyivi hebreo.

¹⁰ Minoo ñi cuhva i catyi ra sihin ndi sa nacohon iñi ndi ta tyindyee ndi sii ñiyivi ndahvi, ta yucuan cuu sa tuhva xein zavaha.

Cuxaan ra Pablo zuhva sihin ra Pedro

¹¹ Ta quivi i saa ra Pedro ñuu Antioquía i catyi sihin ra vatyí ña vaha cuhva zavaha ra.

¹² Vatyí sa xihna ñi i zavaha ra sa vaha ta sasi ra sihin ñiyivi sa yivi ñiyivi hebreo cuu. Tacuan i zavaha ra ndya i saa zuhva ra hebreo, ra i tasi ra Jacobo, ta ziqui ñá cuñi ca ra Pedro casi sihin ñiyivi sa yivi ñiyivi hebreo cuu vatyí yuhu ra sii ra i saa cuan vatyí sica iñi ra cuan vatyí ñiñi xaan costumbre circuncisión.

¹³ Ta i cu-ñi inga ra hebreo sihin ra Pedro ta nduu tucu ra ra vatya, ta ndya cuhva i ndu-ñi tucu ra Bernabé sihin ra.

¹⁴ Ta i ndyehi vatyí ña vaha cuhva zavaha ra. Ña sasi tahan si sihin cuhva catyi tuhun ra Cristo. Yucuan cuenda i catyi sihin ra Pedro ityi nuu tandihi ra yucu yucuan: “Yoho, minoo ra hebreo cuun, zoco zavohon cuhva zavaha ñiyivi sa yivi ñiyivi hebreo cuu. Ta ña zavaha con tandihi costumbre hebreo. ¿Ta ñaa cuenda cuñun zañiñun sii ñiyivi sa yivi ñiyivi hebreo cuu sa cua zavaha ñu costumbre maa yo ra hebreo?” I catyi.

Inuu ñi cuhva cua cacu ñiyivi hebreo ta ñiyivi sa yivi ñiyivi hebreo cuu, sihin sa sino ñi ñi yo

¹⁵ Maa yo sa cuu yo ñiyivi hebreo, ña yaha xaan zavaha yo cuatyí sa nuu inga ñiyivi sa yivi ñiyivi hebreo cuu.

¹⁶ Zoco sito yo vatyí ma catyí ra Ndyoo sihin numinoo ra vatyí ñahñi cuatyí ra sa cuenda sa tyaa ra yahví sii ley i saha ra Ndyoo sii ra Moisés. Nduvaha yo ityí nuu ra Ndyoo sihin sa sino ñi yo sii ra Cristo Jesús. Yucuan cuenda sino ñi yo sii ra. Ta tacuan ta catyí ra Ndyoo vatyí ñahñi ca cuatyí yo ta yivi sa cuenda sa tyaa yo yahví sii ley sahnú vatyí yoñi sihin cua catyí ra Ndyoo vatyí ñahñi ca cuatyí ra sa tyaa ra yahví sii ley sahnú cuan, ta sii ra Cristo ña sino ñi ra.

¹⁷ Vityí sino ñi yo sii ra Cristo ta sica ñi yo vatyí sihin sa yucuan ñi ta cua catyí ra Ndyoo vatyí ñahñi ca cuatyí yo. Zoco tatu cuee ca ta cua nacoto yo vatyí ña ndisa cuu tuhun ra Cristo ta ma cacu yo tatu ma zavaha yo tandihí sa catyí ley sahnú. ¿Atu cuñi si sa catyí yo vatyí sa sino ñi yo sii ra Cristo cuu sa i zatívi sii yo vatyí i zandoo yo ley sahnú sa cuenda sa sino ñi yo sii ra? ¡Numinoo saha ma catyí yo tacuan vatyí ña ndisa!

¹⁸ Zoco cua coo cuatyí yo tatu nanducu tucu yo cuhva sa natyaa tucu yo yahví sii ley sahnú sa i zanandoo yo.

¹⁹ I nducu yo cuhva tyaa yo yahví sii si quívi cuan. Ta ziquí i nacoto yo vatyí ma cuu cacu yo cuhva cuan, ta i zandoo yo sii si vatyí cuñi yo nduvaha yo ityí nuu ra Ndyoo sihin cuhva saha maa ra.

²⁰ Tañi sa sihi yo nu cruz sihin ra Cristo cuu si, zoco ndito yo. Zoco yivi ca maa yo ndito, ra Cristo cuu ra iyo añima yo. Ta cuhva iyo yo vityí ñuu ñiyivi ya, iyo yo tacuan vatyí sino ñi yo sii Zehe ra Ndyoo. Maa ra cuñi xaan sii yo, ta saha ra sa cuu ra sa cuenda yo.

²¹ Yuhví ña cuñi tyaa siye cuhva cuñi xaan ra Ndyoo sii yo vatyí tatu cuu nduu yo ñiyivi vaha ityí nuu ra Ndyoo sihin sa tyaa yo yahví sii ley sahnú, sa caha ñi cuu sa i sihi ra Cristo.

3

Sihin sa sino ñi yo sii ra Cristo ta ñihi yo Tatyí Ii

¹ Tondo xaan iyo ndo ndoho hermanos ñuu Galacia. ¿Yoo ra i zatívi sii ndo ta vityí ña cuñi ca ndo tyaa ndo yahví sii sa ndisa? Casi xaan i nacatyí ndi sihin ndo sa cuenda ra Jesucristo. Ta i cutuñi vaha ñi ndo ñaa cuenda i sihi ra nu cruz.

² Iyo minoo ñi tuhun cuñi nducu tuhun sii ndo: ¿Atu i ñihi ndo Tatyí Ii ra Ndyoo vatyí i tyaa ndo yahví sa catyí ley ra Moisés a sa sino ñi ndo tuhun sa cuenda ra Cristo?

³ ¿Ñaa cuenda i ndutondo xaan ndo? Quívi i quisaha sino ñi ndo, vaha xaan i tyaa ndo yahví sii ra Ndyoo sihin cuhva i tyindyee Tatyí Ii sii ndo. Zoco vityí cuñi ndo zatyíño ndo tyíño ra Ndyoo sihin tundyee ñi maa ndo.

⁴ ¿Atu sa caha ñi i ndyehe ndo cuhva i zacuu Tatyí Ii sihin ndo? Yivi sa caha ñi cuu si cuñi.

⁵ Saha ra Ndyoo Tatyí Ii ra sii ndo, ta zavaha ra sa ndyityí nu yucu ndo. Ta zavaha ra sii si vatyí sino ñi ndo sii ra Cristo, ta yivi sa cuenda sa zavaha ndo cuhva catyí ley ra Moisés.

⁶ Ta ra Abraham tucu, i sino ñi ra sii ra Ndyoo. Yucuan cuenda i catyí ra Ndyoo vatyí ñahñi ca cuatyí ra iyo.

⁷ Yucuan cuenda cuñi si sa coto ndo vatyí ñiyivi sino ñi sa ndisa cuí cuu ñiyivi sii ra Abraham.

⁸ Ta sa naha i sicundyaa Tuhun Ndyoo nuu tutu. Ta catyí si vatyí ityí nuu ca cua zanduvaha ra Ndyoo sii ñiyivi sa yivi ñiyivi hebreo cuu sihin ra vatyí cua sino ñi ñu. Ta yucuan cuenda i catyí ra Ndyoo sihin ra Abraham ta sa naha: “Sa cuenda moo ta cua cuhve sa vaha sii tandihí ñiyivi ñuu ñiyivi.”

⁹ Yucuan cuenda, ñiyivi sino ñi tañi sino ñi ra Abraham, saha ra Ndyoo sa vaha sii ñu tañi i saha ra sa vaha sii ra Abraham vatyí i sino ñi ra.

¹⁰ Ta ñiyivi sica iñi vatyí cua cacu ñu tatu zavaha ñu zuhva sa catyí ley sahnú, cua tasi tuñi ra Ndyoo sii ñu vatyí catyí Tuhun Ndyoo vatyí cua tasi tuñi ra Ndyoo sii tandíhi ñiyivi sa ma zavaha tandíhi cuii sa catyí ley cuan.

¹¹ Ma catyí ra Ndyoo sihin numinoo ñiyivi vatyí ñahñi cuatyí ñu ityí nuu ra vatyí tyaa ñu yahvi sii ley sahnú vatyí catyí Tuhun Ndyoo: “Nduvaha ñiyivi ityí nuu ra Ndyoo sihin sa sino iñi ñu sii ra. Ta cua cundito ñu tandíhi cuii tyiemvu.”

¹² Ta ley ra Moisés, ña iin ñi cuu si sihin sa sino iñi yo vatyí catyí si: “Ra zavaha tandíhi cuii tuhun ya, cua cundito ra tandíhi cuii tyiemvu.” (Zoco ma cuu zavaha yo sii tandíhi cuii si.)

¹³ I tava ra Cristo sii yo sisi cuhva i zatívi ley cuan sii yo vatyí sa i tiví maa ra sa cuenda yo tañi catyí Tuhun Ndyoo: “Yoo ra cua cuu nu cruz, yivi ra vaha cuu ra ityí nuu ra Ndyoo.” Ta yivi ra vaha i cuu ra Jesús ityí nuu ra Ndyoo cuhva sa sindyaa ra nuu cruz vatyí ndyizo ra cuatyí maa yo.

¹⁴ Sa cuenda ra Cristo ta saha ra Ndyoo sa vaha sii ñiyivi sa yivi ñiyivi hebreo cuu tañi i saha ra sa vaha sii ra Abraham. Vatyí sihin sa sino iñi yo sii ra Ndyoo ta ñihi yo Tatyí li sa catyí ra Ndyoo sa cua cuhva ra sii yo.

Zañaha ley sahnú sii yo vatyí iyo cuatyí yo, zoco ma zacacu si sii yo

¹⁵ Vityí, hermanos, cua quehin zuhva ziquí cuhva iyo si ihya ñuu ñiyivi. Tatu catyí minoo ra vatyí cua cuhva ra minoo sa cua cuhva ra sii inga ra ta tatu sa tyaa ra zivi ra, yoñi cuu zama sii si ta yoñi cuu tyizo zuhva ca ziquí si.

¹⁶ Ta i catyí maa ra Ndyoo vatyí cua cuhva ra sa cua cuhva ra sii ra Abraham ta sii minoo zehe ra. Ña catyí si nu tutu ra Ndyoo vatyí cua cuhva ra sii si sii cuaha ñiyivi zoco sii minoo ñi ra. Ta ra yucuan cuu ra Cristo.

¹⁷ Ta ihya cuu sa catyí: I cahan ra Ndyoo cuhva i cahan ra sihin ra Abraham, ta casi xaan i catyí ra sii si. I yaha cumi ziendu oco usi cuiya ta ziquí i saa ley ra Moisés. Zoco ma cuu zanaa ley cuan cuhva i catyí ra Ndyoo sihin ra Abraham. Ma cuu zandíhi si sii si.

¹⁸ Tatu cuu ñihi yo sa tahan si sii yo sihin sa tyaa yo yahvi sii ley sahnú, sa caha ñi cuu cuhva i catyí ra Ndyoo vatyí cua cuhva ra sii yo. Zoco sito yo vatyí i ñihi ra Abraham sa tahan si sii ra sa cuenda cuhva i cahan ra Ndyoo sihin ra.

¹⁹ ¿Ta yozo caa tyindyee ley ra Moisés? I saha ra Ndyoo ley cuan vatyí cua zacuaha si sii yo vatyí iyo cuatyí yo. Ta i ndoo si ndya cuhva ndya quivi i quisi ra Cristo, ra cu ñiyivi sii ra Abraham, vatyí i catyí ra Ndyoo sihin Abraham vatyí cua cuhva ra sa vaha sii ra cua quisi. Ta i saha ángel ley sii ra Moisés, ta ra Moisés saha sii si sii ñiyivi.

²⁰ Zoco ra Ndyoo cuu ra i cahan sihin ra Abraham quivi cuan, ta ñá nanducu ra Ndyoo yoo ca ra cua cahan sihin ra Abraham.

Cuenda sa iyo ley ra Ndyoo

²¹ ¿Atu cuñi si catyí si vatyí cuxaan ley ra Moisés sii tuhun sa saha ra Ndyoo sii yo? Ña tacuan. Zoco ma cuu nduvaha yo ityí nuu ra Ndyoo sihin sa tyaa yo yahvi sii ley sahnú cuan. Tatu sa vatyí cuu coo yo cuhva saa sihin sa tyaa yo yahvi sii zuhva ley cuan, vaha maa tacuan ñi. Zoco ña tacuan cuu si.

²² Catyí tutu ra Ndyoo vatyí iyo cuatyí sii tandíhi cuii ñiyivi. Ta tacuan ta cuu ñihi yo sa catyí ra Ndyoo sa cua cuhva ra vatyí cua cacu yo sa cuenda ra Jesucristo. Ta cua ñihi yo sii si sihin sa sino iñi yo.

²³ Quivi cumañi ca coo tuhun sa sino iñi yo sii ra Cristo, i tyazi ley cuan sii yo tañi sa ñoho yo vehe caa vatyí i ndatu yo quivi cua zañaha ra Ndyoo sii yo cuhva cua sino iñi yo sii ra, ta cua zacacu ra sii yo.

²⁴ Ley cuan i cuu si tañi minoo sa zacuenda sii yo ndya sa quisi ra Cristo, ta ziquí cuu nduvaha yo ityí nuu ra Ndyoo sihin sa sino iñi yo.

²⁵ Ta vityí sa saa quivi sino iñi yo sii ra Cristo ta ña siñi ñuhu ca ley cuan sa zacuenda si sii yo.

²⁶ Vatyí tandíhi yo cuu zehe ra Ndyoo vatyí sino iñi yo sii ra Cristo Jesús.

²⁷ Tandíhi yo, yo sa sicoo ndutya, sa cuenda ra Cristo cuu yo. Ta sa ndu-ín yo sihin ra, ta nduu yo tañi maa ra.

²⁸ Vityi ña ñiñi ca tatu cuu yo ñiyivi hebreo a ñiyivi inga tata a tatu cuu yo muzu ñiyivi a yivi a tatu cuu yo rayi a ñuzihi. Vatyí tandíhi yo sa ndu-ín yo sa cuenda ra Cristo Jesús.

²⁹ Ta tatu ñiyivi ra Cristo cuu yo, ñiyivi sii ra Abraham cuu yo sa ndisa cuii. Ta cua ñihi yo sa catyi ra Ndyoo sihin ra Abraham vatyí cua cuhva ra sii yo.

4

¹ Vityí cua quehin ziqui minoo cuhva. Minoo ra luhlu tatu sihi zutu ra ta zandoo ra tandíhi ndaha tyiño ra sa cuenda zehe ra, ma cuu cutyiño ñaha ra luhlu cuan sii si ndya cuahnu ra. Nii ñi sa luhlu ra, ta cuu ra tañi minoo muzu vehe zutu ra vazu tandíhi ndaha tyiño zutu ra cuu sii maa ra.

² Cuñi si coo minoo ra zacuenda sii ra ta ra cundyaca ñaha sa sii ra ndya cuhva ndya cua tahan si cuiya i catyi zutu ra, ta ziqui cuu naquihin ra ndaha tyiño zutu ra.

³ Ta zuun ñi cuhva cuan iyo tucu si sa cuenda maa yo. Quivi cumañi ca sino iñi yo sii ra Cristo, i sindyaca ñaha ley sahnu sii yo; i tyaa yo yahvi sii costumbre sahnu i zacuu si.

⁴ Ta tahan si quivi i tasi ra Ndyoo sii Zehe ra. I zacacu minoo ñaha sii ra, ta minoo ñiyivi hebreo i cuu ra, ta i tyaa ra yahvi sii ley sahnu.

⁵ I tasi ra Ndyoo sii ra vatyí cua zacacu ra sii ñiyivi tyaa yahvi sii ley sahnu vatyí tacuan ta cuu nduu ñu zehe ra Ndyoo.

⁶ Ta sa cuenda sa nduu yo zehe ra Ndyoo ta tasi ra Ndyoo Tatyí Ii ra Cristo sisi añaima yo. Ta yucuan cuenda catyi yo: “Ndyoo Zuti.”

⁷ Yucuan cuenda zehe ra Ndyoo cuu sii yo, ta yivi ca muzu cuu yo sii ley. Ta sa cuenda sa cuu yo zehe ra Ndyoo ta cua cuhva ra tandíhi sii yo sa cuenda ra Cristo.

Sica xaan iñi ra Pablo sa cuenda ñiyivi sino iñi

⁸ Quivi cumañi ca coto ndo sii ra Ndyoo, muzu i cuu ndo sii inga ndyoo sa yivi ndyoo cuu sa ndisa.

⁹ Zoco vityí sito ndo sii ra Ndyoo, a catyi vatyí maa ra sito sii ndo. ¿Ta ñaa cuenda cuñi ndo nduu ndo muzu inga saha ta nandyico ndo sii cuhva sahnu cuan (sii costumbre sahnu cuan)?

¹⁰ Zacahnu ca ndo vico, quivi nduyutya yoo ta vico tahan cuiya.

¹¹ Sica xaan iñi vazu sa caha ñi i zatyíñe sihin ndo.

¹² Ndoho hermanos, sica xein tumañi iñi sii ndo vatyí nduu ndo tañi mi vatyí ña ndyaca ñaha ca ley cuan sii. Sa ndui tañi i cuu maa ndo vatyí ñá tyaa ndo yahvi ley ra Moisés quivi ta cumañi ca sino iñi ndo. Zoco ña tyei cuatyí sata ndo vatyí i zavaha ndo sa ña vaha sihin mi vatyí ñahñi.

¹³ Sito ndo vatyí quivi i zacote Tuhun Ndyoo sii ndo sa xihna ñi, i cuhu xein.

¹⁴ Ta cuehe cuan tañi minoo prueba i cuu si sii, zoco ñá catyi ndo sa ma tyizoho ndo sa quehin, ta ñá sino sihin ndo sii. I tñin cuenda ndo sii, tañi minoo ángel ra Ndyoo cui a tañi ra Cristo Jesús.

¹⁵ ¿Ndyamaa cuahan sa zii xaan cuñi ndo quivi cuan? vatyí sehi sa ndaa sa cuenda ndo vatyí tatu cuu, cua tava ndo siti nuu ndo ta cuhva ndo sii si sii, quivi cuan.

¹⁶ Ta vityí ¿atu sica iñi ndo vatyí ndui ra xaan iñi sii ndo vatyí quehin sa ndisa sihin ndo?

¹⁷ Ta ñiyivi zacuaha inga cuhva cuan, vaha xaan zavaha ñu sihin ndo cuñi ndo, zoco yivi sa vaha cuu si sa ndisa. Cuñi ñu zacuziñ ñu sii ndo vatyí tacuan ta cua cundyico ndo sii maa ñu.

¹⁸ Ndisa vatyí vaha tatu zavaha ñu sa vaha sihin ndo. Tatu sa vaha cuu sa nanducu ñu sa ndisa, nazavaha ñu sii si tañi quivi sa ndyei sihin ndo.

¹⁹ Zehe ndyíhi, ndyehi tundoho inga saha sa cuenda ndo tañi tundoho ndyehe minoo ñaha tatu sa cuñi cacu zehe ña. Ta cua ndyehi tundoho ndya cua ndundyee iñi ndo sa ndisa sihin tundyee iñi ra Cristo.

²⁰ Vaha xaan tatu cuu quisi nu yucu ndo vityi; cuñi quehin sihin maa ndo. Ña ñihi que cuhva zacui sihin ndo.

Minoo cuhva cuenda ña Agar ta ña Sara

²¹ Ndoho, ra cuñi sa cundyaca ñaha ley ra Moisés sii ndo, nacaty i ndo sihin: ¿Atu cutuñi iñi ndo cuhva catyi ley cuan?

²² Catyi Tuhun Ndyoo vaty i sicoo uu tahan zehe ra Abraham. Minoo ra i cuu zehe ra sihin ñaha i cuu muzu ñazihí ra. Ta inga ra i cuu zehe ra sihin ñazihí ra. Ta yivi muzu i cuu ñazihí ra Abraham.

²³ Agar i sinañi muzu cuan, ta i cacu zehe ña tañi cacu zehe tandihí ñiyivi. Zoco zehe maha Sara, ñazihí ra Abraham, i cacu ra vaty i catyi ra Ndyoo sihin ra Abraham vaty i cua coo minoo zehe ñazihí ra.

²⁴ Ta sa nduu tahan ñaha cuan cuu tañi uu tahan tyiño zandaa ra Ndyoo. Minoo si i saha ra nu yucu Sinaí. Yucuan i saha ra ley sii ra Moisés. Ta ñiyivi sa cuu cuenda ley cuan cuu tañi ña Agar vaty i minoo muzu ñi i cuu ña sihin zehe ña.

²⁵ Tañi ña Agar ta tañi yucu Sinaí ta tacuan iyo ñuu Jerusalén vaty i ndyaca ñaha ley sahnú sii ñiyivi ñuu cuan. Cuu ñu tañi muzu sii ley cuan.

²⁶ Zoco andivi iyo inga ñuu Jerusalén. Minoo ñuu sa ñahñi sa ndyaca ñaha sii cuu si. Ta ñahñi tucu sa ndyaca ñaha sii maa yo vaty i cuenda ñuu sa iyo andivi cuu yo.

²⁷ Ta catyi Tuhun Ndyoo:

Cuzihí xaan iñun ñaha sa ñá sicoo zehe; yoñi zehun, ta i zandoo yiun suun.

Zihí xaan cuñun ndya cuhva cua vacu soon sihin sa zihí cuñun, yoho ñaha sa yoñi zehe.

Vaty i cuaha ca zehe ñaha sa zandoo yihí sii cua coo ta ziqui ñaha sa iyo yihí.

²⁸ Ta maa yo hermanos, cuu yo tañi ra Isaac zehe ra Abraham vaty i cacu ra cuhva i catyi maa ra Ndyoo.

²⁹ Zoco ra i cacu cuenda ñaha sa cuu muzu cuan i cuu ra ra xaan iñi sii ra i cacu cuhva catyi ra Ndyoo, ta tacuan cuu si ndya cuhva ndya vityi. Ñiyivi sa cuñi zavaha cuhva catyi ley, xaan iñi ñu sii maa yo ñiyivi zacacu ra Ndyoo sa cuenda Taty i li ra.

³⁰ Ta ¿ña catyi Tuhun Ndyoo? Catyi si: “Tava ndyizo ndo sii ñaha sa cuu muzu sihin zehe ña. Vaty i zehe muzu cuan ma cuu ñihi ra sa sii zutu ra tañi cua ñihi zehe ñaha sa cuu ñazihí ra sa ndisa.”

³¹ Yucuan cuenda, hermanos, yivi zehe ñaha cu muzu cuu maa yo. Maa yo cuu tañi zehe ñazihí ra Abraham vaty i yivi muzu cuu yo. (Tiin cuenda ra Ndyoo sii yo vaty i sino iñi yo ta yivi sa cuenda sa tyaa yo yahvi sii ley sahnú.)

5

I ndasi ra Cristo sii ndo; coo ndo cuhva cuan

¹ I ndasi ra Cristo sii yo vaty i cua coo yo libre. Coo ndo cuhva cuan, ta ma nduu ndo muzu sii ley sahnú cuan inga saha a sii costumbre sa zavaha ñiyivi.

² Ndyehe ndo, yuhvi ra Pablo catyi sihin ndo vaty i tatu zavaha ndo costumbre circuncisión cuan ta sica iñi ndo vaty i cua zacacu si sii ndo, ma cuu tyindyee ra Cristo sii ndo.

³ Cuñi catyi inga saha sihin tandihí ra cuñi cacu sihin costumbre circuncisión cuan vaty i tatu tacuan cuñi ra, cuñi si sa zavaha ra tandihí cuii sa catyi ley ra Moisés.

⁴ Tandihí ndoho ra sica iñi vaty i cua catyi ra Ndyoo vaty i ñahñi cuaty i ndo vaty i zavaha ndo cuhva catyi ley sahnú cuan, cuu si tañi i zandoo ndo sii ra Cristo. Sa zaña ndo sa vaha sa saha ra Ndyoo sii ndo.

⁵ Vaty i maa yo sa iyo tundyee iñi sa saha Taty i li sii yo, ndatu yo sa cua zanduvaha ra Ndyoo sii yo ity i nuu maa ra sa cuenda sa sino iñi yo.

⁶ Vaty i tatu sa ndu-iiin yo sihin ra Cristo Jesús, ña tyindyee si tatu zavaha yo costumbre circuncisión cuan a tatu ma zavaha yo sii si. Sa tyindyee cuu sa sino iñi yo sii ra Cristo, ta zañaha yo tatu sino iñi yo tatu zavaha yo sa vaha sihin tandihí ñiyivi.

⁷ Vaha xaan i zavaha ndo quivi cuan. ¿Yoo sa zativi sii ndo? ta vityi ña tyaa ca ndo yahvi sii sa ndisa.

⁸ Yivi cuenda ra Ndyoo, ra i cana sii ndo, cuu cuhva cuan.

⁹ Tañi cua ndaa pan sihin zuhva ñi yusa iya, tacuan cuu cuhva cuu zativi minoo ñi ñiyivi sii cuaha xaan ñiyivi.

¹⁰ Cua tasi tuñi ra Ndyoo sii ra zativi sii ndo vazu yoo ca ra cuu ra. Zoco sito vehi vatyí cua tyindyee ra ndyaca ñaha sii yo sii ndo ta ma caca iñi ndo inga cuhva ta ziqui cuhva i zacuehi sii ndo.

¹¹ Ta sa cuenda mi, hermanos, tatu cua catyi vatyí vaha zavaha ca yo costumbre circuncisión cuan, ma cuxaan xaan ñiyivi hebreo sihin. Zoco cuxaan ñu vatyí catyi vatyí sihi ra Cristo nuu cruz sa cuenda cuatyí yo.

¹² Ta sa cuenda ra zativi sii maa ndo ¡vaha xaan tatu ndaha zaña ra sii ndo ta cuhun ra!

¹³ Vatyí i casi ra Ndyoo sii maa ndo, hermanos, vatyí ñahñi ca sa cua cundyaca ñaha sii ndo, zoco yivi sa cuenda sa cua zavaha ndo ñaa sa cuñi maa ndo. Cuñi si sa tyindyee ndo sii ñiyivi vatyí cuñi ndo sii ñu.

¹⁴ Iyo minoo tuhun sisi Tuhun ra Ndyoo ta catyi si: “Cuñi ndo sii ñiyivi tañi cuñi ndo sii maa ndo.” Ta tatu cuñi ndisa cuii yo sii ñiyivi, sihin minoo ñi cuhva cuan ta zavaha yo tandihi sa catyi ley ra Ndyoo.

¹⁵ Zoco tatu xaan cuñi ndo ndyehe ndo sii minoo tahan ndo, ta tatu cahan cuehe ndo sii tahan ndo, coto vaha ndo sii ndo coto ndaha zativi ndo sii minoo ndo ta sii inga ndo.

Cuhva ña vaha sa cuñi yo zavaha yo, ta cuhva zavaha yo tatu zavaha yo cuhva cuñi Tatyí Ii

¹⁶ Ihya cuu sa cuñi catyi sihin ndo: Zavaha ndo cuhva cuñi Tatyí Ii ra Ndyoo, ta tacuan ta ma zavaha ndo sa ña vaha sa cuñi maa ndo zavaha ndo.

¹⁷ Vatyí iyo minoo cuhva sa cuñi Tatyí Ii zavaha yo, ta maa yo cuñi yo zavaha yo inga cuhva. Ta ña cuñi yo zavaha yo cuhva cuñi Tatyí Ii. Cuhva cuñi Tatyí Ii, ña sasi tahan si sihin cuhva cuñi maa yo. Ta yucuan cuenda ma cuu zavaha yo cuhva cuñi maa yo.

¹⁸ Zoco tatu zavaha yo cuhva cuñi Tatyí Ii, ña ndyaca ñaha ca ley cuan sii yo.

¹⁹ Ña yii ndyehe yo ñaa sa zavaha ñiyivi tatu zavaha ñu cuhva cuñi maa ñu. Quixi rayii sihin inga ñaha sa yivi ñazihí ra cuu a ña tindaha ñu. Ta tacuan tucu zavaha ñuzihí sihin rayii, ta cuaha xaan sa quiñi zavaha ñiyivi sihin coño ñuhu ñu.

²⁰ Zacahnu ñu sii zandu. Zatazi ñu. Cuxaan ñu ndyehe ñu sii inga ñiyivi. Sahñi tahan ñu. Cuñi xaan ñu sa sii inga ñiyivi. Vatyí xaan cuxaan ñu. Maa ñi sa cuenda maa ñu sica iñi ñu. Sahñi tahan ñu ta ziqui zavaha ñu ziin ziin ityi.

²¹ Cuñi xaan ñu ndaha tyiño inga ñiyivi. Sahñi ñu ñiyivi. Siñi ñu. Zacahnu xaan ñu vico. Ta inga cuhva tañi cuhva ya zavaha ñu. Ta nacatyí sihin ndo tañi sa catyi sihin ndo quivi cuan vatyí ñiyivi zavaha cuhva ya ma cuu cuhun ñu nu ndyaca ñaha ra Ndyoo.

²² Zoco tatu zatyíño xaan Tatyí Ii sihin yo, ihya cuu cuhva cua coo yo. Cua cuñi xaan yo sii inga ñiyivi; cua cuzii xaan iñi yo; cua coo sa taxi añaima yo. Cua coo xaan tundyee iñi sii yo sihin ñiyivi. Vii xaan cua coo yo, ta cuu yo ñiyivi vaha xaan. Ta cua zavaha yo sa vaha sihin ñiyivi, ta ma zaña yo sa zavaha yo sa vaha.

²³ Ta inga cuhva saha Tatyí Ii sii yo cuu sa mazu xaan iñi yo ta sa cuu cundyaca ñaha yo sii yo. Tatu zavaha yo tandihi cuhva ya ma cuu catyi ley sahnu vatyí iyo cuatyí yo.

²⁴ Ta maa yo sa cuu cuenda ra Cristo Jesús, sa zaña yo sa zavaha yo sa ña vaha, ta ña zavaha ca yo cuhva cuñi maa yo.

²⁵ Ta tañi sa nduu yo ñiyivi saa sa cuenda Tatyí Ii ra Ndyoo, tacuan cuñi si sa tyaa yo yahvi sa zacuaha ra sii yo cuhva cua zavaha yo.

²⁶ Ta ma nducu yo cuhva sa zacahnu ñiyivi sii yo. Ta ma zacahñi tahan yo sii ñiyivi, ta ma cuñi yo sa sii inga ñiyivi.

6

Tahan si sii yo sa tyindyee yo sii ra tahan yo

¹ Hermanos, tatu ndyehe ndo vatyí zavaha minoo ra tahan ndo minoo cuatyí, cuñi si sa tyindyee ndo sii ra ta nazandoo ra sii si, ndoho ra tyaa xaan yahvi sii ra Ndyoo. Zoco vii ñi cahan ndo sihin ra ta coto vaha ndo sii ndo coto nducu coto ihñi tucu cuihna sii maa ndo.

² Ta tahan si sa cuizo yo zuhva sa vee sa ndyizo inga ra. Tatu tacuan zavaha yo, cuñi si catyi si vatyí tyaa vaha yo yahvi sii ra Cristo.

³ Ta tatu iyo yo sica iñi yo vatyí ra ñiñi xaan cuu yo ta ña ndisa, zuun ñi sii maa yo zandavi ñaha yo cuhva cuan.

⁴ Nandyehé xihna yo sii tyiño maa yo, ta cua coto yo tatu zavaha yo sa vaha, ta zii cua cuñi yo. Ta ma ndyehe xaan yo ñaa sa zavaha inga ra.

⁵ Vatyí tahan si sii minoo minoo yo cundyeé iñi yo ñaa sa tahan yo ñuu ñiyivi ya.

⁶ Ta cuñi si sa tyindyee ndo sii ra zacuaha Tuhun Ndyoo sii ndo, ñaa sa siñi ñuhu sii ra.

⁷ Ta ma zandavi ñaha ndo sii ndo. Yoñi sa cuu zandavi ñaha sii ra Ndyoo. Tandihí sa cua tasi minoo ra, yucuan cuu sa cua naquihin ra. (Tatu zavaha ndo sa vaha cua nañihi ndo sa vaha, ta tatu zavaha ndo sa ña vaha cua nañihi ndo sa ña vaha.)

⁸ Tatu zavaha ndo sa ña vaha cuhva cuñi maa ndo, cua zativi si cuan sii ndo. Zoco tatu zavaha ndo cuhva cuñi Tatyí Ii, cua cuhva Tatyí Ii sa cundito ndo tandihí cuii tyiemvu.

⁹ Ma cuhva yo sa cundihí iñi yo ta zaña yo sa zavaha yo sa vaha vatyí tatu ma zaña yo sa zavaha yo sa vaha, cua coo quivi cua ñihi yo sa vaha sa cuenda si.

¹⁰ Yucuan cuenda tandihí saha tatu saha si cuhva, nazavaha yo sa vaha sihin tandihí ñiyivi, ta ñihi ca nazavaha yo sii si sihin ñiyivi sino iñi.

Nu sa cuñi ndihí carta ra Pablo

¹¹ Ndyehé ndo vatyí nahnu xaan letra tyei ihya sihin ndaha mi.

¹² Ra sa cuñi zañiñi sii ndo sa zavaha ndo costumbre circuncisión cuan, zavaha ra cuhva cuan vatyí cuñi ra sa coo vaha ra sihin ñiyivi. Ña cuñi ra ndyehe ra tundoho sa cuenda sa sino iñi ra vatyí sa sihi ra Cristo sa cuenda maa yo ta yucuan cuu cuhva cua cacu yo. Ñahñi ca inga cuhva.

¹³ Zoco nu maa ra sa zavaha costumbre cuan ta ña tyaa ra yahvi sii tandihí ley sahnú. Zoco cuñi ra sa zavaha maa ndo costumbre cuan vatyí tacuan ta cua caca iñi ra vatyí ra ñiñi xaan cuu ra vatyí ndyico ndo cuhva catyi ra.

¹⁴ Ta mi, ña cuñi zacahni sii, nu siin. Zoco zii xaan cuñi vatyí i sihi ra Jesucristo nu cruz sa cuenda mi. Maa ra ndyaca ñaha sii yo. Sa cuenda sa sihi maa ra, ta ña cuñi que sa iyo ñuu ñiyivi ya, ta ña ndyaca ñaha ca si sii.

¹⁵ Vatyí tatu ndyico yo sii ra Cristo Jesús, ña ñiñi ca sa zavaha yo costumbre circuncisión a sa ma zavaha yo sii si. Sa ñiñi ca cuu sa nduu yo ñiyivi saa.

¹⁶ Ta nacuhva ra Ndyoo sa coo sa taxi ñanima tandihí ndoho sa iyo cuhva ya. Ta nacundahvi iñi ra sii tandihí ndo sa cuu ñiyivi ra sa ndisa cuii.

¹⁷ Ityi nuu ca ña cuñi sa cuhva ca ndo tizihí sii, saha tuhun ya vatyí tandihí pehla sa iyo coño ñuhi zañaha si vatyí minoo muzu ra Jesús cui sa ndisa.

¹⁸ Hermanos, nanazoco xaan ra Jesucristo, ra ndyaca ñaha sii yo, sii ndo. Ta nacuu si sa ndisa.

Minoo Carta I Tasi Ra San Pablo Sii Ñiyivi Sino Iñi Sii Ra Ndyoo Ñuu Efeso

Tyaa ra Pablo minoo carta sii ñiyivi sino iñi sii ra Ndyoo ñuu Efeso

¹ Yuhvi ra Pablo, minoo apóstol cui, cuhva cuñi ra Ndyoo. Tyei carta ya sii maa ndo sa sino iñi ñuu Efeso vatyi sino xaan iñi ndo sii ra Cristo Jesús.

² Nacuhva xaan ra Ndyoo Zutu yo ta ra Jesucristo ra ndyaca ñaha sii yo tumañi iñi sii ndo ta nacuhva ra sa coo sa taxi añaima ndo.

Saha xaan ra Ndyoo sa vaha sii yo

³ Nazacahnu yo sii ra Ndyoo, Zutu ra Jesucristo, ra ndyaca ñaha sii yo. Tyindyee xaan ra sii yo, ta saha xaan ra sa vaha sii yo vatyi iñi ñi cuu yo sihin ra Cristo. Saha xaan ra sa vaha sa iyo andivi sii yo.

⁴ I casi ra sii yo sa cu-iñi yo sihin ra Cristo ndya quivi cumañi ca zavaha ra ñuu ñiyivi vatyi cuñi ra sa cuu yo ñiyivi vaha xaan ta ñiyivi ñahñi cuatyti ityi nuu ra vatyi cuñi xaan ra sii yo.

⁵ Ta sa naha i tyaa ra cuhva sa zanduu ra zehe ra sii yo sa cuenda ra Jesucristo vatyi yucuan cuu sa cuñi ra zavaha ra.

⁶ Ta yucuan cuenda zacahnu yo sii ra vatyi vaha xaan sa zavaha ra. Saha xaan ra tumañi iñi sii yo vatyi zandu-iñi ra sii yo sihin Zehe ra, ta cuñi xaan ra sii Zehe ra.

⁷ Cuñi xaan ra Ndyoo sii yo, ta yucuan cuenda i tyiyahvi ra sa cuenda cuatyti yo sihin niñi ra Cristo ta i zandasi ra cuatyti yo.

⁸ Saha xaan ra tumañi iñi sii yo vatyi i saha ra sa siñi tuñi maa ra sii yo.

⁹ Ta i zacoto ra sii yo minoo cuhva xehe sa cuñi maa ra, minoo cuhva sa i sica iñi ra sa cua zavaha ra.

¹⁰ Vatyi natahan si quivi ta cua zandu-iñi ra tandihi, ta cua cundyaca ñaha ra Cristo tandihi, sa iyo ityi ziqui ta sa iyo nu ñuhu.

¹¹ Sa cuenda sa i zavaha ra Cristo, ta i casi ra Ndyoo sii yo vatyi cua cuhva ra sa vaha sii yo. I cuñi maa ra Ndyoo zavaha ra tandihi cuhva ya. Zavaha maa ra ñaa sa cuñi maa ra.

¹² Ta tacuan i zavaha ra vatyi maa ndi sa sino iñi sii ra Cristo sa xihna ñi, cua zacahnu xaan ndi sii ra Ndyoo vatyi vaha xaan ra.

¹³ Ta i sino tucu iñi maa ndo sii ra Cristo sa i siñi ndo tuhun ndisa, cuhva cacu yo. Ta sa yaha sino iñi ndo sii ra, ta ziqui cuu si tañi i tyaa ra Ndyoo tuñi ra sii ndo vatyi i saha ra Tatyti Ii ra sa coo ra añaima ndo tañi sa i catyi ra, ta sii maa ra cuu sii ndo.

¹⁴ Tatyti Ii cuan cuu sa saha ra Ndyoo sii yo sa xihna ca. Ta cuhva cuan zañaha si vatyi cua ñihi yo tandihi sa cua cuhva ra Ndyoo sii yo quivi cua ndihi zacacu ra sii yo. Ta zavaha ra tandihi cuhva ya vatyi cua zacahnu yo sii ra vatyi vaha xaan ra.

Sica ra Pablo sii ra Ndyoo vatyi cua cuhva ra cuaha xaan sa siñi tuñi sii ñiyivi sino iñi

¹⁵ Yucuan cuenda ndya quivi i site cuhva sino xaan iñi ndo sii ra Jesús, ra ndyaca ñaha sii yo, ta cuhva cuñi xaan ndo sii tandihi ñiyivi sino iñi.

¹⁶ Ndy quivi i site cuhva cuan ta ñá zañe sa quehin sihin ra Ndyoo sa cuenda ndo. Ta nacuhva xein tyahvi ndyoo sii ra Ndyoo sa cuenda ndo.

¹⁷ Sique sii ra Ndyoo ra Jesucristo, ra ndyaca ñaha sii yo. Ta zuun ñi maa ra Ndyoo cuu Zutu maa yo. Nazacahnu xaan yo sii ra. Sii maa ra sique vatyi nacuhva ra sa siñi tuñi sa saha Tatyti Ii sii ndo vatyi tacuan ta cua cutuñi ca iñi ndo, ta cua coto vaha ca ndo sii ra.

¹⁸ Tacuan ta ziqui cua cutuñi ca iñi ndo, ta cua coto ca ndo ñaa sa cua ñihi ndo vatyi maa ndo cuu ñiyivi i casi ra Ndyoo. Ta cua coto ndo vatyi vaha xaan ta tyaqui xaan cuu sa cua cuhva ra Ndyoo sii ñiyivi sii ra.

¹⁹⁻²⁰ Ta sique sii ra Ndyoo vatyi cua cuhva ra sa coto ndo cuhva tyindyee ra sii maa yo sa sino iñi sii ra vatyi cahnu xaan ca cuu tundyee iñi sii maa ra. Tundyee iñi maa ra sa

tyindyee sii yo cuu sa zuun ñi tundyee iñi sa zanandoto sii ra Cristo sisi sa i sihi ra, ta i saha ra Ndyoo sa cundyaa ra Cristo siyo cuaha ra andivi.

²¹ Ta yucuan cuu nu i zanducahnu xaan ra Ndyoo sii ra Cristo. Cahnu ca ra ta ziqui tandihi inga ra ndyaca ñaha ñuu ñiyivi a andivi. Vazu rey cuu ra cuan a ra ndyaca ñaha cahnu xaan a vazu ángel andivi, zoco cahnu ca ra Cristo vityi ta ityi nuu ca.

²² Ta saha ra Ndyoo sa cundyaca ñaha ra Cristo sii tandihi. Ra cu nuu cuu ra sii ñiyivi sa cuu cuenda ra. Cuu ra tañi xiñi ñu.

²³ Ta ñiyivi sa cuu cuenda ra cuu tañi coño ñuhu ra. Zacutu cui ra añaima yo, ta zacutu cui ra tandihi cui sa iyo.

2

Zacacu ra Ndyoo sii yo vaty cuñi xaan ra sii yo

¹ Quivi ta sino ca iñi ndo Tuhun Ndyoo cuu si tañi sa sihi añaima ndo vaty i zavaha ndo cuaty ta tandihi cuhva sa ña tahan iñi ra Ndyoo. Zoco i saha ra Ndyoo minoo cuhva saa coo ndo vaty i ndu-ñin ndo sihin ra Cristo.

² Ityi sata i zavaha ndo cuaty tañi zavaha inga ñiyivi ñuu ñiyivi. I zavaha ndo cuhva cuñi ra ndyaca ñaha sii cuhna. Maa ra cuu ra ndyaca ñaha sii ñiyivi ña tyaa yahvi sii ra Ndyoo.

³ Ta tacuan i cuu tandihi yo quivi sa ñá sito yo sii ra Ndyoo. I zavaha yo cuhva ña vaha sa cuñi coño ñuhu yo ta sa cuñi sa siñi tuñi yo tañi zavaha tandihi inga ñiyivi. Inuu ñi i cuu yo tañi inga ñiyivi, ta yucuan cuenda i tahan si sii yo sa cuxaan xaan ra Ndyoo sihin yo.

⁴ Zoco i cundahvi xaan iñi ra Ndyoo sii yo vaty cuñi xaan ra sii yo.

⁵ Ta vazu i sicoo yo tañi sa i sihi yo quivi cuan sa cuenda cuaty yo, zoco i zanandoto ra sii maa yo ñin ñi sihin ra Cristo. Zacacu ra Ndyoo sii yo maa ñi sa cuenda tumañi iñi sa zavaha ra sii yo.

⁶ Tañi sa zanandoto ra Ndyoo sii yo sihin ra Cristo cuu si, ta saha ra sa cundyaa yo andivi sihin ra. (Tañaha ca cua saa yo yucuan, zoco tañi sa saa yo yucuan cuu si vaty ma cuu ca cundyaca ñaha cuaty sii yo.)

⁷ Tacuan zavaha ra Ndyoo vaty ityi nuu ca cua zañaha ra sii tandihi ñiyivi vaty cahnu xaan cuu tumañi iñi i zavaha ra sii yo sa cuenda ra Cristo Jesús. Ta i zavaha xaan ra sa vaha sihin yo.

⁸ Vaty sa cuenda tumañi iñi sa zavaha ra Ndyoo ta cacu yo sihin sa sino ñi iñi yo sii ra. Ta sa zacacu ra Ndyoo sii yo, yivi minoo sa zavaha maa yo cuu si. Minoo sa saha maa ra Ndyoo sii yo cuu si.

⁹ Ma cuu zavaha yo sa vaha ta ñihi yo sii si coto caca iñi yo vaty vaha xaan maa yo.

¹⁰ Vaty maa ra Ndyoo i zanduvaha sii yo. Zandu-ñin ra sii yo sihin ra Cristo Jesús vaty tacuan ta cua zavaha xaan yo sa vaha cuhva i tyaa ra Ndyoo ta sa naha.

Vazu ñiyivi hebreo cuu yo a vazu ñiyivi inga tata, zoco tandihi yo cuu yo ñiyivi ra Ndyoo sa cuenda ra Cristo

¹¹ Yucuan cuenda nacohon iñi ndo cuhva i sicoo ndo ityi sata. Yivi ñiyivi hebreo cuu maa ndo. Ta catyi ñiyivi hebreo vaty ña vale ndo vaty ña zavaha ndo costumbre circuncisión tañi zavaha maa ñu. Ta sica iñi ñu vaty vaha ca maa ñu ityi nuu ra Ndyoo vaty zavaha ñu costumbre cuan.

¹² Ityi sata ñá sicoo ra Cristo añaima ndo. Ña ñin ñi i cuu ndo sihin ñiyivi hebreo. Ta ñá sito ndo tyiño i zandaa ra Ndyoo sihin ra Abraham, cuhva i catyi ra vaty cua zanduvaha ra sii yo sihin ra. Ñá sito ndo sii ra Ndyoo quivi cuan, ta ñahñi sa vaha cua ñihi ndo.

¹³ Quivi cuan sica xaan i sindyaa ndo nuu ra Ndyoo. Zoco vityi sa ndu-ñin ndo sihin ra Cristo Jesús. I sati ñiñi ra sa cuenda maa ndo, ta yucuan cuenda naña ndo sii ra Ndyoo.

¹⁴ Zanduvaha ra Cristo sii yo sihin ra Ndyoo. Zandu-ñin ra sii ndu tahan yo. Zandu-ñin ra sii nduhvi ra hebreo sihin maa ndo sa yivi ñiyivi hebreo cuu. Zanduvaha ra cuhva iyo

yo sihin minoo yo ta sihin inga yo. I cuu si tañi sa zanduva ra minoo nuzama sa sindyaa mahñu nu yucu yo.

¹⁵ Maa ra Cristo i zandihí cuhva sicoo sihin ley sahnu quívi i saha ra coño ñuhu ra ta sihi ra nu cruz. Ley sahnu cuan i zanduziin si sii yo vatyí i zavaha maa ndi costumbre sa catyí ley cuan, ta ñá zavaha maa ndo sii si. Zoco i zandu-ín ra Cristo sii yo quívi i saha ra minoo cuhva saa coo yo, ta zanduvaha ra sii minoo yo sihin inga yo.

¹⁶ I sihi ra nuu cruz sa cuenda cuatyí yo, ta i zanduvaha ra sii tandihí yo sihin ra Ndyoo. Ta i zandu-ín ra sii yo sa ndisa.

¹⁷ I quisi ra Cristo, ta i nacatyí ra sihin yo cuhva cua coo vaha yo sihin ra Ndyoo ta sihin minoo yo ta sihin inga yo. I nacatyí ra cuhva cuan sihin maa ndo, ra sica xaan i sindyaa nuu ra Ndyoo ta sihin maa ndi ra hebreo, ra sa sito zuhva Tuhun Ndyoo.

¹⁸ I sihi ra Cristo sa cuenda yo, ta yucuan cuenda cuu tuhva tandihí yo sii ra Ndyoo Zuto yo vatyí ín ñi Tatyí li cuu sa iyo añima yo vazu ñiyívi hebreo cuu yo a vazu yívi ñiyívi hebreo cuu yo.

¹⁹ Yucuan cuenda yívi ca ñiyívi inga tata cuu ndo a ñiyívi inga ñuu. Sa nduu ndo ñiyívi sa cuenda ñuu ra Ndyoo ín ñi sihin tandihí ñiyívi sa cuu cuenda ra. Sa nduu ndo ñiyívi ra.

²⁰ Ta tañi minoo vehe cuu tucu ndo. Ra apóstol sihin ra profeta, tañi cimienta si cuu ra. Ta zuun ñi ra Cristo Jesús cuu minoo yuu sa ñiñi ca nu cuu siquí vehe.

²¹ Ta zíquí ra Cristo cuahan ndaa vehe minoo cuhva vaha xaan, ta cua cuu si minoo vehe ñuhu sa cuenda ra ndyaca ñaha sii yo.

²² Ta maa ndo cuu tucu zuhva vehe ñuhu cuan. In ñi cuu ndo sihin ra Ndyoo ta sihin minoo ndo ta sihin inga ndo, ta tacuan nduu yo minoo vehe nu iyo ra Ndyoo vatyí iyo Tatyí li ra añima sa minoo minoo yo.

3

Saha ra Ndyoo tyiño sii ra Pablo sa nacatyí ra Tuhun ra sihin ñiyívi sa yívi ñiyívi hebreo cuu

¹ Yuhvi ra Pablo ñohi vehe caa sa cuenda maa ndo vatyí zacote tuhun ra Cristo sii ndoho sa yívi ñiyívi hebreo cuu.

² Sica iñi vatyí sa sito ndo vatyí cahnu xaan cuu tumañi iñi i saha ra Ndyoo sii, vatyí cuu tyindyeyi sii maa ndo.

³ Sa nacatyí sihin ndo zuhva sa cuenda cuhva i zañaha ra Ndyoo minoo sa xehe sii, sa cuenda maa ndo.

⁴ Ta tatu cua cahvi ndo carta i tasi sii ndo cua coto ndo cuhva i saha ra Ndyoo sa cutuñi iñi tuhun ra Cristo sa ña sito ñiyívi.

⁵ Ta sa naha ñá zacoto ra Ndyoo tuhun cuan sii ñiyívi tañi zacoto ra vityí sii ra apóstol ta sii ra profeta. Vityí zacoto ra Ndyoo sii ndi sihin Tatyí li ra.

⁶ Ta tuhun xehe cuan cuu sa catyí vatyí maa ndo sa yívi ñiyívi hebreo cuu, cua ñihi ndo sa vaha sa saha ra Ndyoo ín ñi sihin nduhvi ra hebreo vatyí ín ñi coño ñuhu ra Cristo cuu tandihí yo. Ta cua ñihi yo sa sa catyí ra Ndyoo, vatyí cua cuhva ra sii si sii yo sa cuenda ra Cristo Jesús.

⁷ Tumañi iñi sa i saha ra Ndyoo sii, cuu sa i saha ra tundyee iñi sii, sa zacote tuhun vaha ya sii ñiyívi.

⁸ Sica iñi vatyí luhlu que ta zíquí tandihí inga ñiyívi sa cuu cuenda ra Ndyoo. Zoco i saha ra Ndyoo tumañi iñi ya sii, sa zacote tuhun ra Cristo sii ñiyívi sa yívi ñiyívi hebreo cuu, cuhva vaha xaan sa cua ñihi ñu sa cuenda ra Cristo.

⁹ Ta saha ra Ndyoo tyiño sii, sa zacote sii tandihí ñiyívi minoo cuhva sa sa sito ra Ndyoo cua zavaha ra cumañi ca sino ñuu ñiyívi. Ta sa naha ñá saha ra Ndyoo sa coto ñiyívi tuhun ya.

¹⁰ Vatyí tacuan ta tandihí sa ndyaca ñaha andívi cua ndyehe si cuhva vaha xaan sa zavaha ra Ndyoo sihin maa yo, ñiyívi sa cuu cuenda ra. Ta cua coto si vatyí cuaha xaan sa siñi tuñi iyo sii maa ra Ndyoo.

¹¹ Ta sa cuenda maa yo zavaha ra Cristo Jesús, ra ndyaca ñaha sii yo, cuhva sa cuñi ra Ndyoo ta sa naha.

¹² Ta sa cuenda ra Cristo iyo cuhva sii yo sa tuhva yo sii ra Ndyoo. Sino iñi yo sii ra Cristo, ta yucuan cuenda ña yuhu yo sii ra Ndyoo.

¹³ Yucuan cuenda sique sii ndo vatyí ma nducuihya iñi ndo sa cuenda tundoho sa ndyehi vityi sa cuenda maa ndo vatyí cua tyindyee si sii ndo.

Sica ra Pablo sii ra Ndyoo vatyí nanacoto ca ñu sii ra Cristo

¹⁴ Nacohon iñi sa vaha xaan sa saha ra Ndyoo Zutu yo sii yo, ta yucuan cuenda iñi siti nuu ra.

¹⁵ Maa ra cuu Zutu tandíhi ñiyívi, ñu sa cuahan andívi ta ñu yucu nu ñuhu.

¹⁶ Ta sique sii ra vatyí nazandundyee xaan ra aña ndo sihin Tatyí li ra sa iyo aña ndo. Vatyí vaha xaan cuu sa saha maa ra.

¹⁷ Ta naco ra Cristo aña ndo vatyí sino iñi ndo sii ra. Ta tacuan ta cua cuñi xaan ndo sii tandíhi ñiyívi vatyí naña ndo sii ra Ndyoo.

¹⁸ Ta ziqui cua coo cuhva sii ndo, ta cua cutuñi vaha iñi ndo sihin tandíhi inga ñiyívi sino iñi vatyí cuñi xaan ra Cristo sii yo. Cuñi xaan ra sii yo ndya cuhva ña ñihi ca yo cuhva nacatyí yo cuhva cuñi xaan ra sii yo.

¹⁹ Ta sique sii ra Ndyoo vatyí cua coto ndo cuhva cuñi xaan ra sii yo vatyí yaha xaan cuñi ra sii yo, ndya cuhva ndya ma cuu coto yo cuhva sa cahnu xaan cuñi ra sii yo. Ta tacuan ta ñahñi sa cua cumañi sii ndo vatyí ndyaa ra Ndyoo sihin ndo. Ta yucuan cuenda ñahñi sa cua cumañi sii ndo.

²⁰ Ta vityí nazacahnu yo sii ra Ndyoo vatyí cahnu xaan ca cuu tundyee iñi maa ra, ta cuu zavaha ra cuaha xaan ca ta ziqui sa sica yo sii ra ta cuaha ca ta ziqui sa sica iñi yo vatyí zavaha ra sii si zuun ñi sihin tundyee iñi maa ra sa saha ra sii yo.

²¹ Nazacahnu maa yo, ra sino iñi, sii ra tandíhi cuii tyiemvu sa cuenda sa zavaha ra Cristo Jesús. Nazacahnu yo sii ra vityí ta tandíhi cuii tyiemvu. Ta nacuu si tacuan, ta nacuu si sa ndisa.

4

Cuhva ndu-ñin yo sa cuenda Tatyí li

¹ Yucuan cuenda yuhvi ra ñoho vehe caa ya zañiñi sii ndo vatyí zavaha ndo sa vaha xaan cuhva tahan si zavaha ñiyívi i casi ra Ndyoo vatyí i casi ra sii ndo sa cuu ndo ñiyívi ra.

² Tahan si sii yo sa zanduluhlu yo sii yo ta vii xaan coo yo sihin ñiyívi, ta naco xaan tundyee iñi sii yo sihin ñu. Nacuñi xaan yo sii ra tahan yo, ta nacundyee iñi yo ñaa sa zavaha ra.

³ Nanducu yo cuhva cu-ñin yo sa ndisa cuii sihin ra tahan yo vatyí cua tyindyee Tatyí li ra Ndyoo sii yo sa coo sa taxi sii yo sihin ra tahan yo.

⁴ Vatyí iyo minoo ñi coño ñuhu ra Cristo sa cuu maa yo ra sino iñi sii ra, ta iyo minoo ñi Tatyí li ta minoo ñi sa vaha cua ñihi tandíhi yo ityi nuu ca vatyí i casi ra sii yo.

⁵ Iyo minoo ñi ra ndyaca ñaha sii yo. ñin ñi sii maa ra sino iñi yo. Ta ñin ñi cuenda maa ra coo ndutya yo.

⁶ Iyo minoo ñi ra cuu Ndyoo, ta maa ra cuu Zutu tandíhi yo. Ndyaca ñaha ra sii tandíhi sa iyo. Iyo ra sisi aña tandíhi yo, ta sityiño ra sii tandíhi yo ñaa cuhva cuñi maa ra.

⁷ Ta sii sa minoo minoo yo saha ra Cristo ndatu cuhva cuñi maa ra.

⁸ Yucuan cuenda catyi Tuhun Ndyoo:

I zahacanaa ra sii ra xaan iñi sii ra, ta ziqui i nandaa ra ndya andívi, ta i saha ra ndatu sii ñiyívi.

⁹ ¿Ta ñaa cuñi si catyi si sa catyi si vatyí i nandaa ra? Cuñi si catyi si vatyí i noo xihna ra ndya ñuu ñiyívi.

¹⁰ Ta ra i noo cuan, zuun ñi ra cuu ra i ndaa ndya andívi nu zucu ca. Ta tacuan zavaha ra ta zacutu ra ñuu ñiyívi ya sa maa ñi maa ra vatyí vazuu ndyaca maa, iyo ra.

¹¹ Ta i saha ra ndatu sii sa minoo minoo yo. Iyo yo cuu yo apóstol. Iyo yo cuu yo ra nacatyí tuhun saha ra Ndyoo sii yo. Iyo yo cuu xaan nacatyí yo cuhva zacacu ra Ndyoo sii ñiyivi. Iyo yo cuu yo ra zacuenda sii ñiyivi sino iñi, ta inga yo zacuaha yo Tuhun Ndyoo sii ñu.

¹² Saha ra Ndyoo cuhva cuan sii ñiyivi vatyí tacuan ta ñahñi cua cumañi sii yo, ra cuu ñiyivi ra. Tacuan ta cuu zatyíño yo tyíño ra, ta cuu ndundyee yo sihin Tuhun Ndyoo

¹³ ndya cua ndu-iin yo sa ndisa cuii cuhva sino iñi yo ta cuhva coto vaha yo sii Zehe ra Ndyoo. Ta tacuan ta cua nduu yo ñiyivi vaha xaan, ta cua ñihi yo tandíhi sa saha ra Cristo sii yo, ta cua nduu yo tañi maa ra.

¹⁴ Ta ziqui ma cuu ca yo tañi sa ndyíhi. Vatyí sa ndyíhi, yatyí xaan sino iñi si sii sa ziiin ziiin tuhun. Zoco ma cuu yo cuhva cuan coto ñihi ñiyivi cuhva zandavi ñaha ñu sii yo.

¹⁵ Zoco ihya cuu sa cua zavaha yo; cua cuñi xaan yo sii ñiyivi, ta cua cahan yo sa ndisa sihin ñu, ta cua cuahnu yo sa ndisa cuii ta nduu yo tañi ra Cristo, ra ndyaca ñaha sii yo.

¹⁶ Ta tañi iin ñi cuu coño ñuhu yo, tacuan tucu tandíhi maa yo. Sa cuenda ra Cristo ta iin ñi cuu yo sihin ra tahan yo. Ta tañi ndyaca ñaha xiñi yo sii tandíhi coño ñuhu yo, tacuan ndyaca ñaha ra Cristo sii yo, ta ñihi yo tundyee iñi sii ra. Ta tacuan tyindyee yo sii ra tahan yo vatyí cuñi xaan yo sii ra, ta cua ndundyee ca tandíhi yo.

Saha ra Cristo minoo cuhva saa coo yo

¹⁷ Cuhva sa cua nacatyí sihin ndo vityí cuu si minoo cuhva nacatyí ra ndyaca ñaha sii yo vatyí ma cuu ca ndo tañi ñiyivi ña sito sii ra Ndyoo vatyí zavaha ñu ñaa sa tondo ñi sica iñi ñu.

¹⁸ Ña vaha ca sa siñi tuñi sii ñu. Ña ñihi ñu cuhva vaha, cuhva saha ra Ndyoo coo yo. Ta tondo xaan iyo ñu vatyí ña zavaha ñu cuhva cuñi maa ra, ta ñihi xaan iñi ñu.

¹⁹ Ña cucahan ca nuu ñu tatu zavaha ñu sa ña vaha. Saha ñu sii ñu sa zavaha ñu tandíhi nuu sa ña vaha. Cuñi xaan ñu zavaha ñu tandíhi nuu sa quiñi.

²⁰ Zoco ña tacuan i cutuhva maa yo. Ña tacuan iyo ra Cristo.

²¹ Tatu sa ndisa vatyí i siñi ndo sa cahan ra ta cutuhva ndo sa zacuaha ra sa cuenda maa ra,

²² sa zandoo ndo cuhva i zavaha ndo ityí sata. Minoo cuhva quiñi xaan i sicoo yo vatyí cuhva ña vaha sa cuñi yo zavaha yo i zandavi ñaha xaan si sii yo.

²³ Cuhva ndo sii ndo sii ra Ndyoo, ta nazama ra cuhva sica iñi ndo.

²⁴ Ta cuu ndo ñiyivi saa, vatyí tacuan i zanduvaha ra Ndyoo sii yo sa cuu yo ñiyivi ndoo xaan ta vaha xaan sa ndisa cuii.

²⁵ Yucuan cuenda ma cuvatyá yo. Nacahan tandíhi yo sa ndisa sihin ra tahan yo vatyí iin ñi cuu yo.

²⁶ Tatu cuxaan ndo zoco ma zavaha ndo sa ña vaha, ta ma cuxaan ndo ndyiyaca.

²⁷ Ta ma cuhva ndo cuhva sii cuihna.

²⁸ Ra sa tuhva zuhu, ma zuhu ca ra. Nazatyíño ra sihin ndaha ra minoo cuhva vaha, ta cua cuu tyindyee ra sii ñiyivi cumañi si.

²⁹ Ma cahan ndo sa quiñi sihin yuhu ndo. Cahan ndo sa vaha sa cua tyindyee ta sa cua zandundyee ca sii ñiyivi tyizoho.

³⁰ Ta ma zanducuihya ndo iñi Tatyí Ii ra Ndyoo vatyí i saha ra Ndyoo Tatyí Ii ra sii yo tañi sa tyaa ra tuñi ra sii yo ndya quiñi cua zandíhi ra cuhva zacacu ra sii yo.

³¹ Ma cuu ndo ñiyivi tixi iñi, ta ma cuxaan ndo, ta ma xaan xaan cuñi ndo, ta ma cahan ndo sa quiñi, ta ma cahan cuehe ndo sii ñiyivi. Ta ma cuñi ndo zavaha ndo sa ña vaha sihin ñu.

³² Zoco vii xaan coo ndo sihin minoo ndo ta sihin inga ndo. Cundahvi iñi ndo ta zaha ndo tucahnu iñi sii minoo ndo ta sii inga ndo tañi i zaha ra Ndyoo tucahnu iñi sii maa yo sa cuenda ra Cristo.

¹ Yucuan cuenda nanducu yo cuhva cuu yo tañi maa ra Ndyoo. Zehe ra cuu sii yo, ta cuñi xaan ra sii yo.

² Ta cuñi xaan ndo sii ñiyivi tañi cuñi xaan ra Cristo sii yo ta saha ra sa cuu ra sa cuenda maa yo. Tañi sahñi ñiyivi mvee ticatyi ta saha ñu sii ti sii ra Ndyoo ta sa naha, tacuan i saha ra Cristo sii ra sa cuenda maa yo. Ta zii xaan i cuñi ra Ndyoo sihin cuhva i zavaha ra.

³ Ta vityi sa nduu ndo ñiyivi sa cuenda ra Ndyoo, ña tahan si sa cuzu ndo sihin minoo ñaha tatu ma tindaha xihna ndo, ta ñaa inga sa quiñi sa zavaha ñiyivi sihin coño ñuhu ñu.

⁴ Ta ma cahan ndo sa quiñi ta nu sa tondo, cuhva ña tahan si cahan ndo. Zoco cuhva ndo tyahvi ndyoo sii ra Ndyoo.

⁵ Vatyi sito ndo vatyi tandihi ñiyivi zavaha sa quiñi, ma cuu quihvi ñu nu ndyaca ñaha ra Ndyoo. Ra quixi sihin inga ñaha sa yivi ñazihí ra cuu a ñaha sa zavaha tacuan sihin rayii a ra cuñi xaan sa coo ndaha tyiño, ma cuu cuhun ra nu ndyaca ñaha ra Ndyoo vatyí tatu cuñi xaan ñiyivi sa coo ndaha tyiño ñu, ña zacahnu ñu sii ra Ndyoo cuhva cuan.

⁶ Ma cuhva ndo sa zandavi ñaha ñiyivi sii ndo sihin tuhun ña ñiñi vatyí sa cuenda tandihi cuhva ña vaha ya cua cuxaan ra Ndyoo, ta cua tasi tuñi ra sii ñiyivi ña tyaa yahvi sii ra.

⁷ Yucuan cuenda ma cutahan ndo sihin ñiyivi zavaha tacuan

⁸ vatyí i sicoo maa ndo nu ñaa quivi cuan. Zoco vityí sa ndu-ín ndo sihin ra ndyaca ñaha sii yo, ta iyo ndo nu ndisi. Zavaha ndo cuhva zavaha ñiyivi sa cuu cuenda ñúhu.

⁹ Vatyí cuhva vaha sa saha Tatyí Ii sii yo cuu sa cua zavaha yo sa vaha ta sa ndoo ta sa ndisa.

¹⁰ Nducu ndo cuhva coto ndo ñaa sa tahan iñi ra ndyaca ñaha sii yo.

¹¹ Ta ma cu-ín ndo sihin ñiyivi zavaha sa ña vaha tañi zavaha ñiyivi nu ñaa. Ta zacoto ndo sii ñu vatyí zavaha ñu sa ña vaha.

¹² Vatyí saha si ticahan nuu vazu tuhun cahan ñi yo, sa cuenda cuhva zavaha ñu nu xehe.

¹³ Zoco quivi cua naquita sa xehe cuan nu ndisi ta casi xaan cua cunaha si vatyí zandundisi ñúhu maa ra Ndyoo sii tandihi si.

¹⁴ Yucuan cuenda iyo nu catyí si tyehen:

Ndoyo ndoho ra quixi xaan.

Nduvita ndo nu yucu ñiyivi i sihi vatyí cua cuhva ra Cristo ñúhu ityí cuhun ndo.

Catyí si.

¹⁵ Yucuan cuenda zacuenda ndo cuhva zavaha ndo. Ma zavaha ndo cuhva zavaha ñiyivi ña sito. Zavaha ndo cuhva zavaha ñiyivi sito.

¹⁶ Cutyiño vaha ndo minoo minoo quivi yozo caa zatyíño ndo tyiño ra Ndyoo vatyí quiñi xaan cuu tyiemvu ya vityí.

¹⁷ Yucuan cuenda ma cuu ndo ñiyivi tondo; tyituñi iñi ndo ñaa sa cuñi ra ndyaca ñaha sii yo sihin ndo.

¹⁸ Ma coho ndo ndixi, ta ma cuu ndo ra siñi vatyí yucuan cua zatívi sii ndo. Zoco cuhva ndo sa cutu cuii Tatyí Ii añima ndo.

¹⁹ Cahan ndo maa ñi sa vaha sihin minoo ndo ta sihin inga ndo. Cata ndo salmos, ta coro ta yaa sa saha Tatyí Ii sii ndo. Cata ndo ta zacahnu ndo sii ra Ndyoo sihin tandihi cuii añima ndo.

²⁰ Ta tandihi saha vazu ñaa sa tahan ndo, zoco nacuhva ndo tyahvi ndyoo sii ra Ndyoo Zutu yo sihin zivi ra Jesucristo, ra ndyaca ñaha sii yo.

Cuhva cuñi si coo yo sihin ñiyivi sii yo

²¹ Tyaa ndo yahvi sii minoo ndo ta sii inga ndo vatyí cuhva cuan tyaa ndo yahvi sii ra Ndyoo.

²² Ndoho ñuzihí, tyaa ndo yahvi sii yíi ndo tañi tyaa ndo yahvi sii ra ndyaca ñaha sii yo, ra Cristo.

²³ Vatyí ndyaca ñaha rayíi sii ñazíhi ra tañi ndyaca ñaha ra Cristo sii ñiyívi sino íni sii ra. Ta zacacu ra sii maa yo sa cuu coño ñuhu ra.

²⁴ Yucuan cuenda tañi maa yo sa sino íni sii ra Cristo tyaa yo yahvi sii ra, zuun ñi cuhva cuan natyaa ñuzíhi yahvi sii yíi ñu tandíhi cuii cuhva.

²⁵ Ta ndoho rayíi, cuñi xaan ndo sii ñazíhi ndo tañi cuñi xaan ra Cristo sii ñiyívi sino íni ta saha ra sa cuu ra sa cuenda maa yo.

²⁶ Tacuan i zavaha ra vatyí cua zanduu ra ñiyívi vaha sii yo. Ta zandundíi ra sii yo sihin sa sicoo ndutya yo ta sihin sa cuiñi yo Tuhun Ndyoo.

²⁷ Cuñi ra Cristo cuhva ra sii yo sii ra Ndyoo tañi minoo sa vaha xaan ta ndíi xaan, ñahñi sa quiñi caa a sa ña vaha zoco minoo sa vaha xaan sa ndisa cuii ta sa ndoo xaan.

²⁸ Tacuan i zavaha ra Cristo vatyí cuñi xaan ra sii yo; yucuan cuenda cuñi si sa cuñi xaan rayíi sii ñazíhi ra tañi cuñi ra sii coño ñuhu maa ra. Tatu cuñi xaan rayíi sii ñazíhi ra, cuñi xaan ra sii maa ra cuhva cuan.

²⁹ Vatyí yoñi numinoo ra sa ña cuñi sii coño ñuhu maa ra, zoco zacuenda xaan ra sii si tañi zacuenda ra Cristo sii ñiyívi sino íni sii ra.

³⁰ Ta maa yo cuu zuhva coño ñuhu ra Cristo, coño ra ta yíqui ra.

³¹ Catyí Tuhun Ndyoo: “Nazandoo rayíi sii zutu ra ta sii zíhi ra, ta nandu-ín ra sihin ñazíhi ra. Ta sa nduu tahan ñu cua nduu ñu minoo ñi coño ñuhu.”

³² Ihya cuu minoo tuhun xehe sa cahnu xaan. Ta catyí mi vatyí cuñi si catyí si vatyí ndu-ín ra Cristo sihin ñiyívi ra.

³³ Ta inga tucu cuhva catyí si vatyí cuñi si sa cuñi xaan ndo sii ñazíhi ndo tañi cuñi ndo sii maa ndo, ta natyaa xaan ñuzíhi yahvi sii yíi ñu.

6

¹ Ndoho sa ndyíhi tyaa ndo yahvi sii zutu ndo ta sii zíhi ndo. Tahan si sa tyaa ndo yahvi sii ñu vatyí sino íni ndo sii ra Cristo.

²⁻³ Iyo minoo ley maa ra Ndyoo catyí si: “Tyaa ndo yahvi sii zutu ndo ta sii zíhi ndo.” Catyí si. Ihya cuu sa xihna ñi ley i catyí si ñaa sa cua cuhva ra Ndyoo sii yo tatu zavaha yo sii si vatyí catyí si vatyí zíi xaan cua cuñi yo tatu zavaha yo sii si, ta cuaha cuiya cua cundito yo ñuu ñiyívi ya.

⁴ Ta ndoho ra cu zutu sa ndyíhi, ma zacuxaan ndo sii zehe ndo. Zacuaha ndo sii si tañi cuñi ra Ndyoo, ta cañi ndo sii si tatu cuñi si, zoco ña yaha xaan.

⁵ Ndoho ra cu muzu, tyaa ndo yahvi sii patrón ndo ihya ñuu ñiyívi. Nducu xaan ndo cuhva zavaha ndo cuhva cuñi ra, tañi cuhva tyaa ndo yahvi sii ra Cristo. Ta ma zandavi ñaha ndo sii ra.

⁶ Zatyíño vaha ndo, yívi cuhva sa ndyehe ñi patrón ndo, zoco vazú ña ndyehe ra, zatyíño ndo. Ta yívi sa vatyí catyí ra vatyí ñiyívi vaha cuu ndo, zoco zatyíño vaha ndo tandíhi tyiemvu tañi zatyíño ndo tyíño ra Cristo, ta zatyíño ndo sihin tandíhi cuii añima ndo.

⁷ Zatyíño ndo minoo sa ndisa tañi zatyíño ndo cuenda ra Cristo ta yívi sa cuenda ñiyívi.

⁸ Vatyí sito yo vatyí ñaa sa vaha zavaha yo vazú muzu cuu yo a vazú yívi zoco cua tyiyahvi ra Cristo sii yo sa cuenda sa vaha zavaha yo.

⁹ Ta ndoho ra cu ra ndyaca ñaha sii muzun, cuu ndo ñiyívi vaha sihin muzu ndo. Ta ma zayuhu xaan ndo sii ra vatyí sito ndo vatyí iyo ra ndyaca ñaha sii ndo andívi, ta ín ñi ndyehe ra sii tandíhi yo.

Tundyee íni sa saha ra Ndyoo sii ñiyívi sino íni

¹⁰ Ta inga tucu tuhun, naco xaan tundyee íni sii ndo vatyí ín ñi cuu ndo sihin ra ndyaca ñaha sii yo, ta cuaha xaan cuaha xaan tundyee íni iyo sii maa ra.

¹¹ Ta tañi zacuenda minoo zandaru sii ra sihin ndaha tyíño ra, tacuan zacuenda ndo ndo sihin tandíhi sa saha ra Ndyoo sii ndo vatyí tacuan ta cuu zahacanaa ndo sii cuihna vatyí cuñi xaan ra zandavi ñaha ra sii yo.

¹² Ta yivi sihin ñiyivi sa iyo coño ñuhu sahñi tahan yo, sihin tatyí cuihna sa ña cuu ndyehe yo. Iyo ra ndyaca ñaha nahnu sii sa ña vaha ñuu ñiyivi ya ta cuaha xaan inga tatyí ña vaha.

¹³ Yucuan cuenda tiin cuenda vaha ndo sii tandihi sa saha ra Ndyoo vatyí tacuan ta cuu zahacanaa ndo sii cuihna quivi sahñi tahan ra sihin ndo, ta ma ndoyo ñuhu ndo.

¹⁴ Tañi nandyaa minoo zandaru sihin minoo sinchu sisi ra, tacuan cuiñi ndyaa ndo sihin sa ndisa. Ta maa ñi sa vaha zavaha ndo. Ta tacuan ta cua zacacu ra Ndyoo sii ndo tañi zacacu minoo zandaru sii ra sihin minoo caa ñoho yiqui ndyica ra.

¹⁵ Ta tañi ñoho zapato saha ra zandaru ta ndyaa listo ra sa cuhun ra nu iyo cuatyí, tacuan cundyaa listo ndo sihin Tuhun Ndyoo ta zacoto ndo sii ñiyivi vatyí cuu nduvaha ñu sihin ra Ndyoo, ta ma cuxaan ca ra sihin ñu.

¹⁶ Ta tañi zacuenda zandaru sii ra sihin minoo caa ta ma nañi nduva sii ra, tacuan cuñi si sa cuniñi xaan iñi yo sii ra Ndyoo. Ta cuhva cuan cuu ndahva yo nduva sa cayu sihin ñuhu sa cañi cuihna sii yo.

¹⁷ Ta tañi zacuenda zandaru sii xiñi ra sihin minoo caa sa ñoho xiñi ra, tacuan nacuhva ndo sii ndo sii ra Ndyoo nazacacu ra sii ndo. Ta cutyiño ndo Tuhun Ndyoo vatyí mityí sa sityiño Tatyí li cuu si.

¹⁸ Ta cahan ndo sihin ra Ndyoo tandihi cuii cuhva sihin cuhva saha Tatyí li sii ndo. Ta caca ndo sa tyindyee ra sii ndo. Listo vaha cuu ndo, ta ma zandoo ndo sa cahan ndo sihin ra Ndyoo sa cuenda tandihi ñiyivi sino iñi.

¹⁹ Ta cahan ndo sihin ra Ndyoo sa cuenda mi vatyí tacuan ta cua ñihi que cuhva quehin ta ma yuhi zacote Tuhun Vaha sa cuenda ra Cristo sii ñiyivi. Xehe xaan i cuu tuhun ya, zoco vityí sito yo sii si.

²⁰ Ta sa cuenda sa zacote tuhun ra Cristo, ta ñohi vehe caa, zoco caca ndo sii ra Ndyoo vatyí ma yuhi ta zacoto que tuhun ra tañi tahan si zacote.

Tasi ra Pablo sii ra Tíquico nu yucu ra hermano ñuu Efeso

²¹ Ta cua nacatyí ra hermano Tíquico sihin ndo tandihi sa tehin ta ñaa sa zavehi. Ña zaña ra sa zatyiño xaan ra tyiño ra ndyaca ñaha sii yo, ta cuñi xaan ndi sii ra.

²² Tasi sii ra nu yucu ndo vatyí cua zacoto ra sii ndo yozo caa iyo maa ndi, ta cuhva cuan cua cuhva ra tundyee iñi sii ndo.

²³ Ta nacuhva ra Ndyoo Zutu yo sihin ra Jesucristo ra ndyaca ñaha sii yo sa coo sa taxi añaima tandihi ndoho sa cuu yañi yo. Ta nacuhva ra sa cuniñi xaan iñi ndo. Ta tacuan ta cua cuñi xaan ndo sii maa ra ta sii ñiyivi.

²⁴ Ta nanazoco xaan ra sii tandihi ñiyivi cuñi xaan sa ndisa cuii sii ra Jesucristo, ra ndyaca ñaha sii yo.

Minoo Carta I Tasi Ra San Pablo Sii Ñiyivi Sino Iñi Sii Ra Ndyoo Ñuu Filipos

Ñoho ra Pablo vehe caa ta tyaa ra minoo carta sii ñiyivi sino iñi sii ra Ndyoo ñuu Filipos

¹ Yuhvi ra Pablo sihin ra Timoteo, muzu maa ra Jesucristo cuu sii ndi. Ta tyaa ndi carta ya sii tandihi ndoho ra sino iñi sii ra Cristo Jesús ñuu Filipos sihin ra ndyaca ñaha sii ndo ta ra tyindyee sihin tyiño ra Ndyoo nu yucu ndo.

² Nacuhva xaan ra Ndyoo Zutu yo tumañi iñi sii ndo ta sa coo sa taxi añima ndo. Ta tacuan nazavaha tucu ra Jesucristo ra ndyaca ñaha sii yo.

Cahan ra Pablo sihin ra Ndyoo sa cuenda ñiyivi sino iñi

³ Tahan tahan saha nacohon iñi sii ndo ta nacuhve tyahvi ndyoo sii ra Ndyoo sa cuenda ndo.

⁴ Ta tandihi saha sa quehin sihin ra Ndyoo sa cuenda ndo, zii xaan cuñi

⁵ vaty ndya quivi xihna ñi sa i siñi ndo tuhun sa cuenda ra Cristo ta ndya vityi ña zaña ndo sa tyindyee ndo sii, ta zacoto yo Tuhun Vaha ra Ndyoo.

⁶ Sito vehi vaty tañi i quisaha ra Ndyoo zavaha ra minoo tyiño vaha xaan añima ndo, tacuan cua zavaha ca ra sii si ndya quivi cua quisi tucu ra Cristo Jesús.

⁷ Tahan si sa caca iñi cuhva ya sa cuenda maa ndo vaty ñoho xaan iñi sii ndo. Ta ñn ñi cuhva tyindyee ra Ndyoo sii yo sihin tundyee iñi sii maa ra. Vazu ñohi vehe caa a vazu cuhin nuu ra cu tyiño, zoco saha ra Ndyoo tundyee iñi sii, ta quehin tuhun ra sihin ra ñoho vehe caa ta sihin ra cu tyiño. Ta sito ra vaty sa ndisa cuu Tuhun Ndyoo.

⁸ Sito vaha ra Ndyoo vaty cuñi xein sii tandihi ndo tañi cuñi xaan ra Cristo Jesús sii ndo.

⁹ Ta sique sii ra Ndyoo vaty cua cuñi xaan ca ndo sii tandihi ñiyivi, ta cua coo ca sa siñi tuñi ra Ndyoo sihin ndo, ta cua cutuñi ca iñi ndo ñaa sa cuu sa ndisa.

¹⁰ Vaty tacuan ta cua cuu casi ndo sa vaha xaan cuhva cuñi ra Ndyoo, ta vaha xaan cua cuu cuhva iyo ndo, ta ñahñi cuaty ndo cua coo ndya cuhva ndya quivi cua quisi ra Cristo.

¹¹ Ta tandihi saha cua zavaha ndo sa vaha ta sa ndoo, cuhva zavaha ra Cristo. Ta cua zacahnu ñiyivi sii ra Ndyoo, ta cua catyi ñu vaty vaha xaan ra sa cuenda cuhva zavaha ra sihin maa ndo.

Maa ñi tyiño ra Ndyoo zavaha ra Pablo vaty iyo ra Cristo añima ra

¹² Ta cuñi sa cua coto ndo hermanos vaty tandihi sa tehin, tyindyee si sii, ta ñihi cuhva quehin Tuhun Ndyoo sihin ñiyivi.

¹³ Vaty tandihi ra zandaru ta inga ñiyivi ihya, sito ñu vaty ñohi vehe caa vaty sino iñi sii ra Cristo.

¹⁴ Ta tyindyee si sii cuaha xaan hermano yo sa ñohi vehe caa. Ta vityi ña yuhu ca ra vaty sito ra vaty tyindyee ra Ndyoo sii, ta nduñihi ca cuhva nacaty ra Tuhun Ndyoo sihin ñiyivi.

¹⁵ Ndisa iyo ra nacaty tuhun sa cuenda ra Cristo vaty cuñi ra nducahnu ca ra ta cuñi ra sa zacahnu ñiyivi sii ra. Zoco iyo ra nacaty Tuhun Ndyoo sihin tandihi cuii añima ra vaty cuñi ra tyindyee ra sii.

¹⁶⁻¹⁷ Nacaty ra Tuhun Ndyoo vaty cuñi xaan ra sii, vaty sito ra vaty i quisi ndyaca ra ndyaca ñaha sii yo sii, ihya vaty cuñi ra cutyiño ra sii, sa zacote sii ñiyivi vaty sa ndisa cuu Tuhun Vaha ra. Zoco inga ra cuan, nacaty ra tuhun ra Cristo vaty iyo minoo sa cuñi ra ñihi ra sihin si. Ta ña vaha añima ra cuhva zavaha ra sii si vaty cuñi ra cuhva ra tizihii sii, ñii ñi sa ñohi vehe caa ya.

¹⁸ Zoco ñahñi sa cuu sa cuenda mi vazu zavaha ra sii si sihin minoo añima vaha a sihin minoo añima ña vaha vaty tuhun maa ra Cristo cuu sa zacoto ra, ta yucuan cuenda zii xaan cuñi.

¹⁹ Ta zii xaan ca cua cuñi vatyi site vatyi tandihi sa cuu sii, ta cua tyindyee si sii, vatyi cahan ndo sihin ra Ndyoo sa cuende ta tyindyee Tatyi li ra Jesucristo sii.

²⁰ Ta sito vehi vatyi cua tyindyee ra Ndyoo sii, ta ma cucahan nui, ta ma cuyuhi. Ta tacuan ta cua quehin tuhun ra Cristo sihin tandihi cuii añime. Ta tacuan ta cua coto ñiyivi vatyi cahnu xaan cuu ra Cristo. Ta ña sica xaan iñi a cundito que a cui, zoco cuñi sa cua ndyehe ñiyivi cuhva iye ta coto ñu vatyi cahnu xaan cuu ra Cristo.

²¹ Vatyi tatu cundito que ñuu ñiyivi ya cua zatyine maa ñi tyiño ra Cristo, ta tatu cui cuaha xaan sa vaha cua ñihi.

²² Ta tatu cundito que, vaha, vatyi cua zatyino que sa cuenda ra Cristo. Ta yucuan cuenda ña site tatu vaha ca cundite a cui

²³ vatyi iyo uu cuhva, ta ña site ndya sa cuu sa vaha ca vatyi vaha xaan tatu cuu cuhin nu ndyaa ra Cristo.

²⁴ Zoco sa cuenda maa ndo ta cuñi si sa ndoi ñuu ñiyivi vatyi cuu tyindyei sii ndo.

²⁵ Ta yucuan cuenda site vatyi cua ndoi ñuu ñiyivi vatyi cuñi si sa tyindyee que sii ndo, ta cua sino ca iñi ndo, ta zii ca cua cuñi ndo.

²⁶ Ta cua coo quivi cua quisi ndyehi sii ndo, ta zii xaan ca cua cuñi yo sa cuenda ra Cristo Jesús.

²⁷ Cuñi si sa coo ndo tañi iyo ñiyivi sino iñi Tuhun Vaha sa cuenda ra Cristo. Ta ziqui tatu quisi ndyehe que sii ndo a ma quisi que zoco cua saa tyiño nu ndyei vatyi sino xaan iñi ndo ta ñin xaan cuu ndo ta nacatyi xaan ndo Tuhun Ndyoo.

²⁸ Ta ma yuhu ndo vazu ñaa sa cua zavaha ra xaan iñi sii ndo sihin ndo vatyi tatu ma yuhu ndo sii ra, zañaha casi si sii ra vatyi cua naa ra, ta zañaha si vatyi cua zacacu ndisa cuii ra Ndyoo sii maa ndo.

²⁹ Vatyi sa cuenda ra Cristo ta ñihi maa ndo sa vaha, zoco ña ñin ñi sa sino iñi ndo sii ra cuu si, zoco cua ndyehe tucu ndo tundoho sa cuenda ra.

³⁰ ñin ñi cuhva sañhi tahan yo sa cuenda ra Cristo. Sa tuhva ndo ndyehe cuhva sañhi tehin, ta vityi siñi tucu ndo vatyi ña zañe sa zatyino xein tyiño ra Ndyoo.

2

Cuca xaan ra Cristo, zoco i quisi ra ñuu ñiyivi, ta i sihi ra tañi minoo ra ndahvi

¹ Ndisa zanduzii ra Cristo iñi yo. Ta ndisa vatyi cuñi xaan yo sii tahan yo ta tyindyee yo sii tahan yo. Ta ndisa tucu vatyi ñin ñi cuu yo vatyi iyo Tatyi li sihin yo. Ta ndisa vatyi cundahvi iñi yo sii tahan yo.

² Tatu sa ndisa cuii cuu tandihi cuhva cuan, ñin ñi cuu ndo sa ndisa. Ta sihin cuhva cuan zanduzii ndo iñi. Cuñi xaan ndo sii ra tahan ndo, tañi cuñi xaan ra Cristo sii ndo. ñin ñi cuhva caca iñi ndo, ta ñin ñi cuhva zavaha ndo.

³ Ma zavaha ndo maa ñi sa cua tyindyee sii maa ndo. Zavaha ndo sa cua tyindyee tucu sii inga ñiyivi. Ma nducu ndo cuhva nduu ndo tañi ra ñiñi. Ma caca iñun vatyi vaha xoon. Zanduluhlu suun, ta caca iñun vatyi vaha ca inga ra.

⁴ Tahan tahan ndo caca iñi ndo sa cuenda sa cua tyindyee sii inga ñiyivi ta yivi sii sa maa ñi maa ndo.

⁵ Caca iñi ndo cuhva i sica iñi ra Cristo Jesús

⁶ vatyi vazu Ndyoo cuu ra, zoco ña zacahnu ra sii ra. Ta ña cuñi ra sa zacahnu ñiyivi sii ra tañi zacahnu ñu sii ra Ndyoo Zutu ra.

⁷ I zandoo ra tandihi cuii sa iyo sii ra andivi ta sa cuca ra, ta i nduu ra minoo ñiyivi. Ta i cuu ra tañi minoo muzu.

⁸ I nduu ra minoo ñiyivi ndahvi ñi, ta i zanduluhlu xaan ra sii ra ndya cuhva ndya i tyaa ra yahvi sii ra Ndyoo ta saha ra sa cañhi ñiyivi sii ra. I sihi ra nu cruz tañi minoo ra iyo cuatyí.

⁹ Yucuan cuenda zanducahnu xaan ra Ndyoo sii ra, ta saha ra minoo zivi sii ra sa cahnu ca ta ziqui tandihi inga zivi.

¹⁰ Tacuan i zavaha ra Ndyoo vatyí cuñi ra vatyí cua cuiñi siti tandihi yo ta zacahnu yo sii ra Jesús tatu cuiñi yo zivi ra. Cuñi ra Ndyoo vatyí cua cuiñi siti tandihi sa iyo andivi, ta nu ñuhu ta xu ñuhu ta zacahnu tandihi cuii si sii ra Jesús.

¹¹ Ta cuiñi ra Ndyoo vatyí cua vatyí tandihi cuii sa iyo vatyí ra Jesucristo cuu ra ndyaca ñaha. Cuhva cuan cua zacahnu xaan si sii ra Ndyoo Zutu yo.

Ñiyivi sa sino iñi sii ra Ndyoo cuu ñu tañi ñúhu ñuu ñiyivi ya

¹² Cuñi xein sii ndo hermanos. I tyaa xaan ndo yahvi sii mi quivi i sindyei sihin ndo. Yucuan cuenda tyaa tucu ndo yahvi sii, vityi sa yoñi ndyaa sihin ndo. Ñihi xaan nducu ndo kuhva zavaha ndo maa ñi sa cuiñi ra Ndyoo vatyí maa ra zacacu sii ndo, ta yuhu ndo coto zavaha ndo minoo kuhva sa ma tahan iñi ra

¹³ vatyí maa ra Ndyoo cuu ra iyo añima ndo. Ta tyindyee ra sii ndo vatyí cua cuiñi ndo zavaha ndo sa cuiñi maa ra, ta cua zavaha ndo sii si.

¹⁴ Ta vazu ñaa sa cua zavaha ndo, zavaha ndo sii si sihin minoo kuhva sa ma coo tizihí ta ma cahñi tahan ndo,

¹⁵ ta yoñi cuu tyaa cuatyí sata ndo. Coo ndo minoo kuhva vaha xaan tañi sa zehe ra Ndyoo cuu sii ndo nu yucu ñiyivi iyo xaan cuatyí ñuu ñiyivi ya. Cuu ndo tañi ñúhu sa zandundisi sa ñaa ñuu ñiyivi ya.

¹⁶ Nacatyí xaan ndo Tuhun Ndyoo sihin ñiyivi, kuhva cuu cacu ñu. Ta zii xaan cua cuiñi quivi quisi ra Cristo sa cuenda maa ndo vatyí cua cote vatyí yivi sa caha ñi i zatyíne nu yucu ndo.

¹⁷ Ta vazu cahñi ñiyivi sii, sa cuenda Tuhun Ndyoo, zoco cua cuu si minoo sa cua kuhve sii ra Ndyoo sihin sa sino iñi maa ndo sii ra. Ta zii xaan cua cuiñi ñi ñi sihin maa ndo.

¹⁸ Ta cuzii xaan tucu iñi maa ndo sihin mi.

Tasi ra Pablo sii ra Timoteo ta ra Epafrodito ndya ñuu Filipos

¹⁹ Tatu cuiñi ra ndyaca ñaha sii yo, ra Jesús, sa vatyí cua tasi sii ra Timoteo nu yucu ndo. Cuñi sa cua ndyehe ra yozo caa iyo ndo ta quisi nacatyí ra sihin. Tacuan ta zii xaan cua cuiñi.

²⁰ Vatyí maa ñi maa ra Timoteo sica iñi tañi sica iñi mi, yoñi inga ra. Sica iñi ra sa ndisa cuii yozo caa iyo maa ndo.

²¹ Tandihi inga ra, sica iñi ra sa cuenda tyiño maa ra. Ña nducu ra kuhva zavaha ra kuhva cuiñi ra Cristo Jesús.

²² Ta sito ndo vatyí vaha xaan ra Timoteo. Cuu ra tañi minoo zehi sa cuenda kuhva tyindyee ra ta nacatyí ndi Tuhun Ndyoo.

²³ Sa cuiñi tasi sii ra nu yucu ndo, zoco cua ndyehe xihne yozo caa cundaa tyiñe ihya.

²⁴ Zoco ñii xaan iñi sii ra ndyaca ñaha sii yo vatyí ña naha xaan ca ta cua cuu kuhin nu yucu ndo.

²⁵ Ta sica iñi vatyí cuiñi tucu si sa natasi sii ra hermano Epafrodito nu yucu ndo. Maa ndo i tasi sii ra ihya sa tyindyee ra sii, sihin tyiño ya. Ta ñi ñi i sahñi tahan ndi sihin cuihna sa cuenda Tuhun Ndyoo.

²⁶ Cuñi xaan ra Epafrodito cunuhu ra nu yucu ndo. Ta sica xaan iñi ra vatyí sa sito maa ndo vatyí i cuhu xaan ra ihya.

²⁷ Ta ndisa i cuhu xaan ra ndya kuhva sa vatyí cuii cuu ra, zoco i cundahvi xaan iñi ra Ndyoo sii ra. Ta ña ñi ñi sii maa ra, i cundahvi tucu iñi ra Ndyoo sii, ta ñá saha ra sa cuu ra coto nducuihya xaan ca iñi ta ziqui vityi.

²⁸ Yucuan cuenda cuiñi sa cunanuhu ra vatyí cua ndyehe ndo sii ra inga saha, ta zii cua cuiñi ndo. Ta tacuan ta ma caca ca iñi vatyí cua ndyehe ndo vatyí iyo vaha ra.

²⁹ Tiin cuenda vaha ndo sii ra sa cuenda ra ndyaca ñaha sii yo ta sihin sa zii cuiñi ndo. Tyaa xaan ndo yahvi sii ra ta sii inga ñiyivi tañi maa ra

³⁰ vatyí sa vatyí cuii cuu ra sa cuenda tyiño ra Cristo. Ñá sica iñi ra vazu cua cuu ra. Ta i tyindyee ra sii, sa cuenda maa ndo vatyí ñá cuu quisi tyindyee maa ndo sii.

3

Cuhva ndundoo yo ityi nuu ra Ndyoo sa ndisa

¹ Ta vityi ndoho hermanos cuzīi xaan iñi ndo sa cuenda ra ndyaca ñaha sii yo. Ña yii cuu si cuenda mi vazu cuaha saha tyei sa zuun ñi cuhva sa sa tyei sii ndo vatyi tyindyee si sii maa ndo.

² Zacuenda vaha xaan ndo sii ndo sihin ra quiñi iyo. Zavaha ra cuhva cuñi cuihna. Catyi ra vatyi cua cacu añima ñiyivi tatu zavaha ñu costumbre circuncisión.

³ Zoco sito yo vatyi ña tacuan cua cacu yo. Quivi i saha cuenda yo sii yo sii ra Ndyoo cuu si tañi i tyaa maa ra tuñi ra sii yo vatyi i zandasi ra cuatyí yo. Ta zacahnu maa yo sii ra sihin cuhva saha Tatyí li ra sii yo. Ta zii xaan cuñi yo vatyí cuenda ra Jesucristo cuu sii yo. Ta ña sica iñi yo vatyí cua cacu yo sa cuenda costumbre sa zavaha yo.

⁴ Yoñi yo cua cacu sihin cuhva zavaha ñi maa yo. Tatu ndisa vatyí cuu cacu yo sihin sa zavaha yo, vatyí ca cua cacu mi ta ziqui tandihi inga ra

⁵ vatyí uña quivi ñi mi, ta i zavaha ñu costumbre circuncisión cuan sihin. Ra hebreo cui, tata ra Benjamín. Yivi inga tata cui, maa ñi tata hebreo. Ta minoo ra fariseo i cui, ta i site ta i tyei yahvi sii tandihi cuii ley sahnu.

⁶ I tyaa xein yahvi sii ley sahnu cuan, ta yucuan cuenda i zayanga xein sii ñiyivi sa cuu cuenda ra Cristo. Ta i zavehi tandihi cuii sa catyi ley sahnu cuan, ta yucuan cuenda yoñi cuu tyaa cuatyí sate sa cuenda si.

⁷ Zoco tandihi sa i sica iñi quivi cuan vatyí ñiñi si, ña vale ca si vatyí maa ra Cristo cuu ra zacacu sii.

⁸ Ta site vatyí tandihi sa i zavehi, ña vale si, ta ña tyaa que yahvi sii si vatyí ñiñi xaan ca sa coto yo sii ra Cristo Jesús, ra ndyaca ñaha sii yo. Yucuan cuu sa vale xaan ca. Ta tyaa siye tandihi inga cuhva sa i zavehi, ta cuu si tañi mihin sa cuenda mi vatyí cuñi xaan que sa cote sii ra Cristo.

⁹ Cuñi xaan que ndu-iin sihin ra. Ñá ndundoi ityi nuu ra Ndyoo sihin sa tyei yahvi sii ley sahnu, zoco sa cuenda sa sino iñi sii ra Cristo ta catyi ra Ndyoo vatyí vehi.

¹⁰ Ta vityí cuñi xein cote sii ra Cristo. Cuñi cote yozo caa iyo tundyee iñi sii maa ra vatyí i nandoto ra sisi sa i sihi ra. Ta cuñi ndyehi tundoho in ñi sihin maa ra ta sa cuenda ra. Ta cuñi sa cuu tandihi cuii cuhva ña vaha sa cuñi zavehi

¹¹ vatyí cuñi cui minoo ra cua nandoto sa cuenda ra Cristo quivi cua cui.

Cua cuhun yo ityi nuu ca sihin ra Ndyoo

¹² Ña catyi sihin ndo vatyí ñahñi ca sa cumañi sii, ta sa ndui minoo ra vaha xaan vityí. Ña tacuan. Zoco cuahan que ityi nuu ca. Cuñi sa ñihi sa saha ra Cristo Jesús sii, vatyí maa ra cuu ra i casi sii, ta i ndui ñiyivi ra.

¹³ Hermanos, ña sica iñi vatyí sa ndui minoo ra vaha xaan tañi ra Cristo. Zoco ihya cuu sa zavehi, zanei iñi sii tandihi sa i yaha, ta zañihi ta cuehin ityi nuu ca.

¹⁴ Cuñi ñihi tandihi sa cua cuhva ra Ndyoo sii, andivi sa cuenda ra Cristo Jesús. Yucuan cuenda zañihi ta cuehin ityi nuu ca. Cuahan ca sino iñi tahan tahan quivi.

¹⁵ Yucuan cuenda tandihi yo sa sino xaan iñi, nacaca iñi yo cuhva ya. Ta tatu iyo minoo ndo ña sica iñi ndo cuhva ya, cua cuhva ra Ndyoo sa cutuñi iñi ndo.

¹⁶ Zoco ihya cuu sa cuñi si; cuñi si sa caca iñi yo ta zavaha yo tandihi sa vaha sa i cutuhva yo.

¹⁷ Hermanos, cundyico ndo sii. Ta zaha ndo cuenda yoo inga ra zavaha cuhva zavehi.

¹⁸ Sa cuaha xaan saha catyi sihin ndo, ta vityí cuihya xaan cuñi ta saqui ta nacatyí sihin ndo inga saha vatyí iyo cuaha xaan ra zacuaha ra vatyí ña ñiñi cuu sa i sihi ra Cristo.

¹⁹ Ta quivi cua quisi ra Cristo cua cuhun ra cuan andyaya. Ña zacahnu ra sii ra Ndyoo. Zacahnu ra sii ñaa ndihi cuii ca sa cuñi maa ra zavaha ra. Zavaha ra sa quiñi, ta ña cahan nuu ra sihin si. Sino ca zacahnu ra sii ra sa cuenda sa quiñi zavaha ra. Ta sica iñi ra in ñi sa cuenda sa iyo ñuu ñiyivi ya.

²⁰ Zoco andivi cuu ñuu maa yo, ta ndatu yo quivi cua quisi tucu ra Jesucristo, ra ndyaca ñaha sii yo. Maa ra cua zacacu sii yo.

²¹ Ta cua zama ra coño ñuhu sa iyo sii yo ihya ñuu ñiyivi. Ta cua zanduvaha ra inga coño ñuhu yo tañi coño ñuhu maa ra. Sihin tundyee iñi maa ra cua zama ra sii yo. Ta sihin sa zuun ñi tundyee iñi cuan ndyaca ñaha ra sii tandihi cuii sa iyo.

4

Tandihi tyiemvu nacuzii iñi yo sihin ra Ndyoo

¹ Cuñi xein sii ndo, hermanos. Ñoho xaan iñi sii ndo. Zi xaan cuñi sihin ndo vaty yivi sa caha ñi i nacaty Tuhun Ndyoo sihin ndo. Coto ñáha ndoyo ñuhu ndo sihin Tuhun Ndyoo.

² Ta vityi sica xein tumañi iñi sii ña Evodia ta sii ña Síntique vatyi nacoo sa vaha sihin minoo ña ta sihin inga ña vaty yucuan cuu sa cuñi ra ndyaca ñaha sii yo.

³ Ta yoho ra tehin, ra vaha xaan, sique suun vaty tyindyeeun sii ñu sa nacoo sa vaha sihin ñu vaty i tyindyee nduu tahan ñu sii, sa zacote Tuhun Ndyoo sihin ra Clemente ta inga zuhva ca ra. Ta ndyaa zivi ñu nu libro ra Ndyoo andivi.

⁴ Cuzii iñi ndo sihin ra ndyaca ñaha sii yo tandihi cuii tyiemvu. Ta catyi sihin ndo inga saha, cuzii iñi ndo sihin ra ndyaca ñaha sii yo.

⁵ Ta nandyeehe tandihi ñiyivi vaty ñiyivi vaha cuu ndo sa ndisa. Ta nacohon iñi ndo vaty sa cuñi quisi ra Cristo.

⁶ Ma caca xaan iñi ndo, zoco tandihi tyiemvu cahan ndo sihin ra Ndyoo, ta caca ndo tandihi sa siñi ñuhu sii ndo sii ra. Ta ziqui nacuhva ndo tyahvi ndyoo sii ra sa cuenda sa cua cuhva ra.

⁷ Ta cua cuhva ra Ndyoo sa coo sa taxi añima ndo. Cahnu xaan cuu sa taxi sa saha maa ra. Yoñi cuu cutuñi iñi cuhva sa cahnu xaan si. Cua coo sa taxi añima ndo ta sihin sa siñi tuñi sii ndo vaty ñi cuu ndo sihin ra Cristo Jesús.

Nacaca iñi yo maa ñi sa vaha

⁸ Hermanos, caca iñi ndo maa ñi sa ndisa ta sa ndoo ta sa ndii. Caca iñi ndo sii sa ña quiñi, sii sa tyaqui ta sa vaha. Caca iñi ndo sii sa tahan iñi ra Ndyoo ta sa cuenda cuhva vaha zavaha ñiyivi.

⁹ Zavaha ndo cuhva i zacuehi sii ndo, tandihi sa i nacaty sihin ndo ta cuhva i ndyeehe ndo i zavehi. Ta cua ndoo xaan ra Ndyoo sihin ndo. Ta cua cuhva xaan ra sa coo sa taxi añima ndo.

I tyindyee ñiyivi ñuu Filipos sii ra Pablo

¹⁰ Zi xaan cuñi, ta zacahni sii ra Ndyoo vaty i tyindyee ndo sii, inga saha sihin xuhun. Ta site vaty cuñi ndo tyindyee ndo sii, tandihi saha, zoco ña cuu.

¹¹ Ña catyi cuhva ya vaty iyo sa siñi ñuhu sii, vaty sa cutuhve ndoi vaha sihin sa iyo sii, vazu iyo cuaha a vazu ñahñi.

¹² Ndoi vaha tatu iyo cuaha xaan sa sii, a vazu ñahñi. Cundyee iñi vazu sizoque, ta vaha tucu cuñi tatu iyo sa casi. Site cuzoque, ta site casi vehi.

¹³ Tundyee iñi maa ra Cristo zandundyee xaan si iñi, ta cuu zavehi ñaa sa cuñi maa ra.

¹⁴ Zoco vaha cuhva zacuu ndo vaty i tyindyee xaan ndo sii, sihin tundoho sa ndyehi vityi.

¹⁵ Sito ndo vaty quivi i quisaha nacaty Tuhun Ndyoo i quite nu cu si Macedonia, ta yoñi inga ñiyivi i tyindyee sii. Maa ñi maa ndoho ra ñuu Filipos i saha xuhun sii, vaty i tyindyeyi sii ndo sihin Tuhun Ndyoo.

¹⁶ Ta quivi i sindyeyi ñuu Tesalónica, i tyindyee ndo sii, sihin xuhun uu saha a uñi saha.

¹⁷ Ta ña catyi cuhva ya vaty cuñi xuhun ndo, zoco cuñi sa cua coo ca sa vaha sii maa ndo ityi nuu ra Ndyoo.

¹⁸ Ta vityi ñahñi sa siñi ñuhu sii. Ndyaa cuaha ca sa i zaquisi ndo sihin ra Epafrodito. Ta sa tasi ndo cuan cuu tañi minoo xico azi, saa nu ndyaa ra Ndyoo. Tahan xaan iñi ra cuhva cuan.

¹⁹ Ta cua cuhva ra Ndyoo tandihi sa siñi ñuhu sii maa ndo. Iyo xaan sa cuca ra ndya gloria, ta cua cuhva ra sa siñi ñuhu sii ndo sa cuenda ra Cristo Jesús.

²⁰ Nazacahnu yo sii ra Ndyoo Zutu yo tandihĩ cuii tyiemvu. Ta nacuu si sa ndisa.

Nu ndihĩ cahan ra Pablo

²¹ Tasi minoo nacumi sii tahan tahan ndo, ra sino iñi sii ra Cristo Jesús. Ra ndyaa sihin mi tasi tucu ra minoo nacumi sii ndo.

²² Ta tandihĩ ñu sino iñi ihya tasi ñu minoo nacumi sii maa ndo, ta cuaha ca ñu yucu vehe ra ndyaca ñaha, ra César.

²³ Ta tumañi iñi sa saha ra Jesucristo, nacoo xaan si sihin tandihĩ ndo. Ta nacuu si tacuan.

Minoo Carta I Tasi Ra San Pablo Sii Ñiyivi Sino Iñi Sii Ra Ndyoo Ñuu Colosas

Tyaa ra Pablo minoo carta sii ñiyivi sino iñi sii ra Ndyoo ñuu Colosas

¹ Yuhvi ra Pablo, minoo ra apóstol cui cuenda ra Jesucristo, cuhva cuñi ra Ndyoo. Sihin ra Timoteo yañi yo

² tyaa ndi carta ya sii ndoho ra sino vaha iñi sii ra Cristo ñuu Colosas. Nacuhva xaan ra Ndyoo Zutu yo tumañi iñi sii ndo, ta nacuhva ra sa coo sa taxi añima ndo.

Cahan ra Pablo sihin ra Ndyoo sa cuenda ñu sino iñi

³ Tandihí saha sa cahan ndi sihin ra Ndyoo Zutu ra Jesucristo sa cuenda ndo, nacuhva ndi tyahvi ndyoo sii ra

⁴ vatyí ñihí ndi tuhun vatyí sino xaan iñi ndo sii ra Cristo Jesús, ta cuñi xaan ndo sii tandihí ñiyivi sino iñi.

⁵ Tacuan iyo ndo vatyí sito vaha ndo vatyí cua coo ndo sihin ra Ndyoo andiví. Ta i ñihí ndo tuhun cuan quiví i siñi ndo tuhun ndisa, cuhva cua cacu añima yo.

⁶⁻⁷ Ra Epafras yañi yo i zacoto tuhun cuan sii ndo. ñn ñi zatyíño ra tyiño ra Ndyoo sihin mi. Cuu ra minoo muzu vaha ra Jesucristo sa cuenda maa ndo. Ta tacuan ta i saa tuhun cuan nu ndyaa ndo. Ta nacahnu ñuu ñiyivi sitya si. Ta cuaha ñiyivi saha ñu sii ñu sii ra Ndyoo tañi i zavaha maa ndo quiví i sito ndo sa ndisa cuii vatyí cuñi xaan ra Ndyoo sii yo.

⁸ I zacoto ra Epafras sii ndi sa cuenda maa ndo vatyí cuñi xaan ndo sii ñiyivi sino iñi vatyí iyo Tatyí li ra Ndyoo añima ndo.

⁹ Yucuan cuenda ndya quiví i sito ndi tuhun cuan, ta ñá zaña ndi sa cahan ndi sihin ra Ndyoo sa cuenda ndo. Cuñi xaan ndi sa cua coto ndo tandihí cuii sa cuñi ra Ndyoo sa zavaha ndo. Ta cuñi ndi sa cua cuhva maa ra sa siñi tuñi maa ra sii ndo, ta cua cutuñi vaha iñi ndo sihin cuhva saha Tatyí li ra sii ndo.

¹⁰ Vatyí tacuan ta cua cuu zavaha ndo tandihí sa tahan iñi ra Ndyoo cuhva tahan si zavaha ndo. Ta cua zavaha xaan ndo tandihí nuu sa vaha. Ta cua coto ndo sii ra Ndyoo vaha ca tahan tahan quiví.

¹¹ Ta sica ndi sii ra Ndyoo vatyí cua zandundyee xaan ra sii ndo sihin tundyee iñi sii maa ra. Ta tacuan ta cua cundyee xaan iñi ndo ndyehe ndo tundoho, ta zii xaan cua cuñi ndo.

¹² Ta cua nacuhva ndo tyahvi ndyoo sii ra Ndyoo Zutu yo. Maa ra i zanduu ñiyivi vaha sii yo, ta cua ñihí yo sa vaha sa cua cuhva ra nu ndisi xaan sii ñiyivi sino iñi sii ra.

¹³ I zacacu ra Ndyoo sii yo cuhva ndyaca ñaha sa ñaa sii yo. Ta saha ra sii yo sii zehe ra sa cundyaca ñaha ra, ta cuñi xaan ra sii Zehe ra.

¹⁴ I zata ra Ndyoo sii yo sihin ñiñi ra Cristo, ta i zandasi ra cuatyí yo.

Vityí iyo sa vaha sii yo sihin ra Ndyoo vatyí i sihi ra Cristo sa cuenda maa yo

¹⁵ Ña ndyehe yo sii ra Ndyoo. Zoco i nduu ra minoo ñiyivi, ta cuhva cuan cuu coto yo sii ra. Ta yucuan ra cuu ra Cristo, Zehe ra Ndyoo. Cumañi ca sino ñuu ñiyivi ta sa iyo ra Cristo.

¹⁶ Ta i saha ra Ndyoo sa zavaha ra Cristo tandihí sa iyo andiví ta nu ñuhu. Sa cuu ndyehe yo ta sa ña cuu ndyehe yo i zavaha ra. I zavaha ra ángel andiví. Ta i zavaha ra cuihna ta tatyí cuihna. Ta tandihí sa ndyaca ñaha nu ñuhu i zavaha ra, ta sa cuenda maa ra i sino si. Ta sityiño ra sii si yozo cuhva cuñi maa ra.

¹⁷ Cumañi ca coo tandihí si, ta sa iyo maa ra. Ta sa cuenda maa ra ta tañaha ca naa sa zavaha ra.

¹⁸ Ta maa ra cuu xiñi sii tandihí yo sa sino iñi sii ra, ta cuu yo tañi coño ñuhu ra. Xihna ca maa ra i nandoto sisi sa i sihi ra. Ta yucuan cuenda ra cu nuu cuu ra sii tandihí cuii sa iyo.

¹⁹ Vatyí cuñi maa ra Ndyoo vatyí coo tandíhi tundyee iñi maa ra sihin ra Cristo ta cundyaca ñaha ra sii tandíhi.

²⁰ Ta i cuñi ra Ndyoo vatyí tandíhi sa iyo, coo vaha si sihin ra. Yucuan cuenda i sihi ra Cristo, ta sihin niñi ra i zanduvaha ra Ndyoo sii tandíhi sa iyo ta ndya cuhva ndya maa yo sihin maa ra. Sa iyo nu ñuhu ta sa iyo andívi i zanduvaha ra Ndyoo sii si sihin ra.

²¹ Ta i zanduvaha ra sii maa ndo sihin ra vazu ñiyívi xaan iñi sii ra Ndyoo i cuu ndo sa cuenda sa ña vaha i zavaha ndo.

²² Zoco i cundahvi iñi ra Ndyoo sii ndo, ta yucuan cuenda i tasi ra sii Zehe ra sa cuu ra nuu cruz. Ta i ndyehe ra tundoho sihin coño ñuhu ra, ta i sihi ra vatyí tacuan ta cua cuhva ra sii ndo sii ra Ndyoo. Ta sa nduu ndo ñiyívi vaha ta ñahñi ca cuatyí ndo

²³ tatu ma ndoyo ñuhu ndo sihin cuhva sino iñi ndo, ta tatu ma zandoo ndo cuhva sa niñi iñi ndo sii Tuhun Vaha sa i siñi ndo. Sa sito tandíhi ñiyívi ñuu ñiyívi tuhun cuan. Ta zuun ñi yuhvi ra Pablo cuu minoo ra zacoto sii si.

Ndyizo ra Pablo tyiño sa zacoto ra tuhun sa cuenda ra Cristo tahan tahan ñuu nu iyo ñiyívi sino iñi

²⁴ Ta vityí zii xaan cuñi vatyí ndyehi tundoho sa cuenda maa ndo. Tañi sa ndyehe ca ra Cristo tundoho cuu si vatyí ndyehi tundoho sihin coño ñuhi sa cuenda maa ra. Ta zandíhi tyiño i zavaha ra sa cuenda maa yo sa cuu coño ñuhu ra.

²⁵ Ta yuhvi cui minoo ra zacoto tuhun ra Cristo vatyí yucuan cuu tyiño i saha ra Ndyoo sii, sa cuenda maa ndo. Cuñi ra sa cua zacote tandíhi tuhun ra nacahnu cuii.

²⁶ Zacote tuhun sa sicoo xehe ndya ta tyiemvu, zoco vityí zañaha ra Ndyoo sii si sii ñiyívi sino iñi sii ra.

²⁷ Ta tañi maa ndo sa yivi ñiyívi hebreo cuu, cuñi ra Ndyoo sa coto ndo tuhun sa sicoo xehe cuan vatyí yaha xaan vaha si. Ta tuhun xehe sa sito ndo vityí cuu sa iyo ra Cristo añima yo. Ta sa cuenda maa ra cua cuhun yo andívi nu ndyaa ra Ndyoo.

²⁸ Ta tuhun sa cuenda ra Cristo cuu sa zacoto ndi sii tandíhi ñiyívi. Zayuhu ndi sii ñu, ta zacuahha ndi sii ñu vatyí cua cutuñi vaha iñi ñu ta cua cuahnu vaha tandíhi ñu sihin cuhva sino iñi ñu vatyí iñi ñi cuu ñu sihin ra Cristo.

²⁹ Yucuan cuenda zatyíño xein sihin tundyee iñi ra Cristo sa saha xaan ra sii.

2

¹ Cuñi sa cua coto ndo vatyí sica xaan iñi sa cuenda ndo, ta cahan xein sihin ra Ndyoo sa cuenda maa ndo, ta ñiyívi ñuu Laodicea, ta tandíhi inga ñiyívi ta ndyehe ca sii.

² Sique sii ra Ndyoo vatyí nandundyee ca iñi tandíhi ndo, ta iñi xaan cuu ndo, ta cuñi xaan ndo sii tahan ndo vatyí sihin cuhva cuan ta cua cutuñi vaha ca iñi ndo yozo caa coto vaha ca ndo sii ra Cristo vatyí maa ra cuu tuhun xehe sa zacoto ra Ndyoo sii yo vityí.

³ Maa ra Cristo saha tandíhi sa cuu sa vaha. Ta tandíhi sa siñi tuñi vaha sii yo, maa ra saha. Tatu sito yo sii ra Cristo, sito yo sii ra Ndyoo.

⁴ Ta nacatyí cuhva ya sihin ndo coto zandavi ñaha ñiyívi sii ndo sihin tuhun tyaqui

⁵ vatyí vazu yoñi ndyaa sihin ndo zoco ñoho xaan iñi sii ndo. Zii xaan cuñi sa cuenda ndo vatyí vaha xaan cuhva yucu ndo. Ta vaha xaan ndyico ndo sii ra Cristo.

⁶ Yucuan cuenda tañi cuhva i sino iñi ndo sii ra Cristo Jesús quivi cuan, zuun ñi cuhva cuan cuhun ndo ityi nuu sihin ra.

⁷ Quihi ñaa ndo sii ra ñihi ca. Nacohon iñi ndo vatyí maa ra saha cuhva saa coo ndo. Nacuni ca iñi ndo sii ra tañi i cutuhva ndo. Ta ndita cuii ñi nacuhva ndo tyahvi ndyoo sii ra Ndyoo.

Cuhva saa sa saha ra Cristo coo yo

⁸ Zacuenda vaha ndo sii ndo, ta ma cuhva ndo sa zandavi ñaha ñiyívi sii ndo sihin tuhun ña ndisa, cuhva sa sica ñi iñi maa ñu. Ña sino iñi ñu sii ra Cristo. Maa costumbre ñi ndyico ñu.

⁹ Yivi sa ndisa cuu cuhva zacuahha ñu vatyí tandíhi sa ndisa ta tandíhi tundyee iñi ra Ndyoo iyo si sihin ra Cristo vatyí Ndyoo cuu ra.

¹⁰ Ta sa ndu-~~in~~ ndo sihin ra Cristo, ta yucuan cuenda sa situ cuii ~~añima~~ ndo sihin Tuhun Ndyoo. Ndyaca ñaha ra Cristo sii tandihi inga ra ndyaca ñaha, tandihi ángel, ta sii cuihna ndihi ca.

¹¹ Quivi i ñañihi ndo sii ra Cristo, i quihvi ra ~~añima~~ ndo, ta i tyaa siyo maa ra sii tandihi sa ña vaha sa tuhva ndo zavaha. Ñá zavaha ndo costumbre circuncisión tañi ñiyivi hebreo. Sica iñi ñu vaty sihin sa yucuan ñi ta nduu ñu ñiyivi ra Ndyoo. Zoco i nduu maa ndo ñiyivi ra Ndyoo vaty i zanduvaha ra ~~añima~~ ndo.

¹² I sihi ra Cristo, ta i tyihi ñu sii ra sisi ñaña, ta ziqui i zanandoto ra Ndyoo sii ra. Ta quiwi i sicoo ndutya maa ndo sihin ndutya, cuu si tañi sa sihi ndo sihin ra Cristo. Ta ziqui i zanandoto ra Ndyoo sii ndo. Ta vityi iyo ndo minoo cuhva saa.

¹³ Quiwi tañaha ca coto ndo sii ra Ndyoo i cuu ndo tañi ñiyivi i sihi, sa cuenda cuaty ndo, ta sa cuenda sa ñá sito ndo ley ra Ndyoo. Zoco i zandasi ra Ndyoo cuaty ndo quiwi i sino iñi ndo sii ra Cristo, ta i saha ra minoo cuhva saa coo ndo ~~in~~ ñi sihin ra Cristo.

¹⁴ I zañaha ley sahnú cuan cuaty yo. I caty si vaty tahan si cuhun yo andyaya vaty ñá tyaa yo yahvi sii si. Zoco i zanaa ra Ndyoo cuhva iyo sii ley cuan quiwi i sihi ra Cristo nu cruz.

¹⁵ Ta quiwi i sihi ra nu cruz i zahacanaa ra sii cuihna ta sii tandihi taty cuihna sa ndyaca ñaha ñuu ñiyivi ya. Ta ityi nuu tandihi ángel i zañaha ra vaty cahnu ca maa ra ta ziqui cuihna.

Nacuñi xaan yo sa vaha sa saha ra Ndyoo

¹⁶ Ña tahan si sa tyaa ñiyivi cuaty sata ndo sa cuenda sa casi ndo a sa coho ndo a sa cuenda sa ña zavaha ca ndo vico zandu a vico luna saa a tatu ña tyaa xaan ndo yahvi sii quiwi quitatu ñiyivi. (Quiwi cumañi ca quisi ra Cristo i zavaha ñiyivi cuhva cuan vaty tacuan cua cacu ñu cuñi ñu.)

¹⁷ Zoco vityi sito yo vaty ma cacu yo sihin cuhva cuan vaty yivi sa ñiñi cuu si sa ndisa vaty ra Cristo cuu ra cua zacacu sa ndisa cuii sii yo.

¹⁸ Ma cuhva ndo sa caty ñiyivi sihin ndo vaty ma cacu ndo vaty ña zacahnu ndo sii ángel ta ña tuhva ndo cahñi zoco sii ndo. Caty ñiyivi cuan vaty sito xaan ñu, zoco ña cahan ñu sa ndisa. Sica iñi ñu vaty ñiñi xaan ca maa ñu vaty i zañaha ra Ndyoo cuaha xaan ñimahna sii ñu.

¹⁹ Zoco ña ndyico ñu sii ra Cristo, ta yucuan cuenda zavaha ñu cuhva cuan. Zoco maa yo ndyico yo sii ra Cristo. Coño ñuhu ra cuu yo, ta maa ra cuu xiñi yo. Ta zacuahnu ra sii coño ñuhu ra sihin sa vaha sa saha ra sii yo. Ta zandu-~~in~~ ra sii yo. Ta zandundyee ra sii yo sihin tundyee iñi maa ra cuhva cuñi ra Ndyoo.

²⁰ Tañi sa sihi ndo sihin ra Cristo cuu si, ta ña iyo ca ndo sa cuenda cuhva iyo si ñuu ñiyivi ya. ¿Ta ñaa cuenda iyo ca ndo tañi ñiyivi ña sito sii ra Ndyoo? ¿Ta ñaa cuenda tyaa ndo yahvi sa caty ñiyivi zavaha cuhva cuan?

²¹ Vaty tyehen caty ñu: “Ma cutyiño ndo sa ihya, ta ma casi ndo sa yucuan, coto ma cacu ndo.” Caty ñu.

²² Zoco ña ndisa sa cahan ñu vaty maa ñi cuhva sa sica iñi maa ñu cuu si. Sa casi yo cuu sa cuenda zuhva ñi quiwi, ta ma zativi si sii yo ityi nuu ra Ndyoo.

²³ Ndisa vaty cuhva zacuaha ñiyivi cuan, vaha xaan caa si tañi minoo sa siñi tuñi vaha xaan vaty zandyee xaan yo iñi yo ta zavaha yo sii si, ta zanduluhlu yo sii yo zacuu si, ta ña tyaa ca yo yahvi sii cuhva cuñi coño ñuhu yo zacuu si. Zoco nusiin ta ma tyindyee si sa ndisa cuii sii yo ta cuu zama yo cuhva ña vaha sa iyo sii yo.

3

¹ Saha ra Ndyoo minoo cuhva saa coo yo vaty i nandoto ra Cristo. Ta vityi ndyaa ra siyo cuaha ra Ndyoo andivi. Yucuan cuenda nducu ndo sa vaha sa saha ra Ndyoo sii ndo ndya andivi.

² Nducu xihna ndo sa vaha sa saha ra Ndyoo sii yo andivi. Ta ma caca xaan iñi ndo sa cuenda sa iyo ñuu ñiyivi ya.

³ Vatyí tañi sa i sihi ndo cuu si sa cuenda sa ña vaha i sicoo ndo ityi sata. Ta vityi iyo ndo ñin ñi sihin ra Ndyoo minoo cuhva saa sa saha ra Cristo sii ndo.

⁴ Maa ra Cristo cuu ra saha cuhva saa ya coo yo. Ta quivi cua quisi ra, cua ndyehe ñiyivi vatyí maa ra cuu ra cahnu ca. Ta cua cundyaca ñaha tucu maa yo sihin ra.

Cuhva i sicoo yo ityi sata, ta cuhva cuñi si coo yo vityi

⁵ Yucuan cuenda cuñi si sa zandíhi yo tuhun sa zavaha yo sa ña vaha sihin coño ñuhu yo tañi zavaha ñiyivi ñuu ñiyivi ya. Ma cuzu ndo sihin minoo ñaha tatu ma tindaha xihna ndo. Ma caca iñi ndo tuhun quiñi, ta ma cuñi ndo zavaha ndo sii si. Ma cuñi xaan ndo zavaha ndo sa ña vaha a sa quiñi cuhva ña tahan si zavaha ndo, ta ma cuñi xaan ndo xuhun vatyí yucuan cuu tañi sa zacahnu ndo sii inga ndyoo.

⁶ Sa cuenda tandíhi cuhva ya, cua cuxaan xaan ra Ndyoo sihin ñiyivi ña tyaa yahvi sii ra, ta cua tasi tuñi ra sii ñu.

⁷ Ta quivi cumañi ca coto yo sii ra Ndyoo, i zavaha yo cuhva ña vaha cuan.

⁸ Zoco vityi ma zavaha ca yo sii si. Ma cuxaan xaan yo. Ma quiñi xaan cahan yo sihin ñiyivi. Ma cahan cuehe yo sii ñiyivi a cahan yo ndya vaha ñi.

⁹ Ma cahan ndo cuendu sihin ra tahan ndo vatyí vityi sa nduu yo ñiyivi saa, ta ña zavaha ca yo sa i zavaha yo ityi sata.

¹⁰ Vityi iyo yo minoo cuhva saa. Yucuan cuenda cuñi si nducu yo cuhva coo yo cuhva cuñi ra Cristo. Ta sihin cuhva cuan cua coto vaha ca yo sii ra, ra i saha cuhva saa ya coo yo.

¹¹ Ta vityi ña ñiñi ca tatu ñiyivi hebreo cuu yo a yivi a tatu zavaha yo costumbre circuncisión a ña zavaha yo. Ña ñiñi vazu ñiyivi inga ñuu cuu yo a vazu ña casi xaan iñi yo a vazu muzu cuu yo a vazu patrón cuu yo. Ña ñiñi tandíhi si cuan. Sa ñiñi ca cuu sa ñin ñi cuu yo sihin ra Cristo vatyí maa ra cuu ra saha cuhva saa coo yo, ta ma ndíhi si.

¹² Cuñi xaan ra Ndyoo sii ndo. I casi ra sii ndo ta zanduu ra ñiyivi vaha xaan sii ndo ityi nuu ra. Yucuan cuenda cundahvi iñi ndo sii inga ñiyivi, ta cuu ndo ñiyivi vaha sihin ñu. Zanduluhlu ndo sii ndo. Vii xaan coo ndo, ta ndyee xaan cuu iñi ndo sihin ñiyivi.

¹³ Ndyee xaan cuu iñi ndo sihin minoo ndo ta sihin inga ndo, ta zaha ndo tucahnu iñi sii inga ndo tatu iyo tizíhi. I zaha ra Cristo tucahnu iñi sii maa ndo. Tacuan tucu zavaha ndo sihin tahan ndo.

¹⁴ Ta sa ñiñi xaan ca cuu sa cuñi xaan ndo sii ñiyivi. Yucuan cuu sa zandu-ñin sii yo.

¹⁵ Ta sa taxi sa saha ra Cristo, nacundyaca ñaha si sii añaima ndo vatyí yucuan cuenda i cana ra Ndyoo sii ndo ta zandu-ñin ra sii ndo. Ta nacuhva xaan ndo tyahvi ndyoo sii ra Ndyoo tandíhi tyiemvu.

¹⁶ Ta nacutu cuii tuhun ra Cristo añaima ndo. Zacuaha ndo ta cuhva ndo sa siñi tuñi vaha sii ra tahan ndo sihin sa siñi tuñi sa saha maa ra Ndyoo. Ta zacahnu ndo sii ra Ndyoo sihin sa cata ndo salmo a yaa Ndyoo a yaa sa saha Tatyí li sii ndo. Cata ndo sihin tandíhi añaima ndo. Ta nacuhva xaan ndo tyahvi ndyoo sii ra.

¹⁷ Ta ñaa sa zavaha ndo, ta ñaa sa cahan ndo, zoco zavaha ndo sii si tañi minoo tyiño ra Jesús, ra ndyaca ñaha sii yo. Ta nacuhva xaan ndo tyahvi ndyoo sii ra Ndyoo Zutu yo sa cuenda cuhva tyindyee ra Jesús sii ndo.

Cuhva tahan si zavaha yo vatyí sino iñi yo sii ra Cristo

¹⁸ Ndoho sa iyo yíi, tyaa ndo yahvi sii yíi ndo vatyí yucuan cuu sa tahan si zavaha ñiyivi sino iñi sii ra ndyaca ñaha sii yo.

¹⁹ Ta ndoho rayíi, cuñi xaan ndo sii ñazíhi ndo. Ta ma cuxaan ndo sihin ñu.

²⁰ Ndoho sa ndyíhi, tyaa ndo yahvi sii zutu ndo ta sii zíhi ndo tandíhi cuii cuhva vatyí yucuan cuu sa tahan xaan iñi ra ndyaca ñaha sii yo.

²¹ Ndoho ra cuu zutu sa ndyíhi, ma xaan xaan cahan ndo sihin zehe ndo coto nducuihya iñi si.

²² Ta ndoho ra cu muzu, tyaa ndo yahvi sii patrón ndo tandíhi sa catyí ra. Ma zavaha ndo sii ndo cuhva sa ndyehe ñi ra vatyí cuñi ndo sa cua cuzíi iñi ra sihin ndo, zoco zavaha

ndo sii si sihin tandihi ańima ndo vazu ńa ndyehe patrńn ndo. Tacuan zavaha ndo vatyi yuhu ndo sii ra Ndyoo.

²³ Ta ńaa sa zavaha ndo, zavaha ndo sii si sihin tandihi cuii ańima ndo vatyi zavaha ndo sii si sa cuenda ra Ndyoo ta ńa iin ńi sa cuenda ńiyivi.

²⁴ Vatyi sito ndo vatyi cua cuhva maa ra ndyaca ńaha sii yo sa vaha sa tahan si sii ndo vatyi zatyńo ndo tyińo ra.

²⁵ Zoco tatu zavaha yo sa ńa vaha, cua ńihi yo minoo sa ma tahan ińi yo vatyi Ndyoo ńa ziin ziin ndyehe ra sii yo. Minoo cuhva ndoo xaan cua zandaa ra tyińo cuenda yo sa cuenda cuhva i zavaha yo, a sa vaha a sa ńa vaha.

4

¹ Ndoho ra ndyaca ńaha sii muzu ndo, ndoo xaan coo ndo ta minoo cuhva vaha sihin ńu. Nacohon ińi ndo vatyi iyo tucu ra ndyaca ńaha sii maa ndo andivi.

² Cahan ndo sihin ra Ndyoo tandihi cuii cuhva, ta ma cuzu ndo. Ta nacuhva ndo tyahvi ndyoo sii ra Ndyoo.

³ Cahan ndo sihin ra Ndyoo sa cuenda maa ndi vatyi cua cuhva ra Ndyoo cuhva sii ndi sa cahan ndi sihin ńiyivi tuhun xehe sa cuenda ra Cristo. Yucuan cuenda ńohi vehe caa.

⁴ Caca ndo sii ra Ndyoo vatyi casi xaan cua zacote Tuhun ra sii ńu tańi tahan si.

⁵ Casi coo ndo sihin ńiyivi ńa sito sii ra Ndyoo, vatyi tacuan ta cuu cahan ndo Tuhun Ndyoo sihin ńu.

⁶ Ta maa ńi tuhun vaha cahan ndo ta sihin sa sińi tuńi vaha vatyi tacuan ta cua ńihi ndo minoo cuhva vaha cahan ndo sihin minoo minoo ńiyivi tatu ndaca tuhun ńu sii ndo sa cuenda Tuhun Ndyoo.

*Nu sa cuńi ndi*hi cahan ra Pablo

⁷ Ra Tíquico, ra hermano yo, cua nacatyi sihin ndo yozo caa iye. ńihi xaan zatyńo ra tyińo ra Jesús sihin.

⁸ Tasi sii ra nu yucu ndo vatyi cua zacoto ra sii ndo tandihi yozo caa iyo ndi, ta cua cuhva ra tundyee ińi sii ndo.

⁹ Cuahan tucu ra Onésimo hermano yo sihin ra. ńin ńi ńuu ra sihin ńuu maa ndo. Vaha xaan ńiyivi cuu ra, ta cuńi xaan yo sii ra. Cua zacoto ra sii ndo tandihi sa tehin nu ndyei ihya.

¹⁰ Tasi ra Aristarco minoo nacumi sii ndo. ńoho ra vehe caa sihin ihya. Ta ra Marcos tucu, yańi tahan ra Bernabé, tasi ra minoo nacumi sii ndo. Sa tasi tyińo nu yucu ndo sa cuenda ra Marcos vatyi tatu saa ra nu yucu ndo tiin cuenda vaha ndo sii ra.

¹¹ Ta tasi tucu ra Jesús minoo nacumi sii ndo. Justo nańi tucu ra. Maa ńi ra Aristarco sihin ra Marcos ta ra Justo cuu ra ra hebreo ra zatyńo sihin mi sa cuenda tyińo maa ra Ndyoo, ta saha xaan ra tundyee ińi sii.

¹² Tasi tucu ra Epafras, ra ńuu ndo, minoo nacumi sii ndo. Muzu maa ra Jesús cuu sii ra. Cahan xaan ra sihin ra Ndyoo sa cuenda ndo vatyi cuńi ra sa cua ndundyee xaan ca ińi ndo sihin Tuhun Ndyoo ta cua coto ndo, ta cua zavaha ndo tandihi cuii sa cuńi ra Ndyoo.

¹³ Ta sehi sa ndaa sa cuenda ra vatyi cahan xaan ra sihin ra Ndyoo cuenda maa ndo ta cuenda ńiyivi ńuu Laodicea ta ńiyivi ńuu Hierápolis.

¹⁴ Ra Demas ta ra Lucas tasi ra minoo nacumi sii ndo. Ra Lucas cuu ra médico, ra sa cuńi xaan ndi.

¹⁵ Cuhva ndo minoo nacumi sii ra hermano yo ńuu Laodicea ta sii ńa Ninfas ta sii ra hermano titahan vehe ńa.

¹⁶ Tatu sa yaha cahvi ndo carta ya tasi ndo sii si nu yucu ra hermano ńuu Laodicea, ta cahvi tucu maa ndo carta sa cua tasi sii maa ra.

¹⁷ Ta catyi ndo sihin ra Arquivo nazatyńo vaha ra tyińo i saha ra ndyaca ńaha sii yo sii ra.

¹⁸ Yuhvi ra Pablo sihin ndehi tyei minoo nacumi sii ndo. Ma naa ińi ndo vatyi ńohi vehe caa. Ta ra Ndyoo nanazoco xaan ra sii ndo. Amén.

Carta Sa Xihna Ñi I Tyaa Ra San Pablo Sii Ñiyivi Ñuu Tesalónica

Ra Pablo ta ra tahan ra tyaa ra minoo carta sii ñiyivi sino iñi sii ra Jesús ñuu Tesalónica

¹ Yuhvi ra Pablo sihin ra Silvano ta ra Timoteo tyaa ndi minoo carta ya sii ñiyivi sino iñi sii ra Jesús ñuu Tesalónica. Sa i ndu-ñin ndo sihin ra Ndyoo Zutu yo ta sihin maa ra Jesús, ra ndyaca ñaha sii yo. Naquihin vaha ndo tandihí sa vaha sa saha ra Ndyoo Zutu yo sii ndo ta tacuan tucu saha ra Jesús, ra ndyaca ñaha sii yo. Ta naco sa taxi añima ndo sa cuenda maa ra cuan.

Cuhva sino xaan iñi ñiyivi ñuu Tesalónica

² Saha xaan ndi tyahvi ndyoo sii ra Ndyoo sa cuenda tandihí ndo, ta cahan xaan ndi sihin ra sa cuenda ndo.

³ Ta cuhva cahan ndi sihin ra Ndyoo Zutu yo, ta ña naa iñi ndi cuhva iyo ndo vatyí vaha xaan sino iñi ndo ta zatyíño ndo tyíño ra. Cuñi xaan ndo sii ra Ndyoo, ta yucuan cuenda zatyíño ndo tyíño ra. Ta sino xaan iñi ndo vatyí cua quisi ra Jesús inga saha.

⁴ Ndoho yañi xaa, ra Ndyoo cuñi xaan ra sii ndo, ta sito ndi vatyí maa ra i casi sii ndo.

⁵ Quivi i nacatyí xaan ndi Tuhun Ndyoo sihin ndo cuhva cacu yo, yivi tuhun cahan ñi maa ndi cuu si, zoco i tyindyee xaan Tatyí li sihin cuaha xaan cuhva. Ta i sito vaha maa ndi cuhva cahan ndi vatyí zatyíño xaan ra Tatyí li. Ta sito tucu maa ndo yozo caa i cuu maa ndi quivi i sindyaa ndi sihin ndo vatyí cuñi xaan ndi tyindyee ndi sii ndo.

⁶ Ta i quisaha zavaha ndo cuhva zañaha ndi ta cuhva zañaha ra Jesús, ra ndyaca ñaha sii yo, vatyí i ñin cuenda ndo Tuhun Ndyoo vazu ndyehe xaan ndo tundoho sa cuenda si. Ta zii xaan i cuñi ndo vatyí saha xaan Tatyí li sa zii sii ndo.

⁷ Ta sihin cuhva ya ta i zañaha ndo minoo cuhva vaha sii tandihí ñiyivi sino iñi nu cu si Macedonia ta nu cu si Acaya.

⁸ I zacoto ndo Tuhun Ndyoo sii ñiyivi nu cu si Macedonia ta Acaya, zoco yivi yucuan ñi, nacañu cuí ta sa sito ñiyivi vityí vatyí sino xaan iñi ndo sii ra Ndyoo. Ta ña cuñi ca si sa nacatyí ndi sihin ñu.

⁹ Zuun ñi maa ñu ta nacatyí ñu yozo caa i cuu quivi sa ndyaa ndi sihin ndo. Nacatyí ñu vatyí vaha xaan i sino iñi ndo sa cahan ndi, ta i zaña ndo sa zacañu ndo sii ndyoo yutu ta ndyoo caa ta sino iñi ndo sii ra Ndyoo ndito, ra cu Ndyoo sa ndisa. Ta vityí tyaa ndo yahvi sii ra ta zatyíño ndo tyíño ra.

¹⁰ Ta nacatyí ñu vatyí ndatu ndo quivi sa cua quisi ra Jesús zehe Ndyoo inga saha ndya gloria. Maa ra cuu ra i zanandoto ra Ndyoo. Maa ra Jesús cua zacacu sii yo, ta ma tasi tuñi ra Ndyoo sii yo quivi cua tasi tuñi ra sii ñiyivi.

2

Tyíño i zavaha ra Pablo ñuu Tesalónica

¹ Ta zuun ñi maa ndo sito ndo, ndoho yañi xaa, vatyí quivi i sindyaa ndi sihin ndo, vaha xaan i cuu.

² Vatyí vazu i ndyehe xaan ndi tundoho ta i cañi xaan ñiyivi sii ndi ñuu Filipos, tañi sa sa sito maa ndo, zoco i tyindyee xaan ra Ndyoo sii ndi, ta ñá yuhu ndi, ta i nacatyí ndi Tuhun Ndyoo sihin ndo vazu i sañi tahan xaan ñiyivi sihin ndi ñuu ndo.

³ Ta tuhun i nacatyí ndi sihin ndo, ñahñi tuhun ña vaha i nazaca ndi sihin si ta ñahñi tuhun ña ndoo. Ta ñá zandavi ñaha ndi sii ndo.

⁴ Ña tacuan, zoco cuhva i saha maa ra Ndyoo tyíño sii ndi sa nacatyí ndi Tuhun ra cuhva cacu ñiyivi, ta tacuan nacatyí ndi. Ña nducu xaan ndi cuhva sa cua cuzii iñi ñiyivi sihin ndi. Cuñi ndi sa cua cuzii iñi maa ra Ndyoo sihin cuhva zavaha ndi vatyí maa ra ndyehe ñaa sa iyo añima yo.

⁵ Ta tañi sa sito maa ndo vatyi numinoo saha ta ña cahan ndi tuhun tyaqui vatyi cuñi ndi zandavi ñaha ndi a vatyi cuñi ndi ñihi ndi xuhun. Ta sito vaha maa ra Ndyoo vatyi sa ndisa quehin.

⁶ Ta ña nducu ndi sa zacahnu ñiyivi sii ndi, a maa ndo a inga ñiyivi. Cuu cundyaca ñaha ndi sii ndo tatu cuñi ndi vatyi maa ra Cristo i tava tyiño sii ndi sa zatyino ndi tyiño ra. Zoco ña cuñi ndi sa cundyaca ñaha ndi sii ndo.

⁷ Vii xaan i cahan ndi sihin ndo, ta vaha xaan i zavaha ndi tañi zavaha minoo ñuzihi sihin zehe ndyih i ñu vatyi cuñi xaan ñu sii si.

⁸ Ta maa ndi cuñi xaan ndi sii ndo ta yivi Tuhun Ndyoo ñi saha ndi sii ndo. Vazu cuu ndi sa catyi ndo tatu sa vatyi cuu sa tacuan vatyi cuñi xaan ndi sii ndo.

⁹ Vatyi nacohon iñi ndo, ndoho yañi xaa, cuhva i zatyino xaan ndi. Ñihi xaan i zatyino ndi tandihi quivi ta sa cuua vatyi ñá cuñi ndi sa cozo ziqui ndo sii ndi ñi ñi sa i nacatyi ndi Tuhun Vaha ra Ndyoo sihin ndo.

¹⁰ Maa ndo cuu sa ndaa ta maa ra Ndyoo vatyi quivi i sicoo ndi sihin ndoho sa sino iñi ta minoo cuhva vaha xaan i sicoo ndi sihin ndo. Ndo xaan i zavaha ndi, maa maa ñi cuhva cuñi ra Ndyoo. Ta ña saha ndi cuhva sii ñiyivi ta cuu tyaa ñu cuaty i sata ndi.

¹¹ Ta sito ndo cuhva i saha xaan ndi tuhun vaha sii ndo ta tundyee iñi ta i cahan ndi sihin ndo tañi cahan minoo zutu sa ndyih i sihin si.

¹² Ta i catyi ndi sihin ndo vatyi coo ndo minoo cuhva vaha xaan tañi ñiyivi sito sii ra Ndyoo. Maa ra i casi sii ndo vatyi coo ndo sihin ra nu ndyaca ñaha ra, nu iyo tandihi cuu cuhva sii ra.

¹³ Ta yucuan cuenda ña zaña ndi sa saha xaan ndi tyahvi ndyoo sii ra Ndyoo vatyi quivi i siñi ndo Tuhun Ndyoo sa nacatyi ndi sihin ndo ta i sino iñi ndo sii si tañi sa Tuhun Ndyoo cuu si ta yivi tañi tuhun cahan ñiyivi. Ta ndisa vatyi zatyino xaan si sihin maa ndo sa sino iñi ta zama si cuhva iyo ndo.

¹⁴ Ta vityi tahan si sii ndo, yañi xaa, cuhva tahan si sa xihna ñi sii ñiyivi sino iñi sii ra Ndyoo nu cu si Judea. Vatyi tañi zandyee xaan ñiyivi hebreo tundoho sii ñu, ta tacuan tucu tahan ndo zacuu ñiyivi ñuu ndo.

¹⁵ Ta ñiyivi hebreo cuan cuu ñu i sahñi sii ra Jesús, ra ndyaca ñaha sii yo. Ta zuun ñi ñiyivi ñuu ñu, ñu i nacatyi cuhva catyi ra Ndyoo sihin ñu, ta i sahñi ñu sii ñu. Zandyee xaan ñu tundoho sii maa ndi. Ña zavaha ñu cuhva cuñi ra Ndyoo ta sahñi tahan xaan ñu sihin tandihi ñiyivi.

¹⁶ Ña saha ñu sa cahan ndi Tuhun Ndyoo sihin ñiyivi sa yivi ñiyivi hebreo cuu ta cacu ñu. Ta sa catyi sa zavaha ñu hebreo cuhva ya, ta cuaha xaan nduu cuaty i ñu. Zoco vityi cahnu xaan tundoho cua zaquisi ra Ndyoo ziqui ñu tandihi cuu tyiemvu.

Cuñi ra Pablo cuhun ra inga saha ndya Tesalónica

¹⁷ Yañi xaa, sa naha xaan sa ña ndyehe ca ndi sii ndo. Ta ña naa iñi ndi sii ndo. Ñoho xaan iñi ndi sii ndo. Ta i nducu xaan ndi cuhva cuhun ndi cua ndyehe ndi sii ndo.

¹⁸ Yucuan cuenda zuun ñi yuhvi ra Pablo i cuñi quisi minoo saha ta inga saha tucu, zoco ñá saha cuihna sa quisi.

¹⁹ ¿Ta ñaa cuenda sica iñi ndi vatyi cua ñihi ndi sa vaha nuu ra Ndyoo? ¿Ta ñaa cuenda zii xaan cuñi ndi ta vaha xaan cuñi ndi? Catyi vatyi sa cuenda maa ndo vatyi quivi cua quisi tucu ra Jesús ta vaha xaan cua cuu si sihin maa ndi sa cuenda maa ndo.

²⁰ Vatyi sa cuenda maa ndo ta ndyehe ñiyivi vatyi vaha cuu tyiño ndi, ta zii xaan cuñi ndi sa cuenda ndo.

3

¹ Ta yucuan cuenda quivi ñá cuu ca cundyee iñi ndi (sa ma coto ndi yozo caa iyo ndo) i sica iñi ndi vatyi cua ndoo maa ñi mi ñuu Atenas.

² Ta i zacuhun ndi sii ra yañi yo, ra Timoteo, vatyi cua ndyehe ra sii ndo. Minoo muzu ra Ndyoo cuu sii ra. Zatyino xaan ra sihin ndi sa nacatyi xaan ndi tuhun sa cuenda ra

Cristo cuhva cacu ñiyivi. Ta cuu tyindyee ra sii ndo sihin Tuhun Ndyoo ta cua sino ca iñi ndo, ta cua zandundyee ca ra iñi ndo.

³ Vatyí tacuan ta yoñi numinoo ndo ta cua yuhu xaan ndo sa catyi tundoho sa ndyehe ndo vityi. Zuun ñi maa ndo ta sa sito ndo vatyí tahan si ndyehe yo tundoho.

⁴ Vatyí quívi i sindyaa ndi sihin ndo ta i nacatyí ndi sihin ndo vatyí cua ndyehe yo tundoho. Ta cuhva cuan i cuu si, tañi sa sito ndo.

⁵ Ta yucuan cuenda, quívi ñá cundyee ca iñi vatyí cuñi xein cote tatu sino ca iñi ndo, ta i zacuhin sii ra Timoteo vatyí cua ndyehe ra yozo caa iyo ndo sihin cuhva sino iñi ndo. Vazu sa zandavi ñaha cuihna sii ndo ta tyiño i zavaha ndi nu yucu ndo cua naa tandíhi si.

⁶ Zoco vityi sa nasaa ra Timoteo sa i sahan ra nu yucu ndo, ta nacatyí ra sihin ndi vatyí vaha xaan sino iñi ndo ta cuñi ndo sii minoo ndo ta sii inga ndo. Ta catyi ra vatyí nacohon xaan iñi ndo sii ndi ta cuñi xaan ndo ndyehe ndo sii ndi tañi maa ndi cuñi xaan ndi ndyehe ndi sii ndo.

⁷ Yucuan cuenda, yañi xaa, vaha xaan cuñi ndi sa ñihi ndi tuhun cuan. Vazu cahnu xaan tundoho ndyehe ndi vityi zoco zii xaan cuñi ndi vatyí sino vaha iñi ndo.

⁸ Ta iyo vaha maa ndi vityi sa ndisa vatyí ñá ndoyo ñuhu maa ndo.

⁹ Saha ndi uu xico tyahvi ndyoo sii ra Ndyoo sa cuenda ndo, ta zii xaan cuñi ndi nuu maa ra sa cuenda ndo.

¹⁰ Ora ta sa cuaa sica xaan ndi sii ra vatyí cuhva ra sa ndyehe ndi sii ndo, ta cua cuu tyindyee ca ndi sii ndo cuhva sino ca iñi ndo, ta ma cumañi sa sino iñi ndo.

¹¹ Ta vityi natyindyee zuun ñi maa ra Ndyoo Zutu yo ta ra Jesucristo ra ndyaca ñaha sii yo ta cua cuu cuhun ndi nu yucu ndo.

¹² Ta natyindyee ra Jesús sii ndo, ta cua cuñi ca ndo sii minoo ndo ta sii inga ndo, ta tacuan cua cuñi ndo sii tandíhi ñiyivi tañi cuñi maa ndi sii ndo.

¹³ Ta tacuan ta cua zanduvaha ra aña ndo, ta ñahñi ca cuatyí ndo cua coo nuu ra Ndyoo Zutu yo quívi cua quisi tucu ra Jesús sihin tandíhi ñiyivi sino iñi sii ra. Maa ra cuu ra ndyaca ñaha sii yo.

4

Cuhva cuñi ra Ndyoo sa zavaha yo

¹ Ta vityi, yañi xaa, zañiñi xaan ndi sii ndo ta saha xaan ndi tuhun vaha sii ndo sihin cuhva sa saha ra ndyaca ñaha, ra Jesús, sii ndi. Vatyí tañi sa zacuahá ndi sii ndo cuhva coo ndo cuhva cuñi ra Ndyoo, ta tacuan cua zavaha xaan ndo sii si; zoco zavaha ndo sii si cuaha ca.

² Vatyí sito ndo cuhva sa saha ndi tyiño sii ndo tañi sa saha ra Jesús, ra ndyaca ñaha sii yo, tyiño sii maa ndi.

³ Vatyí cuñi ra Ndyoo vatyí cuhva ndo sii ndo sii maa ra sa ndisa. Ta numinoo ndo ta ma coo ndo sihin minoo ñaha tatu ma tindaha xihna ndo sihin ña.

⁴ Nacoo minoo ñi ñuzihi sii sa minoo minoo ndo. Ta ñn ñi sii maa ñu cuñi ndo.

⁵ Ta ma coo ndo tañi ñiyivi sa ña sito sii ra Ndyoo vatyí maa maa ñi sa ña vaha zavaha ñu sihin cuhva cuan.

⁶ Ta numinoo ndo ta ma zandavi ñaha ndo sii inga yañi yo ta coo xehe ndo sihin ñazihí ra vatyí ñihi xaan cua tasi tuñi ra Ndyoo sii ndo tatu zavaha ndo cuhva cuan tañi sa nacatyí ndi sihin ndo.

⁷ Vatyí ñá casi ra Ndyoo sii yo sa cua zavaha yo sa ña vaha. I casi ra sii yo vatyí zavaha yo sa vaha cuhva cuñi ra.

⁸ Yucuan cuenda yoo ra sa ña tyaa yahvi tuhun quehin ihya, sii maa ra Ndyoo ña tyaa ra yahvi ta yivi sii minoo ñiyivi. Vatyí saha maa ra Ndyoo Tatyí li ra sii yo vatyí cua zavaha yo cuhva cuñi ra.

⁹ Zoco sa cuenda tuhun sa cuñi yo sii minoo yo ta sii inga yo, ña cuñi si sa tyei vatyí zuun ñi maa ra Ndyoo zacuahá ra sii ndo cuhva cuñi ndo sii tandíhi inga yañi yo.

¹⁰ Ta ndisa vatyí sa cuñi ndo sii tandíhi yañi yo nacahnu Macedonia, zoco zañiñi ndi sii ndo, yañi xaa, vatyí cuñi ca ndo sii ra ñihi ca.

¹¹ Ta nducu ndo kuhva coo taxi ndo, ta caca iñi ndo ñin ñi tyiño maa ndo. Ta ma cuñi xaan ndo coto ndo tyiño inga ñiyivi. Ta zatyño ndo sihin ndaha ndo tañi sa saha ndi tyiño sii ndo.

¹² Vatyí tacuan ta cua tyaa ñiyivi ña sito Tuhun Ndyoo yahvi sii ndo, ta ñahñi cua cumañi sii ndo ta kuhva cundito ndo.

Quivi cua quisi tucu ra Jesús

¹³ Yañi xaa, ña cuñi sa ma coto ndo ñaa sa cua tahan ñiyivi sa sihi, coto nducuihya xaan iñi ndo tañi inga ñiyivi sa ña sino iñi.

¹⁴ Sino iñi yo vatyí i sihi ra Jesús ta i nandoto tucu ra. Ta zuun ñi kuhva cuan cua tahan ñiyivi sa sino iñi sii ra Jesús ta sihi ñu vatyí cua zanandoto ra Ndyoo sii ñu.

¹⁵ Yucuan cuenda catyí ndi sihin ndo tañi minoo sa zañaha ra Ndyoo vatyí maa yo tatu ndito yo ndya quivi cua quisi ra Jesús, yivi maa yo kuhun sa xihna ñi. Xihna ca ñiyivi i sihi.

¹⁶ Vatyí zuun ñi maa ra Jesús cua quisi ra ndya gloria, ta ñihi xaan cua cana saa ra, ta cua cana saa ra arcángel, ta cua tivi ra cutu ra Ndyoo. Ta ziqui sa xihna ñi cua nandoto ñiyivi sa i sihi, ñu i sino iñi sii ra Cristo.

¹⁷ Ta ziqui maa yo sa nandoo ta ndito yo, cua kuhun yo ñin ñi sihin ñiyivi cuan sisi vico. Ta ityí ziqui cua ñihi tahan yo sihin ra Jesús, ra ndyaca ñaha sii yo. Tacuan ta cua coo yo sihin ra Jesús tandihi cuí tyiemvu.

¹⁸ Yucuan cuenda tyindyee ndo sii minoo ndo ta sii inga ndo sihin tuhun ya.

5

¹ Zoco quivi cua tahan si cuan, a cuiya, ña cuñi si sa tyei ihya, yañi xaa.

² Vatyí zuun ñi maa ndo sa sito vaha xaan ndo vatyí quivi cua quisi tucu ra Jesús, cua cuu si minoo quivi zana ñi iñi yo. Tañi nu cua quisi minoo ra zuhu sa sa cuaa.

³ Cua catyí ñiyivi: “Vaha xaan vityí. Iyo taxi, ta ñahñi cuatyí iyo”, cua catyí ñu. Ta ziqui yatyí xaan cua quisi minoo tundoho cahnu xaan ziqui ñiyivi tañi tundoho sa cacu zehe ñiyivi ta uhu xaan si. Tacuan tucu ma cuu ca quita ñiyivi sisi tundoho vatyí sa saa kuhva tahan si.

⁴ Zoco ndoho, yañi xaa, ña yucu ca ndo nu ñaa sa vatyí cua saa quivi sa cua quisi tucu ra Jesús ta cua yuhu xaan ndo tañi zayuhu minoo ra zuhu sii ñiyivi vehe ñu.

⁵ Tandihí cuí ndo ta cuu ndo cuenda nu ndisi ta cuenda ora. Ña iyo ca yo cuenda sa cuaa ta cuenda nu ñaa.

⁶ Yucuan cuenda ma cuzu yo tañi zavaha inga ñiyivi. Cutyacu yo ta coo vaha sa siñi tuñi sii yo.

⁷ Vatyí ñiyivi quixi, quixi ñu sa cuaa. Ta ñu siñi, siñi ñu sa cuaa.

⁸ Zoco maa yo cuu yo cuenda ora, ta cuñi si vatyí coo vaha sa siñi tuñi xiñi yo. Cuñi si vatyí zacuenda yo sii yo sihin sa ñi iñi yo ta sihin kuhva cuñi yo sii inga ñiyivi tañi minoo zandaru zacacu ra sii ra sihin minoo caa sa cundyaa yiqui ndyica ra. Ta cuñi si vatyí sino iñi yo vatyí cua cacu yo tañi zacacu zandaru sii ra sihin minoo caa sa ñoho xiñi ra.

⁹ Vatyí ñá casi ra Ndyoo sii yo vatyí cañi ra sii yo. I casi ra sii yo vatyí cacu yo sa cuenda ra Jesucristo, ra ndyaca ñaha sii yo.

¹⁰ I sihi ra Jesús sa cuenda maa yo vatyí cundito yo ñin ñi sihin ra a cuu si sa ndito ca yo a cuu si sa yaha sihi yo.

¹¹ Yucuan cuenda tyindyee ndo sii tahan ndo sihin tuhun ya ta sihin kuhva sa sino iñi ndo tañi sa zavaha ndo vityí.

Saha ra Pablo minoo tuhun vaha sii yañi yo

¹² Yañi xaa, zañiñi ndi sii ndo vatyí tyaa ndo yahvi sii ra zatyño cuenda Tuhun Ndyoo nu iyo ndo vatyí ndyizo ra tyiño ta saha ra tuhun vaha sii ndo sa cuenda ra Jesús.

¹³ Cuñi si sa tyaa ndo yahvi sii ra ñihi xaan, ta cuñi ndo sii ra sa cuenda tyiño sa zavaha ra sihin ndo. Ta coo vaha ndo sihin tandihí inga yañi ndo nu iyo ndo. Ñahñi tizihí coo ndo.

¹⁴ Ta vityi saha ndi tyiño sii ndo, yañi xaa, vatyí cuhva ndo tyiño sii ra yañi yo tatu ña cuñi ra zatyíño. Tyindyee ndo sii ñu tatu yuhu xaan ñu, a tatu nducuihya xaan iñi ñu. Tyindyee ndo sii yañi yo sa cumañi ca sino vaha iñi. Ta vita cuu iñi ndo sihin tandihi ñiyivi.

¹⁵ Zacuenda ndo sii ndo, ta ma zavaha ndo sa ña vaha sihin ñiyivi zavaha sa ña vaha sihin ndo. Tandihi cuii tyiemvu zavaha ndo sa vaha sihin yañi yo ta sihin tandihi ñiyivi.

¹⁶ Nacoo sa zii iñi ndo tandihi cuii cuhva.

¹⁷ Cahan ndo sihin ra Ndyoo tañi tañi.

¹⁸ Tandihi ñaa sa tahan ndo, zoco cuhva ndo tyahvi ndyoo sii ra Ndyoo vatyí tacuan cuñi ra Ndyoo sihin ndo sa sino iñi sii ra Cristo Jesús.

¹⁹ Ñaha ndahva ndo Tatyí Ii ra Ndyoo.

²⁰ Ñaha ma tyaa ndo yahvi sa cahan minoo ra cahan tuhun sa saha ra Ndyoo sii ra.

²¹ Ndyehe vaha xihna ndo tandihi tatu vaha si ta ziqui tiin cuenda vaha ndo sii si.

²² Ma zavaha ndo ñaa ndihi ca sa ña vaha.

²³ Ta maa ra Ndyoo cuu ra saha sa coo taxi añima yo, ta sique sii ra nazanduvaha ra añima ndo vatyí iñi ñi sii maa ra cua tyaa ndo yahvi. Ta nazacuenda ra añima ndo ta coño ñuhu ndo ta ma coo ca cuatyí ndo ndya quivi cua quisi tucu ra ndyaca ñaha sii yo, ra Jesucristo.

²⁴ Maa ra i casi sii ndo, ta cuu cuniñi iñi yo sii ra vatyí cua zavaha ra tandihi cuii cuhva ya.

Saha ra Pablo minoo sa nacumi sii yañi yo nu ndihi i cahan ra

²⁵ Yañi xaa, caca tahvi ndo sii ra Ndyoo sa cuenda ndi.

²⁶ Cuhva ndo minoo nacumi sii tandihi cuii yañi yo.

²⁷ Sehi tyiño sii ndo sihin cuhva saha ra ndyaca ñaha sii yo sii, vatyí cahvi ndo tutu ya nuu tandihi cuii ñiyivi sino iñi.

²⁸ Maa ra ndyaca ñaha sii yo, ra Jesucristo, cua cuhva xaan ra tumañi iñi sii ndo. Ta nacuu si tacuan.

Sa Cu Uu Carta I Tyaa Ra San Pablo Sii Ñiyivi Ñuu Tesalónica

Tyaa ra Pablo ta ra tahan ra minoo carta sii ñiyivi sino iñi Tuhun Ndyoo ñuu Tesalónica

¹ Yuhvi ra Pablo ta ra Silvano ta ra Timoteo tyaa ndi carta ya sii ñiyivi sino iñi Tuhun Ndyoo ñuu Tesalónica. Sa ndu-ñin ndo sihin ra Ndyoo Zutu yo ta sihin ra Jesucristo, ra ndyaca ñaha sii yo.

² Quihin cuenda ndo tandihi sa vaha saha ra Ndyoo sii ndo, ta natyindyee ra sii ndo vatyí coo sa taxi añima ndo. Ta tacuan tucu nazavaha ra Jesucristo, ra ndyaca ñaha sii yo, sihin ndo.

Cua tasi tuñi ra Ndyoo sii ñiyivi iyo cuatyí quivi cua quisi tucu ra Cristo

³ Ndoho yañi xaa, cuñi si sa cuhva xaan ndi tyahvi ndyoo sii ra Ndyoo sa cuenda ndo vatyí sino xaan iñi ndo ta cuahan nduvaha ca cuhva sa sino iñi ndo ta cuhva cuñi xaan ndo sii minoo ndo ta inga ndo.

⁴ Ndyá cuhva cahan ndi tuhun ndo nuu inga ñiyivi sino iñi sii ra Ndyoo inga ñuu vatyí sino xaan iñi ndo ta cundyee xaan iñi ndo ndyehe ndo sa quiñi zavaha ñiyivi sihin ndo ta tundoho cahnu xaan sa cuenda Tuhun Ndyoo.

⁵ Ta ihya cuhva zañaha si vatyí ndoo xaan cuu cuhva ndyaca ñaha ra Ndyoo vatyí sa cuenda tundoho sa tahan ndo ta cua zanduvaha ra cuhva iyo ndo, ta cua cuu quihvi ndo nu ndyaca ñaha ra.

⁶ Ta ndoo xaan cuu cuhva zavaha maa ra Ndyoo vatyí cua zandyehe ra tundoho sii ñiyivi zandyehe tundoho sii maa ndo.

⁷ Ta maa ndo, ra ndyehe tundoho vityí, cuae ca ta cua cuhva ra minoo nu cua quitatu ndo sihin maa ndi. Ta tacuan cua cuu si quivi cua quisi tucu ra Jesús, ra ndyaca ñaha, ndya gloria sihin ángel ra.

⁸ Cua cayu ñúhu nu vasi ra, ta cua tasi tuñi ra sii ñiyivi sa ña sito sii ra Ndyoo ta ña tyaa ñu yahvi Tuhun Vaha sa cuenda ra ndyaca ñaha, ra Jesucristo, cuhva cacu yo.

⁹ Ñiyivi cuan cua ndoho tandihi cuii tyiemvu, ta sica xaan cua nandoo ñu, ta ma cuu cundyaa ñu sihin ra Ndyoo. Ta ma ndyehe ñu cuhva iyo ra Ndyoo vatyí tyaqui xaan ra, ta ma ndyehe ñu cuhva ndyaca ñaha ra.

¹⁰ Quivi cuan cua quisi ra ta cua zacahnu ñiyivi ra sii ra, ta iyo xaan cua cuñi ñiyivi sino iñi sii ra sihin cuhva iyo ra. Tañi maa ndo, vatyí vityí sino iñi ndo sa ndaa sa saha maa ndi sii ndo.

¹¹ Yucuan cuenda cahan xaan ndi sihin ra Ndyoo sa cuenda ndo, ta sica ndi sii ra vatyí nazanduvaha ra añima ndo ta cua cuu ndo cuhva cuñi maa ra. Ta sica ndi sii ra vatyí tyindyee ra sii ndo sihin tundyee iñi sii maa ra ta cua cacu vaha ñaa tyiño cuñi ndo zavaha ndo sa cuenda ra sihin sa ñi iñi ndo.

¹² Tacuan ta cua nducahnu ca zivi ra ndyaca ñaha sii yo, ra Jesucristo, sa catyí sa vaha iyo ndo. Ta zuun ñi maa ra cua zacahnu sii ndo vatyí vaha xaan añima ra sihin ra Ndyoo Zutu yo.

2

Ra ña vaha

¹ Ta vityí, yañi xaa, sa catyí vatyí quivi cua quisi tucu ra ndyaca ñaha sii yo, ra Jesucristo, ta cua ndu-ñin yo sihin ra, sa cuenda cuan zañiñi ndi sii ndo

² vatyí ma zama ndo cuhva sica iñi ndo. Ta ma cuhva ndo sa zayuhu ñiyivi sii ndo tatu catyí ñu vatyí sa yaha quisi ra Cristo, vazu catyí ñu vatyí cahan ñu cuenda ra Ndyoo a tatu cahan xaan ñu ziqui tuhun cuan, a tatu catyí ñu vatyí maa ndi tasi carta vatyí sa i quisi tucu ra Jesús, zoco ña ndisa.

³ Ma cuhva ndo sa zandavi ñaha ñiyivi sii ndo nu zuhva. Vatyi ma saa quivi sa cua quisi tucu ra Jesús tatu tañaha ca cua coo minoo tyiemvu sa cua cuxaan xaan ñiyivi sihin ra Ndyoo. Ta ziqui cua quisi ra iyo xaan cuaty, ra sa cua naa cuee ca.

⁴ Maa ra cuan cua nduvita, ta cua zativi ra tandihi ñaa sa cuu si sa cuenda ra Ndyoo. Cua zativi ra tandihi ñaa sa zacahnu ñiyivi. Ta cua quihvi ra sisi vehe ñuhu ra Ndyoo, ta cua cundyaa ra ta catyi ra vatyi zuun ñi maa ra cuu Ndyoo.

⁵ ¿Atu ña nacohon iñi ndo vatyi quivi i sindyei sihin ndo, ta i nacaty sihin ndo tandihi cuii tuhun ya?

⁶ Ta vityi sa sito ndo ñaa sa cuu sa ña saha sa quisi ra cumañi ca tahan si quivi ra.

⁷ Vityi xehe ñi cuahan tyiño ña vaha cuan, zoco iyo minoo ra sa ña saha sa cucahnu si ndya cua cuiñi siyo xihna ra.

⁸ Ta tatu sa siñi siyo ra, tacuan ta ziqui cua coto ñiyivi yoo ra cuu ra ña vaha cuan. Ta maa ra Jesús, ra ndyaca ñaha sii yo, cua cahñi sii ra. Cua tiví ra Jesús tatyí ra sihin yuhu ra, ta cua cahñi ra sii ra. Cua zanaa ra sii ra sihin sa ndisi xaan ra quivi cua quisi ra.

⁹ Ra ña vaha cuan cua quisi sa cuenda cuihna, ta tandihi cuhva iyo sii cuihna cua coo tucu sii maa ra. Cuaha xaan zeña cua zavaha ra, ta sihin sa ndyityi cua zandavi ñaha ra sii ñiyivi.

¹⁰ Cua cutyiño ra tandihi cuii cuhva ña vaha. Ta sihin si cua zandavi ñaha ra sii ñiyivi, ñu cua cuhun nu xaan. Maa ñu cuu ñu ña cuñi sino iñi sii sa ndisa ta cacu ñu.

¹¹ Ta yucuan cuenda cua cuhva ra Ndyoo vatyi zandavi ñaha sa ña vaha sii ñu, ta cua sino iñi ñu sii sa ña ndisa

¹² vatyi tacuan ta cua ndoho xaan tandihi ñiyivi sa ña sino iñi sii sa ndisa, ñiyivi tahan xaan iñi zavaha ñu sa ña vaha.

Sa cuenda ñiyivi i casi ra Ndyoo vatyi cacu ñu

¹³ Zoco cuñi si sa cuhva xaan ndi tyahvi ndyoo sii ra Ndyoo tandihi cuii tyiemvu sa cuenda maa ndo, yañi xaa, vatyi cuñi xaan ra sii ndo, ta i casi ra sii ndo ndya quivi xihna ñi vatyi cua cacu ndo. Cua cacu ndo cuenda Tatyí Ii, ra zanduvaha cuhva iyo ndo, ta cuenda sa ndisa sa sino iñi ndo.

¹⁴ Sihin tuhun cahan maa ndi sihin ndo ta i zacoto ra Ndyoo sii ndo vatyi sa i casi ra sii ndo ta saha ra cuhva cua cacu ndo ta cuhun ndo gloria ta ñihi ndo sa vaha nu ndyaa ra Jesucristo, ra ndyaca ñaha sii yo.

¹⁵ Yucuan cuenda, yañi xaa, ma zama ndo cuhva sino iñi ndo. Ma naa iñi ndo cuhva zacuaha ndi sii ndo quivi i sindyaa ndi sihin ndo a cuhva i tyaa ndi nuu carta sa tasi ndi sii ndo nu yucu ndo.

¹⁶ Ta zuun ñi maa ra ndyaca ñaha sii yo, ra Jesucristo, sihin maa ra Ndyoo Zutu yo cuñi xaan ra sii yo, ta tyindyee ra sii yo tandihi cuii tyiemvu, ta saha maa ra sa coo xaan sa vaha sii yo.

¹⁷ Ta vityi nacuhva ra sa zii añima ndo, ta natyindyee ra sii ndo, ta cua cuu cahan ndo ta zavaha ndo tandihi tyiño vaha cuhva cuñi maa ra.

3

Cahan ndo sihin ra Ndyoo sa cuenda ndi

¹ Ta minoo ñi ca tuhun catyi sihin ndo, yañi xaa, cahan ndo sihin ra Ndyoo sa cuenda ndi vatyi tacuan ta yatyi xaan cua saa Tuhun Ndyoo nacahnu cuii ñi, ta cua tñin cuenda ñiyivi sii si minoo cuhva vaha tañi i tñin cuenda maa ndo sii si.

² Ta caca ndo sii ra Ndyoo vatyi zacacu ra sii ndi sihin ñiyivi ña vaha ta ñiyivi quiñi iyo vatyi ña tandihi ñiyivi sino iñi sii ra.

³ Zoco maa ra ndyaca ñaha sii yo, ndoo xaan ra. Maa ra cua zaquihin ityi vaha ra sii ndo, ta cua zacuenda ra sii ndo sii ra ña vaha.

⁴ Ta sino iñi sii ra ndyaca ñaha sii yo vatyi maa ndo sa zacuu ndo tandihi, ta ma zandoo ndo cuhva catyi ndi sihin ndo.

⁵ Ta cuñi sa cua tyindyee ra ndyaca ñaha sii yo sii ndo, ta cua cutuñi ca iñi ndo cuhva cuñi ra Ndyoo sihin ndo, ta cua cuñi ca ndo sii ra. Ta cua tyindyee ra sii ndo, ta cua zandyee ndo iñi ndo cuhva ndyehe ndo tundoho tañi zandyee maa ra Cristo iñi ra nu i ndyehe ra tundoho.

Cuñi si sa zatyño yo

⁶ Ta vityi, yañi xaa, tava ndi tyiño sii ndo sihin zivi maa ra ndyaca ñaha, ra Jesucristo, vatyí tava ndo yoo ñi maa yañi yo ra ña cuñi zatyño, ra ña cuñi zavaha cuhva i zañaha ndi sii ndo.

⁷ Vatyí maa ndo sa sito ndo cuhva cuñi si coo ndo ta cua cundyico ndo cuhva i zañaha ndi sii ndo. Vatyí quiví sa sindyaa ndi sihin ndo, ñahñi cuhva sa ñá zatyño ndi.

⁸ Ta ñá sasi caha ñi ndi vehe ñiyiví. Ña tacuan vatyí i zatyño ndi. Ña cuñi ndi sa cozo ziqui numinoo ndo sii ndi, ta yucuan cuenda i zatyño ndi ora ta sa cuaa.

⁹ Vazu iyo cuhva sii ndi sa caca ndi sii ndo ñaa sa cuñi ndi, zoco i zatyño ndi vatyí cuñi ndi zañaha ndi minoo cuhva vaha cundyico ndo.

¹⁰ Vatyí quiví sindyaa ndi sihin ndo i saha ndi tyiño ya sii ndo vatyí tatu iyo ra ña cuñi zatyño, ma casi ra.

¹¹ Vatyí ñihi ndi tuhun vatyí iyo zuhva ndo ña cuñi ndo zatyño. Yucu ñi maa ndo, ta ñahñi maa tyiño zavaha ndo caña ñi.

¹² Ta sii ñiyiví zavaha cuhva cuan, saha ndi tyiño ta zañiñi ndi sii ñu sihin cuhva saha ra Jesucristo, ra ndyaca ñaha sii yo, vatyí nazatyño vaha ñu cuan ta ñihi ñu sa casi ñu.

¹³ Ta maa ndo, yañi xaa, ma zaña ndo sa zavaha ndo sa vaha.

¹⁴ Ta tatu iyo minoo ñiyiví sa ma tyaa yahvi tuhun cahan ndi nu carta ya, ndyehe vaha ndo ñaa ra cuu ra ta ma tyisaha ca ndo sii ra. Tacuan ta cua cucahan nuu ra.

¹⁵ Zoco ma cuxaan ndo sihin ra. Zacoto vaha ndo sii ra ñaa sa cuu cuatyí ra vatyí zuun ñi yañi yo sii ra.

Sica ra Pablo sii ra Ndyoo vatyí tyindyee ra sii ñiyiví cuan

¹⁶ Ta natyindyee sa zuun ñi maa ra ndyaca ñaha sii yo sii ndo tandihi tyiemvu ta tandihi cuhva vatyí coo sa taxi aña ndo tañi sa iyo aña maa ra. Ta nacundyaa ra sihin tandihi cuii ndo.

¹⁷ Yuhvi ra Pablo tyei minoo nacumi sii maa ndo. Sihin zuun ñi ndehi tyei tuhun ya. Tyehen caa firme. Ihya cuu cuhva tyei.

¹⁸ Ta natyindyee xaan ra ndyaca ñaha, ra Jesucristo, sii tandihi cuii ndo. Ndihi si vityí.

Sa Xihna Ñi Carta I Tyaa Ra San Pablo Sii Ra Timoteo

Tyaa ra Pablo minoo carta sii ra Timoteo

¹ Yuhvi ra Pablo minoo apóstol ra Jesucristo cui, cuhva i saha maa ra Ndyoo tyiño sii. Maa ra Ndyoo cuu ra zacacu sii yo. Ta maa ra Jesucristo cuu ra ndyaca ñaha sii yo. Sii maa ra ndatu yo.

² Tyei tutu ya suun Timoteo. Ndisa cuii vaty zehe mi cuu suun sa catyi Tuhun Ndyoo. Nacuhva ra Ndyoo Zutu yo sihin ra ndyaca ñaha, ra Jesucristo, cuaha xaan sa vaha suun; nacundahvi iñi ra suun, ta nacuhva ra sa coo sa taxi añimon.

Zacuenda ndo sii ndo sihin ñiyivi zacuaha sa ña ndisa

³ Zuun ñi cuhva catyi suhun vityi tañi sa catyi quivi i quite ñuu cuan sa cua cuhin ndya nu cu si Macedonia, ndoon ñuu Efeso vaty cua nacatyun sihin ñiyivi vaty ma zacuaha ñu sa ña ndisa.

⁴ Ta ma tyizoho ñu tuhun cahan ñiyivi sahnu a cuhva tyaa xaan ñiyivi yahvi tatu cuñi ñu coto ñu yoo cuu tandihi ñiyivi sahnu sii ñu. Ihya tuhun zacahñi tahan si sii ñiyivi, ta ñahñi tyindyee si sa zacuu yo tyiño sa saha ra Ndyoo sii yo vaty sihin sa sino ñi iñi yo ta cacu añima yo.

⁵ Ta sisi tandihi tuhun i saha ra Ndyoo sii yo sa ñiñi ca cuu sa cuñi yo sii ñiyivi sihin sa ndii vaha añima yo ta sihin minoo sa siñi tuñi vaha. Ta cuñi si vaty sino vaha iñi yo Tuhun Ndyoo, ta tacuan ta cua cuñi vaha yo sii ñu.

⁶ Iyo zuhva ñiyivi sa i zaña ñu tuhun ya. Nazaca ñu inga tuhun sihin si, ta natuhun xaan ñu tuhun ña ñiñi.

⁷ Cuñi ñu cuu ñu maestro cuenda ley sahnu, zoco nu maa ñu ta ña cutuñi iñi ñu sa nacaty ñu. Ta zuun ñi maa ñu ta ña cutuñi iñi ñu sa zacuaha ñu.

⁸ Sito yo vaty vaha xaan cuu ley maa ra Ndyoo, zoco cuñi si sa cutyiño yo sii si minoo cuhva vaha, cuhva catyi si.

⁹ Cuñi si coto yo vaty ñahñi ley Ndyoo sa cua cuxaan sii yo tatu zavaha yo sa vaha. Iyo si vaty tasi tuñi si sii ñiyivi ña vaha, sa cuenda ñiyivi ña tyaa yahvi sii ra Ndyoo ta ña cuñi ñu sii ra. Iyo si sa cuenda ñiyivi iyo cuaty, ñiyivi sa cahan ndya vaha ñi, cuenda ñiyivi sahñi sii zutu ñu a sii zihhi ñu a sii inga ñiyivi.

¹⁰ Iyo ley ra Ndyoo sa cuenda ra iyo sihin inga ñaha sa yivi ñazihhi ra cuu a ra iyo sihin inga ra ta sa cuenda ra zuhu ñiyivi, ra vaty, ra catyi “sito vaha Ndyoo” ta ña ndisa ra. Sa cuenda tandihi cuhva cuan iyo ley maa ra Ndyoo a ñaa inga cuhva zavaha ñiyivi ta ña vaha si.

¹¹ Ta tandihi tuhun sa quehin sihin ndo ihya, sasi tahan si sihin tuhun vaha xaan sa cuenda ra Cristo, cuhva cacu yo. Maa ra Ndyoo saha tyiño sii, sa nacaty sii si, ta cahnu xaan cuu maa ra.

Saha ra tyahvi ndyoo sii ra Ndyoo vaty cundahvi iñi ra Ndyoo sii ra

¹² Sehi tyahvi ndyoo sii ra Jesucristo ra ndyaca ñaha sii yo vaty sito maa ra vaty cuu zavehi tyiño ra, ta saha ra tyiño ya sii, ta saha ra tundyee iñi sii, ta cuu zavehi sii si.

¹³ Tacuan i zavaha ra vazu nu quisi quivi i cui minoo ra cahan xaan ndya vaha ñi sii ra. I zayuhu xein sii ñiyivi sino iñi sii ra, ta i quehin ndya vaha ñi sii ñu. Zoco i cundahvi iñi ra Ndyoo sii vaty quivi i zavehi cuhva cuan tañaha ca sino iñi sii ra, ta ñá site vaty yivi cuhva vaha cuu cuhva zavehi.

¹⁴ Ta i tyindyee xaan ra ndyaca ñaha sii yo sii, ta yucuan cuenda sino xaan iñi sii ra, ta cuñi xein sii inga ñiyivi tañi cuñi maa ra Jesucristo sii ñu.

¹⁵ Cuñi si vaty tandihi cuii yo cua sino iñi yo vaty i quisi ra Cristo Jesús ñuu ñiyivi vaty cua zacacu ra sii ñiyivi iyo cuaty tañi mi. Cuaha ca cuaty i zavehi ta ziqui inga ñiyivi iyo cuaty.

¹⁶ Ta yucuan cuenda i cundahvi iñi ra Ndyoo sii, vatyí cua cuu si sa xihna ñi nu zañaha ra Jesucristo vatyí ndyee xaan iñi ra sihin ñiyivi iyo cuatyí. Zañaha si cuhva sii ñu ta cua sino iñi ñu sii maa ra, ta tacuan ta ma cuu ca ñu.

¹⁷ Ta yucuan cuenda zacahnu xaan yo sii ra Ndyoo ta saha xaan yo tyahvi ndyoo sii ra tandihi cuii tyiemvu vatyí ra ndyaca ñaha cuu ra tandihi cuii tyiemvu, ta ma cuu ra ndaha cuii ñi. Ma cuu ndyehe yo sii ra vityí. Minoo ñi ra cuu Ndyoo, ta casi xaan iñi ra. Ta tacuan cuu si.

¹⁸ Yoho Timoteo zehi, sa nacohon iñun cuhva i catyí ra yañi yo suhun quivi i cahan ra cuenda maa ra Ndyoo. Yucuan cuenda catyí suhun inga saha vatyí zatyíño vohon tyiño maa ra Ndyoo.

¹⁹ Ma zañon cuhva sa sino xaan iñun. Ta tandihi sa zavohon, zavohon sii si sihin minoo sa siñi tuñi vaha. Vatyí iyo zuhva ñiyivi ña tyaa ñu yahvi sa catyí sa siñi tuñi vaha ñu, ta naa iñi ñu sii Ndyoo.

²⁰ Tacuan iyo ra Himeneo ta ra Alejandro. Yucuan cuenda i nacuhve sii ra sii cuihna zuhva quivi vatyí ndoho ra ta cutuhva ra ta ma cahan ra ndya vaha ñi sii ra Ndyoo.

2

Cuhva tahan si cahan yo sihin ra Ndyoo

¹ Sa xihna ñi sehi tyiño vatyí cahan ndo sihin ra Ndyoo sa cuenda tandihi ñiyivi. Caca ndo tumañi iñi sii ra, ta nacuhva ndo tyahvi ndyoo sii ra cuenda tandihi cuii ñu.

² Caca ndo sii ra sa cuenda ra ndyaca ñaha ta tandihi cuii ra cu tyiño. Caca ndo vatyí coo xaan sa vaha sii yo ta ma coo cuatyí ñuu ñiyivi. Tacuan ta cua cuu tyaa yo yahvi sii ra Ndyoo tandihi cuii cuhva ta zavaha yo tandihi cuii sa vaha.

³ Vatyí ihya cuu cuhva vaha sa tahan iñi maa ra Ndyoo, ta maa ra cuu ra zacacu sii yo.

⁴ Cuñi maa ra vatyí cacu tandihi cuii ñiyivi ta coto ñu ñaa sa cuu sa ndisa.

⁵ Vatyí minoo ñi ra Ndyoo iyo, ta minoo ñi ra cua cahan sa cuenda yo nuu ra Ndyoo Zutu yo, ra Jesucristo. Ta ñiyivi cuu tucu maa ra tañi maa yo.

⁶ I saha maa ra Jesús sa cuu ra, ta cuhva cuan i tyiyahvi ra vatyí cuu cacu tandihi ñiyivi. Ta i quita tuhun cuan nu tahan si coto ñiyivi.

⁷ Ta sa cuenda ya i saha ra Ndyoo tyiño sii, vatyí zacote sii ñiyivi tuhun ra ta cui minoo ra apóstol ta zacuehi sa ndisa sii ñiyivi sa yivi ñiyivi hebreo cuu. Cua zacuehi sii ñu cuhva sino iñi ñu. Tañi minoo ra sino vaha iñi sii ra Cristo quehin sa ndisa. Ña quehin cuendu.

⁸ Yucuan cuenda cuñi vatyí nacahnu cuii ñi nacahan rayi sihin ra Ndyoo. Nazandaa ra ndaha ra. Ta ndi vaha coo aña ra. Ta ma cuxaan ra a cahñi tahan ra.

⁹ Ta tacuan tucu ñuzihi. Ta ma ndihvi ñu zahma cuiti xaan zoco minoo cuhva vaha ta sa ña yahvi xaan. Ta ma zandutyacui xaan ñu sii ñu sihin cuaha xaan cuhva zavaha ñu sihin ixi xiñi ñu a sihin xuhun cuaan a perla a zahma yahvi xaan.

¹⁰ Zoco nazavaha ñu tandihi nuu sa vaha tañi tahan si zavaha minoo ñiyivi tatu sito ñu sii ra Ndyoo sa ndisa.

¹¹ Cuñi si vatyí taxi ñi tyizoho ñuzihi Tuhun Ndyoo nu zacuaha ñiyivi sii si ta tyaa ñu yahvi tandihi sa siñi ñu.

¹² Ña sehi sa zacuaha ñuzihi Tuhun Ndyoo (nuu cuaha ñiyivi) a sa cundyaca ñaha ñu sii rayi vatyí cuñi si sa coo taxi ñu.

¹³ Vatyí sa xihna ñi i zavaha ra Ndyoo sii ra Adán ta ziqui cu Eva.

¹⁴ Ta yivi sii ra Adán i zandavi ñaha cuihna. Sii ñaha cuan i zandavi ñaha ra, ta tacuan i quisaha sicoo cuatyí.

¹⁵ Zoco cua cacu aña ñuzihi tatu zavaha ñu tandihi cuhva zavaha ñiyivi cuu zihí sa ndyihí ta tatu sino vaha iñi ñu ta cuñi ñu sii ra Ndyoo sa ndisa ta zavaha ñu tandihi cuii cuhva vaha ta coo minoo sa siñi tuñi vaha sii ñu.

3

Cuhva cuñi si coo minoo ra tatu ndyizo ra tyiño ra Ndyoo

¹ Ndisa cuii tuhun ya vatyi tatu cuñi minoo ra cuizo ra tyiño nu iyo ñiyivi sino iñi Tuhun Ndyoo, vaha xaan cuu tyiño ya tatu cuñi ra cuizo ra sii si.

² Yucuan cuenda, tatu cuñi ra cuizo ra tyiño sa cundyaca ñaha ra sii ñiyivi sino iñi, cuñi si vatyi coo ra minoo cuhva vaha xaan ta yoñi cuu tyaa cuatyí sata ra. Cuñi si vatyí minoo ñi ñazihí ra coo, ta ma coo uu tahan. Cuñi si vatyí ñihi zatyiño ra sa ndisa ta coo vaha xaan sa siñi tuñi ra ta cuu ra minoo ra tyaa ñiyivi yahvi sii. Cuñi si vatyí cuhva ra xita casi ñiyivi saa vehe ra. Cuñi si vatyí zacuaha vaha ra sii ñiyivi.

³ Ma cuu ra ra siñi a ra nanducu tizihí. Ta ma cuñi ra zahacanaa ra xuhun sihin minoo cuhva ña vaha. Cuñi si vatyí coo xaan tundyee iñi sii ra sihin ñiyivi, ta ma cahñi tahan ra sihin ñu, ta ma cuu caca xaan iñi ra tuhun xuhun.

⁴ Cuñi si cuu ra minoo ra cundyaca ñaha vaha vehe ra, ta nacoto zehe ra tyaa si yahvi tandihí saha.

⁵ Vatyí tatu ña sito minoo ra cundyaca ñaha ra vehe ra ¿yozo caa cuu cundyaca ñaha ra sii ñiyivi sino iñi? Ma cuu.

⁶ Ra sa cuñi cuizo tyiño cuan, ma cuu cuu minoo ra saa, coto zacahnu xaan ra sii ra, ta cua tasi tuñi ra Ndyoo sii ra tañi i tasi tuñi ra sii cuihna.

⁷ Ta ra sa cua cuizo tyiño, cuñi si minoo ra vaha ñiyivi cuu nuu ñiyivi ña sino iñi coto quisaha tyaa ñu cuatyí sata ra ta canacava tucu ra inga saha sisi xayú cuihna.

Cuhva cuñi si coo minoo ra tyindyee sii ñiyivi sino iñi

⁸ Ta tacuan tucu sihin ra cuñi tyindyee sii ñiyivi sino iñi, cuñi si vatyí cuu ra minoo ra vaha xaan. Ta cuu ra minoo ra ndoo xaan cahan ta zavaha ra cuhva catyí ra. Ma cuu coho xaan ra ndixi a cuñi ra zahacanaa ra xuhun sihin minoo cuhva ña vaha.

⁹ Cuñi si vatyí quihin vaha xaan ra tuhun ndisa, cuhva sino iñi yo. Ta minoo ñi cuhva ndoo vaha coo sa siñi tuñi xiñi ra.

¹⁰ Cua ndyehe xihna ñiyivi tatu tacuan iyo ra, ta tatu ña quiñi iyo ra, tacuan ta cuu cuizo tyiño ra.

¹¹ Ta tacuan tucu ñazihí ra, cuñi si vatyí cuu ñu ñiyivi vaha xaan. Ta ma cahan ñu ndya vaha ñi sii ñiyivi. Cuñi si vatyí coo taxi xaan ñu ta zavaha ñu sa vaha tandihí cuii tyiemvu.

¹² Ta ra ndyizo tyiño ya, naco minoo ñi ñazihí ra. Ta cuñi si vatyí cundyaca ñaha vaha ra sii zehe ra ta tacuan tucu tandihí tyiño vehe ra.

¹³ Vatyí ra ndyizo tyiño ya tatu zatyiño vaha ra cua ñihi ñiyivi cuhva tyaa xaan ñu yahvi sii ra. Ta ma yuhu ca ra cahan ra sihin ñiyivi cuhva sino iñi ra sii ra Cristo Jesús.

Minoo tuhun sa tyindyee xaan sii yo ta cuu cundyico yo Tuhun Ndyoo

¹⁴ Zacote zuhva tuhun ya suun, ta cuñi cuhin cundyehi suun,

¹⁵ zoco tatu nducuei sa siton yozo caa cuñi si zavohon. Vatyí maa yo cuu vehe ñuhu ra Ndyoo ndito. Ta cuñi si vatyí ñihi xaan sino iñi yo sii sa ndisa ta zacuaha yo sii si sii ñiyivi.

¹⁶ Ndisa cuii vatyí iyo minoo sa vaha xaan sa sino iñi yo:

I quisi ra Ndyoo ñuu ñiyivi, ta caa ra cuhva caa maa yo.

I catyí Tatyí li vatyí ñahñi cuatyí ra.

I ndyehe ángel sii ra.

Nacahnu ñuu ñiyivi i nacatyí ñiyivi cuhva i zavaha ra.

Ta sino iñi ñiyivi nacahnu ñuu ñiyivi.

Ta ziquí cuahan ra ndya gloria nu zacahnu ñu sii ra tandihí tyiemvu.

4

Ñiyivi sa cua zaña cuhva sino iñi ñu

¹ Ta casi xaan catyí Tatyí li vatyí nu sa cuñi ndihí tyiemvu cua coo ñiyivi sa cua zaña cuhva sa sino iñi ñu. Cua sino iñi ñu sii tatyí ña vaha sa zandavi ñaha. Ta cua cundyico ñu tuhun zacuaha cuihna.

² Ma cucahan nuu ñu cahan ñu sa vatya. Ñahñi ca sa siñi tuñi vaha xiñi ñu. Zavaha xaan ñu sa ña vaha ndya cuhva ña tuu ca iñi ñu vatyi ña vaha si.

³ Ihya ñiyivi catyi vatyi cuaty cuu si tatu tindaha ñiyivi, ta cuaty cuu si sa casi yo zuhva nuu ndyayu, catyi tucu ñu. Zoco maa ra Ndyoo i zavaha tandihi, ta ñiyivi sa sino iñi ta sito ñu sa ndisa, cuu casi ñu ñaa ñi maa ndyayu ta nacuhva ñu tyahvi ndyoo sii ra Ndyoo.

⁴ I zavaha ra Ndyoo tandihi nuu quiti, ta vaha ti. Ta ña vaha sa ma casi yo sii ti tatu sa nacuhva yo tyahvi ndyoo sii ra Ndyoo ta casi yo.

⁵ Vatyi ndu-ii si sa cuenda Tuhun Ndyoo ta sa cuenda sa nacuhva yo tyahvi ndyoo sii ra.

Cuhva iyo minoo muzu vaha ra Jesucristo

⁶ Tatu nacaty moo tuhun ya sihin ra yañi yo, minoo ra zatyino vaha sa cuenda ra Jesucristo cua cuun. Vaha xaan cua cuu cuhva sino iñun ta cuhva ndyicon.

⁷ Zoco ñáha tyoon yahvi cuendu sa nacaty ñiyivi ñuu ñiyivi ya, costumbre sa zacuaha ñiyivi sahnú. Nducun cuhva zavohon cuhva cuñi ra Ndyoo tandihi tyiemvu.

⁸ Tyindyee si zuhva sii coño ñuhu yo sa cuziqui yo, zoco sa zavaha yo cuhva cuñi ra Ndyoo, yucuan tyindyee sii yo tandihi cuu cuhva. Vatyi tyindyee si sii yo ihya ñuu ñiyivi, ta cua tyindyee tucu si sii yo nu cua cundito yo sihin ra.

⁹ Ndisa cuu cuhva ya, ta cuñi si sa sino iñi tandihi ñiyivi.

¹⁰ Ta sa catyi ya zatyino ndi ta ndyehe ndi tundoho vatyi ndatu ndi sii ra Ndyoo ndito. Tyindyee ra sii tandihi ñiyivi ta ñihi ca sii ñiyivi sino iñi vatyi cua zacacu ra sii yo.

¹¹ Ihya tuhun zacuhon, ta zañiñun sii ñiyivi vatyi cutuhva ñu.

¹² Ndisa minoo ra yoco cuun, zoco zañon minoo cuhva vaha sii ñiyivi sino iñi sihin cuhva zavohon, sihin tuhun cohon, sihin cuhva cuñun sii ñiyivi, sihin cuhva sino iñun ta sihin cuhva sa ñahñi maa sa ña vaha zavohon.

¹³ Ñi ñi sa cumañi sei nu yucu ndo, nducun cuhva cahvun Tuhun Ndyoo nuu ñiyivi. Zacuhon sii ñu, ta nacatyun sihin ñu yozo caa cua cuu ñu ñiyivi vaha.

¹⁴ Ra ndyizo tyiño cuenda tandihi ra yañi yo i tyizo ra ndaha ra xiñun quivi cuan, ta i saha ra Ndyoo minoo cuhva suun vatyi zatyinon tyiño ra. Coto ñáha naa iñun cuhva cuan, ta zatyinon tyiño ra Ndyoo cuhva i catyi ra cuan.

¹⁵ Tyaa xoon yahvi sii tandihi tuhun ya vatyi cua ndyehe tandihi ñiyivi vatyi vaha xaan i cutuhvon.

¹⁶ Zacuendon suun sihin cuhva ndyicuun ta cuhva zacuhon, ta ñáha zañon sa vaha. Tatu tacuan zavohon, cua cacun, ta cua cacu ñiyivi tyizoho sa cohon.

5

Ihya cuu cuhva zavohon sihin ñiyivi sino iñi Tuhun Ndyoo

¹ Ma cuxoon ta cohon sihin minoo hermano sahnú. Cuñi si vatyi cuhvon tuhun sii ra tañi sa zutun sii ra. Ta cahan vohon sihin ra yoco tañi sa yañun sii ra.

² Cahan vohon sihin ñuzihi sahnú tañi sa zihun sii ñu. Ta sihin ñu yoco tañi sa cuhvon sii ñu. Ta ma zavohon sa ña vaha sihin ñu.

³ Tyindyeeun sii ñu ndahvi sa sihi yii tatu ndisa vatyi cumañi si sii ñu.

⁴ Zoco tatu iyo zehe minoo ña ndahvi a zehe ñañi ña, cuñi si sa cutuhva xihna maa ra sa tyindyee ra sii ña. Nanacohon iñi zehe ña cuhva i tyindyee xaan zutu ra ta zihí ra sii ra ta luhlu ra. Ta yucuan cuenda cuñi si vatyi natyindyee ñiyivi sii zutu ñu a sii zihí ñu. Vatyi ihya cuu sa vaha, ta tacuan ta zii cua cuñi ra Ndyoo.

⁵ Iyo ñuzihi sa ndoo ndahvi sa ndisa cuu sa maa ñi maa ñu. Yucuan cuu ñu ndatu sa vaha iñi ñi sii maa ra Ndyoo, ta ña zaña ñu sa cahan ñu sihin ra ora ta sa cuaa.

⁶ Zoco ñu ndahvi sa cuzii iñi cuhva cuñi maa ñu, tañi sa sihi ñu nuu Tuhun Ndyoo cuu si ñi ñi sa ndito ñu.

⁷ Tacuan cuhvon tyiño sii tandihi yañi yo ta cuhva yo vatyi coto ñu ta zavaha ñu sa vaha.

⁸ Zoco tatu iyo ra yañi yo ña tyindyee ra sii ñiyivi sii ra, ta nu ñiyivi vehe ra ta ña saha ra sa casi ñu, minoo ra ña sino ca iñi cuu ra. Cahnu ca ra ña vaha nduu ra ta ziqui ñiyivi ta sino ca iñi.

⁹ Nacoo minoo tutu sihin zivi ñu ndahvi sa yaha uñi xico cuiya, ñu i sicoo minoo ñi yii.

¹⁰ Cuñi si sa coto ñiyivi sii ña saha sa catyi sa vaha sa zavaha ña, tatu zacuahnu vaha ña sii zehe ña ta tyaa nuu vaha ña sii ñiyivi saa vehe ña. Tatu saha vaha ña sa casi yañi yo, ra saa vehe ña. Tatu tyindyee ña sii ñiyivi ndyehe tundocho, ta tatu zavaha ña tandihi nuu sa vaha.

¹¹ Zoco ma tyihi ndo zivi ñu ndahvi ñu tañaha ca cusahnu vaha vatyí cua cuñi ñu tindaha ñu inga saha, ta cua zaña ñu tyiño zavaha ñu sa cuenda ra Cristo.

¹² Ta cua coo cuatyí ñu vatyí zaña ñu cuhva i catyi ñu sa cua zavaha ñu.

¹³ Ta inga tucu cuhva, tatu tañaha ca cusahnu vaha ñu ndahvi, cua nduzusa ñu ta cua caca noo ñu tahan tahan vehe. Ta ña tacuan ñi, zoco cua quisaha cahan ñu cuendu. Cua natuhun xaan ñu ziqui tyiño inga ñiyivi ta ziqui tuhun ña tahan si cahan ñu.

¹⁴ Yucuan cuenda cuñi vatyí ñu ndahvi ña sahnu xaan, natindaha tucu ñu. Nacoo zehe ñu. Nazacuenda ñu vehe ñu, ta ma cuhva ñu cuhva cahan xaan ñiyivi xaan iñi sii yo.

¹⁵ Vatyí iyo ñu ndahvi sa quita ñu ityi ra Ndyoo, ta nanduu nandyico ñu sii cuihna.

¹⁶ Tatu iyo ra yañi yo a cuhva yo ta iyo ñiyivi ndahvi tahan ñu, natyindyee maa ñu sii ñu, ta ma cuhva ñu sa ñihi xaan tyindyee inga yañi yo. Ta ziqui cuu tyindyee tandihi yañi yo sii ñiyivi sa yoñi ca ñiyivi sii, iyo sa ndisa.

¹⁷ Ta ra sahnu zatyíño tyiño ra Ndyoo, ra ndyaca ñaha vaha sii tandihi ra yañi yo, cuñi si vatyí tyaa xaan yo yahvi sii ra, ta ñihi ca tatu nacatyí ra ta zacuahra ra Tuhun Ndyoo.

¹⁸ Vatyí catyi Tuhun Ndyoo: “Ma cuñi ndo yuhu zindiqui nu sañi ti siti yutu sa quita zoo si.” Ta tacuan tucu: “Ra zatyíño tyiño ra Ndyoo cuñi si vatyí coo yahvi ra vatyí yucuan cundito ra.”

¹⁹ Tatu yoñi uu a uñi tahan sa ndaa ma tyizohon tatu tyaa ñiyivi cuatyí sata minoo ra sahnu zatyíño tyiño ra Ndyoo.

²⁰ Zoco ñiyivi sa ña zaña cuatyí, ñihi cohon sihin ñu nu yucu tandihi yañi yo vatyí tacuan ta cua cuyuhu tandihi ñu ta ma zavaha ñu sa ña vaha.

²¹ Sehi tyiño ya suun ityi nuu ra Ndyoo ta nuu ra ndyaca ñaha sii yo, ra Jesucristo, sihin tandihi ángel ra, ta catyi suhun vatyí zavohon tandihi cuhva ya inuu ñi sihin tandihi ra yañi yo. Ta tatu cuñi con sii minoo ra, zoco ma cuhvon sa zavaha ra sa ña vaha.

²² Ma numi xaan cuhvon tyiño sii minoo ra sa cuu ra ra cuizo tyiño nu iyo ra yañi yo coto coo cuatyun tatu zavaha ra sa ña vaha. Ta ñahñi maa sa ña vaha zavohon caña ñi.

²³ Tuhva xoon huhu sihin sisun, yucuan cuenda ma cohon maa ndutya ñi. Coho tucun zuhva vino.

²⁴ Iyo ñiyivi casi xaan naha cuatyí ñu vazu cumañi ca cuhun ñu nu cua ndoho ñu. Ta iyo tucu inga ñiyivi ña sito yo ñaa sa cuu cuatyí ñu ndya cuee ca ta cua quituu si.

²⁵ Ta zuun ñi cuhva cuan, casi xaan naha si tatu zavaha ñiyivi sa vaha. Ta vazu iyo si sa ña ndyehe yo, zoco ma cuu coo xehe si tandihi tyiemvu.

6

¹ Ra cuu muzu, cuñi si sa tyaa xaan ra yahvi sii patrón ra. Tacuan ta ma cahan ñiyivi ndya vaha ñi sii ra Ndyoo ta sii Tuhun ra.

² Ta tatu sino iñi patrón ra Tuhun Ndyoo, ña cuñi si sa ma tyaa ra yahvi sii ra vatyí yañi yo cuu sii ra. Ña tacuan. Ñihi ca cuñi si tyindyee ra sii ra sihin sa vaha ca vatyí zuun ñi ra sino iñi cuu ra. Ta nacuñi ra sii patrón ra vatyí yañi yo cuu sii ra. Nacatyun tuhun ya, ta zañiñun sii ñiyivi vatyí zavaha ñu sii si.

Tuhun sa saha sa cuzii iñi yo

³ Tatu iyo minoo ra zacuahra minoo cuhva ña ndisa ta ña sasi tahan si sihin cuhva cahan ra Jesucristo, ra ndyaca ñaha sii yo, ta sihin cuhva zacuahra maa yo,

⁴ zacahnu xaan ra cuan zuun ñi sii maa ra, ta ñahñi maa sa sito ra. Zoco tahan xaan iñi ra natuhun xaan ra, ta sahñi tahan xaan ra ziqui minoo tuhun ta inga tuhun. Ta sa

cuenda cuhva ya vasi sa cuñi xaan ñiyivi cundyaca ñaha ñu sii yañi yo. Ta nduu si tizihí, ta cahan ñiyivi ndya vaha ñi, ta ña cutuñi iñi ñiyivi yoo cuu yañi yo cahan sa ndoo.

⁵ Ta ña ndihí tuhun sañhi tahan ñu vatyí ñahñi sa vaha iyo xiñi ñu. Ta ña sito ñu ñaa sa cuu sa ndisa. Sica iñi ñu vatyí minoo cuhva vaha xaan cuu sa zahacanaa yo xuhun sihin Tuhun Ndyoo.

⁶ Ndisa vatyí sa ñihí yo minoo sa vaha xaan tatu zavaha yo tandihí sa catyí ra Ndyoo ta tatu ñahñi ca sa ndyíyo iñi yo.

⁷ Ñahñi sa ndaha yo sa saa yo ñuu ñiyivi ya, ta nu siin ta ma cuu cuizo yo cuhun yo.

⁸ Zoco tatu iyo sa casi yo ta zahma yo, sihin ñi si cuan nandoo yo vaha.

⁹ Ta ñiyivi sa cuñi xaan sa cucuca ñu, nducu coto cuihna sii ñu ta canacava ñu sisi cuatyí. Vatyí cuaha xaan sa cuñi ñu, ta ña ñiñi, ta zatívi si sii ñu. Ta cua ndoyo ñuhu ñu sa cuenda ndaha tyiño ñu ta cua naa ñu.

¹⁰ Vatyí tatu cuñi xaan yo xuhun, cuaha xaan sa ña vaha ndyícuu yo. Ta iyo ñiyivi quisaha ndyíyo iñi ñu xuhun, ta zandoo ñu sa sino iñi ñu Tuhun Ndyoo, ta cuaha xaan tundoho ndyehe ñu.

Cuhva zatyíño yo tatu sino iñi yo sii ra Ndyoo

¹¹ Zoco yoho Timoteo, sii ra Ndyoo cuu suun. Zandoon tandihí cuii sa ña vaha. Cuñi si vatyí cundyicon minoo cuhva vaha xaan, cuhva cuñi maa ra Ndyoo. Ta sino xaan iñun. Cuñi xoon sii inga ra yañi yo ta cundyee xaan iñun. Ta vii ñi cohon sihin ra.

¹² Ñihí zatyínon tyiño ra Ndyoo. Ta ma zañon cuhva cundito añimon tandihí tyiemvu vatyí yucuan cuenda i casi ra Ndyoo suun vatyí cunditon sihin ra. Sa i zavohon minoo cuhva vaha xaan vatyí i nacatyun cuhva sino iñun nuu cuaha xaan ñiyivi.

¹³ Ta vityí ndyehe ra Ndyoo. Maa ra saha sa cundito tandihí sa ndito. Ta ndyehe tucu ra Jesucristo cuhva sehi tyiño ya suun. Ta maa ra, vaha xaan i zavaha ra, ta i saha ra sa ndaa nuu ra Poncio Pilato.

¹⁴ Ta catyí suhun vatyí tyoon yahvi tuhun ya, ta ma zamon numinoo cuhva sihin si ndya quívi quisi tucu ra Jesucristo, ra ndyaca ñaha sii yo. Tacuan ta ma ñihí ñiyivi cuhva catyí ñu vatyí ña vaha tuhun cahan maa ra Ndyoo.

¹⁵ Tatu tahan si quívi, cua zandyehé tucu ra Ndyoo sii ñiyivi sii ra Jesús inga saha. Ta minoo ñi ra Ndyoo cuu ra ndyaca ñaha. Cahnu xaan ra, ta cuu xaan sa zacuu ra. Rey cuu ra sii tandihí inga rey ta ra ndyaca ñaha sii tandihí inga ra ndyaca ñaha.

¹⁶ Maa ñi maa ra Ndyoo cuu ra ña sihi. Iyo ra nu ndisi xaan, nu yoñi sa cuu tuhva. Ta yoñi ca ndyehe sii ra, ta ma cuu ndyehe yo sii ra vityí. Nazacahnu ñiyivi sii ra, ta nacundyaca ñaha ra tandihí cuii tyiemvu. Ta tacuan cuu si.

¹⁷ Cuhvon tyiño sii ñiyivi cuca xaan ihya ñuu ñiyivi vatyí ma zacahnu xaan ñu sii ñu ta ma ñi xaan cuu iñi ñu sihin xuhun ñu coto coo quívi ta ndihí si. Vaha ca cua sino iñi ñu iin ñi sii ra Ndyoo ndito vatyí maa ra cuu ra saha tandihí. Ta sihin sa saha maa ra, ta cua cuzii iñi yo.

¹⁸ Ta catyun sihin ñiyivi cuca vatyí nazavaha ñu maa ñi sa vaha. Nanducuca ñu ityi nuu ra Ndyoo sihin cuhva zavaha ñu sa vaha. Nandoo ñu vaha cuhva ñu sa sii ñu sii inga ñiyivi, ta nazasa ñu sii si.

¹⁹ Tacuan ta cua coo sa cuca ñu ndya gloria, ta ma cunaa si. Ta cua cundito ñu sihin ra Ndyoo.

Saha ra minoo ca tyiño sii ra Timoteo

²⁰ Yoho Timoteo, zacuenda vohon tyiño sa i saha ra Ndyoo suun. Ma tyizohon sa cahan ñiyivi ndya vaha ñi ta tuhun cahan ñiyivi ña sito. Cahan xaan ñu sa ña vaha ta sa ña ndisa, ta catyí ñu vatyí sito xaan ñu.

²¹ Vatyí iyo ñiyivi sa i quita ñu ityi vaha. Ta ña sino vaha ca iñi ñu Tuhun Ndyoo. Ña sino vaha ca iñi ñu cuhva iyo si sa ndisa. Natyindyee xaan maa ra Ndyoo suun. Ndhí si vityí.

Sa Cu Uu Carta I Tyaa Ra San Pablo Sii Ra Timoteo

Sa cu uu carta i tyaa ra Pablo sii ra Timoteo

¹ Yuhvi ra Pablo cui minoo apóstol ra Jesucristo, cuhva cuñi maa ra Ndyoo. Vasi nacatyi sihin ñiyivi cuhva cacu ñu tatu ndu-ñin ñu sihin ra Jesucristo.

² Tyei carta ya suun, Timoteo. Cuñi xein suun; tañi minoo zehi cuu suun. Cuñi sa cua cuhva xaan ra Ndyoo Zutu yo sa vaha suun. Ta cua cundahvi iñi ra suun. Ta cua cuhva ra sa coo sa taxi añimon. Ta tacuan cua zavaha tucu ra Jesucristo, ra ndyaca ñaha sii yo, suhun.

Nanacatyí maa ra Timoteo vatyí cuenda ra Cristo cuu sii ra

³ Ora ta sa cuaa sehi tyahvi ndyoo sii ra Ndyoo cuhva quehin sihin ra cuendon. Zavehi tyiño maa ra sihin minoo sa siñi tuñi vaha tañi i zavaha tandiñi ñiyivi sahnu sii.

⁴ Nacohon iñi cuhva i sacun (quivi i quite yucuan). Ta cuñi xein ndyehi suun inga saha. Ta tacuan ta ziqui zii xaan cua cuñi.

⁵ Nacohon iñi cuhva sino xaan iñun. Maha Loida siton sihin maha Eunice zihun, yucuan ñu i sino iñi sa xihna ñi ta ziqui moo. Ta sito vehi vatyí tacuan tucu sino iñi moo.

⁶ Yucuan cuenda zanaohin iñun vatyí zatyíño vohon tyiño ra Ndyoo tañi i saha maa ra Ndyoo cuhva suun quivi i tyize ndehi xiñun.

⁷ Vatyí ña cuñi maa ra Ndyoo sa cuyuhu xaan yo. Saha ra Tatyí li ra vatyí cua cuu zatyíño yo tyiño ra. Ta cua cuñi xaan yo sii inga ñiyivi, ta cua coo sa siñi tuñi vaha xiñi yo.

⁸ Yucuan cuenda ma cucahan nuun nu sohon sa ndaa sa cuenda ra ndyaca ñaha sii yo. Ta ma cucahan nuun sa cuenda mi vatyí ñohi vehe caa sa cuenda maa ra. Zoco ndoon vaha sa ndyehun tundoho sihin mi sa cuenda Tuhun Ndyoo. Zandyeun iñun vatyí cua tyindyee ra Ndyoo suun.

⁹ Zacacu ra Ndyoo sii yo, ta casi ra sii yo vatyí cu-ii yo tañi maa ra. Ñá casi ra sii yo sa cuenda minoo sa vaha i zavaha yo. I casi ra sii yo vatyí tacuan cuñi maa ra. I tahan si sii yo sa cuu yo sa cuenda cuatyi yo. Ta i zavaha maa ra Ndyoo minoo sa vaha xaan sa cuenda maa yo vatyí i zaquisi ra sii ra Cristo, ta i sihi ra sa cuenda maa yo. Cumañi ca sino ñuu ñiyivi, ta sa sito maa ra Ndyoo vatyí cua zavaha ra cuhva cuan.

¹⁰ Ta zañaha ra cuhva cuñi ra sii yo vatyí i zaquisi ra sii ra Jesucristo vatyí zacacu ra sii yo. I zanaa ra tyiño sa cuu yo, ta sihin Tuhun Ndyoo nu cacu yo i zañaha ra sii yo minoo nu ma cuu ca yo.

¹¹ I saha ra Ndyoo tyiño sii, vatyí nacatyi tuhun ra cuhva cacu ñiyivi. Ta i tava ra tyiño sii, vatyí zacuehi sii ñiyivi sa yivi ñiyivi hebreo cuu.

¹² Ta yucuan cuenda tehin tundoho sa ndyehi vityí. Zoco ña cucahan nui vatyí site yoo ra cuu ra sa sino iñi, ta sito vehi vatyí ra cuan, cuu zacuenda ra tandiñi sa saha cuende sii ra ndya quivi cua quisi ra.

¹³ Cundyico vohon cuhva vaha xaan sa zacuehi suun. Sino xaan iñun ta cuñun sii inga ñiyivi vatyí cuenda ra Cristo Jesús cuu suun.

¹⁴ Sihin tundyee iñi sa saha maa Tatyí li suun, zacuendon tandiñi tyiño i saha ra Ndyoo suun.

¹⁵ Tañi sa siton, tandiñi ñiyivi nu cu si Asia sa i zandoo ñu sii, tañi maa ra Figelo ta ra Hermógenes.

¹⁶ Nacundahvi iñi maa ra ndyaca ñaha sii yo sii ñiyivi ra Onesíforo ta natyindyee ra cuan sii ñu vatyí i tyindyee xaan ra Onesíforo sii. Ta ñá cucahan nuu ra vatyí ñohi vehe caa.

¹⁷ Nu ndiñi tuhun, quivi i sindyaa ra ñuu Roma ñá zaña ra sa nanducu ra sii, ndya cuhva ndya i nañihi ra sii.

¹⁸ Nacuhva ra ndyaca ñaha sii yo tumañi iñi sii ra quivi cua tyicuhva ra sii ñiyivi. Sa sito vohon cuhva i tyindyee xaan ra Onesíforo sii, ndya ñuu Efeso.

2

Minoo zandaru vaha sa cuenda ra Jesucristo

¹ Zehe luhli, cundyee iñun sihin tundyee iñi sa saha ra Cristo Jesús suun.

² Tandihíi tuhun sa i siñun catyi suhun nuu cuaha xaan ñiyivi, yucuan tuhun nacatyun sihin inga ra vaha, ra sa siton vatyi sino vaha iñi ra ta cuu zacuaha ra sii inga ñiyivi.

³ Ta nacundyee iñun ndyehun tundoho tañi minoo zandaru vaha ra Jesucristo.

⁴ Yoñi minoo zandaru nu sañi tahan ra ta cuu nazaca ra tyiño maa ra sihin si vatyi coto ma tahan iñi ra i casi sii ra sa cuu ra zandaru.

⁵ Ta inga tucu cuhva, minoo ra siziqui tatu ma cuziqui vaha ra cuhva tahan si, ñahñi cua zahacanaa ra.

⁶ Ta ra zatyíño sisi cuhu, xihna ca sii maa ra tahan si naquihin ra tyiño i zacuu ra.

⁷ Nacañi vaha iñun sa catyi suhun ihya, ta cua cuhva ra ndyaca ñaha sii yo vatyi cutuñi iñun tandihíi si.

⁸ Nacohon iñun cuhva i nandoto ra Jesús sa i sihi ra. Ta maa ra cuu ñiyivi ra rey David. Ihya cuu Tuhun Ndyoo cuhva cacu yo tañi sa nacatyíi sihin ñiyivi.

⁹ Ta sa cuenda Tuhun Ndyoo ta ndyehi tundoho ndya cuhva nuhñi tañi minoo ra iyo cuatyíi. Zoco Tuhun Ndyoo ña nuhñi si.

¹⁰ Yucuan cuenda cundyee iñi ndyehi tandihíi nuu tundoho sa cuenda ñiyivi i casi ra Ndyoo vatyi tacuan ta cua cuu cacu ñu. Sa cuenda ra Cristo Jesús, ta cua ñihi ñu sa cacu ñu tandihíi cui tyiemvu. Ta vaha xaan cua cuu si.

¹¹ Ndisa cuii cuu si nu catyi si: “Tatu cuu yo sa cuenda ra cuan, cua cundito yo sihin ra.

¹² Tatu ndyehi yo tundoho, cua cundyaca ñaha yo sihin ra. Tatu catyi yo vatyi ña sito yo sii ra, cua catyi tucu maa ra vatyi ña sito ra sii yo.

¹³ Tatu ña ñi iñi yo ta zatyíño yo tyiño ra, zoco maa ra cua zacuu cuhva sa catyi ra tandihíi saha vatyi tacuan iyo ra.” (Ta cua tyindyee ra sii yo.)

Tatu zatyíño vaha ra Timoteo cua quita vaha ra

¹⁴ Znacohon iñi ñiyivi, ta cuhvon tyiño sii ñu sa cuenda ra ndyaca ñaha sii yo vatyi ma natuhun xaan ñu cuenda ñaa minoo tuhun sisi Tuhun Ndyoo vatyi ñahñi maa tyindyee si sa tacuan. Cua zatívi si sii ñiyivi tyizoho.

¹⁵ Ñihi xaan nducun cuhva zavohon tandihíi sa cuñi ra Ndyoo tañi minoo ra zatyíño vaha ta quita vaha ra. Tacuan ta ma cucahan nuun ityi nuu maa ra Ndyoo vatyi i zatyíño vohon sihin Tuhun ra.

¹⁶ Ma cuhun nu natuhun xaan ñiyivi sa cuenda ñaa sa iyo ñuu ñiyivi ya, tuhun ña ñiñi. Vatyi ñiyivi cahan tacuan, tahan saha sa cahan ñu ta cua quihvi cuaha ca tuhun ña vaha sa ña tahan iñi ra Ndyoo.

¹⁷ Ta ihya tuhun cua zatívi si sii ñiyivi tañi sa tyahyu ñu sihin minoo cuehe. Ta tacuan iyo ra Himeneo ta ra Fileto.

¹⁸ Vatyi sa i quita ra ityi vaha, ta catyi ra vatyi sa yaha nandoto ñiyivi i sihi. Ta iyo ñiyivi sa zatívi ra cuhva sino iñi ñu.

¹⁹ Zoco i cahan ra Ndyoo minoo cuhva, ta ma cuu nazama ca si. Ihya cuu cuhva catyi si: “Nacoto maa ra ndyaca ñaha sii yo yoo cuu ñiyivi ra.” Ta catyi tucu si: “Tandihíi ñiyivi sa catyi vatyi cuenda ra Cristo cuu ñu, nazandoo ñu sa zavaha ñu sa ña vaha.”

²⁰ Sisi minoo vehe cahnu, iyo ndaha tyiño xuhun cuaan ta xuhun cuisí. Ta iyo tucu ndaha tyiño vitu ta ndyahyu. Iyo si cutyiño ñu maa ñi nu tyaquí, ta iyo si sa cuenda nu ña ñiñi.

²¹ Ta tacuan tucu maa yo, tatu zaña ndisa cuii yo tandihíi sa ña vaha, tacuan ta ziqui cua cuu yo minoo ñiyivi vaha xaan. Cua zandundiíi ra Jesucristo aña yoo, ta ziqui cua cuu cutyiño ra sii yo sa cuenda tandihíi tyiño vaha.

²² Zacuenda xoon suun, ta ma zavohon tandihi sa ña vaha tañi zavaha ra yoco. Cundyicon minoo cuhva vaha xaan. Sino xaan iñun. Cuñun sii inga ñiyivi. Ta coo taxun sihin tandihi inga ra yañi yo, ra vaha ñanima, ra tuhva caca tahvi sii ra ndyaca ñaha sii yo.

²³ Ma tyizohon nu natuhun xaan ñiyivi tuhun ña ñiñi ta sa ña ndisa. Sa siton vatyí sihin tuhun cuan ta quisaha cahñi tahan ñiyivi.

²⁴ Ta minoo muzu cuenda ra ndyaca ñaha sii yo, cuñi si sa ma nanducu ra tizihí. Inga cuhva cuñi si vatyí vii ñi cahan ra sihin tandihi ñiyivi. Cuñi si vatyí cua cuu zacuahá ra sii ñiyivi ta coo xaan tundyee iñi sii ra sihin ñu.

²⁵ Ta ma caca iñi ra vatyí sito xaan ra, zoco vii ñi nazacuaha ra sii ñiyivi ña tyaa yahvi. Vazu cua tyindyee ra Ndyoo sii ñu, ta cua zama ñu cuhva iyo ñu, ta cua coto ñu ñaa sa cuu sa ndisa.

²⁶ Tacuan ta ziquí cua quita ñu sisi xayú cuihna nu i tñn ra sii ñu cuhva cuñi ra.

3

Cuhva cua nduu ñiyivi nu sa cuñi ndihi tyiemvu

¹ Cuñi si sa coton vatyí ityi nuu ca cua coo quívi yñi xaan.

² Vatyí cua cuñi xaan ñiyivi sii maa ñu, ta ma cuñi ñu sii inga ñiyivi. Cua ndyíyo xaan iñi ñu xuhun. Cua zacahnu xaan ñu sii maa ñu. Cua cahan ñu ndya vaha ñi sii ra Ndyoo. Ma tyaa ñu yahvi sii zutu ñu ta sii zihí ñu. Ma nacuhva ñu tyahvi ndyoo sii ra Ndyoo a sii ñiyivi. Cua ha xaan cuatyí ñu cua coo.

³ Ma cuñi ñu nu sii ñiyivi sii ñu. Ta nu tucahnu iñi, ma coo sii ñu sihin ñiyivi. Cua cahan xaan ñu cuendu ziquí ñiyivi. Nu maa ñu ta ma cundyee iñi ñu cundyaca ñaha ñu sii ñu sa catyi cuatyí ñu. Quiñi xaan cua nanduu ñu. Ta cua cuxaan xaan ñu sii tandihi sa vaha.

⁴ Cua xico tuhun ñu sii amigo ñu. Ñihi xaan iñi ñu. Sica iñi ñu vatyí sito xaan ñu. Nanducu xaan ñu ñaa sa cuñi maa ñu, ta ma nanducu ca ñu sii ra Ndyoo.

⁵ Cua cundyico ñu minoo cuhva tañi sa sino iñi ñu sii ra Ndyoo, zoco ña ndisa. Ña sino iñi ñu vatyí iyo xaan cuhva sii ra Ndyoo. Ñahñi cuenda cua cu-ñun sihin ñiyivi sa tacuan caa.

⁶ Vatyí nu iyo ñiyivi sa tacuan, iyo ra quihvi vehe ñiyivi. Zandavi ñaha ra sii ñuzihí sa ñahñi sa siñi tuñi xiñi, ñiyivi sa iyo xaan cuatyí. Zavaha ñu ñaa ñi maa sa catyi inga ñiyivi sihin ñu.

⁷ Ihya ñiyivi cuñi ñu coto ñu tandihi cuii nuu cuhva. Cutuhva xaan ñu, zoco ña cuu coto ñu ñaa sa cuu sa ndisa.

⁸ Tañi maa ra tazi, ra Janes ta ra Jambres, i sahñi tahan ra sihin ra Moisés. Ta tacuan tucu ñiyivi sa quehin tuhun ya, sahñi tahan ñu sihin sa ndisa. Yaha xaan ña vaha sa siñi tuñi xiñi ñu. Sa zama ñu cuhva iyo ñu, ta ña sino ca iñi ñu sii sa ndisa.

⁹ Zoco ma cucahnu ca ñu sihin cuhva ña vaha cuan vatyí vatyí xaan ta cua coto tandihi ñiyivi vatyí ñahñi sa siñi tuñi xiñi ñu. Tañi i tahan sa uu tahan ra sahñi tahan sihin ra Moisés.

Nu ndihi saha ra Pablo tyiño sii ra Timoteo

¹⁰ Zoco sito vohon cuhva i zacuehi suun ta cuhva iye. Siton ñaa sa cuñi ta cuhva sino iñi. Siton cuhva cundyee xaan iñi sihin ñiyivi ta cuhva cuñi xein sii ñu ta cuhva ña zañe Tuhun Ndyoo vazu ndyehe xein tundoho.

¹¹ Sa cuenda Tuhun Ndyoo ta ndyehe xein tundoho, ta quiñi xaan zavaha ñiyivi sihin. Siton tandihi tundoho sa i tehin ñuu Antioquía, ta ñuu Iconio ta ñuu Listra sa catyi Tuhun Ndyoo. Zoco maa ra Ndyoo i zacacu sii, sisi tandihi si cuan.

¹² Ndisa vatyí tandihi yo sa cuñi cundito cuhva cuñi ra Cristo Jesús, cua ndyehe xaan yo tundoho cua zacuu ñiyivi sii yo sa cuenda ra.

¹³ Zoco ñiyivi ña vaha ta ñiyivi zandavi ñaha, yaha xaan ca cua nduquiñi iyo ñu. Zandavi ñaha ñu, ta cua zandavi ñaha tucu ñiyivi sii ñu.

¹⁴ Zoco cundyico moo cuhva vaha sa i cutuhvon. Siton yoo sa zacuaha suun, ta sito vohon vatyí sa ndisa cuu si.

¹⁵ Ndyá luhlun ta sa siton tutu ra Ndyoo, ta yucuan cuu sa zacuaha suun. Ta saha si coo sa siñi tuñi vaha suun. Ta cua cacun vatyí sino iñun sii ra Cristo Jesús.

¹⁶ Tandíhi cuii tutu Tuhun Ndyoo cuu tuhun sa i cahan maa ra Ndyoo. Ta vaha xaan sa zacuaha yo sii si sii ñiyivi. Zañaha si sii yo tatu iyo sa ña vaha sii yo. Zaquihin si ityi vaha sii yo. Ta zañaha si cuhva cundito yo minoo cuhva vaha.

¹⁷ Tacuan iyo si sa vatyí ra sito sii ra Ndyoo ta ñahñi cua cumañi sii ra. Cua cuu zavaha ra tandíhi cuii nuu sa vaha.

4

¹ Cua quisi ra Jesucristo tañi minoo ra ndyaca ñaha, ta cua tyicuhva ra sii ñiyivi ndito ta ñiyivi i sihi. Sito maa ra cuan, ta sito maa ra Ndyoo vatyí ñihi xaan sehi tyiño suun

² vatyí nacatyun Tuhun Ndyoo tandíhi tyiemvu vazu cuñi ñiyivi tyizoho ñu a vazu ña cuñi ñu. Ñihi xaan cuhvon tyiño sii ñu tatu ña vaha ndyicuu ñu ta zayuhun sii ñu. Cuhva vohon tuhun sii ñu. Nacoo xaan tundyee iñi suun sihin ñu ta zacuaha vohon sii ñu.

³ Vatyí cua saa quivi sa ma cuñi ca ñiyivi tyizoho ñu ñaa sa catyi Tuhun Ndyoo sa ndisa. Cuaha xaan cua nduu maestro sa cua zacuaha sii ñu cuhva cuñi maa ñu tyizoho ñu.

⁴ Cua zama ñu cuhva iyo ñu. Ma tyizoho ca ñu sa ndisa. Ta cua sino iñi ñu tandíhi cuii nuu cuendu.

⁵ Zoco yoho nacoo sa siñi tuñi vaha xiñun. Cundyee iñun tundoho. Nacatyí vohon Tuhun Ndyoo cuhva cacu ñiyivi. Zatyíño vohon tyiño ra Ndyoo cuhva cuñi si.

⁶ Vatyí sa yatyi cua cui sa cuenda Tuhun Ndyoo. Sa cua saa quivi cua quite ihya ñuu ñiyivi, ta cua cuhin nu ndyaa ra Ndyoo.

⁷ I zatyíño vaha xein tyiño ra Ndyoo cuhva ndya zahacanei ta ndehi sihin tyiño cuan. Ñá zandoi cuhva sino iñi.

⁸ Ta vityí sa ndati minoo sa vaha sa cua cuhva ra Ndyoo sii, vatyí vaha xaan cuhva i sindite ihya ñuu ñiyivi. Ta vaha xaan ndyaca ñaha maa ra ndyaca ñaha sii yo. Ta maa ra cua cuhva sii si quivi cuan. Ta yivi sii sa maa ñi mi cua cuhva ra, zoco cua cuhva tucu maa ra sii tandíhi ñiyivi ndatu sii ra.

Minoo ca tuhun cahan ra Pablo sa cuenda maa ra Timoteo

⁹ Z anumun ta quisi ndyehun sii.

¹⁰ Vatyí i zandoo ra Demas sii, vatyí cuñi ca ra ñuu ñiyivi ya. Cuahan ra ndya ñuu Tesalónica. Cuahan ra Crescente ndya nu cu si Galacia. Ta ra Tito ndya nu cu si Dalmacia.

¹¹ Maa ñi maa ra Lucas i ndoo sihin ihya. Naquisi ra Marcos suhun vatyí cuu tyindyee ra sii.

¹² I zacuhin sii ra Tíquico ndya ñuu Efeso.

¹³ Quivi quisun, cundohon minoo zahma coque sa zandoi ñuu Troas vehe ra Carpo. Ta tacuan tucu libro mi, ta ñiñi ca cuu si sa ma naa iñun tuti quisi ndyacon.

¹⁴ Ra cañi caa, ra nañi Alejandro, cuaha xaan sa ña vaha i zavaha ra sihin. Zoco maa ra ndyaca ñaha sii yo cua tasi tuñi sii ra cuhva i zavaha ra sihin.

¹⁵ Zacuendon suun sihin ra vatyí sahñi tahan xaan ra sihin Tuhun Ndyoo sa zacuaha ndi.

¹⁶ Sa xihna ñi nu sehi sa ndaa nuu ra cu tyiño, yoñi numinoo ra i tyindyee sii. Tandíhi cuii ra i zandoo ra sii. Nazandasi ra Ndyoo cuatyí cuan ziqui ra cuan.

¹⁷ Zoco i tyindyee maa ra ndyaca ñaha sii yo, ra Jesús, sii. Saha ra tundyee iñi sii, ta i cuu nacatyí Tuhun Ndyoo cuhva cacu yo. Ta i siñi tandíhi ñiyivi sa yivi ñiyivi hebreo cuu. Ta ñá saha maa ra Ndyoo sa vatyí cahñi ñiyivi sii.

¹⁸ Ta cua zacacu ra sii, sii tandíhi cuii sa ña vaha. Ta cua naquihin vaha ra sii, cua cuhin sihin ra nu ndyaca ñaha ra andivi. Cahnu xaan ca cuu maa ra tandíhi cuii tyiemvu. Ta tacuan cuu si.

Nu sa cuñi ndíhi cahan ra i saha ra minoo nacumi sii ñiyivi

¹⁹ Nacumi sii ndo, yoho maha Prisca ta yoho ra Aquila. Ta tacuan tucu ñiyivi ra Onesíforo.

²⁰ I ndoo ra Erasto ñuu Corinto. Zoco i zandoi sii ra Trófimo ñuu Mileto vatyí cuhu ra.

²¹ Zañiñun ta quisun cuee ca sa nduvisi xaan. Maa ra Eubulo, ta ra Pudente, ta ra Lino, ta ña Claudia ta tandihi inga yañi yo ta cuhva yo zaquisi ñu minoo nacumi suun.

²² Ta nacundyaa maa ra ndyaca ñaha sii yo, ra Jesucristo, suhun. Ta natyindyee xaan ra sii tandihi ndo. Ndihi si vityi.

Minoo Carta I Tyaa Ra San Pablo Sii Ra Tito

Tyaa ra Pablo minoo carta sii ra Tito

¹ Yuhvi ra Pablo minoo muzu ra Ndyoo cui ta minoo apóstol ra Jesucristo cui vatyi cua tyindyeyi sii ñiyivi i casi ra Ndyoo ta cua sino iñi ñu. Cua nacoto ñu sa ndisa, ta cua sino ca iñi ñu. I casi ra Ndyoo sii ñu vatyi coto ñu cuhva zacahnu vaha ñu sii ra.

² Ta cua coto ñu yozo caa cua ñihi ñu sa cundito ñu sihin ra Ndyoo. Ña tuhva maa ra Ndyoo sa cuvatyra ra, ta sa i catyi ra cuee ca sa zavaha ra ñuu ñiyivi vatyi cua cuhva ra sa cundito ñiyivi sino iñi sii ra tandihi tyiemvu.

³ Ta vityi sa saa quivi sa saha ra Ndyoo sa nacoto yo Tuhun ra. Ta i saha ra tyiño sii, sa nacaty Tuhun ra vatyi maa ra zacacu sii yo, ta i tava ra tyiño sii.

⁴ Tyei carta ya suun Tito vatyi zehi sa ndisa cuii cuu suun vatyi ñi ñi cuhva sino iñi yo. Cuñi sa cua tyindyee ca ra Ndyoo suun. Nacuhva ra tumañi iñi suun ta sa coo sa taxi añimon. Ta tacuan tucu nacuhva ra ndyaca ñaha sii yo, ra Jesucristo. Maa ra zacacu sii yo.

Tyiño sa cua zavaha ra Tito nu cu si Creta

⁵ I zandoi suun nu cu si Creta vatyi zandundoon tyiño ra Ndyoo nu cumañi cundoo si. Tahan tahan ñuu nu iyo ra sino iñi Tuhun Ndyoo cua tyaa tyiñon sii ra cua cuu anciano tañi sa catyi suhun.

⁶ Ra sa cua cuizo tyiño cuan, cuñi si vatyi cuu ra minoo ñiyivi vaha xaan tacuhva yoñi cuu tyaa cuaty sata ra. Cuñi si vatyi coo minoo ñi ñazihra ra, ta ma cuu coo uu a uñi tahan ñaha ra. Ta zehe ra cuñi si sa sino iñi tandihi ñu tacuhva ma tyaa ñiyivi cuaty sata ñu sa zavaha ñu sa ña vaha a sa ña tyaa ñu yahvi sii zutu ñu.

⁷ Vatyi ra ndyizo tyiño cahnu sa cuenda Tuhun Ndyoo, zacuenda ra tyiño ra Ndyoo. Yucuan cuenda cuñi si vatyi cuu ra minoo ñiyivi vaha xaan, ta yoñi cuu tyaa cuaty sata ra. Ña vaha tatu zavaha ra maa ñi cuhva cuñi maa ra a tatu yatyi xaan cuxaan ra. Ta ma cuu sa cuu ra minoo ra siñi a ra nanducu tizihra a ra zandavi ñaha ta ñihi ra xuhun.

⁸ Cuñi si sa ndyehe vaha ra sii ñiyivi saa vehe ra ta cuhva ra sa casi ñu. Cuñi si vatyi cuu ra minoo ra zavaha sa vaha, cuu ra minoo ra iyo sa siñi tuñi xiñi, minoo ra ndoo xaan, ra zacahnu sii ra Ndyoo sa ndisa cuii. Ta ma cuñi ra zavaha ra ñaa ndihra sa ña vaha.

⁹ Cuñi si vatyi sino vaha iñi ra maa ñi sa ndisa, Tuhun Ndyoo, sa i cutuhva ra, vatyi sihin cuhva cuan ta cua cuu cuhva ra tundyee iñi sii ñiyivi sihin minoo tuhun vaha. Ta cua cuu zama ra sa siñi tuñi xiñi ñiyivi cahan sa ña vaha ziqui Tuhun Ndyoo.

¹⁰ Vatyi iyo cuaha xaan ñiyivi ña tyaa yahvi, ta cuaha ca ra cuu ra yañi yo, ra hebreo. Ñahñi sa ñiñi cahan ra, ta zandavi ñaha xaan ra sii ñiyivi.

¹¹ Cuñi si sa nacazi yo yuhu ra vatyi zativi ra sa siñi tuñi xiñi cuaha xaan ñiyivi. Sa catyi xuhun ta zacuaha ra sii ñiyivi tuhun sa ña tahan si zacuaha ra.

¹² Minoo ra sa siñi tuñi vaha nu cu si Creta i cahan ra sii ñiyivi ñuu ra, ta catyi ra: “Vatya xaan ra ñuu Creta. Tañi quití iyo sisi cuhu cuu ra. Yaha xaan cuaha sasi ra, ta susa xaan ra.” Tacuan catyi ra cuan.

¹³ Ta ndisa cuii sa cahan ra. Yucuan cuenda cuxoon sihin ra zavaha cuhva ña vaha cuan, nanazama ra cuhva iyo ra ta nasino vaha iñi ra.

¹⁴ Tacuan ta ma tyizoho ra cuendu sa cahan ra hebreo, ra ña sino iñi, ta tuhun cahan ñiyivi sa zama inga cuhva ta ña sino ca iñi ñu sii sa ndisa.

¹⁵ Sa cuenda ñiyivi vaha sa siñi tuñi, tandihi ta vaha si. Zoco ra ña sino iñi, ñahñi maa sa ndoo iyo sii ra vatyi ndya cuhva sica iñi ra ta ndya sa siñi tuñi xiñi ra, quiñi iyo si.

¹⁶ Catyi ra vatyi sito ra sii ra Ndyoo, zoco sihin sa ndyicuu ra ta ndyehe yo vatyi ña ndisa. Ña cundyee ca iñi maa ra Ndyoo ndyehe ra sii ra cuan. Cuaha xaan sa ña vaha

ndyicuu ra, ta numinoo cuhva vaha ña tyaa ra yahvi. Ta ña zavaha ra numinoo cuhva vaha.

2

Minoo cuhva vaha

¹ Tuhun zacuaha moo, nacuu si maa ñi maa sa vaha. (Nacasi tahan sa cohon sihin sa cahan Tuhun Ndyoo.)

² Nacatyun sihin ra sahnu vatyí nacuu ra minoo ra vaha. Nacoo ra minoo cuhva sa cuu tyaa tandíhi ñiyívi yahvi sii ra. Nanacañi vaha iñi ra tandíhi saha. Nasino vaha xaan iñi ra Tuhun Ndyoo. Nacuñi ra sii ñiyívi sa ndisa cuii, ta nacundyee xaan iñi ra tatu ndyehe ra tundoho sa cuenda Tuhun Ndyoo.

³ Ta tacuan tucu ñu sahnu. Catyun sihin ñu vatyí nacuu ñu ñiyívi vaha xaan tañi tahan si coo ñiyívi sito sii ra Ndyoo. Ta yoñi maa sii ziqui cahan ñu. Ma coho xaan ñu ndixi. Nazañaha ñu minoo cuhva vaha

⁴ sii ñu naca tindaha vatyí tacuan ta cua cuñi ñu sii yí ñu ta sii zehe ñu.

⁵ Nazañaha ñu sii ñu vatyí coo sa siñi tuñi vaha xiñi ñu, ta minoo ñi cuhva vaha cua cuñi ñu sii yí ñu. Ta nazacuenda vaha xaan ñu vehe ñu ta cuu ñu ñiyívi vaha ta tyaa ñu yahvi sii maa yí ñu. Vatyí tatu zavaha ñu tandíhi cuhva ya, yoñi cua cahan ndya vaha ñi sii Tuhun Ndyoo.

⁶ Zañiñi tucun sii ra yoco nacoo vaha sa siñi tuñi xiñi ra.

⁷ Ta zuun ñi moo, zañohon maa ñi sa vaha sii ra sihin cuhva iyon. Zacuohon maa ñi sa ndisa cuii. Cuñi si sa cuun minoo ñiyívi vaha.

⁸ Maa ñi tuhun vaha cohon, ta yoñi cua cuu tyaa cuatyí saton cuhva cohon. Ta cua cucahan nuu ra sica iñi inga cuhva vatyí ma ñihi ra cuhva cahan ra ndya vaha ñi sii yo.

⁹ Cuhvon tyiño sii ra yañi yo, ra cuu muzu ñiyívi, vatyí natyaa ra yahvi sii patrón ra. Nazavaha ra tandíhi sa catyí patrón ra, ta ma nacahan ra sa cahan patrón ra.

¹⁰ Ma zuhu ra sa sii patrón ra. Tandíhi cuii cuhva nazavaha ra sa vaha. Ta cua coto patrón ra vatyí sino iñi ra Tuhun Ndyoo sa ndisa, ta cua coto ñu vatyí vaha xaan cuu Tuhun Ndyoo, tuhun sii ra zacacu sii yo.

¹¹ Vatyí sa zañaha ra Ndyoo vatyí saha xaan ra tumañi iñi sii tandíhi cuii ñiyívi ta cuñi ra zacacu ra sii yo.

¹² Ta cuhva iyo ra Ndyoo, zañaha si sii yo vatyí nazaña yo cuhva ña vaha sa zavaha ñiyívi ña sito sii ra ta sa ña vaha sa cuñi coño ñuhu yo ihya ñuu ñiyívi ya. Natyaa yo yahvi sii ra Ndyoo. Nazavaha yo tandíhi sa vaha ta sa catyí sa siñi tuñi vaha sii yo. Ta nazacahnu yo sii maa ra Ndyoo sa ndisa cuii ñi ñi sa ndito yo ñuu ñiyívi ya.

¹³ Vatyí ndatu maa yo minoo quívi vaha xaan, quívi cua quisi tucu ra Jesucristo. Maa ra cuu Ndyoo yo ta ra zacacu sii yo. Cua quisi ra sihin cuaha xaan tundyee iñi sii ra ta ndisi xaan ra.

¹⁴ Saha maa ra sii ra sa cuu ra sa cuenda cuatyí maa yo vatyí cua zacacu ra sii yo sii ityí ña vaha, ta cua zandasi ra tandíhi cuii cuatyí yo. Cuñi ra vatyí sii maa ra cua cuu sii yo ta cua cuñi xaan yo zavaha yo sa vaha.

¹⁵ Tandíhi cuii cuhva ya nacatyun sihin ñiyívi. Zañiñun sii ñu nazavaha ñu sa vaha. Catyí casun sihin ñu ñaa sa cuu cuatyí ñu tatu ma tyaa ñu yahvi vatyí tacuan i saha ra Ndyoo tyiño suun. Ma cuhvon sa cahan ñiyívi ndya vaha ñi suun vatyí zavohon sa vaha.

3

Cuhva cuñi si zavaha yo tatu sino iñi yo Tuhun Ndyoo

¹ Zanacohon iñi ñiyívi vatyí natyaa ñu yahvi sii ra ndyaca ñaha ta sii ra ndyizo tyiño ñuu ñiyívi ya. Nazavaha ñu sa catyí ra cuan, ñaa ndíhi ca tyiño vaha.

² Ta ma cahan ñu ndya vaha ñi sii numinoo ñiyívi. Ta ma nanducu ñu tizíhi. Nazañaha ñu vatyí vaha aña ñu sihin cuhva iyo ñu sihin inga ñiyívi. Vii ñi cuñi si coo ñu sihin tandíhi inga ñiyívi.

³ Vatyí ndya maa yo ta i cuu yo ñiyívi tondo xiñi. Ñiyívi sa ñá tyaa yahvi sii ra Ndyoo i cuu yo. I zandavi ñaha cuihna sii yo, ta i tyaa xaan yo yahvi sii sa cuñi coño ñuhu yo ta zavaha yo sa catyi si. Cuaha xaan sa ña vaha i zavaha maa yo, ta ndyiyo xaan iñi yo ndaha tyiño inga ñiyívi. Ña cuu ndyehe ñiyívi sii yo, ta ña cuu ndyehe yo sii ñu.

⁴ Zoco i zañaha maa ra Ndyoo cuhva cuñi xaan ra sii ñiyívi ta cuhva vaha xaan iyo ra. Maa ra i zacacu sii yo.

⁵ I zacacu ra sii yo, zoco yívi sa cuenda sa vatyí vaha xaan i zavaha yo. I zacacu ra sii yo vatyí cundahvi iñi ra sii yo. I zandasi ra cuatyí yo, ta i nacacu saa yo. Ta i saha ra Tatyí li ra. Tacuan cuu cuhva ñihi yo sa cacu añaima yo, ta ndito yo minoo cuhva saa ihya ñuu ñiyívi ya.

⁶ Vaha xaan saha maa ra Ndyoo Tatyí li ra sii yo sa cuenda ra Jesucristo, ra zacacu sii yo.

⁷ Ta sihin tumañi iñi sa saha maa ra Ndyoo sii yo, ta catyi ra vatyí ñahñi ca cuatyí yo, ta ñihi yo cuhva cundito yo tandíhi tyiemvu, cuhva sa ndatu xaan yo.

⁸ Tandíhi tuhun ya, ndisa xaan si. Cahan tañi minoo ra sito vaha, ta nacatyun tandíhi tuhun ya sihin ñiyívi. Tacuan zavohon ta ziqui ñiyívi sa sino iñi sii ra Ndyoo cua nacañi iñi ñu minoo cuhva vaha, ta cua zavaha ñu tandíhi sa vaha. Vaha xaan cuu tuhun ya, ta cua tyindyee xaan si sii tandíhi ñiyívi tatu zavaha ñu sii si.

⁹ Zoco ma tyizohon nu natuhun xaan ñiyívi tuhun ña ñiñi xaan tañi yoo sa cuu ñiyívi sahanu sii yo a ñaa ndíhi sa catyi ley ra Moisés a ñaa inga tuhun natuhun xaan ñiyívi ta sahanu tahan ñu sa cuenda si. Ta yívi sa ñiñi cuu si. Ta ma cuu tyindyee si sii yo.

¹⁰ Tatu iyo minoo ra ta natuhun xaan ra ta zacahñi tahan ra sii ra yañi yo. Cana sii ra ta cahan vohon sihin ra minoo saha ta inga tucu saha. Ta tatu ña cuñi ra tyizoho, ma tyisaha con sii ra.

¹¹ Siton vatyí ña vaha añaima ra tatu tacuan zavaha ra. Ta sihin cuhva zavaha ra ta zuun ñi maa ra cua cuu ña vaha iñi vatyí ña vaha zavaha ra.

Minoo ca tuhun cahan ra Pablo sihin ra Tito sa cuenda ñi maa ra Tito

¹² Quiví cua tasi sii ra Artemas a sii ra Tíquico nu ndyoon, zanumun ta cuhun ndya ñuu Nicópolis cua ñihi tahan yo vatyí sa cundaa iñi sa cuhin yucuan tyiemvu sa cua nduvisi ihya.

¹³ Tyindyeeun sihin tandíhi cuhva sa cuu suun sii ra Zenas, ra cuu yuhu ñiyívi tañi minoo abogado, ta sii ra Apolos. Tacuan ta cua cuu cuhun ra ityi nuu, ta ñahñi cua cumañi sii ra.

¹⁴ Zacuohon sii ñiyívi sino iñi Tuhun Ndyoo vatyí nazavaha ñu sa vaha sihin tandíhi ñiyívi tandíhi saha. Nacuhva ñu sa siñi ñuhu sii ñiyívi tatu cumañi si sii ñu sa ndisa. Ña vaha sa cuyucu ñi maa ñiyívi sa sino iñi ta ma zatyíño ñu a ma tyindyee ñu sii inga ñiyívi.

Nu ndíhi cahan ra Pablo

¹⁵ Tandíhi ñiyívi sa ndyaa sihin ihya tasi ñu minoo nacumi sii moo Tito. Tacuan tucu tasi ndi minoo nacumi sii tandíhi ñiyívi cuñi sii ndi sa cuenda Tuhun Ndyoo. Ta maa ra Ndyoo cua tyindyee sii tandíhi ndo. Ndíhi si vityi.

Filemón

Tyaa ra Pablo minoo carta sii ra Filemón

¹ Yuhvi ra Pablo ñohi vehe caa sa cuenda ra Jesucristo. Sihin ra Timoteo yañi yo tyaa ndi carta ya suun yoho Filemón. Cuñi xaan ndi suun vatyí ñin ñi zatyíño yo sa cuenda Tuhun Ndyoo.

² Ta tyaa tucu ndi carta ya sii ña Apia, hermana yo, ta sii ra Arquipo vatyí zatyíño xaan tucu maa ra tyíño ra Ndyoo, ta tyaa tucu ndi sii tandíhi inga hermano, ra titahan vehe moo.

³ Cuñi xaan ndi sa cua kuhva xaan ra Ndyoo tandíhi cuii sa vaha sii ndo ta sa coo sa taxi ñi sii ndo sihin ra, kuhva saha ra Ndyoo Zutu yo ta ra Jesucristo sii yo. Ra Jesucristo cuu ra ndyaca ñaha sii yo.

Cuhva cuñi xaan ra Filemón sii tandíhi ñiyívi ta kuhva sino xaan íñi ra sii ra Jesús

⁴ Saha xein tyahvi ndyoo sii ra Ndyoo kuhva quehin sihin ra cuendon,

⁵ vatyí i catyí ñiyívi sihin, kuhva sino xaan íñun sii ra Jesucristo ta kuhva cuñi xoon sii tandíhi ñiyívi sa sino íñi sii ra Ndyoo.

⁶ Ta sique sii ra Ndyoo sa cuenda ñiyívi sa sino íñi sa cuenda kuhva sino íñi moo. Sique sii ra vatyí nacutuñi ca íñi ñu tandíhi cuii sa vaha xaan sa iyo sii yo sa cuenda maa ra Jesucristo.

⁷ Ta zii xaan cuñi ta tyindyee xaan si sii, yoho hermano, vatyí site kuhva cuñi xoon sii ñiyívi vatyí sa cuenda moo hermano ta ñihi tandíhi inga hermano cuaha xaan tundyee íñi.

Sica ra Pablo minoo tumañi íñi sii ra Filemón sa cuenda ra Onésimo

⁸ Yucuan cuenda vazu iyo xaan kuhva sii, sa saha ra Cristo sii, ta cuu catyí suhun ñaa sa cua zavohon,

⁹ zoco vaha cuñi sa caque tumañi íñi suun vatyí cuñi suun, ta cuñi tucu yoho sii. Ta tañi sa sito moo, yuhvi ra Pablo cui minoo ra sahnú, ta vityí ñohi vehe caa sa cuenda maa ra Jesucristo.

¹⁰ Sica xein tumañi íñi suun sa cuenda ra Onésimo. I nduu ra tañi zehi sa cuenda Tuhun Ndyoo ñii ñi sa ñohi vehe caa ya.

¹¹ Ta quívi cuan, ñahñi maa i tyindyee ra suun, zoco vityí tyindyee xaan ra sii, ta cua tyindyee tucu ra suun.

¹² Cua natasi sii ra nu ndyoon. Natíin cuendon sii ra minoo kuhva vaha xaan vatyí cuñi xein sii ra.

¹³ Cuñi sa vatyí ndoo ra ihya sihin vatyí tyindyee ra sii sa cuenda moo ñii ñi sa ñohi vehe caa sa cuenda Tuhun Ndyoo.

¹⁴ Zoco ña cuñi zavehi sa tacuan tatu ma catyí moo vatyí ña cuñi zañiñi suun ta cua zavohon minoo tumañi íñi sii. Sica íñi sa cua zavohon sii si vatyí ñiyívi vaha cuun ta yívi sa vatyí zañiñi suun.

¹⁵ Vaziquí i zandoo ra Onésimo suun zuhva quívi ta vityí cua cuu natíin cuendon sii ra tandíhi cuii tyiemvu.

¹⁶ Ta ña maa ñi muzun cuu sii ra vityí, zoco minoo kuhva vaha ca vatyí cuu tucu ra minoo hermano, ra sa cuñi xaan yo. Cuñi xein sii ra, ta cuñi si sa cuñi xaan ca moo sii ra ñihi ca. Ta yívi tañi ñiyívi ndya vaha ñi, zoco cuñun sii ra tañi minoo hermano yo sa cuenda ra ndyaca ñaha sii yo.

¹⁷ Yucuan cuenda tatu cuñun sii mi tañi sa ra tohon, tíin cuendon sii ra tañi sa yuhvi cuu ra.

¹⁸ Ta tatu iyo sa ña vaha i zavaha ra suhun a tatu tavi ra suun, tyoon sii si sa cuenda mi.

¹⁹ Yuhvi ra Pablo tyei zuun ñi sihin letra mi ihya vatyí yuhvi cua tyiyahvi. Ta cuu catyí suhun vatyí yoho tavun sii, sa cuenda kuhva cacu añimon, zoco ma catyí.

²⁰ Tacuan cuu si hermano, ta cuñi vatyí zavohon minoo tumañi iñi sii, sa cuenda ra ndyaca ñaha sii yo. Zanduziun añime sa cuenda ra.

²¹ Ta tyei carta ya suun vatyí ñi xaan iñi suun vatyí cua tyoon yahvi sa quehin. Ta sa site vatyí cua zavohon cuaha ca.

²² Ta zanduvaha tucun minoo nu cua cundyeyi vatyí sica iñi vatyí cua cuhva maa ra Ndyoo sa sica ndo sii ra ta cua cuu quisi ndyehi sii ndo.

Tasi inga ra hermano minoo nacumi sii ra Filemón, ta ziqui ndihi cahan ra Pablo

²³ Iyo minoo ra ñoho vehe caa ñi ñi sihin mi sa cuenda ra Cristo Jesús. Epafra nañi ra, ta tasi ra minoo nacumi suun.

²⁴ Ta inga ra tyindyee sii, sa cuenda tyiño maa ra Ndyoo, Marcos nañi ra, ta ra Aristarco, ra Demas, ta ra Lucas. Tasi tucu tandihi ra minoo nacumi suun.

²⁵ Cuñi xein sa cua cuhva xaan ra Jesucristo sa vaha sii ndo. Maa ra ndyaca ñaha sii yo. Ta nacuu si tacuan.

Minoo Carta I Tyaa Ra San Pablo Sii Ñiyivi Hebreo Sa Sino Iñi Tuhun Ndyoo

I cahan ra Cristo zehe ra Ndyoo sihin yo sa cuenda zutu ra

¹ Ta sa naha i cahan ra Ndyoo cuaha xaan saha ta cuaha xaan cuhva sihin ñiyivi sa cuu profeta, ta i nacaty i ra cuan sihin ñiyivi sahnu sii yo tandihi sa i catyi ra Ndyoo.

² Zoco vityi nu sa cuñi ndihi tyiemvu i tasi ra Ndyoo sii Zehe ra, ta i cahan ra sihin yo sa cuenda ra Ndyoo Zutu ra. Ta i saha cuenda ra Ndyoo tandihi cuii sa iyo sii ra sii Zehe ra. Ta sihin Zehe ra i zavaha ra Ndyoo ñuu ñiyivi.

³ Ta ndisi xaan Zehe ra Ndyoo sihin sa ndisi sa iyo sii Zutu ra. Ta tandihi cuii sa zavaha Zehe ra Ndyoo, zañaha si vaty i Ndyoo cuu ra. Ndyaca ñaha ra tandihi cuii sa iyo sihin tuhun cahan ra. Maa ra cuu ra i sihi vaty i cua zandasi ra cuaty i yo, ta i zanaa ra sii si. Ta ziqui i nandoto ra, ta i sicundyaa ra siyo cuaha ra Ndyoo Zutu ra, ra ndyaca ñaha andivi. Ta ndyaca ñaha ra sihin ra.

Cahnu ca Zehe ra Ndyoo ta ziqui ángel

⁴ Cahnu xaan ca i nduu Zehe ra Ndyoo ta ziqui ángel, ta sito yo vaty i cahnu ca ra vaty i Zehe Ndyoo cuu sii ra. I saha ra Ndyoo zivi cuan sii ra, ta ñiñi ca si ta ziqui zivi ángel.

⁵ Numinoo saha ta ñá catyi ra Ndyoo sihin numinoo ángel:

Yoho cuu Zehi,

Vityi zañehi vaty i Zehi cuu suun.

Zoco i catyi ra Ndyoo sa cuenda ra Jesús:

Yuhvi cua cuu zutu ra,

Ta maa ra cua cuu zehi.

⁶ Ta quivi i cacu Zehe ra, ra cahnu ca, ñuu ñiyivi ya, i catyi ra Ndyoo: Nazacahnu tandihi cuii ángel Ndyoo sii ra.

⁷ Catyi ra Ndyoo sa cuenda ángel vaty i:

Tañi taty i cuu ra, ta tañi ñúhu cuu ra.

⁸ Zoco sa cuenda Zehe ra catyi ra Ndyoo:

Ndyoo cuun, ta cua cundyaca ñohon tandihi cuii tyiemvu.

Ndoo xaan cua cundyaca ñohon.

⁹ Cuñi xoon sa zavaha ñiyivi sa ndoo, ta cuxaan xoon sihin sa ña vaha.

Yucuan cuenda saha ra Ndyoo sa zii xaan ca cuñun ta ziqui tandihi inga ñiyivi.

¹⁰ Ta inga saha i catyi tucu ra Ndyoo sihin ra:

Ra ndyaca ñaha cuun, ta nu i quisaha si i zavohon ñuu ñiyivi,

Ta i zavohon andivi sihin ndohon.

¹¹ Cunaa si cuan, zoco cua ndoo moo.

Cua ndusahnu ñuu ñiyivi ta andivi tañi ndusahnu minoo zahma.

¹² Ta cua natuun sii si tañi minoo zahma ñi cuu si, ta cua nazama si tañi nazama ñiyivi sii zahma ñu.

Zoco yoho ma zamon, ta ma cuu moo ndaha ñi.

¹³ Zoco numinoo saha ñá catyi ra Ndyoo sihin minoo ángel:

Cundyoon siyo cuehi ndya cua zahacanei sii tandihi ra xaan iñi suun ta ziqui cua cuhve sa cundyaca ñohon sii tandihi ra.

¹⁴ Ña tacuan catyi ra Ndyoo sihin ángel vaty i muzu ñi cuu ra cuan. Tasi ra Ndyoo sii ra sa cua tyindyee ra ta zacuenda ra sii ñiyivi cua zacacu ra Ndyoo.

2

Cahnu xaan cuu cuhva zavaha ra Ndyoo sa cua zacacu ra sii ñiyivi

¹ Yucuan cuenda cuñi si sa sino xaan iñi yo sii sa ndisa sa siñi yo, coto zandoo yo sii si.

² I sityiño ra Ndyoo ángel, ta i nacatyí ra ley ra Ndyoo sihin ra Moisés. Sihin ley cuan i sindyaca ñaha maa ra Ndyoo quivi cuan, ta ñu ñá tyaa yahvi i ndoho ñu tandíhi saha tañi tahan si.

³ Ta maa tucu yo, ma cuu cacu yo tatu ma tyaa yo yahvi cuhva i cahan ra Jesucristo ra ndyaca ñaha sii yo, cuhva cua zacacu ra sii yo. Cahnu xaan cuu cuhva i zavaha ra. Ta ra i siñi sa cahan ra Jesús i nacatyí ra sihin yo cuhva i catyí ra.

⁴ Ta i zañaha casi ra Ndyoo vatyí sa ndisa cuu tuhun cuan vatyí i zavaha ra zeña ta cuaha nuu sa ndyityí, ta i saha ra cuaha cuhva sa cuu zavaha ñiyivi sihin cuhva sa saha Tatyí li ra, cuhva cuñi maa ra Ndyoo.

Ra Jesús cuu ra cua cuhva sa cacu ñiyivi

⁵ Ña saha ra Ndyoo sa cua cundyaca ñaha ángel sii ñuu ñiyivi sa cua coo ityí nuu ca, ñuu ñiyivi sa cahan maa yo tuhun.

⁶ Zoco iyo nu catyí Tuhun Ndyoo tyehen cuhva cahan minoo ra profeta sihin ra Ndyoo sa cuenda ra Cristo:

¿Ñaa ra cuu minoo rayi ta nacohon xaan iñun sii ra,

Ta ñaa cuenda zacahnu xoon sii ra cu zehe ñiyivi?

⁷ Zuhva ni quivi, quivi ndyaa ra ñuu ñiyivi cua zanduluhlu xoon sii ra ta ziqui ángel,

Ta cuee ca cua zanducahnu xoon sii ra,

Cua cuhva xoon cuhva sii ra, ta tyaa xoon yahvi sii ra;

⁸ Ta sohon sa cundyaca ñaha ra tandíhi cuii sa iyo.

Quivi i saha ra Ndyoo sa cundyaca ñaha ra sii tandíhi, ñahñi sa cua cumañi sa ma cuu cundyaca ñaha ra. Zoco tañaha ca cua ndyehe yo sa cundyaca ñaha ra sii tandíhi cuii.

⁹ Zoco ndyehe yo sii ra Jesús, ra i quisi ndya gloria. Luhlu ca i nduu ra ta ziqui ángel zuhva ñi quivi. Ta vityí zacahnu xaan ra Ndyoo sii ra ta saha xaan ra cuhva sii ra vatyí i sihi ra sa cuenda maa yo. Vaha xaan cuu maa ra Ndyoo, ta yucuan cuenda i sihi ra Jesús sa cuenda tandíhi ñiyivi ñuu ñiyivi.

¹⁰ Maa ra Ndyoo i zavaha tandíhi, ta sa cuenda maa ra i sino si. Vaha cuu si sa saha ra sa ndyehe ra Jesús tundoho vatyí cuhva cuan cua cuu ra Jesús sa cuenda tandíhi ñiyivi ñuu ñiyivi. Sihin cuhva i zavaha ra Jesús ta i zacacu ra sii cuaha xaan ñiyivi, ta cuu nduu ñu ñiyivi ra Ndyoo ta cuhun ñu gloria. Ta sihin tundoho sa i ndyehe ra Jesús ta i nduu ra cua cuhva sa cua cacu ñiyivi. Cuhva cuan i zavaha ra tandíhi sa cuñi maa ra Ndyoo.

¹¹ Ñiyivi sa sa nduvaha sihin ra Ndyoo ta ra i zanduvaha sii ñu, iñ ñi Zutu ñu. Yucuan cuenda ña cahan nuu ra zanduvaha sii ñu sa catyí ra vatyí tahan ra cuu sii ñu.

¹² Tyehen catyí ra:

Ndyoo Zuti, cua quehin tuhun nuu yañi,

Cua zacahni suun nu yucu ñiyivi sino iñi suun.

¹³ Ta inga saha i catyí ra:

Niñi xaan cua cuu iñi sii Zuti.

Ta inga tucu saha i catyí ra:

Ica vii ya sihin zehi, ñiyivi i saha ra Ndyoo sii.

¹⁴ Zehe ra Cristo, coño ñuhu ta niñi cuu ñu. Yucuan cuenda i nduu tucu ra Jesús minoo ñiyivi sa iyo coño ñuhu ta niñi. Vatyí tatu cua nduu ra minoo ñiyivi cua cuu cuu ra, ta sihin cuhva cuan zanaa ra cuhva iyo sii cuihna. Vatyí maa ra cuihna cuu ra i quisaha sihin tuhun sa sihi ñiyivi.

¹⁵ Zoco sihin cuhva sa sihi ra Jesús ta i zanaa ra cuhva sa sahñi cuii cuihna sii ñiyivi, ta zacacu ra Jesús sii ñiyivi sihin tuhun sa yuhu xaan ñu coto cuu ñu. Tañi sa nuhñi ñiyivi tandíhi quivi i cuu si vatyí i yuhu xaan ñu sa cuu ñu.

¹⁶ Ndisa cuii vatyí ñá quisi tyindyee ra Jesús sii ángel. Zoco quisi tyindyee ra sii tandíhi zehe ra Abraham.

¹⁷ Yucuan cuenda i nduu ra ñiyivi sa ndisa tañi tandíhi maa yo, ra cu yañi ra. Ta sa cuenda cuan cundahvi xaan iñi ra sii yo. Zavaha ra tandíhi sa catyí ra Ndyoo, ta cuu ra zutu ya cahnu sa cuenda yo ityí nuu ra Ndyoo. Ta i tyiyahvi ra sa cuenda cuatyí ñiyivi.

¹⁸ Maa ra i ndyehe xaan tundoho cuhva i nducu coto ihñi cuihna sii ra, zoco ñahñi sa ña vaha i zavaha ra. Ta yucuan cuenda cuu xaan tyindyee ra sii ñiyivi quivi nducu coto ihñi cuihna sii ñu.

3

Ra Jesús, cahnu ca ra ta ziqui ra Moisés

¹ Yucuan cuenda, ndoho hermanos, i casi ra Ndyoo sii ndo vatyí cua zanduvaha ra sii ndo. I casi ra sii ndo vatyí cahun ndo gloria. Vityí cuñi sa cua nacañi iñi ndo sa cuenda ra Jesús. Maa ra cuu ra i tasi ra Ndyoo sihin tyiño ra. Ta ra cu zutu ya cahnu cuu ra sa cuenda maa yo, ta sino xaan iñi yo sii ra.

² I tava ra Ndyoo tyiño sii ra Jesús sa cuu ra zutu ya cahnu sa cuenda yo, ta i zavaha ra tandihi sa cuñi maa ra Ndyoo. Tañi ra Moisés i zavaha ra tandihi sa cuñi ra Ndyoo nu i siyucu ñiyivi hebreo quivi cuan. Ta ñiyivi hebreo i cuu ñiyivi sii maa ra Ndyoo.

³ Ta cahnu ca ra cuu ra Jesús ta ziqui ra Moisés vatyí ñiñi ca cuu ra zandaa minoo vehe ta ziqui maa si.

⁴ Tahan tahan vehe sa iyo, iyo ra zandaa sii si, zoco ra i zavaha tandihi cuu maa ra Ndyoo.

⁵ Vaha xaan sa i zavaha ra Moisés sihin ñiyivi ra Ndyoo quivi cuan, zoco minoo muzu ra Ndyoo ñi i cuu maa ra ta minoo ra saha sa ndaa ñi i cuu ra. I nacatyí ra sihin ñiyivi tandihi sa i catyí ra Ndyoo sihin ra.

⁶ Zoco ra Cristo cuu ra zehe ra Ndyoo, ta i zavaha ra tandihi sa i catyí ra Ndyoo. Ndyaca ñaha ra sii tandihi ñiyivi sa sino iñi sii ra Ndyoo. Ta maa yo cuu vehe ra Ndyoo tatu ma yuhu yo cahan yo tuhun ra ndya cuhva ndya cua quisi tucu ra Jesús. Ta tatu zii xaan cuñi yo ñi ñi sa ndatu yo sii ra.

Cua quitatu ñiyivi sa sino ndisa cuii iñi sii ra Ndyoo

⁷ Yucuan cuenda catyí Tatyí li ra Ndyoo:

Vityí tatu siñi ndo sa cahan ra Ndyoo,

⁸ Ma zandundava xaan ndo iñi ndo,

Tañi i zavaha ñiyivi hebreo quivi i nducu coto ihñi ñu sii ta i zacuxaan xaan ñu sii nu i sica noo ñu minoo nu ityí xaan.

⁹ Yucuan i nducu coto ihñi xaan ñu sii vazú i ndyehe ñu cuhva i zavehi uu xico cuiya.

¹⁰ Yucuan cuenda i cuxein sihin ñiyivi cuan,

Ta i catyí: “Tandihi saha zandoo ñu ityí vaha ta sica noo ñu minoo ityí ña vaha, ta zandavi ñaha si sii ñu,

Ta ña cuñi ñu coto ñu cuhva cuñi sa cua zavaha ñu.”

¹¹ Ta i cuxaan xein, ta i catyí: “Sa ndisa cuii vatyí ma cuhva mi sa cua saa ñu nu i zanduvehi nu cua quitatu ñu.”

¹² Tacuan i catyí ra Ndyoo. Yucuan cuenda coto vaha ndo sii ndo hermano coto ñaha ma sino ndisa cuii iñi ndo sa cahan ra Ndyoo, ta cua zaña ndo sii ra Ndyoo ndito ta cahun ndo inga ityí.

¹³ Cuhva ndo tundyee iñi sii minoo ndo ta sii inga ndo tandihi quivi ñi ñi sa cuu ca, ta cuhva cuan, yoñi ndo cua zandavi ñaha cuatyí sii. Vatyí tatu zandavi ñaha cuatyí sii ndo cua zanduñihi ndo iñi ndo ta ma tyaa ca ndo yahvi sii ra Ndyoo.

¹⁴ Tatu ñi xaan cuu iñi yo sii ra Ndyoo ndya cuhva ndya cua ndihi ñuu ñiyivi, ñi ñi ñi cuu ñihi yo sa vaha sihin ra Cristo.

¹⁵ Ta ma naa iñi ndo vatyí vityí cuu nu catyí ra Ndyoo:

Vityí tatu cuiñi ndo sa cahan ra Ndyoo,

Ma zanduñihi ndo iñi ndo tañi i zavaha ñiyivi hebreo quivi i zacuxaan ñu sii.

Catyí ra Ndyoo.

¹⁶ ¿Ta yoo cuu ñiyivi i siñi sa cahan ra Ndyoo ta i zacuxaan ñu sii ra? Ñiyivi cuan cuu ñu cuahan sihin ra Moisés. Ta cuahan ra ityí nuu, ta i tava ra sii ñu ñuu Egipto quivi cuan.

¹⁷ ¿Ta yoo sihin i cuxaan ra Ndyoo uu xico cuiya? Zuun ñi sihin ñiyivi cuan i cuxaan ra vaty i zavaha ñu cuaty, ta yucuan cuenda i sihi ñu sisi cuhu ityi cuahan ñu.

¹⁸ ¿Ta yoo sii saha ra Ndyoo tuhun ra vaty ma cuhva ra sa cua saa ñu nu cua quitatu ñu? I saha ra tuhun cuan sii ñiyivi ñá tyaa yahvi sii ra.

¹⁹ Ta cuhva cuan ndyehe yo vaty ñá cuu quihvi ñu vaty ñá sino ca iñi ñu sa catyi ra Ndyoo.

4

¹ Vityi iyo ca tuhun i saha ra Ndyoo sa cuenda sa quihvi ñiyivi ra nu cua quitatu ñu. Yucuan cuenda cuñi si sa cuyuhu yo coto coo zuhva maa ndo sa cua catyi ra Ndyoo vaty ma cuu quihvi ndo.

² Ndisa vaty sa ñihi maa yo Tuhun Vaha ra Ndyoo tañi i ñihi ñiyivi sahnu hebreo sii si. (Tuhun cuan cuu nu i catyi ra Ndyoo vaty cua cuhva ra minoo nu cua quitatu yo), zoco ñá tyindyee si sii maa ñu vaty ñá sino ndisa cuii iñi sii si.

³ Ta maa ñi maa yo sa sino iñi, cuu quihvi yo nu cua quitatu yo tañi sa catyi maa ra Ndyoo:

Sa cuxein ta sehi tuhin vaty ñiyivi ña sino iñi sii,

Ma cuu quihvi ñu nu cua quitatu ñu.

Caty ra Ndyoo. Tacuan i catyi ra vazu sa ndyaa listo si ndya quivi i ndihi zavaha ra ñuu ñiyivi.

⁴ Vaty iyo nu i catyi ra tyehen sa cuenda quivi cu usa cuan: “I quitatu ra Ndyoo quivi cu usa cuan, ta ñá zatyño ca ra quivi cuan.”

⁵ Ta iyo tucu nu catyi si tyehen: “Ndaha cuii ñi ma cuu quihvi ñu nu cua quitatu ñu sihin.” Catyi ra Ndyoo.

⁶ Iyo ca ñiyivi cua quihvi vaty ñiyivi i ñihi tuhun cuan sa xihna ñi, ñá cuu quihvi ñu vaty ñá tyaa ñu yahvi sii ra Ndyoo.

⁷ Yucuan cuenda i saha tucu ra Ndyoo inga saha sa cua cuu quihvi ñiyivi. I cahan ra Ndyoo sihin ra David, ta i nacaty ra David tyehen, cuhva i catyi tucu ra Ndyoo inga saha zuun ñi cuhva tañi i catyi ra sihin ñiyivi hebreo ta sa naha:

Vityi tatu cuiñi ndo sa quehin,

Ma zañihi ndo iñi ndo.

⁸ Tatu sa i sindyaca ra Josué sii ñiyivi nu cua quitatu ñu sa ndisa cuii, ma cahan ca ra Ndyoo inga saha sa cuenda inga quivi nu cua cuu quihvi ñiyivi nu cua quitatu ñu.

⁹ Zoco i cahan ra cuhva cuan vaty cumañi ca quihvi ñiyivi ra Ndyoo nu cua quitatu ñu sa ndisa cuii.

¹⁰ Tatu sa quihvi minoo ra nu saha ra Ndyoo nu cua quitatu ra, sa zandoo ra cuan tyiño ra ta quitatu ra tañi i quitatu ra Ndyoo quivi sa ndihi zavaha ra ñuu ñiyivi.

¹¹ Yucuan cuenda nanducu xaan yo cuhva quihvi yo nu cua quitatu yo yucuan; natyaa yo yahvi sii ra Ndyoo coto cuu yo tañi i cuu ñiyivi hebreo ta sa naha ta ma cuiñi yo saa yo.

¹² Vaty tandihi cuii tuhun cahan ra Ndyoo, ndito si, ta iyo xaan cuhva sihin si. Ñihi xaan si tañi minoo espada ta cuiñi si saa si ndya aña yo ta ndya sa siñi tuñi sii yo. Ta zañaha casi Tuhun Ndyoo sii yo ñaa sa sica iñi yo sihin aña yo tatu vaha si a ña vaha si.

¹³ Ñahñi maa sa cuu cuxehe nuu maa ra Ndyoo. Sito maa ra tandihi cuii sa zavaha tandihi ñiyivi nacañu ñuu ñiyivi. Ta cua nacuhva cuenda yo sii ra tandihi cuii sa zavaha yo.

Ra Jesús cuu ra cu zutu ya cahnú

¹⁴ Ra Jesús, zehe ra Ndyoo cuu sii ra, ta maa ra cuu zutu ya cahnú sa cuenda yo ityi nuu ra Ndyoo ndya gloria. Yucuan cuenda natiin cuenda vaha yo cuhva sa sino xaan iñi yo sii ra.

¹⁵ Vatyí ra cu zutu ya cahnu sa cuenda maa yo, cutuñi iñi ra ñaa cuenda cuñi yo zavaha yo cuatyí vatyí i nducu coto ihñi cuihna sii ra tandihi cuii cuhva tañi nducu coto ihñi ra sii maa yo, zoco ñá zavaha ra Jesús numinoo cuatyí.

¹⁶ Yucuan cuenda ña vaha sa yuhu yo. Nacaca xaan yo sii ra Ndyoo vatyí tyindyee ra sii yo. Ta cua tyindyee ra sii yo vatyí cua cundahvi iñi ra sii yo, ta cua zaha ra tumañi iñi sii yo ta tyindyee ra sii yo tatu iyo sa siñi ñuhu sii yo.

5

¹ Tandihí ra cu zutu ya cahnu sa cuenda ñiyivi hebreo, ñiyivi cuu maa ra. I casi ra Ndyoo sii ra vatyí cua cahan ra sa cuenda tandihí ñiyivi ityi nuu ra Ndyoo. Sahñi ra quití ta saha tucu ra inga sa saha maa ñiyivi sa cuenda cuatyí ñu.

² Iyo saha i zavaha tucu maa ra sa ña vaha. Yucuan cuenda cutuñi iñi maa ra cuhva iyo ñiyivi, ta vii xaan i sicoo ra sihin ñiyivi tondo ta sihin ñu i zaña ityi vaha tatu i ndu-uu iñi ñu cuatyí ñu.

³ Ta sa cuenda cuatyí ñiyivi ta cuatyí tucu maa ra, ñiñi xaan cuñi si sa cua cahñi ra quití.

⁴ Zoco yivi maa ra i catyi vatyí cua quihin ra tyiño sa cuu ra ra cu zutu. Maa ra Ndyoo i casi sii ra, zuun ñi cuhva tañi i casi ra sii ra Aarón.

⁵ Ta zuun ñi cuhva cuan, ñá zanduñiñi ra Cristo sii ra, ta yivi maa ra catyi vatyí cua nduu ra minoo ra cu zutu ya cahnu. Ña tacuan. Maa ra Ndyoo cuu ra i casi sii ra Cristo. I catyi ra Ndyoo sihin ra:

Yoho cuu zehi;

Vityí zanducahnu mi suun.

⁶ Ta inga saha i catyi ra Ndyoo sihin ra tyehen:

Minoo ra cu zutu cua cuun tandihí cuii tyiemvu.

Cua cuun tañi ra Melquisedec.

⁷ Quivi i cuu ra Jesús minoo ñiyivi ihya ñuu ñiyivi, i cahan xaan ra sihin ra Ndyoo, ta ñihi xaan i sacu ra ta i sica xaan ra tumañi iñi sii ra vatyí cuu zacacu ra Ndyoo sii ra ta ma cuu ra. Ta i siñi ra Ndyoo sa cahan ra vatyí cua zavaha ra tandihí sa catyi ra Ndyoo.

⁸ Ta vazu zehe ra Ndyoo cuu sii ra Jesús, zoco sihin cuhva i ndyehe ra tundoho ta i cutuhva ra tyaa ra yahvi sii ra Ndyoo.

⁹ Ta sa yaha cutuhva ra tandihí sa cuñi ra Ndyoo sa coto ra, ta ziqui i ñihi ra cuhva saha ra sa cundito ñiyivi tandihí cuii tyiemvu, tandihí ñiyivi tyaa yahvi sii ra

¹⁰ vatyí i casi ra Ndyoo sii ra sa cuu ra minoo ra cu zutu ya cahnu zuun ñi cuhva tañi i cuu ra Melquisedec.

Ica xaan zandoo yo Tuhun Ndyoo tatu sa sino iñi yo

¹¹ Iyo cuaha xaan sa cuñi catyi sa cuenda ra Cristo, zoco yii xaan cua zacutuñi vehi iñi ndo vatyí zoho xaan ndo.

¹² Vityí sa naha sino iñi ndo, ta tahan si cuu ndo maestro sii inga ñiyivi. Zoco sii maa ndo siñi ñuhu ca sa zañaha ñiyivi sii ndo inga saha zuhva zuhva ñaa sa catyi Tuhun Ndyoo. Cuu ndo tañi sa lee. Ndyo vityí sihi ca ndo zicui, ta ña cuu casi vaha ndo xita. Quehin ziqui minoo cuhva, cuhva iyo ndo sihin Tuhun Ndyoo.

¹³ Tatu sihi ca ndo zicui cuñi si catyi si vatyí ña cutuñi vaha iñi ndo Tuhun Ndyoo, ta cuu ndo tañi sa lee.

¹⁴ Ta ña cuu casi vaha ndo xita ta cuu ndo tañi ñiyivi sahnu sa cuenda Tuhun Ndyoo tatu ma quisaha nacoto xihna ndo ñaa sa cuu sa vaha ta ñaa sa cuu sa ña vaha ta zavaha ndo maa ñi sa vaha.

6

¹ Yucuan cuenda, nazandoo yo cuhva i cuu yo ta nu quisaha sino iñi yo sii ra Cristo, ta nacuahnu yo sa ndisa cuii sihin Tuhun Ndyoo. Ma nacani tucu ndo inga saha Tuhun Ndyoo ánima ndo ta ziqui naquisaha ndaca tucu ndo tucahnu iñi sii ra Ndyoo ta quisaha sino tucu iñi ndo uu a uñi tahan saha.

² Ma zacuaha xaan ca yo ziqui cuhva yozo caa cua coo ndutya ñiyivi ta yozo caa ñihi ñiyivi Tatyí li. Ta ma zacuaha xaan ca yo sa cuenda yozo caa cua nandoto ñiyivi ta cuhva cua tasi tuñi ra Ndyoo sii ñu.

³ Tatu cua cuhva ra Ndyoo, vityi cua yaha yo ityi nuu ca ta cahan yo inga ca tuhun.

⁴⁻⁶ Ñiyivi sa sito Tuhun Ndyoo sa ndisa ta ñihi ñu sa vaha sa saha ra Cristo sii ñu ta tiin cuenda ñu sii Tatyí li, ta tatu sa sito ñu vatyí vaha xaan cuu Tuhun Ndyoo ta tuu iñi ñu vatyí saha xaan ra Cristo cuhva sii ñiyivi sino iñi sii ra. Tatu sa sito ñu tandihi cuhva cuan ta zandoo ñu sii ra Cristo ta catyi ñu vatyí ña vaha ra ta ña sino ca iñi ñu, ma cuu ca zasino yo iñi ñiyivi sa caa tacuan. Ma zama tucu ñu cuhva iyo ñu inga saha. Inuu ñi nduu ñu sihin ñiyivi i sahníi sii ra Cristo nuu cruz vatyí sihin cuhva zavaha ñu ta sihin cuhva sa quiñi cahan ñu saha xaan ñu ticahan nuu sii maa ra Cristo vatyí cahan xaan ñiyivi sii ra sa cuenda cuhva zavaha ñu.

⁷ Tañi cuhva sii minoo ñuhu. Tatu coon vaha zavi nuu si ta sahnú vaha itu a ñaa sa tasi ñiyivi yucuan, tyindyee ñuhu cuan sii ñu, ta ñihi ñuhu cuan sa vaha sii ra Ndyoo.

⁸ Zoco tatu saha si maa ñi iñu ta yucu sa ñahñi yahvi ndyaa, ñahñi yahvi ndyaa tucu ñuhu cuan. Cua catyi ñiyivi vatyí ña vaha si, ta cua cayu si.

Níi xaan cuu iñi yo vatyí sa sito yo vatyí cua ñihi yo sa vaha xaan cuee ca

⁹ Ndoho hermanos, cuñi xein sii ndo, ta vazu quehin sa tacuan, zoco site vatyí iyo vaha maa ndo sihin Tuhun Ndyoo, ta ña iyo ndo tañi ñuhu ña vaha cuan. Site vatyí zavaha maa ndo sa vaha tañi zavaha ñiyivi cua cacu.

¹⁰ Vatyí ndoo xaan cuu maa ra Ndyoo, ta ma naa iñi ra cuhva i zatyíño ndo tyiño ra ta cuhva cuñi xaan ndo sii ñiyivi ta tyindyee ndo sii inga ñiyivi sino iñi sii ra vatyí cuñi xaan ndo sii maa ra. Ta tacuan zavaha ndo ndya cuhva ndya vityí.

¹¹ Ta cuñi xein sa cua sino vaha iñi tahan tahan ndo sii ra Cristo ndya cua cuhva ra Ndyoo sa cundito ndo tandihi cuii tyiemvu.

¹² Ta cuhva cuan ma cuzusa ndo, zoco cua zavaha ndo cuhva zavaha ñiyivi sino xaan iñi sii ra Ndyoo. Vatyí maa ñu zandyee xaan ñu iñi ñu ndyehe ñu tundoho, ta ma zaña ñu sa sino iñi ñu vatyí sihin cuhva cuan cua ñihi ñu sa vaha sa catyi ra Ndyoo sa cua cuhva ra sii ñu.

¹³ Quivi i catyi ra Ndyoo sihin ra Abraham vatyí ndisa cuii cua cuhva maa ra minoo sa cua cuhva ra sii ra Abraham, ñá ñihi ra Ndyoo zivi inga ra cahnu ca cua cahan ra ta cua coto ra Abraham vatyí ndisa cuii sa cahan ra. Yucuan cuenda i cahan ra Ndyoo zuun ñi sihin zivi maa ra vatyí ñahñi inga ca zivi cahnu ca tañi zivi maa ra Ndyoo.

¹⁴ Tyehen i catyi ra Ndyoo sihin ra Abraham: “Ndisa cuii cua tyindyeyi suun, ta cua zanducuaha xein suun.” Catyi ra.

¹⁵ Ta ra Abraham i zandyee ra iñi ra ta i ndatu ra quivi cua cuhva ra Ndyoo sa sa catyi ra. Ta ndisa i ñihi ra Abraham sii si.

¹⁶ Cuhva iyo ñiyivi ñuu ñiyivi, tatu saha minoo ra tuhun ra sii ñu sa cuenda minoo tyiño sa cua zavaha ra, saha tucu ra cuan zivi inga ra cahnu ca ta zivi tucu maa ra vatyí tatu ma zavaha ra cuhva catyi ra, cua tasi tuñi ra cahnu cuan sii ra. Ta sihin cuhva cuan ta ndoo ñiyivi vaha vatyí sito ñu vatyí cua zavaha ra cuhva sa sa catyi ra.

¹⁷ Ta zuun ñi cuhva cuan i zavaha ra Ndyoo. I cuñi ra zañaha ra sii ñiyivi vatyí ndisa cuii ra sa cahan ra ta ña zama ra inga cuhva, yucuan cuenda i cahan ra zuun ñi sihin zivi maa ra.

¹⁸ Tacuan i zavaha ra. I saha ra tuhun ra ta i saha ra zivi ra, ta nduu tahan si cuan ma cuu zama si vatyí ma cuu cuvatyá ra Ndyoo. Ta yucuan cuenda maa yo, ra sa quihvi nu cua zacacu ra Ndyoo sii yo, cuu cuniñi xaan iñi yo ta cuu tiin cuenda vaha xaan yo cuhva i catyi ra Ndyoo vatyí cua cuhva ra sii si sii yo.

¹⁹ Tañi minoo barco, iyo minoo caa vee xaan sa zanoo ñiyivi sisi ndutya ityi zuhma barco ta ma cuu cuhun barco cuan ndya vaha ñi. Ta tacuan tucu maa yo. Ma caca xaan iñi yo tatu cacu yo a ma cacu yo vatyí tuhun i saha maa ra Ndyoo sii yo, ndoo si sihin yo tandihi cuii tyiemvu. Ta vityí sa cuenda sa níi iñi yo sii sa catyi maa ra Ndyoo sihin yo ta cuu si tañi sa sá saa yo gloria

²⁰vatyi sa cuahan maa ra Jesús ndya indyacuan. Sa cuahan maa ra ityi nuu ca sa cuenda maa yo. Ta yucuan i ñihi ra minoo tyiño sa ma ndihi sa cuu ra ra cu zutu ya cahnu zuun ñi cuhva tañi i cuu ra Melquisedec.

7

Zutu ya cahnu cuu ra Jesús zuun ñi cuhva tañi i cuu ra Melquisedec

¹Ra Melquisedec i cuu ra rey ñuu Salem, ta i cuu ra ra cu zutu cuenda ra Ndyoo cahnu. Ta minoo saha i tahan ra sii ra Abraham sa nasaa ra ta sa yaha sahñi ra sii ohon tahan rey. Ta i zoco ñaha ra Melquisedec sii ra Abraham.

²Ta tandihi ndaha tyiño ta xuhun i nama ra Abraham sii rey ra i sahñi ra, i saha maa ra minoo sa tahan tahan usi tahan si sii ra Melquisedec. Zivi maa ra Melquisedec cuñi si catyi si “rey ra ndoo xaan”. Ta rey i cuu ra ñuu Salem. Ta sa yucuan cuñi si catyi si minoo nu cua cuyucu ñiyivi sihin sa taxi ñi.

³Ñahñi nu catyi si yoo ra cuu zutu ra Melquisedec a yoo ña cuu zihhi ra a yoo cuu inga ñiyivi sii ra. Ta ñahñi nu catyi si ama i cacu ra a ama i sihi ra. Cuu ra minoo ra cu zutu tandihi cuui tyiemvu tañi ra cu Zehe ra Ndyoo.

⁴Zaha ndo cuenda vatyi minoo ra ñiñi xaan cuu ra vatyi ra Abraham i cuu ra zutu sii tandihi ñiyivi sa sino iñi sii ra Ndyoo, ta i saha xaan ra sa vaha sa i nama ra sii ra Melquisedec.

⁵Catyi ley ra Ndyoo vatyi tandihi zehe ra Leví, ra cuu ra cu zutu, cuu quihin ra xuhun ñiyivi. Cuu quihin ra minoo sa tahan tahan usi tahan xuhun ñu. Cuu quihin ra xuhun cuan sii ra tahan ra.

⁶Zoco yivi ra tahan ra Abraham i cuu sii ra Melquisedec, zoco zuun ñi i quihin ra Melquisedec xuhun ra Abraham ta i zoco ñaha ra sii ra Abraham. Ta sii ra Abraham, i saha xaan ra Ndyoo tuhun ra.

⁷Sito tandihi ñiyivi vatyi ra cahnu ca cuu ra zoco ñaha sii inga ra.

⁸Ra cu zutu, ñiyivi sii ra Leví, quihin ra xuhun ñiyivi, ta cuee ca ta cua cuu ra, zoco cahan Tuhun Ndyoo sa cuenda ra Melquisedec tañi sa ndito ca ra.

⁹Ta ra Leví ta zehe ra, cuu ra tuhva quihin xuhun ñiyivi sa cuenda tyiño ra sa cuu ra ra cu zutu, zoco cuu catyi yo vatyi i tyiyahvi ra Leví xuhun sii ra Melquisedec quivi i tyiyahvi maa ra Abraham vatyi ñiyivi sahnu ra Leví i cuu sii ra Abraham.

¹⁰Vatyi cua cuu ra Leví tata ra Abraham quivi i tahan ra Melquisedec sii ra Abraham.

¹¹Saha ra Ndyoo ley ra sii ra Moisés zehe ra Leví. Ta catyi ley cuan vatyi tata ra Leví cua cuu ra cu zutu. Tatu sa vatyi cuu nduvaha ñiyivi sihin ra Ndyoo sihin cuhva i zavaha zehe ra Leví, ra cuu ra cu zutu, ña siñi ñuhu sa tasi ra Ndyoo sii inga ra cu zutu tañi ra Melquisedec (ta ra Cristo cuu ra i tasi ra Ndyoo). Tatu ñá siñi ñuhu ra Cristo, cua tasi tucu ra Ndyoo sii inga ra cu zutu, ra cu zehe ra Leví, zoco ñá zavaha ra tacuan.

¹²Ta quivi i tasi ra Ndyoo sii inga nuu ra cu zutu, yucuan ta i nazama ley ra.

¹³Ta ra sa cahan yo tuhun ihya (ra Cristo cuu ra) ta yivi zehe ra Leví cuu sii ra. Ta ñiyivi sii ra ña tahan si sii ñu cahñi ñu quiti ta cuhva ñu sii ti sii ra Ndyoo nu altar.

¹⁴Ra Judá i cuu ñiyivi sahnu sii ra Jesús, ta ñá catyi ra Moisés vatyi cua coo ra cu zutu sii ñiyivi sii ra Judá.

¹⁵Zoco ndisi xaan ndyehe yo vatyi i zama ra Ndyoo cuhva tuhva ñiyivi sii ra vatyi i quisi ra Cristo ta cuu ra ra cu zutu ya cahnu zuun ñi cuhva i cuu ra Melquisedec.

¹⁶Yivi tata ra Leví i cuu sii ra Cristo. Ta yucuan cuenda ña tahan si sa cuu ra ra cu zutu. Zoco cuu ra zutu vatyi iyo xaan cuhva sii ra ta vatyi ma cuu cuu ra.

¹⁷Ta tacuan i catyi minoo ra tyaa Tuhun Ndyoo nu i tyaa ra tyehen:
Yoho cua cuu minoo ra cu zutu tandihi cuui tyiemvu
Zuun ñi cuhva tañi i cuu maa ra Melquisedec.

¹⁸I tyaa siyo ra Ndyoo sii ley sahnu cuan vatyi ñá cuu tyindyee si sii ñiyivi

¹⁹ vatyi ñá zanduvaha si sii ñiyivi sihin ra Ndyoo. Zoco vityi iyo inga cuhva vaha ca, ta sa cuenda maa si cuu tuhva yo sii ra Ndyoo (vatyi zanduvaha ra Cristo sii yo sihin ra Ndyoo).

²⁰ I saha ra Ndyoo zivi ra quivi i catyi ra vatyi ma naa cuhva sa cuu ra Cristo minoo ra cu zutu tandihi cuii tyiemvu.

²¹ Ñá cahan ra Ndyoo cuhva cuan sa cuenda inga ra cu zutu, zoco ñihi xaan i cahan ra Ndyoo ta i saha ra zivi ra quivi i saha ra tyiño sii ra Cristo, ta i catyi ra:

Sa cahan ra Ndyoo, ta ma zama ra inga cuhva:

“Yoho cua cuu minoo ra cu zutu tandihi cuii tyiemvu

Tañi ra Melquisedec.”

²² Sa cuenda ra Cristo, vaha xaan ca tyiño saa ya ta ziqui tyiño sahnu.

²³ Cuhva i sicoo tyiño sahnu cuan, cuaha xaan ra cu zutu i sicoo vatyi tuhva ra cuan sihi ta ziqui ñá cuu ca zavaha ra tyiño cuan.

²⁴ Zoco ra Cristo cuu ra cu zutu tandihi cuii tyiemvu vatyi ma cuu ca ra cuan.

²⁵ Yucuan cuenda cuu zacacu ndisa cuii ra sii tandihi ñiyivi natuhva sii ra Ndyoo sa cuenda maa ra vatyi ndito ra tandihi cuii tyiemvu, ta cuu cahan ra sihin ra Ndyoo sa cuenda yo.

²⁶ Maa ra cuu ra cu zutu sa siñi ñuhu sii yo vatyi ii xaan ra; yoñi cuu tyaa cuatyí sata ra. Numinoo saha ta ñá zavaha ra sa ña vaha. Vazu ñiyivi cuu ra tañi maa yo, zoco ñahñi cuatyí ra, ta ñin ñi ndyaa ra sihin ra Ndyoo gloria.

²⁷ Ña zavaha ra tañi i zavaha ra cu zutu ta sa naha vatyi ña cuñi si sa cahñi ra quiti tandihi quivi sa cuenda cuatyí maa ra ta sa cuenda cuatyí ñiyivi vatyi sa yaha zavaha ra cuhva cuan quivi i saha ra sii maa ra ta i sihi ra sa cuenda maa yo.

²⁸ Cuhva i sicoo ley sahnu, ndya maa ra cu zutu ta i sicoo cuatyí ra, zoco cuee ca i saha ra Ndyoo zivi ra ta i tyaa tyiño ra sii zehe ra sa cuu ra ra cu zutu, ta ñahñi cuatyí ra iyo tandihi cuii tyiemvu.

8

Cahan ra Jesús sihin ra Ndyoo sa cuenda yo

¹ Ihya cuu minoo sa ñiñi sa i catyi ndi sihin ndo. Iyo minoo zutu ya cahnu sa cuenda maa yo. Vaha ca ra ta ziqui ra cu zutu i zatyíño tyiño ra Ndyoo cuhva sahnu. Ndyaa ra gloria siyo cuaha ra Ndyoo nu ndyaca ñaha ra Ndyoo tandihi.

² Yucuan zatyíño ra Cristo nu ii, nu cu si vehe ñuhu ra Ndyoo sa ndisa vityi. Maa ra Ndyoo i zavaha sii si ta yivi ñiyivi.

³ Tahan tahan ra cu zutu ya cahnu cuñi si sa cua coo sa cua cuhva ra sii ra Ndyoo. Yucuan cuenda cuñi si sa coo tucu sa cua cuhva ra Cristo sii ra Ndyoo.

⁴ Tatu sa vatyi ndyaa ra Cristo ñuu ñiyivi vityi, ma cuu ra minoo zutu ya cahnu ihya ñuu ñiyivi vatyi sa iyo ra saha sa saha ra sii ra Ndyoo cuhva catyi ley sahnu.

⁵ Ra yucuan zavaha ra minoo cuhva ñi, ta zacahnu ra sii ra Ndyoo sisi minoo vehe sa caa tañi caa sa iyo sisi gloria. Vatyi quivi sa cuñi zandaa ra Moisés sii si i catyi ra Ndyoo sihin ra vatyi nazacuenda vaha ra ta zavaha ra sii si tañi cuhva i zañaha ra Ndyoo sii ra xiñi yucu Sinaí.

⁶ Zoco ra Cristo, i ñihi ra minoo tyiño vaha xaan ca ta ziqui tyiño i zavaha ra cu zutu ta sa naha. Sa cuenda tyiño saa i zandaa ra Ndyoo sihin ñiyivi sino iñi sii ra Cristo ta vityi cahan ra Cristo sa cuenda yo sihin ra Ndyoo. Vaha ca tyiño saa ya ta ziqui tyiño sahnu cuan vatyi vaha ca cuhva i cahan ra Ndyoo quivi i zandaa ra sii si.

⁷ Ñá zatyíño vaha tyiño sahnu cuan vatyi tatu sa vatyi i zatyíño vaha si ma cuñi si sa coo inga sa saa.

⁸ Zoco zuun ñi maa ra Ndyoo catyi vatyi cuñi si sa zama tyiño sahnu cuan vatyi i catyi ra:

Cua coo quivi sa cua zandei inga tyiño sihin ñiyivi hebreo, ñu ndyaa nu cu si Israel ta ñu ndyaa nu cu si Judá.

⁹ Ma cuu si tañi tyiño i zandei sihin ñiyivi sahnú sii ñu quiivi i tave sii ñu ñuu Egipto; Vatyí maa ñu, ña tyaa ñu yahvi tyiño i zandei sihin ñu, Ta yucuan cuenda i zandoo ihne sii ñu. Catyi ra Ndyoo.

¹⁰ Zoco ihya cuu tyiño saa sa cua zandei sihin ñiyivi hebreo cuee ca, catyi ra Ndyoo. Cua tyei ley sisi sa siñi tuñi xiñi ñu ta sisi añima ñu; Ta yuhvi cua cuu Ndyoo sii ñu, Ta maa ñu cua cuu ñiyivi sii.

¹¹ Ta ma cuñi ca si sa zacuaha ñu sii ñiyivi yucu vatyí sihin ñu a sii ra tahan ñu. Ma cuñi si sa catyi ñu: “Nacoto ndo sii ra Ndyoo”; Vatyí tandihi cuii ñu cua coto sii mi, ndya ra sahnú ca ta ndya ra ndyíhi.

¹² Vatyí cua cundahvi iñi sii ñu sa cuenda sa ña vaha sa i zavaha ñu, Ta ma nacohon ca iñi cuatyí ñu.

¹³ Quiivi i cahan ra Ndyoo cuhva ya sa cuenda minoo tyiño saa, cuñi si catyi si vatyí sa zandíhi ra cuhva sa cuenda tyiño sahnú. Ta sa cua naa si.

9

Vehe ñuhu sa iyo ñuu ñiyivi ta vehe ñuhu sa iyo andivi

¹ Sa xihna ñi tyiño i zandaa ra Ndyoo sihin ñiyivi, saha ra cuhva sii ñu yozo caa cua zacahnú ñu sii ra. Ta i sicoo minoo vehe ñuhu ihya ñuu ñiyivi nu i zacahnú ñu sii ra.

²⁻³ I zavaha ñiyivi tañi minoo vehe zahma. Ta sisi si i sicoo uu tahan cuarto vatyí tyazi zava ñu sihin zahma. Sa xihna ñi cuarto cuan nañi si Nu Ii, ta sisi si i siyucu minoo candelero ta minoo mesa nu siyozo pan ii. Ta cuarto sa cu uu cuan, nañi si Nu Ii Xaan Ca.

⁴ Sisi sa cu uu cuarto cuan i siyucu minoo altar xuhun cuaan nu i sahmi ra cu zutu ya cahnú cutu ta minoo caja iñi xuhun cuaan sa ñoho yuu nu ndyaa sa usi tahan nduzu ñuhu ta tutatu ra Aarón ta minoo quiyi xuhun cuaan sa ñoho zuhva maná.

⁵ Xiñi caja cuan nandyaa uu tahan ángel xuhun cuaan. Nañi si querubines. Ta ndyaa sa ndisi xaan sii maa ra Ndyoo nuu si. Ta zaca nduu tahan ángel cuan ndisi si nuu caja cuan nu nañi si Nu Zaha Ra Ndyoo Tucahnú Iñi Sii Ñiyivi. Ma cuu nacatyí casi tandíhi ca si sihin ndo vityí.

⁶ Ta tatu sa ndyaa listo tandíhi ndaha tyiño cuu quihvi ra cu zutu sisi cuarto sa xihna ñi cuan ñaa ñi cuhva cuñi ra sa cuenda sa zavaha ra tyiño ra.

⁷ Zoco minoo tuhun ñi ra cu zutu ya cahnú cuu quihvi sisi cuarto cu uu cuan. Cuu quihvi ra minoo tuhun ñi saha sa minoo cuiya. Ta ñaa ra niñi quiñi sa cua quiñi ra nu nañi si Nu Zaha ra Ndyoo Tucahnú Iñi Sii Ñiyivi. Tacuan i zavaha ra sa cuenda cuatyí maa ra ta sa cuenda cuatyí tandíhi ñiyivi.

⁸ Ta sihin tandíhi cuhva cuan zañaha Tatyí Ii sii yo vatyí quiivi cuan ñá cuu quihvi ndya vaha ñi ñiyivi nu ndyaa ra Ndyoo vatyí ndyaa inga vehe ñuhu cuan, ta maa ñi ra cu zutu cuu quihvi yucuan.

⁹ Ta cuhva cuan zañaha si minoo cuhva ñiñi xaan sii maa yo vatyí sihin cuhva sahnú cuan i saha maa ra cu zutu sa saha maa ñiyivi sii ra Ndyoo, zoco ñá zanduvaha si sii ñu sa ndisa cuii.

¹⁰ Vatyí cuhva sahnú cuan i cahan si maa ñi sa cuenda ñaa sa cuu casi ñiyivi ta ñaa sa cuu coho ñu ta yozo caa cua ndundii ñu, ta saha si cuaha nuu ley sa cua tyaa ñu yahvi. Tandíhi ihya zañaha si sii ñiyivi vatyí iyo cuatyí ñu ityi nuu ra Ndyoo. Cuhva sahnú cuan cuu sa cuñi ra Ndyoo sa cua zavaha ñiyivi ndya cua cuhva ra minoo cuhva saa sa vaha xaan ca.

¹¹ I quisi ra Cristo vatyí cua cuu ra ra cu zutu ya cahnú sa cuenda minoo cuhva vaha ca, ta i quihvi ra sisi vehe ii sa ii xaan ca vatyí ndyaa si gloria. Yivi ñiyivi i zavaha sii si, ta ña ndyaa si ñuu ñiyivi ya.

¹² Ta ñá quihvi ra Cristo yucuan sihin niñi mvee ta sihin niñi minoo zindiqui luhlu. I quihvi ra nu ii xaan ca sisi gloria nu ndyaa ra Ndyoo vatyí sa sati ra niñi maa ra, ta sihin cuhva cuan i ñihi ra cuhva zandasi ra cuatyí tandíhi yo tandíhi cuii tyiemvu.

¹³ Ta tatu sihin cuhva sahnu sa sati niñi mvee ta niñi zindiqui ta sa sahmi ñiyivi sii zindiqui ta cuu nduvaha ñiyivi zuhva sihin ra Ndyoo,

¹⁴ vaha xaan ca cuu si vityi sihin niñi ra Cristo vatyí ñahñi cuatyí maa ra, ta i saha ra sii ra sii ra Ndyoo vatyí cua cuu ra sa cuenda cuatyí maa yo. I tyindyee Tatyí li sii ra, ta i cuu zavaha ra cuhva cuan. Zanduvaha si sii yo sa ndisa cuii, ta vityi ma caca xaan ca iñi yo yozo caa cua cuu ndasi cuatyí yo. Vityi tyaa yo yahvi sa ndisa cuii sii ra Ndyoo ndito.

¹⁵ Ra Cristo cuu ra cahan saha ñiyivi ityi nuu ra Ndyoo sa cuenda tyiño saa i zandaa ra Ndyoo. Tacuan zavaha ra vatyí tacuan ta ñiyivi i casi ra Ndyoo cua cuu ñihi ñu sa ndasi cuatyí ñu tandíhi cuii tyiemvu vatyí yucuan cuu sa catyi ra Ndyoo sa cua cuhva ra sii ñu. Cua ñihi ñu sii si vatyí i sihi ra Cristo, ta yucuan cuenda ma tyiyahvi ca maa ñu sa cuenda cuatyí i zavaha ñu quivi i sindyaa ñu sihin tyiño sahnu i zandaa ra Ndyoo, quivi tañaha ca zandaa ra tyiño saa.

¹⁶ Tatu sa sihi minoo ñiyivi ta i zandoo ra minoo tutu ta catyi si ñaa ndaha tyiño ra cua ñihi minoo minoo ñiyivi sii ra, yoñi cua ñihi ndaha tyiño cuan tatu ma cuu zañaha ñu vatyí i sihi ndisa cuii sitofo si.

¹⁷ Zoco tatu i sihi ndisa cuii ra, tacuan ta ziqui cuu cutyiño ñu tutu i tyaa ra sa cuenda ndaha tyiño ra, ta cacu ndisa cuii tyiño i zandaa ra sa cuenda si.

¹⁸ Yucuan cuenda ndya sa xihna ñi tyiño i zandaa ra Ndyoo ta i sati niñi quití sa cuenda si vatyí cuñi si sa coo minoo sa cuu ta cua coto ñiyivi vatyí cua zavaha ra Ndyoo cuhva catyi ra.

¹⁹ Vatyí sa yaha nacatyí ra Moisés tandíhi usi tahan ley maa ra Ndyoo sihin tandíhi ñiyivi, ta ziqui i quihin ra niñi zindiqui lee ta niñi mvee, ta i tyihi ra ndutya, ta i zatyí ra zuhva zoco yutu sa nañi hisopo sa nuhñi sihin yuhva cuaha, ta i quití ra sii si nuu tutu nu ndyaa ley cuan, ta i zatyí ra sii si ta sii tandíhi ñiyivi sihin niñi ta ndutya cuan.

²⁰ Ta i catyi ra Moisés: “Ihya cuu niñi sa cuenda tyiño zandaa ra Ndyoo sihin ndo. Ihya cuu cuhva catyi ra cua zavaha ndo.” Tacuan i catyi ra Moisés.

²¹ Ta zuun ñi cuhva cuan i quití ra niñi sisi vehe ñuhu cuan ta nuu tandíhi ndaha tyiño sa sityiño ñiyivi sa cuenda sa zacahnu ñu sii ra Ndyoo quivi cuan.

²² Cuhva catyi ley sahnu cuan cuñi si catyi si sa sa yatyí tandíhi nduvaha ityi nuu ra Ndyoo sihin sa quití ñiyivi niñi nuu si. Ta tatu ñahñi niñi cua cati, ma cuu ndasi cuatyí ñiyivi.

I zandíhi ra Cristo cuhva iyo sii cuatyí quivi i saha ra sa cuu ra

²³ Ta ndaha tyiño sa iyo ñuu ñiyivi ya, minoo cuhva ñi cuu si sii sa iyo sisi gloria. Ta zuun ñi cuhva sa nduvaha si ityi nuu ra Ndyoo, ta tacuan tucu cuñi si sa ndu-ii sa iyo sisi gloria, zoco sihin minoo cuhva vaha xaan ca.

²⁴ Vatyí ra Cristo ñá quihvi ra sisi minoo vehe i zavaha ñiyivi sa caa cuhva caa vehe sa cuu vehe ra Ndyoo sa ndisa. I quihvi maa ra sisi gloria, ta cahan ra sihin ra Ndyoo sa cuenda maa yo.

²⁵ Ña cuñi si sa cuu ra Cristo cuaha saha tañi zavaha ra cu zutu ya cahnu hebreo ihya ñuu ñiyivi nu quihvi ra vehe ii sihin niñi quití tahan tahan cuiya.

²⁶ Vatyí tatu tacuan cuñi si sa cuenda ra Cristo, cua ndyehe ra tundoho cuaha saha ndya ta sino ñuu ñiyivi ta ndya vityi. Zoco ña tacuan cuu si. I quisi ra Cristo minoo saha ñi, ta i quisi ra vatyí cua zandíhi ra cuhva iyo sii cuatyí. Ta i zandíhi ra cuhva iyo sii si quivi i saha ra sa cuu ra.

²⁷ Ta ñuu ñiyivi ya, minoo saha ñi cua cuu yo, ta ziqui cua tyicuhva ra Ndyoo sii yo.

²⁸ Ta zuun ñi cuhva cuan i cuu si sihin ra Cristo. I sihi ra minoo saha ñi sa cuenda cuatyí cuaha ñiyivi. Ta cua quisi ra inga saha zoco yivi ca sa cuenda sa cua cuu ra sa cuenda cuatyí yo. Inga saha cua quisi ra vatyí cua zacacu ra sii ñiyivi sa ndatu xaan sii ra.

10

¹ Ley sahnu cuan, i cuu si tañi minoo xiñahñu ñi sii sa vaha sa cua coo cuee ca, zoco yivi sa vaha cuan cuu ley sahnu cuan sa ndisa vatyí sa cuenda cuhva sahnu cuan ta tahan tahan cuiya ta saha maa ñiyivi sa saha ñu sii ra Ndyoo, zoco ñá cuu zanduvaha si sii ñu sihin ra Ndyoo sa ndisa cuii.

² Tatu sa vatyí i nduvaha ñu sihin ra Ndyoo sa ndisa sihin cuhva cuan, minoo tuhun ñi saha cua zavaha ñu sii si ta sa ndasi ñi cuatyí ñu ta ma caca ca iñi ñu sa iyo ca cuatyí ñu.

³ Zoco i saha ñu sa saha ñu sii ra Ndyoo tahan tahan cuiya, ta i nacohon iñi ñu cuatyí ñu cuhva cuan.

⁴ Vatyí ñiñi zindiqui ta ñiñi mvee, ma cuu zandasi si cuatyí yo.

⁵ Yucuan cuenda quivi i quisi ra Cristo ñuu ñiyivi i catyí maa ra sihin ra Ndyoo Zutu ra:

Ña cuzii iñun sihin sa sahñi ñiyivi quiti ta saha ñu suun a ñaa inga sa cua cuhva ñu suun. Yucuan cuenda i zavohon coño ñuhi vatyí cua cuu cuhve sii si suun.

⁶ Ñá tahan iñun ñaa sa cua cahmi ñiyivi a ñaa sa cua cuhva ñu sa cuenda cuatyí ñu.

⁷ Ta ziqui i catyí mi: “Ndyehe Ndyoo Zuti sa vasi zavehi cuhva cuñun Tañi catyí si nuu tutu moo.”

⁸ Tacuan i catyí ra Cristo, ta nu i catyí ra: “Ña cuñun ta ña tahan iñun ñaa sa saha maa ñiyivi ta sa sahmi ñu sa cuenda cuatyí ñu cuhva catyí ley sahnu”,

⁹ ta ziqui i catyí tucu ra: “Ndyehe, vasi zavehi cuhva cuñun.” Ta sihin cuhva cuan ta zandihí ra Cristo cuhva sahnu ta quisaha tucu ra inga cuhva saa.

¹⁰ Ta sihin cuhva saa ya, ndasi cuatyí yo, ta nduvaha yo sihin ra Ndyoo tandihí cuii tyiemvu vatyí sihi ra Cristo sa cuenda yo.

¹¹ Sihin cuhva sahnu cuan nandyaa ra cu zutu ityí nuu altar tandihí quivi, ta tandihí quivi saha xaan ra sa saha ra sii ra Ndyoo, zoco ñá cuu zandasi si cuan cuatyí ñiyivi numinoo saha.

¹² Zoco i saha maa ra Cristo zuun ñi sii maa ra sii ra Ndyoo sa cuenda cuatyí yo minoo tuhun ñi saha, ta ziqui i sicundyaa ra siyo cuaha ra Ndyoo.

¹³ Ndatu ra quivi sa cua tyihí ra Ndyoo sii tandihí ra xaan iñi sii ra sisi saha ra.

¹⁴ Vatyí sihin sa minoo tuhun ñi saha i sihi ra Cristo ta ndisa cuii i zanduvaha ra ityí nuu ra Ndyoo sii tandihí ñiyivi cua sino iñi sii ra.

¹⁵ Ta saha tucu Tatyí Ii sa ndaa sa cuenda si vatyí catyí ra:

¹⁶ Ihya cuu tyiño cua zandei sihin ñiyivi hebreo

Vazu ñá zavaha ñu cuhva catyí inga tyiño i zandei sihin ñu sa xihna ñi.

Cua tyei lei sisi añima ñu,

Ta cua tyei sii si sisi sa siñi tuñi xiñi ñu.

(Tacuan ta cua zavaha ñu sii si.)

¹⁷ Ta ziqui i catyí tucu ra Ndyoo:

Ta ma nacohon ca iñi cuatyí ñu ta cuhva ñá tyaa ñu yahvi sii.

¹⁸ Ta tatu sa zandasi ra Ndyoo cuatyí ñiyivi, ña cuñi ca si sa cahñi ñiyivi quiti a sa cuhva ñu inga sa cua cuhva ñu sii ra Ndyoo sa cuenda cuatyí ñu.

Cuñi si sa natuhva yo sii ra Ndyoo

¹⁹ Yucuan cuenda, ndoho hermanos, cuu quihvi maa yo nu ii xaan ca nu ndyaa ra Ndyoo vatyí i sati ra Jesús ñiñi ra.

²⁰ Ihya cuu cuhva saa i nuña ra Cristo sa cuenda maa yo vatyí i saha ra sa cuu ra. Ta cuhva cuan i ndata minoo zahma sa ndita caa nuu ra Ndyoo, ta vityí cuu quihvi yo nu ndyaa ra Ndyoo, ta cua cundito yo tandihí cuii tyiemvu.

²¹ Vityí ra cu zutu ya cahnu sa cuenda maa yo ndyaca ñaha ra tandihí vehe ra Ndyoo.

²² Yucuan cuenda natuhva yo sii maa ra Ndyoo. Ta ma ndu-uu iñi yo. Ñi xaan cuu iñi yo vatyí cua tiin cuenda ra sii yo vatyí sa nacatya ñiñi ra Cristo añima yo, ta ma caca xaan ca iñi yo sa cuenda cuatyí yo vatyí ñahñi ca si, ta sa sicoo ndutya yo.

²³ Ta vityi ma ndu-uu iñi yo, ta ma caca xaan iñi yo tatu cua zacacu ra Ndyoo sii yo a ma zacacu ra vatyi sa i catyi ra vatyi cua zacacu ra sii yo, ta ñi xaan cuñi si cuu iñi yo sii ra.

²⁴ Ta nanducu yo cuhva tyindyee tahan yo sii tahan yo, ta cuhva cuan cua cuñi xaan ca yo sii tandihi hermano, ta cua zavaha xaan ca yo sa vaha.

²⁵ Iyo ñiyivi ña sahan ca ñu culto, zoco maa yo ma zandoo yo sa tatahan yo. Ta nacuhva yo tundyee iñi sii minoo yo ta sii inga yo, ta ñihi ca cuñi si vityi vatyi ndyehe ndo vatyi sa cuñi saa quivi cua tyicuhva ra Ndyoo sii ñiyivi.

²⁶ Ta vityi sa sito yo ñaa sa cuu sa ndisa, ta tatu catyi yo vatyi ña sino ca iñi yo, ma cuu ca zandasi ra Ndyoo cuatyí yo tatu tacuan zavaha yo.

²⁷ Ma cuu caca iñi yo vatyí cua ñihi yo sa vaha, tatu tacuan zavaha yo. Cua cuxaan xaan ra Ndyoo sihin yo quivi cua tasi tuñi ra sii ñiyivi. ñn ñi cua cayu yo sihin ñiyivi xaan iñi sii ra Ndyoo.

²⁸ Ta sa naha tatu ñá tyaa minoo ñiyivi yahvi sii ley i saha ra Ndyoo sii ra Moisés, ta tatu i saha uu a uñi tahan ñiyivi sa ndaa sa cuenda cuatyí ra, ñá cundahvi iñi ñiyivi sii ra. I sahñi ñu sii ra.

²⁹ ¿Atu ña sito ndo vatyí ñihi xaan ca tahan si ndoho ñiyivi ña sino iñi sii Zehe ra Ndyoo? Ña tyaa ñu yahvi sii ñiñi ra Cristo sa sati ra quivi i zandaa ra Ndyoo tyiño saa sihin yo. Ta zacuxaan ñu sii Tatyí li cuhva cuan. Ta saha ra Ndyoo Tatyí li ra sii yo vatyí tyindyee ra sii yo.

³⁰ Ta sito maa yo sii ra i catyi: “Yuhvi cuu ra cua cañi sii ñiyivi. Cua tasi tuñi sii ñu sa cuenda sa ña vaha sa i zavaha ñu.” Ta iyo tucu inga nu catyi si tyehen: “Cua tyicuhva ra ndyaca ñaha sii yo sii ñiyivi sii ra.” Catyi si.

³¹ Minoo sa zayuhu xaan sii yo cua cuu si tatu tahan si sii yo sa cañi ra Ndyoo sii yo.

³² Zoco nacohon iñi ndo cuhva i cuu si sihin ndo quivi nacao quisaha sino iñi ndo sii ra Cristo. I ndoo ndo sihin ra Cristo vazu yíi xaan i cuu si, ta i ndyehe xaan ndo tundoho sa cuenda ra.

³³ Iyo saha i zacucahan xaan ñiyivi nuu ndo ityi nuu cuaha xaan ñiyivi. Quiñi xaan i cahan ñu sii ndo, ta i zandyehe xaan ñu tundoho sii ndo. Ta iyo saha i ndyehe ndo tundoho vatyí i zandyehe ñiyivi tundoho sii inga ra tahan ndo.

³⁴ Vatyí i cundahvi iñi ndo sii ra ñoho vehe caa. Ta zii xaan i cuñi ndo vazu i nama ñiyivi ndaha tyiño ndo vatyí sito ndo vatyí cua ñihi ndo ndaha tyiño vaha ca sa ma tiví ta ma cunaa.

³⁵ Yucuan cuenda ma zaña ndo sa sino iñi ndo sii ra Cristo vityí vatyí cuee ca cua ñihi xaan ndo sa vaha sa cuenda si.

³⁶ Cuñi si sa zandyee xaan ndo iñi ndo, ta cua cuu zavaha ndo cuhva cuñi ra Ndyoo, ta ziquí cua ñihi ndo sa sa catyi ra Ndyoo vatyí cua cuhva ra sii ndo.

³⁷ Vatyí catyi Tuhun Ndyoo: “Ña cucuee xaan ca ra. Sa cuñi quisi ra cua quisi.

³⁸ Ta ra sa nduvaha ityi nuu ra Ndyoo vatyí sino iñi ra sii ra, cuñi si sa ñi xaan cuu iñi ra sii ra tandihi saha vatyí tatu quisaha nayuhu ra ta ndu-uu iñi ra, ma cuzii ca iñi maa ra Ndyoo sihin ra.” Tacuan catyi ra Ndyoo.

³⁹ Zoco maa yo, yivi ñiyivi cunanuhu sata cuu yo. Maa ñu cuu ñiyivi cunaa. Zoco maa yo cuu ñiyivi sa ña zandoo sa sino iñi yo, ta cua cacu aña yo.

11

Cuhva cuñi si sa cunii iñi yo sii ra Ndyoo

¹ Tatu ñi cuu iñi yo sii ra Ndyoo sa ndisa cuii, sito vaha yo vatyí tatu iyo minoo sa sa catyi ra Ndyoo sa cua cuhva ra sii yo ta vazu ña ndyehe yo sii si vityí, zoco cuee ca cua ñihi yo sii si.

² Ñiyivi i sino xaan iñi sii ra Ndyoo ta sa naha ñi xaan i cuu iñi ñu sii ra, ta yucuan cuenda i catyi ra Ndyoo vatyí vaha ñu.

³ Sihin sa ñi iñi yo ta sito yo vatyí i cahan ra Ndyoo ta i sino ñuu ñiyivi. Cuu ndyehe yo sii si, zoco i sino si sihin sa ña cuu ndyehe yo.

⁴ Nii xaan i cuu iñi ra Abel, ta yucuan cuenda vaha ca sa i saha maa ra sii ra Ndyoo ta ziqui sa i saha ra Caín. I quihin ra Ndyoo sii sa i saha ra Abel, ta sihin cuhva cuan i zañaha ra vatyí ndoo xaan i cuu ra Abel. Ta vazu sa naha sihi ra Abel, zoco siñi ca yo tuhun ra vazu ndya vityi cuhva i sino xaan iñi ra sii ra Ndyoo.

⁵ I sino xaan iñi ra Enoc sii ra Ndyoo, ta yucuan cuenda ñá sihi ra. Cuahan ra sihin ra Ndyoo ñi vatyí zii xaan i cuñi ra Ndyoo sihin ra.

⁶ Tatu ña nii cuu iñi yo sii ra Ndyoo, ña zii cua cuñi ra sihin yo vatyí yoo ra cuñi tuhva sii ra Ndyoo, cuñi si vatyí cua sino iñi ra vatyí iyo ra Ndyoo, ta cuñi si vatyí cua sino iñi ra vatyí saha ra Ndyoo sa vaha sii ñiyivi nanducu sii ra.

⁷ Nii i cuu iñi ra Noé sii ra Ndyoo. I cahan ra Ndyoo sihin ra sa cuenda minoo sa cua coo ityi nuu ca, ta vazu tañaha ca ndyehe ra Noé minoo sa tacuan, zoco i tyaa ra yahvi sa cahan ra Ndyoo ta i zavaha ra minoo barco, ta cuhva cuan i zacacu ra sii ñiyivi sii ra. Sihin cuhva i sino iñi ra Noé sii ra Ndyoo ta i zañaha si vatyí ñá sino iñi tandihi inga ñiyivi. Ta sa cuenda sa sino iñi ra Noé ta i ndyehe ra Ndyoo sii ra tañi sa ñahñi cuatyí ra.

⁸ Nii iñi ra Abraham sii ra Ndyoo, ta i cana ra Ndyoo sii ra vatyí cua quita ra ñuu ra ta cahun ra inga ñuu sa cua cuhva ra Ndyoo sii ra. Ta vazu ñá sito ra Abraham ndyamaa cua cahun ra, zoco i tyaa ra yahvi ta cuahan ra.

⁹ Ta quivi i saa ra inga ñuu cuan, nii xaan i cuu iñi ra sii ra Ndyoo ta ñá zandaa ra minoo vehe vaha vatyí sa sito ra vatyí yivi ñuu maa ra cua cuu si ta yivi yucuan cua ndoo ra. Ta tacuan tucu i zavaha ra Isaac ta ra Jacob.

¹⁰ Tacuan i zavaha ra Abraham vatyí ndatu ra sa cua cundyaca ra Ndyoo sii ra ndya inga ñuu vaha ca, ñuu i zavaha maa ra Ndyoo.

¹¹ Nii xaan cuu iñi maa ña Sara sii ra Ndyoo, ta i sicoo zehe ña vazu sa sahnu xaan ña, ta yivi ca ñaha coo zehe cuu ña. Zoco i ñihi ña zehe vatyí sica iñi ña vatyí cua zavaha ra Ndyoo cuhva catyí ra.

¹² Ta yucuan cuenda i sicoo xaan ñiyivi sii ra Abraham. Vazu sa sahnu xaan ra ta ma cuu ca coo zehe ñu, zoco i sicoo minoo, ta i sicoo cuaha xaan ñiyivi sii ra tañi iyo cuaha xaan tiñoo andivi a tañi ñiyiti sa iyo yuhu tyañuhu.

¹³ Tandihi ñiyivi sa quehin tuhun ihya, nii xaan i cuu iñi ñu sii ra Ndyoo, zoco i sihi ñu ta ñá ñihi ñu tandihi sa catyí ra Ndyoo vatyí cua cuhva ra, zoco i sito ñu vatyí cua quisi si cuee ca ta zii xaan i cuñi ñu, ta i catyí ñu vatyí yivi ñuu ñu cuu ñuu ñiyivi ya sa ndisa.

¹⁴ Ta ñiyivi cahan cuhva cuan, zacoto ñu vatyí cuñi xaan ñu cahun ñu sica ca (ndya gloria nu cu ñuu ñu sa ndisa cuii).

¹⁵ Vatyí tatu sa vatyí i ñoho xaan iñi ñu ñuu ñu nu i quita ñu, cuu cunanuhu ñu tatu cuñi ñu.

¹⁶ Zoco ñá cuñi ñu cunuhu ñu ndya ñuu ñu vatyí cuñi ñu cahun ñu inga ñuu vaha ca sa cuu gloria. Yucuan cuenda ña cahan nuu ra Ndyoo catyí ra vatyí Ndyoo cuenda ñu cuu sii ra, ta i zavaha ra minoo ñuu ndya andivi nu cua cahun ñu.

¹⁷ Quivi i nducu coto ihñi ra Ndyoo sii ra Abraham nii xaan i cuu iñi ra Abraham vazu i catyí ra Ndyoo vatyí cahñi ra sii ra Isaac zehe ra. Ta ra Isaac i cuu minoo tuhun ñi zehe ra Abraham. Zoco i tyaa xaan ra Abraham yahvi sii ra Ndyoo vatyí i sino xaan iñi ra tuhun i saha ra Ndyoo sii ra.

¹⁸ Vatyí sa i catyí ra Ndyoo sihin ra Abraham: “Sa cuenda ra Isaac ta cua coo cuaha xaan ñiyivi suun.”

¹⁹ I sino iñi ra Abraham vatyí cuu zanandoto ra Ndyoo sii ñiyivi vazu sa sihi ñu. Ta cuu catyí yo vatyí i nandoto ra Isaac vatyí sa ndyaa sa cua cuu ra, ta ziqui i nacuhva ra Ndyoo sii ra sii zutu ra, ta ñá sihi ra.

²⁰ Sa cuenda sa vatyí i sino iñi ra Isaac vatyí zavaha ra Ndyoo cuhva catyí ra, ta i sica ra sii ra Ndyoo vatyí cua cuhva xaan ra sa vaha ityi nuu ca sii ra Jacob ta ra Esaú zehe ra.

²¹ Sa cuenda sa vatyí i sino iñi ra Jacob vatyí zavaha ra Ndyoo cuhva catyí ra, ta i sica xaan ra sa vaha sii ra Ndyoo sa cuenda tahan tahan zehe ra José. Quivi sa cuñi cuu ra

Jacob ta si-iñi ndyaa ra sihin tutatu ra, ta i zacahnu ra sii ra Ndyoo, ta i sica ra sa vaha cuan sii ra.

²² Sa cuenda sa vaty i sino iñi ra José vaty zavaha ra Ndyoo cuhva caty ra, ta quivi sa cuñi cuu ra i cahan ra sa cuenda yiqui ra. Ta caty ra vaty cuñi ra vaty naquihin ñiyivi yiqui ra cuhun sihin ñu quivi cua quita ñu ñuu Egipto.

²³ Nii xaan i cuu iñi zutu ta zih i ra Moisés sii ra Ndyoo, ta yucuan cuenda ñá saha ñu sa cuu ra. Quivi i cacu ra ta i ndyehe ñu vaty ndasa xaan ra, ta i tyixehe ñu sii ra uñi tahan yoo vaty ñá yuhu ñu sii ley i cahan rey ñuu cuan nu i caty ra vaty cua cuu tandihi rayii ndyih i zehe ñiyivi.

²⁴ Ta ra Moisés tucu nii xaan i cuu iñi ra sii ra Ndyoo, ta quivi i sahnu ra, ñá cuñi ra cuu ra zehe ñañi ra rey Faraón.

²⁵ Tahan ca iñi maa ra sa cua ndyehe ra tundoho sihin ñiyivi sino iñi sii ra Ndyoo, ta ma cuzii iñi ra zuhva quivi zavaha ra cuaty tañi zavaha ñiyivi ñuu Egipto.

²⁶ I sica iñi ra vaty vaha ca cua ndyehe ra tundoho sa cuenda ra Cristo, ra cua quisi cuee ca. Vaha xaan ca cuhva cuan ta ziqui tandihi xuhun cuaan ñuu Egipto cuñi ra Moisés vaty ndatu ra sa cua cuhva ra Ndyoo minoo sa vaha xaan ca sii ra cuee ca.

²⁷ Nii xaan i cuu iñi ra sii ra Ndyoo, ta yucuan cuenda i quita ra ñuu Egipto, ta ñá yuhu ra vazu i cuxaan xaan ra rey sihin ra. I zandyee xaan ra iñi ra vaty sito ra vaty cuahan ra Ndyoo sihin ra.

²⁸ Nii i cuu iñi ra sii ra Ndyoo, ta i zavaha ra cuhva caty ra sa cuenda sa cua cuu minoo mvee ticaty lee tahan tahan vehe ta cua cahy ñiyivi niñi ti yutu yuvehe ñu. Tacuan i zavaha ra vaty ma cahñi ángel ra Ndyoo sii ra cu zehe nuu ñiyivi hebreo.

²⁹ Ta nii i cuu iñi tandihi ñiyivi hebreo sii ra Ndyoo. Yucuan cuenda i yaha ñu Tyañuhu Cuaha cuan tañi sa sica ñu nu ñuhu ity. Zoco ñiyivi ñuu Egipto cuan, ñá cuu yaha ñu. I sihi ñu sisi tyañuhu cuan.

³⁰ Zuun ñi sa cuenda sa nii cuu iñi ñu hebreo, ta i nduva nuzama siconduu ñuu Jericó vaty i siconduu tandihi ñu yuñuu Jericó usa tahan quivi tañi i caty ra Ndyoo.

³¹ Sa cuenda sa nii cuu iñi ña Rahab sii ra Ndyoo ta ñá sihi ña sihin ñiyivi ñá tyaa yahvi sii ra Ndyoo ñuu ña. Vazu minoo ñaha zii iñi i cuu ña, zoco ñá sihi ña vaty i tiin cuenda vaha ña sii ra hebreo, ra i sindyehe tatu cuu quindyaa ra ñuu ña.

³² ¿Ta ñaa ca sa cuñi si sa caty vityi? Ma cuyaty ca quehin sa cuenda tandihi cui ñiyivi i cunii xaan iñi sii ra Ndyoo, tañi ra Gedeón, ra Barac, ra Sansón, ra Jefté, ra rey David, ra Samuel ta tandihi inga ra profeta.

³³ Sa cuenda sa nii xaan cuu iñi ñu sii ra Ndyoo ta i zahacanaa ñu sii inga rey. I zavaha xaan ñu sa ndoo. I ñih i ñu sa sa caty ra Ndyoo vaty cua cuhva ra sii ñu. I tyazi ñu yuhu ndicaha.

³⁴ I ndahva ñu ñúhu sa ñih i xaan cayu. I cacu ñu quivi i cuñi ñiyivi cahñi ñu sii ñu sihin espada. Vazu ña ñih i ñu, zoco i zandundyee ra Ndyoo sii ñu. I cuu zahacanaa xaan ñu nu sahñi tahan ñu, ta i sino sihin ñu cuaha xaan ity zandaru inga ñuu.

³⁵ Ta iyo ñuzih i nii xaan i cuu iñi ñu ta i nandoto ñiyivi sii ñu sa yaha i sihi ñu. Zoco inga ñiyivi, nii xaan i cuu iñi ñu sii ra Ndyoo, zoco i ndyehe xaan ñu tundoho ta i sihi ñu vaty ñá zandoo ñu sii ra Ndyoo vazu sihi ñu sa caty ra. Sito ñu vaty tatu ma zandoo ñu sa sino iñi ñu cua nandoto ñu minoo cuhva vaha xaan ca.

³⁶ Inga ñiyivi tahan xaan ñu tundoho vaty sacu ndyaa xaan ñiyivi sii ñu, ta i cañi ñu sii ñu, ta cuhva ndya sihñi ñu sii ñu sihin cadena ta tyih i ñu sii ñu vehe caa.

³⁷ I cañi ñiyivi sihin yuu sii inga ñiyivi sino iñi sii ra Ndyoo, ta sii inga ñu i sahndya zava ñu. I nducu coto ihñi xaan ñu sii ñu. I sahñi ñu sii ñu sihin espada. Inga ñiyivi, ñahñi zahma ñu sicoo. I ndihvi ñu ñii mvee ticaty ta ñii mvee. Ndahvi xaan ñu. Ndyehe xaan ñu tundoho. Ta quiñi xaan i zavaha ñiyivi sihin ñu.

³⁸ Vaha xaan vaha xaan maa ñu sino iñi cuan, ta yaha xaan quiñi i zavaha ñiyivi ñuu ñiyivi sihin ñu. I sica noo ñu nu yoñi ñiyivi iyo ta yucu. Ta i quihvi xehe ñu yavi yuu ta yavi ñuhu.

³⁹ Tandihí ñu cuan, ñi xaan i cuu iñi ñu sii ra Ndyoo, ta vaha i cahan ra Ndyoo sa cuenda ñu, zoco ñá ñihi ñu sa sa catyi ra Ndyoo vatyí cua cuhva ra sii ñu.

⁴⁰ Vatyí cuñi ra Ndyoo sa cua cuatu ñu ta ñihi ñu sa vaha ca ñi ñi sihin maa yo. ñi ñi sihin maa yo cua nduvaha xaan ñu ityi nuu ra.

12

Nanacohon iñi yo sii ra Jesús tandihí saha

¹ Cuaha xaan ñiyivi sa ñi xaan i cuu iñi sii ra Ndyoo ta sihi ñu ta ndyehe ñu sii maa yo vityí. Yucuan cuenda nazandoo yo sii tandihí sa zayanga sii yo, ta cua cuu cundyico yo sii ra Cristo. Ta nazandoo yo cuatyí yo vatyí cuu si tañi minoo xayú saha yo. Ta nazandyee xaan yo iñi yo ta zañihi yo cuhun yo ityi nuu sihin Tuhun Ndyoo.

² Nanacohon iñi yo sii ra Jesús tandihí saha. Maa ra cuu ra zañaha sii yo cuhva cuñi si sa cunhi xaan iñi yo sii ra Ndyoo. I sito ra vatyí zhi xaan cua cuñi ra cuee ca, ta yucuan cuenda i saha ra sa cahñi ñiyivi sii ra. Ñá tyaa ra yahvi sii ticahan nuu sa cuu ra. Ta vityí ndyaa ra siyo cuaha ra Ndyoo.

³ Tatu cuñi ndo sa ma cundihí iñi ndo ta ma ndu-uu iñi ndo sa zatyíño ndo tyiño ra Ndyoo, zaha ndo cuenda cuhva i zandyee xaan ra Jesús iñi ra sihin cuhva i zavaha xaan ñiyivi sa ña vaha sihin ra.

⁴ Vatyí maa ndo tañaha ca cundyee iñi ndo sa zavaha ndo sa vaha cuhva ndya cati ñiñi ndo saha sa ñá zavaha ndo sa ña vaha.

⁵ Ta ¿atu sa i naa iñi ndo cuhva vaha cahan Tuhun Ndyoo sihin ndo tañi sa zehe ra Ndyoo cuu sii ndo? Ta catyi si tyehen:

Zehe luhli, tyoon yahvi tatu zandoho ra Ndyoo suun,

Ta zandyeeun iñun tatu cañi ra suun;

⁶ Vatyí tatu cuñi xaan ra Ndyoo sii minoo ra, zandoho ra sii ra, Ta ñihi xaan cañi ra sii tandihí ñiyivi tñi cuenda ra.

⁷ Cañi ra Ndyoo sii ndo vatyí cuñi ra sa cua cutuhva vaha ndo. Tacuan zavaha ra vatyí zehe ra cuu sii ndo. Yoñi zehe ñiyivi sa ma ndoho si zacuu zutu si.

⁸ Tuhva ra Ndyoo cañi zuhva sii tandihí yo sa cuu zehe ra. Tatu ma cañi ra sii ndo, cuñi si catyi si vatyí yivi zehe ra cuu sii ndo sa ndisa.

⁹ Ta inga tucu cuhva, tyaa yo yahvi sii zutu yo, ra ñuu ñiyivi ya, tatu zandoho ra sii yo. ¿Atu ña ñiñi xaan ca sa tyaa yo yahvi sii ra Ndyoo ta cundito yo tandihí cui tyiemvu?

¹⁰ Vatyí zutu yo sa iyo ñuu ñiyivi ya, i cañi ra sii yo zuhva quivi cuhva cuñi maa ra. Zoco ra Ndyoo Zutu yo, cañi ra sii yo minoo cuhva sa cua tyindyee sii yo. Ta cuhva cuan, cua nduu yo ñiyivi vaha xaan tañi maa ra.

¹¹ Quivi sa ndoho yo, ña zhi cuñi yo. Nducuihya iñi yo zacuu si. Zoco cuee ca ta nduu yo ñiyivi vaha sa ndisa cui ta zhi cuñi yo tatu cutuhva yo sa zañaha ra Ndyoo sii yo quivi cañi ra sii yo.

Ica xaan tatu ma tyaa yo yahvi sa cahan ra Ndyoo

¹² Yucuan cuenda zandyee ndo iñi ndo, ta ma caca iñi ndo vatyí ma cuu ca cundyico ndo ityi ra Cristo.

¹³ Caca tandihí ndo ityi vaha. Tacuan ta yoñi ndo cua ndoyo ñuhu vazu ta sino vaha ca iñi ndo. Cua ndundyee xaan ca iñi ndo sihin Tuhun Ndyoo.

¹⁴ Nducu ndo cuhva coo sa taxi sii ndo sihin tandihí ñiyivi. Ta nducu ndo cuhva cuu ndo niyivi vaha xaan tañi tahan si cuu ñiyivi ra Ndyoo. Vatyí tatu ña tacuan iyo ndo, ma ndyehe ndo sii ra Ndyoo.

¹⁵ Zaha vaha ndo cuenda sii minoo ndo ta sii inga ndo coto coo minoo ndoho ma sino ca iñi sii ra Cristo, ta ma ñihi ca ra cuan sa cua cuhva ra Ndyoo sii ndo. Ta coto quita minoo ra sa tacuan ta cua zañaha ra minoo cuhva ña vaha nu yucu ndo ta ma sino ca iñi ndo, ta cuaha xaan ndo cua tiví.

¹⁶ Ta coto ñáha cuzu ndo sihin minoo ñaha tatu yivi ñazhi ndo cuu, ta coto ñáha zavaha ndo minoo sa ña vaha ta cua zañaha si vatyí ña sino iñi ndo sii ra Ndyoo sa ndisa

cuii. Tañi ra Esaú ta sa naha, i cuñi ra sa cuzama ra, ta yucuan cuenda i xico ra tandihi ndaha tyiño sa cua tahan si sii ra sii yañi ra, ta ñá ñiñi ra sii si.

¹⁷ Sa sito ndo vatyí cuee ca i cuñi ra nañiñi ra sa vaha cuan, zoco ñá cuu ca. Ñá cuu ca ndu-uu iñi ra cuatyí ra vazu i sacu xaan ra.

¹⁸ Ta maa ndo, ma tahan ca si sii ndo tañi i tahan si sii ñiyivi hebreo vatyí ña vasi ndo nu ndyaa minoo sa cuu ndyehe ndo. Ma ndyehe ca ndo sa cayu xaan ñúhu ta cuaha xaan inga sa iyo tañi sa ñaa ta tyiyatyí. (Tacuan i tahan ñiyivi hebreo quivi i saha ra Ndyoo ley ra sii ñu.)

¹⁹ Ñá siñi maa ndo nduzu cutu ta nduzu ra Ndyoo tañi quivi i cahan ra sihin ñu hebreo ndya cuhva sica ñu tumañi iñi sa ma cahan ca ra.

²⁰ Ñá cuu cundyee iñi ñu tyiño i tava ra Ndyoo vatyí i catyí ra vatyí tatu vazu minoo quiti cua tñn sii yucu Sinaí cuan, cuñi si sa cahñi ñiyivi sii ti.

²¹ Iyo xaan i cuu tandihi cuhva cuan ndya cuhva ndya i catyí ra Moisés: “Yuhu xein ndya cuhva nihi.” I catyí ra quivi cuan.

²² Zoco maa ndo cuahan ndo ndya inga yucu sa nañi Sión. Yucuan cuu ñuu maa ra Ndyoo ndito. Ñuu Jerusalén sa ndyaa andivi cuu si. Nu iyo cuaha xaan cuaha xaan ángel sa zii xaan cuñi.

²³ Ta nu yucu tandihi ñiyivi sino iñi, ñu sa ndyaa zivi andivi. Ta nu ndyaa ra Ndyoo, ra cua tyicuhva sii tandihi ñiyivi, ta nu yucu añima ñiyivi vaha, ta sa nduu ñu ñiyivi ñahñi ca cuatyí.

²⁴ Ta nu ndyaa ra Jesús, ra sa cahan saha ñiyivi sa cuenda tyiño saa i zandaa ra Ndyoo sihin ñiyivi. I sati niñi ra Jesús vatyí cua ndasi cuatyí ñiyivi, ta ña sica si sa cuu ñu tañi i zavaha niñi ra Abel.

²⁵ Yucuan cuenda coto vaha ndo sii ndo ta tyaa ndo yahvi sii ra cahan sihin ndo vatyí tatu ñá cacu ñiyivi hebreo sa ñá tyaa ñu yahvi sii ra Moisés, vihi cuii ca maa yo tatu ma tyaa yo yahvi sii ra cahan ndya andivi.

²⁶ Quivi i cahan ra ndya Yucu Sinaí i zacanda nduzu ra sii ñuhu. Ta vityí catyí ra: “Inga saha cua zacande ñuhu ñuu ñiyivi ta andivi tucu.”

²⁷ Ta sa cahan ra cuhva cuan cuñi si catyí si vatyí quivi cua zacanda ra sii si ta cua zanaa ra sii tandihi sa cuu naa, ta cua nandoo maa ñi sa ma cuu cunaa. Nu ndyaca ñaha ra Ndyoo cuu sa ma cuu cunaa,

²⁸ ta yucuan cua cundyaa maa yo. Yucuan cuenda nazacahnu xaan yo sii ra Ndyoo cuhva cuñi maa ra. Ta nayuhu xaan yo sii ra.

²⁹ Vatyí ra cu Ndyoo maa yo ñúhu cuu ra, ta cua zanaa ra sii tandihi sa ña vaha.

13

Cuhva cuñi si zavaha yo ta cua tahan iñi ra Ndyoo

¹ Ma zandoo ndo sa cuñi xaan ndo sii tandihi hermano.

² Cuhva ndo sa casi ñiyivi saa vehe ndo vazu ña sito vaha ndo sii ñu vatyí iyo saha i zacasi ñiyivi sii ángel cuhva cuan, ta ña sito ñu tatu ángel cuu ra.

³ Ma naa iñi ndo sii ra ñoho vehe caa. Cundahvi iñi ndo sii ra tañi sa maa ndo ñoho vehe caa. Ta cundahvi iñi ndo sii ra zavaha xaan ñiyivi sa ña vaha sihin vatyí sa tuu iñi ndo yozo caa iyo tundoho cuan vatyí ñiyivi cuu tucu maa ndo.

⁴ Tatu sa tindaha ndo, tyaa ndo yahvi sii si, ta ma zavaha ndo sa quiñi sihin inga ñaha a sihin inga rayii. Cua tasi tuñi xaan ra Ndyoo sii ñiyivi zavaha sa quiñi tañi ra quixi sihin inga ñaha sa yivi ñazihí ra cuu.

⁵ Ma cuu ndo ñiyivi sa cuñi xaan xuhun. Ndo ndo vaha sihin sa iyo sii ndo vatyí sa i catyí maa ra Ndyoo: “Ma zandoi sii ndo, ta ma zañe sii ndo.”

⁶ Yucuan cuenda ñii xaan cuu iñi yo ta catyí yo:

Ra Ndyoo cuu ra tyindyee sii;

Ma yuhi ñaa sa cua zavaha ñiyivi sii.

⁷ Nacohon iñi ndo sii ra i zacuaha Tuhun Ndyoo sii ndo. Nacañi iñi ndo sa cuenda cuhva i quita vaha maa ra, ta ñi xaan cuu iñi ndo tañi sa ñi iñi maa ra.

⁸ Ña zama ra Jesucristo. Zuun ra cuu ra icu, ta zuun ra cuu ra vityi ta tandihi cuii tyiemvu.

⁹ Ma zandoo ndo ityi vaha, ta ma sino iñi ndo ñaa tuhun saa a ñaa sa ziiñi cua zacuaha ñiyivi. Saha maa ra Ndyoo tumañi iñi sii yo, ta tacuan ta cua ndundyee iñi yo sihin Tuhun Ndyoo ta yivi sa caca xaan iñi yo sa cuenda ñaa sa ma cuu casi yo vatyí ña tacuan ta nduu yo ñiyivi vaha ityi nuu ra Ndyoo. Ñahñi tyindyee cuhva cuan sii ñiyivi tyaa xaan yahvi sii si.

¹⁰ Iyo minoo altar sa cuenda maa yo. Cruz nu i sihi ra Cristo cuu si. Ta ma cuu tyindyee si sii ñiyivi nducu cuhva cacu ñu sihin sa tyaa xaan ñu yahvi sii cuhva sahnu cuan tañi zavaha ñiyivi hebreo sa ña sino iñi sii ra Cristo.

¹¹ Sihin cuhva sahnu cuan, i sahñi ra cu zutu ya cahnu quití sa cuenda cuatyí ñiyivi. I sindyaca ra ñiñi ti sisi vehe ñuhu nu ii, ta i sahmi ra sii ti ndya zava yuñuu.

¹² Yucuan cuenda i ndyehe tucu ra Jesús tundoho ndya zava yuñuu vatyí cua zanduvaha ra sii ñiyivi sihin ñiñi maa ra.

¹³ Yucuan cuenda nacuhun maa yo ndya zava yuñuu sihin ra Cristo. (Cuñi si catyi si vatyí ma cundyico ca yo costumbre sahnu tañi zavaha inga ñiyivi. Cua cundyico yo sii ra Cristo ta ziiñi ñiyivi cuu yo.) Natyaa siyo yo sii yo sii costumbre sahnu vazu ndyehe yo tundoho sa cuenda si.

¹⁴ Vatyí ñuu ñiyivi ya; yivi ñuu maa yo cuu si; nanducu maa yo sii minoo ñuu sa cua coo cuee ca.

¹⁵ Nanducu yo sa cua tyindyee ra Jesús sii yo, ta ziqui cua nacuhva yo tyahvi ndyoo sii ra Ndyoo tandihi cuii cuhva. Cua catyi yo sihin ñiyivi vatyí sito yo sii ra.

¹⁶ Ma zaña ndo sa zavaha ndo sa vaha ta sa zasa ndo sa sii ndo sii ñiyivi ndahvi vatyí zii xaan cuñi ra Ndyoo tatu zacahnu yo sii ra cuhva cuan.

¹⁷ Tyaa ndo yahvi sii ra cu nuu sii ndo sa cuenda Tuhun Ndyoo. Zavaha ndo cuhva catyi ra vatyí zacuenda ra sii ndo ta ma ndoyo ñuhu ndo. Cua nacuhva ra cuenda sii ra Ndyoo sa cuenda tyiño ra. Tatu zavaha maa ndo sa vaha, zii cua cuñi ra quivi cua cuhva cuenda ra, zoco tatu ma zavaha ndo sa vaha, ña zii cua cuñi ra, ta cua ndoho ndo.

¹⁸ Cahan ndo sihin ra Ndyoo sa cuenda ndi vatyí sito vaha ndi vatyí zavaha ndi sa vaha, ta cuñi xaan ndi zavaha ca ndi sii si.

¹⁹ Ta zañiñi sii ndo vatyí caca ca ndo sii ra Ndyoo sa cuende vatyí tacuan ta cua cuu quite ihya ta quisi nanuhi nu yucu ndo yatyí ca.

²⁰ Maa ra Ndyoo cuu ra saha sa coo sa taxi añaima yo. I zanandoto ra sii ra Jesucristo, ra ndyaca ñaha sii yo. Ra Jesús cuu ra zacuenda xaan sii yo tañi zacuenda minoo ra cu pastor sii mvee ticatyí zono ra. Sa cuenda sa i sati ñiñi ra Jesús quivi i zandaa ra Ndyoo tyiño saa sihin yo ta i nduu ra pastor cuenda yo.

²¹ Natyindyee maa ra Ndyoo sii ndo sihin tundyee iñi maa ra sa cuenda ra Jesucristo, ta cua cuu zavaha ndo tandihi cuhva cuñi maa ra. Ta nazacahnu yo sii ra Jesucristo tandihi cuii tyiemvu. Ta nacuu si tacuan, ta nacuu si sa ndisa.

²² Zoco sa ndyoo ñi ndoho hermanos tyizoho vaha ndo sa catyi ihya vatyí ña cuaha xaan tyei.

²³ Cuñi sa cua coto ndo vatyí sa quita ra hermano Timoteo vehe caa vityi. Tatu saa ra ihya yatyí, cua cuhin sihin ra nu yucu ndo.

²⁴ Cuhva ndo minoo nacumi sii tandihi ra hermano ta sii ra hermano ra cu nuu sii ndo. Ra hermano nu cu si Italia tasi ra minoo nacumi sii ndo.

²⁵ Nacuhva xaan ra Ndyoo tumañi iñi sii tandihi ndo.

Minoo Carta I Tyaa Ra Santiago

Tyaa ra Santiago carta ya sii ñiyivi hebreo ñu i sitya cuatyí

¹ Yuhvi ra Santiago cui minoo muzu sii ra Ndyoo ta sii ra Jesucristo, ra ndyaca ñaha sii yo. Tasi carta ya sii tandihi ndoho ñiyivi hebreo. Vityi sino iñi ndo sii ra Jesucristo, ta yucu ndo ityi cuan ityi ya. Tasi minoo nacumi sii tandihi ndo.

Sa siñi tuñi sa saha ra Ndyoo

² Ziñ xaan cuñi ndo hermanos tatu ndyehe xaan ndo tundoho

³ vatyí sa sito ndo vatyí tatu saha ra Ndyoo prueba sii ndo, cuñi ra coto ra tatu sino ndisa cuii iñi ndo sii ra. Ta sihin cuhva cuan, ta cua ndundyee xaan ca iñi ndo sihin Tuhun Ndyoo.

⁴ Ta nandundyee xaan iñi ndo minoo sa ndisa cuii ta ñahñi ca cua cumañi sii ndo. Cua cuu ndo ñiyivi vaha sa ndisa cuii, ta yoñi cua cuu tyaa cuatyí sata ndo.

⁵ Tatu iyo ndo ña sito ndo ñaa sa cuñi ra Ndyoo cua zavaha ndo, nducu tuhun ndo sii ra. Cua catyí casi ra sihin ndo, ta ma cahan ra sii ndo.

⁶ Zoco ñiñ cuu iñi ndo ta nducu tuhun ndo vatyí tatu ña ñiñ cuu iñi ndo cuu ndo tañi tyañuhu. Ndaa noo ñi maa si cuhva tyindaha tatyí sii si.

⁷⁻⁸ Minoo ra ña ñiñ vaha iñi sii ra Ndyoo, uu sica iñi ra tandihi saha, ta ma cuu caca iñi ra vatyí cua cuhva ra Ndyoo sa sica ra sii ra.

⁹ Ra hermano ra ndahvi, nacuziñ xaan cuñi ra vatyí zanducahnu xaan ra Cristo sii ra.

¹⁰ Ta ra hermano ra cuca, nacuziñ xaan cuñi ra vazu cua nduluhlu ra vatyí tañi minoo ita ñi sa iyo sisi cuhu cuu ra. Cua cuu ra, zoco cua cuhun ra gloria.

¹¹ Caña ñicandyi, ta ndu-ihñi xaan, ta xii cuhu ta coyo ita si. Ña tyaqui ca caa si. Zuun ñi cuhva cuan cua tahan si sii ra cuca, vazu zatyíño xaan ra.

Cundyee iñi ndo tatu nducu coto ihñi cuihna sii ndo

¹² Ziñ xaan cua cuu sii minoo ra tatu cundyee iñi ra ta ma ndoyo ñuhu ra tatu nducu coto ihñi cuihna sii ra. Vatyí tatu quita vaha ra sa ndyehe ra tundoho cuan, cua cuhva ra Ndyoo minoo corona sii ra sa cua cundito ra tandihi cuii tyiemvu. Sa catyí ra Ndyoo vatyí cua cuhva ra sii si sii ñiyivi cuñi xaan sii ra.

¹³ Tatu vasi minoo prueba ziqui ndo ta cuñi ndo zavaha ndo cuatyí, ma catyí ndo: “Maa ra Ndyoo nducu coto ihñi sii.” Vatyí ña cuñi ra Ndyoo sa zavaha ndo sa ña vaha, vatyí maa ra ña cuñi ra zavaha ra sa ña vaha numinoo saha, ta yucuan cuenda ña cuñi ra sa zavaha ñiyivi sa ña vaha.

¹⁴ Minoo minoo yo iyo cuatyí añima yo, ta yucuan cuenda cuñi xaan yo zavaha yo sa ña vaha.

¹⁵ Xihna ca cuñi xaan yo zavaha yo sa ña vaha, ta ziqui cacu cuatyí. Ta tatu sa yaha zavaha yo cuatyí, ta ziqui nducuaha xaan ca sa ña vaha zavaha yo. Ta nu ndihi tuhun cua cahñi cuii si añima yo.

¹⁶ Ndoho hermanos cuñi xein sii ndo. Ma zandavi ñaha ndo sii ndo ta caca iñi ndo inga cuhva.

¹⁷ Tandihi sa vaha ta sa ndoo sa cuenda ra Ndyoo cuu si. Maa ra cuu ra i zavaha ñúhu. Ña zama ra cuhva iyo ra, ta ñahñi sa ñaa iyo sii ra. (Sa ñaa cuan cuu sa ña saha coto ñiyivi sa vaha.)

¹⁸ Sa cuenda sa cuñi maa ra, ta i saha ra minoo cuhva saa coo yo sihin Tuhun Vaha ra. Tacuan i zavaha ra vatyí maa yo cua cuu sa vaha xaan ca sii tandihi sa i zavaha ra.

Cuhva zavaha yo cuhva cuñi ra Ndyoo sa ndisa cuii

¹⁹ Coto ndo cuhva ya, ndoho hermanos. Tandihi cuii maa yo cuñi si sa tyizoho vaha yo. Ma yatyi xaan cahan yo, ta ma yatyi xaan cuxaan yo.

²⁰ Vatyí tatu cuxaan yo, ña zavaha yo cuhva cuñi ra Ndyoo sihin cuhva cuan.

²¹ Yucuan cuenda zaña ndo sii tandihi sa quiñi ta sa ña vaha, ta vii ñi tñin cuenda vaha ndo sii Tuhun Ndyoo sa iyo añima ndo vatyí cua zacacu si cuan sii ndo.

²² Zoco zavaha ndisa cuii ndo cuhva catyí Tuhun Ndyoo ta yivi sa tyizoho ñi maa ndo sii si vatyí tatu cuenda tyizoho ñi maa ndo, zuun ñi sii maa ndo zandavi ñaha ndo.

²³ Tatu cuenda tyizoho ñi maa minoo ra cuhva catyí Tuhun Ndyoo ta ña zavaha ra sa catyí si, cuu ra tañi minoo ra ndyehe sii sihin ino.

²⁴ Ndyehe ra sii ra ta ziqui cuahan ra, ta yatyí xaan naa iñi ra cuhva caa ra.

²⁵ Zoco tatu ndyehe minoo ra cuhva catyí Tuhun maa ra Ndyoo, nacatyí si sihin ra tandihi sa cuñi ra Ndyoo sa coto ra, ta yucuan cuu ley ra Ndyoo sa ndasi sii yo. Tatu zavaha ra cuhva catyí si ta ma naa ñi iñi ra sii si, cua tyindyee ra Ndyoo sii ra sihin tandihi sa zavaha ra.

²⁶ Zoco tatu sica iñi minoo ra vatyí zavaha ra cuhva cuñi ra Ndyoo ta ña zacuenda ra yuhu ra, zuun ñi sii maa ra zandavi ñaha ra, ta sa caha ñi catyí ra vatyí sino iñi ra sii ra Ndyoo.

²⁷ Cuhva zavaha yo cuhva cuñi ra Ndyoo sa ndisa cuii ta cuhva zacahnu yo sii ra cuhva cuñi maa ra sa ndisa, cuu sa tyindyee yo sii ñu ndahvi, ñu i sihi yii, ta sii sa ndyíhi ndahvi sihin tundoho sa ndyehe ñu ta ma zavaha yo cuhva zavaha ñiyivi ña sito sii ra Ndyoo.

2

Ña vaha tatu tyaa ca yo yahvi sii ra hermano cuca ta ziqui sii ra hermano ndahvi

¹ Hermanos, tatu sino ndisa cuii iñi ndo sii ra Jesucristo ra ndyaca ñaha sii yo, ma tyaa xaan ca ndo yahvi sii minoo hermano ta ziqui sii inga.

² Vatyí vasi ra hermano nu yucu ndo ta ñoho ra zahma vaha xaan, ta ñoho xehe xuhun cuaan nu ndaha ra. Ta vasi tucu inga hermano, ndahvi ñi caa vasi ra.

³ Ta tyaa ca ndo yahvi sii ra ñoho zahma vaha ta catyí ndo: “Ihya cundyoön nu tyayu vaha.” Ta sihin ra ndahvi catyí ndo: “Yucuan cuiñi ndyoön a cundyoön nu ñuhu ñi ña.”

⁴ Cuhva cuan zaziin ndo sii ra tahan ndo. Ta nduu ndo ñiyivi sica iñi minoo cuhva ña vaha vatyí tyaa ca ndo yahvi sii ra cuca.

⁵ Cuñi xein sii ndo hermanos. Tyizoho vaha ndo sa quehin. I casi ra Ndyoo sii ñiyivi ndahvi vatyí cua sino xaan iñi ñu sii ra, ta cua ñihi ñu sa saha maa ra ta cuhun ñu nu ndyaca ñaha ra tañi sa i catyí ra. Cua tñin cuenda ra sii ñiyivi cuñi xaan sii ra nu ndyaca ñaha ra.

⁶ Zoco maa ndo ña tyaa ndo yahvi sii ra ndahvi. ¿Atu yivi ra cuca cuu ra zavaha xaan sa ña vaha sihin ndo ta sindyaca sii ndo nuu ra juez?

⁷ ¿Atu yivi ra cuca cuu ra quiñi xaan cahan sii ra Jesucristo? Ta maa ndo cuu ra sino iñi sii ra Jesús.

⁸ Zavaha ndo sa vaha tatu tyaa ndo yahvi sa ndisa cuii sii ley maa ra Ndyoo sa zacuahá ra Jesús. Sa ñiñi xaan ca cuu nu catyí si tyehen: “Cuñi xoon sii inga ñiyivi tañi cuñun sii moo.”

⁹ Zoco tatu tyaa ca ndo yahvi sii minoo ñiyivi ta ziqui sii inga, zavaha ndo cuatyí, ta catyí ley ra Ndyoo vatyí ra iyo cuatyí cuu ndo.

¹⁰ Tatu catyí yo vatyí tyaa yo yahvi sii ley ra Ndyoo, ta ña tyaa yo yahvi sii minoo si, ndoo cuatyí ziqui yo sa cuenda tandihi si.

¹¹ Maa ra Ndyoo i catyí: “Ma cuzu ndo sihin minoo ñaha tatu yivi ñazíhi ndo cuu.” Ta i catyí tucu ra: “Ma cahñi ndo ñiyivi.” Vazu ña zavohon cuatyí sa xihna ñi, zoco tatu cahñun ñiyivi, zuun ñi ña tyoon yahvi ley ra Ndyoo, ta iyo cuatyun ityí nuu maa ra.

¹² Cua tyicuhva ra Ndyoo sii ndo cuhva catyí tyiño saa i zandaa ra. Yucuan cuenda zacuenda ndo sii ndo sihin cuhva cahan ndo ta sihin cuhva zavaha ndo.

¹³ Vatyí ma cundahvi iñi ra Ndyoo sii ndo quiñi tyicuhva ra sii ndo tatu ña cundahvi iñi ndo sii ñiyivi. Zoco tatu cundahvi iñi ndo sii ñiyivi, cua cundahvi tucu iñi maa ra Ndyoo sii ndo.

Tatu ñi cuu iñi yo sii ra Ndyoo sa ndisa, cua zatyíño yo tyiño ra

¹⁴ Hermanos, ¿yozo caa cua tyindyee si sii minoo ra tatu catyi ra vatyi ñii xaan cuu iñi ra zoco ñahñi tyiño ra Ndyoo zavaha ra? Sihin sa ñii ñi iñi ra cuan ¿atu cuu cacu ra?

¹⁵ Tatu iyo minoo hermano a minoo hermana ta ñahñi zahma ñu iyo ta sizoco ñu

¹⁶ ta minoo ndo catyi ndo sihin ñu: “Natyindyee ra Ndyoo suun. Vaha xaan tatu coo zahmon ta sa casun.” Tatu tacuan cohon ta ña sohon sa siñi ñuhu sii ñu ¿yozo caa tyindyee si?

¹⁷ Zuun ñi cuhva cuan, vazu ñii xaan iñi ndo catyi ndo, zoco tatu ñahñi maa sa zavaha ndo, ña ñii iñi ndo sa ndisa cuii tatu tacuan caa iyo ndo.

¹⁸ Iyo ndo cua catyi ndo: “Tatu ñii iñi yo sii ra Ndyoo, sa vaha tacuan ñi.” Zoco yuhvi catyi vatyi ñiñi xaan sa zavaha yo sa vaha vatyi tatu ma zavaha yo sa vaha yoñi cua coto tatu ñii iñi yo sii ra Ndyoo a ña ñii iñi yo. Yuhvi zavehi sa vaha, ta cuhva cuan cuu ndyehe ñiyivi vatyi ñii xaan iñi.

¹⁹ Iyo ndo catyi ndo vatyi sino iñi ndo vatyi iyo minoo ñi Ndyoo. Vaha catyun sa sino iñun sa iyo minoo Ndyoo, zoco cuhva cuan sino tucu iñi tandiñi cuihna, ta yuhu xaan si ndya cuhva ñihi si.

²⁰ Ñahñi sa siñi tuñi vaha iyo sii ndo. ¿Ama cua cutuhva ndo vatyi ñahñi maa cuu si sa catyi yo vatyi sino iñi yo tatu ma zavaha yo cuhva cuñi ra Ndyoo?

²¹ Nduvaha ra Abraham ñiyivi sañu sii yo ityi nuu ra Ndyoo sa cuenda cuhva i zavaha ra quivi cua cuhva ra sii ra Isaac zehe ra sii ra Ndyoo ta cua cahñi ra sii ra. I saha ra Abraham sii ra Isaac sii ra Ndyoo vazu ndaha cuu ra cuñi ra.

²² Ñii xaan i cuu iñi ra Abraham sii ra Ndyoo, ta yucuan cuenda i zavaha ra cuhva i catyi ra. Ta sa cuenda cuhva i zavaha ra ta ñii ca i nduu iñi ra.

²³ Ta i cuu si cuhva catyi Tuhun Ndyoo: “I sino xaan iñi ra Abraham sii ra Ndyoo, ta i ndyehe ra Ndyoo sii ra tañi sa ñahñi cuatyi ra.” Ta i catyi ra Ndyoo vatyi amigo ra cuu sii ra Abraham.

²⁴ Cuhva cuan cuu ndyehe ndo vatyi nduvaha yo ityi nuu ra Ndyoo sa cuenda cuhva zavaha yo, ta yivi sa cuenda sa sino ñi iñi yo sii ra.

²⁵ Ta zuun ñi cuhva cuan i cuu si sihin ña Rahab minoo ñaha zii iñi. I catyi ra Ndyoo vatyi ñahñi ca cuatyi ña vatyi i zavaha ña minoo sa vaha quivi i tiin cuenda vaha ña sii ra i tasi ra Josué. I tyixehe ña sii ra, ta ziqui i natasi ña sii ra inga ityi vatyi ma cahñi ñiyivi ña vaha sii ra.

²⁶ Tañi sa quita añima yo tatu sa sihi coño ñuhu yo, zuun ñi tacuan tucu cuu si tatu catyi yo vatyi sino iñi yo sii ra Ndyoo ta ñahñi sa zavaha yo sa cuenda ra. Ñahñi yahvi ndyaa tuhun cahan yo sa sino iñi yo. Ña sino ndisa cuii iñi yo.

3

Cuhva cuñi si zacuenda yo yuhu yo

¹ Ma cuaha xaan ndoho cuñi ndo cuu ndo ra zacuaha sii inga ndo vatyi sa sito ndo vatyi nduhvi ra zacuaha, ñihi ca cua tyicuhva ra Ndyoo sii ndi quivi cua tasi tuñi ra sii ñiyivi tatu ña vaha zacuaha ndi.

² Ta tandiñi cuii yo iyo saha zavaha yo sa ña vaha a zama yuhu yo. Tatu iyo minoo ra cuu zacuenda ra yuhu ra, ñahñi maa cuatyi ra iyo. Cuu cundyaca ñaha ra sii ra sa ndisa cuii.

³ Cuu cundyaca ñaha yo sii minoo caballo cahnu tatu tyihi yo minoo freno yuhu ti.

⁴ Nahnu xaan barco, zoco vazu ñihi xaan caa tatyí cuu zacuhun ra zacaca sii tu ndya ityi cuñi maa ra sihin minoo caa luhlu sa ndyaa xiñi tu.

⁵ Ta zuun ñi cuhva cuan, luhlu xaan yaa yo, zoco cuaha xaan sa ña vaha cuu zavaha si. Tañi minoo ñuhu luhlu tatu sa natiin si cua cahmi si candii cuhu cahnu.

⁶ Ta tañi minoo ñuhu cuu yaa yo. Cuaha xaan sa ña vaha cahan si. Zativi si sii tandiñi yo, ta zativi si sii yo tandiñi quivi iyo yo ihya ñuu ñiyivi. Andyaya cuu nu quita tandiñi tyiño ña vaha sa zavaha yaa yo.

⁷ Vatyi cuu zandumazu ñiyivi sii tandiñi cuii nuu quití xaan a zaa a coo a quití iyo sisi tyañuhu, ta cuu cundyaca ñaha ra sii ti.

⁸ Zoco yaa ra ña cuu cundyaca ñaha ra. Ndyaa vaha ñi cuhva ndyaa listo si sa cahan si sa quiñi caa ta zativi si sii inga ñiyivi.

⁹ Sihin yaa yo zacahnu yo sii ra Ndyoo Zutu yo, ra ndyaca ñaha sii yo. Ta zuun ñi sihin yaa yo cahan yo ndya vaha ñi sii ñiyivi, ta maa ra Ndyoo i zavaha sii ñu vaty cuu ñu zehe ra.

¹⁰ Zuun ñi sihin yuhu yo zacahnu yo sii ra Ndyoo. Ta zuun ñi sihin yuhu yo cahan yo ndya vaha ñi sii ñiyivi. Hermanos, ña tahan si zacuu yo cuhva cuan.

¹¹ ¿Atu quita ndutya cui ta ndutya quiñi caa ñi zoco?

¹² ¿Atu cuu quihin yo mango numinoo tundyica a quihin yo visi numinoo tuticaha? Ma cuu. Ta zuun ñi cuhva cuan ma cuu cuhun yo tyañuhu ta tava yo ndutya vaha.

Sa siñi tuñi sa saha ra Ndyoo

¹³ Tatu iyo cuaha sa siñi tuñi vaha suun, zañohon vaty tacuan iyon sihin cuhva zavohon. Ta ma zacahnun suun ta ma catyun vaty sito xoon.

¹⁴ Zoco tatu cucuhna iñun, a tatu cuñun vaty ñi sii moo cua tyaa ñiyivi yahvi, ma zacahnun suun ta catyun vaty iyo xaan sa siñi tuñi suun. Cuhva cuan nduun minoo ra vaty vaty ña zavohon sa vaha.

¹⁵ Ihya cuu sa siñi tuñi sa iyo ñuu ñiyivi ya, cuhva sica iñi maa ñiyivi, ta yivi cuhva sica iñi Taty li. Sa siñi tuñi sii ra cuhna cuu si.

¹⁶ Vaty tandihi nu iyo sa cuhna iñi ñiyivi ta cuñi xaan ñu sa ñi sii maa ñu tyaa ñiyivi yahvi, yucuan iyo xaan tizih ta iyo tandihi cui nuu cuaty.

¹⁷ Zoco sa siñi tuñi vaha sa saha ra Ndyoo, maa ñi sa vaha cua zavaha ñiyivi tatu iyo si sii ñu. Ma coo tizih nu yucu ñu. Vii ñi cua coo ñu. Ta cuu natuhun tahan vaha ñu iyo sa siñi tuñi vaha sii, ta ma cuxaan ñu. Iyo tumañi iñi sii ñu sihin ñiyivi. Ta cuaha xaan inga nuu tyiño vaha zavaha ñiyivi iyo sa siñi tuñi sa saha ra Ndyoo. Ma ndu-uu iñi ñu, ta ma zandavi ñaha ñu.

¹⁸ Ta ñiyivi nducu cuhva coo sa taxi, yucuan cuu ñu tasi siti vaha. Ta sa cua naquihin ñu cuu maa ñi sa vaha. (Cuñi si catyi si vaty cua cuu ñu ñiyivi vaha xaan tandihi saha.)

4

Ma cuñi xaan yo sa iyo ñuu ñiyivi

¹ ¿Ñaa cuenda iyo tizih nu yucu ndo ta sañi tahan ndo? Tacuan iyo ndo vaty iyo cuaha xaan sa ña vaha sa cuñi ndo zavaha ndo.

² Cuñi xaan ndo coo sa sii ndo. Yucuan cuenda sañi ndo ñiyivi. Cuñi xaan ndo sa sii inga ñiyivi, ta ma cuu ñihi ndo sii si. Yucuan cuenda iyo tizih nu yucu ndo, ta sañi tahan ndo. Ñahñi sa sii ndo iyo vaty ña sica ndo sii si sii ra Ndyoo.

³ Ta iyo saha sica ndo sii si ta ña ñihi ndo vaty ña vaha cuhva sica ndo. Sica ndo maa ñi sa cuenda sa cuzi iñi ndo.

⁴ Cuu ndo tañi minoo ñaha i zandoo sii yñ cuhva zandoo ndo sii ra Ndyoo. ¿Atu ña sito ndo vaty tatu cuñi xaan ndo sii sa iyo ñuu ñiyivi ya, nduu ndo ñiyivi xaan iñi sii ra Ndyoo? Yoo ra cuñi xaan sa ña vaha sa iyo ñuu ñiyivi ya, nduu ra minoo ra xaan iñi sii ra Ndyoo.

⁵ ¿Atu sica iñi ndo vaty sa caha ñi cuu sa catyi Tuhun Ndyoo vaty Taty li sa tyihi ra Ndyoo aña yo zacuenda xaan si sii yo? Cuñi ra Ndyoo vaty ñi sii maa ra cua cuñi xaan yo.

⁶ Tyindyee xaan ra Ndyoo sii yo. Yucuan cuenda catyi si: “Sii ñiyivi zanduluhlu sii, saha ra Ndyoo tumañi iñi. Zoco ra zacahnu sii, ña tyindyee ra Ndyoo sii ra.”

⁷ Yucuan cuenda zanduluhlu ndo sii ndo, ta tyaa ndo yahvi sii ra Ndyoo. Cuxaan ndo sihin cuhna, ta cua cono ra sii ndo.

⁸ Tuhva ndo sii ra Ndyoo, ta cua tuhva ra sii ndo. Zaña ndo sii sa ña vaha, ndoho ra iyo xaan cuaty. Ta ndoho ra cuñi zuhva sa iyo ñuu ñiyivi ya, ta zuhva cuñi tucu ndo sii ra Ndyoo, zandu-ñi ndo iñi ndo ta minoo ñi cuhva caca iñi ndo, ta ñi sii ra Ndyoo cuñi xaan ndo.

⁹ Zanducuihya ndo iñi ndo ta vacu xaan ndo sa cuenda cuatyí ndo. Nacoo tucuihya iñi sii ndo ta ma cuzii xaan iñi ndo.

¹⁰ Zanduluhlu ndo sii ndo ityi nuu ra Ndyoo, ta ziqui cua zanducahnu ra sii ndo.

Ma cahan ndo sii yañi ndo

¹¹ Ma cahan ndo sii minoo ndo ta sii inga ndo. Yoo ra cahan sii inga hermano, sahñi tahan ra sihin ley ra Ndyoo sihin cuhva cuan ta ña tyaa ra yahvi sii ley ra Ndyoo vatyí yoo ra ña zavaha cuhva catyí ley ra Ndyoo, ña tyaa ra yahvi sii si.

¹² Zoco iyo minoo ñi ra sa cuu tava ley, ta minoo ñi ra cuu catyí tatu vaha si a ña vaha si. Iyo cuhva sii ra sa zacacu ra sii ñiyivi a sa zanaa ra sii ñu. ¿Ta yoo ra cuu oo vatyí cuu catyún atu vaha a ña vaha sa zavaha ra tohon?

Ña sito yo ñaa sa cua cuu sii yo ityaan

¹³ Tyizoho ndoho ra tuhva catyí: “Vityí a ityaan cua cuhun ndi inga ñuu, ta cua yaha ndi minoo cuiya. Yucuan cua zatyíño ndi, ta cua ñihi ndi xuhun.” Catyí ndo.

¹⁴ Zoco ña sito ndo ñaa sa cua cuu sii ndo ityaan. Tañi minoo vico nuhu ñi cuu ndo. Ta vico nuhu cuan zuhva ñi cuhva ndyehe yo sii si, ta ziqui naa ñi si.

¹⁵ Yucuan cuenda inga cuhva cuñi si cahan ndo. Tyehen catyí ndo: “Tatu cuhva cuñi ra Ndyoo cuu, cua cundito ca ndi ta zavaha ndi cuhva ya.”

¹⁶ Zoco ndoho, cahnu zaha ndo sii ndo. Ta cuhva zacahnu ndo sii ndo, ña vaha.

¹⁷ Ta yoo ra sito ñaa sa cuu sa vaha ta ña zavaha ra sii si, cuatyí cuu si.

5

Minoo cuhva cua cuu sii ra cuca

¹ Tyizoho ndoho ra cuca, vacu ndo ta vacu saa ndo sa cuenda tundoho sa vasi ziqui ndo.

² Sa cuñi tyahyu sa cuca ndo, ta zahma vaha xaan ndo cua casi tiquixi.

³ Cua cuxi xuhun cuaan ndo ta xuhun cuisi ndo ta cua cuu si minoo sa ndaa vatyí ma cuu coo si tandihi tyiemvu. Ta tañi zatívi cuxi cuan sii xuhun ndo, tacuan cua tiví tucu coño nuhu maa ndo sihin núhu. Ihya cuu sa sicumi vaha xaan ndo, ta cua ndyehe ndo tundoho quívi cua tasi tuñi ra Ndyoo sii ñiyivi.

⁴ Tyizoho ndo cuhva sa sacu ra i zatyíño tyiño ndo ta ñá tyiyahvi vaha ndo sii ra. Saa nduzu ra nuu ra Ndyoo, ra ndyaca ñaha sii yo.

⁵ Vaha xaan i sicoo ndo ñuu ñiyivi ya. I zata ndo ñaa ñi maa sa cuñi maa ndo. I zandunahnu ndo sii ndo, ta vityí tahan si cuu ndo tañi zindiqui xahan.

⁶ I tyaa ndoho, ra cuca, cuatyí sata ñiyivi vaha, ta sahñi ndo sii ñu, vazu nducu ñu cuhva zacacu ñu sii ñu.

Zandyee ndo iñi ndo tandihi cuhva ta cahan ndo sihin ra Ndyoo

⁷ Ta ndoho hermanos, zandyee ndo iñi ndo ndya quívi cua quisi tucu ra ndyaca ñaha sii yo. Tañi minoo ra zatyíño sicuhu, zandyee ra iñi ra ta ndatu ra ndya coon zavi uu a uñi saha ta ziqui cuu tasi ra ta cua coo vaha itu ra.

⁸ Tacuan tucu zandyee ndo iñi ndo, ta ma yuhu ndo vatyí sa cuñi quisi tucu ra ndyaca ñaha sii yo.

⁹ Ma cahan ndo sii minoo ndo ta sii inga ndo hermanos coto catyí ra Ndyoo vatyí zavaha tucu maa ndo sa ña vaha. Sa ndyaa ra cu juez yuvehe.

¹⁰ Zaha ndo cuenda cuhva i sicoo ra profeta ta sa naha, cuhva i zandyee xaan ra iñi ra quívi i ndyehe xaan ra tundoho.

¹¹ Sito yo vatyí zii xaan cuñi ra vityí vatyí i zandyee ra iñi ra. Ta sa sito ndo cuhva i tahan ra Job ta cuhva i zandyee xaan ra iñi ra. Ta sito ndo cuhva i quita vaha ra Job quívi nu ndihi nducu coto ihñi cuhna sii ra vatyí vaha xaan maa ra Ndyoo, ta cundahvi xaan iñi ra sii ñiyivi.

¹² Ta minoo tuhun ñiñi xaan cuu sa cua catyí vityí hermano. Ma tyiñaha ndo Ndyoo nuu ñiyivi ta catyí ndo ñaa sa cua zavaha ndo a ma zavaha ndo. Ta ma cahan ndo ñaa inga

zivi cuhva cuan. Tatu cuñi ndo cahan ndo minoo cuhva catyi ndo: “Tyehen cua zavehi” a catyi ndo “ma zavehi sii si”, ta ma zama tucu ndo inga cuhva cuee ca. Tacuan ta cua coto ñiyivi vatyí tuhva ndo cahan sa ndisa, ta ma tasi tuñi ra Ndyoo sii ndo.

¹³ ¿Atu iyo ndo ndyehe ndo tundoho? Nacahan ra cuan sihin ra Ndyoo. ¿Atu zii cuñi ndo? Nacata ra zii cuñi yaa, ta nazacahnu ra sii ra Ndyoo.

¹⁴ ¿Atu iyo ndo cuhu ndo? Nacana ra cuhu sii tandihi ra sahnú vehe ñuhu, ta nacahan ra sahnú cuan sihin ra Ndyoo sa cuenda ra ta natyíhi ra zuhva azetye xiñi ra cuhu ta cahan ra zivi ra Jesús.

¹⁵ Ta tatu ñii ñi ra, cua nduvaha ra cuhu cuan. Cua zanduvaha ra Jesús sii ra, ta tatu cuhu ra vatyí i zavaha ra cuatyí, cua zandasi ra Ndyoo cuatyí ra.

¹⁶ Yucuan cuenda nacatyí ndo sihin ra tahan ndo ñaa cuatyí i zavaha ndo, ta cahan ndo sihin ra Ndyoo sa cuenda minoo ndo ta inga ndo vatyí cua nduvaha ndo. Tatu iyo minoo ra ndoo xaan ta cahan ra sihin ra Ndyoo, iyo xaan cuhva sihin oración ra. Ta ñihi xaan zatyíño si.

¹⁷ Ra Elías i cuu ra minoo ñiyivi tañi maa yo. Ta sica xaan ra sii ra Ndyoo vatyí ma coon zavi. Ta ñá coon ra nu ñuhu ñuu ñiyivi uñi cuiya zazava.

¹⁸ Ta ziqui i cahan ra sihin ra Ndyoo inga saha ta i coon xaan zavi, ta i zatyíño vaha tucu ñuhu inga saha, ta i nacoo ndaha tyíño.

¹⁹ Hermanos, tatu iyo minoo ndo quita ndo ityi vaha ta zandoo ndo tuhun ndisa, ta tatu quita inga ra zanaquihin ityi vaha sii ra ta natiin cuenda tucu ra Tuhun Ndyoo,

²⁰ cuñi si sa coto ra zanaquihin ityi vaha sii ra vatyí i zacacu ra sii minoo ra iyo cuatyí, ta ma cahun ra andyaya. Ta zanaa ra Ndyoo tandihi cuii cuatyí ra.

Sa Xihna Ñi Carta I Tyaa Ra San Pedro

Tyaa ra Pedro minoo carta sii ñiyivi sino iñi sii ra Jesucristo, ñu i sitya cuatyí

¹ Yuhvi ra Pedro, minoo apóstol ra Jesucristo cui. Maa ra i tava tyiño sii. Ta tasi carta ya sii ñiyivi ña ndyaa ca ñuu ñu. Tandihí ñu i sitya cuatyí. Ta ndyaa ñu nu cu si Ponto ta Galacia ta Capadocia ta Asia ta Bitinia.

² Maa ra Ndyoo Zutu yo i casi sii ndo vatyí tacuan i cuñi maa ra ta sa naha. Sihin Tatyí li ra i zanduvaha ra sii ndo vatyí cua tyaa ndo yahvi sii ra, ta zandasi ra cuatyí ndo vatyí sati ñiñi ra Jesucristo sa cuenda maa yo. Natyindyee xaan ra Ndyoo sii ndo, ta nacuhva ra sa coo sa taxi añima ndo.

Zií xaan cuñi yo, ta ndatu yo sii minoo sa cua ñihi yo cuee ca

³ Zacahnu ndi sii ra cu Ndyoo, Zutu ra Jesucristo, ra ndyaca ñaha sii yo vatyí i cundahvi xaan iñi ra sii yo, ta i zanacacu saa ra sii yo vatyí i nandoto ra Jesucristo sisi sa i sihi ra. Ta vityí zií xaan cuñi yo, ta ndatu yo sii minoo sa cua ñihi yo cuee ca.

⁴ Iyo sa cumi maa ra Ndyoo ndya andivi sa cuenda maa ndo, ta ma tiví si ndaha ñi, ta ñahñi sa quiñi cuu cuhun nu iyo si, ta ma naa si.

⁵ Ta cua ñihi ndo sii si vatyí zacuenda vaha ra Ndyoo sii ndo sihin tundyee iñi sii maa ra. Ñií xaan cuu iñi ndo sii ra, ta nu cua ndihi tyiemvu cua zañaha ra Ndyoo cuhva cua zacacu ndihi ra sii ndo vatyí sa ndyaa listo cuhva cuan.

⁶ Yucuan cuenda zií xaan cuñi ndo vazu ndyehe xaan ndo tundoho vityí.

⁷ Sa ñií xaan iñi ndo sii ra Ndyoo, cuu si tañi xuhun cuaan. Cuñi si sa cua tyicuhva ra Ndyoo sii si sihin ñúhu, ta ziquí cua ndyehe ra tatu vaha si a ña vaha si. Tatu ñií xaan cuu iñi ndo sa ndisa cuii, cua cundyee iñi ndo vazu ndyehe ndo tundoho, ta sa ñií xaan iñi ndo cuhva cuan vale ca si ta ziquí xuhun cuaan vatyí xuhun cuaan sa iyo ñuu ñiyivi ya cua cunaa si. Tatu ñií xaan iñi ndo sa ndisa cuii quivi ndyehe ndo tundoho, quivi quisi ra Jesucristo ta cua zacahnu ra Ndyoo sii ndo. Cua catyí ra vatyí vaha xaan cuu cuhva i cuní iñi ndo, ta cua tyaa xaan ra yahvi sii ndo.

⁸ Cuñi xaan ndo sii ra Jesucristo vazu ta ndyehe ca ndo sii ra. Sino xaan iñi ndo sii ra vityí vazu ta ndyehe ca ndo sii ra, ta yucuan cuenda zií xaan zií xaan cuñi ndo ndya cuhva ndya ña cuu ca nacatyí maa ndo.

⁹ Ta sa cuenda sa ñií xaan iñi ndo sii ra, ta cuee ca cua ñihi ndo sa cacu ndihi ndo.

¹⁰ Ta sa naha, ra i cahan tuhun i saha ra Ndyoo sii ra, ra profeta cuan, ñá cutuñi vaha iñi ra yozo caa cua cacu ñiyivi, zoco i tyaa ra cuhva i catyí ra Ndyoo sihin ra sa cuenda si, ta i zacoto ra yozo caa cua ñihi maa ndo sa vaha sii ra Ndyoo cuee ca.

¹¹ I zacoto Tatyí li ra Cristo sii ra profeta vatyí cua ndyehe xaan ra Cristo tundoho, ta i zacoto si cuhva cua nandoto ra ta cua tiin cuenda ra Ndyoo sii ra andivi, zoco i nducuo coto xaan ra profeta yoo ra cuu ra Cristo ta ama cua quisi ra.

¹² Ta i zacoto ra Ndyoo sii ra vatyí ma saa ñaha cuhva cuan ñií ñi sa ndito ra profeta, zoco i quisi si cuee ca, quivi maa yo. Ta vityí sa sito maa ndo tuhun cuan vatyí iyo ra zacoto Tuhun Vaha sii ndo sihin tundyee iñi Tatyí li sa i tasi ra Ndyoo ndya andivi. Ta ndya cuhva ndya ángel andivi ta cuñi xaan ra coto ra cuaha ca sa cuenda cuhva ya.

Cuñi xaan ra Ndyoo vatyí coo yo minoo cuhva vaha sa ndisa cuii

¹³ Yucuan cuenda nacañi vaha iñi ndo cuhva cua zavaha ndo, ta nacao vaha sa siñi tuñi sii ndo. Cuatu vaha xaan ndo sii sa cua cuhva ra Ndyoo sii ndo quivi cua quisi tucu ra Jesucristo vatyí vaha xaan añima maa ra Ndyoo, ta cua cuhva ra sii si sii ndo quivi cuan.

¹⁴ Zehe ra Ndyoo cuu sii ndo. Yucuan cuenda tyaa ndo yahvi sii ra, ta ma zavaha ca ndo cuhva ña vaha sa i zavaha ndo quivi ta coto ca ndo sii ra.

¹⁵ Ii xaan cuu maa ra Ndyoo, yucuan cuenda cuu ndo ñiyivi vaha sa ndisa cuii sihin tandihí cuii cuhva zavaha ndo.

¹⁶ Vatyí catyí Tuhun Ndyoo: “Cuu ndo ñiyívi sa ñahñi cuatyí vatyí yuhvi ra ñahñi cuatyí cui.” Catyí ra Ndyoo

¹⁷ Minoó cuhva ndoo xaan cua ndyehe ra Ndyoo tyiño zavaha sa minoo minoo yo. Tatu catyí ndo vatyí Zutu ndo cuu sii ra, yuhu ndo sii ra ta zavaha ndo sa vaha ñi sa iyo ndo ñuu ñiyívi ya.

¹⁸ I tyiyahvi ra Ndyoo, ta i tava ra sii ndo sii cuhva sahnu sa i zañaha ñiyívi sahnu sii ndo, cuhva i tyaa xaan ndo yahvi sii costumbre sahnu. Ta ñá tyiyahvi ra Ndyoo sihin minoo sa cuu tiví tañi xuhun cui a xuhun cuaan.

¹⁹ Zoco i tyiyahvi ra sihin minoo sa yahvi xaan ca, sihin ñiñi ra Cristo. Mvee ticatyí ra Ndyoo cuu sii ra. Ñahñi cuatyí ra, ta ñahni sa ña vaha i zavaha ra.

²⁰ Cuee ca sa zavaha ra Ndyoo ñuu ñiyívi ta sa i catyí ra sihin ra Cristo vatyí cua zavaha ra cuhva ya, zoco ñá quisi ñaha ra ndya vityí vatyí cua tyindyee xaan ra sii maa ndo.

²¹ Sa cuenda ra Cristo, ta sino iñi ndo sii ra Ndyoo. Ra Ndyoo cuu ra i zanandoto sii ra sisi sa i sihi ra, ta i natiin cuenda ra sii ra nu ndyaa ra. Vityí sino xaan iñi ndo ta ñi xaan cuu iñi ndo sii ra Ndyoo vatyí ityí nuu ca cua cuyucu ndo sihin ra Cristo nu ndyaa ra.

²² Vityí iyo ca cuhva cuñi xaan ndo sii tandihi ra hermano vatyí sa ndundiñi añima ndo sa ndisa cuii vatyí tyaa ndo yahvi sii sa ndisa. Cuñi xaan ndo sii minoo ndo ta sii inga ndo minoo sa ndisa ta sihin tandihi cuii añima ndo.

²³ Sa i nacacu saa ndo. Ta ra cuu Zutu ndo vityí, ma cuu ca ra. Maa ra Ndyoo cuu ra catyí yozo caa cua cuu si. Ta ma naa tuhun ra. Ndito si, ta tandihi cuii tyiemvu cua coo si.

²⁴⁻²⁵ Vatyí catyí Tuhun Ndyoo:

Tandihi ñiyívi ñuu ñiyívi cuu tañi itya ñi,
ta tañi minoo ita itya ñi cuu ñu.

Na-ityí itya cuan, ta canacava ita si, zoco Tuhun ra Ndyoo cua coo si tandihi cuii tyiemvu. Ta ihya cuu tuhun cuhva cua cacu ñiyívi, tañi sa i zacoto ñiyívi sii ndo.

2

¹ Yucuan cuenda zandoo ndo tandihi sa ña vaha. Ma zandavi ñaha ca ndo sii ñiyívi. Ma zaha ndo tuhun vatyí vaha xaan ndo tatu ña ndisa. Ma cuxaan ndo ndyehe ndo sii ñiyívi tatu iyo sa vaha sii ñu, ta ma cahan ndo cuendu ziqui ñiyívi.

² Cuu ndo tañi lee sa naca cacu ta cuñi xaan si caxi si. Nanducu ndo zicui vaha, zicui sa ñahñi sa ndya vaha ñi zaca sihin. Zicui cuan cuu Tuhun Ndyoo, ta sihin si cua cuahnu ndo.

³ Tacuan zavaha ndo vatyí sa cutuhva ndo sa ndisa cuii vatyí vaha xaan ñiyívi cuu maa ra Cristo.

Ra Cristo cuu minoo yuu ndito

⁴ Tuhva ndo sii ra ndyaca ñaha sii yo. Minoo yuu ndito cuu ra. I catyí ñiyívi vatyí ña vaha yuu cuan, zoco i casi ra Ndyoo sii si, ta ñiñi xaan si.

⁵ Maa ndo cuu tucu tañi yuu ndito. Cuhva ndo sa cutyiño ra Ndyoo sii ndo, ta cua zavaha ra vehe ñuhu ra sihin ndo. Ta cuu tucu ndo ra cu zutu sa cuenda ra. Cuhva ndo sii ndo sii ra, zacahnu ndo sii ra, ta cuhva ndo ñaa inga sa cua cuhva ndo sii ra, ta cua quihin ra sii si sa cuenda ra Jesucristo.

⁶ Tyehen catyí Tuhun Ndyoo sa cuenda ra Cristo:

I casi minoo yuu ñiñi xaan, ta tyei sii si nu cuu siqui vehe ñuhi.

Tandihi ñiyívi cua sino iñi sii ra cuan, ma coo ticahan nuu sii ñu sa cuenda ra.

⁷ Sa cuenda ndoho, ra sino iñi, ta sa sito ndo vatyí vaha xaan ra, zoco sa cuenda ñiyívi ña sino iñi ta cuu si tañi catyí Tuhun Ndyoo:

I zavita ihno ñiyívi zandaa vehe sii yuu sa siñi ñuhu sa cuenda siqui vehe.

Ta vityí yuu cuan cuu sa ñiñi ca ta ziqui tandihi sa cuenda vehe cuan.

⁸ Ta tañi nu catyí tucu si:

Yuu sa cua catyihí saha ñiyívi cuu ra. Cua zanduva cuii ra sii ñu.

Nduva ñu vatyi ña tyaa ñu yahvi sii Tuhun Ndyoo. Tacuan i tyaa ra Ndyoo cuhva cua tahan ñu.

Ñiyivi sa cuu cuenda ra Ndyoo

⁹ Zoco maa ndo cuu minoo ityi ñiyivi i casi ra Ndyoo. Ra cu zutu cuu ndo sa cuenda rey. Ñiyivi ñahñi cuaty i cuu ndo; ñin ñi sa cuenda ra Ndyoo cuu ndo. Yucuan cuhva iyo ndo vatyi cua zacoto ndo sii ñiyivi tyiño vaha xaan ra Ndyoo, cuhva i cana ra sii ndo vatyi cua quita ndo nu ñaa ta quihvi ndo nu iyo ñúhu vaha xaan ra.

¹⁰ Quivi tañaha ca sino iñi ndo, ñahñi ñiyivi i cuu ndo, zoco vityi sa nduu ndo ñiyivi ra Ndyoo. Quivi cuan yoñi i cundahvi iñi sii ndo, zoco vityi cundahvi iñi ra Ndyoo sii ndo.

Zatyño ndo tyiño ra Ndyoo

¹¹ Ndoho hermanos, cuñi xein sii ndo. Tañi ñiyivi ndihvi noo ndahvi cuu ndo vatyi yivi ñuu ndo cuu ñuu ñiyivi ya, ta yucuan cuenda zañiñi sii ndo vatyi ma zavaha ndo cuhva ña vaha sa cuñi coño ñuhu ndo vatyi cuhva cuan cua zativi si sii añima ndo.

¹² Zacuenda ndo sii ndo sihin cuhva zavaha ndo ityi nuu ñiyivi ña sino iñi. Ta vazu cahan ñu ndya vaha ñi sii ndo vityi tañi sa ra ña vaha cuu ndo, zoco cua ndyehe ñu tandih i sa vaha zavaha ndo ta ziqui cua zacahnu ñu sii ra Ndyoo quivi cua ndyehe ra Ndyoo cuhva i zavaha tandih i ñiyivi.

¹³ Sa cuenda ra Cristo, tyaa ndo yahvi sii tandih i cuii ra cu tyiño. Tyaa ndo yahvi sii ra gobierno vatyi ra cahnu ca cuu ra.

¹⁴ Ta vazu ra gobernador cuu ra, tyaa tucu ndo yahvi sii ra vatyi tava ra gobierno tyiño sii ra sa cua tasi tuñi ra sii ñiyivi ña vaha, ta cua zacahnu ra sii ñiyivi zavaha sa vaha.

¹⁵ Vatyi cuñi ra Ndyoo sa cua zavaha maa ndo sa vaha, ta sihin cuhva cuan cua cazi ndo yuhu ñiyivi sa ñahñi maa sito ta cahan ñu sa tondo ñi sa cuenda ndo.

¹⁶ Ña ndyaca ñaha ca ley sii ndo sa ndisa, zoco ma caca iñi ndo vatyi cuu zavaha ndo ndya vaha ñi. Vityi cuñi si cuu ndo muzu maa ra Ndyoo ta tyaa ndo yahvi sii maa ra.

¹⁷ Ta tyaa ndo yahvi sii tandih i ñiyivi. Cuñi xaan ndo sii tandih i ra hermano ta ñu hermana. Yuhu ndo sii ra Ndyoo. Ta tyaa ndo yahvi sii ra gobierno.

I ndyehe xaan ra Cristo tundoho sa cuenda maa yo, ta zandoo ra minoo cuhva cua cundyico yo

¹⁸ Ndoho ra cu muzu, tyaa ndo yahvi sii patrón ndo tandih i cuii cuhva. Ña ñin ñi sii ra vaha ta ra mazu iñi, zoco vazu ra quiñi iyo, tyaa tucu ndo yahvi sii ra.

¹⁹ Vatyi tahan iñi ra Ndyoo tatu sa cuenda sa tyaa ndo yahvi sii maa ra ta ndyehe ndo tundoho, vatyi zavaha ndo sa vaha.

²⁰ Zoco tatu zavaha ndo sa ña vaha, ta tasi tuñi ñiyivi sii ndo sa cuenda maa si, ta zandyee ndo iñi ndo tundoho cuan, ¿yozo caa tyindyee si sii ndo ityi nuu ra Ndyoo? Ña tyindyee si. Zoco tatu zavaha ndo sa vaha ta zandyee ndo iñi ndo vazu ndyehe ndo tundoho sa cuenda si, yucuan cuu sa tahan iñi ra Ndyoo.

²¹ Vatyi yucuan cuenda i casi ra Ndyoo sii ndo. Vatyi i ndyehe ra Cristo tundoho sa cuenda maa ndo, ta zandoo ra minoo cuhva cua cundyico ndo. Cuhva zavaha maa ra, tacuan zavaha tucu maa ndo.

²² Ñahñi maa numinoo cuaty i zavaha ra. Ta yoñi sii i zandavi ñaha ra.

²³ Tatu cahan ñiyivi ndya vaha ñi sii ra, ñá nacahan ra sa cahan ñu. Tatu zandyee ñiyivi tundoho sii ra, ñá zayuhu ra sii ñu. I tyaa ra tandih i tyiño cuan ndaha ra Ndyoo vatyi ra Ndyoo, ndoo xaan zandaa ra tyiño.

²⁴ Zuun ñi maa ra Cristo i ndyehe tundoho sa cuenda cuaty yo sihin coño ñuhu ra quivi i sihi ra nu cruz. Ta vityi cuu zandih i yo tuhun sa zavaha yo sa ña vaha ta coo yo minoo cuhva ndoo xaan sa ndisa cuii. I ndoho maa ra sa cuenda maa yo, to yucuan cuenda i nduvaha yo ñin ñi sihin ra.

²⁵ Nu quisi quivi i sica noo ndo tañi mvee ticaty sa cua naa, zoco vityi sa naquita ndo nu ndyaa ra zacuenda sii ndo. Tañi minoo ra cu pastor, zacuenda xaan ra sii añima ndo.

3

Cuhva cuñi si zavaha ra iyo ñazihí ta ñu iyo yíi

¹ Zuun ñi cuhva cuan, cuñi si sa tyaa xaan ñuzihí yahvi sii ra cu yíi ñu vatyí tatu ña sino iñi yíi ñu Tuhun Ndyoo, zoco cuu sino iñi ra sihin cuhva vaha zavaha ñu vazu ña cahan ñu Tuhun Ndyoo sihin ra.

² Cua ndyehe yíi ndo vatyí yuhu ndo sii ra Ndyoo ta zavaha xaan ndo sa vaha.

³ Ma zandutyiqui xaan ndo sii ndo sihin cuhva zavaha ndo sihin ixi xiñi ndo ta cuhva sa sityiño xaan ndo ndaha tyiño xuhun cuaan a zahma yahvi xaan.

⁴ Vaha ca sa caca iñi ndo yozo caa cuu ndo ñiyívi vaha sa ndisa sihin añima ndo. Ihya cuu sa tyaquí sa ma tiví, tatu cuu ndo ñiyívi víi xaan ta ma nducu ndo tizihí. Ihya cuu sa cahnu ca nuu ra Ndyoo.

⁵ Cuhva ya i zanduvaha ñuzihí sii ñu ta sa naha ta yívi sihin zahma vaha. I sino xaan iñi ñu sii ra Ndyoo, ta vaha xaan ñiyívi i cuu ñu, ta i tyaa xaan ñu yahvi sii yíi ñu.

⁶ Tacuan i cuu ña Sara. I tyaa ña yahvi sii ra Abraham, ta catyí ña vatyí maa ra ndyaca ñaha sii ña. Cua cuu ndo tañi maa ña tatu zavaha ndo sa vaha ta tatu ña yuhu ndo sa tyaa ndo yahvi sii ra Ndyoo.

⁷ Ta zuun ñi cuhva, ndoho ra iyo ñazihí, naco vaha sa siñi tuñi sii ndo sihin ñazihí ndo. Tyaa ndo yahvi sii ña tañi tahan si. Cundahví iñi ndo sii ña vatyí vita ca ña ta ziquí ca maa ndo. Ta tyaa tucu ndo yahvi sii ña vatyí iin ñi cuhva cua ñihi ndo sa cundito ndo tandihí cuii tyiemvu. Tacuan zavaha ndo ta ma cundazi nu cahan ndo sihin ra Ndyoo.

Iyo saha cua ndyehe ñiyívi tundoho vatyí zavaha ñu sa vaha

⁸ Ihya tuhun tyaa tucu ndo yahvi. Naco sa vaha nu yucu ndo sihin minoo ndo ta sihin inga ndo tañi sa iin ñi ñiyívi cuu ndo. Cundahví xaan iñi ndo sii tahan ndo ta ma zacahnu ndo sii ndo.

⁹ Tatu zavaha ñiyívi sa ña vaha sihin ndo, ma zavaha ndo sa ña vaha sihin ñu. Ta tatu cahan ñu ndya vaha ñi sii ndo, ma nacahan ndo nu cahan ñu. Inga cuhva zavaha ndo. Cahan ndo sihin ra Ndyoo vatyí cua cuhva ra sa vaha sii ñu. Vatyí i cana ra Ndyoo sii maa ndo vatyí cua cuhva ra sa vaha sii ndo.

¹⁰ Ta catyí Tuhun Ndyoo vatyí:

Ra cuñi coo vaha ñuu ñiyívi ta cuzihí iñi ra, nazacuenda vaha ra yuhu ra ta ma cahan ra sa ña vaha, ta ma zandavi ñaha ra.

¹¹ Cuñi si sa zacuenda ra sii ra ta ma zavaha ra sa ña vaha, ta nazavaha ra sa vaha. Nanducu xaan ra cuhva coo sa taxi sii ra sihin tandihí ñiyívi.

¹² Vatyí zacuenda xaan ra Ndyoo sii ñiyívi ndoo iyo, ta siñi ra sa cahan ñu sihin ra, zoco cua tasi tuñi ra sii ñiyívi zavaha sa ña vaha.

¹³ Yoñi ra cua zavaha sa ña vaha sihin ndo tatu maa ñi sa vaha zavaha maa ndo.

¹⁴ Zoco vazu zandyehe ñu tundoho sii ndo sa cuenda sa zavaha ndo sa vaha, zihí xaan cua cuñi ndo. Ta ma yuhu ndo sii ñiyívi zayuhu sii ndo, ta ma caca xaan iñi ndo.

¹⁵ Zoco sihin tandihí añima ndo tyaa ndo yahvi sii ra Cristo, ra ndyaca ñaha sii ndo. Ta cundyaa listo ndo sa nacatyí ndo sihin ñiyívi ndaca tuhun sii ndo ñaa cuenda sino iñi ndo Tuhun Ndyoo. Zoco víi ñi cahan ndo sihin ñu minoo cuhva cua zañaha si vatyí tyaa ndo yahvi sii ñu.

¹⁶ Zavaha ndo sa vaha vatyí sino iñi ndo sii ra Cristo, ta ziquí tatu cahan ñiyívi ndya vaha ñi sii ndo ta tyaa ñu cuatyí sata ndo, zuun ñi maa ñu cua cucahan nuu vatyí maa ñi sa vaha zavaha ndo. Ta maa ndo cua coto ndo vatyí ñahñi cuatyí ndo.

¹⁷ Tatu cuhva cuñi maa ra Ndyoo cuu, vaha ca cua ndyehe ndo tundoho vatyí zavaha ndo sa vaha ta ziquí sa ña vaha.

¹⁸ Vatyí zuun ñi maa ra Cristo i ndyehe ra tundoho minoo saha sa cuenda cuatyí maa yo. Nahñi cuatyí maa ra, zoco i ndyehe ra tundoho sa cuenda maa yo vazu ñiyívi ña vaha i cuu yo vatyí cuhva cuan cuu zanduvaha ra sii yo sihin ra Ndyoo. I sahñi ñiyívi sii coño ñuhu ra, zoco ñá sihi añima ra.

¹⁹ I sahan ra sihin añima ra, ta i nacatyí ra Tuhun Ndyoo sihin añima sa ñoho ndazi.

²⁰ Añima ñiyivi ñá tyaa yahvi sii ra Ndyoo quivi i cahan ra Noé. Ta i cundyee xaan iñi ra Ndyoo sihin ñu ñii ñi sa zavaha ra Noé barco cuan, zoco zuhva ñi ñiyivi i cacu sisi tu nu ndutya. Uña tahan ñi ñu.

²¹ Ta tañi i cacu ñiyivi nu ndutya quivi cuan, tacuan tucu zañaha si cuhva cua cacu maa yo quivi sa sicoo ndutya yo vatyi i nandoto ra Jesucristo sisi sa i sihi ra. Zoco ma caca iñi yo vatyi sa coo ndutya yo cuu sa cua zacacu sii yo, zoco sa caca yo sii ra Ndyoo ta nduvaha sa siñi tuñi vaha sii yo vatyi sino iñi yo sii ra Jesús.

²² Ta vityi cuahan ra andivi, ta ndyaa ra ityi siyo cuaha ra Ndyoo. Ta ndyaca ñaha ra sii ángel ta sii inga ra ndyaca ñaha ta ra nahnu.

4

Cuñi si sa zatyíño yo tyíño ra Ndyoo sihin cuhva saha ra sii yo

¹ Yucuan cuenda, tañi i ndyehe ra Cristo tundoho sihin coño ñuhu ra, tacuan tucu tahan si sii maa ndo. Cundyaa listo ndo sa ndyehe ndo tundoho sa cuenda ra. Ra sa ndyehe tundoho sihin coño ñuhu ra, ña ndyaca ñaha ca cuatyí ra sii ra.

² Ta vityi zavaha ra cuhva cuñi ra Ndyoo. Ña zavaha ca ra cuhva ña vaha sa cuñi coño ñuhu ra tandihí quivi sa iyo ra ñuu ñiyivi.

³ Sa vaha ñi cuu si cuhva i zavaha ndo quivi ta sino ca iñi ndo, tañi zavaha ñiyivi ña sito sii ra Ndyoo. I zavaha ndo ñaa sa ña vaha sa cuñi ndo sihin coño ñuhu ndo, tandihí sa quiñi. I sihi xaan ndo ndixi ta i siñi ndo. I zacahnu xaan ndo vico, ta i zacahnu ndo sii zandu yutu sihin minoo cuhva ña cuñi ra Ndyoo.

⁴ Ta ñiyivi ña sito sii ra Ndyoo, iyo xaan cuñi ñu vatyi ña cutahan ca ndo sihin ñu sihin tandihí cuhva ña vaha sa zavaha ñu. Ta yucuan cuenda cahan ñu ndya vaha ñi sii ndo.

⁵ Zoco cua cuhva maa ñu cuenda sii ra cua tyicuhva sii ñiyivi ndito ta sii ñiyivi i sihi.

⁶ Yucuan cuenda i nacatyí ra Jesús Tuhun Ndyoo sihin ñiyivi i sihi. Ñiyivi cuu ñu, ta yucuan cuenda i sihi coño ñuhu ñu, zoco cua cundito añima ñu tañi ndito maa ra Ndyoo.

⁷ Sa cuñi naa ñuu ñiyivi. Yucuan cuenda cuu ndo ñiyivi iyo sa siñi tuñi vaha, ta cuaha xaan cahan ndo sihin ra Ndyoo.

⁸ Ta sa ñiñi ca ta ziqui tandihí cuu sa cuñi xaan ndo sii minoo ndo ta sii inga ndo vatyi tatu cuñi xaan yo sii tahan yo ma ndyehe xaan yo ñaa cuatyí zavaha ñu.

⁹ Tiñ cuenda vaha ndo sii minoo ndo ta sii inga ndo vehe ndo, ta ma cuxaan ndo tatu saa ra hermano vehe ndo.

¹⁰ Ta tahan tahan cuhva saha ra Ndyoo sii sa minoo minoo ndo, tacuan tyindyee ndo sii tahan ndo sihin cuhva saha ra Ndyoo sii ndo vatyi saha xaan ra cuaha xaan nuu sa vaha sii tandihí ndo iin ñi.

¹¹ Yoo ndo nacatyí Tuhun Ndyoo, cahan ndo tañi sa maa ra Ndyoo cahan, a tatu tyindyee ndo sii ñiyivi, tyindyee ndo sihin tandihí tundyee iñi sa saha ra Ndyoo sii ndo. Ta tandihí sa zavaha ndo, zavaha ndo sii si sihin minoo cuhva sa cua zacahnu sii maa ra Ndyoo sa cuenda ra Jesucristo. Ta nazacahnu xaan yo sii ra, ta nacundyaca ñaha ra tandihí cui tyiemvu. Ta nacuu si tacuan, ta nacuu si sa ndisa.

Cua ndyehe yo tundoho vatyi sino iñi yo sii ra Cristo

¹² Ndoho hermanos, cuñi xein sii ndo. Ma cu-iyo xaan cuñi ndo sa cuenda tundoho cahnu xaan sa vasi ziqui ndo vatyi tacuan cua tahan si sii tandihí yo ra sino iñi sii ra Cristo.

¹³ Zoco zii xaan cuñi ndo sa cuenda sa ndyehe ndo tundoho sihin ra Cristo vatyi tatu ndyehe ndo tundoho sa cuenda ra, quivi cua quisi ra ta cundyaca ñaha ra ñuu ñiyivi, zii xaan ca cua cuñi ndo.

¹⁴ Tatu cahan ñiyivi ndya vaha ñi sii ndo sa cuenda ra Cristo, zii xaan cua cuñi ndo vatyi situ xaan Tatyí li sii ndo. Ta Tatyí li cuu sa zañaha vatyi vaha xaan maa ra Cristo. Quiñi xaan cahan ñiyivi sii maa ra, zoco maa ndo zacahnu ndo sii ra.

¹⁵ Zoco ma cahñi ndo ñiyivi ta ma zuhu ndo; ma nducu ndo tizihí, ta ma tyihí ndo sii ndo sihin inga ñiyivi vatyi cua ndyehe ndo tundoho sa cuenda cuhva cuan. Ta yivi tundoho sa cuñi maa ra Ndyoo sa ndyehe ndo cuu tundoho cuan.

¹⁶ Zoco tatu ndyehe ndo tundoho sa cuenda Tuhun Ndyoo, ña tahan si sa cucahan nuu ndo. Zacahnu ndo sii ra Ndyoo sa cuenda tundoho sa ndyehe ndo vatyi ñiyivi ra Cristo cuu ndo.

¹⁷ Sa cua saa quivi cua tyicuhva ra Ndyoo sii ñiyivi cuenda ra. Ta tatu cua quisaha cuhva cuan sihin maa yo, ¿ta yozo caa cua tahan ñiyivi ñá tyaa yahvi sii Tuhun Vaha ra Ndyoo?

¹⁸ Ta tatu sihin tundoho ta cua cacu ñiyivi vaha, ¿yozo caa cua tahan si sii ñiyivi ña vaha ta ñiyivi iyo cuatyí?

¹⁹ Yucuan cuenda tatu ndyehe ndo tundoho vityi vatyi tacuan cuñi ra Ndyoo, cuñi si sa zavaha ca ndo sa vaha ta cuhva cuenda ndo añima ndo sii ra Ndyoo. I zavaha ra sii ndo, ta ma zandoo ra sii ndo.

5

Saha xaan ra tyiño sii ñu sino iñi

¹ Vityi sehi tyiño sii ra sahnú, ra ndyizo tyiño nu yucu ndo. Minoo ra sahnú cuu tucu ii, ta i ndyehi sii ra Cristo quivi i ndyehe ra tundoho. Ta cua ñihi tuqui sa vaha sihin ra Cristo cuee ca.

² Tañi zacuenda minoo ra cu pastor sii mvee ticatyí zono ra, tacuan zacuenda maa ndo sii ñiyivi cumi ndo. Ma cuatu ndo ndya sa zañiñi ñiyivi sii ndo, zoco cuñi ndo zavaha ndo sii si sihin sa vaha. Ta ma zavaha ndo sii si vatyi cuñi ndo xuhun zoco sa cuenda sa vatyi cuñi ndo zatyíño ndo tyiño ra Ndyoo.

³ Ma ñihi xaan cundyaca ñaha ndo sii ñu, zoco zañaha ndo minoo cuhva vaha sii ñu sihin cuhva vaha iyo maa ndo.

⁴ Ta quivi cua quisi tucu ra cu pastor cahnu ca, cua ñihi maa ndo minoo sa vaha xaan sa ma tiví, ta ma cunaa si.

⁵ Ndoho ra cuatyí, tyaa ndo yahvi sii ra sahnú. Ta tandihí ndo, tyaa ndo yahvi sii tahan ndo ta zanduluhlu ndo sii ndo, vatyi:

Cuxaan ra Ndyoo sihin ñiyivi sa zacahnu sii, zoco saha ra sa vaha sii ñiyivi zanduluhlu sii.

⁶ Yucuan cuenda quivi ndyehe ndo tundoho, tñin cuenda ndo sii si tañi minoo sa tasi ra Ndyoo sii ndo, ta cuee ca, quivi tahan si, cua tyaa siyo ra sii si ta zñi xaan cua cuñi ndo inga saha.

⁷ Nacatyí ndo sihin maa ra tandihí sa sica xaan iñi ndo ta zandoo ndo sii si sihin maa ra vatyi sica iñi maa ra sa cuenda ndo, ta zacuenda ra sii ndo.

⁸ Zacuenda vaha xaan ndo sii ndo vatyi ra xaan iñi sii ndo, ra cuihna, sica noo ra tañi minoo ndicaha cuahyi. Nanducu ra yoo sii cua casi ra.

⁹ Sino vaha iñi ndo sii ra Ndyoo, ta tava ndyizo ndo sii ra cuihna. Ta cundyee iñi ndo vatyi sa sito ndo vatyi nacahnu ñuu ñiyivi ndyehe ñu sino iñi tundoho zuun ñi cuhva tañi ndyehe maa ndo.

¹⁰ Saha xaan ra Ndyoo sa vaha sii yo tandihí quivi. Maa ra catyi vatyi cua ndyehe xihna ndo zuhva tundoho, ta ziqui cua coo sa vaha xaan sii ndo tandihí cuii tyiemvu vatyi ñin ñi cuu ndo sihin ra Jesucristo. Tatu sa ndyehe ndo zuhva tundoho, maa ra Ndyoo cua zanduvaha sii ndo sihin tundoho cuan. Cua zandundyee xaan ra iñi ndo. Cua cuhva ra tundyee iñi sii ndo, ta ma ndoyo ñuhu ndo ndaha ñi.

¹¹ Nazacahnu xaan yo sii ra, ta nacundyaca ñaha ra tandihí cuii tyiemvu. Ta nacuu si tacuan ta nacuu si sa ndisa.

Saha ra minoo nacumi sii ñu nu ndihí cahan ra

¹² Tasi carta ya sii ndo sihin ra Silvano. Sica iñi vatyi minoo hermano vaha cuu ra. Zuhva ñi i tyei ihya. Saha xein tyiño sii ndo vatyi ma zaña ndo cuhva sino iñi ndo. Sa ndisa sa saha maa ra Ndyoo cuu cuhva sino iñi ndo; ma zaña ndo sii si.

¹³ Ñu sino iñi ihya ñuu Roma tasi ñu minoo nacumi sii ndo. I casi tucu ra Ndyoo sii maa ñu tañi i casi ra sii maa ndo. Ta ra Marcos, zehi, tasi tucu ra minoo nacumi sii ndo.

¹⁴ Cuhva ndo minoo Ndyoo nacucumi xaan sii minoo ndo ta sii inga ndo. Nacoo sa taxi añaima tandihi ndo, ra cuu cuenda ra Jesucristo. Amén.

Sa Cu Uu Carta I Tyaa Ra San Pedro

Tyaa ra Pedro inga carta sii ñiyivi sino iñi

¹ Yuhvi ra Simón Pedro, minoo muzu ra Jesucristo cui ta minoo apóstol ra. Tyei carta ya sii ndoho ra sa nañihi kuhva vaha ta ñii xaan cuu iñi ndo sii ra Jesucristo tañi ñii iñi maa ndi. Ñihi ndo kuhva cuan tañi ñihi maa ndi sii si vatyi ndoo xaan cuu ra Ndyoo ta ra Jesucristo, ra ndyaca ñaha sii yo.

² Nacoo xaan ca sa vaha sa saha ra Ndyoo sii ndo, ta nacoo sa taxi añima ndo kuhva cuahan nacoto ca ndo sii ra Ndyoo ta sii ra Jesús, ra ndyaca ñaha sii yo.

Cuhva iyo ñiyivi sino ndisa cuii iñi sii ra Cristo

³ Sihin tundyee iñi sa iyo sii maa ra Ndyoo, ta i saha ra sii yo tandihi cuii sa cuñi si sa cuenda kuhva cundito yo ta zavaha yo kuhva cuñi maa ra. I saha ra kuhva cuan sii yo quivi i quisaha nacoto yo sii ra. I cana ra sii yo sihin kuhva vaha xaan iyo ra ta sihin sa vaha xaan i zavaha ra.

⁴ Ta zuun ñi sihin kuhva cuan i saha ra tuhun ra sii yo sa cuenda kuhva cua zavaha ra. Cahnu xaan cuu tuhun ya, ta vale xaan si. Ta sa cuenda tuhun i saha ra Ndyoo sii yo, cuu nduu ndo ñiyivi vaha xaan tañi maa ra Ndyoo, ta cuu zandoo ndo sii sa ña vaha sa cuñi coño ñuhu ndo, sa cuñi zativi sii ndo. Ta ma cuu ca zacuu si sihin ndo.

⁵ Ta sa cuenda ya cuñi si sa zañiñi ndo sii ndo. Ñii xaan cuu iñi ndo, ta vityi nducu tucu ndo kuhva zavaha ndo sa vaha. Ta sihin sa zavaha ndo sa vaha, nducu ndo kuhva coto ca ndo sii ra Ndyoo.

⁶ Ta tatu sa sito vaha ndo sii ra Ndyoo, cutuhva ndo cundyaca ñaha ndo sii maa ndo. Ta tatu sa cuu cundyaca ñaha vaha ndo sii ndo, cutuhva ndo cundyee xaan iñi ndo. Ta tatu sa cuu cundyee iñi ndo, yuhu ndo sii ra Ndyoo ta nducu xaan ndo kuhva zavaha ndo sa cuñi ra.

⁷ Tatu sa cuñi ndisa cuii ndo sii ra Ndyoo, cuñi ndisa cuii ndo sii tandihi hermano, ta tatu sa cuñi ndisa cuii ndo sii tandihi hermano, cuñi xaan ndo sii tandihi ñiyivi.

⁸ Tatu iyo tandihi cuii kuhva ya sii ndo ta cuahan nduñihi ca kuhva iyo si sihin ndo, cua cuu ndo ñiyivi sityiño ra Ndyoo sa ndisa, ta yivi sa caha ñi cuu sa sito ndo sii ra Jesucristo, ra ndyaca ñaha sii yo.

⁹ Zoco ra sa ñahñi kuhva ya iyo sii, cuu ra tañi minoo ra cuaa a ra ña ndisi ndyehe. Sa naa iñi ra sa catyi ra vatyi cua zavaha ra kuhva cuñi ra Ndyoo quivi i zandasi ra Ndyoo cuaty i zavaha ra quivi cuan.

¹⁰ I cana ra Ndyoo sii ndo ta i casi ra sii ndo hermanos vatyi cua cuu ndo ñiyivi cua cuahnu vaha sihin Tuhun ra. Yucuan cuenda nducu xaan ndo kuhva zañaha ndo vatyi ñiyivi sii maa ra cuu sii ndo sa ndisa cuii. Vatyi tatu zavaha ndo tandihi cuii kuhva ya, ma ndoyo ñuhu ndo nu yozo cuii ca.

¹¹ Ta cua nuña vaha ra Ndyoo andivi quihvi ndo nu ndyaca ñaha ra Jesucristo. Maa ra cuu ra ndyaca ñaha, ta zacacu ra sii yo.

¹² Ta ma zandoi sa zanacohin iñi ndo tandihi kuhva ya vazu sa sito ndo sii si ta sa ndyee xaan iyo ndo sihin sa ndisa sa iyo sii ndo.

¹³ Ta sica iñi vatyi vaha tatu ñii ñi sa ndito que ta zanacohin iñi ndo ta kuhve zuhva tyiño sii ndo.

¹⁴ Sa i zañaha ra Jesucristo, ra ndyaca ñaha sii yo, sii vatyi ña naha ca ta cua cui.

¹⁵ Zoco ñii ñi sa ndite ta tyei tandihi kuhva ya, ta tatu sa sihi zoco cua nacohon iñi maa ndo tandihi kuhva ya ndya vaha ñi kuhva.

Ñiyivi sa ndyehe kuhva vaha xaan iyo ra Cristo

¹⁶ Cuhva i nacaty ndi sihin ndo sa cuenda tundyee iñi sa iyo sii ra Jesucristo, ra ndyaca ñaha sii yo ta sa cuenda kuhva cua quisi tucu ra, yivi xemvlu sa cahan ñiyivi ñi cuu kuhva

cuan. Maa ndi sa sihin nuu ndi i ndyehe ndi vatyi minoo ra cahnu xaan cuu ra ta zehe ra Ndyoo cuu sii ra.

¹⁷ I ndyehe ndi cuhva i zandutyaqui xaan ra Ndyoo Zutu yo sii ra, ta siñi ndi cuhva i zacahnu xaan sa zuun ñi maa ra Ndyoo sii ra nu i cahan ra sihin ra, ta i catyi ra: “Ihya ra cuu zehi. Cuñi xein sii ra. Zi xaan cuñi sihin ra.”

¹⁸ Ta maa ndi siñi ndi nduzu cuan sa quita andivi, ñi ñi sa yucu ndi sihin ra Jesús xiñi yucu nu i zacahnu xaan ra Ndyoo sii ra.

¹⁹ Ta sa sito ndi vatyi ndisa xaan cuu tuhun i tyaa ra profeta sa cuenda ra Cristo. Vaha tatu tyaa maa ndo yahvi sii si tañi minoo lámpara zandisi nu ñaa ndya quivi cua coo sa ndisi aña ndo vatyi cua cuhva ra Cristo sa cutuñi ca iñi ndo quivi cua quisi ra. Maa ra cuu tañi minoo tiño sa caña tatu sa vasi cundisi.

²⁰ Zoco coto vaha ndo vatyi tuhun i tyaa ra profeta, ñahñi numinoo si sa cuu cutuñi vaha iñi yo sa maa ñi maa yo.

²¹ Vatyi ra i tyaa cuhva cuan, ñá tyaa ra cuhva cuñi ñi maa ra. Ra i sityiño ra Ndyoo cuu ra, ta i cahan ra cuhva cahan Taty i ra Ndyoo sihin ra.

2

Ra zacuaha sa ña ndisa

¹ I sicoo tucu ra zandavi ñaha sii ñiyivi hebreo ta sa naha. I catyi ra vatyi cahan ra tuhun i saha ra Ndyoo sii ra, zoco ña ndisa ra. Ta cua coo tucu ra zandavi ñaha nu yucu maa ndo. Zuhva huhva ñi cua zacuaha ra tuhun sa cua zativi sii ñiyivi. Cua cahan ra tuhun ra ndyaca ñaha sii yo, zoco cua zacuaha ra tuhun sa ña ndisa. Yaty xaan cua zanaa ra Ndyoo sii ra sa cuenda cuhva ña vaha zacuaha ra.

² Cuaha xaan ñiyivi cua cundyico sii ra, ta cua zavaha ñu cuaha xaan cuaty sihin coño ñuhu ñu. Ta sa cuenda maa ñu, ta cua cahan ñiyivi ndya vaha ñi sii Tuhun Ndyoo ta sii sa ndisa sa zañaha si.

³ Cuñi ra ña vaha cuan xuhun, ta yucuan cuenda cua zandavi ñaha ra sii maa ndo sihin tuhun sa ña ndisa. Zoco ma cacu maa ra cuan. Cua ndyehe xaan ra tundoho vatyi ndya ta sa naha sa catyi ra Ndyoo yozo caa cua zavaha ra sihin ñiyivi zavaha tacuan. Ñahñi inga ca cuhva sa cuenda maa ra.

⁴ Ná zandasi ra Ndyoo cuaty i ángel quivi i zavaha ra cuaty. I zavita ra sii ra sisi andyaya, ta yucuan i zandoo ra sii ra nuñi ra sihin cadena nu ñaa. Ndatu ra quivi cua tasi tuñi ra Ndyoo sii ra. ⁵ Ta ñá zandasi ra Ndyoo cuaty ñiyivi i zavaha sa ña vaha ta sa naha. I zacon ra zavi xaan ziqui ñu, ta i situ ndutya ñuu ñiyivi, ta sii ñi ra Noé i zacacu ra sihin usa tahan ñiyivi sii ra vatyi i nacaty ra sihin ñiyivi cuhva cuñi si sa zandoo ñu cuaty ñu. ⁶ Ta i zanaa tucu ra Ndyoo ñuu Sodoma ta ñuu Gomorra. I sahmi ra sii si, ta i nduu si ñiyaa vatyi cuñi ra vatyi cua cuu si sa ndaa nuu ñiyivi cua zavaha sa ña vaha cuee ca vatyi tacuan cua tahan tucu maa ñu. ⁷ Zoco i zacacu ra Ndyoo sii ra Lot ñuu Sodoma cuan vatyi minoo ra vaha i cuu ra Lot, ta ñá cundyee iñi ra ndyehe ra cuhva quiñi xaan zavaha ñiyivi ña vaha cuan. ⁸ Tandihí quivi i sindyaa ra vaha cuan ticui ñiyivi ña vaha cuan, ta uhu xaan cuu aña ra sa ndyehe ra ta sa siñi ra tandihí sa ña vaha i zavaha ñu. ⁹ Ta zuun ñi cuhva cuan, sito maa ra Ndyoo yozo caa cua tyindyee ra sii ñiyivi yuhu sii ra ta zavaha ñu cuhva cuñi maa ra, ta cua zacacu ra sii ñu quivi nducu coto ihñi cuhna sii ñu. Ta cua tyaa ziin ra sii ñiyivi ña vaha ndya quivi cua tyicuhva ra sii ñu, ta ziqui cua tasi tuñi ra sii ñu. ¹⁰ Ta ñihí ca cua tasi tuñi ra sii ñiyivi catyi vatyi sito ñu sii ra ta zavaha ñu tandihí sa ña vaha sa cuñi maa ñu sihin coño ñuhu ñu, ta ña saha ñu sa cundyaca ñaha ra sii ñu. Zacahnu xaan ñu sii ñu, ta maa ñi sa cuñi maa ñu cuu sa zavaha ñu. Ña yuhu ñu cahan ñu ndya vaha ñi sii ra nahnu ca.

¹¹ Zoco ángel, vazu nahnu ca ra ta iyo ca sa ndyaca ñaha ra, zoco ña caña iñi ángel tyaa ra cuaty sata ra nahnu ca cuan ta ña cahan ra ndya vaha ñi sii ra ityi nuu ra ndyaca ñaha sii yo.

¹² Zoco ñiyivi sa quehin tuhun, tañi quitì cuu ñu. Ñahñi sa siñi tuñi vaha iyo sii ñu. Ndito ñi maa ñu tañi ndito quitì. Cahan ñu ndya vaha ñi sii sa ña cutuñi iñi ñu. Ta sa cuenda cuatyì ñu, ndaha cua tivì ñu, ta cua coo quivì ta ta sica ñi cua zanaa ra Ndyoo sii ñu.

¹³ Cua ñihi ñu sa tahan si sii ñu sa cuenda sa ña vaha i zavaha ñu. Zi xaan cuñi ñu zavaha ñu sa ña vaha vazú ora. Saha ñu ticahan nuu, ta zatìvì ñu tyiño ra Ndyoo nu sasi ñu sihin ndo nu zacahnu ndo vico. Ñiyivi quiñi caa cuu ñu, ta zandavi ñaha ñu ta zaha ñu tuhun vatyì ñiyivi vaha cuu ñu.

¹⁴ Ta ra quiñi caa cuan, cuñi ra sa tandihì ñu zihì cuzu sihin ra. Ñahñi cuhva sa zandihì ra sa zavaha ra cuatyì. Nducu ra cuhva zandavi ñaha ra sii ñu ña cutuñi vaha iñi ta cuzu ñu sihin ra. Cuñi xaan ra cuaha ca xuhun ta ndaha tyiño. Cua tasi tuñi ra Ndyoo sii ra sa ndisa cuii.

¹⁵ Sa zandoo ra ityi vaha, ta cua naa ra. Ndyico ra cuhva i zavaha ra Balaam zehe ra Beor vatyì i cuñi xaan ra Balaam cuan xuhun, ta yucuan cuenda i zavaha ra cuhva sa ña tahan iñi ra Ndyoo.

¹⁶ Ta i cahan burro zono ra sihin ra sihin minoo nduzu tañi cahan ñiyivi, ta i cuxaan ti sihin ra, ta i catyi ti vatyì ma zavaha ca ra cuhva ña tahan iñi ra Ndyoo.

¹⁷ Ra ña vaha sa zacuaha sa ña ndisa cuan, cuu ra tañi zoco sa ñahñi ndutya ñoho, ta cuu ra tañi vico cuahan sihin tatyì. Cua cuhun ra nu ñaa xaan, ta yucuan cua ndoo ra tandihì cuii tyiemvu.

¹⁸ Vatyì zacahnu xaan ra sii ra sihin cuhva cahan ra, ta cuaha tuhun cahan ra sa ñahñi yahvi ndyaa. Ta nu iyo ñiyivi naca sino iñi ta cuñi ca ñu zavaha ñu sa ña vaha, tyihi ra tyiño ta cuñi ra zatìvì ndihì ra sii ñu.

¹⁹ Catyi ra cuan vatyì cuu zavaha ñiyivi ñaa sa cuñi maa ñu, ta caca noo nuña ñu catyi ra, zoco zuun ñi maa ra sa cahan cuan, ta minoo muzu cuu ra sii sa ña vaha. Tahan tahan yo cuu yo muzu sii sa ndyaca ñaha sii yo.

²⁰ Ta ñiyivi sa sito sii ra Jesucristo, ra zacacu ta ndyaca ñaha sii yo, ta sa quita ñu sisi sa ña vaha sa iyo ñuu ñiyivi ya, ta ziquì cuee ca ta nandihvi tucu ñu ta quisaha zavaha tucu ñu sii sa ña vaha cuan ta ndyaca ñaha si sii ñu. Yaha ca cua cuu ñu ta ziquì sa xihna ñi.

²¹ Vaha ca tatu sa ñá nacoto ñu ityi ndoo ta ziquì sa sito ñu sii si ta zandoo tucu ñu sii ley vaha ra Ndyoo.

²² Ta sa cuenda ñu cuan, quita ndisa cuii minoo cuhva tuhva ñiyivi cahan. Catyi ñu: “Nandusa ina ta ziquì nacasi tucu ti. Ta quiñi naca sityi ta cua nandihvi tucu ti nu ndyahyu.”

3

Cuhva cua quisi tucu ra ndyaca ñaha sii yo

¹ Ihya cuu sa cu uu carta tyei sii ndo, ndoho hermanos. Cuñi xein sii ndo. Nu nduu tahan carte nduqui cuhva zancohin iñi ndo tandihì tuhun vaha sa sa sito ndo.

² Cuñi si sa nacohon iñi ndo cuhva i cahan ra profeta ta sihin ley ra ndyaca ñaha sii yo sa i zacuaha nduhvi ra apóstol sii ndo. Ta maa ra ndyaca ñaha sii yo cua zacacu sii yo.

³ Sa xihna ñi cuñi zancohin iñi ndo vatyì tatu sa cuñi naa ñuu ñiyivi cua coo ñiyivi cua vacu ndyaa sii Tuhun Ndyoo. Ta cua zavaha ñu ñaa ndihì sa ña vaha sa cuñi maa ñu.

⁴ Ta cua catyi ñu: “¿Ñacu yoñi ra Cristo? Ta maa ra i catyi vatyì cua quisi tucu ra. Zoco ndya quivì i sihi ñiyivi sahnú sii yo ta ña zama maa si, ta inuu ñi cuu tandihì si ndya quivì i zavaha ra Ndyoo ñuu ñiyivi.”

⁵ Tacuan cua catyi ñu vatyì cuñi ñu sa naa iñi ñu vatyì i cahan ra Ndyoo ta tyiemvu ta i sino andivì. Ta sihin tuhun cahan ñi ra ta i sino ñuu ñiyivi mahñu tyañuhu ta ndoo tucu zuhva ndutya sa cu yuu nu ñuhu.

⁶ Ta zuun ñi sihin ndutya i naa ñuu ñiyivi minoo saha vatyì i situ cuii ndutya ñuu ñiyivi.

⁷ Zoco andiví ta ñuu ñiyiví sa iyo vityi, i catyi tucu ra Ndyoo vatyí cua ndoo si cuhva ndya quiví cua cayu si, quiví cua tyicuhva ra sii ñiyiví, ta cua zanaa ra sii ñiyiví ña sino iñi sii ra.

⁸ Zoco ma naa iñi ndo yañi xaa vatyí sa cuenda ra Ndyoo, inuu ñi cuu minoo ñi quiví ta minoo mil cuiya. Ta minoo mil cuiya cuu si tañi minoo quiví ñi nuu Ndyoo.

⁹ Ma naa iñi ra ndyaca ñaha sii yo cuhva i catyi ra, ta ña cucuee xaan ra tañi sica iñi ñiyiví. Zoco ndyee xaan iñi ra sihin maa yo. Ña cuñi ra sa cunaa numinoo ñiyiví. Cuñi ra vatyí zaña ñu sa zavaha ñu sa ña vaha ta cacu ñu.

¹⁰ Zoco quiví cua quisi tucu ra ndyaca ñaha sii yo, cua saa ra tañi saa minoo ra zuhu sa sa cuaa vatyí ña sito yo ñaa cuhva cua saa ra. Quiví cuan cua naa andiví sihin minoo nduzu ñihi xaan. Cua cayu ñicandyi ta yoo ta tiñoó ta cua naa si, ta cua cayu ñuu ñiyiví sihin tandíhi sa iyo.

¹¹ Cua naa candíi cuii sa iyo. Yucuan cuenda, ¡cuñi si sa cuu ndo ñiyiví vaha sa ndisa cuii, ta cuñi xaan ndo sii ra Ndyoo!

¹² Cuatu ndo sii quiví cuan, ta zavaha ndo ñaa cuhva cuu sii minoo minoo ndo, ta cua quisi si vatyí ca. Quiví cuan cua cayu andiví ta ñicandyi ta yoo ta tiñoó, ta cua naa si.

¹³ Zoco maa yo ndatu yo sa cua coo minoo andiví saa ta inga ñuu ñiyiví saa vatyí i catyi ra Ndyoo vatyí cua coo si. Ta ma zavaha ca ñiyiví cuatyí yucuan.

¹⁴ Sa sito ndo ñaa sa cua tahan ñuu ñiyiví ya, yucuan cuenda nducu xaan ndo cuhva sa ñahñi ca cuatyí ndo coo quiví cua quisi tucu ra Cristo, ta cua coo vaha ndo sihin ra Ndyoo.

¹⁵ Ta nacohon iñi ndo vatyí iyo xaan tucahnu iñi sii ra ndyaca ñaha sii yo sihin ñiyiví, yucuan cuenda ndatu ra vatyí cua cuu cacu ñu. Zuun ñi cuhva ndyaa ya i tyaa ra Pablo yañi yo nuu carta i tasi ra sii ndo. Cuñi xaan yo sii ra, ta i tyaa ra sihin sa siñi tuñi i saha ra Ndyoo sii ra.

¹⁶ Ta i cahan tucu ra cuhva ya tandíhi nuu carta i tyaa ra. Iyo zuhva si yíi xaan cutuñi iñi yo. Ta iyo ñiyiví ña sino vaha iñi ñu ta zama ñu cuhva cahan si tañi zama ñu sii inga parte Tuhun Ndyoo. Ta zuun ñi sii maa ñu zandoyo ñuhu ñu.

¹⁷ Vityí sa zacote tandíhi cuhva ya sii ndo cuee ca sa tahan si; yucuan cuenda ndoho yañi xaa zacuenda vaha ndo sii ndo coto zandavi ñaha ñiyiví ña vaha sii ndo, ta cua coo cuatyí ndo, ta ma sino vaha ca iñi ndo.

¹⁸ Nacoto vaha ndo sii ra ndyaca ñaha sii yo. Maa ra Jesucristo cuu ra, ta zacacu ra sii yo. Ta nacoó xaan ca tumañi iñi sa saha maa ra sii yo sihin ndo. ¡Ta nazacahnu xaan yo sii ra vityí ta tandíhi cuii tyiemvu! Ta nacuu si tacuan ta nacuu si sa ndisa. ta ñicandyi ta yoo ta tiñoó, ta cua naa si.

Sa Xihna Ñi Carta I Tyaa Maa Ra San Juan

Cuhva cundito ñiyivi tandihi cuii tyiemvu

¹ Ra sa iyo ndya ta xihna ñi quivi nu i sino tandihi cuii sa iyo, siñi maa ndi sa cahan ra quivi i sica noo ndi sihin ra. I ndyehe ndi sii ra sihin siti nuu ndi. I cutuñi iñi ndi sa ndyehe ndi. Ta ndya cuhva ndya i ñin tucu ndi sii ra. Maa ra cuu Tuhun Ndyoo, ta saha ra sa cundito ñiyivi tandihi cuii tyiemvu sihin ra.

² I ndyehe ndi sii ra, ta saha ndi sa ndaa cuenda ra vaty saha ra sa cundito ñiyivi sihin ra tandihi tyiemvu. I sindyaa ra sihin ra Ndyoo Zutu yo, ta zañaha ra sii ra sii ndi.

³ Ta cuhva sa ndyehe ndi ta sa siñi ndi, zacoto ndi sii maa ndo vaty ndu-ñin tucu maa ndo sihin ndi. Ta cua ndu-ñin tandihi yo sihin ra Ndyoo Zutu yo ta sihin ra Jesús zehe ra, ra i zaquisi ra.

⁴ Ta tyaa ndi tuhun ya sii ndo vaty tatu sito ndo sii si, cua cuziñi xaan iñi tandihi yo.

Maa ra Ndyoo cuu ra tañi minoo ñúhu

⁵ Ihya cuu tuhun i cutuhva ndi sihin maa ra Cristo, ta zacoto ndi sii ndo. Maa ra Ndyoo cuu ra tañi minoo ñúhu, ta ñahñi sa ña vaha (tañi sa ñaa) iyo sii ra.

⁶ Tatu catyi yo vaty ñin ñi cuu yo sihin ra Ndyoo Zutu yo, ta zuun ñi sica noo ca yo nu ñaa, vaty xaan yo sa tacuan cahan yo. Ña zavaha yo sa ndoo. Ña ñin ñi iyo yo sihin ra Ndyoo.

⁷ Zoco tatu maa yo ta sica noo yo nu ndisi ta zavaha yo sa vaha tañi maa ra ndisi xaan ra ta zavaha ra maa ñi sa vaha, tatu tacuan iyo tucu maa yo, ñin ñi iyo yo sihin minoo yo ta sihin inga yo. Ta ñiñi ra Jesús zehe ra Ndyoo zandasi si tandihi cuii cuaty yo.

⁸ Tatu catyi maa yo vaty ñahñi cuaty yo iyo, zuun ñi sii maa yo zandavi ñaha yo. Ta ñahñi sa ndisa iyo sii yo.

⁹ Zoco tatu nahma yo cuaty yo, cuu sino iñi yo vaty cua zaha ra Ndyoo tucachu iñi sii yo ta cua zandasi ra cuaty yo. Vaty maa ñi sa vaha ta sa ndoo zavaha maa ra, ta cua nacatya ra tandihi cuii cuaty yo.

¹⁰ Zoco tatu catyi yo vaty ñahñi cuaty yo, tañi zacuu yo minoo ra vaty sii ra Ndyoo cuu si (vaty catyi maa ra vaty iyo cuaty yo). Tatu tacuan iyo yo, ña sino ndisa cuii iñi yo Tuhun ra.

2

Ra Cristo cuu ra cua cahan sa cuenda yo

¹ Tyei cuhva ya sii ndoho, zehe ndyihvi, vaty ma zavaha ndo cuaty. Zoco tatu iyo minoo ndo sa zavaha minoo cuaty, iyo minoo ra cahan sa cuenda yo nuu ra Ndyoo Zutu yo. Ta ra cahan cuan, Jesucristo nañi ra. Maa maa ñi sa vaha zavaha ra.

² Ta maa ra cuu ra i tyiyahvi sa cuenda cuaty yo. Ta ña ñin ñi sa cuenda cuaty maa yo. Tyiyahvi tucu ra ndya sa cuenda tandihi cuaty zavaha tandihi cuii ñiyivi ñuu ñiyivi.

³ Ta tatu tyaa yo yahvi sa cahan ra, sito yo vaty sito vaha yo sii ra.

⁴ Zoco tatu minoo yo catyi yo: “Nacote sii ra”, catyi yo, ta ña tyaa yo yahvi sa cahan ra, minoo ra vaty cuu yo, ta sa ndisa cuan ñahñi si iyo sii yo.

⁵ Zoco minoo ra zavaha cuhva catyi ra Ndyoo, cuñi xaan ra sii ra Ndyoo sa ndisa cuii. Ta sihin cuhva cuan ta sito yo vaty ñin ñi cuu yo sihin ra Cristo.

⁶ Tatu catyi minoo ra vaty sa ndu-ñin ra sihin ra Cristo, cuñi si vaty coo ra cuhva i sicoo maa ra Cristo.

Minoo cuhva saa cuñi si zavaha yo

⁷ Ndoho yañi xaa, yivi minoo tuhun saa sa ndisa cuii cuu sa zacote sii ndo vaty sa iyo si sihin ndo ndya quivi quisaha sino iñi ndo. Ihya tuhun sañu cuu tuhun sa siñi ndo sa xihna ñi.

⁸ Zoco tañi sa zacote minoo tuhun saa sii ndo cuu si vaty sa ndusaa si sa ndisa cuii sa cuenda maa ra Cristo ta sa cuenda maa ndo vaty sa cua ndihi cuhva sica noo ñiyivi nu ñaa, ta vityi sa iyo inga cuhva vaty vityi zandisi minoo ñuhu sa cuu ñuhu sa ndisa cuii.

⁹ Tatu iyo yo catyi yo vaty ndyaa yo nu ndisi zoco ña cuu ndyehe yo sii hermano yo, sica noo ca yo nu ñaa cuu si cuan.

¹⁰ Ra cuñi sii hermano ra, ndyaa ñuhu cuan sihin ra. Ta ñahñi sa cuu zandoyo ñuhu sii ra.

¹¹ Zoco ra ña cuu ndyehe sii hermano ra, iyo ra ta sica noo ra nu ñaa. Ta ña sito ra ndya ityi cuahan ra vaty sa ñaa cuan zacuaa si sii ra.

¹² Tyei carta ya sii ndo, zehe ndyih, vaty sa i zandasi ra Ndyoo cuaty ndo sa cuenda maa ra Jesucristo.

¹³ Ta tyei sii tucu maa ndoho, ra sahn, vaty nacoto ndo sii ra Cristo. Sa iyo ra ndya quivi cumañi ca sino ñuu ñiyivi. Ta tyei sii maa ndo, ra yoco, vaty vazu cuñi cuhna zandavi ñaha ra sii ndo, zoco sa i zahacanaa maa ndo. Tyei carta ya sii maa ndo, zehe ndyih, vaty sa sito ndo sii maa ra Ndyoo Zutu yo.

¹⁴ Ta tyei sii maa ndo, ra sahn, vaty sito ndo sii ra sa iyo ndya quivi cumañi ca sino ñuu ñiyivi. Ta tyei carta ya sii ndoho, ra yoco, vaty iyo xaan tundyee iñi sii ndo. Ta iyo xaan Tuhun ra Ndyoo sihin ndo, ta yucuan cuenda zahacanaa ndo sii cuhna.

¹⁵ Ma ndyio iñi ndo ñuu ñiyivi ya ta nu sa iyo ñuu ñiyivi ya. Tatu cuñi xaan ndo sa iyo ihya ñuu ñiyivi ya, ña cuñi ndo sii ra Ndyoo Zutu yo.

¹⁶ Vaty tandih cuhva sa iyo ñuu ñiyivi ya tucun sa ña vaha sa cuñi coño ñuhu yo a sa ndyehe siti nuu yo ta ndyio iñi yo sii si a sa zii xaan cuñi yo sihin ndaha tyiño yo ihya ñuu ñiyivi ya, yivi cuenda ra Ndyoo cuu tandih cuhva ya. Sa cuenda ihya ñi ñuu ñiyivi ya cuu cuhva cuan.

¹⁷ Ta cunaa ñuu ñiyivi ya. Ta tandih sa ndyio iñi ñiyivi ihya, cunaa si. Zoco ñiyivi zavaha cuhva cuñi ra Ndyoo, cua cundito ñu tandih cui tyiemvu.

Minoo ra cua cahan ndya vaha ñi sii ra Cristo

¹⁸ Zehe ndyih, sa cuñi cundih tyiemvu, ta tañi sa i siñi ndo, vasi ra cua cahan ndya vaha ñi sii ra Cristo. Ta vityi sa iyo cuaha xaan ra zavaha cuhva cuan. Ta sihin cuhva cuan ta sito yo vaty sa cuñi cundih tyiemvu.

¹⁹ I quita ra zavaha cuhva cuan zuun ñi ticui maa yo vaty yivi ra tahan yo cuu sii ra sa ndisa cuii. Vaty tatu ra tahan yo cuu sii ra sa ndisa cuii cua ndoo ra sihin yo. Zoco i quita ra, ta sihin cuhva cuan ndisi xaan ndyehe yo vaty yivi ñiyivi cuenda maa yo cuu tandih ra cuan.

²⁰ Zoco sii maa ndo sa saha ra Cristo Taty Ii ra, ta sa sito ndo Tuhun maa ra sa ndisa cuii.

²¹ Ta tyei carta ya sii ndo vaty sa sito ndo sa ndisa, ta yivi sa cuenda sa vaty ña sito ndo. Ta sito ndo vaty ñahñi tuhun vaty quita sisi tuhun ndisa.

²² ¿Yoo ra cuu ra vaty? Ra catyi vaty yivi ra Ndyoo i zaquisi sii ra Cristo. Ra cahan tacuan, yucuan ra cuu ra cahan ndya vaha ñi sii ra Cristo. Zaha ra cuan tuhun vaty yoñi Ndyoo iyo ta yoñi zehe ra.

²³ Tandih cuii ra cahan tuhun sa yoñi zehe Ndyoo iyo, yoñi ra Ndyoo Zutu yo a ra Cristo ndyaa sihin ra cuan. Zoco ra catyi sihin ñiyivi vaty Zehe ra Ndyoo cuu sii ra Cristo, ndyaa tucu maa ra Ndyoo Zutu yo sihin ra cuan.

²⁴ Yucuan cuenda, cucumi vaha xaan ndo tuhun i siñi ndo ndya quivi i quisaha sino iñi ndo. Ta tatu tuhun cuan coo vaha xaan si sihin ndo, tacuan tucu maa ndo cua coo vaha ndo sihin Zehe ra Ndyoo ta sihin ra Ndyoo Zutu yo.

²⁵ Ta ihya cuu minoo sa vaha xaan sa i catyi ra sihin yo vaty cua cuhva ra sa cundito yo tandih cui tyiemvu.

²⁶ I tyei cuhva ya sii ndo sa cuenda ra cuñi zandavi ñaha sii ndo.

²⁷ Zoco sii maa ndo sa iyo Taty Ii sa i saha maa ra Jesucristo sii ndo. Ta ña cuñi si yoo ca ra cua zacuaa sii ndo vaty zuun ñi Taty Ii cuan cuu sa zacuaa sii ndo tandih. Ta

cuhva sa zacuahá maa ra, maa ñi sa ndisa cuu si, ta yivi sa vatya. Ta tañi sa zacuahá Tatyí li cuan sii ndo, tacuan cuu cuhva cuñi si vatyi ñin xaan cuu ndo sihin ra Cristo.

²⁸ Ta vityi ndoho, zehe ndyíhi, ñin xaan cuu ndo sihin ra Cristo vatyi tatu tacuan zavaha ndo ñahñi maa sa cua yuhu ndo, ta ma cucahan nuu ndo ityi nuu ra quivi quisi ra.

²⁹ Sa sito ndo vatyi maa maa ñi sa vaha zavaha ra Cristo. Ta cuñi tucu si coto ndo vatyi tandíhi cuii ñiyivi zavaha maa ñi sa vaha, zehe ra Ndyoo cuu sii ñu.

3

Ñiyivi sa cuu zehe ra Ndyoo

¹ Nacañi ñi ndo cuhva cuñi xaan maa ra Ndyoo Zutu yo sii yo ndya cuhva ndya nduu yo zehe ra Ndyoo. Zuun ñi yucuan cuu sa cuu maa yo, ta yucuan cuenda ña nacoto ñiyivi ñuu ñiyivi ya sii yo vatyi ña nacoto ñu sii maa ra Ndyoo.

² Ndoho yañi xaa, cuñi xein sii ndo. Vityi sa cuu yo zehe ra Ndyoo, ta tañaha ca cucasi si cuhva cua cuu yo ityi nuu ca. Zoco sito yo vatyi quivi cua quisi ra Jesús inga saha ta cua nduu yo tañi maa ra vatyi cua ndyehe yo sii ra tañi iyo ra sa ndisa.

³ Ta tandíhi ñiyivi sa ndatu cuhva cuan, zanduvaha ñu cuhva iyo ñu. Zandoo ñu cuatyí ñu, ta ma zavaha ca ñu sii si. Tañi maa ra Jesús, ñahñi cuatyí ra.

⁴ Ta tandíhi ñiyivi zavaha cuatyí, ña tyaa ñu yahvi cuhva cuñi ra Ndyoo. Vatyi sa zavaha ñu cuatyí, yucuan cuu cuhva ña tyaa ñu yahvi cuhva cuñi ra Ndyoo.

⁵ Ta sa sito ndo vatyi i quisi ra Jesucristo ñuu ñiyivi ya vatyi cua zanaa ra tandíhi cuatyí ñiyivi. Ta ñahñi cuatyí maa ra iyo.

⁶ Yucuan cuenda tandíhi ñiyivi sa iyo vaha sihin ra Cristo, ñahñi ca cuatyí zavaha ñu. Zoco ñiyivi sa tuhva zavaha cuatyí, tañaha ca cua ndyehe ñu cuhva iyo ra Cristo, ta tañaha ca nacoto ñu sii ra.

⁷ Zehe ndyíhi, ma cuhva ndo sa zandavi ñaha ñiyivi sii ndo. Ñiyivi zavaha sa vaha, yucuan ñu cuu ñiyivi vaha tañi maa ra Jesús vaha xaan ra.

⁸ Zoco ñiyivi zavaha cuatyí cuu cuenda cuihna. Vatyi cuihna cuu ra zavaha sa ña vaha ndya quivi i quisaha cuatyí. Ta yucuan cuenda i quisi Zehe ra Ndyoo vatyi cua cani ra tyiño cuihna.

⁹ Ta tandíhi ñiyivi sa nacacu saa sa cuenda maa ra Ndyoo, ña tuhva ca ñu zavaha cuatyí vatyi ndito ñu sihin tundyee ñi sa saha maa ra Ndyoo sii ñu. Ma cuu ca zavaha ñu sa ña vaha vatyi zehe ra Ndyoo cuu sii ñu.

¹⁰ Sihin cuhva ya zañaha casi si yoo ñiyivi cuu zehe ra Ndyoo ta yoo cuu zehe cuihna vatyi tandíhi ñiyivi ña zavaha sa vaha a ña cuñi ñu sii tandíhi hermano, yivi cuenda ra Ndyoo cuu sii ñu.

Nacuñi yo sii minoo yo ta sii inga yo

¹¹ Vatyi ihya cuu tuhun sa siñi ndo ndya sa xihna cuii ñi: Cuñi si vatyi cuñi xaan yo sii minoo yo ta sii inga yo.

¹² Ña tahan si coo yo cuhva i sicoo maa ra Caín. Cuenda cuihna i sicoo ra, ta i sahñi ra sii yañi ra. ¿Ta ñaa cuenda i sahñi ra sii yañi ra? I sahñi ra sii ra vatyi maa ñi maa sa ña vaha i zavaha ra, ta i cuxaan ra vatyi maa ñi maa sa vaha i zavaha yañi ra.

¹³ Ma iyo xaan cuñi ndo, hermano, tatu ña cuu ndyehe ñiyivi ñuu ñiyivi ya sii ndo.

¹⁴ Sito yo vatyi sa i yaha yo sisi tuhun nu cua cuu cuii yo, ta sa i saa yo inga cuhva nu cua cundito yo. Cuñi xaan yo sii tandíhi hermano. Ta cuhva cuan sito yo vatyi ndito ndisa cuii yo ityi nuu ra Ndyoo. Ra sa ña cuñi sii inga hermano, nu ñoho ra sisi tuhun sa cua cuu cuii ra.

¹⁵ Yoo ra ña cuu ndyehe sii inga hermano, minoo ra sahñi cuu ra. Ta sito ndo vatyi yoñi ra sahñi ñiyivi ta ndito añima ra ityi nuu ra Ndyoo. Tañi sa i sihi ndisa cuii ra cuu si.

¹⁶ Ta nacoto yo cuhva cuñi xaan maa ra Ndyoo sii yo vatyi saha maa ra Jesucristo sa cuu ra sa cuenda maa yo. Ta tacuan tucu maa yo, cuñi si vatyi cuñi xaan yo sii inga ñiyivi sino ñi ta vazu cuu yo sa cuenda ñu.

¹⁷ Tatu iyo minoo yo ta iyo tandihi cuii sii yo ta iyo xaan ndaha tyiño yo ta ndyehe yo sii minoo hermano yo vatyi siñi ñuhu xaan si sii ra ta ña cundahvi iñi yo sii ra ta ña tyindyee yo sii ra, ma cuu catyi yo vatyi cuñi xaan yo sii ra Ndyoo tatu ña tyindyee yo sii hermano yo.

¹⁸ Zehe ndyihí, ma cuu cuñi yo sii inga ñiyivi sihin tuhun cahan ñi yo. Nacuñi yo sii ñu sa ndisa cuii, ta nazañaha yo sa cuñi yo sii ñu sihin cuhva vaha zavaha yo sihin ñu.

Cuhva sa ma cuyuhu yo ityi nuu maa ra Ndyoo

¹⁹ Ta sihin cuhva ya, sito yo vatyi ndyico yo sa ndisa, ta cuu zanaa yo cuhva sica xaan iñi yo vatyi sa sito yo vatyi iyo vaha yo ityi nuu maa ra Ndyoo.

²⁰ Ta tatu sica iñi yo vatyí iyo cuatyí yo, zoco sito ca maa ra Ndyoo ta ziqui cuhva sica iñi maa yo vatyí sito ra tandihi.

²¹ Ndoho hermanos, cuñi xein sii ndo. Tatu ñahñi maa sa catyi sa siñi tuñi vaha sii yo vatyí iyo cuatyí yo, ma cuyuhu yo ityi nuu maa ra Ndyoo.

²² Ta ñaa ndihi ca sa cua caca yo sii ra, cua ñihi yo sii si vatyí tyaa xaan yo yahvi tuhun ra, ta zavaha yo tandihi sa tahan iñi maa ra.

²³ Ta ihya cuu tuhun i saha ra sii yo vatyí sino iñi yo sii ra Jesucristo vatyí zehe ra Ndyoo cuu sii ra ta zacacu ra sii yo. Ta cuñi si vatyí cuñi xaan yo sii minoo yo ta sii inga yo cuhva i catyi maa ra Cristo sihin yo.

²⁴ Ta ñiyivi sa tyaa xaan yahvi tuhun cahan ra Ndyoo, iyo ñu sihin ra Ndyoo, ta maa ra Ndyoo ndyaa sisi añima ñu cuan. Ta sito yo vatyí ndyaa maa ra Ndyoo sisi añima yo vatyí saha maa ra Tatyí li ra sii yo.

4

Ihya cahan si cuenda Tatyí li maa ra Ndyoo ta cuenda tatyí cuihna sa cahan ndya vaha ñi sii ra Cristo

¹ Ndoho ra sa cuñi xein, ma sino iñi ndo yoo ñi maa ñiyivi catyi vatyí cahan ñu sa cuenda maa ra Ndyoo. Cuñi si vatyí nducu coto vaha ndo sii ñu, ta cua coto ndo tatu Tatyí li maa ra Ndyoo cuu sa iyo sihin ñu a yivi. Vatyí sa cuaha xaan ra vatya quita coyo nacahnu ñuu ñiyivi, ta catyi ra vatyí cahan ra sa cuenda maa ra Ndyoo.

² Ihya cuu cuhva cuu nacoto ndo tatu cahan ñiyivi sa cuenda Tatyí li maa ra Ndyoo a yivi. Tatu catyi ñu vatyí i quisi maa ra Jesucristo, ta i nduu ra ñiyivi sa ndisa cuii, ta sihi ra sa cuenda maa yo, iyo Tatyí li maa ra Ndyoo sihin ñu tatu sino ndisa cuii iñi ñu cuhva cuan.

³ Zoco ñiyivi ña sito sii ra Jesús cuhva cuan, ñahñi Tatyí li maa ra Ndyoo iyo sihin ñu. Tatyí cuihna cuu sa iyo sihin ñu, tatyí sa cahan ndya vaha ñi sii ra Cristo. Ta sa sito maa ndo vatyí tahan si quisi tatyí ña vaha cuan, ta vityí sa iyo si ihya ñuu ñiyivi.

⁴ Maa ndo cuu ñiyivi cuenda maa ra Ndyoo, zehe ndyihí, ta sa zahacanaa ndo sii ñiyivi cahan tuhun vatya cuan vatyí Tatyí li maa ra Ndyoo sa iyo sihin maa ndo, iyo xaan ca tundyee iñi sii si cuan ta ziqui tatyí cuihna sa iyo sihin ñiyivi ityi sata.

⁵ Maa ñu cuu cuenda ñuu ñiyivi ya. Ta yucuan cuenda cahan ñu sa cuenda sa iyo ñuu ñiyivi ya. Ta inga ñiyivi sa cuu cuenda ñuu ñiyivi ya, tyizoho ñu sa cahan ñu.

⁶ Zoco maa yo cuu cuenda ra Ndyoo. Ta ñiyivi sa sito sii ra Ndyoo, tyizoho ñu sa cahan maa yo, zoco ñiyivi sa yivi cuenda ra Ndyoo, ma tyizoho ñu sa cahan yo. Ta sihin cuhva ya ta cuu nacoto yo yoo cuu ñiyivi sa iyo Tatyí li maa ra Ndyoo sihin ñu ta yoo cuu ñiyivi sa iyo tatyí cuihna sa zandavi ñaha.

Cuñi xaan maa ra Ndyoo sii ñiyivi

⁷ Ndoho hermanos, nacuñi xaan yo sii minoo yo ta sii inga yo vatyí sa cuenda maa ra Ndyoo cuu cuhva cuan. Tandihí ñiyivi sa cuñi xaan sii inga ñiyivi, yucuan cuu ñu sa cuu zehe ra Ndyoo, ta sito ñu sii ra.

⁸ Ra sa ña cuñi sii ñiyivi, ña sito ra sii maa ra Ndyoo vatyí maa ra Ndyoo cuñi xaan ra sii ñiyivi.

⁹ Ihya cuu kuhva i zañaha maa ra Ndyoo kuhva cuñi xaan ra sii yo vatyí i zaquisi ra sii sa minoo tuhun ñi ra cuu zehe ra. I zaquisi ra sii ra ñuu ñiyivi vatyí cua cuu cundito yo tandíhi cuii tyiemvu sa cuenda maa ra.

¹⁰ Ta ihya cuu kuhva i cuñi xaan maa ra Ndyoo sii yo. Yivi maa yo i cuñi sii maa ra Ndyoo. Maa ra i cuñi sii yo sa xihna ñi. Ta i zaquisi ra sii zehe ra vatyí cua cuu ra sa cuenda cuatyí yo.

¹¹ Tacuan cuu kuhva sa cuñi xaan maa ra Ndyoo sii yo, ndoho hermanos. Ta cuñi si vatyí cuñi tucu maa yo sii minoo yo ta sii inga yo.

¹² Yoñi maa sa ndyehe sii ra Ndyoo numinoo saha, zoco tatu cuñi xaan maa yo sii minoo yo ta sii inga yo, iyo maa ra Ndyoo sisi añima yo. Ta vaha xaan cuu kuhva sa cuñi yo sii ñu, tañi cuñi maa ra Ndyoo sii ñu.

¹³ Ihya kuhva cuu coto yo vatyí ñin ñi iyo yo sihin maa ra Ndyoo, ta ñin ñi iyo tucu maa ra sihin yo vatyí saha maa ra Tatyí li ra sii yo.

¹⁴ Ta maa ndi sa ndyehe ndi ta saha ndi sa ndaa vatyí i zaquisi maa ra Ndyoo Zutu yo sii zehe ra vatyí cua zacacu ra sii ñiyivi ñuu ñiyivi.

¹⁵ Tandíhi ñiyivi sa cua catyí sihin inga ñiyivi vatyí ra Jesús cuu zehe ra Ndyoo, ñin xaan cuu ñu sihin ra Ndyoo, ta maa ra Ndyoo iyo sisi añima ñu.

¹⁶ Ta vatyí sa sito yo ta sino iñi yo vatyí cuñi xaan maa ra Ndyoo sii yo. Cuñi xaan ra Ndyoo sii ñiyivi, ta tatu cuñi xaan maa yo sii maa ra Ndyoo ta sii ñiyivi, sa ndu-ñin yo sihin ra Ndyoo. Ta iyo ra sisi añima yo.

¹⁷ Ihya kuhva cuahan nduvaha ca kuhva cuñi xaan maa yo sii ra Ndyoo, ta sihin kuhva ya ta ma yuhu yo quivi cua zannahma ra Ndyoo sii ñiyivi vatyí kuhva iyo maa ra Jesucristo ta tacuan tucu iyo maa yo ñuu ñiyivi ya.

¹⁸ Tatu cuñi xaan yo sii maa ra Ndyoo sa ndisa cuii, ma yuhu yo sii ra. Sihin sa cuñi xaan yo sii ra Ndyoo ta tyaa siyo si sa yuhu yo. Vatyí tatu yuhu yo, yuhu yo coto ndoho yo zacuu ra Ndyoo sa cuenda cuatyí yo. Yucuan cuenda tatu yuhu xaan yo, cuñi si catyí si vatyí ña cuñi vaha yo sii maa ra Ndyoo sa ndisa cuii.

¹⁹ Cuñi xaan yo sii ra Ndyoo vatyí xihna ca maa ra i cuñi xaan ra sii yo.

²⁰ Tatu catyí minoo yo: “Yuhvi cuñi xein sii maa ra Ndyoo”, catyí yo. Zoco ña cuu ndyehe yo sii minoo hermano. Sa nduu yo minoo ra vatyí sihin kuhva cuan. Ña ndisa yo sa catyí yo vatyí cuñi xaan yo sii ra Ndyoo vatyí tatu ña cuñi yo sii hermano yo ta ndyehe yo sii ra ihya ñuu ñiyivi ya ¿yozo caa cua cuu cuñi yo sii maa ra Ndyoo ta ña ndyehe yo sii ra?

²¹ Ihya cuu tuhun sa i saha ra Ndyoo sii yo: Tatu cuñi xaan yo sii maa ra Ndyoo, cuñi si vatyí cuñi xaan tucu yo sii hermano yo.

5

Cuhva zahacanaa yo ziqui kuhva ña vaha sa iyo ñuu ñiyivi ya

¹ Tandíhi ñiyivi sa sino iñi vatyí i nduu ra Jesús ñiyivi ta i sihi ra sa cuenda maa yo, ñiyivi sa sino iñi kuhva cuan, yucuan ñu cuu zehe maa ra Ndyoo. Ta ñiyivi sa cuñi sii maa ra Ndyoo Zutu yo, cuñi tucu ñu sii tandíhi ñiyivi sa sino iñi sii ra vatyí zehe ra Ndyoo cuu sii ñu.

² Ihya cuu kuhva sito yo vatyí cuñi yo sii tandíhi zehe ra Ndyoo vatyí cuñi yo sii maa ra Ndyoo ta tyaa yo yahvi tuhun cahan ra.

³ Vatyí kuhva cuñi yo sii maa ra Ndyoo sa ndisa cuii cuu sa tyaa yo yahvi tandíhi sa catyí ra. Ta ña yíi xaan sa tyaa yo yahvi tuhun cahan ra.

⁴ Vatyí tandíhi ñiyivi sa cuu zehe maa ra Ndyoo, zahacanaa ñu ziqui kuhva ña vaha sa iyo ñuu ñiyivi ya, ta zavaha ñu kuhva cuñi maa ra Ndyoo. Ta ihya cuu kuhva zahacanaa yo ziqui kuhva ña vaha sa iyo ñuu ñiyivi ya, sihin sa ñiñ xaan iñi yo sii ra Jesús.

⁵ Maa ñi ñiyivi sa ñiñ xaan iñi vatyí ra Jesús cuu zehe ra Ndyoo, yucuan cuu ñu sa zahacanaa ziqui kuhva ña vaha sa iyo ñuu ñiyivi ya, ta ñihi ñu kuhva zavaha ñu kuhva cuñi ra Ndyoo.

Sa ndaa sa cuenda Zehe ra Ndyoo

⁶ I tava ra Ndyoo tyiño sii ra Jesucristo, ta i quisi ra, ta i yaha ra sihin ndutya, ta i yaha ra sihin niñi; ña ñin ñi sihin ndutya zoco ndutya ta niñi. Ta zuun ñi Tatyí li maa ra Ndyoo cuu sa saha sa ndaa cuhva cuan, ta maa maa ñi sa ndisa nacatyí ra.

⁷ Ta iyo uñi tahan ra saha sa ndaa ityi ziqui: ra Ndyoo Zutu yo, ra cuu Tuhun Ndyoo, ta Tatyí li. Ta ñin ñi cuu sa uñi tahan ra.

⁸ Ta iyo uñi tahan sa ndaa ñuu ñiyivi: Tatyí li, ta ndutya, ta niñi. Ta ñin ñi cuhva nacatyí tandíhi uñi tahan si.

⁹ Sino iñi yo sa ndaa sa saha ñiyivi, zoco cahnu xaan ca cuu sa ndaa sa saha maa ra Ndyoo vatyí sa ndaa cuu si sa zuun ñi maa ra Ndyoo saha sa cuenda Zehe ra.

¹⁰ Ra sa sino iñi sii Zehe ra Ndyoo, zuun ñi sisi añima ra iyo sa ndaa. Ra sa ña sino iñi sa catyí ra Ndyoo, zacuu ra tañi minoo ra vatya sii maa ra Ndyoo vatyí ña sino iñi ra sa ndaa sa saha maa ra Ndyoo sa cuenda Zehe ra.

¹¹ Ta ihya cuu sa ndaa cuan. I saha maa ra Ndyoo sa cundito yo tandíhi cuii tyiemvu. Ta ñihi yo cuhva cuan sa cuenda Zehe ra.

¹² Ra sa ndu-ñin sihin Zehe ra Ndyoo, sa ndu-ñin ra sihin cuhva cua cundito ra. Zoco ra ña ndu-ñin sihin Zehe ra Ndyoo tañaha ca cua ñihi ra cuhva cua cundito ra tandíhi tyiemvu.

Nu ndíhi cahan ra Juan ta saha xaan ra tyiño

¹³ I tyei tandíhi cuhva ya sii ndoho sa sino iñi sii Zehe ra Ndyoo vatyí coto ndo vatyí sa ndito añima ndo. Ta cua cundito ndo tandíhi cuii tyiemvu.

¹⁴ Ta vityí ñahñi maa sa yuhu yo ityi nuu maa ra Ndyoo, ta sito yo vatyí ñaa ndíhi ca sa caca yo sii ra, tyizoho ra sa cahan yo tatu caca yo minoo cuhva cuñi maa ra.

¹⁵ Ta tañi sa sito yo vatyí tyizoho ra Ndyoo sa cahan yo, ñaa sa caca yo sii ra. Sito tucu yo vatyí cua ñihi yo tandíhi cuii sa sica yo sii ra.

¹⁶ Tatu ndyehe yo sii minoo hermano vatyí zavaha ra cuatyí zoco tañaha ca cua quihin ra ityi andyaya sa ndisa cuii, cuñi si vatyí cahan yo sihin ra Ndyoo sa cuenda ra, ta cua zandasi ra Ndyoo cuatyí ra, tatu tañaha ca quihin ra ityi andyaya sa ndisa cuii. Zoco iyo tucu cuatyí ñiyivi sa ma zandasi maa ra Ndyoo, ta ña catyí vatyí cahan ca ndo sihin ra Ndyoo sa cuenda ñiyivi zavaha cuatyí cuan.

¹⁷ Tandíhi cuii sa ña vaha sa zavaha yo, cuatyí cuu si. Zoco iyo cuatyí zavaha ñiyivi ta cua zaha ra Ndyoo tucahnu iñi sii ñu tatu nandaca ñu tucahnu iñi sii ra, ta ma cahun ñu andyaya.

¹⁸ Sito yo vatyí tandíhi ñiyivi sa cuu zehe ra Ndyoo, ña zavaha ca ñu cuatyí vatyí zacuenda maa Zehe ra Ndyoo sii ñu. Ta ñahñi sa cuu zacuu cuihna sihin ñu.

¹⁹ Ta sito yo vatyí maa yo cuu zehe ra Ndyoo, ta ndyaca ñaha cuihna sii tandíhi cuii ñiyivi sa iyo cuenda ñuu ñiyivi ya.

²⁰ Ta sito yo vatyí sa i quisi Zehe ra Ndyoo. Ta sito yo vatyí i saha ra minoo sa siñi tuñi vaha sii yo vatyí coto yo sii ra cuu Ndyoo sa ndisa cuii. Ta ñin ñi iyo yo sihin ra sa cuenda Zehe ra, ra Jesucristo. Ihya cuu maa ra cuu Ndyoo sa ndisa cuii, ta ihya cuu cuhva cundito yo tandíhi cuii tyiemvu.

²¹ Zehe ndyíhi, zacuenda ndo sii ndo, ta coto ñáha zacahnu ndo sii inga ndyoo.

Sa Cu Uu Carta I Tyaa Maa Ra San Juan

Tasi ra Juan minoo nacumi sii ñiyivi sino iñi Tuhun Ndyoo

¹ Yuhvi ra sahnũ tyei carta ya suun, hermana. Sa i casi maa ra Ndyoo suun ta sii tandihi zehun. Sa ndisa cuii vatyí cuñi xein sii tandihi ndo. Ta tacuan tucu tandihi ñiyivi sa sito sa ndisa ta cuñi xaan ñu sii ndo.

² Cuñi ndi sii ndo sa cuenda sa ndisa sa iyo añaima yo. Ta tandihi cuii tyiemvu cua coo si sihin yo.

³ Cuñi sa cua cuhva xaan maa ra Ndyoo Zutu yo sa vaha sii ndo, ta nacuhva xaan ra tumañi iñi sii ndo, ta natyindyee ra sii ndo ta cua coo sa taxi ñi sii ndo sihin ra ta sihin ñiyivi. Ta tacuan tucu nacuhva maa ra Jesucristo tandihi cuhva cuan sii ndo vatyí Zehe Ndyoo cuu sii ra. Nacuhva ra sii si vatyí sino iñi ndo sii ra sa ndisa cuii ta cuñi xaan ndo sii inga ñiyivi.

Coto ñáha cuiñi siyo ndo sii sa ndisa sa iyo cuenda ra Jesucristo

⁴ Zii xaan cuñi vatyí sa ñihi tyiño sa cuenda zuhva zehun vatyí vaha xaan ndyico ñu sii sa ndisa, cuhva saha maa ra Ndyoo Zutu yo tuhun ra sii yo.

⁵ Ta vatyí ñihi xaan sique suun hermana vatyí nacuñi yo sii tahan yo. Ta yivi minoo tuhun saa cuu sa zacote sii ndo vatyí. Zuun ñi si cuu si sa iyo sihin yo ndya quivi i quisaha sino iñi yo.

⁶ Ta cuhva cuñi yo sii tahan yo ta sii maa ra Ndyoo sa ndisa cuu si tatu coo yo cuhva saha ra tuhun ra sii yo. Ta tañi sa i siñi ndo ndya sa xihna cuii ñi, ihya cuu tuhun i saha ra sii yo sa vatyí nacuñi yo sii tahan yo.

Ra zandavi ñaha

⁷ Sa cuaha xaan ra zandavi ñaha sica noo ñuu ñiyivi ya. Ta catyi ra cuan vatyí ñá nduu ra Jesucristo minoo ñiyivi sa ndisa cuii quivi i quisi ra ihya ñuu ñiyivi. Ñiyivi zacuaha cuhva cuan cuu cuenda ra zandavi ñaha. Yivi cuenda ra Cristo cuu ñu vatyí cahan ñu ndya vaha ñi ziqui ra Cristo.

⁸ Zacuenda xaan ndo sii ndo sa ma ndoyo ñuhu tyiño ndo vatyí tacuan ta cua ñihi ndo tandihi sa vaha sa cuñi ra Ndyoo cuhva ra sii ndo.

⁹ Ñiyivi ña cuñi zacuaha cuhva vaha tañi zacuaha ra Cristo ta quita ñu ityi ndisa ta nazaca ñu inga tuhun sihin si, ña ñn ñi iyo ñu sihin ra Ndyoo. Zoco ñiyivi zacuaha maa ñi cuhva zacuaha ra Cristo, ñn ñi cuu ñu sihin ra Ndyoo Zutu yo ta sihin Zehe ra.

¹⁰ Tatu saa minoo ra nu yucu ndo ta ña zacuaha ra cuhva zacuaha ra Cristo, ma cuhva ndo sa ndoo ra vehe ndo ta nu ma catyi ndo nacumi suun tatu saa ra.

¹¹ Vatyí tatu saha yo nacumi sii ra, cuu si tañi zatyíño yo cuhva ña vaha tañi zatyíño maa ra cuan.

Nu ndihi cahan ra Juan

¹² Iyo cuaha xaan sa cuñi catyi sihin ndo, zoco ña cuñi tyei sii si nuu tutu vatyí cuñi quisi nu yucu ndo. Cuñi ndyehi sii ndo ta natuhin sihin ndo vatyí tacuan ta zii xaan cua cuñi tandihi yo.

¹³ Zehe cuhun tasi ñu minoo nacumi suun. I casi tucu maa ra Ndyoo sii cuhun.

Sa Cu Uñi Carta I Tyaa Maa Ra San Juan

Saha ra minoo nacumi sii ra Gayo

¹ Yuhvi ra sahnu tyei carta ya suun, yoho Gayo. Sa ndisa cuii vatyi cuñi suun.

² Hermano, sica xein tumañi iñi sii maa ra Ndyoo vatyi naquita vaha tandihi cuii tyiñon ta nacoo vaha xoon tañi sa sino vaha xaan iñun.

³ Zi xaan i cuñi quivi i quisi zuhva ra hermano vatyi i nacaty i ra sihin, cuhva zavohon tandihi cuhva catyi Tuhun Ndyoo. Ta catyi ra vatyi vaha xaan iyon sihin tandihi cuii cuhva catyi tuhun ndisa.

⁴ Tatu ñihi tuhun vatyi ndyico zehe luhli tandihi cuii cuhva catyi tuhun ndisa, yaha xaan zi cuñi.

⁵ Hermano, vaha xaan cuhva zavohon cuhva catyi Tuhun Ndyoo tatu tyindyeun sii inga hermano ta ra cahan Tuhun Ndyoo, ra quisi inga ñuu.

⁶ Saha ra hermano cuan sa ndaa ityi nuu tandihi ca hermano sa cuenda cuhva i cuñi xoon sii ra. Sa ndyoo ñi tyindyee con sii ra sihin minoo cuhva sa tahan iñi maa ra Ndyoo vatyi tacuan ta cua cuu cuhun ca ra ityi nuu nu cuahan ra.

⁷ Vatyi i quita ra cuan ñuu ra sa cuenda tyiño maa ra Jesús. Ta ña saha ra sa tyindyee ñiyivi ña sito sii ra Ndyoo sii ra sihin xuhun.

⁸ Yucuan cuenda cuñi si sa ñihi xaan tyindyee maa yo sii ra sihin xuhun a ñaa sa cumañi sii ra vatyi tacuan ta zatyño tucu maa yo sihin ra nu nacaty ra tuhun ndisa.

Cuhva ña vaha sa zavaha ra Diótrefes

⁹ Sa tasi minoo carta sii tandihi ñiyivi sino iñi. Zoco cuñi xaan ra Diótrefes cuu ra ra cu nuu, ta ña saha ra sa cundyaca ñehi.

¹⁰ Yucuan cuenda tatu quisi nu yucu ndo cua zacote sii ñiyivi cuhva zacuu ra vatyi cahan ra ndya vaha ñi sii ndi, ta vatya tucu ra. Ta yivi sa yucuan ñi, zoco inga cuhva tucu vatyi ña tiin cuenda vaha ra sii ra hermano saa coyo nu yucu ndo. Ta tatu cuñi inga hermano tiin cuenda ra sii ra saa coyo cuan, ña saha ra Diótrefes, ta tava ndyizo ra sii ra cuñi tiin cuenda sii ra saa coyo yucuan.

¹¹ Hermano, ma cundyicon numinoo cuhva ña vaha. Maa ñi cuhva vaha cundyicon. Ñiyivi zavaha sa vaha, yucuan ñu cuu cuenda ra Ndyoo. Zoco ñiyivi zavaha sa ña vaha, ña sito ñu cuan sii maa ra Ndyoo.

Cuhva vaha xaan sa zañaha ra Demetrio

¹² Vaha cahan tandihi cuii ñiyivi sa cuenda maa ra Demetrio. Ta zuun ñi sa ndisa sa ndyico ra, zacoto si sii yo vatyi vaha ra. Ta maa tucu ndi catyi ndi vatyi vaha xaan ñiyivi cuu ra, ta sito ndo vatyi cahan ndi sa ndisa.

Nu ndihi cahan ra Juan

¹³ Iyo cuaha xaan ca sa cuñi catyi suhun, zoco ña cuñi tyei sii si.

¹⁴ Vatyi ña naha ca ta cua ndyehi suun cuñi, ta cua cuu natuhun vaha maa ñi maa yo.

¹⁵ Nacuhva ca ra Ndyoo vatyi coo ca sa taxi ñi suun sihin ra ta sihin ñiyivi. Tandihi ra amigun ihya tasi ra minoo sa nacumi suun. Sa ndyoo ñi cuhvon minoo nacumi sii sa minoo minoo amigo mi yucuan.

Carta Sa I Tyaa Ra San Judas

Tyaa ra Judas minoo carta sii ñiyivi i casi ra Ndyoo

¹ Yuhvi ra Judas cui minoo muzu ra Jesucristo. Ta yañi ra Jacobo cuu sii. Tyei carta ya sii ñiyivi i casi ra Ndyoo Zutu yo. Sa zama ra cuhva iyo ndo vatyí cuenda maa ra cuu sii ndo. Ta zacuenda ra Jesucristo sii ndo.

² Cuñi sa cua cundahvi xaan iñi maa ra Ndyoo sii ndo. Nacuhva ra sa coo sa taxi ñi sii ndo sihin ra, ta nacuñi xaan ca maa ra sii ndo.

Ra zacuaha sa vatya

³ Ndoho amigo, cuñi xein sii ndo. I cuñi xein tyei minoo carta sii ndo cuhva cacu añima yo. Zoco vityi zañiñi ca si sii, sa tyei minoo carta sii ndo ta zañiñi sii ndo vatyí nducu xaan ndo cuhva, cuhva sino iñi ñiyivi tuhun ndisa sa ndyico yo. Yucuan cuu tyiño i zandoo maa ra Ndyoo sii maa yo sa cuu yo ñiyivi ra.

⁴ Catyi cuhva ya vatyí sa i quihvi zuhva ra zandavi ñaha ticui maa ndo. Catyi ra cuan vatyí saha xaan ra Ndyoo tumañi iñi sii yo ta cuu zacuu yo ñaa ñi maa sa cuñi maa yo ta ma tasi tuñi ra Ndyoo sii yo, catyi ra cuan. Sa naha xaan ndyaa si nuu tutu cuhva cua ndoho ñiyivi cuan vatyí sa nanuhu sata ñu, ta ña zacahnu ca ñu sii ra Ndyoo. Minoo tuhun ñi maa ra ndyaca ñaha sii yo, ta tacuan tucu ra Jesucristo.

⁵ Sa sito maa ndo yozo caa iyo si, zoco cuñi zanacohin iñi ndo cuhva i zacacu ra Ndyoo sii ñiyivi hebreo ndya ñuu Egipto, zoco sa yaha cuan ta ziqui i zanaa ra sii ñiyivi ñá sino iñi sii ra ticui ñiyivi sa i zacacu ra.

⁶ Ta ángel tucu, i cuu ra ra ii xaan, ta ñahñi cuatyí ra. Zoco sa nanuhu sata zuhva ra, ta i zandoo ra cuhva vaha sa i zavaha ra. Ta vityi nuhñi ra sihin cadena zacuu ra Ndyoo minoo nu ñaa xaan. Ndatu ra quivi cahnu sa cua tasi tuñi ra Ndyoo sii ra.

⁷ Ta zuun ñi cuhva, ñuu Sodoma ta ñuu Gomorra ta inga tucu ñuu yatyí ñi, i zavaha tucu ñiyivi cuan sa ña vaha. I quixi rayii sihin ziiñ ziiñ ñaha. Ta iyo tucu ra quixi ra sihin inga rayii. Ta ndya vityi ta sito yo vatyí yaha xaan cuhva ña vaha i zavaha ñiyivi ñuu cuan. Ta zacoto si sii yo vatyí iyo minoo nu cua ndoho ñu sisi ñúhu sa ma ndahva ca.

⁸ Zoco vazu sa sito ñiyivi cuhva cuan, zoco ra sa ñoho sihin maa ndo cuu ra tañi ra quixi ta ndyehe ra ñimahna vatyí zavaha ra tandihi nuu sa ña vaha sihin coño ñuhu ra, ta ña yuhu ra sii ra Ndyoo. Ña saha ra cundyaca ñaha ra tahan si cundyaca ñaha sii ra. Ta cahan ra ndya vaha ñi sii ángel ta sii inga ra nahnu ca.

⁹ Zoco zuun ñi ra ángel cahnu sa nañi Miguel quivi i tusi tahan ra tuhun sihin cuihna sa cuenda coño ñuhu ra Moisés, ñá caña iñi ra Miguel cahan ra ndya vaha ñi sihin cuihna. Ihya ñi tuhun i cahan ra: “Nacuxaan maa ra Ndyoo suhun.” Catyi ra.

¹⁰ Zoco ra sa ñoho sihin maa ndo caña iñi ra cahan ra ndya vaha ñi ziqui tandihi vazu ñahñi maa sa sito ra sa cuenda si. Cuhva sa nacoto maa ra, nacoto ra tañi nacoto quití vatyí ña nacañi iñi ra tatu vaha si a ña vaha si. Zavaha ra sa ña vaha, ta zuun ñi sii maa ra zatívi si.

¹¹ ¡Ndahvi ra cuan! vatyí zavaha ra cuatyí nuu ra Ndyoo tañi i zavaha maa ra Caín. Ta sa cuenda sa cuñi xaan ra xuhun ta i quita ra ityi vaha tañi zavaha ra Balaam. Ta tañi ra Coré quivi ñá tyaa ra yahvi sii ra ndyaca ñaha, ta tacuan tucu ra ya, zatívi xaan ra zuun ñi sii maa ra.

¹² Cuu ra tañi minoo ra quiñi xaan caa nu titahan ndo cua casi ndo ta zacahnu ndo minoo vico sihin tandihi ra hermano. Vatyí ra cuan, sasi ra, sihi ra, ta zii xaan cuñi ra. Ña cahan nuu ra, ta ña sica iñi ra sa cuenda inga hermano. Maa ñi sa cuenda maa ra sica iñi ra. Cuu ra tañi minoo vico sa cuahan sihin tatyí ta ñahñi zavi coon. Cuu ra tañi yutu sa ñahñi siti saha quivi tahan si cuhva tu. Sa sihi ra, ta yivi sa minoo tuhun ñi saha. Sa uu saha sihi ra tañi sihi minoo yutu i quita ndya yoho.

¹³ Yaha xaan, yaha xaan cuhva zavaha ra, ta saha ra sa cahan nuu. Cuu ra tañi tyañuhu tatu yaha xaan coon zavi. Ndaa noo tyañuhu, ta cuxi xaan caa tiñi nuu ndutya. Tañi tiñi cuxi caa cuan, tacuan iyo sa zavaha ra. Cuu ra tañi tiño sa cua naa vatyí cua cuhun ra nu ñaa xaan. Yucuan cua ndoo ra tandihi cuii tyiemvu.

¹⁴ Ra Enoc i cuu minoo ñiyivi ra Adán ta tyiemvu, ta i cahan ra Tuhun i saha ra Ndyoo sii ra. Ta i cahan ra sa cuenda ñiyivi ña vaha ya, ta catyi ra: “I ndyehi sii ra ndyaca ñaha. Vasi ra sihin cuaha xaan cuaha xaan ángel ra

¹⁵ vatyí cua tasi tuñi ra sii tandihi ñiyivi, ta cua catyi ra cuhva cua ndoho ñiyivi zavaha sa ña vaha. Cua ndoho ñu sa cuenda sa ña vaha sa zavaha ñu ta sa cuenda tandihi cuii tuhun ndya vaha ñi sa i cahan ñu sii ra Ndyoo.”

¹⁶ Ñahñi minoo tuhun vaha cahan ñu. Cahan ñu ndya vaha ñi sii inga ñiyivi. Nanducu xaan ñu maa maa ñi sa cuñi maa ñu ta cuhva cuzi iñi ñu. Zacahnu xaan ñu sii ñu sihin cuhva cahan ñu. Ta tatu cahan vaha ñu sihin minoo ñiyivi, zavaha ñu tacuan vatyí iyo minoo sa cuñi ñu ñihi ñu sihin ñu cuan.

Nacatyí ra cuhva cua zavaha ñiyivi sa sino iñi Tuhun Ndyoo sa ndisa cuii

¹⁷ Zoco ndoho hermanos, nacohon iñi ndo tuhun i cahan ra apóstol ra Jesús ta quivi cuan

¹⁸ vatyí i nacatyí ra cuhva cua coo si nu sa cua ndihi tyiemvu. Catyi ra vatyí nu sa cua ndihi tyiemvu cua coo cuaha xaan ñiyivi sa cua vacu ndyaa sii Tuhun Ndyoo. Minoo cuhva ndya vaha ñi cua coo ñu, cuhva cuñi maa ñu.

¹⁹ Yucuan cuu ñiyivi cua quiti cuatyí sii hermano. Tyaa xaan ñu yahvi sii sa cuñi coño ñuhu ñu. Ta ñahñi maa Tatyí li maa ra Ndyoo iyo sihin ñu.

²⁰ Zoco ndoho hermanos, tyindyee ndo sii minoo ndo ta sii inga ndo vatyí tacuan ta ndoo xaan cua cuu tandihi ndo sihin cuhva sino iñi ndo. Cahan ndo sihin ra Ndyoo sihin cuhva sa saha Tatyí li maa ra sii ndo.

²¹ Cuñi xaan maa ra Ndyoo sii ndo. Ñaha quita ndo ityi vaha sa ndyico ndo ta zavaha ndo sa ña vaha, ta ma cuñi ca ra Ndyoo sii ndo. Zoco cuatu vaha ndo quivi sa cua cuhva ra Jesucristo sa cundito yo tandihi cuii tyiemvu. Tacuan cua zavaha ra vatyí cundahvi xaan iñi ra sii yo.

²² Cahan vaha xaan ndo sihin ñiyivi cumañi sino vaha iñi, ta zasino vaha xaan ndo iñi ñu.

²³ Tyindyee ndo sii ñiyivi ta cuhva cacu ñu. Tavon sii ñu nu cayu ñúhu. Ta cundahvi iñi ndo sii inga ñiyivi, zoco zacuenda ndo sii ndo vatyí ndya zahma ñu ta ña vaha si sa cuenda cuatyí sa zavaha ñu sihin coño ñuhu ñu. Yuhu ndo coto zavaha tucu ndo tacuan.

Zacahnu ra sii ra Ndyoo, ta i ndihi cahan ra

²⁴⁻²⁵ Ta sa minoo tuhun ñi ra cuu Ndyoo sa ndisa, cuaha xaan sa siñi tuñi iyo sii ra. Ta maa ra cuu ra zacacu sii yo. Iyo xaan cuhva sii ra sa zacuenda ra sii ndo, ta ma canacava ndo sisi cuatyí. Ta ñahñi ca cuatyí ndo cua coo quivi cua zacuhun ra sii ndo ityi nuu maa ra, ta zii xaan zii xaan cua cuñi ndo. Nazacahnu xaan yo sii ra. Nacatyí yo vatyí tyaqui xaan nu ndyaca ñaha ra. Cuaha xaan tundyee iñi iyo sii ra. Ndyaca ñaha ra ziqui tandihi cuii sa cuenda cuhva i zavaha ra Jesucristo ndya ta sa naha, ta ndya cuhva ndya vityí, ta tandihi cuii tyiemvu. Ta nacuu si tacuan.

Cuhva I Ndyehé Ra San Juan

Cuhva i zañaha ra Jesucristo sii ra Juan

¹ Ihya cuu sa i zañaha ra Ndyoo sii ra Jesucristo vatyí cua zañaha ra sii muzu ra cuhva sa cua cuu. Ta i sityiño ra Jesucristo minoo ángel, ta i zañaha ra cuhva sa zañaha ra Ndyoo sii ra sii ra Juan, ra cu muzu ra.

² Ta ra Juan cuu ra nacatyí tandíhi sa i ndyehe ra. Saha ra sa ndaa sa cuenda tandíhi sa i catyí ra Ndyoo sihin ra Jesucristo ta i nacatyí Jesucristo sihin maa ra.

³ Zii xaan cuñi ñiyívi cua cahvi tuhun ya, ta zii xaan cuñi ñiyívi cua tyizoho cuhva catyí tuhun ya sa i saha ra Ndyoo ta tyaa ñu yahvi cuhva catyí si vatyí sa ndyaa yatyí quívi cua tahan si cuhva cahan si ihya.

Tyaa ra Juan carta ya sii ñiyívi sino iñi sii ra Jesús usa tahan ñuu nu cu si Asia

⁴ Yuhvi ra Juan tyei carta ya sii ñiyívi sino iñi usa tahan ñuu nu cu si Asia. Nacuhva xaan ra Ndyoo tumañi iñi sii ndo ta sa coo sa taxi añima ndo vatyí maa ra cuu ra ndya vityí, ta maa ra cuu ra ta sa naha, ta cua coo ra tandíhi cuii tyiemvu. Ta cuhva cuan nacuhva tucu sa usa tahan cuhva sa iyo sii Tatyí Ii sa ndyaa ityí nuu ra Ndyoo nu ndyaa ra.

⁵ Ta tacuan tucu nacuhva xaan maa ra Jesucristo tumañi iñi sii ndo. Maa ra cuu ra cu sa ndaa ra cahan sa ndisa cuii. Xihna ca maa ra i nandoto sisi tuhun sihi, ta ndyaca ñaha ra sii tandíhi inga ra ndyaca ñaha ñuu ñiyívi. Cuñi xaan ra sii yo. Sati niñi ra, ta zanaa ra cuatyí yo sihin niñi ra.

⁶ Maa ra cuu ra saha sa nduu maa yo ra ndyaca ñaha nahnu ta sa nduu yo ra cu zutu ityí nuu ra Ndyoo Zutu ra. Nazacahnu yo sii ra Jesucristo, ta nacundyaca ñaha ra tandíhi cuii tyiemvu. Ta nacuu si tacuan.

⁷ ¡Ndyehé!, sa vasi ra sisi vico, ta tandíhi cuii ñiyívi cua ndyehe sii ra. Ñiyívi i cuxaan sihin ra ta catyí ñu vatyí cua cuu ra nuu cruz cua ndyehe ñu sii ra. Ta cua vacu saa xaan tandíhi ñiyívi ñuu ñiyívi cuhva cua ndyehe ñu sii ra. Ta tacuan cua cuu si sa ndisa.

⁸ Catyí ra Ndyoo ra ndyaca ñaha sii yo: Yuhvi cui ra ndya ta xihna cuii ñi tañi letra A, ta ra cua coo ca nu cua ndíhi tandíhi sa iyo cui tañi letra Z, catyí ra Ndyoo. Ta iyo tandíhi cuii tundyee iñi sii maa ra. Maa ra cuu ra iyo vityí, ta maa ra cuu ra iyo ndya ta xihna cuii ñi, ta cua coo ra tandíhi cuii tyiemvu.

Ndyehé ra Juan minoo cuhva tyaqui xaan caa ra Cristo

⁹ Yuhvi ra Juan cui yañi ndo. Zuun ñi ndyehe xaan tucu mi tundoho ta cua cuhun tuqui nu ndyaca ñaha ra Ndyoo iñi ñi sihin maa ndo. Ta ñihi tuqui cuhva sa cundyee xaan iñi vatyí saha maa ra Jesucristo cuhva cuan sii yo. I siñohi vehe caa minoo ñuhu mahñu tyañuhu sa nañi Patmos vatyí i nacatyí Tuhun Ndyoo sihin ñiyívi, ta i sehi cuenda yozo caa iyo ra Jesucristo.

¹⁰ Minoo quívi tumingu i situ cuii Tatyí Ii ra Ndyoo sii, ta i siñi minoo nduzu ñiyívi saa xaan ityí sate. Tañi minoo nduzu cutu, tacuan i cuu nduzu cuan.

¹¹ Ta catyí nduzu cuan: Yuhvi cui ra iyo ndya ta xihna cuii ñi tañi letra A, ta ra cua coo ca nu cua ndíhi tandíhi sa iyo cui tañi letra Z. Cuaha xaan sa cua ndyehun vityí. Tyoon sii si nu tutu, ta tasun sii si nu yucu ñiyívi sino iñi usa tahan ñuu nu cu si Asia. Tasun sii si ndya ñuu Efeso, ñuu Esmirna, ñuu Pérgamo, ñuu Tiatira, ñuu Sardis, ñuu Filadelfia ta ñuu Laodicea.

¹² Ta sa ndíhi cahan nduzu cuan ta i nasico cave ta i ndyehi ityí sate vatyí cua ndyehi yoo ra cahan. Ta ityí sate i ndyehi usa tahan candelero xuhun cuan.

¹³ Ta mahñu candelero cuan nandyaa minoo ra caa ra tañi caa ra Jesús, ra i quisi ndya gloria. Ñoho ra minoo zahma cañi xaan ndya cuhva ndya nu saha ra, ta ñuhñi minoo yoho xuhun cuan yiquí ndyica ra.

¹⁴ Cuisi xaan ixi xiñi ra tañi ixi mvee ticatyí a tañi caa ñieve. Ta tañi caa ñúhu, tacuan caa siti nuu ra.

¹⁵ Ta saha ra ndisi xaan tañi caa minoo caa sa nañi bronce tatu cayu si. Ta saa xaan quita nduzu ra tañi cucayu yuu nahnu.

¹⁶ Ndaha siyo cuaha ra ñaa ra usa tahan tiño. Ta yuhu ra quita minoo espada sa xaan nduu siyo yuhu. Ta nuu ra ndisi xaan si tañi sa ndisi ñicandyi quivi sa ndisi vaha si.

¹⁷ Ta cuhva sa ndyehi sii ra i nduve saha ra, ta i ndui tañi minoo ra sihi. Zoco i tyizo ra ndaha siyo cuaha ra sii, ta i catyi ra sihin: Ma yuhun. Yuhvi cui ra iyo ndya ta xihna cui ñi, ta cua coo que vazu sa naa tandihi sa iyo.

¹⁸ Yuhvi cui ra ndito. I sihi, zoco vityi ndite. Ta cua cundite tandihi cui tyiemvu. Cumi ndaha ticui andyaya. Ta cuu catyi ama cua cuu ñiyivi.

¹⁹ Tyoon cuhva sa ndyehun, cuhva iyo si vityi ta cuhva cua coo cuee ca.

²⁰ Sa usa tahan tiño sa ndyehun ndaha siyo cuehi cuu sa cuenda sa usa tahan ra zacuenda sii sa usa tahan vehe ñuhu ñiyivi sino iñi ziiñ ziiñ ñuu. Ta sa usa tahan candelero cuu sa cuenda sa usa tahan vehe ñuhu cuan.

2

Tyiño i tasi ra sii ñu ñuu Efeso

¹ Tyoon minoo carta sii ra zacuenda sii ñiyivi ñuu Efeso, ta tyehen catyun: “Ihya cuu tuhun cahan ra ñaa sa usa tahan tiño ndaha siyo cuaha ra ta sica ra mahñu sa usa tahan candelero xuhun cuan.

² Site tandihi sa zavaha ndo ta cuhva sa ñihi xaan zatyiño ndo ta cuhva cundyee xaan iñi ndo ta zatyiño ndo. Ta site vatyí ña cuu cundyee iñi ndo tatu zavaha ñiyivi cuatyí. Ta site cuhva nducu coto ihñi ndo sii ra catyi vatyí apóstol cuu ra ta ña ndisa ra. Ta sa nacoto ndo sii ra vityí vatyí ra vatya cuu ra.

³ Ta i zandyee xaan ndo iñi ndo ta cundyee iñi ndo ta zatyiño ndo sa cuenda mi. Ta ña sitatu ndo sa zavaha ndo sa vaha.

⁴ Zoco site vatyí iyo ca sa cumañi sii ndo vatyí ña cuñi ca ndo sii, tañi i cuñi xaan ndo sii, sa xihna ñi.

⁵ Yucuan cuenda nacohon iñi ndo cuhva i sicoo ndo sa xihna ñi ta ndyehe ndo cuhva iyo ndo vityí ta zandoo ndo cuatyí ndo, ta zavaha tucu ndo cuhva i zavaha ndo sa xihna ñi. Tatu ma zama ndo cuhva iyo ndo, yatyí xaan cua cuhin nu yucu ndo ta cua quindyeyi candelero ndo. (Cuñi si catyi si vatyí cua nduu tucu ñu tañi ñiyivi ña sino iñi.)

⁶ Zoco iyo minoo cuhva vaha sii ndo vatyí ña tahan maa iñi ndo cuhva zavaha ñiyivi ndyico sii ra Nicolás. Ta tacuan tucu mi. Ña tahan maa iñi cuhva zavaha ñu.

⁷ Tatu ndyaa zoho ndo tyizoho ndo cuhva catyi Tatyí li sihin sa usa tahan vehe ñuhu ñu sino iñi. Catyi ra: Tatu cundyee iñi ndo ta zahacanaa ndo (sii cuihna) cua cuhve sa casi ndo yucu vixi sa iñi nu minoo yutu nandyaa ndya gloria, ta cua cundito ndo tandihi cui tyiemvu.”

Tyiño i tasi ra sii ñu ñuu Esmirna

⁸ Tyaa tucun minoo carta sii ra zacuenda sii ñiyivi sino iñi ñuu Esmirna, ta tyehen catyun: “Ihya cuu tuhun cahan ra iyo ndya ta xihna cui ñi, ta cua coo ca ra vazu sa naa tandihi sa iyo. Zuun ra cui ra i sihi ta i nandote.

⁹ Site cuhva iyo ndo. Cuhva ndyehe xaan ndo tundoho ta cuhva ndahvi xaan iyo ndo. Zoco cuca xaan ndo ityi nuu ra Ndyoo. Ta site sii ñiyivi catyi vatyí ñiyivi hebreo cuu ñu, ta cahan ñu ndya vaha ñi sii ndo, zoco yivi ñiyivi hebreo cuu maa ñu sa ndisa cuii. Vehe ñuhu ra cuihna cuu sii ñu.

¹⁰ Ma yuhu ndo tundoho cua ndyehe ndo. Cua tyihi cuihna sii zuhva ndo vehe caa vatyí cuñi ra nducu coto ihñi ra sii ndo. Ta cua ndyehe ndo tundoho usi tahan quivi, zoco ma ndu-uu iñi ndo vazu cuu ndo sa cuenda mi, ta cua cuhve sa vaha sii ndo sa cundito ndo tandihi cui tyiemvu.

¹¹ Tatu ndyaa zoho ndo, tyizoho ndo cuhva catyi Tatyí li sihin sa usa tahan vehe ñuhu ñu sino iñi: Tatu cundyee iñi ndo ta zahacanaa ndo sii cuihna, ma cuu cuii ndo.”

Tyiño i tasi ra sii ñu ñuu Pérgamo

¹² Tyaa tucun minoo carta sii ra zacuenda sii ñu sino iñi ñuu Pérgamo, ta tyehen catyun: “Ihya cuu tuhun cahan ra cumi espada sa xaan nduu siyo yuhu.

¹³ Site vatyí ndyaa ndo minoo ñuu nu ndyaca ñaha cuihna, zoco ña ndu-uu iñi ndo, ta ña catyi ndo vatyí ña sino iñi ndo sii, vazu i ndyehe ndo cuhva i sahñi ñiyivi sii ra Antipas ñuu cuan nu ndyaa cuihna vatyí saha vaha xaan ra Antipas sa ndaa sa cuenda mi.

¹⁴ Zoco iyo zuhva sa zavaha ndo ta ña tahan iñi sii si vatyí ñuu Pérgamo cuan iyo zuhva ndo ndyico ca ndo cuhva i zacuaha ra Balaam vatyí i nacatyí ra sihin ra Balac vatyí vaha cua zavaha ñiyivi hebreo cuatyí sa casi ñu ndyayu sa saha maa ñiyivi sii inga ndyoo ta cua cuzu rayií sihin ñaha vazu yivi ñazihí ra cuu, catyi ra cuan.

¹⁵ Ta nu yucu ndo iyo tucu zuhva ndo ña cuñi ndo zandoo ndo sa ndyico ndo cuhva zacuaha ra Nicolás.

¹⁶ Yucuan cuenda zama ndo cuhva iyo ndo vatyí tatu ma zama ndo, yatyí xaan cua quisi nu yucu ndo ta cua cahñi tehin sihin ra zavaha sa ña vaha sihin espada sa quita yuhi.

¹⁷ Tatu ndyaa zoho ndo tyizoho ndo cuhva catyi Tatyí li sihin sa usa tahan vehe ñuhu ñu sino iñi: Tatu cundyee iñi ndo ta zahacanaa ndo sii cuihna cua cuhve sa casi ndo pan maná sa ñoho xehe, ta cua cuhve minoo yuu cuisí sii tahan tahan ndo. Ta nu yuu cuan ndyaa minoo zivi saa, zoco yoñi sito sii si. Maa ñi ñiyivi ñihi yuu cuan cua coto ñaa zivi ndyizo si.”

Tyiño i tasi ra sii ñu ñuu Tiatira

¹⁸ Ta tyaa tucun minoo carta sii ra zacuenda sii ñu sino iñi ñuu Tiatira. Tyehen tyoon: “Ihya cuu tuhun cahan zehe ra Ndyoo, ra sa caa siti nuu tañi caa ñúhu. Ta saha ra caa tañi caa sa nañi bronce sa xiño xaan.

¹⁹ Site tandihí sa vaha sa zavaha ndo. Site cuhva cuñi xaan ndo sii ñiyivi ta cuhva ñi xaan iñi ndo ta cuhva tyindyee ndo sii tahan ndo ta cuhva cundyee xaan iñi ndo. Ta site vatyí zavaha ca ndo sa vaha vityí ta ziquí ndya ta xihna ñi.

²⁰ Zoco iyo zuhva sa zavaha ndo ta ña tahan iñi vatyí saha ndo sa zavaha minoo ñaha ña vaha nu yucu ndo ndya vaha ñi, cuhva i zavaha ña Jezabel ta sa naha. Catyi ña vatyí cahan ña tuhun saha ra Ndyoo sii ña, zoco zandavi ñaha ña ta zacuaha ña sii ñiyivi cuu muzu mi vatyí vaha cua cuzu rayií sihin ñaha vazu yivi ñazihí ra cuu, ta cuu casi ndo sa saha maa ñiyivi sii inga ndyoo, catyi ña.

²¹ Sa ndatu xein sa zama ña cuhva iyo ña ta zandoo ña cuatyí zavaha ña sihin rayií, ta ña cuñi ña.

²² Cua tasi tuñi sii ña ta sii tandihí ñiyivi zavaha ndya vaha ñi cuhva zavaha maa ña. Tatu ma zama ñu cuhva zavaha ñu cua tasi cuehe ziquí ñu, ta ma cuu nduvita ñu.

²³ Ta cua cahñi sii tandihí ñu. Ta cua coto tandihí ñiyivi sino iñi vatyí yuhvi cui ra sito tatu vaha sica iñi ñiyivi sihin añima ñu a ña vaha. Ta sii sa minoo minoo ndo cua cuhve cuhva tahan si sii ndo sa cuenda tyiño i zavaha ndo.

²⁴ Ta sii inga ndo ñuu Tiatira, ndoho ña zavaha cuhva ña vaha cuan ta ña zavaha ndo tandihí sa ndya vaha ñi cuhva cuñi cuihna, ña cua cahan que inga ca tuhun sihin maa ndo vatyí vaha ñi cuhva yucu ndo.

²⁵ Zoco ma zaña ndo sa zavaha ndo sa vaha. Cuhva sa zavaha ndo vityí, tacuan zavaha ndo ndya quivi cua quisi tuqui.

²⁶ Ta tatu zahacanaa ndo sii cuihna ta zavaha ndo cuhva catyi ndya quivi cua cuu ndo, cuee ca cua cuhve sa cundyaca ñaha ndo sii ñiyivi ñuu ñiyivi.

²⁷ Ta ñihi xaan cua tasi tuñi ndo sii ñu

²⁸ tañi saha Zuti cuhva sii, sa tasi tuñi sii ñu. Ta cua cundyeyi sihin maa ndo.

²⁹ Tatu ndyaa zoho ndo, tyizoho ndo cuhva catyi Tatyí li sihin ñu sino iñi.”

¹ Tyaa tucun minoo carta sii ra zacuenda sii ñu sino iñi ñuu Sardis. Tyehen catyun: “Ihya cuu tuhun cahan ra iyo sa usa tahan cuhva sii Tatyí li ra. Ta cumi tucu ra sa usa tahan tiño, ta tyehen catyi ra: Site cuhva iyo ndo. Catyi ñiyivi vatyí sino xaan iñi ndo ta sa ndito ndisa cuii añima ndo, zoco ña ndisa sa ndito añima ndo vatyí sa ndoyo ñuhu ndo.

² Zacuenda ndo sii ndo, ta zanduvaha ndo cuhva zavaha ndo coto ndoyo ñuhu ndihi ndo. Sa ndyehi vatyí ña vaha cuhva zavaha ndo ityi nuu ra Ndyoo.

³ Nacohon iñi ndo cuhva i zacuaha ñiyivi sii ndo, ta zavaha ndo sii si. Zandoo ndo sa ña vaha sa zavaha ndo. Tatu ma cundyaa listo ndo ta zavaha ndo sa vaha, cua quisi ziqui ndo tañi cua quisi minoo ra zuhu vatyí ma coto ndo ñaa cuhva cua sei.

⁴ Iyo zuhva ca ñiyivi nu yucu ndo sa ña zavaha cuatyí. Cua cuhun ñu sihin mi, ta cua ndihvi ñu zahma cuisí vatyí ñiyivi vaha xaan cuu ñu.

⁵ Ta ñiyivi zahacanaa sii cuihna, zuun ñi cua ndihvi ñu zahma cuisí, ta ma zanei zivi ñu nu libro sa ndyaa zivi ñiyivi cua cundito sihin ra Ndyoo. Ityi nuu ra Ndyoo Zuti ta ityi nuu ángel cua catyi vatyí ñiyivi sii mi cuu sii ñu.

⁶ Tatu ndyaa zoho ndo tyizoho ndo cuhva catyi Tatyí li sihin ñu sino iñi.”

Tyño i tasi ra sii ñu ñuu Filadelfia

⁷ Tyaa tucun minoo carta sii ra zacuenda sii ñu sino iñi ñuu Filadelfia, ta tyehen catyun: “Ihya cuu tuhun cahan ra ii xaan, ta ra ndisa cuii cuu ra. Cumi ra ndaha ticui ra rey David (cuñi si catyi si vatyí iyo xaan cuhva sii ra tañi i sicoo sii ra rey David), tatu nuña ra yoñi cuu nacazi. Ta tatu nacazi ra, yoñi cuu nuña.

⁸ Site tandihi sa vaha sa zavaha ndo. Sehi cuhva sii ndo sa nacatyí ndo Tuhun Ndyoo, ta yoñi cua cuu cazi. Ta vazu zuhva ñi tundyee iñi iyo sii ndo, zoco zavaha ndo cuhva catyi, ta ña catyi ndo sa ña sito ndo sii.

⁹ Iyo ñiyivi zavaha xaan cuhva cuñi cuihna. Catyi ñu vatyí ñiyivi hebreo cuu ñu, ta zavaha ñu cuhva cuñi mi catyi ñu, zoco vatyí xaan ñu. Cua zañiñi sii ñu, ta cua quisi ñu nu yucu ndo, ta cua zacahnu ñu sii ndo. Ta cua coto ñu vatyí cuñi xein sii maa ndo.

¹⁰ Cundyee xaan iñi ndo tañi i cundyee xaan iñi mi, ta yucuan cuenda cua zacuende sii ndo, ta ma ndyehe ndo tundoho cahnu sa vasi ziqui tandihi ñiyivi ñuu ñiyivi vatyí cua nducu coto ihñi sii tandihi ñiyivi ñuu ñiyivi, ta cua cote tatu cuñi ñu sii, sa ndisa a ña cuñi ñu sii.

¹¹ Sa cuñi quisi tuqui. Ma zaña ndo cuhva vaha iyo sii ndo coto ma ñihi ndo sa vaha sa cuñi ra Ndyoo cuhva ra sii ndo.

¹² Tandihi ñu zahacanaa sii cuihna cua zandui ñiyivi ñiñi sii ñu ityi nuu ra Ndyoo, ta ma cuu ca ndoyo ñuhu ñu. Cua tyei zivi ra Ndyoo mi ta zivi ñuu ra Ndyoo nuu tandihi ñu cuan. Ñuu cuan cuu ñuu Jerusalén saa. Cua quita si andivi nu iyo ra Ndyoo, ta cua noo si. Ta tandihi ñu zahacanaa sii cuihna, cua tyei zivi sei nuu ñu.

¹³ Tatu ndyaa zoho ndo tyizoho ndo cuhva catyi Tatyí li sihin ñu sino iñi.”

Tyño i tasi ra sii ñu ñuu Laodicea

¹⁴ Tyaa tucun minoo carta sii ra zacuenda sii ñu sino iñi ñuu Laodicea, ta catyun: “Ihya cuu tuhun cahan minoo ra zavaha ndisa cuii cuhva catyi ra. Sa ndaa, ra cahan sa ndisa cuii cuu ra. Ta maa ra i zavaha tandihi sa i zavaha ra Ndyoo.

¹⁵ Site yozo caa iyo ndo, ta ña vaha cuhva iyo ndo. Nu sa ña zandoo ndo sii, ta nu sa ña zatyño vaha ndo tyiñe. Vaha ca tatu zandoo ndihi ndo sii a nduñihi ca zatyño ndo tyiñe. Ña vaha sa zuhva cuñi ndo sii, ta zuhva ña cuñi ndo.

¹⁶ Zoco maa ndo zuhva cuñi ndo sii, ta zuhva ña cuñi ndo. Ta nu ña zandoo ndihi ndo sii, ta nu ña cuñi ndo zatyño vaha ndo tyiñe. Yucuan cuenda cua tava ndyize sii ndo.

¹⁷ Tacuan catyi vatyí catyi maa ndo vatyí iyo xaan sa vaha sii ndo. Iyo xuhun ndo. Ñahñi sa cumañi sii ndo cuñi maa ndo, ta ña nacoto ndo vatyí ñahñi cuenda cuzi iñi ndo. Ndahvi xaan ndo; cuaa ndo; ta ñahñi sa vaha iyo sii ndo sa ndisa cuii.

¹⁸ Yucuan cuenda catyi sihin ndo vatyi zata ndo sa vaha sa iyo sii mi ta cua cucuca ndo sa ndisa cuii. Zata ndo xuhun cuaan vaha ta zahma cuii sa cua ndihvi ndo ta ma cucahan ca nuu ndo. Ta zata ndo colirio quehe nuu ndo ta cua cuu nandyehe ndo. (Cuñi si catyi si vatyi nazama ñu cuhva iyo ñu ta nanducu ñu sa vaha ñin ñi sii maa ra Ndyoo.)

¹⁹ Saha xein tuhun vaha sii ñiyivi, ta cañi sii ñu vatyi cuñi xein sii ñu. Yucuan cuenda zavehi cuhva cuan sihin maa ndo. Ta vityi cuñi si sa zama ndo cuhva iyo ndo ta zavaha ndo sa vaha sa ndisa cuii.

²⁰ Ndyehe ndo vatyi nandyei yuvehe ta cati. Yoo ra cua cuiñi nduzi ta nuña ra yuvehe, cua quihvi ta cua ndoi sihin ra. Ta ñin ñi cua cuu ra sihin.

²¹ Ta ñiyivi cua zahacanaa sii cuihna, cua cuhve sa cundyaa ñu sihin mi nu ndyaca ñehi tañi i zahacanei sii cuihna ta vityi ndyei sihin Zuti nu ndyaca ñaha ra.

²² Tatu ndyaa zoho ndo tyizoho ndo cuhva catyi Tatyí li sihin ñu sino iñi.”

4

Cuhva zacahnu ñu sii ra Ndyoo ndya gloria

¹ Yaha cuan ta ziqui i ndyehi vatyí tacoho minoo yuvehe andivi. Ta i siñi tuqui nduzu ra cahan sihin sa xihna ñi. Ñihi cahan ra tañi nduzu minoo cutu. Ta i catyi ra sihin: Ñaha ihya ta cua zañehi suun ñaa sa cua coo cuee ca. Catyi ra.

² Ta zuun ñi caa cuhva cuan i situ cuii Tatyí li ra Ndyoo sii, ta i ndyehi vatyí ndyaa minoo tyayu ra rey andivi ta ndyaa minoo ra nuu si.

³ Ta ra ndyaa tyayu cuan, xiño xaan ra tañi xiño yuu vaha sa nañi jaspe ta cornalina. Ta siconduu minoo coo yahndyi sii tyayu cuan ta xiño xaan si tañi yuu sa nañi esmeralda.

⁴ Ta nu ndyaa tyayu cuan i ndyehi vatyí siconduu yucu oco cumi tahan ca tyayu rey. Ta yucuan ndyaa oco cumi tahan ra sahnu ndyaca ñaha. Ñoho ra zahma cuii, ta minoo corona xuhun cuaan ñoho xiñi tahan tahan ra.

⁵ Ta tyayu sa ndyaa mahñu cuan quita tasa zavi ta sa cahan zavi ta inga nduzu ndihi ca. Ta ityi nuu tyayu cuan cayu usa tahan ñúhu. Ñúhu cuan cuu sa cuenda sa usa tahan cuhva iyo sii Tatyí li.

⁶ Ta ityi nuu tyayu cuan iyo tucu minoo sa caa tañi caa tyañuhu, zoco xiño xaan si tañi ino. Ta siconduu nu nandyaa tyayu cuan nandyaa cumi tahan quití. Situ cuii siti nuu sii ti. Ityi nuu ti ta ityi sata ti.

⁷ Minoo ti caa ti tañi caa minoo ndicaha. Ta quití cu uu cuan, caa ti tañi caa minoo toro. Quití cu uñi cuan caa nuu ti tañi caa nuu rayí. Quití cu cumi cuan, caa ti tañi caa minoo tazu sa ndava.

⁸ Ta sa cumi tahan quití cuan iyo iñu tahan ndisi ti sa minoo minoo ti. Ta iñi siti nuu nacahnu tandihi ndisi ti. Ñiyaca ta ndiyiyaca ñá sicuita quití cuan sa catyi ti: Yoho ra ndyaca ñaha nacahnu cuii cuun. Ii xaan; ii xaan cuun. Iyon vityi, ta ndya ta xihna cuii ñi iyon, ta cua coon tandihi cuii tyiemvu.

⁹ Tacuan zacahnu quití cuan sii ra ndyaa nu tyayu cuan. Ra ndito tandihi cuii tyiemvu cuu ra, ta saha xaan tucu quití cuan tyahvi ndyoo sii ra.

¹⁰ Ta cuhva sa zavaha quití cuan cuhva cuan, i sicuiñi siti sa oco cumi tahan ra sahnu ndyaca ñaha ityi nuu ra ndyaa nu tyayu rey cuan, ta i zacahnu ra sii ra ndito tandihi cuii tyiemvu. I tava tandihi ra sahnu cuan corona ra, ta i saqui ra sii si ityi nu tyayu cuan, ta i catyi ra:

¹¹ Yoho ra ndyaca ñaha ta Ndyoo cuun sii ndi.

Ra cahnu xaan ca cuun.

Tahan si sa zacahnu xaan ndi suun ta tyaa xaan ndi yahvi suun.

Ta tahan si sa cundyaca ñohon sii tandihi cuii sa iyo.

Vatyí i zavaha moo tandihi si.

I sino si vatyí tacuan cuii moo.

5

Ihya cahan si sa cuenda minoo libro ta sa cuenda ra cu Mvee Ticatyi ra Ndyoo

¹ Tacuan ta ziqui i ndyehi vatyi ra ndyaa tyayu mahñu, ndaha ra minoo libro ndaha siyo cuaha ra. Ndyaa letra sisi si, ta sata si. Ta iyo usa tahan sa nacazi sii si.

² Ta i ndyehi sii minoo ángel ñihi xaan, ta saa xaan cahan ra, ta catyi ra: ¿Yoo ra cuu ra cahnu sa ndisa cuii ta sii ra tahan si sa nuña ra sa nacazi libro ya? ¿Yoo ra cua nuña libro ya? Catyi ra.

³ Tacuan ta yoñi i cuu nuña libro cuan ta ndyehe sisi si. Yoñi minoo ra ñiñi xaan andivi a nu ñuhu a xu ñuhu ta cuu nuña ra sii si.

⁴ Ta i sacu xein vatyi yoñi sa cuu nuña sii si ta ndyehe sisi si.

⁵ Tacuan ta minoo ra sahnú ndyaca ñaha i catyi ra sihin: Ma vacun. Iyo minoo ra cahnu, ñiyivi ra Judá. Ta zuun tucu ñiyivi ra David cuu ra. Sa i zahacanaa maa ra, ta cuu cani ra sii sa usa tahan sa nacazi libro cuan ta nuña ra sii si.

⁶ Ta i ndyehi vatyi mahñu nu yucu tyayu ta sa cumi tahan quití ta tandíhi ra sahnú ndyaca ñaha cuan nandyaa minoo ra caa tañi caa minoo mvee ticatyí sa i sahní ñiyivi. Usa tahan ndiqui ti, ta usa tahan siti nuu ti sa cuu cuenda sa usa tahan cuhva iyo sii Tatyí li ra Ndyoo sa tasi ra Ndyoo nacahnu ñuu ñiyivi.

⁷ Tacuan ta i sahan ra cu mvee ticatyí cuan, ta i quihin ra libro sa ñaa ra ndyaa tyayu cahnu cuan ndaha cuaha ra.

⁸ Ta cuhva i quihin ra libro cuan ta sa cumi tahan quití cuan sihin sa oco cumi tahan ra sahnú ndyaca ñaha cuan i sicuiñi siti ra ityi nuu ra cu mvee ticatyí cuan. Tahan tahan ra cuan ndaha ra arpa ra ta ndaha ra minoo coho xuhun cuaan. Sisi coho cuan cayu cutu. Ta cutu cuan cuu xico sa sica tahvi ñiyivi ra Ndyoo sii ra.

⁹ Ta cuhva sa yucu ra yucuan, i sata ra minoo yaa saa. Tyehen catyi si:

Yoho, minoo ra vaha xaan cuun.

Yucuan cuenda cuu cuhun libro ta canun sa ndazi yuhu si.

Vatyí yoho, sohon sa sahní ñiyivi suun. Satun niñun, ta sihin si zanduvohon sii ndi sihin ra Ndyoo.

Ta ñiyivi nacahnu ñuu ñiyivi cuu ndi, ta ziin ziin cuhva cahan ndi.

Ñiyivi ziin ziin tata cuu ndi.

¹⁰ I sohon cuhva sii ndi ta cuu ndi rey ta cuu ndi ra cu zutu sa cuenda ra Ndyoo, ta cua cundyaca ñaha ndi ñuu ñiyivi.

¹¹ Tacuan i sata ra cuan yaa cuan, ta ziqui i nandyehi inga saha ta siñi nduzu ángel sa nandyaa siconduu nu ndyaa tyayu cahnu ta nu yucu sa cumi tahan quití sihin sa oco cumi tahan ra sahnú ndyaca ñaha. Cuaha xaan cuaha xaan ángel cuenda millón.

¹² Saa xaan i cahan si, ta catyi si:

Ra cu mvee ticatyí sa sahní ñiyivi, ra vaha xaan cuu ra.

Yucuan cuenda iyo xaan cuhva sii ra.

Iyo xaan sa sii ra.

Iyo xaan sa siñi tuñi sii ra.

Cuu xaan cundyaca ñaha ra.

Tahan si sa zacahnu xaan ñiyivi sii ra.

Ra cahnu xaan ca cuu maa ra.

Catyí ángel cuan.

¹³ Ta ziqui siñi vatyí cahan tandíhi sa i zavaha ra Ndyoo, sa iyo ityi ziqui, ta sa iyo nu ñuhu ta sa iyo xu ñuhu ta sa iyo sisi tyañuhu. Tandíhi cuii sa i zavaha ra Ndyoo i cahan si ta catyi si:

Cahnu xaan cuu ra ndyaa tyayu cahnu cuan sihin ra cu mvee ticatyí cuan.

Iyo xaan cuhva sii ra, ta cuu xaan cundyaca ñaha ra.

Tahan si zacahnu yo sii ra tandíhi cuii maa tyiemvu.

¹⁴ Ta sa cumi tahan quití cuan i catyi ti:

¡Nacuu si tacuan, ta nacuu si sa ndisa!

Tacuan ta tandíhi sa oco cumi tahan ra sahnú ndyaca ñaha i sicuiñi siti ra, ta i zacahnu ra sii ra ndito tandíhi cuii maa tyiemvu.

6

Nuña ra usa tahan sa ndazi yuhu libro

¹ Tacuan ta ziqui i ndyehi vatyí ra cu Mvee Tícatyi ra Ndyoo, i nuña ra minoo sa usa tahan sa ndazi yuhu libro cuan. Ta siñi sa cahan minoo sa cumi tahan quití sa yucu yucuan. Saa xaan i cahan tí tañi cahan zavi ta catyi tí: ¡Ñaha ihya ta ndyehun! Catyi tí.

² Ta ziqui i ndyehi minoo caballo cuisí. Yozo minoo ra sii tí, ta ndaha ra minoo nduva. I ñihi ra minoo corona ñoho xiñi ra vatyí sahñi tahan ra ta zahacanaa ra, ta cua zahacanaa ca ra nu cuahan ra.

³ Ta ra cu Mvee Tícatyi i nuña ra sa cu uu sa ndazi yuhu libro cuan. Ta siñi sa cahan sa cu uu quití cuan, ta catyi tí: ¡Ñaha ta ndyehun!

⁴ Tacuan ta i quita inga caballo. Caballo cuaha cuu tí. Ta ra yozo sii tí, iyo cuhva sii ra quindyaa ra cuhva vaha yucu ñiyivi ñuu ñiyivi. Ta cua quisaha cahñi ñiyivi sii tahan ñu. Ta ra yozo caballo cuan i ñihi ra minoo espada cahnu xaan.

⁵ Yaha cuan ta ziqui i nuña ra cu Mvee Tícatyi cuan sa cu uñi sa ndazi yuhu libro cuan ta siñi sa cahan sa cu uñi tahan quití cuan, ta i catyi tí: ¡Ñaha ta ndyehun! Ta i ndyehi inga caballo toon. Ta ra yozo sii tí ñaa ra minoo tícayá.

⁶ Ta mahñu nu yucu sa cumi tahan quití cuan, siñi minoo nduzu tañi cahan ñiyivi ta catyi si:

Minoo kilo nuñi, yahvi xaan cua cundyaa si.

Ta tacuan tucu siti cebada, yahvi xaan cua cundyaa si.

Zoco cua coo cuaha azetye ta vino.

Catyi nduzu cuan.

⁷ Cuhva sa nuña ra cu Mvee Tícatyi sa cu cumi tahan sa ndazi yuhu libro cuan, i siñi vatyí cahan sa cu cumi tahan quití cuan ta catyi tí: ¡Ñaha ta ndyehun!

⁸ Ta i ndyehi sii minoo caballo cuaan. Ta ra sa yozo sii tí, nañi ra Tuhun Sihi Ñiyivi. Ta ityi sata ra vasi inga ra sa nañi Andyaya. I ñihi ra cuan cuhva ziqui zuhva ñuu ñiyivi sa cahñi ra ñiyivi. Sahñi ra sii ñu sihin cuhva i zacanda ra cuatyí ta sihin tama, ta sihin cuehe ta sihin quití xaan.

⁹ Yaha cuan, ta ziqui i nuña ra cu Mvee Tícatyi sa cu ohon tahan sa ndazi yuhu libro cuan, ta i ndyehi minoo altar, ta xuu si i ndyehi añima ñiyivi i sihi sa cuenda Tuhun Ndyoo ta sa cuenda sa nacatyí xaan ñu Tuhun Ndyoo sihin ñiyivi.

¹⁰ Ta i cana saa ñu sihin minoo nduzu saa xaan, ta catyi ñu: Zutu mañi yuu, ii xaan moo, ta ndoo xaan zavohon, ¿ta ama ta cua tyicuhvon sii ñiyivi ta cua tasi tuñun sii ñiyivi ñuu ñiyivi vatyí maa ñu cuu ñu i sahñi sii ndi? Catyi ñu.

¹¹ Tacuan i cuu si, ta i saha ra zahma cuisí ndihvi tandihí ñu cahan, ta i catyi ra sihin ñu vatyí naquitatu ñu zuhva ca quivi vatyí cumañi ca casi tahan ñu, tandihí ca ñu sa cua cahñi ñiyivi sa cuenda ra Cristo cuhva i sihi maa ñu.

¹² Ta ziqui i ndyehi vatyí sa nuña ra cu Mvee Tícatyi sii sa cu iñu tahan sa ndazi yuhu libro cuan. Sa yaha i nuña ra sii si, ta ziqui i taan minoo sa ñihi xaan. I ndutoon xaan ñicandyí tañi zahma toon. Ta luna, i nducuaha si tañi caa niñi.

¹³ Ta tiño sa iyo andivi, i canacoyo tí ndya nu ñuhu tañi coyo tandihí yucu vixi tatu nu yutya si tatu ñihi xaan caa tatyí.

¹⁴ Ta ziqui i ndata zava yutyí andivi, ta i natuu si tañi natuu minoo tutu. Ta tandihí yucu ta tandihí ñuhu sa ndyaa mahñu tyañuhu, i nacanda si ta i nazama si nu ndyaa si.

¹⁵ Ta tandihí ra cu rey ta ra nahnu ta ra cuca ta ra ñiñi ta ra ndyaca ñaha sihin tandihí ra cu muzu ta tandihí inga ñiyivi ndya vaha ñi, cua quihvi xehe ñu sisi ñuhu ta sisi yavi yuu ta ticui yuu sa iyo yucu.

¹⁶ Ta cua cahan ñu sihin yucu ta sihin yuu, ta catyi ñu: Canacava ndo ziqui ndi, ta tyixehe ndo sii ndi sii ra ndyaa tyayu cahnu cuan ta sii ra cu Mvee Tícatyi cuan vatyí sa cuxaan xaan ra vityí.

¹⁷ Sa saa quivi cuxaan xaan ra sa ndisa, ta yoñi cua cuu cundyee iñi sii si. Catyi ñu.

7

Ñiyivi hebreo sa cuu ñiyivi ra Ndyoo sa ndisa

¹ Yaha cuan ta ziqui i ndyehi cumi tahan ángel. Nandyaa ra sa cumi tahan siqui ñuu ñiyivi, ta ñá saha ra yaha tatyí. Yucuan cuenda ñá cuu cava tatyí ñuu ñiyivi ta nu nu tyañuhu ta nu nu yutu. Ñahñi maa tatyí i caa.

² Ta i ndyehi sii inga ángel. Vasi ra ndya ityi caña ñicandyi, ta ndyizo ra zeyu ra Ndyoo ndito. I cana saa ra ta cahan ra sihin inga cumi tahan ángel cuan vatyí sa cumi tahan ra cuan iyo cuhva sii ra sa zatívi ra ñuu ñiyivi ta tyañuhu.

³ Zoco ángel sa vasi cuan, i catyí ra sihin ra: Cuatu noo ndo. Ma zatívi ñaha ndo sii ñuu ñiyivi ta sii tyañuhu ta nu sii yutu ndya cua tyaa xihne zeyu ra Ndyoo Zutu yo yiqui nuu ñiyivi sa cuu muzu maa ra Ndyoo.

⁴ Tacuan i cuu si, ta siñi nacatyí ra yozo tahan ñiyivi i tyaa ra zeyu cuan. Ta cuu si minoo ziendu uu xico cumi mil ñiyivi sisi tandíhi sa usi uu ityi ñiyivi hebreo.

⁵ Usi uu mil ñu cuu ñu ñiyivi ra Judá. Usi uu mil ñu cuu ñu ñiyivi ra Rubén. Usi uu mil ñu cuu ñu ñiyivi ra Gad.

⁶ Usi uu mil ñu cuu ñu ñiyivi ra Aser. Usi uu mil ñu cuu ñu ñiyivi ra Neftalí. Usi uu mil ñu cuu ñu ñiyivi ra Manasés.

⁷ Usi uu mil ñu cuu ñu ñiyivi ra Simeón. Usi uu mil ñu cuu ñu ñiyivi ra Leví. Usi uu mil ñu cuu ñu ñiyivi ra Isacar.

⁸ Usi uu mil ñu cuu ñu ñiyivi ra Zabulón. Usi uu mil ñu cuu ñu ñiyivi ra José. Ta usi uu mil ñu cuu ñu ñiyivi ra Benjamín.

Ndyehi ra cuaha xaan ñiyivi ñoho zahma cuisí

⁹ Yaha cuan ta ziqui i ndyehi sii cuaha xaan ñiyivi. Ñiyivi tandíhi cuii tata cuu ñu ta tandíhi cuii nación ta tandíhi cuii ñuu. Ta ziiñ ziiñ yuhu cahan ñu, tandíhi nuu zahan ta tyehen ñi sa iyo ñuu ñiyivi. Nandyaa ñu cuan ityi nuu tyayu cahnu, ta nandyaa ñu ityi nuu ra cu Mvee Ticatyi. Cuaha xaan cuaha xaan ñiyivi cuu ñu ndya cuhva yoñi cuu cahvi sii ñu. Ñoho ñu zahma cuisí, ta ñaa ñu ndaha ticaha.

¹⁰ Tandíhi ñu cana saa ñu sihin minoo nduzu saa xaan, ta catyí ñu:

Ra Ndyoo, ra ndyaa tyayu cahnu cuu ra zacacu sii ndi,

Ta ra cu Mvee Ticatyi cuu ra zacacu sii ndi.

Catyí ñu.

¹¹ Ta tandíhi cuii ángel cuan nandyaa ra siconduu ra nu ndyaa tyayu cahnu cuan ta nu yucu tandíhi ra sahnú ndyaca ñaha ta nu yucu sa cumi tahan quiñi. Ta tandíhi cuii ángel cuan i sicava ndyayu ra nu ñuhu ityi nuu tyayu cahnu cuan, ta i zacahnu ra sii ra Ndyoo.

¹² Ta i catyí tandíhi ángel:

Yoho Ndyoo Zutu ndi, nazacahnu xaan maa ndi suun.

Tyaqui xaan coon. Cuaha xaan sa siñi tuñi iyo suun.

Nacuhva xaan ñiyivi tyahvi ndyoo suun, ta nazacahnu ñu suun.

Cuaha xaan cuhva iyo suun, ta cuaha xaan sa ndyaca ñohon.

Ta nacuu si tacuan, ta nacuu si sa ndisa tandíhi cuii tyiemvu.

¹³ Tacuan i cuu si, ta ziqui minoo ra sahnú ndyaca ñaha i ndaca tuhun ra sii, ta catyí ra: ¿Yoo ñiyivi cuu ñu sa ñoho zahma cuisí ña? ¿Ta ndya ityi i quisi ñu? Catyí ra.

¹⁴ Ta i catyí sihin ra: Tata, sa sito moo. Ta ziqui i catyí ra sihin mi: I quita ñu ndya nu iyo tundoho cahnu xaan. Sa nacatya ñu zahma ñu ta nducuisi zahma ñu sihin niñi ra cu Mvee Ticatyi. (Cuñi si catyí si vatyí sa nduvaha añima ñu sa cuenda ra Cristo.)

¹⁵ Ta vityí nandyaa ñu ityi nuu tyayu maa ra Ndyoo. Ndyiyaca ta ñiyaca zatyiño ñu tyiño ra sisi vehe nu zacahnu ñiyivi sii ra. Ta maa ra sa ndyaa tyayu cahnu cuan zacuenda ra sii ñu vatyí ndyaa ra sihin ñu.

¹⁶ Ma cuzoco ca ñu. Ta ma cu-ityi ca ñu. Ma cahmi ca ñicandyi sii ñu, ta ma quehe ca yoco sa ihñi sii ñu.

¹⁷ Vatyí ra cu Mvee Tícatyi, ra ndyaa yatyí ñi tyayu cahnu cuan, cua zacuenda ra sii ñu tañi sa mvee tícatyí zono ra cuu sii ñu, ta cua cundyaca ra sii ñu nu iyo ndutyá coho ñu, ta cua cundito ñu tandíhi cuii tyiemvu. Ta cua zanaa ra Ndyoo tandíhi cuii tucuihya iñi sii ñu.

8

Nuña ra sa cu usa tahan sa ndazi yuhu libro

¹ I nuña ra cu Mvee Tícatyi sii sa cu usa tahan sa ndazi yuhu libro, ta cuhva cuan i cutaxi gloria tañi zava ora.

² Ta zíquí i ndyehi vatyí sa usa tahan ángel sa nandyaa ityi nuu ra Ndyoo, i ñihi minoo minoo ra minoo cutu.

³ Ta zíquí i quisi inga ángel, ta i sicuñi ndyaa ra ityi nuu altar. Ñaa ra minoo cuun xuhun cuaan. Ta i ñihi ra cuaha xaan cutu vatyí cua cahmi ra sii si nuu altar xuhun cuaan sa ndyaa ityi nuu tyayu cahnu. Cua cahmi ra sii si ityi nuu ra Ndyoo cuhva sa cahan tandíhi ñiyívi sa cuu cuenda ra Ndyoo sihin ra. Ta cua quihin ra Ndyoo xico cutu ta oración cuan.

⁴ Ta i quita ñuhma cutu cuan sisi sa ndaha ángel cuan, ta i ndaa si ndya nuu ra Ndyoo ñi sihin oración sa zavaha ñiyívi sa cuu cuenda ra.

⁵ Ta zíquí i zacutu ángel cuan cuun cuan sihin ñúhu sa cayu nu altar. Ta i cañi ra ñúhu cuan nu ñuhu ñiyívi. Ta sicoo minoo nduzu ñihi xaan tañi cahan zavi, ta sicoo xaan inga nduzu ta tasa zavi, ta i taan ndíhi ca.

Tívi ángel cuan cutu

⁶ Tacuan i cuu si, ta i nacundyaa listo tandíhi sa usa tahan ángel cuan vatyí cua tívi ra cutu ra.

⁷ Ta ángel sa xihna ñi cuan i tívi ra cutu ra, ta zaca noo yuu zavi ta ñúhu ta niñi i canacava nu ñuhu ñiyívi. Ta i cayu sa yatyí zava ñuu ñiyívi sihin yutu ta cuhu.

⁸ Ta zíquí sa cu uu ángel cuan, i tívi ra cutu ra, ta i canacava tañi minoo yucu cahnu sisi tyañuhu. Cayu si i canacava si. Ta sa yatyí zava tyañuhu i nduu si niñi.

⁹ Ta quítí sa iyo sisi tyañuhu nu nduu niñi cuan, i sihi tí. Ta i tívi cuaha xaan barco.

¹⁰ Tacuan ta zíquí i tívi tucu ángel sa cu uñi cuan cutu ra ta i canacava minoo tiñoó cahnu xaan. Cayu xaan tí tañi minoo ñúhu. I canacava tí nuu sa yatyí zava yuu sa iyo ñuhu ñiyívi ta nu cuaha xaan zoco ndutyá.

¹¹ Nañi tiñoó cuan Ajenjo vatyí ndu-uva tandíhi ndutyá nu canacava tí, ta cuaha xaan ñiyívi i sihi vatyí sihi ñu ndutyá cuan, ta uva xaan si.

¹² Tacuan ta i tívi tucu sa cu cumi tahan ángel cuan cutu ra. Cuhva cuan ta i tívi sa yatyí zava ñicandyi ta sa yatyí zava yoo ta sa yatyí zava tiñoó. I nduñaa sa yatyí zava ñicandyi ta sa yatyí zava yoo ta sa yatyí zava tiñoó. Yucuan cuenda ñá ndundisi vaha ca ora, ta i nduñaa ca sa sa cuaa.

¹³ Ta zíquí i ndyehi vatyí ndava minoo ángel ta cuahan ra zava mahñu andívi. Ta saa xaan i cahan ra ta siñi sa cahan ra. Tyehen catyi ra: ¡Ndahvi ñi cuu ñiyívi iyo ñuu ñiyívi!, vatyí sa cuñi tívi inga uñi tahan ángel cutu ra.

9

¹ Tacuan i cuu si, ta zíquí ángel cu ohon cuan i tívi ra cutu ra, ta i ndyehi sii minoo ra caa tañi caa minoo tiñoó. I quita ra ndya andívi, ta i canacava ra ndya nu ñuhu. Ta ñaa maa ra ndaha ticui sa cuu nuña yavi cono xaan nu ñoho ñiyívi zavaha sa ña vaha.

² Ta i nuña ra sii si, ta i quita ñuhma tañi quita ñuhma minoo nu cayu siin. Ta i nduñaa ñicandyi, sihin ñuhma sa quita yavi cuan, ta ñuhma xaan i nduu nacahnu.

³ Ta i quita quítí tañi caa tica sisi ñuhma cuan, ta i ndava tí ñuu ñiyívi. Ta quítí xaan cuu tí, tañi xaan tizuhma sa iyo nu ñuhu.

⁴ Ta tica xaan cuan, cuu zandyehe tí tundoho sii tandíhi ñiyívi sa ñahñi zeyu ra Ndyoo ndyaa yíquí nuu. Zoco ma cuu zatívi tí cuhu ta nu yutu sa iyo ñuu ñiyívi.

⁵ Ta ña cuu cahñi ti sii ñiyivi. Maa sa ndyehe ñi ñu tundoho ohon yoo. Cua zandyehe quití cuan tundoho sii ñu tañi zandyehe tizuhma tundoho sii yo vatyí cua tyaa ti sii ñu.

⁶ Quivi cuan cua cuñi ñiyivi sa cuu ñu, zoco ma ñihi ñu cuhva. Cua nanducu xaan ñu cuhva cuu ñu, zoco ma cuu cuu ñu.

⁷ Tica cuan caa ti tañi caa caballo nahnu. Quiti cuahan nu iyo cuatyí. Ta xiñi ti caa si tañi sa ñoho minoo corona xuhun cuaan. Ta nuu ti caa tañi caa nuu ñiyivi.

⁸ Ixi xiñi ti caa tañi caa ixi xiñi ñu zihí. Ta noho ti caa tañi caa noho ndicaha.

⁹ Ta iyo minoo zoo ti ndava xaan si tañi caa. Ta tatu cua ndava ti, cuaha xaan nduzu zavaha ndisi ti tañi nduzu zavaha cuaha xaan carreta sa xita caballo tatu cuahan ti nu iyo cuatyí.

¹⁰ Zuhma ti cuu tañi zuhma tizuhma. Iyo minoo iñu xaan nuu si. Ta sihin zuhma ti cua zandyehe ti tundoho sii ñiyivi ohon yoo.

¹¹ Iyo ra ndyaca ñaha sii tica xaan cuan. Zuun ra cuu ra sa ndyaca ñaha yavi nu ñoho ñiyivi i zavaha sa ña vaha. Nañi ra Abadón sihin zahan hebreo. Ta ñiyivi cahan zahan griego catyí ñu vatyí Apolión nañi ra. Cuñi si catyí si ra zatívi.

¹² Yucuan cuu sa xihna ñi tundoho. Ndyaa coo uu tahan ca.

¹³ Ra ángel cu iñu cuan i tiví ra cutu ra ta siñi nduzu cahan minoo ra. Quita nduzu cuan nu ndyaa tandihí sa cumi tahan tutu altar xuhun cuaan sa ndyaa ityí nuu ra Ndyoo.

¹⁴ Ñaa ángel cu iñu cuan cutu ra, ta i catyí ra cahan cuan sihin ra: Ndasun sii sa cumi tahan ángel nuñi nu ndyaa yutya cahnu Eufrates.

¹⁵ Ta tacuan ta i ndasi sa cumi tahan ángel vatyí sa ndatu listo ra sa cuenda cuhva cuan ta sa cuenda quivi cuan ta sa cuenda yoo cuan ta cuiya cuan. Ta sa tahan si cuhva sa ndatu xaan ra, ta cua zavaha ra tyiño sa tahan si sii ra. Cua cahñi ra sa yatyí zava ñiyivi ñuu ñiyivi.

¹⁶ I ndyehi cuaha xaan zandaru ángel cuan; yozo ra caballo ta cuahan ra. Ta siñi vatyí uu ziendu millón ra cuu ra.

¹⁷ Tyehen cuu cuhva caa caballo cuan sisi sa i ndyehi. Ra yozo sii ti ñoho minoo caa yiquí ndyica ra. Iyo si cuaha si. Iyo si azu si, ta iyo si cuaan si. Xiñi caballo cuan caa si tañi caa xiñi ndicaha. Ta yuhu ti quita ñúhu ta ñuhma ta azufre.

¹⁸ Ta sihin ñúhu ta ñuhma ta azufre sa quita yuhu caballo cuan, i sihi sa yatyí zava ñiyivi ñuu ñiyivi.

¹⁹ Vatyí iyo cuhva sii ti sihin yuhu ti ta sihin zuhma ti. Zuhma ti caa tañi caa coo sihin xiñi ti. Ta sihin si zañicuehe ti sii ñiyivi.

²⁰ Zoco numaa sihi xaan ñiyivi sihin tundoho cuan, zoco inga ñiyivi sa ñá sihi, ñá ndu-uu iñi ñu cuatyí ñu. Ñá zaña ñu sa zacahnu ñu sii cuihna ta sii ndyoo xuhun cuaan ta ndyoo xuhun cui si ta ndyoo caa ta ndyoo yuu ta ndyoo yutu. Zacahnu ñu sii si vazú ña ndyehe si ta ña siñi si ta ña cuu caca si.

²¹ Ta ñá zaña ñu tuhun sa sahñi ñu sii ñiyivi ta sa zatazi ñu ta sa zuhu ñu ta sa quixi rayii sihin ñaha ta ñá tandaha ra ta sa quixi ra sihin ñazihí inga ra. Ñá zaña ñu sii tandihí cui cuatyí zavaha ñu.

10

Minoo ángel sa ndyizo minoo libro luhlu

¹ Tacuan ta ziquí i ndyehi sii inga ángel ñihi xaan. I quita ra andívi ta vasi noo ra ndya nu ñuhu. Ñoho ra sisi minoo vico, ta ñoho minoo coo yahndyí xiñi ra. Ndisi xaan nuu ra tañi ñicandyí, ta saha ra ndisi xaan si tañi cayu ñúhu.

² Ta ndaha ra minoo libro luhlu, ta nuña si. Ta i sañi ra saha siyo cuaha ra nu tyañuhu, ta i sañi ra saha siyo zatyí ra nu ñuhu.

³ Ta ziquí i cana saa ra sihin minoo nduzu ñihi xaan tañi tana minoo ndicaha. Cuhva sa cana saa ra, i siñi usa tahan nduzu tañi nduzu zavi.

⁴ Ta sa yaha cahan zavi cuan ta ziquí cua tyei sii si, zoco siñi mino nduzu sa quita andívi ta tyehen catyí si sihin: Cucumi xehun cuhva i cahan sa usa tahan nduzu zavi cuan, ta ma tyoon sii si.

⁵ Ta ziqui i ndyehi ángel sa sañi saha siyo cuaha ra nu tyañuhu ta saha siyo zatyí ra nu ñuhu vatyí i zandaa ra ndaha siyo cuaha ra ndya andívi.

⁶ Ta i tyiñaha ra Ndyoo. Cahan ra sa cuenda ra Ndyoo ra ndito tandíhi cuii tyiemvu, ra i zavaha andívi ta ñuhu ñuu ñiyívi ta tyañuhu ta tandíhi cuii sa iyo. Ta i catyí ángel cuan: Sa cua ndíhi tuhun

⁷ vatyí tatu sa quisaha tiví ra ángel cu usa cuan cutu ra, cuñi si catyí si vatyí sa yaha zavaha ra Ndyoo cuhva xehe sa cua zavaha ra tañi sa zacoto ra sii ra cu muzu ra, ra cu profeta.

⁸ Tacuan i catyí ángel cuan, ta ziqui i siñi tuqui nduzu sa tuhve siñi. Minoo nduzu sa quita andívi cuu si, ta i cahan si sihin inga saha, ta catyí si: Cuahan ta cuhun libro luhlu sa ndaha ángel ra nandyaa nu tyañuhu ta nu ñuhu ñuu ñiyívi. Catyí ra.

⁹ Ta i sehin nu nandyaa ángel cuan, ta i sique libro luhlu cuan sii ra, ta i catyí maa ra sihin: Cuhun sii si, ta casun sii si. Vixi xaan cua cuu si sisi yuhun tañi tyahiñu ñuñu. Zoco cua ndu-uva xaan si sisun.

¹⁰ Ta tacuan i zavehi. I quihin libro luhlu sa ndaha ángel cuan, ta i sasi sii si. Sisi yuhi vixi xaan i cuu si tañi tyahiñu, zoco i ndu-uva xaan si sisi sa yaha sasi sii si.

¹¹ Ta ziqui i catyí ra sihin: Vityí cuñi si sa nacatyí moo cuhva catyí ra Ndyoo nu libro cuan yozo caa cua cuu si sa cuenda cuaha xaan ñiyívi ta cuaha xaan nación ta sa cuenda ñiyívi cahan ziin ziin zahan ta sa cuenda ra ndyaca ñaha sii ñu, ndíhi ca.

11

Uu tahan ra saha sa ndaa

¹ Tacuan ta ziqui i saha ra minoo tuñi sii, ta cua tyicuhve sihin si, ta i catyí ángel cuan sihin: Nduvítan ta tyicuhvon vehe ñuhu ra Ndyoo ta altar si ta cahvun yozo tahan ñiyívi zacahnu sii ra Ndyoo yucuan.

² Zoco nu cuu nuquehe vehe ñuhu, ma tyicuhvon vatyí cua ndoo si cuenda ñiyívi sa yívi ñiyívi hebreo cuu, ta cua zanduquiñi caa ñu sii ñuu vaha xaan ya uu xico uu yoo.

³ Ta cua tasi sii uu tahan ra cua cuhva sa ndaa sa cuenda mi. Cua ndíhvi ra zahma toon, ta cua cahan ra sa cuenda mi mil uu ziendu uñi xico quívi.

⁴ Sa uu tahan ra ya cua cuu ra tañi uu tahan yutu olivos ta cua cuu ra tañi uu tahan candelero sa ndyaa ityí nuu ra Ndyoo ra ndyaca ñaha sii tandíhi yo.

⁵ Tatu iyo ñiyívi cuñi cuhva tundoho sii ra, cua quita ñúhu yuhu ra ta cua cahmi si sii ñiyívi cuxaan sii ra. Cuhva cuan cua cuu ñiyívi tatu cuñi ñu cuhva ñu tundoho sii ra.

⁶ Sa uu tahan ra ya, iyo cuhva sii ra ta cuu cazi ra andívi ta ma coon zavi tandíhi quívi sa cua cahan ra sa cuenda ra Ndyoo. Ta iyo tucu cuhva sii ra sa nazama ra ndutya ta cua nduu si niñi, ta cua cuu zandyehé xaan ra tundoho sii ñiyívi. Cua quihin cuehe sii ñu, ta cua coo inga tundoho sii ñu yozo cuhva cuñi maa ra.

⁷ Zoco quívi sa yaha saha ra tandíhi sa ndaa, cuhva cua nacatyí ra sihin ñiyívi, ta ziqui cua quita minoo quítí xaan sisi yavi nu ñoho ñiyívi zavaha sa ña vaha, ta cua cahñi tahan tí sihin ra, ta cua zahacanaa tí ta cua cahñi tí sii ra.

⁸ Cua cava coño ñuhu ra ityí cahnu ñuu cahnu nu i sahñi ñiyívi sii ra ndyaca ñaha sii yo. Catyí tucu ñiyívi vatyí nañi ñuu cuan Sodoma ta nañi si Egipto vatyí cuaha xaan cuatyí zavaha ñiyívi ñuu cuan.

⁹ Ta uñi quívi zazava ñiyívi ziin ziin ñuu ta ziin ziin tata ta ñiyívi ziin ziin nación, ñu cahan ziin ziin zahan cua ndyehé ñu sii coño ñuhu ra, ta ma cuhva ñu sa quíhvi si ñuhu.

¹⁰ Ta zii xaan cua cuñi ñiyívi ñuu ñiyívi vatyí sihi ra cuan. Cua cuzii xaan iñi ñu, ta cua tasi ñu regalo sii amigo ñu vatyí sihi uu tahan ra saha sa ndaa cuan ta zayanga xaan ra sii ñu.

¹¹ Zoco cua yaha uñi quívi zazava, ta ziqui cua zanandoto ra Ndyoo sii ra, ta cua nduvita ra inga saha. Ta tandíhi ñiyívi ndyehé, cua yuhu xaan ñu.

¹² Ta ziqui sa uu tahan ra saha sa ndaa, cua cuñi ra minoo nduzu saa xaan sa quita andívi, ta cua catyí si sihin ra: Ñaha ndo. Ndaa ndo ihya. Catyí si. Ta cua ndaa ra ndya andívi sisi minoo vico, ta cua ndyehé ra xaan iñi sii ra cuhva cuan.

¹³ Ta zuun ñi caa cuhva cuan i taan minoo sa ñihi xaan, ta i nacoyo xaan vehe minoo parte ñuu cuan, ta i sihi usa tahan mil ñiyivi sa cuenda sa taan cuan. Ta ñiyivi sa nandoo i yuhu xaan ñu, ta i zacahnu ñu sii Ndyoo ra ndyaa andivi.

¹⁴ Tacuan cua cuu sa cu uu tundocho, ta sa yatyi cua coo tucu sa cu uñi tundocho.

Tivi ángel sa cu usa cuan cutu ra

¹⁵ Tacuan ta ziqui i tivi ángel sa cu usa cuan cutu ra, ta ziqui saa xaan i quisaha cahan ñiyivi sisi gloria, ta i catyi ñu: Vityi cua cundyaca ñaha ra Ndyoo ta ra Cristo sii tandihi sa i sindyaca ñaha ñiyivi. Ta cua cundyaca ñaha ra tandihi cuii maa tyiemvu.

¹⁶ Ta sa oco cumi tahan ra sahnu, ra ndyaa nu tyayu ityi nuu ra Ndyoo, i sicava ndyayu ra, ta i zacahnu ra sii ra Ndyoo.

¹⁷ Tyehen i catyi ra:

Nacuhva ndi tyahvi ndyoo suun, Ndyoo ra ndyaca ñaha, ra iyo tandihi cuii cuhva sii.

Moo cuu ra sa iyo nu quisaha si, ta ndito moo vityi,

Ta cua cunditon tandihi cuii tyiemvu.

Nacuhva ndi tyahvi ndyoo suun vatyi cahnu xaan cuhva iyo suun,

Ta vityi sa quisaha cundyaca ñaha moo sii tandihi.

¹⁸ I cuxaan xaan ñiyivi ñuu ñiyivi sihin moo, zoco vityi sa saa quivi cua cuxoon sihin maa ñu.

Vityi sa saa si quivi cua tyicuhvon sii ñiyivi i sihi,

Zoco cua cuhvon sa vaha sii ra cu profeton ta sii ra cu muzun,

Ta cua cuhvon sa vaha sii tandihi ñiyivi cuñi xaan suun ta sii ñu yuhu suun vazu cahnu ñu a vazu luhlu ñu.

Ta sa saa si cuhva cua zanaa moo sii ñiyivi i zativi ñuu ñiyivi.

¹⁹ Tacuan i catyi tandihi ra sahnu ndyaca ñaha ta ziqui i nuña yuvehe vehe maa ra Ndyoo sa iyo andivi, ta sisi vehe ra i ndyehi minoo satu sa cuenda tyiño sahnu i zandaa ra Ndyoo. Ta i sicoo xaan tasa zavi ta nduzu ñihi, ta cahan zavi. Ta i taan, ta i coon xaan yuu zavi.

12

Cuhva i zavaha minoo dragón sihin minoo ñaha

¹ Tacuan i cuu si, ta ziqui i sicoo minoo sa iyo cahnu xaan andivi. I ndyehi sii minoo ñaha, ta zahma ña cuu ñicandyi ta sañi ña nu yoo. Iñi usi uu tahan tiño xañi ña, ta cuu si corona ña.

² Ñoho zehe ña, ta sacu saa ña. Uhvi sisi ña vatyi sa cuñi cacu si.

³ Ta ziqui i quituu tucu inga sa iyo andivi. I ndyehi sii minoo dragón cahnu. Cuaha ti, ta iyo iñu tahan xañi ti. Usi tahan ndiqui ti. Ta ñoho minoo corona tahan tahan xañi ti.

⁴ I xita cañoho ti sa yatyi zava tiño andivi sihin zuhma ti, ta i cañi ti sii ti nu ñuhu ñuu ñiyivi. Ta ziqui i sicuñi ndyaa ti ityi nuu ñaha sa cuñi cacu zehe vatyi cua casi ti sii zehe ña tatu sa cacu si.

⁵ Ta i zacacu ña sii zehe ña, ta rayi cuu ra, ta ityi nuu ca ñihi xaan cua cundyaca ñaha ra sii tandihi ñiyivi ñuu ñiyivi. Ta i quihin ra Ndyoo sii zehe ña, ta i sindyaca ra sii ra ndya nu ndyaa maa ra.

⁶ Ta ziqui i sino ñaha cuan, ta i ndihvi ña sisi cuhu minoo nu sa i zanduvaha maa ra Ndyoo cuenda ña vatyi yucuan cua casi ña mil uu ziendu uñi xico quivi.

⁷ Ta ziqui i sicoo minoo cuatyi andivi. Minoo ángel cahnu, ra sa nañi Miguel sihin ángel sa ndyaca ñaha ra, i sañi tahan ra sihin dragón cuan ta sihin ángel ndihi sihin ra dragón cuan.

⁸ Ta ñá cuu zahacanaa dragón cuan. Yucuan cuenda ñá cuu ca ndoo quitu cuan andivi.

⁹ I tava ra Ndyoo sii ra andivi, ta i quisi ra ñuu ñiyivi sihin ángel sa sino iñi sii ra vatyi i tava tucu ra Ndyoo sii tandihi ra cuan. Ta ra dragón cuan, zuun ñi ra cuu coo ta sa naha, ta nañi ra cuihna, ta nañi ra Satanás, ta zandavi ñaha ra sii tandihi cuii ñiyivi ñuu ñiyivi.

¹⁰ Ta ziqui i siñi vatyi saa xaan cahan minoo ra andivi, ta catyi ra: Vityi sa saa cuhva zacacu ra Ndyoo sii ñiyivi. Vityi iyo xaan cuhva sii ra, ta ndyaca ñaha xaan ra, ta tacuan

tucu ra Cristo vatyí saha xaan ra Ndyoo cuhva sii ra. Tacuan cuu si vityi vatyí i tava ra Ndyoo sii cuihna, ta maa cuihna cuu ra sahan ityi nuu ra Ndyoo ta tyaa ra cuatyí sata ñu sino iñi ndiyaca ta ñiyaca.

¹¹ Zoco i zahacanaa ñiyivi sino iñi sii ra Ndyoo sii cuihna vatyí i sati ra cu Mvee Ticatyi ra Ndyoo niñi ra. Ta i zahacanaa tucu ñu sii ra vatyí i nacatyí ñu sihin ñiyivi cuhva i sino iñi ñu sii ra Ndyoo, ta ñá yuhu ñu sa cuu ñu cuenda ra.

¹² Yucuan cuenda cuzi xaan iñi ndo, ndoho sa iyo andivi, zoco ndahvi ndoho sa iyo ñuu ñiyivi ta ndoho sa iyo tyañuhu vatyí sa i noo cuihna ndya nu ndyaa ndo. Ta cuxaan xaan ra vatyí sito ra vatyí ñahñi ca quivi ra.

¹³ Ta cuhva sa ndyehe ra dragón cuan vatyí i zavita ra Ndyoo sii ra ndya ñuu ñiyivi ya, ta ziqui i quisaha zayanga ra sii ñaha sa i zacacu sii lee cuan.

¹⁴ Ta i saha ra Ndyoo uu tahan ndisi sii ñaha cuan tañi sa iyo sii minoo tazú cahnú. Yucuan cuenda i cuu ndava ña, ta i quihvi ña sisi cuhu nu cua ñihi ña sa casi ña uñi cuiya zazava, ta ma nañihi coo cuan sii ña.

¹⁵ Zoco coo cuan, i tava ti cuaha xaan ndutya yuhu ti, ta i nduu si tañi minoo yuu, ta cua zatyani si sii ñaha cuan.

¹⁶ Zoco i tyindyee ñuhu sii ña vatyí i ndata ñuhu, ta i quihvi ndutya sa i tava coo cuan sihin yuhu ti.

¹⁷ Ta ziqui i cuxaan xaan coo cuan sihin ñaha cuan, ta yucuan cuenda i quita ti ta cuahan ti vatyí cua cahñi tahan ti sihin tandihi inga ñiyivi sa cuu zehe ñaha cuan. Maa ñu cuu ñiyivi sa zavaha cuhva catyi ra Ndyoo. Ta ndyico ñu sii sa ndisa sa i zañaha ra Jesucristo.

13

Uu tahan quití quiñi caa

¹ I sicuñi ndyei nu ñiyiti yuhu tyañuhu, ta i ndyehi vatyí minoo quití quiñi caa i quita sisi tyañuhu. Usa tahan xiñi ti, ta usi tahan ndiqui ti. Tahan tahan ndiqui ti ñoho minoo corona. Ta tahan tahan xiñi ti ndyizo si minoo tuhun quiñi.

² Quití sa i ndyehi, caa ti tañi caa minoo cuiñi. Zoco saha ti caa tañi saha oso, ta yuhu ti cuu tañi yuhu ndicaha. Ra dragón saha cuhva maa ra sii ti. Saha ra sa cundyaca ñaha ti, ta sa coo xaan cuhva sii ti.

³ Minoo xiñi quití cuan, ndyehi vatyí sa ñicuehe si, ta yucuan cuenda cuñi cuu ti. Zoco i nduvaha ti nu ñicuehe ti, ta iyo xaan i cuñi tandihi ñiyivi ñuu ñiyivi, ta i sindyico ñu sii quití quiñi caa cuan cuhva i ndyehi.

⁴ Cua zacahnu ñu sii ra dragón vatyí saha xaan ra cuhva sii quití cuan, ta cua zacahnu tucu ñu sii quití cuan, ta catyi ñu: Yoñi sa iyo cuhva sii tañi iyo cuhva sii quití ya. Tatu cahñi tahan ñiyivi sihin ti, zoco ma zahacanaa ñu sii ti.

⁵ Saha dragón cuan vatyí zacahnu quití cuan zuun ñi sii maa ti sihin cuhva cahan ti, ta cua cahan ti ndya vaha ñi sii ra Ndyoo. Ta uu xico uu yoo cua cundyaca ñaha ti.

⁶ Ta quiñi xaan cua cahan ti sii ra Ndyoo, ta cua cahan ti ndya vaha ñi sii zivi ra Ndyoo ta cuenda nu ndyaa ra Ndyoo ta cuenda tandihi ñu sa iyo andivi.

⁷ Ta cua ñihi ti cuhva cahñi tahan ti sihin ñiyivi ñoho cuenda ra Ndyoo, ta cua zahacanaa ti. Ta cua ñihi ti cuhva cundyaca ñaha ti sii tandihi ñiyivi ñuu ñiyivi vazú ziiñ ziiñ tata ñu ta ziiñ ziiñ zahan cahan ñu ta ziiñ ziiñ ñuu ñu.

⁸ Ta ra cu Mvee Ticatyi ra Ndyoo, cuee ca sa sino ñuu ñiyivi ta sa tyaa ra Ndyoo cuhva vatyí cua cuu ra, ta cumi ra minoo libro ndyaa zivi ñiyivi cua cacu. Ta tandihi ñiyivi ñuu ñiyivi tatu ña ndyaa zivi ñu nu libro cuan, cua zacahnu ñu sii quití quiñi caa cuan.

⁹ Tatu ndyaa zoho ndo, tyizoho ndo sa quehin.

¹⁰ Tatu cua tiñ ñiyivi sii ndo ta tyihi ñu sii ndo vehe caa, cuee ca cua quiñi ndazi tucu maa ñu cua zacuu ra Ndyoo. Ta ra cua cahñi sii ndo sihin mityi, cua cuu tucu maa ra sihin mityi. Yucuan cuenda cundyee xaan iñi ndo, ta cunhi xaan iñi ndo sii ra Ndyoo.

¹¹ Yaha cuan ta ziqui i ndyehi vatyi quita inga quití quiñi caa sisi ñuhu. Ndyaa ndiqui ti tañi ndiqui mvee ticatyí, zoco cahan ti tañi cahan minoo dragón.

¹² Iyo tandíhi cuii cuhva sii ti tañi iyo sii inga quití sa quisi sa xihna ñi, ta yucuan cuenda zañiñi ti sii ñiyivi ñuu ñiyivi vatyí zacahnu ñu sii inga quití sa xihna ñi cuan. Maa ti cuu quití yaha xaan iñi cuehe xiñi, zoco i nduvaha ti, ta ñá sihi ti.

¹³ Ta quití sa quita sisi ñuhu cuan, i zavaha xaan ti sa ndyityi nahnu ndya cuhva cuu sii ti zagoon ti ñúhu sa quita andivi nu ñuhu ñuu ñiyivi. Ta i ndyehe ñiyivi cuhva zavaha ti.

¹⁴ Ta sihin sa ndyityi sa cuu zavaha ti ityi nuu quití sa xihna ñi cuan, cua zandavi ñaha ti sii ñiyivi ñuu ñiyivi ta ziqui cua catyi ti sihin ñu vatyí nazavaha ñu minoo ndyoo yutu cuhva caa inga quití cuan. Maa ti cuu quití ñicuehe xiñi sihin mityi, zoco ñá sihi ti.

¹⁵ Ta cua ñihi quití cu uu cuan cuhva ta cua cuhva ti sa cundito sa i zavaha ñiyivi cuhva caa quití sa xihna ñi cuan. Ta cua cuu cahan si, ta cua catyi si vatyí cua cahñi ñiyivi sii tandíhi ñiyivi ña zacahnu sii si.

¹⁶ Ta cua tava tucu si tyiño vatyí cua cundyaa minoo marca sii tandíhi ñiyivi a siyo ndaha cuaha ñu a yiqui nuu ñu. Cua ñihi tandíhi ñiyivi marca cuan vazú cahnu ñu a luhlu ñu a cuca ñu a ndahvi ñu ta vazú muzu cuu ñu ta vazú yivi.

¹⁷ Ta yoñi cua cuu zata ta yoñi cua cuu xico tatu ña ndyaa marca cuan sii ñu a ndyaa zivi quití cuan sii ñu a minoo número sa cuenda zivi ti.

¹⁸ Ihya cuñi si sa coo xaan sa siñi tuñi sii yo. Yoo ndoho iyo xaan sa siñi tuñi sii, nacañi iñi ndo sa cuenda número sii quití cuan vatyí número sii minoo rayi cuu si. Iñu ziendu uñi xico iñu cuu número cuan.

14

Cuhva i sata ñiyivi cuu cuenda ra Ndyoo yaa

¹ Tacuan ta ziqui i ndyehi vatyí nandyaa ra cu Mvee Ticatyí ra Ndyoo xiñi yucu Sión. Ta sihin ra ndíhi ziendu uu xico cumi mil tahan ñiyivi. Maa ñi ñiyivi sa ndyaa zivi ra cu Mvee Ticatyí ta zivi Zutu ra yiqui nuu ñu.

² Ta ziqui i siñi minoo nduzu sa quita andivi. Cuu si tañi nduzu sa cucayu cuaha xaan yuu ta tañi nduzu iyo tatu ñihi xaan cahan zavi. Ta siñi nduzu sa zavacu ñiyivi arpa.

³ Ta sata ñiyivi minoo yaa saa ityi nuu ra ndyaa nu tyayu cahnu ta nuu sa cumi tahan quití sa yucu sihin ra ta nuu ra sahnu ndyaca ñaha, ndíhi ca. Ta yoñi ca cuu cutuhva yaa cuan, maa ñi sa ziendu uu xico cumi mil tahan ñiyivi sa i cacu nu yucu ñiyivi ñuu ñiyivi sito sii si.

⁴ Maa ñu cuu ñu sa ñá zavaha ndya vaha ñi. Ná quixi zana rayi sihin ndya vaha ñi ñaha. Ñahñi maa cuatyí zavaha ñu caña ñi. Ta ndyico ñu sii ra cu Mvee Ticatyí vazú ndyaca maa cuahan ra. Cacú ñu nu yucu ñiyivi ñuu ñiyivi, ta cuu ñu tañi sa xihna cuii ñi ofrenda cua ñihi ra Ndyoo ta ra cu Mvee Ticatyí.

⁵ Yoñi cuu catyi vatyí vatyí ñu vatyí ña tuhva ñu cahan cuendu. Ta ñahñi maa cuatyí ñu iyo ityi nuu ra Ndyoo.

Tyiño i zacoto uñi tahan ángel

⁶ Tacuan i cuu si ta ziqui i ndyehi vatyí ndava minoo ángel ta cuahan ra zava mahñu andivi sa quisi catyi ra Tuhun Ndyoo sa ma cunaa, ta nacatyí ra yozo caa cua zacacu ra Ndyoo sii ñiyivi. I zacoto ra tuhun cuan sii ñiyivi iyo ñuu ñiyivi, sii ñiyivi ziiñ ziiñ nación ta ziiñ ziiñ ñuu ta ziiñ ziiñ tata. Ta sii ñiyivi cahan zahan ta sii ñiyivi cahan tyehen ñi.

⁷ Saa xaan i cahan ra, ta i catyi ra: Nayuhu ndo sii ra Ndyoo, ta zacahnu ndo sii ra vatyí sa saa cuhva cua tyicuhva ra sii ñiyivi. Zacahnu ndo sii ra i zavaha andivi ta ñuu ñiyivi ta tyañuhu ta tandíhi zoco ndutya.

⁸ Ta i sindyico inga ángel sii ángel sa xihna ñi cuan, ta catyi ra: Sa tivi ñuu cahnu Babilonia vatyí i zatívi ñiyivi ñuu cuan sii tandíhi ñuu ñiyivi sihin tandíhi cuatyí sa quiñi xaan i zavaha ñu.

⁹ Tacuan i catyi ángel cu uu cuan, ta i sindyico inga ángel sii ra, ta saa xaan cahan tucu ra ta catyi ra: Yoo ñiyivi cua zacahnu sii quití cuan a sii sa zavaha ñiyivi cuhva caa ti, a tatu saha ñiyivi sa cundyaa marca ti yiqui nuu ñu a ndaha ñu.

¹⁰ Cuaha xaan cuaha xaan tundoho cua ndyehe ñu zavaha cuhva cuan vatyí cua zandoho ra Ndyoo sii ñu. Sa cuxaan xaan ra vityí, ta cua tasi tuñi ra sii ñiyivi zavaha cuhva cuan ityi nuu ángel ra ta ityi nuu ra cu Mvee Ticatyi vatyí cua tyihi ra sii ñu nu cayu ñúhu sihin azufre.

¹¹ Ñiyivi zacahnu sii quití cuan a sii sa zavaha ñiyivi cuhva caa ti, a tatu saha ñu cundyaa marca a zivi ti sii ñu, cua cayu ñu. Cua cayu ñu ñiyaca ta ndiyiyaca, ta cua ndaa ñuhma ñu tandihi cuii tyiemvu.

¹² Yucuan cuenda cuñi si vatyí ñiyivi cuenda ra Ndyoo, yoo ñu tyaa yahvi sa cahan ra ta sino xaan iñi ñu sii ra Jesucristo, cuñi si vatyí nacundyee xaan iñi ñu. Catyi ángel cuan.

¹³ Ta ziqui i siñi minoo nduzu sa quita andivi, ta catyi si sihin: “Vityí ta ityi nuu ca zii xaan cuu sii ñiyivi sino iñi sii ra ndyaca ñaha sii yo cuee ca sa cuu ñu. Avi, catyi Tatyí li ra Ndyoo vatyí cua quitatu ñu sihin tyiño ñu, ta sa vaha sa i zavaha ñu cua cuhun si gloria sihin ñu.”

Cuhva cua tasi tuñi ra Ndyoo sii ñiyivi

¹⁴ Tacuan ta ziqui i nandyehi, ta i ndyehi minoo vico cuisí, ta nuu si ndyaa minoo ra caa tañi caa ra i quisi ndya gloria. Ñoho minoo corona xuhun cuaan xiñi ra, ta ndaha ra minoo mityí cutya, xaan xaan si.

¹⁵ Ta i quita inga ángel ndya nu ndyaa ra Ndyoo, ta i cana saa ra ta cahan ra sihin ra ndyaa nu vico cuan, ta i catyi ra: Sa saa si cuhva nacuhun ndaha tyiñon vatyí sa sityí xaan sa iyo ñuu ñiyivi. Cahndyon sii si ta nacuhun. Catyi ra.

¹⁶ Ta ziqui ra ndyaa nu vico cuan i zayaha ra mityí ra nuu ñuu ñiyivi, ta i naquihin ra ndaha tyiño ra.

¹⁷ Yaha cuan ta ziqui i quita inga ángel ndya nu ndyaa ra Ndyoo andivi, ta ndyizo tucu maa ra minoo mityí cutya ta xaan xaan si.

¹⁸ Ta i quita inga tucu ángel ndya nu ndyaa altar. Maa ra ndyizo tyiño nu cayu ñúhu nu altar. Ta i cana saa ra ta catyi ra sihin ra ndyizo mityí xaan cuan: Sa sityí xaan yucu vixi uva sa iyo ñuu ñiyivi. Yucuan cuenda cahndyon sii si.

¹⁹ Ta ziqui i zayaha ángel cuan mityí ra nu ñuu ñiyivi ta sahndya ra yucu vixi uva sa iyo ñuu ñiyivi, ta i tyihi ra sii si nu cua quita ndutya si vatyí yucuan cuu nu cua cuxaan xaan ra Ndyoo sihin ñiyivi.

²⁰ Sata ñuu cuu nu i sañi ra yucu vixi uva cuan. Ta cuaha xaan niñi si i quita nu i sañi ra sii si. Yaha xaan cuaha niñi i quita. Cono xaan i nduu si. I ndaa si, ta saa si ndya freno caballo sa zucu. Ta i saa si uñi ziendu kilómetro nu ñuhu cuhva i sino si.

15

Cua coo inga usa tahan tundoho, ta ziqui cua ndihi si

¹ Tacuan ta ziqui i ndyehi inga sa iyo cahnu xaan andivi, ta i zayuhu xaan si sii. I ndyehi usa tahan ángel, ta iyo cuhva sii ra sa zaquisi ra usa tahan ca tundoho. Sihin ihya tundoho cua ndihi si vatyí cua ndihi sa cuxaan ra Ndyoo sihin ñiyivi.

² Ta i ndyehi minoo sa caa tañi caa tyañuhu. Xiño si tañi ino, ta zaca ñúhu sihin ndutya cuan. Ta nandyaa ñiyivi yuhu tyañuhu cuan. Ndaha ñu arpa sa saha ra Ndyoo sii ñu. Maa ñu cuu ñu i zahacanaa sii quití quiñi caa cuan ta sii sa i zavaha ñiyivi cuhva caa ti ta sii número sa cuu cuenda zivi ti.

³ Sata ñiyivi cuan yaa ra Moisés muzu ra Ndyoo ta yaa ra cu Mvee Ticatyi. Tyehen catyi ñu:

Cahnu xaan ta iyo xaan cuu tandihi sa i zavohon, yoho Ndyoo, vatyí iyo tandihi cuii cuhva suun;

Ndoo xaan ta ndisa xaan cuu cuhva zavohon,
Ta rey cuun sii tandihi ñiyivi ñuu ñiyivi.

⁴ Yoñi ñiyivi iyo sa ma yuhu suun ta ma zacahnu ñu zivun

Vatyí maa tuhun ñi moo cuu ra ii.

Ta cua quisi tandihí ñiyivi ñuu ñiyivi ta cua zacahnu ñu suun

Vatyí sa ndyehe ñu kuhva ndoo xaan zavohon.

⁵ Yaha cuan ta ziqui i ndyehi vatyí i nuña minoo nu ii xaan ca sisi gloria nu ñoho yuu sa ndyaa ley maa ra Ndyoo.

⁶ Sisi vehe cuan i quita sa usa tahan ángel sa ndyizo sa usa tahan tundoho cuan. Ñoho ra zahma vaha xaan. Cuisi xaan zahma ra, ta xiño xaan si. Ta nuhñi yoho xuhun cuaan yiqui ndyica ra.

⁷ Minoo sa cumi tahan quití sa yucu vatyí ñi sihin ra Ndyoo i saha ti minoo coho xuhun cuaan sii sa minoo minoo sa usa tahan ángel cuan. Sisi coho cuan ñoho kuhva cuxaan xaan maa ra Ndyoo, ra ndito tandihí cuii maa tyiemvu.

⁸ Ta i situ cuii nu ndyaa ra Ndyoo sihin ñuhma vatyí minoo ra cahnu xaan cuu maa ra Ndyoo, ta iyo tandihí cuii kuhva sii ra. Ta yoñi i cuu quihvi nu ndyaa ra ndya sa i yaha sicoo tandihí sa usa tahan tundoho sa ndyizo sa usa tahan ángel cuan.

16

Tundoho sa cua zaquisi sa usa tahan ángel cuan

¹ Tacuan ta ziqui i siñi vatyí saa xaan i cahan minoo ra ñoho nu ndyaa ra Ndyoo, ta i catyi ra sihin sa usa tahan ángel cuan: Cuahan ndo ta coyo ndo sa ñoho sisi coho sa ndyizo ndo ziqui ñuu ñiyivi vatyí sa cuxaan xaan maa ra Ndyoo.

² Ta cuahan ángel sa xihna ñi cuan, ta i sicoyo ra sa ñoho sisi coho ra ziqui ñuu ñiyivi, ta tandihí ñiyivi sa ndyizo marca quití cuan ta zacahnu ñu sii sa i zavaha ñiyivi kuhva caa ti, i quita ityi sii ñu. Nahnu xaan si, ta uhu xaan si.

³ Ta ángel sa cu uu cuan i sicoyo ra sa ñoho sisi coho ra nu tyañuhu, ta i nduu si niñi tañi niñi cuxi caa sa quita sii minoo ra tatu sa i sihi ra. Ta tandihí quití ndito sisi tyañuhu, i sihi ti.

⁴ Ta sa cu uñi ángel cuan i sicoyo ra sa ñoho sisi coho ra nu tandihí yuu, ta nu tandihí zoco ndutya, ta i nduu si niñi.

⁵ Ta ziqui i siñi vatyí ángel ra ndyizo tyiño sa cuenda ndutya i catyi ra: Ndo xaan cuun vatyí tacuan tasi tuñun, yoho ra ndyaca ñaha. Ii xaan cuun ta tandihí cuii tyiemvu iyo moo.

⁶ Ndo xaan kuhva zavohon vatyí ñiyivi ñuu ñiyivi i sati ñu niñi ñiyivi cuñi xaan suun ta niñi ra profeta. Ta vityi cua coho ñiyivi ña vaha ña ndutya niñi vatyí tacuan tahan si sii ñu.

⁷ Ta i siñi vatyí cahan inga ra ñoho nu ndyaa altar, ta catyi ra: Ndisa, yoho ra ndyaca ñaha. Ra Ndyoo sa iyo tandihí cuii kuhva cuu suun, ta vaha xaan ta ndoo xaan tasi tuñun.

⁸ Tacuan ta ángel sa cu cumi cuan i sicoyo ra sa ñoho sisi coho ra nu ñicandyi, ta i ñihi ñicandyi cuan kuhva ñihi ca cua cahmi si sii ñiyivi.

⁹ Ta yaha xaan i ndiyi tandihí ñiyivi, zoco ñá zama ñu kuhva zacuu ñu. Ta ñá ndu-uu iñi ñu cuatyí ñu, ta ñá zacahnu ñu sii ra Ndyoo sino ca i cahan ñu ndya vaha ñi sii ra vatyí maa ra i tasi tundoho cuan.

¹⁰ Ta ángel cu ohon cuan i sicoyo ra sa ñoho sisi coho ra nu ndyaca ñaha quití cuan, ta i nduñaa xaan nacahnu nu ndyaca ñaha ti. Ta i sacu xaan ñiyivi vatyí ña cundyeé iñi ñu tandihí sa uhu ñu.

¹¹ Zoco i cahan ñu ndya vaha ñi sii ra Ndyoo ra ndyaa andivi vatyí uhu xaan ñu ta cahvi xaan ñu, zoco ñá ndu-uu iñi ñu cuatyí ñu.

¹² Ta ángel cu iñu cuan i sicoyo ra sa ñoho sisi coho ra nu yuu cahnu sa nañi Eufrates, ta i ndoco yuu cuan vatyí tacuan ta cua cuu yaha tandihí ra rey, ra ndyaca ñaha ityi caña ñicandyi.

¹³ Tacuan i cuu si, ta ziqui i ndyehi vatyí i quita tatyí cuihna yuhu dragón cuan ta yuhu inga quití cuan ta yuhu minoo ra i catyi vatyí cahan ra sa cuenda ra Ndyoo zoco yivi. Ta caa tatyí cuihna cuan tañi caa zahva izu.

¹⁴ Ta yucuan cuu tatyí cuihna sa cuu zavaha sa ndyityí, ta cuahan si cua zandu-ín si sii tandíhi ra cu rey ra ndyaca ñaha ra iyo nacahnu ñuu ñiyívi vatyí cua cahñi tahan ra quívi tahan si sihin ra Ndyoo ra iyo tandíhi cuií cuhva sii.

¹⁵ Ta i catyí ra Ndyoo: Zaha ndo cuenda vatyí zana ñi ñi ndo ta cua quisi tañi quisi minoo ra zuhu cuhva sa ña sica ñi ñiyívi. Zii xaan cua cuu sii ñiyívi ndatu sii, ta ndyaa listo ñu, ta ñahñi sa cumañi sii ñu. Zoco ñu ña ndyaa listo, cua cucahan xaan nuu ñu. Catyí ra.

¹⁶ Ta cua titahan tandíhi ra cu rey sihin tandíhi zandaru ra minoo nu nañi si Armagedón sihin zahan hebreo.

¹⁷ Ta ángel cu usa cuan i sicoyo ra sa ñoho sisi coho ra nu tatyí. Ta saa xaan i quita nduzu cahan minoo ra ñoho nu ndyaa tyayu ra Ndyoo. Ta catyí ra ndyaa nu tyayu cuan: Sa cuu vityí. Catyí ra.

¹⁸ Tacuan ta ziquí i sicoo tasa zavi ta nduzu ñihi, ta i sicoo xaan nduzu zavi, ta i sicoo minoo sa taan ñihi xaan ca ta ziquí tandíhi sa taan sa iyo cuhva ndya quisaha ñuu ñiyívi.

¹⁹ Sihin sa taan i ndata ñuu cahnu cuan. Uñi cuhva i ndata si. Ta i tani xaan vehe tandíhi inga ñuu sa iyo ñuu ñiyívi. Sihin cuhva cuan i nacohon ñi ra Ndyoo sii ñuu cahnu Babilonia cuan cuhva quiñi xaan zavaha ñiyívi ñuu cuan, ta i zandoho xaan ra sii ñu vatyí sa cuxaan xaan ra sihin ñu.

²⁰ Ta i naa tandíhi ñuhu sa iyo sisi tyañuhu sihin sa taan, ta i nduva tandíhi yucu.

²¹ Nahnu xaan yuu zavi i coon ziquí ñiyívi. Ta iyo si vee si uu xico kilo. I cuxaan xaan ñiyívi sihin ra Ndyoo sa cuenda tundoho i zacuu yuu zavi cuan vatyí cahnu xaan tundoho i saha si, ta i cahan ñu ndya vaha ñi sii ra Ndyoo.

17

Cuhva cua tyicuhva ra Ndyoo sii minoo ñaha ziquí

¹ Ta ziquí i quisi minoo sa usa tahan ángel sa ndyizo sa usa tahan coho cuan, ta i cahan ra sihin, ta catyí ra: Ñaha ihya. Cua zañehi suun cuhva cua tahan minoo ñaha zii ñi, ñaha sa ndyaa nuu tandíhi tyañuhu.

² I zavaha ra rey ra ndyaca ñaha ñuu ñiyívi cuatyí sihin ña. Ta ñiyívi ñuu ñiyívi, yaha xaan i tiví ñu sa cuenda sa ña vaha sa zavaha ña. Catyí ra.

³ Ta ziquí sihin cuhva i zandyehe Tatyí Ii ra Ndyoo sii, ta i sindyaca ángel cuan sii sisi cuhu, ta yucuan i ndyehi sii minoo ñaha. Yozo ña ziquí minoo quití cuaha. Usa tahan xiñi tí, ta usi tahan ndíqui tí. Ta ñi xaan tí tuhun quiñi, tuhun cahan ndya vaha ñi sii ra Ndyoo.

⁴ Ñoho ñaha cuan zahma tyacu tixinda ta tyacu cuaha, ta yaha xaan i cucutu ña sihin ndaha tyiño xuhun cuaan ta yuu vaha ta perla. Ndaha ña minoo coho xuhun cuaan situ cuií si sihin tandíhi nuu sa ña vaha vatyí cuaha xaan sa ndya vaha ñi zavaha ña.

⁵ Yiquí nuu ña ndyaa minoo zivi, zoco ñá sito ñiyívi ñaa zivi cuu si, ta catyí si: “Ihya ñaha cuu ñuu Babilonia cahnu, maa ña cuu zihí tandíhi ñu zii ñi ta sii tandíhi sa ña vaha sa iyo ñuu ñiyívi.”

⁶ Ta ziquí i ndyehi vatyí siñi ñaha cuan vatyí i sihi ña niñi ñiyívi cuñi xaan sii ra Ndyoo ta ñiyívi i sihi sa cuenda ra Jesús, ta i yuhu xein.

⁷ Ta ziquí i catyí ángel cuan sihin: ¿Ñacu yuhu xoon? Cua zacote suun yoo ña cuu ña ya ta ñaa sa cuñi si catyí si sa cuenda quití sa iyo usa tahan xiñi ta usi tahan ndíqui ta ndyizo tí sii ña.

⁸ Quití sa i ndyehun ihya, i sindito tí, zoco ña ndito ca tí, zoco cua quita tí sisi yavi cono ñu ñoho ñiyívi i zavaha ndya vaha ñi, ta cua cahun tí nu cua cuu ndíhi tí. Ta ñiyívi ñuu ñiyívi tatu ña ndyaa zivi ñu nu libro i zavaha ra Ndyoo ndya ta cumañi ca sino ñuu ñiyívi, libro sa catyí yoo cuu ñiyívi cua cundito tandíhi cuií tyiemvu, tatu ña ndyaa zivi ñu nuu libro cuan, iyo xaan cua cuñi maa ñu ndyehe ñu sii quití sa sicoo ta i sihi tí, zoco cua naquita tucu tí inga saha.

⁹ Ta ihya cuu minoo sa cuu coto ñiyivi tatu cuu cutuñi iñi ñu sii si. Sa usa tahan xiñi ti cuu usa tahan yucu nu ndyaa ñaha cuan.

¹⁰ Ta iyo tucu usa tahan rey. Ohon tahan ra sa i ndoyo ñuhu ra, ta minoo ra ndyaca ñaha vityi. Ta rey sa cu usa cuan cumañi ca quisi ra. Cua quisi ra, zoco zuhva ñi quivi cua cundyaca ñaha ra.

¹¹ Ta sa cu uña tahan rey cuu quitì sa i sicoo ta i sihi ti, ta zuun ñi ra i cuu tucu rey sa cu usa cuan, ta cua cuhun ra nu cua naa ra.

¹² I ndyehun vatyì iyo usi tahan ndiqui quitì cuan. Sa usi tahan ndiqui ti cuu usi tahan rey. Tañaha ca cundyaca ñaha ra. Cua cundyaca ñaha sa usi tahan rey cuan zuhva ñi quivi iin ñi sihin quitì cuan.

¹³ Iin xaan cua cuu sa usi tahan rey cuan, ta cua cuhva ra tandihì cuhva iyo sii ra sii quitì cuan. Cua cuhva ra sa cundyaca ñaha quitì cuan sii sa ndyaca ñaha maa ra.

¹⁴ Cua cahñi tahan tandihì ra sihin ra cu Mvee Ticatyi, ta cua zahacanaa ra cu Mvee Ticatyi sii tandihì ra cuan vatyì ra cu Mvee Ticatyi, ra ndyaca ñaha cuu ra sii tandihì inga ra ndyaca ñaha ta rey sii tandihì inga rey. Ta ñiyivi sa cuu cuenda ra cu Mvee Ticatyi, ra i casi ra Ndyoo cuu sii ra, ta i cana ra sii ra, ta ma ndu-uu iñi ra ta ma zandoo ra sii ra Ndyoo.

¹⁵ Tacuan i catyi ángel cuan, ta i catyi tucu ra sihin: I ndyehun vatyì ndyaa ñaha zii iñi cuan nuu tandihì tyañuhu. Tyañuhu cuan cuu tañi ñuu sa iyo ñuu ñiyivi, ta tañi ñiyivi ziiin ziiin naciòn ta ñiyivi cahan ziiin ziiin zahan ta ziiin ziiin tyehen ñi.

¹⁶ Ta sa usi tahan ndiqui sa ndyehun xiñi quitì cuan cuu rey sa cua cuxaan xaan sihin ñaha zii iñi cuan, ta ñaha cuan cuu tañi minoo ñuu, ta cua zanaa ra cu rey cuan sii si sihin tandihì sa iyo sii si. Cua cahñi ra sii ñiyivi, ta cua cahmi ra ñuu cuan.

¹⁷ Tacuan cua zavaha ra vatyì maa ra Ndyoo saha minoo sa siñi tuñi sii ra, ta cua zavaha ra cuhva cuñi maa ra Ndyoo cuhva cuan vazu ña sito ra. Yucuan cuenda cua cu-iin ra ta cua cuhva ra tandihì cuhva iyo sii maa ra sii quitì cuan ndya quivi cua cuu tandihì cuii tyiño cuhva i catyi maa ra Ndyoo.

¹⁸ Ta ñaha sa sindyehun cuan cuu minoo ñuu cahnu sa ndyaca ñaha sii tandihì ra cu rey sa iyo ñuu ñiyivi.

18

Cuhva cua tivì ñuu Babilonia

¹ Tacuan i cuu si, ta ziqui i ndyehi sii inga ángel. I quita ra andivi, ta noo ra ndya nu ñuhu. Cuaha xaan cuhva iyo sii ra, ta ndisi xaan nduu ñuu ñiyivi sihin sa ndisi maa ra.

² Ta i cana saa ra sihin minoo nduzu saa xaan, ta catyi ra: Sa i tivì ñuu cahnu Babilonia. Maa ñi ca tatyì cuihna iyo ñuu cuan vityi, maa ñi ca tandihì cuii nuu tatyì ña vaha ta tyasii ta inga zaa quiñi caa.

³ Tacuan iyo ñuu cuan vityi vatyì ñiyivi ñuu cuan i zativi xaan sii ñiyivi ñuu ñiyivi, ta i zavaha ñu ndya vaha ñi. Ra rey ra ndyaca ñaha ñuu ñiyivi iin ñi cuhva ndya vaha ñi i zavaha ra sihin ñiyivi ñuu cuan. Ta ra xico ndaha tyiño, cuca xaan nduu ra sa xico ra ndaha tyiño sii ñiyivi ñuu cuan vatyì zanaa xaan ñu xuhun ñu tandihì cuii cuhva.

⁴ Tacuan i catyi ángel cuan, ta ziqui i siñi vatyì cahan inga ra andivi ta catyi ra: Quita ndo ñuu cuan, ndoho sa cuu ñiyivi sii. Ma zavaha ndo sa quiñi xaan tañi zavaha ñiyivi yucuan ta ndoho ndo tañi cua ndoho maa ñu.

⁵ Cuaha xaan cua nduu cuatyì zavaha ñu ndya cuhva ndya sa saa si ndya andivi, ta ma naa iñi ra Ndyoo cuatyì zavaha ñu.

⁶ Uu saha cua zandyehe ra tundoho sii ñu sa cuenda minoo minoo sa ña vaha i zavaha ñu. Uu saha cua nacuhva ra coho ñu sa xaan cuhva i zacoho tucu maa ñu sii ñiyivi.

⁷ I zacahnu xaan ñu sii ñu, ta i cuzii xaan iñi ñu zavaha ñu tandihì cuii cuhva cuñi maa ñu. Yucuan cuenda nandyehe xaan maa ñu tundoho vatyì sica iñi ñiyivi ñuu cuan: “Ñuu ndi cuu tañi minoo ñaha ndyaca ñaha. Ña ndahvi ndi, ta ñahñi tucuihya iñi cua ndyehe ndi.”

⁸ Sa cuenda cuhva zacahnu ñu sii ñu, ta minoo ñi quivi cua quisi xaan tundoho ziqui ñu. Cua cuu ñu; cua nducuihya xaan iñi ñu; cua cuzoco ñu. Ta cua cayu ndihi ñuu cuan vaty iyo xaan cuhva sii ra Ndyoo ra ndyaca ñaha sii yo, ta sa tyaa ra cuhva tasi tuñi ra sii ñuu cuan.

⁹ Ra rey ra ndyaca ñaha ñuu ñiyivi, ra i zavaha ndya vaha ñi ñuu cuan, cua vacu xaan ra ta cua nducuihya xaan iñi ra quivi ndyehe ra vaty cayu ñuu cuan vaty i zavaha ra rey cuan ñaa ndihi sa cuñi maa ra iñ ñi cuhva sihin ñiyivi ñuu cuan.

¹⁰ Cua cuiñi ndyaa ra ndya zava vaty yuhu ra tundoho cahnu xaan sa cua coo ñuu cuan, ta cua catyi ra: Ndahvi yoho ñuu cahnu Babilonia. Tañi tyehen ñi ta sa i zanaa ra Ndyoo suun.

¹¹ Ra xico ndaha tyiño tucu, cua vacu xaan ra, ta cua nducuihya iñi ra sa cuenda sa cua tahan ñuu cuan vaty yoñi ca zata ndaha tyiño ra

¹² tañi xuhun cuaan, xuhun cuis, yuu vaha, perla, zahma yahvi xaan, zahma seda, ta zahma yuhva tixinda ta yuhva cuaha, ta tandihi nuu vitu vaha sa tyaqui sahan xico ta ndaha tyiño sino sihin noho nahnu uru yucu ta vitu vaha ta caa ta yuu.

¹³ Yucuan i cuyahvi tucu yutu canela, ta yucu ta cutu ta perfume ta vino ta azetye ta yuty pan vaha ta trigo, ta i cuyahvi tucu quitu tañi quitu ndyizo ndaha tyiño ta mvee ticaty, ta caballo, ta carreta. Ta yucuan i cuyahvi tucu ñiyivi ndihi ca vaty cua cuu ñu muzu ñiyivi.

¹⁴ Ta ra xico ndaha tyiño, cua catyi ra sihin ñuu cuan: ¡Ña cumi con tandihi ndaha tyiño vaha xaan sa tahan xaan iñun; sa ndaha cua naa tandihi cui sa cucon! Catyi ra.

¹⁵ Ndyava zava cua cuiñi ndyaa ra i nducuca sa xico xaan ra ndaha tyiño ra ñuu cuan. Ndyava zava cua cuiñi ndyaa ra vaty yuhu xaan ra ndyehe ra cuhva ndoho xaan ñuu cuan. Ta cua vacu saa xaan ra, ndya cuhva cana saa ñi ca ra, ta catyi ra:

¹⁶ ¡Ndahvi ñuu cahnu xaan cuan! Tañi minoo ñaha i cuu si vaty ñiyivi ñuu cuan i siñoho ñu zahma vaha xaan, zahma yuhva tixinda ta zahma cuaha, ta i sityiño ñu ndaha tyiño xuhun cuaan ta yuu vaha ta perla.

¹⁷ ¡Ta tañi tyehen ñi cua naa tandihi cui sa cuca xaan ñu! Tandihi ra xu sii barco ta ra zacaca sii tu sihin ra zatyiño sihin tu, cua cuiñi ndyaa ra ndya zava.

¹⁸ Ta cuhva sa ndyehe ra cuhva cayu ñuu cuan, cua catyi ra: Ñahñi inga ñuu iyo tañi ñuu cahnu ya. Cua catyi ra.

¹⁹ Ta cua tyizo ra ñuhu xiñi ra vaty nducuihya xaan iñi ra, ta cua vacu saa xaan ra ndya cuhva cana saa ñi ca ra, ta cua catyi ra: ¡Ay! ¡Ndahvi ñuu cahnu cuan! Tandihi ñiyivi sa iyo barco, nducuca xaan ra ñuu cuan vaty i zata xaan ñiyivi ndaha tyiño ra yucuan. Ta vity, tañi tyehen ñi ta sa cua naa ñuu cuan. Tacuan cua catyi ra.

²⁰ Zoco vity cuzi xaan iñi maa ndo ndoho sa yucu andivi ta ndoho ra apóstol ta ndoho ra profeta vaty vity tasi tuñi ra Ndyoo sii ñiyivi ñuu cuan sa cuenda sa ña vaha i zavaha ñu sihin maa ndo.

²¹ Tacuan ta ziqui i ndyehi vaty i cañihi minoo ángel sii minoo yuu. Cahnu xaan yuu cuan tañi minoo yuu molino cahnu, ta i zavita ángel cuan sii si sisi tyañuhu, ta catyi ra: Zuun ñi cuhva ya cua zavita ra Ndyoo sii ñuu cahnu Babilonia. Ta yoñi cua ndyehe ca sii si.

²² Ñahñi ca yaa cua coo ñuu cuan vaty yoñi ca cua zavacu ndyalin, ta yoñi ca cua tiví tiyoo a cutu. Yoñi ca cua zatyiño yucuan, ta yoñi ca cua ndyico nuñi.

²³ Ñahñi ca ñuhu cua cayu ñuu cuan sa sa cuaa. Ta ma coo ca vico tindaha vaty ra ñuu cuan cuca xaan ra, ta cahnu xaan i nduu ra sa xico ra ndaha tyiño ra nacahnu ñuu ñiyivi. Ta i zandavi ñaha xaan ñiyivi ñuu cuan sii tandihi ñiyivi ñuu ñiyivi (sihin sa ña vaha sa i zavaha ñu.)

²⁴ Ta ñuu cuan i sahñi ñiyivi sii ra profeta ta sii ñiyivi cuñi xaan sii ra Ndyoo, ta nacahnu ñuu ñiyivi i sahñi tucu ñu sii ñiyivi vaha.

19

¹ Yaha cuan ta ziqui i siñi minoo nduzu ñihi xaan vatyi cuaha xaan ñiyivi cahan sisi gloria, ta catyi ñu: ¡Aleluya! Maa ra Ndyoo Zutu yo cuu ra zacacu sii yo. Iyo tandihi cuui cuhva sii maa ra. Nazacahnu yo sii ra.

² Vatyi ndoo xaan ta vaha xaan zandaa ra tyiño. Ta sa i tasi tuñi ra sii ñaha zii ñi cuan. Ta maa ña i zativi xaan sii ñiyivi ñuu ñiyivi vatyi yaha xaan i zavaha ña sa ña vaha. Sa tasi tuñi ra sii ñaha cuan. (Ta ñaha cuan cuu ñuu Babilonia sa cahan si tuhun.) Ta i tasi tuñi ra sii ñuu cuan vatyi i sahñi ñiyivi ñuu cuan sii muzu ra.

³ Tacuan i catyi ñiyivi cuan, ta ziqui i catyi tucu ñu: ¡Aleuya! Cua cayu ñuu cuan tandihi cuui tyiemvu.

⁴ Ta sa oco cumi tahan ra sahnun dyaca ñaha ta sa cumi tahan quitu sa yucu vatyi ñi nu ndyaa ra Ndyoo i sicava ndyayu ra, ta i zacahnu ra sii ra Ndyoo, ra ndyaa nu tyayu cuan, ta i catyi ra: ¡Nacuu si tacuan, ta nacuu si sa ndisa! ¡Aleyuya!

⁵ Nu ndyaa tyayu cuan i cahan minoo ra, ta catyi ra: Ndoho ra cuu muzu maa ra Ndyoo, ndoho sa yuhu sii ra vazu ñiyivi cahnu cuu ndo a vazu ñiyivi ndyihii cuu ndo zoco zacahnu ndo sii ra, catyi ra.

Cuhva cua coo vico tandaha ra cu Mvee Ticatyi ra Ndyoo

⁶ Ta ziqui i siñi vatyi cahan cuaha xaan ñiyivi, ta i cuu si tañi sa cucayu cuaha xaan yuu ta tañi nduzu tatu ñihi xaan cahan zavi. Tyehen i catyi ñu: ¡Aleyuya! Vatyi ndyaca ñaha ra ndyaca ñaha sii yo, ta iyo tandihi cuui cuhva sii maa ra Ndyoo, ta ñihi xaan ra.

⁷ Nacuzii xaan cuñi yo, ta nazacahnu xaan yo sii ra vatyi sa saa cuhva cua tindaha ra cu Mvee Ticatyi ra Ndyoo. Ta sa ndyaa listo ñiyivi cua cuu tañi ñazihii ra.

⁸ Ñoho ñu zahma vaha; ndii xaan si, ta cui si xaan si. Vatyi zahma cuan cuu tañi cuhva ndoo xaan zavaha ñiyivi sa cuu cuenda maa ra Ndyoo. Catyi ñu.

⁹ Ta ziqui i catyi ángel cuan sihin: Tyehen tyoon: “Zii xaan cuu sii ñiyivi i cana ra Ndyoo vatyi cuyucu ñu nu iyo vico tandaha ra cu Mvee Ticatyi ra.” Ta i catyi tucu ra: Ihya cuu tuhun i cahan maa ra Ndyoo sa ndisa cuui.

¹⁰ Ta ziqui i sicuiñi siti nuu ángel cuan vatyi cua zacahni sii ra, zoco i catyi ra sihin: Ma zavohon tacuan. Yuhvi cui muzu maa ra Ndyoo tañi moo ta tañi inga hermanon, tandihi ndoho ra ma zandoo sa ndisa sa i zacoto ra Jesús. Zacahnun sii ra Ndyoo. Vatyi tandihi tuhun sa cahan ra profeta, iyo si vatyi cua zacahnu si sii ra Jesús.

Minoo ra yozo sii minoo caballo cui si

¹¹ Ta ziqui i ndyehi vatyi nuña andivi, ta i ndyehi sii minoo caballo cui si. Ra sa yozo sii ti nañi ra, Ra Vaha Xaan ta Ra Ndisa Xaan vatyi ndoo xaan ndyaca ñaha ra, ta minoo cuhva vaha xaan sahñi tahan ra.

¹² Ndisi xaan i cuu siti nuu ra tañi ñuhu, ta cuaha xaan corona ñoho xiñi ra, ta ndyaa tucu zivi sii ra, zoco yoñi sito sii si; maa ñi maa ra sito.

¹³ Zahma sa ñoho ra, lehle si sihin niñi, ta zivi ra cuu Tuhun Ndyoo.

¹⁴ Tandihii zandaru maa ra Ndyoo sa iyo andivi, ndyico ra sii ra. Ñoho tandihii ra zahma vaha. Cui si, ta ndii xaan si. Ta yozo tandihii ra caballo cui si.

¹⁵ Ta ra cu nuu sii zandaru cuan, ñoho minoo espada xaan yuhu ra vatyi cua cañi ra sii ñiyivi ñuu ñiyivi sihin si. Ñihi xaan cua cundyaca ñaha ra sii ñu. Cua zañaha ra cuhva sa cuxaan xaan maa ra Ndyoo cahnu sihin ñiyivi. Tañi ra sañi ziqui yucu vixi uva sihin saha ra ta quita ndutya si, tacuan cua zandyehe ra tundoho sii ñu.

¹⁶ Ta zahma ra ta nu zihin ra ndyaa letra ta catyi si tyehen: “Rey cuu ra sii tandihii inga rey, ta ndyaca ñaha ra sii tandihii inga ra ndyaca ñaha.”

¹⁷ Ta ziqui i ndyehi vatyi nandyaa minoo ángel nu ñicandyi, ta saa xaan i cana saa ra sii tandihii zaa sa ndava andivi, ta catyi ra: Ñaha ndo. Titahan ndo vatyi ra Ndyoo cahnu cua cuhva ra sa cuxiñi ndo.

¹⁸ Cua casi ndo coño ñuhu ra cu rey ta coño ñuhu ra ndyaca ñaha sii zandaru ta coño ñuhu ra nahnu ta coño ñuhu caballo zono ra ta coño ñuhu ra yozo sii ti. Cua casi ndo

coño ñuhu sii tandihí ñiyivi, sii ra cu muzu ta sii sa yivi ra cu muzu ta sii ñiyivi ñiñi ta ñiyivi ña ñiñi.

¹⁹ Ta ziqui i ndyehi sii quití sa quiñi xaan caa cuan vatyí cu-ñin tí sihin ra cu rey ra ndyaca ñaha ñuu ñiyivi ta sihin zandaru ra. Cu-ñin tandihí ra vatyí cua cahñi tahan ra sihin ra yozo caballo cuisí cuan ta sihin zandaru ra.

²⁰ Ta ra yozo caballo cuisí cuan sihin zandaru ra, i ñin ra sii quití cuan sihin ra cahan cuendu sihin tí vatyí maa ra cuu ra i zavaha sa ndyityi ityi nuu quití cuan. Ta i zandavi ñaha ra sii tandihí ñiyivi, ñu i saha sa cundyaa marca quití cuan sii ñu, ta i zacahnu ñu sii sa i zavaha ñiyivi cuhva caa tí. Ta sa yaha i ñin zandaru ra yozo caballo cuisí cuan sii nduu tahan ra cuan, ta ziqui i tyihi ra sii ra sisi ñúhu sa cayu sihin azufre. Ndito ra cuan ta quihvi ra yucuan.

²¹ Ta tandihí ñiyivi ñoho cuenda ra, i sahñi ra yozo caballo cuisí cuan sii ñu sihin espada sa ñoho yuhu ra. Ta i sasi xaan zaa sii coño ñuhu tandihí ñu cuan, ta i ndaha xaan iñi tí.

20

Cuenda sa minoo mil cuiya

¹ Tacuan ta ziqui i ndyehi vatyí i quita minoo ángel ndya andivi ta i noo ra, ta ndaha ra ndaha ticui cuenda minoo yavi cono nu ñoho ñiyivi i zavaha sa ndya vaha ñi, ta ndaha ángel cuan minoo cadena cahnu.

² I ndyehi vatyí ñin ra sii ra dragón. Zuun ra cuu ra i cuu minoo coo ta sa naha. Cuihna cuu ra cuan, ta nañi ra Satanás. Cua cuhñi ángel cuan sii ra minoo mil cuiya.

³ Ta cua tyihi ra sii ra sisi yavi cono cuan, ta cua nacazi ra yuhu si, ta cua tyaa ra minoo zeyu yuhu si vatyí ma cuu quita ra ta ma cuu zandavi ñaha ra sii ñiyivi ñuu ñiyivi minoo mil cuiya. Tatu sa yaha sa minoo mil cuiya cuan ta ziqui cua ndasi ra zuhva ñi quivi.

⁴ Tacuan i ndyehi, ta ziqui i ndyehi tyayu nahnu nu ndyaa ra sa ñihi cuhva sa cua tyicuhva ra sii ñiyivi. Ta i ndyehi añima ñiyivi i sahndya yuu ñiyivi zucu vatyí i nacatyí ñu Tuhun Ndyoo sa cuenda ra Jesús. Maa ñu ñá zacahnu sii quití cuan, ta ñá zacahnu ñu sa i zavaha ñiyivi cuhva caa tí. Ta ñá saha ñu sa cundyaa marca tí yiqui nuu ñu ta nu ndaha ñu. Ta i ndyehi vatyí cua nandoto maa ñu, ta cua cundyaca ñaha ñu sihin ra Cristo minoo mil cuiya.

⁵ Ihya cuu ñiyivi cua nandoto sa xihna ñi. Zoco inga ñiyivi i sihi, ma nandoto ñaha ñu ndya sa yaha minoo mil cuiya cuan.

⁶ Ziñ xaan cua cuu sii ñiyivi sa cua nandoto sa xihna ñi cuan, ta ma coo cuatyí maa ñu icaña ñi. Ma cuhun ñu nu cua cayu ñúhu sa ma ndahva maa. Ta cua cuu ñu tañi ra cu zutu ityi nuu ra Ndyoo ta ra Cristo, ta cua cundyaca ñaha ñu sihin ra minoo mil cuiya.

⁷ Tatu sa yaha sa mil cuiya cuan, ta ziqui cua ndasi Satanás ta quita ra nu ñoho ndazi ra.

⁸ Cua quita ra, ta cua zandavi ñaha ra sii ñiyivi nacahnu ñuu ñiyivi. Cua zandavi ñaha ra sii ñiyivi ñuu Gog ta ñuu Magog, ta cua zatitahan ra sii zandaru ñiyivi ñuu cuan. Cuaha xaan zandaru ra cua coo, tañi ñiyiti yuhu tyañuhu.

⁹ Ta cua ndaa ra ndya minoo nduhva cahnu ndya nu yucu ñiyivi cuñi xaan sii ra Ndyoo ndya ñuu Jerusalén cu si, ta cua vico nduu ra nu yucu ñu vatyí cuñi ra cahñi ra sii ñu. Zoco cuhva cuan cua tasi ra Ndyoo ñúhu ndya andivi, ta cua cayu tandihí zandaru cuan.

¹⁰ Ta cuihna, ra cua zandavi ñaha sii ñu, cua tyihi ra Ndyoo sii ra nu cayu ñúhu sihin azufre sa ma ndahva maa nu sa ñoho quití quiñi caa cuan sihin ra i cahan cuendu sihin tí. Ta yucuan cua ndyehe tandihí uñi tahan ra cuan tundoño ñiyaca ta ndyiyaca ta tandihí cuiñ tyiemvu.

Cua cutuñi ñiyivi ityi nuu minoo tyayu cahnu ta cuisí nu ndyaa ra Ndyoo

¹¹ Ta ziqui i ndyehi sii minoo tyayu cahnu, ta cuisí xaan si, ta i ndyehi sii ra ndyaa nuu si. Ta i sino ñuhu ñuu ñiyivi ta andivi sii ra, ta cua naa si vatyí ñahñi ca nu cua cundyaca si.

¹² Ta i ndyehi vatyí nandyaa tandíhi ñiyivi i sihi ityi nuu ra Ndyoo, ñiyivi ñiñi ta ñiyivi ña ñiñi. Ta cua nuña ra Ndyoo libro ra sa nacatyí cuhva i zavaha ñu, ta cua nuña tucu ra inga libro nu ndyaa zivi ñiyivi cua cundito tandíhi cui tyiemvu sihin ra Ndyoo. Ta cua zandaa ra Ndyoo tyiño ñiyivi i sihi sa cuenda cuhva i zavaha ñu, cuhva catyi si nu libro cuan.

¹³ Ta ndiyi sa ñoho sisi tyañuhu cua naquita ñu ta tacuan tucu ñu ñoho sisi ñuhu a inga nu yucu ndiyi, ta cua zandaa ra Ndyoo tyiño sii sa minoo minoo ñu, cuhva i zavaha ñu.

¹⁴ Ta ziqui ma cuu ca cuu ñiyivi, zoco ndito ñu ta quihi ñu sisi ñúhu sa ma ndahva maa. Ihya cuu sa cu uu tuhun sihi sii ñu, zoco yivi sa ndaha cua cuu ñu. Cuenda cua cayu ñi ñu.

¹⁵ Tatu ña ndyaa zivi ñiyivi nu libro sa cumi ra Ndyoo sa cuenda ñiyivi cua cundito tandíhi cui tyiemvu, cua tyihi ra sii ñu sisi ñúhu cuan.

21

Cua coo minoo andívi saa ta minoo ñuu ñiyivi saa

¹ Yaha cuan ta ziqui i ndyehi sii minoo andívi saa ta minoo ñuu ñiyivi saa vatyí sa i naa ñuu ñiyivi sa sicoo sa xihna ñi. Ta ñahñi ca tyañuhu cua coo.

² Ta yuhvi ra Juan i ndyehi sii minoo ñuu ii, ñuu Jerusalén saa cuu si, ta i quita si andívi nu ndyaa ra Ndyoo, ta i noo si. Tyaqui xaan i cuu si vatyí sa ndyaa listo si tañi minoo ñaha sa cua tandaha, tyaqui xaan ña.

³ Ta i siñi vatyí saa xaan cahan minoo ra sisi gloria nu ndyaa tyayu maa ra Ndyoo, ta catyi ra: Ndyehi vatyí vityí ndyaa maa ra Ndyoo sihin ñiyivi. ñiñi ñi cua cuyucu ñu sihin ra. Maa ñu cua cuu ñiyivi ra, ta maa ra cua cuu Ndyoo ñu.

⁴ Cua zanaa ra tandíhi cui sa cuihya iñi ñu, ta ma cuu ca ñu. Ma nducuihya ca iñi ñu. Ma vacu ca ñu, ta ñahñi ca tundoho a sa uhu cua coo sii ñu vatyí cuhva i cuu ityi sata, sa i yaha si cuan.

⁵ Ta ziqui i catyi tucu ra ndyaa nu tyayu cahnu: Ndyehi vatyí tandíhi sa iyo ta vityí zandusei sii si. Ta i catyi tucu ra: Tyaa, vatyí ndisa xaan cuu tuhun ya, ta cuu cuní xaan iñun sii si.

⁶ Ta ziqui i catyi ra sihin: Sa cuu tandíhi si vityí. Yuhvi cuu ra sa iyo nu quisaha tandíhi, ta cua cundite tandíhi cui maa tyiemvu. Yucuan cuenda cui tañi letra A ta tañi letra Z. Tatu ityi ndo cua cuhva mi sa caha ñi ndutyá coho ndo, ta cua cundito ndo tandíhi cui tyiemvu.

⁷ Tatu zahacanaa ndo sii cuihna, cua ñihi ndo tandíhi sa vaha ya. Yuhvi cua cui ra Ndyoo ra zacahnu ndo, ta maa ndo cua cuu zehe ndiyi.

⁸ Zoco ñiyivi yuhu xaan ta ñiyivi ña sino iñi ta ñiyivi quiñi xaan iyo ta ñiyivi sahñi sii ñiyivi ta ra quixi sihin ñaha sa yivi ñazíhi ra cuu a ñu quixi sihin rayí sa yivi yí ñu cuu ta ñiyivi zatazi ta ñiyivi zacahnu sii ndyoo yutu ta tandíhi ñiyivi vatyá, cua cuhun tandíhi ñu cuan nu cayu ñúhu sihin azufre sa ma ndahva maa. Ihya cuu sa cu uu saha cua cuu ñu.

Cuhva cua cuu ñuu Jerusalén saa

⁹ Tacuan ta ziqui i saa minoo sa usa tahan ángel sa i sindaha coho xuhun cuan sa siñoho tundoho cua ndyehi ñiyivi ñuu ñiyivi, ta i catyi ángel cuan sihin: Ñaha ta cua zañehi suun sii ñaha sa cua tindaha sihin ra cu Mvee Tícatyi. Catyi ra.

¹⁰ Ta sisi sa i ndyehi sa sindyaca ra sii, ndya xiñi minoo yucu cahnu xaan ta zucu xaan, ta i zañaha ra ñuu Jerusalén sii. Cahnu xaan ta ii xaan si, ta i quita si ndya andívi ndya nu ndyaa maa ra Ndyoo.

¹¹ Ndisi xaan ñuu cuan tañi sa ndisi maa ra Ndyoo ta tañi minoo yuu vaha xaan sa nañi jaspe. Ta xiño si tañi minoo ino.

¹² Siconduu ñuu cuan i ndyehi vatyí ndyaa minoo nuzama cahnu ta zucu. Ta iyo usi uu tahan yuvehe si. Nandyaa minoo ángel tahan tahan yuvehe. Ta minoo minoo yuvehe ndyaa zivi sa minoo minoo sa usi uu tahan ityi ñiyivi hebreo.

¹³ Ityi caña ñicandyi ndyaa uñi tahan yuvehe nuzama cuan, ta uñi tahan tucu ityi yucu, ta uñi tahan ityi tyañuhu, ta uñi tahan ityi cua iñi.

¹⁴ Nu cimientu nuzama cuan yozo usi uu tahan yuu nahnu, ta tahan tahan si ndyaa zivi minoo sa usi uu tahan ra i cuu apóstol ra cu Mvee Ticatyi.

¹⁵ Ra ángel ra cahan sihin, ndaha ra minoo tuñi xuhun cuaan vatyí cua tyicuhva ra ñuu cuan sihin yuvehe si ta nuzama si.

¹⁶ Cumi tahan siqui ñuu cuan, ta inuu cuii ñi caa tandihi cumi tahan si. I tyicuhva ángel cuan ñuu cuan sihin tuñi ra ta cuu si uu mil uu ziendu kilómetro ñin ñin siqui si, ta tacuan tucu sa zucu si.

¹⁷ Ta i tyicuhva tucu ra nuzama si, ta cuu si uñi xico cumi metro sa quehen si. I tyicuhva ángel cuan tañi tyicuhva ñiyivi.

¹⁸ Nuzama cuan cuu si yuu vaha sa nañi jaspe, ta ñuu cuan maa ñi xuhun cuaan cuu si, ta xiño xaan si tañi ino vaha.

¹⁹ Usi uu tahan toto nuzama cuan. Maa maa yuu vaha cuu si, ta ñoho inga yuu vaha ticui si. Sa xihna ñi yuu yozo toto cuu si yuu sa nañi jaspe. Sa cu uu cuu zafiro. Sa cu uñi cuu ágata. Sa cu cumi cuu esmeralda.

²⁰ Sa cu ohon cuu ónice. Sa cu iñu cuu cornalina. Sa cu usa cuu crisólito. Sa cu uña cuu berilo. Sa cu ñin cuu topacio. Sa cu usi cuu crisoprasa. Sa cu usi ñin cuu jacinto. Ta sa cu usi uu cuu amatista. (Ziñ ziñ tyacu tahan tahan yuu vaha cuan.)

²¹ Sa usi uu tahan yuvehe ñuu cuan, maa ñi perla cuu si. Minoo perla cahnu xaan cuu ñin ñin yuvehe. Ta calle cahnu ñuu cuan xuhun cuaan vaha xaan cuu si, ta xiño xaan si tañi ino.

²² Ñahñi vehe ñuhu i ndyehi ñuu cuan. Ndyaa maa ra Ndyoo Cahnu ra ndyaca ñaha sii yo ta ra cu Mvee Ticatyi, ta zacahnu ñiyivi sii maa ra, ta ña cuñi si minoo vehe.

²³ Ta ñahñi ñicandyi ta ñahñi yoo zandisi sii ñuu cuan vatyí ndisi xaan maa ra Ndyoo ta ndisi xaan ra cu Mvee Ticatyi, ta sa nduu tahan maa ra saha sa ndisi yucuan.

²⁴ Sa ndisi sii ñuu cuan, cua zandisi si nacahnu ñuu ñiyivi. Ta ra rey ra ndyaca ñaha ñuu ñiyivi, cua cundyaca ra sa vaha sa iyo sii ra ndya ñuu cuan.

²⁵ Ma cundazi yuvehe nuzama ñuu cuan ndyaca. Ta ma coo sa sa cuaa yucuan.

²⁶ Ta tandihi sa cuca ta sa vaha sa iyo sii ñiyivi ñuu ñiyivi, cua cundyaca ñu ndya ñuu cuan, ta ñuu cuan cua cundyaca ñaha sii tandihi cuii sa iyo.

²⁷ Ñiyivi sa ndyaa zivi nu libro ra cu Mvee Ticatyi vatyí cua cundito ñu tandihi cuii tyiemvu, yucuan ñu cuu ñu cua quihvi yucuan, zoco ma cuu quihvi cuatyí ndaha cuii ñi a ñiyivi vatya a ñu zacahnu sii inga ndyoo.

22

¹ Ta ziqui i zañaha ángel cuan minoo yuu cuii xaan sii. Ndyuta sa saha sa cundito ñiyivi tandihi cuii tyiemvu cuu si, ta quita si nu ndyaa tyayu cahnu maa ra Ndyoo ta ra cu Mvee Ticatyi.

² Mahñu calle cahnu ñuu cuan, ta nduu siyo yu yuu iyo yutu sa cua cuhva sa cundito ñiyivi tandihi cuii tyiemvu. Tahan tahan yoo ziñ ziñ nuu yucu vixi cua cuhva tu. Cua cuhva tu yucu vixi usi uu saha sa minoo cuiya. Ta ndaha tu cua cuu tata sa cua zanduvaha sii ñiyivi.

³ Ñuu cuan, ñahñi maa sa ña vaha cua coo vatyí maa ra Ndyoo cua cundyaa ñuu cuan sihin ra cu Mvee Ticatyi. Ta yucuan cua zacahnu ñiyivi ra sii ra.

⁴ Cua ndyehi ñiyivi nuu ra, ta cua cundyaa zivi ra yiqui nuu ñu.

⁵ Ñahñi sa cuaa cua coo ñuu cuan. Ta ñiyivi sa yucu yucuan, ma cuñi si sa coo lámpara sii ñu, ta ñahñi ñicandyi cua coo vatyí maa ra Ndyoo ra ndyaca ñaha sii yo cua zandundisi ra yucuan, ta cua cundyaca ñaha ñu sihin ra.

Sa cuñi quisi ra Jesucristo

⁶ Ta ziqui i catyi ángel cuan sihin: Sa ndisa cuii cuu tuhun ya, ta cunñi xaan iñun sii si. Maa ra Ndyoo ra ndyaca ñaha sii yo cuu ra i cahan sihin ra profeta ta sa naha. Ta vityi i tasi ra sii ángel ra vatyí cua zañaha ra sii muzu ra tandihi sa vatyí xaan cua cuu.

⁷ ¡Sa cuñi quisi! Catyi ra. Ziñ xaan cuu sii ñiyivi tyaa yahvi cuhva catyi si nuu libro ya.

⁸ Yuhvi ra Juan cuu ra i siñi ta i ndyehi tandiñi sa tyei ihya. Ta sa yaha siñi sii si ta ndyehi sii si, ta ziqui i sicuiñi siti ityi nuu ángel sa i zañaha sii, vatyi cua zacahni sii ra.

⁹ Zoco i catyi maa ra sihin: Ma zavohon tacuan vatyi yuhvi cui minoo muzu ra Ndyoo tañi moo ta tañi inga hermanos, tandiñi ra profeta ta tandiñi ñiyivi cua tyaa yahvi cuhva catyi si nuu libro ya. ñn ñi sii ra Ndyoo zacahnun.

¹⁰ Ta ziqui i catyi tucu ra sihin: Ma cucumi xehun tuhun sa zacoto ra Ndyoo nuu libro ya vatyi sa cua saa cuhva catyi si.

¹¹ Ñiñi sa cumañi ca tahan si, nazavaha ca ñiyivi ña vaha sa ña vaha, ta ñiyivi zavaha xaan cuaty, nazavaha ca ñu cuaty. Zoco ñiyivi ndoo iyo, nazavaha ca ñu sa ndoo, ta ñiyivi vaha sa ndisa cuii, nazavaha ca ñu sa vaha xaan.

¹² Ndisa, sa cuñi quisi, catyi maa ra Ndyoo. Ta cuize sa cua cuhve sii sa minoo minoo ñiyivi sa cuenda cuhva i zavaha ñu.

¹³ Yuhvi cuu ra sa iyo nu quisaha tandiñi, ta cua cundite tandiñi cuii maa tyiemvu. Yucuan cuenda cui tañi letra A ta tañi letra Z.

¹⁴ Ziñ xaan cua cuu sii ñiyivi cua ndoo zahma vatyi cua cuu quihvi ñu yuvehe ñuu cuan, ta cua cuu casi ñu yucu vixi sa iñi nu yutu sa cua cuhva sa cundito ñu tandiñi cuii tyiemvu.

¹⁵ Zoco ñiyivi zavaha sa ña vaha cua nandoo ñu ityi sata tañi ñiyivi zavaha ndya vaha ñi ta ñiyivi zatazi ta ra quixi sihin minoo ñaha sa yivi ñazihi ra cuu, ta ñiyivi sahñi sii ñiyivi, ta ñiyivi zacahnu ndyoo yutu a zandu, ta tandiñi ñiyivi tahan xaan iñi cuvaty.

¹⁶ Yuhvi ra Jesús sa tasi sii ángel mi vatyi cua zacoto ra sii tandiñi ra hermano tandiñi tuhun ya. Yuhvi cui ñiyivi sahnun sii ra rey David, ta cuu tucu ra ñiyivi sahnun sii mi. Ta cui minoo tiño ndisi xaan sa quita sa ñaa ca tatu sa vasi cundisi.

¹⁷ Ta Taty i maa ra Ndyoo ta ñiyivi cuu tañi ñazihi ra cu Mvee Ticaty, catyi ñu sihin ra: ¡Ñaha! Ta tacuan tucu catyi tandiñi ndo sa siñi tuhun ya. ¡Ñaha! catyi ndo sihin ra. Ta tatu iyo ra ityi xaan naquisi ra nu ndyei ta naco ho ra nduty sa sehi sa caha ñi sa cua cuhva sa cundito ñiyivi tandiñi cuii tyiemvu.

¹⁸ Ta tyehen nacaty sihin tandiñi ñiyivi tyizoho Tuhun Ndyoo sa ndyaa nu libro ya vatyi tatu iyo ra natyih zuhva ca tuhun sihin si, cua zandyehe ra Ndyoo sii ra tandiñi cuii nuu tundoho sa cahan si nuu libro ya.

¹⁹ A tatu iyo ra cua tava zuhva sa catyi Tuhun Ndyoo nuu libro ya, cua tava ra Ndyoo zivi ra nuu libro sa nacaty yoo sa cua cundito tandiñi cuii tyiemvu, ta ma cuu cuhun ra ñuu vaha xaan cuan, ta ma ñihi ra tandiñi sa vaha sa nacaty libro ya.

²⁰ Ta ra sa nacaty tandiñi tuhun ya, catyi ra: Ndisa vatyi sa cuñi quisi. Ta catyi yuhvi ra Juan: Vaha xaan. ¡Ñaha! yoho ra Jesús ra ndyaca ñaha sii ndi!

²¹ Ta nacuhva xaan ra Jesucristo ra ndyaca ñaha sii yo tandiñi nuu sa vaha sii tandiñi cuii ndo. Ta nacuu si tacuan, ta nacuu si sa ndisa.